



## დათვი, მელა და მგელი

დათვი, მგელი და მელა დაძმობილდნენ და წავიდნენ აჭმლის საშოვნელად. ნახირს ერთი მსუქანი ფური ჩამორუნოდა, ძმობილებმა უპატრონო ფური დაიმარტოხელეს, მთ უღრან-უდაბურ ადგილზე შეიმწვევიეს და გაჟატრეს. ასხდნენ და დაიწყეს ბჭობა, როგორ გაეყოთო. მელამ ქვა:

— მოდით, ვინც ჩვენში ყველაზე ხნირი იყოს, ეს ძროხასულ იმას დარჩესო. — და პირველმა თვითონვე დაიქო: — მე იმ ხნისა ვარ, როცა ცა და დედამიწა გაჩნდა და ყვეანაზე ჩემს მეტი სულიერი არ არსებობდათუ

— მართლაც ძალიან ხნირი ყოფილხარო, — მოუწონა ათვამ და მგელს ჰკითხა: — აბა, შენ როდინდელიდა ხარო?

მგელმა თქვა:

— ცა და ქვეყანა რომ გაჩნდა, პირველი შვილი სწორედ შენ მომიკვდაო.

ჯერო დათვზე მიდგა, ბიძამ ცერად შეხვდა ორივეს და ქვა:

— მე ჯერ ორი წლისაც არა ვარ, მაგრამ, თუ კარგი ბიჭობი ხართ, მიდით და ამ ძროხას პირი დააკარეთო.

სწორედ ამაზეა ნათქვამი, — ძალა აღმართსა ხნავსო, ხსდგა დათვი ძროხას და მგელსა და მელას ერთი ჩიჩქიც წაუწილადა.

ჭირი — იქა, ლხინი — აქა,

ქატო — იქა, ფქვილი — აქა.



## კატა და ვეფხვი

ერთხელ სოფლის განაპირას ერთი გლეხი წანას წნავდა. გლეხს კატაც თან წამოჰყოლოდა და ცყის პირას ჩიტებსა და კალღებსე ნადირობდა. უცბად ცყიდან ვეფხვი გამოვარდა, დაინახა კატა და გაკვირვებულმა ჰკითხა:

— შენ, ძამიავ, როგორც ვაცყობ, ჩემი მოდგმისა უნდა იყო და რა უბედურება დაგმართია, რომ ასე დაპატარავებულსარო?

— ეჰ, ძმაო, — უთხრა კატამ, — შენ რომ ჩემს ბატონს იცნობდე, მაგას აღარ შემეკითხებოდიო.

— მე რე და, ვინ არის შენი ბატონიო?

— აღამიანიო.

— აბა, ერთი დამანახვე და შენი დაჩაგვრისათვის სამაგიეროს მე გადაუხდიო, — დაიღრინა ვეფხვმა.

— არ გირჩევ, — უთხრა კატამ, — მოგერევაო.

მაგრამ ვეფხვმა არ დაიშალა და კატაც გაუძღვა, მიიყვანა თავის პატრონთან და უთხრა: — აი, ეს არის ჩემი ბატონიო.

ვეფხვი გადაუდგა გუთნეულს წინ და კაცს შეუტია:

— შენ, ეი, აღამიანი ხარ, თუ ვილაც თხერი, ეს ჩემი მოდგმა-ჯილაგი ასე რატომ დაგიჩაგრავს, ან პასუხი აგე, ახ შემებრძოლოო.

— კარგი, ვიბრძოლოთო, — უპასუხა გლეხმა, — მაგრამ მე ღონე შინ დავტოვე, წავალ, მოვიტან და ბატონი ბრძანდებაო.

ვეფხვი დათანხმდა, — ოღონდ ჩქარა მოდი, ბრ დაიგვიპნო, — გააფრთხილა.

გლესმა უთხრა:

— მეშინია, ვაითუ შეგეშინდეს, ჩემს მოსვლამდე ტყეში გაიქცე და სოფელში ჩასვლა-ამოსვლამ ტყუილად ჩამიაროს. მოდი, ასე ვქნათ, რომ არ გამექცე, ამ ხეზე თოკით მივაგაბამ, ამოვიტან ჩემს ღონეს, ისევ აგიშვებ და ვიბრძოლოთ.

ვეფხვი ამაზეც დათანხმდა, გლესმა გუთნეულს საყვერის ჯამბარა ახსნა და ვეფხვი ხეზე მიაკრა. თვითონ ისევ ტყეში შევიდა, მოსჭრა ჯაგრცხილის ხორკლიანი სახრე, გამოიტანა და გადაუჭირა და გადაუჭირა ვეფხვს, — აი, ჩემი ძალა და ღონეო!

ვეფხვი ტკივილისაგან სულ მალლა-მალლა ხტოდა და შესაბრალისად ღმუოდა, მაგრამ გლესი შეუბრალებლად ურტყამდა. ბოლოს მთლიანად რომ მიასავათა, აუშვა და უთხრა:

— არა მკითხე მოამბეო, მიტყიპე და მიაგდეო წადი და ჭმის შემდეგ იცოდე, სადაც არ გეკითხებოდნენ, იქ ნუ წაიჩხირებო.

ნაცემ-ნაბეგვი ვეფხვი ლასლასით გაუდგა გზას და კატას მიაძახა:

— ბარაქალა, ძმაო, შენს ვაჟეაცობას, რომ ასეთი ბატონის ხელში ეგ ტანიც შეგრჩენიაო.

ჭირი — იქა, ლხინი — აქა,

ქატო — იქა, ფქვილი — აქა.





## გ ვ რ ი ტ ი

იყო და არა იყო რა, იყო ერთი გვრიტი, ცხოვრობდა თავისთვის ერთ სეზე, იდგამდა ბუდეს, ჩეკდა ბარტყებს და მზრუნველადაც უვლიდა, — ადრე დილიდან მზის ჩასვლამდე ფრთებჩაშუკრუფლად დაფრინავდა და შვილებს საზრდოს უზიდავდა. საღამოობით დაღლილ-დაქანცული, მაგრამ ბედნიერი, ჩამოჯდებოდა ბუდის გვერდით და მიდამოს ნელი გვრინით ატკობდა.

ერთხელაც ბარტყებისათვის საჭმლის საშოვნელად შორს მოუხდა გაფრენა და ბუდეს დიდი ხნით მოშორდა. ერთმა გლესმა ამით ისარგებლა, ამოსხა ბუდოდან გვრიტის პაწაწინა ბარტყები და შინ წაიყვანა.

დაბრუნდა გვრიტი შორეული მოგზაურობიდან და საზრდოც — ჭიაღუა და მსუქანი მატლები — ბლომად მოიტანა; მაგრამ სადღა არიან ბარტყები? — ბუდე ცარიელი დახვდა. დაღონდა გვრიტი, ბუდის გვერდით ფრთებჩანოყრილი ჩამოჯდა და მწარედ ატირდა.

ტირილით რომ გული მოიოხსა, ადგა და შვილების საძებნელად წავიდა. ცოტა გზა რომ გაიარა, წინ მამალი შემოხვდა და ჰკითხსა:

— გვრიტო, გვრიტო, სად მიდისარო?

— შვილების საძებნელადო.

— მოდი, მეც შენი მშველელი ვიქნებო.

— ძალიან კარგიო, — უთხრა გვრიტმა, — მშველელი და ამხანაგი კაცს სწორედ გაჭირვების ეამს უნდაო, — და გაიყოლა.

წავიდნენ ორნი. წინ გვრიტი მიდის, უკან მამალი. იარეს, იარეს და წინ მახათი შემოეყარათ.

— გვრიტო, გვრიტო, საით გაგიწევიაო? — ჰკითხა მამათმა.

— შვილების საძებნელადო.

— ეგ მამალი რაღად მოგდევსო?

— ჩემ საშველად მოდისო.

— მაშ მეც შენი მშველელი ვიქნებიო.

— ძალიან კარგიო, — მიუგო გვრიტმა.

შეუერთდა მახათიც და გაუდგნენ გზას სამნი. წინ გვრიტი მიდის, უკან მახათი და მამალი მისდევენ, იარეს, იარეს და ახლა ფილთაქვა შემოსვდათ.

— გვრიტო, გვრიტო, საით გაგიწევიაო? — ჰკითხა ფილთაქვამ.

— შვილების საძებნელადო.

— ეგ მახათი და მამალი რაღად მოგდევნენო?

— ჩემ საშველად მოდიანო.

— მაშ მეც შენი მშველელი ვიქნებიო.

— ძალიან კარგიო.

შეუერთდა ფილთაქვაც და წავიდნენ ოთხნი. წინ გვრიტი მიდის, უკან მამალი, მახათი და ფილთაქვა მისდევენ. იარეს, იარეს და ახლა ვირი შემოსვდათ.

— გვრიტო, გვრიტო, საით მიდიხარო? — ჰკითხა ვირმაც.

— შვილების საძებნელადო.

— ეგ მამალი, მახათი და ფილთაქვა რაღად მოგდევნენო?

— ჩემ საშველად მოდიანო.

— მაშ, მეც შენი მშველელი ვიქნებიო.

— ძალიან კარგიო.

შეუერთდა ვირიც და წავიდნენ ხუთნი. შუალამისას ერთ სოფელში შევიდნენ, დაუბდეს ყური და ერთი სახლიდან ბატარა გვრიტების ღულუნი გაიგონეს. მივიდნენ სახლთან, შევიდნენ ეზოში და სარმრად მოემზადნენ: ვირი სახლის კარებთან აიტყუზა, მახათი ჭუჭრუტანიდან შეძვრა და ბუხრის პირას დაერჭო. გვრიტი, მამალი და ფილთაქვა ერდო-

დან ჩავიდნენ. მამალი ბუსრის თავზე შემოიჯდა, ფილთაქვა ნაღვერდალში ჩაეფლო, ხოლო გვრიტი გალიასთან მიფრინდა და ბარტყების გამოსსნას შეუდგა.

ღედის დანახვაზე ბარტყებმა ერთი ჭყიპინი და კრუმ-კრუში ატეხეს. სმაურზე კაცს გამოეღვიძა, წამოვარდა ლოგინიდან და, რომ გაეგო, სიბნელეში რა ხდებოდა, ბუსართან ცეცხლის ასანთებად მივიდა. გაჩსრიკა თუ არა ნაღვერდალი, ფილთაქვა გასკდა და ნაცარი თვალეში შეეყარა. კაცი შეშინდა, უკან დაიწია და ბარძაყში ახლა მახათი შეერჭო. ამ დროს მალლიდან მამალმაც დაჰყვივლა. კაცს შეუწინდა და გულგახეთქილი გარეთ გავარდა. კარებთან ვირი დახვდა და გვერდებში ისეთი წიხლები უტყუბა, რომ სამი ყირა გადაატარა.

ამასობაში გვრიტმა გალია გახსნა, გამოიყვანა თავისი ბარტყები, შეისხა ფრთებზე და გახარებულმა ბუდისაკენ გააფრინა.

ჭირი — იქა, ლხინი — აქა,

ქატო — იქა, ფქვილი — აქა.





## თხა და ვენახი

მოდით, ვნახო ვენახი,  
რამ შეჭამა ვენახი?  
მიველ, ვნახე ვენახი,  
თხამ შეჭამა ვენახი.

მოდით, ვნახო თხა,  
რამ შეჭამა თხა?  
მიველ, ვნახე თხა,  
მგელმა ჭამა თხა.

მგელმა — თხა,  
თხამ ვენახი შეჭამა.

მოდით, ვნახო მგელი,  
რამ შეჭამა მგელი?  
მიველ, ვნახე მგელი,  
თოფმა ჭამა მგელი.

თოფმა — მგელი,  
მგელმა — თხა,  
თხამ ვენახი შეჭამა.

მოდით, ვნახო თოფი,  
რამ შეჭამა თოფი?  
მიველ, ვნახე თოფი,  
ქანგმა ჭამა თოფი.

ქანგმა — თოფი,  
თოფმა — მგელი,

მგელმა — თხა,  
თხამ ვენახი შეჭამა.

მოდო, ვნახო ჟანგი,  
რამ შეჭამა ჟანგი?  
მიველ, ვნახე ჟანგი,  
მიწამ ჭამა ჟანგი.

მიწამ — ჟანგი,  
ჟანგმა — თოფი,  
თოფმა — მგელი,  
მგელმა — თხა,  
თხამ ვენახი შეჭამა:

მოდო, ვნახო მიწა,  
რამ შეჭამა მიწა?  
მიველ, ვნახე მიწა,  
თაგვმა ჭამა მიწა.

თაგვმა — მიწა,  
მიწამ — ჟანგი,  
ჟანგმა — თოფი,  
თოფმა — მგელი,  
მგელმა — თხა,  
თხამ ვენახი შეჭამა.

მოდო, ვნახო თაგვი,  
რამ შეჭამა თაგვი?  
მიველ ვნახე თაგვი,  
კატამ ჭამა თაგვი.

კატამ — თაგვი,  
თაგვმა — მიწა,  
მიწამ — ჟანგი,  
ჟანგმა — თოფი,  
თოფმა — მგელი,  
მგელმა — თხა,  
თხამ ვენახი შეჭამა:





## მ ე მ ო ბ რ ო ბ ა

იყო და არა იყო რა, ღვთის უკეთესი რა იქნებოდა, ერთ სახელმწიფოში ერთი უშიშარი და ალაღ-მართალი: კაცი ცხოვრობდა. მუდამ სიალალმართლეს ედგა და, თუ საქმე საქმეზე მიდგებოდა, თავის სიმართლეს ხელმწიფესაც არ დაუთმოდა; ამის გამო ხელმწიფეს ძალიან სძულდა და სულ კრიჭაში ედგა. ხომ იცით, რომ ხელმწიფეებს სიმართლისმოყვარული კაცი არ მოსწონთ. ჰოდა, ეს ხელმწიფეც სულ იმის ცდაში იყო, როგორმე თავიდან მოეშორებინა, სხვა რომ ვერაფერი მოუხერხა, ბოლოს ქვეყნის დალატი დასწამა და ციხეში ჩასვა.

მართალი კაცი არც ციხეს დამორჩილდა, გამოანგრია კედელი და გაიქცა. გავიდა ტყეში, იარა, იარა და ერთ უღრან ხევში გამოქვაბულში დაბინავდა. დაღლილ-დაქანცული მხართეძოზე წამოწვა და დაეძინა.

უცბად რაღაც ხმაურმა გამოაღვიძა. კაცმა გაახილა თვალები და შემოსასვლელში ერთი უზარმაზარი აღრენილი ლომი დაინახა. კაცი ჯერ შეკრთა, მერე გული გაიმაგრა, — აღბათ ეს იყო ჩემი ბედისწერაო, — თქვა და ლომის დასახედრად მოემზადა — ხანჯლის ტარი ჩაბღუჯა და ფეხზე წამოდგა. მაგრამ ლომი არ შებრძოლებია. ნელა, კოჭლობით მიუახლოვდა, წინა თათი გაუწოდა და თვალები მუდართით შეაშტერა.

კაცი მიხვდა, რომ ლომს რაღაც უჭირდა, ხანჯალი ჩააგო და ფეხი გაუსინჯა. მართლაც, ლომს ტერფში მოზრდილი ეკალი შერჭობოდა და დასჩირქებოდა. კაცმა გამოუღო

ეკალი, გამოურწყა ჩირქი, მრავალძარღვას ფოთოლი დაადო და თავისი პერანგის ნახევით შეუსვია. ლომმა კაცს მადლობით შეხედა და გამოქვაბულის კუთხეში თვინიერად დაწვა.

ლომს ფეხი მალე მოურჩა. გამოვიდა გამოქვაბულიდან და სანადიროდ წავიდა. საღამო ხანს დაბრუნდა და თან ერთი ხარირეში მოიტანა. კაცმა ცეცხლი დაანთო და მწვადები შეიწვა, ლომი კი უმ სორცსაც გემრიელად შეექცა.

ასე დამეგობრდნენ ლომი და კაცი და ერთმანეთი ძალიანაც შეუყვარდათ. იმ ზამთარს კაცი გამოქვაბულიდან არ გამოსულა, მაგრამ საზრდოდ ცვრიანი სორცი არ მოჰკლებია.

გაზაფხულზე მონადირეებმა ლომი მახეში გააბეს, ცოცხლად შეიპყრეს და საჩუქრად ხელმწიფეს მიჰგვარეს. ხელმწიფემ ააშენებინა მოზრდილი. გალია, ლომი ამ გალიაში ჩასვა და თავშესაქცევად სტუმრებს აჩვენებდა.

რაკი ლომი აღარ დაბრუნდა, კაცმაც მიატოვა გამოქვაბული და სხვა სახელმწიფოში გადავიდა. იქ ერთ თავისავით ალაღ-მართალ ოჯახს ჩაუსიძევდა და დაიწყო მშვიდი და ბედნიერი ცხოვრება.

გავიდა ხუთი წელიწადი. გაიგო ხელმწიფემ მართალი კაცის ადგილსამყოფელი და იმ ქვეყნის ხელმწიფეს ვეზირი გაუგზავნა, — ეგ კაცი დიდი დამნაშავეა, ციხიდან გამექცა და დამიბრუნე. სასტიკად უნდა დაესაჯო.

ნათქვამია, ძაღლი ძაღლის ტყავს არ დახვესო, ხელმწიფემ დაუყოვნებლივ აასრულა ხელმწიფის მოთხოვნა, კაცი თავის ჩაფრებს დააჭერიდა და ხელფეხშეკრული გაუგზავნა.

ხელმწიფემ, რაკი ურჩი კაცი ისევ ხელში ჩაიგდო, დიდად გაიხარა და კაცის საგანგებო დასჯა გადაწყვიტა. მოიწვია მთელი სახელმწიფო, რომ დასჯისათვის ეყურებინათ და ურჩობა ველარავის გაებედა.

მოვიდა და მოვიდა ხალხი, სასახლის მთელი ეზო მაყურებლებით გაიჭედა, გამოიყვანეს ხელფეხშეკრული ტუსადი და ხელმწიფეს წარუდგინეს.

— ჰა, ხომ ჩამივარდი ხელში? — ნიშნისმოგებით უთხრა ხელმწიფემ, — არ იცოდი, რომ ხელმწიფის ძალა უსაზღვროა და ვერსად გაექცეოდით? — და ჯალათებს უბრძანა:—

გაუხსენით ხელ-ფეხი და ჩემს ლომს შეუგდეთ გალიაშიო! გაუხსნეს ჯვალათებმა ბორკილები და გალიაში შეაგდეს. ლომი ბოროტად აიფოფრა, მაგრამ შეხვდა თუ არა კაცს, მაშინვე დაცხრა, ნელა მიუახლოვდა და თავი კალთაში ჩაუდო. ყველა განცვიფრდა: მაყურებელი, სალხიც და ხელნწიფეც, მაგრამ ლომის საქციელი ვერაფერს ახსნა. სელმწიფემ გამოაყვანიდა ტუსადი და ჰკითხა, — რა მიზეზია, რომ ლომმა პირი არ დაგაკარაო?

კაცმა უამბო ლომისა და თავისი მეგობრობის ამბავი, ხელნწიფეს მოეწონა ლომის ერთგულებას და ორივენი გაათავისუფლა. — ოღონდ ჩემს ქვეყანაში არ ზაიჭაჭანოთ, თორემ სიკვდილი მოგელითო, — უთხრა კაცს.

— შენი ქვეყნიდან აქამდეც წასული ვიყავი და ახლაც ნით უფრო არ განჩერდებოთ, — მიუგო კაცმა, გადახვია ლომს ხელი და გაუღგნნ გზას ორივენი.

ჭირი — იქა, ლხინი — აქა.

ქაჭო — იქა, ფქვილი — აქა.





## ჩიტი და მელია

იყო და არა იყო რა, ღვთის უკეთესი რა იქნებოდა, იყო ერთი ჩიტი-ჩიორა. გაზაფხული რომ დადგა, სხვა ჩიტების მსგავსად, ჩიორამაც ერთი ხშირტოტიანი ხე მონახა და მოხერხებულ ადგილას ბუდე ჩადგა. ჩაჯდა შიგ, სამი კვერცხი დადო და სამი კვირის თავზე პატარა ჩიორები გამოჩეკა, როგორც ყველა დედა, ჩიორაც თავს ევლებოდა თავის შვილებს, დაჰხაროდა, დასჭიკჭიკებდა, უზიდავდა პეპლებს, ბუზებს, ჭია-მატლებს, აჭმევდა და ზრდიდა.

ერთ კვირაში ბარტყებს შიშველი ტანი ჭრელი და რბილი ბუმბულით შეემოსათ. დედა-ჩიორა უფრო გახალისდა, მალე ფრთებიც წამოეზრდებათ ჩემს პაწიებს და ბედნიერად დავაფრენო, ფიქრობდა გულში და ღმერთს მადლობას სწირავდა, რომ მისი შვილები უხიფათოდ იზრდებოდნენ. მაგრამ ნიხარული მალე მწუხარებად შეეცვალა: ერთმა წყეულმა მამელამ ბუდეს მიაგნო, ხის ძირას კუდზე დაყუნცდა და ჩიორას ასძახა:

— ჩიტო, ჩიტო, ჩიორაო!

— რაო, ბატონო მელაო? — ჩამოსძახა ჩიორამ.

— ერთი შვილი გადმომიგდე,

თორემ შავ ღღეს დაგაყენებ:

ცულს მოვიტან ცუნცულასა,

ხელეროს და წალღუნასა,

ხესაც მოვჭრი, ხის ძირსაცა,

შენც შეგჭამ და შენს შვილსაცა.

შეეშინდა საცოდავ ჩიორას და ერთი ზარტყი გადმოუგდო. მელამ დააელო ბარტყს პირი, იქვე, ბურქებში შეაცუნცულა და თაფუფხიანად გადასანსლა. ისევ უკან დაბრუნდა, დაყუნცდა ხის ძირას და ჩიორას ასძახა:

— ჩიტო, ჩიტო, ჩიორაო!  
— რაო, ბატონო მელაო?  
— ერთი შვილი გადმომიგდე,  
თორემ შავ დღეს დაგაყენებ:  
ცულს მოვიტან ცუნცულასა,  
ხელეროს და წალდუნასა,  
ხესაც მოვჭრი, ხის ძირსაცა,  
შენც შეგჭამ და შენს შვილსაცა.

ისევ შეეშინდა საცოდავ ჩიორას, იფიქრა, იქნებ ჩამომეხსნასო და მეორე ბარტყიც გადაუგდო. წუწკმა მელამ ჰაერშივე სტაცა პირი; ისევ ბურქებში შეაცუნცულა და გადასანსლა. ტურები მადიანად მოილოკა, ისევ უკან გამოცუნცულდა, დასკუპდა ხის ძირას და ჩიორას ასძახა:

— ჩიტო, ჩიტო, ჩიორაო!  
— რაო, ბატონო მელაო?  
— ერთი შვილი გადმომიგდე,  
თორემ შავ დღეს დაგაყენებ:  
ცულს მოვიტან ცუნცულასა,  
ხელეროს და წალდუნასა,  
ხესაც მოვჭრი, ხის ძირსაცა,  
შენც შეგჭამ და შენს შვილსაცა.

მწარედ დაღონებულმა ჩიორამ აიყვანა მესამე ბარტყიც და მელიას გადაუგდო. თვითონ აფრინდა, წავიდა შორს, შორს, შემოჯდა ერთ ხის ტოტზე და მოთქმით ატირდა.

იქვე ერთი მონადირე დადიოდა. გაიგონა ჩიორას მოთქმა, მივიდა და ჰკითხა:

— რა იყო, ჩიორაჲ, ასე მწარედ რა გატირებსო?

— რაღა რა მატირებს, სამი შვილი მყავდა და ერთმა წუწკმა მელიამ სამივე შემიჭამაო.

— ვერ მანივენებ იმ წყეულსო? — ჰკითხა მონადირემ.

— რატომ ვერ განვენებ, ალბათ ასლაც იქვე გდია და ჩემს დაბრუნებას ელოდებო.

— მაშ, გამიძებ, მანივენე და იმის ჯავრს მე ამოგყრიო, — უთხრა მონადირემ.


ჩიორა გაუძღვა მონადირეს და ნიიყვანა თავის ბუდე-თან, წელა მართლაც იქვე იყო, კუდზე დაყუნცული მაღლა იყურებოდა და ჩიორას დაბრუნებას ელოდებოდა. მონადირემ დაუმიზნა თოფი, ესროლა და სული გააფრთხოვინა.

ასე მიუზღო სამაგიერო წუწქსა და მტაცებელ მელიას, ხოლო ჩიორამ იმ წელს კიდევ ჩადო ბუდეში სამი კვერცხი, ისევ დაიქა ბარტყები და უვნებლადაც დააფრინა.

ჭირი — იქა, ლხინი — აქა,

ქატო — იქა, ფქვილი — აქა.





## ზარმაცი კაცი

იყო და არა იყო რა, ღვთის უკეთესი რა იქნებოდა, იყო ერთი ზარმაცი კაცი. ქვითი ქვაზე არაფერი გააჩნდა და არც თავს იწუხებდა. მეზობლები სამადლოდ ხან რას უგზავნიდნენ და ხან — რას: საჭმლის ნარჩენს, ხმელ პურს, ნახმარ ძონძებს. ზარმაცი შეჭამდა კეთილი ხალხის ნაწყალობევს და ისევ მხართუძოზე წამოწევებოდა.

მეზობლებმა რაკი ნახეს, რომ თვითონ თავს არაფერზე იწუხებდა, ეს მცირე მოწყალეობაც შეუწყვიტეს და დარჩა ზარმაცი მშიერ-მწყურვალი. რა ქნას, გარედან არაფრის იმედი აქვს და არც რაიმე შინ მოეპოვება — არც ფქვილი, არც მარცვალი, არც პური და არც სატანი. მოშიედა ზარმაცს და თქვა, თუ არ გავისარჯე, ცუდად არის ჩემი საქმეო. გამოვიდა კარში და შეხვდა თავი. უთხრა ზარმაცმა:

— ჩემო თავუნა, ხვალ წვეულება მაქვს, დილით ადრე მობრძანდი და კაი პატივს გცემ, ოღონდ ხელს ერთი ჯამი სორბალიც გამოაყოლეო.

— კარგი, გეწვევი და სორბალსაც მოგიტანო, — შეპპირდა თავი.

წავიდა ზარმაცი კაცი და ასლა კატა შესვლა. ზარმაცმა კაცმა ისიც დაპატიჟა:

— ჩემო ციცუნი, ხვალ წვეულება მაქვს, საუზმის დროს მოდი და კაი პატივს გცემ, ოღონდ, რომ წამოხვალ, ერთი თავი ყველი გამომიყოლეო.

— ადვილი სამსახურიო, — უთხრა კატამ და გემრიელი საჭმლის გახსენებაზე უღვაწები მადიანად მოილიჯა.

წავიდა კაცი და ასლა მელია შემოხვდა. უთხრა ზარმაცმა:

— ჩემო მელაკუდავ, ხვალ წვეულებას ვისდი, კარგად რომ მოდღვედება, იმ დროს მოდი და კაი პატივს დაგახვედრებ, ოღონდ ერთი მსუქანი დედალი გამომიყოლო.

— კარგიო, — უთხრა მელიამ, — ერთ დედალს მეც შემოგაწევო.

წავიდა კაცი და ასლა მგელი შეხვდა.

— მგელო-კუდბაწარო, — უთხრა კაცმა, — ხვალ დიდი წვეულება მაქვს და დამეწვიე. სადილობისას მოდი და კაი პატივს გცემ, ოღონდ ფეშქაშად ერთი ცხვარი გამომიყოლო.

— კარგიო, — უთხრა მგელმა, — ერთი ცხვარი დიდი არაფერიაო.

წავიდა ზარმაცი კაცი და შეხვდა დათვი. უთხრა ზარმაცმა:

— ჩემო ბერო ბიძია, ხვალ დიდი წვეულება მაქვს და სამხრობისას მეწვიე, კაი პატივს გცემ, ოღონდ ხელცარიელი, არ მოხვიდე, ერთი ძროხა მაინც გამომიყოლო.

— კარგიო, — დათვმაც უთხრა, — ერთ ძროხაზე პირს როგორ შევირცხვენო.

დაბრუნდა ზარმაცი შინ გახარებული. გათენდა მეორე დღე წამოდგა კაცი, მიალაგა სახლი და დაუწყო სტუმრებს ლოდინი. ის იყო იყიყრიბანდა, რომ თაგვიც მოცუნცულდა და ერთი ჯვამი ხორბალი მოიტანა. ზარმაცმა ჯვამი ჩამოართვა და კარადაში შეინახა, თაგვი კი ბუხრის პირას დასვა; ნამგზავრი ხარ, შეგცივდებოდაო. თვითონ კარში გამთვიდა და კატას დაელოდა. მზის ამოსვლისას კატაც მოვიდა და შეპირებული ერთი კვერი გუდის ყველაც მოუტანა. ზარმაცმა ყველი ჩამოართვა და უთხრა:

— შედი შინ, შენთვის ბუხრის პირას კაი საუზმე მაქვს მომზადებული, შეეჩეცი და მეც მალე შემოვალო.

შევიდა ციცა შინ, დაინახა ბუხრის პირას წამოსკუპებულ თაგვი, ეცა მაშინვე და გემრიელად ჩაასრამუნა.



გავიდა ცოტა ხანი და მელიაც გამოჩნდა, პირში მსუქანი დედალი ეჭირა და კუდის ქნევით მოცუნცულებდა. ზარმაცი კაცი სიცილით შეეგება, დედალი ჩამოართვა, საქათმეში შესვა და მელას უთხრა:

— დიდი მადლობელი ვარ, რომ ასეთი ჯიშისანი დედალი მომიყვანე, მაგრამ ვალში არც მე დაგრჩენილვარ, მეც კარგი ლუკმა დაგახვედრე, შედი შინ და ბუხრის პირას ნახავო.

შევიდა მელა შინ, ნახა ბუხრის პირას ტკბილად ჩაძინებული კატა, ეცა და ერთ წუთში შეასრამუნა, გამაძლარი კი კატის ადგილზე წამოწვა.

ეს იყო ამოსცდა მზე მთას და მგელიც მოვიდა. ზურგზე ერთი მაკე ცხვარი მოეცდო და სენეშით მოდიოდა. ზარმაცი კაცი შეეგება მგელს, მისი მოყვანილი ცხვარი ფარეხში შეაგდო და უთხრა:

— მადლობელი ვარ კარგი ძღვნისათვის, მაგრამ ხელცარიელი არც მე დაგხვედრივარ, შედი შინ და ბუხრის პირას ნახავო.

შევიდა მგელი, ნახა წამოწოლილი მელა და მაშინვე ყული გამოლადრა.

ახლა დათვი იყო მოსასვლელი. ცოტა ხნის შემდეგ დათუნიაც მობაჯბაჯდა. ზურგზე ძროხა წამოეკიდა და ბურტყუნ-ბურტყუნით მოაბიჯებდა. შეეგება ზარმაცი, ჩამოართვა ძროხა და უთხრა:

— შედი შინ, ბუხრის პირას შენთვის გემრიელი საკბილო მყავს მომზადებული, ერთი შენებურად, მადიანად შეასრამუნე და მეც მალე შემოვალო.

შევიდა დათვი, ეცა ცეცხლს მიფიცხებულ მგელს და ერთ წამში სული გააფრთხოვინა, მერე ასო-ასო დაგლიჯა, შემოაძრო ტყავი და უკანასკნელ ჩიჩქამდე გამოხიწა.

ზარმაცმა ძროხა ბოსელში შეაგდო და თვითონ დათვთან შევიდა. გამაძლარი დათვი ცეცხლს მიფიცხებოდა და, სისხლიან ტუჩებს ილოკავდა. კაცმა შესედა დათვის მსუქან ზურგს და გაიფიქრა, ეს რომ აქედან ცოცხალი გაეუშვა და ამისი ყაურმა არ ვჭამო, რალა ბიჭობა იქნებო, დაუჯდა დათვს გვერდით და მოთაფლული ხმით უთხრა:

— ჩემო ბებერო ბიძიავ, ეს მგელი კი შეგაჭამე, მაგრამ არ კმარა, კაი სადილს კაი პირის ჩასატკბარუნებელიც უნდა. მოდი წავიდეთ, აქვე, ტყეში ერთი თაფლიანი ხე მეგულება, გამოხეჩე და ისიც შენი იყოსო.


თაფლის ხსენებაზე დათვის პირწყალი მოადგა და კაცს ძუნძულით გაპყვა. კაცმა იცოდა, რომ იმ ტყეში ერთი ხვალი ლომი ბუდობდა და უნდოდა დათვი იმისათვის მოეკვლევინებინა. მართლაც, შევიდნენ თუ არა ტყეში, იკრა ლომმა დათვის სუნი და ტევრიდან კბილალესილი გამოვარდა. კაცი ხეზე შესტა, ლომი დათვის ეცა და თვალის დახამხამების უმაღლ მოასწრო.

ლომი რომ წავიდა, კაციც ჩამოვიდა ხიდან, მოსჭრა თავი მკვლარ დათვის, გამოშიგნა და შინ წამოიღო. შინ რომ მიიტანა, ტყავიც გახადა, ერთი ფეხსო მეზობლებში პურზე გაყიდა, მეორე ფეხსო საზამთროდ ჩააბასტურმა, ტყავისა კი თბალი ქურჭი შეიკერა.

ასე და ამგვარად, ზარმაცი და ღარიბ-ლატაკი კაცი ცხოვრებას მოეკიდა: სარჩოც იშოვა, სათბილობელიც და საყოლი მსხვილფეხ-წვრილფეხიც. რაკი ფუძე დაიდო, სიზარმაცეც დასძლია, საქმეზე გავიდა და ერთ-ორ წელიწადში მდიდარ მეზობლებს გაუტოლდა.

ჭირი — იქა, ლხინი — აქა,  
ქატო — იქა, ფქვილი — აქა.





## მელია და მწყერჩიტა

იყო და არა იყო რა, ღვთის უკეთესი რა იქნებოდა, იყო ერთი მეტისმეტად ხარბი და წუწკი მელია. ერთხელ სოფლის ნაპირას ხეტიალისას მძორს მიაგნო და თავისებურად ხარბად მიაძღა. იმდენი ჭამა, იმდენი, რომ მონელება გაუჭირდა და მუცელმა გვრემა დაუწყო. იქვე ხეზე ერთი მწყერჩიტა იჯდა და მხიარულად ჭიკჭიკებდა. შეესვენა მელია მწყერჩიტას:

— მეზობელო, ოღონდ ეს საჭმელი მომანელებინე და ჩემს სიცოცხლეში შენს ბარტყებს და საბუდარს ახლოს აღარ გავექარებო.

— კარგიო, — უთხრა მწყერჩიტამ, — შე აფერინდები და საითაც წაუალ, შენ ფუხდაფუხ უკან მომყევო.

აფრინდა მწყერჩიტა და გაედევნა უკან მელია. მიფრინავს მწყერჩიტა და მისდევს მელია. ხან მინდორზე არბენინა, ხან ჩირგვებში აძვრინა, ხან ქვებზე ახტუნავა და ხან წყალში ატოპინა. იმდენი არბენინა, იმდენი, რომ მელიას მთლად ფერდები დასცვივდა. ბოლოს მწყერჩიტამ ჰკითხა:

— როგორ არის საქმე, მეზობელო, მოინელე თუ ვერაო?

— მონელებით კი მოვინელე, — უთხრა მელიამ, — მაგრამ ახლა სიცლი მომინდა და, თუ გულიანად მაცინებ, შენ მოდგმას აღარასოდეს არაფერს დაეუშავებო.

— კარგი, არც ეგ არის ძნელი, — დათანხმდა მწყერჩიტა, — გამომყე უკან და სიცლითაც გულს გაჯერებინებო.

მწყერჩიტამ მელია კალოზე მიიყვანა და ძნის ქვეშ დამალა. თვითონ კერის ხარს დააჯდა რქაზე და ჭიკჭიკი დაიწყო. დაინახა გლეხმა და სახრე მოუქნია, მწყერჩიტამ აფრე-

ნა მოასწრო, სასრე სარს მოხვდა რქაზე და მოსტყვა. მელია იცინის, იცინის, კვდება სიცილით.

მწყერჩიტა ახლა მაწვნის ქილაზე შემოჯდა. გაჯავრებულმა გლესმა ქვა ესროლა: მწყერჩიტამ ისევ მოასწრო აფრენა, ქვა ქოთანს მოხვდა, ქოთანი გატყდა და მაწონი კალოზე გაღვარდა. მელია იცინის, იცინის, კვდება სიცილით.

ბოლოს მწყერჩიტა ბავშვს დააჯდა თავზე. ბავშვმა ჯოჯი მოუქნია, უნდოდა მოერტყა და მოეკლა, მაგრამ მწყერჩიტამ აქაც გაასწრო, სასრე ბავშვმა თავში შირტყა და აღრიალდა.

მელია იცინის, იცინის, კვდება სიცილით.

მიფრინდა მწყერჩიტა მელიასთან და ჰკითხა:

— რას იტყვი, მეზობელო, ხომ კარგად გაცინეთ?

ამდენ სიცილ-სიცილში მელიას ხელახლა მოშივდა, დაავიწყდა თავისი პირობა და მწყერჩიტას წაეტანა დასაჭერად; მაგრამ მწყერჩიტა რისი მწყერჩიტა იქნებოდა, რომ მელას ჩავარდნოდა პირში, იმავე წამს აფრინდა და იმ ძნაზე ჩამოჯდა, რომლის ქვეშაც მელია იყო მიმალული. დაჯდა ზედ და მელას ჩასძახა:

— არ გაინძრე, ახლა ერთი სერი კიდევ უნდა გარვენოლი მიეპარა გლესი მწყერჩიტას და მოუქნია დიდი კეტი. მწყერჩიტამ ესევ აიციდინა, კეტი მელიას მოხვდა თავში და შუაზე გაურჩხა. აფრინდა მწყერჩიტა, შემოჯდა ხის კენწეროზე და მელიას ნიშნის მოგებით ჩამოსძახა:

— სადაც შენი დაიკვებო, იქ ჩემიცა თქვი, სიტყვის გამტეხს და მოლაღატეს ყველას ასე მოუვაო.

ჭირი — იქა, ლხინი — აქა,

ქათო — იქა, ფქვილი — აქა.





## მსაჯული მელა

იყო და არა იყო რა, ამ დალოცვილ დედამიწაზე ვინღა არ გაჩენილა და არ ყოფილა და მათ შორის მაიმუნიც. მაიმუნი კი, თქვენც კარგად მოგეხსენებათ, როგორი მეტიჩარა და ცნობისმოყვარეც არის. ჰოდა, იყო სწორედ ერთი ასეთი მაიმუნი, ისეთი აბუზარი და მეტიჩარა; რომ საცა არ ეკითხებოდა, ყველგან ცხვირს წაჰყოფდა, ყველაფერს ჩხრეკდა და სუნავდა.

ერთხელ, ასე უთავბოლო ხეტილისას, ერთ ადგილას აკოკოლებული ქვეები დაინახა და თვალები დააჭყიტა, — აქ რაღაც განძი უნდა იყოსო; იფიქრა და ქვეების გადმოლაგება დაიწყო. ქვეების ქვეშ დიდი ხვრელი აღმოჩნდა, მაიმუნმა იფიქრა, ამ ხვრელში შეიძლება რამე სასუნსავი ინახებოდესო და თავისი შავი თათი შეყო. უცებ ხვრელიდან გაჯავრებული სისინი მოესმა და ერთი უშველებელი გველი გამოცოცდა. გველი დიდი ხნის წინათ ჩაექოლა ხალხს და სახსრები დახუთული ჰქონდა, მაგრამ რაკი თავისუფლად განძრევის ნება მიეცა, ტანი საჩქაროდ გაშალა, განიმართა და მადლობის მაგიერ მაიმუნს შეჭმა დაუბირა.

მაიმუნი ახლა კი მიხვდა თავის შეცდომას და მწარედ ინანა, — არა, შე ოხერო ჩემო თავო, რას ეძებდი, რომელი ერბოს ქილები გქონდა აქ ჩადგმული, რომ ამ უზარმაზარ ქვეებს ეჭიდებოდიო, — უსაყვედურა თავის თავს, მერე დაუჩოქა გველს და შეევედრა:

— მომიტევეთ შეცოდებანი ჩემნი, ღირსეულად პატივ-

საცემო ბატონო გველუშაპო, არ ვიცოდი, რომ აქ ბრძანდებოდით, თორემ როგორ გაებედავდი ქვებისთვის ხელის სლებას და თქვენი მყუდროების დარღვევასო!

მაგრამ გველი რის გველილა იქნებოდა, თუ მაიმუნის თხოვნას შეიწყნარებდა.

— როგორ, თუ გაპატიო? — დაუსისინა ბოროტად და კისერი უფრო შემართა, — არ იცი, რომ ჩემი შეშფოთება და ძილის დაფრთხობა მხოლოდ სიკვდილით გამოისყიდებაო? მაიმუნი ხელავდა, რომ სსნა აღარ იყო და აკანკალებული აქეთ-იქით იყურებოდა, იქნება მშველელი ვინმე გამოჩნდესო. უცებ ბედად ტყიდან ერთი მელა გამოცუნცულდა, მსუქანი ბატით იყო გამაძღარი და გულდაარხეინებული თავისთვის მოლიღინებდა. მაიმუნმა რომ დაინახა, ცოტა იმედი მოეცა და გველს მოახსენა:

— წესი არ არის. გაუსამართლებლად დასჯა, აგე, პატიოსანი მსაჯული მოდის და მოვიწვიოთ საქმის გასარჩევად, არც ჩემიანია, არც თქვენიანი და სამართალს მიუკერძოებლად გაგვიჩენსო.

— კარგი, თანახმა ვარ, — უთხრა გველმა, — მაგრამ იცოდე, რასაც მე გეუბნები, ისიც იმასვე გადაგიწყვეტსო.

— გადამიწყვეტს და სამართალს სად წავუვალო, — მიუგო მაიმუნმა და მელას განძახა: — პატიოსანო კაცო, ერთი წუთით შეჩერდი და სამართალი გვიყავიო.

— რაშია საქმე, რას უჩივით ერთმანეთსო? — ჰკითხა მელამ.

გველმა და მაიმუნმა თავ-თავიანთი საჩივარი მოახსენეს.

მელა გველის მოდგმაზე თვითონაც ნაწყენი იყო და ახლა უზომოდ გაუხარდა, რომ სამაგიეროს გადახდის საშუალება მიეცა. უღვაშებში ცბიერად ჩაიციინა და სანამ საქმის განსჯას შეუდგებოდა, სამხილის საფუძვლიანი გაცნობა მოითხოვა.

— ბატონებო, — მიმართა მედიდურად, — მე თუ ჩემი თვალით არ ვნახე, თავიდანვე რა მოხდა და რამ გამოიწვია თქვენი მტრობა, ისე საქმეს სამართლიანად ვერ განვსჯი. ამისათვის საჭიროა, რომ მომჩივანი ცოტა ხნით ისევ თავის ხვრელში შებრძანდეს, ხოლო მოპასუხე გაისარჯოს, ეს

ქვები, როგორც იყო, ისევ ისე ააკოკოლოს და მერე ახლიდან გადმოალაგოს, ესე იგი, გაიმეოროს ის, რაც თავდაპირველად მოიმოქმედაო.

გველს მოეწონა მსაჯულის ასეთი კეთილგონიერება და, დარწმუნებული, რომ მართალი თვითონ გამოვიდოდა, უყოყმანოდ ჩაიკრიფა თავის სორათში. მაიმუნმაც თვალის დახამსანებაში ააკოკოლა ქვები და მელიას ჰკითხა, — ახლა რაღა ვქნაო?

— ახლა მოუსვი აქედან და უკან აღარ მოიხელო, — უთხრა მელამ, — ღა ამის შემდეგ იცოდე, სადაც არაფერი გესაქმება, იქ ცხვირს ნუ ჩაჭყოფო. — სოლო გველს კი ჩასმახა: — რაკი შენ ვერ გაიგე და ვერ დაათასე, რომ მაიმუნმა თავისი სისულელით ტყვეობიდან დაგისხნა და თავისუფლება მოგანიჭა, ახლა იჯექი მანდ და თუნდა საუკუნო ძილით დაიძინეო. — გამომეშვიდობა მაიმუნს და თავის სორათსაკენ წაფუნცულდა, რომ გამამღარს ერთი კარვად დაესვენა და გამოეძინა.

მაიმუნიც კმაყოფილი და გახარებული გაუდგა თავის გზას, მაგრამ იმ დღიდან სვრელის შიში დასჩემდა და დედამიწიდან სამუდამო საცხივრებლად ხეზე გადაინაცვლა.

ჭირი — იქა, ლხინი — აქა,

ქატო — იქა, ფქვილი — აქა.





## ლოზი და კურდღელი

იყო და არა იყო რა, იყო ერთი მეტად ავი და ბრახინანი ლომი. როცა მოშივდებოდა, იმის მძვინვარებას საზღვარი აღარ ჰქონდა — დაფრეოდა მხეცებს და სულ მუსრს ავლებდა.

იმ არემარის მხეცები ძალიან წუხდნენ, მაგრამ საშველი არ ჩანდა. ბოლოს, მეტისმეტად რომ გაუჭირდათ, ერთად შეიკრიბნენ და ბჭობა გამართეს, — რა ვქნათ, რით გადავურჩეთ ლომის თავგასულობასაო. ბევრი სჯა-ბაასის შემდეგ ასე გადაწყვიტეს: დავუნბნოთ ლომს სამუდამო სარჩო, ჩვენ თვითონვე მივართვათ და ვთხოვოთ, რომ ჩამოგვეხსნას და ყოველდღე ნულარ დაგვაწიოკებსო.

წავიდნენ და თავიანთი გადაწყვეტილება ლომს მოახსენეს. თან ისიც უთხრეს, თუ ასე არ მოიქცევი, ავდგებით და სულ სხვა მხარეს გადავიხვეწებითო. ლომი დათანხმდა, მაგრამ გააფრთხილა კი, — იცოდეთ ერთი წუთითაც რომ დამიგვიანოთ საჭმლის მოტანა, დაგეცემით და სულერთიანად ამოგყლეთო.

ამ დღიდან იმ არემარეში მყუდროება ჩამოვარდა. მხეცებს ყოველდღე სათითაოდ მიჰყავდათ თითო ცხოველი ლომთან და ლომიც აღარ მძვინვარებდა. ბოლოს ჯერი კურდღელზე მიდგა — ან რომელიმე მხეცი უნდა მივეყვანა ლომისთვის, ან თვითონ უნდა მისულიყო, და რაკი არავისი მიყვანა არ შეეძლო, ადგა და ისევ თვითონ წავიდა.

მხეცებს შეებრალათ სუსტი და უმწეო კურდღელი და გუ-



ლისტიკვილით გააცილეს. კურდღელს კი შიშისა არაფერი ემჩნეოდა.

— ნუ დარდობთ, ძმებო და მეგობრებო, — უთხრა წასვლისას მხეცებს. — ლომს ისეთ ოინს ვუზამ, რომ მეც გადავრჩები და თქვენც სამუდამოდ ჩამოგაშორებით.

მხეცებს გაუკვირდათ, ამ სუსტმა და მშიშარამ ლომს რა უნდა უყოსო, მაგრამ კურდღელი მაინც თავისას გაიძახოდა, — ისე მოვსპობ, რომ დღეიდან იმისი სახსენებელიც აღარ იყოსო.

ლომს შიოდა და სარჩოს მოსვლას კბილებაკაწკაწებული მოელოდა, მაგრამ კურდღელი ლომის ბუნაგს დილამდე ახლოს არ გაჰკარებია. განრისხებული ლომი ის იყო, ბუნაგიდან გამოსვლას და მხეცების დასასჯელად წასვლას აპირებდა, რომ ამ დროს კურდღელიც მიცუნცულდა, ჩამოჯდა შორიანხლო და თავმდაბლად მიესალმა.

ლომმა მრისხანედ შეხედა და შეუტია:

— სადა ხარ აქამდე, შე ელამო ელმის შვილო, რატომ წუხელევე არ მოეხირეთ?

— დიდო ბატონო, — კრძალვით მოახსენა კურდღელმა, — თქვენთან ერთი მსუქანი კურდღელი მომყავდა, მაგრამ გზაზე სჭვა ლომი შემომხვდა, ის კურდღელიც წამართვა და მეც ძლივს გადავურჩი ცოცხალიო.

— რაო? ლომი შეგხვდაო? — აღშოთდა უზომოდ ლომში, — ვინ გაბედა ჩემს საბრძანებელში შემოსვლა, ახლავე წამიყვანე და მაჩვენეო!

— აქვე ახლოს ჭაში ზისო, — უთხრა კურდღელმა.

— აბა წამიყვანე და გაყურებინებ იმის სეირსო! — დაიგრგვინა ლომმა.

გაუძღვა კურდღელი ლომს, მიიყვანა ჭასთან და უთხრა!

— აი, ბატონო, ამ ჭაში ზის, მაგრამ მეშინია, მარტო ვერ ჩავისედავ, შენ ამიყვანე და ერთად ჩავისედოთო.

ამიყვანა ლომმა კურდღელი და ჩაიხედა ჭაში. ჭის ფსკერზე ფაფარაყრილი ლომი დაინახა, რომელსაც თათებში კურდღელი ეჭირა. ლომი ვერ მიხვდა, რომ ჭის გამჭვირვალე წყალში არეკლილი მისივე საკუთარი გამოსახულება ჩანდა, ეგონა, ჩემ საბრძანებელში მართლაც შემოჭრილა უცხო

ლომი და ჩემთვის განკუთვნილი ულუფა მიუსაკუთრებიათ, და მთლად ცეცხლი მოეკიდა. კურდღელს იმავე წაქს თათი უშვა ოა კბილებდაკრეჭილი ჭაში თავდაყირა გადაეშვა. მაგრამ იქ არც ლომი დახვდა, არც ნადავლი კურდღელი და თვითონ კი დაიხრჩო.

გაიგეს მხეცებმა ეს ამბავი და კურდღელს დიდი მადლობა გადაუსადეს. კურდღელს კი ამ დღიდან ლომის შიში დასჩემდა და ყველა სულიერი ლომად ეჩვენება. ამიტომ არის, რომ თვალები მძინარესაც ასულილი აქვს და სულ უბრალო გაფარუნებაზეც გულგახეთქილი გარბის.

ჭირი — იქა, ლხინი — აქა,  
ქატო — იქა, ფქვილი — აქა.





## ნ ა ხ ე ვ ა რ წ ი წ ი ლ ა

იყო და არბ იყო რა, იყო ერთი ნახევარწიწილა. ერთხელ ნაცრის ქექვა დაიწყო.

ქექვა და ქექვა ნაცარი,  
იპოვა ფეტვის ნაცვალი.

წაიღო ფეტვის მარცვალი მანდორში, მოხნა მიწა და დათესა. ყანა მოვიდა ისეთი, რომ უფლის თვალი შიგ ტრი-  
ალეზდა და ნახევარწიწილაც მოუთმენლად მოელოდა დამ-  
წიფებას. დამწიფდა ყანა, მაგრამ შემოვიდა ბატონის ჯოჯი  
და ერთ ღამეში პირწინდად გადაძოვა.

ნახა დილას ნახევარწიწილამ თავისი განადგურებული  
ყანა და ჯავრისაგან გულზე ცეცხლი მოეკიდა, პირიდან  
სულ ცოფები ყარა. აღგა და წავიდა ბატონის საქებნელად,  
რომ ან ზარალი აენაზღაურებინა, ან სამაგიერო მიეზლო.  
იარა, იარა და გზაზე ერთი მელია შემოხვდა. ერთმანეთს  
„გამარჯობა — გაგიმარჯოს“ უთხრეს და მელამ ჰკითხა:

— საით გაგიწევია, ან რამ გაგაჯავრაო?

— რაღა რამ გამაჯავრა, — უთხრა ნახევარწიწილამ, —

ვქექე და ვქექე ნაცარი,  
ვიპოვე ფეტვის მარცვალი,  
მოვხან მიწა და დაეთესე,  
მოვიდა ყანა სამკალი.  
ჩვენი ბატონის ნახირი,  
უთვალავი და მრავალი,

შესულა, გაუძოვია,  
აღარ შემომჩრა მარცვალი.

აი, ამაზე ვარ გაჯავრებული და ბატონთანაც იმიტომ მივდივარ, რომ ზარალი ავანაზლაურებინო ან სამაგიერო გადავუსხადო.

მელამ უთხრა:

— ტყუილად ჯავრობ, ახლა მე ჩაგყლაპავ და აღარც ფეტვი დაგჭირდება და აღარც სორბალი.

გაჯავრდა ნახევარწიწილა, დაალო პირი და მელია გადაყლაპა.

გაუდგა ისევ გზას. გზაზე ახლა მგელი შემოხვდა. ჰკითხა მგელმა: — რამ გაგაჯავრა, ან საით მიდიხარო?

ნახევარწიწილამ იმასაც ასევე უპასუხა:

ვქექე და ვქექე ნაცარი,  
ვიპოვე ფეტვის მარცვალი,  
მოვხან მიწა და დავთესე,  
მოვიდა ყანა სამკალი,  
ჩვენი ბატონის ნახირი,  
უთვალავი და მრავალი,  
შესულა, გაუძოვია,  
აღარ შემომჩრა მარცვალი.

— ახლა ნულა იჯავრებ, — უთხრა მგელმა, — სულელობია, ჩაგყლაპავ და ფეტვი რაღად გინდაო.

— რბო, ჩამყლაპავო?! — გადაიჩრია ნახევარწიწილა, — ახლა მიყურე, ვინ ვის ჩაყლაპავსო, — დაალო პირი და მგელსაც ყლაპი გაადინა. გაუდგა ისევ გზას. ცოტა რამ გაიბარა, გზაში-დათვი გადაუდგა და ჯიმიჯიმით ჰკითხა:

— რაზე ჯავრობო?

ნახევარწიწილამ მიუგო:

— რაღა რაზე ვჯავრობ, ბატონის ნახირმა დამღუპა და დამაქციაო.

ვქექე და ვქექე ნაცარი,  
ვიპოვე ფეტვის მარცვალი,

მოვხან მიწა და დავთესე,  
მოვიდა ყანა სამკალი,  
ჩვენი ბატონის ნახირი,  
უთვალავი და მრავალი,  
შესულა, გაუძოვია,  
აღარ შემომტრია მარცვალი.

აი, ამაზე ვჯავრობ და ბატონთანაც იმიტომ მივდივარ,  
რომ ზარალი ავანაზლაურებინო.

— აღარ გინდა ბატონთან წასვლა, — უთხრა დათვმა, —  
ახლა მე გადაგყლაპავ და ფეტვიც ოხრად დაგტრება და შე-  
ნი თავიცო.

— ჩემი ზარალი არ მეყოფა, რომ ახლა კიდევ ჩაყლაპვას  
მიპირებო! — განრისხდა ნახევარწიწილა, დაალო პირი და  
დათვსაც მგელთან და მელასთან გადაუძახა.

დაადგა ისევ გზას. გზაზე ზღვა დახვდა. ნახევარწიწილამ  
უთხრა:

— დაშრი და გამატარეო.

ზღვას სიცილადაც არ ეყო!

— ახლა სწორედ შენი გულისათვის დავშრებიო.

— არ დაშრები და მე დაგაშრობო, — უთხრა ნახევარ-  
წიწილამ, გაალო პირი და მთელი ზღვა ერთ ყლუპად ამოშ-  
რიტა. გაიარა ნაზღვავარი და მივიდა ბატონის სახლში.  
შევიდა-ეზოში და მოსამსახურეებს უთხრა:

— უთხარით თქვენს ბატონს, რომ ზარალი ამინაზლაუ-  
როს, თორემ შავ დღეს დავაყრიო.

მოსამსახურეები ავიდნენ და ნახევარწიწილას შენათვა-  
ლი ბატონს მოახსენეს. ბატონი ტახტზე არხეინად გაიშოტა  
და უბრძანა:

— ახლავე წაიყვანეთ და საქათმეში დაამწყვდიეთო!

შეიპყრეს ბატონის შინაყმებმა ნახევარწიწილა და საქათ-  
მეში დაამწყვდიეს. ნახევარწიწილამ ამოუშვა მელია მუც-  
ლიდან, მელიამ მთელი ქათმები შესანსლა და ტყეში გაიქ-  
ცა. მოახსენეს ბატონს ეს ამბავი. ბატონმა ბრძანა:

— წაიყვანეთ და ფარეხში დაამწყვდიეთო!

წაიყვანეს ბატონის შინაურებმა და ახლა ფარეხში შე-  
ბ. ქართული ხალხური ზღაპრები

აგდეს. ნახევარწიწილამ მუცლიდან მგელი ამოუშვა. მისდგა მგელი ცხვარს, პირწმინდად გაჟლიტა და ტყეში გაიქცა.

გაიგო ეს ამბავი ბატონმა და განრისხებულმა ხმამაღლა დაიყვირა:

— ახლავე წაიყვანეთ და ჩემს ნახირთან შეაგდეთო!

წაიყვანეს შინაურებმა ნახევარწიწილა და გომურში უკრეს თავი. ნახევარწიწილამ აქ დათვი გამოუშვა. დათვმა დატორა მთელი ნახირი, მიბეგვ-მობეგვა, ზოგი შეჭამა, ზოგი მკვდარი დააგდო და, გული რომ იჯერა, გამაძლარი ტყისკენ გაძუნძულდა.

ბატონი ახლა მთლად გადაირია, გამოვიდა აივანზე და შინაყმებს გადმოსძახა!

— დაანთეთ ეზოში დიდი კოცონი და შიგ ჩაწვითო!


დაანთეს იმავე წამს დიდი კოცონი და გამოიყვანეს ნახევარწიწილა. მაგრამ სანამ ცეცხლში ჩააგდებდნენ, ნახევარწიწილამ მუცლიდან ზღვა ამოუშვა და მთელი საბატონო წაალეკვინა.

ასე გადაუხადა ბატონს სამაგიერო ნახევარწიწილამ.

ჭირი — იქა, ლხინი — აქა,

ქატო — იქა, ფქვილი — აქა.





## ბაქია კურდღელი

იყო და არა იყო რა, ღვთის უკეთესი რა იქნებოდა, იყო ერთი მეტისმეტად ტრაბახა კურდღელი, სულ ტრაბახობდა, ბაქიბუქობდა და ნათესავ-მეზობლებმაც ბაქია დაარქვეს.

მართალია, თავის ქება მწარე კიტრად არა ღირს, მაგრამ ხანდახან ისეთი დროც გამოერევა, რომ სწორედ ტრაბახითა და თავის ქებით გადიან ფონს და უღირსნი ღირსეულთა თანასწორ ადგილზე წამოსკუპდებიან ხოლმე. ჰოდა, ეს ბაქიაც სწორედ ასეთი იყო. ტოლებში რომ გაერეოდა, ისეთ ტრაბახს მოჰყვებოდა, რომ სულ კორიანტელს დააყენებდა. ბაქიას შრომაც ეზარებოდა და სულ სხვათა საცერ-ვარცლის შემყურე იყო, — რა ჯობია მუქთა სუფრას, — იტყოდა ხშირად. — მარტო ტაში შემოჰქარ და მიუჯექი! — და მიუჯდებოდა კიდევ, სათამადო ადგილს დაიჭერდა და ყანწს ყანწზე ყლურწავდა. გამოიბრუებოდა და კვლავ ტრაბახსა და თავის ქებას მოჰყვებოდა.

— ეგ რომ შინაურებში ბაქიბუქობს, აბა, ერთი გარეთ ნახეთ, რა ვაჟკაცია, ფოთოლი რა არის, ფოთლის გაფარუნებაზეც კი სული სძვრება. შინ მამაცი, გარეთ მხდალიო, სწორედ მაგაზე არის ზედგამოჭრილიო, — ამბობდნენ კურდღლები ზურგს უკან.

შინაურები პირშიაც ეუბნებოდნენ:

— დაანებე ტრაბახს თავი, ნუ გვარცხვენ, განა არ ვიცით, რა შვილიცა ბრძანდებიო.

მაგრამ ბაქიას ეს კეთილი რჩევა და მითქმა-მოთქმა სი-

ტილდაც არ ჰყოფნიდა. სადაც სუფრას დაიგულებდა, ისიც უმალ იქ გაჩნდებოდა, გადახუხავდა ერთ-ორ ხელადას და ტრაბახის კორიანტელს დააყენებდა.

ერთხელაც მოდის მთვრალი ბაქია გზაზე და რაც ძალი და ღონე აქვს მოიმღერის:

ეს ქვეყანა სამეფოა,  
მე ვარ მეფე ამ ქვეყნისა,  
არ ვანსხვავებ ლომს და მელას,  
შიშის ზარს ვცემ ყველა ბრიყვსა.

სად იყო, სად არა, უცებ ტყიდან ლომი გამოვარდა და ბაქიას შეუტია:

— რათ, რათ, რას კნაოდი, მეფე ვარო?

ბაქია ადგილზე გაშრა და შიშისაგან ენა მუცელში ჩაუვარდა.

— ვინ არის მეფე, მე თუ შენო? — დაუღრიალა ლომმა.

ბაქიამ, როგორც იქნა, ამოიდგა ენა და აცახცახებულმა საცოდავად შეჰქნავლა:

— მე რა მეფობის ღირსი ვარ, მეფეც შენა ხარ და მბრძანებელიცო.

— აი, შე ლაჩარო, კომბოსტოწიწკნიავ, შენა! მაშ, წელან რად მღეროდი, მეფე ვარ და ლომსაც დავსჯიო? ჰოდა, მაგ თავხედობისათვის ახლა მე დაგსჯი და გემრიელად შეგახრამუნებო, — დაუყვირა კიდევ ლომმა, ერთი ნაბიჯით წინ წაიწია და მადაზე მოსულმა მუშტისტოლა ნერწყვი გადაყლაპა.

— ნადირთა დიდო მბრძანებელო, — ასლუკუნდა ბაქია, — რა იქნება, ცოტა ხანს დამაცადო, რომ გამოფხიზლდე, თორემ მთვრალი ვარ და გემოს ვერ ჩამატან, სხვაც არა იყოს რა, არყის სუნი დაგბნედს და შენვე გაიტანჯებიო.

— ხმა-კრინტი! — შეუღრინა ლომმა, — თავს ტყუილად ნუ მამბრალეხ, ეგ ოინები აღარ გაგივაო, — და კბილებდალრენილი კურდღლისაკენ გაემართა.

ამ დროს ტყიდან ერთი მშვიერი ვეფხვიც გამოვარდა. დაინახა კურდღელი და მაშინვე მიეჭრა: — მოემზადე უნდა შეგჭამოო.



მაგრამ ლომი რის ლომია, რომ თავისი ნადავლი სხვას დაუთმოს.

— რას მიტქარავ. — დაულრინა დაუპატიყებელ მოქიშპეს, — ვერა ხედავ, მე უკვე აქა ვარ და შეცილებას როგორ მიბედავო! ახლავე უკან გაბრუნდი, თორემ მე ვიცი, რასაც შეგაჭმევო.

— შენ თვითონ გაბრუნდი, — არ დაუთმო ვეფხვმა, — ეს ტყე ჩემი სამფლობელოა და ნადავლიც მე მეკუთვნისო.

არც ლომმა დაუთმო, არც — ვეფხვმა, შეტყვენ, შეტყვენ და, როგორც ასეთ დროს ხდება ხოლმე, ბოლოს დაეტაკნენ. იბრძვიან, მაგრამ რას იბრძვიან, გლეჯენ და ფლეთენ ერთმანეთს, ხან ლომია ქვეშ, ხან — ვეფხვი. არის ერთი ბრდღვინვა და კბილთა სრჭიალი.

ბაქიამ შიშით განძრევაც ვერ შესძლო. უყურა ლომისა და ვეფხვის ბრძოლას, უყურა და ბოლოს გული წაუვიდა. გაჭიმა ფეხები და უგრძნობლად გაიშოტა.

როდის-როდის მოვიდა გონზე. დააჭყიტა თვალები და რას ხედავს:

ლომი და ვეფხვი უსულოდ ყრიან, ერთი — ერთ მხარეს, მეორე — მეორე მხარეს. ირგვლივ მათი ტყავის ნაფლეთები მიმოფანტულა, დედამიწაც სისხლით არის მოსვრილი.

ბაქია ცას ეწია სიხარულით და ისევ ტრაბახს მოტყვა:

— ფუტ, შევარცხვინე მთვრალი კაცი! ამოდენა მხეცები შემომკვდომია და აღარც კი მახსოვსო. ალბათ ურჩობა გამიბედეს და ეს საცოდავები იმიტომ დავსაჯე. ახია მათზე, ყველას ასე დავსჯი და გავანადგურებ, ვინც ჩემს სიტყვას არ დაიჯერებს და გამიჯიუტდებაო. — ეს თქვა ბაქიამ, შედგა მაღალ ბორცვზე და განგაში ატეხა: — მხეცნო და ნადირნო, ვინც კი ასლომასლო ხართ, ახლავე ჩემთან გამოცხადდითო!

მოვიდნენ და მოვიდნენ მხეცები, — დათვები, მგლები, ტურები, მელიები; კურდღლები ხომ, რაღა თქმა უნდა, დიდი და მცირე ყველა იქ შეიკრიბა. წაიყვანა ბაქიამ მხეცები, დახოცილი ლომ-ვეფხვი აჩვენა და რიხიანად უთხრა:

— არც ახლა გჯერათ, რომ მე უძლეველი ვარ. ხომ ხედავთ, თავხედობისათვის ლომსა და ვეფხვს რა გუყავი:


პოდა, იცოდეთ: დღეიდან თუ ჩემს სიტყვას არ დაიჯერებთ და ურჩობას გამიბედავთ, თქვენც ეს დღე მოგელითო.

დაიჯერეს მხეცებმა, რომ ეს საქმე მართლა ბაქიას ნაქნარი იყო და იმავე დღეს მეფედ აირჩიეს.

აი რა ძალა აქვს ზოგჯერ ტრაბახსა და თავის ქებას — მშიშარა კურდღელმა უძლეველი ლომის ადგილი დაიჭირა და ქვეყნის მბრძანებლად გადაიქცა. მაგრამ რამდენ ხანს შერჩა ტახტს, როგორ იმეფა და მართა ქვეყანა, ეს კი აღარავის გაუგია.

ჭირი — იქა, ლხინი — აქა,  
ქატო — იქა, ფქვილი — აქა.





## დათვი, მგელი და მელა

იყო და არა იყო რა, იყო ერთი ეშმაკი და ქურდბაცაცა მელაკუდა. ერთხელ ერთი მსუქანი დედალი მოიტაცა და განარებული თავისი სოროსაკენ მიარბენინებდა. გზაზე დათვი შემოხვდა, დათვი მშიერი იყო, მსუქანი დედლის დანახვაზე პირწყალი მოადგა და მელიას შარი მოუდო, — ამ არემარის მბრძანებელი მე ვარ და შენ რა ხელი გქონდა, რომ ჩემს სამფლობელოში შემოჭრილხარო? — დედალი თვითონ დაინარჩუნა, მელას კი ერთი ლაზათიანი პანღური ამოჰკრა და გააგდო.

— მაშ, მე ბიჭი არ ვიყო, თუ ეგ თავხედობა შეგარჩინო, — თქვა მელიამ გულში და წავიდა. იმ წელიწადს იმ არემარეში აღარ გაუჭაჭანია, სულ სხვა მხარეს გადავარდა და ფერი და შესახედაობა გამოიცვალა. მეორე წელს დაბრუნდა და დაიწყო აქეთ-იქით წანწალი, — უნდა სადმე დათვს გადაეყაროს და სამაგიერო გადაუხადოს.

ბოლოს მიაგნო დათვის ბუნაგს. დათვს ბელები გაჰქეციანებიყო, გამოეყვანა სოროს წინ, მზუზე დაესხა და ბეწვს უხილავდა. მელია მივიდა და ჰკითხა:

— ბიძავ, რას აკეთებო?

— აი, შვილები გამიხდნენ ავად და ვმკურნალობო, — მიუგო დათვმა.

— მაგ სენის წამალი მე ვიცო, — უთხრა მელამ.

— იცი და, მომირჩინე, რაღას უყურებო! — გაბრაზდა დათვი.

— მოგირჩენო, — უთხრა მელიამ, — ოღონდ გასამრჯეპ

ლოდ ერთი მსუქანი დედალი უნდა მომიტანო, მერე ერთი ქვაბი წყალი ამიდულე და დანარჩენი მე ვიციო.

დათანხმდა დათვი და მიუტანა დედალი. თან ერთი მოზრდილი ქვაბიც მოაყოლა, გაავსო წყლით და შემოდგა ცუცხლზე.

წყალი რომ გაცხელდა, მელამ უთხრა დათვის:

— ახლა შენ წადი და მთაზე რომ წმინდა გიორგის ნიშია, იქ ილოცე, რომ შვილები მალე მოგიჩინონ.

დათვი ძუნძულით გაუდგა გზას წმინდა გიორგის ნიშისაკენ, მელიამ კი დაავლო ხელი დათვის ბელებს, ჩაყარა მდულარე წყალში და შიგ ჩაფუჭა. მერე დასტაცა პირი დათვის მოტანილ დედალს და ტყისაკენ მოუსვა.

მიდის მელია გახარებული და მილილინებს. წინ მგელი შემოხვდა. მგელიც მშიერი იყო და მსუქანი დედლის დანახვაზე იმასაც პირწყალი მოადგა. უთხრა მელიას, — ძალიან მშია და ეგ დედალი უნდა დამითმოო.

— რალა მე მართმევ, — უთხრა მელიამ, — აგე ქვევით დათვის ბუნაგია და სულ ამისთანა დედლებით არის გამოტენილი, დათვი თვითონ შინ არა ჩანს, წადი, შედი შიგ და რამდენიც გინდა მიირთვიო.

მგელს სულმა წასძლია, — ერთი ქათამი მართლაც რას მიზამს და იქ კი ლაზათიანად გამოვძღებო, თქვა გულში, და დათვის ბუნაგისაკენ სულ ხტუნვა-ხტუნვით წავიდა. შვიდა შიგ, მაგრამ მსუქანი დედლების მაგიერ იქ თვითონ დათვი დახვდა. ამ დროისათვის დათვი მთიდან დაბრუნებულიყო, ენახა ჩაფუჭული შვილები და ცუცხლმოკიდებული ბრდღვინავდა. სტაცა თათი მგელს და მთელი გულის ჯავრი მასზე იყარა. — დაიდო ქვეშ და ისე დაჟეჟა, რომ ძვალი და რბილი გაუერთიანა.

როგორც იქნა, დაალწია დათვის თავი მგელმა და გაცუცხლებული წავიდა მელიის სამეხნელად. იარა, იარა და ბოლოს მიაგნო, მელიამ შორიდანვე იცნო მგელი, ჩახტა თხილის ბურქში და წვრილი წნელების მტკრევა დაიწყო. მივარდა მგელი და დაუყვირა:

— შენ არა ხარ, დათვთან რომ გამგზავნეო?!

— თავი დამანებე, — უთხრა დინჯად მელამ, — ტყუი-

ლად შარს წუ მდებ, ვერა ხედავ, პატიოსანი ხელოსანი ვარ და ჩემს ხელობას ვადგეუარო.

დაიჯერა მგელმა მელიის ნათქვამი და ჰკითხა:

— რა ხელოსანი ხარ, ან მაგ წნელებით რას აკეთებო?

— რას ვაკეთებ და რასაც ჩემი მამა-პაპანი აკეთებდნენო, — მიუგო მელიამ, — აგე, ქვევით ქათმებს ხომ ხედავ, პოდა, მოექსოვ გოდორს, გადავიცვამ თავზე და დავგორდები. ასე ჩავალ ქათმებთან, დავიჭერ ერთ დედალს, შევითარე გოდორში და კაი ქეიფს გავწევო.

— თუ ღმერთი გწამს, მეც გადამაქსოვე თავზე გოდორი, — უთხრა მგელმა, — იმ ქათმებთან ცხვრებიც ჩანან და მე იმათკენ დავგორდებო.

გადააქსოვა მელამ თავზე გოდორი მგელს და დააგორა დაფრთხა ცხვრები, გამოცვივდა ხალხი კეტებით, ბარებით, მისდგნენ მგელსა და რაც დათვმა დააკლო, ახლა იმათ აუთავეს. დაადწია ხალხსაც თავი მგელმა და გაბოროტებული მელიას გამოეკიდა. მოფხოჭა მელიამ, მაგრამ მგელი წამოეწია, მოჰკრა კუდზე კბილი და მოსწყვიტა.

მელამ სიკვდილს თავი კი დაადწია, მაგრამ კუდი აღარ შერჩა. შეწუხდა ძალიან: ახლა როგორღა დავემალო მგელს, უკუდოს ყველგან მიცნობსო, და მგლის თავიდან მოშორება გადაწყვიტა.

— თუ ბოლო არ მოვუღე და სამუდამოდ არ მოვიშორე თავიდან ეგ გაუმაძღარი, ხეირს არ დამაყრისო, — თქვა და გაუდგა გზას.

იარა, იარა და გზაზე ერთი ვაჭარი დაინახა, — ურმით თევზი მიჰქონდა სოფელში გასაყიდად. უყელა მელიამ, დაუარა წინიდან და გზაზე მკვდარივით გაიშოტა. ვაჭარს მელია მართლა მკვდარი ეგონა, აიღო და ურემზე შეაგდო, — ტყავს გავაძრობ და ცოლს გავასარებო, — შეჯდა კოფოზე და გაეკა ხარები.

მელიამ ცალი თვალით გამოიჭყიტა და ნახა, რომ მეურამე უკან არ იყურებოდა. იმავე წამს წამოხტა, ურმიდან ერთი მოზრდილი ორაგული გადმოაგდო და თვითონაც ურმირად ჩამოხტა. აიღო ორაგული, გამოიბა კუდის ადგილზე და წამოვიდა მგლის საძებნელად.

შემოხვდა მგელი და მელია რომ ასეთი კუდიტ დანახა. მტრობა უცბად გადაავიწყდა, მსუქანი ორაგულის დანახვაზე პირწყალი მოადგა და გაკვირვებულმა ჰკითხა, — სად გიშოვნია ასეთი გემრიელი კუდიო?

— ეს, ამათ მეტი რა არის, — მიუგო მელიამ, — ერთ მორევში მთელი ქარავანია თავმოყრილი, მაგრამ მე ამ ერთის მეტს ვერ მოვერიეო.

— ახლავე წამიყვანე და მაჩვენე, თორემ მაგ შენი კუდიანად გადაგსანსლავო, — დაემუქრა მგელი.

— ბატონი ბრძანდებით, — უთხრა მელიამ, — წამოდი, მიგიყვან მორევთან და შიგ რაც ორაგულებია, სულ შენი იყოსო.

წაიყვანა მელიამ მგელი და მიიყვანა ერთ გაყინულ მორევთან. მეტისმეტი ყინვისაგან წყალი აფუებულიყო და შუა ადგილას ბუებუყით ამოდიოდა. მელიამ უთხრა მგელს:

— აგე იმ ყინულჭრილს ხომ ხედავ, მიდი, ჩაყავი კუდი შიგ და დილამდე ასე იყავი. რაც მორევში ორაგულებია, სულ კუდზე გამოგებმიან, დილაზე კი ამოსწიე, მთელი თევზები ნაპირზე ამოყარე და შეექცეო.

მგელს მელიას რჩევა ჭკუაში დაუჯდა, მართლაც და, ამ ერთმა თევზმა რა უნდა მიყოს, — თქვა გუნებაში, — ის არ მირჩევნია, რომ ყველა დავისაკუთრო, — და ჩაყო კუდი აფუებულ მორევში. ღამე ყინვამ უფრო მოუჭირა და მგელს კუდი ჩაუყინა.

ნახა თუ არა მელიამ მგელი ასეთ ყოფაში, გაიქცა და ერთ მინდორზე გავიდა. მინდორში თავადიშვილებს მწვევარ-მეძებრები გამოეყვანათ და ნადირობას აპირებდნენ. მელია დაენახვა ძაღლებს, ძაღლები ერთი ღავღავით გამოეკიდნენ, მელიამ მოკურცხლა და მორევში კუდჩაყინულ მგელს ჩაურბინა. მწვევარ-მეძებრებმა რაკი მგელი დაინახეს, მელია მაშინვე გადაავიწყდათ, მისცვივდნენ მგელს და თვალის დახამხამების უმალ ნაფლეთებად აქციეს.

ასე გადაუხადა მელიამ სამაგიერო, — დათვის ბელები დაუხოცა, მგელი მწვევარ-მეძებრებს გააგლეჯინა, თვითონ კი დღესაც ცოცხალია და ახალ-ახალ ოინებს იგონებს.

ჭირი — იქა, ლხინი — აქა,

ქათო — იქა, ფქვილი — აქა,



## ხელმწიფე და სკვინჩა

იყო და არა იყო რა, ღვთის უკეთესი რა იქნებოდა, იყო ერთი მეტიხმეტად ხარბი და უსამართლო ხელმწიფე. თავის საბრძანებელში რასაც კი კარგსა და მოსაწონს ნახავდა, ყველაფერი თავისთვის უნდოდა. მშრომელ ხალხს უკანასკნელ ლუკმა პურს და პერანგს ართმევდა და თავის ახლობლებსა და ნაზირ-ვეზირებს ურიგებდა. ხალხი დრტვინავდა, წუხდა, მაგრამ ვინ იყო გამკითხავი უბრალოდ საყვედურიც რომ დასცდენოდა ვისმეს, ხელმწიფე თავის ნაზირ-ვეზირებს მიუსევდა და მის ოჯახს დედაბუდიანად ააკლებინებდა.

ხალხი ისე გაღარიბდა, რომ ლუკმაპურის მეტი აღარავის რამე შერჩა. ხელმწიფეს ხალხისათვის წასართმევი რომ აღარაფერი დარჩა, ახლა ნადირ-ფრინველთა დამორჩილება მოინდომა. დაგზავნა ჯარები ოთხივ მხარეს, დააჭერინა ყველა ნადირ-ფრინველი, რაც კი მის სამფლობელოში იყო, მოარეკვინა და დილეგებში დაამწყვდევინა. კმაყოფილმა ხელმწიფემ ჯარის უფროსებს ჰკითხა, — ტყეში კიდევ ხომ არაფერი დაგრჩათო?

— მხოლოდ ერთი სკვინჩა დაგვრჩა, ძალიან პატარა იყო, დევნად არ ღირდა და იმიტომ არ დავიჭირეთო, — მთა ახსენეს სარდლებმა.

ხელმწიფე განრისხდა:

— რას ჰქვია, პატარა იყო! ჩემს საბრძანებელში ყველა მე უნდა შემორჩილებოდეს, დიდიც და მცირეც, ახლავე წადით, დაიჭირეთ ის სკვინჩაა თუ რაღაც ჯანდაბა და აქ მომგვარეთო!

წავიდნენ სარდლები. წაიყვანეს ჯარი ტყეში, დაიჭირეს

ბაწაწინა სკვინჩა და ხელმწიფეს მოჰგვარეს.—დაამწყვდიეთო — ბრძანა ხელმწიფემ. წაიყვანეს სკვინჩა და სხვებთან ერთად დილეგში შეაგდეს. სკვინჩა კარის ღრიჭოდან გამოფრინდა და ხელმწიფის ბაღში შეფრინდა. ბაღში ხელმწიფე დასეირნობდა და, რა თქმა უნდა, ერთგული ნაზირ-ვეზირებიც თან ახლდნენ. სკვინჩა ბლის ტოტზე დასკუბდა და ხელმწიფეს ჭიკჭიკით ჩამოსძახა:

მეფე ძარცვავს ღარიბებს,  
ვეზირებს კი ამდიდრებს.

— რაო? ეს ვინ მიბედავს თავხედობასო? — ყურები ცქვიტა ხელმწიფემ და ვეზირებს უბრძანა, დაიჭირეთო.

ვეზირები დაედევნენ, მაგრამ ცარიელი ხელებით სკვინჩას რას უზამდნენ. ბლიდან ქლიავზე გადაინაცვლა და ისევ მხიარულად აჭიკჭიკდა:

მეფე ხოცავს მართალ ხალხს,  
არც კაცს ინდობს და არც — ქალს!

ხელმწიფეს მთლად ცეცხლი მოეკიდა და ვეზირებს უყვირა:

— ახლავე დაიჭირეთ და ჩააჩუმეთ, თორემ თავებს დაგაცრევენებთო!

ვეზირები შიშის ელდამ აიტანა და სკვინჩას გაუკიდნენ, ჯარიც მოიშველიეს, მაგრამ სულ ამოდ, სკვინჩა ახლოს აღარავის იკარებდა, თვალი ფხიზლად ეჭირა, გადადიოდა ხიდან ხეზე, ტოტიდან ტოტზე და გაუთავებლად სულ ერთსა და იმავეს ჭიკჭიკებდა:

მეფე ძარცვავს ღარიბებს,  
ვეზირებს კი ამდიდრებს,  
მეფე ხოცავს მართალ ხალხს,  
არც კაცს ინდობს და არც — ქალს!

ხელმწიფე ჯავრისაგან მთლად გადაირია და ბლის გაკაფვა ბრძანა. გაკაფეს ბალი, მაგრამ სკვინჩამ სასახლის ეზოს საჩრდილობელ ხეივანზე გადაინაცვლა და კვლავ თავისი სიმღერა შემოსძახა. ხელმწიფემ ხეივანიც გააკაფინა.



მაგრამ ვერც ამან უშველა, სკვინჩა ახლა სასახლის სახეზე  
რავზე წამოსკუბდა და ხელმწიფეს იქიდან ჩამოსძახა:

მეფე ძარცვავს ღარიბებს,  
ვეზირებს კი ამდიდრებს,  
მეფე ხოცავს მართალ ხალხს,  
არც კაცს ინდობს და არც ქალს!

მეტის მოთმენა აღარ შეიძლებოდა, გაწბილებული ხელ-  
მწიფე შინ შევიდა, დაიბარა ნაზირ-ვეზირები, ჯარის სარ-  
დლები, კარისკაცები და სასტიკი ბრძანება გასცა, — ან  
დაიჭირეთ ეგ თავხედი ჩიტი, ან არადა ყველას სასრჩობე-  
ლაზე ჩამოგვიდებთო.

წავიდნენ ჯარის სარდლები და ნაზირ-ვეზირები და სა-  
ხელმწიფოში ვინც კი განთქმული მონადირე იყო, ყველა სა-  
სახლეში მორეკეს. მონადირეებმა გააწყვეს მახეები, ძუის ბა-  
დე-ფაცერები და როგორც იყო, სკვინჩა დაიჭირეს. ხელმწი-  
ფემ დიდად დაუმაღლა ქვეშევრდომებს ეს ერთგული სამსა-  
ხური და ბრძანა:

— ასლავე წაიყვანეთ სამზარეულოში, დაკალით, კარგად  
გაპუტეთ, შეწვით და სადილად სუფრაზე მომართვიეთო.

ხელმწიფის ბრძანება, რა თქმა უნდა, დაუყოვნებლივ  
შესრულდა: წაიყვანეს საბრალო სკვინჩა სამზარეულოში,  
დაკლეს, კარგად გაპუტეს, შეწვეს და ხელმწიფეს სადილზე  
მიართვეს. ხელმწიფე გამხიარულდა, რომ ბოლოს მაინც  
იყარა ჯავრი და სუფრას კმაყოფილი მიუჯდა. მაგრამ აქ  
ერთი საოცარი ამბავი მოხდა! შემწვარი სკვინჩა თეფშზე  
უცბად შეინძრა და ისევ ჩვეული ხმით აჭიკჭიკდა:

მეფეს სუფრას დავუმშვენებ,  
მაგრამ არ კი მოვასვენებ.

— ერთი ამას დამიხედეთ, რომ შემწვარიც არ ისვენებ-  
სო, — ისევ გაჯავრდა ხელმწიფე, საჩქაროდ მიგლიჯ-მოგა-  
ლიჯა და ძვლებიანად შეახრამუნა. კმაყოფილი ადგა სუფა-  
რიდან და, როგორც ხელმწიფეთა წესია, სადილის შემდეგ  
ეზოში გაისეირნა. ეგონა, ის აბეზარი ჩიტი ახლა კი სამუ-  
დამოდ მოვიშორეთო. მაგრამ ამჯერადაც მოტყუვდა, ჯერ

ორი ნაბიჯიც არ ჰქონდა გადადგმული, რომ საკუთარი მუცლიდან ისევ სკვინჩას ჭიკჭიკა ხმა გაიგონა:

ღირსი იყო, გავლანძღე,  
შიოდა და გავაძღე!

ხელმწიფეს ელდა ეცა, — ეს რა ამბავიაო?! დაიბარა კარის ექიმი და უთხრა, — ინსეთი წამალი მომეცი, რომ ეს წყეული ჩიტი მოკლასო. მისცა ექიმმა ათასნაირი წამლები — წვეთები და ფხვნილ-აბები, მაგრამ არც ერთმა არ უშველა. სკვინჩა მუცელში ფართხალებდა და გაიძახოდა:

ღირსი იყო, გავლანძღე,  
შიოდა და გავაძღე!

ბოლოს ხელმწიფემ ასეთ ხერხს მიმართა: ექიმს სასაქმებელი წამალი გამოართვა, დალია და ნაზირ-ვეზირები გააფრთხილა:

— შემომიდექით აქეთ-იქიდან ამოწვდილი ხმლებით და როცა გული ამერევა და პირიდან სკვინჩაც წამომვარდება, დაუქნიეთ ხმლები და შუა გაკვეთეთო.

იშიშვლეს ალესილი ხმლები ვეზირებმა და ამოუდგნენ ხელმწიფეს აქეთ-იქიდან. ხელმწიფეს გული აერია და დააბოყინა. ამ დროს სკვინჩაც გამოვარდა, ვეზირებმა მოუქნიეს ხმლები, მოახვედრეს ხელმწიფეს კისერში და თავი გააგდებინეს.

სკვინჩა კი უვნებლად გადარჩა, შეიბერტყა ფრთები, გაინავარდ-გამოინავარდა, მერე აივნის ღირეზე შემოჯდა და ისევ სიმღერა შემოსძახა:

უსამართლო მეფესა  
თავი ჩამოჰკვეთესა!

ხელმწიფის სიკვდილი რომ გაიგეს, გამოცვივდნენ დილეგებიდან დამწყვდეული მხეცები, მტაცებელი ფრინველები, დაერივნენ ხელმწიფის ოჯახს, ნაზირ-ვეზირებს და სულ მუსრი გაავლეს. ხალხმა ახალი, კეთილი ხელმწიფე აირჩია და დაიწყო წესიერი ცხოვრება.

ჭირი-იქა, ლხინი — აქა,  
ქატო — იქა, ფქვილი — აქა.



## ნუ დაჰპარბავ ძველსა გზასა

იყო და არა იყო რა, იყო ერთი მგელი — რუსი, ყურდაც-ქვეტილი, კუდბაწარა და კბილბასრი. ზამთარ-ზაფხულ, დღე და ღამე გაუჩერებლად დაძუნძულებდა და რასაც მოახელთებდა, კბილგაუკრავს არაფერს უშეებდა.

ერთხელ ერთი მსუქანი ძროხა გაფატრა და ისე გამოძღა ცვრიანი სორცით, რომ ეგონა, ახლა აღარასოდეს მომშვიდებო და ბერად შედგომა გადაწყვიტა:

„ჩემი წუთისოფელი სულ ქურდობასა და ტაციაობაში გამიტარებია, ახლა კი დროა, სულის ცხონებაზეც ვიფიქრო, მოდი, წავალ იერუსალიმში, ცოდვებს მოვინანიებ და სათნოების გზას დავადგებო,“ თქვა გულში, ახსენა ღმერთი, ამოიძუა კუდი ფეხებშუა და გაუდგა იერუსალიმის გზას.

მიდის მგელი, მიძუნძულებს. იარა, იარა და გზაზე ერთ შეინდა მოზვერს გადაეყარა, ისეთი მსუქანია, რომ ტყავში ველარ ეტევა, მაგრამ მგელმა თავი შეიკაგა და მოზვერს მეგობრულად მიესალმა, — გამარჯობა, მოზვერო!

— გაგიმარჯოს, მგელო, — უპასუსხა გაკვირვებულმა მოზვერმა და ჰკითხა, — სად მიხვალ ასე აჩქარებით, რა საქმე გამოგჩენიაო?

— ცოდვები მოვინანიე და ახლა იერუსალიმში მივდივარ, მინდა ბარემ ბერადაც შევდგეო, — უპასუსხა მგელმა.

— ძალიან კარგ გზას დასდგომიხარ, — მოუწონა მოზვერმა, — ღმერთმა ხელი მოგიმართოს, თუ მართლა შესძლებ და ბოლომდე გაიტანო.

გამოემშვიდობა მოზვერს მგელი და გაუდგა გზას. კარგა მანძილი რომ გაიარა, გზაზე ახლა ორი მსუქანი ყორი შემოხვდა. მგელს კბილები აუკაწკაწდა მათი დუმების დანახვაზე, მაგრამ ცდუნებას აქაც სძლია და ყორებს შორიდანვე მიესალმა:

— გამარჯობათ, ყორებო!

— გაგიმარჯოს, მგელო, — მიუგეს ყორებმა, — საით გაგიწევია, ან რა საქმეზეო?

— იერუსალიმს მივდივარ, სული უნდა გავიწმინდო და ბერად შევდგეო.

განზრახვა ყორებმაც ძალიან მოუწონეს, — კარგ გზას დასდგომიხარ და ღმერთმა ხელი მოგიმართოსო.

გასცდა მგელი ყორებსაც და გაუდგა გზას. მიდის მგელი, მიდის და ახლა ვირი შემოხვდა, ვირმაც მოუწონა საქციელი და გზაც დაულოცა.

იარა მგელმა, იარა და ბოლოს მივიდა იერუსალიმში. იერუსალიმი სანთლებით განათებული საყდრებითა და ეკლესიებით იყო სავსე, შესასვლელში ხელარგნიანი ბერები მიმოდრიოდნენ. ისმოდა ლოცვა-კურთხევა და გალობა, მაგრამ მგელს ეს ვერაფრად ეჭაშნიკა. ამ დროისათვის მოშივდა კიდეც და თვალწინ ის მსუქანი მოზვერი, ყორები და ვირი დაუდგა, გზაზე რომ უვნებლად დატოვა, დაავიწყდა სულის ცხონებაც და ბერად შედგომაც. „ეს რა სისულელე მომივიდა, — თქვა გულში, — როგორ გავუშვი ხელიდან ისეთი გემრიელი ლუკმა? ეგეც არ იყოს, მგელს იერუსალიმში ვინ შეუშვებს, აქ რომ დამინახონ, მომდგებიან თავიანთი არგნებით ეს ბერები და იქნება სულიც გამაფრთხობინონ. არა, ძმაო, მირჩევნია საიდანაც მოვსულვარ, ისევე იქით წავიდე, თორემ მე აქ ვერ ვიხეირებო.“

ადგა და უკანვე გამობრუნდა ვირის, ყორებისა და მოზვერის საქმენელად. ბევრი ძებნა არ დასჭირვებია, ვირიც, ყორებიცა და მოზვერიც იმავე ადგილებზე დახვდნენ, სადაც დატოვა. ჯერ, რა თქმა უნდა, ვირთან მივიდა. მომშეულს აღარც სალამი მოჰგონებია, აღარც ტკბილი გამარჯობა, პირდაპირ მგლურად მიეჭრა და ღრენით უთხრა: — უნდა შეგჭამო.

ვირი ამას აღარ მოელოდა და შიშით გული გადაუტრია ალდა. — აკი იერუსალიმს იყავი სულის საცხოვრებლად და რაღად მჭამო? — ჰკითხა.

— შიმშილმა იერუსალიმი არ იცის, — უთხრა მგელმა და უფრო ბრაზიანად შეუღრინა, — მოემზადე, დროს ნუ მაკარგვინებო.

— კარგი, რა გაეწყობა, ალბათ ეს ყოფილა ჩემი ბედისწერა, — თქვა ვირმა და მგელს ჰკითხა, — სიკვდილის წინ ერთ სათხოვარს თუ შემისრულებო?

— რა გინდა, ჩქარა თქვიო? — მოთმინება დაელია მგელს.

— უკანა ჩლიქში ლურსმანი მაქვს ჩარჩენილი და მაწამებს, ოღონდ ამის ჯავრს ნუ წამაყოლებ, ამომიღე და მერე რაც გინდა, ის მიყავიო.

— აბა მაჩვენე, სადა გაქვსო? — დაფაცურდა მგელი.

— აი, აქა მაქვსო, — უთხრა ვირმა და უკანა ფეხი გაუშვირა, მგელი ჩააფრინდა კბილებით, ვირმა ტყუპი წიხლი სდრუზა ცხვირ-პირში და გაბრუებული მიწაზე გააგორა. თვითონ კი ისე მოკურცხლა, რომ კურდღელიც ველარ დაეწეოდა.

ცოტა ხნის შემდეგ მგელი გონს მოვიდა და წამოდგა, შერცხვა თავისი მარცხისა, მაგრამ გული მაინც არ გაიტეხა, ვირი თუ გადამირჩა, ყოჩები ხომ აქ არიანო, — თქვა გულში და გამოსწია ყოჩებისაკენ. მიეჭრა შიმშილისაგან გაცოფებული და შეუტია, — მოემზადეთ, ახლავე ორივენი უნდა შეგჭამოთო!

— რა გაეწყობაო, — თქვეს ცხვრებმა, — ოღონდ ერთი სათხოვარი გვაქვს და სიკვდილის წინ უარს ნუ გვეტყვიო.

— თქვით, რა გინდათო? — ჰკითხა მგელმა.

— აი ეს მინდორი ჩვენი პატრონებისაა, — უთხრეს ყოჩებმა. — ჩვენი პატრონები ძმები არიან, როცა გაიყარნენ და ყველაფერი გაიყვეს, ერთი ერთ ძმას ვერგეთ, მეორე — მეორეს. გასაყოფი მარტო ეს მინდორი დარჩათ. ჩვენ გაყარის დღიდან ვდაობთ, მაგრამ აქამდე ვერ მოვრიგებულვართ და არ ვიცით, რომელს გვეკუთვნის. ახლა ამასა

გთხოვთ, სიკვდილის წინ სამართალი გაგვიჩინოთ, რომ  
საიქოში მაინც სადაო აღარაფერი გექონდესო.

— თქვენ როგორ გინდათ? — ჰკითხა მგელმა.

— შენ მინდვრის შუაში დადექი, — უთხრეს ყოჩებმა, —  
ჩვენ აქეთ-იქიდან გამოვიტყევით და რომელიც წინ მოვალთ,  
მინდორი იმას დარჩესო.

— კარგიოთ, — დათანხმდა მგელი და შუა მინდორში  
დადგა.

წავიდნენ ყოჩები ერთი — ერთ მხარეს, მეორე — მეორე  
მხარეს, მერე შემობრუნდნენ, გამოეჩანნენ რაც ძალი შეს-  
წევდათ, დაეჯახნენ რქებით მგელს და ნეკნები ერთმანეთზე  
შეაჭყლიტეს. წაიქცა მგელი და დაიწყო ფეხების ფშეკა. ყო-  
ჩებმა კი მოკურცხლეს და თავს უშველეს.

იფართხალა მგელმა, იფართხალა და, როგორც იქნა, წა-  
მოდგა. — ჯანდაბას მაგათი თავი, — თქვა გაწბილებულ-  
მა, — მოზვერი ხომ ველარსად გამექცევაო, — და გამოსწია  
მოზვრის საძებნელად.

მოზვერი მართლაც იმავე ადგილზე დახვდა. მიეჭრა მგე-  
ლი და შეუტია: — აბა, ჩქარა მოემზადე, უნდა შეგჭამოო.

— მე მზადა ვარ, — უთხრა მოზვერმა, — ოღონდ სიკვ-  
დილის წინ ერთი სათხოვარი მაქვს და უარს ნუ მე-  
ტყვიო.

— ოღონდ ლურსმანი არ გქონდეს ჩლიქში, ან მინდორი  
არ იყოს გასაყოფი და სხვას ყველაფერს შეგისრულებო, —  
უთხრა მგელმა.

— არაო, — მიუგო მოზვერმა, — მე სიმღერის მოყვარუ-  
ლი ვარ, დიდი ხანია, შენი ვაჟკაცური ხმა აღარ მომისმე-  
ნია, სიკვდილის წინ ერთი მიმღერე და მერე თუნდა ძვლე-  
ბიანად შემახრამუნეო.

მგელმა იფიქრა, ამაში სახიფათო არაფერი ჩანსო, და  
გააბა თავისებურად ყმუილი. იქვე ახლოს მეცხვარის ფარე-  
ხი იყო, გაიგეს ფარის კბილბასრა ძაღლებმა მგლის ყმუი-  
ლი და ღრენა — ყუფით გამოემართნენ, ეცნენ მგელს, ერთმა  
აქედან გაჰკრა კბილი, მეორემ — იქიდან, მესამემ თათი ჩას-  
ცხო თავში. აგორავეს და ჯენჯეს. მგელმა რის გაჭირვე-  
ბით დააღწია თავი, წავიდა ნაცემ-ნაბეგვი, დაგლეჯილი.

გასისხლიანებული, დაეგდო ზოროს წინ და მოჰყვა თავის თავზე ჯავრობას:

— რა მრჯიდა, რა ჩემი საქმეა სულის ცხონება, ან მე რომელი ნალბანდი ვიყავი, რომ ლურსმნის ამოღებას ვცდილობდი, ან რომელი მოსამართლე და მომღერალი? ახი არ იქნება, რომ ვინმე მოვიდეს ახლა და ამ სიბრყვიისათვის ერთი ფარსაგად მიმბეგვოსო.

ამ დროს მართლაც მეცხვარე მოდიოდა ცხენით. გაიგონა მგლის ჩივილი, მისდგა მათრახით და უცხუნა და უცხუნა. წელათრეული მგელი ძლივს გადაურჩა მეცხვარეს, ავიდა ერთ მაღალ მთაზე და ხმამაღლა დაიძახა:

— ასე დაემართოს ყველას, ვინც მამა-პაპურ ჩვეულებას და საქმიანობას უღალატოს და სხვათა გზასა და მაგალითს გაჰყვესო!

ტყუილად კი არ არის ნათქვამი: რაც არ ექნას მამაშენსა, ნურც შენ გაშლი მარმაშებსა.

ჭირი — იქა, ლხინი — აქა,

ქათო — იქა, ფქვილი — აქა.





## დედა ღორი და მგელი

იყო და არა იყო რა, იყო ქრთი ღორი, სახელად ღრუტუნა. ხუთი ჩაკიტრებულ-ჩამრგვალებული გოჭი ჰყავდა; ხუთივეს შესაფერი სახელი ერქვა: მშიანა, მცივანა, თბილანა, გვიანა და მაგარა. დედაღორი თვითონაც ჭკვიანი იყო და გოჭებიც ჭკვიანები დაზარდა.

ღრუტუნა დღისით შვილებს ბუნაგში ტოვებდა, თვითონ საჭმლის საშოვნელად მინდორში დადიოდა. თხრიდა ძირ-ხვენას, მაჩიტასა და სხვა ბალახ-ბულახის ფესვებს. სადაც საჩირქნი არაფერი იყო, არც მწვანე ბალახს იწუნებდა, ხოლო თუ ნაკარტოფილარს წააწყდებოდა, პირდაპირ აღდგომის დილა გაუთენდებოდა — თხრიდა ღონიერი დინგით ფაფუკ მიწას, ახრამუნებდა გემრიელ კარტოფილს და თან სულ ადამიანს ლოცავდა:

— რა კეთილია მშრომელი კაცი, თავისთვისაც სარჩოს იმარაგებს და საკბილოს არც სხვისთვის იშურებს. რა მეშველებოდა, რომ ქვეყნად ყველა მძული და უქნარა იყოსო.

არც მწიფე რქოსა და თხილ-პანტა-მაჟალოს იწუნებდა, ერთი სიტყვით, მადა ძალიან დიდი ჰქონდა და ძუძუებსაც პირთამდე იტენიდა რძით. საღამოს დაბრუნდებოდა შინ, გადაწვებოდა გულალმა და ნელი ღრუტუნით შვილებს მოუხმობდა, შვილებიც ხარბად ჩააფრინდებოდნენ დედის ძუძუებს და პატარა მუცლებს ტკბილი, ნოყიერი რძით იტიკინდნენ.



ცხოვრობდა ასე ღრუტუნა მშვიდად და აუმღერეველად. ზრდიდა შვილებს და თავის ყოფას თვითონვე დანატროდა.

ერთ დღესაც წავიდა მინდორში ღრუტუნა და თავის ჩვეულ საქმიანობას შეუდგა — თხრიდა მიწას და ახრამუნებდა გემრიელ ფესვებს. უცბად ნაწვევრალში თავის სოროს წააწყდა, სორო სულ სვავრიელი თავთავებით იყო გაჭედილი. ღრუტუნა თფთო-თითოდ იღებდა თავთავებს და მწიფე ხორბალს მადიანად აკნატუნებდა. საქმით გართულს ერთი მშინერი მგელი წამოეპარა ზურგიდან და გაგრძელებულად შეღმუვლა:

— გამარჯობა, დარბაისელო მანდილოსანო!

ღრუტუნა შეკრთა, სწრაფად შემობრუნდა და შიშისაგან სუნთქვა შეეკრა, — მის წინ კბილდაკრეჭილი მგელი იდგა და თვალებს საზარლად აბრიალებდა.

მგელი წინა თათებზე ჩაწვა, თვალები ცბიერად აახამხამა და ვითომ დიდი გულშემატკივარი იყო, ისე ჰკითხა:

— რატომ ჩიჩქნი მაგ მიწას, რადა წვალობ, ასე ხომ გახდები და ქონი და ხორცი შემოგადნებაო?

ღრუტუნამ იფიქრა, იქნებ ტკბილი სიტყვით როგორმე ჩამოვიცილო და რაც კი შეეძლო, მოწიწებით უპასუხა:

— გადღეგრძელოს ღმერთმა, დიდო ბატონო, აქ ერთი თავთავებით გამოტენილი სორო ვაპოვნე, წყეულ თავეს კაცის ნაშრომი მოუპარია და ზამთრის სარჩოდ თავის სოროში შეუზიდნია. ახლა სწორედ იმ თავთავებს გეახლებოდით, თუ ისიამოვნებთ, მგელო-ბატონო, კაი მსუქან თავთავებს ავირჩევთ და მიირთვითო.

— რაო? თავთავები მივირთვაო? — დაიყმუვლა მგელმა და ფესზე წამოხტა, — შენ მე ღორი ხომ არ გგონივარ, თავთავები ვაკნატუნო? ან იქნებ გინდა, რომ ყელში ფხა გამეჩხიროს და დამახრჩოს? ეგეც არ იყოს, შენ ვინ მოგცა ნება, რომ სხვათა ნაშრომ-ნაღვაწს მისდგომიხარ. ერთ საცოდავ ბაწაწინა ცხოველს ზამთრის სარჩო შეუგროვებია და შენ კი უნადგურებ, იყორავ გაუმაძღარ მუცელს და სხვას კი — სუსტსა და უმწეოს — მშიერს ტოვებ? ასეთი დიდი ცოდვა ქვეყნად ჯერ არც ერთ სულიერს არ ჩაუდენია, და ამ შეცო-

დებისათვის ღირსეულადაც დაგსჯი — ახლავე შგაღ-  
რბილიანად შეგახრამუნებო.

ღრუტუნა მიხვდა, რომ მისი საქმე წასული იყო, თუ რა-  
მეს არ მოიფიქრებდა.

— დიდო მბრძანებელო, — მიმართა უფრო ჭარბი მოწი-  
წებით, — თქვენი ნებაა, რასაც მიზამთ, მაგრამ სანამ შემ-  
ჭამდეთ, გთხოვთ ერთი სიტყვა მათქმევინოთო.

— ჩქარა თქვი, არ დამაგვიანო, მეტის მოფმენა აღარ  
შემიძლიაო, — უღრიალა მგელმა.

— მე ძალიან დიდი ხნისა ვარ, ბატონო, — უთხრა ღრუ-  
ტუნამ, — წლოვანებაც კი აღარ მახსოვს ჩემი, ჰოდა, სიბჭ-  
რისაგან ხორცი სულ აღარ მივარგა და ძვლებიც ქვასავითა  
მაქვს გამაგრებული, აბა ასეთს რა გემო უნდა ჩაატანოთ.  
წამობრძანდით ჩემს ბუნაგში, ხუთი გოჭი მყავს, — ერთსა  
ჰქვია მშინანა, მეორეს — მცივანა, მესამეს — თბილანა, მე-  
ოთხეს — გვიანა და მეხუთეს — მაგარა. ხუთივე ისეთი მსუ-  
ქანია; რომ სულ ქონი გასდით. მობრძანდით და რომელიც  
მოგეწონებათ, ის მიირთვიოთ, თუ ინდომებთ, ხუთივე თქვენი  
ფეშქაში იყოსო.

ღორის ნათქვამმა მგელი ძალიან დააფიქრა, ტყუილად  
კი არ არის ნათქვამი, ხერხი ჯობია ღონესა, თუ კაცი მოი-  
გონებსო. მართლაცდა, სად გოჭის ქორფა, ჩვილი ხორცი და  
სად ბებერი ღორისაო, თქვა გუნებაში მგელმა და ღრუტუ-  
ნას ჰკითხა:

— კარგი, გაპატიებ დანაშაულს, მაგრამ მითხარი, შენს  
ბუნაგში როდის ან რა დროს მოვიდეთ?

— როცა გენებოთ, ბატონო, — მიუგო ღორმა, — მაგ-  
რამ, ჩემი აზრით, სადამოთი ჯობია, უფრო უხიფათოდ  
მოხვალთ, ვერავინ დაგინახავთ და ჩვენც ყველანი ბუნაგში  
დაგხვდებითო.

მგელს ეს რჩევა ჭკუაში დაუჯდა. — კარგი, სადამოზე  
მოვალ, მაგრამ თუ მომატყუე, იცოდე, ცოცხალი ვერ გა-  
დამირჩებიო, — უთხრა ღორს და თავის გზით წავიდა. მი-  
დიოდა და თან ტურებს ილოკავდა, თვალწინ სულ მსუქანი  
გოჭები ელანდებოდა და ნერწყვს ნერწყვზე ყლაპავდა.

მგელი რომ წავიდა, ღრუტუნამაც მაშინვე თავის სახ-

ლისაკენ მოძუდა. თან სულ უკან იყურებოდა, ემანდ ღმერთი არ გაუწყრეს, სიწუწუკემ არ დასძლიოს და ისევ არ წამომეწიოსო.

მივიდა ღრუტუნა შინ, დაუძახა შვილებს, შემოისხა ირგვლივ და რაც თავს გადახდა, ყველაფერი დაწვრილებით უამბო. თან ყველანი სათითაოდ დაარიგა, თუ როგორ მოქცეულიყვნენ, როცა მგელი კარებს მოუკაკუნებდა ან რა ეპასუხნათ. ამის შემდეგ კარებს მაგარი ურდული გაუყარა, დააწვინა შვილები და თვითონაც გვერდით მიუწვა.

კარგა რომ ჩამობნელდა, მოვიდა მგელი და კარზე დააკაკუნა.

ღრუტუნამ ისე მოაჩვენა თავი, თითქოს არ იცოდა, ვინც აკაკუნებდა და შიგნიდან ტუქსვით გამოსძახა:

— ვინ ოხერი ხარ, ამ შუალამისას რომ აკაკუნებ. ამ დროს ყველა თავის კერაზე ზის და შენ თუ ავი სული არა ხარ, კარდაკარ რას დაეხეტებო?

— ვინა ვარ და მგელი ვარ, — შეჰყმუვლა გარედან მგელმა, — გაადე, ღორო, კარები, თორემ პირის გატეხისათვის ავ დღეს დაგაყენებო.

— ღორიც შენა ხარ და უარესიც, — გამოსძახა ღრუტუნამ, — დაიკარგე მანდედან და საიდანაც მოთრეულხარ, ისევ იქით წაეთრიეო.

მგელი მიხვდა, რომ ნებით ვერაფერს გახდებოდა და კარის შემტვრევა მოინდომა, მაგრამ ძვრაც ვერ უყო. ბოლოს მოტყუებით სცადა ფონს გასვლა და ტკბილი ხმით გოჭებს გაესაუბრა. ჯერ მშიანას დაუძახა, — კარი გამიღეო.

მაგრამ მშიანამ მგლის თვალთმაქცობა კარგად იცოდა და როგორც დედისაგან იყო დარიგებული, ისე უპასუხა:

— მე შენთვის არა მცალია, მშია და ძუძუსა ვწოვ, დაიკარგე მანდედან, ნუ მაწუხებო!

მგელმა ახლა მცივანას დაუძახა:

— მცივანა, კარი გამიღეო!

მაგრამ მცივანაც დედისაგან იყო დარიგებული და მგელს საკადრისი პასუხი გასცა:

— მე ისედაც ძალიან მცივა და გიჟი არ ვიქნები, რომ სარი გავაღო?!  
..

რაკი მცივანამ უარი სტკიცა, მგელმა ახლა თბილანას მიმართა:

— თბილანა, შენ მაინც გამიღე კარი, შენ ხომ აღარა გცივაო.

— შენ ხომ არ გადაირიე, — გასძახა თბილანამ, — ძლივს ფარსაგად ჩავითბუნე და შენი გულისთვის გვერდებს ვერ გავიცვიებო.

იქნებ გვიანა მაინც შევაცდინო, — თქვა გულში მგელმა და გვიანას შესძახა, — კარი გამიღეო!

— ახლა ძალიან გვიანია და კარს ვერ გაგიღებო! — ცივი უარი შეაგება გვიანამაც.

მგელმა ბოლოს მაგარას დაუძახა:

— მაგარა, გამიღე კარი, შენ ხომ მაგარი ხარ და შიში არაფრისა გაქვსო.

— მაგარი რომ ვარ, სწორედ ამიტომაც ვკეტავ კარს მაგრადო, — გამოსძახა მაგარამ.

მგელი ახლა კი მიხვდა, რომ შეაცდინა ღორმა და ბრახისაგან სულ ცეცხლი მოეკიდა.

— ახია ჩემზე, რომ შენ დაგიჯერე და დღევანდელ კვერცხს სვალინდელი ქათამი ვამჯობინე, — შესძახა ღრუტუნას, — მაგრამ იცოდე, თუ სადმე წაგასწარი და ხელში ჩამივარდი, შეუჭმელი ვერ გადამირჩებიო.

— კაი, თუ გავბრიყვდი და კიდევ ჩაგივარდი, მაგრამ მაგას ველარ ეღირსებო, — გამოსძახა ღრუტუნამ და არხეინად მეორე გვერდზე გადაბრუნდა.

ჭარი — იქა, ლხინი — აქა,

ქათო — იქა, ფქვილი — აქა.





## რწყილი და ჭიანჭველა,

მეგობარი ამქვეყნად ყველას სჭირდება — კაცსაც, პირ-  
უტყვისაც, ნადირ-ფრინველსაც და პაწაწინა არსებას — მწე-  
რსაც. ჰოდა, ერთხელ ერთი რწყილი და ჭიანჭველა დაძ-  
მობილდნენ და გაუდგნენ გზას ერთად. იარეს ბედნიერად,  
გადალახეს ბევრი მთა, ბევრი მინდორი და ბოლოს ერთ მო-  
ზრდილ რუს მიადგნენ. რწყილმა უთხრა ჭიანჭველას:

— მე გადავხტები და შენ რას იზამო?

— მეც გამძოვხტებიო, — მიუგო ჭიანჭველამ.

რწყილმა ისკუპა და გადახტა. ისკუპა ჭიანჭველამაც და  
შუა წყალში კი მოადინა ტყაპანი. წაიღო წყალმა ჭიანჭვე-  
ლა, ხედავს, საშველი აღარ არის და რწყილს შეეხვეწა:

— ძმობილო, მიშველე რამე, ნუ დამახრჩობო.

რწყილს თვითონ შეეღა არაფრით არ შეეძლო, ამიტომ  
ახტა, დახტა, მივიდა ღორთან და შეეხვეწა:

— ღორო, მომეც ჯაგარი,

დაეგრეს თოქსა-ბაწარსა,

ჩაუუგდებ და ამოვიყვან

ჩემს ძმობილ ჭიანჭველასა.

ღორმა ყურადღებით მოუსმინა და უთხრა:

— შენ რომ ჩემთვის რკო არ მოგიტანიაო?

რწყილი ისევ ახტა, დახტა, მივიდა მუხასთან და  
სთხოვა:

— მუხავ, მომეც რკო,  
რკოს მივუტან ღორსა,  
ღორი მომცემს ჯაგარსა,  
დავგრეხ თოქსა-ბაწარსა,  
ჩაუუგდებ და ამოვიყვან  
ჩემს ძმობილ ჭიანჭველასა.

მუხამ მოუსმინა, მსხვილი ტოტები შეარხია და უთხრა:  
— შენ რომ ჩემთვის ყვავი არ მოგიშორებიაო?

რწყილი კვლავ ახტა, დახტა, მივიდა ყვავთან და  
სთხოვა:

— ყვავო, ესენ მუხასა,  
მუხა მომცემს რკოსა,  
რკოს მივუტან ღორსა,  
ღორი მომცემს ჯაგარსა,  
დავგრეხ თოქსა-ბაწარსა,  
ჩაუუგდებ და ამოვიყვან  
ჩემს ძმობილ ჭიანჭველასა.

ყვავმა მოუსმინა და ყრანტალით უთხრა:

— შენ რომ ჩემთვის წიწილა არ მოგიყვანიაო?

რწყილი დაიღალა ამდენი ხტუნვით, მაგრამ რა ექნა, მე-  
გობარი ეღუპებოდა და თავს ვერ დაანებებდა. ისევ ახტა,  
დახტა, მივიდა კრუხთან და სთხოვა:

— კრუხო, მომეც წიწილა,  
წიწილს მივგვრი ყვაუსა,  
ყვავი დასთმობს მუხასა,  
მუხა მომცემს რკოსა,  
რკოს მივუტან ღორსა,  
ღორი მომცემს ჯაგარსა,  
დავგრეხ თოქსა-ბაწარსა,  
ჩაუუგდებ და ამოვიყვან  
ჩემს ძმობილ ჭიანჭველასა.

კრუხმა დაიკრუშკრუშა, გაიფხორა და უთხრა:

— შენ რომ ჩემთვის ფეტვი არ მოგიტანიაო?

შეწუხდა რწყილი, მაგრამ სხვა გზა არ ჰქონდა, ისეუ  
ახტა, დახტა, მივიდა ფეტვის ორმოსთან და სთხოვა:

— ორმოვ, მომეც ფეტვი,  
ფეტვს მივუტან კრუხსა,  
კრუხი მომცემს წიწილსა,  
წიწილს მივგვრი ყვავსა,  
ყვავი დასთმობს მუხასა,  
მუხა მომცემს რკოსა,  
რკოს მივუტან ღორსა,  
ღორი მომცემს ჯაგარსა,  
დავგრეხ თოქსა-ბაწარსა,  
ჩავუგდებ და ამოვიყვან  
ჩემს ძმობილ ჭიანჭველასა.

ორმომ პირი ფართოდ დააღო და უთხრა:

— შენ რომ ჩემთვის თაგვი არ მოგიშორებიაო?

რწყილს ბევრი აღარ უფიქრია, იმავე წამს ახტა, დახტა,  
მივიდა თაგვთან და შეეხვეწა:

— თაგვო, ეხსენ ორმოსა,  
ორმო მომცემს ფეტვსა,  
ფეტვს მივუტან კრუხსა,  
კრუხი მომცემ წიწილსა,  
წიწილს მივგვრი ყვავსა,  
ყვავი დასთმობს მუხასა,  
მუხა მომცემს რკოსა,  
რკოს მივუტან ღორსა,  
ღორი მომცემს ჯაგარსა,  
დავგრეხ თოქსა-ბაწარსა,  
ჩავუგდებ და ამოვიყვან  
ჩემს ძმობილ ჭიანჭველასა.

თაგვმა ტურები ააცმაცუნა, თვალები გადმოკარკლა და  
წრიბინით უთხრა:

— შენ რომ ჩემთვის კატა არ მოგიშორებიაო?  
რწყილი ახტა, დახტა, მივიდა კატასთან და სთხოვა:

— კატავ, ესენ თაგვსა,  
თაგვი დასთმობს ორმოსა,  
ორმო მომცემს ფეტვსა,  
ფეტვს მივუტან კრუხსა,  
კრუხი მომცემს წიწილსა,  
წიწილს მივგვრი ყვავსა,  
ყვავი დასთმობს მუხასა,  
მუხა მომცემს რკოსა,  
რკოს მივუტან ღორსა,  
ღორი მომცემს ჯაგარსა,  
დავგრეხ თოქსა-ბაწარსა,  
ჩაუგდებ და ამოვიყვან  
ჩემს ძმობილ ჭიანჭველასა.

კატამ თვალები მილულა, უღვაშებზე დარბაისლურად  
გადაისვა თათი და დაიკნავლა:

— შენ რომ ჩემთვის რძე არ მოგიტანიაო?

რწყილმა კვლავ მკვირცხლად ისკუბა, ახტა, დახტა, მი-  
ვიდა ძროხასთან და სთხოვა:

— ძროხავ, მომეც რძე.  
რძეს მივუტან კატასა,  
კატა დასთმობს თაგვსა,  
თაგვი დასთმობს ორმოსა,  
ორმო მომცემს ფეტვსა,  
ფეტვს მივუტან კრუხსა,  
კრუხი მომცემს წიწილსა,  
წიწილს მივგვრი ყვავსა,  
ყვავი დასთმობს მუხასა,  
მუხა მომცემს რკოსა,  
რკოს მივუტან ღორსა,  
ღორი მომცემს ჯაგარსა,  
დავგრეხ თოქსა-ბაწარსა,



ჩაუგდებ და ამოვიყვან  
ჩემს ძმობილს ჭიანჭველასა.

ძროხამ ნელა დაიზმუვლა, რწყილს დიდრონი თვალები  
მიაშტერა და ცოხნით უთხრა:

— შენ რომ ჩემთვის ბალახი არ მოგიტანიაო?


რწყილს მეტი აღარ შეეძლო, ამდენი სტუნვით მუხლები  
ასტკივდა, თავ-პირზე ხვითქი გადასდიოდა და სუნთქვაც  
უჭირდა, მაგრამ მეგობარს მაინც არ უღალატა, დაგლიჯა  
ბლომად ბალახი და ძროხას წინ დაუყარა.

ძროხამ ხარბად მოლოშნა ღორთქო ბალახი და მისცა  
რძე. რწყილმა რძე კატას მიუტანა, კატა თავვს ჩამოეხსნა,  
თავი — ორმოს, ორმომ ფეტვი მისცა, რწყილმა ფეტვი  
კრუხს მიუტანა და კრუხმაც ერთი წიწილა აჩუქა, რწყილი  
მაშინვე ყვავთან მიიჭრა და წიწილა მიუყვანა. ყვავმა დას-  
თმო მუხა, მუხამ მისცა რკო და რკო ღორს მიუტანა. გახა-  
რებულმა ღორმა მთელი კისრის ჯაგარი დაიგლიჯა და  
რწყილს მისცა. რწყილმა იქვე დაგრიხა ბაწარი, ჩაუგდო  
ჭიანჭველას და გამოიყვანა.

ჭირი — იქა, ლხინი — აქა,

ქათო — იქა, ფქვილი — აქა.





## ქალღების ენა

იყო და არა იყო რა, იყო ერთი საწყალი, გულკეთილი, მარტოხელა კაცი. კაცს ორი ძაღლის მეტი არაფერი ებადა, დღიურ მუშად დადიოდა და რასაც შოულობდა, ნახევარს ძაღლებს აჭმევდა, ნახევარს თვითონ ჭამდა.

მობეზრდა კაცს ასეთი ძაღლუმადური ცხოვრება და იფიქრა, მოდი, ცოლს მოვიყვან, იქნება ჩემს გაჭირვებას რამე ეშველოსო. მოიყვანა ცოლი და უარეს დღეში ჩავარდა: ისეთი ავი ქალი გამოდგა, რომ სულ თავბედს აწყევლინებდა, მსუნაგი და გაუმადლარი იყო და ქმარს სულ ხილსა და ტკბილეულს სთხოვდა.

ერთხელ იანვარში მარწყვი მოინდომა და ქმარს უთხრა, თუ მომიტან, მომიტან, თუ არა და, შენთან აღარ ვიცხოვრებო.

დაღონდა ქმარი, სად უნდა ეშოვნა იანვარში მარწყვი? მაგრამ ცოლი ცეცხლს უკიდებდა და სხვა გზა არ ჰქონდა, უნდა წასულიყო. ადგა კაცი, აიყოლია თავისი ძაღლები და წავიდა.

ბევრი იარა კაცმა. და ეძება, მაგრამ იანვარში მარწყვს სად იპოვიდა? ბოლოს მშიერი და დაღლილ-დაქანცული ერთი მდინარის ბირას მივიდა. იფიქრა, ამ მდინარეში თევზი უთუოდ იქნება, დავიჭერ და მეცა ვჭამ და ძაღლებსაც დავაბურებო. მართლაც, დაიჭირა ერთი თევზი და შეწვას უპირებდა, რომ თევზმა უცბად ენა ამოიდგა და კაცს შეეხვეწა, ოღონდ ნუ მომკლავ და ძაღლების ენას გასწავლიო.

კაცმა ჰკითხა:

— ძაღლების ენა რაში გამოვიყენო?

— იქნებ როდისმე გამოგადგეს, — უთხრა თევზმა, — არ იცი, რომ ცოდნა ზედმეტი არასოდეს არ არისო?

კაცმა იფიქრა, იქნებ მართლაც რამეში გამომადგესო, და თევზი გაუშვა. წამოვიდა, სოფელში ერთი პური იმათხოვრა, გატეხა შუაზე, ნახევარი ძაღლებს აჭამა და ნახევარი თვითონ შეჭამა.

პური რომ გაათავეს, ერთმა ძაღლმა მეორეს უთხრა:

— რა გულკეთილია ჩვენი პატრონი, ერთი პური იშოვა და ისიც ნახევარი ჩვენ გვაჭამა, ჩვენი დიასახლისი კი როგორი გულარჯლია, ნაცარტუტას აგვირევეს და ისიც ენანებდა, სულ თავში გვირტყამს და მშივრებს გვხოცავს. რა კარგი იქნებოდა, რომ ჩვენი პატრონი თავის აშარ ცოლს წამოიყვანდეს და დიდ მინდორში, ბებერი ვაშლის ქვეშ ღრმა ორმოში რომ ეშმაკების ჯადოქარი ზის, იმას ჩაუგდებდესო.

კაცმა ეს რომ გაიგონა, სიხარულით ცას ეწია. მივიდა დიდ მინდორში და ვაშლის ძირას ერთი უზარმაზარი ორმო დაინახა, ორმოში ეშმაკების ჯადოქარი იჯდა და თავისთვის რაღაც წყევლას ბუტბუტებდა. კაცმა ორმოს წვრილი ფიჩხი წააფარა და ზედ მწიფე ვაშლი დააყარა, მერე წავიდა შინ და ცოლს უთხრა:

— დედაკაცო, მართალია, მარწყვი ვერ მოგიტანე, მაგრამ სამაგიეროდ, ერთი ისეთი თურაშაული ვაშლი ვიპოვნე, რომ იმის ჭამას არაფერი ჯობსო.

— რატომ არ წამომიღე, შე მიწის შეჭმულოო? — დასჭყივლა ცოლმა.

— იმიტომ, რომ მთლიანად ვერ წამოგიღებდი, — უთხრა თავმოკატუნებით ქმარმა, — ისევ ჯობია, თვითონ წამოხვიდე და მთელ ვაშლს დაეპატრონო.

ცოლი მაშინვე ფეხზე წამოხტა და ქმარს შესძახა:

— აბა, გამიძეხი წინ და ახლავე იმ ვაშლთან მიმიყვანეო!

გაუძღვა კაცი წინ და წაიყვანა. მიიყვანა ვაშლის ხესთან. ცოლმა დაინახა ხის ძირას ფიჩხზე მიმოფანტული ვაშლები, შორიდანვე გაქანდა და ორივე ხელით დაააცხრა. მაგრამ

მოკრეფა აღარ დასჭირდა, — ფიჩხის საფარი ჩაენგრა და ვაშლებიანად ორმოში მოადინა ტყაპანი.

— ჯადო იყავ და ჯადოქართანაც მოხვდიო! — ჩასძახა კაცმა, მერე ერთი უშველებელი ლოდი მოაგორა, და აფარა ორმოს თავზე და გახარებული უკან გამობრუნდა.

გავიდა ხანი. ერთ დღეს თქვა კაცმა: მოდი, წავალ და დავხვდავ, რა ყოფაშია ჩემი ცოლიო. წავიდა, მივიდა ორმოსთან და მიაყურადა: ორმოდან რაღაც ჭლმურტული გაიგონა. კაცმა ასადა ქვას და რას ხედავს: ქალს ეშმაკების ჯადოქარი კუთხეში მიუგდია და თვითონ ხალვათად გაშოტილა. ჯადოქარმა დაინახა თუ არა კაცი, მაშინვე მუდარით ასძახა:

— ქრისტიანო, ადამიანო, ოღონდ აქედან ამიყვანე, ამ ჯადო დედაკაცს მომაშორე და საშვილიშვილოდ გაგაკეთებო.

ჩაუშვა კაცმა თოკი, ამოიყვანა ჯადოქარი და ორმოს ისევ ლოდი დააფარა. ჯადოქარმა უღრმესი მადლობა გადაუხადა კაცს და უთხრა:

— რაკი ამ ჯადო დედაკაცისაგან დამიხსენი, ახლა მე ვიცი და ჩემმა გრძნულულებამო. წავალ, თქვენს ხელმწიფეს რომ მზეთუნახავი ქალი ჰყავს, იმას საწოლზე თავით დავუჯდები და ისე ავად გავხდი, რომ სიკვდილის პირას მივიყვან. შენ ხმა დაყარე, ხელმწიფის ქალს მე მოვარჩენ, თუ ცოლად მომცემსო.

წავიდა ეშმაკების ჯადოქარი და დაუჯდა ხელმწიფის ასულს თავით. ქალი იმავე წამს სულთმობრძავი შეიქნა. დაიბარა ხელმწიფემ რაც კი გამოჩენილი მკურნალები ჰყავდა, მაგრამ ავადმყოფი ვერავინ მოარჩინა. გაიგო ეს კაცმა, წავიდა ქალაქში და ხალხში ხმა დაყარა, ხელმწიფის ასულს მე მოვარჩენ, თუ ხელმწიფე ცოლად გამატანსო. ხალხმა ეს ამბავი მაშინვე ხელმწიფეს შეატყობინა. ხელმწიფემ დაიბარა კაცი და ჰკითხა:

— მართლა შეგიძლია ჩემი ქალის მორჩენაო?

— შემიძლია და მოვარჩენ კიდევ, — უთხრა კაცმა, — თუ პირობას მომცემთ, რომ მორჩენის შემდეგ თქვენს ქალს ცოლად შემრთავთო.

ხელმწიფეს ძალიანაც არ უნდოდა თავისი ასული ღარიბ-ღატაკი კაცისათვის მიეთხოვებინა, მაგრამ თავს იქით ძალა არ ჰქონდა და დათანხმდა, — ოღონდ ნუ მომიკედება, მოახრინე და შენთვის დამილოცნიაო, — უთხრა კაცს.

— მაშინ წამიყვანეთ ავადმყოფთან, ოღონდ სხვა არავინ შემომყვესო, — უთხრა კაცმა.

წამიყვანეს ეს საწყალი კაცი და მარტო შეუშვეს ხელმწიფის ქალის საწოლში. ეშმაკების ჯადოქარმა ახადა ჯადო ქალს და ფანჯრიდან გაფრინდა. ქალი იმავე წამს კარგად გახდა, წამოდგა ლოგინიდან და საჭმელი მოითხოვა.

მოახსენეს ხელმწიფეს მისი ქალის გამოჯანმრთელება ხელმწიფე ცას ეწია სიხარულით, იმავე დღეს ჯვარი დასწერა საწყალ კაცზე და მზითვად ნახევარი სახელმწიფო უბოძა. მივიდა ეშმაკების ჯადოქარი კაცთან და უთხრა:

— რასაც შეგპირდი, ხომ შეგისრულე, ახლა იცოდე, მე უობელი ხელმწიფის ჯავრი მჭირს და იმისი შვილი უნდა გავხადო ავად. ვიცი, შეიტყობენ შენს ამბავს და სამკურნალოდ მიგიწვევენ, არამც და არამც არ დათანხმდე, თორემ რაც გაშოვნინე, იმასაც წაგართმევო.

წავიდა ეშმაკების ჯადოქარი და მძინარე ხელმწიფის შეიღს საწოლის თავით დაუჯდა. გახდა ხელმწიფის შვილი ავად, წევს სულთმობრძავი და აღარც ცოცხლებშია, აღარც მკვდრებში. აბა, ექიმები, აბა, წამლები, მაგრამ არაფერს შველის, ამ დროს კარისკაცებმა გაახსენეს ხელმწიფეს, — ჩვენს მომიჯნე ხელმწიფეს რომ ქალი მოურჩინა, ის მკურნალი დაიბარე და შენს შვილსაც განკურნავსო.

აფრინა მაშინვე კაცები ხელმწიფემ კაცთან და დიდძალ გასამრჯელოსაც შეპირდა, მაგრამ კაცს ჯადოქარის გაფრთხილება გაახსენდა და ცივი უარი შეუთვალა, — მე არც ექიმობა ვიცი და არც ფეხს მოვიცვლიო.

ხელმწიფემ უკანვე გააბრუნა თავისი შიკრიკები და დააბარა: — ან ახლავე აქ გაჩნდეს, ან არა და, უომრად არ გავუშვებო.

დაღონდა კაცი, აღარ იცის, რა ქნას, — წავიდეს, ჯადოქარი შემოსწყრება და ყველაფერს წაართმევს, არ წავიდეს და კიდევ უარესი — ხელმწიფე ჯარს მიუსევს და მიწას-ნ. ქართული ხალხური ზღაპრები

თან გაასწორებს. ამ ფიქრში რომ იყო კაცი, უცბად მისი ძაღლები ალაპარაკდნენ, ერთმა უთხრა მეორეს:

— ჩვენი ბატონი დიდ გასაჭირშია, მაგრამ საქმე არც ისეთი ძნელია: რომ წავიდეს იმ ავადმყოფთან და ჯადოქარს უთხრას, ჩემი ცოლი თრმოდან ამოსულა და შენ დასასრნობად მოდიხო, ჯადოქარი შიშით მაშინვე გაეცლება ხელმწიფის შვილს და გადაიქარება. ავადმყოფი მორჩება და ხელმწიფე გასამრჯელოდ ნახევარ სახელმწიფოს მისცემსო.

კაცმა ეს რომ გაიგონა, სახე იმედით გაებაღრა, მაშინვე წამოდგა და ხელმწიფის კარისკაცებს განუცხადა, — მოვდივარო!

ხელმწიფემ დიდი პატივით მიიღო. კაცმა უთხრა: — წამიყვანეთ ავადმყოფთან, ოღონდ მარტო შემიშვით, სხვა არავინ შემომყვესო. შეიყვანეს კაცი ავადმყოფთან. ეშმაკების ჯადოქარმა რომ დაინახა, უზომოდ განრისხდა და კაცს დაეტაკა: — ხომ გითხარი, სხვაგან აღარ წახვიდე ავადმყოფის მოსარჩენად, თორემ რაც გაშოვნივე, ისევე წაგართმევო.

კაცმა უთხრა:

— თრმოში, შენთან, დედაკაცი რომ ჩამოვაგდე, ის ამოსულა და შენს დასასრნობად მოდიხო. — დედაკაცის გახსენებაზე ჯადოქარს შიშით გააცივ-გააცხელა, გავარდა კარში და ცხრა მთას იქით გადაიქარვა.

ხელმწიფის შვილი, რა თქმა უნდა, მაშინვე კარგად გახდა. ხელმწიფემ შვილის გადარჩენის ნიშნად დიდი ნადიმი გადაიხადა და კაცს დაპირებული ნახევარი სახელმწიფოც დაულოცა.

ჭირი — იქა, ლხინი — აქა,

ქატო — იქა, ფქვილი — აქა.





## დათვი და მელია

იყო და არა იყო რა, იყო ერთი გლეხკაცი. ერთი ფარა ცხვრისა და ერთი გოგონას მეტი არაფერი ჰყავდა. მეწველ ცხვარში თვითონ დადიოდა და ბატკანში გოგონას გზავნიდა.

ერთ დღეს გოგონამ ადრე ვერ გარეკა ბატკნები: გზაზე დაუცხა, ფარა დაემურა და ვერ იქნა, ველარ გაშალა. იჯდა და ტიროდა. ამ დროს მელიამ გამოიარა და ჰკითხა:

— რა გატირებს, გოგონავ, რა დაგმართნიაო?

— ბატკანი დამემურა და ველარ გამიშლიაო, — უპასუხა გოგომ.

— თუ ერთ ბატკანს მომცემ, — უთხრა მელიამ, — მე გავიშლიო.

— მოგცემო. — დაეთანხმა გოგონა.

მელიასათვის მისაცემი ბატკანი გაიყვანეს და ხეზე მიაბეს. მელია შევარდა ბატკნებში და კუდის ქნევა დაიწყო. ბატკნები დაფრთხნენ და გაიშალნენ. ხეზე მიბმული ბატკანი მელიამ წამოიყვანა. სიხარულით ფეხზე ძლივს დაიდგა.

მელიას ძალიან უყვარდა თავისი ბატკანი და მუდამ პირით უზიდავდა ბალახს. გაუკეთა ერთი სახლი და იმაში ჰყავდა. საღამოს, შინ რომ დაბრუნდებოდა, ეთამაშებოდა ბატარა ბატკანს და ორივენი სარობდნენ.

ერთ დღეს დათვმა დაინახა, რომ მელიას ბატკანი ჰყავდა და იფიქრა: როგორმე უნდა შეეუჭამო.

მელია რომ შინ დაბრუნდებოდა, ფესს შეუყოფდა კარში  
ბატკანს და დაუძახებდა:

ბეკო, ბეკო, ბეე,  
კარი გამიღე,  
ბირით ბალასი მომაქვს,  
ძუძუებით — რძე.

ბატკანიც დაინახავდა მელიას პატარა თათს და გაუღებდა  
კარს. ეს სიტყვები დათვმაც დაიხსომა. ერთხელ, როდესაც  
მელია სსვავან იყო, ბატკნის სახლთან მივიდა და ბოხი  
ხმით დაუძახა:

ბეკო, ბეკო, ბეე,  
კარი გამიღე,  
ბირით ბალასი მომაქვს,  
ძუძუებით — რძე.

ბატკანმა დაუძახა: აბა ერთი თათი შემოყავიო. დათვმა  
შეყო თათი, მაგრამ დიდი და ბანჯგვლიანი თათი ჰქონდა,  
იცნო ბატკანმა და უთხრა:

— წადი, მე ჩემი დედობილის თათს კარგად ვიცნობ,  
შენ ის არა ხარ; იმას პატარა თათი აქვს და შენ — დიდიო.

დარჩა დათვი გაწბილებული. გაბრაზდა, რადაც არ უნდა  
დაშიჯდეს, ეს ბატკანი მაინც სელთ უნდა ვიგდოო, და წა-  
ვიდა ტყეში.

ავდრიანი დღე იყო. მწყემსებს ცეცხლი ენთოთ და ირგ-  
ვლივ შემოსხდომოდნენ. დათვი გადაუხტა, დააფრთხო ეს  
მწყემსები, თვითონ ნაცარში ამოითხუპნა, გაიტრუსა თათი  
და წავიდა ისევ ბატკნის სახლისაკენ. მივიდა კართან, შეყო  
ჭურჭრუტანაში თათი და წვრილი ხმით დაუძახა:

ბეკო, ბეკო, ბეე,  
კარი გამიღე,  
ბირით ბალასი მომაქვს,  
ძუძუებით — რძე.



ბატკანმა გაუღო კარი, დათვი შევიდა, მაგრამ მაშინვე კი არ შეჭამა, უნდოდა მიზეზი რამ ეპოვა. გადაგორდ-გად-მოგორდება ბატკნის წინ, დააბოყინებს და ეტყვის:

— ეგ რა ჰქენი, ბეკეკო, შე უზრდელიო?

— მე არაფერი მიქნიაო, — უბასუსებს ბეკეკო.

— სუ, თორემ შეგჭამო.

— ხელსაც ვერ მასლებო, — მიუგებს ბეკეკო, მელიას იმედი აქვს.

გადაგორდება დათვი ისევ, დააბოყინებს და ეტყვის:

— არც ახლა ჰქენ, შე უზრდელიო?!

— არაფერიც არ მიქნიაო.

— ბეკეკო, შეგჭამო, — დაემუქრება დათვი.

— ხელსაც ვერ მასლებო, — მიუგებს ბეკეკო.

დათვმა დაიჭირა ბატკანი, მაგრამ მელიასი ეწინოდა და შთლად კი არ შეჭამა, ნახევარი მას შეუნასა.

გამოვიდა დათვი და მელიას შეეფეთა. მელია მაშინვე მისვდა, რა ამბავიც მოხდებოდა. დათვმა დაუძასა:

— ძმისწულო, ბატკანმა გამაჯაჯრა და შეეჭამე, ნახევარი შენ შევინაპეო.

— მადლობელი ვარო, — მოასხენა მელიამ ეშმაკობით, — ბატკნის სორცს არა ვჭამ, ბიძავ. რაც დარჩა, ისიც შენ შეჭამე, მე მინდა ნასუქი დეკეულის სორცი ვჭამო და შენც გაჭამო; აქ ასლოს ქორწილია, წავიდეთ, ბოსელს დავვცეთ, ყველანი მთვრალეები არიან, ვერაფერს გაგვიგებენ და შეგვრჩებაო.

დათვს გაუსარდა!

— წავიდეთო!

წავიდნენ მართლაც. შევიდნენ ბოსელში, წააქციეს ერთი მსუქანი დეკეული, მიაძღა დათვი და მელიას უთხრა:

— მოდი, ერთი ჩვენც შემოვძასოთ მაყრულიო.

მელიამ უთხრა:

— მე ხმა ჩამიწყდა, შენ ბოსი ხმა გაქვს, შენ შემოსძახეო. დაიღრიალა დათვმა თავისებურად. გაიგონეს დათვის ღრიალი მაყრებმა, გამოუცვივდნენ. მელიამ ფხაჭა გაადინა კარის ძირიდან და თავს უშველა. დათვი კი დარჩა მაყრების ხელში. გამოიყვანეს ჩვენი „ბიძა“ და ნეჟე-დედოფლის შე-

საქცევად ტყავი გააძვრეს. ტყავგაძრობილმა დათვმა როგორ-  
დაც მოახერხა გაქცევა და თავს უშველა.

ძალიან გაჯანჯარებული იყო მელიაზე. დღედაღამ ეძებ-  
და, უნდოდა ჯავრი ამოეყარა. ერთ დღეს დაინახა — მელია  
ჯაგის ძირში ზის, გორაზე. წავიდა მისკენ. დაინახა მელიამ  
და თითქოს ვერ იცნოთ, პირი მოარიდა. დათვმა დაუძახა:

— აბა, მანდ დამიცადეო.

მელიამ მიუგო:

— ხმა ჩემი ბიძისაა, მაგრამ ეს წითელ-ყვითელი ტან-  
საცმელი კი იმისი არ არისო.

გამოუდგა დათვი მელიას. მელია გაძვრებოდა ეკლიან  
ჯაგში და კუფს მიუშვერდა დათვს, რომ ისიც შეეცყუებინა.  
ნისდევდა დათვიც, იკაწრებოდა, სდიოდა სისხლი და ყვი-  
როდა. მელია კი გაექცეოდა და ასლა სხვა ჯაგში წამოს-  
კუბდებოდა.

მერე მელიამ დაუძახა:

— ოღონდ ნუ მაწვალებ და მე თვითონ მოვარჩინო.

— როგორაო? — დაუძახა დათვმა.

— როგორ და ამგვარად: ხომ გინახავს, რას უშვრებიან  
მეცხვარეები მგლისაგან დაგლეჯილ ცხვარს? წადი, სახნის-  
საკვეთი მოიტანე, გავახურებ, დაგდაღავ და მოარჩებო.

დათვი წავიდა, მოიბარა სახნის-საკვეთი და მიუტანა მე-  
ლიას. მელიამ გაასურა სახნის-საკვეთი, დაუძახა მწყემსებს,  
შეაკრევიანა ფეხები დათვისთვის და უთხრა:

— უნდა დავდალო და მოვარჩინო.

დაუწყო დაღვა მელიამ, იწყო ყვირილი დათვმა. როდე-  
საც კარგა აღრიალა მელიამ „ბიძა“, გაუხსნა ფეხები და  
უთხრა:

— ასლა მოვნახავ გოდორს, ჩაგიგებ თივა-ბუმბულს,  
ჩაგსვამ შიგ და ბეწვი ამოგივო.

მოაწვნივინა მწყემსებს ერთი გოდორი, ჩასვა შიგ, გადა-  
უწინა თავი და გააგორა. აგორა, აგორა და ერთი კლდის  
თავზე აიტანა. იქ წიხლი ჰკრა და ძირს გადაუშვა.

ჭირი — იქა, ლხინი — აქა,

ქათო — იქა, ფქვილი — აქა.



## სამშენებანა ზაბუკი

იყო და არა იყო რა, ღვთის უკეთესი რა იქნებოდა, იყო ერთი ღარიბი მეწისქვილე, წისქვილის ეზოში ერთი ძირი ვაში ედგა და ზედ სამად-სამი მტევანი ება.

მტევნები რომ დამწიფდა, მეწისქვილემ მოიტანა სამსაპალნიანი ქვევრი და დაუწყო რეცხვა. ამ დროს ერთმა მელიამ ჩამოიარა და მეწისქვილეს დაეღრიჯა:

— შენი ჭირიმე, ჩემო მეწისქვილე, ერთი მტევანი მომიწყვიტე და ბედსა გწევო.

— შენ ხომ არ გაგიჟდი, — უთხრა მეწისქვილემ, — ვერა ხედავ, ამ სამი მტევნის გულისთვის ამოდენა ქვევრსა ვრეცხავ, რომ მოგიწყვიტო, შიგ რაღა ჩაწურაო?

მელიამ იმდენი უჩიჩინა, იმდენი, რომ ერთი მტევანი მოაწყვეტინა. შეძვრა იქვე ბუჩქებში, გასვლიბა ყურძენი, ისევ მეწისქვილესთან დაბრუნდა და ასლა მეორე მტევანი სთხოვა:

— ჩემო მეწისქვილე, ერთი მტევანიც მომიწყვიტე და ბედსა გწევო.

მეწისქვილე ისევ უარზე დადგა:

— რას ამბობ, კაცო, ეს ორი მტევანი ყურძენილა დამტრია და ერთი კიდევ რომ მოგიწყვიტო, ამ სამსაპალნიან ქვევრში რაღა ჩავასხაო?

მაგრამ მელია რის მელიადა იქნებოდა, თუ მეწისქვილესაც ვერ შეაცდენდა. იმდენი ესვეწა და ეთილისმა, — ბედსა გწევო, — რომ მეორე მტევანიც მოაწყვეტინა.

ისევ გაცუნცულდა ბურჩებში, გასვლიბა ყურძენი, ისევ უკან გამოცუნცულდა და მეწისქვილეს წინ დაუტყუქდა.

— ჩემო მეწისქვილე, ეგ ერთი მტევანიც მომიწყვიტე და ბედსა გწევო.

დაფიქრდა მეწისქვილე: „ამ ერთი მტევნით ქვევრს მაინც ვერ ავავსებ და მელამ კი შეიძლება მართლა ბედსა მწიოსო“, — თქვა გულში და ის მესამე მტევანიც მოუწყვიტა.

მელამ მტევანი მეწისქვილის თვალწინ გასვლიბა, გაილოკა უღვაშები და უთხრა:

— ახლა წავალ და ხელმწიფის ქალს გითხოვ ცოლადო.

მელიას ნათქვამი მეწისქვილეს სიცილად არ ეყო:

— აბა რას ამბობ, ჩემო მელიავ, ხელმწიფე მე ქალს როგორ მომცემსო?

— შენ კარგად იყავი, მე ნურა ამტკივა რა, და როგორ არ მოგცემს, მაგასაც ვნახავო, — უთხრა მელიამ და გასწია ხელმწიფის სასახლისაკენ. მივიდა ხელმწიფესთან და მოახსენა:

— დიდებულო ხელმწიფევ, სამმტევანა ჭაბუკი ქალსა გთხოვთ ცოლად და უნდა მისცეთო.

ხელმწიფეს ასეთი არავინ გაეგონა და მელას ჰკითხა:

— ვინ არის ეგ სამმტევანა ჭაბუკი, რა კაციარ?

— კარზე სამი ძირი ვაზი უდგას, — უთხრა მელამ, — სამ ძირზე სამი მტევანი ყურძენი უბია და მათი ნაწურით სამსაპალნიან ქვევრს ავსებსო.

— ო, ეგ მართლაც უცნაური კაცი ყოფილაო, — გაიკვირვა ხელმწიფემ და მელიას უთხრა, — აბა, ერთი მომიყვანე და მაჩვენეო.

წამოვიდა უკან მელია, მოვიდა მეწისქვილესთან და უთხრა:

— ჩქარა მოემზადე, ხელმწიფეს სასიძოს გაცნობა სურსო.

მეწისქვილემ თავის გახრილულ ტანსაცმელზე დაიხედა და სულ გააცია და გააცხელა, — ასეთი რომ მივადგე ხელმწიფეს ქალის სათხოვნელად, ხომ მაშინვე თავს მომკვეთავსო.

— რასაც გეტყვი, შენ ის გააკეთე და დანარჩენი მე ვი-

ციო, — უთხრა მელამ, გამოატანინა წისქვილიდან ორი დიდი ტომარა, მისცა ხელში მეწისქვილეს და შარაგზის პირას გაიყვანა. გზაზე ერთი სომეხი ვაჭარი მიდიოდა და ურმით გასაყიდი ქუდები და ტანსაცმელი მიჰქონდა. მელამ უთხრა მეწისქვილეს: — შენ ურემს უკან გამოჰყევი და რასაც გადნოყერი, ყველაფერი ტომრებში ჩაყარეო, — თვითონ წინ გაუსწრო ურემს, გაწვა შუაგზაზე და თავი მოიმკვდარუნა.

მიადგა ურემი მელიას. სომეხს მართლა მკვდარი ეგონა და ცას ეწია სისარულით, — მუქთი საქუდე ტყავი ვიშოვეო, — დაავლო ხელი მელას და ურემში გადაუძახა, თვითონ ისევ კოფოზე დაჯდა და სარები გარეკა.

მელიასაც ეს უნდოდა, რაკი ვაჭრის თვალი იცდინა, ყარა და ყარა ქუდები და ტანსაცმელი ურმიდან. მეწისქვილე უკან მიჰყვებოდა და ყველაფერს ტომრებში ყრიდა. ორივე ტომარა პირთამდე რომ გაავსო, მელა მხოლოდ მაშინდა ჩამოხტა ურმიდან, ერთი ტომარა თვითონ წამოიკიდა, მეორე მეწისქვილეს აჰკიდა და გზის პირას უჩინარ ადგილზე დამალა. მერე მეწისქვილეს ურემში შეაბმევინა, დაადებინა ტომრები ზედ და გაუძღვა ხელმწიფის სასახლისაკენ.

ხელმწიფის სახლს შორიასლო დიდი მდინარე ჩამოუდიოდა, მაგრამ ზედ ხიდი არ იყო. მდინარესთან რომ მივიდნენ, მელამ ხარ-ურემიცა და ტომრებიც წყალში ჩაყარა, მეწისქვილე ნაპირზე დატოვა, თვითონ ცურვით გავიდა, შევარდა ხელმწიფის ეზოში და ერთი ყვირილი და ვაი-ვიში ატეხა: დავიღუპეთ! ვინა ხართ ქრისტიანი, გვიშველეთო!

გამოიხედა ხელმწიფემ და ჰკითხა:

— რა მოხდა, რა გაყვირებსო?

მელიამ უფრო უმატა ყვირილს და მოთქმას:

— რალა რა მოხდა, ჩემო ხელმწიფე, სასიძო მომყავდა თქვენთან თავისი ამალით, მაგრამ წყალმა ურემი გადაგვიბარუნა და ხალხი სულ დაგვისრჩო. აგე, მდინარეს რომ ქუდები და ტანსაცმელი მიჰქვს, სულ ჩვენი ამალისააო. ბედად, სიძე ცოცხალი გადარჩა, მაგრამ ტანსაცმელი იმასაც წყალმა მოსტაცა და დედისობილა მდინარის გაღმა იცდისო.

ხელმწიფემ ბრძანება გასცა:—ახლავე ძვირფასი ტანსაცმელი გაუტანეთ, ჩააცვიოთ და აქ მომიყვანეთო!

მსახურებმა იმავე წამს გაუტანეს მეწისქვილეს ტანსაცმელი. გამოაწყვეს როგორც წესია, როგორც ხელმწიფის სასიძოს ეკადრებოდა. შესვეს საუკეთესო ბედაურზე და დიდი ბატივით შეიყვანეს სასახლეში.

მელიამ განუგო გაისმო მეწისქვილე და უთხრა:

— არამც და არამც ტანსაცმელზე ყურება არ დაიწყო, ან სხვა არაფერი გაგიკვირდეს, თორემ შეგატყობენ, რომ ხამი ხარ და ქალს აღარ გაგატანენო.

მეწისქვილე თავის სიცოცხლეში პირველად ხედავდა ასეთ ტანსაცმელს და რას არ დაიხედავდა! ასევე უკვირდა სახლის მდიდრული მორთულობა და ოქროთი მოვარაყებულ ი კედლები და სულ აქეთ-იქით იყურებოდა.

ხელმწიფემ ითმინა, ითმინა, მაგრამ ბოლოს ველარ მოითმინა და მელიას ჰკითხა:

— მელიავ, რა არის, რომ ეს ჩემი სასიძო სულ ტანსაცმელზე იყურებო?

რა ღმერთმანი მელასაც პასუხი გაუჭირდებოდა, წამოდგა და ყველას გასაგონად მოახსენა:

— რა არის, დიდებულო ხელმწიფევ, და ჩაცმულობა არ მოსწონს, ხომ თქვენ თვითონაც დაინახეთ, წყალმა როგორი ძვირფასი ტანსაცმელი მოსტაცა, ეგ თქვენი ნაძღვნევი იმისთანა ვერ არის და იმიტომ უყურებსო.

შერცხვა ხელმწიფეს და ბრძანა:

— ახლავე ტანსაცმელი გამოუცვალეთო! — და მსახურებმაც სულ ოქრომკედით ნაკერი ტანსაცმლით შემოსეს.

მეწისქვილეს ამ ძვირფასმა ტანსაცმელმა მთლად თავი გზა აუბნია, აღარ იცოდა სად წასულიყო და სულელივით სულ აქეთ-იქით იყურებოდა. ხელმწიფემ ისევ მელას ჰკითხა:

— ახლა რაღად იყურება ასე უცნაურად, კიდევ ხომ არაფერს სწუნობსო?

— ახლა სახლს სწუნობს, — უთხრა მელიამ, — ეს რანაირ სახლში შემომიყვანეს, მასხარად ხომ არ მიგდებენო?

ხელმწიფის ბრძანებით, მეწისქვილე მაშინვე უფრო მდიდრულად მორთულ სასახლეში გადაიყვანეს და სუფრაც იქ გაუშალეს.

ამასობაში ნეფე-პატარძლის წასვლის დროც დადგა.

ხელმწიფემ მთელი თავისი ჯარი, ნაზირ-ვეზირები და მსპ ხურები გამთაყოლა მაყრებად ქალ-სიძეს და თან ათი ურე-ში ბურ-ღვინთ და შემწვარ-მოხრაკული გამოატანა. მიუძღვის მეწისქვილე ამ უზარმაზარ მაყრონს და თან ჭირის ფულში ცურავს, — ერთი დანგრეული წისქვილის მეტი რომ არა მამადია. რა, ეს ამოდენა სტუმარი სად მივიყვანო?

— შიში ნერაფრისა გაქვს, — უთხრა მელიამ, — შენ მარტო გზაზე მაყრები როგორმე შეაგვიანე, რომ თადარიგა მთვალსწრო და დანარჩენი მე ვიციო. — დატოვა მელიამ მეწისქვილე მაყრონთან და დაწინაურდა.

წისქვილის ასლოს სიმდიდრით განთქმული დევები სას-ლოზედნენ. რაღა არ ჰყავდათ და ჰქონდათ: მათი ცხვარ-ძრო-ხისა და ჯოგების ტარება მთა-ბარს უჭირდა, სოლო ბრუ-ლისა და მარმარილოს სასახლეები თვალმარგალიტითა და თქრო-ვერცხლით ჰქონდათ გამოტენილი. მელია მათზე ნა-წყენი იყო და ჯავრის ამოყრა უნდოდა. შევარდა დევების ეზოში და ატესა ყვირილი:

— არიქათ, თავს უშველეთ, თორემ აღმოსავლეთის ხელ-მწიფე მოდის ჯარით და დედაბუდიანად ამოქლეტას გიბი-რებთო!

გამოცვივდნენ დევები კარში, გაიგონეს მაყრონთა სიჟ-ღერა და დაფ-ნაღარის სმა და გულგახეთქილები მელიას შეესხვეწნენ:

— შენი ჭირიმე, ჩვენო მელიავ, როგორმე გადაგეარჩინე და სიკეთეს არ დაგიკარგავთო.

— მომყევითო! — დაიძახა მელიამ და გაუძღვა წინ. დე-ვებს მინდოროში საზამთროდ მოსიღწული თივის ზვინები ედ-გათ. მიიყვანა მელიამ დევები ამ თივის ზვინებთან, და უთხრა, — შეძვერით შიგ და რამდენიც დავიძახო, — გულ-თანსი გულთანსი — იმდენი თქვენ შიგნით და შიგნით შეიწი-ეთო.

შეძვრნენ დევები. ზვინებში, მელიამ წაუკიდა გარედან ცეცსლი, ურბენს გარშემო და ყვირის: გულთან, გულთანო! დევები სულ უფრო შიგნით მიიწევდნენ და ბოლოს მთლია-ნად ამოიბუგნენ.

მელია საჩქაროდ უკანვე გამობრუნდა, შევიდა დევების

სახლში, მიაღაგ-მოაღაგა და მაყრიონს ჳიშკარში შეეგება. წაუძღვა წინ, დაალო კარები და მაყრები და ნეფიანი თვალ-მარგალიტით შემკულ დარბაზებში შეიყვანა.

მეწისქვილე ახლა დევების სახლის მდიდრულმა მორთულობამ გააკვირვა და მოჰყვა ისევ აქეთ-იქით ყურებას. მაყრებმა ეს შენიშნეს და მელიას ჰკითხეს:

— ჩვენი ხელმწიფის სასასლე თუ არ მოსწონდა, ეს სახლი ხომ თავისია და რაღად იყურება აქეთ-იქითო?

მელიამ პასუხი არც ამჯერად დააყოვნა:

— თქვენს სიძეს ნაბრძანები ჰქონდა, საქორწინო დარბაზი ჩემი ყველაზე ძვირფასი ალმასებითა და მარგალიტებით მომირთეთო, და ახლა რომ კედლებზე იმათ ვერა ხედავს, ჯავრობსო.


მაყრებმა გაკვირვებით გადახედეს ერთმანეთს, — ამაზე ძვირფასი რაღა უნდა იყოსო?!

მსახურებმა ხელმწიფის გამოტანებული პურ-მარტილი ამოაღაგეს და სუფრა გაშალეს. სუფრის თავში, რა თქმა უნდა, ნეფე-პატარძალი დასხეს და სამი დღე და ღამე გაუჩერებლად იღვინეს და იმხიარულეს. მეოთხე დღეს სიძეს ბედნიერი ცხოვრება უსურვეს და გამოემშვიდობნენ.

ამ დღიდან მეწისქვილე მართლაც რომ ბედნიერად და უზრუნველად ცხოვრობდა. სიკეთე არც მელიას დაუკარგა და და ქათმების მოვლა-პატრონობა ჩააბარა. მართალია, მელიას ხანდახან სული წასძლევდა და ერთ მსუქან-დედალს ან ქორთა ვარიკას შესანსლაჲდა, მაგრამ გაწეული სამსახურიანათვის მეწისქვილე ამ მცირე ცოდვას აბატიებდა ხოლმე.

ჭირი — იქა, ლხინი — აქა,

ქატო — იქა, ფქვილი — აქა.







## მელიას ოინება

იყო და არა იყო რა, იყო ერთი კაფანდარა მელია, დადიოდა სოფლიდან სოფელში და ყველგან რაღაც ზიანს შვრებოდა, ერთგან ქათამს მოიპარავდა, მეორეგან — ბატს ან ინდაურს, არც ჩვილ, ძუძუთა ბატკნებზე ამბობდა უარს. და თავის წუთისოფელს უზრუნველად ატარებდა.

ერთხელ ნაფეტვარზე გაიარა. ყანაში ბევრი თავთავი ეყარა. მელიამ იფიქრა, ამ თავთავებით შეიძლება კარგად ვისარგებლო, და დაიწყო კრეფა, კარგა მოზრდილი კონა მოკრიფა, ამოიღო ილიაში და გაუდგა გზას.

ერთ სოფელში დაულამდა. მივიდა ერთ სახლთან და დაიქასა:

— ოჯახისვილებო, ღამეს ვერ გამათევინებთო?

— რატომ ვერ გაგათევინებთ, მობრძანდითო! — გამოსქახეს შიგნიდან. მელია შევიდა. თავთავების კონა მასპინძელს მიაბარა და უთხრა, კარგად შემინასეთ, ქათმებმა არ შემეიჭამონო.

მასპინძელმა თავთავების კონა მარანში შეიტანა და კედელზე ჩამოჭკიდა. შუალამისას, ყველამ რომ დაიძინა, მელია ჩუმად ადგა, გამოვიდა მარანში, გამოიტანა თავთავების კონა და საქათმეში წითელ მამალს დაუდო წინ. მამალმა დედლები მოიწვია და დილისათვის ერთი მარცვალისც აღარ დატოვეს.

დილას რომ ადგნენ და ისაუზმეს, მელია წასასვლელად მოემზადა და მასპინძელს ანაბარდ მოსთხოვა. შევიდა მასპინძელი მარანში და სადღაა ფეტვის კონა. ეძებეს, ეძებეს

და გამოკენკილი თავთავები საქათმეში იბოვეს. მელიამ ტირილი მორთო;

— ეგ თავთავები ვაი-შავი ღლით მქონდა ნაშოვნი, მეტი არაფერი მეზადა და ეგეც თქვენმა მამალმა შემეჩამაო.

შეწუსდა მასპინძელი და ჰკითხა:

— რა გიყო, მელიავ, რით ავინაზლაურო ეს ზარალით?

— ან ჩემი თავთავები დამიბრუნე, ან ის წითელი მამალი მომეცი, რომელმაც ჩემი ფეტივი გამოკენკაო, — უთხრა მელიამ.

რადას იზამდა მასპინძელი ნათქვამია, ანაბარი მგელმაც იცისო. ადგა და გამოიყვანა ის წითელი მამალი. ამოიღო მელიამ ილღიაში მამალი და გასწია თავის გზაზე. მიდიოდა და გახარებული მიიმღეროდა:

ფეტივი გავყიდე მამლადა,  
მამალს მივირთმევე ვახშმადა.

იარა მელიამ ასე ღიღინ-ღიღინით და ერთ მთაზე დაულამდა, დაინახა მეცხვარის ბინა, მივიდა და ღამის გათევა სთხოვა. მეცხვარე, რა თქმა უნდა, სტუმარს უკან არ გააბრუნებდა და მაშინვე კოცონთან გადაიპატიჟა.

მელიამ მამალი მეცხვარეს მიაბარა და თან გააფრთხილა:

— კარგად შემინახე, შენმა ვაც-ვერძებმა რქით არ გამოფატრონო.

— ნუ გეშინიაო; — უთხრა მეცხვარემ და მამალი ბოსლის ზედა კუთხეში დასვა.

ივასშმეს და დაიძინეს. შუალამისას, როცა მეცხვარეს ძილი გაუყინრდა, მელია ჩუმად ადგა, აიყვანა თავისი მამალი, ბაკში შევიდა და ერთ მოზრდილ ერკემალს რქაზე ჩამოაცვა.

მეორე დღით რომ ადგნენ და ისაუზმეს, მელიამ უთხრა მეცხვარეს: — აბა, ახლა კი მომიყვანე ჩემი მამალი და წავალო.

შევიდა მეცხვარე ბოსლის უკანა კუნჭულში, მაგრამ სადღაა მამალი. ეძებეს, ეძებეს და ნახეს: ბაკში ერკემალს ჰყავს რქაზე წამოცმული.

შემოიკრა მელიამ თავში ხელა და დაიწყო ტირილმ,

— მაგის მეტი არაფერი გამაჩნდა და ეგ ვაი-შავი დღით ნაშოვნი მამალი რად მომიკალითო? —

შეწუსდა ძალიან მეცხვარე და მელიას ჰკითხა:

— რა გიყო, რით გადაგიხადო შენი ზარალიო?

— ან ჩემი მამალი გამიცოცხლე, ან ის ერკემალი მომეცი, რომელმაც მოკლაო, — მიუგო მელიამ.

რადას იზამლა მეცხვარე, მამალს სომ ველარ გააცოცხლებდა და ისევ ერკემალი გამოუყვანა, ჩააბა რქებში თოკად მისცა, წამოვიდა მელია გასარებულთ, მიჰყავს მსუქანი ერკემალი და მიიწღერის:

ფეტვი გავყიდე მამლადა,

მამალი — ერკემალადა.

იარა, იარა და საღამო ხანზე ერთ გუთნისდედას შიადვა. უთხრა, ღამეს ვერ გაძათევენებო?

— რატომ ვერ გაგათევენებ, მელიავ, მოზრძანდიო.

მისცა მელიამ ერკემალი მასპინძელს და თან გააფრთხილა:

— სადმე მოშორებით დააბი, სარებმა არ განიფატრონიო.

შეიყვანა გუთნისდედამ ერკემალი ბოსელში და სულ ბოლო კუთხეში დააბა. ივანშემეს და დაიძინეს.

ღამით ჩუმად ადგა მელია, შევიდა ბოსელში, ასსნა ერკემალი და ერთ ყველაზე მსუქან ხარს რქაზე ჩამოაცვა.

დილას გაიღვიძეს, ისაუზმეს და მელიამ უთხრა მასპინძელს:

— გამომიყვანე ჩემი ერკემალი და წავალო.

შევიდა გუთნისდედა ბოსელში და რას ხედავს: მელიას ერკემალი ნიშა ხარს წამოუცვია რქაზე და არზეინად იცოხნება:

შემოიკრა მელიამ თავში ხელი და მორთო ტირილი:

— მაგ ერკემლის მეტი არაფერი გამაჩნდა, ვაი-შავი დღით მყავდა ნაშოვნი და ეგეც შენს ხარს მომიკვლევენო.

შეწუსდა გუთნისდედა და ჰკითხა:

— რა გიყო, ჩემო მელიავ, რით აგინაზღაურთ ზარალიო?

— ან ჩემი ერკემალი გამიცოცხლე, ან არა და, ის ხარი მომეცი, რომელმაც ერკემალი მომიკლაო.

რალას იზამდა გუთნისდედა, გამოუყვანა ნიშა ხარი და მისცა. გაიგდო მელიამ ხარი წინ და გამოსწია გახარე-ბულმა. მიდის და მიიშლერის:

ფეტვი გავეციდე მამლადა,  
მამალი — ერკემალადა,  
ერკემალი კი ხარადა —  
თვალ-გულის გასასხარადა.

იარა, იარა და გზაზე ისევ დაულამდა. ერთ დედაბერთან მივიდა და ლამის გათევა სთხოვა. დედაბერმა. შინ შეიპატიჟა:

— მობრძანდი მელიავ, მობრძანდი, ღამეს როგორ არ გაგათევინებო,

დედაბერს სამი ღამეა ჭალი ჰყავდა, შევიდა მელია შინ და ქალებს უთხრა:

— ეზოში ხარი მყავს, დილამდე ისე შემინახეთ, რომ ან ქურდმა არ დამიკლას და ან მგელმა არ შემიჭამოსო.

გამოვიდნენ ქალები, შეაგდეს ხარი ბოსელში, ერთი მოზრდილი კონა ბალახი დაუყარეს და კარები გარედან გადაკეტეს.

დედაბერმა ქათამი გააკეთა, ივანშემეს და დაიძინეს. ღამე გველამ რომ დაიძინა, მელია ჩუმად ადგა, აიღო დედაბრის ღანა, შევიდა ბოსელში და ხარს ყელი გამოსჭრა. სისხლიანი დანა უმცროს ქალს ჩაუდო ჯიბეში და ისევ დაწვა.

გათენდა დილა, ისაუზმეს და მელიამ უთხრა:

— აბა, დედი, ჩემი ხარი გამომიყვანეთ და წავალო.

შევიდა დედაბერი ბოსელში და რას ხედავს: ხარი ყელ-გამოჭრილი გვია. გამოვიდა და უთხრა მელიას. მელიამ შემოიკრა თავში ხელი და მორთო ტირილი:

— ეს ხარი იყო ჩემი სარჩო-საცხოვრისი და რად დამიქალით, რაზე დამლუპეთო?

დაადვიმა დედაბერმა თავისი ქალები და ჰკითხა: — ხარი რომელმა დაჭკალითო? — ქალებმა დაიფიცეს, ჩვენ არ დავეციკლავსო.

— მაშინ გავუსინჯოთ ჯიბეები და ვისაც სისხლიანი დანა აღმოაჩნდება, დამკვლელიც ას იქნებაო, — თქვა ბოლოს მელიამ.

გაუსინჯეს ჯიბეები და სისხლიანი დანა უმცროს ქალს აღმოაჩნდა. მელიამ უარესად შეშოიკრა თავში ხელი და უფრო სმანაღლა აღრიალდა:

— მასპინძლებს რომ სტუმრისათვის ასე ელაღატოს, ჯერ არსად გაჩიგონიაო.

შეწუსდა დედაბერი და მელიას ჰკითხა:

— რა გიყო, ჩემო მელიავ, რით აგინაზღაურო ზარალიო?

— ან ხარი უნდა გამიცოცხლო, ან არა და, რომელმაც ჩემი ხარი დამიკლა, ის ქალი უნდა მომცეო, — მიუგო მელიამ.

რადღა უნდა ექნა დედაბერს, სიმაჩთლეს ვინ სად წაუვა? ადგა და მისცა უმცროსი ქალი. მელიამ დედაბერს ერთი მოზრდილი გუდა სთხოვა, ჩასვა ქალი იმ გუდაში, წამოიკიოდა და გახარებული გაუდგა გზას. მიდის და მიიზღერის,

ფეხვი გავეყიდე მამლადა,

მამალი — ერკემალადა,

ერკემალი კი — ხარადა,

ხარი — უტურფეს ქალადა,

მიმყავს და მიმიხარია,

ვერვინ წამართმევს ძალადა,

ცა ქუდად არ მიმაჩნია

და დედამიწა ქალმნადა.

ერთ მელორეს ბურვაკი დაეკლა და ცეცხლის პირამ მწვადებს აგებდა. დანინასა მელია და დაუძანა:

— მელიკო, მოდი მწვადზე დამეწვიეო!

მელია ბურვაკის მწვადზე აბა რა უარს იტყოდა და სიამოვნებით დათანხმდა. მივიდა მელორესთან, მოიხსნა გუდა და დადო. მელორემ უთხრა:

— მელო, მოდი, გადაირბინე და ლელიდან წყალი მოიტანე, ღვინო არა გვაქვს და ამ გემრიელ სადილს ცივი წყალი მაინც დავაყოლოთო.

აილო მელიამ თუნგი და წავიდა. მელორემ იფიქრა, მოდი ვნასავ, მელას ამ გუდაში რა აქვსო, მოხსნა გუდას პირი

და ნახა ლამაზი ქალი. ამოიყვანა საჩქაროდ და ბურჯებს უკან დამალა, გუდაში კი ქალის მაგიერ ერთი ყველაზე დიდი ქოფაკი ჩასვა და თან პური ჩაუყარა, რომ არ ეხმაურა. მოიტანა მელიამ ცივი წყალი, შემოუსხდნენ სუფრას და ცვრიან მწვადებს გემრიელად მიიძღნენ. ჭამას რომ მორჩნენ, მელიამ უღვაშები მოიწმინდა, მელორეს დიდი მადლობა გადაუხადა და უთხრა:

— ახლა კი წავალ, თორემ მეშინია, გზაზე არ დამიღამდესო.

— კი, კი, ჯობია, — დაეთანხმა მელორე, — წასვლა ჯობ წამავალისათ, — და დიდი პატივით გაისტუმრა.


წამოიკიდა მელიამ გუდა, მიდის და მწვადით გამაძლარი უფრო ხალისიანად მიიმღერის:

ფეტვი გავეიდუ მამლადა,  
 მამალი — ერკემალადა,  
 ერკემალი კი — ხარადა,  
 ხარი — უტურფეს ქალადა.  
 მიმყავს და მიმისარია,  
 ვერვიწ წამართმევს ძალადა,  
 ცა ქუდად არ მიმანინია,  
 და დედამიწა ქალმნადა.

ამ დროს ძაღლს გუდაში პური გაუთავდა და ფხაკუნის ატეხა. მელიას ეგონა, ქალს რაღაცა აწუხებდნო, გადმოიღო გუდა და შეუსწნა პირი, ამოვარდა გააფთრებული ქოფაკი გუდიდან, გაიგდო წინ მელია, წამოეწია და ფაფუკი ქურქი კუდის რიკამდე გააძრო.

ჭირი — იქა, ლხინი — აქა,  
 ქატო — იქა, ფქვილი აქა.





## დათვი და მელა

იყო და არა იყო რა, ღვთის უკეთესი რა იქნებოდა, იყო ერთი ცბიერი მელაკუდა. მელა სულ მარტოკა დაცუნცულეობდა და სარჩოს გაჭირვებით შოულობდა. ბოლოს, ძალიან რომ გაუჭირდა მარტოს თავის რჩენა, თქვა, ერთი ამხანაგი თუ არ ვიშოვე, ისე არაფერი მეშველებათ, და წავიდა ამხანაგის საძებნელად.

ტყეში დათვი დაინახა. დათუნიას ერთი მსხმოიარე პანტა ჩამოებერტყა და მწიფე ნაყოფით გამაძლარი ხის ძირას ზანტად გორაობდა. მელიამ იფიქრა: „რალა სხვა ვეძებო, ამაზე ძლიერსა და საიმედო მეგობარს ან სად ვიშოვი, თავსაც დაირჩენს და მეც მაძლრისად შემინახავსო“. — მივიდა, მიესალმა და უთხრა:

— დავძმობილდეთო.

თავის მხრივ დათვისაც გაუხარდა მელიასთან ამხანაგობა, ეშმაკია და ბევრ რამეში გამომადლებათ, და უყოყმანოდ დათანხმდა. დამძმობილდნენ და დაიწყეს ერთად ცხოვრება. დათვის ცხვრები და ძროხები მოჰქონდა, მელას მსუქანი დედლები და ყველაფერს ტოლად იყოფდნენ, სორცს ჭამდნენ, ქონს ადნობდნენ და საზამთროდ ქვევარში ინახავდნენ, — ძალიან რომ გაგვიჭირდება, მაშინ გამოვიყენოთო.

ასე გალიეს ზაფხული და შემოდგომა. ზამთრის პირზე საშოვარი შემოაკლდათ, რადგან ხალხმა ცხვარ-ძროხა და საქონელი თბილ გომურებში გამოკეტა, ხოლო როცა კარგა დაზამთრდა და თოვლი ჩამოყარა, მთლიანად გამოელიათ.

დათვის ისე რიგად არ უჭირდა, ჩაიწყობდა თათებს პირა

წი, იწუწნიდა და შიმშილს იმით იოკებდა. მელიას კი თათუ-  
ბის წუწვნა ჯიშად არ მოსდგამდა და კუჭი შიმშილით ეწვო-  
და. ბოლოს ველარ გაუძლო შიმშილს და დათვს უთხრა:

— ბიძავ, შენ თათებს იწუწნი, მე კი შიმშილით სული  
შძვრება, მოდი, ქონიან ქვევრს მოვხდი და ცოტა სულს მო-  
ვიბრუნებ, სომ ძმები ვართ და ძმობაში კი თანასწორობა  
უნდა იყოსო.

მაგრამ შიმშილმა და გაჭირვებამ დათვს ძმობა და თა-  
ნასწორობა დაავიწყა და მელა მკაცრად დატუქსა:

— ხელი არ ახლო, თორემ მიგბეგვავ. მაგ ქონს, სომ  
იცო, ვაიშავი დღისათვის ვინახავო.

გაჯავრდა მელია, მაგრამ აბა დათვს რას გაუბედავდა,  
გუნებაში კი თქვა, — შენ თუ სამაგიერო არ გადაგინადო,  
მელაკუდა ნუ შერქვასო. ზის მელია ბუნაგში და ფიქრობს,  
რა მოვიგონო ისეთი, რომ ქონი სულ მე დამრჩესო. უცბად  
ადგა, გამოვარდა კარში და სმამალლა დაიძახა:

— რა იყო, კაცო, რას მეძახითო? — ცოტახანს შეიცა-  
და და კიდევ დაიძახა: — კარგით, კარგით, შევალ, ბიძას  
ვკითხავ და თუ გამომიშვებს, წამოვალო!

შევიდა მელია ბუნაგში და დათვმა ჰკითხა:

— რა იყო, მელია-კუდიგრძელია, რას გეძახოდნენო?

— აგე ქვევით, ჭალაში რომ მეცხვარეა, ის ამოსულა  
და ნათლიად მეპატიეება, შვილი მომინათლეო და, რა-ვქნა,  
წავიდე თუ არაო?

— წადი, კაცო, წადი და ცოტა რამ ნათლობის წილი მეც  
წამომილეო.

ადგა მელია და გამოვიდა კარში, რის ნათლობა, რა ნათ-  
ლობა! მიადგა ქონით სავსე ქვევრს და ნაპირები მთლიანად  
მოულოკა. გამოძდა ლამაზად, შევიდა ბუნაგში ხვნეშით და  
კუთხეში წამოწვა.

— რა ჰქენი, მონათლე ბალდიო? — ჰკითხა დათვმა.

— მოვნათლეო, — მიუგო მელამ.

— სახელი რა დაარქვესო?

— თავმოლოკილიო.

— მე არაფერი წამომილეო?

— აბა, რას მოგიტანდი, ბიძიავ, — უთხრა მელიამ, —



ერთი კვერი ყველი ჰქონდათ და ერთი კულა ღვინო, კულა ავაკურკულე, ჩავაკურკულე, ზედ ის ყველი დაფაყოლე და წამოვედიო.

— კარგი, რაკი მღტი არაფერი ჰქონდათ, რალა იქნებაო, — უთხრა დათვმა და კვლავ თათების წოვა განაგრძო.

გამაძლარმა მელამ იმ ღამეს ტკბილად დაიძინა, მეორე დღეს კი ისევ გამოვიდა კარში და გუშინდელივით დაიძახა:

— რა იყო, კაცო, ახლა რაღას მეძახითო? — და ცოტა ხნის შემდეგ დააყოლა, — აბა, შევალ, ბიძას დავეკითხებ და თუ გამომიშვებს, წამოვალო!

შევიდა შინ მელია და დათვმა ჰკითხა:

— ახლა ვინღა იყო, ან რას გეძახოდანო?

— ახლა მეღორე მეძახის, კაი ხელი გქონია და ბავშვებმეც მომინათლეთ.

— მაშინ წადი, რაღას უყურებო, — უთხრა დათვმა. — თლონდ გუშინდელივით კი არ ჰქნა, ნათლობის წილ-კერძმეც წამომიღეთ.

— წამოგიღებო, — შეპირდა მელია და გამოვიდა. მიადგა ქვევრს და ქონი ნახევრამდე დაიყვანა, გამოძლა კარგად, გადაილოკა უღვაშები და დაბრუნდა ბუნავში.

— რა ქენი, მონათლე ბაღლიო? — ჰკითხა დათვმა.

— მოვნათლეთ, — მიუგო მელიამ.

— სახელი რა დაარქვესო?

— შუაწელაო, — მიუგო მელიამ.

— ნათლობის წილი კიდევ არ მომიტანეთ? — გაუწყრა დათვი.

მელამ თავი მოიკატუნა:

— აბა, რას მოგიტანდი, ბიძავ, ერთი ღორის ბარკალი ჰქონდათ და ერთი კულა ღვინო, კულა ავაკურკულე, ჩავაკურკულე, ზედ ის ბარკალი დაფაყოლე და წამოვედიო.

დათვის ძალიან ეწყინა, ღორის ბარკლის ხსენებაზე სომ მთლად პირწყალი მოადგა, მაგრამ აღარაფერი თქვა და ისევ თათების წოვა დაიწყო. მელია კი მიწვა კუთხეში და ქონით გამაძლარმა ყინჩად დაიძინა.

მეორე დღეს მელიამ შუადღემდე ინეპივრა, — გაწვა გულაღმა და აქეთ-იქით იგორავა, სოლო როცა მოშვიდა, ისევ კარში გამოვიდა და სმამალლა დაიძახა:

— რა გინდათ, კაცო, კიდევ რაღას შეძახითო? — ცოტა ხანს იყურა და კიდევ გასძახა, — კარგიო, შევალ, ბიძას ვკითხაუ და თუ გამომიშვებს, წამოვალო!

შევიდა მელია ბუნაგში და დათვმა ჰკითხა:

— რა იყო, მელია — სერუფენია, კიდევ ვინ იყო, ან რაღას გეძახოდნენო?

— ახლა შეძროხე ამოსულა და ისიც ბაღლის მონათლას მთხოვს, კარგი სული გქონია და გინდა თუ არა, წუნდა მომინათლოო, და რას იტყვი, წავიდე, თუ უარი შეგუთვალაო?

— წადი, ოღონდ თუ კიდევ სულცარიელი მოხვედი, ძალიან მეწყინებაო, — უთხრა დათვმა.

— თუკი იქნება, რატომ არ წამოგიღებო, — დააიმედა მელამ და გამოვიდა. მივიდა ქვევრთან, მოხადა თავი და მთლიანად ამოლოკა. მოილოკა ტურები და სოროში შევიდა.

— რა ქენი, მონათლე ბაღლიო? — ჰკითხა დათვმა.

— მოვნათლეო, — მიუვო მელიამ.

— სახელი რა დაარქვითო?

— ძირმოლოკილაო.

— არც ახლა მომიტანე რამეო? — ჰკითხა დათვმა.

მელამ ისევ წუწუნი დაიწყო:

— რას წამოგიღებდი, ბიძავ, როცა თავისთვისაც არაფერი ჰქონდათ. ერთი გუდა ერბო მომიტანეს და ერთი კულა ღვინო. კულა ავაკურკულე, ჩავაკურკულე, ზედ ის ერბო დაჯყოლე და წამოვედიო.

— კარგი და სვალ მე თვითონ წავალო, — თქვა დათვმა.

— კეთილი და პატიოსანი, — უთხრა მელამ, — წადი, ამდენი ქეიფი მე მომბეზრდა კიდევცო.

მელამ ისევ ხვრინვა ამოუშვა, დათვმა კი ჩაიწყო პირში თითები და მთელ ღამეს ბურღუნით წუწუნა.

გათენდა მეორე დღე. მელა გამოვიდა ბუნაგის წინ და დაიძახა:— რა გინდათ, კაცო, აღარ უნდა მომასვენოთო? — და ცოტა ხნის შემდეგ დაუმატა, — კარგიო, აბა, შევალ შინ და გავიგებ, ბიძა რას იტყვისო.

შევიდა მელა შინ და დათვმა ჰკითხა:

— ახლა ვიღამ დაგიძახაო?

— ახლა მეჯოგე მეძახის, იმასაც ბავშვი ჰყოლია მოსა-  
ნათლიო, — უთხრა მელამ.

— ახლა მე თვითონ წავალო, — თქვა დათემა და ზღაზღ-  
ნით წამოდგა. გამოვიდა კარში და ჭალისაკენ დაეშვა. მე-  
ლიასაც სწორედ ეს უნდოდა, რომ დათვი შორს გაეცყუებო-  
ნა და თავისი ნამოქმედარი დაეთარა. მაშინვე კარში გამო-  
ვარდა, მოხიდა ნაცარი და ამოჭმულ ქვევრში ჩაყარა. მოუს-  
წორა პირები, დააფარა ისევ სარქველი და არხეინად წამოწვა.

დათვი კი ჩავიდა ჭალაში და პირდაპირ მეჯოგის თავ-  
ლებს მიადგა. დაინახა მეჯოგემ, ეგონა, კვიციის მოსატა-  
ცებლად მოდისო, გამოიტანა კომბალი და მისცხო და მის-  
ცხო გვერდებში. დათემა რის ვაი-ვაგლახით დააღწია მეჯო-  
გის კომბალს თავი და ნაცემ-ნაბეგვი ბუნაგისაკენ ძუნძუ-  
ლით წავიდა. შევიდა შიგ და ხენეშით კუთხეში დაეგდო.

— გეტყობა, კაი ნათლობა გქონდათ, კარგი ნაქეიფარი  
ჩანხარო, — უთხრა მელამ.

— კი, გვარიანი პატივი მცესო, — ჩაიბურტყუნა დათ-  
ემა. შერცხვა და მელას სიმაართლე არ გაუმხილა.

— ბაღღს რა დაარქვითო? — ჰკითხა მელამ.

— გვერდებჩალეწილიო.

— კარგი სახელი დაგიარქმევიათო, — მოუწონა მელამ  
და თან დაუმატა, — ამის შემდეგ რომ დაგვიძახებენ, ნათ-  
ლიად სულ შენ იარეო.

— მე ნათლია-ნათლობა არ ვიცი, — უთხრა დათემა, —  
ქეიფმა მადა გაბიღვიძა, ნათქვამია, მადა ჭამაში მოდისო.  
წამოდი, ჩვენს ქვევრს გადავხადოთ და ქონი ვჭამოთ, თო-  
რემ მეტიც მოთმენა აღარ შემიძლიათ.

გამოვიდნენ და მივიდნენ ქვევრთან. მელიამ გადახადა  
სარქველი და დათეს უთხრა:

— ოჰ, ბიძავ, ქონს ბრკე და ობი მოჰკიდებია და თუ არ  
გადავაცალეთ, გემოს ვერ ჩაატანო.

— როგორ გადავაცალოთო? — ჰკითხა დათემა.

— როგორ და, სული უნდა შევუბეროთო.

— მერე, შეუბერე, რაღას უყურებო? — გაუწყრა დათვი.

— მე ჯერ თვითონ რა ვარ და ჩემი შებერვა რაღა უნდა  
იყოსო, — უთხრა მელიამ, — ისევ შენ შეუბერე, ღონიერი  
ხარ და სულიც მეტი გიდგასო.

დააჭყიტა დათვმა თვალები და რაც ძალი და ღონე ჰქონდა შეუბერა, აბუქდა ნაცარი და სულერთიანად თვალეში შეეყარა. დათვმა მეტისმეტი სიმწრისაგან ღმუილი გააბა და თვალების სრესა დაიწყო, მაგრამ ვერაფერი იშველა და ისევ მელიას უთხრა: — რა ვქნა ასლა, თვალეზდაშრეტილმა როგორღა ვიარო?

— ექიმთან წაგიყვან და მოგარჩენსო, — უთხრა მელიამ.

— ბრმა ვარ და როგორ წამოვიდეთ? — ჰკითხა დათვმა.

— აი, როგორ, — უთხრა მელიამ, — წავალ და აყიროს მთვითან, შიგ კენჭებს ჩავეყრი, გაგიძღვები წინ, დავაჩხარუნებ და ჩხარუნს გამოჰყევი. სადაც სწორი და უშიშარი გზა იქნება, გეტყვი: ახტი, დახტი, ბერო ბიძავ, აქ ხომ დიდი ველიაო, და შენც სირბილით გამომეკიდეთ, ხოლო სადაც ვიწრო და სახიფათო გზა იქნება, იქ გეტყვი: ცოკდრ, ცოკდი, ბერო ბიძავ, აქ მაღალი კლდენიაო, და შენც ნელა მომყევით.

— კარგიო, — უთხრა დათვმა.

წავიდა მელია, ერთ ეზოში აყირო გოგრა მოიპარა და წამოიღო. ჩაყარა შიგ კენჭები და გაუძღვა დათვს წინ. აჩხარუნებს გოგრას მელია და მიჰყვება დათვი. გზა სწორი და კარგია, მაგრამ მელია მალმალე აფრთხილებს:

— ცოკდი, ცოკდი, ბერო ბიძავ, აქ მაღალი კლდენიაო.

და დათვიც ნელა, ცეცებ-ცეცებით მიაბიჯებს, ბოლოს მიადგნენ ერთ უშველებელ კლდეს. მელიამ დააგორა კლდეზე კენჭებით სავსე აყირო და დათვს უთხრა:

— ახტი, დახტი, ბერო ბიძავ, აქ ხომ დიდი ველიაო.

დათვიც ახტა, დახტა და გაეკიდა გოგრას უკან. ეგონა: მელიას მივსდევო და კლდეზე კი გადაიღო ხრიალი.

მიგორავს დათვი კლდეზე და ერთი ნაპრალიდან მეორეზე თავდაყირა გადადის. მელიამ კი გაიღერა კუდი, წადგა კლდის თავზე და სიმღერა შემოსძახა:

— ახტება და დახტება ეს სულბოროტიანი,  
დადგება და უყურებს ხოსრო დავლატიანი.

ჭირი — იქა, ლხინი — აქა,

ქატო — იქა, ფქვილი — აქა.



## ერთგული სარეზი

იყო და არა იყო რა, ღვთის უკეთესი რა იქნებოდა, იყო შაშვი მგალობელი, ღმერთი ჩვენი მწყალობელი. ერთ სოფელში ცხოვრობდა ერთი ღარიბი გლეხი კაცი, ჰყავდა ცოლი და ერთი ძროხა. შვილი არც ცოლს უჩნდებოდა და არც ძროხას, მაგრამ ერთ წელიწადს ცოლიც დაორსულდა და ძროხაც დამაკდა. გავიდა ცხრა თვე, დედაკაციც ლოგინზე დაწვა და ძროხასაც მუცელი ასტკივდა. კაცი მელოგინე ცოლს დასტრიალებდა თავს და ძროხას ყურადღება ვეღარ მიაქცია. ცოლს ბიჭი ეყოლა, ძროხა კი, რაკი კაცმა იმ საწებში ყურადღება ვერ მიაქცია, გაწყრა და სახლიდან გაიბარა. გავიდა ერთ ტრიალ მინდორზე, მონახა ლელიანი ადგილი და ხბო იქ მოიგო. მეორე წელიწადს მეორე მოიგო, მესამე წელიწადს — მესამე, ხბოები დაიზარდნენ და იმათაც მოიგეს ხბოები, ასე რომ თხუთმეტი წლის მანძილზე ამ ძროხის მონაგარი ოცდაათი სული შეგროვდა.

მონაგარს თვითონ დედა ფური მიუძღვოდა მუდამ წინ და მინდორში თავისუფლად დააბალახებდა. ისეთი ავები იყვნენ, რომ მათი შიშით იმ არემარეში ვერც ნადირი და ვერც კაცი ვერ გაიჭაჭანებდა. თუ რომელიმე ნადირი ან ადამიანი გაბედავდა და მიუახლოვდებოდა, დედა ფური ბლავილს ატეხდა, მოზვრები და დეკეულები კუდებს აიშვერდნენ და რქებწაწვდილები მიესეოდნენ. ჯერ რქებზე აიცვამდნენ, შერე შესდგებოდნენ ფეხებით და ნაბადივით გასთელავდნენ, მათი ადგილსამყოფელი სოფელში ერთი მონადირის მეტმა არავინ იცოდა.

თხუთმეტი წლის მანძილზე ის ბიჭიც გაიზარდა და კარგი თვალად-ტანადი ვაჟკაცი დადგა. ერთ დღეს ბიჭი თავის ტოლებში კოჭაობდა, ამოიარა ამ დროს იმ მონადირემ და ბიჭს უთხრა:

— სირცხვილი არ არის, შენ აქ კოჭს თამაშობ და თქვენი ძროხები კი მინდორში უპატრონოდ დადიანო.

ბიჭს ძალიან გაუკვირდა მონადირის ნათქვამი: თუ მართლა გვყავს ძროხები, რატომ დედას ან მამას ერთხელ მაინც არ უთქვამთო?!

დაანება ბიჭმა კოჭაობას თავი, წავიდა შინ და დედას ჰკითხა:

— დედი, ჩვენ ძროხები გვყავსო?

— არა, შვილო, ვინ გითხრა, ჩვენ არც ძროხები გვყავს და არც ცხვრები, ლარიბ-ლატაკი ხალხი ვართო.

ბიჭი დაეჭვდა, მაშ, მონადირე ტყუილად რად მეტყობაო, და დედას სთხოვა: — მოდი ძუძუ მომაწოვეო.

დედამ უარი უთხრა:

— რალა დროს შენი ძუძუს წოვია, შვილო, თხუთმეტ-თექვსმეტი წლის ვაჟკაცი ხარო.

მაგრამ ბიჭი არ მოეშვა და დედაც დათანხმდა. ბიჭმა ჩაიდო თუ არა პირში ძუძუ, მაშინვე კბილები მოუჭირა და უთხრა:

— სიმართლე მითხარი, გვყავს თუ არა ძროხები, თორემ ძუძუს მოგაკენეტაო.

დედას შეეშინდა და გამოუტყდა:

— გვყავდა, შვილო, ერთი ძროხა, შენზე რომ ვლთგინობდი, ძროხასაც მშობიარობა დაეწყო, მამაშენმა ყური ველარ მიუგდო, ძროხას ეწყინა და სახლიდან გაიქცა. ახლა თურმე იმ ფურის მონაგარი ოცდაათი სული გამხდარა, მინდორში თავისუფლად დაბალახობენ და სიახლოვეს ძეხორციელს არ ეკარებენო.

ბიჭმა გაუშვა დედის ძუძუ, იმავე დღეს მივიდა მონადირესთან და სთხოვა, სანადიროდ რომ წახვალ, მეც წამიყვანე და ის ჩვენი ძროხები მაჩვენეო.

მონადირე დათანხმდა, ხვალ სწორედ იმ მხარეს მივდი-

ვაჭარ და, თუ წამოსვლა გინდა, დილაუთენია სოფლის ბოლოს დამელოდეო.

გავიდა ბიჭი დილით სოფლის ბოლოს და მონადირეს დაელოდა. მალე მონადირეც მოვიდა და გაუდგნენ გზას. შინდორში რომ გავიდნენ, მონადირემ უთხრა ბიჭს:

— ახლა შენ მარჯვნივ წადი, გაჰყევი ამ ბილიკს და სადაც ხშირლელიან ადგილს დაინახავ, თქვენი ძროხები სწორედ იქ იქნებიან. ოღონდ ძალიან ფრთხილად მიდი, თვალი არ შეგასწრონ, თორემ ცოცხალი ვერ გადაურჩებიო.

გამოეწვიდობა ბიჭი მონადირეს და წავიდა ნაწიეწებში გზით.

ბევრი იარა, თუ ცოცხა იარა, ბოლოს გავიდა ლელიან შინდორში, ლელიანში გაშლილი ნახირიც დაინახა. ბიჭი შედგა და დაფიქრდა: „მივიდე თუ არ მივიდე?“ — ეს, რაც მომივა, მომივაო, — თქვა ბოლოს და პირდაპირ წავიდა ნახირისაკენ. დაინახეს მოზვრებმა და დეკეულეებმა და კულები აპირეს, რქები წინ წაიწვირეს და ბიჭისკენ ბღავილითა და სამუქართო ქშუტუნით გამოქანდნენ. მაგრამ ნახირს დედა ფური გადაუდგა წინ, ბიჭს შედ გადაეფარა და შვილებს და შვილიშვილებს უთხრა:

— ეს ბიჭი ჩვენი პატრონია და არაფერი დაუშაოთო.

დეკეულეები და მოზვრები განზე გადგნენ, დედა ფურმა ბიჭი ალოკა და პკითხა:

— ამ არემარეში ჩვენი შიშით ლომსა და ვეფხეს ვერ გაუჭაჭანია და შენ როგორ მობედე აქ მოსვლაო?

— გავიგე, ჩვენები ყოფილხართ და საპატრონოდ წამოგედიო, — უთხრა ბიჭმა.

— კარგია, რომ მოგვძებნე, — უთხრა ფურმა, — მაგრამ ჩვენ პატრონობა არ გვჭირდება, სანამ ცოცხალი ვარ, ჩემს მონაგარს არაფერს გავუჭირებ, წერე თავის თავს თვითონაც მოუვლიან. ახლა შენ ორ სახარე სხოს მოგცემ, დაზარდე, კარგად მოუარე, ბირუტყვთან მამაშენივით უმადური ნუ იქნები და სიკეთეს ათმაგად გადაგიხდიან. როცა დაიზრდებიან, თორმეტი უღელი ხარ-კამეჩის ღონე ექნებათ და ამათ პატრონს ცხოვრება არ გაგიჭირდებაო.

გამოირეკა ბიჭმა ხბოები, მოოქვა შინ და დაუწყო ერთ-  
გული მოვლა და მზრუნველობა. დაიზარდნენ ხბოები და  
სამ წელიწადში ისეთი ხარები დადგნენ, რომ კაცის თვალი  
უკეთესს ვერაფერს ნახავდა. ბიჭმა გაძარტა გუთანნი, ურემი  
და ოჯახი ისე წამოსწია, რომ შექმლებულ ოჯახებს ბევრით  
გაუსწრო.

შორს გავარდა ხარების ქების ხმა. დღე ერთი იყო და  
მთელი სოფელი სულ ბიჭის ქედმაღლიან ხარებზე ლაპარაკ-  
ობდა. ხარების ქებამ ბოლოს ერთ მდიდარ ქოსას ყურამ-  
დეც მიაღწია, ქოსას შური აღებრა გულში და გადაწყვიტა  
მათი ხელში ჩაგდება. ერთ დღეს მივიდა ბიჭთან, ჯერ ხა-  
რები უქო და მერე უთხრა:

— შენ კარგი ხარები გყავს, მე ლაშაზი — გოგო. მოდი  
დავნიძლავდეთ: ერთ მინდორს გაჩვენებ, თუ იმ მიწას შენი  
ხარებით ერთ დღეში მოხნავ, ჩემი ლამაზი გოგო შენი იყოს,  
თუ ვერა და ხარები მომეცით.

ბიჭი იცნობდა ქოსას გოგოს და გუნებაში კიდევაც მოს-  
წონდა, „ალბათ ჩემს ბედზე ყოფილა გაჩენილიო“, — თქვა  
გულში და დათანხმდა. თან ხარების იმედიც ჰქონდა, განა  
რამოდენა უნდა იყოს ის მინდორი, რომ ჩემს ხარებს იმისი  
მოხვნა გაუჭირდეთო.

წაიყვანა ქოსამ ბიჭი, ერთი ტრიალი მინდორი დაანახვა  
და უთხრა, — ეს ვაკე ერთ დღეში მთლიანად უნდა მოხნაო.

ბიჭმა გახედა მინდორს სიგრძე-სიგანეზე და გულს ელდა  
ეცა: იმოდენა მინდორს კაცი დოღის ცხენით ვერ შემოუვ-  
ლიდა და უღველ ხარს როგორ უნდა მოეხნა. მაგრამ რას  
იზამდა, პირს ხომ ვერ გადავიდოდა? წავიდა შინ დაღონე-  
ბული. ხარებმა მოწყენა შეატყვეს და შეეკითხნენ:

— რა იყო, ჩვენო პატრონო, რადა ხარ დაღონებულიო?

— ეს, ჩემო ერთგულებო, — ამოითხრა ბიჭმა, — დღეს  
კი თქვენი პატრონი ვარ, მაგრამ ხვალიდან სხვა გვეყოლება  
პატრონიო, — და ხარებს ყველაფერი უამბო.

ხარებს ბიჭის საწუხარი სასაცილოდაც არ ეყოთ.

— მაგაზე როგორ წუხხარო, — უთხრეს ბიჭს, — ნუ გეშინ-  
ნია, შენ მარტო გუთანს მოკიდე ხელი, იმ მინდორში მიგვი-  
ყვანე და დანარჩენი ჩვენ ვიცოთო.



ბიჭის გული მოეცა, იქნებ მართლა არ გამოვირის ღმერთ-  
შაო და მეორე დღეს დილიდანვე შეუდგა სუნას. გადიან და  
გამოდიან სარები ქშენით, გადადის კვალი კვალზე და მინ-  
დორი თანდათან შავ ფერში იძირება. ჯერ შუადღევ არ იყო,  
რომ ბიჭმა თითქმის მთელი მინდორი გადასწა, რანდენიმე  
კვალიდა დარჩა გასატანი და მორჩებოდა. სწორედ ამ დროს  
შოვიდა ქოსა, გახედა ნახნავს და მიხვდა, რომ სანახლეს  
აგებდა. „თუ რაღაც ხერხი არ ვიხმარე, ცუდად არის ჩემი  
საქმეო“, — თქვა გულში და საჩქაროდ უკან გაბრუნდა,  
ცოლს კარგი სადილი მოამზადებინა, — მსუქანი დედალი,  
გამტკიცული შოთები, ორი ხელადა ღვინო, და უთხრა:

— წაიღე ეს სასმელ-საჭმელი და მინდორში რომ ბიჭი  
მიწას ხნავს, იმასთან მიიტანე. გაუშალე სუფრა და ეცადე,  
რომ ეს ღვინო მთლიანად დააღვეინო და დაათროს.

გადაიკიდა ცოლმა ხურჯინი და მივიდა ბიჭთან. გაშალა  
ხელდახელ სუფრა და ბიჭს უთხრა:

— შეილო, შრომა კარგია, მაგრამ არც ასეთი თავგადა-  
ვლა ვარგა. თუ შენი თავი არად მიგაჩნია, საქონელი მაინც  
შეიცოდე. რალა ბევრი შენ გიკლია, ერთი-ორი კვალიდა  
გაქვს დარჩენილი, მოდი, ისადილე, ხარებიც წააძოვე და  
მერე უფრო მალე გამოხნავო.

ბიჭმა გახედა მინდორს, ასედა მზეს, მოსახნავი მართ-  
ლაც ძალიან ცოტალა დარჩენოდა, მზეც ჯერ მალლა იდგა.  
მოვასწრებო, — გადაწყვიტა გულში, ხარები გამოუშვა და  
თვითონ სუფრას მიუჯდა.

ქოსას ცოლი ღვინოს და საჭმელს უმარჯვებდა და ბი-  
ჭიც მადიანად შეექცეოდა. ორივე ხელადა რომ გამოცალა,  
ძილი მოერია.

ქოსას ცოლმა უთხრა:

— არა უშავს, ცოტასანს თვალი მოატყუე და მზის ჩას-  
ვლამდე მე გაგაღვიძებო.

დაუჯერა ბიჭმა და დაიძინა. ქოსას ცოლმა წამოკრიფა  
საჭმლის ნარჩენები, ჩაყარა ხურჯინში და ცუხცუხით გა-  
უდგა გზას შინისაკენ.

დარჩა მძინარე ბიჭი, მზე მიიწვერა, საცაა უნდა ჩავი-  
დეს, ბიჭი კი გულარხეინად ხვრინავს. შეწუხდნენ ხარები,

დაადგნენ თავზე მძინარე. პატრონს და ყვირილი ატყვის, მაგრამ ვერ იქნა და თვალი ვერ გაახელინეს. ბოლოს ერთი ხარი კბილით დასწვდა და მსარზე უკბინა. ბიჭს კბენა ემწარა და წამოხტა. მოიფშენიჭა თვალები, გახუდა მზეს და შვ-მოიკრა თავში ხელი:

— ვაი, ეს რა მომსვლია, ერთი სადილის გულისათვის თავი როგორ დავიღუპეო!

— ნუ გეშინია, ჩქარა გუთანი გამართეო, — უთხრეს ხარებმა, შეუბერეს მზეს და ისევ შუა ცაზე ამოაგდეს. ბიჭმაც გამართა გუთანი და დარჩენილი მინდორი მზის ხელახლა ჩასელამდე მთლიანად გამოხნა. წამოვიდა გახარებული ბიჭი და ქოსას უთხრა:

— ხომ მოგიგე სანაძლეო და პირობაზე როგორა ხარო? ქოსამ შარი მოუდო:

— სანაძლეო ორჯერ უნდაო.

ბიჭი ამაზეც დათანხმდა.

— იყოს ნება შენი, თქვი და მზადა ვარო!

წაიყვანა ქოსამ ბიჭი თავის კალოზე, მიიყვანა ერთ ბზით სავსე მთისტოლა საბძელთან და უთხრა:

— თუ შენი ხარები ერთ ღამეში ამ ბზეს მთლიანად გაათავებენ, მოგებული იქნები და პირობას წინ აღარაფერი დაუდგება, ხოლო თუ ვერა, მაშინ ხარებს გამოეთხოვეო.

ბიჭი ახლა უფრო დაღონდა, ამოდენა ბზეს სამი სოფლის ნახირი ვერ გაათავებს და მარტო ჩემმა ხარებმა ერთ ღამეში როგორ უნდა შეჭამონო. წამოვიდა შინ და მოვიდა ხარებთან კრიჭაშეკრული. შეატყვეს ხარებმა დანადვლიანება და ჰკითხეს:

— რაზე ხარ ასე დაღონებული, ჩვენო საყვარელო პატრონო, განა ისეთი რა მოხდაო?

— ეს, ჩემო ერთგულო მეგობრებო, — ოხვრით მიუგო ბიჭმა, — ის მოხდა, რომ ხვალიდან თქვენს თავს წამართმევენ და სხვა დაგეპატრონებათო. — და უამბო, ქოსამ რა სანაძლეოც დაუდო.

— ნუ გეშინია, მაგასაც შევძლებთ, — კვლავ ანუგეშეს ხარებმა, — შენ მარტო ქოსას უთხარი, საბძელს სახურავიც

მთლიანად მოხადოს და გვერდებიც შემოაცალოს და მერე ჩვენ ვიცითო.

წავიდა ბიჭი გახარებული და უთხრა ქოსას, როგორც ხარებმა დაარიგეს. ქოსამ მოხადა სახურავი საბძელს, გვერდებიც შემოაცალა და ბზის ზვინული მთლიანად გააშისულა. დაღამდა თუ არა, მორეკა ბიჭმა ხარები ბზესთან და თვითონ შორიასლოს წამოწვა.

შუალამემ რომ მოატანა, სოფელმა დაიძინა და ირგვლივ ჩამიძინა აღარ ისმოდა. წამოდგნენ ხარები, მოუარეს საბძელს ქვედა მხრიდან, ერთი ძლიერად შეუბურეს და მთელი ბზე ცაში გაფანტეს. მერე ბიჭს უთხრეს, — წადი და ქოსას უთხარი, ის ერთი საბძელი ბზე არ ეყოთ და კარგს იზამ, თუ აითოთ გოდორს სადილაოდაც გაუგზავნი-თქო!

გათენდა დილა, გამოვიდა ქოსა და ნასაბძლარიც კი ველარ ინიშნა, — ის ადგილი კალოსავით იყო დაგვიღ-დასუფთავებული.

— ჯანდაბას ამათი თავი, ხარები კი არა ქაჯები ყოფილანო, — ჩაილაპარაკა თავისთვის და ბიჭს მესამედაც უშატა, — ღმერთი სამეზბით არის, თუ მესამედაც მომიგე. ღმერთთანაც და კაცთანაც მართალი იქნები და ვეღარც მე შეგედავები, თუ არადა, ხარები უნდა დასთმოდ.

რა უნდა ექნა ბიჭს, ამაზღვ დაყაბულდა და ქოსას უთხრა: — ბრძანე, რასა მთხოვ სანაძლეოდ და ნზადა ვარო.

ქოსას ერთი უხედნელი აჯილდა ჰყავდა, ისეთი თავლორი და გადარეული ცხენი იყო, რომ კაციშვილი სიანლოგეს ვერ ეკარებოდა. რამდენმა კარგმა მსუდარმა სცადა მასზე შეჯდომა, მაგრამ ცხენმა ყველა ჩამოაგდო და ფეხით გათელა. გამოიყვანა ქოსამ ცხენი და ბიჭს უთხრა:

— თუ ამ ცხენზე შეჯდები და სოფლის თემშარაზე სამჯერ აატარ-ჩამოატარებ, სომ კარგი, მოგებული იქნები, თუ არადა, იცოდე, პირთბა პირთბაა და მე ჩემი უნდა ჩავიბარო.

წამოვიდა შინ ბიჭი დაღონებული, იცოდა, თვითონ რა მხედარიც იყო და ქოსას გიჟ ცხენსაც კარგად იცნობდა. როგორ უნდა შეეჯდე მე, როცა საუკეთესო მხედრები ვერაფერს გახდნენო? — ფიქრობდა გულში, თანაც ეს ისეთი და-

ვალეზა იყო, რომ მარტო თვითონ უნდა შეესრულებინა და სარები ველარაფერს უშველიდნენ, მოვიდა შინ და თავისი გასაჭირი სარებს შესჩივლა.

— ვიცი, ხეალიდან ერთმანეთს ველარ ვიხილავთ, მე ცხენი მომკლავს და თქვენ კი ქოსა დაგეპატრონებათო, — უთხრა და თვალებიდან მდულარე ცრემლი გადმოსცვივდა.

— ჩვენც თან წაგვიყვანე, როცა ცხენს გამოგიყვანენ, გვერდით გვიყოლიე და იმ ცხენს ჩვენ დავიურებთო.

წავიდა დილით ბიჭი ქოსასთან და თავისი სარებიც თან წაიყვანა, გამოიყვანეს ცხენი თავლიდან — აქეთ-იქიდან ოთხ-ოთხი კაცი ამოსდგომოდა და გაჭირვებით აკავებდნენ. მოუყვანეს ბიჭს და წინ დაუყენეს. ცხენი ყურებს ათამაშებს და თვალებიდან და ნესტოებიდან სულ ნაპერწყმებს აკვესებს. ქოსამ ბიჭს შიში შეატყო და გასარებულმა დაუძახა:

— ჰა, შეჯდები, თუ სარები გავირეკო?

სარებმა ბიჭს უჩურჩულეს:

— შეჯექი, ნუ გეშინიაო.

ბიჭმა მოიკრიბა გამბედაობა, დასტაცა სადავეს ხელი და თვალის დახამხამების უმალ ზურგზე მოექცა. მეჯინიბუ-ებმა სადავე გაუშვეს და ცხენმაც დააპირა კამარის შეკვრა. მაგრამ ამ დროს სარებმა შეუბერეს, მალლა აატივტივეს და ცხენმა ფეხები ჰაერშილა გაასავსავა. ბიჭმა გადაუჭირა და გადაუჭირა მათრახსი, მაგრამ მიწას მოწყვეტილი რაღას იხამდა.

ცხენმა რამდენჯერმე კიდევ დააპირა გაქცევა, მაგრამ რამდენჯერაც გაიწია, სარებმა იმდენჯერ შეუბერეს და მიწას მოსწყვეტეს, ბიჭი ყიყინას სცემდა და მათრახს სულ უფრო გამეტებით ურტყამდა. ბოლოს ცხენი ისე შეშინდა, რომ სულ ოფლად დაიღვარა და კანკალი დააწყებინა. აღარც ნესტოებს ბერავდა, აღარც თვალებს აბრიალებდა და აღარც ცოროებს იქნევდა. გაქცევას ვინ იტყვის, ჩორთით სიარულიც კი ველარ გაბედა. ათი წლის იაბოსავით დინჯვად აიარ-ჩაიარა თემშარა და ეზოშიც თავდასრილი და მოთვინიერებული შევიდა.

ბიჭმა ერთხელ კიდევ გადაჰკრა მათრახსი, გადმოსტა და სადავე ქოსას მიუგდო.

— აჰა, შენი სანაქებო ცხენი, ჩაიბარე და შენი ლამაზი გოგო გამომიყვანეო, — უთხრა.

რალა უთქმობდა ქოსას, გამოუყვანა თავისი მზეთუნახავი გოგო და მისცა. ბიჭმა წამოიყვანა გოგო, გამოირეკა თავისი სარებიც, გადაიხადა კარგი ქორწილი და დღესაც ბედნიერად ცხოვრობს.

ჭირი — იქა, ლხინი — აქა,  
ქატო — იქა, ფქვილი — აქა.





## ხელმწიფის შვილი და მისი მეზობლები

იყო და არა იყო რა, იყო შაშვი მგალობელი, ღმერთი ჩვენი მწყალობელი, იყო ერთი სახელოვანი, მორგებული ხელმწიფე და ჰყავდა ერთადერთი ვაჟიშვილი. ბიჭი რომ წამოიზარდა და საცოლოდ მოიწიფა, მამამ დაიბარა და უთხრა:

— შვილო, დროა, უნდა დაგნიშნო და საცოლე ამოირჩიეო.

— საცოლე უკვე ამორჩეული მყავსო, — გამოუტყდა შვილი.

— ვინ არისო? — ჰკითხა მამამ.

— მაშრიყის ხელმწიფის ქალი. თუ იმას შემრთავ, შემრთავ, თუ არადა სხვა ქალი არ მინდაო.

— რაღა ღარიბი ხელმწიფის ქალი ამოირჩიე, მდიდარი გინმე ითხოვეო, — ურჩია მამამ.

შვილმა არ დაუჯერა.

— მე ვინც მინდა, ის უნდა შევირთოო.

ხელმწიფე სიტყვის შებრუნებას არ იყო ჩვეული და შვილს გაუწყრა:

— ჩემი შვილი ხარ და, რასაც გეტყვი, უნდა გამიგონოო.

შვილიც გაჯავრდა.

— არც შენი შვილობა მინდა და არც მემკვიდრეობაო! — შიამხა მამას და კარი გამოიჯახუნა. იმავე დღეს შეკაზმა ცხენი, აისხა თოფ-იარაღი, ნაბადი, შეჯდა ცხენზე და წავიდა. შევიდა უღრან, დაბურულ ტყეში, მონახა ერთი გამოქვაბული და დასახლდა.

ყოველდღე შეჯდებოდა ცხენზე, წავიდოდა სანადიროდ და ერთ ირემს მოკლავდა, რასაც ჭამდა, ჭამდა, რასაც არა და — სრამში ყრიდა. ერთ დღეს ამ სრამში ჩაყრილ ლეშს ერთმა მშიერმა მელამ მიაგნო და კარგად გამოძლა. მეორე დღეს ლეშზე ერთი გაველურებული ციცაც მივიდა. მესამე დღეს მგელმა და დათვმა მიაგნეს და ბოლოს ერთი ყორანიც მიფრინდა. გახდნენ ხუთნი, მაგრამ ლეში იმდენი იყო, რომ ყველას ჰყოფნიდა და ერთმანეთში ქიშპი და ცილაობა არ მოსვლიათ. რაკი სრამს ასუფთავებდნენ და სუნი აღარ აწუხებდა, უნებურ მეინახეთ არც ხელმწიფის შვილი უწყრებოდა და ცხოვრობდნენ ტკბილად და მეზობლურად.

ერთ დღეს მელამ შეკრიბა ყველა თავისი თანამეინახე და გამოუცხადა:

— ერთად ცხოვრება უფროს-უმცროსობის გარეშე არ შეიძლება, ერთ-ერთი ჩვენთაგანი მამასახლისად უნდა ამოვირჩიოთ, რომ ხორცი გოლად გაგვიყოს და თუ ვინიცობაა, ჩხუბი და უსიამოვნება მოგვივა, გაგვაშველოს და სამართალი დაგვიდოსო. როგორ ფიქრობთ, კარგი აზრია, თუ არაო?

— კარგი და პატიოსანი, — მოუწონეს მეგობრებმა და ჰკითხეს: — ვინ ჯობია, ვინ ავირჩიოთ მამასახლისადო?

მელას თვითონ უნდოდა მამასახლისობა, მაგრამ სურვილი არ გაამქლავნა და საცდელად მგელს შესთავაზა: — ყოჩაღია და ამ მოვალეობას სხვაზე უფრო კარგად შეასრულებსო.

მგელი არ დათანხმდა, ცოტა გულხარბი და თვალმშიერი ვარ, ვაითუ ხორცის გაყოფისას ზედმეტი ჩემსკენ გადავიღო და კრებულიდან სამუდამოდ გამაგდოთო.

— მაშინ დათვი იყოს, — თქვა მელამ, — ბრძენია, ჭკუა უჭრის და გამოგვადგებაო.

დათვმაც შორს დაიჭირა:

— ცოტა სიბრძნევი მომდგამს, გულმავიწყიცა ვარ და ვაითუ, საქმე სწორად ვერ განვსაჯოო.

— კარგი, რაკი არავის არ გინდათ, ამ მძიმე ტვირთს ისევ მე ავიკიდებო, — თქვა მელამ და ყველანი გააფრთხილა, — ოღონდ იცოდეთ, უფროსის სიტყვა კანონია და რასაც გეტყვით, უყოყმანოდ უნდა შეასრულოთო.

— შევასრულებთო, — აღუთქვა ყველამ ერთხმად.

დაიწყო მელამ მამასახლისობა და სამართალს მართლა სასახელოდაც განაგებდა, არც მეტს ვისმეს აზრუნებდა და არც — ნაკლებს. ერთ დღეს კიდევ შეკრიბა თანამესუფრენი და უთხრა:

— ეს კაცი რომ ტკბილად გვმეზობლობს, არც გვმტრობს და უსაყვედუროდაც გვაჭმევს, როგორ ფიქრობთ, სიკეთე არ უნდა გადაუხადოთ? თუ მეზობლობაა, უნდა იყოს კიდევცო!

— რა ვქნათ, რით გადაუხადოთ, თორემ ჩვენცა გვრცხვინიაო, — უთხრეს დათვმა, მგელმა, კატამ და ყორანმა.

— რითა და, ამ ჩვენს მარჩენალ მეზობელს მაშრიყის ხელმწიფის ქალი უყვარს, მოდით, მოვიტაცოთ და ცოლად მოვგვაროთო, — უთხრა მელამ.

— კი, მაგრამ როგორ? — ჰკითხეს კვლავ ერთხმად, ?

— როგორ და, აი ასე, — მელამ დათვსა და მგელს მიმართა, — თქვენ წახვალთ, შეებმებით კავში და ხელმწიფის ეზოში დაიწყებთ მიწის ხვნას. ხელმწიფე თავს მოიწონებს, — აი, რა ძალა მაქვს, მხეცებიც კი თავისი სურვილით მემსახურებიანო—და ცოლ-შვილს გამოიყვანს, — გამოდით და თქვენი თვალით ნახეთო—რა თქმა უნდა, სხვებთან ერთად ის ნუთუნახავი გოგოც გამოვა. ამ დროს ყორანი სასახლის სასურავზე იქნება დამალული, ჩამოფრინდება საჩქაროდ, აიტაცებს გოგოს, შეისვამს ფრთებზე და აქეთ გამოაფრენს, თქვენც იმავე წამს მიაწებეთ კავს თავი და გამოიქეცითო.

— ასე, მართლაც, მოხერხდებაო, — მოიწონეს მამასახლისის აზრი დათვმა, მგელმა და ყორანმა და წავიდნენ. როგორც მელამ დაარიგა, ყორანი სასახლის სასურავზე დაიმალა, მგელი და დათვი კავში შეებნენ და მიწის ხვნა დაიწყეს. გამოიხედა ხელმწიფემ და მაშინვე ერთი განგაში ატეხა:

— გამოდით, ხალხნო, ნახეთ, რა ძალა მაქვს, მხეცებიც კი მემსახურებიანო!

მთელი სასახლე — ნაზირ-ვეზირები, კარისკაცები — აიფანზე შეიკრიბა. გამოვიდა ხელმწიფის ცოლ-შვილიც. რა თქმა უნდა, მუთუნახავი გოგოც გამოჰყვა. ხალხი საკვირგელი ამბის ცქერით გაერთო. ყორანმა ამით ისარგებლა,



ჩაფრინდა სასურავიდან, შეისვა გოგო ფრთებზე და გამოაფრინა... ხალხი „ჭაუ-ჭაუს — ძასილით ყორანს დაედევნა და მგელსა და დათვის ყურადღება აღარავინ მიაქცია. მათაც დრო იხელთეს და ხელმწიფის ეზოდან ფსაჭა-გლეჯით გამოცვივდნენ.

სადამოს დაბრუნდა ხელმწიფის შვილი ნადირობიდან და თავის განოქვებულში მხეთუნასავი ქალი რომ დაინახა, ცამდე გაკვირდა. ჰკითხა: — ქალო, ვინა ხარ, ან ამ ჩემს უდაბურ გამოქვებულში საიდან გაჩნდიო?

ქალმა უთხრა, ვინც იყო და როგორც მოხვდა გამოქვებულში. ხელმწიფის შვილი სიხარულმა აიტაცა, მოეხვია ქალს და უთხრა:

— შენ გენაცვალე, მთელი ჩემი სიცოცხლე შენზე ვფიქრობდი და რაკა ჩემიან მოხვედი, ახლა ჩემს ბედს ძალღი აღარ დაჰყუფსო.

ამის შემდეგ ბიჭმა თავისი მეზობელი მხეცებიც უყრო შეიყვარა და ორმაგად მეტ ხორცს უყრიდა. დღისით ისევ სანადიროდ დადიოდა, დამღამობით კი მხეთუნასავი ცოლის ცქერით ტკებებოდა.

ერთ დღეს მელია-მამასახლისმა კიდევ შეკრიბა თავისი ხელქვეითი მხეცები და გამოუცხადა:

— ძალიან კარგია, რომ ჩვენს კეთილ მეზობელს საყვარელი ქალი მოვგვარეთ და გავახარეთ, მაგრამ ეს ძალიან ცოტაა იმასთან შედარებით, რაც ამას ჩვენზე ამაგი აქვს. ხომ სედავთ, ულუფა მოგვიმატა და სულ უფრო მსუქან-მსუქან ნაჭრებს გვიყრის, და თუ არ გინდათ, რომ ვალში დავრჩეთ, ჩვენც სამაგიერო რაღაცით უნდა გადავუხადოთო.

— რით გადავუხადოთ? — ჰკითხეს მხეცებმა.

— რითა და იმით, რომ ლოგინი მოვუტანოთ, — უთხრა მელამ, — ესენი ადამიანის შვილები არიან, შიშველ მიწაზე წოლას დიდხანს ვერ აიტანენ. და დიდი უმადურობა იქნება ჩვენი მხრიდან, რომ ერთი ხელი ლოგინი ვერ ვუშოვოთო.

— კარგი იქნება, მაგრამ საიდან და როგორ? — კვლავ ჰკითხეს მხეცებმა.

— მაგასაც გეტყვითო, — უთხრა მელამ და ისევ დათვისა

და მგელს მიმართა: — თქვენ ორივენი წახვალთ ქალაქში, დათვო, შენ ქალაქის შესასვლელში დაიმალები, მგელი კი შევარდება ქალაქში და ქურჩას სწრაფად გაირბენს. ხალხი მთლად მგელს გამოეკიდება და დუქნები უპატრონოდ დარჩება. შენ შევარდი ფარჩის დუქანში, დასტაცე ერთ მოზრდილ თოფს ტორები და გამოაქციეო.

დათვი შეფიქრიანდა:

— მგელს რა უჭირს, გაირბენს და წავა, მე კი რა ვქნა, დუქანში რომ შემიმწყვდიონ და ძალებს დამახრჩობინონ?

— აი, შე, მყრალო ბებერო, აქამდე გაძვალტყავებულნი დაძუნძულებდი, კაცმა გაჭამა, გამოგკვება, გაგასუქა და ბატარა სამსახურის შესრულებაც აღარ გინდაო? — დასტყვილა მელამ და ციცა-მდივანს უბრძანა, — ჩასწერე, რომ დღეიდან დათვი გავიდეს ჩვენი მეზობლობიდან და თავის სიცოცხლეში სიახლოვეს აღარ გაგვეკაროსო.

დათვს შეეშინდა, მართლა არ გამაძევონო და იმ წამსვე ფეხზე წამოვარდა, — არა, არა, ოღონდ მაგას ნუ მიზამთ და აი ახლავე შივიდვარო, მგელიც გაპყვა და წავიდნენ. მივიდნენ ქალაქში და, როგორც მელამ დაარბია, აქაც ისე მოიქცნენ: დათვი ბაზრის ჭიშკარში ჩასაფრდა, მგელი შიგნით შევარდა და მთელი ქურჩა დაოთხილმა ჩაირბინა. ხალხი მართლაც მგელს გამოეკიდა და სავაჭროს ყველამ თავი მიანება. შევარდა დათვი ფარჩის დუქანში, მომოსა ერთი მოზრდილი თოფი ფარჩის ქსოვილი და წამოძუნძულდა. გზაზე მგელიც წამოეწია და გამოქვაბულში ისევ ერთად დაბრუნდნენ.

ქალმა იმავე დღეს შეკერა ლოგინი, ბიჭმა ტახტი გააკეთა და ცხოვრება უფრო საამური გაუხდათ. ცოტა ჰქონდათ, მაგრამ ბედს არ ემდუროდნენ და ერთმანეთის სიყვარულში დღეებს ტკბილად და ბედნიერად ატარებდნენ.

მაგრამ ნათქვამია, ბედნიერება ხანოკლეაო და დიდხანს არც ქალ-ვაჟს შერჩა. ქალის მამამ, მაშრიყის ხელმწიფემ გაიგო თავისი ქალის ადგილსამყოფელი და ბრძანება გასცა: ვინც წავა და ჩემს ქალიშვილს უკან დამიბრუნებს, თავის წონა ოქროს მივცემო.

იმ ქალაქში ერთი კუდიანი დედაბერი ცხოვრობდა, ბდგა, ჯოხის ბჯენით მივიდა ხელმწიფესთან და მოახსენა:

— თუ მართლა მაგდენ ოქროს მომცემ, ქალიშვილს მე მოგიყვანო.

ხელმწიფემ მისცა ნახევარი წონა ოქრო და ნახევარს მოყვანის შემდეგ დაპირდა. ბებერმა ერთი მოზრდილი ქვევრი მოსთხოვა, ხელმწიფემ ესეც მისცა. ბებერი გადაჯდა ქვევრზე, მათრახად ერთი წითელი გველი დაიჭირა, გადაჰკრა ქვევრს და გააფრინა. იფრინა ქვევრმა, იფრინა და გამოქვაბულის ახლოს, ერთ ღრმა დელეში ჩაფრინდა. ბებერი ჩამოსდა ქვევრიდან, გველი უბეში ჩაისვა და წავიდა გამოქვაბულისაკენ. გამოქვაბულს რომ მიუახლოვდა, დაიბჯინა ჯოხი და კენესა-კრუსუნით აქეთ-იქით სიარული დაიწყო. ამ დროს გამოიარა ნადირობიდან მომავალმა ხელმწიფის შვილმა და ბებერს შეეკითხა:

— დედი, ვინა ხარ, ან ამ ტყეში საიდან მოსულხარო?

ბებერმა უფრო უმატა კენესას და ხელმწიფის შვილს შეეხვეწა:

— გზაარული და ავადმყოფი ბებერი ვარ, შვილო, და აგრემც ღმერთი დიდხანს გაცოცხლებს, ერთი ღამით შემიფარეო.

— წამოდი, დედი, თავშესაფარს როგორ დაგამადლიო, — უთხრა ხელმწიფის შვილმა, შემოისვა ცხენზე და წაიყვანა. მიიყვანა გამოქვაბულში და ცოლს შესძახა:

— ქალო, გამოისედე, სტუმარი მოგიყვანეო!

ქალი ხალხს დანატრებული იყო და ბებრის დანახვა უზომოდ გაუხარდა. მაშინვე შინ შეიყვანა, დააბანინა ხელ-პირი და ცუცხლის ბირას დასვა. მერე მწვადი შეუწვა, გემრიელად ავანშმა და ბოლოს უთხრა:

— დარჩი ჩვენთან, ვითომ ჩემი დედა ყოფილხარ, წვრილმამ საქმეებში მომეხმარებე და ლუკმას არც ჩვენ დაგაყვედრით. ეგეც რომ არ იყოს, დღისით ხმის გამცემი მაინც მეყოლებიო.

ბებერსაც ეს უნდოდა, დარჩა გამოქვაბულში და ერთგული სამსახურით მალე ახალგაზრდა ცოლ-ქმარს თავიც შეა-

ყვარა. ურეცხავდა, საჭმელს უმზადებდა და თავისუფალ დროს ქალი ტყეში სასეირნოდ დაჰყავდა.

ერთხელაც წაიყვანა სასეირნოდ, ატარა, ატარა და თავის ქვევრთან მიიყვანა. ქალმა დაინახა ქვევრი და ბებერს შეეკითხა:

— დედი, ის რა ქვევრი ჩანსო?

— არ ვიცი, შვილო, აბა მივიდეთ და ვნახოთო.

მივიდნენ ახლოს და ბებერმა უთხრა:

— აბა, ჩაიხედე, შვილო, შიგ რა არისო.

ქალმა ჩაყო თავი ქვევრში, დედაბერმა ხელი ჰკრა და შიგ შეაგდო. თვითონ ისევ ზედ გადააღაჯა, გადაჰკრა გველი, ქვევრი გაფრინდა და თვალის დახამხამების უმაღ ქალი მამას მიუყვანა.

დაბრუნდა ხელმწიფის შვილი სანადიროდ და აღარც ცოლი დახვდა და აღარც დედაბერი, მისვდა, რაც დაემართა, შემოიკრა თავში ხელი და დაიწყო ოხვრა და ვიზ-ვიში.

გაიგო ეს ამბავი მელამ და მხეცებს უთხრა:

— ჩვენს მეზობელს იმ ბებერმა მზეთუნახავი ქალი მოსტაცა და თავის მამას დაუბრუნა. თვითონ არც გზა იცის, არც სავალი, ისევ ჩვენ უნდა ვუშველოთ და ის ქალი უკანვე მოვგვაროთო.

— როგორ და რანაირადო? — ჰკითხეს მხეცებმა.

— როგორ და ასეო, — უთხრა მელამ და ყორანს მიმართა, — შენ შეისვამ კატას ფრთებზე და გაფრინდები მაშრიყის ქვეყანაში. მისვალ ხელმწიფის სასახლესთან, კატას ეზოში ჩამოსვამ და თვითონ ისევ სახლის სახურავზე დაიმაღლები. კატა შევა ქალის ოთახში. ქალი, რა თქმა უნდა, იცნობს, აიყვანს ხელში, მოეფერება და აივანზე გამოიყვანს. შენ თვალი მზირად გეჭიროს და გამოვა თუ არა ქალი აივანზე, აღარ დააყოვნო, მაშინვე ჩააფრინდი, ქალიც და კატაც ფრთებზე შეისხი და გამოაფრინეო.

თქმა და ასრულება ერთი იყო. შეისვა ფრთებზე კატა ყორანმა და აფრინდა. გადაიარა მთები, ტბები, მინდვრები, ღელეები და მზის ჩასვლის ხანს მაშრიყის ხელმწიფის ეზოში დაეშვა. კატა ძირს დატოვა და თვითონ სახურავზე დაიმალა.

შევიდა კატა სასახლეში და ქალს კალთაში ჩაუხტა. ქალმა დანახვისთანავე იცნო, მოეფერა და გულში ჩახუტებული აივანზე გამოიყვანა. ყორანმაც აღარ დააყოვნა, სასწრაფოდ ჩაფრინდა სახურავიდან, შეისხა ფრთებზე ქალი და კატა და გამოქვაბულისაკენ გამოაფრინა. რა თქმა უნდა, ქალმა და ხელმწიფის შეიღმა კვლავ ერთად შეყრით დიდად გაიხარეს და თავიანთ მზრუნველ მეზობლებს დიდი მადლობა გადაუხადეს.

მაგრამ მელა მარტო ქალის მოყვანით არ დაკმაყოფილდა. იცოდა, რომ მაშრიყის ხელმწიფე ქალის ხელასლა მოტაცებას არ აპატიებდა და თადარიგი წინასწარვე დაიჭირა. შეკრიბა თავისი ხელქვეითები — დათვი, მგელი, კატა, ყორანი და უთხრა:

— ვიცი, მაშრიყის ხელმწიფე ამ შერცხვენას არ მოითმენს და ჩვენი მეზობლის დასასჯელად ჯარს გამოგზავნის, ჩვენც აქედანვე უნდა დავიჭიროთ თადარიგი, საგუშაგო ადგილებზე უნდა გავნაწილდეთ, რათა მტრის შემოსულა დროზე შევიტყოთ და სათანადოდ მომზადებულნი დავხედეთო. — ტყე დათვს ჩააბარა, სერი — მგელს, კატა კლდის თხემზე აგზავნა, ხოლო ყორანს ციდან თვალყურის ჭერა დაავალა და თვითონ გამოქვაბულის შემოსასვლელ სვობაში ჩადგა.

მართლაც არ გასულა დიდი ხანი, რომ მაშრიყის ხელმწიფის ჯარებმა საზღვარი გადმოლახეს და ტყესა და ველს კალიასავით მოედვენენ. ხელმწიფემ შუა მინდორში შავი კარავი დადგა და ჯარები საომრად განაწყო.

მელიამ საჩქაროდ დაიბარა საგუშაგოებზე მდგარი თანამოძმენი და ყველას თავისი დავალება მისცა: დათვს სადათვეთი უნდა შეეკრიბა, მგელს — სამგლეთი, კატას — კატების ლაშქარი უნდა მოეყვანა, ხოლო ყორანს — ფრინველებისა.

გადადგა მგელი სერზე, ერთი ხმამაღლა დაიყმუველა და თვალის დახამხამების უმაღ სერი მგლის ლაშქრით გაივსო. ასე ქნეს სხვებმაც: — დათვმა, კატამ და ყორანმა. ერთ წუთში იმდენი მტაცებელი ნადირ-ფრინველი მოგროვდა, რომ მათი ღრენა-ყაშყაშისაგან ყურთასმენა აღარ იყო.

შუალამე რომ შეიქნა, მელამ დააწყო თავისი ლაშქარი,

დათვებს დათვი უსარდლა, მგლებს—მგელი, ფრინველებს—  
ყორანი და კატებს — კატა. — ყველას თავისი ტომისა და  
შოდგმის სარდალი დაუნიშნა და უბრძანა:

— აბა, ახლა კი ხელი — ხმალს და ხმალი — მტერსო! —  
წადირ-ფრინველთა ლაშქარმაც იხუვლა და ღრენით, ყმუი-  
ლით, ბურტყუნითა და ყაყაყით ხელმწიფის ჯარს მიესია.  
დათვები ბეგვავდნენ, მგლები გლეჯდნენ, ფრინველები კორ-  
ტნიდნენ და კატები თვალებს აკაწრავდნენ. თვითონ მელა  
ბრძოლის შუაგულში იდგა და ახალ-ახალ განქარგულებებს  
იძლეოდა. გათენებამდე ხელმწიფის ჯარი მთლიანად განად-  
გურდა, ზოგი მოკვდა, ზოგი დასახიჩრდა, ზოგმა გაქცევით  
ჟშველა თავს და ბრძოლის ველს საბოლოოდ ხელმწიფე და  
იმისი ამალადა შემორჩა. მივიდა მელა ხელმწიფესთან და  
უთხრა:

— რას უწუნებ შენს სიძეს და ჯარს რაზე ლუბავო?

— მაშ რა ვქნა, ერთადერთ ქალიშვილს ტყის კაცს ხომ  
არ მივცემო? — მიუგო ხელმწიფემ.

— წამოდი და თვითონ გაიგებ, როგორი ტყის კაციც  
არისო, — უთხრა მელამ, წამოიყვანა ხელმწიფე გამოქვა-  
ბულში და სიძე გააცნო, ხელმწიფის შვილმა უამბო მაშრი-  
ცის ხელმწიფეს თავისი თავგადასავალი და ტყეში გაჭრის  
მიზეზიც უთხრა. ხელმწიფემ ახლა კი გაიგო, ვისთანაც ჰქონ-  
და საქმე და დიდად ინანა, რომ ამდენი ჯარი ტყუილუბრა-  
ლოდ გააყლეთინა. გადაეხვია ხელმწიფის შვილს, მამაშვი-  
ლურად გადაკოცნა და უთხრა:

— მე ამ ერთი ქალის მეტი შვილი არ გამაჩნია, ტახტის  
მემკვიდრე არა მყავს, ბარემ წამოდი, ტახტიც ჩაიბარე და  
სახელმწიფოც განაგეო.

— დიდი სიამოვნებითო, — უთხრა ხელმწიფის შვილ-  
მა, — მაგრამ მე მარტო არ წამოვალ, ჩემი მეზობლებიც თან  
უნდა წამოვიყვანო.

— ვინ არიან შენი მეზობლები, ამ უღრან ტყეში მეზობ-  
ლები ვინლა გყავსო? — გაუკვირდა მაშრიცის ხელმწიფეს.

— ვინა მყავს და ვინც შენი ჯარები დაამარცხაო, —  
უთხრა სიძემ და წარუდგინა დათვი, მგელი, მელა, ციცა და  
ყორანი.

სიმამრმა ნება დართო, ხელმწიფე დღეიდან შენა ხარ და  
როგორც გინდა, ისე მოიქეციო.

აიკრეს გუდა-ნაბადი და ყველანი ერთად წავიდნენ მამ-  
რიყის ქვეყანაში. ხელმწიფემ ქალიშვილსა და სიძეს დიდი  
ქორწილი გადაუხადა, მათი მეზობლებიც სასახლეში და-  
ასახლა და შესაფერი დღიური ულუფაც გაუწესა: დათეს —  
ღორი, მგელს — ბურვაკი, მელას — ბატი, ყორანს — ბატკა-  
ნი და ციცას — ერთი ჯამი თბილი რძე. და დაიწყო ტკბილი  
და მოსვენებული ცხოვრება.

ჭირი — იქა, ლხინი — აქა,

ქათო — იქა, ფქვილი — აქა.





## წ ი ქ ა რ ა

იყო და არა იყო რა, ღვთის უკეთესი რა იქნებოდა. იყო ერთი ცოლ-ქმარი და ჰყავდათ ერთი პატარა ბიჭი. დედ-მამა ბიჭს სამწყემსურში აგზავნიდა და თვითონ მინდორში მუშაობდა, წლის სარჩოს შოვნაში სამივე ერთმანეთს ეხმარებოდა და ტკბილ და უსაყვედურო ლუკმას ჭამდნენ.

მაგრამ ერთ უბედურ დღეს მათი ოჯახის სიმყუდროვე დაირღვა. — დედა მოულოდნელად ავად გახდა და გარდაიცვალა. მამა-შვილმა მიცვალებული წესისამებრ გამოიტირეს და დაასაფლავეს.

წლის თავზე მამამ სხვა ცოლი მოიყვანა. დედინაცვალი ერთი ავი და კუდიანი დედაკაცი გამოდგა და გერს ზოსულის დღიდანვე მოსისხლე მტრად მოექიდა — ლანძლავდა, სცემდა და ცეცხლის კალოში აყენებდა. წავიდოდა თუ არა მამა მინდორში სამუშაოდ, იმავ წამს ლოგინში მიუხტებოდა, ცემა-ტყეპით წამოაგდებდა და მშიერ-მწყურვალსა და უსაგზლოს სამწყემსურში გააგდებდა.

ბიჭს ნასირში ერთი წითელი ხარი ერიო. ხარს სახელად წიქარა ერქვა. ხარი გრძნეული იყო და ბიჭის გასაჭირს კარგად ხედავდა, რქიდან ღალას იღებდა და მშიერ ბიჭს იმით ასაზრდოვებდა. ბიჭსაც ძალიან უყვარდა თავისი უტყვი მეგობარი, — ნოყიერ ბალახს უზიდავდა, აბანავებდა და ჩრდილში ასვენებდა. დედინაცვალმა შეიტყო ხარისა და ბიჭის მეგობრობის ამბავი და უარესად გაანჩხლდა. მიხვდა, რომ გერთან ვერაფერს გახდებოდა, სანამ მას გვერდით წიქარა ჰყავდა, და ხარის თავიდან მოშორება გადაწყვიტა. —



მოიავადმყოფა თავი, ლოგინში ჩაწვა და ქმარს კენესა-გმინ-  
ვით დახვდა:

— ვკვდები და მიშველეო.

— რა მოგარჩენსო? — ჰკითხა ქმარმა.

— წიქარას გულ-ღვიძლის მეტი არაფერი მიშველისო, —  
უთხრა ცოლმა. — თუ დაკლავ, გულ-ღვიძლს ამოაცლი და  
შაჭმევ, მოვრჩები, თუ არადა, მოვკვდებიო.

დალონდა კაცი ძალიან, აბა ვის უმეტება თავისი მარჩე-  
ნალი დასაკლავად, მაგრამ რა უნდა ექნა, როცა ცოლი ლო-  
გინიდან აღარ დგებოდა და კენესა-გმინვას უფრო უმატებდა.  
ჯანდაბას, რაც იქნება, იქნებაო, — თქვა კაცმა, გადმოიღო  
დიდი დანა და დაუწყო ლესვა.

ბიჭმა ეს დაინახა და მამას ჰკითხა:

— მამი, რად გინდა ეგ დანა, რადა ლესავო?

— წიქარა უნდა დავკლაო, — ამოიოხრა მამამ.

ბიჭს თავზარი დაეცა, მაშინვე ბაკში შევარდა, მოეხვია  
წიქარას ყელზე და სმამაღლა აქვითინდა.

— რატომ ტირიხარ, ჩემო პატარა მეგობარო? — ჰკი-  
თხა წიქარამ.

— მამაჩემი დაკვლას გიპირებს და იმიტომაო, — მიუ-  
გო ბიჭმა.

— მაშ ნულარ აყოვნებ, — უთხრა წიქარამ, — ახლავე  
აილე ერთი საღესავი, ერთი სავარცხელი, ერთი მათარა წყა-  
ლი, შემაჯექ ზურგზე და გავიქცეთო.

შევარდა ბიჭი შინ, გამოიტანა ყველაფერი და მივიდა  
ისევ წიქარასთან, წიქარამ შეისვა ზურგზე და გააქროლა.

მამამ დანა გალესა, მაგრამ ბაკში წიქარა აღარ დახვდა,  
აღარც ბიჭი სადმე ჩანდა. მამა აქეთ ვცა, იქით შეიხვდა,  
მაგრამ ბიჭისა და წიქარას ასავალ-დასავალისა ვეღარაფე-  
რი გაიგო. შევიდა შინ და ლოგინში მწოლიარე ცოლს  
უთხრა, — დანა მზადა მაქვს, მაგრამ წიქარა აღარსად ჩანს  
და ბიჭიც დაკარგულაო.

დედინაცვალი კუდიანი იყო და ყველაფერს მიხვდა. მა-  
შინვე წამოხტა ლოგინიდან და კარში გავარდა, დადგა  
ზურგშექცევით მზის ამოსახედისაკენ, სამჯერ უკულმა ბირ-  
ჯვარი გადაიწერა და რაღაც ლოცვა ჩაიბუტბუტა: დედა-

კაცს ერთი ჯადოქარი ტახი ჰყავდა და იმას მოუხმო. მოვარდა ტახი ქშენითა და კბილების ლესვით და ჰკითხა:

— რას მიბრძანებ, რით გემსახურო?

— ახლავე გაქანდი, — უთხრა დედინაცვალმა, — დაეწიე წიქარას, გაფატრე და გულ-ღვიძლი ამოარიდეო.

— სიტყვა გრძელია, საქმე მოკლეო! — თქვა ტახმა, გაქრა ეშვი ეშვს და გაეკიდა წიქარასა და ბიჭს.

მირბის წიქარა, მიაბრუნინებს პატარა მეგობარს და უკან ეშვებდალესილი ტახი მისდევს. ეტყვის წიქარა ბიჭს:

— აბა მიისედე, უკან ხომ არაფერი მოჩანსო?

მოიხედა ბიჭმა და წიქარას უთხრა:

— შორს ბუზისტოლად რაღაც მოჩანსო.

— ეგ ტახია, — უთხრა წიქარამ, — სიკვდილი გვიასლოვდება, გადაღვარე მათარაო.

გადაღვარა ბიჭმა მათარა და გაჩნდა საშინელი ზღვა. დელავს ზღვა, მთისოდენა ტალღებს იფაფრავს და ყველაფერს წალეკვას უქადის, მაგრამ ტახი არად ავდებს ტალღების ცემას, მიაპობს ზვირთებს და მიცურავს.

ცურვაში საკმაო დრო გავიდა, ამ ხნის მანძილზე წიქარამ და ბიჭმა კარგა გრძელი მანძილი გაირბინეს, მაგრამ ღორი მაინც წამოეწია. კიდევ უთხრა წიქარამ ბიჭს:

— უკან მიიხედე, ხომ არაფერი მოჩანსო?

— ბუზისტოლად რაღაც მოჩანსო, — უთხრა ბიჭმა.

— ისევ წამოგვეწია ეგ წყეული, — თქვა წიქარამ და ბიჭს უთხრა, — სავარცხელი გადააგდეო!

გადააგდო ბიჭმა სავარცხელი და უცბად ისეთი სშირი ტყე აიყარა, რომ შიგ თაგვიც ვერ გაძვრებოდა. კაფავს ტახი ტყეს ეშვებით, აწვენს ხეს ხეზე და მიიწევს წინ. როგორც იქნა, გაკაფა ტყე, გავიდა ნაპირში და უფრო გაშმაგებით გაეკიდა.

წიქარა სულს არ ითქვამს, მიქრის და მიაქროლებს ბიჭს. კარგა მანძილი რომ გაირბინა, კიდევ უთხრა ბიჭს:

— მიიხედე უკან, ხომ არ გამოჩნდა ის ჯადოქარიო?

ბიჭმა მიიხედა და შორს ისევ ბუზისტოლა წერტილი დაინახა. წიქარამ უთხრა, — სალესავი გადააგდეო.

გადააგდო ბიჭმა სალესავი და აღიმართა პიტალო, მიუ-

გალი კლდე. მიადგა ღორი ამ კლდეს და დაიწყო საფეხურების გამოჭრა. ჭრის ტახი საფეხურებს, გააქვს ეშვებს ტინზე ღრჭიალი, და მიიწვეს ზევით, გასჭრა უკანასკნელი საფეხურიც, ის არის, უნდა გადავიდეს კლდეს, რომ უცბად ფეხი დაუსხლტა და უფსკრულში ჩაიღწა.

გადარჩნენ ბიჭი და წიქარა. გავიდნენ ერთ ტრიალ მინდორზე, მინდორში ერთი ისეთი მაღალი ალვის ხე იდგა, რომ კაცი თვალს ვერ შეაწვდენდა. წიქარამ შესვა ბიჭი ხეზე, მისცა სალამური — ერთი სალხინო, მეორე — სამწუხარო და უთხრა:

— მე ახლა საძოვარზე წავალ და თავს იმით ვირჩენ. შენ კი სალხინო სალამური დაუკარი და სასმელ-საჭმელი უღეგად გექნება, ხოლო თუ რამე გაგიჭირდეს, მაშინ სამწუხარო სალამური დაუკარი და იმავ წამს შენთან გავირდებით.

გამოეთხოვა წიქარა ბიჭსა და წავიდა. ბიჭი დარჩა ალვის ხეზე, დაუკრავს სალხინო სალამურს და მთელი მიდამო აცეკვდება. ხეები, ბურქები, ბალახი ყველა ერთნაირად ამღერდება და ბიჭს ნაირ-ნაირი საჭმელებით გაწყობილი სუფრა გაეშლება. ცხოვრობს ასე ბიჭი უდარდვლად და ლაღად.

მაგრამ, საუბედუროდ, ლხინს და გართობას სიფათიც განუშორებლად თან ახლავს. ერთხელ ერთმა მეცხვარემ მინდორში ცხვარი შემორეკა, გაიგონა სალამურის ხმა და ძალიან მოეწონა. მიჰყვა ხმას, მიჰყვა და ალვის ხეს მიადგა. შეიხედა მალლა და დაინახა: ბიჭი სალამურს უკრავს და თან ნუგბარ-ნუგბარ საჭმელებს შეექცევა. სალამურის ხმაზე ჭრელ-ჭრელა ჩიტუნებისა და პეპლების გუნდი თავს დასტრიალებს; მეცხვარეს შურით აევისო გული, სალამურის ხელში ჩაგდება მონინდომა და ბიჭს ასძახა:

— ჩამოდი ერთი ძირს და მაჩვენე შენი სალამური, მინდა. გავიგო, რისგან არის გაკეთებულიო.

ბიჭმა ჯერ ჩასვლა დააპირა, მაგრამ უცბად წიქარას ნათქვამი გაახსენდა, არამც და არამც ძირს არ ჩახვიდე და არც სალამური ვისმეს აჩვენო, და მეცხვარეს ჩამოსძახა:

— ვერც ჩამოვალ და ვერც სალამურს გაჩვენებო.

მეცხვარეს უფრო გაუძლიერდა შური, შენ თუ თინი ვერ

გიყო, რაღა კაცი ვყოფილვარო, — ჩაილაპარაკა ჩუმად და ხელმწიფესთან წავიდა. შევიდა სასახლეში და მოახსენა:

— დიდებულო ხელმწიფე, თქვენს სამფლობელოში, ამა და ამ ადგილას ალვის ხეზე ერთი ბიჭი ზის და ისეთი სალამური აქვს, რომ იმის ხმაზე მთელი ტყე, ბალახი და ნაღირ-ფრინველი ცეკვავს. ვინ მისცა ნება, რომ თქვენს დაუკითხავად ასეთ ჯადო-საქმეს აკეთებსო?

ის ხელმწიფე დიდი ვერავი იყო და ლხინსა და მსიარულებას ვერ იტანდა. მაშინვე დაიბარა ნაზირ-ვეზირები და უბრძანა: წადით და ის ბიჭი თავის სალამურიანად აქ მომიგვარეთ. მე მას ვუჩვენებ, როგორ უნდა უნებართვოდ სალამურის დაკვრათ.

წავიდნენ ნაზირ-ვეზირები, მიადგნენ ალვის ხეს, მაგრამ ზიჯმა მათაც უარი უთხრა, — არ ჩამოვალო. რა ქნან ვეზირებმა, ზედ ვერ ავლენ, გლუვი ხეა და ხელმოსაჭიდი არაფერი აქვს, მოსჭრან კიდევ და ბიჭი დაიღუპება. დაბრუნდნენ უკან ხელცარიელები და ხელმწიფეს უთხრეს, იმ ბიჭის ცოცხლად შეპყრობა ყოვლად შეუძლებელიაო. ხელმწიფე უფრო განრისხდა და თქვა:

— ვინც იმ ბიჭს ალვის ხიდან ჩამოსვამს და სასახლეში მომიყვანს, დიდძალ თქრო-ვერცხლს ვაჩუქებო.

გაიგო ეს ერთმა კუდიანმა დედაბერმა, მივიდა ხელმწიფესთან და უთხრა:

— დიდო ხელმწიფე, იმ ბიჭს მე მოგიყვანთ, ოღონდ თქვენ ერთი თხა და ერთი სადგისი მიბოძეთო.

აბა ერთი თხა და ერთი სადგისი ხელმწიფეს რა გაუხდებოდა, მისცა მაშინვე და გაგზავნა.

წაიყვანა დედაბერმა თხა და მიიყვანა ალვის ხის ძირას. ბიჭს აინუნშიაც არ მოსდის, ზის ალვის ხეზე, უკრავს სალხინო სალამურს და თავზე ბეპლებისა და ჩიტების გუნდი დაფარფატებს.

დედაბერმა ამოიღო სადგისი და დაუწყო თხას ჩხვლეტა, გააბა თხამ ბლავილი. გაიგონა ბიჭმა თხის კიკინი და დედაბერს ჩამოსძახა:

— რას შერები, ბებია, მაგ თხას რად აჩხავლებო?

— დაკვლა მინდა, შვილო, და ვერ მომიხერხებია. დედა-

შვილობას, მიყავი სიკეთე, ჩამოდი ცოტასანს, დამიკალი ეს  
თხა და ისევ ადიო.

გაბრწყვდა ბიჭი, იფიქრა, ამ დედაბერს რა ღალატი უნ-  
და ედოს გულშიო და ძირს ჩამოვიდა. საბედნიეროდ სალა-  
ხურები ხეზე დატოვა. დაუკლა დედაბერს თხა და ის იყო,  
ისევ ხეზე უნდა ასულიყო, რომ დედაბერმა ძილქუშისა შეუ-  
ლოცა და დააძინა. ზერე აიყვანა მძინარე ხელში და მიზგვა-  
რა ხელმწიფეს. ხელმწიფემ ბრძანა, ასლავე ცხრაკლიტულში  
დაამწყვდიეთო და კარისკაცებმაც მძინარე ბიჭს ცხრაკლი-  
ტულში უკრეს თავი.

როდის-როდის გამოედვიძა ბიჭს და რას ხედავს, დატყ-  
ვევებულა. მოაგონდა ყველაფერი, მიხვდა, რომ ეს საქმე  
დედაბერმა მოუწყო და მწარედ ატირდა.

ტირილით რომ გული იჯერა, რკინის რიკულებიან ფან-  
ჯარასთან დაჯდა და ლაყვარდოვან ცას მიაშტერდა. ამ  
დროს ცაზე ყვავმა გადაიფრინა, დაინახა ბიჭმა და ასძახა

ყვავო, ყვავო, შენსა მზესა,  
შენი წყვილი შვილის მზესა.  
მინდორში რომ ალვის ხე დგას,  
ლაყვარდ ცას რომ უწვდენს წვერსა,  
იქ სალამურები დამჩნა,  
გზას არა გთხოვ შორს და ძნელსა,  
წადი და აქ მომიტანე,  
დავიფიცავ შენსა მზესა.

— გახსოვს, მე რომ ლეშზე ვიჯექ და შენ ქვების სროლა  
დამიწყეო, — ჩამოსჩსავლა მალლიდან და გაფრინდა. ბიჭს  
მოაგონდა თავისი დანაშაული და მწარედ ინანა.

ცოტა ხანი და ცაში ასლა ბელურა გამოჩნდა. ბიჭმა შე-  
ხედა და ასძახა:

— ჩიტო, ჩიტო, შენსა მზესა,  
შენი წყვილი შვილის მზესა.  
მინდორში რომ ალვის ხე დგას,  
ლაყვარდ ცას რომ უწვდენს წვერსა.

იქ სალამურები დამჩნა,  
გზას არა გთსოვ შორს და მნელსა,  
წადი და აქ მომიტანე,  
დავიფიცავ შენსა მზესა.

— გახსოვს, შენ რომ მახეს მიგებდი და ბუდეს მიშლიდი, ახლა აღარც მე გიშველიო, — ჩამოუქღურტულა ბელურამ და გაფრინდა ისიც თავისი გზით. ბიჭს ეს დანაშაულიც მოაგონდა და უფრო მწარედ ინანა. მერე შეხედა ზეცას და დაიფიცა, — თუ აქედან მშვიდობით გადავრჩი, ნადირ-ფრინველთა მოდგმას ჩემს დღეში აღარაფერს დავეუშავებო.

ამ დროს ჩამოიფრინა მერცხალმა. ბიჭმა ხელები მუდარით გაიშვირა და შესტირა:

— საით მიფრინავ, მერცხალო,  
გულთეთრო, მსუბუქფრთიანო,  
მინდორში იცი ალვის ხე?  
ცივნი წყარონიც დიანო,  
პეპლებიც იქა სხდებიან,  
ტურფად ჭრელ ფრთებსა შლიანო,  
შეიყრებიან ჩიტები,  
სიმღერით დატკბებიანო,  
წიქარაც იმათთან მოვა,  
იქ დაინახავ, ღვთიანო!  
სალამურებიც იქ არის,  
ურემოდ დალპებიანო,  
გაფრინდი, აქ მომიტანე,  
დიდხანს არ დამიგვიანო!

მერცხალმა უთხრა: — შენგან მეც ბევრჯერ მახსოვს წყენა, მაგრამ რაკი მოინანიე და ფიცი დადე, რომ ნადირ-ფრინველთ ამიერიდან აღარაფერს დაუშავებ, მეც გაპატიებ და სალამურებსაც მოგიტანო. — გაფრინდა მერცხალი და სალამურები სულ რამდენიმე წამში მოუტანა.

ბიჭი ცას ეწია სიხარულით. თვალებიდან ცრემლიც კი გადმოსცვივდა, მერცხალს გულმხურვალე მადლობა გადაუ-

ხადა და საჭირვარაშო სალამურს ჩაპბერა. გაიგონა წიქარამ საჭირვარაშო სალამურის ხმა და მაშინვე ბიჭის დასახსნელად გაეშურა. გააფთრებული ეცა ცხრაკლიტულს და დაუწყო რქებით მტვრევა. რვა კარი უვნებლად შეამტვრია, მეცხრე კარზე კი ცალი რქა მოსტყდა.

დალონდა წიქარა, დალონდა უფრო იმიტომ, რომ ცალი რქით კარებს ვეღარ შეამტვრევდა და მეგობარს ვერ გამოიხსნიდა. უცბად საძირკვიდან დედოფალა გამოძვრა და წიქარას უთხრა:

— რქა რომ გაგიმთელო, შენს ლეშს სომ მაჭმევო?

— თლონდ რქა გამიმთელე, ჩემი პატარა მეგობარი გაამომახსნევენე და მერე რაც გინდოდეს, ის მიყავიო.

გაიქცა დედოფალა, მოიტანა რალაც ბალახი, მიუსვ-მო-უსვა წიქარას მოტეხილ რქაზე და გაუმთელა. წიქარა დაეძგერა მეცხრე კარს და შელენწა. შევარდა ბიჭთან, შეისვა ზურგზე და გააქროლა.

მივიდნენ ბიჭი და წიქარა ისევ ალვის ხესთან და დიდი ხნის უნახავებმა დაიწყეს ერთმანეთის ხვევნა და ალერსი. სად იყო, სად არა, დედოფალაც იქ გაჩნდა და წიქარას უთხრა:

— ხომ შეგისრულე დანაპირები? ახლა შენი ჯერია, მოემზადე, უნდა დაგკლა და შეგჭამოო.

წიქარამ კისერი მორჩილად გადაუგდო და უპასუხა:

— მართალი ხარ, აპა, ჩემი კისერი და შენი ხმალი დამკალი და შემჭამეო!

ბიჭს ტირილი აუტყდა, დაიროქა და დედოფალას შეესვენწა:

— თლონდ წიქარას ნურაფერს ავნებ და ისევ მე მომკალიო.

— კარგი, რახან ასე გინდათ, შენ მოგკლავ, ჩემთვის სულერთიაო. — უთხრა დედოფალამ და ბიჭის დაკვლა დააპირა.

— ახლა წიქარამ შესტირაქ

— განა იმიტომ გამოვიხსენი ტყვეობიდან, რომ ახლა სასიკვდილოდ გავიმეტო. ბირობა მე მოგეცი და მოკვლითაც მე უნდა მომკლაო.

დედოფალამ უყურა, უყურა და ბოლოს უთხრა:

— არა, თქვენ ისეთი მეგობრები ყოფილხართ, რომ თქვენი გაყრა არასგზით არ შეიძლება. იცოცსლეთ მარად და ერთიმეორე გაახარეთო. — დედოფალამ თავი დაუკრა და გაუჩინარდა.

გახარებული მეგობრები უფრო მსურვალედ მოეხვივნენ ერთმანეთს. მერე წიქარამ ბიჭი ზურგზე შეისვა და გააქროლა სსვა ადგილას. სადაც არც შურიანი მეცხვარე იყო და არც ბოროტი ხელმწიფე. შესვა იქაც ალვის ხეზე, მისცა სალამურები და თვითონ ისევ საბალახოდ წავიდა.


ბიჭი ახლაც იმ ალვის ხეზე ზის. უკრავს სალხინო სალამურს და თვითონაც ხარობს და ნადირ-ფრინველსაც ახარებს. ხოლო როცა წიქარას ნახვა მოუნდება, დაუკრავს საჭირვარამო სალამურს და წიქარაც უმალ იქ გაჩნდება. ესვევიან ერთმანეთს, ჰკოცნიან და ღმერთს მადლობას სწირავენ, რომ ბოროტი ადამიანებს სამუდამოდ მოშორდნენ.

ჭირი — იქა, ლხინი — აქა,

ქატო — იქა, ფქვილი — აქა.











## ამხანაგი ნუ ბქულს, საშოვარი ნუ გზურს

იყო და არა იყო რა, იყო სამი ამხანაგი. დადიოდნენ საშოვარზე და რასაც შოულობდნენ, თანატოლად იყოფდნენ. ერთხელ ერთი ჩანახი თქრო იპოვეს და ჩვეულებრივ თანაბრად გაიყვეს. იმხანად საჭმელი აღარაფერი ჰქონდათ და ერთ-ერთი ამხანაგი ქალაქში საჭმლის მოსატანად გაგზავნეს.

მიდიოდა ამხანაგი ქალაქისკენ და თან ფიქრობდა: — ასლა აღარა მიჭირს რა, საკმაოდ გავმდიდრდი და საშოვარზე სიბარული აღარ მომიწევს. მაგრამ რა კარგი იქნებოდა, რომ ჩემი ამხანაგების წილიც ჩემი ყოფილიყო, ცხოვრებას უფრო უზრუნველად გავატარებდიო. ამ ფიქრმა აცდუნა და ბოლოს ასე გადაწყვიტა: მოდი, სანოვავს რომ ვიყიდი, მოვწამლავ და ამხანაგებს ისე მივუტან. თვითონ პირს არ დავაკარებ, ვეტყვი, ქალაქში ვჭამე-მეთქი, მოიწამლებიან და იმათი წილიც მე დამჩრებაო.

გადაწყვიტა და გააკეთა კიდევ: იყიდა სანოვავე, მოწამლა და ისე წამოიღო. მაგრამ გულხელდაკრეფით არც მისი ამხანაგები მსხდარან. წავიდა თუ არა ამხანაგი, მათაც იგივე ფიქრი აეკვიატათ: რატომ გავუყოთ მესამე ამხანაგს? იმისი წილიც რომ ჩვენ დაგვრჩეს, სომ უფრო მეტი გვექნებაო, და გადაწყვიტეს: მოვა თუ არა, მაშინვე მოვკლათ და იმისი წილიც ჩვენ გავიყოთ.

მოიტანა თუ არა გაგზავნილმა ამხანაგმა საჭმელი, იმორმა ამხანაგმა მაშინვე ხმლები იშიშულეს და ლუკმა-ლუკ-

მად აკუწეს. თვითონ კი მიუსხდნენ სანოვაგეს, მაგრამ პუარის ჭამა ნახევრადაც ვერ აითავეს, მოიწამლნენ და დაიხოცნენ. ნაპოვნი სიმდიდრე კი ოხრად დარჩა.

ასეა, ვისაც ამხანაგი სძულს და საშოვარი შურს, თავისი წილიც ოხრად დარჩება.

ჭირი — იქა, ლხინი — აქა,  
ქატო — იქა, ფქვილი — აქა.





## დიაკვანი და ყვავი

იყო და არა იყო რა, ღვთის უკეთესი რა იქნებოდა, ერთ ქალაქში ისეთი ლამაზი ეკლესია ააშენეს, რომ მისი ბადალი ქვეყნად არაფერი მოიპოვებოდა. კედლები, შიგნით-გარეთ, სულ ძვირფასი თვლებით შეუმკეს და გუმბათზე ოქროს ჯვარი აღმართეს. მნახველები ჩერდებოდნენ ეკლესიასთან და აღტაცებით გაიძახოდნენ, — მართლაც, რომ მეტიმეტად კარგი რამ არისო, სოლო მრევლი ხალისით დადიოდა სალოცავად და შესაწირავსაც გულუხვს სწირავდა.

მაგრამ ქალაქის მცხოვრებთ ლამაზი ეკლესიით თავმოწონება დიდხანს არ დასცალდათ. საყდარს ერთი ზინზლიანი ყვავი შემოეჩვია და მთელი სილამაზე გააოხრა, დასკუბდებოდა ოქროს ჯვარზე დილიდან საღამომდე და ჯვარიც და კედლებიც მთლიანად ჩამოსვარა. რა არ იღონა მღვდელმა, როგორ არ ეცადა, მაგრამ ყვავი ვერა და ვერ მოიშორა. მრევლი კი დასვრილ ეკლესიაში აღარ შედიოდა და აღარც უხვი შესაწირავი მიჰქონდა.

გაჯავრდა ბოლოს მღვდელი და დიაკვანს უთხრა:

— მოაშორებ ეკლესიას ამ ოხერ ფრინველს, ხომ კარგი, არადა, ქალაქში აღარ გაგაჩერებო.

დაღონდა დიაკვანი. დაჯდა შინ და დაფიქრდა. იფიქრა, იფიქრა და ბოლოს ასეთი სერსი მოიფიქრა: აიღო ერთი ნაჭერი დამარილებული ღორის ხორცი, ერთი ჯამი თავანკარი ღვინო და აიტანა ეკლესიის გუმბათზე. ხორცი ჯვარზე დაჰკიდა, ღვინო ჯვრის ძირში დადგა და უკანვე ჩამოვიდა.

მოფრინდა ყვავი და შემოჯდა ეკლესიის გუმბათის ჯვარზე. ხორცს ჯერ უნდობლად შეხედა, მაგრამ მალე სულმა სძლია და ჩაუნისკარტა. ხორცი ეგემრიელა და მსუნაგად გადასანსლა. გამაძღარმა რამდენჯერმე ხმამალლა დაიჩხავლა და ფრთა ფრთას შემოჰკრა. მლაშე ხორცნაჭამს მალე წყალიც მოსწყურდა და ღვინიან ჯამს დაეწაფა. სვა, სვა და ამოშრიტა. დიაკვანი დაბლიდან უთვალთვალებდა და სიხარულისაგან სულ ასკინკილას ცეკვავდა.

ყვავმა წყურვილიც რომ მოიკლა, ისევ ჯვარზე შეჯდომა და დაჩხავლება მოუნდა, დაიქნია ფრთები, მაგრამ მთვრალმა ტანი ველარ აიტანა და ჯვარზე შეჯდომის მაგიერ მიწაზე მოადინა ბრაგვანი.


დიაკვანიც ამას ელოდა, მივარდა ღვინისაგან გაბრუებულ ყვავს, აიყვანა ხელში და თავი კედელს უჯახა. სცემდა და თან გაჯავრებული ჩასძახოდა:

— შე ოხერო, რა ხარ, ვინა ხარ, რომ საშველი აღარ მოგვეცი, რა რჯულისა და სარწმუნოებისა ხარ: თუ ურია ხარ, ღორის ხორცს რატომ სჭამ, თუ მაჰმადიანი — ღვინოს რადა. სვამ, ხოლო თუ ქრისტიანი ხარ, ამ წმინდა ჯვარს და ღვთის საყდარს რაღად აფუჭებო? — წააძრო კისერი და სანაგვეზე გადაუძახა:

ჭირი — იქა, ლხინი — აქა,

ქატო — იქა, ფქვილი — აქა.





## ღვინის გარეშა

იყო და არა იყო რა, ამქვეყნად რა არ ყოფილა ოდესღაც ისეთი დროც იყო, როცა ხალხი ვაზს არ იცნობდა და არც ღვინის დაყენება იცოდა, ვაზი მაშინ ტყეში იზრდებოდა და ყურძენს ჩიტები კენკავდნენ.

ერთხელ ერთმა ქართველმა კაცმა ტყეში ერთი ვაზი მო-  
თხარა, წამოიღო და თავის ეზოში საჩრდილობლად დარგო.  
ვაზმა, რა თქმა უნდა, ყურძენი დაისხა, კაცმა შეჭამა ყურ-  
ძენი, მოეწონა და მეორე წელიწადს კიდევ დარგო რამდენი-  
მე ძირი. ვაზმა რქა დაიყარა და მალე მთელს ეზოს მოედო.  
კაცი ყოველ შემოდგომაზე რთველს მართავდა, მოიწვევდა  
მეზობლებს — ხალხს, ნადირ-ფრინველს და ვაზის გემრიე-  
ლი ნაყოფით უმასპინძლებოდა.

ერთ წელიწადს ვაზებმა დიდძალი ყურძენი დაისხეს. კაც-  
მა ჩვეულებრივ მოიწვია მეზობლები, მაგრამ ნახევარიც ვერ  
შეჭამეს. დარჩენილი მტევნები კაცმა დაწურა და ტკბილი  
წვენი თიხის ჭურჭელში ჩაასხა.

გავიდა ცოტა ხანი, კაცმა შენასულ წვეს გემო გაუსინ-  
ჯა და მოეწონა. გაუკვირდა, ამ მახინჯმა და უსწორმასწო-  
რო ლერწმა ასეთი ტკბილი წვენი როგორ გაიკეთაო, და ჭაზ-  
ნიკზე ისევ მოიწვია ხალხი და ნადირ-ფრინველი. ყველამ  
გასინჯა წვენი და ყველას მოეწონა მისი სურნელი და გემო.  
გაიმართა ბჭობა: რა დავარქვათ, ან რა თვისება დავანათ-  
ლოთო?

მოფრინდა ბულბული, შეავსო თიხის ჯამი და თქვა:

— ვინც სამი ჯამი დალიოს, ჩემსავით ტკბილად ამღერდესო! — დალია ჯამი და დადგა.

მოვიდა ლომი, შეავსო ჯამი და თქვა:

— ვინც ხუთი ჯამი დალიოს, ჩემსავით ღონიერი და უშიშარი გახდესო.

გამოვიდა კალია, შეავსო ჯამი და თქვა:

— ვინც შვიდი ჯამი დალიოს, ჩემსავით მომაბეზრებლად აჭრიჭინდესო.

გამოვიდა ძაღლი, შეავსო ჯამი და თქვა:

— ვინც ცხრა ჯამი დალიოს, ჩემსავით ღრენა დაიწყოსო.

გამოვიდა ბატი, შეავსო ჯამი და თქვა:

— ვინც თორმეტი ჯამი დალიოს, ჩემსავით გამოტვინდესო.

ბოლოს გამოვიდა ღორი, შეავსო ჯამი და თქვა:

— ვინც თორმეტ ჯამზე მეტს დაღევს, ჩემსავით ტალახში იგორაოსო.

ამ დროს მოვიდა ლხინის ღმერთი, აავსო ჯამი და თქვა:

— რაკი ყველა ჩემი ძალა და უნარი დაანათლეთ, მაშ სახელიც ჩემი ერქვასო და ღვინო დააარქვა.

ასე აღმოაჩინა ქართველმა კაცმა ღვინო. მალე სხვა სალხმაც ისწავლა ღვინის დაყენება და ბოლოს მთელ დედამიწას მოუღო. დროთა განმავლობაში ბევრი რამ შეიცვალა. სალხმა ვაზის სულ ახალი და ახალი ჯიშები აღმოაჩინა და ამისდა კვალად ღვინოებიც სხვადასხვაგვარი გაჩნდა, მაგრამ ის თავდაპირველი ძალა და თვისება კი დღევანდლამდე უცვლელად შეინარჩუნა: ახლაც, სამ ჯამს რომ დაღევს კაცი, ბუღბუღლივით ტკბილად ამღერდება, ხუთ ჯამზე ღომის ძალა და გამბედაობა ეძლევა, შვიდჯამდალეული კალიასავით აჭრიჭინდება და ყველას თავს აბეზრებს, მეცხრე ჯამზე ძაღლივით ღრენას იწყებს, მეთორმეტეზე ბატივით გამოტვინდება, ხოლო ვინც თორმეტ ჯამზე მეტს დაღევს, ღორივით ტალახში ჩაწვება და გორაობასა და ღრუტუნს დაიწყებს.

ჭირი — იქა, ლხინი — აქა,

ქათო — იქა, ფქვილი — აქა.





## სარბი მღვდელი

იყო და არა იყო რა, ღვთის უკეთესი რა იქნებოდა, იყო ერთი სარბი მღვდელი. მრევლმაც იმის სიხარბესა და გაუმადრობას ვეღარ გაუძლო და მიმოეფანტა. დარჩა სუცესი ულუკმაპუროდ. იფიქრა, იფიქრა და ხალხის მოსაზიდად და მოსატყუებლად ასეთ სერხს მიმართა: ერთ თეთრწვერა მათხოვარს დღეში ორ შაურს შეჰპირდა, შეიყვანა ეკლესიაში და კანდელის ჯაჭვზე ჩამოჰკიდა, ვითომდა, ღმერთი გამოჰცხადაო. ძირს შესაწირისათვის მწვანე ბაღდადი გაშალა და ხალხს ზარის რეკვით მოუხმო, მოდით და ღვთის სასწაული ყველამ თქვენი თვალით ნახეთო:

მოვიდა და მოვიდა ხალხი, გაიჭვდა მთელი ეკლესია შლოცველებით. მღვდელი ავიდა საკურთხეველზე და ხალხს განუცხადა:

— ვისაც რა გაჭირვება გაქვთ, ჩემს ღმერთს შესთხოვეთ და, თუ შესაწირ ფულს არ დაიშურებთ, ყველა თხოვნას შეგიბრუნებთო.

დაიჯერა ხალხმა და დაიწყო ღოცვა-ვედრება, თან ყველა მწვანე ბაღდადზე შესაწირავ ფულს ყრიდა. მღვდელი დაჰყურებდა ფულის გროვას, გული სიხარულით ეცებოდა და ხალხს უფრო ხმამაღლა მოუწოდებდა:

— ილოცეთ, ხალხნო, გულით შეევედრეთ ჩვენს მამაუფალს და ყველა საწადელი აგიბრუნდებათო!

ხალხიც ღოცულობდა და დაუზოგავად ყრიდა ფულს ბაღდადზე. კანდელის ჯაჭვზე დაკიდული თეთრწვერა მა-

თხოვარი შეწუხდა და მღვდელს თვალით ანიშნა, — მეტი ატანა აღარ შემიძლია და, თუ არ ჩამომხსნი, ჯამაგირი მაინც მომიმატეთ. მაგრამ მღვდელმა ყურადღება არ მიაქცია, უარის ნიშნად თავი გაიქნია და კვლავ ლოცვა განაგრძო.

მლოცავ ხალხს თვლა არა აქვს, ბაღდადი უკვე ფულით აივსო. ჯაჭვზე დაკიდულ მათხოვარს მეტისმეტი გაჭირვებისაგან უკვე ოფლი დაასკდა, მღვდელი კი აინუნშიაც არ აგდებს. თვალი მხოლოდ ფულის გროვაზე უჭირავს და ხალხს კვლავ ღეთის ერთგული სამსახურისაკენ მოუწოდებს.

ხალხმა ილოცა და ნელ-ნელა გაიკრიფა ეკლესიიდან, საკურთხეველთან ერთი ღარიბ-ღატაკი, დაკონკილი კაცილა დარჩა, დაიჩოქა ამ კაცმა და ღმერთს შეევედრა:

— ღმერთო მწყალობელო! ერთი ღარიბ-ღატაკი კაცი ვარ, ოთხი ქალიშვილი მყავს და ბსინიც ჩემსავით დაკონკილები დადიან. ჩემთვის არაფერს გთხოვ, როგორმე თავს გავეიტან, ოღონდ ჩემი შვილები შეიბრალე, იმდენი ქონება მაინც მომეცი, რომ თითო ხელი სამზითვო ლოგინი გავუმზადო და საიქიოში მათი საწყევ-საკრულავი არ გავსდეთ.

ჩამოხედა ღმერთად გამოცხადებულმა მათხოვარმა გაჭირვებულ კაცს და ჩამოსძახა:

— რაკი ასე გიჭირს, დღევანდელი ჩემი შემოსაწირი მთლიანად შენთვის დამითმია, მოხვეტე ეგ ფული და წაიღეო!

გახარებულმა ღარიბმა კაცმა ფულს ორივე ხელით დაუწყო ხვეტა, გადმოსედა მღვდელმა საკურთხევლიდან და დაუყვირა:

— რას შვრები კაცო, შესაწირ ფულს რომ იღებ, ღმერთი ხომ გაგირისხდებაო?

— შენ რა გინდა, თვითონ ღმერთმა მომცაო, — მიუგო კაცმა.

მღვდელი მათხოვარ კაცს შეეკითხა:

— მართლა შენ მიუკიო?

— დიას, მე მივეცი — უბასუხა მათხოვარმა, — მაშ რი-

სი ღმერთი ვარ, თუ გაჭირვებულსა და ღარიბ-ღატაკს არ დავეხმარებო.

დარჩა მღვდელი პირში ჩალაგამოვლებული. ღარიბმა კაცმა კი მიიტანა შინ ფული და თავის ქალიშვილებს მეორე დღესვე სამზითვო ღოგინები და კაბა-ჯუბები შეუკერა.

ჭირი — იქა, ლხინი — აქა,  
ქატო — იქა, ფქვილი — აქა.





## ლაშაზების ქვეყანა

იყო და არა იყო რა, ღვთის უკეთესი რა იქნებოდა, იყო ცნდოთ ხელმწიფე შადათი — კაცი ამაყი, გულზვიადი და პატრიარქული მოკვარული. ქვეყნად რა უნდა ყოფილიყო ისეთი, რომ იმას მოენდომებინა და ხელთ არ ეგდო: თუ სადმე ლამაზი ქალი აღმოჩნდებოდა, უსათუოდ მის პარამხანაში უნდა მიეყვანათ, საუკეთესო ცხენს დაიგულეებდა და მანამ არ მოისვენებდა, სანამ არ დაისაკუთრებდა, იმის ხმალ-აბჯარსა და ჯაჭვ-მუზარადს სომ, ნულა იტყვიოთ, — ქვეყნად ბადალი არ მოენახებოდა. სასახლეც თავის გუნებისა აიშენა — ბროლ-მარმარილოსი, შიგნით-გარეთ სულ ძვირუფასი თვლებითა და ოქრო-ვერცხლით მოჭედილი და თანაც ისეთი ლამაზი, რომ მნახველებს თვალი ზედ რჩებოდათ. სასახლის შესაფერი არც დგამ-ავეჯი აკლდა. ერთი სიტყვიოთ, რომ იტყვიან, სიმდიდრეში ყელამდე ჩაფლული იყო, მაგრამ გული მაინც არ უძლებოდა და სულ ზედმეტს და ზედმეტს თხოულობდა. თანდათან ისე გაიტაცა განდიდებისა და მოხვეჭის სურვილმა, რომ ბოლოს თავის ეზო-კარმიდამოში სამოთხის გაშენება და შიგ ციური ანგელოზების დასახლება განიზრასა.

თქმა და ქმნა ერთი იყო. გააშენა სამოთხე, შეამკო ყველაფრით, დაიბარა ნაზირ-ვეზირები და უბრძანა:

— წადით, დაიარეთ მთელი ზღვა და ხმელი და სადაც კი ანგელოზი ნახოთ, ყველა აქ მომგვარეთო.

იმ დროს ანგელოზები დედამიწაზე ჩამოდიოდნენ და მათი პოვნა ძნელი არ იყო. წავიდნენ ნაზირ-ვეზირები, შეიპ-

ყრეს ყველა ანგელოზი და დატყვევებულები ინდოეთის შოკ<sup>1</sup> რეულ გზას გაუყენეს. იმ ადგილზე რომ მივიდნენ, სადაც ახლა საქართველოა, ინდოეთიდან ამბავი მოუვიდათ: ნეფე შადათს ზედმეტი თავგასულობისა და კადნიერებისათვის ღმერთი გაუჩრისსდა და სასტიკად დასაჯა, — შხამიანი გველები მიუსია, ღააკბენინა და წამებით მოაკვლევინაო.

ტყვე ანგელოზებმა ეს ამბავი რომ გაიგეს, დიდად გაიხარეს, შადათის ნაზირ-ვეზირებს აღარ დამორჩილდნენ და ინდოეთში აღარ გაჰყვნენ, მაგრამ აღარც ცაში დაბრუნდნენ, ისე მოეწონათ ნათელი, მზიანი, ყოველმსრივ შემკული, ლამაზი ადგილი, რომ თავიანთ ძველ ადგილ-სამყოფელზე ხელი აიღეს და საბოლოოდ იქ დარჩენა გადაწყვიტეს.

ასე დასახლდნენ საქართველოს მიწა-წყალზე ციური ანგელოზები. დღევანდელი ქართველი ასულები, ასე რომ სიბლავს ყველას მათი თვალ-წარბის შუქი, ტანკენარობა და სილამაზე, იმ ანგელოზთა შთამომავლები არიან და ჩვენს ქვეყანასაც საქართველო სწორედ იმ დღიდან დაერქვა, რადგან ინდურ ენაზე ქართული ლამაზს ნიშნავს.

ჭირი — იქა, ლსინი — აქა,  
ქატო — იქა, ფქვილი — აქა.





## ყმის სურვილი

იყო და არა იყო რა, იყო ერთი ბატონი და ჰყავდა ერთ-გული ყმა. ყმამ მთელი თავისი სიცოცხლე ბატონის სამსახურში გაატარა, თან სულ მიწასა და თავისუფლებას ნატრობდა. ამ ნატვრაში ისე დაბერდა და დაჩანანაკდა, რომ ვერც ერთს ეღირსა და ვერც — მეორეს.

ერთ დღეს ბატონმა ცოლეურების ნახვა მოიწადინა და ყმას უბრძანა:

— ურემი შეაბი და ზედ ჩემი ცოლ-შვილი დასხი, მე კი კარგი საჯდომი ცხენი შემიკაზმე, გალმა, მოყვრებში, უნდა წავიდეო.

გზად მდინარეზე უნდა გასულიყვნენ, ყმამ ეს იცოდა და ურემში კამეჩები შეაბა. დაინახა ბატონმა და დატუქსა:

— კამეჩებს წინ ხარებიც მიუბი, შე რეგვენო, თავადი-შვილი ვარ და სოფლებზე რომ მარტო უღელი კამეჩებით გაფიარო, ვინ რას იტყვისო?!

ყმამ გაამზადა ურემი და ეზოში დააყენა. გამოიყვანა თავლიდან ცხენიც და შეკაზმა. ბოლოს გამობრძანდა ბატონიც. ცოლ-შვილი ურემში ჩასხა, თვითონ ცხენზე შეჯდა და ურემს გვერდით ამოუდგა.

გაიარეს სოფლები და მიადგნენ მდინარეს. მდინარე მოდიდებული იყო და ნაპირზე გადმოვარდნილიყო, მაგრამ ბატონმა უკან გამობრუნება იუკადრისა და ყმას უბრძანა, შეიყვანე ურემი წყალში და მეც უკან მოგყვებო.

ყმამ ფრთხილად შეაცურა ურემი მდინარის მღვრიე ტალღებში, მაგრამ ადიდებულ წყალთან სიფრთხილე რას უშვე-

ლიდა? შესვლისთანავე წყალი ურემს კოფომდე მისწვდა და აატივტივა. ახლა კი იკადრა ბატონმა და ცხენი საჩქაროდ უკან გამოაბრუნა, თან შეშინებულია ყმას გასძახა:

— არიქა, ხარებს წინ დაუარე და ურემი როგორმე ისევ უკან შემოაბრუნეო.

ყმამ ახალუსი გაიხადა და მაშინვე წყალში გადაეშვა, დიდხანს და თავგამეტებით ებრძოდა აბობოქრებულ მდინარეს, ბოლოს, როგორც იქნა, შესძლო წინა ხარების შემობრუნება და თვალცრემლიანი ქალბატონი და აწივლებული ბავშვები ნაპირზე უვნებლად გამოიყვანა.

ბატონი ცას ეწია სიხარულით და მივიდნენ თუ არა შინ, ყმას უთხრა:

— რაკი ცოლ-შვილი დაღუპვას გადამირჩინე, მინდა სა-მაგიერო გადაგიხადო და მითხარი, რას ისურვებო?

ყმამ ქუდი მოიხადა, ხელები გულზე დაიკრიფა და უპასუხა:

— დიდო, ბატონო, კარგად მოგეხსენებათ, რომ საწყალ ყმას მიწისა და თავისუფლების მეტი სხვა სათხოვარი არა აქვს რა და თუ მიბოძებთ, მადლობელი და თქვენზე მლოცავი ვიქნებიო.

— მომიცია მიწაც და თავისუფლებაც, მაგრამ მითხარი, მიწა რამდენი გინდა, რამდენი დღიური მოგცეო?

ყმას სახე გაუნათლა, თავი მოიფხანა და გაუბედავად მოახსენა:

— ბატონო, უენი ჭირიმე, რაკი ასეთი გულუსვი ხარ, მოდი და, რასაც სირბილით შემოვუვლი, ის მიწა მომეცეო.

— მომიციაო! — კვლავ მიუგო ბატონმა.

ყმამ ისევ გაიხადა ახალუსი და გაიქცა. მირბის რაც ძალი და ღონე აქვს, მირბის, მაგრამ სიბერისა და მუშაობისაგან არაქათგამოცლილი მალე დაიღალა, ოფლი ღვარად დასდინდა და სუნთქვაც გაუჭირდა, მაგრამ მაინც გარბის, გააყურებს მინდორს და სულ უფრო სულწასულად გარბის, რომ რაც შეიძლება, მეტი მიწა დაისაკუთროს.

სიხარბეატანილმა ვერც კი გაიგო, როგორ მოეჭრა მუხ-

ლი და დაუბნელდა თვალები. უცბად გული გაუსკდა, პირ-  
ქვე დაეცა და სული განუტევა.


მოკვდა საწყალი ყმა და აუხდენელი სურვილი საფლავში  
ჩაიტანა. ტყუილად კი არ არის ნათქვამი:

ბატონის ხელში ყმა გლეხი ნუ ელის გახარებასაო.

ჭარი — იქა, ლხინი — აქა,  
ქათო — იქა, ფქვილი — აქა.







## ზღაპარი — გამოცანა

იყო და არა იყო რა, იყო ერთი ხელმწიფე. ერთხელ ამ ხელმწიფემ მეგუთნეებს ორი დღის მიწა მოახუნეინა და პური დაათესვინა. ამოვიდა ლურჯი, სავერდივით ჯეჯილი. ყანაში ერთ დღეს ერთი ხარი შევიდა და მთელი ჯეჯილი პირწმინდად გადაძოვა. დაინახა ხელმწიფემ, ესროლა ისარი და მოკლა. წაიქცა ხარი, ტანი ხელმწიფის მამულში ედო, თავი და კუდი სხვა ხელმწიფეთა მამულებში.

უცბად ერთი ყორანი მოფრინდა, ჩასჭიდა ბრჭყალება და თავისი ბუდისაკენ გაფრინდა. გზაზე მეცხვარეს ფარა გამოეშალა. ყორანი ერთ თიკანს დააჯდა რქებზე, დაიდო ხარიც რქებზე და დაუწყო ჭამა. ერთ წუთში ძვალ-რბილიანად გადასანსლა. მხოლოდ ერთი გამოსრული ბეჭი დაუვარდა ძირს.

ყორანი გაფრინდა, ბეჭი კი ადგილზე დარჩა. გავიდა ხანი, ერთხელ ქარი ამოვარდა, მოიტაცა ეს ბეჭი და მეცხვარეს ჩაუგდო თვალში. მეცხვარეს სამი სიძე ჰყავდა: ფრინველთ ხელმწიფე, ნადირთ ხელმწიფე და ზღვათ ხელმწიფე. წავიდა მეცხვარე ფრინველთ ხელმწიფესთან და შესჩივლა:

— თვალში რაღაც ჩამივარდა, ლამის გამომეთხაროს და მიშველე რამეო.

ფრინველთ ხელმწიფემ მოიხმო მთელი თავისი საბრძანებელი და შეგზავნა ცოლისძმის თვალში. ფრინველებმა სამი დღე დაჰყვეს მეცხვარის თვალში, მეოთხე დღეს გამოვიდნენ და თქვეს:

— სულ ძირის-ძირობამდე დავიარეთ, ყველა კუთხე-კუნ-  
ჭული მოვსხრიკეთ, მაგრამ ვერაფერი ვიპოვეთ.

მეცხვარეს კი ეწვება თვალი, ლამის განოეთხაროს. გა-  
მოემშვიდობა ფრანგულთ ხელმწიფეს და მეორე სიძესთან —  
ნადირთა ხელმწიფესთან წავიდა. იმასაც ისე შესწივლა და  
იმანაც შეგზავნა ნადირი თვალში. მაგრამ ბეჭი ვერც მათ  
იპოვეს. შელონებული ბოლოს ზღვათა ხელმწიფეს მიადგა.  
ზღვათა ხელმწიფემ გახსნა ზღვები, მდინარეები და მიუშვა  
მეცხვარის თვალში. წყლებმა ერთი კვირა იდინეს თვალში  
და გამორიყეს ბეჭი.

მეცხვარე თავის გზით წავიდა, ბეჭი კი ზღვის პირას  
დარჩა. გავიდა ხანი, ბეჭი მიწამ დაფარა და გაჩნდა მშვე-  
ნიერი მინდორი. ერთხელ ზღვის პირას ერთმა ხელმწიფემ  
გაიარა, ნახა მინდორი, მოეწონა და ზედ ქალაქის გაშენება  
გადაწყვიტა. ააშენა დიდი ქალაქი და დაასახლა ხალხი.  
დაიწყო ხალხმა ტკბილად ცხოვრება.

მაგრამ აი უბედურება! ბეჭს ერთი ნაპირი გაუშიშვლდა,  
შიშველ ნაპირს ერთი წუწკი მელია შეეჩვია და დაუწყო  
ხვრა. ბეჭი შეინძრა და დაიწყო ქალაქმა ნგრევა. შეწუხდა  
ხალსი და დაიწყეს მშველელი კაცის ძებნა, მაგრამ ამაოდ—  
მელიის მომრევი ვერავინ იპოვეს.

ერთ დღეს ერთ ორსულ ქალს მუცელი ასტკივდა და ბი-  
ჭი ეყოლა. ადგა ეს ახლად დაბადებული ბიჭი, მივიდა ხალ-  
ხთან და უთხრა:

— მშვილდ-ისარი მომეცით და მაგ მელიას მე მოგა-  
შორებთო.

გაუხარდა ხალხს და მოუტანეს მშვილდ-ისარი. წავიდა  
ბიჭი, სტყორცნა ისარი მელას და მოკლა.

წამოიღეს მკვდარი მელა, გაატყავეს და ბიჭს უთხრეს:

— რა მოგცეთ, რომ ამ უბედურებას გადაგვარჩინო?

— მელიის ტყავის ნასევარი მომეცითო, — უთხრა  
ბიჭმა.

მისცეს სიხარულით ტყავის ნასევარი, ნასევარი კი თვი-  
თონ დაიტოვეს. იმ ნახევრისა მთელმა ქალაქმა, დიდმა  
და პატარამ, ქურქები შეიკურა, მაგრამ ტყავი მაინც დარ-  
ჩათ. თავისი წილი ნახევრისა ბიჭმა ქურქი შეიკურა, მაგ-


რამ არ ეყო — წინა კალთები, ფარავი და სასელოები დანა  
აკლდა.

ასლა თქვენ მითხარით, რომელი უფრო დიდი ყოფილა —  
ის ხარი, ყორანი, ციკანი, მეცხვარე, თუ ის ბეჭი, ის მულია  
და ის ვაყი?

ჭირი — იქა, ლხინი — აქა,

ქატო — იქა, ფქვილი — აქა.





## ჭკვიანი ხელმწიფე და ღარიბი კაცი

იყო და არა იყო რა, ღვთის უკეთესი რა იქნებოდა. ერთი ქვეყნის სატახტო ქალაქში ცხოვრობდა ერთი პატიოსანი კაცი, სამუშაოს ვერ შოულობდა და მეტისმეტად ღარიბი იყო. ძალიან რომ შეაწუხა სიღარიბემ და შიმშილმა, იფიქრა, მოდი, ხელმწიფესთან წავალ, ჩემს გასაჭირს შევჩივლებ და იქნებ რაიმე მიწყალობოსო.

ადგა და წავიდა. მიადგა ხელმწიფის სასახლეს და შეშვება ითხოვა. კარისკაცმა ჰკითხა:

— რა საქმეზე მიდიხარო?

კაცმა უთხრა, რისთვისაც მიდიოდა.

კარისკაცმა იცოდა, რომ ხელმწიფე გაჭირვებულთათვის ძალიან გულუხვი იყო და კაცს უთხრა:

— რასაც ხელმწიფე გიწყალობებს, თუ ნახევარს მე მომცემ, გაგიშვებ, თუ არადა — არაო.

— დალონდა კაცი, — ჩემნაირ გაჭირვებულს რაღა შუაზე გაყოფა უნდაო, — უთხრა გუშაგს და შეეხვეწა, — შემიშვიო.

— მე გაჭირვებული და გაუჭირვებელი არ ვიცი, — უთხრა გუშაგმა, — მომცემ ნახევარს, რასაც მეფე გიწყალობებს, ხომ კარგი, შეგიშვებ, არადა, საიდანაც მოსულხარ, ისევ იქით წადიო.

რაღა უნდა ექნა კაცს, ხედავდა, თავს იქით ძალა არ ჰქონდა და დათანხმდა, — ოღონდ შემიშვი და გაგიყოფო.

ამ პირობით შეუშვა კარისკაცმა. შევიდა ღარიბი კაცი ხელმწიფესთან. ხელმწიფემ მისვლის მიზეზი ჰკითხა:

— რა გინდა, რისთვის მოსულხარო?

— დიდებულს ხელმწიფევე, მეტი არაფერი მინდა, მხოლოდ ორი მაგარი სილა გამკართთ ერთი ერთ ყბაში და მეორე — მეორეშიო, — მოასსენა კაცმა.

ხელმწიფეს გაუკვირდა, სილის გაკვრა რაღა სათხოვარიაო, მაგრამ ღარიბი კაცი ისე ემუდარებოდა, რომ უარი ვეღარ უთხრა და ორი კარგი აღიყური აჭამა.

კაცმა მადლობა გადაუსადა და გამოვიდა. ჭიშკართან ის კარისკაცი გადაუდგა და უთხრა: — აბა, რა გიწყალობა ხელმწიფემ, ჩქარა გამიყავი, არაფერი დამაკლოო.

— ერთ მისხალსაც არ დაგაკლებო, — უთხრა კაცმა და ცაცია ხელით ისეთი სილა სტკიცა ყბაში, რომ თვალებიდან სულ ნაპერწკლები დააყრევინა.

ატყდა დიდი ჩხუბი და აყალმაყალი. შეესმა ხელმწიფეს ჩხუბის ხმა და აივანზე გამოვიდა. იკითხა, რა მოხდა, რაზე ჩხუბობთო?

ღარიბმა კაცმა უთხრა:

— დიდებულს ხელმწიფევე, ამ კაცმა თქვენთან შემოსვლისას მოხოვა, რასაც ხელმწიფე გიწყალობებს, შუაზე უნდა გამიყო. მეც გავუყავი, — თქვენი ნაწყალობევი ორი სილიდან ერთი ამას ვუთავაზე და ახლა აღარ ვიცი, რას მედაკეზაო.

ხელმწიფეს მოეწონა ღარიბი კაცის მოხერხებულობა, ხარბი კარისკაცი მაშინვე დაითხოვა და იმის ადგილზე დანიშნა.

ამ დღიდან ღარიბ კაცს ხელმწიფის ზრუნვა აღარ მოკლებია, სიღარიბესაც თავი დააღწია, ოჯახიც გაიჩინა და ცხოვრობდა ტკბილად და ბედნიერად.

ჭირი — იქა, ლხინი — აქა,

ქატო — იქა, ფქვილი — აქა.





## ქ მ ო ზ ა

იყო და არა იყო რა, ღვთის უკეთესი რა იქნებოდა, იყო ცოლ-ქმარი და ჰყავდათ ორი ვაჭიშვილი. ოჯახს უღელი ხარის მეტი არაფერი გააჩნდა და გაჭირვებით ცხოვრობდა.

მალე უფროსმა ძმამ ცოლი მოიყვანა და ცალკე დასახლდა, უმცროსი კი დედ-მამასთან დარჩა. გაყრამ ოჯახი უფრო დაცარა, ძმებს თითო-თითო ხარი ერგოთ, ცალული ხარებით კი აბა რა წლის სარჩოს მოიმარაგებდნენ. მაგრამ იმები გულს არ იტყუნდნენ, ბეჯითად შრომობდნენ და მომავალს იმედის თვალით შეჰყურებდნენ.

მაგრამ გაჭირვებულთა და ღარიბ-ღატაკთათვის იმედიც მაცდურია. ერთ წელიწადს დიდი გვალვა დაიჭირა, ძმებს ცალ-ცალკე ხარით ჯერ რა მოხსნული ჰქონდათ და ისიც გვალვამ გაუნადგურა, ასე რომ, საბოლოოდ თავ-თავიანთი ყანებიდან ოც-ოცი ძნაღა მოშკეს.

მიიტანა უმცროსმა ძმამ თავისი თავკირკოტა ძნები სახლში და დაფიქრდა: ჩემს უფროს ძმას ცოლ-შვილი ჰყავს და წელს ჩემზე უფრო გაუჭირდება, მე კი მარტოხელა ვარ და ისერიგად არ მიჭირს, მოდი, ჩუმად რამდენიმე ძნას წავიღებ და იმის ძნებში შევურევო. მართლაც, დაღამდა თუ არა, აიკიდა ათი ძნა ზურგზე, მოიტანა ჩუმად ძმის კალოზე და იმის ძნებში შეურია.

დაბრუნდა შინ კმაყოფილი, მაგრამ თავის კალოზე ისევ ოცი ძნა დაუხვდა. გაუკვირდა უმცროს ძმას, ეს ძნები ხომ ახლახან მივიტანე ძმის კალოზე და აქ საიდანღა გაჩნდაო? | თურმე ნუ იტყვიოთ და უფროს ძმასაც იგივე ეფიქრა: ჩემს

ძმას დედ-მამა ჰყავს შესანახი, თანაც ჰატარაა, ცხოვრებაში იმდენი გამოცდილება არა აქვს და უფრო გაუჭირდებაო, — ანუ ათი ძნა და ჩუშად ძმის კალოზე მიეჯანა.

უმცროსნა ძმამ ისევ აიკიდა ათი ძნა და კვლავ ძმის კალოსაკენ გასწია. უფროსმა ძმამაც იგივე ქნა: შინდაბრუნებულს თავის კალოზე ისევ ოცი ძნა რომ დახვდა, ძალიან გაუკვირდა და ათი ძნა ისევ უმცროსი ძმის სახლისაკენ წაიღო.

გზაზე ძმები ერთმანეთს შეეჩვენენ, მიხვდნენ, როგორც იყო საჭმე და ერთიმეორეს სიყვარულით გადაეხვივნენ.

ასეთია ძმობა.

ჭირი — იქა, ლხინი — აქა,

ქატო — იქა, ფქვილი — აქა.





## სარბი ოქრომჭედელი

იყო და არა იყო რა, იყო ერთი ღარიბი კაცი. დღე და ღამე მუშაობდა, მაგრამ სიღარიბიდან თავი ვერ დაეხსნა, მემამულის მიწას ამუშავებდა და მის შემოსავალს ბარაქა არა ჰქონდა: მოსავლის ნახევარი მიწის პატრონს მიჰქონდა.

ერთ გაზაფხულზე კაცმა შეაბა გუთანში ხარები და შეუდგა ხვნას. შუადღე გადასული იყო, ცხელოდა, მინდორში ისეთი ბული იდგა, სულის მოთქმაც კი ჭირდა, მაგრამ კაცი დასვენებას არ ფიქრობდა. უცებ სახნისი რალაცას მოედო და მიწიდან დიდი ლოდი ამოაგორა. ლოდი ორად გატყდა და მზეზე ბრწყინვა დაიწყო. ღარიბი კაცი შეშინდა: ფარსაგი რამე არ იყოსო.

ამოათრია ლოდი, მიწა შემოაცალა და, რას ხედავს, ნამდვილი ოქროს ზოდია, ორად გატეხილი შეასხვია პერანგში, გაიდო მხარზე და შინისაკენ გასწია.

მეორე დღეს ერთი ნატეხი ბაზარში წაიღო და ოქრომჭედელს მიუტანა. ოქრომჭედელმა გაკვირვებისაგან თვალები გადმოკარკლა; მერე საწყალი კაცის მოტყუება მოინდომა. ნატეხი აწონა, სამი ოყა გამოვიდა, ღარიბ კაცს კი უთხრა: ნახევარი ოყაა და ბევრი-ბევრი ასი თუმანი ღირსო. ღარიბი კაცი არც ისეთი უჭკუო იყო, რომ ოქრომჭედლის ეშმაკობას ვერ მიმხვდარიყო. ნატეხი უკანვე გამოართვა და წამოსვლა დააპირა. ოქრომჭედელი არ მოეშვა: მომყიდე და მომყიდეო! მაგრამ თან ფულის გადახდაც ენანებოდა.

ბოლოს ღარიბმა კაცმა ხერხი იხმარა. ოქრომჭედელს უთხრა: მომეცი სელწერილი, რომ ჩემგან ნახევარი ოყა ოქროს ნატეხი იყიდე, ორმოცდაათი თუმანი დღეს მომეცი, და-



ნარჩენი მერე იყოსო. ოქრომჭედელს სასვე გაუნათდა, ორ-  
მოცდაათი თუმანი მაშინვე ჩაუთვალა და ხელწერილიც დაუ-  
წერა.

ღარიბმა კაცმა ხელწერილი და ფული რომ თავისად  
დაიგულა, დაავლო ხელი ოქროს ნატეხსაც და მოკურცხლა.  
როცა ოქრომჭედელმა შეატყო, საქმე წასდამო, ყვირილი  
მორთო. ხალხი გაქცეულს დაედევნა და ღარიბი კაცი შეი-  
ბყრეს.

ადგილზე ბოქაულიც მობრძანდა. გამოიძია, რად ატყობ  
აყალმაყალი. ოქრომჭედელმა თავისი საჩივარი მოასსენა:  
ამ კაცმა ოქროს ნატეხი მომყიდა, ფული მივეცი, ოქროს  
ნატეხი კი უკანვე გაიტაცა და მიმალვას აპირებლათ.

— ტყუის ოქრომჭედელი, — უთხრა ბოქაულს ღარიბმა  
კაცმა, — თავისი ოქროს ნატეხი მაგას ხელში მივეციო.

— მე როგორ მომცემდა, აგერ თვითონ უჭირავსო, —  
თქვა ოქრომჭედელმა.

— ოქრომჭედელი ახლაც ტყუის, ეს სხვა ოქროს ნატე-  
ხია — მიწის პატრონს უნდა მივართვა. თუ არა გჯერათ,  
ნახეთ ხელწერილი, მაგას რომ ოქროს ნატეხი მივეცი, ნახე-  
ვარი ოყა იყო, ეს კი სამ ოყას იწონისო. ბოქაულმა ააწინი-  
ნა ოქროს ნატეხი და, მართლაც, სამი ოყა გამოვიდა. ხელ-  
წერილში კი ნახევარი ოყა ეწერა.

ხარბი ოქრომჭედელი გამტყუნდა: ოქროც დაკარგა და  
ფულიც.

მეორე დღეს ღარიბმა კაცმა ოქრომჭედელს თავისი ორ-  
მოცდაათი თუმანი უკანვე გაუგზავნა, ხოლო ოქროს ზოდის  
ნატეხი საკადრის ფასში გაყიდა.

ჭირი — იქა, ლხინი — აქა,  
ქატო — იქა, ფქვილი — აქა.





## პურის მარცვალი

იყო და არა იყო რა, იყო ერთი მხვნელ-მთესველი კაცი. ერთხელ ჩვეულებრივ შებაბა გუთანი და გავიდა მინდორში სახნავად. უცბად სახნისს ერთი თხილის გულისტოლა პურის მარცვალი ამოჰყვა. კაცმა აიღო ხელში პურის მარცვალი, აუგდო გუთანი და შინ წავიდა. მივიდა შინ, აჩვენა ცოლს ეს საკვირველი მარცვალი და უთხრა:

— უნდა წავიდე და სანამ ასეთი პურის მჭამელ ხალხს არ ვიპოვი, უკან არ დავბრუნდებიო.

ადგა და წავიდა. ბევრი იარა, თუ ცოტა იარა, ერთ ქალაქში გაიგო, რომ ცხრა მთას იქით ერთი ღრმა მოხუცი კაცი ცხოვრობს და, თუ ეცოდინება, იმას ეცოდინებო. წავიდა კაცი, გადაიარა ცხრა მთა, მივიდა მოხუცის სახლთან და დაიძახა:

— ოჯახის პატრონო, შინა ხარო?

გამოიხედა დედაბერი და ჰკითხა:

— ვინა ხარ და რას იძახიო?

— თქვენი ქმარი შინ გახლავთო? — ჰკითხა კაცმა.

— შინ გახლავთო.

— თუ შეიძლება, ერთი წუთით სთხოვეთო.

შებრუნდა შინ დედაბერი და გამოვიდა ერთი თოვლივით გათეთრებული კაცი.

— რა გაგჭირვებია, შვილოო?

კაცმა უჩვენა პურის მარცვალი და უთხრა:

— იმ ღროის მომსწრე ხომ არა ხარ, როცა ხალხი აი, ასეთ პურს ჭამდაო?

— მე არა, შვილო, მაგრამ ჩემი უფროსი ძმა ცხოვრობს ჩემს იქიცი და შეიძლება იმას ასსოვდესო, — უთხრა თეთრ-წვერა კაცმა.

წავიდა კაცი და მივიდა შუათანა ძმასთან. შუათანა ძმა უფრო გათეთრებული იყო, მაგრამ ასეთი ბური არც იმას ხსომებოდა. უთხრა კაცს:

— ჩემს იქით ჩვენი უფროსი ძმის სახლი შეგპვდება, მი-  
დი იმასთან და უსათუოდ ეცოდინებაო.

წავიდა კაცი და მივიდა უფროსი ძმის კარზე; დაიძახა და გამოვიდა ერთი გადაღრძეული დედაბერი. ჰკითხა კაცს, რა გნებაესო.

— ოჯახის უფროსის ნახვა მინდაო, — უთხრა კაცმა.

— მობრძანდითო, — დედაბერმა კაცი შინ შეიპატიჟა. ბუნართან ერთი მოხუცი კაცი დახვდა. თეთრი წვერი მუხ-  
ლებზე ეუფინა და ერთი შეხედვით თოვლის ზეინს ჰგავდა. კაცს სანთელივით დამდნარი სელი გაუწოდა, მიესალმა და ხტუმრობის მიზეზი ჰკითხა. კაცმა პურის მარცვალი აჩვენა და უთხრა:

— აი, ამ დროის მომსწრე თუ ხარ, როცა სალსი ასეთ ბურს ჭამდაო?

— ვარ, როგორ არა ვარ, — უთხრა მოხუცმა, — მაგრამ ჯერ დაიცადე, პური ვჭამოთ და მერე გიამბობო.

გააშლევინა ცოლს სუფრა, ახსენა ღმერთი და პური გადატეხა. პურის ჭამას რომ მორჩნენ, თეთრწვერა მოხუცმა კაცს პურის მარცვალი გამოართვა, დასუნა, უკანვე დაუბ-  
რუნა და უთხრა:


— ეს პურის მარცვალი იმდროინდელია, როცა ძმები ერთმანეთში სიამტკებლობით ცხოვრობდნენ, ხოლო როცა გაიყრებოდნენ და კალოზე ხვავს გაიყოფდნენ, უცოლო ზედ-  
მეტს ცოლიანს უთმობდა და თან ეუბნებოდა, წაიღე, კაცო. შენ ოჯახიანი ხარ და მეტი გჭირდება, მე კი მცირედიტაც იოლად გავალო. ცოლიანი კი, პირიქით, ზედმეტს უცოლოს არგუნებდა, მარტოხელა ხარ, მეტი ხარჯი გაქვს და წი-  
ლიც ნაჭარბევად გერგებაო. ეს მარცვალი სწორედ იმ დროს დაკარგულა და ახლა შენ გიპოვიანო.

— ასლა აღარ შეიძლება, რომ ასეთი პური მოვიყვანოთ და ისა ვჭამოთ? — ჰკითხა მხვინულ-მთესველმა.

— ასლა ძნელია, — მიუგო მოხუცმა ღრმა ამოხვრით, — ასლა ხალხში ის გული აღარ არის და პურის მარცვალიც ამიტომ დაჩიავდა. ერთადერთი ხსნა პატიოსან შრომაშია, წადი, ალაღ-მართლად იშრომე, სხვისა ნურაფერი გინდა, ძმის შური ნუ მოგერევა და ქვეყანასაც და შენს თავსაც ამით არგებო.

ჭირი — იქა, ლხინი — აქა,  
ქატო — იქა, ფქვილი — აქა.





## ერთი დრო არავის შერჩება

იყო და არა იყო რა, იყო ერთი ხელმწიფე — მეტად მდიდარი და სვებედნიერი. სასახლის წინ, როგორც ყველა ხელმწიფეს, იმასაც საუცხოო ბაღი ჰქონდა გაშენებული. ბაღი სავსე იყო უცხოური და ნაირ-ნაირი ხილით, ყვავილებით და ხელმწიფე ძალიანაც უფრთხილდებოდა. ერთხელ ხელმწიფემ მებაღედ ერთი გლეხი აიყვანა და დააავალა:

— იცოდე, ჩემს ბაღში ჩემს უნებურად ფეხი არავის შეადგმევიანო. თუ გაბედავს ვინმე და შევა, მოდი და დაუყოვნებლივ მომახსენეო.

დაიწყო გლეხმა ბაღში მუშაობა და დიდი მუყაითობაც გამოიჩინა. დღისით და ღამით თავს დასტრიალებდა, წმენდდა, რწყავდა და ალამაზებდა. მეფის ბრძანებასაც ზედმიწევნით ასრულებდა და უნებართვოდ შიგ არავის უშვებდა.

მაგრამ ერთხელ ჩვეულებრივ ჩამოუარა ბაღს და ნახა, რომ ვარდის ბუჩქში ბულბულს ბუდე ჩაედგა და ბარტყები გამოეჩეკა. გაიქცა მაშინვე ხელმწიფესთან და მოახსენა:

— დიდებულო ხელმწიფევე, თქვენს საყვარელ ვარდზე ბულბულს ბუდე გაუკეთებია და ბარტყებსა ზრდის. რას მიბრძანებთ, დაუუნგრეო ბუდე, თუ სელი არ ვახლოო?

— ხელს ნუ ახლებ, — უთხრა ხელმწიფემ, — ერთი დრო არავის შერჩენია და ჩემს ვარდზე ბუდის გაკეთება არც იმ ბულბულს შერჩებაო.

გავიდა რამდენიმე ხანი. ერთ დღეს მებაღეს გაახსენდა ბულბული და თქვა: მოდი ვნახავ, რა ქნა იმ ბულბულმა, დაზარდა ბარტყები და დააფრინა, თუ ისევ იქ არისო. გადასწია ბურჩი და რას ხედავს: ბუდეს გარშემო მცურავი შემოხვევია და ბულბულიც და ბარტყებიც დაუჭამია. წაივია მებაღე ხელმწიფესთან და მოახსენა:

— დიდებულო ხელმწიფევ, თქვენს ვარდზე ბულბულმა რომ ბუდე გააკეთა, გველი შემოხვევია და ბულბულიც შეუჭამია და ბარტყებიცო.

ხელმწიფეს გაეცინა და მებაღეს უთხრა:

— ხომ გითხარი, ბულბულს არ შერჩება-მეთქი, ჩემს ვარდზე ბუდის გაკეთება. მაგრამ იცოდე, არც გველს შერჩება ბულბულისა და მისი ბარტყების შეჭმამო.

გავიდა კიდევ რამდენიმე ხანი. ერთ დღეს მებაღე ბაღში ნამგლით ბალახს თიბავდა. ბალახში გველი ყოფილიყო დახვეული. მებაღემ შემთხვევით ნამგალი გამოჰკრა და შუაზე გადაჭრა. გაიქცა მაშინვე ხელმწიფესთან და მოახსენა:

— დიდებულო ხელმწიფევ, ბაღში ბალახს ვთიბავდი და ის გველი, ბულბული და მისი ბარტყები რომ შეჭამა, შემთხვევით ნამგალზე შემომეჭრა და შემომაკვდაო.

ხელმწიფემ ისევ გაიცინა და მებაღეს ადრე ნათქვამი გაახსენა:

— გახსოვს, რომ გითხარი, გველს ბულბულის ბარტყების შეჭმა არ შერჩება-მეთქი, მაგრამ იცოდე, არც შენ შერჩება იმ გველის მოკვლამო.

გავიდა კიდევ დიდი დრო. ერთ დღეს ხელმწიფის ქალები ჩამოსულიყვნენ ბაღში და აუზში ბანაობდნენ. მებაღეს სულმა წასძლია, ამოეფარა ბურჩს და ტანშიშველ ქალებს ქურდულად მზერა დაუწყო. ქალებმა თვალი შეასწრეს და ხელმწიფესთან უჩივლეს. განრისხდა ხელმწიფე, მებაღე დააჭერინა და ჩამოხრჩობა მიუსაჯა. სახრჩობელაც ბაღშივე აამართვინა, მებაღე გამოაყვანინა და ჯალათებს გადასცა. მებაღემ სიკვდილის წინ ერთი სიტყვა ითხოვა. ხელმწიფემ ნება დართო. მებაღე წინ წამოდგა და უთხრა:

— გახსოვთ, დიდებულო ხელმწიფევ, თქვენს ვარდზე ბულბულმა რომ ბუდე ჩადგა და ბარტყები გამოჩეკა. მაშინ


თქვენ ბრძანეთ, არ შერჩება ბულბულს ჩემს ვარდზედ ბუდის გაკეთებაო, და არც შერჩია. — თვითონაც და ბარტყებიც გველმა დაჭამა. მერე იმ გველზე თქვით, არ შერჩება ბულბულისა და მისი ბარტყების შეჭმაო, და მართლა არც შერჩია, — ნამგალზე შემომგვტრა და მოკვდა. როგორც გველს არ შერჩია ბულბულების შეჭმა, არც მე შემრჩია გველის მოკვლა. ჩანს, ეს ქვეყანა მართლა ისე ყოფილა მოწყობილი, რომ ერთი დრო არავის შერჩება. ასლა მე თქვენი ბრძანებით მახსრჩობენ, მაგრამ იცოდეთ, მართალია, ხელმწიფე ბრძანდებით, მაგრამ ერთი დრო არც თქვენ შეგრჩებათო.

ეს თქვა მებაღემ და ჯალათებს ჩაბარდა. ჯალათებმა კისერზე გასანთლული ყულფი ჩამოაცვეს და სახსრჩობელაზე ჩამოჰკიდეს.

გავიდა კიდევ დრო და ხანი. ხელმწიფეს სასახლეში ღალატი მოუწყვეს და ღვინოში საწამლავი შეაპარეს. ხელმწიფეს თვალთ დაუბნელდა, ტახტზე გადავარდა და სიკვდილის წინ ამის თქმა მოასწრო: — ერთი დრო არც ჩემს დამღუპველს შერჩებაო, და სული განუტევა.

ჭირი — იქა, ლხინი — აქა,  
ქატო — იქა, ფქვილი — აქა.





## შერკხვენილი მონადირე

იყო და არა იყო რა, იყო ორი მონადირე. ერთი სიტყვა-ძვირი იყო, მეორე კი ყბედი და მეტიჩარა, სულ სხვათა საქმეში ერებოდა და თავი ყოვლისმცოდნედ მოჰქონდა, მაგრამ ცოლს რომ საყვარელი ჰყავდა, ამისი კი არაფერი იცოდა. მონადირეები მუდამდღე ტყეში დადიოდნენ, ერთად ნადირობდნენ და თავსა და ოჯახებს იმით არჩენდნენ.

ერთხელაც წავიდნენ სანადიროდ, ბევრი ნადირი დახოცეს და ნადირის დევნაში ძალიანაც დაიღალნენ და დაულამდათ კიდევ. თქვეს: ამაღამ სულერთია შინამდე ველარ მივალწევთ, მოდი ცეცხლი დავანთოთ, მწვადი შევიწვათ და ღამეც აქვე გავათიოთო.

ჩამოატყავეს ერთი ირემი და კარგი სამწვადეებიც ააჭრეს, მაგრამ ნადირის დევნაში ტალ-კვესი და აბედი ორივეს დაჰკარგოდა. დაიწყეს ფიქრი, — რა ვქნათო. ბოლოს გაიხედეს და სადღაც შორს, ტყეში, ცისკენ აღმართული ბოლის სვეტი დაინახეს. ჭკვიანმა უთხრა ყბედს:

— მოდი, მე ფიჩხსა და შეშას შევაგროვებ, შენ კი წადი და ცეცხლი მოიტანე, უფრო ფეხმარდი ხარ და ჩქარა მიხვალ-მოხვალო.

დაიწყო ჭკვიანმა შეშა-ფიჩხის შეგროვება, ყბედი კი ცეცხლის მოსატანად წავიდა, იარა, იარა და მივიდა იმ ადგილას, საიდანაც ბოლი ამოდიოდა. ცეცხლი ტყის ჯადოქარს ენთო, თვითონაც გვერდით შემოსწოლოდა და გრძელტარნიან ყალიონს აბოლებდა. მონადირე ახლოს მივიდა და მიესალმა, — გამარჯობაო!



— გაგიმარჯოსო, — მიუგო თეთრწვერა კაცმა და ჰკითხა, — ვინა ხარ და რისთვის მოსულხარო?

— მონადირე გახლავართ, ტალ-კვესი აღარა მაქვს და ცეცხლის სათხოვნელად მოვედიო, — უთხრა მონადირემ.

— მაშ, რაკი მონადირე ყოფილხარ, — უთხრა ბერიკაცმა, — ერთი მთვარეს შეხედე და გამიგე, სადაროა, თუ საადროო?

მონადირემ შუბლზე ხელი მოიჩრდილა, შეხედა მთვარეს და უთხრა, საავდროაო. ამის თქმაზე ბერიკაცმა ჩიბუხი ჩაუკაკუნა თავში და მონადირე ვირალ აქცია. დადგა ვირი წორიასლო და ყურები ჩამოყარა, გონება კაცისა აქვს, სახე — ვირისა.

აღვიღზე დარჩენილმა მონადირემ შეშა-ფიჩხი შეაგროვა და დაუწყო ამხანაგს ლოდინი. ელოდა, ელოდა და, რომ აღარ გამოჩნდა, საქებნელად წავიდა. მივიდა ისიც იმ ჯადოქარ ბერიკაცთან და მიესალმა:

— გამარჯობაო!

— გაგიმარჯოსო, — მიუგო ბერიკაცმა და იმასაც იგივე ჰკითხა, — ვინა ხარ ან ჩემთან რისთვის მოსულხარო?

— მონადირე გახლავართ, ამხანაგი გამოვგზავნე ცეცხლისათვის და, რომ აღარ დაბრუნდა, საქებნელად წამოვედიო.

— ცეცხლს მოგცემ, — უთხრა ბერიკაცმა, — ოღონდ მთვარეს შეხედე და გამიგე, საავდროა, თუ სადაროა?

მონადირეს სიცილი აუტყდა, — შე კაი კაცო, მე რომ მაგის გაგება შემეძლოს, ტყე-ღრეში კი არ ვიხეტივალედი, ხელმწიფის პირველი ვეზირი ვიქნებოდიო.

ბერიკაცს მოეწონა მისი პასუხი, მისცა ცეცხლი და ვირიც აჩუქა. შეჯდა მონადირე ვირზე და მივიდა თავის ბინასთან, დაანთო ცეცხლი, შეწვა მწვადები და გემრიელად შეექცა. ვირი კი დგას ყურებჩამოყრილი და თვალებს საცოდავად ბლუტს, გონება ადამიანისა აქვს, მწვადის ყურებით პირწყალი მოსდის, მაგრამ ლაპარაკი არ შეუძლია.

გათენდა დილა და, რაკი ამხანაგი არც დილას გამოჩნდა, მონადირემ იფიქრა, სახლში დაბრუნდებოდაო, გუ-

ლი დაიმშვიდა, აჰკიდა ვირს ნანადირევი, წაიგდო წინ და სახლისაკენ გარეკა. რა იცის, თუ ეს ვირი მისი განუყრელი მეგობარია.

შეიყვანა მონადირემ აკიდებული ვირი თავის ეზოში, მოხადა საპალნე და ბალახზე გააგდო. ვირი კი მაშინვე თავისი სახლისაკენ გაიქცა და პირდაპირ საწოლ ოთახში შევიდა. შევიდა და შედგა, ვაი, იმ სანახავს, რაც მან იქ დაინახა: მის ცოლს ერთი თვალ-ტანადი ჭაბუკი დაუსვია გვერდით და ქალერსება.

გამწარებულმა ვირმა, სხვა რომ აღარაფერი შეეძლო, ყროყინი გააბა. წამოუხტა ცოლი, — ვისი რა იხერი მოთრეულხარ, შე პატრონ-ამოწყვეტილო, და ცემა-ტყეპით კარში გამოაგდო.

წამოვიდა დაღონებული ვირი და ისევ თავისი მეგობრის კარზე გაჩერდა. დგას დაღონებული და ყურებჩამოყრილი, სახე ვირისა აქვს, გონება — ადამიანისა, მაგრამ ლაპარაკი არ შეუძლია.

მონადირე ელოდა დაკარგულ მეგობარს ერთი დღე, ორი, სამი და, რომ მაინც არ გამოჩნდა, თქვა: მოდი, წავალ და ნოვებენი, იქნებ კაცს რა დაემართა და ცოცხალს თუ არა, მკვდარს მაინც ვიპოვიო. — შეჯდა ვირზე და წავიდა.

იარა ვირით ტყე-ღრეში, იარა და ბოლოს ისევ იმ ჯადოქარ ბერიკაცს მიაღგა. ბერიკაცი ისევ ისე იწვა ცეცხლთან და ხელში გრძელტარიან ყალიონს ათამაშებდა. ისევ მიესალმნენ ძველებურად ერთმანეთს და ბერიკაცმა ჰკითხა:

— ახლა რაღად მოხველ, რა გაგჭირვებიაო?

მონადირემ უთხრა:

— ისევ მეგობრის სამებნელად დავდივარო.

მაშინ ბერიკაცმა ჩაჰკრა ყალიონი თავში ვირს, ისევ ადამიანად გადააქცია და ჰკითხა:

— სიმართლე თქვი, შინ რომ მიხვედი, რა ნახე, ტყუილი არ გაბედო, თორემ ისევ ვირად გაქცევო.

— შინ რომ შევედი, ის ვნახე, რომ ჩემი ცოლი თავის საყვარელს ქალერსებოდაო, — გამოტყდა მონადირე.


— აბა, შე კაი კაცო, — უთხრა ბერიკაცმა, — შენ საკუთარი ცოლისა და ოჯახისა ვერაფერი გაგიგია და ცაში

მთვარეს რა უნდა გაუგო. წადი ახლა, საკუთარ ოჯახს მისედე და დაუფიქრებლად აღარაფერი თქვაო.

წამოვიდა შინ შერცხვენილი მონადირე, გააძევა ცოლი, სსვა ქალი მოიყვანა და იმ დღიდან მეტიწრობაც საბოლოოდ მოიშალა.

ჭირი — იქა, ლხინი — აქა,

ქატო — იქა, ფქვილი — აქა.





## სამი ტყუილი

იყო და არა იყო რა, იყო ერთი მეტად ჭირვეული ხელმწიფე. წარამარა რაღაც უცნაურს აიჩემებდა და თავის ნათქვამს აღარც გადავიდოდა.

ხელმწიფეს ერთი მზეთუნახავი ქალი ჰყავდა. ქალი საპატარძლოდ რომ მოიყარა, ხელმწიფემ გამოაცხადა: ვინც სამ ტყუილს მეტყვის, ჩემს ქალიშვილს იმას მივათხოვებ, ხოლო ვინც ვერ იტყვის, თავს მოვჭრიო.

დაიწყო ხალხმა მოდენა, ქვეყნის ყველა კუთხიდან მოდიოდნენ თავმომწონე სასიძო ბიჭები, მაგრამ სულ ამოდ: თითო ტყუილს იტყოდნენ, დანარჩენს ველარ მოიგონებდნენ და ხელმწიფე თავებს აყრუვინებდა. ასე დაიღუპა ხელმწიფის ქალის მთხოვნელი ათასობით ახალგაზრდა.

ეს ამბავი ბოლოს ერთმა მენახირემაც გაიგო, მივიდა შინ და დედას უთხრა:

— დედი, საგზალი მომიმზადე, უნდა წავიდე, ხელმწიფეს სამი ტყუილი ვუთხრა და მზეთუნახავი ქალი ვითხოვო.

დედამ ძალიან დაუშალა:

— არა, შვილო, იქ შენზე ასჯერ კაი ბიჭებს დასჭრეს თავები და შენ რა უნდა მოიგონო ისეთი, რომ ცოცხალი გადარჩე და ქალიც წამოიყვანო?

— შენ საგზალი მომიმზადე და დანარჩენში ღმერთი შეამწევაო, — უთხრა ბიჭმა.

რაღა უნდა ექნა დედას, მოუმზადა საგზალი და ჩაუდო გუდაში. ბიჭმა წამოიკიდა მენახირის გუდა და წავიდა ხელმწიფესთან.

ხელმწიფეს გაუკვირდა მენასირის მისვლა და ჰკითხა:

— რა გინდა, რაზე გარჯილხარო?

— თქვენი ბრძანება გავიგე და იმიტომ მოვედიო, — უთხრა ბიჭმა.

— კეთილი და პატიოსანი, — უთხრა ხელმწიფემ, — მაგრამ მაჩვენე პირის სანახავად რა მოიტანეო? — ესე იგი, რა ტყუილს მეტყუო.

ბიჭი მიუხვდა, რა პირის სანახავზეც ეუბნებოდა ხელმწიფე და თვითონაც ისევე უთხრა:

— ბევრი ვერაფერი მოვიტანე, დიდო ხელმწიფე, და ნუ დამძტახავთ. თვითონაც ეს-ეს არის მოვედი ნახირიდან. დედას საჭმელი შეეღვა, მაგრამ მარილი აღარა ჰქონდა. მაშინვე აღზევანს გავიქეცი, მოვიტანე მარილი, ვუყავი საჭმელს, შეეჭამე და საჩქაროდ გამოვიქეციო.

— ბიჭოს, ეს აღარ ხუმრობსო! — თვალეები დააჭყიტა ხელმწიფემ და მენახირე სასვალისოდ დაიბარა. მივიდა მეორე დღეს მონადირე. ხელმწიფემ კვლავ ჰკითხა, აბა რა მომიტანეო?

— ბევრი ვერაფერი, დიდო ხელმწიფე, — კვლავ განგებ თავი მოიკატუნა მენახირემ, — ზღვის პირას ერთი ქოხი მიდგას, გუშინ აქედან რომ წავედი, ქოხის წინ გოგრა დავთესე, ამ დილას გამეღვიძა და, რას ვხედავ: გოგრის ლერწი ზღვის გაღმა გასულა და გოგრა იქ მოუბამს. გავედი მეც ლერწზე, ის გოგრა იქ მოვხარზე, გეახელი და პირდაპირ იქიდან მოვდივარო.

ხელმწიფეს ჯავრისაგან გულზე ცეცხლი მოეკიდა. თუ არაფერი მოუხერხე, ეს მენახირე ნამდვილად მომიგებს და ქალს წამართმევსო, — თქვა გულში და მენახირე კვლავ მეორე დღისათვის დაიბარა. ბიჭი რომ წავიდა, ხელმწიფემ ნაზირ-ვეზირები გააფრთხილა:

— დილაზე რომ მოვა და ტყუილს მეტყვის, თქვენ ყვირილი ატეხეთ, არა, ეგ ტყუილი არ არის, მართალიაო, და იქნებ როგორმე გადავრჩეო.

მენახირე მიხვდა ხელმწიფის მუსხანათობას და თვითონაც ხერხი იხმარა: ამოთხარა ერთი უშეკლებელი სამსაპალნიანი ქვევრი და გათენებისთანავე ხელმწიფის ეზოში შეა-

გორა. გამობრძანდა სელმწიფე, დაიყენა გვერდით ნაზირ-ვეზირები და ჰკითხა:

— აბა, რა მოიტანე პირის სანასავიო?

— ასეთი სამი ქვეყრი ოქრო უსესსებია მამაჩემს თქვენთვის, ვერ ეს ვალი გადამიხადეთ და პირის სანასავზე მერყვილაპარაკოთო, — უთხრა ბიჭმა.

თქვა თუ არა ბიჭმა ეს, ნაზირ-ვეზირები მაშინვე აყვირდნენ: — მართალია, მართალიო!

განრისხდა სელმწიფე და თავის ვეზირებს შეუტია:

— თქვე ოხრებო, მართალი კი არა, ტყუილიაო!

— თუ ტყუილია, მაშინ შენი მზეთუნახავი ქალი მომეციო, — უთხრა ბიჭმა.

რადას იზამდა სელმწიფე, გახადა მენახირეს ძველმანუბი, ჩააცვა სელმწიფის საკადრისი ტანსაცმელი, შერთო ქალი და სასელმწიფოც იმას გადაულოცა.

ჭირი — იქა, ლხინი — აქა,

ქატო — იქა, ფქვილი — აქა.





## მღვდელი და გლეხი

იყო და არა იყო რა, ღვთის უკეთესი რა იქნებოდა, იყო ერთ სოფელში ერთი უტი და უსიაგი გლეხი. არათური სწამდა, — არც ღმერთი, არც მღვდელი, არც წირვა-ლოცვა და წუთისოფელს თავის ქეიფზე ატარებდა. ერთ დღესაც მოკვდა ეს გლეხი და დარჩა ვრთი შვილი, ისიც მამასავით უსაქმური, უჯიათო და ურწმუნო.

მამა-შვილს ერთი მეწველი და ხბოიანი ძროხა ჰყავდათ, სანამ მამა ცოცხალი იყო, ძროხის მოვლა არ უჭირდათ, რიგრიგობით აბალახებდნენ და საზამთრო თივასაც ასევე რიგრიგობით უთიბავდნენ. ახლა, რაკი მამა მოკვდა, შვილს მარტოკას-დაინაზრდა ძროხის მოვლა და სახეტილოდ დრო აღარ რჩებოდა. თან ჯერ არც საზამთრო თივა ჰქონდა გათიბული. ბიჭი საგონებელში ჩავარდა, რა მოვუსერხო ამ ძროხას, გაზაფხულამდე როგორ გამოვკვებო.

ბევრი ფიქრის შემდეგ, ასეთ ხერხს მიმართა: წავიდა სოფლის მღვდელთან და შესჩივლა:

— მამაო, თქვენც ხომ იცით, მამაჩემი როგორი ცოდვის-შვილი კაცი იყო. მთელი სიცოცხლე ისე გალია, ერთი სულის საცხონებელი საქმე არ გაუკეთებია და ხალხიც სულ იმას ეუბნებოდა; საიქიოში არ ცსონდები, სამოთხის მაგიერ ჯოჯოხეთში ჩაგაგდებენ და საკირის ცეცხლში დაგწვავენო. ვინ იცის, იქნებ ეს მართალია და მამაჩემი მეცოდება. თქვენთანაც სწორედ იმიტომ მოვედი, რომ იმისი ცოდვილი სულისათვის სწიროთ, იქნებ ჩამე ეშველოს თქვენი ლოცვა-მადლით და სამოთხეში მოხვდეს. თუ ამ სიკეთეს იზამთ და

წლის თავამდე უწირავთ, ვალში არც მე დავრჩები, წირვა-ლოცვის საფასურად ერთი ხბოიანი ძროხა შეყავს და იმას მოგართმევთო.

მღვდელი ცას ეწია სისარულით, ძროხა და ისიც ხბოიანი? ერთი წლის წირვა-ლოცვისათვის ამდენს ალბათ ხელმწიფეც არ გაიმეტებდა. გადასწერა პირჯვარი ბიჭს და უთხრა:

— გისმინოს უფალმა შეციერმა, შვილო ჩემო, მამაც კარგი გყავდა და შენც კარგი დარჩენილხარ. ოღონდ ძროხის მოყვანას ნუ დააგვიანებ, დღესვე მოიყვანე და მეც ბარემ დღეიდანვე შეეუდგები წირვა-ვედრებას სულისა მამაშენისათვის, რათა შეუნდოს ცოდვები მაცხოვარმა ჩვენმა იესო ქრისტემ და მისცეს განსვენება სამოთხესა შინა.

მოუყვანა ბიჭმა ძროხა თავის ხბოიანად და ჩააბარა მღვდელს. სანამ დაზამთრდებოდა, მღვდელმა ძროხა ეკლესიის ეზოში გაუშვა, მერე თბილ ბოსელში დააბა, საზამთროდ აბრეშუმივით ღბილი თივა მოუმარაგა და მომვლელიც კარგი მიუჩინა. ხოლო როცა გაზაფხულდა, ისევე ეკლესიის ეზოში გაუშვა. ასეთმა პატივმა და მოვლა-პატრონობამ ძროხა ისე გაათამამა და გაასუქა, რომ სულ ვარსკვლავებს ეთამაშებოდა.

ამასობაში წლისთავიც შესრულდა. ერთ დღეს მივიდა ბიჭი მღვდელთან და ჰკითხა:

— აბა, სულიერო მამაო, პირობაზე როგორა ხარ, უწირე მამაჩემის სულს თუ არაო?

— როგორ არა, შვილო ჩემო, — მიუგო მღვდელმა, — მამაშენის ხსენება არც ერთ წირვაზე არ გამომიტოვებია და სული მისი სამუდამოდ დავამკვიდრე სამოთხეშიო.

ბიჭმა მადლობა გადაუხადა და წავიდა. მივიდა ეკლესიის ეზოში, გამოიყვანა ძროხა და თავის ხბოიანად სახლისაკენ გაიგდო. ეკლესიის მნათე გაიქცა და ეს ამბავი მღვდელს აცნობა. ვილაც კაცმა შენი ძროხა და ხბო წაიყვანაო. გამოეკიდა მღვდელი კაცს.

— სად მიგყავს, შვილო, ეგ ძროხა და ხბო? — მიამახა მღვდელმა, — პირობის თანახმად, ეგენი ხომ მე უნდა დამრჩენოდნენ. იცოდე, თუ ახლავე არ მოინანიებ ამ ცოდვას და



ძროხასა და სბოს არ დატოვებ, მამაშენს სამოთხიდან უკან გამოაგდებენ და კვლავ ჯოჯოხეთში შეაგდებენო.

გლესის ბიჭმა ხმამაღლა გადაიხარხარა:

— ჰეჰე, მამათ მღვდელო, განა არ იცნობდი მამაჩემს, რა ოხრის ერთიც იყო. სადაც შევიდოდა, კეტიტ რომ ეცემნათ, უკან ვედარ გამოაგდებდნენ. რაკი სამოთხეში მოსვდრილა, ახლა იმას იქიდან ვერც ღმერთი და ვერც ეშმაკი ვედარ ვამოიყვანს. ასე რომ, მაგის შიში არა მაქვს და ვერც ძროხას და სბოს დაგიბრუნებო.

დატოვა ბიჭმა მღვდელი პირში ჩალაგამოვლებული. მღვდელი დღესაც სულ იმას ვეედრება უჟალს, ის კაცი სამოთხიდან გამოაძევე და ისევ ჯოჯოხეთში ჩააგდო, მაგრამ თავისი ლოცვა-ვეედრებისა თვითონაც არ სჯერა და ბოღმა ახრჩობს.

ჭირი — იქა, ლხინი — აქა,

ქატო — იქა, ფქვილი — აქა.





## ‘ჰვის სმტყჰა’

იყო და არა იყო რა, ღვთის უკეთესი რა იქნებოდა, იყო ერთი ღარიბი ცოლ-ქმარი. ქმარი ჭკვიანი კაცი იყო, ხოლო ცოლს თავში ცოტა უქროდა.

ერთ დილას კაცი სამუშაოდ წავიდა და ცოლს დაავალა: — ღვინოს ბრკე შემოაცალე და საღამოს რომ ჩამოვალ გადავიღებო.

კაცი წავიდა, ცოლმა კი გადახადა ქვევრს და დაუწყო ბრკეს სახაპავით მოხდა, რამდენიც არ ჩაყო სახაპავი შიგ და ამოიღო, ბრკე მანც რჩებოდა. საბა ქალმა ასე, საბა, და საღამოსათვის ქვევრი მთლიანად დააცარიელა. მოვიდა ქმარი და ჰკითხა:

— აბა, ჩემო თვალის ჩინო, რა ქენი, დავალება შემისრულეო?

— შეგისრულე და ისეო? — მიუგო ცოლმა.

— მაშ წადი და ვახშამზე ერთი ხელადა ღვინო ამოიღეო, — სთხოვა ქმარმა.

— სადღაა ღვინო, სულ ბრკედ ქცეულიყო, ვხაპე, ვხაპე და ქვევრში წვეთიც აღარ დარჩაო.

— ის ამონახაპი რა უყავიო? — ჰკითხა ქმარმა.

— რას ვუზამდი, ბრკეს სუფთა ქვევრში ხომ არ ჩავასხამდი, მიწაზე მივასხ-მოვასხიო.

გაჯავრდა კაცი, შე ასეთ-ისეთო, მე ის კი არ გითხარი, მთელი ქვევრი ამოხაპე, ბრკეს მოხდა დაგავალეო. გულში კი თქვა: ეს თუ თავიდან არ მოვიშორე, ხეირს არ დამაყრისო, და გააგდო.

წავიდა დედაკაცი, გავიდა სოფლის თემშარაზე და ერთი

უპატრონოდ მიმავალი აქლემი დაინახა. აქლემს ზურგზე უშველვებელი ხურჯინი ეკიდა.

ქალმა იფიქრა, ეს რომ კაი სული იყოს, შუალამისას მარტოკა არ ისუტიადებდა, მოდი, წავიყვან და ჩემს ქმარს დავამწყვდევინებო — ჩაჭკიდა ხელი აქლემს და შინ წაიყვანა. დაუძახა თავის ქმარს:

— ჩემო კაცო, გამოიხედე, ჯორი ვიპოვე გზაზე და ჩაიბარეო.

გამოვიდა კაცი, ხედავს, ჯორი კი არა, ხურჯინაკიდებული აქლემია. მოხადა ხურჯინი და გასინჯა: სულ ბაჯადლო თვალ-მარგალიტით არის გატენილი. ხურჯინი შეინახა, აქლემი კი გაიყვანა თემშარაზე და გაუშვა.

ახლა ფიქრობს ეს კაცი: ჩემი ცოლის სასიათი რომ ვიცი, თუ არაფერი მოვუხერხე, ამ ამბავს ხალხში გაიტანს და დამლუპავსო, და ცოლს უთხრა:

— ჩემო თვალისჩინო, საცაა ძლიერი სეტყვა უნდა მოვიდეს, მოდი, თონეში ჩაგსვამ, მაღლიდან ფიცრებს დაგაფარებ და უფრო მშრალად და უვნებლად გადარჩებიო.

ცოლი დათანხმდა. ჩასვა ქმარმა თონეში, დააფარა ფიცრები, ფიცრებზე სიმინდი დაყარა და ქათამ-ინდაური მიუსია. კენკავენ ქათმები და ინდაურები სიმინდს, გააქვთ ერთი კაკაკუკი, ქალს სეტყვა ჰგონია და ხმას არ იღებს.

ქათამ-ინდაურებმა აკენკეს მთელი სიმინდი და გადაფარინდნენ, ქალს ეგონა, სეტყვამ გადაიღოო, და თონიდან თავი ამოყო. ამ დროს გზაზე იმ აქლემის პატრონმა თათარმა გამოიარა, დაინახა ქალი და შეეკითხა:

— აქეთ ხურჯინაკიდებულ აქლემს ხომ არ გამოუვლიათ?

— მე რომ ჯორი ვიპოვნე, ალბათ ის იქნებოდაო, — უპასუხა ქალმა.

გაიგონა ქმარმა ცოლისა და თათრის საუბარი, გამოვიდა კარში და ცოლს დაუცაცხანა:

— ნუ ხარ სულელი, აქ ჯორს რა უნდოდაო?

თათარმა იფიქრა, ჩემი აქლემი ნამდვილად ამათი მოპარულიაო და ხელმწიფესთან საჩივრელად გაიქცა. შევიდა და მოახსენა:

— დიდებულ და სამართლიან სელმწიფე, შენს საბრძანებელში სურჯინაკიდებული აქლემი დაკარგე. ერთ დედაკაცს უბოვია, მისი ქმარი კი მალაფსო.

დაიბარა ხელმწიფემ ცოლ-ქმარი, მაგრამ ქმარმა ცოლი არ წაიყვანა, შინ დატოვა და მკაცრად გაფრთხილა:

— აქ იჯექი და ამ კარს არ გადმოსცდეო.

მივიდა კაცი ხელმწიფესთან და უთხრა, არც აქლემი გვებოვია და არც სხვა რაღეო. ამ დროს გაიღო კარები და შურგზე კარებაკიდებული დედაკაცი კი გამოჩნდა. ქმარს საქციელი წაუხდა და ცოლს შეუტია: — შე ტუტუცო და სულელო, აკი გითხარი, კარს არ გადმოსცილდე-მეთქი?!

— არც გადმოვიცილებულვარ, ჩემო კაცო, რად მიწერები, აი, კარი, თან წამოვიღეო, — უთხრა ცოლმა.

ხელმწიფემ ქალი მიიხმო და ჰკითხა:

— ქალო, შენ გზაზე რა იპოვეო?

— ჯორი ვიპოვე, შენი ჭირიმეო, — მიუგო ქალმა.

— სურჯინი ეკიდაო?

— ეკიდაო.

ქმარი სიმწრის ოფლში იწურება.

— როდის მოხდა ეს ამბავიო? — ჰკითხა ბოლოს ხელმწიფემ.

ეგ მაშინ მოხდა, შენი ჭირიმე, აი ქვის სეტყვა რომ მოგვიდაო.

ხელმწიფე ახლა თათარს მიუბრუნდა და ჰკითხა:

— შენ როდის დაკარგე აქლემიო?

— წუხელ საღამოს, — მიუგო თათარმა.

— აი, შე მუდრეგო, შენა, — დაუყვირა ხელმწიფემ, — ქალს ქვის სეტყვიანობის დროს ჯორი უბოვია და შენ კი წუხელ დაკარგულ აქლემს ედავებიო?! — მოჰკიდა და მოჰკიდა ზურგზე არგანი და გამოაგდო.

წამოვიდნენ შინ გახარებული ცოლ-ქმარი. იმ დღიდან აღარც წაჩხუბებულან და აღარც სიღარიბე უგრძნიათ.

ჭირი — იქა, ლხინი — აქა,

ქატო — იქა, ფქვილი — აქა.



## ოქრომჭედლის ცოლი

იყო და არა იყო რა, იყო ერთი ბებერი ოქრომჭედელი. ჰქონდა აუარებელი სიმდიდრე, მაგრამ ცოლი არა, ჰყავდა და სულ იმის ცდაში იყო, როგორმე ახალგაზრდა და თანაც მთლად მზეთუნახავი ქალი მოეყვანა. მაჭანკლები ეუბნებოდნენ, შესაფერი ქალი მონახე, ახალგაზრდა და მზეთუნახავი აღარ გამოგადგებაო, მაგრამ ოქრომჭედელი თავისას არ იშლიდა, ჩემი სიმდიდრის პატრონს სწორედ ასეთი ცოლი შემშვენისო.

მართლაც ამ ოქრომჭედელმა იმდენი ქნა, რომ ერთი ახალგაზრდა ლამაზი ქალი მოიყვანა. ჩაკეტა შინ და მეზობელთან გასვლაც კი აუკრძალა. მართალია, ჩაცმა-დახურვას არ აკლებდა — სულ დიბა-ატლასებით ჰყავდა მორთული, შინაც კი ოქროს ქოშებს აცმევდა, ბეჭდებსა და ბრილიანტების სამკაულებს სულ თავზე აყრიდა, მაგრამ ქალს სიცილ-ხარხარი, გართობა-თამაშობა ენატრებოდა და მკვდარი საჩუქრები გულს ვერ უხარებდა. არც შეილი ჰყავდა, რომ იმასთან მაინც მოეკლა დრო და ეგრე ოთხკედელშუაგამომწყვდეული სანთელივით დნებოდა.

გაიგო ერთმა სოვდაგრის შეილმა, ამა და ამ ქალაქში ერთ ბებერ ოქრომჭედელს მზეთუნახავი ცოლი ჰყავს და ისე უფრთხილდება, მზის სხივისაც არ აჩვენებსო. გადაწყვიტა, ქალის ხელში ჩაგდება, წაიღო ბლომად ფული და წავიდა იმ ქალაქში. მიაგნო ოქრომჭედლის სახლ-კარს და ბინა იმის გვერდით იქირავა.

დასახლდა ბიჭი ოქრომჭედლის გვერდით და დასახლდა ბის დღიდანვე შეუდგა გვირაბის გაყვანას. თხარა, თხარა და ერთ მშვენიერ დღეს ოქრომჭედლის ცოლის ოთახში კი ამოყო თავი.

ქალს ჯერ შეეშინდა და ყვირილი დააპირა, მაგრამ ახალგაზრდა, თვალ-ტანად ბიჭს რომ შეხედა, კრინტიც აღარ დაძრა. ბიჭმა თავისი გულისნადები გაუმელავნა, ქალიც თანახმა გაუხდა და ერთმანეთს სიყვარულის პირობა შეჰფიცეს.

გადიოდა დღეები, მალე ბიჭმა ოქრომჭედელიც გაიცნო და ძალიანაც დაუმეგობრდა. ერთხელ უთხრა, — მზეთუნახავი დანიშნული მყავს, მინდა საჩუქრად ოქროს ქოშები მივართვა და გამიკეთეო. მისცა დიდძალი ფული და ოქრომჭედელმაც გაუკეთა.

ახლა მეორედ მივიდა და უთხრა, — ძვირფასთელიანი ალმასის ბეჭედი გამიკეთე, ჩემს მზეთუნახავ დანიშნულს საჩუქრად უნდა მივართვაო. — გაუკეთა ბეჭედიც ოქრომჭედელმა.

გადის კვლავ დღეები. ოქრომჭედელი დუქანში მუშაობს, ბიჭი კი ყოველ დილით გაძვრება გვირაბში, ავა ოქრომჭედლის ცოლთან და მთელ დღეს ერთად ატარებენ. როცა ოქრომჭედლის მოსვლის დრო მოახლოვდება, ბიჭი ისევ გაძვრება გვირაბში და თავის სახლში დაბრუნდება.

ერთ დღესაც მივიდა ბიჭი ოქრომჭედელთან და უთხრა: — დღეს ჩემს დანიშნულზე ჯვარს ვიწერ და ნათლიად წამომყევო.

წაჰყვა ოქრომჭედელი ბიჭს და პატარძლისათვის ბლომა საჩუქრებიც წაიღო. მივიდნენ ბიჭის სახლში და გააცნო ბიჭმა თავისი დანიშნული. ოქრომჭედელი პირდია შეპყრებს ქალს, ხედავს, რომ ეს ქალი მისი ცოლია, მაგრამ თქმას ვერ ბედავს. ბოლოს უთხრა ბიჭს:

— ნათლიდედას მინდა საჩუქრად ბრილიანტის ბეჭედი მივართვა და ერთი წუთით სახლში შევირბენო.

სანამ ოქრომჭედელი შინ მივიდოდა, ქალი საჩქაროდ ხვრელით გაძვრა და ქმარს ხელსაქმით გართული დაუხვდა. აიღო ოქრომჭედელმა ყველაზე ძვირფასი ბრილიანტის ბე-

ჭედი და უკანვე გაბრუნდა, მაგრამ სანამ ის ჭიშკრიდან ჭიშკრამდე მივიდოდა, ქალმა დაასწრო ხერელით უკან დაბრუნება და ბიჭის სასლში ისევ თავის ადგილზე დახვდა.

ოქრომჭედელი უარესად გაოცდა, იფშენეტს თვალებს და შეჰყურებს ქალს, ტანი, სახე, თვალ-წარბი, ხმა და მისრამოხრა, ყველაფერი მისი ცოლისაა, ტანსაცმელიც იგივე აცვია და იგივე სამკაულები უკეთია. ისევ მიუბრუნდა სოვდაგარის შვილს და უთხრა:

— მოდი, ეკლესიაში წასვლამდე ერთხელ კიდევ შევირბენ შინ და საგზალს წამოვიღებ, რომ გზაზე მაყრებს არ მოვივდეთო.

— შენი ნებაა, მიბრძანდიო, — უთხრა ბიჭმა.

შევარდა ოქრომჭედელი შინ და რას ხედავს: ცოლი წამოწოლილა ტახტზე და თვლემს. წამოიხედა და ქმარი დატუქსა:

— რა წანამარა დარბიხარ, ქორწილში ხარ, დროს ატარებ და მე ძილი მაინც დამაცადეო.

ოქრომჭედელი საბოლოოდ დარწმუნდა, რომ მისი ცოლი შინ იყო და ქორწილში სრულიად გულდამშვიდებული წავიდა. თან კარგი მდიდრული პურ-მარილიც წაიღო. როგორც ნათლია, გაუძღვა თავის ცოლსა და სოვდაგარის შვილს წინ, შეიყვანა ეკლესიაში და ჯვარი გადასწერა.

ეკლესიიდან სოვდაგარის შვილი პირდაპირ თავის ქვეყანაში უნდა წასულიყო და ცოლიც წაეყვანა. ოქრომჭედელმა საზღვრამდე მიაცილა, წამოღებული პურ-მარილი გაშალა, და გამგზავრების წინ კარგად აქეფა.

სოვდაგარის შვილი გამოეთხოვა ოქრომჭედელს და უთხრა:

— უსაზღვროდ მადლობელი ვარ შენი. ახლა რაც გამაჩნია, ყველაფერი შენი წყალობითა მაქვს, ამ სიკეთეს სიკვდილამდე არ დავივიწყებ და მე და ჩემი ცოლი სულ შენი მლოცავები ვიქნებითო.


ჩასდნენ ნეფე-დედოფალი საგანგებოდ ამ დღისათვის დაქირავებულ ექვსცხენიან ეტლში და თვალისდახამხამების

უბალ მტვრის კორიანტელში გაუჩინარდნენ. .ოქრომჭედელი დაბრუნდა შინ, შევიდა ცოლის ოთახში, მაგრამ სადღაა ცოლის ახლა კი მისვდა, რაც დაემართა, მაგრამ რაღას იზამდა, ექვსცხენიან ეტლს ხომ ვეღარ დაეწეოდა?

ჭირი — იქა, ლხინი — აქა,  
ქატო — იქა, ფქვილი — აქა.







## ჭკუა და ღოვლათი

იყო და არა იყო რა, ღვთის უკეთესი რა იქნებოდა, იყო ერთი ღარიბ-ღატაკი ქვრივი დედაკაცი და ჰყავდა ერთი ბიჭი. დედა-შვილს ქვითი-ქვაზე არაფერი ებადა, მხოლოდ უღელი ხარი ჰყავდათ და სულს იმ ხარების ნაშრომით იდგამდნენ.

ერთ დღეს შეაბა ბიჭმა ხარები და გავიდა ყანაში სასნავად. მესამე კვალი რომ გაატარა, სახნისმა მიწიდან ერთი კვერცხისტოლა ბრჭყვიალა მძივი აშოაგდო. ბიჭმა აიღო ხელში მძივი, მაგრამ არ იცოდა, რა იყო და გაკვირვებული ატრიალებდა.

ამ დროს ჩაშოიარა ერთმა უცხოელმა სოვდაგარმა, დაინახა, რომ ბიჭს ხელში ალმასი უჭირავს და სიხარბისაგან ხელები აუკანკალდა. გააჩერა ქარავანი, მივიდა ბიჭთან და უთხრა:

— ბიჭო, ეგ მძივი მომეცი და ერთი აქლემის საპალნე ოქროვერცხლს მოგცემო.

ბიჭმა იფიქრა, ამ ერთ მძივს რა თავში ვიხლი, ერთი საპალნე ოქრო-ვერცხლი კი მთელ სიცოცხლეს მეყოფათ, მისცა ნაპოენი მძივი და წამოიყვანა ოქრო-ვერცხლკიდებული ერთი აქლემი. აიშენა კარგი სახლი, იყიდა ძვირფასი ავეჯი და დაიწყო უზრუნველი ცხოვრება.

ამ ბიჭის გამდიდრების ამბავმა მალე ხელმწიფის ყურამდეც მიაღწია. ხელმწიფემ დაიბარა ბიჭი და უთხრა:

— რაკი შენ ასეთი მდიდარი ხარ, ჩემი ქალი უნდა შეგტოო ცოლადო.

აბა ბიჭი უარს რად ეტყოდა დასწერა ხელმწიფემ ჯვარი, გადაუხადა მდიდრული ქორწილი და ბინაც სასახლეში მიუჩინა.

ამ ბიჭის ჭკუამ და დოვლათმა ერთმანეთში ბჭობა გამოართეს. დოვლათმა თქვა:

— მდიდარი რომ გახდა, ხელმწიფემ თავისი ქალი იმიტომ შერთო.

ჭკუა აუხიდა:

— არა, ჭკვიანი რომ არ ყოფილიყო, ხელმწიფე ქალს არ მისცემდაო.

დოვლათმა არ დაუთმო, არც ჭკუამ დაუთმო. ბიჭის გაბედნიერებას ორივენი თავისთვის იჩემებდნენ, — არა, ჩემი წყალობით მოხდა, არა — ჩემითო. ბოლოს ჭკუამ უთხრა:

— კარგი, რაკი არ მიჯერებ, მე გავეცლები და ვნახავ, მარტო შენ რა ხეირს დააყრიო.

გამოეცალა ჭკუა და წავიდა თავისთვის. დარჩა ბიჭი გამოლენჩებული. აღარც თავისი თავი ახსოვდა და აღარც ახალგაზრდა ცოლი. დაწვება ტანსაცმლიანი ლოგინში და მთელი ღამე კუნძივით გდია. ხელმწიფის ქალი ჯავრობს, — რაშია საქმე, ეს ქვრივი დედაკაცის შვილი არ მკადრულობს თუ რა არისო? ბოლოს მოთმინება რომ დაეკარგა, წავიდა და მამას შესჩივლა:

— რად მიმათხოვე იმ უემურს, ჩემთან დალაპარაკებასაც არ კადრულობს და არც ახლოს მეკარებაო.

დაიბარა ხელმწიფემ სიძე და ჰკითხა:

— რა მიხეზია, რომ შენ ჩემს ქალს არა ჰკადრულობო?

ბიჭი დგას გამოთაყვანებული და ხმას არ იღებს. განრისხდა ხელმწიფე: — ეს, როგორც ვხედავ, ჩემთან დალაპარაკებასაც თაკილობსო, — და კარისკაცებს უბრძანა:

— აღმართეთ ძელი და ახლავე ჩამოახრჩეთო!

აღმართეს ძელი და გაიყვანეს ბიჭი დასასრჩობად. ამ დროს მოვიდა ჭკუა და დოვლათს უთხრა:

— დოვლათო, ხომ ხედავ, კაცი იღუპება, უშველეო.

დოვლათი მიხვდა, რომ ვერაფრით უშველიდა და ჭკუას შეეხვეწა:

— ოღონდ სიკვდილისაგან დაიხსენი, მაგის საცოდოო

ბას კისრად ნუ დამადებინებ და ვალიარებ, რომ გიჯობ-  
ნიაო.

მოიბრინა ჭკუამ, შეუჯდა ისევ თავში და ბიჭიც გამო-  
ფხიზლდა. მისვდა, რაც ამბავი ტრიალებდა იმის თავს და  
ჯალათებს სთხოვა:

— ხელმწიფეს უთხარით, ერთი წუთით მაცალოს, სიკე-  
დილის წინ ერთი სიტყვა მათქმევინოს და მეტი არაფერი  
მინდაო.

წავიდნენ ჯალათები და სიძის თხოვნა ხელმწიფეს გა-  
დასცეს, — ერთი სიტყვის თქმის უფლებას გემუდარებაო.

მოაყვანინა ხელმწიფემ ბიჭი და ჰკითხა:

— აბა, მითხარი, რა გინდოდაო?

— დიდებულო ხელმწიფეე, — უთხრა ბიჭმა, — მე მეგო-  
ნა, მცდიდით და თქვენს ქალს იმიტომ არ ვეკარებოდი. ახ-  
ლა დავრწმუნდი, რომ ნამდვილად თქვენი სიძობის ღირსად  
შთვლით და ამიერიდან მე ვიცი და ჩემმა კაცობამაო.

ხელმწიფემ დაიჯერა ბიჭის ნათქვამი და მისი წინდახე-  
დულობაც მოეწონა. ისევ დაუბრუნა თავისი ქალი, უბოძა  
ბირველი ვეზირობა და დიდძალი ქონებაც უწყალობა.

ჭირი — იქა, ლხინი — აქა,

ქატო — იქა, ფქვილი — აქა.





## მუჭანახევარი მარილი,

იყო და არა იყო რა, ღვთის უკეთესი რა უნდა ყოფილიყო, ერთ სოფელში ცხოვრობდა ღარიბი ცოლ-ქმარი. ცხოვრობდაო, ვიტყვით, თორემ იმათ ყოფას რა ცხოვრება ეთქმოდა, საჭმელი იმათ არ გააჩნდათ და სასმელი, ერთი სიტყვით, სულს იქით არაფერი აბადიაო, რომ იტყვიან, სწორედ ისეთები იყვნენ.

ერთ დღეს მიკრიფ-მოკრიფეს და, როგორც იქნა, ერთი მოხარშვა ღობიო მოაგროვეს. ღობიო კი შემოდგეს ცეცხლზე, მაგრამ მარილი ერთი მწიკვიც აღარ აღმოაჩნდათ, რომ შეჭამანდისთვის ექნათ. ცოლმა უთხრა ქმარს:

— წადი ქალაქში, წაიღე თუ რამე გროშები გაქვს, და იქნებ ერთი მუჭანახევარი მარილი მაინც იყიდო.

— წასვლით კი წავალ, — უთხრა ქმარმა თავის ქეჭვით, — მაგრამ რამდენი ვიყიდო დამავიწყდება, ამოდენა გზაზე როგორ დავიხსნომო.

— გზაზე სულ მუჭანახევარი, მუჭანახევარი იძახე, აღარ დაგავიწყდებაო, — ურჩია ცოლმა.

წავიდა კაცი. მიდის ქალაქისაკენ და გაიძახის, — მუჭანახევარი, მუჭანახევარიო!

გზის პირას ერთი კაცი ყანას თესავდა და თესლის ყოველ გადაბნევაზე ერთი ასად, ერთი ასადო — ამბობდა. გაიგონა მთესველმა ამ ღარიბი კაცის ყვირილი და ცეცხლი მოეკიდა — მე იმას ვითხოვ, რომ ერთი ასად მომივიდეს, ეს ბრიყვი კი მუჭანახევარს გაიძახისო. დადო ხორბლიანი ხურჯინი და ერთი მაგრად მიბეგვა.

— რა დაგიშავე, რაზე მცემო? — ჰკითხა კაცმა.

— იმიტომ გცემ, რომ ღირსი ხარო, — უთხრა გლეხ-  
მა, — მე ღმერთს ერთი ასად ვთხოვ, შენ კი მუჭანახევარს  
გაიძახიო.

— მაშ როგორ უნდა მეთქვაო?

— უნდა გეთქვა, ერთი ათასად, ერთი ათასად! და მად-  
ლობასაც გეტყოდით, — უთხრა ყანის მთესველმა.

— კარგი, ამის შემდეგ ასე ვიტყვიო, — უთხრა კაცმა და  
წავიდა. მიდის ქალაქისაკენ და გაიძახის, — ერთი ათასად,  
ერთი ათასადო!

გზაზე მკვდარს მოასვენებდნენ. გაიგონეს კაცის ძახილი  
ჭირისუფლებმა, მისდგნენ და ერთი კარგა მიბერტყეს, — შე  
ოხერო და მუდრეგო, ეს ერთი მკვდარი არ გვეოფნის, რომ  
ახლა ათასადაც არ გაგვიხდესო?

— მაშ როგორ უნდა მეთქვაო? — ჰკითხა კაცმა.

— როგორ და — ღმერთმა აცხონოს, ღმერთმა აცხო-  
ნოსო! — და ჩვენც პატივით გაგისტუმრებდითო.

— კარგით, აწი სულ ასე ვიტყვიო, — უთხრა კაცმა და  
წავიდა. მიდის ქალაქისაკენ და გაიძახის: — ღმერთმა აცხო-  
ნოს, ღმერთმა აცხონოსო!

გზაზე მაყრიონი შემოხვდა, მოჰყავთ პატარძალი და  
ზომილერიან. გაიგონეს ამ კაცის ძახილი მთვრალმა მაყრებ-  
მა და მათრახებით სულ თავ-პირი ჩამოალეწეს, — შე მამა-  
ოხრიშვილო, პატარძალი მიგვეყავს, ბედნიერებასა და სიცო-  
ცხლეზე ვმღერით და საცხონებელს აქ რასა ხედავო?

— მაშ რა უნდა ვთქვაო? — ჰკითხა კაცმა, — მე როგორც  
მასწავლეს, ისე ვამბობო.

ვინც ეგ გასწავლა, ისიც შენნაირი მუდრეგი იქნებაო, —  
უთხრეს მაყრებმა, — ცხონება კი არ უნდა გეთქვა, უნდა მი-  
სულიყავი ახლოს, მოგეხადა ქუდი და ხმამაღლა გეყვირა, —  
გაუმარჯოს, გაუმარჯოს!

— კარგით, აწი ასე ვიზამო, — თქვა კაცმა და გაუდგა  
გზას ქალაქისაკენ, მიდის და რაც ძალი და ღონე აქვს გაჰკი-  
ვის: გაუმარჯოს, გაუმარჯოსო!

გზაზე ერთი მონადირე ირემს ეპარებოდა. ის იყო თოფი  
უნდა ესროლა, რომ ირემმა გაიგონა კაცის ყვირილი და  
დამფრთხალი ტყეში შევარდა. მოტრიალდა გაცეცხლებული

მონადირე და ურტყა და ურტყა თოფის კონდახი ბეჭებში —  
შე სულძაღლიშვილო, რა ჭირი გალრიალებს, ნასთველვე  
ხარირემი რატომ გამიფრთხეო.

— მაშ რა უნდა მეტქვაო? — ჰკითხა კაცმა.

— არაფერიც არ უნდა გეტქვა, — უთხრა მონადირემ, —  
დადუნულიყავი და ჩუმად გაგველო. ახლა ირემი მოკლული  
მეყოლებოდა და კაი მწვადებსაც გაჭმევდიო.

— კარგი, ამის შემდეგ ხმას აღარ ამოვიღებ და ხულ  
მოდუნული ვივლიო, — თქვა კაცმა და წავიდა. მიდის ქალა-  
ქისაკენ წელში მოდუნული და თან ღობე-ყორეს ეფარება.

ერთ კაცს ფულიანი ქისა დაჰკარგოდა და დაეძებდა. დაი-  
ნახა მოდუნული კაცი, დაიჭირა და უთაქა და უთაქა:—თუ  
ჩემი ფულიანი ქისა შენ არ იპოვე, მაშ ღობე-ყორეს რას  
ეფარებო?


კაცმა დაიფიცა, არ მიპოვიაო და ფულის პატრონმაც და-  
წანება თავი:

— აბა, რა ვქნა, როგორ ვიარო, ან რა ვთქვაო? — ჰკი-  
თხა კაცმა. ქისის პატრონს თავისი ფულები აწუსებდა და კა-  
ცის დარდი სულაც არ ჰქონდა.

— ჯანდაბამდისაც გივლია და ის გითქვამს, რაც ჯერ  
არავის უთქვამსო, — მიაძახა და ქისის საძებნელად წავიდა.

დარჩა კაცი ადგილზე და აღარ იცის, როგორ მოიქცეს.  
ამდენ სათაბალაში ცოლის დანაბარებიც დაავიწყდა და შინ  
ხელცარიელი დაბრუნდა. გაბრაზდა ცოლი. რატომ მარილი  
არ მოიტანეო და რაც ხალხმა დააკლო, თვითონ დაუმატა.

ჭირი — იქა, ლხინი — აქა,  
ქატო — იქა, ფქვილი — აქა.





## ზარმაცნი შვილი

იყო და არა იყო რა, იყო ერთი მჭედელი, პატიოსანი და ფუტკარივით მშრომელი კაცი. ერთადერთი შვილი ჰყავდა და ისიც უვარგისი, უსაქმური და არაფრის გამკეთებელი. უკვე ოცი წლისა იყო, მაგრამ ლუკმა პურს ისევ მამის ხელიდან გამოელოდა და მთელი დღე ქუჩა-ქუჩა დაყიალობდა. მჭედელი სანამ ასალგაზრდა იყო და ღონე შესწევდა, შვილს არაფერს აკლებდა, მაგრამ როცა დაბერდა, დაუძღურდა და სიკვდილის მოახლოება იგრძნო, საგონებელში ჩავარდა, იწვა დღენი დაგ საწოლზე და სულ თავის უსაქმურ შვილზე ფიქრობდა.

ერთ დღეს დაუძახა ცოლს და უთხრა:

— მე დიდი დღე აღარ მიწერია, მალე მოვკვდები, და რა გქნა, ჩემი სახლ-კარი და მონაგარი ჩვენის შვილის ხელში როგორ ჩავაგდო. თვითონ მანეთის შოვნაც არ შეუძლია და ჩემს დანატოვარს ერთ თვეში გაანიავენს, გამონახე ვინმე ალალი მშრომელი ბიჭი და იმას ვუანდერძებო.

ცოლს ეწყინა, დედის გული მაინც სხვაა, და ქმარს უსაყვედურა:

— კაცს საკუთარი მემკვიდრე გყავს და ქონება სხვას რად უნდა უანდერძო, არც ისეთი უმაჟნისია ჩვენი შვილი, რომ მანეთიანის შოვნა გაუჭირდესო.

— აი, ბურთი და მოედანი თუკი შეუძლია, წავიდეს, იშოვოს და მოიტანოსო, — უთხრა მჭედელმა.

გამოვიდა ცოლი, მისცა შვილს მანეთიანი და დაარიგა:

— წადი, შვილო, მთელ დღეს შინ ნუ გამოჩნდები, საღა-

მოს მოდი, უჩვენე მამაშენს ეს მანეთიანი და უთხარი, — მე ვიშოვე-თქო.

წავიდა ბიჭი, მთელ დღეს ქურა-ქურა იხეტიალა, საღამოს დაბრუნდა შინ, გაუწოდა მამას მანეთიანი და უთხრა:

— აი, მამი, დღეს მთელი დღე ვიმუშავე და ეს მანეთიანი ვიშოვეო.

მამამ გამოართვა ფული, გადააბრუნ-გადმოაბრუნა, უსუნა და ბუხარში შეაგდო. შვილს კი უთხრა:

— არა, შვილო, ეს შენი ოფლით ნაშოვნი არ არისო.

ბიჭს ოდნავადაც არ დანანებია მანეთიანი. მამის საქციელზე, პირიქით, გულიანად გაეცინა, გამოვიდა და ყველაფერი დედას უამბო. შეწუხდა დედა, მეორე დღეს კიდევ მისცა მანეთიანი და დაარიგა:

— წადი, შვილო, მთელი დღე თუნდ ბეწვსაც ნუ გაწყვეტ, ოღონდ საღამო ხანზე ირბინე და დაღლილ-დაქანცული, ოფლიანი რომ მოხვალ, იქნებ დაგიჯეროს, რომ შენი ნაშოვნია და გული მოუბრუნდესო.

წავიდა შვილი და მთელი დღე ჩვეულებრივ უსაქმოდ იხეტიალა, საღამოს ნარბენი და გაოფლილი შევარდა მამასთან, გაუწოდა ფული და უთხრა:

— აი, ეს ფული ჩემი ალალი ოფლით ვიშოვეო,

მამამ გამოართვა, გადაატრიალ-გადმოატრიალა, დასუნა და ისევ ბუხარში შეუძახა:

— არა, შვილო, არც ეს ფულია შენი ოფლით ნაშოვნიო.

ბიჭს არც ამ ფულის გადაგდება დანანებია, ისევ გაიცინა, წავიდა და დედას უამბო. დედა შეწუხდა, მიხვდა, რომ ცუდად იყო საქმე და შვილს უთხრა:

— შვილო, ხომ ხედავ, მამაშენი ჭკვიანი კაცია და არ ტყუვდება. თუ მართლა ცარიელზე არ გინდა დარჩე, წადი, ერთი კვირა მაინც იმუშავე, როგორმე ერთ მანეთს მოუყარე თავი, მოუტანე მამაშენს შენი ოფლით ნაშოვნი ფული და დაგიჯერებსო.

ბიჭი წავიდა და ერთ კვირას მართლაც პატიოსნად იმუშავა: ზოგს შეშა მოუტანა, ზოგს ბოსტანი დაუბარა, ზოგს სამწყემსურში შეენაცვლა და, როგორც იქნა, კვირის ბოლო-



სათვის ერთი მანეთი მოაგროვა. მიუტანა მამას ფული და უთხრა:

— ეს კი მართლა შრომითა და გარჯით ნაშოვნიაო.

მამამ ამ ფულსაც უსუნა, გადაიტანა ხელიდან ხელში და ისევ ბუხარში შეუძახა:

— არა, შვილო, არც ეს ფულია შენი ნაშოვნო.

ახლა კი აღარ გაუცინია ბიჭს, ორივე ხელით ეცა ბუხარს, გამოხვეტა თავისი ფული და მამას უსაყვედურა:

— არა გრცხვენია, მამაჩემო, მე ამ ფულის შოვნას მთელი კვირის შრომა მოვანდომე და შენ ცეცხლში მიყრიო?

მამამ სიამოვნებით გაიღიმა და უთხრა:

— მართალი ხარ, შვილო, და მეც მჯერა, ისე დაგეწვა გული, რომ ეგ მანეთი ნამდვილად შენი შრომით ნაშოვნია. ასეა, შვილო, — დაუმატა მამამ, — სანამ შენი ოფლით არ შეიძენ, მანამდე ფულისა და ქონების ყადრს ვერ გაიგებ. ახლა ვხედავ, რომ უკვე გაგიგია და მთელს ჩემს მონაგარს უსაყვედუროდ დაგიტოვებო.

მამამ მთელი ქონება შეიღს უანდერძა და გულდამშვიდებული გაემგზავრა იქ, საიდანაც ჯერ უკან არავინ დაბრუნებულა.

ჭირი — იქა, ლხინი — აქა,

ქათო — იქა, ფქვილი — აქა.





## ეშმაკის ლაზამი

იყო და არა იყო რა, ღვთის უკეთესი რა იქნებოდა, იყო ერთი მდიდარი მეცხვარე. ამქვეყნად სიმდიდრეს ვინ არ გაუძუნწვებია, მაგრამ ეს კაცი ყველა ამბად გაგონილ ძუნწს სჭარბობდა, — თვითონაც მშიერ-ტიტველი დადიოდა და ცოლ-შვილსაც შიმშილით ხოცავდა. უთვალავი ცხვარი ჰყავდა, მაგრამ იმის შიშით, არაფერი დამეხარჯოსო, მეცხვარეებს არ იყენებდა და მთელს, ამოდენა ფარებს თვითონ მწყემსავდა.

ერთხელ ეს ქვაწვია კაცი მინდორში ცხვარს მიერეკებოდა. უცბად დაინახა, რომ მგელი მორბის და პირში რაღაც უჭირავს. ეს რაღაც ეშმაკის შვილი იყო. გადაუდგა კაცი წინ, გადმოიღო თოფი, დაახალა მგელს და ნადავლი პირიდან გააგდებინა.

წამოდგა ეშმაკუნა და მეცხვარეს უთხრა:

— რაკი გადამარჩინე, ჩემს დედ-მამასთან წაგიყვან და ჩემი გადარჩენისათვის სამაგიერო სიკეთეს გადაგიხდიანო. დახარბდა ძუნწი საჩუქარს და ეშმაკუნას გაჰყვა. გზაზე ეშმაკის ნაშიერმა უთხრა:

— ჩემი დედ-მამა ძალიან მდიდრები არიან და შენც დიდძალ ოქრო-ვერცხლს შემოგთავაზებენ, მაგრამ არ დახარბდე და არაფერი არ აიღო. უთხარი: — ჩემი ქონება მომეცით, მეტი არაფერი მინდა-თქო.

როგორც იქნა მიადწიეს ეშმაკების სახლს, შევიდნენ შიგნით და ეშმაკუნამ დედ-მამას უთხრა:

— მგელმა მომიტაცა და შესაჭმელად თავისი ბუნაგისა-

კენ მიმარბენინებდა, წინ ეს კაცი შემომხვედა, ესროლა თოფი მგელს და გადამარჩინა, ახლა თქვენ იცით, როგორც გადაუხდით სიკეთესო.

ეშმაკები ცას ეწინენ სიხარულით და მეცხვარე თვალმარგალიტით სავსე ოთახებში შეიყვანეს, — აიღე, რაც მოგეწონება და რამდენიც გინდა წაიღეო.

ძუნწს ამდენი სიმდიდრის დანახვაზე კანკალი აუვარდა და კინადამ სულმა წასძლია, მაგრამ ეშმაკუნამ დროზე ანიშნა, არ შეცდეო, და ძუნწმაც თავი შეიკავა. ეშმაკები აძალებდნენ: — ჰა, აიღე, რაღას უყურებო, — ძუნწი კი დგას და ხმას არ იღებს, ბოლოს ეშმაკებმა უთხრეს:

— თუ თვალ-მარგალიტი არ გინდა, გვითხარი, რა მოგცეთ და შენთვის არაფერს დავიშურებთო.

ახლა კი ამოიდგა ძუნწმა ენა და უთხრა:

— თუ მომცემთ, ჩემი ქონება მომეცით, მე იმის მეტი არაფერი მინდაო.

ეშმაკებს არ ეჭაშნიკათ სათხოვარი, მაგრამ რაღას იზამდნენ, სიტყვას ხომ ვერ გადავიდოდნენ. კარგი, მოგცემთო, — უთხრა მამა ეშმაკმა. მოუარა ზურგიდან მეცხვარეს და კისერში ერთი ლაზათიანი მჯილი უთაქა. „ვაიო!“ — დაიძახა ძუნწმა და პირიდან ლაგამი წამოვარდა. ეშმაკმა ლაგამი აიღო და შეინახა.

ტყუილად კი არ ამბობენ, ძუნწის ქონებას ეშმაკები ჭამენო. ეს ლაგამი თვითონ ეშმაკის ხელით ჰქონდა მეცხვარეს პირში ამოდებული და თავისი სიმდიდრიდან საკუთარი თავისათვის აღარაფერს ამეტებინებდა. რაკი ლაგამი აეხსნა, კაცი უცბად მოვიდა გონს, თითქოს ღრმა ძილიდან გამოერკვა, პირველად შეხედა თავის თავს ფხიზელი თვალთ და სიცოცხლე შესძულდა: ისეთი ჩამოგლეჯილ-ჩამოკონილი იყო, მათხოვარსაც კი შეებრალებოდა. მეცხვარეს იმავე წამს თავისი მშიერ-ტიტველი ცოლ-შვილიც თვალწინ დაუდგა და შერცხვენილი ეშმაკის სახლს უჩუმრად გაშორდა.

დაბრუნდა თავის ცხვართან. იმავე დღეს ყოველ ფარაზე რამდენიმე მწყემსი დაიჭირავა და საზღაურიც გულუხვი დაუნიშნა. ერთ-ერთი მწყემსი ცოლ-შვილთან აფრინა, მსუქანი ჭედილები და ბლომად ფული გაატანა და დაუბარა

— ჭედილები დახოცეთ და ჭამეთ, ხოლო ფულით ძვირფასი ტანსაცმელი იყიდეთ და ჩაიცვით. ერთი ხელი ტანსაცმელი მეც გამომიგზავნეთ, თორემ ასეთი ჩამოგლეჯილ-ჩამოფლეთილი ხალხში ვეღარ გამოვჩნდები და ვეღარც თქვენ დაგენახვებითო.

აბა, რაღა თქმა უნდა, რომ ძუნწის ცოლ-შვილი იმ დღეს გაიხარებდა. მაშინვე გაიხადეს კონკიძველები და სულ ძვირფასი ფარჩები შეიკურეს. მეცხვარესაც გაუგზავნეს ერთი ხელი ძვირფასი ტანსაცმელი. მერე ჭედილები დახოცეს და თავის სიცოცხლეში მაძღრისად და გემრიელად პირველად ისადილეს.

მეცხვარემ, როგორც მეპატრონის წესია, ცხვრის ფარები ასლად დაქირავებულ მწყემსებს ჩააბარა, თვითონ შინ დაბრუნდა და მდიდარი კაცის კვალობაზე უხვი და ხელგაშლილი ცხოვრებაც დაიწყო, აღარც ცოლ-შვილს აკლებდა რაზეს, აღარც თავის თავს და გამვლელ-გამომვლელსაც გულუხვად უმასპინძლებოდა.

ჭირი — იქა, ლხინი — აქა,  
ქატო — იქა, ფქვილი — აქა.





## ოქროსტარიანი ცული

იყო და არა იყო რა, იყო სამი ძმა. მშობლები რომ დაეწოცათ, გაიყარნენ. უფროსმა ძმამ სახლ-კარი დაისაკუთრა, შუათანამ — ბოსელი, ბოლოლას აღარაფერი ერგო. დაუდგა ძმებს მოჯამაგირედ: ამუშავებდნენ დღედაღამ, ლუკმის ჭმევა კი ეზარებოდათ.

ერთ დღეს ბოლოლა ძმა უფროსმა ძმებმა ტყეში შეშის მოსაჭრელად გაგზავნეს. გაიმზადა სამი დღის საგზალი, აიღო ხელში მამა-პაპის დატოვებული ცული და გზას გაუდგა. ბევრი შეშა მოჭრა, დაიღალა და პურის საჭმელად მდინარეზე ჩავიდა. წყალს რომ დაეწაუთა, თავი ველარ შეიმაგრა და შიგ გადაავარდა. თვითონ გადარჩა, მამაპაპეული ცული კი წყალში ჩაუვარდა. ბევრი ეძება, ბევრი იწვალა, მაგრამ ამოდენა მდინარეში ცულს აბა, რას იპოვიდა!

რალა უნდა ექნა საწყალ ბიჭს. ჩამოჯდა ქვაზე და წყალს ჩასძახა: — ჩემი ცული გამომიჩინე, ღმერთი არა გწამს! შინ უცულოდ ვერ წავალ, ძმები მომკლავენო.

ამ დროს, სად იყო, სად არა, მდინარის ნაპირას ერთი წვერიანი კაცი გამოჩნდა, ბიჭთან მივიდა და გამარჯობა უთხრა.

— რას დაღონებულხარ, რა გაგჭირვებიაო? — ჰკითხა.

— მდინარეში ცული ჩამივარდა და ვერ მიპოვია, დასაღონებელი როგორ არა მაქვსო, — უპასუხა ბიჭმა.

წვერიანი კაცი გადაეშვა მდინარეში, ამოიღო ოქროსტარიანი ცული და გაუწოდა:

— აი, შენი ცული აქა ყოფილაო.

ბიჭმა უპასუხა:

— არა, ეგ ჩემი ცული არ არის, სხვის ცულს ხომ არ წა-  
ვიღებო.

წვერიანმა კაცმა ოქროსტარიანი ცული ნაპირზე გად-  
მოდისროლა და კვლავ ჩაყო ხელი წყალში. ამოიღო ვერ-  
ცხლისტარიანი ცული და უთხრა:

— აი, შენი ცული აქა ყოფილაო.

— არა, არც ეგ არის ჩემი ცული, სხვის ცულს ხომ არ  
წავიღებო, — იუარა ბოლოლა ძმამ.

წვერიანმა კაცმა ვერცხლისტარიანი ცულიც ნაპირზე გა-  
დაისროლა და ისევ ჩაყო წყალში ხელი. ამოიღო სპილენ-  
ძისტარიანი ცული და გაუწოდა.

— არა, არც ეს არის ჩემი ცული, სხვის ცულს ხელს ვერ  
მოვკიდებო!

წვერიანმა კაცმა სპილენძისტარიანი ცულიც გადაისრო-  
ლა ნაპირზე და ახლა ამ ბიჭის ცული ამოიღო.

მაშინ კი გაიხარა ბოლოლა ძმამ და შესძახა: აი, ეგ  
არის ჩემი ცული, წყალში რომ ჩამივარდაო!

წვერიანმა კაცმა სამივე ცული აჩუქა ამ ბიჭს და თავის  
გზას გაუდგა. ბოლოლა ძმამ კიდევ იმუშავა ორ დღეს და  
შინ დაბრუნდა. ძმებს ყველაფერი უამბო და ოქროსტარი-  
ანი, ვერცხლისტარიანი და სპილენძისტარიანი ცულებიც  
მიუტანა.

უფროსი ძმა შურიანი და ხარბი იყო, იფიქრა: მოდი,  
მეც წავალ ტყეში შეშის საჭრელად და ოქროსტარიან ცულს  
ვიპოვიო. ადგა, ცოლს სამი დღის საგზალი გაამზადებინა,  
აიღო ხელში მამაპაპეული ცული და გზას გაუდგა. მდინა-  
რესთან რომ მივიდა, თავისი ცული შიგ გადააგდო და დაი-  
წყო ყვირილი: მიშველეთ, ხალხო, დამეხმარეთ, წყალში ცუ-  
ლი ჩამივარდაო.

სად იყო და სად არა, ის წვერიანი კაცი გამოჩნდა.

— ძმობილო, რა მოგივიდა, რა გაყვირებსო? — ჰკითხა  
უფროს ძმას.

— მდინარეში ცული ჩამივარდა და, თუ შეგიძლია,  
ამოღებაში დამეხმარეო.

წვერიანმა კაცმა ფეხთ გაიხადა და მდინარეში გადაეშვა. ამოიღო ოქროსტარიანი ცული და უფროს ძმას უთხრა: აი, შენი ცული, შეხედე სად ყოფილაო!

შურიანმა და ხარბმა ძმამ ველარ მოითმინა და ყვირილი მორთო:

— ჩქარა გამომიტანე, ჩემი ცული ეგააო!

წვერიანი კაცი გაბრაზდა. გამოვიდა ნაპირზე, ერთი მაგარი სილა გააწნა და უთხრა:

— ტყუილის მთქმელს არც თავისი ცული ერგებაო!— ოქროსტარიანი ცული ისევ მდინარეში გადააგდო და თავის გზას გაუდგა.


ხარბი ძმა უკან გამოუდგა: კაცო, რას მიშვრები, ჩემი ცული მაინც ამომიღეო. მაგრამ წვერიან კაცს უკან აღარ მოუხედაია.

ასეა, ხარბი კაცი სხვის ქონებას ეტანება, მაგრამ თავისასაც დაკარგავს.

ჭირი — იქა, ლხინი — აქა

ქატო — იქა, ფქვილი — აქა.





## ობოლი და ქოსატყუილა

იყო და არა იყო რა, იყო ერთი საბრალო ობოლი, უქონელი და უყოლელი. ერთხელ ობოლმა ერთი გუდა საფეკვაო იზოვა სადღაც, წაიღო წისქვილში და დაფეკვა. ამ დროს წისქვილში ქოსატყუილამაც მოიტანა ერთი გუდა მარცვალი დასაფეკვავად. წასვლისას ობოლს უთხრა:

— შინ ერთად წავიდეთო.

— ძალიან კარგიო, — დაეთანხმა ობოლი.

წავიდნენ. მიდიან გზაზე. ქოსამ უთხრა:

— იცი, რა ვქნათო?

— რაო? — ჰკითხა ობოლმა.

— რა და, ჩემი ფეკვილი მოვზილოთ, შენი საფანლად ვინმართ და კვერები გამოვაცხოთო.

— ძალიან კარგიო, — უპასუხა ობოლმა.

მივიდნენ ობლის სახლში. მოზილეს ქოსას ფეკვილისაგან ცომი. ობლის ფეკვილი საფანლად მოაყარეს, ჩააკრეს თონეში და დაბრაწული კვერები ამოყარეს. ეს კვერები რომ ნახა ქოსატყუილამ, ეამა და ობოლს უთხრა:

— მოდი, ვინც უკეთესი ტყუილი თქვას, კვერები იმას დარჩესო.

— ძალიან კარგიო, — უპასუხა ობოლმა.

ქოსატყუილამ დაიწყო:

— ერთი ბატი გვყავდა, ბაბაჩემის გაზრდილი. ისეთი კარგი რამ იყო, რომ მთელ ოჯახს გვინახავდა. სახნავი იყო, სათიბი თუ მგზავრობა, სულ ის დაგვყავდა. მე კიდევ



წევადებოდი ზედ და ხან მინდორში დავაჭენებდი და ხან მთებზედ. ერთხელ, რაღაც საუბედუროდ, ტყეზე მივაჭენებდი, უცებ, ვნახოთ, მშიერი ტურა არ გამომიხტა? ეცა ჩემს ბატს და გვერდი სულ მთლად გამოგლიჯა. წაიქცა ბატი და სულსა ლევდა. მე მაშინვე გონება მოვიკრიბე, მოვჭერი სე, დავგრიხე წნელი, გაუჟკერე იმით გვერდი, წამოვასტუნე და გავაჭენე სახლისკენო, — დაამთავრა ქოსამ და ობოლს უთხრა: — აბა, ახლა შენი ჯერიაო.

ობოლმა დაიწყო:

— მამაჩემს ასი ძირი ფუტკარი ედგა. მუდამ დღე თავს დასტრიალებდა: უვლიდა და თვლიდა. ერთხელ, ერთიც ვნახოთ, დაითვალა ფუტკრები და ერთი არ დააკლდა სათვალავში? მოიკითხა მაშინვე, აქეთ ვეძებეთ, იქით ვეძებეთ და ბოლოს ვიპოვეთ, თურმე ფეხი მოსტეხოდა და ზღვის გაღმა დარჩენილიყო. ვიღაც ავაზაკებს მოესწროთ, დაეჭირათ, წაეყვანათ, შეებათ გუთანში და ახვნევენებდნენ. მამაჩემმა რომ ეს ნახა, ძალიან გაჯავრდა: — ვინ მოგცათ, ეგ ჩემი ფუტკარიო?

ისინი უარზე დადგნენ, გინდა თუ არა, ჩვენიაო. აი იქით, აი აქეთ, შეიქნა ერთი ორომტრიალი. ბოლოს მოავლო მამაჩემმა ფუტკარს ყურზე ხელი და გამოსწია შინ წამოსაყვანად. ამ დროს მიიწყდა კისერი ფუტკარს და თავი ხელში არ შეჩრა? მაშინვე ამოიღო მამაჩემმა ჯიბიდან ნიგოზი, მოუსვა კისერზე ფუტკარს და მოაბა თავი. ნანიგვზარზე ნიგვზის ხე ამოვიდა! გაიზარდა, მოისხა კაკალი. მუდამ წელს ვბერტყავდით და ვყიდდით კაკალს. ერთხელ კაკალს ყვავი შემოეჩვია და სულ გააჩანაგა. ესროლა მამაჩემმა ყვავს ბელტი და აკი ხეზე არ დარჩა? გაიზარდა ეს ბელტი, გადიდდა და საჩნავ-სათიბ მიწად იქცა. გავაშენეთ ზედ ვენახი. ისე ვუვლიდით, ვაზებზე მტევნები სულ წითლად ღუოდა. დადგართველის დრო და ველით, აი ახლა მოვკრეფთ, აი ახლაო, რომ უცებ ერთი მელა შემოგვეჩვია. ისე გაგვიოხრა და გაგვიტიალა ვენახი, რომ მთელ ყურძენზე ხელი აგვადებინა. ერთი სიტყვით, წყალი გადაგვიწურა, გამოჭამა მთელი ვენახი. ბოლოს ვთქვი: მოდი ერთი, წავალ და ვუყარაულე, დავიჭერ და სულ კუდით ქვას ვასროლინებ-მეთქი. თქმა და ას-

რულება ერთი იყო: ვიპოვე ხვრელი, საიდანაც მელა მობ-  
ვრებოდა ხოლმე, დავჯექე და დაუწუწუე ლოდინი. ერთიც ვნა-  
ხოთ, მოდის რაღაც და მოაფაჩუნებს. მე თან გული მისკდე-  
ბა შიშით, თან ვფიქრობ, ნეტა დამაჭერინა-მეთქი. მართლა  
მელა არ იყო?! ვტაცე კუდში ხელი და დავიჭირე. გავუსვი  
და გამოვუსვი სახრე, გავუსვი და გამოვუსვი. სიკეთე მოგე-  
ცეს, მე ის დავზილე დაქარიანებული კაცივითა. რამდენსაც  
დავარტყამდი, იმდენი პირიდან ბარათებსა ჰყრიდა.

— ბარათებსაო? რაო მერე, რა ეწერა იმ ბარათებ-  
შიო? — შეაწყვეტინა სიტყვა ქოსატყუილამ.

— რაო და, ობოლს — კვერი და ქოსატყუილას — თხის  
კუდიო.

დარჩა კვერები ობოლს.

ჭირი — იქა, ლხინი — აქა,

ქატო — იქა, ფქვილი — აქა.





## დედაკაცი და ეშმაკი

იყო და არა იყო რა, ღვთის უკეთესი რა იქნებოდა, იყო ტკბილი ცოლ-ქმარი. ისეთი სიამტკბილობა ჰქონდათ, რომ ბირიდან ლუკმას იღებდნენ და ერთმანეთს სთავაზობდნენ.!

შორს გავარდა ამ ცოლ-ქმრის სიყვარულის ამბავი და ბოლოს ეშმაკის ყურამდეც მიაღწია. ეშმაკი ხომ სიკეთეს ვერ იტანს და გაგებისთანავე გულში ბოროტი განზრახვა ჩაიდო: ცოლ-ქმარს შორის როგორმე მტრობა უნდა ჩამოვაგდო. წავიდა და შეუჩნდა, რაღა არ სცადა, როგორ არ უტრიალა, რა ხერხი არ გამონახა, მაგრამ სულ ამოდ — თხუთმეტი წელიწადი ისე გავიდა, რომ ცოლ-ქმარს შორის ერთი პაწია უსიამოვნებაც ვერ მოახდინა. დაბრუნდა უკან გაწბილებული, დაჯდა ერთ ხის ძირას და დაიწყო თავში ცემა. აბა, მე რა ეშმაკი ვარ, ერთი ცოლ-ქმარიც ვერ ვაცდინეო. ამ დროს გამოიარა ერთმა დედაბერმა, ნასა ეშმაკი ისეთს ყოფაში და ჰკითხა:

— რა იყო, რაზე იხოკავ თავ-პირსო?

ეშმაკმა უთხრა, რაც აწუხებდა. დედაბერმა ქოქოლა მიაყარა, ხმამაღლა გაიცინა და უთხრა:

— რას მომცემ, ის ცოლ-ქმარი რომ დღესვე ერთმანეთს სამტროდ გადავკიდოო?

— ოღონდ მაგას მომასწარი და ჩემს სულს მოგცემო, — შეესვეწა ეშმაკი.

— კარგი, აქ დამაცადე და გაყურებინებ სეირსო, — უთხრა დედაბერმა და წავიდა. ჯერ ცოლთან მივიდა და გულისტკივილით უჩურჩულა:

— შეილო, რა ძალიან მებრალებიო.

— რა მჭირს შესაბრალებიო? — გაუკვირდა ქალს.

— რაღა რა გიჭირს, შეილო, შენი ქმარი ერთ ქალს გადაჰკიდებია და თუ დროზე არა იღონე რა, ოჯახი დაგენგრევაო.

! შეწუხდა ქალი ძალიან და დედაბერს ჰკითხა, როგორ მოვიქცეო?

— როგორ, შეილო, და, — დაარიგა დედაბერმა, — ქმარი რომ შინ მოვა, წარბშეკრული და გაჯავრებული დახვდეს, ამით მიხვდება, რომ მისი ამბავი გაგებულნი გაქვს და იმ ქალს ჩამოეხსნებაო.

ცოლი შეპირდა, როგორც დამარიგე, ისე მოვიქცევიო. წამოვიდა ბებერი და ახლა ქმართან მივიდა ყანაში. მისალმა, ბარაქა უსურვა და მერე უთხრა:

— ძალიან მებრალები, შეილო, კარგი ვაჟკაცი ხარ და ეგ არ გეკადრებაო.

— რა არ მეკადრებაო? — ყურები ცქვიტა ქმარმა.

— რა, შეილო, და ღმერთმა დასწყევლოს ქალის ჯილაგი, ცოლი გლალატობსო, — უთხრა დედაბერმა, — ვილაც მღვდელი შეიყვარა და შენ ამბადაც აღარ ახსოვხარო.

ქმარი კინალამ გადაირია და დედაბერს შეუტია:

— რას ამბობ, ბებერო, ამდენი ხანია ერთად ვცხოვრობთ და ასეთი რამ ერთხელაც არ შემიმჩნევია, მზე და მთვარე ერთმანეთზე ამოგვდისო.

— აბა, მაშ, კარგი, რაკი ჩემი არ გჯერა, დიდგულად შედი შინ და ნახავ, თუ პირიქით არ მოგდოს შარი და ღალატი შენვე არ დაგწამოსო.

წავიდა ქმარი მაშინვე და შინ დიდგულად შევიდა. ცოლი შუბლშეკრული დახვდა და შეუტია:

— რა დიდი გულითა ხარ, განა არ ვიცი, რომ საყვარელი გყავს და დღე და ღამე იმასთან დაეთრევიო.

არც ქმარმა დააკლო.

— მე კი არა და, შენა ხარ ისეთი უნამუსო, რომ ოჯახზე ხელი აგიღია და ვილაც მღვდელთან დაიარებიო.

შეჰყვნენ, შეჰყვნენ და ერთი კარგი ლაზათიანი ჩხუბი მოუვიდათ.

ის ღამე უბრად გაათენეს და აღარც ერთმანეთს მიჰქანა რებიან. მეორე დღეს ქმარი რომ სამუშაოდ წავიდა, დედაბერი ისევ მივიდა ცოლთან და ჰკითხა, — როგორ არის საქმე, გამოტყეხე ქმარი თუ ვერაო? ბებერს უნდოდა გაეგო, გასჭრა ჩემმა ხერხმა თუ არაო. ქალმა ყველაფერი უამბო და თან შეეხვეწა, — რამე წამალი მასწავლე, რომ ქმარმა საყვარელზე ხელი აიღოს და ისევ მე დამიბრუნდესო. დედაბერმა უთხრა:

— ისეთ წამალს გაგიკეთებ, რომ შენს ქმარს ისევ ძველებურად შეუყვარდე, ოღონდ შენც უნდა მომეხმარო.

— როგორაო? — ჰკითხა ქალმა.

— აიღე გალესილი სამართებელი. — უთხრა დედაბერმა, — ამალამ შენი ქმარი რომ დაიძინებს, მიდი ჩუმად, შეატყერი წვერიდან რამდენიმე ღერი ბალანი და მომიტანე. მე შევულოცავ, იმავე წუთიდან შენი ქმარი ძველებურად შეგიყვარებს და საყვარელსაც ჩამოეხსნებაო.

ქალს ძალიან გაუხარდა და შეპირდა, — უსათუოდ ავაჭრი და მოგიტანო.

რაკი ქალთან საქმე მოათავა, დედაბერი ისევ ქმართან წავიდა ყანაში, მივიდა და გააფრთხილა:

— ფრთხილად იყავი, ღამე არ დაიძინო, თორემ ცოლი მოკვლას გიპირებს და სამართებლით ყელს გამოგჭრისო.

ქმარი მთლად გადაიჩრია: ღალატით მღალატობს და მოკვლას მანინც რაღას მემართლებათ. დაბრუნდა შინ დაღონებული. ცოლი კერასთან იჯდა და მატყლს ართავდა. ქმარმა ივანშმა და დაწვა. ცოლი ტარს ატრიალებს და თან თვალი ქმრისკენ უჭირავს, — როდის დაეძინება, რომ წვერის ბალები ავაჭრაო. მაგრამ ქმარს რა დააძინებდა, თვალდახუჭული იწვა და თავის მწარე ბედზე ფიქრობდა. ბოლოს გადაწყვიტა, მოდი ერთი თავს მოვიმძინარებ და ვნახავ, ჩემი ცოლი რას იზამსო, და ხვრინვა დაიწყო.

ქალი ჩუმად ადგა, გამოიღო სამართებელი და მივიდა ქმართან. ის იყო, მიიტანა სამართებელი წვერთან, რომ ქმარმა თვალი გაახილა, დაუჭირა სამართებლიანი ხელი და ყვირილი ატყხა:

— მიშველეთ, ცოლი მოკვლას მიპირებსო!

ყვირილზე მოცვივდნენ მეზობლები და სოფლის მამასახლისი, ნასეს ქალის ხელში სამართებელი, ქმრის საჩივარი ყველამ ირწმუნა და ცოლი სამუდამოდ გააშორეს.

— რაკი მიზანს მიაღწია, დედაბერი მაშინვე ეშმაკთან წავიდა, რომ დაპირებული სული გამოერთმია, მაგრამ ეშმაკი ადგილზე აღარ დახვდა, გაიგო დედაბრის ოინები და შეშინებული, ემანდ მეც არაფერი მიხიმანოსო, ცხრა მთას იქით გადაიკარგა.

დედაბერი ოდნავადაც არ შეწუხებულა ეშმაკის გაპარვით, რად უნდოდა იმისი სული, როცა ტან-გვამში ყველა ეშმაკზე უფრო ჯადოქარი სული ედგა.

ჭირი — იქა, ლხინი — აქა,

ქატო — იქა, ფქვილი — აქა.





## ს ი მ ა რ თ ლ ე

იყო და არა იყო რა, აბა მეგობრობაზე უკეთესი რაღა უნდა ყოფილიყო, ჰოდა, იყო ამქვეყნად ორი მეგობარი — მეცხვარე და სოვდაგარი. მეცხვარე სოფელში ცხოვრობდა და აუარებელი ცხვარი ჰყავდა, სოვდაგარი — ქალაქში და აუარებელი ფულისა და სიმდიდრის პატრონი იყო. ერთიმეორე ძალიან უყვარდათ და განუზომელ პატივსაც სცემდნენ, მხოლოდ ერთ რამეში ვერ თანხმდებოდნენ — მოიპოვებოდა თუ არა ქვეყნად ისეთი კაცი, რომელსაც ტყუილი ერთხელაც არ ექნებოდა ნათქვამი.

— არა, ასეთი კაცი არ იქნება, — ამბობდა სოვდაგარი, — იმიტომ, რომ სიმართლით ამქვეყნად ვერაფერ იცხოვრებსო.

— იქნება, როგორ არ იქნება და იცხოვრებს კიდევცო, — უმტიციცებდა მეცხვარე.

ერთხელაც, ერთ-ერთი შეხვედრისას, პურისჭამაზე, კვლავ ჩამოუვარდათ ამაზე ლაპარაკი.

— მე მაინც არა მჯერა, თუ არის ქვეყნად ისეთი ადამიანი, რომელსაც თავის სიცოცხლეში ტყუილი არ ეთქვასო, — დაიჟინა კვლავ სოვდაგარმა.

— ჩემო. მეგობარო, — უთხრა მეცხვარემ, — მე მყავს ერთი მწყემსი, რომელსაც არასოდეს ტყუილი არ უთქვამს და არც იტყვისო.

სოვდაგარმა მაინც არ დაუჯერა, მეცხვარე არწმუნებდა. ბოლოს, რომ ვერ შეთანხმდნენ, ასეთი სანაძლეო დადეს: თუ ქვეყნად მართლა აღმოჩნდებოდა ისეთი კაცი, რომელსაც

ტყუილი არასოდეს ეთქვა, სულერთია, ეს მეცხვარის მწყემსი იქნებოდა, თუ სხვა ვინმე, მაშინ სოვდაგარის მთელი ქონება მეცხვარეს უნდა დარჩენოდა, ხოლო თუ არ აღმოჩნდებოდა, პირიქით, მეცხვარეს მთელი თავისი ცხვარი სოვდაგარისთვის უნდა მიეცა.

ამ პირობით დასცილდნენ ერთმანეთს და თავთავიანთ საქმეზე წავიდნენ.

მეცხვარეს ცხვარი ზაფხულობით თრიალეთის მთაში ჰყავდა, ზამთრობით — ყიზლარის საძოვრებზე, და წესად ჰქონდა დადებული, თვეში ორ-სამჯერ წავიდოდა ფარის სანასავად და, როცა ფარეხში მივიდოდა, თავის მწყემსს ასე მიმართავდა:

— გამარჯობა, ჩემო მწყემსო! როგორა ხარ? როგორ არის ჩემი ცხვარი და ჩემი საყვარელი ქერიო?

— გავიმარჯოს, ჩემო ბატონო, — უპასუხებდა მწყემსი, — მეც კარგადა ვარ და თქვენი ცხვარი და ქერიც კარგად არისო.

ფარის წინამძღოლი ქერი მართლაც რომ ტურფა სანასავი იყო, დიდრონი, ერთმანეთზე გადაჯვარედინებული რქები, ჭკვიანი თვალები, არქიელის საკადრისი წვერი, დინჯი სიარული და მიხრა-მოხრა მის სილამაზეს მეტ შნოსა და ლაზათს აძლევდა. ამის გამო მეცხვარეს იგი გამორჩეულად უყვარდა. ეს მწყემსმაც იცოდა და თვალის ჩინივით უფრთხილდებოდა.

სანაძლეოს დადების შემდეგ ცოტა დრო რომ გამოსდა, სოვდაგარმა გაამზადა საგზალი, იყიდა ბლომად ღვინო და თავის ორ მედუქნესთან ერთად მთაში მწყემსის სანასავად წავიდა. მას კიდევ არ სჯეროდა მწყემსის პატიოსნება და გამოცდა უნდოდა.

მწყემსს ძალიან გაუხარდა თავისი პატრონის მეგობრის სტუმრობა და კარგადაც გაუმასპინძლდა, — მაშინვე მსუქანი ცხვარი დაკლა და ჩობანყაურმა გაუქეთა. სტუმრებმაც ამოალაგეს თავიანთი საგზალი, სუფრა წყაროს პირას, ხის ჩრდილში გაშალეს და პურის ჭამას შეუდგნენ. სოვდაგარი მწყემსს ღვინოს აძალეებდა და, როცა საკმარისად დაათრო, უთხრა:



— თუ ჩემი პატივისცემა გინდა, ფარაში წინამძღოლი ქერი რომ გყავს, ის დამიკალიო.

— ო, არა, მაგას ვერ ვიზამ, — გაასავესავე მწყემსმა ხელები, — ჩემს ბატონს ის ქერი მთელს ფარას ურჩევნია და, რომ მოვა, რა პასუხი გავცეო!

— შენს ბატონს ასე უთხარი, მგელმა მომტაცა-თქო, — დაარიგა სოვდაგარმა.

მწყემსი დიდ უარზე იდგა, სოვდაგარი კი არა და არ ეშვებოდა. თან კვლავ ღვინოს აძალუბდა და სულ უფრო მეტად ათრობდა. ასეთი ხერხით — შეგონებით, დაჟინებული თხოვნით, დათრობით, სოვდაგარმა იმდენი ქნა, რომ მწყემსს საბოლოოდ აურიო თავგზა და პატრონის საყვარელი ქერი დააკვლევინა.

სოვდაგარი და მისი ამხანაგები იმ ღამეს იქ დარჩნენ, დილაზე ადრე ადგნენ, ისაუზმეს, მწყემსი ერთხელ კიდევ გააფრთხილეს, შენს ბატონს არამც და არამც არ გაუშხილო სიმართლე, უთხარი, ქერი მგელმა მომტაცა-თქო, და გახარებულები ქალაქში დაბრუნდნენ.

გამოფხიზლებული მწყემსი მიხვდა თავის შეცდომას და დიდ საგონებელში ჩავარდა: — რა ეთქვა თავისი ბატონისათვის, როცა მოვიდოდა და ჰკითხავდა, — როგორ არის ჩემი ქერიო?

დიდი ფიქრის შემდეგ მინდორში გავიდა, ჩაარჭო მიწაში სამეცხვარო ჯოხი, ზედ თავისი ნაბადი წამოასხა, ქუდიც დაასურა და ისე მოიჩვენა, ვითომ თვითონ იყო, ხოლო თავისი თავი მეცხვარედ წარმოიდგინა. წავიდა შორს, მერე მობრუნდა, მივიდა ჯოხთან და მიესალმა:

— გამარჯობა, ჩემო მწყემსო! როგორა ხარ, როგორ არის ჩემი ცხვარი და ჩემი ქერიო?

— გაგიმარჯოს, ჩემო ბატონო, — თქვა ჯოხის მაგივრად, — მე კარგადა ვარ, შენი ცხვარიც კარგად არის, მაგრამ შენი ქერი კი წუხელ მგელმა მომტაცაო.

ასე რამდენჯერმე გაიმეორა, მაგრამ ტყუილის თქმას ვერა და ვერ შეეგუა. ყოველ თქმასზე სახეს სირცხვილის აღმური უწევდა. ბოლოს ისევ სიმართლის თქმა გადაწყვიტა და მეცხვარის მოსვლას უკვე სინდისდამშვიდებული დაულოდა.

მაღე მეცხვარეც მივიდა და მწყემსს ჩვეულებრივ მიუ-  
სალმა:

— გამარჯობა, ჩემო მწყემსო! როგორა ხარ? როგორ  
'ბრის ჩემი ცხვარი და ჩემი ქერიო?

— გაგიმარჯოს, ჩემო ბატონო, — მიუგო მწყემსმა, —  
მე, კარგადა ვარ, შენი ცხვარიც კარგად არის, მაგრამ შენი  
საყვარელი ქერი კი აღარა მყავს. წუხელ ორი ამხანაგით შე-  
ნი მეგობარი სოვდაგარი მეწვია, კარგი პატივი ვეცი, იმათ  
ღვინო დამალევინეს, დამათვრეს და შემაცდინეს — შენი  
საყვარელი ქერი დამაკვლევინეს. თან დამარიგეს, რომ შენ-  
თვის ტყუილი მეთქვა, ვითომ ქერი მგელმა მომტაცა. მაგ-  
რამ მე ჩემს სიცოცხლეში ტყუილი არ მითქვამს და ვერც ახ-  
ლა ვიკადრე. აი ასეთი მარცხი დამემართა წუხელ და ახლა  
როგორც გინდა, ისე დამსაჯე, ყველაფრის ღირსი ვარო.

მეცხვარეს, მართალია, ქერის დაკვლა ძალიან ეწყინა,  
მაგრამ რაკი მწყემსმა სიმართლე აღიარა, აღარ გაუწყრა.

— პირიქით, მადლობელი ვარო, — უთხრა, — ქერი სხვაც  
გაიზრდება, ხოლო შენი სიმართლით ჩემს თვალში უფრო  
ამაღლდი და თანაც უზარმაზარი სანაძლეო მომაგებინე, რის  
სამაგიეროდაც ეს ჩემი ფარა დღეიდან შენთვის მიჩუქნიაო.

მეცხვარემ მწყემსს მუდმივ სიმართლით ცხოვრება უსურ-  
ვა და ქალაქისაკენ გაეშურა, მივიდა თავის მეგობარ სოვ-  
დაგართან, მოიკითხა და ბოლოს უთხრა:

— ახლაც იტყვი, ქვეყანაზე არ მოიპოვება ისეთი ადამი-  
ანი, რომ ტყუილი არ ეთქვასო? ჩემმა მწყემსმა ყველაფერი  
დაწვრილებით მიაჩხო, — როგორ დაათვრეთ, როგორ და-  
აკვლევინეთ ჩემი საყვარელი ქერი და მერე როგორ დაარი-  
გეთ, რომ ჩემთვის ტყუილი ეთქვა, — ვითომ ქერი მგელმა  
მოსტაცა. მაგრამ იმან ტყუილი არ იკადრა, ამით კი თვითო-  
ნაც გამდიდრდა — სიმართლის თქმისათვის მთელი ჩემი  
ცხვარი იმას ვარუქე, — და მეც სანაძლეო მომაგებინა. ახლა,  
ჩემო მეგობარო, როგორც პირობა გვქონდა, შენი ქონება  
მომითვალე და ამის შემდეგ იცოდე, რომ ტყუილს და სი-  
ყალბეს სიმართლით ცხოვრება სჯობიაო.

ჭირი — იქა, ლსინი — აქა,

ქათო — იქა, ფქვილი — აქა.



## სოვდაგარი და მისი ცოლი

იყო და არა იყო რა, ღვთის უკეთესი რა იქნებოდა, ერთსატახტო ქალაქში ცხოვრობდა ერთი მდიდარი სოვდაგარი. სოვდაგარს მეტად ჭკვიანი ცოლი ჰყავდა, ქალი ქმარს ხშირად სასარგებლო რჩევა-დარიგებას აძლევდა, მაგრამ სოვდაგარი ისეთი ჯიუტი იყო, რომ ცოლს არაფერს უჯერებდა. თავისი სიჯიუტით ბევრჯერ ზარალიც მოსვლია, მაგრამ ისტიბარს არ იტყვდა და ცოლს სულ იმას ეუბნებოდა:

— დედაკაცი თმა გრძელი და ჭკუამოკლეა, ამიტომ ჩემად უნდა იყოს და კაცის საქმეში არ ერეოდესო.

ერთხელ სოვდაგარმა აიტყხა, ჩვენს ხელმწიფეს დაბადების დღე აქვს და საჩუქარი უნდა მივართვაო. ცოლმა ურჩია:

— თავი დაანებე ხელმწიფისთვის საჩუქრების მირთმევას, ერთხელ რომ მიუტან, მეორედაც მოგიხედნებს, მეფეთა გული გაუმადლარია, მერე როდისმე რაღაც არ მოეწონება, გაგირისხდება და ხათაბალაში გაეხვევიო.

ქმარმა არც ეს რჩევა დაუჯერა, გადაჰკიდა მხარზე ხურჯინი მოჯამაგირეს და წავიდა ბაზარში საჩუქრის საყიდლად. ბევრი იარა ბაზარში, ყველა დახლს აუარ-ჩაუარა, მაგრამ შესაფერი ვერაფერი ამოარჩია. ბოლოს ერთ ადგილას რაღაც უცნაური ხილი დაინახა და მოჯამაგირეს უთხრა, — აბა, ერთი გამიგე, ის რა ხილიაო. მოჯამაგირემ მიიღბინა გამყიდველთან და ჰკითხა:

— ძმობილო, ეს რა ხილიაო?

— ეს, ძმობილო, ინდოეთის კაკალიაო, — უპასუხა გამყიდველმა.

— ამაზე უკეთეს საჩუქარს, მე მგონი, ვერ ვიშოვიო, — თქვა სოვდაგარმა, — რაც იშვიათია, ის ძვირიც არის და

ტკბილიცო, — აავსო ხურჯინი ინდოეთის კაკლით, გადაი-  
ხადა ფული და გახარებული დაბრუნდა შინ. დაჰკრა ხელი  
კაკლით სავსე ხურჯინს და ცოლს ახარა:

— ისეთი საჩუქარი ვუშოვე ჩვენს დიდებულ ხელმწიფეს,  
რომ მისი მსგავსი ქვეყნად არაფერი მოიპოვებაო.

— მაინც რა იშოვე ასეთით? — ჰკითხა ცოლმა.

სოვდაგარმა შეხსნა ხურჯინს პირი და ინდური კაკლე-  
ბი ამოალაგა. ცოლმა უყურა, უყურა და უცბად გულიანად  
გადაიხარხარა.

— რა გაცინებსო? — ჰკითხა სოვდაგარმა.

— შე სულელო, — უთხრა ცოლმა, — ნეტა რას ფიქრობ-  
დი, როცა ამ გოგონსტოლა კაკლებს ყიდულობდი. ერთიც  
ვნახოთ, ჩვენი დიდებული ხელმწიფე ავ გუნებაზე იყოს,  
შენს საქციელში რაღაც არ მოეწონოს და კარისკაცებს  
უბრძანოს, — აიღეთ ეს საჩუქარი და თავზე დააყარეთო შე  
უბედურო, როგორ გგონია, იქიდან კიდევ ცოცხალი დაბ-  
რუნდებიო?

სოვდაგარი დაფიქრდა: „მგონი ეს უჭკუო დედაკაცი მარ-  
თალს უნდა ამბობდესო, — თქვა გულში, — ჩვენი დიდებუ-  
ლი და სახელოვანი ხელმწიფე ლომივით ავი და მღრინავია.  
ვინ იცის, იქნებ ამ ბედნიერ დღესაც რაღაც ჭმუნვა აჰყვა  
ლოგინიდან და ავ გუნებაზე იყოს, საჩუქრის მიტანის დროს  
გამირისხდეს და ჩემი მირთმეული ინდის კაკლები სათითა-  
ოდ თავზე გადამამტვრიოს. მართლაც და, გაუძლებს ჩემი  
საცოდავი თავი ასეთს წყალობას? კი, ჩემი ცოლი ამჯე-  
რად მართლაც მართალს ამბობს, გადაწყვიტა საბოლოოდ  
და ცოლს ჰკითხა:

— მაშ რა ვქნა, როგორ მოვიქცე, რომ საჩუქარიც მივაბრ-  
თვა და არც მე დაეზარალებო?

ცოლმა უთხრა:

— რაკი მაინც არ იშლი, მაშინ ადექი და რბილი ხილი  
მიართვიო.

წავიდა ხელახლა სოვდაგარი ბაზარში, იყიდა ქარვასა-  
ვით ყვითელი ინდის ხურმა, ქიშმიში, კუპრით შავი სპარ-  
სული ჭანჭური, დაშაქრული ლედვის ჩირი და დაბადების  
დღეს, დილაადრიან პირველმა შეაღო ხელმწიფის დარბაზის  
კარი,

ხელმწიფეს სახეზე ბრაზი ემჩნეოდა და დარბაზში ბოლ-  
თას სცემდა. სოვდაგარმა შესვლისთანავე შეამჩნია უხასია-  
თობა და მოწიწებით მიესალმა.

— რისთვის მოთრეულსარ ამ დილაადრიანო? — თვა-  
ლები დაუბრიალა ხელმწიფემ.

— ბედნიერი დღის მოსალოცად მოვედი, დიდებულო და  
ქვეყნის მპყრობელო. ხელმწიფევ, — მიუგო სოვდაგარმა და  
წელში უფრო მოიხარა, — მაღალი ღმერთი გუარავდეს შენა  
და შენს ოჯახს და ნუ მოგაკლოს ლხინი და ბედნიერი დღე.

— ეს ხურჯინი რისთვის შემოათრეე აქ? — შეაწყვეტი-  
ნა სიტყვა ხელმწიფემ და ხურჯინს წიხლი გაუქნია.

— ეს იმიტომ, რომ ღმერთმა სიტკბოთი და სიამით და-  
გაბეროთ. ჩამიჩითა და დაშაქრული ხილით მოგილოცავ ამ  
ბედნიერ დღეს, დიდებულო ხელმწიფევ, და ღმერთსა ვთხოვ,  
რომ ოჯახიც სულ ასე ტკბილად გყოლოდეთო, — მიუგო  
სოვდაგარმა და ხელმწიფის წინ მუხლი მოიყარა.

— რაო, რაო? ჩამიჩი და ლელვის ჩირიო? — უფრო გან-  
რისხდა ხელმწიფე და კარისკაცებს უბრძანა, — ახლავე შე-  
უხსენით პირი ხურჯინს და რაც მოუტანია ამ რეგვენს, სულ  
თავზე დააყარეთო!

კარისკაცებმა, რა თქმა უნდა, ხელმწიფის ბრძანება უსი-  
ტყვოდ შეასრულეს, გახსნეს ხურჯინი, შემოეხვივნენ სოვ-  
დაგარს ირგვლივ და დაუშინეს ჭანჭური და ინდის ხურმა,  
ლელვის ჩირი და ქიშმიში.

სოვდაგარი თავპირზე ხელებს იფარებდა და შეშინებული  
გაიძახოდა:

— გენაცვალე, ჩემო ცოლო, რომ ჭკვიანი ხარო! გენა-  
ცვალე, ჩემო ცოლო, რომ ჭკვიანი ხარო!

გაიგონა ხელმწიფემ სოვდაგარის სიტყვები და კარისკა-  
ცებს უბრძანა, შეწყვიტეთ დასჯაო. მერე სოვდაგარს ჰკითხა:

— სოვდაგარო, მომახსენე, რა გააკეთა ისეთი იმ უჭკუო  
დედაკაცმა, რომ ასეთი სასჯელის დროსაც კი მადლიერე-  
ბით იხსენიებო?

— მოგახსენებთ, მაგრამ მეშინია, უარესად არ გამირისა-  
ხდეთო, — შეჰკადრა სოვდაგარმა.

— თქვი და არას გერჩიო, — შეჰპირდა ხელმწიფე.

— ქვეყნის მპყრობელო, დიდებულო ხელმწიფე, ამ ბედნიერი დღის მოსალოცად თქვენთვის უცხოეთის ხილი ვიყიდე, — ინდოეთის კაკალი. სახლში რომ მივიტანე და ჩემმა ცოლმა დაინახა, ძალიან გამიწყრა, — ეს ბედნიერი დღე ჩვენს დიდებულ ხელმწიფეს უცხოეთის ხილით რომ არ მოულოცო, განა ჩვენი ქვეყნის ხილი რით არის ამაზე ნაკლები? ან რა იცი, ამ გოგონსტოლა კაკალს შიგნით როგორი გული აქვს, ერთიც ვნახოთ და, ჭიანი გამოდგეს, ხელმწიფეს გული მოუვიდეს და გაბრაზებულმა მთელი კაკალი თავზე გადაგამტყროს, როგორ ფიქრობ, გაუძლებს შენი თავი ხელმწიფის ასეთ პატივისცემასო? ახლა მითხარით, დიდებულო ხელმწიფე, განა მადლობის ღირსი არ არის ჩემი ცოლი ასეთ ხიფათს რომ გადამარჩინა? მე რომ იმისთვის არ გამეგონა და თქვენთვის საჩუქრად ის დაწყევლილი კაკალი მომერთმია, ახლა ხომ ცოცხალიც აღარ ვიქნებოდით.

ხელმწიფეს მოეწონა დედაკაცის საზრიანობა და პირზე ღიმილი მოეფინა. უთხრა სოვდაგარს:


— რაც მამაუფალს შენთვის ჭკუა და გონება დაუკლია, სულ შენი ცოლისათვის უბოძებია. ახლა წადი და იმ შენს ცოლს ჩემგან მოკითხვა გადაეციო.

კარისკაცებმა რაკი ხელმწიფის სახეზე ღიმილი დაინახეს, თვითონაც სიცილი დაიწყეს და გაწბილებული სოვდაგარი სასახლის კარიბჭემდე მიაცილეს.

ის დღე იყო და ის, სოვდაგარი ერთხელაც აღარ გასჯიუტებია თავის ცოლს, ყველა რჩევას უჯერებდა და საქმეც წალმა მისდიოდა.

ელასა, მელასა, ჭიქა მეკიდა ყელასა,  
მთქმელსა და გამგონებელსა,  
ლხინი გაამოთ ყველასა.





## სამი გამოცანა

იყო და არა იყო რა, ღვთის უკეთესი რა იქნებოდა, იყო ერთი ხელმწიფე და ჰყავდა ერთი შვილი. ხელმწიფის შვილი ნადირობის დიდი ტრფიალი იყო, გადაიცვამდა ყოველდღე მდაბიურად, აიღებდა მშვილდ-ისარს და სანადიროდ მიდიოდა. ხელმწიფემ იცოდა თავისი შვილის ხასიათი და სიკვდილის წინ ასეთი დარიგება მისცა:

— შვილო, მე ვკვდები, ტახტსაც და სახელმწიფოსაც შენ გაბარებ და ვინძლო შესაფერისად მართო. ვიცი, ნადირობას ვერ მოიშლი, მაგრამ ჩემგან ერთი რჩევა კი დაიხსომე: ყველა მხარეს ინადირე, ოღონდ დასავლეთისაკენ ნურასოდეს წახვალო, — მერე ერთი პატარა კოლოფი მისცა და დაუმატა, — ამ კოლოფს თვალის ჩინივით გაუფრთხილდი. და მხოლოდ მაშინ გახსენი, როცა ძალიან გაგიჭირდესო, — დაასრულა ხელმწიფემ შვილის დარიგება და სულიც განუტევა. შვილმა მამა მეფური პატივით დაასაფლავა და სახელმწიფოს მართვა-გამგებლობას შეუდგა. ერთ წლამდე, სანამ ძაძები ეცვა და მამას იგლოვდა, შინიდან ფეხი არსად გადაუდგამს, მერე კი, როცა მამას წლისთავიც გადაუსადა, ძაძები გაიხადა და ისევ ძველი ჩვეულება გაიხსენა, — აიყოლია ნაზირ-ვეზირები და სანადიროდ სიარულს მოუხშირა.

ინადირა ერთ მხარეს, ინადირა მეორე მხარეს, ინადირა მესამე მხარესაც და ბოლოს დასავლეთისაკენ წახვალა გადაწყვიტა. ნაზირ-ვეზირებმა მამის ანდერძი მოაგონეს და თვითონაც ბევრი უშალეს, მაგრამ ახალგაზრდა ხელმწიფემ არ დაიშალა, შინაყმებსა და მზარეულებს საგზლის მომზადება

უბრძანა და მეორე დილით თავისი ნაზირ-ვეზირებითა და ზაზიერ-მარეკებით დასავლეთისაკენ გაემართა.

პირველ დღესვე უამრავი ნადირი დახოცეს, მერე დაანთეს ცეცხლი და სადილის თადარიგს შეუდგნენ. ახალგაზრდა ხელმწიფემ შორს, მთაზე ერთი ბროლის კოშკი დაინახა და აიჩქმა, — გინდა თუ არა, იქ უნდა ავიდე და გავიგო, ის კოშკი ვისია, ან იმ მაღალ მთაზე რისთვის აუშენებიაო.

ვეზირებმა არც ეს განზრახვა მოუწონეს, მაგრამ ახალგაზრდა ხელმწიფემ აქაც თავისი გაიტანა, შეაკაზმინა ცსენები, სამი ვეზირი იახლა და კოშკისაკენ წავიდა. მივიდნენ კოშკთან, კოშკის კარი დაკეტილი დახვდათ, კარზე კი ასე ეწერა:

„შემოხვალ, ინანებ, არ შემოხვალ და მაინც ინანებო!“  
ახალგაზრდა ხელმწიფე დაფიქრდა და თქვა:

— რაკი ორივე სანანურია, ისევე შესვლა ჯობია, იმას მაინც გავიგებ, შიგნით რა არისო, — და შევიდა.

შევიდა თუ არა, აქეთ-იქიდან ორმოცი ხმალამოწვდილი კაცი გამოვარდა და ახალგაზრდა ხელმწიფეს შემოერტყა. მოჰკიდეს ამ კაცებმა ხელი, გაატარეს რვა ოთახი და მეცხრეში შეიყვანეს. ოთახში ტახტი იდგა და ზედ მზეთუნახავი ქალი იწვა. კაცებმა ხელმწიფე ქალის პირდაპირ დააყენეს და უთხრეს:

— თუ ამ ქალს სამჯერ ხმას ამოაღებინებ, ცოლად გაგატანთ, თუ არადა, თავს მოგჭრით და ფანჯრიდან გადაგადებთო.

დალონდა ახალგაზრდა ხელმწიფე, რა ქნას, რით ამოაღებინოს ხმა? არადა, უკან ორმოცი ხმალამოწვდილი კაცი უდგას და ხსნა არსაით არის. უცბად მამის დანატოვარი კოლოფი მოაგონდა, ამაზე დიდი გასაჭირი რალა უნდა დამადგესო, — თქვა გულში. ამოიღო კოლოფი და გახსნა. კოლოფიდან ერთი პაწაწინა ჭრელი ჩიტი გამოფრინდა, დასკუპდა ტახტის თავზე და მზეთუნახავ ქალს ჭიკჭიკა ხმით მიმართა: — ერთი ქალი გზაზე მიდიოდა, თან ქმარი და მაზლი ახლდნენ. ერთ ადგილას დაულამდათ და საჭმელიც შემოაკლდათ. მაზლმა თქვა, მე მოვიტანო და ახლო სოფელში ბურის საშოვნელად წავიდა. გზაში ყაჩაღები დახვდნენ, გაძარა



ცვეს და თავი მოჰკვეთეს. მაზლი რომ აღარ გამოჩნდა, ახლა ქმარი წავიდა, მაგრამ იმასაც ის დღე ეწია, — ყაჩაღებმა გაძარცვეს და თავმოკვეთილი ძმის გვერდით დააწვინეს. ქმარმაც რომ დაიგვიანა, ადგა ქალი და თვითონ წავიდა. იარა, იარა და ქმარი და მაზლი თავმოკვეთილები კი იპოვა. დაჯდა საწყალი ქალი, წაიშინა თავში და დაიწყო ტირილი.

სად იყო, სად არა, უცბად ჯაგებიდან ერთი თავის ბასხლა გამოძვრა და სისხლს დაუწყო ლოკვა. ქალს გული მოუვიდა, ესროლა ქვა და მოკლა. ჯაგებიდან ახლა დედა თავი გამოძვრა და ქალს შეუტია, — შე ასეთ-ისეთო. შვილი რაზე მომიკალის ბრალი შენი, შენ რას უზამ შენს ქმარ-მაზლს, თორემ ჩემს შვილს აპლავე გავაცოცხლებო. — გაიქცა იქვე ველში, მიირბინ-მოირბინა, რაღაც ბალასი მოწყვიტა, მოიტანა, წაუსვა თავის მკვდარ შვილს და გააცოცხლა. დედა-შვილი წრუწუნით შეცოცდნენ ისევ ჯაგებში. ქალმა დაიხსომა ბალახი და თვითონაც მოგლიჯა, მიუსვ-მოუსვა ქმარ-მაზლს და ორივე გააცოცხლა, მაგრამ გახარებულს აერია და ქმრის თავი მაზლს მოაბა და მაზლისა — ქმარს. ახლა მითხარი, მზეთუნახავო ასულო, რომელს უნდა დარჩეს ქალი, ტანით ქმარს, თუ თავით ქმარსო?

— რა თქმა უნდა, ტანით ქმარსო, — ამოიღო ხმა მზეთუნახავმა.

ჩიტმა შეიჭიკჭიკ-შეიფრთხიალა და მეორე გამოცანა დაიწყო:

— დურგალი, დერციკი და მღვდელი მიდიოდნენ, ერთ ტყეში დაულამდათ, დაანთეს ცეცხლი და ღამის გასათევად დაბინავდნენ. როცა ივახშმეს და ძილიც მოეკიდათ, თქვეს: — მოდით ჯერ-ჯერით ორ-ორმა დავიძინოთ და მესამემ ვუყარაულოთ, რომ ნადირმა არ გაგვაფუჭოსო. — ყარეს წილი და პირველად ყარაულობა ერგო დურგალს. დაიძინეს მღვდელმა და დერციკმა. დურგალი კი ზის ცეცხლთან და ფხიზლობს. ბოლოს მობეზრდა უქმად ჯდომა, ერთი ხის ქალი გამოთალა და ხეზე მიაყუდა.

გავიდა დრო და ახლა დერციკს ერგო გუშავობა. დურგალმა და მღვდელმა დაიძინეს, დერციკი კი ზის ცეცხლის ბირას და ფხიზლობს. მალე იმასაც მოსწყინდა მუქთად

ჯდომა და დურგლის გამოთლილ ქალს ტანსაცმელი შეუკრა, ჩააცვა, გამოაწყო.

ბოლოს მღვდლის ჯერიც დადგა. დურგალმა და დერციკმა დაიძინეს და მღვდელი ცეცხლის პირას ჩამოჯდა. მოსწყინდა მღვდელსაც მუქთად ჯდომა, მიიხედ-მოიხედა, დაინახა ძვირფას ტანსაცმელში გამოწყობილი ხის ქალი და გუნებაში თქვა: მოდი, ვილოცებ, შევთხოვ ღმერთს, რომ ამ ქალს სული ჩაუდგასო... დაიწყო ლოცვა, ქალს მართლაც ჩაედგა სული და ხორციელ ადამიანად იქცა. ახლა შენ მითხარი, მზეთუნახავო ასულო, რომელს ეკუთვნის ის ქალი, მღვდელს, დურგალს, თუ დერციკსო?

— რა თქმა უნდა, იმას, ვინც სული ჩაუდგა და ხორციელ ადამიანად აქციაო, — მიუგო ქალმა.

ჩიტმა უფრო მხიარულად ჩაიჭიკჭიკ-შეიფრთხიალა და მესამე გამოცანა დაიწყო:

— გზაზე სამი კაცი მიდიოდა — გულთმისანი, ფეხმარდი და ექიმი. გულთმისანმა თქვა: — ჩვენი ხელმწიფის ქალი ავად გამხდარა და სულთმობრძავი წევსო. — აბა, რომ მივესწრებდე, გადავარჩენდი, მაგრამ იქ ვინ მიმიყვანსო, — თქვა ექიმმა. ფეხმარდმა უთხრა: — მე მიგიყვანო ფეხმარდმა შეისვა ზურგზე ექიმი და საჩქაროდ ხელმწიფის სასახლეში მიიყვანა. ექიმმა ავადმყოფს წამალი დააღლეინა და მოარჩინა. ახლა მითხარი, მზეთუნახავო ასულო, ვი ეკუთვნის ის ხელმწიფის ქალიშვილიო?

— ვინც მოარჩინა, იმასო, — მიუგო ქალმა.

რაკი მესამედაც ამოაღებინა ხმა, ჩიტი ისევ კოლოფში ჩაფრინდა. მზეთუნახავი ქალი წამოდგა, გადაეხვია ახალგაზრდა ხელმწიფეს და უთხრა:

— შენა ყოფილხარ ჩემი ბედი და სადაც გინდა, იქ წამიყვანეო.

წამოიყვანა ახალგაზრდა ხელმწიფემ მზეთუნახავი ქალი, წამოიღო მთელი მისი ქონება, ის შეიარაღებული ორმოცი კაციც თავის ამაღლაში ჩარიცხა და გამოსწია შინისაკენ. შინ მისვლისთანავე მოიწვია სამღვდულოება, მზეთუნახავ ქალზე ჯვარი დაიწერა და დიდი ქორწილიც გადაიხადა.

ჭირი — იქა, ლხინი — აქა,

ქატო — იქა, ფქვილი — აქა.



## გლეხი, მოლა და ეშმაკი

იყო და არა იყო რა, ღვთის უკეთესი რა იქნებოდა, იყო შაშვი მგალობელი, ღმერთი ჩვენი მწყალობელი. ერთხელ ერთი საწყალი გლეხი ტყეში წავიდა და წერაქვით ყუნჩების თხრა დაიწყო. სადამომდე თხარა ყუნჩები და; ის იყო, უკანასკნელი ყუნჩი უნდა ამოეგდო, რომ ნათხარიდან უცბად ეშმაკი ამოხტა და წივილ-კივილით ღელისაკენ დაეშვა. სად იყო, სად — არა, იმავ წამს ძეძვიანებიდან ერთი მშიერი, პირმურა მგელიც გამოვარდა და ეშმაკს გაეკიდა.

მირბის ეშმაკი, მაგრამ მგელს ველარ უსწრებს და საცოდავად წივის. გლეხს შეებრალა ეშმაკი, წამოავლო ხელი წერაქვს, გამოუდგა მგელს უკან „ჰაე-ჰაეს“ ძასილით და საკბილო გააგდებინა. ეშმაკი მობრუნდა და გლეხს უთხრა:

— რაკი სიკვდილს გადამარჩინე, მეც სიკეთით მინდა გადაგიხადო. მე ჯიშინ ვირად გადავიქცევი, შენ თოკი ჩამაბი და ბაზარზე გასაყიდად წამიყვანე. მუშტარი ბევრი დაგეხვევა და ბევრ ფულსაც შემოგაძლევენ, მაგრამ სანამ მოლა არ მოვა, არავის მიმყიდო. იმ მოლას ჯავრი მჭირს, თავის ლოცვებში სულ ეშმაკებს სწყევლის. მსოლოდ მოლას მიმყიდე და ორივენი მოგებული დაფრჩებით: შენ ფულს მიიღებ და მე ჯავრს აშოვიყრიო.

ეშმაკი მართლაც იქცა თეთრ ვირად, გლეხმა შეაბა თოკი და წაიყვანა ბაზარში. შევიდნენ თუ არა ბაზარში, ვირმა ისე მოიღერა კისერი და ისეთი სტუნვა-კუნტრუში ატევა, რომ გამვლილ-გამაშვლელს თვალი შედა ჩივებოდა. — აი, ვირი და ლაშათი! — გაიძახოდნენ აღტაცებით, — ამისთანა საქონელში მიცემული ფული დასანანი არ არისო!

მყიდველები ერთმანეთს ეცილებოდნენ და იყო ერთი ჯგუფეთა და ყაყანი, მაგრამ გლეხი ყველას უარს ეუბნებოდა, — არა, ძმაო, არ ვყიდი, ამისთანა საქონელს გასაყიდად როგორ გავიმეტებო.

ხალხი ამ გაწამაწიასა და შეცილებაში რომ იყო, ამ დროს მოლაც მოვიდა, შეხედა ვირს, შემოუარა აქეთ-იქიდან და ძალიან მოეწონა. მაგისი წონა ფულიც რომ მთხოვოს, უნდა მივცე და ეს ვირი კი დავისაკუთრო, — გადაწყვიტა გულში და გლეხს შეევაჭრა:

— ძმობილო, რა ღირს შენი ვირით?

— ას თუმანს ფეხს არ მოვუცვლიო, — უპასუხა გლეხმა.

მოლა შეყოყმანდა, ეს მართლაც მეტიმეტად დიდი ფული იყო, მაგრამ აქეთ-იქიდან ხალხი შეუჩნდა, — მოლავ, ფულიანი კაცი ხარ და ფასიც ნუ გენანება, ხომ იცი, თეთრი ვირი შაჰების საჯდომი ვირის ჩამომავალია და ასეთს ყოველთვის ვერ იშოვიო.

მოლა შეგულიანდა, დაუთვალა გლეხს ასი თუმანი, გაიგდო წინ ვირი და გასწია თავისი სახლისაკენ. გზადაგზა ვირი უფრო გასხლისდა. ხან კუნტრუშობდა, ხან დაიყროყინებდა. ხან კი ახალ პატრონს მოუტრიალდებოდა და გაეთამაშებოდა. გახარებული მოლა სახედარს თვალს არ აშორებდა, — სწორედ რომ ჩემი საკადრისი საფურხე ვიშოვეო, — ჩაილაპარაკებდა მალმალე და ნასიამოვნები ხელს ინით შეღებილ წვერზე ჩამოიხვამდა.

ასე მიიყვანა მოლამ შინ ვირი და ნათელ თავლაში დააბა. მუზობლები და ნაცნობები ულოცავდნენ მოლას კარგი ვირის შეძენას. მოლა თვითონაც ძალიან ამაყობდა თავისი ჯიშისანი სახედრით და შესაფერისადაც უვლიდა: ყოველდღე აბანავებდა, სუფთა პირსახოცით ამშრალეებდა. არც საჭმელს აკლებდა, ბაგას ქერითა და ქიშმიშებით უვსებდა და, თუ დააკლდებოდა, კიდევაც უმატებდა. მერე გამოიყვანდა კარში, წამოჰყრიდა ავშარას და ფართო ეზოში სანავარდოდ გაუშვებდა.

ერთ დღესაც მოლამ ჩვეულებრივ აბანავა თავისი ვირი, გაწმინდა, კარგად გააძლო ქერ-ქიშმიშით და ეზოში გამოიყა

ვანა, ვირმა ერთი შეიკუნტრუშა, დაიფროყინა და უცბად იქვე მდგარ პატარა სურაში ჩაძვრა.

მოლა გაშტერდა და ნანახი თვალებს არ დაუჯერა, მაგრამ ვირმა ცოტა ხნის შემდეგ სურიდან ჯერ თავისი გრძელი ყურები ამოყო, მერე მთლიანად ამოვიდა, მოლას თვალწინ ძველებურად შეიკუნტრუშა და ისევ სურაში ჩაძვრა. მოლა მთლად გადაირია და გაკვირვებულმა ხმამალალი ყვირილი ატეხა:

— ხალხნო, არ გიკვირთ, რა მოხდა, ჩემი ვირი სურაში ჩაძვრა, ისევ ამოძვრა და ისევ ჩაძვრაო!

ყვირილზე მეზობლები მოცვივდნენ და შეეკითხნენ:

— რა იყო, მოლავ, რა გაყვირებდაო?

— როგორ რა მაყვირებდა, ჩემი ვირი სურაში ჩაძვრაო, — მიუგო მოლამ.

ხალხი მოლაზე უარესად გაკვირდა: როგორ შეიძლება ვირი სურაში ჩაძვრესო, და მოლას ურჩიეს, გაჩუმდი და ასეთი სისულელე მეორედ აღარ წამოგცდესო. მაგრამ მოლა არ დაცხრა და კვლავ თავისას გაიძახოდა:

— ჩემი ვირი ნამდვილად ჩაძვრა სურაში, მერე ამოძვრა და ისევ ჩაძვრაო!

მეზობლებმა დაასკვნეს, ჭკუაზე შეიშალაო და საჩქაროდ ექიმთან წაიყვანეს. მოლამ ექიმთანაც იგივე გაიმეორა:

— ჩემი ვირი სურაში ჩაძვრა, მერე ამოძვრა და ისევ ჩაძვრაო!

— საწყალს, ციებ-ცხელება თავში ავარდნია და მორყვიანო, — თქვა ექიმმა და ხალხს უთხრა, — გახადეთ ტანსაცმელი, შეუკარით ხელ-ფეხი და დააწვინეთო.

მისცვივდა ხალხი მოლას, გახადეს ტანსაცმელი და ხელ-ფეხშეკრული ტახტზე გაშოტეს. ექიმმა მოიტანა ერთი მოზრდილი ყინულის ნატეხი და თავზე დაადო.

ექიმი ყოველდღე მოდიოდა და ეკითხებოდა:

— აბა, მოლავ, სად არის შენი ვირით?

— ჩემი ვირი სურაში ჩაძვრა, ისევ ამოძვრა და ისევ ჩაძვრა და ასლაც იქა ზისო, — უპასუხებდა მოლა.

— ჰო, სიცხე ჯერ კიდევ არ გამოწელებიაო, — იტყოდა ექიმი და უმატებდა თავზე ყინულის ნატყებს.

მოლას ყინულისაგან თანდათან თავი გაეყინა, მერე სახეც გაულურჯდა და ბოლოს ფეხებიც გაფშვია. ვირი კი ამოძვრა სურიდან, ისევ ეშმაკად გადაიქცა და ღელისაკენ მოკურცხლა.

ჭირი — იქა, ლხინი — აქა,  
ქატო — იქა, ფქვილი — აქა.





## ც ე რ ო დ ე ნ ა

იყო და არა იყო რა, ღვთის უკეთესი რა იქნებოდა, იყო ერთი ღარიბი ცოლ-ქმარი. ერთხელ ქმარი სახსნაყად წავიდა, შუადღემ რომ მოაწია, ცოლმა ცხელი პური, მაწონი და ლობიოს შეჭამანდი ხურჯინში ჩაალაგა, გადაიკიდა მხარზე და წაულო ქმარს ყანაში.

ქალი ორსულად იყო და გაჭირვებით მიდიოდა, ნასევარი გზა რომ გაიარა, მუცლიდან ბავშვმა დაუძახა:

— დედი, მომეცი ხურჯინი და მე ავიკიდებო!

— სადა ხარ, შვილო, რომ ვერა გხედავო? — ჰკითხა დედამ.

— აი, დედილო, აქა ვარო, — მოესმა დედას დაბლიდან. დაიხედა დედამ ძირს და ცერისტოლა ბიჭი დაინახა, ისე დაბადებულიყო, დედამ ვერც გაიგო, იღვა ხელებგაწვდილი და ეუბნებოდა, — მომეცი, დედი, ხურჯინი, მომეცი, მე წამოვიდებო.

მისცა დედამ ხურჯინი, მაგრამ რის წამლები იყო! ხურჯინის სიმძიმემ თავ-ფეხიანად მიწაში ჩააძვრინა. ხურჯინი ისევ დედამ აიკიდა და გაუდგნენ გზას, წინ ცეროდენა მიცაკუნობს, უკან დედა მიჰყვება. მივიდნენ მამასთან. ცეროდენამ გუთანი რომ დაინახა, ახლა მამას დაუყინა: — მამილო, ჩამოდი ულლიდან, მე უნდა დავუჯდო.

მამა სიცილით მოკვდა:

— შენ რა ხარ, შე პაწაწკინავ, და შენი უღელზე დაჯდომა რა უნდა იყოს. რომ ჩამოვარდე, ხომ გაგტყელიტეს ხარებმაო.

— არა და არა, უნდა დავუჯდეთ, — გაჯიუტდა ცეროდენა.

რადას იზამდა მამა, ჩამოვიდა და დასვა უღელზე ცეროდენა. ჯერ ერთი კვალიც არ ჰქონდათ გავლილი, რომ ცეროდენა უღლიდან გადმოვარდა და კამეჩის ნეხეში ჩავარდა. ჩავარდა და თავფეხიანად ჩაიკარგა.

გაიხედეს დედ-მამამ და, აღარსადაა ცეროდენა. აი აქით ეცნენ, აი, იქით, მაგრამ ვეღარ იპოვეს. დაღონდნენ ძალიან, ეს რა დაგვემართა, ჯერ რა შვილი გვეყოლა, ერთი ციცქნა, და ისიც დაუკარგეთო.

იღბლად ცა მოიღრუბლა, დაიქუსა, გაიგრიალ-გამოიგრიალა, ცეცხლის საზები გააველო, გაკლაკნ-გამოკლაკნა და კოკისპირული წვიმა დაუშვა. წვიმამ კამეჩის ნეხვი გაშალა, ვაჟანტა, გადარეცხა და ცეროდენა გამოაჩინა. ცეროდენამ გრძელი წამწამები დააფახულა, პირი და ყურები გამოირეცხა და ისევ ის კოხტა ბიჭი დადგა. ოღონდ ეგ იყო, წვიმაში ცოტათი შესცივნოდა, მაგრამ ამასვე სულაც არ წუხდა. დედ-მამას უთხრა, — თქვენ საქმეს მიხედეთ, ჩემს თავს მე თვითონ მოვუვლიო. იქვე, მუხის ძირას ცეცხლი დაანთო და მიეფიცხა.

სად იყო, და სად—არა, მუხასთან ერთი მშიერი მგელი მოძუნძულდა, დაინახა ცეროდენა და ძალიან გაუხარდა, ერთი ლუკმა მაინც გამომივო. მივიდა ცეროდენასთან და უთხრა: უნდა შეგჭამოო.

— ვერ შემჭამო, — უპასუხა გულადად ცეროდენამ, წამოხტა ფეხზე, ერთი წვეტიანი წკირი იპოვა და მგელს შეუტია: — აქედან დაიკარგე, თორემ თავს ეგაგიხეთქავო! — მგელს სიცილადაც არ ეყო ცეროდენას მუქარა, გაალო პირი და კბილებში მოიქცია.

მგელს ძვლის ხვრაში ერთი კბილი მოსტეხნოდა და ძალიან სტიკოდა, ჩაუჯდა იმ ნაკბილარში ცეროდენა და დაუწყო ჯოხით ჩხვლეტა. მგელმა ტკივილს ვეღარ გაუძლო და ღმუილი მორთო. ატრიალა ყბები, ისვა ენა, იგრიხა აქეთ-იქით, მაგრამ ამოდ, ცეროდენას ვერაფერი დააკლო. ბოლოს უთხრა: — გამოდი და აღარას გერჩიო:

— არა, ვერ გენდობი, — უთხრა ცეროდენამ, — ვიცი, რა



ღვარვალისა სარ, გინდა, რომ კბილებში მომიგდო, მაგრამ ვერ ეღირსები ჩემ აქედან გამოსვლასო.

მგელი შეწუხდა: — ეს რა სათაბალა, გადავიკიდვო, და ცეროდენას შეესხვეწა:

— ოღონდ გამოდი და ვფიცავ ჩემს გამჩენს, არც კბილებში მოგიგდებ და ერთ ოქროსმატყლიან ვერძსაც გაჩუჭბო.

ასლა კი გამოვიდა ნაკბილარიდან ცეროდენა და მგელს წინ დონიჯ შემოყრილი დაუდგა: — აბა, პირობაზე როგორა ხარო?

— პირი პირია და არ გატყდებაო, — უთხრა მგელმა, აჩუქა ერთი ოქროსმატყლიანი ვერძი და კუდამოძუებული თავის გზაზე წავიდა.

რაკი ცხვარი იშოვა ცეროდენამ, ერთი ჩალის სალამურიც გაიკეთა, გაიყვანა ვერძი სოფლის პირას და ეკლესიის გვერდით საბალახოდ გაუშვა. თვითონაც გვერდით მიუჯდა და სალამური აარაკრაკა. ძოვს ვერძი ბალახს, ცეროდენა სალამურს არაკრაკებს და მასთან ერთად გარემოც ხარობს: ყვავილებზე პეპლები ცეკვავენ, ნიავი მიმოქრის, ხეები ტოტებს სრიან და ჩიტები სტვენა-ჭიკჭიკით ესმიანებიან.

უცბად თოფ-იარაღში ჩამჯდარი ყაჩაღები მოვიდნენ, საყდრის გატეხა უნდოდათ. შემოუარეს საყდარს ირგვლივ, მაგრამ ყველა კარი შიგნიდან დაკეტილი დახვდათ. მივიდნენ ცეროდენასთან და ყაჩაღების უფროსმა უთხრა:

— წამოდი, ფანჯრიდან საყდარში გადაგსვამთ და შიგნიდან კარი გაგვიღეო.

— ვერ წამოვალო, — უთხრა ცეროდენამ, — ჩემს ვერძს უპატრონოდ ვერ დავტოვებ, მგელი შემიჭამსო.

— ოღონდ წამოდი და შენს ვერძსაც ვუპატრონებთ და ნაძარცვის ნახევარსაც მოგცემთო. — შეესხვეწნენ ყაჩაღები.

დაიყოლიეს ბოლოს ცეროდენა ყაჩაღებმა და გადასვენ ფანჯრიდან. ცეროდენამ გაულო კარები, შევიდნენ ყაჩაღები და, რაც კი რამ ძვირფასი ნახეს, ოქრო-ვერცხლი, ნივთები, ყველაფერი მოხვეტეს და გამოზიდეს. გამოვიდა ცეროდენაც და ყაჩაღებს უთხრა:

— აბა, ჩამაბარეთ ჩემი ოქროსმატყლიანი ვერძი და დაპირებული ნახევარიც მომეცითო.

მაგრამ ყაჩაღებმა არც დაპირებული ნახევარი მისცეს და აღარც ვერძი დაუბრუნეს: — დაიკარგე, შე ბუზის ტოლაჲ, შენ ან ვერძი რად გინდა, ან ოქრო-ვერცხლიო.

— მომეცით, თორემ განანებთო! — მუქარით უთხრა ცეროდენამ.

ყაჩაღებმა სიცილი დაიწყეს, — უყურეთ ამ ციცქნას, მუქარასაც რომ გვიბედავსო.

— რაკი სიკეთე არ გინდათ, ახლა მე მიყურეთო, — თქვა ცეროდენამ, ისკუბა და ყაჩაღების მეთაურს ყურში შეუძვრა, ჩაუძვრა ტვინამდე და თავისი წვეტიანი ჯოხით ტვინში ჩხვლეტა დაუწყო.

მეთაური ტკივილისაგან დაიკლაკნა და ხელქვეითებს უყვირა: — მიშველეთო!

მოცვივდნენ ყაჩაღები, ჩახედეს ყურში, მაგრამ ცეროდენა ვერსად დაინახეს, უთხრეს მეთაურს:

— ისე ღრმად შესულა, რომ ამოყვანა შეუძლებელიაო.

ცეროდენა კი ჩხვლეტდა და ჩხვლეტდა წვეტიან ჯოხს ტვინში. მეთაურმა ტკივილს ვეღარ გაუძლო და ცეროდენას შეეხვეწა:

— ოღონდ გამოდი, ნუ მაწამებ და, რასაც მთხოვ, ყველაფერს შეგისრულებო.

— აბა, დაიფიცეო, — უთხრა ცეროდენამ.

ყაჩაღების უფროსმა დაიფიცა, მაშინ ცეროდენამ უთხრა:

— ნაძარცვი ისევ ეკლესიაში შეზიდეთ, ჩემი ვერძი და მიბრუნეთ და თქვენი თოფ-იარაღიც ჩამაბარეთო.

უფროსმა ყაჩაღებს უბრძანა და მთელი ნაძარცვი ოქრო-ვერცხლი ეკლესიაში შეაზიდვინა, ოქროსმატყლიანი ვერძიც მოაყვანინა, თოფ-იარაღიც ააყრევინა და ერთად დააწყობინა. მერე თვითონაც აიყარა იარაღი და ცეროდენას დაუყვირა: — შენი თხოვნა შესრულებულია და გამოდიო.

გამოვიდა ცეროდენა, შემოირტყა სავაზნეები, გადაიკიდა მხარზე თოფები და თავისი ვერძიც წამოიყვანა. დედ-მამას უკვე დაკარგული ეგონა, ვინ იცის, რამ გაჭყლიტაო, და სალსალამათი და თანაც თავით-ფესებამდე იარაღში ჩამ-

ჯდარი რომ დაუბრუნდათ, სიხარულით ცას ეწიენენ და დიდი საღმრთო გადაიხადეს.

ამ დღიდან ცეროდენას აღარც მგლის შიში ჰქონდა, აღარც ყაჩაღებისა. შემოირტყამდა სავსე სავაზნეს, გადაიკიდებდა თოფს და სალამურის დაკვრით თავის ვერძს იალაღებისაკენ გაირეკავდა. სალამოზე დედა ვერძს პარსავდა, მაგრამ მეორე დღეს ვერძი საძოვრიდან ისევ ხშირი მატყლით შემოსილი ბრუნდებოდა. მამა ოქროს მატყლს ბაზარზე ყიდდა და ტანსაცმელიც და სასმელ-საჭმელიც ულევად ჰქონდათ. დედ-მამა სულ შვილის ქებაში იყო, — ეს რა ყოჩაღი ბიჭი გვეყოლაო. და განა არ იყო საქებარი?

ჭირი — იქა, ლხინი — აქა,  
ქატო — იქა, ფქვილი — აქა.





## ორი მეგობარი

იყო და არა იყო რა, ღვთის უკეთესი რა იქნებოდა, იყო ორი კაცი, ერთი — ტინიხიდელი, მეორე — სიდისთაველი. ერთმანეთში დიდი მეგობრობა ჰქონდათ, მაგრამ ხასიათით კი სრულიად განსხვავდებოდნენ: სიდისთაველი ისეთი კაცი იყო, მოვალეს საფლავის კარამდე მიჰყვებოდა, გახვრეტილი შაურიანი რომ ესესხებინა ვისმესთვის, მერე მოსვენებას აღარ მისცემდა, თუნდ იმ მოვალეს ათასი თუმნის პატივიც ეცა. ტინიხიდელი კი ისეთი ჯანჯალი იყო, ვისმესი ერთი ჯამი ლობიო რომ მართებოდა, მთელ მეჯლისს გაუმართავდა და ვალს კი არ დაუბრუნებდა.

ერთხელ ტინიხიდელმა თავისი მეგობარი სიდისთაველისაგან ერთი აბაზი ისესხა და გადახდას სამი დღის შემდეგ შეჰპირდა.

გავიდა სამი დღე და სიდისთაველიც მაშინვე მოვალის კარზე გაჩნდა. ტინიხიდელმა მეგობარი შინ შეიპატიჟა, ქათამი დაუკლა, ერთი თუნგი ღვინო დააღვინა, მაგრამ ვალზე კი უარი უთხრა:

— ბოდიში, ძმაო, პირობა ვერ შეგისრულე, ერთი თვის შემდეგ მოდი და უეჭველად გადაგიხდიო.

გავიდა ერთი თვე, ისევ მიადგა სიდისთაველი მოვალეს კარზე და აბაზი მოსთხოვა. ტინიხიდელმა კვლავ ქათამი დაუკლა, ერთი თუნგი ღვინო კიდევ შეასვა და ისევ ბოდიშით გაისტუმრა:

— ერთი თვე კიდევ მაცალე და უსათუოდ გადაგიხდიო.

გავიდა ის თვეც, მაგრამ ტინიხიდელმა ვალი არც ამჯერ-

რად გადაუხადა, თუმცა მოვალეს ქათამი ახლაც დაუკლა და კარგადაც აქეიფა.

თვე თვეს მისდევდა, ხიდისთაველი ვალს არ ივიწყებდა, ტინიხიდელიც ჩვეულებრივ ჯანჯლობდა და მოვალეს პურ-ღვინით უმასპინძლდებოდა. ბოლოს, ყველაფერი რომ გამო-ელია — აღარც ქათმები შერჩა და აღარც ღვინო, ცოლს უთხრა:

— ვიცი, სანამ ცოცხალი ვარ, ჩემი ხიდისთაველი ძმაკა-ცი იმ ერთ აბაზს არ შემარჩენს, ამიტომ, მოდი ასე ვქნათო კუბო ვიყიდოთ, მოსვლის დრო რომ მოვა, მე კუბოში ჩავ-წვები, შენ შავები ჩაიცვი და ტირილით შეეგებე. იქნებ რო-გორმე დავაჯეროთ, რომ ცოცხალი აღარა ვარ და ეს ვალი შევინარჩუნოთო.

ქმრის აზრი ცოლსაც ჭკუაში დაუჯდა. იყიდეს კუბო და ტინიხიდელი გულხელდაკრეფილი ჩაწვა შიგ. ცოტა სანი და, გამოჩნდა ხიდისთაველიც. ტინიხიდელის ცოლმა სარ-ქაროდ შავები გადაიცვა, თმა გაიწეწა, სასე ჩამოიხოკა და მოვალეს ტირილითა და ვაი-ვიშით შეეგება. მაგრამ, თქვენც არ მომიკვდეთ, ხიდისთაველს თავის აბაზზე ხელი არ აეღოს. მოვალის სიკვდილი რომ გაიგო, მაშინვე ღრიალი მორ-თო, — ვაიმე, ჩემო აბაზოო! — და კუბოსკენ გაიწია, — მეც შიგ უნდა ჩავწვე და ჩემს აბაზთან ერთად დავი-მარხოო.

მოიყვანეს მღვდელი, კუბოში მწოლიარე ტინიხიდელს ანდერძი აუგეს და ერთ დანგრეულ ეკლესიაში დაასვენეს. ხიდისთაველი ძმაკაცს არც ახლა მოეშვა, მეც ამასთან უნდა გავათიო ღამეო, დაიჟინა და კუბოს გვერდით მიუწვა.

შუალამისას გარედან რაღაც საეჭვო ხმა შემოესმა. შე-ეშინდა ემანდ ეშმაკები არ იყვნენო და გულგახეთქილი ტრა-პეზში დაიმალა. ცოტა ხნის შემდეგ ეკლესიაში სამი კაცი შემოვიდა და თან ფულით გატენილი ტომარა შემოიტანეს. თურმე ნუ იტყვით, ესენი ქურდები ყოფილიყვნენ, საზინა გაქპარცვათ და ეკლესიაში ფულის გასაყოფად შემოსულიყ-ვნენ.

ანთეს სანთელი, ფული იატაკზე წამოყარეს და მუჭით დაიწყეს გაყოფა: ერთი მუჭა ერთს, მეორე — მეორეს და

მესამე — მესამეს. ბოლოს ერთი მუჭა დარჩათ და ბჭობა გამართეს, — რა ექნათ, როგორ გავიყოთო. ერთმა თქვა:

— მოდით, ეს მკვდარი კუბოდან ამოვიღოთ და რომელიც ხანჯლის ერთი დაკვრით შუა გაკვეთს, ფულიც იმას დარჩესო.

ეს აზრი ყველამ მოიწონა, იშიშვლეს ხანჯლები და ის იყო, კუბო უნდა გადმოებრუნებინათ, რომ ტინიხიდელმა თვითონვე წამოიწია და ყვირილი ატეხა.

— არიქათ, მკვდრებო, მიშველეთ, ეკლესიაში ქურდები შემოსულან და დავიჭიროთო!

ტრაპეზში დამალულმა ხიდისთაველმა ძმაკაცის ხმა იცნო და იქიდან გამოსძახა:

— ხელი მაგრად ჩასჭიდე, არ გაუშვა და ჩვენც ახლავე მოგეშველებითო!

გულგახეთქილი და თავზარდაცემული ქურდები ფსახა-გლეჯით გამოცვიდნენ ეკლესიიდან და უკან მოუხედავად მოკურცხლეს. ფული კი ძმაკაცებმა გაიყვეს. მაგრამ ხიდისთაველს ვალი მოაგონდა და ტინიხიდელს უთხრა:

— აბა, ძმაო, ახლა ხომ გაქვს ფული და ბარემ ჩემი აბაზი დამიბრუნეო. ტინიხიდელმა ისევე ჯანჯლობა დაიწყო, მოუვიდათ ლაპარაკი — ძალს ერთია, ძალს — მეორე.

ამასობაში შეშინებული ქურდები გონს მოეგნენ, მოდით, გავიგოთ მართლა მკვდრები დაცოცხლდნენ, თუ მოგვეჩვენაო. თქვეს და ამბის გასაგებად ერთი ამხანაგი გამოგზავნეს.

ქურდი სწორედ იმ დროს მივიდა ეკლესიასთან, როცა ხიდისთაველი და ტინიხიდელი აბაზზე დაობდნენ. ქურდს ცნობისწადილმა წასძლია და სარკმლიდან გადაიხედა. ტინიხიდელმა თვალი შეასწრო, მოხადა ქუდი და ამხანაგს მიუგო:

— აჰა, იმ ერთ აბაზში ეგ ქუდი გქონდეს და ერთხელ და სამუდამოდ ჩამომეხსენიო.

ქუდმოხდილი ქურდი სირბილით დაბრუნდა ამხანაგებთან და ხმის კანკალით უამბო, რაც ნახა:

— ძმებო, საჩქაროდ გავეცალოთ აქაურობას, თორემ იმდენი მკვდრები წამომდგარან საფლავებიდან, ჩვენი ფულიდან თითო აბაზიც არ შესვდრიათ, ერთს ჩემი ქუდი მისცეს აბაზში და სხვებს რას უზამენ, რას მისცემენ, არ ვიცია ჩქარა თავს ვუშველოთ, თორემ თუ წამოგვეწივნენ, ამ ფულეზსაც წაგვართმევენო.

ჭირი — იქა, ლხინი — აქა,  
ქატო — იქა, ფქვილი — აქა.





## მ ე ც ხ ვ ა რ ე

იყო და არა იყო რა, იყო შაშვი მგალობელი, ღმერთი ჩვენი მწყალობელი. ერთ სოფელში ცხოვრობდა ერთი მეცხვარე კაცი. ერთხელ ეს კაცი შთაზე ცხვარს ამოვებდა. უცბად ფარას ერთი რქებდაგრეხილი ყორი მოსწყდა და ქვევით, ზურქნარისაკენ დაეშვა. მეცხვარე დაედევნა და მოაბრუნა, მაგრამ ყორი ფარაში მაინც არ გაჩერდა და ისევ ბურქნარისაკენ დაეშვა; მეცხვარემ მეორედაც მოაბრუნა. ყორმა მესამედაც იგივე ქნა — მოსწყდა ფარას და ქვევით დაეშვა.

— უნდა გავიგო, სად ეშმაკებში იწევს ეს მგლის შესაჭმელიო, — თქვა მეცხვარემ და უკან გამოუდგა.

ყოჩმა იარა, იარა და ერთ ღიხიან ჭალაში გავიდა. დაღა და აქეთ-იქით ყურება დაიწყო. უცბად ერთი მგელი გამოვარდა, ეცა ყორს და ტყისკენ გააქანა.

ამ ამბავმა მეცხვარე უზომოდ გააკვირვა. იდგა დიდხანს გარინდებული და ფიქრობდა: კაცი ცხვარში ვებრდები, მაგრამ ასეთ რამეს არც მოვსწრებოვარ და არც ამბად გამიგონია. ჭედილა სამჯერ გამოვაბრუნე, მაგრამ ამოდ — სანამ არ წავიდა და მგელს პირში არ ჩაუვარდა, არ მოისვენა. ჩანს, რაღაც განგების ძალა მოქმედებს და, თუკი აგრეა, მე რაღად ვიკლავ თავს და დღე და ღამე ველის არგნად ვყუდივარ. მგელს სომ მისცა ღმერთმა უზრომლად და უწვალებლად. მაშ, თუ უნდა, მეც ასევე მომცემსო. — აიღო მწყემსის კომბალი, გუდა-ნაბადი, ხელუკულმა გადაყარა და სახლისაკენ გასწია. შინ რომ მივიდა, ცოლმა ჰკითხა:



— კაცო, სახლში რომ მოხვედი, ცხვარი ვიღას დაუტოვო?

მეცხვარემ უამბო ყველაფერი, რაც თავს გადახდა, და ბოლოს უთხრა:

— თუ ღმერთს უნდა, ცხვარს ისეც მომცემს, უმწყემსავად, თუ არა და, ძალით ვერაფერს გავსდებიო.

ცოლი ბევრს ეჩივინა და ეჩხუბა, წადი, მიხედეო, მაგრამ ქმარმა არ გაუგონა, წამოწვა შინ მხართეძოხზე და ადგილიდან აღარ იპროდა. უბედურება უფრო ის იყო, რომ კაცი მარტო ცხვარში წასვლაზე კი არ ამბობდა უარს, აღარც სხვა საქმეს აკეთებდა, თან სულ იმას გაიძახოდა: — ღმერთს თუ უნდა, უშრომლადაც მომცემსო!

ერთ დღეს მეცხვარის ცოლს პური უნდა გამოეცხო, მაგრამ ეზოში თონის გასახურებელი წკირიც ვეღარ იპოვა. შევიდა შინ და ქმარს საყვედურით უთხრა:

— კაცო, ეზოში ჩხირიც აღარ იბადება, ადექი, ფიჩხი მაინც მოიტანე, რომ თონე გავახურო და პური გამოვაცხო, თორემ მშივრები დავრჩებითო.

— თუ ღმერთს უნდა, ისეც მომცემსო, — უპასუხა ქმარმა და მეორე გვერდზე გადაბრუნდა.

— კაცო გაგიყედი, თუ რა მოგივიდა! — დასწყვილა ცოლმა, — ღმერთი რას მოგცემს, თუ ხელი არ გაანძრიე. ჯერ ცხვარი დალუპე და ახლა ოჯახიც გინდა ზედ მიაყოლო? კარგი, თუ არ შეგრცხვება, მეზობლებში ხარ-ურემს ვითხოვ და თვითონ წავალ ფიჩხის მოსატანადო.

მართლაც, ადგა დედაკაცი, ინათხოვრა ხარ-ურემი და წავიდა ტყეში. დაჭრა ხეები, დაამზადა ფიჩხი, დაუდო ურემზე და წამოიღო. გზაზე რუ შემოხვდა, ცხელი დღე იყო, კამეჩები დალექდნენ და, როგორც სჩვევიათ, წყლისაკენ გასწვიეს. ჩაწნენ რუში და სანამ მზე არ გადაიხარა, აღარ გამოვიდნენ, მერე ადგნენ და რუს ნაპირს ძოვა-ძოვით გაჰყვნენ. თვალთაგან რომ არ დაჰკარგოდნენ და შორს არ წასულიყვნენ, ქალიც უკან მიჰყვებოდა. ბოლოს, როცა ივარაუდა, ახლა კი დაძლებოდნენო, სათავე დაუარა და გზისკენ გამოაბრუნა. მობრუნებისას, რუს ვიწრო კალაპოტში კამეჩები ნაპირის კედელს გაეხასუნნენ და ჩამოანგრეს ჩამონაშალ-

ში ერთი მოზრდილი ქვევრის ცალი გვერდი გამოჩნდა. ქალს გაუკვირდა, — ამ კლდე-ღრეში ქვევრი ვის რად ჩაუგდია მიწაშიო, და ახლოს მივიდა. აქედან შეხედა, იქიდან შემოხედა და დაუწყო თხრა. იმდენი თხარა, იმდენი, რომ პირი გამოუჩინა, ახადა სარქველი და რას ხედავს! ქვევრი სულ ბაჯაღლო ოქროს ფულით არის სავსე!

დედაკაცი სიხარულისაგან კინალამ გაგიჟდა, მაგრამ ქვევრი ისეთი დიდი იყო, რომ ადგილიდან ვერ დაძრა. ბოლოს ასე გადაწყვიტა: — „წავალ, ქმარს ვეტყვი, წამოვიყვან და ორივენი მოვერევითო“. დააფარა ისევ სარქველი ქვევრს, შეაბა კამეჩები ურემში და სახლისაკენ სულ სირბილით გამოირეკა. ურემი საჩქაროდ გადმოცალა ეზოში, შევიდა შინ და ქმარს ახარა:

— ერთ კლდეში ოქროთი სავსე ქვევრი ვიპოვე, ადექი, წავიყვანოთ ურემი და ის ქვევრი შინ მოვიტანოთ.

ქმარმა ზარმაცად დაამთქნარა და მიუგო:

— ღმერთს თუ უნდა, იმ ოქროს ისეც მომცემსო.

ცოლი ახლაც ბევრს ეჩივინა, ემუდარა, ერხუბა კიდევ, მაგრამ ქმარი ადგილიდან ვერ გაატოკა. არა და — არა! თუ ღმერთს უნდა, ისეც მომცემსო. — შედგა ამ სიტყვაზე და ფეხი აღარ მოიცვალა.

რალას იზამდა ცოლი? ადგა და ისევ იმ მეზობელთან წავიდა, ვისგანაც ხარურემი ინათხოვრა, და საიდუმლო გაანდო, ასე და ასეა საქმე, წამოდი, მიშველე ჩამოტანა და შუაზე გავიყოთო. მეზობელი საკამაოდ გაქნილი და ხარბი კაცი იყო, მაშინვე მოიფიქრა, როგორ უნდა მოქცეულიყო, რომ ნაპოვნი ოქრო სულ თვითონ დარჩენოდა, და მეცხვარის ცოლს უთხრა:

— აბა შენ რაღად გაწვალო, პოვნა შენია, ჩამოტანა ჩემი იყოს და ბარიბარში ვიქნებით. როგორც კი შელამდება, მართოკა წავალ, ჩამოვიტან და გავინაწილოთო.

— კარგიო, — უთხრა მეცხვარის ცოლმა.

შელამდა თუ არა, მეზობელმა ურემზე ორი ცარიელი ტომარა შეაგდო და მეცხვარის ცოლისაგან მინიშნებული კლდი საკენ გასწია. მივიდა, გადმოიღო ოქროს ფულებით სავსე ქვევრი და ტომრებში გადაცალა, ცარიელი ქვევრი გველ-

ბაყაყებით გაავსო და ისიც ურემზე დაუდო. სოფელში რომ ჩამოვიდა, ჯერ თავის ეზოში შეიყვანა ურემი და ტომრები გადმოაწყო, ხოლო გველ-ბაყაყებით სავსე ქვევრი მეცხვარის ცოლს ჩაუტანა. თავი ისე მოაჩვენა, ვითომ ძალიან გაჯავრებული იყო, ქალს ლანძღვა-გინება დაუწყო:

— შე ასეთ-ისეთო, რატომ მომატყუე ამ ხნის კაცი და ტყუილად მაწვალე. აჰა, შენი ქვევრი და ოქროები სულ შენი იყოსო — და ქვევრი ჭიშკარში მოაპირქვევა.

ქალს ძალიან დასწყდა გული, რომ ოქროების ნაცვლად ხელთ გველ-ბაყაყები შერჩა, მაგრამ რაღას იზამდა, ისევ ქმართან შევიდა და ჩხუბი დაუწყო:

— შე ოხერო, შენი უნიათობით ოქროები ხომ დავკარგეთ და დავკარგეთ, ადე, ცხვარს მიხედე, იმას მაინც ნულარ დავკარგავთო. — მაგრამ ქმარმა ისევ დაუდევრად უპასუხა:

— თუ ღმერთს უნდა, ისეც მომცემსო.

ხარბმა მეზობელმა კი, რაკი ხელთ ოქროები იგდო, ახლა ცხვრის დასაკუთრებაც მოინდომა. დაიქირავა მაშინვე მწყემსები, წაასხა მთაში, მოაგროვებინა მეცხვარის დაფანტული ფარები და სულ სხვა მხარეს გაარეკვინა. საბოლოოდ ცხვარიც და ოქროც ხარბსა და წამგლეჯ მეზობელს დარჩა და კარგადაც გამდიდრდა, მეცხვარე კი დღესაც ტახტზე გორავს და გაიძახის: — თუ ღმერთს უნდა, ისეც მომცემსო, მაგრამ ღმერთს ჯერაც არაფერი მიუცია.

ჭირი — იქა, ლხინი — აქა,

ქატო — იქა, ფქვილი — აქა.





## მდიდარი და ღარიბი

იყო და არა იყო რა, ქვეყნად სამოთხეზე უკეთესი რა უნდა იყოს. მაგრამ ღმერთიც, ეს დალოცვილი, სამოთხის კარს თურმე მხოლოდ მდიდრებისათვის აღებს, ღარიბ-ღატაკს კი მარტო იმედსა და მოლოდინს უტოვებს. ჰოდა, იყო ერთი საწყალი კაცი, ძალიან რომ გაუჭირდა ცხოვრება, ადგა და ერთ მდიდარ მებატონეს დაუდგა მოჯამაგირედ. მდიდარი კი აბა ისე როგორ იქნებოდა, თუ საწყალ კაცს სულს არ ამოხდიდა. რაკი შეიტყო მდიდარმა მოჯამაგირის გაჭირვება, საქმე გაუორკეცა — მუშაობით კლავდა და მაძლრისად არც პურს აჭმევდა. საწყალი კაცი კარგად ხედავდა თავის გასაჭირს, მაგრამ არას ამბობდა, ყველაფერს ითმენდა, თავისდ ცოდვა საიქიოს მოეკითხებო, ინუგეშებდა თავს და ბატონს ერთგულად ემსახურებოდა.

ჯერ წელიწადიც არ გასულიყო, რომ ზედმეტი ტანჯვა-შიმშილისაგან ეს საწყალი კაცი მოკვდა, ქელეხში მდიდარმა უზომოდ ბევრი ჭამა, დაემართა კუჭის ანთება და ისიც მოჯამაგირის კვალს გაჰყვა.

მიდის მოჯამაგირე საიქიოსკენ და წამოეწია ბატონიც.

— „ჰო, — თქვა მოჯამაგირემ გულში, — ახლა კი მოეკითხება ჩემი ცოდვა და გავსწორდებით“.

იარეს, იარეს და მიადგნენ საიქიოს კარიბჭეს. კარებში ორი გუშაგი იდგა. გუშაგებმა მოჯამაგირეს შეუტიეს, — სადა ხარ აქამდე, რა ხანია გელითო, და კისერში მაგრად წაუთაქეს. მოჯამაგირემ იფიქრა, მე, ალალ-მართალს, რაკი ასე მკაცრად მომექცნენ, ჩემს ბატონს ალბათ სულს ამოხდიან ცემითო, მაგრამ, თქვენც არ მომიკვდეთ, გუშაგებმა

ძვირფას ქურქში გამოწყობილი და მორთულ-მოკაზმული ბატონი რომ დაინახეს, განზე მიდგნენ და კარებში რიდიტა და მოწიწებით გაატარეს.

„ეგ არაფერია. — ინუგეშა კვლავ თავი მოჯამაგირემ, — მალე ღვთის კარზე მივალთ და უფლის სამართალს ველარსად გაექცევთ“.

იარეს, იარეს და ბოლოს მივიდნენ უფლის საბრძანებელში. ღმერთს აქეთ-იქიდან ანგელოზები ედგნენ, თვითონ ოქროს სკამზე იჯდა, თეთრი წვერი მუხლებზე ეფინა, ხელში ოქროს სასწორი ეჭირა და სამართალს არიგებდა. „ახლა კი მეშველებათ“, თქვა მოჯამაგირემ გულში და ქუდმოხდილი წარუდგა უფლის სამართალს.

უფალმა სასწორი ასწია და მოჯამაგირეს უთხრა:

— აბა, დაწვრილებით მოგვიყვი, რა ცოდვები გაქვს ჩადენილიო?

— მე ქვეყნად არაფერი ცოდვა არ მიქნია, — მოახსენა მოჯამაგირემ თავდაკერით, — სულ მადლს ვთესავდი, ან ვინ მომაცლიდა ცოდვის ჩასადენად, ნამოჯამაგირალი და ნატანჯ-ნაბეგვი კაცი ვარო.

— კეთილი და პატიოსანი, — თქვა ღმერთმა და ხელი ფაფუკ წვერზე ჩამოისვა, — ახლა ეს გვითხარი, ეკლესიაში თუ დადიოდით?

— მე ეკლესიაში ვინ გამიშვებდა, — უთხრა მოჯამაგირემ, — აგე ჩემი ბატონი აქა დგას, ეგ ისეთი ავი კაცია, რომ ეკლესიაში წასასვლელად კი არა, პურის საჭმელადაც არ მაცლიდაო.

— სანთლებს მაინც თუ ანთებდიო? — ჰკითხა ღმერთმა.

— არაო, — მიუგო მოჯამაგირემ, — მე სანთლის საყიდ ფულს ვინ მომაშავებდაო.

— არც მღვდლისთვის გიკოცნია ხელზეო?

— არა, ეკლესიაში არ მივლია და მღვდლისთვის სად უნდა მეკოცნათ?!

— შენ იქნებ კვირა-უქმე დღეებშიც მუშაობდიო? — ჰკითხა ღმერთმა.

— ვმუშაობდი და ეგრეო, — აღიარა მოჯამაგირემ, — ჩემს ბატონს არც ერთ კვირა დღეს არ დავუსვენებიაო.

— მაშ, შენ დიდი ცოდვიანი კაცი ყოფილხარ, — უთხრა ღმერთმა, — დიდი ცოდვა აგიკიდნია და პირდაპირ ჯოჯოხეთში უნდა მოხვდეო. — და ანგელოზებს უბრძანა: — წაიყვანეთ ეს კაცი და შიგ შუა ჯოჯოხეთში შეაგდეო.

ანგელოზები ეცნენ ამ საწყალ კაცს და დაუპირეს ჯოჯოხეთში შეგდება. კაცი შეეხვეწა:

— ცოტა ხანს მაცალეთ, აგე იმ ჩემი ბატონის გასამართლება მომასმენინეთ და მერე რაც გინდათ, ის მიყავითო. ანგელოზები დათანხმდნენ და შორიასლო დააყენეს.

ღმერთმა ისევ ასწია სასწორი და ბატონს ჰკითხა:

— აბა, გვითხარი, რა ცოდვა გიქნიაო?

— მე არაფერი ცოდვა არ მიქნიაო, — უთხრა ბატონმა. — უცოდველი ვარ ბატკანივითაო.

— მაშ, ეკლესიაში დადიოდით?

— როგორ არა, ყოველ კვირა ვაწირვინებდიო.

— კარგია, კარგია, — სასუ უფრო გაეზადრა ღმერთს, — სანთლებს თუ ანთებდიო?

— აბა, ეკლესიაში ისე როგორ მივიდოდი, რომ სანთელი არ შეყიდა, სულ ჩემსიგრძე სანთლებს ვანთებდიო.

— მღვდლისათვის თუ გიკოცნია ხელზეო?

— ხელზედაც მიკოცნია და პატივიც დიდი მიცია, ყოველ კვირა ვპატივებდი და საკლავს ვუკლავდიო.

საწყალ კაცს უნდოდა. ეყვირა, — ტყუის, არ დაუჯეროთო, მაგრამ ანგელოზებმა ხმა არ ამოაღებინეს. ღმერთმა კი ისევ მდიდარს ჰკითხა:

— კვირა-უქმე დღეებში ხომ არ გიმუშავიაო?

— იდიდოს, ღმერთო, შენი სახელი, — მიუგო ბატონმა, — საქმის დღეს არაფერს ვაკეთებდი, სულ მხართეძოზე ვიწექი და კვირა-უქმე დღეებში რა ჭირი მამუშავებდაო.


— აი, ბარაქალა შენს კაცობასო, — შეაქო ღმერთმა, — ნამდვილი უცოდველი შენა ყოფილხარ და სამოთხეც შენ გეკუთვნისო, და ანგელოზებს უბრძანა, — ამ კაცს ფართოდ გაუღეთ სამოთხის კარი და ოქროს ტახტზე დააბრძანეთო.

მაშინ კი ველარ მოითმინა მოჯამაგირემ, დაალო პირი, გადმოიხედა სააქაოსკენ და ხმამაღლა დაიყვირა:

— ხალხნო, ცოცხლად დარჩენილნო, ჩემსავით დარბ-  
ლატაკნო და გაჭირვებულებო, არ დაუჯეროთ არც მღვდელს,  
არც მოხელეს, საწყალი, ალალ-მართალი კაცისათვის აქ  
არც სამოთხე ყოფილა და არც განსასვენებელი, მანდაც და  
აქაც ყველა სიკეთე ცოდვილთა და სხვათა ოფლით გამდიდ-  
რებულთა კუთვნილება ყოფილაო!

ჭირი — იქა, ლხინი — აქა,  
ქატო — იქა, ფქვილი — აქა.





## ა რ ჩ ე ვ ა ნ ი

იყო და არა იყო რა, ქვეყნად ვინ არ ყოფილა და მათ შორის ერთი დასანაშენი ბიჭიც იყო. ამ ბიჭს სამი ლამაზი ქალი ეძლეოდა: ერთი ქალიშვილი იყო, მეორე ქმარნაყოლი და მესამე ქვრივი, მაგრამ სამივენი ერთმანეთზე უკეთესები იყვნენ და ბიჭმა აღარ იცოდა, რომელი ემჯობინებინა. იმდენი იფიქრა, იმდენი, რომ ფიქრისაგან მთლად ჩამოხშა. ბოლოს, ძალიან რომ გაუჭირდა, ადგა და მამას მიმართა, — მამი, ასე და ასეა ჩემი საქმე და მიზრჩიე რამე, რა ვქნაო?

— აბა მე რა გირჩიო, შვილო, — უთხრა მამამ, — წადი სოლომონ ბრძენთან და რასაც გეტყვის, ის გააკეთეო.

წავიდა ბიჭი სოლომონ ბრძენთან. მიდის, მიდის და გზაზე ხალხი დაინახა: უხარმაზარი მორისათვის თავ-ბოლოში ოთხ-ოთხი კამეჩი მოებათ და ერთი გნისი ედგათ, მაგრამ მორს ადგილიდან ვერ ატოკებდნენ, რადგან ერთი ყვეარი ერთ მხარეს ეწეოდა, მეორე — მეორე მხარეს. უყურა ბიჭმა, უყურა, მერე მივიდა ახლოს და უთხრა:

— კაცო, ეს რანაირი ხალხი ყოფილხართ, ან თქვენ რაზე იტანჯებით და ან საქონელს რად აწვალვებთ, ახსენით ერთ-ერთი თავიდან ყვეარი, მეორე ყვეარს მიუბით, ერთ მხარეს გააწევენეთ და მორიც დაიძვრებაო.

— წადი, წადი, გზას ეწიე, — დატუქსეს კაცებმა, — ეს კამეჩებიც, მორიცა და ჩვენც სოლომონ ბრძენისა ვართ და საქმისაც თვითონ ვიცითო.

„ან ეს ხალხია გიჟი, ან თვითონ სოლომონ ბრძენიო“, —



თქვა ბიჭმა გულში, მაგრამ გზა მაინც განაგრძო, — ვნახო მაინც, როგორი კაცია ეს სოლომონი ან მე რა რჩევა-ღარი-გებას მომცემსო.

გაიარა კიდევ ცოტა მანძილი და ხედავს: ერთ კაცს ზურგზე უზარმაზარი შეშის გუდურა წამოუკიდნია, ეწევა და ადგილიდან ძვრას ვერ უშვრება, მაგრამ მოკლების მაგიერ უფრო იმატებს და იმატებს შეშას. ბიჭს გაუკვირდა და ჰკითხა:

— კაცო, ხომ ხედავ, რაც ზურგზე გკიდია, იმასაც ვერ ვრევი და სხვას რაღად იმატებო?

— საქმე ნახე, საქმე, — უთხრა კაცმა, — მე სოლომონ ბრძენის კაცი ვარ და თვითონ ვიცი, რასაც ვაკეთებო.

რა უნდა ეთქვა ბიჭს, უსიტყვოდ გაშორდა და გზა განაგრძო. ცოტა მანძილი რომ გაიარა, ახლა მესამე კაცს გადაეყარა: კედელთან იდგა და კედელს ცერცვს აყრიდა. ცერცვი ძირს ცვიოდა. ბიჭს გულმა არ მოუთმინა და უთხრა:

— ტყუილად ეწვალე, ძმობილო, კედელზე ცერცვის გაჩერება თვალთ არაეის უნახავსო.

იმ კაცმაც ადრე შესვედრილი კაცებივით შეუტია:

— მამაშენს არ უთქვამს შენთვის, სხვის საქმეში არ ჩაერიო? ეს საქმე სოლომონ ბრძენისაგან მაქვს დავალებული და იმან უფრო არ იცის, რა როგორ უნდა გაკეთდესო?

რაღა ეთქმოდა ბიჭს, გაუდგა თავის გზას, მაგრამ ქალაქში შესვლამდე ერთ საკვირველებას კიდევ გადაეყარა: ერთ ადგილას ოთხი თვალი წისქვილი ბრუნავდა, ოთხი კაცი ტომრებით ხელუკუღმა ყრიდა ხვიმირებში საფქვავს, მაგრამ ფქვილი არსად ჩანდა. ბიჭს ძალიან გაუკვირდა და ჰკითხა:

— კაცებო, ეს როგორ არის, რომ ხორბალს ტომრებით აყრით და ალაში კი ნამცეცი ფქვილი არ ჩადისო?

— წისქვილიც და ჩვენც სოლომონ ბრძენისანი ვართ და როგორც გვიბრძანა, ისე ვაკეთებთო. გაიარე, ღმერთი გიშველის, საქმეს ნუ გვაცდენო!

წავიდა იქიდანაც ბიჭი და მივიდა ქალაქში, კითხვა-კითხვით მიაგნო სოლომონ ბრძენის სახლს, შევიდა და თავისი გასაჭირი მოახსენა:

— სამი ქალი მეძლევა; სამივე ერთმანეთზე უკეთესი, ერთი ქალიშვილია, მეორე ქმარზე ხელაღებული და მესამე ქვრივი. არ ვიცი, რომელი შევირთო, თვითონ ვერ გადამიწყვეტია და რჩევისათვის თქვენთან მოვედიო.

— ეზოში ჩემი უმცროსი შვილი თამაშობს, ჩადი და მაგის პასუხს ის მოგცემსო, — უთხრა სოლომონ ბრძენმა.

ჩამოვიდა ბიჭი ძირს. სოლომონ ბრძენის შვილი ჯოხცხენაზე იჯდა და დახტოდა. ბიჭი მივიდა და თავისი გასაჭირი შესწივლა. ბავშვმა ჯოხცხენა შეაჩერა და უთხრა:

— ქალიშვილს ახსნა არ უნდა, ქმარნაყოლთან ცხენი ქერსა სჭამს და ქვრივთან სამნი იქნებითო.

ბიჭმა ამ პასუხისა ვერაფერი გაიგო, დაბრუნდა ისევ სოლომონ ბრძენთან და სთხოვა, — ამისხსენიო. სოლომონ ბრძენმა ბიჭი დასვა და უთხრა:

— ქალიშვილ ქალს ახსნა არ უნდა, ეს იმას ნიშნავს, რომ გამოუცდელია და შენი ერთგული იქნება. ქმარნაყოლ ქალს გამოცდილება აქვს და, თუ ძალიან კარგად არ მოექცევი, არ მოითმენს და როგორც პირველი ქმარი გაეყარა, შენც ისე გაგეცლება, ნაქვრივალს კი ყოველ წუთს მოაგონდება თავისი ქმარი, მეტადრე, თუ შენზე უკეთესი ჰყავდა და ამიტომ სამნი იქნებითო.

— მაშ ცოლად რომელი მოვიყვანო? — ჰკითხა ბიჭმა.

— ეგ თვითონ უნდა გადაწყვიტო, — უთხრა სოლომონ ბრძენმა, — მე ჩემი ვალი მოვიხადე, გითხარი, რომელთან რა მოგელის და ახლა რომელიც გიჯობს, ის მოიყვანეო.

ბიჭმა ბოლოს გზადაგზა ნანახი ხალხის უცნაური საქციელის ახსნაც სთხოვა. სოლომონ ბრძენმა ესეც აუხსნა:

— ყველაფერი, რაც ნახე, ადამიანთა უგუნურების ნიშნებიანო, — უთხრა, — უშველებელ მორს თავ-ბოლოში რომ ყვევარ-ყვევარი კამეჩი ება და აქეთ-იქით ეწეოდნენ, ეს ადამიანთა შეუთანხმებლობას გამოხატავს, ადამიანები როცა თავ-თავისკენ იქაჩებიან, მათი საქმე წინ არასოდეს წავა. ტყეში კაცი შეშის გუდურაზე კიდევ შეშებს იმატებდა, — ეს სინარბისა და გაუმაძღრობის ნიშანია, ხოლო სადაც სინარბე და გაუმაძღრობაა, იქ სიკეთე არავის დაეყრება. კედელს ცერცვს რომ აყრიდა კაცი, ეს უგუნურობის ნიშანია:

ადამიანები ბევრს უსარგებლო რამეს აკეთებენ და საჭიროს და სასარგებლოს კი ივიწყებენ. წისკვილის თითო ხვიშირში ოთხი კაცი რომ ხელუკუღმა სობაღს აყრიდა და ფქვილი კი არსად ჩანდა, ეს იმას ნიშნავს, რომ თუ კაცი ხელმართლად არ შრომობს, მისი ნაშრომი ნაყოფს არასოდეს გამოიტანსო, — უთხრა სოლომონ ბრძენმა და დაუმატა, — ყველაფერი ეს იმიტომ დაგანახვე, რომ ახალგაზრდა კაცი ხარ და შენი ჯანი და სიცოცხლე ფუჭ საქმეს არ შეაღიო: გვერდით როცა ამხანაგი გახლავს, შეუთანხმდი და თავის ქეიფზე ნუ გაიწევ, ზედმეტხ ნურასოდეს დახარბდები, უსარგებლო საქმეს ნუ შეეჭიდები და ოჯახში ხელუკუღმართს ნურაფერს შეიტანო.

ბიჭმა მადლობა გადაუხადა სოლომონ ბრძენს და წამოვიდა, მაგრამ ის კი არავინ იცის, რომელი ქალი მოიყვანა ცოლად და თავისი ცხოვრება როგორ მოაწყო.

ჭირი — იქა, ლხინი — აქა,

ქატო — იქა, ფქვილი — აქა.





## ბევრის მაქეზარი ცოტასაც დაპარბავს

იყო და არა იყო რა, იყო ერთი წუწკი და ფულსდახარბე ბული დედაკაცი. სოფელში ისე არავის რამეს ასესხებდა ან არ ისესხებდა, რომ მერე შარი არ მოედო და ერთი აურზაური არ აეტყესა. სოფელში ყველა ერიდებოდა მასთან საქმის დაჭერას, მაგრამ მეზობლობას სად წაუხვალ!

ერთხელ ამ სოფლის ნაპირას ერთი შორი გზიდან მომავალი სოვდაგარი დაბანაკდა ღამის გასათევად. ჩამოხადა ნავაჭრი საქონელი ჯორ-აქლემებს და სოფელში ბიჭი გაგზავნა სანოვავის საყიდლად. ბიჭმა იარა კარდაკარ და ბოლოს ამ წუწკ დედაკაცს მიადგა. დედაკაცმა უთხრა, კვერცხის მეტი არაფერი მაქვს და, თუ გინდა, მოგყიდიო.

ბიჭმა მოახარშვინა ერთ აბაზად ღირებული ოცი ცალი კვერცხი, გამოართვა და წავიდა. ფულის გადახდას მეორე დილისათვის შეჰპირდა, — დილას აქეთ ჩამოვივლით და მოგცემთო.

სოვდაგარმა და მისმა მსლებლებმა ივანშემეს ამ ერთი აბაზის კვერცხით და დაიძინეს. მეორე დღე ავდრიანი გათენდა, სოვდაგარმა საჩქაროდ დაასაპალნებინა ჯორ-აქლემები და გაუდგა გზას.

კარგა შორი გზა რომ გაიარა, მაშინლა გაახსენდა, რომ კვერცხების საფასურის გადახდა დავიწყებოდა.

ბევრიც იდარდა, მაგრამ რაღას იზამდა — გზიდან უკან რომ ვერ დაბრუნდებოდა. ბოლოს ასე გადაწყვიტა: მოდი, ამ ერთ აბაზს ჩემს ფულში არ გავრევ — ცალკე ვასარგებლებ და, რასაც მოიგებს, სულ იმ დედაკაცს მივცემო. ერთი აბა-

ზი ცალკე შეაგდო სარგებელზე და ხუთ წელიწადში ას თუმნად აქცია.

მეექვსე წელიწადს სოვდაგარი ისევ გაემგზავრა შორეულ ქვეყანაში სავაჭროდ. როცა ივაჭრა და უკან გამობრუნდა, ღამის გასათევად ისევ იმ სოფლის პირას დაბანაკდა. ჩვეულებრივ ჩამოსადა ბარგი ჯორ-აქლემებს და მოვალე დედაკაცის მოსანახად ისევ ბიჭები გაგზავნა. — წადით, მონახეთ და გადაეცით, რომ სოვდაგარს სურს შენი ნახვა ძლიერ საჭირო საქმეზე და, თუ შეიძლება, წამობრძანდითო.

ბიჭები წავიდნენ, კითხვა-კითხვით მიაგნეს ამ დედაკაცის სახლს და გადასცეს სოვდაგარის დანაბარები. დედაკაცი გაჰყვა და მივიდა სოვდაგართან. სოვდაგარმა უთხრა:

— დედილო, მე ამ ხუთი წლის წინათ აქ ღამე გავათიე, მაშინ შენგან ჩემი ბიჭის ხელით ერთი აბაზის კვერცხი ვიყიდე, მაგრამ ისე წავედი, რომ ფულის გადახდა დამავიწყდა. ის აბაზი მას აქეთ შენს სახელზე ვასარგებლე და ას თუმნად ვაქციე, ახლა ის ასი თუმანი მოვიტანე და მიიღეო.

დედაკაცს აბაზის კვერცხი აღარც კი ასსოვდა, მაგრამ სოვდაგარმა ამდენი ფული რომ შეაძლია, უცბად სიხარბემ შეიპყრო და, მეტის გამორჩენის მიზნით, მაღლობის მაკიერ ლანძღვა-გინება დაუწყო:

— შე ასეთ-ისეთო, ხუთი წელიწადი შენს ძებნაში გავატარე და ახლა გინდა ას თუმნად დაიძვინო თავი? ვერ მოგართვეს: იმ კვერცხებზე კრუნს დავსკამდი და წიწილებს გამოვაჩეკინებდი, წიწილები დაიზრდებოდნენ, მერე კიდევ და კიდევ, ასე და ამნაირად ამ ხუთ წელიწადში მათი მოგება ხუთას თუმანს მიაღწევდა. ახლა თუ გინდა, ნებით მომეცი ეგ ხუთასი თუმანი, არადა, სასამართლოში გირივლებ და სამართლის ძალით აგანაზღაურებინებო.

სოვდაგარი ამას არ მოელოდა, არ ეგონა თუ მაღლი მატლად ექცეოდა და გაკვირვებული პირლია დარჩა.

— არა გრცხვენია, დედი, — უთხრა დედაკაცს, — მე სიკეთე გიყავი და სამაგიეროს ასე მიხდიო?

— რა სიკეთეც მიყავი, იქ გამორჩდებაო, — უთხრა დედაკაცმა, შეიტანა სასამართლოში საჩივარი და სოვდაგარიც დააბარებინა.

რალა უნდა ექნა სოვდაგარს, ადგა და წავიდა. მოსამართლემ უთხრა, — ასე და ასე ყოფილა საქმე, ამ დედაკაცისაგან ხუთი წლის წინ აბაზის კვერცხები წაგიღია და ფული კი არ გადაგიხდია, მათი ღირებულება ხუთ წელიწადში ხუთას თუმანს შეადგენს, ასლა ეს დედაკაცი ამ თანხას გირივის და უნდა გადაუხადო.

დალონდა სოვდაგარი და მოსამართლეს სთხოვა, ერთი საათის ვადა მომეცი მოსაფიქრებლადო. მოსამართლე და თანხმდა. გამოვიდა სოვდაგარი და იხედება აქეთ-იქით, — იქნებ ვინმე გამოჩნდეს და რჩევა ვკითხო. უცბად ერთი ხნიერი კაცი დაინახა — თოვლივით ფაფუკი წვერი გულზე ეფინა, ხელში არგანი ეჭირა და ნელა მოაბიჯებდა. სოვდაგარი წინ გადაუდგა და სთხოვა:

— მამილო, ერთი რამე უნდა გკითხოთ და, თუ შეიძლება, მომისმინეთო.

— ბრძანე, შვილო, — უთხრა კაცმა და ჯოხზე დაეყრდნო.

სოვდაგარმა უამბო თავისი გასაჭირი და სთხოვა, მიჩიეთ, რა ვქნა, როგორ მოვიქცეო.

— ის კვერცხები მოხარშული იყო თუ უმით? — ჰკითხა კაცმა.

— მოხარშულიო, — მიუგო სოვდაგარმა.

— მაშ, შვილო, ასე ჰქენი, — უთხრა კაცმა, — წადი, იყიდე აბაზის მოხარშული კვერცხები და მოსამართლეს წინ დაულაგე, თან უთხარი ამ კვერცხებიდან წიწილები გამოაჩეკინეთ და მე ხუთასი თუმნის მაგიერ ათასს მივცემ-თქო.

მოხუცი კაცის რჩევა სოვდაგარს ჭკუაში დაუჯდა. მართლაც იყიდა ერთი აბაზის მოხარშული კვერცხები, დააწყო თეფშზე და დაუდგა წინ მოსამართლეს.

— ეს კვერცხები რისთვის მოიტანეო? — ჰკითხა მოსამართლემ.

სოვდაგარმა მდაბლად დაუკრა თავი და მოახსენა:

— ბატონო მოსამართლეო, ამ კვერცხებიდან წიწილები გამოაჩეკინეთ და ჩემს მოვალეს ხუთასი თუმნის მაგიერად ათას თუმანს გადაუხდითო.

— მოსახარშია თუ მოხარშულიო? — ჰკითხა მოსამართ-  
ლემ.

— მოხარშულია, ჩემო ბატონო, — მიუგო სოვდაგარმა.

— მე რე მოხარშული კვერცხიდან ვის გაუგონია წი-  
წილების გამოჩეკვამ? — უთხრა მოსამართლემ.

— თქვე დალოცვილო, თუ არავის გაუგონია, მამ რა-  
ტომ მისჯით ხუთასი თუმნის გადასდასო? — ჰკითხა სოვ-  
დაგარმა.

— როგორ, შენ მოხარშული კვერცხები იყიდე ამისაგა-  
ნო? — გაიკვირვა მოსამართლემ.

— თვითონვე თქვას თუ ვტყუივარო, — მიუგო სოვდა-  
გარმა.

მოსამართლე ასლა დედაკაცს შეეკითხა:

— შენი კვერცხები, რომლებიც ამ კაცს მიჰყიდე, უში  
იყო თუ მოხარშულიო?

— მოხარშულიო, — აღიარა დედაკაცმა.

მაშინ კი მიხვდა მოსამართლე დედაკაცის ვერაგობას და  
ასეთი განაჩენი გამოიტანა: იყიდოს სოვდაგარმა ერთი აბა-  
ზის მოხარშული კვერცხი, ჩააბაროს დედაკაცს და საჩივარი  
ამით დასრულდესო.

დედაკაცმა ბევრი იუარა და ბევრიც იწივლ-იკივლა, მაგ-  
რამ სამართალთან ველარაფერს გახდა და ხუთასი თუმნის  
მაძებარმა ასი თუმანიც დაკარგა. ტყუილად კი არ ამბობს  
ანდაზა: ბევრის მაძებარი ცოტასაც დაკარგავსო.

ჭირი — იქა, ლხინი — აქა,

ქატო — იქა, ფქვილი — აქა:





## სამი ძმა და ქოსატყუილა

იყო და არა იყო რა, იყო სამი ძმა. ძმები კარგა მდიდრები იყვნენ და თვალ-მარგალიტიც ბლომადა ჰქონდათ: იმათი მამა რომ კვდებოდა, შვილებს თურმე ანდერძად დაუბარა: შვილებო, ყველასთან ივაჭრეთ, ყველას ენდეთ, ქოსას კი ნურასოდეს ნუ ენდობითო.

გავიდა ხანი, ძმებს არაფრისათვის არ დასჭირვებიათ ქალაქში წასვლა. ბოლოს გაუთავდათ მარილი. ადგა უფროსი ძმა, შეკაზმა ჯორი, აჰკიდა თვალ-მარგალიტი და წავიდა ქალაქში სავაჭროდ. გზაზე ერთი ქოსატყუილა შემოხვდა.

— გამარჯობაო!

— გაგიმარჯოსო!

— სად მიდიხარო?

— ქალაქში. თვალ-მარგალიტი მიმაქვს გასაყიდად, მარილი შემოგვაკლდა და უნდა ვიყიდოო.

— მე მომყიდეო, — უთხრა ქოსამ, — მარილსაც მოგცემ და ყველაფერს, რაცა გჭირდებაო.

— არაო, — უთხრა უფროსმა ძმამ, — მამაჩემმა ანდერძად დაგვიბარა, ქოსებს ავადაც მოერიდეთ და კარგადაც ნურც არას იყიდით იმისაგან და ნურც არას მიჰყიდითო.

— კარგო, — უთხრა ქოსამ, — ძალით რა იქნებაო.

გაიქცა მაშინვე, ირბინა, ირბინა, გზა გადაუჭრა და ისევ წინ შემოხვდა.

— გამარჯობა, სად მიდიხარო? — მიესალმა ისევ.

— თვალ-მარგალიტი მიმაქვს ქალაქში, უნდა გაყვიდო და მარილი ვიყიდოო, — უთხრა ჯორის პატრონმა.



— მე მომყიდეო, — უთხრა ქოსამ.

— ვერაო, — იუარა უფროსმა ძმამ, — მამის ანდერძს ვერ გავტყუებო. — მაშ სადღა უნდა გაჰყიდო — უთხრა ქოსამ, — მთელი ეს ქვეყანა ქოსებიითაა სავსეო.

დაიჯერა ჯორის პატრონმა:

— კარგი, მოგყიდი, რაც იქნება, იქნებაო.

ქოსამ უთხრა:

— მოდი, ერთ გამოცანას გეტყვი, თუ ის გამოიცან, ერთი აქლემი მყავს, იმას დაგიტვირთავ თვალ-მარგალიტით, ეგ შენი ჯორიც წამოიყვანე, მარილსაც მოგცემ და წადიო. თუ ვერა და შენი ჯორი თავისი თვალ-მარგალიტით მე დამრჩებაო.

— ძალიან კარგიო, — გაუხარდა ჯორის პატრონს.

— ერთ კაცს ერთი ციცარი ჰყავდა. ეს ციცარი დილით წავიდოდა ტყეში, კვერცხებს დადებდა და საღამოზე ციცარიცა და კვერცხიც კაკანით მოლიოდნენ შინაო, — უთხრა ქოსამ.

— რა უნდა იყოსო? — იფიქრა ჯორის პატრონმა, მაგრამ აბა, რას მოიფიქრებდა? წააგო ჯორიცა და თვალ-მარგალიტიც. წავიდა დაღონებული შინ. ქოსამ ძლივს წაუტყუა ერთი გირვანქა მარილი და მისცა. მივიდა შინ უფროსი ძმა და მიიტანა ერთი გირვანქა მარილი.

რამდენ ხანს ეყოფოდათ ის ერთი გირვანქა მარილი. ჰოდა, ახლა შუათანა ძმა ადგა, აჰკიდა ჯორს თვალ-მარგალიტი და წავიდა ქალაქში მარილის საყიდლად. გზაზე იმასაც ისევ ის ქოსა შემოეყარა.

— გამარჯობა შენო, — უთხრა ქოსამ შუათანა ძმას.

— გაგიმარჯოსო!

— სად მიხვალო?

— ქალაქში, თვალ-მარგალიტი უნდა გავყიდო და მარილი ვიყიდოო.

— მე მომყიდე ეგ თვალ-მარგალიტიო, — უთხრა ქოსამ მარილსაც მოგცემ და ყველაფერსაცაო.

— არაო, — უთხრა შუათანა ძმამ, — მამის ანდერძს ვერ გავტყუებ. ქოსას არც არაფერს მივყიდი და არც იმისაგან ვიყიდი რამესო.

ქოსა გაბრუნდა, ირბინა, ირბინა, გზა გადაუჭრა, წინ დაუხვდა და უთხრა:

— რა მიგაქვს, მომყიდეო.

— ქოსებს არაფერს არ მივყიდიო, — უთხრა შუათანა ძმამ.

— მაშ, ვილას უნდა მიყიდეო, როცა ამქვეყანაზე ქოსების მკეტი არავეინ არისო, — მიუგო ქოსამ.

დაუჯერა ჯორის პატრონმა და გაურიგდა.

— ერთ გამოცანას გეტყვი, თუ გამოიცან, ეგ ჯორიც შენი იყოს, ერთ აქლემსაც მოგცემ და მარილსაც ზედ დაგიმატებო. თუ ვერ გამოიცან, შენი ჯორი თავისი საპალნით მე დამრჩებაო.

— ძალიან კარგიო, — დათანხმდა ჯორის პატრონი.

— ერთი ციცარი მყავდა, დილით წავიდოდა ტყეში, კვერცხს დადებდა, სალამოზე კი კვერცხიცა და ციცარიც კაპანით მოდიოდნენ შინაო.

ვერ გამოიცნო შუათანა ძმამ. დარჩა ქოსას დატვირთული ჯორი. წაუტეხა ერთი გირვანქა მარილი და გაისტუმრა. მივიდა შინ შუათანა ძმა და მიიტანა ერთი ბეწო მარტილი.

ასლა უმცროსმა ძმამ აპკიდა ჯორს თვალ-მარგალიტი, წაიყვანა და წავიდა ქალაქში. იმ ადგილს რომ ჩაუარა, სადაც იმისი ძმები ქოსამ გაძარცვა, ქოსა გადაუდგა წინ და მიესალმა. ვაჟმა სალმითვე უპასუხა.

— სად მიხვალ, სად მიგაქვს ეგ თვალ-მარგალიტით? — პკითხა ქოსამ.

უმცროსმა ძმამაც ისევე უპასუხა, როგორც უფროსმა ძმებმა. თან დიდი უარი დაატანა, ქოსას არაფერს მივყიდიო. მიანება თავი ქოსამ, შემოურბინა სოფელს, გზა გადაუჭრა და წინ დაუხვდა.

— მომყიდე ეგ შენი თვალ-მარგალიტით, — უთხრა ვაჟს.

— არ მოგყიდი, ქოსა ხარო, — უპასუხა ვაჟმა.

— მაშ, ვისლა უნდა მიყიდეო, აქ სულ ქოსებიო, — მიუგო ქოსამ.

— კარგი, მოგყიდიო, — უთხრა ვაჟმა.

— ერთ გამოცანას გეცევი, თუ გამოიცან, წენი ჯორიც შენ დაგრჩება, შენი თვალ-მარგალიტიც, მარილსაც მიგეცემ და ერთ აქლემსაც დავუმატებო, — უთხრა ქოსამ.

— კარგო, — დასთანხმდა ვაჟი.

— ერთი ციცარი მყავდა, დილით წავიდოდა ტყეში, კვერცხს დადებდა, ხალამოზე კი კვერცხიცა და ციცარიც კაკანით მოდიოდნენ შინაო, — უთხრა ქოსამ.

— ეგ იმ ტყუილსა ჰგავს, ერთმა კაცმა რომ მიაძხო: ერთი ძირი ფუტკარი დგმია. ყოველდღე ჩამოუვლიდა და თვლიდა თურმე. ერთიც ვნასოთ, ერთსელ რომ დაუთვლია, ერთი ფუტკარი დაკლებია, მაშინვე წასულა საქებნელად; უვლია, უვლია და ზღვის გაღმა უპოვია, ფესი მოსტესოდა, გზაში დარჩენილიყო, მომკედარიყო და ყვავ-ყორნები წიწკნიდნენ თურმეო, — შიუგო ვაჟმა.

ქოსას მეტი რა ღონე ჰქონდა — აქლემისათვის თვალ-მარგალიტი უნდა აეკიდა და მიეცა.

— ჩემო აქლემო, ეს კაცი რომ წაგიყვანს, ამა და ამ ადგილას ლაფია და იქ ჩაწეკი. რაც უნდა გცემოს, არ ადგე, თუ ღმერთი გაგიწყრა და ადეკი, სახლში რომ მიგიყვანს და ბოსელში შეყვანას დაგიპირებს, გაიბერე, კარებში ველარ შეეტევი, თავს დაგანებებს და ჩემთან გამოიქეცო.

წაიყვანა უმცროსმა ძმამ აქლემიცა და თავისი ჯორიცა შუა გზაზე ერთ დიდ ტლაპოს წააწყდნენ. მივიდა აქლემი და ჩაწვა შიგ. უმცროსმა ძმამ ხმაც არ გასცა, ღობეზე ჩამოჯდა, ამოიღო ჩიბუხი და გააბოლა.

ამ დროს ერთმა კაცმა გამოიარა.

— გამარჯობაო! — უთხრა უმცროს ძმას.

— გაგიმარჯოსო! — უპასუხა ვაჟმა.

— სადაური ხარ და სად მიხვალო? — ჰკითხა მგზავრმა.

— მეც არ ვიცი, სად მივალო, — მიუგო აქლემის პატრონმა და თან დასძინა: — ერთი შენს გასარებას, ჩვენ სოფელზე ჩაიარე, ჩემი ცოლი ნახე და უთხარი: ახლა რომ ვაჟი გაგვიჩნდა, როცა გაიზრდება, უთხრას ხარები შეაბას უღელში და წამოვიდეს, ტალახში აქლემი დამიწვა და წავიდოთ-თქო.

აქლემმა იფიქრა, სანამ იმის ცოლს ვაჟი გაეზრდება და

აქ მოვა, მე ხომ შიმშილით მოვკვდი და ჩავლბი ამ ტალახ  
შიო. — წამოხტა და გაუდგა გზას. გაპყვა თან უმცროსი  
ძმაც. გზაზე აქლემი აღარსად დაწოლილა, სახლში მივიდნენ  
და მიიტანეს თვალ-მარგალიტი. ბოსელში რომ უნდა შეეყ-  
ვანა, აქლემი უცბად გაიბერა და ველარ შეეცია კარში. ახედ-  
დახედა ვაჟმა აქლემს და დაუძახა ძმებს:

— ბიჭებო, ერთი ცული მომიტანეთ, აქლემი განიერი მო-  
ვიდა, გვერდები უნდა ჩამოვათალოო!

აქლემმა იფიქრა: ეს ისეთი გიჟი ვინმე ყოფილა, რომ  
არც კი გაუკვირდება, გვერდებს მართლა ჩამომათლისო,  
დაიფუყა და შევიდა ბოსელში. მოხადეს აქლემს თვალ-მარ-  
გალიტი, ათი ჯორის საპალნე გამოვიდოდა, იმდენი იყო.

თავისი ჯორიც თვითონ დარჩა უმცროს ძმას, მარტივ  
მიიტანა და ძმების ზარალიც აინაზღაურა.

ჭირი — იქა, ლხინი — აქა,

ქატო — იქა, ფქვილი — აქა.





## ნ ა ც ა რ ქ ე ქ ი ა

იყო და არა იყო რა, ღვთის უკეთესი რა იქნებოდა, იყო ერთი ზარმაცი და მუქთამჭამელი კაცი. ცისმარე დღე კერასთან იჯდა, ხელში ჩხირი ეჭირა და ნაცარს ქექავდა. სწორედ ამიტომ ხალხმა ნაცარქექია შეარქვა.

ნაცარქექიას კარგი მეოჯახე ძმები ჰყავდა.

— კაცო, სულ რომ ნაცარს უზიხარ, ან ჭამა არ გინდა, ან სმა, — ეუბნებოდნენ ყოველდღე. — აღექი, გაისარჯე, იქეთ მიდექ, აქეთ მოდექ და ოჯახში რამე შემოიტანე, თორემ იცოდე, ჩვენ შენი რჩენის თავი აღარა გვაქვს და სახლიდან გაგაგდებთო.

მაგრამ ნაცარქექია ძმების მუქარას ერთ ყურში რომ შეუშვებდა, მეორიდან გამოუშვებდა. მობეზრდათ ძმებს მისი უსაქმურობა და ერთ მშვენიერ დღეს მართლაც გააგდეს სახლიდან. ერთი ხბოს გუდა ნაცრით გაუტენეს და ზურგზე აკკიდეს, ხელში ჩხირი მისცეს, ჩოხის კალთაში საეზლად ჭყინტი ყველი გამოუსვიეს და გაისტუმრეს. თან გააფრთხილეს:

— ამ ჩვენი ქვეყნის ფარგლებს გაშორდი, აქ არ დაგიშვებთ, თორემ ცოცხალს არ გაგიშვებთო.

— კარგი თო, — უთხრა ნაცარქექიამ, — ვეცდები, რაც შეიძლება შორს წავიდეო, — და გაუდგა გზას.

ბევრი იარა თუ ცოტა იარა, ბოლოს ერთ უშველებელ მდინარეს მიადგა. შეეშინდა ნაცარქექიას წყალში გასვლისა და მდინარის პირას მხართემოზე წამოწვა, — იქნებ ვინმემ გამოიაროს და გამიყვანოსო.

თურმე ეს მდინარეცა და ადგილიც ცხრაათავიანი დევის სამფლობელო ყოფილა. სადამო ხანზე მოადგა დევი გაღმა ნაპირიდან მდინარეს და დაუწყო წყალს ხერება.

დაინახა ნაცარქექიამ და ხაფი ხმით გასძახა:

— ჰეი, რომელი ხარ, ახლავე აქ გამოდი, მხარზე შემის-  
გი და გაღმა გამიყვანე, ფესის დასველება მეზარებაო!

დევს ძალიან გაუკვირდა, აქ ჩემი შიშით გოლიათებს ვერ  
გაუვლია და ეს ჭინჭრაქა რის პატრონია, ამას რომ მიბე-  
დავსო, და გამოსძახა: — ვინა ხარ, რა სულიერი ხარ და მაგ  
თავსედობას როგორ მიბედავო?

ნაცარქექია დიდი მკვეხარა და ბაქიბუქაც იყო. შორიდან  
ისეთ ტრაბახს ატეხდა, რომ კაცს გორის მდრეკავი ეგონე-  
ბოდა. შემოიყარა დონიჯი და გასძახა დევს:

— აი, შე ქინქლავ, შენაი ერთი არ მებრალეობდე და გი-  
ჩვენებდი, ვინცა ვარ. მაგრამ იცოდე, თუ ჭკუით არ იქნები,  
ასეთ თავსედობას მეორედ აღარ გაპატიებ. შე ბრიყვო და  
ბაბაყურო, საბირიკა არ გაგიგონია, ნაცრიყლაპია, ჩხირით  
მებრძოლი? მე სწორედ ისა ვარო! არ მინდა ქვეყანა დავაქ-  
ციო, თორემ ისეთი ღონე მაქვს, დედამიწას რომ ხელი მო-  
ვავლო, ზეცას შევტყორცნი და ნაცარ-მტვრად ვაქცევო. თუ  
გინდა შევეჯიბროთ და ერთმანეთი ღონეში გამოვცადოთ!  
შენ მანდ აიღე ქვა, მე აქ ავიღებ, მოვუჭიროთ ორივემ ხელი  
და, ვინც წვენი გაადინოს, გამარჯვებულნიც ის იყოსო.

აიღო დევმა ქვა, მოუჭირა ხელი და სულ დაფშვნა, მაგ-  
რამ წვენი ვერ გამოადინა.

დაინახა ნაცარქექია, ვითომ ქვას ვიღებო, ამოიღო ჩო-  
ხის კალთაში გამოხვეული ჭყინტი ყველი, მოუჭირა ხელი  
და წვენი სულ წურწურით გაადინა.

გაუკვირდა დევს, ეს ვინა ყოფილაო?!

— აბა, ახლა სირბილში გამოვცადოთ ერთმანეთი, —  
გასძახა ნაცარქექიამ, — გავიქცეთ რიყეზე — შენ მაქეთ, მე  
აქეთ — და ვინც მეტ მტვერსა და კორიანტელს აადენს, ბი-  
ჭიც ის იყოს და ქუდიც იმას ეხუროსო!

გაძუნძულდა დევი იქითა ნაპირზე და რიყის ქვებს სულ  
ხრაშახრუში დააწყებინა, მაგრამ მტვერი ვერა და ვერ აადი-  
ნა. რიყის ქვებს ან რა მტვერი აუვიდოდა!

ნაცარქექიამ კი მოიხსნა ნაცრიანი გუდა, გაკუნკულდა ნაპირზე და თან ნაცარი მიმოაბნია. ისეთი მტვერი და კორიანტელი ააყენა, რომ დევმა ველარაფერი ვერ დაინახა.

შეშინდა დევი, ეს მართლაც უძლეველი კაცი ჩანსო, — თქვა გულში და გაღმა ნაპირზე გავიდა, მორჩილად ეახლა ნაცარქექიას, დაიღუნა და მსარზე შეისვა. შუა მდინარეში რომ შევიდნენ, დევმა, როგორც იქნა, გაუბედა და ჰკითხა:

— ბატონო, საბირიკავ, ნაცრიულაპიავ და ჩხირით მებრძოლო, ასეთი ღონის პატრონი, როგორღაც მეტისმეტად მსუბუქი მეჩვენებო.

— რაო? მსუბუქიო? ხა, ხა, ხა, — გადაიხარხარა ნაცარქექიამ, — შენ რომ ჩემი სიმძიმის ამბავი იცოდე, მაგ სისულელეს აღარ წამოროშავდი. რაკი დედამიწას ჩემი ტარება უჭირს, ცაში ღმერთს უჩინარი თოკით ვუჭერივარ, თორემ ჩემი სიმძიმე ქვესკნელში ჩავიტანდაო.

დევს ეჭვი შეეპარა, ამ ერთ ციცქნას ისეთი რა სიმძიმე უნდა ჰქონდესო, და ნაცარქექიას მოკრძალებით უთხრა:

— აბა, ასძახე ღმერთს, რომ სულ ოდნავ შეგიშვას ხელი, მინდა შენი სიმძიმე გავიგოო.

— ღმერთო მწყალობელო, აბა, ცოტათი მოუშვი თოკი, რომ ამ ბრიყვსა და აყეიას ენა დავამოკლებინოო! — ასძახა ცისკენ ნაცარქექიამ, ჩუმად კი ამოიღო შვინდის გამხმარი ჩხირი და დევს კისერში დააჭირა. დევს ეგონა, მთელი ზეცა ზედ დამაწვაო და შეშინებულმა, მართლა ქვესკნელში არ ჩამაძვრინოსო, ხვეწნა დაუწყო:

— შენი ჭირიმე, უთხარი ღმერთს, ისევ აგწიოს, თორემ მეტის ატანა აღარ შემიძლიაო.

მოაშორა ნაცარქექიამ ჩხირი და დევიც ისევ გაიმართა წელში.

— ახლა ხომ დარწმუნდი, რა სიმძიმეც მქონიაო? — ჰკითხა ნაცარქექიამ:

— მართლაც მეტისმეტად მძიმე ყოფილხარო, — უპასუხა დევმა და შინ მიიპატიჟა. ნაცარქექია ტახტზე დასვა, თვითონ კერა გაახურა და ცომი მოზილა. გააკეთა ერთი უშველებელი ხმიადი, ჩადო კეცში, ცუცხლს მიუფიცხა და ნაცარქექიას უთხრა:

— თუ უკაცრავად არ ვიყო, ამ პურზე თვალი გეჭიროს, რომ არ დაიწვას, მე ტყეში წავალ და სავახშმოდ ბარემ ნანადირევსაც მოვიტანო.

დევი წავიდა. ხშიადს ცალი გვერდი რომ დაებრაწა, ნაცარქექიამ იფიქრა, ახლა კი გადაბრუნების დროაო, და დაუწყო საკეცით წვალება. წვალება-წვალებაში კეცი წამოიქცა და ნაცარქექია ქვეშ მოიყოლა. წვალობს ნაცარქექია, აფხარკალებს ფეხებს, სენეშის, ოსრაუს, ქშინაუს, მაგრამ კეცს ბერას ვერ უშვრება. დაიღალა და შეშინებულმა ფერიც დაკარგა.

მოვიდა დევი და, ნაცარქექია რომ ამ ყოფაში დაინახა, გაკვირვებულმა ჰკითხა, — რა დაგმართნიაო?

— რა უნდა დამმართნოდა? — შეუტია ნაცარქექიამ, — ცოტათი მუცელი წამომტკივდა და ცხელი კეცი დავიდევი. ახლა უკვე კარგად ვარ, მოდი და ამაცალეო.

დევმა კეცი ააცალა და ნაცარქექიაც წამოდგა.

ხშიადი გამოცხვა, ნანადირევიც მოხარშეს და ვახშამს შენოუსხდნენ. პურის ჭამაში დევმა ცხვირი დააცემინა და სტუმარი ჭერში შეაგდო. გულგახეთილი ნაცარქექია თავსეს წაეჭიდა და ფხარკალი დაიწყო.

— მანდ რას აკეთებო? — ჰკითხა დევმა.

— რას ვაკეთებ და, აი ეს წკებლა უნდა გამოვიღო და გვერდები აგიჭრელო, როგორ გაბედე ჩემთან ცხვირის დაცემინებაო?

— ღმერთო, ეს ვინა ყოფილა?! — გაოცდა დევი, — ამოდენა თავზე მე ძლივს ბოძებზე ავიტანე და ეს კი წკებლას ეძახის და გამომძრობას უპირებსო. აქაურობას თუ არ გავეცალე, ერთხელაც იქნება, რამეს მიშარებს და ცოცხალი ვეღარ გადავურჩებიო. — დაჰკრა დევმა ფეხი და ცხრა მთას იქით გადაიხვეწა.

დევის სახლ-კარი და სიმდიდრე მთლიანად ნაცარქექიას ღარჩა, წავიდა, ძმებიც იქ მიიყვანა და უთხრა:

— ძმებო, მუქთახრობისათვის თქვენ სახლიდან გამაგდეთ, სულ იმას მაყვედრიდით, ოჯახში არაფერი შემოგაქვსო. აი, ახლა ჩემს წილად ეს სახლ-კარი და ქონება-ცხოვრე-




ბა შემომბაქვს, ეს ყველაფერი თქვენთვის დამითმია, ოღონდ  
ლუკმაპურს ნულარ დამაყვედრით და ნურც ნაცრის ქექვას  
დამიშლითო.

გადაულოცა ნაცარქექიამ დევის სახლი და სიმდიდრე  
ქმებს, თვითონ კი აიღო ჩხირი, მიუჯდა კერას და ისევ  
ნაცრის ქექვა დაიწყო.

ჭირი — იქა, ლხინი — აქა,  
ქატო — იქა, ფქვილი — აქა.





## ალალი ორი შაური

იყო და არა იყო რა, ამ ქვეყნად სიღარიბის მეტი რა ყოფილა, ჰოდა, სხვათა მრავალთა შორის, ერთი ღარიბი ცოლქმარი იყო. ჰყავდათ ბევრი შვილები და ლუკმაპური კი არ მოეპოვებოდათ. ცოლიც და ქმარიც წელებზე ფეხს იდგამდნენ, მაგრამ ალალი შრომით ბევრს ვერაფერს შოულობდნენ და შვილები მშიერ-ტიტვლები დაუდიოდათ.

ერთ დღეს ქმარმა უთხრა ცოლს:

— მოდი, წავალ და ვინმეს მოჯამაგირედ დავუდგები, იქნებ ბედმა გამიღიმოს და ამ გაჭირვებას თავი დავაღწიოთო.

ადგა და წავიდა. იარა, იარა და ერთ უცხო სახელმწიფოში გავიდა. შევიდა ქალაქში და ერთ მდიდარ სოვდაგართან მივიდა. უთხრა, — სამი წლით მოჯამაგირედ მინდა დავდგე და ხომ არ ამიყვანო?

— აგიყვანო, — უთხრა სოვდაგარმა, — მაგრამ მითხარი, წელიწადში ალალი ორი შაური მოგცე, თუ არამი ასი თუმანიო?

კაცი დაფიქრდა: აქამდე ნაარშალი არაფერი შემიტანია სახლში, ახლა ამ სიბერისას სულს ხომ არ წავიწყებდო, და სოვდაგარს უთხრა: — ალალი ორი შაური მიჩვენიაო.

მორიგდნენ და დადგა გლეხი მოჯამაგირედ. სამი წელიწადი ერთგულად და მუყაითად ემსახურა, ყავლი რომ გაუთავდა, მივიდა თავის ბატონთან და უთხრა:

— ანგარიში გამისწორე და წავალო.

გამოუტანა სოვდაგარმა დაპირებული ალალი ექვსი შაური და მისცა.

— წადი, ძმაო, და ხეირი ნახეო.

წამოვიდა კაცი დაღონებული. სამიწელიწადი ექვს შაურად ვიმსახურე, რა მივუტანო ჩემს ცოლ-შვილს ამ ფულით, რა პასუსი გავცეო. ბოლოს გადაწყვიტა, მოდი, ბარემ ერთ წელიწადს კიდევ ვიმსახურებ, იქნებ რამე ავიღო და შინ ხელცარიელი არ დავბრუნდეო.

იარა, იარა და გავიდა კიდევ ერთ უცხო სახელმწიფოში. შევიდა ქალაქში და დაინახა, რომ ერთ დუქანთან უშველებელი რიგი დგას. მივიდა და იკითხა, რა იყიდებაო?

— სარკეებს ყიდდიან ალალ ორ შაურადო, — მიუგო ხალხმა.

გლუხს სარკე არ ენახა, იფიქრა, რაკი ამდენი ხალხი დგას, ალბათ ძვირფასი რაღაც იქნებაო, და ერთი ცალი იყიდა. ჩაიდო უბეში და გაუდგა გზას. იარა, იარა და კიდევ გადავიდა უცხო ქვეყანაში, ჩაიარა ქალაქში და იქაც დაინახა უზარმაზარი რიგი. მივიდა და იკითხა, რა იყიდებაო?

— კატებს ჰყიდდიან ალალ ორ შაურადო, — მიუგო ხალხმა.

— ეს ამდენი ხალხი რომ დგას, ჩანს სასარგებლო რაღაც იქნებაო, — იფიქრა კაცმა, ჩადგა რიგში და ერთი კატა იყიდა. ჩაისვა ეს კატაც უბეში და გაუდგა გზას. იარა, იარა და გავიდა კიდევ უცხო ქვეყანაში. იქაც დაათვალიერა ქალაქი, ერთ დუქანთან ორი იმხელა რიგი დაინახა. მივიდა და იკითხა, რას ყიდდიანო?

— ჭკუას ყიდდიან ალალ ორ შაურადო, — მიუგო ხალხმა.

კაცს კიდევ ჰქონდა ორი შაური. იფიქრა, ამ ფულით ჩემს ცოლ-შვილს მაინც ვერაფერს ვარგებ, ჭკუა კი შეიძლება გამომადგესო. შევიდა დუქანში და მისცა დარჩენილი ორი შაური დუქნის პატრონს. დუქნის პატრონმა უთხრა:

— ვინც რა უნდა შეგეკითხოს, შენ ყველაფერზე კარგი უთხარი და ჭკვიანი იქნებიო.

გამოვიდა კაცი დუქნიდან და გაუდგა გზას უარესად დაღონებული. მიდის და ფიქრობს: სამი წელიწადი ექვს შაურად ვიმსახურე, აღებული ფულით სარკე, კატა და ჭკუა

შევიძინე. მაგრამ ჩემს გაჭირვებულ ცოლ-შვილს ვერაფერი ვარგეო.

ამ ფიქრით გავიდა კიდევ ერთ უცხო სახელმწიფოში. შვიდა ქალაქში და რას ხედავს: მთელი ქალაქი მოედანზე შეკრებილა და გულამოსკვნით ტირის. კაცი მივიდა და იკითხა, რა გატირებთო?

ხალსმა უთხრა:

— უწყლობა გვატირებს. ქალაქში ერთი ჭა გვქონდა და წყალი იქიდან ამოგვქონდა, ასლა რალაც ძალა დაეპატრონა და რამდენიც ჩავგზავნეთ, უკან აღარავინ დაბრუნებულაო.

კაცმა იფიქრა: მაინც თავმოსაკლავად მაქვს საქმე. მოდი, ჩავალ, იქნება ამოვუტანო წყალი და ამ ხალსმაც თითო-ორორი გროში მიწყალობოსო.

— თუ მაგ სიკეთეს გვიზამ, სულსაც არ დავიშურებთო, — შეღალადა ხალსმა.

— მომიტანეთ ჭურჭელიო! — დაიძახა კაცმა.

მოუტანეს ჭურჭელი, ჩავიდა კაცი ჭაში და ფსკერზე ერთი ბებერი დედაკაცი დახვდა. დედაბერმა ორი ახალგაზრდა ქალი აჩვენა, ერთი ლამაზი, მეორე კი ზანგივით გონჯი და ჰკითხა:

— შვილო, ამ ორ ქალში რომელი უფრო ლამაზიაო?

დედაბერი წყლის ქაჯი იყო. ლამაზი ქალი გერი იყო მისი, გონჯი კი — შვილი. კაცმა ჯერ სიმართლის თქმა დააპირა, მაგრამ უცბად ჭკუის გამყიდველის ნათქვამი მოაგონდა, ვინც რა უნდა შეგეკითხოს, ყველაფერზე კარგი უთხარიო, და დედაბერს ასე უპასუხა:

— ორივენი თანაბრად ლამაზები და კარგები არიანო.

— აი, შენ კი გაიხარე, შვილო, კაცის პირით ძლივს სიმართლე არ გავიგონეო, — უთხრა დედაბერმა, აუვსო ჭურჭელი წყლით და გამოუშვა. ხალხი სიხარულით ცას ეწია, — ჰკოცნიდნენ, ესვეოდნენ, ლოცავდნენ. მერე გაიქცნენ თავიანთ ხელმწიფესთან და მოახსენეს:

— დიდებულო ხელმწიფე, ერთი უცხო ტომის კაცი მოვიდა ჩვენს ქალაქში და წყალს ჯადო ახსნაო.

დაიბარა ხელმწიფემ კაცი, მისცა ერთი აქლემი ოქროს ფული და სადილადაც მიიპატიჟა. კაცი შევიდა ხელმწიფის

სასლში. ხელმწიფემ სუფრა გააშლევინა და ორი ხმალ-  
ამოწვდილი კაცი კარებში დააყენა. კაცს გაუკვირდა და  
ჰკითხა:

— რას ნიშნავს ეს ორი ხმალშემართული გუშაგი, წესი  
გაქვთ ასეთი პურის ჭამის დროს, თუ სხვა რამ მიზეზია?

— თქმისაც კი მრცხვენია, — მიუგო ხელმწიფემ დარ-  
ცხვენით, — შარშანდელმა დიდთოვლობამ ჩემს სახელმწი-  
ფოში ისე გაამრავლა თაგვი, რომ სუფრიდან პურს გვტაცე-  
ბენ და, თუ გუშაგი არ დავაყენე, პური ვეღარ მიჭამიაო.

— დაითხოვე ეგ გუშაგები და თაგვებს მე მოეუელიო, —  
უთხრა კაცმა.

ხელმწიფემ დაითხოვა გუშაგები, თაგვებსაც ეს უნდო-  
დათ, ფხაჭა-გლეჯით შენოცხვიდნენ დარბაზში, მიესივნენ  
სუფრას, ზოგი პურს ეცა, ზოგი ჯამში ჩახტა და ყველაფერი  
ყირამალა დააყენეს.

ამ დროს ამოსვა კაცმა ციცა უბიდან, ციცა მშიერი იყო  
და ამდენი თაგვის დანახვაზე კბილები აუკაწკაწდა. გაფ-  
შიკა კუდი, გახარებულმა ერთი წამოიკნავლა, დაურია თა-  
გვებს და თვალის დასამხამების უმაღლესი მუსრი გააელო.

ხელმწიფეს იმდღემდე ციცა არ ენახა. მოეწონა ძა-  
ლიან და გლესს უთხრა, დამითმე და ერთ აქლემ ოქროს  
ფულს კიდევ მოგცემო. კაცი, რა თქმა უნდა, დათანხმდა და  
ხელმწიფემაც ნისცა ერთი აქლემი ოქროს ფული. განოვიდ-  
ნენ ეზოში, ეს კაცი უნდა გამოემშვიდობოს ხელმწიფეს და  
წავიდეს. ამ დროს სასახლიდან რაღაც წივილ-კივილი და  
ტირილის ხმა გაიგონა. კაცმა იკითხა, რა ამბაეიაო?

ხელმწიფეს ერთი მზეთუნახავი ქალი ჰყავდა, მაგრამ თა-  
ვისი სახე არასოდეს არ ენახა და ყოველდღე იმაზე ტიროდა  
და ჭირვეულობდა — ჩემი თავი დამანახვეთო. იმ ქვეყანაში  
არც სარკე იცოდნენ რა იყო, კაცი ამას მისვდა და ხელმწი-  
ფეს უთხრა, მიმიყვანეთ თქვენს ქალთან და თავის სახეს მე  
დავანახებო.

წაიყვანა ხელმწიფემ კაცი და შეიყვანა ქალის ოთახში.  
კაცმა ამოიღო უბიდან სარკე და ქალი შიგ ჩაახედა. ქალმა  
დაინახა თავისი ლამაზი სახე, სიხარულისაგან ცეკვა დაი-  
წყო, სარკე გულში ჩაიხუტა და მამას უთხრა:

— თუ აზას მიყიდი, მიყიდი, თუ არადა თავს მოვიკლავო.

ხელმწიფესაც ძალიან მოეწონა სარკე და კაცს უთხრა:


— მომყიდე და ერთ აქლემ ოქროს ფულს კიდევ მოგცემო.

კაცმა მისცა სარკე, ხელმწიფემ კიდევ დაატვირთვინა ერთი აქლემი ბაჯჯალლო ოქროს ფულით და გამოუყვანა. კაცმა ოქროს ფულკიდებული აქლემები ერთად რომ დაინახა, თავი სიზმარში ეგონა. „მართლაც, რომ ალალი ორი შაური ჯობია თურმე არამ ას თუმანსო“, — თქვა გულში, გამოირეკა აქლემები და გამოსწია თავისი სოფლისაკენ. მოვიდა ცოლ-შვილში, აიშენა ძვირფასი სასახლე, იყიდა ხელმწიფური ავეჯი და ისეთი ცხოვრება მოაწყო, რომ თავის თავს თვითონვე დანატყობდა.

ჭირი — იქა, ლსინი — აქა,

ქატო — იქა, ფქვილი — აქა.





## ჭკუა მაქვს და ფული — არა

იყო და არა იყო რა, ღვთის უკეთესი რა იქნებოდა, იყო ამქვეყნად ერთი საწყალი კაცი. დადიოდა სოფელ-სოფელ და გაიძახოდა:

— ჭკუა მაქვს და ფული — არა, ჭკუა მაქვს და ფული — არა!

გაიგონა ეს ძახილი ერთმა მდიდარმა სოვდაგარმა და იფიქრა, — მოდი, ამ კაცს ფულს მივცემ, ერთი ორას-სამასი თუმანი ვითომ არც კი მქონია, ვნახავ მაინც, თუ მართლა ჭკუა აქვს, რას გააკეთებსო.

დაიბარა ერთ დღეს სოვდაგარმა ეს კაცი, მისცა ორასი თუმანი და უთხრა:

— სოვდაგრები ამ დღეებში სავაჭროდ უნდა წავიდნენ, შენც წაჰყევი და ივაჭრე, ვნახოთ ერთი, რა ჭკუა გაქვს და ამ ფულს როგორ გამოიყენებო.

— კარგიო, — დათანხმდა კაცი.

წავიდნენ სოვდაგრები სავაჭროდ და გაჰყვა ეს საწყალი კაციც. ჯერ ხმელეთით იარეს, მერე ზღვასთან მივიდნენ. სოვდაგრებმა დაიქირავეს ხომალდები და გადაბარდნენ ზედ.

— არა, ძმებო, ზღვის სიღრმეს ვერ ვენდობიო, — თქვა საწყალმა კაცმა და ხომალდს ახლო არ გაეკარა. იყიდა ერთი პატარა ორჩხომელა, იყიდა საგულად ასი თუმნის ჩამიჩი და ჩაილაგა ნავში. სოვდაგრებმა დაცინვა დაუწყეს, ბევრ მოგებას კი მიუტან შენს აღას, მთელი ფული გამხმარ ჩამიჩიში გადაყარეო.

საწყალმა კაცმა პასუხი არ გასცა, თავისთვის ჩაიციხა და ნავი ზღვაში შეაცურა. მიცურავს ნაპირ-ნაპირ და თან ჩამინს შეექცევა, ერთ მუჭას რომ თვითონ შესჭამს, ორსა და სამს ზღვაში მოცურავე თევზებს უყრის. თევზები გაჩქარებით ყლაპავენ დაშაქრულ მარცვლებს.

— მე რომ ვჭამ, სხვებმაც ჭამონო, — ამბობდა საწყალი კაცი და უყრიდა და უყრიდა თევზებს ჩამინს.

ბოლოს თევზებმა თქვეს:

— ეს კაცი რომ ამდენ სიკეთეს გვიშვრება, მოდით, ჩვენც რაშით შევეწიოთო. ამოვიღოთ რაც ზღვის ფსკერზე თვალ-მარგალიტია და სულ ამ კეთილ კაცს გავატანოთო.

თქმა და შესრულება ერთი იყო: დაყვინთეს თევზებმა ზღვის ფსკერზე, ამოზიდეს რაც თვალ-მარგალიტი ეგულებოდათ და ჩაყარეს ნავში. იმდენი თვალ-მარგალიტი ამოუზიდეს, რომ სანამ დანიშნულ ქალაქამდე მიაღწევდა, ნავი პირთამდე გაუვსეს.

საწყალმა კაცმა იფიქრა: ეს სიმდიდრე ჩემს ამხანაგ სოფ-დაგრებს რომ დავანახო, სიწუწუკე წასძლევთ და ჩემს დაღუბლას მოინდომებენ, მოდი, ამას ისე დავმალავ, ვერაფერი შეიტყონო.

ადგა, ქალაქგარეთ საქონლის გომურებთან მივიდა და კარგა ბლომა ნეხვი იყიდა. თევზების ნაბოძარი თვალ-მარგალიტი ნეხვის გუნდებში შეფუთა და წიგად გაახმო. ერთი იმდენი ცარიელი გუნდები გააკეთა და ისიც გაახმო. ამასობაში სოფდაგრებიც დაბრუნდნენ ძვირფასი საქონლით დატვირთული ჯორ-აქლემებით და კაცს ისევ დაცინვა დაუწყეს:

— შე ოხერო, ნეხვი აქედან რომ არ წაგეღო, განა ჩვენს ქალაქში ცოტაა, აღას რა პასუხი უნდა გასცეო.

— მე ეს მომეწონა და ეს ვიყიდე, თავისი საქმისა ყველამ თვითონ იცისო, — თქვა საწყალმა კაცმა, იყიდა იმანაც ჯორ-აქლემები, აჰკიდა წივიანი ტომრები და გაუდგნენ გზას.

გზაში ერთ მაღალ უღელტეხილზე დაულამდათ. ღამე თოვლ-ქარბუქი ატყდა და ისე აცვიდა, რომ ქვა სკდებოდა, საწყალმა კაცმა ამოალაგა ცარიელი წივის გუნდები, დაან-



თო ცეცხლი, შემოუმწკრია ირგვლივ თავისი ჯორ-აქლემები და თვითონაც ცეცხლს მიეფიცა. სოვდაგრებმა ყინვას ველარ გაუძლეს, თან ჯორ-აქლემების დარდიც ჰქონდათ, სიცივემ არ გაგვიწყვიტოს და ჩვენი მოგება აქ არ დაგვკრჩესო, და საწყალ კაცს შეეხვეწნენ, — ცოტა წივა გვასესხვო.

კაცმა უარი უთხრა: — ჩემს საქონელს ვწვავ და თქვენც თქვენი დაწვითო.

რა უნდა ექნათ საცოდავ სოვდაგრებს? მართლა საქონელს სომ ვერ დასწვავდნენ, არადა, სიცივით დაიხოცებოდნენ. ადგნენ და, რაკი სხვა საშუელი არა გააჩნდათ რა, ისევ საწყალ კაცს შეეხვეწნენ, — ოღონდ დაგვითმე და რასაც ითხოვ, მოგცემთო.

— რამდენი გინდათ? — ჰკითხა კაცმა.

— ორი საპალნე გვეყოფაო, — მიუგეს სოვდაგრებმა.

— კარგიო, დაგიღობოთ, — უთხრა ბოლოს წივის პატრონმა, — ოღონდ ხელწერილი მომეცით, რომ ჩემგან ისესხეთ ორი საპალნე ისეთივე წივა, როგორიც ჯორ-აქლემებს მიკიდია, და ქალაქში ჩასვლისას ისეთსავე წივას დამიბრუნებთო.

სოვდაგრებმა, რა თქმა უნდა, სისარულით მისცეს ხელწერილი და გამოართვეს ორი საპალნე წივა. გაათენეს ის ღამე მშვიდობიანად, აჰკიდეს დილით ქარავანს თავთავიანთი ბარგი და გასწიეს ქალაქისაკენ. წივის პატრონიც იმათთან ერთად წავიდა. ქალაქს რომ მიუახლოვდნენ, სოვდაგრებმა კაცები გაგზავნეს და საქონლისათვის მდიდრული ქარვასლები დაიქირავეს. წივის პატრონის სოვდაგარს კი შეუთვალეს: — შენს ჭკვიან კაცს ნეხვი მოაქეს და სადმე ერთი მიგდებული გომური დაასვედრეო.

კეთილმა სოვდაგარმა სოვდაგრების დაცინვას ყური არ ათსოვა და თავის ნოქარს ყველაზე საუკეთესო ქარვასლა დაუქირავა. ნოქარმაც თამამად მიაყენა წივით დატვირთული ჯორ-აქლემები ქარვასლას და მსახურებს საპალნეების ჩამოხდა უბრძანა. მეპატრონე სოვდაგარს წივიანი საპალნეების დანახვაზე გული დასწყდა, მაგრამ წყენა არ დაიმჩნია. პირიქით, თავის ნოქარს კარგი სადილი გაუმზადა და შინ მიიწვია. კაცმა აიღო ორი წივის გუნდა და პატრონს გაჰყვა.

სუფრას ომთ იემოუსადიეო. გახსნა ეს წივის გუნდები და მაგიდაზე სულ ბაჯალლო თვალ-მარგალიტი და ოქროები გადმოყარა.

— შენი მოცემული ფულით მე აი ასეთი საქონელი შევიძინე. გზაში ორი საპალნე იმ სოვდაგრებსაც ვასესხე. ახლა ისინი მოცემას აღარ აპირებენ, წავიდეთ ხელმწიფესთან, ვიჩივლოთ და ვალი ავინაზლაუროთო.

ჭკვიანმა კაცმა იცოდა, რომ სოვდაგრები თვალ-მარგალიტით სავსე წივას ვერსაიდან მოიტანდნენ და ვალის გადახდაზე უარს იტყოდნენ, ამიტომ ურჩია თავის პატრონს წინასწარვე ხელმწიფესთან ჩივილი.

მართლაც მეორე დღესვე გასწიეს ხელმწიფესთან. საწყალმა კაცმა ხელმწიფესაც მიართვა საჩუქრად თვალ-მარგალიტით სავსე წივის გუნდა და შესჩივლა:

— დიდებულო ხელმწიფე, მე და თქვენი ქალაქის სოვდაგრები ერთად ვიყავით სავაჭროდ წასული. აქეთობას გზაზე თოვლმა მოგვისწრო, სოვდაგრებმა ცუცხლის დასანთებად ჩემგან ორი საპალნე ასეთი წივა ისესხეს და ახლა ვალს არ მიბრუნებენო.

— რა საბუთი გაქვსო? — ჰკითხა ხელმწიფემ.

კაცმა სოვდაგრების ხელწერილი აჩვენა და დასძინა:

— როგორც მანდ წერია, ჩამოსვლისთანავე უნდა დაებრუნებიანთ ორი საპალნე ასეთივე წივა, მაგრამ ახლა აღარაფერს იძლევიანო.

ხელმწიფემ მაშინვე დაიბარა სოვდაგრები და უთხრა:

— ამ კაცისაგან თქვენ გზაში ორი საპალნე წივა გისესხნიათ და ხელწერილიც მიგიციათ, რომ ჩამოსვლისთანავე დაუბრუნებდით, მაგრამ ახლა თურმე აღარაფერს აძლევთ, რაშია საქმეთ?

სოვდაგრებმა სიცილი ატეხეს და მოახსენეს:

— დიდებულო ხელმწიფე, მაგაზე ჩივილი რად უნდოდა, ნახვს დღესვე თუნდა ათმაგად გადავუხდითო.

— ეს კაცი ნახვს კი არა, აი ამისთანა წივას გთხოვთო, — უთხრა ხელმწიფემ და აჩვენა თვალმარგალიტით სავსე წივა.

სოვდაგრებმა შორს დაიჭირეს: — ჩვენ მაგნაირი წივა არ  
კვისესხნია, მაგას ეგ ერთი წივა ჰქონია თვალ-მარგალი-  
ტით სავსე და ახლა უნდა, რომ ჩვენ ორი საპალნე მივცეთო.

მაშინ ადგა ეს საწყალი კაცი და მოახსენა ხელმწიფეს:  
— დიდებულო ხელმწიფე, თქვენი კაცები გამოგვაყო-  
ლეთ, სათითაოდ დავამტვრევ ყველა წივას და თუ ერთი  
საინც ცარიელი აღმოჩნდება, თავი მომკვეთეთო.

გააყოლა ხელმწიფემ თავისი კაცები, დაამტვრევინა რაც  
წივა ჰქონდა კაცს საპალნეებში და ყველა თვალ-მარგალი-  
ტით გატენილი აღმოჩნდა. რაღა ეთქმოდათ საცოდავ სოვ-  
დაგრებს, მოიტანეს რაც რამ ნავაჭრი ჰქონდათ და სულ იმ  
კაცს ჩააბარეს.

ჭირი — იქა, ლსინი — აქა,

ქატო — იქა, ფქვილი — აქა.





## ჭირვეული ხელმწიფე

იყო და არა იყო რა, ღვთის უკეთესი რა უნდა ყოფილიყო, იყო ერთი მეტისმეტად ჭირვეული და ავგუნება ხელმწიფე. რაღაც უცნაურს აიკვიატებდა და სანამ არ აისრულებდა, არც მოისვენებდა.

ერთსელ დაიბარა თავისი ერთგული ვეზირი, დაანახვა ცეცხლზე შემოდგმული ლობიოს ქოთანი და ჰკითხა:

— ეს ლობიოს ქოთანი რომ ჩუხჩუსებს, რას ამბობს, უნდა ამიხსნა, თორემ თავს წაგაგდებინებო.

შეწუსდა ვეზირი. იცოდა, მისი მბრძანებელი რა ჭკუისაც ბრძანდებოდა და იზისაგან კარგს არაფერს მოელოდა. თვითონ გონიერი კაცი იყო და იფიქრა, ვაითუ ის არა ვთქვა, რაც ხელმწიფეს აქვს გულში და რაღა მეშველებათ. მოდი, ჯერ სხვებსაც ვკითხავ და საბოლოო პასუხს მერე გაეცემო. მართლაც, ადგა, აიღო ჯოსი, გადაიკიდა მხარზე საგზალი და წავიდა. იარა, იარა და ბოლოს გზაზე ერთ კაცს გადაეყარა. კაცმა „გამარჯობა“ უთხრა, ვეზირმაც „გაგიმარჯოსო“ უპასუხა და წავიდნენ ერთად. კარგა გზა რომ გაიარეს, დაიღალნენ. ვეზირმა უთხრა თანამგზავრს:

— მოდი, ან შენ ამიკიდე, ან მე აგიკიდებ, თორემ ასე სიარული, ვსედავ, ორივეს გაგვიჭირდაო.

თანამგზავრმა გაოცებით შესედა:

— შე დალოცვილო, საკუთარი თავის ტარება გვიძიმს და ერთმანეთი როგორღა ავიკიდოთო?!

ვეზირმა ამაზე აღარაფერი უთხრა, თანამგზავრმაც უჩუმრად განაგრძო გზა. თანდათან უფრო დაიღალნენ. გზის პირას ტყე შესვდათ. ვეზირმა კიდევ უთხრა:

— შედი ტყეში და ორი ფეხი გამოიტანე, ერთი ჩემთვის, ერთი შენთვის და სამ-სამი ფეხით უფრო მსუბუქად ვიფლითო.

თანამგზავრმა ისევ გაოცებით მიუგო:

— რას ამბობ, კაცო, ღმერთმა ორ-ორი ფეხი გამოგვიყოლა და ამას უნდა დავჯერდეთ, ეგეც არ იყოს, ტყეში ფეხებს რა უნდაო?!

ვეზირმა აღარაფერი თქვა. თანამგზავრიც გაჩუმდა. გაიარეს კიდევ რამდენიმე მანძილი და გზაზე სამკალად შემოსული პურის ყანა დახვდათ. ყანაა ისეთი, რომ ნულა იტყვი ვეზირმა ჰკითხა:

— რას იტყვი, ეს ყანა მომკილია თუ მოსამკელიო?

თანამგზავრმა სიცილი დაიწყო:

— განა თვითონ ვერა ხედავ, რომ მოსამკალია და რაღას მეკითხებიო?

ვეზირმა კიდევ არაფერი უთხრა და განაგრძო გზა. გაჰყვა თანამგზავრიც. გაიარეს კიდევ კარგა მანძილი და გზაზე მკვდარი შემოხვდათ, ხალხი მიასვენებს.

— როგორ გგონია, ის კაცი მართლა მკვდარია, თუ ცოცხალიო? — ჰკითხა ვეზირმა.

ახლა კი ველარ მოითმინა თანამგზავრმა და ხმანალა შეუტია:

— კაცო, ან შენ თვითონა ხარ სულელი, ან მე გგონივარ, კაცი კუბოში წევს, სასაფლაოსკენ მიასვენებენ და ცოცხალი როგორღა იქნებაო?!

ვეზირი ისევ გაჩუმდა. ბოლოს მიაღწიეს თანამგზავრის სოფელს და დაულამდათ კიდევ. თანამგზავრმა ვეზირი შინ მიიპატიჟა. ვეზირიც დათანხმდა. თანამგზავრს ერთი გასათხოვარი გოგო ჰყოლოდა. მამა-შვილმა სტუმარს კარგა უმასპინძლეს და ცალკე ოთახში მოასვენეს. სტუმარი რომ გავიდა, ქალმა მამას მისი ვინაობა გამოჰკითხა, მამამ უთხრა:

— ხელმწიფის ვეზირი ყოფილა, მაგრამ გზაზე ისეთ რაღაცეებს მეუბნებოდა და მეკითხებოდა, რომ უსათუოდ სულელი უნდა იყოსო.

— მაინც რას გეუბნებოდაო? — ჰკითხა ქალმა.

— გზაზე დავიღალეთ და იმის მაგიერ, რომ დაგვესვენა, მითხრა: მოდი, ან შენ ამიკიდე, ან მე აგიკიდებ, თორემ ასე სიარული ორივეს გვიჭირსო.

— მერე შენ რა უპასუხეო? — ჰკითხა გოგომ.

— რაც იყო, ის უპასუსე: ცარიელები ფეხებს ძლივს მივათრევთ და ერთმანეთი როგორღა უნდა ვატაროთ-მეთქიო.

— არა, მამა, შენ შემცდარხარ, — უთხრა ქალმა, — იმას მართლა ზურგზე აკიდება კი არ სდომებია. მაგ არაკით ის უთქვამს შენთვის, რომ ან შენ თქვი ზღაპარი, ან მე ვიტყვი და დაღლილობას ვეღარ ვიგრძნობთო.

— ვიარეთ, ვიარეთ და, რა თქმა უნდა, უფრო დავიღალეთ, — განაგრძო მამამ, — დაღლილები ერთ ტყესთან მივედით, ვეზირმა იქ მითხრა, შედი ტყეში, თითო ფეხი გამოიტანე და სამ-სამი ფეხით უფრო ხალვათად ვივლითო.

— მერე, მამი, შენ რა პასუხი მიეციო? — ჰკითხა ქალიშვილმა,

— რა პასუხს მივცემდი, ღმერთს ორფეხიანები გავუჩინვართ და ეს უნდა ვიკმაროთ-მეთქი. ეგეც არ იყო, ტყეში ფეხებს ვინ არიგებსო.

— ვერ გითქვამს, მამი, კარგად, — გაამტყუნა ქალმა მამა, — ეგრე არ უნდა გეთქვა. შენთვის მაგ ნათქვამით იმას ის უნიშნებია, რომ შედი ტყეში, თითო ფეხი გამოსტყერ, დავიბჯინოთ და დაღლილ მუხლებს ქარი ამოვალებინოთო.

ვეზირს ღვიძავს მეორე ოთახში და მამა-შვილის ლაპარაკი სიტყვასიტყვით ესმის.

— შენ მგონი, მართალი ხარ, შვილო, — უთხრა მამამ ქალიშვილს და განაგრძო, — ვიარეთ და გზაზე ერთი მშენიერი ყანა ვნახეთ. ვეზირმა მკითხა, — როგორ გგონია, ეს ყანა მომკილია, თუ მოსამკალიო? მე უპასუსე: რას ამბობ, კაცო, ვერა ხედავ, ყანა მოსამკალია-მეთქი!

— არა, მამი, აქაც შემცდარხარ, — უთხრა ქალმა, — იმ ყანის პატრონს იქნებ ვალი ემართა და მთელი მოსავალი მოვალისთვის უნდა მიეცა, მაშინ იმისთვის მომკილიც იქ-

ნებოდა და შეჭმულიც, ვეზირს სწორედ ეს უკითხავს შენ-  
თვის და შენც ასე უნდა გეპასუხო.

მამამ განაგრძო:

— გამოვიარეთ კიდევ ცოტა მანძილი და ვხედავთ, მკვდარს მოასვენებენ. ვეზირი მეკითხება: ის კაცი მართლა მკვდარია, თუ ცოცხალიაო? აქ კი ველარ მოვითმინე და გა-  
ჯავრებულმა შეეუტიე: — ან შენა ხარ გიჟი და ან მე მთელი გიჟად, თორემ ვინ არ ხედავს, რომ მკვდარი არისო.

— არა, მამი, — უთხრა ქალმა, — შენ სულ ტყუილ-უბ-  
რალოდ გაფხუკიანებულხარ. თუ იმ მკვდარს შვილი დარჩა, მკვდრად არ ითვლება, ხოლო თუ უშვილძიროდ გადაეგო, სიცოცხლის გამგრძელებელი აღარავინ ეყოლება და მარ-  
თლაც მკვდარი იქნებაო.

ვეზირმა მეორე ოთახში ყველაფერი გაიგონა, ძალიან მოეწონა ქალის გონიერება და იმედი ჩაესახა, იქნებ სელმ-  
წიფის შეკითხვაზეც პასუხი გამცეს და გასაჭირიდან დამის-  
ნნასო. მართლაც, გათენდა თუ არა მეორე დილა, ვეზირმა მასპინძელს სთხოვა, თქვენი ქალი მაჩვენეთ, მინდა ორიოდ შეკითხვა მივცეო.

მამამ დაუძახა ქალიშვილს, ქალიშვილი შემოვიდა. ვე-  
ზირმა უთხრა:

— ძალიან ჭკვიანი ქალი ჩანხარ და მამაშვილობას, ერ-  
თი ეს ამისხენი: ლობიოს ქოთანი ცეცხლზე რომ ჩუხჩუხებს, რას ამბობსო?

ქალმა მოახსენა:

— ლობიოს ქოთანი რომ ჩუხჩუხებს, ცეცხლს ეუბნება: ცეცხლო, მაკმარე წვა და დუღილი, თორემ შენი მსურვალე-  
ბის ატანა აღარ შემიძლია, გადმოვალ და ჩაგაქრობო.

ვეზირს ჭკუასთან ახლოს ეწიშნა ეს პასუხი, ქალს ძვირ-  
ფასი საჩუქარი მიართვა და ხელმწიფესთან გახარებული დაბრუნდა. უთხრა ხელმწიფეს, როგორც ქალმა ასწავლა: ლობიოს ქოთანი როცა ჩუხჩუხებს, ცეცხლს ეუბნება, კარგი, მაკმარე ამდენი დუღილი, თორემ გადმოვალ და ჩაგაქრობო.

პასუხი ხელმწიფესაც ძალიან მოეწონა. ჰკითხა ვეზირს:

— სწორედ მითხარი, შენ მოიგონე თუ სხვამ გასწავ-  
ლაო?

ვეზირმა ყველაფერი დაუფარავად მოასხენა. ხელმწიფემ იმავ დღეს გაუგზავნა ქალს შუაკაცები და ცოლობა სთხოვა. ქალი დათანხმდა და ხელმწიფემაც აღარ დააყოვნა, საჩქაროდ გამართა ქორწილი და ამ ქალზე ჯვარი დაიწერა.

გახდა გლეხის ქალი დედოფალი, მაგრამ ზოგიერთები-  
ვით არ გამედიდურებულა, ის კი არადა, თავისი გონივრუ-  
ლი საქციელით ხელმწიფეც მოათვინიერა, მოაშლევინა ჭირ-  
ვეულობა, აკვიატება, სიჯიუტე და ხალხისათვის გულშემა-  
ტკივარ, სამართლიან მსაჯულად აქცია.

ტყუილად კი არ ამბობს ხალხი: კარგი ცოლი დიდი გან-  
ძიაო.

ჭირი — იქა, ლხინი — აქა,

ქატო — იქა, ფქვილი — აქა.







## ორი ქოსატყუილა

იყო და არა იყო რა, ღვთის უკეთესი რა იქნებოდა. იყო ორი ქოსატყუილა, ერთს დათუა ერქვა, მეორეს — პეტრიკელა. დათუა ქართლელი იყო, პეტრიკელა — იმერელი.

ერთ დღეს დათუა ქოსატყუილამ აიღო ერთი დიდი ტომარა, გატენა ჭახვის ნაფურჩალით, მალლიდან ცოტა მატყლი დააფინა და იმერეთში წაიღო გასასყიდად.

სწორედ იმ დღეს პეტრიკელამაც აიღო ერთი დიდი ტომარა, გატენა კაკლის ნაჭუჭით, მალლიდან ცოტა კაკალი მოაყარა და გასასყიდად ქართლში წაიღო.

დათუა ქოსატყუილა კორტოხის წვერზე რომ ავიდა და იმერეთს გადახედა, სწორედ ამ დროს პეტრიკელაც ამოჩნდა ტომარააკიდებული. შეხვდნენ ერთმანეთს და, როგორც ქართველების წესია, გამარჯობა-გაგიმარჯოს უთხრეს.

— საიდან მოხვალ, ან საით მიხვალო? — ჰკითხა დათუა ქოსატყუილამ.

— იმერეთიდან მოვდივარ, ქართლში გასაყიდად კაკალი მიმაქვსო, — მიუგო პეტრიკელამ და თავის მხრითაც ჰკითხა, — შენ საიდანღა მოდიხარ და საით გაგიწევიაო?

— მე კიდევ იმერეთში მივდივარ და მატყლი მიმაქვს გასაყიდადო, — უთხრა დათუამ.

— მოდი, ერთი კაი სიტყვას გეტყვი, თუ დამიჯერებო, — უთხრა პეტრიკელამ.

— ბრძანე და, თუ მართლა კარგ რასმე იტყვი, დაგიჯერებო, — მიუგო დათუამ.

— აქეთ-იქით სიარულს რას გამოვრჩებით, — უთხრა

პეტრიკელამ, — სხვაც არა იყოს რა, ტყუილუბრალოდ ქალამნები გაგვიცვდება. მოდი, ჩვენი სავაჭროები გავცვალოთ, — შენ კაკალი წაიღე ქართლში და გაყიდე, მე შენი მატყლი მომეცი და იმერეთში გავყიდო.

— ძმობის მადლმა, ასეთი გონივრული სიტყვა კარგა ხანია აღარ მომისმენიაო, — უთხრა დათუამ, — მართლაცადა, რას გამოვრჩებით აქეთ-იქით ტანტალს, აჰა, ჩემი მატყლი და შენი კაკალი მომეციო.

გაცვალეს ქოსატყუილებმა ტომრები და თავიანთი სახლებისაკენ გაბრუნდნენ. ერთსაც ეგონა, მოვატყუეო და მეორესაც. მაგრამ გულში ეჭვი ორივეს ჰქონდა. ჰოდა, ცოცა მანძილი რომ გაიარეს და ერთმანეთის თვალი იცდინეს, მაშინვე ტომრებს ეცნენ, შეხსნეს პირები და მიხვდნენ, ერთმანეთი მოუტყუებიათ: პეტრიკელას სახვის ნაქურჩალით გატენილი ტომარა შერჩა ხელთ, დათუას კი — კაკლის ნაჭუჭით.

გავიდა რამდენიმე ხანი და დათუა და პეტრიკელა კიდევ შესვდნენ ერთმანეთს. იცნეს, რა თქმა უნდა, ერთმანეთი და მიესალმნენ:

— გამარჯობა!

— გაგიმარჯოს!

— მე მეგონა, მართლმე ვიცოდი ტყუილი, მაგრამ არც შენ ყოფილხარ, ძმაო, ნაკლებიო, — უთხრა დათუამ.

— იმე, — შეიცხადა პეტრიკელამ, — ტყუილში რავა მაჯობებდი, შენ თუ იცი, მე რავა აღარ მეცოდინებოდაო?!

— მართლა გცოდნია და კარგადაც გცოდნია, — უთხრა დათუამ, — მოდი, ბარემ დავძმობილდეთო.

— ძალიან კარგიო, — მიუგო პეტრიკელამ, — დავძმობილდეთ და საქმეც ერთად ვაკეთოთო.

— რა ვაკეთოთ? — ჰკითხა დათუამ.

— სადმე მოჯამაგირედ დავდგეთო.

— კარგი, დავდგეთო.

დაიწყეს ქოსატყუილებმა მოჯამაგირის ადგილის ძებნა. ბევრი იარეს თუ ცოცა, ბოლოს გაიგეს, ერთ დედაბერს ორი მოჯამაგირე უნდაო, და წავიდნენ დედაბერთან. დედაბერმა უთხრა:

— ერთი ძროხა მყავს და აი ეს სახლი მაქვს. ერთმა თქვენგანმა ძროხა უნდა ატაროს საბალახოდ და თან სალამური იქონიოს, ჩემი ძროხა პირველი მოცეკვავეა და სალამურის დაკვრასზე ცეკვავს. მეორემ აქაურობა უნდა დააღაგოს, დაგავოს და ნაგავი სხვის ეზოში გადაყაროს. აი, ეს არის ჩემი საქმე და, თუ თანახმა ხართ და შესძლებთ სამსახურს, დადექითო.

— რა არის მანდ შეუძლებელი, თანახმა ვართო, — უთხრეს ქოსატყუილებმა.

დაუდგნენ მოჯამაგირედ. მეორე დღეს პეტრიკელა შინ დარჩა სახლ-კარისა და ეზოს მოსაველელად, დათუამ კი ჩადო ყველ-პური გუდაში, სალამური ქამარში გაიჩარა და ძროხა გარეკა.

პეტრიკელამ სახლ-კარი დაგაგა, დაასუფთავა და კარვაც ბლომა ნაგავიც დააგროვა. მერე მოსვეტა და, როგორც პირობა ჰქონდა, მეზობლის ეზოში გადაყარა. ეზოს პატრონებმა თვალი შეასწრეს, ეცნენ და ისე სცემეს, რომ ძვალი და რბილი გაუერთიანეს. ნაცემ-ნაბეგვი პეტრიკელა ძლივს-ძლივობით შეხანხალდა დერეფანში და ტახტზე დაეგდო.

კაი დღე არც დათუა ქოსატყუილას დაადგა: გაიყვანა თუ არა ძროხა მინდორში, როგორც დედაბრისაგან ჰქონდა ნათქვამი, მაშინვე სალამურს ჩაჰბერა. აბა, სალამურის ხმა გავიგეო, — შეხტა ძროხა და მთელ დღეს მუხლჩაუხრელად ირბინა. დათუაც, რა თქმა უნდა, უკან დასდევდა. იმდენი არბენინა ძროხამ, იმდენი, რომ სალამოს ფეხზე დგომა უჭირდა. პურის ჭამაც კი ვერ მოახერხა და სალამოს ასე მშიერ-მწყურვალად და გადალასლასებული დაბრუნდა შინ. ნახა პეტრიკელა დერეფანში ტახტზე წამოწოლილი და ჰკითხა:

— რა მოგივიდა, ძმაო, ავად ხომ არა ხარო?

— ავად კი არა, ის არ გინდაო! — მიუგო პეტრიკელამ.

— აბა, რატომ წევხარო?

— რატომ ვწევარ, ძმაო, და, — ბოსელი და სახლ-კარმიდამო რომ დავგავე, ნაგავი სხვის ეზოში გადავყარე. დამინახეს ეზოს პატრონებმა და მაშინვე პურმარილზე მიმიწვიეს. იმდენი კახური ვსვი, რომ ახლაც თავი მიბრუნისო, — მერე ჰკითხა, — შენ როგორილა დრო გაატარეო.

— მეც დიდებული დრო გავატარე, — უთხრა დათუამ, — გავედი თუ არა, მინდორში სალამური ავარაკრაკე, ძროხამ დაიწყო ცეკვა. სალამურის ხმასა და ცეკვაზე აუარებელი ხალხი მოგროვდა და ისინიც ჩვენთან ერთად ცეკვავდნენ და მსიარულობდნენ. ისე გავერთე ამ საერთო ლხინში, რომ, წენ წარმოიდგინე, პურის ჭამაც აღარ მომგონებია და ხმიადი ისევ მთელი მოვიტანეო.

— აბა, რაკი ვგრეა, ძმაო, — უთხრა პეტრიკელამ, — ხვალ ძროხას მე გავყვები და შენ კი ერთი ლაზათიანად გამოთვერიო.

— ვგრე იყოს, არ გაწყენინებო, — დათანხმდა დათუა. გათენდა მეორე დილა, პეტრიკელამ ძროხა გარეკა. დათუა კი სახლ-კარის მოსავლელად დარჩა, პეტრიკელა ძროხამ არბენინა, დათუა მეზობლებმა მიბეგვეს. დაბრუნდა პეტრიკელა სამწყემსურიდან სულამოხდილი, დაინასა დერეფანში ტახტზე მოკუნტული დათუა და შორიდანვე სიცილი აუტყდა, დათუამაც ასევე, პეტრიკელას დანახვაზე, ხმამალა გადაიხარხარა:

— კაი ოინი კი გიყავი, მაგრამ არც შენ დამმართე ნაკლებიო.

— თხა თხაზე ნაკლები მგელმა შეჭამოსო, — მიუგო პეტრიკელამ და თვითონაც დათუას გვერდით მიეგდო.

ქოსატყუილებმა იმ ღამეს მოილაპარაკეს, მოდი, აქედან გავიპართ, თორემ ან შიმშილ-სირბილი მოგვიღებს ბოლოს, ან ცემა-ტყეპაო, ადგნენ და ჩუმად კართან მიიპარნენ, მაგრამ კარი დედაბერს გარედან ურდულით გადაეკეტა და თვითონაც იქვე დაწოლილიყო.

რალა უნდა ვქნათ? ბევრი ფიქრის შემდეგ პეტრიკელამ თქვა:

— მოდი, ჭერი ავანგრიოთ, ეს ჩვენი მაწვალებელი ძროხა დაგვკლათ და ტომარაში ჩავდოთ, მერე ერთ-ერთი მალლა ავიდეთ და თოკი ჩამოვუშვათ, ძირს რომელიც დაერჩებოთ, იმან ჯერ ტომარა მიაბას თოკს და მიაწოდოს, მერე თვითონაც მოიბას წელზე და ავიდეს, ბანზე რაკი ავალთ, წინ აღარაფერი დაგვიდგება და თავსაც და ნაპარავსაც მშვიდობით გავიტანთო.

— ეგ ძალიან კარგი რაღაც მოიგონე, — მოუწონა და  
თუამ, — მაშ, მოდი, მაღლა მე ავალ, რადგან უფრო ღონიუ-  
რი ვარ და შენცა და ხორცსაც უფრო ადვილად აგზიდავთო.

შეთანხმდნენ ამ ბირობაზე და დაკლეს ძროხა. მერე ააზ-  
გრიეს ჭერი, პეტრიკელამ უკიბა დათუას და ასვა ბანზე. და-  
თუამ თოკი ჩაუშვა, პეტრიკელამ ტომარაში ორი ნაჭერად  
ხორცი ჩააგდო, მერე თვითონ ჩაჯდა, შემოიხვია გარედან  
თოკი და დათუას ასძახა:

— აბა აიტანე ხორცი და თოკი ისეე ჩამოუშვიო.

აიტანა დათუამ ტომარა, მაგრამ პეტრიკელა აღარც კი  
მოჰგონებია, წამოიკიდა ტომარა და უკანმოუხედავად მო-  
კურცხლა. კარგა დიდი მანძილი რომ გაირბინა და დარწმუნ-  
და, ახლა კი სამშვიდობოს ვარო, დასვენება გადაწყვიტა.  
მოიხსნა ტომარა და ძირს დააგდო.

— ნელა, შე ოჯახქორო, გვერდები ნუ დამამტვრიეო! —  
შესძახა პეტრიკელამ და ტომრიდან ხარხარით ამოძვრა.

— გაგიწყრა ღმერთი, წელი რაზე მომწყვიტეო, — უსა-  
ყვედურა დათუამ და თვითონაც სიცილი აუტყდა.

მერე დასდნენ, ძროხის მწვადები შეიწვეს და ერთმა-  
ნეთს უთხრეს: — სომ ვხედავთ, რომ ერთმანეთის ღალატი  
და მოტყუება ხეირს არ გვაყრის, მოდი, ნულარ მოვატყუი-  
ლებთ ერთმანეთს, ნურც ვუღალატებთ და აღარც წელი მოგ-  
ვწყდება და არც სსვაფრივ ვიზარალებთო.

დათქვეს და გაამართლეს კიდევ. ის დღე იყო და ის,  
ერთმანეთისათვის აღარც ტყუილი უთქვამთ, აღარც უღალა-  
ტიათ და დღესაც კარგი მეგობრები არიან.

ჭირი — იქა, ლხინი — აქა,

ქატო — იქა, ფქვილი — აქა.





## სტუმართმოყვარე ცოლი

იყო და არა იყო რა, იყვნენ სამნი ძმანი, მეტად ღარიბები და არაფრის მქონენი. ერთ დღეს მთელი სოფელი მინდორში სათიბად გავიდა. ყველამ კარგი სადილი მოამზადა და წაიღო. ღარიბმა ძმებმა კი გუდაში ხმელი პურის ნატეხები ჩააწყვეს, ხურჯინში ერთი დოქი ნაძირალა ღვინო ჩადგეს, ხახვი და ნივრის თავები ჩაყარეს და ისე გავიდნენ. თიბვას რომ მორჩნენ, მთიბავებმა გაშალეს სუფრები და ერთი ქეიფი და დროსტარება გამართეს. ღარიბ ძმებს კი რით უნდა ექეიფათ, გავიდნენ მინდვრის ბოლოში, ამოიღეს თავიანთი ღარიბული საგზალი და ჩუმად დაიწყეს ჭამა. მინდორში გახურებული ცეკვა-სიმღერაა, ძმები კი სხედან თავისთვის და გამხმარ პურს უგემურად ლოლნიან.

ამ დროს ქვევიდან ერთი თეთრწვერა მოხუცი გამოჩნდა. ამოუარა სუფრებს და ყველას მიესალმა, მაგრამ სუფრაზე ერთმაც არ მიიწვია. ბოლოს ღარიბ ძმებსაც მიესალმა. უფროსმა და შუათანა ძმებმა თქვეს: კარგი იყო, ეს ბერიკაცი მოგვეწვია, მაგრამ ჩვენი სამყოფი არაფერი გვაქვს და მაგას რაღა ვაჭამოთ.

— რაცა გვაქვს, თანასწორად გავიყოთო, — უთხრა ნაბოლარა ძმამ და ბერიკაცს დაუძახა: — ძია კაცო, თუ გვიკადრებთ, ჩვენთან მობრძანდით და სუფრაზე დაგვეწვიეთო.

მივიდა თეთრწვერა კაცი, ჩამოჯდა სუფრასთან და ძმებს უთხრა:

— ყველა მღერის, მხიარულობს და თქვენ ჩუმად რად სხედხართო?

— არაფერი გვაქვს სამხიარულო და რა ვქნათო, — მიუ-  
გეს ძმებმა, — აი, ხმელი პურის და ნაძირალა ღვინის მეტი  
არაფერი გაგვაჩნია და ამით აბა რა ქვიფს გავწევთო.

მაშინ სტუმარმა უთხრა:

— აბა, კარგად ნახეთ, გუდაში იქნებ სხვა პურიცა  
გაქვთო.

გასინჯეს ძმებმა გუდა და რას ხედავენ: სულ თეთრი,  
გამტკიცული შოთებით არის გამოტენილი. ამოალაგეს პუ-  
რები. ბერიკაცმა კიდევ უთხრა::

— აბა, ახლა ხურჯინი ნახეთ, იქნება ნივრისა და ხა-  
ხვის გარდა სხვა რამეც იყოსო.

ნახეს ძმებმა ხურჯინი და სულ ნაზუქებითა და მოსარ-  
შული დედლებით არის სავსე. გადმოალაგეს ისიც სუურაზე.  
ბერიკაცმა ახლა ღვინის დოქზე უთხრა:

— აბა, დაასხით, რა იცით, შიგ თავანკარა საფერავი  
არა დგასო.

მართლაც დაასხეს ძმებმა ღვინო და დოქიდან გიშრის-  
ფერი საფერავი წამოიღვარა. გაიშალა მდიდრული სუფრა,  
მოსუსდნენ ძმები თავის სტუმრიანად. გადაჰკრეს ღვინო  
და ომახიანი სიმღერაც შემოსძახეს.

მთიბავები იცინოდნენ, — ნეტა მაგ ლატაკებს რა აქვთ  
ისეთი, რომ სტუმარიც მიიპატიყეს და ჩვენზე მხიარულად  
მღერიანო.

ქვიფი რომ დაამთავრეს, თეთრწვერა კაცმა უფროს ძმას  
ჰკითხა:

— შენ რას ინატრებდი, უფრო რისი მოყვარული ხარო?

— არაფერი არ მინდა, — უთხრა უფროსმა ძმამ, — ნეტა  
იმდენი მიწა მომცა, წლის სამყოფი სარჩო მოვიყვანოო.

— მომიცია შენთვის საკმარისი მიწა და სანამ სტუმარი  
გეყვარება, ბარაქა ნუ გამოგილიოსო, — უთხრა სტუმარმა  
და შუათანა ძმას ჰკითხა: — შენ რაღას ინატრებდიო?

— მე საქონლის მეტი არაფერი მინდა, — მიუგო საშუა-  
ლო ძმამ, — საქონელი თუ მეყოლება, არც მომშივა და არც  
შემცივაო.

— მომიცია შენთვის საქონლის ჯოგი და სანამ სტუმა-  
რი არ შეგძულდება, არც ლალა და ბარაქა გამოგელევაო. —

უთხრა კაცმა და ბოლოს ნაბოლარა ძმას მოუბრუნდა:—შენ რაღა გინდაო?

— მე ისეთი ცოლი მინდა, სტუმარი უყვარდეს და ოჯახის მოვლაც არ ეზარებოდესო, — უთხრა ნაბოლარამ.

— აი, ყოჩაღ!—უთხრა ბერიკაცმა,—შენ მართლა კარგი რამე ირჩიე, მაგრამ ეგეთი ქალი ქვეყანაზე მხოლოდ ერთი მეგულება, კეისარსა ჰყავს და სწორედ ამდამ ათხოვებს. წავიდეთ, ვცადოთ, იქნება როგორმე მოვახერხო და შეგერთო.

ბერიკაცმა უფროს ძმას მიწა მისცა, საშუალოს — საქონლის ჯოგი და იქვე დაასახლა. უმცროსი ძმა კი თან წაიყვანა. მიიყვანა მოხუცმა უმცროსი ძმა კეისრის კარზე და დაიძახა:

— მასპინძელო, მგზავრები ვართ და ერთი ღამე გაგვათენებინეო.

გამოეგებნენ მექორწილები და შეიყვანეს შინ. მოუსხდნენ სუფრას ბერიკაცი და ბიჭი. რა გინდა სულო და გულო, სუფრაზე არ იყოს. თავში ნეფე-დედოფალი სხედან, აქეთ-იქიდან მდადი და ეჯიბი უსხედან, არის ერთი ჯიხვების ტრიალი, ლხინი, მუსიკა და სიცილ-ხარხარი.

ბერიკაცმა უთხრა ბიჭს:

— რასაც გეჭყვი, ყველაფერზე დამეთანსმე, რა გინდ შეუძლებელიც არ უნდა გეჩვენოს ჩემი ნათქვამი, შენ არ შეგეშინდეს, მე შეგასრულებინებო.

— კარგიო, — დათანხმდა ბიჭი.

შუა ლხინში თამადამ სმა შეაჩერა და მუსიკა და ცეკვა მოითხოვა. გადმოდიან ნარჩევ-ნარჩევი ბიჭები, იწვევენ თვალყუქუნა გოგოებს და უვლიან ცერულს. ბოლოს ნეფეც გადმოვიდა და გადმოიყვანა პატარძალი. ცეკვავს ნეფე, ხტის მაღლა, დგება ცერებზე და პატარძალს თავს აწონებს. ამ დროს წამოდგა თეთრწვერა ბერიკაცი და ხმამაღლა დაიძახა:

— ეს რა ცეკვაა, მომიტანეთ ხანჯლები და ნამდვილ ცეკვას მე გირჩვენებთო.

მოუტანეს ხანჯლები. ბერიკაცმა ყველა ხანჯალი ტარით წვერაღმა დააყუდა და უმცროს ძმას უთხრა. — ადუ, იცეკვეო.



ბიჭს გული გაუსკდა.

— როგორ უნდა ვიცეკვო ხანჯლის წვერებზე, სომ ზედ ჩამოვეგებო, — უჩურჩულა ბერიკაცს, მაგრამ თეთრწვერამ არ დაიშალა: — შენ გადი და დანარჩენი მე ვიცო.

გადავიდა ბიჭი და ხანჯლის წვერებზე ისე დაუარა, როგორც გაკრიალბულ იატაკზე. თვალი ყველას მასზე დარჩა — პატარძალსაც და სხვებსაც, ნუფემ ეს შეამჩნია და გაჯიბრება მოიწადინა, მაგრამ შედგა თუ არა ფესი ხანჯლის წვერებზე, შიგ შეერჭო და გაწბილებული უკანვე გამობრუნდა.

დაიწყეს ისევ სმა და ლხინი. კარგა რომ შეზარხოშდნენ, თამილამ ისევ შესვენება გამოაცხადა. შესვენებაზე, როგორც ქართული ლხინის წესია, ათასნაირი გასართობი მოიგონეს, — ზოგმა ცხვირის ბეჭი გადაიმტვრია ცერზე, ზოგმა თავსატეხი გამოცანა თქვა, ზოგმა ცხვირსახოცი დამალა ნუჭში და მერე სხვისი ჯიბიდან ამოიღო. ერთი სიტყვით, ვისაც რისი უნარი ჰქონდა, იმით დაიწყო თავის გამოჩენა. უცბად ბერიკაცი წამოდგა და საჯაროდ გამოაცხადა:

— ეგ რა საკვირველია, მომიტანეთ ვაზის რქა და ნამდვილ სასწაულს მე გიჩვენებთო.

მოუტანეს ვაზის რქა. ბერიკაცმა თქვა:

— ჩემი ძმისწული ამ ვაზს დაიჭერს ხელში, რქა თქვენს თვალწინ აყვავდება, გამოისხამს მტევნებს და ერთ საათში ცინცხალ ყურძენს მოგართმევთო.

ბიჭს ისევ გული გაუსკდა, ვაზს ხელში რა აყვავილებს და რა დაამწიფებსო, მაგრამ ბერიკაცმა უჩურჩულა: — შენ ხელი მოჰკიდე და დანარჩენს თვითონ ნახავო.

მოჰკიდა ბიჭმა ხელი და ვაზი მართლაც აყვავდა, დაიკოკრა მტევნები და ყურძენიც დამწიფდა. ყველა გაოცებული დარჩა, პატარძალი სომ მთლად გადაირია და ბიჭს თვალს ვედარ აშორებდა. ბერიკაცმა ბიჭს უჩურჩულა, ყურძენი პატარძალს მიართვით. მიართვა ბიჭმა და პატარძალმა უფრო გაიხარა.

გაჯავრდა ნუფე და დაიძახა:

— ეს რა დიდი სასწაულია, მომიტანეთ ვაზი და მეც განვიხილო!

შემოუტანეს ერთი თამაში სამამულე რქა და მისცეს ხელში. ნეფემ ბევრი ატრიალა ვაზის რქა, ხან მოუჭირა ხელი, ხან შეუშვა, ხან სული შეუბერა, მაგრამ სულ ამაოდ, ვაზი არც აყვავდა და არც მტევანი გამოიბა. პატარძალმა სიცილი დააყარა. გაწბილებულმა ნეფემ ვაზი შორს გადაისროლა და ღვინის სმას მიეძალა.

დანარჩენმა ხალხმაც ღვინის სმა განაგრძო. კარგად რომ შეთვრნენ, ქართული ჩვეულების თანახმად, შეჯიბრი გამართეს. ყველას უნდოდა თავის გამოჩენა და ყველა მოზრდილ სასმისს ეტანებოდა, — ზოგი ყანწით სვამდა, ზოგი — თასით, ზოგი — დოქით. იყო ერთი მსიარულება და სიცილხარხარი. ამ დროს ისევ წამოდგა თეთრწვერა ბერიკაცი და თამადას უთხრა:

— ეს რა სმაა, აბა ერთი ჩაფიანი კოკა მომიტანეთ და ნამდვილი სმა თუ გინდათ, მე გიჩვენებთო.

მოიტანეს ჩაფიანი კოკა, ბერიკაცმა გაავსო ღვინით პირამდე და უმცროს ძმას მიაწოდა. ბიჭს კინალამ გულს შემოეყარა, ერთი კოკა ღვინო რომ დავლიო, ხომ მოვკვდებიო, მაგრამ ბერიკაცმა ისევ ჩურჩულით გაამხნევა: — დალიე, ნუ გეშინიაო.

მოიყუდა ბიჭმა კოკა და სულმოუთქმელად გამოცალა. ხალხმა ტაში დაუკრა და ერთხმად აღიარა, ჭეშმარიტად დევური მსმელი ყოფილაო. გაცხარდა ისევ ნეფე, ამ გადამთიელმა როგორ უნდა მაჯობოსო და თვითონაც მოითხოვა კოკა. აუვსეს და მიაწოდეს. მოიყუდა ნეფემ და დაიწყო დიდი ყლუპით სმა. ჯერ ნახევარიც არ ჰქონდა დალეული, რომ უცბად დაბარბაცდა, კოკა ხელიდან გაუვარდა და გონდაკარგული ძირს გაიშხლართა.

უგრძნობლად მთვრალი ნეფე დარბაზიდან გაიტანეს. პატარძალი კი წამოხტა, მიიბრინა ბიჭთან და გვერდით დაუჯდა. სტუმრები ადგნენ და წავიდ-წამოვიდნენ, აბა, იქ რაღა გააჩერებდათ. თეთრწვერა ბერიკაცი მივიდა კეისართან და ჰკითხა:

— გვატან შენს ქალს, თუ არაო?

— გაგატანთო, — მიუგო კეისარმა და ქალიშვილს ახასაღი ბედი დაულოცა.

წამოიყვანა ბერიკაცმა ქალ-ვაჟი, ძმების მომიჯნედ ყველაზე კარგ ადგილზე დაასახლა და გამომშვიდობებისას უთხრა:

— სანამ სტუმარი არ შეგძულდებათ, ქვეყნად თქვენისთანა ბედნიერი არავინ იყოსო.

გავიდა ხანი. ცხოვრობენ ძმები ბედნიერად. ერთ კოკისპირულ წვიმიან დღეს ეს ბერიკაცი ისევ გამოჩნდა. მოდის თავით ფეხამდე გაწუწულ-გალუმბული და მიადგა კარზე უფროს ძმას, დააკაკუნა კარი და დაუძახა:

— მგზავრი ვარ, წვიმამ მომიწრო და სამადლოდ ერთი ღამე გამათევინეო!

ქმარი ცოლს შეეკითხა, რა ვქნა, შემოვუშვა თუ არაო?

— მეხი მაგასაც დავეყარე. — აბუზღუნდა ცოლი, რას დაწანწალებს, გდებულებს შინ და აღარც წვიმა დაასველებდაო.

გაიგონა თეთრწვერამ ცოლის სიტყვები, — რა ბედიც გქონდათ, იგივე დაგიბრუნდეთო, — თქვა თავისთვის და გაბრუნდა. მიადგა ახლა შუათანა ძმას, დაუკაკუნა კარზე და შესძახა:

— ხალსნო, ქრისტიანებო, სამადლოდ ერთი ღამე გამათევინეთ, თორემ ღამის წვიმამ დამახჩრისო.

საშუალო ძმაც ცოლს დაეკითხა, ცოლი გაბრაზდა:

— აბა, სწორედ მეტი აღარაფერი მინდა, მაგას ლოგინს გავაჭუჭყიანებინებო.

ბერიკაცმა ახლაც გაიგონა ცოლის ნათქვამი და იმათაც ისე შეუთვალა, ისევ ძველი ბედი დაგიბრუნდეთო, და უმცროსი ძმის სახლისაკენ გასწია. მიადგა და დაუკაკუნა: — მასპინძელო, გზაარეული მგზავრი ვარ და ერთი ღამე სამადლოდ გამათევინეო!

უმცროსი ძმა მომკვდარიყო. ქალს ქმარი კუბოში ჩაესვენებინა და გულამოსკვნით დასტიროდა. ბერიკაცის ხმა რომ გაიგონა, საჩქაროდ წამოდგა, ცრემლი შეიმშრალა და სტუმარს გაღიმებული გამოეგება:

— მობრძანდი, შენი ჭირიმე, სტუმარი ღვთისაა, ახლავე ცეცხლს აგინთებ და ვახშამსაც მოგიმზადებო.

შებრუნდა ქალი შინ, სახლი მიალაგ-მოალაგა და სტუმარი შეიწვია. შევიდა ბერიკაცი და ჰკითხა:

— რატომ ხარ მარტო, ქმარი სადღა გყავსო?

— სხვაგან არის და ჯერ არ მოსულაო, — მიუგო ქალმა და სახე მოარიდა, რომ სტუმარს ნაღველი არ შეემჩნია და არ შეწუხებულყო.

ეს ბერიკაცი გრძნეული იყო, იცოდა, რომ ქალს ქმარი მკვდარი ჰყავდა და მეორე ოთახში ესვენა, მაგრამ თავი ისე დაიჭირა, ვითომ არაფერი იცოდა. ქალი რომ ვახშმის სამზადისს შეუდგა, ბერიკაცი ადგა, გავიდა მეორე ოთახში და უმცროსი ძმა ისევ გააცოცხლა, გაუყარა ხელი და ცოლთან გამოიყვანა.

ცოლი, რა თქმა უნდა, ცას ეწია სიხარულით, მაგრამ სტუმარს მაინც არაფერი შეამჩნევინა და ქმარს გაღიმებულმა უთხრა:

— უი, შენ გენაცვალე, რა კაი დროს მოხვედი, სტუმარს მარტოს მოსწყინდებოდაო.

ახლა კი გაამხილა თეთრწვერა კაცმა თავისი ვინაობა და ქალს უთხრა:

— მე გრძნეული ვარ და ყველაფერი ვიცი. ბარაქალა, ქალო, მართლა კარგი ქალი ყოფილხარ და ბოლომდე კარგი ზედიც შეგარჩესო.

თქვა თუ არა ეს კაცმა, იმავე წამს უკვალოდ გაქრა. ამ დღიდან ცოლ-ქმარი უფრო გამდიდრდა და უფრო ბედ-იღბლიანიც გახდა, უფროსი და საშუალო ძმა კი კვლავ ღარიბ-დატაკებად იქცნენ.

ჭირი — იქა, ლხინი — აქა,

ქატო — იქა, ფქვილი — აქა.





## სოლომონ ბრძენი და პატარა ბიჭი

იყო და არა იყო რა, ღვთის უკეთესი რა იქნებოდა. იყვნენ ორნი ძმანი, ორივენი ერთგული და თავდადებული მშრომელები და ბევრსაც მუშაობდნენ, მაგრამ უგერგილო ცოლები ჰყავდათ და ნაშრომ-ნაღვაწს ბარაქას ვერ ატანდნენ. ძალიან რომ გაუჭირდათ სიღარიბე, ძმებმა თქვეს, მოდი, გავიყარნეთ და ცალ-ცალკე დავსახლდეთ, იქნებ ამით მაინც გვეშველოს და ოჯახებს როგორმე ფუძე დაუდოთო.

ძმებმა დაანგრიეს მამისეული სახლი; გაიყვეს ხე-მასალა და ცალ-ცალკე ქოხები აიშენეს, მერე ადგნენ და, როგორც გაყრილები, საშოვარზეც ცალ-ცალკე წავიდნენ.

უფროსმა ძმამ უმცროსი საით წავიდა, ვერაფერი გაიგო, თვითონ კი იარა, იარა და ერთ მინდორში გავიდა. მინდორში ხალხი გამოსულიყო სახნავად, გუთანს თორმეტი უღელი ხარ-კამეჩი ება, მაგრამ საკვირველი ის იყო, რომ ექვსი უღელი ერთ მხარეს ება, ექვსი — მეორე მხარეს, მესხრები დასჭყიოდნენ და სახრეებს გამეტებით უტყაპუნებდნენ, მაგრამ გუთანი ადგილიდან არ იძვროდა, ან რას დაიძვრებოდა, როცა ექვსი უღელი ხარ-კამეჩი ერთ მხარეს ეწეოდა, ექვსი — მეორე მხარეს.

უფროსმა ძმამ კარგა ხანს გაკვირვებით უყურა მესხრეების წვალებას, ბოლოს ვეღარ მოითმინა, მივიდა და გუთნისდელდას უთხრა:

— ძმაო, რატომ აწვალე ან საქონელს ან შენს თავს,

აუშვი ერთი მსწრიდან ხარ-კამეჩები, ჩაუბი მეორე მხარეს და გასწვევნო.

— წადი, წადი, გზას ეწიე, — უპასუსა გუთნისდედამ, — ჩვენმა ბატონმა ასე გვიბრძანა და ჩვენც ასე უნდა ვაკეთოთო.

— ვინ არის თქვენი ბატონიო? — ჰკითხა კაცმა.

— ვინა და, სოლომონ ბრძენიო! — უთხრა გუთნისდედამ.

— ღმერთმა გაგაძლებინოთ მაგეთი ბატონის ხელშიო, — თქვა უფროსმა ძმამ და წავიდა. ცოტა რომ გაიარა, ახლა ერთ ოთხთვლიან წისქვილს მიადგა. შევიდა შიგა და რას ხედავს: ხვიმირებიდან სულ დარჩეული სორბალი ჩამოდის, წისქვილებიც—ოთხივე დოლაბი გამართულად ფქვავს, მაგრამ საფქვილე ალა არცერთს არ უდგას, ფქვილი საღვარეში ჩადის და წყალს მიაქვს. გაუკვირდა კაცს და მეწისქვილეს ჰკითხა:

— კაცო, რაზე ღუპავ ამ ბროლივით სორბალს, რატომ ალებს არ დაუდგამ, რომ ფქვილი წყალში არ ჩადიოდესო?

— ჩვენმა ბატონმა ასე მიბრძანა და მეც ასე უნდა ვფქვაო, — მიუგო მეწისქვილემ.

— ვინ არის შენი ბატონიო? — ჰკითხა კაცმა.

— ვინა და, სოლომონ ბრძენიო.

კაცს უფრო გაუკვირდა, თუ ის სოლომონი მართლა ასეთი დიდი ბრძენია, მაშ ამ გაუგონარ სიგიჟეს რაღად შერებო, და გუნებაში გადაწყვიტა, უნდა წავიდე და ვკითხოო. მივიდა სოლომონ ბრძენთან და მიესალმა.

— გაგიმარჯოსო, — მიუგო სოლომონ ბრძენმა.

— კაცო, შენზე დიდი ქება გამიგონია და, თუ მართლა ასეთი ჰკვიანი კაცი ხარ, ის წისქვილი და გუთანი ასე უკულმართად რატომ გამართეო? — ჰკითხა კაცმა.

— ბევრი გინახავს და ცოტა გაგიგიაო, — უთხრა სოლომონ ბრძენმა. ახლა თუ ამიხსნი, რისთვის გავმართე ის გუთანი და წისქვილი ასე, ხომ კარგი, თუ არადა, უვიცობისათვის თავს მოგჭრიო.

დაღონდა კაცი, არ იცოდა, როგორ აეხსნა და სოლომონ ბრძენს მოფიქრებისათვის ერთი კვირის ვადა მოსთხოვა!

— ერთ კვირაში თუ ავიხსენით, ავიხსენით, თუ არა და, იყოს ნება თქვენით.

სოლომონ ბრძენმა მისცა ერთი კვირის ვადა.

წამოვიდა კაცი, მიდის გზაზე დაღონებული და არ იცის, რა ქნას, რა მოიფიქროს და სიკვდილს როგორ გადაარჩეს.

უცბად გზაზე ერთ მენახირე ბიჭს გადაეყარა. ბიჭს ნახირი კაკლის ჩრდილში დაექუჩებინა, თვითონ განზე გასულიყო და სათავნაპიროდ დაცუცქულიყო. ხელში პურის ნატყენი ეჭირა, თან ჭამდა და თან საქმობდა. კაცს გაუკვირდა ბიჭის უსაქციელობა და შეეკითხა:

— როგორ შეიძლება, რომ თან საქმობ და თან პურსა სჭამო?

— განა ასე არ ჯობია, — დაუდევრად მიუგო ბიჭმა, — ძველი გადის, ახალი ჩადისო.

უფროს ძმას მოეწონა ბიჭის პასუსი და იფიქრა, მოდი, ჩემს გასაჭირს ვეცყვი, იქნება სასარგებლო რამე მირჩიოსო, და უთხრა:

— შეილო, გზაზე ორი საკვირველი ამბავი ვნახე: ერთ მინდორში სალხს გუთანი გამოეტანა, მაგრამ საქონელი ისე შეება, ექვსი უღელი ერთ მხარეს, ექვსი — მეორე მხარეს, რომ გუთანს ადგილიდან ვერ ატოკებდნენ. მეორე ადგილზე წისქვილი ვნახე, კარგი სორბალი ეყარა, დოღაბებიც კარგი გამართული ჩანდა, მაგრამ საფქვილე ალები არც ერთს არ ედგა და ფქვილი წყალში ჩადიოდა. ვკითხე: მეგუთნებსაც და მეწისქვილესაც, ასე რადა შვრებით-მეთქი? იმათ მიპასუხეს, — ხალხიც და საქმეც სოლომონ ბრძენისა ვართ და როგორც გვიბრძანა, ისე ვაკეთებთო. გამიკვირდა და ახლა სოლომონ ბრძენტან წავედი და ვკითხე, რას ნიშნავს ასე უკულმართად გამართული გუთანი და წისქვილი-მეთქი. სოლომონ ბრძენმა მითხრა, ეს გამოცანა შენ უნდა ამიხსნა, თუ არადა, თავს მოგჭრიო, აი უკვე კვირა მიიწურა, რაც გზაზე მოვდივარ და ვფიქრობ, მაგრამ ამ უცნაური ამბისა ჯერაც ვერაფერი გამიგიაო.

— მე ავიხსნი, თუ არ გამცემო, — უთხრა ბიჭმა.

კაცი შეჰპირდა, კრინტს არსად დავძრავო.

— გუთანში ორივე მხარეს ხარები რომ ება და თავთა-

ვიანთკენ ეწეოდნენ. ეს იმას ნიშნავს, რომ, როცა ძმები გაიყრებიან და ცალ-ცალკე გავლენ, იმათი საქმეც ეგრევე წინ ვერ წავა, — უთხრა ბიჭმა, სოლო უალებო წისქვილი ის არის, რომ კაცმა რაგინდ ბევრი იმუშაოს და შეზიდოს სახლში, თუ შინ გერგილიანი დიასახლისი არ ტრიალებს, იმის ნაშრომს ბარაქა არ დაჰყევაო.

კაცს ეს პასუხი სიმართლედ ენიშნა და სოლომონ ბრძენისკენ გახარებული წამოვიდა. მივიდა და, რაც ბიჭმა უთხრა, ყველაფერი დაწვრილებით მოახსენა.

— ეგ ყველაფერი სწორია, მაგრამ ახლა უნდა მითხრა, ეგ პასუხი ვინ გასწავლაო? — ჰკითხა სოლომონ ბრძენმა. სოლომონი იმხანად სავაზირო კაცს ეძებდა და იფიქრა, ვინც ეს გამოიცნო, ნამდვილად ჭკვიანი იქნება და ევეზირად იმას ავიყვანო.

კაცმა უთხრა:

— თქმით ვერ გეტყვი, რადგან სიტყვა მივეცი, რომ არსად გავთქვამდი და სიტყვის გატეხა სირცხვილიაო.

— მითხარი და იმ კაცს ბედსა ვწევო, — უთხრა სოლომონმა.

— მაშინ წამობრძანდი და ბარემ თვალით გაჩვენებო, — უთხრა კაცმა.

სოლომონ ბრძენმა შეაბმევეინა ეტლი, ჩაისვა უფროსი ძმაც და წავიდნენ. პატარა ბიჭს ძროხები უკვე საძოვარზე გამოეშვა და თვითონ კაკლის ჩრდილში წამოწოლილიყო. სოლომონ ბრძენის ეტლმა შემთხვევით ერთ ფურს გვერდი გაჰკრა და განზე მიაგდო.

პატარა ბიჭმა წამოიხედა და დაუძახა:

— ჰე, ჰე, ეგ ფური არ გამიბერწოთ, მუცელში ერთი ყარგი სახარე ხბო ჰყავსო.

სოლომონ ბრძენმა ეტლი გააჩერებინა, დააკვირდა მკვე ფურს და უთხრა:

— მართალია, სახარეა, მაგრამ შუბლში ნიშაა.

— არა, ნიშა არ არის, კუდვარდაა; — უპასუხა ბიჭმა, — შუბლზე კუდის წვერი უდევს და შენ ნიშა გგონიაო.

გაიმართა ცილობა, ბიჭი თავისას ამტკიცებდა; სოლომონი — თავისას. რომ ვერ მორიგდნენ, ბოლოს სანაძლეო და-




დეს, დაკლეს ფური და ამოაცალეს ხბო. მართლაც კუდეარა და გამოდგა.

— ბრძენი მე კი არა, შენა ყოფილხარო, — უთხრა სოლომონმა პატარა ბიჭს, წაიყვანა სასახლეში და პირველი ვეზირის სახელო უბოძა. ხოლო კაცი ასეთი გონიერი ვეზირის შოვნისათვის გულუხვად დაასაჩუქრა.

წამოვიდა კაცი, მონასა თავისი უმცროსი ძმა და ისევ შეიერთა. ძმებმა დაანგრეს თავიანთი ქოხები და ისევ ერთი საერთო სახლი აიშენეს. მერე უგერგილო ცოლებიც თავიდან მოიშორეს, შრომისმოყვარე, მეოჯახე ქალები მოიყვანეს და რამდენიმე წელიწადში ოჯახი ქონებით პირამდე გაავსეს.

ჭირი — იქა, ლხინი — აქა,  
ქატო — იქა, ფქვილი — აქა.





## მატყუარა ბატონი

— იყო და არა იყო რა, იყვნენ ორნი ძმანი, ღარიბები და არასმქონენი. თქვეს ძმებმა, მოდი წავიდეთ, ვისმე მოჯამაგირედ დავუდგეთ და რამე ვიშოვოთო. ჯერ უფროსი ძმა წავიდა, იარა, იარა, მივიდა ერთ მდიდარ ბატონთან და სთხოვა, გაჭირვებული კაცი ვარ და მოჯამაგირედ დამიყენეო. ბატონი დათანხმდა და უთხრა: — დაგიყენებ მოჯამაგირედ, ოღონდ იცოდე, სანამ გუგული „გუ-გუს“ დაიძახებს, სამჯერ თუ რამე გეწყინა, უსასყიდლოდ გაგიშვებ, ხოლო თუ მე რამე მეწყინა, ორმაგს გადაგიხდი და გაგანთავისუფლებო.

— კარგიო, — უთხრა ბიჭმა და დაუდგა მოჯამაგირედ.

მეორე დილას ბატონმა დილაუთენია წამოაგდო მოჯამაგირე ლოგინიდან და თან დასჭყვივლა, შე ზარმაცო, ცისკრის ამოსვლამდე რომ წევსარ ლოგინში, რა საქმე უნდა გამიკეთოო!

ბიჭს ძალიან ეწყინა უდროო დროს გაღვიძება, მაგრამ იმის შიშით, სანაძლეო არ წავაგოო, ხმის ამოღება ვერ გაბედა. და ასე ყოველდღე წამოაგდებდა ბატონი დილაბინდზე და გააგდებდა სამუშაოდ: ჯერ წყალს მოაზიდვინებდა, მერე შეშას დააჭრევენებდა და ბუხარს აანთებინებდა, ბოლოს კი დილიდანვე დაღლილ-დაქანცულს, ერთ ნატეხ ხმელ პურს მისცემდა და ნახირში ან ცხვარში გააგდებდა. თან სულ დარაჯად ედგა და მცირე უკმაყოფილებასაც თუ შენიშნავდა, მაშინვე ჰკითხავდა:

— სომ არაფერი გეწყინათ?

მოჯამაგირე ბოღმას გულში ჩაიბრუნებდა და შეშინებული, წყენა არ შემატყოსო, მშვიდად მიუგებდა:

— არა, ბატონო, როგორ გეკადრებათ, ცამდე კმაყოფილი ვარო.

ითმინა მოჯამაგირემ, ითმინა, მაგრამ ბოლოს ველარ მოითმინა და ბატონს უთხრა:

— შენთან ყოფნა აღარ მინდა, უნდა წავიდეო.

— წადი, თუ წახვალო, — უთხრა ბატონმა, — მაინც არაფრის მაქნისი იყავი და პურს ტყუილად გაჭმევდიო, — ამოჰკრა პანლური და გამოავადო.

მოვიდა სახლში ჩამოგლეჯილ-ჩამოკონკილი და უმცროს ძმას ყველაფერი უამბო. უმცროსმა ძმამ უთხრა, შენ ერთი იმ ბატონის სახლი მასწავლე, წავალ, მე დავუდგები მოჯამაგირედ და შენს შრომასაც და ჩემსასაც ერთიორად ავინაზღაურებო.

ძმამ დაუშალა:

— თავი დაანებე, ისეთი უხიაგი რამ არის, ბოლომდე ვერ გაუძლებ და შენც ტყუილუბრალოდ გამუშავებსო.

მაგრამ უმცროსმა ძმამ არ დაიშალა: — შენ მაჩვენე და დანარჩენი ჩემზე იყოსო.

წავიდა უმცროსი ძმა, მივიდა ბატონთან და უთხრა:

— ღარიბი კაცი ვარ და შენს დღეგრძელობას, მოჯამაგირედ დამიყენეო.

ბატონმა დაიყენა და იმასაც ისეთივე პირობა ჩამოართვა: — სანამ გუგული „გუ-გუს“ დაიძახებდეს, თუ სამჯერ რამე გეწყინა, უსასყიდლოდ გაგაგდებ, თუ მე მეწყინა, რაც გერგება, ორმაგს მოგცემო.

— კარგიო, — უთხრა უმცროსმა ძმამ და დაუდგა მოჯამაგირედ.

უმცროსი ძმა ცოტა ხანს კარგად ემსახურებოდა და ყველაფერს უსრულებდა, მაგრამ ერთხელ მზის ამოსვლამდე აღარ წამოდგა ლოგინიდან. შევიდა ბატონი და დაუყვირა:

— ადექი, შე ზარმაცო, საქმეს მიხედეთ!

— დამაცადე, ცოტა გამოვიძინოო, — უპასუხა მტკნარებით მოჯამაგირემ და მეორე გვერდზე გადაბრუნდა. ბატონს

მთლად ცეცხლი მოეკიდა, თავი ველარ შეიკავა და უყვირა და უყვირა მოჯამაგირეს. მოჯამაგირე გადმობრუნდა და ცბიერად ჰკითხა:

— რატომ ყვირი, ბატონო, ხომ არაფერი გეწყინაო? —

— არა, კაცო, რა უნდა მწყენოდა, — დაიმდაბლა სხა შეშინებულმა ბატონმა, — ისე გითხარი, გაგახსენეო.

წამოდგა მოჯამაგირე ზღაზვნით და დაიწყო ტანსაცმლის ჩაცმა. შარვალს ხან გაიხდიდა, ხან ჩაიცმევდა, ხან გაიხდიდა, ხან ჩაიცმევდა, იმდენი, იმდენი, რომ შუადღემდე ძლივს დაამთავრა ჩაცმა. ბატონი უყურებდა და ბრაზით სუნთქვა ეკვროდა, მაგრამ გამხელას როგორ გაბედავდა.

ერთ დღეს ბატონმა უთხრა მოჯამაგირეს:

— ადექი, ხარები მოაძოვე და მალევე მორეკე, დღეს შენა უნდა ჩამოგატანინო მთიდანო.

მოჯამაგირემ გამოუშვა ხარები და გაირეკა საბალახოდ. მინდორში რომ გავიდა, დაკლა რომელიც უფრო კარგი ხარი იყო, გაატყავა, შეწვა მწვადები და ვინც კი ახლომახლო იყო, ყველა დაპატიჟა. ბატონი ელოდა მოჯამაგირეს, ელოდა და, რომ აღარ დაბრუნდა, თვითონ წავიდა ამბის გასაგებად. მივიდა და რას ხედავს: გატყავებული ხარი ტყავზე გდია და იმისი მწვადებით ხალხი ქეიფობს. ბატონს უცბად ყველაფერი გადაავიწყდა და სმამალა უყვირა:

— რა გიქნია ეს, შე ოჯახდანგრეულოო?!

მოჯამაგირემ ცბიერად გაიცინა და ჰკითხა:

— რა იყო, ბატონო, ხომ არ გეწყინაო?

ბატონი უცბად მოვიდა გონს:

— არა, კაცო, წყენით არ მწყენია, მაგრამ აჯობებდა კი, რომ ეს ხარი არ დაგეკლათ, — აკრიფა დარჩენილი ხორცი, შეახვია ტყავში და წამოიღო.

მეორე დღეს ბატონმა მოჯამაგირე ცხვარში გაგზავნა და უთხრა: — სადილს ბიჭის ხელით გამოგიგზავნიო.

მოჯამაგირე წავიდა, მაგრამ ბატონმა სადილი არ გაუგზავნა. იფიქრა, იქნებ გული მოუვიდეს და გავაგდოო. მაგრამ თქვენც არ მომიკვდეთ, მოჯამაგირეს ამაზე გული არ მოსვლოდეს და არც შეწუხებულიყოს. დაკლა ერთი კარგი მსუქანი ჭედილა და მწვადები ააშიშხინა. სალამოს დათვალა

ბატონმა ცხვრები და ნახა, რომ ჭედილა აკლია. მაგრამ შიშით, სანაძლეს წავაგებო, აღარაფერი თქვა.

ჩავარდა ბატონი საგონებელში: რა ქნას, რით მოიშოროს თავიდან აბეზარი მოჯამაგირე. იფიქრა, იფიქრა და ბოლოს ასეთ სერხს მიმართა: ერთ დღეს წაიყვანა თავისი ცოლი ტყეში, სეზე შესვა და უთხრა:

— მე ჩვენს მოჯამაგირეს სანადიროდ წამოვიყვან და აქეთ ამოვატარებ, როცა დაგიასლოვდებით, სამჯერ „გუგუ“ დაიძახე. მოჯამაგირე იფიქრებს, ყავლი გამსვლიათ და წავა, თორემ სხვანაირად თავიდან ვერ მოვიშორებთ და დაგველუპავსო.

დატოვა ბატონმა ცოლი სეზე და წამოვიდა. მოვიდა შინ და მოჯამაგირეს უთხრა, სანადიროდ უნდა წავიდეთო.

— კარგი, — დათანხმდა მოჯამაგირე. — ბატონი ბრძანდები და რასაც მიბრძანებ, უნდა შევასრულოო. — აიღეს თოფები, შემოირტყეს სავაზნეები და წავიდნენ. ბატონმა, რა თქმა უნდა, მოჯამაგირე განგებ იმ ხისაკენ წაიყვანა, რომელზეც ცოლი ჰყავდა დამალული. როცა დაუასლოვდნენ, ცოლს ნიშანი მისცა და ცოლმაც სამჯერ ზედიზედ დაიძახა „გუ-გუ, გუ-გუ, გუ-გუ!“

ბატონი მიუბრუნდა მოჯამაგირეს, ხელი ჩამოართვა და უთხრა:

— მომილოცავს თავისუფლება, აგე, გუგული იძახის, წამოდი, მოგცემ, რაც გერგება და მშვიდობით წადიო.

— მოჯამაგირე უარზე დადგა:

— არა, ბატონო, ჯერ გუგულის მოსვლის დრო არ არის, ალბათ სხვა რამემ დაიძახაო.

— გუგულია, აბა, „გუ-გუს“ სხვა რა დაიძახებდაო, — გაჯიუტდა ბატონი.

მოჯამაგირე მისვდა, რომ ბატონი რაღაცას ეშმაკობდა და უთხრა:

— რატომ ვდაობთ, სიმართლეს ასე გავიგებთ, ვესვრი თოფს, მოვკლავ და, თუ მართლა გუგული იქნება, რაღა შეთქმისო.

ამ სიტყვებით გადმოიღო თოფი მოჯამაგირემ, შეაყენა ფეხზე და დაუმიზნა იმ ადგილს, საიდანაც „გუ-გუ“ მოისმო-

და. ბატონი შეშინდა, ემანდ ახლა ცოლი არ მომიკლასო. სწვდა თოფზე მოჯამაგირეს და გაბრაზებულმა ხმამაღლა დაუყვირა:

— წადი, კაცო, მომშორდი თავიდან, აღარ მინდა შენი მოჯამაგირეობაო.

მოჯამაგირემ ცბიერად გაიღიმა და ჰკითხა:

— ჩემო ბატონო, რაღაც ისეთ ხმაზე ყვირი, მგონი, გული მოგივიდაო.

— გულიც მომივიდა და სისხლიც ამემღვრა, წადი, მომშორდი თავიდანო, — უფრო ხმამაღლა უყვირა ბატონმა.

— მაშინ რაკი აგრეა, სადაო რა გვაქვს, პირობის თანახმად გავსწორდეთ და ღმერთმა მშვიდობა მოგცესო, — უთხრა მოჯამაგირემ.

რალას იზამდა ბატონი, მისცა, რაც პირობით უნდა მიეცა, უფროსი ძმის ნამუშევარიც ზედ დაუსართა და გააგდო სახლიდან.

ჭირი — იქა, ლხინი — აქა,

ქატო — იქა, ფქვილი — აქა.





## ჭკუამხიარული ცოლები

იყო და არა იყო რა, იყო ერთი ცოლ-ქმარი. არც შვილი გააჩნდათ, არც ძირი და ვერც ქონებით დაიქადნიდნენ, მათს ბედობაზე შინ კატა არ ჩხაოდა და კარში ძაღლი არ ყუფდა. ქმარი შრომით თავს იკლავდა, დღე და ღამეს ასწორებდა, მაგრამ ცოლი ჭკუამხიარული ჰყავდა და ბარაქას ვერაფერს სდებდა. ქმარს სახლში ერთი ოქროს კვერცხი ჰქონდა, ამ კვერცხს ვაი-შავი დღისათვის ინახავდა და ძალიანაც უფრთხილდებოდა, დაკეტილ უჯრაში ედო და ცოლს ხელის ხლებების ნებას არ აძლევდა.

ერთხელ ქმარი სამუშაოდ წავიდა და ცოლი შინ დარჩა. ამ დროს სოფელზე მეწვრილმანე ვაჭარმა ჩამოიარა, ბოლოს ამ ღარიბი კაცის ეზოშიც შეიხედა და მის ცოლს თავისი სავაჭრო გაუშალა. ქალს ყველაზე მეტად დედოფალები მოეწონა. ვაჭარმა რომ ეს შეამჩნია, უფრო შეუქო — ისეთი გონიერები არიან, რასაც ეტყვი, ყველაფერს გაგიგონებენო.

ქალს გაუხარდა — შვილების მაგივრობას გამიწვევენო, მოხვეტა თუკი რამ ებადა სახლში, გამოუტანა ვაჭარს და ორი თოჯინა გამოართვა. ვაჭარმა ჭკუასუსტობა შეატყო და ლაპარაკი გაუბა:

— ერთი მეტისმეტად ძვირფასი ნივთი მაქვს და, თუ სახლში კიდევ მოგეპოვება რამე, ბარემ იმასაც შენ მოგყიდიო. — ამოიღო ჯიბიდან ქაშანური კოკის მოტეხილი ყელი და ქალს დაანახვა, თან ჩვეულებრივ შეუქო: ეს ხვარაზმული ჭოგრიტია და ისეთი საკვირველი რამ არის, მეტი აღარ იქნებაო. მაღლა აიხედავ — ცას დაინახავ, დაბლა დაიხედავ —

დედამიწას, აქეთ გაიხედავ — მთებს, იქით — მინდვრებს, ერთი სიტყვით, შიგ ყველაფერი ჩანს და ძალა და სახსარი თუ გაგაჩნია, იყიდეო.

ქალს ძალიან მოეწონა ბრჭყვიალა კოკის ყელი და სულმა წახძლია, შევიდა შინ, გატეხა უჯრა, გამოიტანა ქმრის გადამალული კვერცხი და გაუცვალა.

გახარებულმა ვაჭარმა ისე მოკურცხლა სოფლიდან, რომ უკან აღარ მოუხედნია. ქალი კი შევიდა შინ, მოუჯდა ახლად შეძენილ თოჯინებს და ლაპარაკი გაუბა.

სალამოს მოვიდა ქმარი სამუშაოდან. სახლი დაკეტილი დახვდა და ცოლს დაუძახა, ქალო, კარი გამიღეო!

ქალი კვლავ დედოფალებს გამოელაპარაკა:

— აბა, ჩემო კარგებო, წამოდექით და მამას კარი გაულეთო.

ქმარი გაბრაზდა და დაუყვირა:

— ქალო, მანდ ვის ელაპარაკები, არ გესმის, კარი გამიღეო!

ცოლმაც თოჯინებს დაუწყო ტუქსვა:

— რა ჯიუტი ბაღლები ყოფილხართ, არ გესმით, მამა მოვიდა და კარი გაულეთო.

ქმარმა ბევრი ეძახა და უყვირა, მაგრამ რომ ვერაფერი შეაგნებინა, კარი შეამტვრია. შევიდა და რას ხედავს: მის ცოლს ორი დედოფალა დაუწვევია ტახტზე, თვითონ შუაში ჩამჯდარა და ხან ერთს უსვამს თავზე ხელს და ხან — მეორეს. ქმარს დაბლიდან შემოსცინა და უთხრა:

— არ გეწყინოს, შენი ჭირიმე, აი, ღმერთმა ორი შვილი მოგვცა, ამათ ველაპარაკებოდე და კარი იმიტომ ვეღარ გაგიღეთო.

— რა მიეცი მაგ დედოფალებშიო? — ჰკითხა ქმარმა.

— აბა, რას დავიშურებდი, შენი ჭირიმე, რაც რამ გვებადა, ყველაფერი ამათ მომყვანს გავატანე, მაგრამ ნუ გამიჯავრდები, სამაგიეროდ შენთვის ნამდვილი სვარაზმული ჭოგრიტი ვიყიდეო. — უთხრა ქალმა და ქმარს მოტეხილი კოკის პირი გაუწოდა.

— ქალო, რა ღმერთი გაგიწყრა, ამაშიც ფული მიეციო? — შეჰყვირა ქმარმა.



— ბევრი არაფერი, შენი ჭირიმე. — უთხრა ცოლმა, — შენ რომ უჯრაში კვერცხი გქონდა, ის მივეცი და აბა, ერთი კვერცხი რა დიდი ფასიაო.

ქმარი კინალამ გადაიჩრია, მაგრამ რაღას იზამდა, მოიკრიფა გონება და ცოლს გამოჰკითხა, ვინ იყო, ვინც ესენი მოგიტანა, როგორი კაცი იყო, ან ტანთ რა ეცვაო?

ცოლმა ჩამოუთვალა კაცის ნიშნები, ქმარი მიხვდა, რომ მისი ცოლი ქალაქელ ვაჭარს მოეტყუებინა და იმავე წამს მის საძებრად წაეიდა. მივიდა ქალაქში; აუარ-ჩაუარა ვაჭართა დუქნებს, მაგრამ რა იცის, რომელია, ვაჭრები ხომ ჩაცმულობითაც და ქცევითაც ერთმანეთს ჰგვანან. გამობრუნდა უკან დაძმარებული. სანამ ქალაქს გამოსცდებოდა, დაღლილ-დასიცხულს მოსწყურდა და ერთ ეზოში წყალი ითხოვა. ეს სწორედ იმ ვაჭრის სახლი იყო, რომელმაც იმისი ცოლი მოატყუა. მოახლე გოგომ თუნგივით წყალი გამოუბრუნა და თან შეეკითხა:

— სადაური ხარ, ძია, ან საიდან მოდიხარო?

— ჯანდაბელი ვარ და ჯანდაბას მივალო, — უპასუხა გაჯავრებულმა კაცმა. გოგომ გაკვირვებისაგან პირი დააღო, შევარდა შინ და თავის ქალბატონს მიაძახა:

— ქალბატონო, ქალბატონო, ჩვენს ეზოში ჯანდაბელი კაცი შემოვიდაო.

— ჯანდაბელი კაციო? — ქალბატონი ფხაჭა-გლეჯით გამოვარდა და კაცს ჰკითხა: — მართლა ჯანდაბელი ხარო?

კაცი მიხვდა, რომ ქალბატონიც მისი ცოლის ჭკუისა იყო და თავი მოიმხიარულა.

— კი, ჯანდაბელი ვარო, — უთხრა.

— რაკი იქაური ხარ, ჩემი ძმების ამბავიც გეცოდინებო? — ჰკითხა ქალბატონმა.

— როგორ არ ვიცი, — უთხრა კაცმა, — შენი ძმები სახლს აშენებენ, ახლა საგანგებოდ იქით ჩამოვიარე და დამაბარეს, ჩვენს დასთან მიდი და უთხარი, რომ მშენებლობის ფული გვაკლდება და ოქრო და თვალმარგალიტი გამოგვიგზავნოსო.

— ოღონდ იმათ ნურაფერი გაუჭირდებათ და, რაცა გვაქვს, ყველაფერს გაგატანო, — თქვა ქალბატონმა, შევარ-

და შინ, მოუსვა ხელი რაც ფული და თვალ-მარგალიტი ჰქონდათ, გატენა ერთი დიდი ტომარა და კაცს გამოუტანა. — აჰა, წაუღე, ახლა ამის მეტი არა მაქვს, მაგრამ შემოდგომისათვის კიდევ მოვუგროვებ და, როცა დასჭირდებათ, შემომითვალნო.

— კარგი, გადავცემო, — უთხრა კაცმა, წამოიკიდა ოქრო-თვალ-მარგალიტით გატენილი ტომარა და უკან მოუხედავად მოკურცხლა.

მოვიდა შინ ვაჭარი, ქალს გუნებანაცვალობა შეატყო და ჰკითხა:

— ქალო, რა იყო, რამ გაგამხიარულაო?

— ამაზე მეტი სასიხარულო რაღა უნდა მქონდეს, — უთხრა ქალმა, — დღეს ერთმა ჯანდაბელმა კაცმა ჩამოიარა, ჩემს ძმებს დაებარებინათ, სახლის ასაშენებელი ფული შემოგვაკლდა და ჩვენმა დამ გამოგვიგზავნოსო.

— მერე გაატანეო? — ჰკითხა შეშინებულმა ვაჭარმა.

— ბევრი ვერაფერი, მხოლოდ ერთი ტომარა გავუვსეო.

შემოიკრა ვაჭარმა თავში ხელი, შეჯდა მაშინვე ცხენზე და კაცს დაედევნა. კაცმა ერთ წისქვილთან შეისვენა, უკან მოიხედა და შორს გაჭენებული ცხენით მომავალი ვაჭარი დაინახა, „ეგ უეჭველად მე მომდევსო“, — თქვა კაცმა, შევარდა წისქვილში და მეწისქვილეს უთხრა: — კაცო, ასეთი რა დაუშავე ბატონს, რომ შენს მოსაკლავად მოდისო, — და დაანახვა ცხენიანი ვაჭარი.

მეწისქვილეს მართლა თავისი ბატონი ეგონა, იფიქრა, ალბათ საფქვავე კარგად ვერ დაეუფქვი და იმაზეა ასე გაჯავრებულიო, და გულგახეთქილი კაცს შეეხვეწა:

— მოდი, ცოტა ხანს ჩემს ადგილზე დადექი. მე ხვიმირში დავიშალები და იქნებ ვერ მიბოვოსო.

— კარგიო, — დათანხმდა კაცი, მეწისქვილე ხვიმირში ჩაძვრა, თვითონ კი შეიყარა ფქვილი სახეზე, რომ მართლა მეწისქვილეს დამგვანებოდა და ვაჭარს საკიდვარზე შეეგება.

მოაგდო ვაჭარმა ცხენი თქარათქურით და კაცს ჰკითხა:

— აქეთ ტომარააკიდებულ კაცს ხომ არ გაუვლიათ?

კაცი ახლოს მივიდა და ჩურჩულით უთხრა:

— ნუ გამცემ კი და, ამ ცოტა ხნის წინ, ერთი ტომარა-

აკიდებული კაცი მოვარდა და, შენ რომ დაგინახა, აგე, ხვი-  
მირში დაიმალო.

ვაჭარმა ცხენი კაცს მიუგდო და წისქვილში შევარდა.  
კაცმა დრო იხელთა, დაავლო ფულიან ტომარას ხელი, მოახ-  
ტა ცხენს და თავისი სახლისაკენ გააჭენა.

რალას იზამდა ვაჭარი, იმ ალალ-მართალ მეწისქვილეს  
რას წაართმევდა, მიხვდა, რაც დაემართა და შერცხვენილი  
და გაწბილებული სახლისაკენ ჩანჩალით წავიდა. შევიდა  
ეზოში. ცოლმა უცხენოდ მოსული რომ ნახა, ჰკითხა:

— კაცო, ცხენი რაღა უყავიო?

— ცხენიც იმ ჯანდაბელს გავატანე, რომ უფრო მალე  
მიუტანოს შენს ძმებს ფული და სახლი დროზე აიშენონო, —  
მიუგო ვაჭარმა და ტახტზე წელმოწყვეტილივით დაეშვა.

ჭირი — იქა, ლხინი — აქა,

ქატო — იქა, ფქვილი — აქა.





## ხარბი და ალალ-მართალი

იყო და არა იყო რა, იყო-ერთი ღარიბი ცოლ-ქმარი. ქმარი დღედაღამ ჯარასავით ტრიალებდა, მის მუშაობას ბარაქა მანც არა ჰქონდა. ითმინა ცოლმა, ბოლოს ველარ მოითმინა და გაანჩხლებულმა ქმარს შეუტია:

— კაცო, გაბრიელ, მომბეზრდა სულ ხმელა პური და ცივი წყალი ხომ ხედავ, ჩვენს ბედობაზე ოთხით მავალი კატაც არ კნავის ადე, წადი სადმე, სამუშაო იშოვე, მთელი ქვეყანა ჩვენ დაგვცინის. როდემდე ვისხდეთ ასე გაციებულ კურაზეო?

— კარგი, წავალო, — უთხრა ქმარმა, — ოღონდ სამი პური გამომიცხვეო.

ცოლმა ქმარს მაშინვე გამოუცხო სამი პური. ქმარმა სამივე ილღიაში ამოიჩარა და გზას გაუდგა.

იარა, იარა და, კარგა მანძილი რომ გაიარა, ერთი ცხენოსანი წამოეწია. გაიცნეს ერთმანეთი. ცხენოსანმა უთხრა:

— პეტრე მქვია, რაკი ორივენი ბედის საძებრად მივდივართ, ერთი გზა გვქონია, ჩვენი ჭირი და ლხინი საზიარო იყოს, დღეიდან მეგობრები გავხდეთო.

ცოტა-გზაც რომ გაიარეს, ცხენოსანმა უთხრა:

— რაღა ხელით ზიდო, ბარემ ეგ პურები აქ მომეცი, ხურჯინში ჩავაწყობ და შენც უფრო ხალვათად იქნებიო.

გაბრიელმა პურები მიაწოდა, ცხენოსანმა სამივე ხურჯინში ჩაალაგა და დაწინაურდა. დაღმართი. რომ ჩაათავეს და გაივაკეს, გაბრიელმა თვალი შეასწრო, პეტრე პურსა ჭამდა, მაღა გაეხსნა და უთხრა:

— მოდი, შევისვენოთ, პური ვჭამოთ, მეც მომშივდაო.  
ცხენოსანი დათანხმდა. გასწიეს და წყაროს მიადგნენ.  
პეტრე ცხენიდან ჩამოსტა, ხურჯინიდან პურები ამოიღო,  
ერთი გაბრიელს მიაწოდა, ერთს თვითონ შეექცა.

ჭამა რომ დაამთავრეს, გაბრიელმა უთხრა:

— რა ვქნა, შიმშილს ისე შევუწუხებივარ, ამ ერთმა პურ-  
მა ნაწლავის ყურშიც არ გამიარა, რაც იყოს, იყოს, მოდი  
ის ერთი პურიც ამოიღე, ბარემ ისიც ზედ მივაყოლოთო.

პეტრე ახტა და დახტა:

— რას მიედებ-მოედები, გიჟი ხომ არა ხარ, სად იყო სა-  
მი პური, შენ ხომ ორი პური ჩამაბარეთ?!

გაბრიელი შეეხვეწა:

— ხომ სამი პური მოგეცე, ოღონდ გამოტყედი და უსა-  
ყვედურო იყოს შენზე ის მესამე პურიო.

გაჯიუტდა პეტრე, მოჰყვა ფიცს, დედ-მამა აღარ დატო-  
ვა საფლავში: — არა, ღმერთი, რჯული, მარტო ორი პური  
იყო!

მეტი რა გზა იყო, დაანება გაბრიელმა თავი და განაგ-  
რძეს გზა. ბევრი იარეს, თუ ცოტა იარეს, მიადგნენ სოფელს.  
ერთ ოჯახში ბაღლი უკვებობდათ. ერთი წიოკი და ვაი-ვაგ-  
ლახი ედგათ. ექიმებსაც ხელი აეღოთ: სულ ერთია, აღარ  
გადარჩებაო.

გაბრიელს ექიმის ხელობა მდიდრების კარზე მოჯამაგი-  
რობაში ესწავლა და ეს ცოდნა ახლა გამოიყენა. მივიდა  
ავადმყოფი ბავშვის მამასთან და მოახსენა:

— ნუ სწუხხართ, დამშვიდდით, მაგ ბავშვს ახლავე მო-  
ვარჩენო.

მამა სიხარულით ცას ეწია და გაბრიელს შეეხვეწა:

— ოღონდ ეს ბავშვი მომირჩინე და, რას იტყვი, რომ არ  
ზოგცე, ქვას ქვაზე დავადნობ და ჩემს სიტყვას არ გავტყხო.

გასინჯა გაბრიელმა ავადმყოფი, გაკვეთა მუცელზე,  
ამოსჭრა რალაც და გაკერა ხელახლა. ბავშვი მაშინვე შეე-  
ღივით წამოსტა და სიხარულისაგან ცეკვა დაიწყო.

ეს რომ იქ შეგროვილმა ხალხმა დაინახა, ერთმანეთს  
აღარ აცდიდნენ, ვინ ხელს ართმევდა, ვინ ჰკოცნიდა, ვინ  
ესვოდა...

— რამდენი ტომარა ოქროთი დაგასაჩუქრო? — ჰკითხა გაბრიელს ბავშვის მამამ; ჯერ კიდევ ვერ გამორკვეულიყო და თავი სიზმარში ეგონა.

— ნახევარი ტომარა ოქროც მეყოფათ, — უბასუსა გაბრიელმა.

— აგრე მცირე საჩუქარი რა სათქმელია, როცა სულთმობრძავი ბავშვი სიკვდილს გადამირჩინე! ჰა, მითხარ, რამდენ ტომარა ოქროს წაიღებ? — აღარ ეშვებოდა ბავშვის მამა. მეტი მაინც რომ ვერ ათქმევინა, რაღას იზამდა, ადგა და ნახევარი ტომარა ოქრო გაატანა.

გზას გაუდგნენ, გაბრიელი — ფეხით, პეტრე — ისე ცხენით. სოფელს რომ გასცდნენ, პეტრემ უსაყვედურა და უსაყვედურა:

— არაფრის შნო შენ არა გაქვს, ექვსი ტომარა ოქრო მაინც ღირდა იმ ბავშვის მორჩენა, შენ კი ნახევარ ტომარას დასვვერდი. მთელი შენი წუთისოფელი ჭურში იჯექი, ხეპრევე და ჩიტირეკიავ? ჩქარა გამიყავი ჩემი წილი ოქრო, შენისთანა რეგვენთან მგზავრობა რა ხელს მომცემს, მე ჩემთვის წავალ, ექიმობა სომ მეც ვისწავლეო!

დათანხმდა გაბრიელი, მისცა თავისი წილი ოქრო და ერთი ერთ მხარეს წავიდა, მეორე — მეორე მხარეს.

მაგრამ თავისი გზიდან მალე მობრუნდა გაბრიელი: „მოდე ერთი იმ ცხენოსანს გავეყვები, ვნახავ, როგორ მოარჩენს ავადმყოფს, ასე მალე როგორ ისწავლა ექიმობაო“, — გაიფიქრა გულში და ცხენოსნის გზას გაუდგა.

იარა და იარა. შუადღისას ერთ დიდ ქალაქს მიაღწია, მაგრამ რას სედავს: ქალაქის უშველებელი მოედანი ხალხითაა გაჭედილი, დგას ერთი ფაციფუცი, ყველას სახეზე შიში და განცვიფრება აღბეჭდილა. უფრო ახლოს რომ მიიწია, მოედნის შუაგულში აღმართულ სასწრაფოებს მოჰკრა თვალი. იქვე მეფე და ვეზირები ბრძანდებიან. აგერ, ჯალათმა ვილაც კაცს მარყუჟში გააყოფინა თავი.

გაბრიელმა აქა-იქ იკითხა:

— რა მოხდა, ვინ არის ეგ კაცი, ან რისთვის სჯიან სიკვდილითო?

— ხელმწიფეს დაჰპირდა, ქალს მოვირჩინო, ვერ მოარჩინა და სჯიან მაგიტომო, — უპასუხეს გაბრიელს.

მიაშტერდა გაბრიელი სახრჩობელაში თავგაყოფილს: „ეს ხომ პეტრეაო!“ — გაუელვა თავში, არც აცია, არც აცხელა, ცმწამსვე მეფის ვეზირებთან გაჩნდა და შეეხვეწა:

— ძალიან გთხოვთ, ეგ კაცი ჩამოხსნათ, ჩემი ძველი ნაცნობია, რაღაც უნდა ვუთხრა, თუ დამთანხმდა, თქვენს ქალს ორივენი მოვარჩინო, თუ არადა, სად გაგეპცევათ, მერე ჩამოახრჩეთო.

მეფემ და ვეზირებმა გაბრიელის თხოვნა შეისმინეს და პეტრე ჩამოხსნეს. გაბრიელმა პეტრე განზე გაიხმო და უთხრა:

— ოღონდაც თქვი, რომ სამი პური იყო, და სიკვდილისაგან გადაგარჩენ, ეს ქალიც ორივემ ერთად მოვარჩინოთ და აღებული ფულიც შუაზე გავიყოთო.

პეტრე მაინც თავისას არ იშლიდა:

— არა, ორი პური იყო!

რა არა სცადა გაბრიელმა, მაგრამ არ იქნა და პეტრეს სიმართლე ვერ ათქმევინა.

— მე ჩემი სათქმელი ვუთხარი, ახლა თქვენ თვითონ იცითო, — მოახსენა გაბრიელმა ვეზირებს, თან მოუბოდიშა: — დრო წაგართვითო.

ადგნენ და პეტრეს ისევ გააყოფინეს მარყუქში თავი.

— ახლა მაინც გამოტყდი, რომ სამი პური მოგეცე და სიკვდილისაგან გიხსნიო, — ასძახა გაბრიელმა სახრჩობელაში თავგაყოფილს. — სამი კი არა, ორი იყო! — ჩამოსძახა პეტრემ.

— „ოხ, შენ თუ სიმართლე არ გათქმევინე, კაცი ნუ ვყოფილვარო“, — გაიფიქრა გაბრიელმა და ვეზირებს მოახსენა:

— ჩამოხსენით ეგ რეგვენი, ავადმყოფს მე მოვარჩინო.

ვეზირებმა გაბრიელს თხოვნა შეუსრულეს, პეტრე ისევ ჩამოხსნეს.

გაბრიელმა სასწრაფოდ მოარჩინა ავადმყოფი, ხელმწიფის ქალს ისევ თავისი სილამაზე და ლაზათი დაუბრუნდა.

ხელმწიფეს სიხარულით ფრთები შეესხა, მივიდა გაბრიელთან და ჰკითხა:

— რა მოგცეო?

— ორი ტომარა ოქრო, მეტი არ მინდაო, — მიუგო გაბრიელმა.

ხელმწიფე რამდენს არ ეჩიჩინა: — მეტი აიღე, დღეს ჩვენთვის ამომავალი მზე სართ, მაინც არაფერმა გასჭრა.

აიღეს საფასური და გზა განაგრძეს. ცხენოსანი ისევ წაეჩხუბა:

— ეგ ოქრო გინდა ცალ ყურში ჩამაყარე, რატომ მეტი არ გამოართვი, მომეცი ჩქარა ჩემი წილი, მე ისევ ჩემთვის წავალთ!

ღარიბი უარს როგორ ეტყოდა. გავიდნენ თუ არა ვაკეზე, გაბრიელმა წამოყარა ოქროები და გაყოფა დაუწყო. უყურებს პეტრე და გუნებაში უკვირს: ჩვენ ხომ ორნი ვართ და ამ ოქროს საშად რადა ჰყოფსო?

— აბა, ახლა გავიყოთო, — უთხრა გაბრიელმა და დაიწყო: — ეს ერთი გროვა — მე, ეს ერთი გროვა — შენ, ეს მესამე კი.....

— მესამე გროვა ვიღასო? — ვეღარ მოუთმინა გულმა პეტრეს.

— მესამე გროვა იმას, ვინც მესამე პური შეჭამაო! — უპასუხა გაბრიელმა.

— მესამე პური მე შევჭამე და ეგ მესამე გროვაც მე მერგებაო! — გამოტყდა პეტრე.

გაბრიელს გაეღიმა:

სირცხვილი შენი, სასრჩობელამ ვერ გათქმევინა სიმაართლე, ოქრომ კი გათქმევინაო.

ჭირი — იქა, ლხინი — აქა,  
ქატო — იქა, ფქვილი — აქა.







## უქნარა

იყო და არა იყო რა, იყო ერთი ცოლი და ქმარი. ქმარი, მეტისმეტი უქნარა და ზარმაცი, არაფერს აკეთებდა: ან იჯდა და ჭამდა, ან იწვა და ხან ერთ გვერდზე გადაბრუნდებოდა, ხან — მეორეზე. ცოლი კი, რაც ძალი და ღონე ჰქონდა, შრომობდა, იმასაც კვებავდა და აცმევდა და თავის თავსაც. მაინც მეტად ღარიბად ცხოვრობდნენ. იმათ ბედობაზე მართო ერთი გაოსრებული მამული იყო სადღაც შორს, რიყესა და ქვაზე. — ჭინჭრისა და ლოლოს მეტი იქ არც არაფერი იდგა და არც არაფერი მოდიოდა.

ერთ გაზაფხულზე ცოლმა სთხოვა მეზობლებს და ეს მამული მოახვეწინა. მერე თესლი ჩამოითხოვა და დათესა, ყანა მოვიდა, რა ყანა, სულ ზღვასავით ღელავდა!

დადგა მკათათვე.

შემოვიდა ყანები.

ცოლმა უთხრა ქმარს:

— კაცო, ადექი, წადი, ნახე, იქნება იმ მამულზე არაფერი მოგვივიდა და ტყუილად გვაქვს იმედიო.

ადგა, როგორც იყო, უქნარა და წავიდა მამულის სანახავად, მაგრამ ნახევარი გზაც არ გაუვლია, დაბრუნდა ისევ უკან და ცოლს მოატყუა:

— იქ ვიყავი და ლოლოსა და ჭინჭრის მეტი არაფერი მოსულა, თესლი რაღაზე გადავყარეთ ტყუილადო.

ცოლმა იცოდა, როგორი ყანაც იდგა, და არაფერი უთქვამს. როდესაც ყანა სამკალი გახდა, ცოლმა უთხრა უქნარას:

— კაცო, ან სამკალს წადი, ან შინ დარჩი, რძე შედღვი-

ბე. კრუს-წიწილას საკენკი დაუყარე და თვალი დაიჭირე, ფქვილი გაცერი და პური გამოაცხვეო.

უქნარამ შინ დარჩენა არჩია. კრუს-წიწილა რომ არსად წასულიყო, აიღო ძაფის გორგალი, გადააბა ერთმანეთს წიწილები და კრუსი და ისე გაუშვა კალოზე. უცებ საიდანაც განდა ქორი, დააჟრინდა კრუს-წიწილას და გააქანა ყველა ერთად. უქნარამ აიკიდა ზურგზე საცერი, ფქვილიანი გუდა, სარძეული და ისე გამოუდგა: „კრუს-წიწილასაც დავაგდებინებ ქორს, ფქვილიც გაიცრება, რძეც შეიდღვიბება და ყველა საქმეს ერთბაშად გაეაკეთებო“. მაგრამ ვერც კრუს-წიწილა გააგდებინა და ფქვილიც დააბნია. დაბრუნდა უქნარა შინ, ცოტა არ იყოს, შეფიქრიანებული:

„რალა ვუთხრა ცოლს, საიდან ვუშოვო ან კრუს-წიწილა და ან ფქვილიო“. იფიქრა, იფიქრა და მოიფიქრა: „ეს კვერცხები სომ გვაქვს, აედგები და ჩავაწყობ გოდორში, შიგ მე ჩავეჯდები და, სანამ ჩემი ცოლი სამკლიდან დაბრუნდება, წიწილებს გამოვჩეკავო. მართლაც, აიღო და ჩააწყო კვერცხები ბუდეში, ზედ თვითონ დააჯდა და მოჰყვა კრუსკრუსს.

სალამოზე ცოლი დაბრუნდა სამკლიდან და ქმარს დაუძახა:

— კარი გამიღეო!

— კრუს, კრუს, კრუსი — მოესმა სახლიდან.

— კარი გამიღეო — გაუმეორა ცოლმა.

— კრუს, კრუს, კრუსი — ისევ მოესმა სახლიდან.

მესამედ დაუძახა ქმარს:

— სადა ხარ, სად დაიხაფრე და დაიკარგე, კარი გამიღეო!

მაგრამ ხმა არავინ გასცა, მარტო კრუსკრუსი ისმის. ადგა და შეამტვრია ცოლმა. კარი, შევიდა შინ და რას ხედავს! — მისი ქმარი ჩამჯდარა ქათმის საბუდარში და კრუსკრუსებს.

— რა არი, კაცო, ეგ რალა საქნელი იყო, რა მოგიგონია, რასა შვრები? ამოდი მაგ გოდრიდანაო!

— კრუს-წიწილა ქორმა წამართვა და კვერცხებს დავაჯექ გამოსაჩეკადო — უბასუსა ქმარმა.

— შენი გამოჩეკილი არ მინდა, — უთხრა ცოლმა, —

ამოდი მაგ გოდრიდანაო. — ამოიყვანა ბუდიდან ცოლმა უქ-  
ნარა ქმარი და დასვა კერაზე.

მეორე დღეს ცოლმა ჰკითხა უქნარას:

— აბა, რას იზამ, ისევე სახლს მოუვლი, თუ სამკალს წა-  
ხვალო?

— სამკალს წავალო, — უპასუხა ქმარმა. — თუ დღეში  
სამ ქათამს დამიკლავ: ერთს სადილად, ერთს სამხრად და  
ერთს ვახშმად, მარტოკა მე მოვპკი იმ მამულსაო.

— ოღონდ შენ ის ყანა მომკე და თუნდ ოთხ ქათამს და-  
გიკლავო, — უპასუხა ცოლმა.

წავიდა უქნარა ყანაში. მთელი დღე ორ-სამი ძნა ვერ გა-  
მოსჭრა, სულ ეგდო და ეძინა, სამი ქათამი კი შეჭამა.

ასე გავიდა სამი-ოთხი დღე. ყანა უკვე ჩაწვას აპირებდა.

ერთ დილას ადგა უქნარას ცოლი, ითხოვა ცხენი, კაცის  
ღანისამოსი ჩაიცვა, იარაღიც აისხა, შეჯდა ცხენზე და  
ქმრისაკენ გასწია. უქნარას რომ მიუახლოვდა, დაუძახა:

— მიმკალო, ერთი ზარმაცი კაცი ხომ არ იცი, ხელმწი-  
ფეს შვილი ჰყავს ავად, უკვდება და ზარმაცის ღვიძლი გვას-  
წავლეს, ის უშეელისო.

ზარმაცი შეშინდა და შეჰფიცა:

— არ მიზარმაცნია, კაცო, აი, ეს ერთი საათია, რაც შე-  
დავიწყე და მეტს როგორ მოვპკიდოო.

— თუ საღამომდის არ მოგიპკია ეგ ყანა, მოვალ, თავს  
მოგჭრი და ღვიძლს ამოგარიდებო, — უთხრა მგზავრმა და  
წავიდა.

ეცა უქნარა ყანას და საღამომდე დაამთავრა. მერე დაჯ-  
და დაღლილი და დაიწყო ქშენა, საღამოზე ცოლმა საწმელი  
მოუტანა, მაგრამ ჭამის თავი სადღა ჰქონდა, იჯდა და, რაც  
ძალი და ღონე ჰქონდა, კვნესოდა. ცოლმა განგებ ჰკითხა:

— რას დაუღლისხარო?

უქნარამ უამბო:

— ერთმა ხელმწიფის კაცმა გამოიარა და დამემუქრა:  
თუ საღამომდე ამ ყანას არ მოპკი, მოვალ, თავს მოგჭრი,  
ღვიძლს ამოგარიდებ და წავიდებო.

ცოლმა გული გაუკეთა:

— ნუ გეშინია, მოგიპკია, აღარაფერს გიტყვისო.

როგორც იყო, მოიტანეს ძნაც, გალეწეს და ჩაყარეს ხორ-  
ხალი, უქნარა ისევ ან იჯდა და ჭამდა ან იწვა და ხან ერთ  
გვერდზე გადაბრუნდებოდა, ხან — მეორეზე. დროდადრო  
ცოლს გასძახებდა:

— დედაკაცო, ღორს აჭამეო.

უქნარას ეს ერთი ღორი ჰყავდა და რაც რამ ებადა, სულ  
იმას აჭმევდა.

ერთხელ ცოლმა უთხრა:

— კაცო, ჩვენთვისაც არაფერი გვაქვს, რომ ვჭამოთ,  
შენ კიდევ ღორს აჭმევ, მოვიშოროთ, დავკლათო.

— სანამ ქონი ტყავს გარეთ არ გამოვია, არ დავკლა-  
ვო, — უპასუხა ქმარმა.

ცოლი ადგა, გაათბო ერბო, მიასხა ღორს, მიიყვანა  
ქმართან, აჩვენა და უთხრა:

— აი, ისე გასუქებულა, რომ ქონი გამოსდისო.

უქნარამაც დაკლა თავისი საყვარელი ღორი, რადგანაც  
მუცელი უფრო უყვარდა. ღორის ხორცს მალე მოუღო ბო-  
ლო. ცოლმა ერთი ბარკლის დამალვა ძლივს მოასწრო. ქმარ-  
მა შეიტყო, რომ ცოლმა ღორის ბარკალი დაუმალა და გა-  
დაეკიდა; მომეცო.

ცოლმა უარი მოასხენა.

— მოვკვდები, თუ არ გამომიჩენო, — უთხრა უქნარამ  
ცოლს. ცოლმა კიდევ უარი სტკიცა.

— მოვკვდებიო, — უთხრა კიდევ უქნარამ.

— მოკვდი, თუ მოკვდები, ვის დააკლდებიო, — არ და-  
უთმო ცოლმა.

ადგა უქნარა, წაწვა ტახტზე, დასუჭა თვალები, გაინაბა  
და მოიმიკვდარუნა თავი. ცოლმა ყასიდად დაიწყო ტირილი.  
მოიყვანა მღვდელი, გააკეთებინა კუბო და ჩადეს შიგ უქნა-  
რა. ცოლი ერთხელ კიდევ მივიდა ქმართან და წასჩურჩულა:

— გაცოცხლდი, თორემ დაგმარხავთო.

— მკედარი ვარ, როგორ გავცოცხლდეო, — უპასუხა  
ქმარმა.

— გაცოცხლდიო, — დაუყინა ცოლმა.

— თუ ღორის ბარკალს მომცემ, გავცოცხლდებიო, —  
უთხრა ქმარმა.

— არაო, — უპასუხა ცოლმა.

— მაშ, არც მე ავდგებიო.

წაიღეს უქნარა და დაასვენეს ეკლესიაში.

რომ დაღამდა, უქნარას ცოლი ადგა, მივიდა საყდრის კარებთან და დაიძახა:

— მკვდარნო, ასაღნო და ძველნო, გეყურებოდეთ, ადუქით, ცაში საყდარი შენდება — ვინც ასალი მკვდრები ხართ; ორას-ორასი აგური უნდა აიტანოთ და ვინც ძველნი — ასასიო.

უქნარამ იფიქრა: ვაჟო, მე აქ ხუთ აგურსაც ვერ მოვრევივარ და იქ ორასი როგორ უნდა ავიტანო.

წამოსტა და მოკურცხლა ეკლესიიდან.

ის დღე იყო და ის, აღარც მომკვდარა, აღარც ღორის ბარკალი მოუკითხავს და აღარც ერთი გვერდიდან მერრეშე უგორავია. მუდამ შრომობდა და იყვნენ ტკბილად და შლიდრად.

ჭირი — იქა, ლხინი — აქა,  
ქატო — იქა, ფქვილი — აქა.





## ორი ქურდი

იყო და არა იყო რა, ღვთის უკეთესი რა იქნებოდა, იყო ერთი მეტად ხელმარჯვე ქურდი. მოუპარავს არაფერს უშვებდა და თანაც ისე ოსტატურად ქურდობდა, კაციშვილი ვერაფერს უგებდა. რომ იტყვიან, კაცს თვალიდან ბეწვს ამოაცლისო, სწორედ ისეთი იყო.

ერთხელ გზის პირას, კაკლის ჩრდილში ისვენებდა და კიდევ სად რა მოეპარა იმაზე ფიქრობდა. ამ დროს ერთი კაცი მიუახლოვდა და გამარჯობა უთხრა.

— გაგიმარჯოსო, — მიუგო ქურდმა.

— ვინა ხარ და ამ საქმის დღეს ჩრდილში რასა ზიხარო? — ჰკითხა კაცმა.

— ვინა ვარ და ქურდი ვარო.

— რისი მოპარვა შეგიძლიაო?

— აგე, ხეზე ჩიტს ბუდე აქვს და თვითონაც შიგა ზის, ისე ამოვაცლი კვერცხებს, რომ ვერ გაიგებს და არ აფრინდებაო.

— თუ მაგას მართლა იზამ, მაშინ ვიტყვი, რომ ქვეყნად შენი ბადალი ქურდი არ ყოფილაო. — უთხრა კაცმა.

— მაშ კარგი და, მიყურეო, — თქვა ქურდმა და ხეზე ჩრდილივით უხმაუროდ აცოცდა, შეუყო ხელი ჩიტს, ამოაცალა კვერცხები, ჩაილაგა უბეში და შეუმჩნეველად უკანვე ჩამოცოცდა. ჩიტმა ვერაფერი გაიგო.

— ამოაცალე კვერცხებით? — ჰკითხა კაცმა.

— ერთიც აღარ დაუტოვეო, — მიუგო ქურდმა.

— აბა, მაშ, მაჩვენე, სადა გაქვსო.

ქურდმა ჩაიყო ხელი უბეში, მაგრამ სადღაა კვერცხები!

მაშინ კაცმა თავისი უბიდან ამოიღო კვერცხები, ქურდს გაუწოდა და სიცილით უთხრა:

— თხა თხაზე ნაკლები მგელმა შეჭამოსო!

— მაშ შევამხანაგდეთ და ერთად ვიქურდოთო, — უთხრა ქურდმა.

— შევამხანაგდეთო, — დათანხმდა კაცი. მერე ჰკითხა ქურდს, — ახლა ვინ გავძარცვოთო?

— ვინც ყველაზე მდიდარიაო, — მიუგო ქურდმა.

— ვინ არის ყველაზე მდიდარიო? — ჰკითხა კაცმა.

— ვინა და ხელმწიფეო. ხელმწიფის საზინაზე სულ თვალი მეჭირა, მაგრამ მარტოკა ვერ ვებედავდი. ახლა კი, რაკი შენც გვერდით მეყოლები, შიში აღარაფრისა მაქვსო.

შეეჩვივნენ ამ ღლიდან ეს ქურდები ხელმწიფის საზინას და კინალამ გაანახევრეს. ხელმწიფემ სასახლის ყველა კუთხე-კუნჭულში დარაჯები დააყენა და თან სასტიკად გააფრთხილა, — თუ კიდევ რამე დაკარგულა სასახლიდან, ცოცხლებს არ გაგიშვებთო.

დარაჯებმა მეტი სიფრთხილისათვის სასახლის კარიბჭესთან კუპრწასმული ხალიჩა დაფინეს, რომ თუ ვინცობაა ვინმე შევიდოდა, ფეხი კუპრით დაესვრებოდა და ქურდს ნაკვალევით მაინც მიაგნებდნენ. მაგრამ ქურდები რის ქურდები იყვნენ, თუ ამ ხრიკს ვერ მიუხვდებოდნენ და დარაჯებს პირში ჩალაგამოვლებულებს არ დატოვებდნენ. კარებთან მისვლისთანავე მიხვდნენ, რაშიც იყო საქმე, და ხრიკს ხრიკი დაუსვედრეს: ერთმა სასახლეს მეორე მხრიდან მოუარა, განგაში ატეხა: — ქურდები, ქურდებიო! და სიბნელეში მიიმალა. დარაჯები წამოცვივდნენ და თავქუდმოგლეჯილები სასახლის უკანა კედლისაკენ გაიქცნენ. ამასობაში მეორე ქურდმა კუპრწასმული ხალიჩა სადარაჯოს წინ გააფინა. შევარდა სასახლეში, დახვეტა, რასაც კი მოერეოდა, და შეუმჩნეველად უკანვე გამობრუნდა.

გათენდა დილა. ხელმწიფე გამობრძანდა და ნახა, რომ კუპრზე დარაჯების ნაფეხურები დარჩენილიყო, დარაჯები იმავე დღეს ჩამოახრიობინა, მაგრამ ამით საზინას არაფერი ეშველა, — ისევ ხან რა იკარგებოდა, ხან — რა.

ხელმწიფემ ბოლოს გადაწყვიტა, თვითონ ედარაჯნა

ქურდებისათვის და მათ აღმოსაჩენად ასეთ ხერხს მიმართა სასახლის კარიბჭის წინ დიდი ხალიჩა გააშლევინა და ზედ ოქროს ფული მიმოაბნია. დაიბარა მთელი ქალაქი და სასახლის კარიბჭეში შესვლა უბრძანა. ხელმწიფის აზრით, ვინც ფულს დაწვდებოდა ან დააშტერდებოდა, ქურდიც ის იქნებოდა. ქურდებმა ეს ჩანაფიქრიც ამოიცნეს და კვლავ ხერხს მიმართეს: ახლა თვითონ წაისვეს ფეხსაცმლის ძირებზე კუბრი და ისე გაიარეს ხალიჩაზე. კუპრწასმულმა ფეხსაცმელმა მთელი ფული ზედ აიკრო. ხედავს ხელმწიფე, რომ ხალიჩაზე ფული აღარ არის, მაგრამ ვის დააბრალოს? არც ძირს ვინმე დახრილა და არც თვალი ვისმე გაშტერებია.

ხელმწიფე საგონებელში ჩავარდა: რა ქნას, რა მოუხერხოს ამ გათავსებულ ქურდებს, რით გადაარჩინოს საზინა დალუპვას? იდარდა, იდარდა და ბოლოს ავად გახდა.

ერთ დღეს ხელმწიფემ მეზობელი ხელმწიფის გამოგზავნილი წერილი და ქალის ლერიაქი მიიღო. ხელმწიფე სწერდა: „ქურდებმა საზინა გაგინახევრეს, საუკეთესო დარაჯები ტყუილუბრალოდ დაგახოცინეს, ოქროს ფულები თვალწინ აგაცალეს და ქურდები ჯერაც ვერ გიპოვნია. შენ კაცი კი არა, დედაკაცი ყოფილხარ და ამ ლერიაქსაც ამიტომ გიგზავნი, დაიხურე და ისე იარეო.“

განრისხდა ხელმწიფე, ცალკე სირცხვილისა და ცალკე ჯავრისაგან გულზე სულ ცეცხლი მოეკიდა. ავადმყოფობაც დაავიწყდა, წამოდგა ლოგინიდან და საჯაროდ გამოაცხადა:

— ვინც იმ ხელმწიფის ჯავრს ამომყრის, თუნდაც თვითონ ის ქურდები იყვნენ, ყველა დანაშაულს ვაპატიებ და კარგადაც დავასაჩუქრებო.

მაშინ წამოდგნენ ქურდები წინ და მოახსენეს:

— დიდებულო ხელმწიფე, ჩვენ ვართ ის ქურდები და იმ ავყია ხელმწიფის ჯავრსაც ჩვენ ამოგყრითო. მხოლოდ ერთი ისეთი კიდობანი გაგვიკეთებინეთ, რომ ადამიანი თავისუფლად ჩაეტიოს, მოგვეცით თეთრი სუდარები, ჟღარუნებიანი ჯოხები, კარგი, ფეხმარდი ცხენები და დანაძრენი ჩვენ ვიცითო. თქვენ მშვიდად დაიძინეთ და იმ ხელმწიფეს ერთ კვირაშივე ქვეყნის მასხარას გავხდითო.



სელმწიფემ მისცა ქურდებს ყველაფერი, რაც მოსთხოვეს, და ისინიც გაულგზნენ უზას. მივიდნენ მკნობელი სელმწიფის სასახლესთან, ცხენები გარეთ დამალეს, თვითონ კი ბაღში შეიპარნენ. როცა დაღამდა, ყველამ დაიძინა და სასახლე მთლიანად მიჟუნდა, ჩუმად აიპარნენ აივანზე. მოიხვიეს ზეწრები და ჟღარუნებიანი ჯოხები ააჟღარუნეს. სელმწიფეს გამოეღვიძა, გამოიხსედა ფანჯარაში და რას ხედავს! აივანზე თეთრ სუღარებში გახვეული მოჩვენებანი დგანან და ეყვნებს აჟღარუნებენ. სელმწიფემ გამოაღო ფანჯარა და აკანკალებული სმით ჰკითხა:

— ვინა ხართ და რას აკეთებთ?

— ჩვენ სულთამსუთავი ანგელოზები ვართ, — უთხრეს ქურდებმა, — ღმერთმა შენს წასაყვანად გამოგვეზავნა და მოემზადე, თანაც იცოდე, იმდენი ცოდვა გაქვს ამქვეყნად ჩადენილი, რომ შენი სული პირდაპირ ჯოჯოხეთში მოხვდებაო.

— არ შეიძლება, ცოდვები მოვინანო და სამოთხეში მოვხვდეთ? — ჰკითხა გულგახეთქილმა სელმწიფემ.

— შეიძლება, თუ მთელს შენს სიმდიდრეს ისე დაურიგებ ქვრივ-ობლებს, რომ შენთვის ერთ გროშსაც არ დაიტოვებო.

— რაღა ოხრად მინდა სიმდიდრე, თუ მე აღარ ვიქნები, — თქვა სელმწიფემ, — სვალვე უკანასკნელ მისსლამდე დავარიგებო.

— რაკი ასე იზამ, ჩვენც შეგიბრალებთ და ჯოჯოხეთის მაგიერ სამოთხეში წაგიყვანთო, — შეჰპირდნენ ქურდები.

მართლაც გათენებლისთანავე სელმწიფემ დაიბარა მთელი თავისი საყმო და რაც რამ ქონება და ძვირფასეული გააჩნდა, უკლებლივ დაურიგა. მერე გულხელდაკრფილი დაჯდა გამოცარიელებულ სასახლეში და დაუწყო, ლოდინი სულთამსუთავებს. დაღამდა თუ არა, ქურდებმა მოიხვიეს ზეწრები, ავიდნენ აივანზე და სელმწიფე ისევ ეყვნების ჟღარუნით გამოიხმეს. ჩამოიყვანეს ძირს, გახადეს ტანსაცმელი, აუსვიეს თვალები და ჩასვეს კიდობანში. თან გააფრთხილეს, ოღონდ იცოდე, პირდაპირ სამოთხეში რომ მოხვდე, ამისათვის სამი რამეა საჭირო და ეს წესი ზუსტად უნდა აასრულო: როცა ძაღლივით დავიყუფოთ, შენც კიდობანში დაიყუ-

ფე, კატასავით დავიკნავლოთ, დაიკნავლე, მამალივით დაიყვივლოთ, შენც დაიყვივლე, გზაზე სამი ბეწვის ხიდი გვაქვს გასავლელი და მათზე სხვანაირად გავლა არ შეიძლება, კუბარის წყალში ჩავცვივდებითო. მანამდე კი ჩუმად იჯექი და კრინტი არაფერზე დასძრაო.

ხელმწიფე, რა თქმა უნდა, ამაზეც დათანხმდა.

წამოჰკიდეს ქურდებმა ცხენს კიდობანი, თვითონაც ცხენებზე შესდნენ და გამოსწიეს თავიანთი ხელმწიფისაკენ. შეიტანეს კიდობანი სასახლის ეზოში, მოუყარეს ხალხს თავი, მოიწვიეს მესაკრავენი, ხელმწიფეც გამობრძანდა თავისი ამალით, ყველა მოუთმენლად მოელის, რა მოხდება.

ქურდები მივიდნენ კიდობანთან და ძაღლივით დაიყვივეს, დაიყეფა ხელმწიფემაც კიდობანში, მერე კატასავით დაიკნავლეს და კიდობანში ხელმწიფემაც კნავილი გააბა, ზოლოს მამალივით დაიყვივლეს და ხელმწიფემაც ყვილი ატეხა. მერე ქურდებმა მესაკრავეებს საცეკვაო დააკვრევენეს, გახსნეს კიდობანი, ამოიყვანეს დედიშობილა ხელმწიფე და უთხრეს:

— აი, სამოთხე ეს არის და იცეკვეო.

დაუარა ტიტლიკანა ხელმწიფემ და ჩაბუქნა. ხალხმა ხარხარი ატეხა. ხელმწიფე ახლა კი მიხვდა, რაც დაემართა და დარცხვნილი ისევ კიდობანში ჩაჯდა.

მაშინ აიღეს ქურდებმა იმისი გამოგზავნილი ქალის ლეჩაქი და დაახურეს თავზე, თან დააყოლეს:

— ჩვენს ხელმწიფეს მარტო ფულებს ვპარავდით, შენ კი თვითონვე მოგიპარეთ და საფხოვრებელიც უკანასკნელ გროშამდე დაგინიავეთ. ეს ლეჩაქი შენ უფრო გეკუთვნის და მთელი სიცოცხლე უსაყვედუროდ ატარეო.

ხელმწიფემ შეპირებისამებრ აპატია ქურდებს მთელი დანაშაული, მისცა სახლები, სარჩო-საბადებელი და ხაზინის მცველებად დანიშნა. ქურდებმაც დააფასეს ხელმწიფის ნდობა და ისეთი ერთგულება გამოიჩინეს, რომ იმ დღიდან არც სასახლეში და არც ქალაქში ფეტვის მარცვალიც აღარ დაკარგულა.

ჭირი — იქა, ლხინი — აქა,  
ქატო — იქა, ფქვილი — აქა.



## მამასახლისი და გლეხის ბიჭი

იყო და არა იყო რა, ღვთის უკეთესი რა იქნებოდა, ერთ სოფელში ცხოვრობდა ერთი ყოჩაღი გლეხის ბიჭი. ჰყავდა ღრმად მოსუცი მამა და ძალიან ლამაზი ცოლი. ბიჭი მეტი-მეტად გამრჯე იყო და გლეხის კვლობაზე მდიდრად ცხოვრობდა. ცოლსაც კარგად ინახავდა, სულ ფარჩა-აბრეშუმს აცმევდა და გამტკიცულ პურსა და შემწვარ-მოხრაკულს არ აკლებდა.

ქალმა პატივი ვერ შეიშენია და სოფლის მამასახლისი შეიყვარა. ქმარზე და ოჯახზე გული აიცრუა. აღარც მოსუცი მამამთილს სცემდა ძველებურად პატივს, ქმარი და მამამთილი სულ ხმელა პურზე გადაჰყავდა და მათს მონაგარს მამასახლისს აჭმევდა.

ქმარმა შეუტყო ცოლს ღალატი, მაგრამ არაფერი თქვა და მარჯვე დროს დაუწყო ლოდინი. ერთხელ მამა-შვილი სახნაუად წავიდნენ. ბიჭმა ცოლს უთხრა:

— გემრიელი სამხარი გაგვიკეთე და ამოგვიტანეო.

სამხრობამ რომ მოაწია, ცოლმა გამოკრა ხელსახოცში დაობებული ხმელი პურები, ხახვი, ნიორი, ერთი ჯამი ლობიოს შეჭამანდი და წაუღო. ბერიკაცი გაწყრა და რძალს უსაყვედურა:

— რა არის, შვილო, რომ სულ ხმელი პური და ხახვ-ნიორი მოგაქვს, განა ჩვენ სახლში ამაზე უკეთესი საჭმელი არაფერი მოინახებაო?

რძალმა ბუზღუნნი დაიწყო:

— რა ჩემი ბრალია, მამამთილო, მე რომ ფქვილის გაც-

რას დავიწყებ, თქვენი შვილი გვერდით დამიჯდება, უბრაავს ფქვილს და სულ ქარს ატანსო.

ბერიკაცი ახლა შვილს გაუწყრა:

— ბიჭო, ჭკუით, თორემ მიგბეგვავ, იცოდეთო.

რალას იზამდნენ, რაკი სხვა არაფერი ჰქონდათ, ამ ღარიბ სამხარზე უნდა გადასულიყვნენ: ისამხარეს. ცოლი უკან გაბრუნდა, ხოლო მამა ჩრდილში წამოწვა. შვილმა უთხრა:

მამი, შინ გავიქცევი და, სანამ შენ თვალს მოატყუებ, ისევ მოვალო.

მამამ ნება დართო. გაიჭრა ბიჭი მოკლე გზით და ცოლს შინ მისვლა დაასწრო. შევარდა შინ და რას ხედავს: გაშოტილა ტახტზე მამასახლისი, დაუღია ხახა და ხვრინავს. ტაბლახზე გამტკიცული შოთები და ნაზუქები აწყვია, ცეცხლზე ერბო დულს. აიღო ბიჭმა ადუღებული ერბო, ჩაასხა პირში მძინარე მამასახლისის და ისევ მინდორში გაიქცა.

მოვიდა ცოლი, ნახა დამდურული მამასახლისი და შემოიკრა თავში:

— შე ჩემი ცოდვით სავსეე, რა გაგიჭირდა ისეთი, რომ ცოტახანს ვერ მოიცადე, მოვიდოდი და გემრიელად გაჭმედიო.

ბევრი იტირა და ივიშვიშა, მაგრამ რალას უშველიდა. ბოლოს ასე გადაწყვიტა, — მკვდარს ტახტქვეშ დავმალავ და ღამით, ყველა რომ დაიძინებს, ხრამში გადავავებო, — ჩამოიღო მკვდარი მამასახლისი და ტახტქვეშ შეაცურა.

სალამოზე მოვიდნენ მამა-შვილიც. დაიხადეს ქალამნები და ტახტქვეშ შეაწყეს, ქალამანი რალაცას წამოედო. შეისხედა ბიჭმა და დაიძახა:—მამი, აქ ვილაც მკვდარი წევსო.—გამოათრიეს და ნახეს, მამასახლისია. შემოეყარა გულზე მამას, ეს რა ღვთის წყრომია ჩვენს თავს, ვინ გავვიხადა საქმე საციმბიროდო!

ბიჭმა დაამშვიდა:

— მამაჩემო, შენ არ შეგეშინდეს, ამ მკვდარს მე მოვიშორებ და ბლომა ფულსაც ვიშოვიო.

ბიჭს მღვდლის ჯავრი სჭირდა, ეს მღვდელი მართლაც მეტისმეტი გაუმადლარი იყო და შესაწირავით ხალხს სულსა

ხდიდა. ბიჭმა წამოიკიდა მკვდარი მამასახლისი, წაიღო ეკლესიაში და გალავნის უკან დამალა. თვითონ სამრეკლოზე ავიდა, დარეკა ზარები, ჩამოხტა და დაიშალა.

მღვდელმა გაიგონა ზარის რეკვა და ცოლს უთხრა:

— ადუ, ქალო, წყალი შედგი, არ გეყურება, ზარებს რეკავენ, ვილაცა შესაწირავს მოიტანდაო.

ადგა გახარებული ფოფოღია და წყალი შემოდგა, იმედი აქვს, ცხვარი თუ არა, ხარის ბარკალი მინც იქნებაო, გავიდა მღვდელი ეკლესიაში, მაგრამ იქ არც მლოცველი დახვდა და არც შესაწირი.

დაბრუნდა გაწბილებული უკან და დაწვა. არ გასულა დიდი ხანი, რომ ბიჭმა ისევ ატეხა ზარების რეკვა. მღვდელიც ისევ გავიდა, მაგრამ არც ახლა დახვდა ვინმე. დაბრუნდა შინ გაჯავრებული და დაწვა.

ბიჭმა წამოიღო მკვდარი მამასახლისი და ეკლესიის კარებთან კედელზე ააყუდა. თვითონ ისევ ზარები დარეკა და დაიშალა. გამოვარდა მღვდელი, მოგლიჯა ერთი უშველებელი მარგილი და გაქანდა ეკლესიისაკენ, მივიდა, ხედავს, კარებთან კაცი დგას, ხელში არც შესაწირავი უჩანს, არც სხვა რამე. გაცეცხლებული მღვდელი პირდაპირ მივარდა და მარგილი დაუშინა, — შე ასეთ-ისეთო, შენა ხარ, რომ ძილი აღარ დამაცალეო!

მოწყდა მკვდარი კედელს და მიწაზე გაიშლართა. მღვდელმა დახედა, იცნო მამასახლისი და თავზარი დაეცა. ემანდ არავინ შემომესწროსო, საჩქაროდ წამოიკიდა ზურგზე და სახლისაკენ მოცოცხა. ცოლს შესძახა, — ჩქარა კარი გამიღეო! ფოფოღიას უხარია, შესაწირი მოდისო, და ქმარს გასარებული ეკითხება, — რა მოგაქვს, შენი ჭირიმეო?

— შენი ჭირიც და ჩემიც ერთად მომაქვსო, — მიუგო მღვდელმა და ცოლს წინ მკვდარი მამასახლისი გაუჭიმა.

აქეთ ქალმა წაიშინა თავში ხელი, — დავიღუპეთ და ეგ არისო, იქით მღვდელმა. ამ დროს გაიღო კარი და ოთახში ეს გლეხის ბიჭი კი შევიდა, ხელში ერთი მოზრდილი ქვამარილი უჭირავს. ეუბნება მღვდელს:

— მამაო, მამაჩემმა ეს მარილი საკურთხევლად წამომადებინა და გვიკურთხეო.

მღვდელს რა კურთხევის თავი აქვს — გულზე ცეცხლი უკიდია. აიღო სარქაროდ ანაფორა და, ბიჭს რომ არ დაენახა, მამასახლისს გადააფარა, მაგრამ ცალი ჩექმა მანც გამოუჩნდა. ბიჭმა დახედა და ჰკითხა:

— ეს ჩვენი მამასახლისი რაზე მოგიკლავთ, ან აქ რატომ მოგიტანიათ, წავალ, სოფელს შევატყობინებ და დავმარხოთო.

აქეთ მღვდელი უწევს ყელს, იქით — მღვდლის ცოლი, — შენი ჭირიმე, ნურსად გაგვამხელ, ნუ დაგვლუპავ და რაც გინდა გვთხოვეო.

— რას მომცემთ, რომ ეს მკვდარი აქედან მოგაშორეთ? — ჰკითხა ბიჭმა.

— ერთ ჩანახ ოქროს მოგცემო, — უთხრა მღვდელმა და ოქროებით სავსე კასრი გამოუტანა.

ბიჭმა წაიღო შინ ოქრო და მამას ჩააბარა. მეორე დღეს ისევ მღვდელთან დაბრუნდა, წამოიკიდა მკვდარი მამასახლისი და ახლა მეწისქვილესთან მიიტანა. ბიჭი ამ მეწისქვილეზეც ნაწყენი იყო, იმიტომ, რომ, ხალხს ძალიან ბევრ მინდს ართმევდა. მკვდარი ბურქს მოაფარა თვითონ მივიდა წისქვილის არხის სათავესთან, წყალი გადაუგდო და დაიმალა. წისქვილი გაჩერდა. გამოვიდა მეწისქვილე, რომ გაიგოს, წისქვილი რამ დააყენა, ნახა გადახეთქილი არხი, გაასწორა და ისევ წისქვილში დაბრუნდა.

ცოტა ხნის შემდეგ ბიჭმა მეორედ მოშალა არხი და წისქვილი ისევ გაუჩერა. გამოვიდა გაჯავრებული მეწისქვილე, ნახა, არხი ისევ გადანგრეულია. ახლომახლო კი არავინა ჩანს. გაასწორა მეორედაც არხი და ისევ წისქვილში დაბრუნდა.

ბიჭმა მესამედაც გადაუგდო წყალი. მკვდარი მამასახლისი არხის თავში დააყენა და თვითონ ისევ დაიმალა. გაცეცხლდა მეწისქვილე, დაავლო ბარს ხელი და გამოვარდა. ნახა არხის სათავესთან კაცი დგას. — შენ მიჩერებ წისქვილს, შე ასეთ-ისეთო! — დასჭყვილა და დაარტყა ბარი თავში. წაიქცა მკვდარი მამასახლისი. იცნო მეწისქვილემ და წაიშინა თავში. წამოიკიდა მკვდარი, შეიტანა წისქვილში და ტომრებშუა დამალა.

ცოტა ხნის შემდეგ ბიჭიც მივიდა და ერთი გულდა საფუქავი მიიტანა. ეუბნება მეწისქვილეს:

— ეს საფუქავი მამარემმა გამომატანა და ამაღამ რომ არ დამიფუქვა, არ იქნებო.

მეწისქვილეს რა ესაფუქავება, გულში შიში და ბოღმა უტრიალებს. შეუტია ბიჭს: — დამეკარგე აქედან, სომ ხედავ, რაც მოტანილია, ისიც ვერ დამიფუქვიაო!

— დავიცდი, სანამ ჩემი ჯერი არ მოვაო, — თქვა ბიჭმა და ტომრებზე წამოწვა. ქვეშ რალაც რბილი მოჰყვა. ადგა, ნახა, მკვდარი მამასახლისია. — ბიჭოს, ვინ მოკლა ეს ჩვენი მამასახლისი, ან აქ რატომ მალავ, ახლავე წავალ და ხალხს შევატყობინებო.

დაუწოქა მეწისქვილემ და შეეხვეწა:

— ოღონდ ნურსად გამამხელ და რაც სორბალი მაქვს, სულ შენ მოგცემო.

— კარგი, მომეცი და არსად გაგთქვამ, — დათანხმდა ბიჭი, — ამ მკვდარსაც მოგაშორებო.

მისცა მეწისქვილემ რაც მინდი და ჭირნასული ჰქონდა. ბიჭმა მთელ დღეს ზიდა ურმით, დააბინავა და საღამოს ისევ მეწისქვილესთან დაბრუნდა, წამოიკიდა მკვდარი მამასახლისი და შუალამისას მის ცოლს მიაყენა კარზე. დააყუდა კიბეზე და მამასახლისის ხმით შესძახა:

— ქალო, კარი გამიღე, მთვრალი მოვედიო!

— სამი დამე რომ შინ არ მოსულხარ, სადა ხარ, სად დაეთრევიო?! — დასჭყვივლა ცოლმა შიგნიდან. ცოლს მართლა თავისი ქმარი ჰგონია.

ბიჭმა ისევ მამასახლისის ხმით დაუძახა:

— ქალო, კარი გამიღე, ფეხზე ძლივსა ვდგევარო!

— სადაც დაეთრეოდი, ახლაც იქ წადიო! — ცოლმა გა' მოსძახა.

— ქალო, გამიღე, თორემ, იცოდე, თავს მოვიკლავ და ჩემი ცოდო შენ მოგეკითხებაო! — კიდევ დაუძახა ბიჭმა.

ქალი უარესად გააკაპასდა:

— თუნდ ჯანდაბას წადიო!

— მაშ, ღმერთმა ჩემი ცოდო შენ მოგეკითხოსო, — დაუძახა ბიჭმა უკანასკნელად მამასახლისის ხმით, ჰკრა ხელი

მკვდარს და კიბეზე გადაჩეხა. თვითონ საკუთარი სახლისა-  
კენ მიმავალ გზას დაადგა.

გაიგონა ლეწა-მტვრევის ხმა მამასახლისის ცოლმა და  
თმაგაწეწილი გამოვარდა. ნახა მკვდარი ქმარი, ეგონა ახლა  
მოიკლა თავიო და სახე ფრჩხილებით ჩამოისოკა.

ბიჭი კი არსენად მივიდა შინ. გადმოიღო ვარცლი, სა-  
ცერი, გააღვიძა ცოლი და უთხრა:

— აბა, მე ფქვილს გავცრი და შენ სული შეუბერე, ვნა-  
ხოთ, თუ წაიღებს ფქვილს ქარიო.

დაიწყო ბიჭმა ფქვილის ცრა, ცოლმა შეუბერა, მაგრამ  
შებერვით რას დააკლებდა.

— აი, შე წყეულო, შენა; — დასჭყვივლა ცოლს, — შენ  
გაცრილ პურს საყვარელს აჭმევდი და მე კი მაბრალე-  
დიო! — მიჰკიდა და მიჰკიდა იფნის სახრე გვერდებში  
და სახლიდანაც გააგდო.

ჭირი — იქა, ლხინი — აქა,

ქატო — იქა, ფქვილი — აქა.







## ქალის კაბა

იყო და არა იყო რა, იყო ერთი ბრძენი და შორსმჭვრეტელი ხელმწიფე და ჰყავდა ერთი ვაჟიშვილი. ხელმწიფეს სიკვდილის დრო რომ მოუვიდა, დაიბარა თავისი მემკვიდრე და უთხრა:

— შვილო, მე ვკვდები, ერთ ანდერძს დაგიტოვებ და უსათუოდ აასრულე: ცოლს რომ მოიყვან, მანამ არ გაეკაროს სიახლოვეს, სანამ კაბას არ გაიხდის და თავქვეშ არ დაგიდებსო.

ეს თქვა ხელმწიფემ და მოკვდა: შვილმა საკადრისი პატივით დაასაფლავა და მეზობელი ხელმწიფის ქალი მოიყვანა ცოლად.

გავიდა ერთი წელიწადი, მეორე, მაგრამ ხელმწიფის შვილი ახლოს არ ეკარება. ქალი ჩამოდნა, ჩამოხმა და სამართიდან ამოღებულ ჩონჩხს დაემსგავსა.

ერთხელ ქალი დედამ მოინახულა და, ასეთ ყოფაში რომ ნახა, თავზარი დაეცა. ჰკითხა ქალს:

— შვილო, რა მოგსვლია, საჭმელს არ გაჭმევნო?

— არც საჭმელი მაკლია, არც — სახმელი, არც სხვა პატივი, მაგრამ ყველაფერს თვალი დაუდგეს, ქმარი სიახლოვეს არ მეკარებაო.

გაწყრა სიდედრი, იმავე დღეს დაბრუნდა უკან და ეს ამბავი ქმარს შეატყობინა. ჩავარდნენ საგონებელში ქალის დედ-მამა, — რა ვქნათ, როგორ დავიხსნათ შვილი ამ სატანჯველიდანო. ბოლოს ასე მოილაპარაკეს, მოვიწვიოთ ქალ-სიძე სტუმრად, სიძე ჩვენს ლომებს დავაგლეჯინოთ და

ქალი სხვაზე გავათხოვოთ. დაუბარეს სიძეს: — ორი წელია ჩვენი სიძე ხარ და ერთხელ მაინც გვეწვიე სტუმრადო.

რა თქმა უნდა, სიძე ცოლეურებში მარტო არ წავიდოდა. შეაბმევინა ეტლი, ჩაისვა თავისი ცოლიც და წავიდნენ. გზაში დაუღამდათ და ღამის გასათევი ადგილის ძებნას შეუდგნენ. ხელმწიფის შვილმა ერთ ადგილას ცეცხლის შუქი შენიშნა და ცოლს უთხრა: — რაღა ღია ცის ქვეშ დავეყარნეთ, მოდი, მივიდეთ იმ სინათლესთან, ვინმე მაცხოვრებელი იქნება და ერთ ღამეს ყველა გაგვათენებინებსო.

დაუჯერა ცოლმა და მივიდნენ. ეს სახლი სამი ძმა დევისა ყოფილიყო. დევები შინ არ იყვნენ — სანადიროდ ყოფილიყვნენ წასულები. სახლიდან მათი დედა გამოვიდა და ჰკითხა:

— ვინა ხართ, ან აქ რამ მოგიყვანათო?

— დედაშვილობას, მგზავრები ვართ და ერთი ღამე გაგვათენებინეო, — სთხოვა ხელმწიფის შვილმა.

დევების დედამ უარი უთხრა:

— არა, შვილო, ღამეს ვერ გაგათევენებთ, ჩემი შვილები ადამის ტომის მტრები არიან, აქ რომ მოგასწროთ, შეგჭამენ და თქვენს ცოდვას კისრად ვერ დავიდებო.

ქალს შეეშინდა და ქმარს უჩურჩულა, — ჩქარა წავიდეთო, მაგრამ ქმარმა არ დაუჯერა და დევების დედას კიდევ სთხოვა:

— შენ შინ შემიშვი და მე და შენი შვილები თვითონ მოვრიგდებითო.

რალას იზამდა დევების დედა? ბრალი მოიხადა და მისცა ერთი ოთახი. შევიდნენ ცოლ-ქმარი და დაწვნენ, ერთი ერთ ტახტზე, მეორე მეორე ტახტზე. ქმარმა მაშინვე ხვრინვა ამოუშვა, ცოლს კი რა დააძინებდა, დევების მოლოდინში მთელი ტანით კანკალებდა.

არ გასულა დიდი ხანი, რომ კარზე რაღაც ხმაური ატყდა, ეს უფროსი ძმა, სამთავიანი დევი მოვიდა, დააგდო ძირს ნანადირევი ირემი, შემოვიდა და დედას დაუყვირა:

— ვინ შემოგიშვია სახლში? ადამის ტომის სუნი მცემსო! — და გამძვინვარებული იმ ოთახისკენ წამოვიდა, სა-

დაც ცოლ-ქმარს ეძინა. სმაურზე ხელმწიფის შვილს გამოე-  
ღვიძა და დევს კარებში შეეგება, დასტაცა ხელი, თვალის  
დახამხამების უმალ სამივე თავი წააგლიჯა და ტანიცა და  
თავებიც ფანჯრიდან გადმოისროლა, მერე გამობრუნდა უკან  
და ტახტზე არხეინად გაიშოტა, თითქოს დიდი არაფერი  
მომხდარა, და ისევ ხვრინვა ამოუშვა.

ქალმა ყველაფერი ეს დაინახა, მაგრამ თავი მოიმძინარა  
და ქმარს არ გაუმხილა.

ქალი შიშით კანკალებს, ქმარი კი არხეინად ხვრინავს.  
გავიდა კიდევ ცოტა ხანი და კიდევ ატყდა კარზე სმაური:  
ახლა შუათანა ძმა — ექვსთავიანი დევი მოვიდა, დააგდო  
ნანადირევი, შემოვიდა შინ და დედას დაუყვირა:

— ადამის ტომის სუნი მცემს, სახლში ვინ შემოგიშ-  
ვიაო? — და განრისხებული ისიც იმ ოთახისაკენ წამოვიდა,  
რომელშიც ცოლ-ქმარს ეძინა. სმაურზე ისევ გამოეღვიძა  
ხელმწიფის შვილს, ამ დევსაც კარებშივე შეეგება და თვა-  
ლის დახამხამების უმალ უფროსი ძმის გზას გაუყენა. ისევ  
ტახტზე გაიშოტა და გულარხეინად ახვრინდა.

ქალმა ესეც დაინახა, მაგრამ ისევ თავი მოიმძინარა და  
ქმარს არ გაუმხილა.

ქალი შიშით კანკალებს, ქმარი კი ხვრინავს. გავიდა კი-  
დევ ცოტა ხანი და ეზოში ახლა უმცროსი ძმა — ცხრათავი-  
ანი დევი მოჩქომდა. დააგდო ირემი, შემოვიდა შინ და ცა-  
სავით დაიჭექა:

— დედი, ადამის ტომის სუნი მომდის, სახლში ვინ შე-  
მოგიშვიაო? — და განრისხებული ცოლ-ქმარის საწოლი  
ოთახისაკენ გამოემართა.

გააღვიძა სმაურზე ხელმწიფის შვილმა, სწვდა კარებში  
დევს, წააგლიჯა ცხრავე თავი და თავებიან-ტანიანად ფან-  
ჯრიდან გადაუძასა. გამობრუნდა და ისევ მშვიდად დაი-  
ძინა:

ქალმა, რა თქმა უნდა, ესეც დაინახა, მაგრამ ქმარს არც  
ანჯერად გაუმხილა.

გათენდა დილა. ადგნენ ცოლ-ქმარი, შეაბმევიანეს ეტლი  
და წავიდნენ. მივიდნენ ქალის დედ-მამასთან. არის ერთი  
ლხინი და წვეულება, ხელმწიფეს და დედოფალს თავიანთი

ქალისათვის უკვე მოუყვანიათ სხვა საქმრო და ნამდვილი სიძე შინაც აღარ შეუშვეს.

უთხრა ხელმწიფე-სიმაგრმა: სიძე-ბატონო, ცოტა ხანს ბაღში გაისეირნეთ, დაისვენეთ და შინ მერე შევიდეთო.

ხელმწიფეს და დედოფალს ბაღში უკვე ლომები ჰყავთ გაშვებული და უნდათ, რომ ეს სიძე დააგლეჯინონ, ქალი კი ახალ სასიძოს გადაულოცონ.

ხელმწიფის შვილი ბაღში შევიდა, ქალი კი წაიყვანა დედ-მამამ და ახალი საქმრო გააცნო. ისიც, რასაკვირველია, ხელმწიფის შვილი იყო და კარგი თვალად-ტანადი ვაჟ-კაციც. ქალს მოეწონა და გუნებაში თქვა, — ჩემს ქმარს ათასჯერ ჯობიაო. დედ-მამაც კმაყოფილია და ახლა მხოლოდ სიძის სიკვდილსდა ელიან, რომ თავიანთ ქალსა და ახალ სასიძოს ჯვარი გადასწერონ.

სიძე კი დადის ბაღში დაფიქრებული: რატომ გამომიშვა ჩემმა სიმაგრმა ბაღში და სტუმრებთან არ შემიყვანა? აქ რაღაც ამბავია და ვნახოთ რით დამთავრდებაო.

ამ ფიქრებით შივიდა წყაროსთან და ის იყო, წყაროს უნდა დასწაფებოდა, რომ აქეთ-იქიდან ორი გამძვინვარებული ლომი გამოვარდა და კბილებდაღრენილები ხელმწიფის შვილისაკენ გამოემართნენ. დაასწრო ხელმწიფის შვილმა, სტაცა კისრებში ხელი, ჯერ თავები დაუხეთქა ერთმანეთზე, მერე ასო-ასოდ დაგლიჯა და გადაყარა. დალია წყალი და დაფიქრებული წყაროს პირას ჩამოჯდა: „რატომ შემომიშვა ჩემმა სიმაგრმა ბაღში, ნუთუ არ იცოდა, რომ აქ ლომები იყვნენო?“ ამ ფიქრში მოერია ძილი, მიდო ერთ ქვაზე თავი და ნამგზავრს, უძინარსა და დაღლილს ღრმა ძილით დაეძინა.

შუალამე გადავიდა. ხელმწიფის შვილს კი კვლავ ღრმად სძინავს. რაკი აღარ გამოჩნდა, ხელმწიფემ და დედოფალმა დაასკვნეს, მკვდარი იქნებაო და თავიანთი ქალის ახალი ქორწინება საჯაროდ გამოაცხადეს. გამოიყვანეს სასიძო, საჩქაროდ ჯვარი გადასწერეს და ნეფე-პატარძალი მათთვის განკუთვნილ საძილე ოთახში შეუშვეს. სიძემ დაიწყო ტანსაცმლის გახდა, ჩექმას რომ იხდიდა, საწოლქვეშიდან ერთი თავი გამოვარდა, სიძემ ესროლა ჩექმა და მოკლა.

მიუბრუნდა სახეგაბადრული პატარძალს - და ტრაბახით უთხრა:

— ნასე, რა ბიჭი ვარ, თავეს ორი ნაბიჯი არ გადავადგმევინეო. გაიხადა მეორე ჩექმაც და კიდევ უთხრა:

— ხომ ვარ ძლიერი ვაჟკაცი, თავვი რომ ვერ წამივიდაო?

დაწოლამდე კიდევ რამდენჯერმე უთხრა:

— რა მარჯვედ ვესროლე ჩექმა, პირდაპირ თავში მოვარტყიო.

ქალმა გაიხადა ტანსაცმელი და უნდა დაწვეს, ნეჟე კი კვლავ თავის მოკვლას ეტრაბახება:

— პა, ხომ ვარ ბიჭი-ვაჟკაცი, თავეს რომ დედა ვუტირეო?

ქალს მობეზრდა: ეს რა მკვეხარა ვიღაცა ყოფილა, თავვი მოკლა და თავი გმირი ჰგონია, იმან კი დევების დასოცვაც არ გაამხილაო. ვაჟკაცი ეს კი არა, ისა ყოფილა, და ამასთან სიცოცხლეს, იმასთან სიკვდილი მირჩევნიაო. წავალ და, სადაც ის დაგლიჯეს ლომებმა, მეც იქ მოვკვდებიო.

წამოდგა ქალი: გადაიცვა კაბა და წავიდა ბაღში, — მკვდარი იქნება, თუ ცოცხალი, ვიპოვი და მეც იმის სვედრს გავიზიარებო.

იარა, იარა და მიადგა წყაროს. ნასა, დაგლეჯილი ლომები აქეთ-იქით ყრიდა, თვითონ კი მიუდვია თავი შიშველ ქვაზე და არხეინად სვრინავს. ქალს შეეცოდა ქვაზე თავმიდებული ქმარი და, რაკი ხელთ სხვა არაფერი ჰქონდა, საჩქაროდ კაბა გაიხადა და თავქვეშ ამოუდო.

გამოედვიდა ხელმწიფის შვილს და დაინახა თავქვეშამიდებული კაბა. მაშინვე მოხვია მკლავები ქალს და გულში მსურვალედ ჩაიკრა.

ასე აუხდა შვილს მამის ანდერძი. მაგრამ ბრძენი ხელმწიფე აქ ერთ რამეში მოტყუვდა: ქალი მხოლოდ იმას უფენს ქვეშ თავის კაბას, ვინც ვაჟკაცობას გამოიჩენს.

ჭირი — იქა, ლხინი — აქა,

ქატო — იქა, ფქვილი — აქა.



## შრომა და იღბალი

ერთხელ შრომა და იღბალი შეხვდნენ ერთმანეთს და წაიკიდნენ, — არა, მე გჯობივარ, არა — მეო; არა, მე უფრო მეტი სარგებლობა მომაქვს ადამიანისათვის, არა — მეო. ბოლოს შრომამ თქვა, — რაც უნდა იყოს, კაცი უჩემოდ ვერ გამდიდრდება და ვერც იცხოვრებსო. — მე თუ შევეწიე, კიდევ გამდიდრდება და კიდევ იცხოვრებსო, — იღბალმა მიუგო.

— მაშ, მოდი და დავნაძლევედეთო, — უთხრა შრომამ.

— დავნაძლევედეთო, — არ დაუთმო იღბალმა.

დანაძლევდნენ და გაუდგნენ გზას. იარეს, იარეს და შემოხვდათ ერთი ღარიბი კაცი. იღბალმა თქვა:

— აი, ამ ღარიბ კაცს დღესვე გავამდიდრებო.

— აბა, ჰა, შენ იცი, აგერ ვარ და გიყურებო, — მიუგო შრომამ და უღვაშებში ჩაიცინა.

მივიდა იღბალი ღარიბ კაცთან, მისცა დიდძალი ოქროს ფული და უთხრა:

— კაცო, რატომ კვდები სიღარიბეში, წაილე ეს ფული, გახსენ დუქანი და ივაჭრეო.

გამოართვა კაცმა ოქროს ფული — და გახარებული მასწინვე ბაზრისაკენ გაიქცა, უცბად მშიერ-ტიტველი ცოლ-შვილი გაახსენდა და გუნებაში თქვა: დუქნის გახსნა სად წაშივა, მოდი, ჯერ ცოლ-შვილს მივხედავ, ცოტა რამეს ვუყიდი და ფულსაც ვახარებო. მართლაც, იყიდა ძვირფასი ტანსაცმელი, გემრიელი სასმელ-საჭმელი, გამოკრა ერთ აბრეშუ-

მის ხელსახოცში, დარჩენილი ფულებიც შიგ ჩაყარა და გას-  
წია სახლისკენ.

გზაზე დაიღალა და ძილიც მოერია. დაჯდა გზის პირას,  
ხელსახოცი გვერდით დაიდო და დაიძინა. სად იყო და სად  
არა, ერთი მშვიერი ყორანი მოფრინდა, დასტაცა ნისკარტი  
ხელსახოცს და წაიღო. გამოელვინა კაცს და სადღაა ხელსა-  
ხოცი! შემოიკრა თავში ხელი, მაგრამ რაღას უშველიდა. წა-  
ვიდა შინ დაღონებული და ცოლს შესჩივლა, მაგრამ ცოლმა  
არ დაუჯერა და დანაკარგი აინუნშიაც არ ჩააგდო.

გავიდა ერთი კვირა. შეხვდნენ კიდევ ერთმანეთს შრომა  
და იღბალი და შრომამ ჰკითხა:

— რა ჰქენი, გაამდიდრე ის კაცი თუ ვერაო?

— რა თქმა უნდა, გაამდიდრეო.

— მაშ, აბა წავიდეთ და ვნახოთო.

წავიდნენ და მივიდნენ ღარიბ კაცთან. რა სიმდიდრე,  
რის სიმდიდრე, — რაც აქამდე იყო, კაცი ისევ ის ლატაკი  
დახვდათ.

— კაცო, რა უყავი ის ოქროს ფული, მე რომ მოგეციო? —  
ჰკითხა იღბალმა.

— დამეკარგაო, — უთხრა კაცმა და უამბო, რაც თავს გა-  
დახდა.

იღბალმა ახლა ორი იმდენი მისცა და გააფრთხილა: —  
კარგად შეინახე და გამდიდრდებო.

წავიდა კაცი ისევ ბაზარში დუქნის გასახსნელად, მაგრამ  
სანამ დუქანს გახსნიდა, ჯერ ცოლ-შვილისათვის ტანსაც-  
მლისა და სასმელ-საჭმლის ყიდვა გადაწყვიტა. ამოიღო  
ოქროს ფულით გატენილი ქისა და შემოუარა დუქან-  
დახლებს.

დაინახა ორმა ქურდმა, რომ კაცს ბლომა ფული აქვს და  
ერთმა უთხრა მეორეს:

— მე დანით გამოგეკიდები, ვითომ მოკვლას გიპირებ,  
შენ გაიქეცი, მიდი მაგ კაცთან და შეველა სთხოვე, ეგ ქულა-  
ჯის ქვეშ დაგმაღავს და ქისა ამოაცალეო.

გამოუდგა ერთი ქურდი მეორეს დანით, მეორე ქურდი  
მივარდა კაცთან და შეეხვეწა:

— ძია კაცო, მოსაკლავად მომდევენ და როგორმე დამ-  
მალეო.

კაცს შეებრაღა განწირული ქურდი და ქულაჯის ქვეშ  
ამოიფარა, ქურდმა ჩუმად ქისა ამოაცალა და გაიქცა. დარჩა  
კაცი ხელცარიელი. ბევრი იტირა და იცა თავში, მაგრამ რას  
უშველიდა. წავიდა შინ და ისევ ცოლს შესჩივლა, ცოლმა  
არც ახლა დაუჯერა, — ნეტა ბევრს არ ყბედობდე, თქროს  
ფულს შენ არავინ მოგცემდა და ცარიელი ჯიბიდან კი ვინ  
რას ამოგაცლიდაო, — უთხრა.

გავიდა კიდევ ერთი კვირა და შრომა და იღბალიც ისევ  
შესვდნენ ერთმანეთს.

— რა ჰქენი, გაამდიდრე ის კაცი, თუ ვერაო? — ჰკითხა  
შრომამ.

— გავამდიდრე და მეტიც ვუყავიო, — თამამად მიუგო  
იღბალმა.

— აბა, წავიდეთ და ვნახოთო, — ეჭვიანად უთხრა შრო-  
მამ.

წავიდნენ, ჩაუარეს კაცის სახლს და რას ხედავენ, —  
არც სიმდიდრე და არც ქონება, რაც ღატაკი იყო, ისევ ისე-  
თი დახვდათ.

— კაცო, რა უყავი ჩემი მოცემული თქროს ფულები? —  
ჰკითხა იღბალმა.

— ისევ დამეკარგაო, — უთხრა კაცმა და რაც თავს გა-  
დახდა, ყველაფერი უამბო.

იღბალი გაჯავრდა:

— მარტოს თუ შნო არა გაქვს, ამხანაგი აიყვანე და იმას  
დაეკითხო, — უთხრა და სამმაგად მეტი ფული მისცა.

წავიდა კაცი შინ, ამოიღო თქროს ფული და ცოლს  
უთხრა:

— აი, ფული მოვიტანე და შეინახე, მე ამხანაგის საშო-  
ნელად მივდივარო.

ცოლი ცომას ზელდა, ქმარს არც ახლა დაუჯერა და ზედ  
არც კი შეხედა, ისე უთხრა:

— მე შენთვის არა მცალია, თუ რამე მოიტანე, აგე, სა-  
მარილე ქოთანს დგას მანდ და ჩაყარეო.

ჩაყარა კაცმა ფული ქოთანში და წავიდა ამხანაგის სა-



მებნელად. ცოტა ხნის შემდეგ მეზობლის გოგო შემოვიდა და დიასახლისის მარილი სთხოვა. დიასახლისმა უთხრა:

— მე, შვილო, ცომიანი სელები მაქვს და ქოთნიდან თვითონ ამოიღეო.

ამოიღო გოგომ მარილი და ოქროს ფულიც თან ამოაყოლა. მოუტანა დედას მარილიც და ფულიც, დედამ მარილი იხმარა და ფული თავიანთ საფულე ყუთში ჩაყარა.

დაბრუნდა კაცი შინ და ამხანაგიც მოიყვანა. ჩაიხედა ქოთანში და სადღაა ფული.

— რა იქნა ფულიო? — ჰკითხა ცოლს.

— რა ფული, რის ფულია — დატუქსა ცოლმა, — რაღაცა გეჩვენება, თორემ ოქროებს ვინ გიყი მოგცემდაო.

კაცმა ბევრი იჩხუბა და იჯავრა, მაგრამ ველარაფერს გახდა და ბედს დამორჩილდა.

გავიდა ერთი კვირა და შრომა და იღბალი კიდევ შესვდნენ ერთმანეთს. ისევ ჰკითხა შრომამ:

— რა ჰქენი ბოლოს და ბოლოს, გაამდიდრე ის კაცი, თუ ვერაო?

— მე მგონია, გავამდიდრე, — მიუგო იღბალმა, — სამზაგად მეტი მივეცი და თუ კიდევ ღარიბად დარჩა, მოსაკლავიაო.

— მაშ, წავიდეთ და ვნახოთო, — უთხრა შრომამ.

— წავიდეთო, — დათანხმდა დაიმედებული იღბალი.

მივიდნენ კაცთან და რას ხედავენ, — რაც იყო იმაზე უარესად გაღატაკებულიყო. შესედა შრომამ და უთხრა:

— რაკი შენ ვერაფერს გახდი, ასლა მე მიყურეო, — და კაცს ხუთი მანეთი არუქა. თან დაარბია, ეს ფული როგორ გამოეყენებინა, უთხრა:

— სამი მანეთით ვირი იყიდე, ათი შაურით — ცული, ათი შაურით — თოკები და მოსართავები, მანეთისა — სასმელ-საჭმელი ცოლშვილისათვის. წადი ტყეში, დაამზადე შეშა, ყოველდღე ჩამოიტანე ქალაქში და გაყიდე. აღებული ფული ზოგი დახარჯე, ზოგი შეინახე და სულ მუდამ გაუჭირვებლად იცხოვრებო.

მართლაც გაიგონა კაცმა შრომის დარიგება, იყიდა სამ მანეთად ვირი, ათ შაურად — ცული, ათ შაურად აკაზმულო-

ბა და წავიდა ტყეში. პირველ დღესვე იმდენი შეშა ჩამოიტანა, რომ აღებული ფულით სამაძღრისო საჭმელ-სასმელიც იყიდა და შესანახადაც გადაარჩა. შემდეგ დღეებში კაცი უფრო გაიწაფა შეშის ჭრაში, შრომას ხელი მიაჩვია და მუშტრებიც გაიმრავლა. გაიმართა კაცი წელში, აღარც სასმელ-საჭმელი აკლდა და აღარც ჩასაცემელ-დასახური. რომ იტყვიან, ქვაც აქვს და კაკალიც.

ერთხელ ტყეში ერთი ხმელი წიფელი იპოვა. შემოუარა ირგვლივ, შემოათვალიერა და მოეწონა, მართლაც კარგი საშეშე ხე იყო. თანაც იმდენ შეშას დაყრიდა, კაცი მთელ წელიწადს ვერ გამოლევდა. მიადგა ცულით და მოსჭრა. წაიქცა ხე და რას ხედავს: თურმე ის წითელი ხელსახოცი, კაცმა პირველად რომ იყიდა, ყორანს ამ ხეზე მოეტანა, საჭმელი შეეჭამა, ოქროს ფული კი დაეტოვებინა. წამოიღო კაცმა ოქროები შინ და უფრო მდიდარი გახდა. მაგრამ შრომაზე ხელი არ აუღია, ფულის პოვნამ უფრო გაახალისა და შეშის გაყიდვასაც მოუმატა.

გავიდა ხანი, კაცი იმდენად გამდიდრდა, რომ სოფლის შეძლებულ ოჯახებს გაუტოლდა. ერთხელაც იმ მეზობელმა, რომლის გოგომაც მარილს ფული გააყოლა, ყუთში ფული დათვალა და სამასი თუმანი ზედმეტი გამოუვიდა. გამოჰკითხა ცოლს და ქალიშვილს, გაიგო მიზეზი და უკანვე დაუბრუნა. ამ ფულით კაცმა სახლი აიშენა და მდიდრული ავეჯი შეიძინა.

ბოლოს შრომა და იღბალი ისევ შესვდნენ ერთმანეთს და ახლა იღბალმა ჰკითხა:

— რა ჰქენი, გაამდიდრე, შენი ხუთი მანეთით ის კაცი თუ ვერაო?

— წავიდეთ და ვნახოთო, — უთხრა შრომამ.

წავიდნენ და ნახეს: სადღა იყო წაფერებული, ფარღალა ქოხი, მის ადგილზე მშენიერი ორსართულიანი სახლი იდგა და ეზო-კარმიდამოც შესაფერისად ჰქონდა მოწყობილი. გაუკვირდა იღბალს და ჰკითხა კაცს:

— მე შენი წონა ოქროს ფული მოგეცი და ვერაფერი შეინატე, იმ ხუთ მანეთს ისეთი რა თილისმა ჰქონდა, რომ ყელამდე მოყრილხართო?

— არაფერი თილისმა არ ჰქონია, იმ ხუთმანეთიანმა მხოლოდ შრომა მასწავლაო, — მიუგო გლეხმა.

ასეა, შრომა თვითონ ქმნის იღბალსაც, სიმდიდრესაც და ზედნიერებასაც, ხოლო უშრომლად არც ერთი არსებობს, არც — მეორე და არც — მესამე.

ჭირი — იქა, ლხინი — აქა,

ქატო — იქა, ფქვილი — აქა.





## მორჩულეპული ცოლი

იყო და არა იყო რა, ღვთის უკეთესი რა იქნებოდა, — ერთ სოფელში ცხოვრობდნენ დედა-შვილი. უღელი ხარის მეტი არა ებადათ რა; — ეს იყო მათი საცხოვრისიც და სარჩო-საბადიც, მაგრამ ყველიერი რომ დადგა და მთელი სოფელი ღვთისა და სმა-ჭამას მიეცა, დედამ უთხრა შვილს:

— შვილო, ხომ ხედავ, ხალხი რა ყოფაშია, ყველა ქეიფში ატარებს ღვთის. როდემდე უნდა ვიყოთ ასე გამორჩეულები, მოდი ერთ-ერთი ხარი დავეკლათ, ხორცი ზოგი ღვინოზე გადავცვალოთ, ზოგი — პურზე, დანარჩენი სახლში დავიტოვოთ და ჩვენც ერთი რიგიანი ქეიფი გავწიოთო.

შვილმა იუარა, ახლა საცაა ხვნა დაიწყება და ერთი ხარით ყანა როგორღა მოვხნაო, მაგრამ დედამ არ დაიშალა, არა უშავს რა, მე შემაბიო, უთხრა და დაიყოლია.

დაკლა ბიჭმა ერთი ხარი, ხორცი ზოგი ღვინოზე გადაცვალა, ზოგი პურზე, სამწვადე შინაც ბლომად დაიტოვა და დედა-შვილმა ყველიერი მართლაც მაძღრისად გაატარეს.

ყველიერი მაღლე ჩამოთავდა, დადგა დიდმარხვა და ხალხიც სახნავად გავიდა. ბიჭს კი ცალი ხარიღა ჰყავს და აღარ იცის, რა ქნას. ადგა და, რაკი სხვა სახსარი ვერაფერი გამოიხსნა, უღელში დედა შეაბა, გაიტანა გუთანს და დაიწყო ხვნა.

იმ დღეს იმ ქვეყნის ხელმწიფეს გასეირნება მოესურვა და თავისი ნაზირ-ვეზირებით სოფელში გამოვიდა. დაინახა, რომ უღელში ხარის მაგიერ დედაბერი აბია და ნაზირ-ვეზირებს უბრძანა: — ახლავე გუთნისდედა მომგვარეთო!

მოიყვანეს ბიჭი.

— ვინ არის ეგ დედაბერი, უღელში რომ გიბიაო? — ჭკითხა ხელმწიფემ.

— დედაჩემიაო, — მიუგო ბიჭმა.

ხელმწიფე უფრო განრისხდა:

— მერე არა გრცხვენია, რომ მშობელი დედა გუთანში შეგიბია, რად კადრულობ ასეთ საქციელსო? — შეუტია ხელმიწიფემ.

ბიჭმა უამბო, როგორც იყო საქმე. ხელმწიფე ცოტა დაშოშმინდა, ბიჭს წერილი დაუწერა და უთხრა:

— წაიღე ეს წერილი ჩემს მენახირესთან და ხარს მოგცემს, დღეიდან აღარ გავიგო, რომ დედა შეაბა უღელში, თორემ ცოცხალს არ გაგიშვებო.

ბიჭმა მადლობა გადაუხადა, გამოხსნა დედა უღლიდან და მაშინვე ხელმწიფის მენახირისაკენ გაეშურა. მიუტანა ხელმწიფის წერილი, მენახირემ წაიკითხა და ერთი უშველელი გათქვირებული ხარი დაანახვა:

— შენთვის აგე ის ხარი მოუცია, მაგრამ მეექვება, რომ მოიხმარო, ეგ ხარი მთელმა ჯარმა ვერ დაიმორჩილა და მარტოკამ რა უნდა უყო.

— როგორმე მოვათვინიერებო, — უთხრა ბიჭმა და ერთი მსხვილი თოკი მოიტანა. ავიდა შუა მინდორში მდგარ უზარმაზარ მუხაზე, თოკის ერთი წვერი მუხას მიაბა, მეორე ქამანდად გამოყულფა და მენახირეს ჩამოსძახა. — როგორმე ნელ-ნელა ხესთან მორეკეო.

მორეკა მენახირემ ოჩანი ხარი, ბიჭმა სტყორცნა ქამანდი და გადააცვა კისერზე. ხარი მთლად გაგიჟდა, დაიქშუტუნა, თვალები გადმოკარკლა და ყალყზეც შედგა, მაგრამ ქამანდთან რას გახდებოდა, — რამდენიც გაიწევდა, ყელში მით უფრო ძლიერად უჭერდა.

სალამომდე იბრძოლა ხარმა, და რომ ვერაფერს გახდა, ბედს დამორჩილდა, ამ წვევა-ჭინჭყლში დაიქანცა კიდეც და ხის ძირას დაწვა.

ბიჭი ჩამოვიდა ხიდან და ხარს შორიასლო დაუდარაჯა და ხარი იქამდე აშიმშილა, სანამ მთლად სინსილა არ გადაუწყდა. მერე ნელ-ნელა დაუწყო ჭმევა: ჯერ ერთი ბლუჯა

ბალახი დაუყარა, მერე ცოტა მეტი. წყალსაც ასე ცოტა-ცოტაობით ასმევდა და ბოლოს ისე შეიჩვია, რომ თავზე ხელიც კი გადაუსვა. ხარი აღარც ერჩოდა და აღარც გასაქცევად იწევდა. მაშინ კი ახსნა ბიჭმა მუხიდან, წამოიყვანა შინ და შეაბა გუთანში. ხარი დადგა ისეთი, რომ ნულა იტყვი გააქვს და გამოაქვს კვალი, ბიჭი სიხარულით აღარ არი.

ერთ დღეს ხელმწიფეს მოაგონდა თავისი ოჩანი ხარი და ვეზირს უთხრა:

— მოდი ერთი გავიაროთ და ვნახოთ, რა ქნა იმ ბიჭმა, მოათვინიერა ჩემეული ხარი თუ ვერაო?

წავიდნენ და მივიდნენ ბიჭის ყანაში. სადღაა ოჩანი ხარი, კვალი თითქმის მარტოკას გააქვს და ისე მოთვინიერებულა, კუდსაც აღარ ატოკებს.

ხელმწიფეს ერთი იმ ხარივით ჯიუტი და ზარმაცი ქალიცა ჰყავდა. ისეთი უქნარა იყო ეს ქალი, რომ განძრევას და ფეხზე ადგომას ვინ იტყვის, პურის ჭამაც კი ეზარებოდა. ხელმწიფე საგონებელში იყო, ასეთ ზარმაცსა და არაფრის მაქნისს რა ეშველებათ. მაგრამ მორჯულებული ხარი რომ ნახა, გულში გადაწყვიტა, — მოდი, ჩემს ქალსაც ამას მივათხოვებ, იქნებ რამე მოუხერხოსო. მოიხმო ბიჭი და უთხრა:

— ხვნას რომ მორჩები, იმავე დღეს სასახლეში მოდი, შენთან საქმე მაქვსო.

მორჩა ბიჭი ხვნას და წავიდა სასახლეში. რა იცის, ხელმწიფე რისთვის იბარებს. ჰგონია, რამე საქმეს დამავალბნოსო, დგას და ელოდება.

უცებ ხელმწიფემ ჰკითხა:

— ჩემი ქალი მინდა მოგათხოვო და რას იტყვიო?

ბიჭმა ყურებს არ დაუჯერა ნათქვამი და ისე გაშტერდა, რომ კარგა ხანს ხმა ვერ ამოიღო, მერე უთხრა:

— დიდებულო ხელმწიფე, მე თქვენი სიძობისა რა ღირსი ვარ, ან როგორ შევინახავ თქვენს ქალსო?

— არ ვიცი, ვთქვი და გათავდა, უნდა შეირთოო, — უთხრა ხელმწიფემ.

რადას იზამდა ეს ბიჭი, წამოიყვანა ხელმწიფის ქალი და მოიყვანა შინ. დედა და შვილი თავს ევლებოდნენ ხელმწი-

ფის ასულს და სულ იმის ცდაში იყვნენ, რა ესიამოვნებინათ, მაგრამ პატარძალი სამაგიეროს არაფრით უხდიდა, ეზოდან წყალსაც არ შემოიტანდა, მხოლოდ ჭამდა და ტახტზე გორაობდა.

დედა-შვილმა ითმინეს, ითმინეს და ბოლოს ასე გადაწყვიტეს: თუ საქმეს გააკეთებს, ვაჭამოთ საჭმელი, თუ არა და ღშიერი ვამყოფოთო. ადგნენ დილით და დედამ უთხრა შვილს:

— შვილო, პური ვინა ჭამოსო?

— ვინც საქმეს გააკეთებსო.

— საქმე ვინლა გააკეთოსო?

— მე და შენაო.

ჭამეს დედა-შვილმა საჭმელი და წავიდნენ სამუშაოდ, პატარძალს კი ერთი ლუკმაც არ უწილადეს.

ხელმწიფის ქალს მოშივდა, მაგრამ ტახტიდან ადგომა და საჭმლის გაკეთება დაეზარა, იფიქრა, ქმარი და დედამთილი მოვლენ და მაჭმევენო, მაგრამ ქმარმა და დედამთილმა აღარც ვახშამი გაუყვეს. სამუშაოდან რომ დაბრუნდნენ, დედამ მხოლოდ ორი სულის სამყოფი ვახშამი გააკეთა და შვილს უთხრა:

— შვილო, დღეს საქმე ვინ გააკეთაო?

— მე და შენაო.

— საჭმელი ვინლა ჭამოსო?

— ვინც საქმე გააკეთაო.

დასხდნენ დედა-შვილი, შეჭამეს რაც კი ვახშმად ჰქონდათ მომზადებული და დაიძინეს. მეორე და მესამე დღესაც ასე გააკეთეს. პატარძალმა იფიქრა, თუ არაფერი გავაკეთე, ესენი ნამდვილად მშიერს მომკლავენო და ღონემიხდილმა ნახევარი სახლი დაგავა. მოვიდნენ საღამოს დედა-შვილი, ნახეს ნახევრად დაგვილი სახლი და ერთმანეთს თვალი უყვეს. დედამ ჩვეულებრივ ჰკითხა:

— შვილო, ვახშამი ვინა ჭამოსო?

— ვინც საქმე გააკეთაო, — მიუგო შვილმა.

— ვინ გააკეთა საქმეო?

— მე და შენაო.

— არა, შვილო, — უთხრა დედამ, — ხომ ხედავ, დღეს

ჩვენს პატარძალსაც უმუშაენია, — ნახევარი სახლი დაუგვია, — და ცოტა რამ ამასაც უნდა ვუნაწილოთ.

გააკეთა დედამ საჭმელი და ორი კოვზი კერძი და ერთი ნატესი პური პატარძალსაც მიაწოდა.

ხელმწიფის ქალმა ცოტა სული მოითქვა, თან იმასაც მისვდა, რაც უფრო მეტ საქმეს გააკეთებდა, საჭმელსაც მეტს მისცემდნენ. ადგა მეორე დღეს და გაუკეთებელი აღარაფერი დატოვა: სახლი ძირის ძირობამდე დაგაეა, ჯამჭურჭელი დარეცხა, წყალი მოზიდა და დუმელიც გაახურა.

დაბრუნდნენ სამუშაოდან დედა-შვილი და ყველაფერი გაკეთებული რომ დასვდათ, ძალიან გაუსწარდათ, ერთმანეთს კვლავ თვალი უყვეს, მერე დედამ ვახშამი მოამზადა და შეიღს ჰკითხა:

— შეიღო, დღეს ვახშამი ვინა ჭამოსო?

— რა თქმა უნდა, ვინც საქმე გააკეთაო, — მიუგო შვილმა.

— საქმე ვინლა გააკეთაო?

— ყველამ გავაკეთეთო.

— სწორია, შეიღო, — უთხრა დედამ, — დღეს ჩვენს პატარძალსაც კარგად უმუშავია და ესეც ჩვენთან ერთად უნდა ვავახშმოთო.

დასვეს პატარძალიც სუფრასთან, დედა-შვილი სულ საუკეთესო ნაჭრებს სთავაზობდნენ. ხელმწიფის ქალი ახლა კი საბოლოოდ დარწმუნდა, შრომის მეტი არაფერი მიშველისო, და ამ დღიდან ისე გაყოჩაღდა, რომ საჭიროზე მეტსაც აკეთებდა, მთელი დღე ციბრუტივით ტრიალებდა. რეცხავდა, გვიდა, ასუფთაევებდა და, სანამ ქმარი და დედამთილი სამუშაოდან დაბრუნდებოდნენ, ვახშმის მომზადებასაც ასწრებდა.

ერთ დღეს ხელმწიფემ თავის ვეზირს უთხრა:

— მოდი, წავიდეო, ვნახოთ, ჩემი ზარმაცი ქალი რასა იქსო.

შესხდნენ ცხენებზე და წამოვიდნენ. მოვიდნენ სიძის სახლში. ქალი სიხარულით გამოეგება მამას და შინ შეიყვანა. ხედავს ხელმწიფე, რომ იმისი ქალი ჩიტივით დახტის სახლში და პირზე ხვითქი გადასდის, ხელმწიფეს უხარია და



თან უკვირს: ნეტა რა უქნა იმ მენახირემ ასეთი, რომ გააყო-  
ჩალო?

ქალმა კმართან და დედამთილთან მეზობლის ბიჭი გააგ-  
ზაენა, — მამა გვეწვია და საჩქაროდ წამოდითო. — თვით  
ხელმწიფეს და ვეზირს კი ხელში ცულები მისცა და შეშის  
დაჭრა დაავალა.


— აქ ასეთი წესია, თუ საქმე არ გააკეთეთ, პურს არ  
გაჭმევენო.

ხელმწიფე ახლა კი მისვდა, რა სერხითაც მოერჯულები-  
ნა მენახირეს იმისი ქალი. მოეწონა სიძის საზრიანობა, ვე-  
ზირის თანამდებობა უბოძა და კარგი ჯამაგირიც დაუნიშნა.

ჭირი — იქა, ლხინი — აქა,

ქატო — იქა, ფქვილი — აქა.





## ხ ა ხ უ ტ ა

იყო და არა იყო რა, ღვთის უკეთესი რა იქნებოდა, იყვნენ სამნი ძმანი. სამივეს უკვე ცოლები ჰყავდათ, მაგრამ ჯერ ისევ ერთ ოჯახსად ცხოვრობდნენ. უფროსი და შუათანა შრომის მოყვარენი იყვნენ, უმცროსი ხახუტა კი — ზარმაცი და მუქთახორა, სულ მხართეძოზე იწვა და ჭამის მეტი არაფერი აგონდებოდა. ძმები სულ იმას ეჩიჩინებოდნენ, — ადექი, შენც რამე გააკეთე და ოჯახს მოეხმარეო, მაგრამ ხახუტა ძმების რჩევას არაფრად აგდებდა და კვლავ ტახტზე გორაობდა. მოსწყინდათ ძმებს ხახუტას რჩენა და გაეყარნენ, წილში სახლი და სამი თხა არგუნეს.

მოიხმო ხახუტამ ცოლი და უთხრა:

— ეს თხები სამწყემსავად არა ღირან, არადა, შიმშილით დაგვეხოცებიან, მოდი, რომ არ ვიწვალთ, მთაზე გარეკავ და ერთი წლით იქ დავტოვებ, განისამდე თვითონ გამოიკვებებიან, კიდევ გამრავლდებიან და სამწყემსავადაც მოღირდებიანო.

ცოლმა ძალიან მოუწონა ეს აზრი და მაშინვე საგზალი მოუმზადა. გარეკა ხახუტამ თხები მთაზე, გაუშვა იქ და თვითონ შინ დაბრუნდა.

ერთი წელიწადი მოსვენებით იყო, მეორე წელს წავიდა თხების ჩამოსარეკად, მაგრამ იქ ციკნის ყურიც აღარ დახვდა. გაბრაზდა ხახუტა, მომართა მშვილდ-ისარი და დაიწყო აღმა-დაღმა სიარული, იქნებ სადმე ცოცხლები იყვნენ და წავაწყდო. ბევრი იარა, მაგრამ თავისი თხები ვეღარსად

ნახა. სამაგიეროდ ერთი მგელი შეხვდა და ხახუტამაც გულს ჯავრი იმაზე გადაიტანა: დაიჭირა, დააკრეჭინა კბილები და აკი სისხლი არ შეამჩნია! ჰო, აი სწორედ ამას შეუჭამია ჩემი თხები და სამაგიეროსაც შესაფერისს მივუზღავო, — თქვა ხახუტამ და მგელს ისარი დაუმინა. მგელი შეეხვეწა, ოღონდ ნუ მომკლავ და ბედსა გწევო.

— რა ბედსა მწევო? — ჰკითხა ხახუტამ.

— რასა და, აგე მთაზე მწყემსები რომ თხებს აძოვებენ, წავალ, ერთ თიკანს მოვტაცებ და გავიქცევი. მწყემსები და ძაღლები მე გამომეკიდებიან, შენ ამასობაში დრო იხელთე, მოუარე მაგ ფარას და სულერთიანად გაირეკეო.

დაუჯერა ხახუტამ მგელს და გაუშვა. წავიდა მგელი, შევარდა ფარაში და ერთი ნაცრისფერი თიკანი მოიტაცა. მწყემსები და ძაღლები მგელს გაეკიდნენ და თხის ფარა უპატრონოდ დატოვეს, ხახუტამ ამით ისარგებლა და მთელი ფარა საჩქაროდ შინისაკენ გამოირეკა.

ამდენი თხების დანახვაზე ძმები შურით აივსნენ და ხახუტას ჰკითხეს:

— სად იშოვე, ხახუტა, ამდენი თხებით?

— აბა, როგორ გგონიათ, თქვენ რომ სამი თხის მეტი არ მარგუნეთო, — თქვა ხახუტამ და უღვაში გადაიგრისა, — ის თხები შარშან მთაში ავრეკე და გავუშვი, წელს ავედი და აი ასე მოშენებულები დამხვდნენო.

ძმებმა დაიჯერეს ხახუტას ნათქვამი და თავიანთი თხები იმავე წელს მთაში არეკეს. გაუშვეს უპატრონოდ და წამოვიდნენ. ძმებს იმედი აქვთ, წლის თავზე ათნაგად მომრავლებული დაგვხვდებიანო, მაგრამ რა დაგიკარგავს, რას ეძებ! თხის კუდიც ველარსად იპოვეს. დაბრუნდნენ მთიდან ცარიელ-ტარიელები, მიუხტნენ ხახუტას და სახლი გადაუბუგეს.

დარჩა უსახლკაროდ ხახუტა, მაგრამ გული მანც არ გაიტეხა და ახალი ხერხი მოიგონა: მოაგროვა დამწვარი სახლის ნახშირი და ერთი გოდორი გაავსო. მერე მეზობლებში ცოტაოდენი ვერცხლის ფული ისესხა, მოაყარა ნახშირს მალლიდან, წამოიკიდა გოდორი და გაუგდა გზას ქალაქისაკენ. ქალაქში ერთ მდიდარ სოვდაგარს მიადგა და

ღამის გასათევი ბინა სთხოვა. სოვდაგარმა ბინა მისცა და ჰკითხა:

— რაზე შეწუხებულხარ და ქალაქში რაზე ჩამოსულ-  
ხარო?

— რაზე ჩამოვსულვარ და, ღმერთმა რომ დასწყევლოს სიმდიდრე, — მიუგო სახუტამ, — მეტისმეტად ბევრი ვერცხლი დამიგროვდა, შემეშინდა, არავინ მომპაროს-მეთქი და ეს ერთი გოდორი საზინაში ჩასაბარებლად წამოვიღეო.

სოვდაგარს გაუკვირდა სახუტას სიმდიდრე და ჰკითხა:—  
სად იშოვე ამდენი ფულიო?

— ვშრომობ, ძმაო, — უთხრა სახუტამ, — დღედაღამეს ვასწორებ და რატომ არ მექნებაო?

სახუტამ და სოვდაგარმა კიდევ ბევრი ისაუბრეს მოგება-  
წაგებაზე, მერე ივახშმეს და დაწუნენ. სოვდაგარმა დაიძინა, სახუტას კი რა დააძინებდა, წამოდგა ჩუმად ლოგინიდან, აიღო თავისი გოდორი, ვერცხლის ფული სახლის კიბეებსა და ეზოში მიმოაბნია, ნახშირიანი გოდორი კი მტკვარში ჩა-  
აგდო, თვითონ უკანვე დაბრუნდა, ისევ ჩუმად შეიპარა სა-  
წოლში და დაიძინა.

დილას ადგნენ თუ არა, სახუტამ მაშინვე თავისი გოდორი მოიკითხა, მაგრამ სადღაა გოდორის ატეხა სახუტამ ყვირილი:

— სოვდაგარო, ჩემს ფულებს უსათუოდ შენ გაატანდი ვისმეს, და თუ ათმაგად არ მოგიცია, სამართალში გიჩივლებო!

შეეშინდა სოვდაგარს, ემანდ მართლა არ მიჩივლოს და საქვეყნოდ თავი არ მომჭრასო და ათი ტომარა ვერცხლის ფული გადმოუღაგა. სახუტამ იქვე იქირავა მუშები, აჰკიდო ვერცხლის ფულით სავსე ტომრები და გამოსწია შინისაკენ.

სახუტას ძმებმა რომ ამდენი ფული დაინახეს, შური უარესად გაუძლიერდათ და ძმას ჰკითხეს:

— სად გიშოვნია, სახუტა, ამდენი ფულიო?

— ქალაქში ფულის მეტი რა იშოვებაო, — მიუგო სახუტამ, — თქვენ რომ სახლი დამიწვით, მოვაგროვე იმისი ნახშირი, გავიტანე ქალაქში და სულ წონა-წონა ვერცხლის ფულზე გადავცვალო.

ძმებმა თქვეს, თუკი ამდენ ფულს მოვიგებთ, ეს ბუდრე-განა ქოხები რად გვინდა, გადავწვათ, გავიტანოთ ნასშირი ქალაქში და სახლებსაც კარგს ავიშენებთ და მდიდრებიც გავხდებითო. გადაბუგვეს მაშინვე თავიანთი სახლები, დაავსეს გოდრები ნახშირით და გასწიეს ქალაქისაკენ. გავიდნენ ბაზარზე და ატეხეს ყვირილი, — ვის გინდათ ვერცხლში ნახშირი წონა-წონაზეო! ხალხმა იფიქრა, ეს მენახშირეები ნამდვილად გიჟები არიან, თორემ ნახშირში წონა ვერცხლს ვინ მისცენსო, და ყურიც არავენ ათხოვა.

მისვდნენ ძმები, რომ სახუტამ ამჯერადაც გააცურათ, დაბრუნდნენ შინ ბრაზმორეულები და სახუტას ცოლი მოუქლეს.

დაღონდა საცოდავი სახუტა ძალიან, მაგრამ ეშმაკობა მაინც არ მოიშალა. წავიდა ქალაქში, იყიდა ფარჩეულობა, გამოაწყო მდიდრულად თავისი მკვდარი ცოლი, გაიდო მხარზე და გასწია ბედის საძებრად. ბევრი იარა, თუ ცოტა, ბოლოს დაბინდებისას ერთ მდინარეს მიაღდა. მდინარეზე წისქვილი ბრუნავდა. მივიდა სახუტა წისქვილთან, ცოლი არხის პირას ხეზე მიაყუდა და მეწისქვილეს ღამის გათევა სთხოვა. მეწისქვილემ უყოყმანოდ მიიღო სტუმარი, მაგრამ გაუკვირდა, სახუტა მარტოკა რომ შევიდა და ჰკითხა: — ცოლი რატომ აღარ შემოიყვანო?

— მეტისმეტი მორცხვია და მოერიდაო, — უპასუხა სახუტამ.

მეწისქვილეს ერთი მზეთუნასავი გოგო ჰყავდა. ადგა გოგო და კარში გავარდა, მე შემოვიყვანო. მივიდა სახუტას მკვდარ ცოლთან და დაუწყო ხვეწნა, — ნუ გრცხენია, შიგნით შემოდო, მაგრამ მკვდარს აბა რას გააგებინებდა. რომ ვერაფერი შეასმინა, ხელი მოჰკიდა და თავისკენ გამოსწია. მკვდარი მოშორდა საყრდენ ხეს, გაუვარდა გოგოსაც სულიდან და არხში მოადინა ტყაპანი. შეშინებული გოგო მაშინვე წისქვილში შევარდა და მომხდარი ამბავი მამას და სახუტას შეატყობინა.

გამოვარდა სახუტა კარში და ატეხა ყვირილი:

— არიქათ, ვინა ხართ ქრისტიანი, მიშველეთ, ცოლი დამისრჩევსო!

მეწისქვილეს შეეშინდა, ემანდ არავინ გაიგოს და არ და-  
ვიღუბო, და სასუტას შეესვეწა:

— ოღონდ გაჩუმდი, ამ ამბავს ნურავის გააგებინებ და  
ცოლად აი ჩემი ქალიშვილი წაიყვანო.

სასუტასაც მეტი რაღა უნდოდა. მოჰკიდა ლამაზ გოგოს  
ხელი, ამოიყენა გვერდით და შინ მიიყვანა.

ძმები ამ ლამაზი გოგოს დანახვასზე მთლად გაღიზი-  
ნენ, შურით პირდაპირ გულები დაუსკდათ და სასუტას ჰკი-  
თხეს:

— სად იშოვე ასეთი ლამაზი გოგო, ან ვინ მოგცაო?

— ჰმ, აბა რა გეგონათ, ცოლი რომ მომიკალითო, —  
მიუგო სასუტამ და უღვაშებში ჩაიციანა, — წავიღე ქალაქში  
ჩემი მკვდარი ცოლი, გავიტანე შეიდანზე და დავიძახე. —  
აბა, ვის გინდათ სოფლელი მკვდარი ქალაქელ ცოცხალში?  
ქალაქელები ხომ იცით, რა სალხია, ოღონდ გასაცვლელ-გა-  
საყიდი რანე დაინახონ და უშალ ფეხზე დადგებიან. ჰოდა,  
შემონებსვიწინენ მეც და თავიანთი ქალიშვილები შემომბაძლი-  
ეს, მაგრამ მე სხვა არავინ მომეწონა, ეს ერთი ავიჩიე და  
წამოვიყვანეო.

— თუ ქალაქელები ცოცხლებს მკვდრებში სცვლიან და  
თანაც ასეთ ლამაზ გოგოებს იძლევიან, მეტი რაღა გვინ-  
დაო, — თქვეს ძმებმა და თავიანთი ცოლები ემავე დღეს და-  
ხოცეს. გაიტანეს ქალაქის შეიდანზე და ატესეს ყვირილი:

— აბა ვის გინდათ სოფლელი მკვდრები ქალაქელ ცოცხ-  
ლებში გასაცვლელიო?

გაბრაზდნენ ქალაქელები და ძმები სულ ცემა-ტყუებით გა-  
მოცარეს: — ვინ ოხრები ხართ, ან ჩვენ ვინა გგონივართ,  
რომ მკვდრებში ცოცხლებს ითხოვთ, ახლავე მოუსვით აქე-  
დან. თორემ ცემას არ გაკმარებთ, დაგიჭერთ და მტკვარში  
გადაგვრითო.

ცოლებს ვინღა ჩიოდა, ძმებს თავებიც კინადამ იქ  
დარჩათ, მოვიდნენ შინ ნაცემ-ნაბეგვები, მიუსტნენ სასუტას  
და ცემა დაუწყეს: — შე სულაძაღლებულო მუქთასორავ, რა-  
ზე დაგედუბე, ცოლები რაზე დაგვახოციანო.

ცემით რომ გული იჯერეს, ძმებმა ერთი დიდი კიდობა-  
ნი გააკეთეს, ჩასვეს შიგ სასუტა და თავი დაალურსმეს. მე-

რე დაუდეს ურემზე კიდობანი და ერთ ფრიალო კლდის პირას მიიტანეს. გადასაგდებად და სასიკვდილოდ თვითონ ვერ გაიმეტეს, თქვეს, იქნებ ვინმემ ხელი ჰკრას ან თვითონ გაინძრეს და კლდეზე გადაიჩეხოსო. მაგრამ ხახუტა არც ისეთი ბრწყვი იყო, რომ ძმების განზრახვას ვერ მიმხედარიყო, — არც განძრეულა და არც ხმა ამოუღია, იჯდა კიდობანში და მარტო იმაზე ფიქრობდა, თავი როგორ გადაერჩინა.

კლდის თავზე საქარავნო გზა გადიოდა. ბედად გზაზე ერთი სოვდაგარი გამოჩნდა, ათი აქლემი ფარჩა-აბრეშუმით დაეჭვირთა და ქალაქისაკენ მიერეკებოდა. ხახუტა ზანზალაკების წკარუნზე მიხვდა, რომ გზაზე სოვდაგარის ქარავანი მოდიოდა და კიდობანში ყვირილი ატეხა:

— არ მინდა, კაცო, რას მერჩით, სხვა ვინმე წაიყვანეთ, მე რატომ მაძალებთო!

მივიდა სოვდაგარი კიდობანთან და ჩასძახა:

— ვინა ხარ, რატომ ყვირი, ან ვინ რას გაძალებსო?

— როგორ რა მაყვირებს, — მიუგო კიდობნიდან ხახუტამ, — ხელმწიფის ქალს მრთავენ ცოლად, არ მინდა, მაგრამ უარი რომ ვუთხარი, აი ამ კიდობანში ჩამსვეს და ისე მივყვარ, დღეს სწორედ ჯვარი უნდა დამწერონო.

სოვდაგარს გაუკვირდა, ეს რა გიჟი ვინმე ყოფილაო, და უთხრა:

— შენ რაკი არ გინდა, მე წავალ, ამოგიყვან ამ კიდობნიდან და მე ჩავჯდები. შენ კი სამაგიეროდ ჩემი ქარავანი გაირეკე და მთელი ეგ აურაცხელი სიმდიდრე ღმერთმა მშვიდობაში მოგასმაროსო.

ამოუშვა სოვდაგარმა კიდობნიდან ხახუტა და თვითონ ჩავჯდა. ხახუტასაც ეს უნდოდა, დაულურსმა თავი კიდობანს, ჰკრა ხელი და უფსკრულში გადაუძასა. თვითონ ფარჩა-აბრეშუმით დატვირთული ქარავანი გამოირეკა და ეზოში დიღინ-დიღინით შემოერეკა.

ძმების შურსა და გაკვირვებას საზღვარი არ ჰქონდა, — როგორ გადაარჩა ცოცხალი და ან ეს ამდენი სიმდიდრე სად იშოვაო?

— აბა, რა გეგონათ, — უთხრა ხახუტამ თავმომწონედ, —

თქვენ სასიკვდილოდ გამიშეტეთ, მაგრამ მართალ კაცს ღმერთი არ გასწირავს. მართალია, კლდეზე დავგორდი, მაგრამ სიკვდილის მაგივრად ერთ სავერდივით მწვანე მინდორში დავუცი. გამოვედი კიდობნიდან და, რას ვხედავ, მინდორში ეს ფარჩა-აბრეშუმით დატვირთული ქარავანი ბალახობს. მე წამოსვლა დავაპირე, მაგრამ ციდან ვილაცამ ჩამომძასა:


— შენია ეგ ქარავანი, ღმერთსაც მოუცია და კაცსაც, გარეკე და მოიხმარეო! მეც რაღა უარს ვიტყვოდი, გამოვრეკე და, როგორც შედავთ, ახლა ჩემიაო.

მაგრამ ძმებმა ამჯერად აღარ დაუჯერეს. თქვეს, თუ ამას არ მოვშორდით, კიდევ რამეს გვიხიმიანებს და მთლიანად დაგვღუპავსო. ადგნენ და სამუდამო საცხოვრებლად სულ სხვა მხარეს გადაიკარგნენ. დარჩა ხახუტა მარტო თავის ლამაზ ცოლთან, ძმების წილ ადგილ-მამულსაც თვითონ დაეპატრონა და დაიწყო ტკბილი და უზრუნველი ცხოვრება.

ჭირი — იქა, ლხინი — აქა,  
ქატო — იქა, ფქვილი — აქა.







## მეფობას ხელობა ჯობია

იყო და არა იყო რა, ღვთის უკეთესი რა იქნებოდა, იყო ერთი ჭაბუკი მეფე, ცოლი არ ჰყავდა, მაგრამ სხვა უფლისწულებივით თვალი დიდგვაროვანთა ქალიშვილებისაკენ არ გაურბოდა, — მდაბიურად გადაცმული დადიოდა და თავის გუნების ქალს დაეძებდა.

ამ ძებნა-ძებნაში ერთი ხელოსნის გოგო მოეწონა და იმავე დღეს შუამავლად თავისი პირველვეზირი მიუგზავნა. გოგოს მშობლები ცას ეწივნენ სიხარულით, რომ მათს ქალიშვილს ახალგაზრდა ხელმწიფე თხოულობდა. რა თქმა უნდა, თვითონ გოგოსაც ძალიან გაუხარდა, მაგრამ გულს უცაბედად არ აჰყვა და მაშინვე ის იკითხა, — რა ხელობის კაციაო?

— როგორ რა ხელობის კაცია, — გაიკვირვა დიდვეზირმა, — შეფეაო!

— მეფობა რომელი ხელობააო, — კვლავ იკითხა გოგომ, — რისი გაკეთება შეუძლიაო?

— სახელმწიფოს მართავსო, — განუმარტა ვეზირმა.

— სულ ეგ იცისო? — ჩააცვიდა გოგო.

— ამაზე კარგი რაღა უნდა იცოდესო?

— თვითონ, თავისი ხელით არაფერს აკეთებსო?

— თავისი ხელით არაფერს და მეფეს ეს არც ეკადრება, თვითონ ბრძანებს და საქმეს სხვები აკეთებენო.

— მაშ მეფობა ვერაფერი ხელობა ყოფილა, — თქვა ქალმა, — სანამ რამე ხელობას არ ისწავლის, მე იმისი წამყოლი არა ვარო.

მშობლებს ძალიან ეწყინათ თავიანთი ქალიშვილის უარი. ეწყინა, რა თქმა უნდა, დიდვეზირსაც. მეფეს კი სულაც არ სწყენია, პირიქით, სადედოფლოს პასუხში გულისხმაში ჩააგდო: მართლაც და, რა კაცია ის, ვინც ერთი ხელობა მაინც არ იცის და თავისი ხელით ცოტა რაიმის გაკეთება მაინც არ შეუძლიათ, — გაიფიქრა გულში და დიდვეზირს ჰკითხა: — ხელობის ცოდნა მეფობას ხომ არ ამცირებსო?

— პირიქით, — უთხრა დიდვეზირმა, — ქვეყნის მმართველმა ყველაფერი უნდა იცოდეს, რაც მეტი ხელობა იცის კაცმა, მით მეტის შენძნელებელია და ცხოვრებაში არც რამე გაუჭირდებაო. წუღან ვერ შეგბედეო, თორემ სწორედ ასე თქვა თქვენმა ამორჩეულმა სადედოფლომ: ერთიც ვნასოთ და საღხმა მეფედ აღარ ინდომოს, მერე რით აპირებს თავის რჩენას და ცხოვრებასო?

— მართალი უთქვამსო, — თქვა ჭაბუკმა მეფემ და ისევ დიდვეზირს ჰკითხა:

— ყველაფერს რომელი ხელობა ჯობიაო?

— ფეიქრობა ყველა ხელობას ჯობია, — მიუგო დიდვეზირმა, — რა შეედრება ფერადი ყვავილების ქარგვას, თანაც ძაფი და ბაწარი ყველგან იშოვება და ფეიქარსაც მეტი არაფერი სჭირდებაო.

დიდვეზირის რჩევას მეფეც დათანხმდა და სასახლეში ყველაზე სახელგანთქმული ხალიჩების მქსოველი მოიწვიეს. ისტატმა სულ მალე შეასწავლა ასალგაზრდა მეფეს ხელობა და ბოლოს მთლიანი ხალიჩის მოქსოვაც მიანდო. ამ პირველ, დამოუკიდებელ ნახელავში მეფემ მთელი თავისი ნიჭი, უნარი და შეძენილი ცოდნა ჩააქსოვა, თავიდან ბოლომდე ფერადი ყვავილებით მოხატა, ყვავილებს შორის სატრფიალი ლექსები ჩაურთო და საჩუქრად თავის საცოლეს გაუგზავნა. ლექსები და საალერსო სიტყვები ისე იყო ყვავილთა ფოთლებში შესამებული, რომ თუ ძალიან ყურადღებით არ დააკვირდებოდა მნახველი, ვერაფერს გაუგებდა, მაგრამ ჭკვიანმა გოგომ უმაღვე ამოიცნო და თანხმობაც შეუთვალა. გადანიხადეს დიდი ქორწილი და დაიწყეს ბედნიერი ცხოვრება.

ჭაბუკ მეფეს ერთი ასირებული ჩვეულება ჰქონდა: ხანდა-

სან მოუხასნიათებოდა, გადაიცეამდა მდაბიურად და მარტოდმარტო სანადიროდ წაედოდა. ერთხელაც გადაიცეა და წავიდა. იმ დღეს ვერაფერი ინადირა, საგზალიც შემოკლია და მოშვიდა. უცბად უსიერ ტყეში ერთ დუქანს წააწყდა და მაშინვე მას მიაშურა. შევიდა დუქანში და დახლიდარს ჰკითხა:

— სადელი გაქვთო?

— როგორ არაო.

— აბა, მამ მაჭამე, თორემ მკელივით მშიაო.

— აიხსენით იარაღი და დარბაზში მობრძანდითო, — შენთავაზა დახლიდარმა.

მეფემ აიხსნა მშვილდ-ისარი, ხმალ-სანჯალი და, როგორც სტუმარ-მასპინძლობის წესია, — დახლიდარს ჩააბარა. დახლიდარმა მეფის იარაღი დახლსუკან შეინახა და სალინებით მოფენილი დიდი ოთახის კარი გაუღო. მეფეს მოეწონა დახლიდარის ასეთი თავაზიანობა და დარბაზში მკვირცხლად შეაბიჯა. მაგრამ შედგა თუ არა ფესი შიგ, უცბად იატაკი ჩაბრუნდა და მეფემ ბნელ და ღრმა ორმოში მოადინა ბრაგვანი.

გულგახეთქილი და გაოგნებული მეფე წამოდგა და მიმოიხედა, მაგრამ რას დაინახავდა, — ირგვლივ ისეთი სიბნელე იდგა, თვალთან თითის მიტანა არ შეიქლებოდა. უცბად გვერდიდან ვიღაცამ გადაულაპარაკა:

— ვინა ხარ, ან ამ დუქანში — ამ ცოდვის ორმოში როგორ მოხვდიო?

— როგორ თუ ცოდვის ორმოშიო?! — გაუკვირდა მეფეს. მეფის ამ კითხვაზე ახლა მეორე ხმამ უპასუხა:

— როგორ და, ვინც ამ ორმოში მოხვდება, სიკვდილს ვერ გადაურჩებაო. ახლა ჯერი ჩვენზეა მომდგარი, ჩვენ რომ ბოლოს მოგვიღებენ დუქნის პატრონები, მერე შენც დაგკლავენო.

— კი, მაგრამ რა დავუშავე, რაგომ დამკლავენო? — იკითხა უარესად გაკვირვებულმა მეფემ.

— ეს დუქანი ყაჩაღებისაა, — უთხრა პირველმა ხმამ, — აქ ყველას ადამიანის ხორციით უმასპინძლდებიან. ვინც მარტო შემოვა და თვალადაც მოეწონებათ, მაშინვე ამ ორმოში

უკრაინენ თავს. მერე დაკლავენ და გემრიელ კერძებს აკეთებენო.

— რატომ შერებთან ამ საზიზღრობასო? — კვლავ იკითხა მეფემ.

— მოგების გულისათვისო, — უბასუხა იმავე ხმამ, — საქონლის სორცში ფული უნდა მისცენ, ასე კი კაპიკი არ ეხარჯებათ. მოგებას ისე გაუწუწუკებია ეს ვაჭრები, რომ აღარაფრისა აღარ სცხვენიათ და აღარც სიბრაღული და ადამიანობა გააჩნიათო.

ამ ლაპარაკში რომ იყვნენ, ორმოში შეიარაღებული კაცები ჩამოეშენენ, წააქციეს ის კაცი, ვინც მეფეს პირველად გამოელაპარაკა და ყელი გამოსჭრეს.

მეფე საგონებელში ჩავარდა, — რა ქნას, როგორ დაიხსნას თავი? უცბად თავისი ხელობა მოაგონდა და მკვლელებს ჰკითხა:

— მეც ასე უნდა დამკლათო?

— შენ რომელიღა წითელი კოჭი ხარო?

— მე ისეთი ხელობა ვიცი, რომ ათჯერ მეტს მოგაგებინებთ, ჩემს სიკვდილს რას გამოორჩებით, არ გირჩევნიათ, მაცოცხლოთ და ფულები ხვეტოთო, — უთხრა მეფემ.

— მაინც რისი გაკეთება შეგიძლიაო? — ჰკითხეს მკვლელებმა.

— მე ისეთ ხალიჩებს მოვქსოვ, რომ თითო ხუთას თუმნად გაიყიდებაო.

— ხალიჩებში ხუთას ოქროს ვინ გაიღებსო?! — დაეჭვდნენ მკვლელები, მაგრამ მეფემ მალე ჩააჩუმა, — საქვო არაფერია, მყიდველს თვითონ მე გასწავლით, თქვენ მარტონართის ძაფი და საქსოვი მოწყობილობა მომიტანეთ და შედეგს თქვენი თვალით ნახავთო.

— აქ რომ მოგიტანოთ ყველაფერი, მოქსოვო?

— რატომაც არა, ოღონდ სანთელი დამანთებინეთ, თორემ ამ სიბნელეში ფერებს ვერ გავარჩევო.

— კარგი, გენდობით, — უთხრეს ვაჭარ-მკვლელებმა, — ჩამოგვიწერე, რა და რა გჭირდება და მოგიტანთო.

მეფე ჩამოჯდა და ჩამოწერა: ორი ყდა, ორი ლილვი, ორი გარა, ორი ქირი, ოთხი სამატ-საკლები სოლი, ორი საშევა-

რი, საქანი გარა, ფხინი, ცხემლი, ბეჭ-წიწუ და შვიდი ფერადი ნართის გორგალი.

— აი ყველაფერი ეს მომიტანეთ და დანარჩენი მე ვიციო, — უთხრა მევემ და დაწერილი სია მკვლელებს გადასცა.

ფულსდახარბებულმა კაციტამია მიკიტნებმა ყველაფერი იმ დღესვე მოუტანეს. მეფეც იმავე დღეს შეუდგა საქმეს, შვიდი დღე და დამე თავაუღებლად იმუშავა, მერვე დღეს ქსელი გაჭრა და ყდიდან ისეთი ხალიჩა ჩამოიღო, რომ ქვეყნად იმისი ბადალი არაფერი მოიძებნებოდა: ფერად ყვავილწუნულებსა და ფოთლებს შორის მეფის მთელი თავგადასავალი ეწერა, მაგრამ ასოები ისე იყო შესამებული და ჩახლართული ერთმანეთში, რომ იმის ამოკითხვას დედოფლის მეტი ვერავენ შესძლებდა.

— ახლა, პირობის თანახმად, ისიც გვითხარი, ვინ იყიდის ამ ხალიჩას და ვინ გაიღებს ხუთას ოქროსო? — ჰკითხეს მიკიტნებმა.

— ამის ფასს უბრალო კაცი ვერ შესწვდება, — უთხრა მეფემ, — მიიტანეთ მეფის სასახლეში და დედოფალი იყიდისო.

წავიდნენ მიკიტნები და მიიტანეს ხალიჩა მეფის სასახლეში.

— რა გნებაეთო? — ჰკითხეს სასახლის მცველებმა.

— ასეთი და ასეთი ნივთი გვაქვს გასაყიდი და გვინდა დედოფალს ვაჩვენოთო.

კარისკაცებმა მოასხენეს დედოფალს. დედოფალმა დარბაზში შემოყვანა ბრძანა. შევიდნენ მიკიტნები და გაშალეს ხალიჩა. დედოფალმა დახედა თუ არა, წამსვე მიხვდა, რომ ხალიჩა მისი ქმრის ნახელავი იყო, მერე საიდუმლო წარწერაც ამოიკითხა: მეფე სწერდა, როგორც ჩავარდა ტყვედ, როგორ გადაარჩინა სიკვდილს ხელობის ცოდნამ და ბოლოს დასძენდა: „ამ ხალიჩაში უსათუოდ მიეცი ხუთასი ოქრო, მერე შენი საწოლი ოთახისათვის დაავალე ახალი ხალიჩის მოტანა, ოღონდ მოსთხოვე, რომ თვითონ ოსტატი მოგიყვანონ და იმან აიღოს ზომა, თორემ ოდნავ მეტ-ნაკლებიც რომ იყოს, არ ავიღებთ-თქო. შეპირდი ათას ოქროს, თან კარისკა-

ცებს დაავალე, რომ ამ ავაზაკებს ჩუმად თვალყური ადევნონ.

დედოფალმა ყველაფერი დაწვრილებით გაიგო, მაგრამ გარეგნულად არაფერი დაიმჩნია, უყოყმანოდ ჩაუთვალა მიკიტნებს ხუთასი ოქრო და უთხრა:

— ერთი ასეთი ძვირფასი სალიჩა ჩემი საწოლი ოთახისთვისაც მინდა, ოღონდ ძალიან ზუსტი ზომისა უნდა იყოს და ამისათვის, მე მგონი, თვითონ ოსტატის მოყვანა დაგჭირდებათ, რომ კარგად გაზომოს სიგრძე-სიგანით. ნუ გეშინიათ, ფასზე არ გალაპარაკებთ და თქვენს ოსტატს თუ ჩემი გუნების სალიჩას მოაქსოვინებთ, ათას ოქროს სულ ბაჯალღოს ჩაგითვლითო. — ერთი სიტყვით, სწორედ ისე უთხრა, როგორც სალიჩაზე ეწერა.

ათასი ოქროს გაგონებაზე კაციჭამია მიკიტნებმა თვალეზი გადმოკარკლეს და ყველა პირობაზე სიხარულით დათანხმდნენ. მეორე ღამესვე მოიყვანეს მეფე-ოსტატი და შეიყვანეს სასახლეში. დედოფალს გული დაეწვა მეფის დანახვაზე, მაგრამ სიბრალული არც ამჯერად დაიმჩნია, მეფეს ხელში საზომი მისცა და თავის საძილე ოთახში შეუშვა. მეფეს ოთახში კარისკაცები დახვდნენ და სამეფო ტანსაცმელი დაახვედრეს. მეფემ საჩქაროდ გამოიცვალა ძველმანები, გაიკეთა სამეფო ნიშნები და დარბაზშივე გამოვიდა. მიკიტნებმა, რა თქმა უნდა, ვერ იცნეს.

— თქვენა ხართ სალიჩის ვაჭრებიო? — ჰკითხა მეფემ.

— ჩვენ გახლავართო!

— თქვენ იღებთ დედოფლის ახალ შეკვეთას ათასთუმნიან სალიჩაზეო?

— დიას, ჩვენ ვიღებთო!

— თვითონ მე ვინა ვარო? — ჰკითხა ბოლოს მეფემ.

— რალა თქმა უნდა, მეფე ბრძანდებითო, — მიუგეს მიკიტნებმა.

— ჩემს შესახებ სხვა არაფერი იცითო?

— ამაზე მეტი რალა უნდა ვიცოდეთო!

— აი, თქვე კაციჭამია ავაზაკებო, — დასჭყვივლა ახლა კი მოთმინებადაკარგულმა მეფემ, — განა ის სალიჩა მე არ მოექსოვე, თქვენ რომ ხუთასი ოქრო ჩაიჯიბეთ? მაგრამ

ახლა სამუდამოდ მოელო ბოლო თქვენს ავაზაკობას, ჩემს ხელში ხართ და ველარსად წამინვალთო!

ამის შემდეგ მეფემ უბრძანა კარისკაცებს და ყველანი იქვე დაატყუებინა. მერე ჯარი გაგზავნა დუქანში, დუქანი დაარბევინა და დანარჩენებიც ხელფეხგაკრული მოაყვანი-  
ნა. მოიწვია სამსჯავრო და ყველასთვის ჩამოსწრობა მიას-  
ჯვევინა.

დამნაშავენი რომ ჩამოასწრევს, დედოფალი გადაეხვია მეფეს და უთხრა:

— აბა, ცუდი ვქენი, რომ ხელობა შეგასწავლეთ?

— რაც მართალია, მართალია, სული ახლა შენით მიდ-  
გასო, — უთხრა მეფემ, — შენ რომ ასეთი ჭკვიანი არა მყავ-  
დე, დღეს ჩემი ძულებიც აღარ იქნებოდა. მეფობა მართლაც  
ვერაფერი ხელობა ყოფილა, მეფობა იქ ველარაფერს მიშვე-  
ლიდა, ხელობამ კი აი, ცოცხალი გაუამარჩინაო.

ჭირი — იქა, ლხინი — აქა,

ქატო — იქა, ფქვილი — აქა.





## სელმწიფე და გლეხის ქალი

იყო და არა იყო რა, ღვთის უკეთესი რა იქნებოდა. იყო ერთი გლეხი და ჰყავდა ერთი გასათხოვარი ქალიშვილი.

ერთხელ გლეხი ყანას ხნავდა. ათი კვალი სწორად გაატარა, მეთერთმეტეზე მიწაში სახნისი რალაცას წამოედო და გუთანს კვალი შეაშლევინა. გლეხმა ხარებს დაუხია, მივიდა იმ ადგილზე, სადაც გუთანი ამოუვარდა, და თვალები გაუბრწყინდა — სწულის შავ ნალარში ოქროს ფილი დაინახა.

გლეხმა ჩოხის კალთით გააპრიალა ოქროს ფილი, ხარგუთანს იმავე წამს თავი მიანება და სახლისაკენ მოკურცხლა.

ქალიშვილი არ მოელოდა მამის ამ დროს დაბრუნებას და გაკვირვებულმა ჰკითხა:

— ასე ადრე რომ მოხვედი, განა ხვნა უკვე მოათავეო?

— რა დროს ხვანაა, შვილო, — მიუგო მამამ, — დღეს ისეთი ბედი დამეცა, რომ ხვნაც დამავიწყა და ჩემი თავიცო.

— რა ბედი, მამილო, მიწაში საგანძური ხომ არ გიპოვიაო? — ჰკითხა ქალიშვილმა.

— დიანაც მიპოვია! — თქვა გლეხმა და ოქროს ფილი ქალიშვილს თვალებთან მიუტანა, — აბა დახედე, ამას რომელი საგანძური შეედრებაო.

— ეს ხომ ოქროს ფილიაო! — წამოიძახა ხმამაღლა ქალიშვილმა.

— სწორედ, რომ ის არისო! — თქვა გლეხმა და ფილი ხელში თავმომწონედ შეათამაშა.



— მერე და, რა ვუყოთ, რაში მოვიხმაროთო? — ჰკითხა ქალიშვილმა.

— როგორ თუ რა, — უთხრა მამამ, — ჩვენს ხელმწიფეს მივართმევ და ამაში სამ დღიურ მიწას მაინც მომცემსო.

ქალიშვილს არ მოეწონა მამის განზრახვა და ურჩია:

— არა, მამავ, განა არ იცი, ხელმწიფე როგორი ხარბია, იმას რომ ეს ფილი აჩვენო, წყალგალმა მოგედავება და ოქროს სანაყსაც მოგთხოვსო.

ბევრი ასეთი რამ უთხრა ქალიშვილმა მამას და ურჩია, რომ ოქროს ფილი ხელმწიფესთან არ წაეღო, მაგრამ მამამ არ დაუჯერა, რომ იტყვიან, ქვა შეაგდო და თავი შეუშვირა, — გინდა თუ არა, ასეთი ძვირფასი ნივთი მხოლოდ მეფის საკადრისია და უნდა მივეუტანო.

გლეხმა აიღო ფილი, გამოიხვია ჩოხის კალთაში და გასწია მეფის სასახლისაკენ. კარისკაცებს შესვლის ნებართვა სთხოვა, ხელმწიფეს ქუდმოხდილი წარუდგა და მოახსენა:

— დიდებულო ხელმწიფე, ეს ძვირფასი ნივთი სწორედ თქვენი საკადრისია და საჩუქრად მომიერთმევიათ.

— რა არის, რა ნივთიაო? — ჰკითხა ხელმწიფემ.

— ოქროს ფილი გახლავთ, — მიუგო გლეხმა, — ხნულში ვიპოვე და აი, მოგართვითო.

— ოქროს ფილი?! — გაიკვირვა ხელმწიფემ და გლეხს შეეკითხა, — სანაყი რაღა უყავით?

— მიწაში მარტო ეს ვიპოვეო, — უთხრა გლეხმა.

ხელმწიფემ არ დაუჯერა, — აი, შე ბრიყვო, შენა! — დაუყვირა წყრომით, — სადაც ფილი იყო, იქ უსათუოდ სანაყიც იქნებოდა. ახლავე უკან გაბრუნდი და ისიც მომიტანე, თორემ მაგ მატყუარა ენას ძირში ამოგწვდიო.

შეწუხდა გლეხი, საიდან უნდა მოეტანა ოქროს სანაყი? არადა, ხელმწიფე მუქარას აასრულებდა და ენას მართლა ამოსწვდიდა. ახლა კი გაახსენდა თავისი ქალის რჩევა და სინანულით ჩაილაპარაკა:

— ახია ჩემზე, არ მერჩია, ჩემი ქალისათვის დამეჯერებინაო?!

ხელმწიფემ ყური მოჰკრა გლეხის ნათქვამს და ჰკითხა:

— რა გითხრა ასეთი შენმა ქალმაო?

— რა და, მაგ ფილს ხელმწიფეს ნუ აჩვენებ, თორემ ოქროს სანაყსაც მოგთხოვსო, — უთხრა გლესმა და დაუმატა, — აჰა, აგე, თქვენც სომ ხედავთ, როგორ ამიხდაო.

— შენმა ქალიშვილმა წინასწარ საიდან იცოდა, რომ სანაყსაც მოგედავებოდით? — ჰკითხა ხელმწიფემ.

— ეს, — ამოიოხრა გლესმა, — მე ვარ სულელი, თორემ ვისაც ჭკუა აქვს, იმან წინასწარვე იცის, რა საქმეს რა შედეგიც მოჰყვებაო.

— რაკი შენი ქალი ასეთი ჭკვიანი ყოფილა, წადი და ახლავე აქ გამომიგზავნეო, — უბრძანა ხელმწიფემ.

მეფის ბრძანებამ გლესი უარესად დააღონა, აქამდე მარტო ოქროს სანაყი ჰქონდა თავსახლელი, ახლა კი ქალიშვილის დარდიც დაემატა. მიდიოდა სახლისაკენ და თან თავის თავს საყვედურობდა:

— რა გინდოდა, შე ოხერო ჩემო თავო, რაზე გადაიკიდე სათაბალა, — ოქროს ფილი დაკარგე, ოქროს სანაყი ვალად დაიდე და ქალიშვილის ცოდვაშიც ჩადექიო.

ქალიშვილმა შინ შესვლისთანავე შეატყო მამას უგუნებობა და ჰკითხა:

— რა იყო, მამილო, რაზე დაღონებულხარო?

— რაღა რა იყო, შვილო, — უთხრა მამამ, — როგორც მითხარი, სწორედ ისე დამემართა, — შენც დაგლუპე და ჩემი თავიცო, — და მეფის ნათქვამი სიტყვასიტყვით უამბო, — ხელმწიფეს მივართვი თუ არა ოქროს ფილი, მაშინვე ოქროს სანაყიც მომთხოვა, — ისიც მომიტანე, თორემ ჩემი მოტყუებისათვის ენას ძირში ამოგწვდიო, თანაც მიბრძანა, შენი ჭკვიანი ქალი დღესვე აქ გამომიგზავნეო. ვინ იცის რა უდევს გუნებაში, ხელმწიფე რომ კარგს არაფერს იფიქრებს, აბა ვინ არ იცისო.

— ნუ გეშინია, მამილო, — ანუგეშა ქალიშვილმა, — ხელმწიფე ალბათ იმიტომ მიბარებს, რომ ჩემი ჭკუის გამოცდა უნდა, წავალ, იქნებ გავიმარჯვო და ორივენი ბედს ვეწიოთო.

ქალმა გადაიცივა თუ რამ გლესის კვალობაზე რიგიანი ჩასაცმელი გააჩნდა და გასწია ხელმწიფის სასახლისაკენ.

კარისკაცებს შესვლის ნებართვა სთხოვა, ხელმწიფეს თავდასრით წარუდგა და მოახსენა:

— გეახელით, დიდებულო ხელმწიფე, რას მიბრძანებთო?

— აბა, თუ მართლა ასეთი ჭკვიანი ქალი ხარ, ახლა გამოინდება, — უთხრა ხელმწიფემ, — სვალ ისევ მოხვალ ჩემთან, მაგრამ ისე კი, რომ არც შიშველი იყო, არც ჩაცმული, არც ფეხით მოსვიდე და არც სხვა რამით, რასაც ხალხი სამგზავროდ ჰმარობს. შეასრულე ამ დავალებას, სომ კარგი — მამაშენს ოქროს ფილს უკანვე დაეუბრუნებ და შენ ცოლად შეგირთავ, ვერ შეასრულე და, ენას მოგაჭრით.

— კარგიო, — უთხრა ქალიშვილმა და წავიდა.

მეორე დღეს დაიწადა ტანსაცმელი: დედიშობილა ჩაჯდა ბადეში, ბადე ვირს გამოაბა უკან და ასე თრევეთ მივიდა ხელმწიფესთან.

ხელმწიფეს ძალიან მოეწონა გლეხი ქალის ასეთი მოსერება და, როგორც შეპირებული იყო, იმავ დღეს ცოლად შეირთო, სოლო ოქროს ფილი მამას დაუბრუნა.

დაიწყეს ამ დღიდან ხელმწიფემ და გლეხის ქალიშვილმა ტკბილი და ბედნიერი ცხოვრება. ხელმწიფე ხშირად ეთათბირებოდა სახელმწიფო საქმეებზე თავის ჭკვიან ცოლს და მისი რჩევა ყოველთვის კარგადაც უჯდებოდა.

ერთ წელიწადს მწყემსებმა ქალაქზე მთისკენ მიმავალი ცხვარ-ძროხის ფარები ამოატარეს. ქალაქს რომ გასცდნენ, ბინდმაც მოუსწრო. მწყემსებმა ღამის გასაღევი ადგილი შეარჩიეს, ჯორ-ცხენებს ბარგი მოხადეს, ცხვარ-ძროხა ერთად დააქურჩეს და კოცონის გვერდით ვახშამს შემოუსხდნენ. კარგად რომ დანაყრდნენ და ლაპარაკითაც გული იჯვრეს, დაწვნენ და დაიძინეს.

იმ ღამეს ერთი მცცხვარის ჭაკმა ცხენმა კვიცი მოიგო, ცხენის პატრონს ეძინა. მეორე მწყემსმა ამით ისარგებლა და ახალშობილი კვიცი თავის ხარს გამოაბა ფეხზე.

გათენდა მეორე დღი. მწყემსებმა გაიღვიძეს და თავთავიანთი საქონელი მოათვალიერეს. ცხენის პატრონმა ნახა, რომ იმის ცხენს კვიცი მოუგია, მივიდა ხარის პატრონთან და უთხრა:

— ძმობილო, ეს კვიცი წუსელ ჩემს ცხენს მოუგია და შენს ხართან საიდან გაჩნდაო?

— სომ არ გადაირიე, — გაწყრა ხარის პატრონი, — ეს კვიცი შენმა ცხენმა კი არა, ჩემმა ხარმა მოიგო, წუსელ მთელი ღამე თავზე ვედექი და დედას რომ არ მოშორებოდა, ფეხზე მივაბიო.

მწყემსებმა ბევრი იდავეს — არა ჩემია, არა ჩემიაო, მაგრამ ვერ შეთანხმდნენ. ბოლოს ადგნენ და საჩივლელად ხელმწიფესთან წავიდნენ.

ხელმწიფე ამჯერად აღარ დაეკითხა თავის ჭკვიან ცოლს, საჩივარი მარტომ განსაჯა და მწყემსებს ასეთი განაჩენი გამოუტანა: რაკი კვიცი დილას ხართან აღმოჩნდა, მაშასადამე, ხარს მოუგია და რგებითაც ხარის პატრონს უნდა ერგოსო.

ცხენის პატრონს გულზე ბოღმა შემოაწვა, ხან გაყვითლდა, ხან გაღურჯდა, მაგრამ რა ექნა, — ხელმწიფეს სიტყვას სომ ვერ შეუბრუნებდა. გაბოროტებული გამობრუნდა უკან, სიმწრისაგან სულ ტუჩებს იკვნეტდა და თვალები ცრემლით ევსებოდა.

სასახლიდან გამოსულ მწყემსს კარებში ხელმწიფის ცოლი შემოხვდა და, დალონება რომ შეატყო, ჰკითხა:

— რა იყო, ასე მწარედ რამ დაგაღონაო?

მწყემსმა ყველაფერი დაწვრილებით უამბო.

— ნუ გეშინია, სიმართლე არსად დაიკარგებაო, — უთხრა ხელმწიფის ცოლმა, — ოღონდ, როგორც დაგარიგო, ისე მოიქეცი: წადი, სადმე ერთი ბადე იშოვე, მოიტანე და ხელმწიფის აივნის წინ, ეზოში მალმალე გადაისროლე, ვითომ მეთევზე ხარ და თევზებს იჭერ. ხელმწიფე რომ დაგინახავს, უსათუოდ შეგეკითხება, — კაცო, რას შვრები, უწყლო, მყარ მიწაზე თევზის დაჭერა როგორ შეიძლებაო? — შენ უპასუხე: დიდებულო ხელმწიფევე, თუკი ის შეიძლება, რომ ხარმა კვიცი მოიგოს, მიწაზე თევზის დაჭერა რატომ აღარ უნდა შეიძლებოდესო? ხელმწიფე მიხვდება თავის შეცდომას და კვიცს შენ დაგიბრუნებსო.

მწყემსი ისე მოიქცა, როგორც ხელმწიფის ცოლმა დაარჩია: იმავე დღეს სადღაც ერთი ძველი ბადე იშოვა, შევი-

და მეფის ეზოში და მოჰყვა ბადის სროლას — გადაისვრის, აჰკეცავს, გადაისვრის, აჰკეცავს. ხელმწიფე აივანზე გამოვიდა და მწყემსი რომ ამ ყოფაში დაინახა, გაკვირვებულმა ჰკითხა:

— კაცო, რას შერები, ცარიელ მიწაზე თევზის დაჭერა ვის გაუგონიაო?

— რატომ გიკვირთ, დიდებულო ხელმწიფე, — მიუგო მწყემსმა, — თუ მშრალ მიწაზე თევზის დაჭერა არავის გაუგონია, ის კი გაუგონია ვისმეს, რომ ხარმა კვიცი მოიგოსო?

ხელმწიფეს, რა თქმა უნდა, მაშინვე გაახსენდა თავისი უსამართლო განაჩენი და თავის შეცდომასაც მიხვდა, მაგრამ ხელმწიფე იხტიბარს რომ არ გაიტეხდა და მწყემსს გაჯავრებით შეუტია:

— აი, შე ბრიყვო, შენა, არ იცი, რომ ხელმწიფის სიტყვა იგივე ღვთის ბრძანებაა, როცა ის იტყვის, რომ შეიძლება ხარმა კვიცი მოიგოსო, მაშასადამე, შეიძლებაო!

რალა უნდა ექნა საწყალ მეცხვარეს, ადგა და უსიტყვოდ გასცილდა. მაგრამ მწყემსის ნათქვამმა ხელმწიფე მაინც ჩააფიქრა.

— ეს მეცხვარე უთუოდ ჩემი ცოლის დარიგებულია. — თქვა გულში, — თუ დროზე არ მოვიშორე ცოლი თავიდან, ასეთი საქციელით ხალხში სახელს გამოიტეხს და ძალა და გავლენა დამეკარგებაო.

ხელმწიფემ ბევრგვარად იფიქრა და თავის ცოლს ბერიც უდარაჯა, მაგრამ მიზეზი ვერაფერი მოუნახა. ბოლოს ძალად გაჭირვეულდა და ცოლს ტყუილუბრალოდ წაეჩხუბა.

— ამიერიდან შენთან ცხოვრება აღარ შემიძლია, — განუცხადა გადაჭრით, — წადი, გამშორდი და ნებას გაძლე, ჩემს სახლში რაც უფრო მოგწონს და თვალ-გულს მოგდის, აირჩიე და ისიც თან წაიღეო.

— კარგიო, — დათანხმდა ცოლი, — თუკი აღარ გინდვიარ, ძალას არც მე დაგატან, ოღონდ ერთი სათხოვარი მაქვს და ის შემისრულე: დღემდე ტკბილად გვიცხოვრია, გაყრითაც ტკბილად გავიყარნეთ, ერთხელ კიდევ უკანასკნელად ვჭა-

მოდ პური ერთად და ერთმანეთს მშვიდობით ყოფნა ვუსურ-  
ვოთო.

ამაზე ხელმწიფეს აღარაფერი ეთქმოდა.

ქალმა მოამზადა საჭმელი და სუფრა გაშალა. ქმარს  
ღვინოში ბანგი გაურია, თვითონ საღი ღვინო დაიდგა და  
დაიწყეს პურის ჭამა. ჯერ შუა ჭამაშიც არ იყვნენ შესული,  
რომ ხელმწიფეს თვლენა მოერიდა, თავი სუფრაზე ჩამოდო და  
ხვრინვა ამოუშვა. ქალმა მსასურს ცხენი მოაყვანიდა, შესვა  
ზედ მძინარე ქმარი, წაიყვანა თავის მამის სახლში და და-  
აწვინა.

დიღას ხელმწიფეს გაედვიდა, მისედ-მოსედა კედლებს,  
ჭერს და თავისთვის ჩაილაპარაკა:

— სადა ვარ? აქაურობა რაღაც ჩემს სახლს არა ჰგავსო.

— დიდებულო ხელმწიფე, შენ ასლა მამაჩემის სახლში  
ხარ, — უპასუხა ცოლმა, — წუხელ აქ გეძინა და აქვე გაი-  
ღვიძეო.

მეფე უფრო გაოცდა და, — აქ რა მინდა, ან ვინ მომიყვან-  
ნაო? — იკითხა.

— როგორ თუ რა, — უთხრა ცოლმა, — გუშინ ჩვენ რომ  
გაკვირეთ, განა თვითონვე არ მითხარი, აირჩიე რაც უფ-  
რო მოგწონს ჩემს სახლში და თან წაიღეო. მე კი შენს სა-  
სახლესი შენს მეტი არავინ მომწონდა და აი წამოგიყვანეო.

ხელმწიფე ასლა უფრო დიდად გააკვირვა გლეხის ქალის  
ასეთმა ჭკუა-მოხერხებამ და შერიგება სთხოვა.

ქალი დათანხმდა, იმავ საღამოს შესხდნენ ცხენებზე და  
დაბრუნდნენ სასახლესი. კვლავ დაიწყეს ტკბილად ცხოვრე-  
ბა და დღესაც მშვიდად და აუმღვრევლად ცხოვრობენ.

ჭირი — იქა, ლხინი — აქა,

ჭატო — იქა, ფქვილი — აქა.





## კომბლე

ზლაპარ იყო, ზლაპარ იყო,  
ღობეს ჩიტი მომკვდარიყო,  
ჭერში შავდე, გამსმარიყო,  
ჩამოვიღე — დამბალიყო.  
დიდ ქვაბში არ ეტეოდა,  
პატარაში ლაღე იყო,  
ასმა კაცმა ვერ შეჭამა,  
ერთი კაცის ლუკმა იყო.

იყო და არა იყო რა, ღვთის უკეთესი რა იქნებოდა, ერთ სოფელში ერთი ალაღ-მართალი და გამრჯე კაცი ცხოვრობდა. ერთი ძროხა ჰყავდა და საბალახოდ უშვებდა. ძროხას იმ არემარეში ყველა ნადირი იცნობდა და პატრონის შიშით ახლოს არც ერთი არ ეკარებოდა. კაცი არხეინად იჯდა შინ, თლიდა კომბლებს და ჭერში აწყობდა. ამიტომ ხალხიც სახელად კომბლეს ეძახოდა.

ერთ წელიწადს ძროხა ბერწად დარჩა. კომბლემ იფიქრა, ამ ბერწ ძროხას რა უნდა გამოვრჩე, მოდი, გავყიდი და სამაგიეროდ ცხვრებს ვიყიდი, სხვა თუ არაფერი, გაზაფხულზე მატყლს მაინც გავპარსავო.

წაიყვანა ძროხა ბაზრობაზე და აატარ-ჩაატარა. ბერწი ძროხა, რა თქმა უნდა, მსუქანიც იქნებოდა და ყასბებს დანახვისთანავე თვალები ზედ დარჩათ, მაგრამ ფასის მიცემა დაენანათ და ერთმანეთში მოილაპარაკეს, მოდი ამ ტუტიას შარი მოვდოთ და თხის ფასად გავაყიდინოთ.

მივიდა ერთი ყასაბი კომბლესთან და ჰკითხა:

— ძმობილო, რა ღირს შენი თხაო?

კომბლე გაბრაზდა:

— შე ოხერო, თხას სადა ხედავ, ძროსააო.

ყასაბმა უთხრა, თხა არისო. ძალს კომბლე, ძალს ყასაბი. ბოლოს ყასაბმა უთხრა, რაკი ჩემი არა გჯერა, აი ხალხს დავუძახოთ და ვკითხოთო. დაუძახა ყასაბმა თავის მეგობარ ყასბებს და ჰკითხა:

— ხალხნო, სამართალი გვიყავით, გაგვაგებინეთ, ეს თხა არის, თუ ძროსაო?

— რა თქმა უნდა, თხა არის, ჩვენ აქ ძროსას ვერსად ვხედავთო, — მიუგეს ყასბებმა.

მიუბრუნდა ყასაბი კომბლეს და უთხრა:

— აი, ძმობილო, ხომ გესმის, ეს პატროსანი ხალხი რას ამბობს, მე თუ არა, ამათ მაინც დაუჯერეო.

გადაირია კომბლე, მაგრამ იმდენ ხალხთან რას გახდებოდა. ადგა და მიჰყვიდა ძროსა თხის ფასად. გამოართვა ყასაბს ფული და უთხრა:

— რაკი ეს ჩემი ძროსა თხა ყოფილა, მაშინ სამართალი ქენით და, ანდაზისა არ იყოს, თხის პატრონს თხის კუდი მაინც მარგუნეთო.

— ჯანდაბას, წაიღოს კუდიო, — თქვა ყასაბმა, დაკლა ძროსა, მოსჭრა კუდი ძირში და გადაუგდო, — მშვიდობაში მოგახმაროსო.

წამოვიდა შინ კომბლე დაღონებული, დაჯდა კერასთან და დაუწყო კომბლებს თლა. თან გულში ყასბის ჯავრი ჰქონდა და სულ იმის ფიქრში იყო, სამაგიერო როგორ გადაეხადა.

ერთ დღეს კომბლემ გაიგო, ყასაბი ძლიერ ავად გამხდარაო, მაშინვე ჩაიცვა ექიმის ტანისამოსი, გაიკეთა წვერი, რომ არ ეცნოთ, ამოიფარა ჩოხის ქვეშ თავისი ძროხის კუდი და ერთი კარგი შვინდის კომბალი და წავიდა. მივიდა ყასბის სახლში და მის მოსამსახურეებს უთხრა:

— თქვენს ბატონს მე მოვარჩენ, ოღონდ ჩემი წამალი ძალიან ძლიერია, რომ დავალევინებ, ოფლს მოადენს და ყვირილს დააწყებინებს, — მიშველეთ, მომკლაო! — მაგრამ



თქვენ არ შემოსვიდეთ და კარები არ გააღოთ, თორემ თელიანზე ნიავი დაჰკრავს და უარესად გახდება, ან შეიძლება ველარც კი გადარჩესო.

შეუშვეს მოსამსახურებმა კომბლე ყასაბთან და კარები გარედან გადაკეტეს. მივიდა კომბლე ყასაბთან, მაჯა გაუსინჯა და უთხრა, აბა, გაისადეო.

ყასაბმა, რა თქმა უნდა, კომბლე ვერ იცნო, მართლა ექიმი ეგონა და მაშინვე გატიტვლდა. კომბლემ გამოიღო უბიდან ძროხის კუდი, დაანახვა ყასაბს და ჰკითხა:

— ეს რისი კუდიაო?

— რა თქმა უნდა, ძროხისაო, — მიუგო ყასაბმა.

— ახლა გახდა ძროხისა, შე სულძაღლისშვილო, აბა მაშინ რად წამართვი თხის ფასადო? — უთხრა კომბლემ, გამოიღო შეინდის გატუსული კომბალიც და მისცხო და მისცხო გვერდებში.

ყასაბმა ღრიალი გაბა: — მიშველეთ, მომკლაო! — მაგრამ ვინ მიეშველებოდა? ბოლოს რომ ველარ გაუძლო კომბლეს კომბალს, შეეხვეწა, ოღონდ ნუ მომკლავ და იმ ძროხის ფულს ორმაგად გადაგიხდით.

ამოიღო ოქროს ფულებით სავსე ქისა და მისცა. კომბლემ მხოლოდ თავისი ძროხის საფასური აიღო, დანარჩენი უკანვე მიუგდო და წამოვიდა. იყიდა ოთხი ცხვარი და მიჩქა შინ.

მეორე დილით გაუშვა ცხვრები საძოვარზე და თან დაარიგა:

— თუ მგელი, ან სხვა რომელიმე მტაცებელი შეგხვდათ, უთხარით, კომბლესები ვართ-თქო და ჩემი შიშით ახლოს ვერც ერთი ვერ გაგეკარებათო.

ცხვრები გამოუცდელები იყვნენ, შეჰყვნენ საძოვარს და სრულიად უცხო ადგილზე გავიდნენ. იქ კომბლეს არავინ იცნობდა. შემოსვდათ მელია და ჰკითხა:

— ცხვრებო, ვისი ხართო?

— კომბლესიო, — მიუგეს ცხვრებმა.

— კომბლე რა კაციაო?

— კომბლე ის კაცია, კომბლებსა თლის, ჭერში აწყობს, ვინც ჩვენ შეგვჭამს, თავში ჩასცხობსო.

— ოო, ეგ თქვენი კომბლე რაღაც ძალიან საშიში კაცი ჩანსო, — თქვა მელიამ და უკანმოუსუდავად მოკურცხლა.

იარეს ცხვრებმა, იარეს და ახლა მგელი შემოხვდათ.

— ცხვრებო, ვისი ხართო? — ჰკითხა მგელმა.

— ვისი და კომბლესიო.

— ეგ კომბლე რა კაციაო?

— კომბლე ის კაცია, კომბლებსა თლის, ჭერში აწყობს, ვინც ჩვენ შეგვჭამს, თავში ჩასცნობსო.

შეშინდა მგელიც, — რაღაც ძალიან საშიში ჩანსო, — თქვა და იმანაც უკან მოუსუდავად მოკურცხლა.

იარეს კიდევ ცხვრებმა, იარეს და ახლა დათვი შემოხვდათ.

— ცხვრებო, ვისი ხართო? — ჰკითხა დათვმა.

— ვისი და კომბლესიო.

— კომბლე რა კაციაო?

— კომბლე ის კაცია, კომბლებსა თლის, ჭერში აწყობს, ვინც ჩვენ შეგვჭამს, თავში ჩასცნობსო.

— მე თქვენი კომბლე არ ვიცი, მშიერი ვარო, — უთხრა დათვმა და ოთხივე ცხვარი ცოცხლად გადაყლაპა.

სალამო სანზე უცადა კომბლემ თავის ცხვრებს, უცადა და რომ აღარ დაბრუნდნენ, ჩამოიღო ერთი ყველაზე დიდი კომბალი, გაიღო მხარზე და წავიდა საძებნელად.

იარა კომბლემ, იარა და შემოხვდა მელია.

— მელბავ, ჩემი ცხვრები ხომ არსად გინახავსო? — ჰკითხა კომბლემ.

— არა, რჯულის მადლმაო, — მიუგო მელიამ.

— აბა კბილები დაკრიჭე და ენა გამოყავიო.

დაკრიჭა მელიამ კბილები და ენა გამოყო, მაგრამ არც კბილებსა და არც ენაზე სისხლის ნატამალი არ უჩანდა.

დაანება კომბლემ მელიას თავი და წავიდა. იარა, იარა და ახლა მგელი შემოხვდა.

— ჩემი ცხვრები ხომ არ გინახავსო? — ჰკითხა კომბლემ.

— არა, რჯულის მადლმაო, — მიუგო მგელმა.

— აბა კბილები დაკრიჭე და ენა გამოყავიო.

დაკრიჭა მგელმა კბილები და ენაც გამოყო, მაგრამ ენაზე სისხლი არ ეცხო და კბილებში ჩიჩია არ უჩანდა.

კომბლემ მგელსაც თავი დაანება და წავიდა. იარა, იარა და ბოლოს დათვი შემოსვდა.

— ჩენი ცხვრები ხომ არ გინასავსო? — ჰკითხა კომბლემ.

— არა, რჯულის მადლმანო, — მიუგო დათვმა.

— აბა, კბილები დაკრიჭე და ენა გამოყავიო.

დაკრიჭა დათვმა კბილები და ენაც გამოყო. ენა სისხლიანი ჰქონდა და კბილებში ჩინია უჩანდა.

— აი, შე ღორმუცელა, ქოფაკოლი — დასჭყვივლა კომბლემ და მისცხო და მისცხო გვერდებში კომბალი. წამოაყრევინა თავისი ცხვრები და იმდენი სცემა, სანამ სულ არ მიამკვდარა. ნეკნებჩალეწილი დათვი ადგილზე დატოვა, გამოირეკა ცხვრები და შინისაკენ გამოსწია.

ეს ამბავი მთელმა სამხეცეთმა გაიგო და კომბლეს ცხვრებს შიშით ყველა განზე უვლიდა. ცხვრები თავისუფლად დაბალახობდნენ და მრავლდებოდნენ. ბოლოს ისე გარავლდნენ, რომ მთა-ბარი სულ თეთრად გადააქნტეს.

ერთხელ იმ მხარეში ქრისტე-ღმერთმა ჩამოიარა, ნახა ეს ამდენი ცხვარი და თქვა, — მოდი, ერთი, ამ ცხვრის პატრონს ვეწვევი და ვნახავ. რა კაცია, აბა თუ ამ სიმდიდრის შესაფერი გულუხვობაცა აქვსო. გადაიქცა მათხოვარა ბერიკაცად, მიადგა კომბლეს და სთხოვა:

— უსახლკარო კაცი ვარ და ერთ ღამეს შემეფარეო.

კომბლე ხელგაშლით შეეგება, მობრძანდით, სტუმარი ღვთისააო — დაუკლა ცხვარი, კარგა გაუმასპინძლდა და ბუმბულის ლოგინში დააძინა.

მეორე დილას ადგა ქრისტე-ღმერთი და უთხრა:

— რაკი ასეთი კეთილი კაცი ყოფილხარ და ცხვრები და კომბლებიც ასე ძლიერ გყვარებია, მე შენ ერთ ისეთ კომბალს გაჩუქებ, რომ რასაც ეტყვი, ყველაფერს აგისრულებსო, ცხოვრების ნახვა თუ მოგინდება, ეტყვი:

კომბალ-კომბალ, შენსა მზესა,  
შენი გამომცემლის მზესა,  
წადი, ცხვრები მომირეკე,  
ბატკანიც არ დაგაკლდესა.

წავა და იმავ წამს უკლებლივ მოგირეკავსო. ხოლო თუ ვინმე გაგაჯავრებს, მაშინ უთხარი:

კომბალ კომბალ, შენსა მზესა,  
შენი გამომცემლის მზესა,  
წადი, ჯავრი აღომყარე,  
ნუ შეარჩენ თმას და წვერსა.

და ისეთ დღეს დააყრის, რომ თავ-ზედს იწყევლიდესო.

გამოიღო ილლიდან კომბალი და მისცა. ამ დღიდან კომბლე ცხვრების დასასხედად ერთხელაც აღარ წასულა, როცა თავისი ფარების ნახვა და დათვალიერება მოუნდებოდა, აიღებდა კომბალს და ეტყოდა:

— კომბალ, კომბალ, შენსა მზესა,  
შენი გამომცემლის მზესა,  
წადი, ცხვრები მომირეკე,  
ბატკანიც არ დაგაკლდესა.

წავიდოდა კომბალი, დაუვლიდა სათავეს და ყველა ფარას უკლებლივ მიურეკავდა, კომბლე გადახედავდა, დაითვლიდა ნამატს და ისევ საძოვარზე გაუშვებდა.

ცხვარი კი მრავლდებოდა და მრავლდებოდა.

იმ ქვეყნის ხელმწიფე მეტისმეტად გულსარბი და შეუბრალებელი იყო. ვისაც კი ცოტა ქონებას დააგულებდა, შეუსევდა თავის ნაზირ-ვეზირებს და წაართმევდა. ხალხი შიშით საქმეს ველარ აკეთებდა და არც ქონება-ცხოვრებას იძენდა.

გაიგო ხელმწიფემ, ჩემს სამფლობელოში ერთ კაცს უთვალავი ცხვარი ჰყოლიაო და მაშინვე ნაზირ-ვეზირები გაგზავნა, სულერთიანად წაართვით და მომირეკეთო.

წავიდნენ ნაზირ-ვეზირები, გამოირეკეს მთელი ცხვარი და მოურეკეს ხელმწიფეს. გაიგო კომბლემ, ჩემი ცხვარი ჩვენს ხელმწიფეს გაურეკინებიაო, აიღო ქრისტე-ღმერთის ნაჩუქარი კომბალი და წავიდა. მივიდა ხელმწიფესთან,

დაუკრა თავი, როგორც ხელმწიფეს ეკადრებოდა, და სთხოვა, ჩემი ცხვრები დამიბრუნეო.

განრისხდა ხელმწიფე, შენც ჩემი ხარ და შენი ცხვრებიც, როგორ მიბედავ ასეთ თხოვნასო, და ვეზირებს უბრძანა:

— ახლავე გაატიტელეთ, ასი არგანი ჰკარით და დილეგში ჩააგდეთო! — ვინ ვისა ჰკრავს ას არგანს, ახლავე დაგანასვებო, — თქვა გულში კომბლემ და თავის გრძნეული კომბალს უთხრა:

— კომბალ, კომბალ, შენსა მზესა,  
შენი გამომცემლის მზესა.  
ხელმწიფეს და მის ვეზირებს  
ნუ გაუშვებ ნურცერთს მთელსა!

დატრიალდა კომბალი და ერთი წუთის განმავლობაში ბოროტი ხელმწიფე და მისი ნაზირ-ვეზირები მკვდრები დაყარა.

ხალხმა გაიგო ხარბი ხელმწიფის სიკვდილი და სიხარულით ცას ეწია, მთელი ქალაქი სასახლის ეზოში შეიკრიბა, ხელმწიფისა და მისი ვეზირების გვამები გადაყარეს და ხელმწიფედ კომბლე დააყენეს.

კომბლე დღესაც ტახტზე ზის, ისევ თლის კომბლებს და ჭერში აწყობს, მტყუანს, ხარბსა და გულბოროტს დღესაც თავში უჩაჩქუნებს, ხოლო ალალ-მართალსა და გულკეთილს ყველანაირად სწყალობს.

ჭირი — იქა, ლხინი — აქა,  
ქატო — იქა, ფქვილი — აქა.





## სიმდიდრე ზობია თუ სიღარიბე

იყო და არა იყო რა, რაც არ იყო, 'რა იქნებოდა, — იყო ერთი ძალიან მდიდარი კაცი. ერთხელ ეს მდიდარი კაცი აივანზე იჯდა და სამხარს შეექცეოდა, წინ გულუხვი სუფრა ედგა, თავზე მსახურები დასტრიალებდნენ და ეკითხებოდნენ:

— ახლა რომელი კერძი მოგართვათ, რა უფრო გესიამოვნებაო?

ამ დროს ერთმა ღარიბმა კაცმა ჩამოიარა და ამ მდიდარი კაცის განცხრომა რომ დაინახა, შურით კინაღამ გაიგუდა, გაბოროტებულმა ცას შეხედა და ხმამაღლა შესძახა:

— შე დალოცვილო ღმერთო, ან ამ კაცმა რა სამსახური გაგიწია ისეთი, რომ ასეთს განცხრომაში გყავს — გუნებას ეკითხება, რით გასიამოვნო, და ან მე რა დაგიშავე ისეთი რომ ლუკმაპურიც სანატრული გამიხდომ?

მდიდარმა კაცმა გაიგონა გზად მიმავალი კაცის ნათქვამი და აივნიდან გადმოსძახა:

— თუ დრო გაქვს და ძალიან არ გეჩქარება, ცოტახანს ჩემთან ამოდიო!

ღარიბ კაცს აბა სად უნდა ეჩქარებოდეს და ავიდა. მდიდარმა მოისვა გვერდით, კარგად აჭამა, გააძლო და მერე უთხრა:

— შენ ჩემი სიმდიდრე გშურს და ჩემს ყოფას დანატრი, მაგრამ ჩემი თავგადასავალი რომ იცოდე, როგორ და რა გზით შემიძენია ეს სიმდიდრე, მაშინ აღარ შეგშურდება და აღარც ჩემს დღეში ყოფნას ინატრებო.

— მიაშბეო, — უთხრა ღარიბმა.

მდიდარმა კაცმა დაიწყო:

— ერთ დროს მეც შენსავით ღარიბი კაცი ვიყავი, პატიოსნად ვშრომობდი და დღიურ ლუკმაზე გამოვდიოდი. შრომით ცოტაოდენი დანაზოგი დავაგროვე. ერთ დღეს ეშმაკი შემინდა და უცხო ქვეყანაში მიმავალ ვაჭართა ქარავანს გავეყვი — იქნებ რამე შევიძინო და ფულს ფული მოვაგები-ნო-მეთქი.

ჩავსხედით გემში და წავედით. შუა ზღვას რომ მივად-წიეთ, უცბად ძლიერი ქარიშხალი ამოვარდა და ჩვენი გემი ნაფოტებად აქცია. უინც შიგ ვიყავით, ყველანი ზღვაში ჩა-ცვივდით. ყველანი დაიხრჩინენ. მე ბედად ერთი ფიცარი შემრჩა ხელში, იმას ჩავეჭიდე და ზედ ტკიპასავით დავეკა-რი. ქარიშხალი სან ერთ ცაღლანე გამტყორცნიდა, ხან მეო-რეზე. იღბალმა აქაც ღამინდო. ბოლოს ღელვა ჩადგა და ცაღლამ ხმელეთზე გამრიცა, მაგრამ ისეთ უდაბურ, ადგილ-ზე მოვხვდი, რომ ასეთ გადარჩენას ისევ სიკვდილი წერია: უკან ფრიალო კლდე იყო, წინ კი ისევ გაშლილი, უნაპირო ზღვა. სად უნდა წავსულიყავი? დავჩინი იქ მშვიერ-მწყურვა-ლი. კლდის ძირას ქვა-ლორღის მაგიერ სულ ოქროს ფული-სა და თვალ-მარგალიტის გროვები ეცარა და შიმშილს მისი ცქერით ვიქარვებდი.

ერთ დღესაც ვზივარ კლდის ძირას ღაღინებულა, გავ-ცქერი უკაცრიელ ზღვას და განენის დღეს ვიწყევლი. უცბად რაღაც სრიალი მომესმა და ჩემ წინ, ოქროებზე ტყავგანდი-ლი და გამოთზიგნული ხარი დაეცა. იმავე წამს ერთი უშვე-ლებელი ფასკუნჯი მოფრინდა, ისეთი ღიდი იყო, რომ მისი ფრთების ჩრდილი ნახევარ ზღვას ფარავდა, ჩასჭიდა კლანჭები ხარს და პანერში აიტაცა.

მერე გავიგე: თურმე კლდის თავზე ხალხი ცხოვრობდა. მათი ერთადერთი სარჩო თურმე ეს ოქრო და მარგალიტი იყო, მაგრამ მალლა სხვანაირად ვერ აპქონდათ: დაკლავდნენ ხარს, გაატყავებდნენ, გამოთზიგნავდნენ და კლდეზე გადმო-აგდებდნენ. თბილი და სველი ხორცი აიკრავდა თვალ-მარ-გალიტს, მერე მოფრინდებოდა ის უზარმაზარი ფასკუნჯი და აიტაცებდა, რომ ბუდეში მიეტანა, მაგრამ როცა კლდეს თავზე გადაუფრენდა, ხალხი ყიჟინას დასცემდა — დაუწყებ-

დნენ ფასკუნჯს თოფის სროლას, გააგდებინებდნენ ხარს და სორცზე აკრულ ოქროებს ერთმანეთში გაიყოფდნენ.

მეორედ რომ გადმოაგდეს ხარი, მაშინვე მოვხვეტე ბრილიანტები და უბე-ჯიბეები სულ გამოვიტენე. რასაც კი მოვერეოდი, ხარის მუცელში შევყარე და თვითონაც შიგ შევძვარი. აღარც ფასკუნჯმა დააყოვნა, მოფრინდა გრიალით, დაავლო კლანჭები ხარს და აიტაცა. კლდის თავზე ჩვეულებრივ დაუხვდა ხალსი და ატეხეს თოფების სროლა, ფასკუნჯმა ხარს კლანჭი გაუშვა და ძირს დავენარცხე. გამოქანდა ხალსი ჟრიაშულით. ვიფიქრე ახლა კი ცოცხალი ვეღარ გადავრჩები-მეთქი. გამოვძვერი ხარის მუცლიდან და შეშინებულმა სმამალლა დავიყვირე. ხალსს ზღვის კაცი ვეგონე. შეშინდა და აქეთ-იქით მიმოიფანტა. მოვკრიფე რაც ოქროვერცხლი ჰქონდა სორცს აკრული, მუცლიდანაც გამოვიღე და თავქუდმოგლეჯილმა მოვკურცხლე.

მივრბივარ, მაგრამ სად მივრბივარ, არ ვიცი, არც გზა ჩანს, არც ბილიკი. ასე ვირბინე რამდენსამე ხანს და ბოლოს ერთ სოფელს მივადექი. ოქრო და თვალ-მარგალიტი სოფლის პირას სრამში დავმალე, ჯიბეზე მხოლოდ ერთი ქისა დავიტოვე და ღამის გასათევად ერთ დედაბერთან მივედი. დედაბერმა ჯერ უარი მითხრა, მაგრამ ოქროთი სავსე ქისა რომ დავანახვე, დამთანხმდა და შინ შემიშვა.

თურმე ეს სოფელი ყაჩაღების ბუდე ყოფილიყო და ასეთი წესი ჰქონოდათ: თუ ვინმე ფულიანი უცხოელი ჩაუვარდებოდათ ხელში, ფულებს წაართმევდნენ და თვითონ ხაროში ჩააგდებდნენ, რომ შიმშილ-წყურვილით სული ამოხდომოდა. მეც სწორედ ასე მიყვეს, დედაბერმა ფულები რომ დაიგულა, მაშინვე ხალსს შეატყობინა და მთელი სოფელი თავზე დამცა. წამართვეს ოქროებით სავსე ქისა და ერთ ბნელ ხაროში ჩამაგდეს.

ხარო სულ ჩემნაირად დახოცილი ხალსის ჩონჩხებით იყო სავსე. დავჯექი და დავიწყე ტირილი, — რად მინდოდა სიმდიდრე და თვალ-მარგალიტი, ის რომ არ მქონოდა, ხომ ამ დღეში არ ჩავვარდებოდი-მეთქი.

უცბად ერთი აზრი დამებადა: — ესენი თუ ყაჩაღებია, მე ხომ ვაჭარი ვარ და თუ ამათ ვერ ვაჯობებ, რაღა კაცი ვიქნები-მეთქი, — და გუშავს დაეუძახე.



— მე უთვალავი თვალ-მარგალიტი მომქონდა, — ვუთხარი გუშაგს, — ყველაფერი იმ დედაბერს მივაბარე შესანახად და ჯიბეზე მხოლოდ ის ერთი ქისალა დავიტოვე. რაკი ვეღები, არ მინდა, რომ ის სიმდიდრე იმ მოლაღატე დედაბერს დარჩეს, გამოართვი და ისევ თქვენ მოიხმართო.

მაშინვე დაიბარეს დედაბერი და თვალ-მარგალიტი მოსცილდა. დედაბერმა; რა თქმა უნდა, უარი თქვა, მაშინ მოჰკიდეს ხელი, ერთი ფარსაგად გაროზგეს და ისიც ჩემთან შემოაგდეს.

— გაები, წუნკალო, — ვუთხარი დედაბერს, — არ იცი, სხვას რომ მახეს დაუგებ, იმ მახეში უწინ თვითონ გაებმები-მეთქი?

დედაბერმა ტირილი დაიწყო და შემეხეწა:

— ოღონდ აქედან დამიხსენი და სამუდამოდ შენი მონამორჩილი ვიქნებიო. წამიყვანე და როგორც გინდა, ისე მიმსახურო.

მაშინ დედაბერს ვუთხარი:

— მე მართლა მაქვს უთვალავი თვალ-მარგალიტი, უთხარი შენ ხალხს, აქედან გამიშვან, მოვიტან ჩემს სიმდიდრეს და გამოვიწყობი.

დედაბერი ჯერ არ მენდო, — მომატყუებო, მაგრამ მე ცა და ქვეყანა დავუფიცე, — ვაჭარს ტყუილი ფიცია არ გაუჭირდება, და დედაბერმაც დამიჯერა. დაუძახა გუშაგს და უფროსთან წაყვანა სთხოვა. იქ რა ილაპარაკეს იმ დედაბერმა და ყაჩაღების უფროსმა, არ ვიცი, მაგრამ მივხვდი, რომ დედაბერი თავდებად დამიდგა, რადგან იმავ დღეს გამომიშვეს და თვალ-მარგალიტის მიტანა მიბრძანეს.

რაკი თავი სამშვიდობოს დავიგულე, იქით რაღა მიმახედებდა, მანამ არაფერი ჭამოთ, სანამ მე ოქროები და თვალ-მარგალიტი არ მოგიტანოთ-მეთქი, — ვთქვი გულში და დაღამდა თუ არა, მაშინვე ჩემს სამალავ სრამს მივაშურე. ამოვიდე, რაც თვალ-მარგალიტი მქონდა გადამალული და ისე მოვკურცხლე, რომ კურდღელიც ვეღარ დამეწეოდა. დედაბერს კაი დღე რომ არ დაადგებოდა, ვიცოდი, მაგრამ რაში მენადვლებოდა!

სამი დღე და ღამე გაუჩერებლივ ვირბინე და ბოლოს

ერთ სოფელში შევედი. სალხში გამოჩენა აღარ მინდოდა, მეშინოდა, — კადევ არაფერ ხიფათს გადავეყარო-მეთქი, მაგრამ შიმშილმა შემაწუსა და მასპინძლის ძებნა დავიწყე. იქაც ერთ დედაბერთან დავბინავდი. დედაბერმა შვილივით მიმიღო, — დამაბანინა, დამასვენა და კარგადაც მავახშმა. დედაბერს ერთი გასათხოვარი გოგო ჰყოლოდა. გოგო ძალიან ლამაზი იყო, გულში ჩამივარდა და მეორე დილას დედაბერს ვთხოვე, შენი გოგო მომეწონა და ცოლად გამატანე, მდიდარი კაცი ვარ და არაფერს გაუჭირვებ-მეთქი, და თან თვალ-მარგალიტიც ვაჩვენე. დედაბერი ჩემს სიმდიდრეს დასარბდა და თანხმობა გამომიცხადა. დავიწერეთ ჯვარი იმავე დღეს იმ სოფლის ეკლესიაში და წამოვედით.

ანგელოზივით გოგო მომყავს და ისეთი გასარებული მოვდივარ, ქვეყნად ჩემზე ბედნიერი კაცი აღარ მეგულება. მაგრამ კაცს თურმე ხიფათი არ გამოელება. ერთ თვეს გაუჭირვებლად ვიარეთ, მერე ერთ უცხო სოფელს მივაღექით. სალხი მინდვრად იყო გამოსული და მიწას ხნავდა. ერთ ხნიერ გუთნისდედასთან მივედი და ვთხოვე, მამაშვილობას, მგზავრები ვართ და ღამე გაგვათევეინეთ-მეთქი.

— მამაშვილობა რომ არ გეთქვა, ნასავდი, როგორ დამესაც გაგათენებინებდითო, — მითხრა გუთნისდედამ. — ახლა რაკი მამაშვილობა მითხარი, შეგიბრალებ და აღარას გერჩი, მაგრამ საჩქაროდ გაშორდით აქაურობას და ეცადეთ, რომ მზის ჩასვლამდე აგე აიმ მდინარეზე გადახვიდეთ, თორემ ჩვენ ძაღლთაპირები ვართ, მზე რომ ჩავა, ყველანი ძაღლებად გადავიქცევით და ვისაც უცხოვს წავასწრებთ ჩვენს მიწაწყალზე, ლუკმა-ლუკმა დავგლეჯთო.

ეს რომ გავიგე, თავზარი დამეცა. მოვკიდე ხელი ჩემს ლამაზ ცოლს და, რაც ძალი და ღონე მქონდა, მოვკურცხლე. მივრბივართ მუხლჩაუდრეკლად, ქალი დაიღალა, მაგრამ ვამხნევებ და მაინც მივარბენინებ. აი, მიუჯახლოვდით სასაზღვრო მდინარეს, ხიდიც გამოჩნდა, მაგრამ სწორედ ამ დროს მზეც ჩავიდა.

მზის ჩასვლისთანავე მთელი სოფელი ძაღლებად გადაიქცა, ისუვლეს და ყეფა-ღრენით ჩვენსკენ გამოენთნენ. ვხედავ, რომ გვეწვიან, ოქრო-ვერცხლი მამძიმებს და ველარ მივ-

რბივარ, ქალს მუხლები მოეკვეთა და ტირილით შემეხვეწა, გადაყარე ეგ ოხერი თვალ-მარგალიტი და მე ამიკიდე, ამ ცოფიანების საჯიჯგნად ნუ გამსდიო, მაგრამ ცოლს ისევ საკუთარი თავი და სიმდიდრე ვამჯობინე, ლამაზ ცოლს ყოველთვის ვიშოვი, სიმდიდრეს კი ვინ იცის, როდისღა შევიძენ-მეთქი, — ვთქვი გულში, ქალი ძაღლებს მივუგდე და თვითონ მშვიდობით გადავასწარი ხედზე.

ჩემი ცოლი ერთ წუთში შეჭამეს, მე ავდექი და მარტოკამ გამოვწიე. ვიარე, ვიარე და ერთ უშედეგებელ მდინარეს მივადექი. არც ხიდი სადმე ჩანს, არც — ფონი. დავდივარ მდინარის პირას დაღონებული აღმა-დაღმა და აღარ ვიცი, როგორ გადავიდე, თვალ-მარგალიტიანად შევიდე წყალში, ვიცი დავიძირები და დავისრჩობი, არადა, ამოდენა სიმდიდრის გადაყრა არ ვინდა! ამ გასაჭირში რომ ვარ, მდინარის ნაპირს კიდევ ერთი კაცი მოადგა. ერთმანეთს სალამი მივეცით და ჩემი გაჭირება შევჩივლე. ეგ აღვიღიათ, ნიბრა კაცმა, თურმე მცურავი ყოფილიყო, შემასვა ზურგზე და ისე გამიყვანა მდინარეში, რომ ფხსიც არ დამასველებინა. ძალიან მშვიდი და უწვინარი კაცი იყო, დაეძვობრდით და ერთად დავადექით გზას.

იმ კაცმა ბევრი სიკეთე მიყო, მე არაფერს მაკეთებინებდა, — გზაზე ცეცხლის დანთება იქნებოდა, თუ ღანის გასათევი ბინის მოწყობა, ყველაფერს თვითონ აკეთებდა. ასე ვიარეთ ერთად კარგა ხანს და ბოლოს ერთ ქალაქში შევედით. მე რაკი ვაჭარი ვიყავი, ვაჭართა ქარვასლა მოვძებნე და ღამის გასათევად იქ დავბინავდით. ვაჭრებმა თვალმარგალიტი შემაგულეს და ჩემი მოკვლა გადაწყვიტეს. მე კარს უკან ვიდექი და მათი საუბარი სიტყვა-სიტყვით გავიგონე. ჩემზე ამბობდნენ, ეგ მდიდარი კაცი ღამე ქარვასლის ბნელ კუნჭულში დავაწვინოთ, რომ დაეძინება, ჩუმად მივებართოთ და გავგუდოთ. ამხანაგს თავისით დამხრჩვალე ეგონება და მაგისი ოქროები ხასვივით შეგვრჩებაო.

როგორც დათქვეს, ისეც მოიქცნენ: ვახშამი რომ ვჭამეთ, მე ქარვასლის სულ ბოლო კუთხეში დამიდგეს საწოლი, ჩემს მეგობარს კი — კარებთან. ძილი ნებისა გვისურვეს და კარი გარედან ურდულით გადაკეტეს.

დავწექი, მაგრამ რა დამაძინებს. წუთ-წუთს მოველი ვაჭრების თავდასხმას და სულ იმის ფიქრში ვარ, ცოცხალი როგორ გადავრჩე. ბოლოს ასეთ ხერხს მივმართე: ჩუმად ავდექი, ავიღე ჩემი მეგობრის საწოლი ისე, რომ არ გაღვიბოდა, და ჩემი საწოლის ადვილზე დავდვი, ჩემი საწოლი კი კარებთან მივიტანე.

სინდისი მქენჯნიდა, მაგრამ გულს იმით ვიმშვიდებდი, რომ ჩემი მეგობარი ღარიბი იყო და რომც მომკვდარიყო, ამქვეყნად დიდად დასანანებელი არაფერი დარჩებოდა. მე კი ამდენი სიმდიდრის პატრონი ვიყავი და ჩემი სიკვდილი ცოდო იყო. ერთი სიტყვით, მეგობარი გავწირე და თავი მოვიშინარე.

შუალამისას შემოვიდნენ ვაჭრები და ფესაკრეფით წავიდნენ ჩემი მეგობრის საწოლისკენ. მინდოდა მაშინვე შეყვირა და ამსანაგი გადამერჩინა, მაგრამ მერე ვიფიქრე, ეს კაცი არაფერს მარგებს და ამ ვაჭრებს კი რაღაცას გამოერჩები-მეთქი და, სანამ ახრჩობდნენ, ლოგინში არ გავნძრეულვარ, მერე კი, როცა მთლიანად გაგუდეს, ლოგინიდან წამოვხტი, გავვარდი კარში და ყვირილი ავტყეხე: — ხალხნო, მიშველეთ, ამხანაგი მომიკლეს-მეთქი!


ვაჭრებს შიშის ზარი დაეცათ, მაშინვე გამომეკიდნენ და სვეწნა დამიწყეს, ოღონდ ნუ გაგვთქვამ, ნუ დაგვლუპავ და რასაც მოითხოვ, ყველაფერს მოგცემთო.

ბევრი რომ არ გავაგრძელოთ, იმ ვაჭრებს სულს იქით აღარაფერი შევარჩინე. — წავართვი რაც კი ძვირფასეული და ნავაჭრი ფული ჰქონდათ, ავკიდე ჯორ-აქლემს და გამდიდრებული დავბრუნდი შინ. ახლა როგორც მხედავ ასე ვარ — კარგს ვსვამ, კარგს ვჭამ და კარგს ვიცმევ, მაგრამ აღარც მეგობარი გამაჩნია, არც ცოლ-შვილი და არც ახლობელი. მოდი ახლა და, მითხარი, შენი სიღარიბე ჯობია, თუ ჩემი ასეთი გზით შეძენილი სიმდიდრეო?

— არა, ძმაო, მაგნაირ სიმდიდრეს, ისევე ჩემი პატიოსანი სიღარიბე მირჩევნიაო, — უთხრა. კაცმა და გაუდგა თავის გზას.

ჭირი — იქა, ლხინი — აქა,

ქატო — იქა, ფქვილი — აქა.



## ვაჭარი და გურული

იყო და არა იყო რა, ღვთის უკეთესი რა იქნებოდა. — იყო ერთი ღარიბი გურული. ერთხელ გურულმა ხეები დათალა, შეკრა ტივი და ფოთში ჩაიტანა გასაყიდად. იქ ერთი ვაჭარი შეუჩნდა და ტივი ნახევარ ფასში დასტყუა. გურულმა იცოდა, რომ ტყუვდებოდა, მაგრამ უჭირდა და შევაჭრება აღარ დაუწყო. დაბრუნდა უკან პირში ჩალაგამოვლებული და გულში თქვა, — თუ შენ კვანტი არ გამოვდო და ოინი არ გიყო, მე გურული ნულა ვყოფილვარო.

გავიდა ხანი და ვაჭარი თვითონ ავიდა გურიასი ხეების საყიდლად. კითხვა-კითხვით მიაგნო ნაცნობ გურულს და სუების დამზადება სთხოვა. გურული დათანხმდა, მხოლოდ იმ ბირობით, თუ კაი ფასს მისცემდა და ნახევარ საფასურს წინასწარვე ბედ გადაუხდიდა.

— გადავიხდიო, — უთხრა ვაჭარმა, ამოიღო საფულე და ნახევარი საფასური ჩაუთვალა.

წავიდა ვაჭარი დაიმედებული, მაგრამ გურულს ხეების დამზადება აზრადაც არ მოსვლია, ფული ბლომად ჰქონდა, შინ არაფერი უჭირდა და დროს ნადირობაში ატარებდა — ხოცავდა კაკბებს, სოხბებს, როჭოებს და საზამთროდ ბუხრის თაფზე ჰკიდებდა.

ვაჭარი ელოდა დაპირებულ ხეებს, ელოდა და, გურული რომ არსად გამოჩნდა, თვითონ წავიდა ამბის გასაგებად. გურული ბუხრის წინ იჯდა და ნანადირევ ფრინველს ბუტავდა. შევიდა ვაჭარი სამზადში და გამარჯობა უთხრა.

— გაგიმარჯოს, ძამიაო, — მიუგო გურულმა.

— სადა ხარ, ან ხეები სადა გაქვსო? — ჰკითხა ვაჭარმა.

— ხეებიც აქა მაქვს და მეც აქა ვარო, — მიუგო გურულმა, — ჩამოჯექ, ნანადირევი ისიამოვნე და ხეებზე მერე ვილაპარაკოთო.

დაჯდა ვაჭარი.

გურულს ერთი გაწუწკებული კატა ჰყავდა, სუფრას რომ შემოუსხდნენ, კატაც იქვე დაცუცქდა და წკნავილი გააბა.

— აცხა, შე სასიკვდილევ, — შეუტია გურულმა, — რას შემომწკნავი, ეს ხოსხები, ხომ ხედავ, ჩვენ არ გვეყოფა, წადი, კიდევ მოიტანე და მერე გაჭმევო.

— როგორ, ეს ხოსხები ამ კატამ მოიტანაო? — გაუკვირდა ვაჭარს.

— კი, ამის მოტანილია, — მიუგო გურულმა, — მაგრამ ამ ბოლო დროს გაზარმაცდა. წინათ დღეში ოცამდე ფრინველი მოჰქონდა, ახლა კი, აი, ხუთის მეტი არ მოუტანიაო.

ვაჭარი უფრო გაოცდა, ასეთი გაწვრთნილი კატა გყოლია და რაღას ემდურებო, მაგრამ გურულმა ისევ თავისი გაიმეორა, სანამ ძველებურ სიბეჯითეს არ გამოიჩინს, ლუკმას არ ვაჭმევ და არც კერასთან მოვეუშვებო, — ჩაარტყა თავში ციცას და გააგდო.

ვაჭარმა იფიქრა, ეს კატა რომ ჩემი იყოს, გავკეთდები, ყოველდღე ნანადირევი არ მომაკლდებაო, და გურულს უთხრა, მომყიდე და, რასაც დააფასებ, მოგცემო. — გურულმა ცივი უარი შეაგება:

— არა, ძამია, სული ამ კატით მიდგას და შენ რა უნდა მომცე ამისი ფასიო.

ვაჭარი მაინც არ მოეშვა, მომყიდე და მომყიდეო. გურულმა უთხრა, აკი გეუბნები, ამ ბოლო დროს ნამეტანი გაზარმაცდა და კარგად რომ ვერ ინადიროს, დამემდურებო.

ვაჭარმა არც ამით დაიშალა და ბოლოს გურულიც დათანხმდა. გამოართვა ერთი საცხოვრებელი ფული და კატა გაატანა.

წავიდა ვაჭარი გახარებული, მიიყვანა შინ კატა, კარგად აჭამა, უალერსა, მერე უთხრა, დღეს სადილად ხალხი უნდა დავაპტიყო და ერთი ათი ცალი ხოსხობი მომიტანინეო. კატამ დაიკრუტუნა, ვაჭარმა ეს თანხმობად მიიჩნია, გამოიყვანა კატა და გაუშვა. კატა წავიდა და უკან აღარც დაბრუნებულა,

გაჯავრდა ვაჭარი და წავიდა გურულთან. გურულს ცეცხლზე ქვაბი ეკიდა და ღომს ხარშავდა. დაინახა ვაჭარი ეზოში შესული, აიღო ერთი ღომის მარცვალი და ხელის გულზე თითით სრესა დაუწყო, ვითომ ხესავს და ასუფთავებს. შევიდა ვაჭარი და საყვედურით უთხრა:

— რატომ მომატყუე, ნანადირევი კი არა, თვითონაც ჯანდაბას დაიკარგაო.

— სანადირო ადგილები თუ აჩვენე წინასწარ, ან შინ მოსასვლელი გზა თუ ასწავლეო? — ჰკითხა გურულმა.

— არაო, — უთხრა ვაჭარმა.

— აბა მე რას მემდურები, უცხო ადგილას კაცს ებნევა გუბ-კვალი და კატას რომ დაებნეს, რა საკვირველიაო, — უთხრა გურულმა და თვითონვე უსაყვედურა, — ნატვრის თვალივით კატა გამომართვი და დამღუპეო.

ამასობაში გურულმა ღომის მარცვალი კარგა გააპრილა, ჩააგდო ქვაბში და მოურიბა. გამოჩნდა მთელი ქვაბი მოხარშული ღომი. ვაჭარს ახლა ეს გაუკვირდა და გურულს ჰკითხა:

— ეგ რა ჰქენიო?

— არაფერი, წყალში ღომის მარცვალი ჩავაგდე და მოვხარშეო, — მიუგო გურულმა.

— ეს ამოდენა ქვაბი ღომი სულ იმ ერთი მარცვლისაგან მოიხარშაო? — კელავ ჰკითხა ვაჭარმა.

— აბა, ღარიბ კაცს იმდენი ვინ მომცა, რომ მუჭა-მუჭა ვყაროო? — უთხრა გურულმა.

— მაშ, რაც ღომი გაქვს, სულ ასე თითო მარცვლობით უნდა ხარშოო?

— სულ ასეო, — მიუგო გურულმა, — ან რატომ ჩავყრი მეტს, როცა ერთი მარცვალიც საკმარისიაო.

ვაჭარს გაუკვირდა, ეს რანაირი ღომი ჰქონიაო და შეევაჭრა, ოღონდ ეგ ღომი მომყიდე და, რასაც მომთხოვ, მოგცემო. გურულმა შორს დაიჭირა, შენ კატაც მოგყიდე, მაგრამ მადლობის მაგიერ საყვედურით ამავესე, ახლაც ასე იზამ — ან წესიერად ვერ მოხარშავ, ან რაღაც იქნება და ისევ დამემდურები. ეგეც არ იყოს, მთელი ჩემი საცხოვრისი ეს არის და შენ რა უნდა მომცე ამის ფასიო.

ვაჭარი მაინც არ მოეშვა, ოღონდ მომყიდე და, რაც მომივა, შენ აღარ დაგაბრალებო.

დათანხმდა გურული, გამოუტანა ერთი ჩანახი ღომი და მთელი წლის სამყოფი ფული გადაახდევინა. წაიღო ვაჭარმა ღომი, მიიტანა შინ და ცოლს უთხრა, ხალსი დამიპატიე. სასწაული უნდა ვაჩვენო — ღომის ერთი მარცვალთ ოც კაცს დავაპურებო.

მოიწვია ხალსი, შემოდგა ცეცხლზე ქვაბი და ჩააგდო შიგ ღომის ერთი მარცვალი. სტუმრები ელოდნენ, ელოდნენ, მაგრამ ერთი მარცვლით რა ღომი მოიხარშებოდა. ადგნენ გაწბილებულები, მასპინძელს მოტყუებისათვის საყვედური უთხრეს და თავთავიანთ სახლებში წავიდ-წამოვიდნენ.

გურულმა იცოდა, რომ ვაჭარი ამ მოტყუებას არ შეარჩენდა და ისევ საყვედურებით მიადგებოდა. წავიდა ტყეში, ორი კურდღელი დაიჭირა, მოიყვანა შინ და ცოლს უთხრა:

— მე ყანაში სამუშაოდ წავალ, ერთ კურდღელს თან წავიყვან, მეორეს შენ დაგიტოვებ, ის ვაჭარი რომ მოვა, უთხარი, ყანაშია წასული-თქო. ის ჩემთან წამოვა, მე კურდღელს გამოვუშვებ შენთან და დავაბარებ: სადილად ერთი ინდაური, ორი ქათამი, ოთხი იხვი მოამზადე, ზოგი შეწვი, ზოგი მოხარშე და ამოგვიტანე, თან ერთი დოქი ადესა ღვინოც გამოაყოლე-თქო. შენ ყველაფერი ეს წამოგვიღე და კურდღელიც წამოიყვანეო.

წავიდა გურული ყანაში. გავიდა ცოტა ხანი და მოვიდა ვაჭარიც. გურულის ცოლმა უთხრა, ჩემი ქმარი ყანაშიაო. წავიდა ვაჭარიც ყანაში, მივიდა გურულთან და უსაყვედურა, — კიდევ მომატყუე, ფულები დამცანცლე და სრულიად ჩვეულებრივი ღომი კი გამატანეო. გურულმა უთხრა:

— აკი გითხარი, ისევ დამემდურები-მეთქი. შენ ღომის მოხარშვა არ გცოდნია, ალბათ ან ცეცხლი ვერ შეუკეთე წესიერად, ან კარგად ვერ გარეცხე, ან ხარშვა დააკელი და რა ჩემი ბრალიაო. მთელი წლის სარჩო დაგითმე და კიდევ მსაყვედურობო. მერე უთხრა, ქართულ სტუმარ-მასპინძლობის წესს მაინც ნუ დავარღვევთ, დარჩი, სადილი ვჭამოთ და მერე წადიო.



ვაჭარი დარჩა. გურულმა შეხსნა კურდღელს თოკი და უთხრა:

— წადი შინ და დედაკაცს უთხარი, ერთი ინდაური, ორი ქათამი, ოთხი იხვი მოამზადოს სადილად და ამოგვიტანოს. თან ერთი დოქი ადესა ღვინოც გამოაყოლოს. ოღონდ დროზე წადი, შენებურად გზადაგზა კურდღლებთან მუსაიფს არ გადაყვეო.

არ გასულა დიდი ხანი, რომ ცოლმა მართლაც მოუტანა შენათვალი და თან თოკით კურდღელიც მოიყვანა. უთხრა ქმარს:

— ამ კურდღელმა შენი შემონათვალი მომიტანა და აბანახე, ხომ არაფერი დაავეწყდაო.

გურულმა გადმოალაგა სუფრაზე სანოვაგე და ვაჭრის გასაგონად ჩაილაპარაკა, ჩემს ყურცქვიტას არაფერი დაავეწყდებაო. ვაჭარს გაუკვირდა და ჰკითხა:

— ამ კურდღელს რასაც დაავალე, სულ ასე ასრულებსო?

— ხომ დაინახე შენი თვალითო, — უთხრა გურულმა.

— მერე და სად იშოვე ასეთი გონიერი კურდღელიო?

— არა, ძამა, შოვნით ასეთს სად იშოვი, — უთხრა გურულმა, — თვითონ გავწვრთვენი და ამ შრომას ათი წელი შევალეო.

ვაჭარს ძალიან მოეწონა კურდღელი, ეს რომ მყავდეს, რაღა მიჭირს, მუქთი შიკრიკი მეყოლება და სადაც დამჭირდება, გავაგზავნიო. შეუჩნდა გურულს, მომყიდე და მომყიდეო. გურულმა უარი უთხრა, ქალაქს შეჩვეული არ არის და შეიძლება დაგეკარგოს, ჩემთვის კი პირდაპირ მისწრებააო. მაგრამ ვაჭარმა არ დაიშალა და გურულმაც დაუთმო. კიდევ გამოართვა ერთი წლის სამყოფი ფული და კურდღელი გაატანა.

მიიყვანა ვაჭარმა კურდღელი შინ და ცოლს უთხრა, ხალხი დაბატოფე, სასწაული უნდა ვაჩვენოო. დაბატოფა ცოლმა ხალხი, ვაჭარმა გამოიყვანა კურდღელი, შეხსნა თოკი და უთხრა:

— წადი ჩემ დახლიდართან და უთხარი: ბაზარში გავი-

დეს, კაი სამწვადე იყიდოს, ხიზილალა, ნედლი ყველი, ცოცხალი, კაი კახური ღვინო და სანქაროდ აქ მომიტანოსო.

კურდღელი დაფეთებული ეცა ქალაქის ქუჩებს და გადაიკარგა. ელოდნენ ვაჭარი და იმისი სტუმრები დასლიდარს, მაგრამ არც თვითონ ჩანდა და არც შენათვალი პურ-ღვინო მოჰქონდა.

გაგზავნა ვაჭარმა შიკრიკი დასლიდართან და შეუთვალა, 'ახლავე აქ ამოდიო. ამოვიდა დასლიდარი, ვაჭარმა შეუტია:

— სადა ხარ აქამდე, შე ყურუმესალო, ან პურმარილი რა უყავიო?

დასლიდარი გაოცდა, რის პურმარილი, რა პურმარილიო?!

— მაშ კურდღელს ამბავი არ მოუტანიაო? — ჰკითხა ვაჭარმა.

— თქვენი რისხვა არა მქონდეს, მე არც კურდღელი მენახოს და არც სხვა ამბის მომტანიო.

ვაჭარი მიხვდა, რომ გურულმა ისევ მოატყუა. სტუმრებმა სიცილი დააყარეს და წავიდ-წამოვიდნენ. ვაჭარი კი შეჯდა ცხენზე და გაცეცხლებულმა ისევ გურულისკენ გასწია. გურულმა იცოდა, რომ ვაჭარი ისევ მიადგებოდა და ცოლს უთხრა:

— მოდი, ყელზე სისხლით სავსე ქათმის ჩიჩახვს შეგაბამ, ის ვაჭარი რომ მოვა, წავიკიდნეთ, მე დანას გამოგისვამ ჩიჩახვზე, შენ წაიქეცი, თავი მოიმკვდარუნე და სანამ ჩონგურს არ დაუეკრავ, არ გაცოცხლდეთ.

შეაბა ყელზე გურულმა ცოლს სისხლით სავსე ჩიჩახვი, ვჯიბეში გალესილი დანა ჩაიდო და ვაჭარს დაელოდა, სად იყო, სად არა, მოვიდა ვაჭარიც და გურულს შეუტია, შე ასეთ-ისეთო, რად მომატყუე და მეორედ ხალხში თავი რატომ მომჭერიო?

ვაჭარს გურულის ცოლიც გამოესარჩლა და ქმარს ლანძღვა-გინება დაუწყო. გურულმა უთხრა, ქალო, ენა დააყენე, თორემ ყელს გამოგჭრიო. ცოლი უარესად გაანჩხლდა, მაშინ წამოვარდა გურული, ამოიღო დანა და ცოლს ყელზე დაკიდულ ჩიჩახვზე გამოუსვა. წამოვიდა სისხლი თქრიალით, ცოლი გადავარდა და თავი მოიმკვდარუნა. ვაჭარს ში-

შით გული გაუსკდა, ეს რა სათაბალაში ჩავევარდი, ჩენს თვალწინ ადამიანი მოკლეს და სასამართლოში თრევით სულს ამომხდინაო.

— შე ჩემი ცოდვით სავსეე, რად ჩამაგდე ამ სათაბალაში, რა იყო, ასეთ უბრალო რამეზე ცოლი სასიკვდილოდ როგორ გაიმეტო? — უთხრა გურულს.

— მაგისტანა აბეზარს აგრე მოუხდებო, — დინჯად მიუგო გურულმა.

— რაღა ვქნა ასლა, ამ სათაბალას როგორ გადავუბრეო, — წაიშინა ვაჭარმა თავში ხელები.

— ნუ გეშინია, ძამა, — უთხრა გურულმა, — თუ მოვიინდომე, ამას ახლავე გავაცოცხლებო.

ვაჭარი შეესვეწა, ოლონდ გააცოცხლე, ოლონდ შარში ნუ გამსვევ და რაც მომიცია, ერთ იმდენს კიდევ მოგცემო. ამოიღო საფულე და რაც ფული ჰქონდა, სულ გურულს მისცა.

— კარგი, ხათრს არ გაგიტეხო, — უთხრა გურულმა, — ჩამოიღო კედლიდან ჩონგური და დაუკრა. ქალი ჯერ ოდნავ შეინძრა, მერე თვალი გაახილა და ფეხზეც წამოდგა. ქმარმა უთხრა:

— იცოდე, ამ კაცის ხათრი, თორემ ასლა მე შენს გაცოცხლებას აღარ ვაპირებდიო.

ვაჭარს ასლა ჩონგური მოეწონა. მეტისმეტად აშარი ცოლი ჰყავდა და იფიქრა, „ეს ჩონგური რომ ჩემი იყოს, რა კარგი იქნებოდა! როცა ცოლი ნამეტანი წამეკიდება, მოვკლავ და ისევ გავაცოცხლებ, იქნებ ცოტა დაეშინო და მოვათვინიერო“, და გურულს შეუჩინდა, მომყიდეო. გურულმა აქაც უარი უთხრა, ხომ იცი, გურული ვარ და სიფიცხე მომდგამს, ასეთი რამ ხშირად მემართება — ხან ვინ შემოსაკვდება, ხან ვინ და ეს ჩონგური რომ არ მქონდეს, დავიღუპებიო. ვაჭარი მაინც არ მოეშვა და ბოლოს გურულიც დათანხმდა — გამოართვა დიდძალი ფული და მისცა ჩონგური.

წაიღო ვაჭარმა ჩონგური შინ. ცოლი გადაეკიდა, რა ჭირად გინდა ვაჭარს ჩონგური, შენი საქმე დუქანი და აქეთიქით ტანტალიაო. ვაჭარმა უთხრა, დედაკაცო, გაჩუმდი, თორემ მოგკლავო. ცოლმა არ დაიშალა, მაშინ დაავლო ვაჭარმა დანას ხელი, გამოუსვა ყელში ცოლს და მოკლა. ცოტა

ხნის შემდეგ ჩამოიღო ჩონგური და დაუკრა, მაგრამ ყელგამოჭრილს რა გააცოცსლებდა.

შემოიკრა ვაჭარმა თავში ხელი, დალეწა ჩონგური, წაიყვანა თავისი ბიჭები და გურულის დასასჯელად წავიდა. მივიდა გურულთან და შეუტია, შე ასეთ-ისეთო, ცოლი რაზე ზომაკვლევინე, ახლა უნდა დაგიჭირო, წაგიყვანო და პალი-ასტომის ტბაში ჩაგაგდოო.

გაუკრეს გურულს ხელები ზურგსუკან და წაიგდეს წინ. გზაზე დაულამდათ და პურიც მოშივედათ. გურული ხეზე მიაბეს და ვაჭარი და მისი ბიჭები ნაკადულთან ჩავიდნენ პურის საჭმელად. გურულმა დაინახა, რომ მენახირე ძროხებს მოერეკებოდა და ატეხა ყვირილი: — არ მინდა, კაცო, ნუ მიგყევართო.

— ძალიანაც არ გინდა, მაგრამ ღირსი ხარ და უნდა წაგიყვანოთო — ამოსძახა ვაჭარმა.

მენახირემ ეს ძახილი გაიგონა, მივიდა გურულთან და ჰკითხა, რა არ გინდა, ან იმ კაცებს სად მიჰყევხარო?

გურულმა უთხრა:

— ფაშა მოჰკვდომიათ და იმის ადგილზე დაყენებას მიპირებენ, მე არ მინდა, მაგრამ ძალად მიყვევარ და რომ არ გავექცე, ამ ხეზე მიმაბესო.

მენახირემ იფიქრა, ეს კაცი ნამდვილად სულელი ყოფილაო და უთხრა: მოდი, ჩამოგხსნი ხიდან, რაკი ფაშობა არ გინდა, და შენს ადგილზე მე მიმაბი, მე ვიქნები ფაშა, შენ კი ეს ნახირი გყავდეს და საითაც გინდა, იქით გაირეკეო.

ჩამოხსნა ხიდან მენახირემ გურული და თავისი თავი მიაბმევიანა. გურულმა ნახირი გამოირეკა, ვაჭარმა და მისმა კაცებმა სიბნელის გამო მენახირე ვერ იცნეს და გურულის მაგიერ ის გადააგდეს ტბაში.

გავიდა ხანი. გურულს ნახირი გაუმრავლდა და დიდძალი საქონლის პატრონი გახდა. ერთხელ ვაჭარმა ჩამოიარა იმ სოფელზე და ნახა, რომ გურული ამდენ ნახირს მოერეკებოდა. გაუკვირდა და ჰკითხა:

— კაცო, შენ ტბაში არ ჩაგაგდე და არ დაგახრჩვეო?

— ჩამაგდე, მაგრამ არ დავმხრჩვეალვარო, — მიუგო გურულმა.

— ეს ამდენი საქონელი სადღა იშოვეო? — კიდევ ჰკითხა ვაჭარმა.

— ეს ნახირიც სწორედ იქიდან გამოვრეკეო.

— როგორათ? — გაოცდა ვაჭარი.

— როგორ და ასეო, — უთხრა გურულმა, — ტბის ფსკერი სულ საქონლით იყო სავსე, მაგრამ ცარიელი ხელით მეტის გამოვრეკვა ვერ შეეძელი, სახრე რომ მქონოდა, ათ ამდენს გამოვრეკავდიო.

— მაშ სახრეს მოვჭრი და ჩამაგდე ტბაშიო, — უთხრა ვაჭარმა.

გურულმა ყასიდად გააფრთხილა: — ტბის ფსკერზე ყოფნა ძალიან ძნელია და, თუ მაგარი გული არა გაქვს, ნუ გაბედავო.

მაგრამ ვაჭარს სიხარბემ წასძლია და უთხრა, არა, ჩამაგდეო.

წაიყვანა გურულმა ვაჭარი, გადააგდო ტბაში და ჩასძახა:


— რაც ტბის ფსკერზე ნახირი ნახო, სულ შენთვის დამილოცნიაო.

რა ქნა ვაჭარმა, გამოვრეკა ნახირი ტბიდან თუ არა, ეგ აღარ ვიცი, რადგან იქიდან გამოსული ის აღარავის უნახავს.

ჭირი — იქა, ლხინი — აქა,

ქატო — იქა, ფქვილი — აქა.





## ჭკვიანი ნავეზირალი

იყო და არა იყო რა, ღვთის უკეთესი რა იქნებოდა: იყო ერთი ხელმწიფე. ხელმწიფე ღამღამობით გადაიცვამდა გლესურად და თავის სატახტო ქალაქს ზვერაავდა, აბა უწესობას ხომ არავინ ჩადისო.

ერთ საღამოსაც ჩვეულებრივ გამოეწყო მდებრიურად და გავიდა ქალაქში. უდროო დროა, შუქი ყველას ჩამქრალი აქვს — ქალაქს სძინავს და ირგვლივ სრული მყუდროებაა. მაგრამ აი, ერთი სასლიდან სინათლე გამოკრთის. ხელმწიფე დაინტერესდა, რატომ უნთიათ შუქი ამ დროსო და ეზოდან დაუძახა:

— მასპინძელო, მგზავრი ვარ და ამალამ შემინახეო.

სასლის პატრონი გამოეგება და შინ შეიწვია.

— მობრძანდი, სტუმარი ღვთისააო.

სასლის პატრონის ცოლმა მაშინვე სუფრა გაშალა. სტუმარი კარგად ავასშმეს და ცალკე ოთახში დააწვინეს. რა თქმა უნდა, ამ ცოლ-ქმარმა ეჭვადაც არ იციან, თუ ეს მათი ხელმწიფეა. შუადამისას დიასახლისი წამოდგა, ჩაიცვა ტანსაცმელი, ჩამოსსნა ხმალი, ამოაძრო ქარქაშიდან და მიძინარე ქმარს თავზე დაადგა.

— თუ გძინავს, არ გაიღვიძო, სოლო თუ გღვიძავს, თვალი არ გაახილო, თორემ თავს გაგაგდებინებო.

ხელმწიფე-სტუმარს ღვიძავს და ყველაფერი ესმის.

ქმარს ეძინა და არაფერი გაუგია, მაგრამ რომც ღვიძებოდა, ასეთ დროს განძრევას და ხმის ამოდებას მაინც ვერ გაბედავდა.

დედაკაცმა ხმალი ისევ ქარქაშში ჩააგო და თავის ადგილზე დაჰკიდა. მერე ნულა გამოაღო კარი, სახე შალით მოიბურა და სიბნელეში სადღაც წავიდა. ხელმწიფეც მაშინვე წამოდგა და დედაკაცს მალულად უკან აედევნა.

იარა დედაკაცმა სიბნელეში, იარა და ბოლოს ერთ უზარა მახარ კლდეს მიადგა. კლდეში გამოქვაბული იყო. დედაკაცი ჩამოდგა გამოქვაბულის შესასვლელთან და ხმამაღლა შესძახა:

— გამოდი, ჩემო საყვარელო, გელოდებით!

გამოქვაბულთან ერთი არაბი გამოვიდა, ისეთი უშნო და მახინჯი, რომ თვალი იმაზე უარესს ველარაფერს ნახავდა: ქვედა ტუჩი ნიკაპზე ეკიდა. ზედა ცხვირზე ჰქონდა აფარებული.

— დანაპირები თუ მომიტანეო? — ჰკითხა დედაკაცს.

— დანაპირები ვერ მოგიტანე, მაგრამ მე კი მოვედიო, — უთხრა დედაკაცმა თავმოკატუნებით.

— მარტო შენ რა ჭირად მინდისარ, — დაუღრიალა არაბმა, — ახლავე დაიკარგე აქედან და სანამ დანაპირებს არ მომიტან, ჩემთან ფეხი აღარ მოსდგაო.

გამობრუნდა უკან დედაკაცი ტირილით. ხელმწიფეც საჩქაროდ დაბრუნდა მასპინძლისას და დედაკაცის მოსვლამდე ისევ ლოგინში ჩაწვა. დილა რომ გათენდა, ხელმწიფემ მადლობა გადაუხადა მასპინძლებს და წავიდა შინ. მაგრამ დაღამდა თუ არა, ისევ მდაბიურად გადაიცვა, ოღონდ ასლა სხვანაირად მოირთო, რომ არ ეცნოთ, და ისევ იმ ცოლქმარს მიადგა.

— ოჯახიშვილებო, თუ შეიძლება, ამაღამ მისტუმრეთო!

— მობრძანდი, შენი ჭირიმე, სტუმარი ღვთისააო, — გამოეგება მასპინძელი და შინ შეიყვანა, ისევ გაშალა ცოლმა სუფრა, სტუმარი კარგად ავახშმეს და კვლავ ცალკე ოთახში დააწვინეს, ცოლქმარიც თავის საწოლში დაწვნენ.

ხელმწიფეს, რა თქმა უნდა, არც ახლა დაუძინია, მასპინძლის ცოლს უთვალთვალებდა. მართლაც, არ გაუვლია დიდხანს, რომ ცოლი მაშინდელივით წამოდგა ლოგინიდან, ჩაიცვა ტანსაცმელი და ხმალიც ისევ ჩამოიღო. — ეპ, მოსახდენი უნდა მოხდესო, — ჩაილაპარაკა თავისთვის, გააძ-

რო ხმალი, სწევითა ქმარს კისერზე და თავი გააგდებინა, ხელმწიფემ ყველაფერი ეს დაინახა და ძალიანაც შეეშინდა, ემანდ, მეც არ მომკლასო, მაგრამ დედაკაცს მისი საწოლისაკენ არც კი გაუხედია, საჩქაროდ შეახვია შალში ქმრის თავი, გამოვიდა გარეთ და სირბილით წავიდა გამოქვაბულისაკენ. ხელმწიფეც წამოდგა და შორიასლო მიჰყვა..

დედაკაცი მიადგა წინანდელ უდაბურ გამოქვაბულს და ხმამალა შესძახა:

— გამოდი, ჩემო საყვარელო, დანაპირები მოგიტანეო გამოვიდა ისევე ის საზარელლაშინი არაბი, ნახა შალში ზეხვეული მშვენიერი ვაჟკაცის თავი და დედაკაცს ერთი ლაზათიანი სილა გაუშალა:

— შე წუწკო და სალახანავ, ამისთანა ანგელოზით ქმარს უღალატე და მე როგორ მიერთგულებოი — და სულ ცემა-ტყეპით გამოაგდო.

წამოვიდა დედაკაცი უკან დაღონებული. ხელმწიფეც მშინვე გამობრუნდა, შევიდა მასპინძლის სახლში, დაისველა ხელი სისხლში და გამოსვლისას ალაყაფის კარზე დაჰკრა, რომ ნიშანი დასტყობოდა, და დედაკაცის მოსვლამდე გაეცალა იქაურობას.

დედაკაცი დაბრუნდა შინ და საჩქაროდ დამარხა ქმარი, მაგრამ სტუმარი რომ შინ აღარ დახვდა, ამან ცოტა შეაფიქრინა. „რატომ გაიპარა ასე აღრიანად, არაფერი მიხიმანოსო“ — თქვა გულში და ეზო-კარმიდამო მოათვალიერა, რა თქმა უნდა, იპოვა ალაყაფზე სისხლიანი ხელის ანაბეჭდი და ყველაფერს მიხვდა. შევარდა შინ, დაისველა თვითონაც ხელი სისხლში, ჩამოუარა თავის ქურჩას და ყველა ჭიშკარს ისეთივე ნიშანი დაადო.

გათენდა მეორე დილა. ხელმწიფემ დაიბარა თავისი ნაზირ-ვეზირები და უთხრა:

— წადით ამა და ამ ქურჩაზე და რომელი სახლის ალაყაფსაც სისხლიანი ხელის ანაბეჭდი ეტყობოდეს, იმ სახლის დიასახლისი აქ მომიყვანეთო.

ვეზირები წავიდნენ, მაგრამ მალე უკანვე დაბრუნდნენ და ხელმწიფეს მოახსენეს:

— დიდებულო ხელმწიფე, იმ ქურჩაზე ყველა ალაყაფის



კარს სისხლიანი ხელის ანაბეჭდი ატყვია და ვერ გავიგეთ. რომელი დედაკაცი მოვიყვანოთ.

ხელმწიფე მიხვდა, რომ დედაკაცმა აჯობა ეშმაკობით და ძალიანაც განრისხდა, მაგრამ რა უნდა ექნა? მთელ დღეს ჩაფიქრებული იჯდა. მეორე დღეს დაიბარა თავისი ყველაზე ერთგული ვეზირი და უთხრა:

— სანადიროდ უნდა წავიდე, ორ კვირამდე შემაგვიანდება და სანამ დავბრუნდები, ეს ბრძანება უნდა აასრულო: რაც ჩემს საბრძანებელში დედათა მოდგმაა, დიდიან-პატარიანად ყველა უნდა გაჟლიტო, რომ ერთი სახსენებელიც არსად გადარჩეს. ჯერ ჩემი ცოლი და ქალიშვილები დასოცე. მერე — შენი და ბოლოს ყველა დანარჩენი. იცოდე, ეს ბრძანება შეუსრულებელი რომ დამასვედრო, ზარბაზანში ჩაგდება და გაგისვრიო.

წამოვიდა ვეზირი მწარედ დაღონებული და მივიდა შინ. ამ ვეზირს ერთი ნავეზირალი უხსუცესი პაპის პაპა ჰყავდა: როცა კი სასახლიდან შინ დაბრუნდებოდა, ყოველთვის მოიკითხავდა და ხელზე ეამბოროებოდა. მაგრამ ასლა ისე იყო ხელმწიფის უცნაური ბრძანებით შეძრწუნებული, რომ პაპა აღარც კი მოჰგონებია. პაპამ უგუნებობა შეატყყო და პკითხა:

— შეილო, რადა ხარ დაღონებული, რა მოგსვლიაო?

— როგორ რა მომსვლია, ასე და ასე მიბრძანა ხელმწიფემ და თუ არ ავასრულე, ზარბაზნით გამისვრის, არადა, როგორ ამოვადლო ქვეყანაში დედაკაცის სახსენებელი, რას იტყვის ჩემზე შთამომავლობაო?

— მაგაზე ნუ დაღონდები, შეილო, — უთხრა მშვიდად მოხუცმა ნავეზირალმა, — ხელმწიფე რომ მობრძანდება, უთხარი, ჩემმა პაპის პაპამ, შენი პაპის პაპის ნავეზირალმა არ მომცა ნება, თანაც შემოგითვალა, დამიბაროს და ამ ურჩობისათვის პასუხს მე გავცემო.

ვეზირმა დაუჯერა გამოცდილ მოხუცს და აღარ აასრულა ხელმწიფის ბრძანება.

გავიდა ორი კვირა და ხელმწიფეც დაბრუნდა ნადირობიდან. თავისი ბრძანება აუსრულებელი რომ დახვდა და ყველა ქალი უვნებელი დაინახა, უზომოდ განრისხდა. იმავე

დღეს დაიბარა ვეზირი და კარისკაცებს უბრძანა, — გატე-  
ნეთ ზარბაზანიო!

ვეზირმა მუსლებზე დაიჩოქა და სთხოვა:

— დიდებულო ხელმწიფევ, სიკვდილის წინ ერთი სიტყვა  
მათქმევინეთო.

— თქვიო — უთხრა ხელმწიფემ.

— მე, რა თქმა უნდა, თქვენს ბრძანებას არ გადავიდო-  
დი, მაგრამ ერთი უხუცესი პაპის პაპა მყავს, თქვენი პაპის  
პაპის ნავეზირალი და იმან არ დამანება. ასე მითხრა, ხელ-  
მწიფემ მე დამიბაროს და პასუხს გავცემო.

— მაშ, წადი და ახლავე აქ მომიყვანეო! — უბრძანა  
ხელმწიფემ.

დაბრუნდა ვეზირი შინ, ჩასვა თავისი პაპის პაპა ეტლში  
და წაიყვანა ხელმწიფესთან. მოხუც ნავეზირალს სიარული  
აღარ შეეძლო, კარისკაცი ამოუდგა მხარში და ისე შეიყვა-  
ნეს სამსჯავრო დარბაზში. შემოვიდა ხელმწიფე და შეუტია  
მოსუცს:

— რატომ არ დაანებე ჩემი ბრძანების ასრულება, ან  
როგორ გაბედე ხელის შეშლაო?

— დიდებულო ხელმწიფევ, სანამ პასუხს გავცემდეთ, თუ  
ნებას დამრთავთ, ერთ ამბავს მოგახსენებთ და თვითონ გან-  
საჯეთ, თქვენი ბრძანება სამართლიანი იყო, თუ არაო, —  
უთხრა მოხუცმა.

— ბრძანეო! — ნება დართო ხელმწიფემ.

მოხუცმა ნავეზირალმა ჩაახველა და დაიწყო:

— დიდებულო ხელმწიფევ, ცხონებულ პაპათქვენს ორ-  
მოცი ვეზირი ვყავდით და ქვეყანას გონივრულადაც ვმარ-  
თავდით. მაგრამ ერთ ღამეს ერთი ვეზირი სადღაც გაქრა და  
უგზოუკვლოდ დაიკარგა, მეორე ღამეს მეორე ვეზირი დაი-  
კარგა, არც კვალი გამოჩნდა, არც ასავალ-დასავალი, მესა-  
მე ღამეს — მესამე და ასე შემდეგ. ოცდაცხრამეტი დღე-ღა-  
მის განმავლობაში ოცდაცხრამეტივე ვეზირი დაგვეკარგა.  
ასე, რომ საბოლოოდ მეღა დავრჩი.

მეორმოცე ღამეს ჩვეულებრივ ვწევარ ჩემს სახლში. შუა-  
ღამისას ვიღაცამ კარი დამიკაკუნა, მე წამოვდექი და საცე-

ლების ამარა ვაპირებდი კარში გასვლას, უცბად ლოგინი-  
დან წამოსტა ჩემი ცოლი, მტაცა ხელი და შემომიტიო:

— სად მიდიხარ ტიტველ-შიშველი, რა იცი, იქნებ ვი-  
დაც სამტროდ მოსულა და შეიარაღებულია, ჩაიცვი ტანსაც-  
მელი, აისხი იარაღი და ისე გადიო.

მე დავუჯერე ცოლს — ჩავიცვი ტანთ და იარაღიც ავის-  
ხი, მაგრამ ჩემმა ცოლმა კიდევ არ გამიშვა, — იქნებ ის  
ცხენზე ზის და შენ ქვეითი ცხენოსანთან რას გახდები, შედი  
თავლაში, შეკაზმე შენი საუკეთესო ცხენი, შეჯექი ზედ და  
მომხედურს ისე შეეგებეო.

ეს რჩევაც დავუჯერე: შევკაზმე საუკეთესო მერანი, შეე-  
ჯექი ზედ და, როგორც ვაჟაკს შეშვენის, უცნობს ისე გამო-  
ვეგებე. უცნობი ღამის სტუმარი მართლაც შეიარაღებული  
იჯდა ცხენზე, დამინახა და მოწონებით წამოიძახა:

— მადლობა ღმერთს, ძლივს ერთი მაინც გამომეგება  
ვაჟაკურადო — მერე შემოჰკრა ცხენს, — მომყევი, არ ჩა-  
მომრჩეო — მომადახა და გაქუსლა სიბნელეში.

მეც მიყევი.

ვიარეთ ასე ჭენებით, ვიარეთ და ერთ კლდესთან მივე-  
დით, კლდის ძირას დიდი გამოქვაბული იყო, უცნობი მსე-  
დარი ცხენიდან გადმოსტა და მითხრა:

— მე გამოქვაბულში უნდა შევიდე, აქ მტერი მყავს და  
უნდა შევებრძოლო, დღეს უკანასკნელი დღეა, ან მე უნდა  
ვიყო, ან ის. იმ ჩემს მტერს ერთი კუდიანი დედაბერი მფარ-  
ველობს, როცა შევიბმით, მოფრინდება და შველის. მაგრამ  
აქ რომ დაგინახავს, ჯერ შენ შეგებრძოლება, ამიტომ ცხე-  
ნიდან არ ჩამოხვიდე და იარაღიც მარჯვედ გეჭიროს. ეცა-  
დე, ასლოს არ მოუშვა, თორემ თუ მხრებში ჩაგავლო ხელი,  
აგიტაცებს და ისეთ უფსკრულში ჩაგჩეხავს, რომ ყვავი და  
ყორანიც ვეღარ გიპოვისო. — მერე გამომემშვიდობა და გა-  
მოქვაბულში შესვლის წინ კიდევ მითხრა, — ახლა, რომ შე-  
ვალ, ერთს მაშინვე დავიკივლებ, მეორედ, რომ დავიტაკე-  
ბით, მაშინ, ხოლო მესამედ მაშინ, როცა გავიმარჯვებო.  
თუ მესამედ ვეღარ გაიგონე ჩემი დაკივლება, იცოდე, მკვდა-  
რი ვარ და შენს გზას ეწეო.

შევიდა უცნობი მხედარი გამოქვაბულში და ერთი ისეთი

დაიკივლა, რომ კლდესაც კი ზანზარი დააწყებინა. ცოტა ხნის შემდეგ კიდევ გაისმა კივილი და ამით გავიგე, რომ უკვე მტერს შეება. იმავე წამს კუდიანი დედაბერიც მოფრინდა და გამოქვაბულის კარებში რომ დამინახა, შემომიგია. ხელში გრძელტარიანი ცოცხი ეჭირა და იმ ცოცხს ხან მახვილად ხმარობდა, ხან — ფარად და ხან ზედ ჯდებოდა. ვიბრძოლეთ დიდხანს, ის მიტევდა, მე ვიგერიებდი. ბოლოს ვთქვი: სირცხვილი არ არის, რომ მე, დიდი ხელმწიფის ვეზირმა ერთი კუდიანი დედაბერი ვერ დავამარცხო, რალა პირით ვერწენო ჩემს ხელმწიფეს-მეთქი, მოვიკრიბე უკანასკნელი ღონე, მოვუქნიე სმალი და ცოცხიანად შუაზე გავკვეთე.

ამ დროს გამოქვაბულშიც გაისმა კივილი — ეს გამარჯვების ნიშანი იყო. მართლაც, ჩემი თანამგზავრი უნებელი გამოვიდა გამოქვაბულიდან და თან ჭრულ ბაღდადში შეხვეული რალაც გამოიტანა. მე ხმა არ გამცა, ისევ ცხენზე ამხედრდა, — მომყვილიო! — მომამახა და ცხენი გააქროლა. მეც მივყვი.

ვიარეთ ასე ჭენებით, ვიარეთ და ბოლოს ერთ მწვანე მინდორში გავვდით. მინდორში მშვენიერი სასახლე იდგა და ირგვლივ ედემისებური ბაღი ერტყა.

გაღმოვხტით ცხენებიდან, ჩემი თანამგზავრი სასახლეში შევიდა და ბარი და ნიჩაბი გამოიტანა. შემეყვანა ბაღში, ერთ ხის ძირას მიწა შემომიხაზა და, ეს ადგილი მოთხარეო, — მითხრა. დავიწყე თხრა. ვთხარე, ვთხარე და ერთი ოქროს კუბო აღმოვაჩინე.

— ამოიღე ეგ კუბო და თავი ახადეო, — მითხრა ჩემმა თანამგზავრმა.

ამოვიღე კუბო, შემოვდგი საფლავის ნაპირზე და ავხადე: შიგ ისეთი მშვენიერი ვაჟკაცი იწვა, რომ მის დანახვაზე მტერიც კი ატირდებოდა.

— მე ქალი ვარ და ეს მკვდარი ჩემი შეყვარებულია, — მითხრა ჩემმა თანამგზავრმა, — დედ-მამამ ერთმანეთზე დაქორწინების ნება არ მოგვცეს და ამას სხვა ცოლი მოუყვანეს. იმ ცოლმა უღალატა, ამან სირცხვილს ვერ გაუძლო და მოკვდა. სიკვდილის წინ ანდერძი დამიტოვა, ჩემს შემარ-

ცხვენელს სამაგიერო მიუზღე და საიქიოშიც შენზე მლოცველი ვიქნებო. მე ადრევე მინდოდა ამესრულებინა ამისი ანდერძი, მაგრამ შენამდე ისეთი ვაჟკაცი არ შემხვდა, რომ კუდიან დედაბერს გამკლავებოდა და ჩემთვის ბრძოლა გაეადვილებინა. დღეს შენ შემხვდი და აი გავიმარჯვე კიდევცო. — ამ სიტყვებით გახსნა აბრეშუმის ხელსახოცი, გამოქვაბულიდან რომ გამოიტანა, და მაჩვენა ერთი მახინჯი, საწიზლარი არაბის თავი. სწორედ ამან აცდინა ჩემი შეყვარებულის ცოლი, ეს იყო მისი სიკვდილის მიზეზი და სამაგიეროც მიიღო. მაგრამ მე უამისოდ სიცოცხლე მაინც აღარ მინდა, ჩემს შეყვარებულს ზედ უნდა დავაკედე. და სადაც ამდენი სიკეთე მიყავი, სიკვდილის შემდეგ ეს ერთი თხოვნაც შემისრულე: მე ჩემს შეყვარებულთან ერთად დამმარხე, არაბის თავი ქალაქში მარგილზე ჩამოაგე და ჩვენი ამბავი ქვეყანას გააგებინე, სამაგიეროდ მთელი ეს სასახლე, ბაღი და ქონება შენი იყოს და როგორც გინდოდეს, ისე მოიხმარეო.

ამის შემდეგ ჩამოიშალა თმები და თავის საყვარელს დიდხანს გულამოსკვნით დასტიროდა. მერე ამოაძრო ხანჯალი, წვერი გულზე მიიღო, ტარი კუბოს მიაბჯინა, დააწვა და ხანჯლის წვერი ბეჭებში გაიგდებინა.

მე, რა თქმა უნდა, ყველაფერი ისე გავაკეთე, როგორც უკანასკნელად მთხოვა, მაგრამ სახლიდან გროშიც არ წამომიღია.

— აბა, დიდებულო ხელმწიფევე, — უთხრა ბოლოს მოხუცმა ნავეზირალმა, — ჩემს ცოლს რომ რჩევა არ მოეცა და კარში უიარაღო და ქვეითი გავეშვი, მეც ხომ ჩვენი ვეზირების დღე დამადგებოდა და კუდიანი დედაბერი უფსკრულში ჩამჩეხავდა. ან იმ ქალს რომ თავისი შეყვარებულისათვის ასე არ ეერთგულა და ანდერძი არ აესრულებინა, ის მშვენიერი ვაჟკაცი ხომ საიქიოშიც სულ დატანჯული უნდა ყოფილიყო. ახლა ხომ ხედავთ, რომ ყველა ქალი ერთნაირი არ ყოფილა და ერთგულ, გონიერ დედაკაცს ბევრი კარგი რაღაც შესძლებია. და, თქვე დალოცვილო, ერთი წუნკალი დედაკაცის გულისთვის რომ საქალეთი ამოაგდოთ, ამით ან თქვენ რას მოიგებთ და უქალოდ ან ქვეყანას რა ეშველება?

ნურც ის გედარდებათ, რომ ის წუნკალი დედაკაცი დაუსჯე-  
ლი გადარჩა, ბოროტი და ავაზაკი თავის ზნეს არ მოიშლის,  
ერთხელაც იქნება კიდევ რამეს ამგვარს ჩაიდენს და თავის  
თავს თვითონ გაპოვნინებსო.

ხელმწიფე მიხვდა თავის შეცდომას და დიდადაც შერ-  
ცხვა, მოხუცი ნავეზირალი უხვად დაასაჩუქრა და ამ დღი-  
დან სამეფოსაც უფრო გონივრულად და სამართლიანად გა-  
ნაგებდა.

ჭირი — იქა, ლხინი — აქა,  
ქატო — იქა, ფქვილი — აქა.





## ამხანაგს ნუ უღალატებ

იყო და არა იყო რა, ღვთის უკეთესი რა იქნებოდა. ერთ სოფელში ორი ღარიბი კაცი ცხოვრობდა. ერთხელ მოიღაპარაკეს, — ასეთი ღატაკები როდემდე უნდა ვიყოთ, მოდი წავიდეთ სადმე, იქნებ სხვაგან მაინც ბედს ვეწიოთო. ჩაიდეს გუდაში თითო გამხმარი პური, დაიწერეს პირჯვარი და გაუდგნენ გზას.

კარგა მანძილი რომ გაიარეს, პური მოშივდათ, ერთმა უთხრა მეორეს, — მოდი, ჯერ შენი პური ვჭამოთ და მეორედ რომ მოგვშივა, ჩემიო. დათანხმდა მეორე, ამოიღო თავისი პური და ამხანაგს შუაზე გაუყო. დანაყრდნენ და გაუდგნენ ისევე გზას.

იარეს, იარეს და ბოლოს ერთ გზაჯვარედინს მიადგნენ.

— აქ უნდა გავიყარნეთ და თავთავიანთი გზით წავიდეთო, — უთხრა პირველმა.

— მე რომ ნამცეცი პური აღარ დამრჩაო? — უპასუხა მეორემ, პირობა მოაგონა და თავისი წილი ნახევარი პური მოსთხოვა. მაგრამ პირველმა ახლოც არ გაიკარა, — სანამ ერთად მოვდიოდით, საგზალიც ზიარი გვექონდა, ამიერიდან კი ჩვენ ჩვენი გზით უნდა ვიაროთ და საზრდოც თვითონ უნდა ვიშოვოთო.

დაღონდა საწყალი კაცი, მაგრამ დავა არ დაუწყია, „სადაც ამდენი რამ მაკლია, ეგ ერთი პურიც იქ იყოსო“, — თქვა გულში, ჩაიქნია ხელი და წავიდა თავისი გზით. ბინდმა ერთ მიტოვებულ ფარღალაღა წისქვილთან მოუსწრო. ღია ცის ქვეშ გდებას ისევ თავშესაფარში ღამის გათევა

სჯობიაო, — ჩაილაპარაკა თავისთვის, შევიდა წისქვილში და ხვიშირში ჩაჯდა.

ზის კაცი ხვიშირში და თავის მწარე ხვედრზე ფიქრობს. მშიერს არც ძილი ეკარება. შუალამისას რაღაც ხმაური შემოესმა, წუთიც და, წისქვილში ერთი დაღლილ-დაქანცული დათვი შევიდა. „ვაი, მუხლებიო!“. დაიკვნესა და ბურტყუნით კუთხეში მიეგდო. დათვს მგელი მოჰყვა, არ გასულა დიდი ხანი, რომ ახლა მელია შემოცუნცულდა. „ვაიმე, მუხლები, მუხლებიო!“ დაიწუწუნა იმანაც და დათვისა და მგლის გვერდით მიწვა.

ერთხანს სამივენი ჩუმად იყვნენ. მერე დათვა თქვა:

— ძმებო, ამოდენა ღამეს რა გაათენებს, მოდით, ვთქვათ რამე, ვისაც რა გვინახავს, ან თავს გადაგვხდენია და ღამე ისე გავიყვანოთო.

— მართლაც აჯობებდსო, — კვერი დაუკრეს მგელმა და მელიამ.

— მაშ, მოდი და ჯერ შენ დაიწყე, — უთხრა დათვა მელას, — შენ უფრო ეშმაკი ხარ და ნახვითაც ბევრი რამ გინახავსო.

— ჩემი თავი თქვენი ჭირის სანაცვლო იყოსო, — თქვა მელიამ, ტუჩები მოილოკა, ამოიკეცა ფაფუკი კუდი და უკანა ფეხებზე წამოყუნცდა.

— აქვე, გვერდით, ერთი პატარა ნაკადული რომ ჩამორუხჩრუხებს, ხომ იცითო? — იკითხა.

— როგორ არ ვიცითო, — უპასუხეს დათვა და მგელმა.

— აი, სწორედ იმ წყლის ნაპირზე ერთი თავგი ცხოვრობს. იმდენი ოქროს აქვს, იმდენი, რომ ბარემ ერთ სასულ-მწიფოს ეყოფა. მზიან დღეებში გამოფენს ხოლმე კარში და აშრობს. აბა რად უნდა თავის ოქროს? განა უკეთესი არ იქნება, რომ ეს საიდუმლო ვინმე საწყალმა კაცმა იცოდეს, წაიღოს ის ოქროები და მოიხმაროს, თავის კი თხილი ან კაკალი მიუტანოს, იმას ის ურჩევნიაო.

დათვა ახლა მგელს უთხრა, შენი ჯერიაო, და მგელმაც დაიწყო:

— მაშრიყის ხელმწიფე უძეო იყო და სულ შეიღს ნატრობდა. სიბერის ჟამს ვაჭიშვილი შეეძინა, მაგრამ კაცს რომ



ბედი არ ექნება, ეგ არის: ბავშვი ცოტა რომ მოიზარდა, ავად გაუხდა და აგე უკვე ათი წელიწადია, ლოგინში უწევს. არც კვდება, არც რჩება, რაღა არ იღონა ხელმწიფემ, მთელი ქვეყნის ექიმები და მისნები დღე და ღამე თავზე ადგანან, მაგრამ ვერაფერს შველიანო.

— მერე და, შენ იცი, რა მოარჩენსო? — ჰკითხა მელიამ.

— როგორ არ ვიცი, — უთხრა მგელმა, — ცხრა მთას იქით ერთი სასელგანთქმული მეცხვარეა. მეცხვარეს ფარაში ერთი ყბაშავი ცხვარი ურევია. ის ცხვარი რომ დაკლან და იმისი გულ-ღვიძლი შეაჭამონ, მაშინვე ფეხზე წამოხტება. რა კარგი იქნებოდა, რომ ამას ვინმე საწყალი კაცი გაიგებდეს, ავადმყოფსაც გადაარჩენდა და თვითონაც გამდიდრდებოდა. — ხელმწიფე თავის წონა თვალ-მარგალიტს აჩუქებსო.

ჯერი დათვზე მიდგა.

— აბა, ჩვენო ბიძავ, ერთი კარგი რამ შენც გვითხარო, — უთხრეს მგელმა და მელამ.

დათვმა ჩაახველა და დაიწყო.

— აქ, მთის ძირას, ერთი დიდი სოფელია. ხალხს მიწა რომ აღარ ეყო, ტყე გაკაფეს და ახლები გაიკეთეს. ტყის გაჩეხვის გამო კი, როგორც ყოველთვის ხდება, წყაროები დაშრა და სოფელი უწყლოდ დარჩა. ახლა ხალხი დიდ გასაჭირშია, — სასმელ წყალს ერთი დღის სავალიდან ეზიდებიან და ის კი არ იციან, რომ წყალი იქვე, გვერდითა აქვთ: სოფლის პირას ერთი ტინი კლდეა, ის კლდე არშინზე რომ გამოთხარონ, იმდენი წყალი გადმოვა, რომ თუნდა ათ სოფელს ეყოფა. რა მადლი იქნებოდა, რომ ეს საიდუმლო, ვინმე ღარიბ-ღატაკმა კაცმა იცოდეს და იმ სოფელს წყალს გამოუყვანდეს, ხალხი იმდენ ფულსა და საქონელს მისცემს, რომ მთელი თავისი სიცოცხლე ეყოფაო.

— ძმებო, ჩვენ საუბარში გავერთეთ და თავზე კი დაგვთენებია, — წამოიძახა მელიამ, — ავჩქარდეთ, თორემ აქ თუ მონადირემ მოგვისწრო, ცოცხლები ვერ გადავურჩებითო, — წამოხტა, გაიბურტყა კუდი და ისარივით გავარდა კარში. დათვი და მგელიც უკან მიჰყვნენ.

მთელი ეს ნალაპარაკევი ღარიბმა კაცმა კარგად დაიმახსოვრა, გათენებისთანავე ხვიშირიდან ამოძვრა, დაკრიფა ერ-

თი გუდა თავბროლი თხილი და პირდაპირ წისქვილის გვერდით ჩამომდინარე ნაკადულისაკენ წავიდა. აჰყვა ხევ ხევ და მართლაც ერთ ადგილას მზუზე გაფენილი ოქროები დაინახა, თავიცი იქვე იყო, მხართუძოზე წამოწოლილი და თავისი სიმდიდრის ცქერით ტკბებოდა. თავგმა მოჰკრა თუ არა თვალი ადამიანს, შეშინებული მაშინვე სოროში შევარდა. კაცმა მოიხსნა თავისი ტყავის გუდა, თხილი სოროს პირას წამოყარა, გუდა ოქროებით გატენა, რაც გუდაში არ ჩაეგია, ჯიბეებსა და უბეში ჩაიყარა და გახარებული სახლისაკენ წამოვიდა. შევიდა შინ, მოხსნა გუდას პირი და მთელი ოქრო ტახტზე დაახვავა. უბიდან და ჯიბეებიდანაც ამოყარა და აქამდე სიღარიბისაგან გატანჯულ ოჯახში იმედი და სიხარული შეიტანა. ცოლი და შვილები თვალს არ უჯერებდნენ და გახარებულები ჩქარ-ჩქარა ეკითხებოდნენ:

— სულ ჩვენია ეს ოქროები, მართლა ჩვენიაო?

— თქვენია, სულ თქვენიო, — ეუბნებოდა კაცი და ცოლ-შვილის სიხარულით თვითონაც ტკბებოდა.

— გვითხარი მაინც, ვინ მოგცა ამოდენი ოქრო, სად იშოვეო? — ჰკითხა ბოლოს ცოლმა.

— ჯერ ნურაფერს მკითხავეო, — უთხრა კაცმა, — საჩქაროდ პური მაჭამეთ, რომ დრო არ დავკარგო და ამისთანას სხვასაც ბევრს მოგიტანთო.

ცოლმა მოუტანა გამხმარი მჭადპურა, ქმარმა აატეხა ცალი ყუა, ალა-ულით შეჭამა, გამოემშვიდობა ცოლ-შვილს და გაუდგა ისევ გზას.

ბევრი იარა თუ ცოტა, ბოლოს კითხვა-კითხვით მივიდა იმ სოფელში, სადაც ხალხი უწყლობით იტანჯებოდა, გამოცხადა სოფლის მამასახლისის და უთხრა:

— რას მომცემ, რომ შენს ხალხს წყალი გამოვუყვანო?

— კომლზე თითო თუმან ფულსა და თითო ძროხას მოგცემთო, — უთხრა მამასახლისმა.

— თანახმა ვარ, — დათანხმდა კაცი, — ოღონდ ერთი ოთხიოდე კაცი გამომაყოლე ბარ-წერაქვებით და დილაზე შენს ხალხს პირს წყაროს წყლით დავაბანინებო.

მამასახლისმა ოთხის მაგიერ, ათი გააყოლა. წაიყვანა

კაცმა მუშები, მიიყვანა სოფლისპირა კლდესთან და თხრა დააწყებინა. ეს ამბავი ელვის სისწრაფით მოედო სოფელს. იმ ღამეს არავის სძინებია. დიდი თუ პატარა მოუთმენლად მოელოდა გათენებას.

და მართლაც, ჯერ ისევ დილაბნელი იყო, რომ ნათხარი-დან ალაზნისტოლა წყალმა ამოხეთქა. სოფელი სიხარულ-საგან ცას ეწია, იყო ერთი ზეიმი, ლხინი, სიმღერა, კაცს ეხვეოდნენ, ჰკოცნიდნენ და მარჯვენას ულოცავდნენ. ბოლოს მისცეს დაპირებული ფული, ათას სულამდე საქონელი — ძროხა, ცხენი, ხარ-კამეჩი და გამოისტუმრეს.

კაცმა ეს ახალი სიმდიდრეც სახლში მიიტანა, ცოლი და შვილები უარესად გაკვირდნენ, — საიდან მოგაქვს ამდენი სიმდიდრეო? მაგრამ კაცმა არც ამჯერად გაუმხილა, ფული ცოლს ჩააბარა, საქონელი — შვილებს, და თვითონ ისევ უკან გაბრუნდა.

იარა კაცმა, იარა და მივიდა მაშრიყის ქვეყანაში. მთელი ქვეყანა ძაძებში იყო გახვეული, სახლებზე შავი დროშები გადმოეკიდათ და ხალხსაც სულ შავები ეცვა. კაცი შეფიქრიანდა, ხელმწიფის შვილი იქნებ კიდევაც მოკვდაო, და ერთ დედაბერს ჰკითხა:

— დედაშვილობას, მითხარი, რატომ გაცვიათ ყველას შავი ტანსაცმელი და ან შავი დროშები რადა გაქვთ გადმოკიდებულიო?

— ეს, შვილო, გეტყობა, უცხო ხარ და არ იცი, — დაიწუწუნა დედაბერმა, — ამისი მიზეზი კი ის არის, რომ ჩვენს ხელმწიფის შვილს რაღაც ავი სული დაეპატრონა. ეს ათი წელიწადია, ლოგინად არის ჩაეარდნილი და აღარც ამ ქვეყნისაა, აღარც — იმ ქვეყნისა. ავი სულის გულის მოსაგებად ხელმწიფემ გლოვა გამოაცხადა და იმ დღიდან ძაძები არავის გაუხდია. აი ამ გასაჭირში ვართ და აღარ გვეგონია, თუ სიხარული კიდევ როდისმე გვეღირსებაო.

— წამიყვანე ხელმწიფესთან და იმ ავადმყოფს მე მოვარჩენო, — უთხრა კაცმა.

— მაგაზე უკეთესს რას იზამ, შვილო, — უთხრა დედაბერმა, — ჩვენც გვიშველი და შენს თავსაც გააბედნიერებ, — ხელმწიფე იმდენ ოქროსა და თვალ-მარგალიტს მოგცემს,

რომ შენს სიცოცხლეში აღარაფერი გაგიჭირდებაო, — გაუძღვა კაცს წინ და წაიყვანა ხელმწიფის სასახლისაკენ, თან გულში უხაროდა, ხელმწიფეს ამისთანა კაცს რომ მიუყვან, მეც უხვად დამასაჩუქრებსო.

მივიდნენ სასახლეში, შევიდნენ ხელმწიფესთან და დედობა მოახსენა:

— დიდებულო ხელმწიფე, აი, ეს კაცი ქუჩაში შემხვდა, მითხრა, ხელმწიფის შვილს მოვარჩინო, და პირდაპირ თქვენთან წამოვიყვანეო.

ხელმწიფე ზედმეტი სიხარულისაგან მაშინვე ფეხზე წამოდგა და კაცს ჰკითხა, — მართლა მოარჩინო?

— მოვარჩინე, დიდებულო ხელმწიფე, — მიუგო კაცმა, — მაგრამ წამალი თან არა მაქვს და მის მოსატანად ერთი-ორი დღით წასვლა დამჭირდებაო.

— თუნდაც ერთი კვირით წადი, — უთხრა ხელმწიფემ, — ოღონდ ნუ დაიგვიანებ, შვილი მომირჩინე და რასაც ინატრებ, შეგისრულებო.

კაცის მიყვანისათვის ხელმწიფემ მართლაც უხვად დაასაჩუქრა დედობერი და გაისტუმრა. კაციც გამოემშვიდობა ხელმწიფეს და თავისი გზით წავიდა. ბევრი იარა თუ ცოტა იარა, ბოლოს მიაგნო იმ მეცხვარის ბინას, რომლის ფარაშიც ყბაშავი ცხვარი ერია.

— გამარჯობა, ძმობილო! — მიესალმა კაცი.

— გაგიმარჯოს და მშვიდობა შენს მოსვლას, — უპასუხა მეცხვარემ და შეეკითხა, — რა გაგჭირვებია, რაზე გარჯილხარო? — კაცმა უთხრა რისთვისაც იყო მისული. — ახლა შენ იცი და შენმა კაცობამო, — დაუმატა ბოლოს, — ის ყბაშავი ცხვარი გინდა მომეყიდე, გინდ სესხად მომეცი და აქედან ხელცარიელს ნუ გამისტუმრებო.

მეცხვარეს გაეცინა და უთხრა:

— შე კაი კაცო, ერთ ცხვარში რა ფასი და სესხი მინდა, წაიყვანე და წამლად შეერგოს შენს ავადმყოფსო. — შევიდა ფარაში, გამოიყვანა ყბაშავი ცხვარი და მისცა.

კაცმა დიდი მადლობა გადაუხადა, შეისვა ცხვარი კისერზე და წამოვიდა. ქალაქში ის ნაცნობი დედაბერი მოძებნა, დაკლა ცხვარი, ხორცი დედაბერს მისცა, გულ-ღვიძლი კი

მოხარშა, დააწყო თეფშზე, მალლიდან ხელსახოცი გადააფარა და წავიდა ხელმწიფესთან, ხელმწიფემ ჰკითხა:

— მკურნალობისთვის კიდევ ხომ არაფერი გჭირდებაო?

— არაფერი, დიდებულო ხელმწიფე, მხოლოდ მე და ავადმყოფი დრომდე მარტონი დაგვტოვეთ, — უთხრა კაცმა. ხელმწიფე, რა თქმა უნდა, ამაზეც დათანხმდა. თვითონვე შეიყვანა შვილის ოთახში და კარები გამოუხურა.

კაცმა მოხსნა ხელსახოცი თეფშს. აიღო ღვიძლის ერთი ნაჭერი და ავადმყოფს ძალით ჩაუდო პირში, ხელმწიფის შვილმა რის ვაივაგლასით დაღეჭა ლუკმა და გადაყლაპა, გადაყლაპა და იმავე წამს თვალები გაახილა.

— უჰ, რა გემრიელია! — წამოიძახა ხმამაღლა და ტუჩები მადიანად გააწკლაპუნა. გლეხმა მეორე ნაჭერიც ჩაუდო, ხელმწიფის შვილმა ეს ნაჭერი უკვე გაუჭირვებლად დაღეჭა და მესამე ლუკმა თვითონვე მოითხოვა. ავადმყოფი თანდათანობით მომჯობინდა. ბოლოს ლოგინიდანაც წამოდგა და კაცს უთხრა:

— მომეცი თეფში, ახლა ჩემი ხელითაც შეეჭამო.

მთელმა სასახლემ ხელმწიფის შვილის ოთახთან მოიყარა თავი. ყველა გულის ფანცქალით მოელოდა მკურნალობის შედეგს. ამ დროს გამოვიდა კაცი და ხელმწიფეს მოახსენა:

— დიდებულო ხელმწიფე, შენი შვილი უკვე ფეხზე დგას და სადილს მიირთმევს, შებრძანდით და ნახეთო.

შეცვივდნენ ხელმწიფე და დედოფალი და მორჩენილ შვილს გადაეხვივნენ. ხან დედა ჰკოცნიდა, ხან — მამა. კარებზე მდგარი შინამოსამსახურენი და ნაზირ-ვეზირები ბედნიერ დედ-მამას მემკვიდრის გადარჩენას ულოცავდნენ. იყო ერთი ლხენა და სიხარული.

ბოლოს ხელმწიფემ, შვილის ალერსით რომ გული იჯერა, კაცი ისევ ოთახში შემოაყვანინა და ჰკითხა:

— რას ითხოვ, რით გადაგიხადო სამაგიერო?

— მე ბევრი არაფერი მინდა, დიდებულო ხელმწიფე, — უთხრა კაცმა, — სოფელში სახლი არ მივარგა და, თუ ერთ პატარა სახლს ამიშენებთ, მადლობელი ვიქნებიო.

რაკი საზღაურს არ დახარბდა, ეს კაცი ხელმწიფეს უფ-

რო მოეწონა, მისცა უთვალავი ფული, თვალ-მარგალიტი და გამოისტუმრა. თან ვეზირი, რჩეული კალატოზები და მუშები გამოაყოლა და უბრძანა:

— ამ კაცს მარმარილოს სასახლე დაუდგით, გარშემოც მარმარილოს გაღავანი შემოავლეთ და შიგნით ხეხილის ბაღი გაუშენეთ.

მოვიდნენ თუ არა კაცის სოფელში, მუშები იმავე დღეს საძირკვლის გაჭრას შეუდგნენ, მოზიდეს ქვა, კირი და ერთ თვეში სწორედ ისეთი სახლი და ეზო-კარმიდამო აუშენეს, როგორც ხელმწიფემ დაავალა. დაულოცეს სახლკარი და წავიდნენ.

გადაბარგდა კაცი მარმარილოს სასახლეში და დაიწყო ბედნიერი ცხოვრება. გაიგო იმისმა ამხანაგმა ეს ამბავი და გული შურით აეესო. მივიდა ერთ დილას და ჰკითხა:

— ძმაო, სიმართლე მითხარი, ეს ამოდენა დოვლათი როგორ და რა გზით შეიძინეო?

— სიმართლითო, — უთხრა კაცმა და ყველაფერი დაწერილებით უამბო — როგორ დაულამდა გზაში, როგორ დაბინავდა წისქვილში ღამის გასათევად, როგორ შემოვიდნენ დათვი, მგელი და მელა, და მათგან რა და რა საიდუმლო გაიგო. — ასეა, ჩემო ძმაო, — დაუმატა ბოლოს, — მე ჩემი საგზალი ალაღად რომ გაგიყავი, ღმერთმა გადმომხედა და აი, ამოდენა სიმდიდრის პატრონი გამხადა. შენ კი მიღალატე, ამხანაგისათვის ლუკმა ვერ გაიმეტე და უცხო გზაზე მშინერი გამიშვი, ხელიც სწორედ ამიტომ მოგეცარა და ვერაფერი ისარგებლეო.

ამხანაგს შური უფრო მოედო. იფიქრა, მოდი წავალ იმ წისქვილში და ღამეს გავათევ, იქნებ მეც გავიგო რამე და ბედს ვეწიოო. იმავე დღეს აიკრა გუდა-ნაბადი, ცოლსაც კი არ გააგებინა, ისე გაუდგა გზას. შებინდებისას უკვე წისქვილთან იყო, შევიდა შიგ, ჩაჯდა ხვიმირში და სული განაბა. დაღამდა თუ არა, ჯერ დათვი შევიდა, მერე მგელი და ბოლოს მელიაც შემოცუნცულდა. ახლაც დაღლილები კუთხეში მიეყარნენ. ჯერ ჩუმად იყვნენ, მერე დათვმა დაიბურცყუნა:

— ძმებო, რას გავჩუმებულვართ, რამდენი ხანია, ამ

წისქვილში აღარ შევკრებილვართ და ერთმანეთისთვის აღარაფერი გვიამბნია, ვთქვათ რამე, გული გადავაყოლოთ და ღამეც შევიძოკლოთო. — და პირველად ისევ მედიას უთხრა, — შენ დაიწყე, შენ უფრო კარგი ამბები გეცოდინებაო.

— როგორ არ ვიცი, — თქვა მელიამ და კვლავ კუღზე წამოყუნცდა, — გახსოვთ, ძმებო, მაშინ რომ გიამბეთ, წყლის პირას ერთ თაგვს სოროდან ოქროები გამოაქვს და მზეზე აშრობსო?

— გვახსოვს, გვახსოვსო, — შესძახეს მგელმა და დათვმა.

— ჰოდა, ამ წინაზე ის თაგვი შემხვდა ცამდე გახარებულნი: სოროსთვის ვიღაც კაცს მიუგნია, ის ოქროები წაუღია და სამაგიეროდ იმდენი თხილი მიუჭანია, რომ თაგვს სიკვდილამდე ეყოფა.

— ერთი ასეთი ამბავი მეც ვიცი, — წამოიძახა მგელმა, — მაშინ რომ გიამბეთ, ერთ ხელმწიფეს შვილი ჰყავს ავად და ყბაშავი ცხვრის გულ-ღვიძლის მეტი არაფერი მოარჩენსო, ეს საიდუმლო ვიღაც კაცს გაუგია, გამოურთმევია მეცხვარისთვის ის ყბაშავი ცხვარი, უჭმევია ხელმწიფის შვილისათვის იმისი გულ-ღვიძლი და ავადმყოფი იმავ დღეს ფეხზე წამოუყენებია. ამბობენ, ხელმწიფემ იმ კაცს მარმარილოს სახლი აუშენა და იმდენი ოქრო მისცა, რომ იმის შვილიშვილებსაც კი ეყოფაო.

— რაკი აგრეა, ახლა ერთ ამბავს მეც გეტყვითო, — დაიბურტყუნა დათვმა, — ალბათ მაშინდელი ჩემი ნაამბობიც გეხსომებათ, ერთი სოფელი უწყლობით რომ ისრჩობოდა და სოფლის პირა კლდეში კი ალაზნისტოლა წყალი იყო დაგუბებული. ეს საიდუმლოც ვიღაც კაცს გაუგია, მისულა იმ სოფელში, გაუთხრევინებია კლდე და ისეთი ცივცივი წყალი გამოუყვანია, რომ თვალი უკეთესს ვერაფერს ნახავს. სამაგიეროდ სოფელს იმ კაცისათვის იმდენი საქონელი მიუცია, რომ იმისი ნახირი და ცხვრის ფარები აღარსად ეტევაო.

— ძმებო, — დაიძახა უცბად მელიამ, — იმ ღამეს ჩვენ ვიღაცამ ჩუმად მოგვისმინა, თორემ სხვანაირად ამ საიდუმლოებას ვერავინ მიაგნებდაო.

— მართალი ხარო, — კვერი დაუკრეს დათვმა და მგელ-

მა, — ნამდვილად ყურს ვილაც გვიგდებდა, ჩვენი ნალაპარაკები სიტყვასიტყვით აკრიფა და გამოიყენა კიდეცო.

— იქნებ ახლაც ვინმე გვისმენსო? — დაეჭვდა უცბად მელია.

— ეგეც შესაძლებელიაო, — უთხრა დათვმა და თან დაუმატა: — დამალულის პოვნა შენ უფრო გეხერხება, აბა ერთი მიიარ-მოიარე და კარგად მოჩხრიკე, ემანდ მართლა არაფერ გვისმენდესო.

წამოხტა მელია, აფშიკა კუდი და ოთხივე კუნჭული გულდასმით მოათვალიერა, მერე საფქვილზე ალაში ჩაიხედა, ბოლოს სვიმირზე შეხტა და შიგ მობლუნძული კაცი რომ დაინახა, ყვირილი გააბა:

— სვიმირში კაცი ზის, სვიმირში კაცი ზისო!

წამოცვივდნენ დათვი და მგელი. ამოათრიეს კაცი სვიმირიდან და გასწიეს და გამოსწიეს. თქვენს მტერს, რაც იმას დღე დააყენეს, ძვალი და რბილი სულ გაუერთიანეს, რის გაივავლასით გადაურჩა ცოცხალი, წამოვიდა შინისაკენ ლასლასით და თავისი საქციელი — ამხანაგისათვის ლალატი, მწარედაც ინანა, მაგრამ სინანულით წამხდარ საქმეს ველარაფერი უშველა.

ჭირი — იქა, ლხინი — აქა,

ქატო — იქა, ფქვილი — აქა.







## სამი სიბრძნე

იყო და არა იყო რა, ერთ სოფელში ერთი მეტისმეტად ღარიბი კაცი ცხოვრობდა. დღე და ღამეს ასწორებდა. მაგრამ ცოლ-შვილი მაინც მშიერი და შიშველ-ტიტველი დაუდიოდა, ბოლოს, სიღარიბემ ძალიან რომ შეაწუსა, თავის ცოლ-შვილს უთხრა:

— მიჭირს თქვენთან დაშორება, მაგრამ რა ექნა, თუ ერთი-ორი წლით სადმე არ წავედი და სარჩო არ ვიშოენე, ისე არაფერი გვეშველებათ.

გამომშვიდობებისას ცოლმა უთხრა:

— წადი, ეგებ ღმერთმა ხელი მოგიმართოს, ოღონდ ამას კი გეხვეწები, სამ წელიწადზე მეტს ნუ დაიგვიანებ, თუ ბედს ეწიე, ხომ კარგი, თუ არა და, შინ დაბრუნდი და სანამ ცოცხლები ვიქნებით, ერთმანეთის გვერდით მაინც ვიყოთ.

გადაკოცნა კაცმა თავისი ცოლ-შვილი და გაუდგა გზას. მიდის დღე და ღამე შეუსვენებლად. საგზალი გაუთავდა, ტანსაცმელი ტანზე შემოადნა, მაგრამ იმედს მაინც არ კარგავდა, შიმშილს ტყის კენკრითა და ბალახების ძირებით იოკებდა, ტანზე შემოკონკილ ძველმანებს იფარებდა და მიდიოდა. ასე იარა, იარა და დაკონკილ-გადასავათებული ბოლოს ერთი ბრძენი ხელმწიფის სატასტო ქალაქში შევიდა, მივიდა ხელმწიფესთან და მოახსენა:

— ბრძენო ხელმწიფე, ერთი ღარიბ-ღატაკი კაცი ვარ, შორი გზიდან მოვდივარ და სამუშაოს დავეძებ, ქენი მაღლი, დამიყენე მოჯამაგირედ და ჩისი ღირსიც ვიქნები, ის საფა-

სური მიბობე, ბევრს არ მოვითხოვ, ჩემი საცოდავი ცოლ-  
შვილი მცირედითაც კმაყოფილი იქნებაო.

ბრძენმა ხელმწიფემ მოუსმინა და პირდაპირ ჰკითხა:

— წელიწადში რამდენი მოგცემ?

ღარიბი კაცი შეფიქრებდა, არ იცოდა, რამდენი მო-  
თხოვა და ყოყმანობდა: ბევრი ვთხოვო, ვაითუ, სულაც  
უარი მითხრას, არადა, მეც ცოდო ვარო. ბოლოს გაბედა და  
მოახსენა:

— წელიწადში სამ თუმნად გემსახურებო.

— კარგო, — დათანხმდა ხელმწიფე, — სამ თუმანს  
მოგცემო, მაგრამ ერთი პირობით: წლის ბოლოს თუნდა სა-  
მი თუმანი მიიღე და შენი გზით წადი, თუნდა ერთ სიბრძნეს  
გასწავლი და ფული მე დამრჩესო.

დადეს პირობა და დარჩა კაცი ბრძენი ხელმწიფის  
კარზე.

დაიწყო სამსახური და თანაც როგორი გახარებული,  
რომ წლის ბოლოს თავის მშიერ ცოლ-შვილს სამ თუმანს  
მიუტანო, დღე და ღამე არ ისვენებს, რა გინდა, რომ იმისი  
ხელიდან არ გამოვიდეს. აკეთებს ყველაფერს ერთგულად  
და მოსაწონად და ხელმწიფე ძალიან კმაყოფილია თავისი  
ახალი მოჯამაგირით.

ასე გავიდა ერთი წელიწადი.

მივიდა კაცი წლის ბოლოს ხელმწიფესთან და დანაპირე-  
ბი ჯამაგირი მოსთხოვა:

— მიბობეთ ჩემი ჯამაგირი და წავალო.

ბრძენმა ხელმწიფემ უსიტყვოდ გახსნა სპილოს ძვლის  
ზარდახმა, ამოალაგა ვერცხლის მანეთიანები და ოცდაათი  
ცალი დაულაგა წინ. მერე უთხრა:

— აჰა, აი შენი ჯამაგირი, ალალი, გამრჯე კაცი ხარ  
და გეკუთვნის, ახლა თუ გინდა, ეს ფული აიღე და წადი, თუ  
გინდა, ერთ სიბრძნეს გასწავლი, როგორც პირობა გექონდა,  
და ფული ისევ მე დამრჩესო.

დაფიქრდა კაცი. რა ქნას, — სიბრძნეც უნდა და აღარც  
ფული ეთმობა. ბოლოს, ისევ ცოდნის სურვილმა დასძლია.  
ფული მალე გამითავდება, ცოდნა კი უღვეველი განძიაო,  
თქვა გულში და დათანხმდა, — მასწავლემო.

ბრძენმა ხელმწიფემ ფულები ისევ ზარდახშაში ჩაყარა და კაცს ეს სიბრძნე ასწავლა:

— ვინც რა უნდა გკითხოს, პასუხს მაშინვე ნუ მიახლი, კარგად დაფიქრდი, აწონ-დაწონე და მერე უპასუხეო.

კაცი დალონდა, ეს სომ აქამდეც ვიცოდით. — ეჰ, — თქვა გულში, ფულიც დავეკარგე და ვერც დიდი რამ საცოდარი შევიძინეო. ხელმწიფე მიუხვდა დალონების მიზეზს, მაგრამ არ შეიბრალა, — როდისმე გამოსცდის და თვითონ მიხვდებათ, თქვა გულში და მოჯამაგირეს გზა დაულოცა. მაგრამ კაცი წასვლას არ ჩქარობდა, ან როგორ დაბრუნებულყო შინ ხელცარიელი? ბევრი ფიქრის შემდეგ კიდევ ერთ წელიწადს დარჩენა გადაწყვიტა და ხელმწიფეს მოასხენა:

— ბრძენო ბატონო, რომ წავიდე, სად წავიდე, რა მიეუტანო ჩემს მშიერ ცოლ-შვილს, შენს დღეგრძელობას, ერთი წელი კიდევ მიმსახურე და მერე წავალო.

ბრძენი ხელმწიფე უყოყმანოდ დათანხმდა, მხოლოდ ის უთხრა, ჯამაგირს რას მოითხოვო?

კაცმა იფიქრა, მოდი, ცოტა მეტს ვეტყვი, იქნებ მომცეს და იმ გასული წლის ჯამაგირიც ავინაზღაუროთ, და ათი თუმანი მოსთხოვა.

— კარგი, შვილო, მოგცემ ათ თუმანს, — უთხრა ხელმწიფემ, — გამრჯე ბიჭი ხარ და გეკუთვნის. წლის ბოლოს უკლებლად დაგიტოვლი, ოღონდ კვლავ შენი ნებაა, გინდა ფული წაიღე, გინდა ერთ სიბრძნეს კიდევ გასწავლი და ფული მე დამრჩესო.

კაცი დათანხმდა და შეუდგა სამსახურის ასრულებას, ერთგულებით და მუყაითობით შარშანდელს ორმაგად გადააჭარბა. გავიდა წელიწადი, კაცი გახარებულია: ხუმრობა სომ არ არის, ცოლ-შვილს ათ თუმანს მიუტანს და სამუდამოდ მორჩებიან შიმშილსა და გაჭირვებას.

ბრძენმა ხელმწიფემ ჩვეულებრივ გახსნა ზარდახშა, დაუთვალა ათი თუმანი სულ ვერცხლის მანეთიანები და უთხრა:

— აი, შვილო, შენი ერთი წლის ჯამაგირი, თუ გინდა, აიღე და წადი, თუ არადა — ერთ სიბრძნეს გასწავლი და, როგორც პირობა გქონდა, ფული მე დამრჩესო.

ღარიბ კაცს მშიერ-ტიტველი ცოლ-შვილი ჭლანდებოდა და გაპრიალებული ვერცხლის მანეთიანებს სულწასულად დაჰყურებდა, მაგრამ ამჯერადაც სძლია ცდუნებას, ფულს ისევ ცოდნა ამჯობინა და ბრძენ ხელმწიფეს უთხრა:

— მასწავლე და ფული ისევ შენი იყოსო.

ხელმწიფემ ფულები ისევ ზარდახმაში ჩააბრუნა და თავის მოჯამაგირეს ასეთი დარიგება მისცა:

— რისი გაკეთების იმედიც არა გქონდეს, იმ საქმეს ხელს ნუ მოჰკიდებ და მიუწვდომელს ნუ წაეპოტინები, ჯერ საკუთარი ძალა და უნარი კარგად აწონ-დაწონე და საქმეს მერე შეუდექიო.

კაცმა ეს სიბრძნე კი ისწავლა, მაგრამ მშიერ-ტიტველ ცოლ-შვილს რა მიუტანოს? ეს რომ გაახსენდა, თვალებიდან ცხარე ცრემლი გადმოყარა. დგას დაღონებული, გულაჩირებული და აღარ იცის, რა გააკეთოს. ხელმწიფემ უყურა, უყურა და ბოლოს უთხრა:

— წადი შინ, რაღას ელოდებიო?

— რომ წავიდე, სად წავიდე. — უთხრა კაცმა, — როცა ჯიბეში საგზაოდ გროშიც არ მიგდია. მოდი, ბატონო, შენმა დღეგრძელობამ, ერთი წელიწადი კიდევ მიმსახურეო.

ხელმწიფეს ძალიან შეუყვარდა ეს კაცი ერთგული სამსახურისათვის და მაშინვე დათანხმდა, თან ანუგეშა:

— შენი ფული რომ ჩემთან რჩება, ამაზე არ იღარდო. სამაგიეროდ ისეთს რასმეს იძენ, რაც ფულს ათჯერ ჯობია. მართალია, ფულიც დიდი განძია, მაგრამ საქმე ის არის, რომ ფული ჯიბეში უნდა შეინახო, ჯიბიდან კი ან დაგეკარგება, ან მოგპარავს ვინმე, შეიძლება გზაში ყაჩაღები დაგესხნენ და ძალითაც წაგართვან, ცოდნა კი თავში იდება და ყოველმხრივ ხელშეუხებელიც არის, სიკვდილამდე არ გამოგელევა და ქონება-ცხოვრებასაც უფრო მეტს შეგძენსო. — ბოლოს ჰკითხა: — რას ითხოვ ამ მესამე წელიწადსო?

კაცმა იფიქრა, რაკი ასე მოსწონს ჩემი ერთგული სამსახური, იქნებ ჯამაგირი მომიმატოსო და კრძალვით და მორიდებით ოცდაათი თუმანი მოსთხოვა.

— კარგი, შვილო, მოგცემ ოცდაათ თუმანს, — უთხრა ხელმწიფემ.

— წელიწადს რომ შეასრულებ, დაგითვლი შენს ჯამაგირს და როგორც ჭკუა გაგიჭრის, ისე მოიქეცი. — თუნდა ფული წაიღე, თუნდა ერთ სიბრძნეს კიდევ გასწავლი და ფული ისევ მე დამრჩესო.

დადეს ასეთი პირობა და შეუდგა ღარიბი კაცი მესამე წელიწადს მოჯამაგირეობას. რაკი ჯამაგირი მოემატა, მუშაობასაც უმატა, დღედაღამ ჯარასავით ტრიალებს, არც ძილი იცის, არც — დასვენება და ორი დღის საქმეს ერთ დღეში ასწრებს.

გავიდა მესამე წელიწადიც. კაცი სიხარულით აღარ არის, მშიერ ცოლ-შვილს ოცდაათ თუმანს მიუტანს და ყველა ნაკლსა და გაჭირვებას სამუდამოდ დაავიწყებს. დაუძახა ბრძენმა ხელმწიფემ ბოლო დღეს, გახსნა ზარდახშა, დაუთვალა ოცდაათი თუმანი, დაულაგა წინ და უთხრა:

— აი, შვილო, შენი ერთი წლის ჯამაგირი, ახლა თუნდა ეს ფული წაიღე, თუნდა ერთ სიბრძნესაც გასწავლი და ფულს მე დავიტოვებო.

ბრჭყვიალა ფულის ყურებით კაცს ლამის თვალები გადმოსცივიდეს, აღარ იცის, რა ქნას, — აიღოს თუ დასთმოს. დგას და მეტიცმეტი დელვისაგან ხელები უკანკალებს. ხელმწიფემ კიდევ შეახსენა:

— ჰა, ნულა მაცდენ, ან ფული აიღე, ან სიბრძნეს გასწავლიო.

კაცმა ცოტახანს კიდევ იფიქრა და ბოლოს გადაწყვიტა, — მართალია, ფული ახლა ძალიან მიჭირს, მაგრამ იქნებ სიბრძნე უფრო სჯობდეს და ჩემს გაჭირვებულ ცოლ-შვილს ამ ცოდნით უფრო მეტი ვარგოთ, და ხელმწიფეს უთხრა:

— დამითმია ფული, ისევ სიბრძნე მირჩევნიაო.

ბრძენმა ხელმწიფემ დინჯად, აურჩქარებლად მოხვეტა ოქროს თუმნიანები, ჩაყარა ზარდახშაში და კაცს უთხრა:

— აი, შვილო, ჩემი სწავლა ამჯერად ეს იქნება, — რაც შენი თვალთ არ დაინახო, სხვის ნათქვამს ნუ დაიჯერებო.

კაცს ხელახლა მოჯამაგირედ დადგომა აღარ შეეძლო, ცოლ-შვილისათვის მიცემული პირობის ვადა — სამი წელი უკვე ამოიწურა, ცოლ-შვილს მკვდარი ეგონებოდა და უფრო დაღონდებოდნენ, რაღა უნდა ექნა? ადგა და როგორც მივიდა ამ ხელმწიფესთან, ისეთივე უქონელი და შიშველ-ტიტველი წამოვიდა, თან სულ ოხრავდა და თვალებიდან ცრემლი სდიოდა.

დაადგა ეს საწყალი კაცი თავისი სოფლისაკენ მომავალ გზას, მოდის მშიერ-ტიტველი და თვალცრემლიანი, ერთგან საჭმელს ითხოვს, სხვაგან — ძონძებს და თავი ასე გააქვს.

იარა ასე გაჭირვებით, იარა და ბოლოს ერთ სახელმწიფოში შევიდა. ამ ქვეყნის ხელმწიფეს ცოლად ჰყავდა ბაყაყი. ეს ბაყაყი სინამდვილეში მზეთუნახავი ქალი იყო, მაგრამ ჯადოთი იყო შეკრული და სანამ მის ქალობას ვინმე არ ამოიცივობდა, თავის ნამდვილ სახეს ვერ დაიბრუნებდა.

ბაყაყს ძალიან უნდოდა, ასეთი კაცი შესვედროდა, მაგრამ ვისაც კი დაიჭერდნენ ქალაქში უცხოს, მიიყვანდნენ და ბაყაყს აჩვენებდნენ, ყველა გაიძახოდა, — ბაყაყიაო. ამის თქმაზე მოსჭრიდნენ თავს და სასახლის ირგვლივ კაცის თავების გალავანს უმატებდნენ. ამ ხათაბალას ვერც ეს კაცი ასცდა. შევიდა თუ არა ქალაქში, მაშინვე ხელი სტაცეს და ხელმწიფის სასახლისაკენ გააქანეს. შეიყვანეს დიდ, მშვენიერ მორთულ დარბაზში, დააყენეს ბაყაყის პირდაპირ და ჰკითხეს:

— ეს რა არისო?

რა უნდა ექნა საწყალ კაცს, ერთი საზარელი ბაყაყი იყო და მეტი არაფერი, და ის იყო, უნდა ეთქვა, ბაყაყიაო, როცა უცბად ბრძენი ხელმწიფის ნასწავლები სიბრძნე გაახსენდა „სანამ კარგად არ დაფიქრდები, ისე არაფერი თქვაო“. მარტლაც, იფიქრა, ეს ბაყაყი რომ რაღაც სხვანაირი არ იყოს ასეთ თვალმარგალიტით მოჭედდელ სინზე არ დასვამდნენ დარც ასე მუდარის თვალით დამიწყებდა ყურებას, ჩანს, ა რაღაც სხვა ამბავია, თორემ ან ჩემი აქ მოყვანა რა არის, ა ეს კითხვაო. და ხელმწიფესა და ნაზირ-ვეზირებს მიახსენა:

— მინდა გიპასუხოთ თქვენს კითხვაზე, მაგრამ ისეთი სიტყვა ვერ მომიგონია, რომ ამისი შესადარი იყოს და რაცა აქვს, ის მშვენიერება გამოცხატო.

ამის თქმაზე ბაყაყი თითქოს გამოცოცხლდა, დაღონებულ თვალებში სიხარული ჩაუდგა, ზეზე წამოიწია და თავი კეკლუცად შეარხია. კაცმა შეატყო, რომ ბაყაყს მისი ნათქვამი ესიამოვნა, ხელმწიფისაკენ შებრუნდა და უფრო გაბედულად განაგრძო:

— დიდებულო ხელმწიფე, მართალია, დიდი და ძლიერი ხელმწიფე ბრძანდებით, მაგრამ თქვენ რომ მშვენიერი, სიტყვით უთქმელი, კალმით აუწერელი, ერთი სიტყვით, ფასდაუდებელი, მზისა და ხმელეთის დარი არსება გყავთ, უფრო ბედნიერი ბრძანდებითი ბევრ მეფესა და ხელმწიფეს ენატრებათ ამისთანა მშვენიერი არსება, მაგრამ ღმერთს მარტო თქვენთვის გაუმეტებია და თავისი უხვი კალთა მარტო თქვენზე დაუბერტყიაო.

ბაყაყმა ეს ქება-დიდება რომ მოისმინა, მეტისმეტი სიხარულისაგან ოქროს სინზე ხტუნვა-თამაში დაიწყო, ხელმწიფემ და იქ დამსწრე ხალხმაც დიდად გაიხარეს. ბოლოს ბაყაყმა გადაიძრო ბაყაყის ტყავი და გამოვიდა მშვენიერი, ქვეყნის მანათობელი ქალწული, გადაეხვია ჯერ ხელმწიფეს, მერე ამ საწყალ კაცს და დაუწყო კოცნა.

შენ კი გაიხარე, რომ მეცა და ჩემმა ქმარმაც პირველად შენგან გავიგონეთ ჩემი ქება, ეტყობა, ღმერთს ჰყვარებიხარ და შენთვის სიკეთე სდომებია, თორემ სიკვდილს ვერ ასცდებოდი და მეც ისევ ბაყაყად უნდა დავრჩენილიყავი. ახლა კი შენც გადაარჩი და მეც მომარჩინე ამდენ ჭირსა და მწუხარებასო.

ხელმწიფემ და დედოფალმა იმავე დღეს დიდი ნადიმი გამართეს, კაცს კონკ-მანკები გახადეს, მდიდრული ტანსაცმლით მორთეს, მერე სუფრაზე შუაში ჩაისვეს და, რა გინდა სულღო და გულო, რომ იმას არ მიაართვეს. სამ დღე-ღამეს ხელმწიფურად აქეიფეს, ხოლო როცა ნადიმი დამთავრდა, სამუდამოდ სასახლეში დარჩენა სთხოვეს და მემკვიდრეობაც უბოძეს, მაგრამ კაცი სიმდიდრეს და ხელმწიფის მემკვიდრეობას არ დახარბდა და მეფურ განცხრომას თავის და-

რიბ ცოლ-შვილთან ყოფნა ამჯობინა. ხელმწიფეს და დედოფალს მდაბლად თავი დაუკრა და მოახსენა:

— დიდო ხელმწიფევე და დედოფალო, მე ერთი ღარიბ-ღატაკი ოჯახის პატრონი კაცი ვარ, სამი წელიწადია საშოვარზე ვარ სასლიდან გამოსული და ჩემი ოჯახისა აღარაფერი მსმენია. ახლაც რომ არ მივიდე, მკვდარი ვეგონები და უარესად დაღონდებიან. ძალიან გთხოვთ, უარს კადნიერებაში ნუ ჩამომართმევთ, მაგრამ რა ვქნა, უიმათოდ სიცოცხლე არც მე მიხარიაო. ხელმწიფემ და დედოფალმა იმდენი სიმდიდრე უბოძეს, რომ ჩამოთვლაც კი ძნელია: მოარეივნეს ასი ჯორ-აქლემი და სულ თვალ-მარგალიტი აუკიდეს, ცოლ-შვილისათვისაც მდიდრული ტანსაცმელი შეუკერეს, გაატანეს შეიარაღებული მცველები, ხელზე მოსამსახურეები და გაისტუმრეს.

მიდის შინისაკენ ეს სიღარიბისაგან დამწვარ-დადაგული კაცი, მიერეკება თვალ-მარგალიტით დატვირთულ ქარავანს და გულში სულ ბრძენ ხელმწიფეს ლოცავს, სადაც ადგილი მოეწონება, ცხენიდან ჩამოხდება და დასვენებას ბრძანებს. მოსამსახურეები მაშინვე თვალ-მარგალიტით მორთულ სუფრას გაუშლიან და ზედ ხელმწიფურ სასმელ-საჭმელს დაულაგებენ. ისადილებს გემრიელად და ჩრდილში ხავერდის მუთაქებით გაწყობილ ხალიჩაზე წამოწვება. მცველები და მოსამსახურეები ქონება-ცხოვრებას დარაჯობენ. თვითონ კი თავის ცოლ-შვილზე ფიქრობს, წარმოიდგენს, როგორ გაახარებს ამდენ სიმდიდრეს რომ მიუტანს, და გული თვითონაც სიხარულით უცემს.

ერთხელაც ასე დაისვენა ერთ ტყის პირას, ისადილა და ის იყო, ხის ძირას, ხალიჩაზე წამოწვა, რომ გზაზე ერთი მდიდარი სოვდაგარი დაინახა. სოვდაგარს სხვა ქვეყანაში ევაჭრა, აურაცხელი სიმდიდრე მოეგროვებინა და ახლა თავისი ქვეყნისაკენ მიდიოდა.

— გამარჯობა!

— გაგიმარჯოს!

— შეიძლება, შენს მეზობლად დავბინავდეთ?

— კი, ბატონო, ინებეთ, — მიუგო კაცმა, — ადგილს რომ გორ დაგიჭერო.



სოვდაგარმა ჩამოახდევინა ჯორ-აქლემებისათვის თავისი სავაჭრო და მონაგარი, მიაბინავ-მოაბინავა ყველაფერი და კაცს გვერდით ჩამოუჯდა. კაცმა და სოვდაგარმა გაიცნეს ერთმანეთი და, როგორც ახლადგაცნობილებს სჩვევიათ, ერთმანეთში საუბარი გააბეს.

უცბად იმ ხის ტოტზე, რომლის ჩრდილშიც იხსდნენ, ერთი უცნაური, ჭრელი ჩიტი ჩამოუჯდა და ისეთ საამო ხმაზე აჭიკჭიკდა, რომ ქვაც კი მოიხიბლებოდა.

კაცი და სოვდაგარი კარგა ხანს სულგანაბულნი უსმენდნენ, მერე სოვდაგარს სულმა წასძლია და კაცს უთხრა:

— კარგი არ იქნება, დავიჭიროთ და თან წავიყვანოთო?

— კარგი კი იქნება, მაგრამ როგორ დავიჭიროთო? — ჰკითხა კაცმა.

— მოდი, და ნაძლევი დავდოთ, — უთხრა სოვდაგარმა, — ორივემ ვცადოთ და რომელიც დავიჭერთ, ჩვენი ორივეს ქონება თავისი ჯორ-აქლემებითა და მოსამსახურეებით იმას დარჩესო.

კაცს სოვდაგარის ნათქვამი ჭკუაში დაუჯდა, და ის იყო, თანხმობა უნდა მიეცა, რომ უცბად ბრძენი ხელმწიფის ნათქვამი სიტყვები მოაგონდა: „შენი ძალა წინასწარვე აწონდა-წონე და, რასაც ვერ შესწვდები, ნუ წაეპოტინებიო“. ამის მოგონება და უარის თქმა ერთი იყო, — არა, მე ვერ დავიჭერო.

— მაშინ მე დავიჭერ და შენი ქონება მომეცო, — უთხრა სოვდაგარმა.

— მოგცემ თუ დაიჭერ, მაგრამ რომ ვერც შენ დაიჭიროო? — ჰკითხა კაცმა.

— ვერ დავიჭერ და პირობას წინ რა უდგას, ჩემს ქონებას სულ შენ მოგცემო.

კაცი დაფიქრდა, — ვაითუ მართლა დაიჭიროს და ამდენ სიმდიდრეზე ხელი ამალებინოსო, მაგრამ ბოლოს გადაწყვიტა, თუ ჩემი იღბალია, რაც ხელმწიფემ და დედოფალმა მიბოძეს, შემრჩება, თუ არადა, თვითონაც არ მინდაო, და დათანხმდა.

დაუძახეს სოვდაგარმა და კაცმა თავთავიანთ მხლებლებს და პირობის წიგნი დაწერინეს. მშვენიერი ჩიტი კი ზის თავისთვის ხის ტოტზე, შლის ოქროსფერ ფრთებს და ჭიკჭიკებს. ადგა სოვდაგარი, ნელა მიეპარა ჩიტს და დაუპირა ხელის წაღება, ჩიტმა თვალი შეასწრო და ზედა ტოტზე გადაინაცვლა. სოვდაგარიც აცოცდა ხეზე, მაგრამ ხელმისაწვდენზე რომ მიუახლოვდა, ჩიტი კვლავ აფრინდა და უფრო მაღლა ტოტზე შემოჯდა.

ასე ავიდნენ კენწერომდე. ბოლოს ხეს გადასანაცვლებელი ტოტი რომ აღარ შერჩა, ჩიტმა გაშალა ფრთები და გაფრინდა, ვინ იცის, საით. სოვდაგარი ჩამოვიდა ხიდან წელმოწყვეტილი და, პირობის თანახმად, მთელი სიმდიდრე კაცს გადაულოცა. კაცმა სოვდაგარისთვის მოგებული ქონებაც თავისას მიუმატა და გამოსწია სახლისაკენ ორმაგად გახარებულმა.

აი, უკვე მიატანა თავის სოფელსაც, სულ ერთი დღის სავალისა დარჩა. კაცს სიხარული ემატება და ერთი სული აქვს, როდის მიადგება თავის ღარიბ ცოლ-შვილს, მიდის და მიდილინებს. უცბად გზაში თავისი მეზობელი შემოხვდა. მეზობელმა, რა თქმა უნდა, ვერ იცნო, კაცმა კი მაშინვე იცნო და გახარებულმა დაუძახა:

— სად მიხვალ ბიჭო, მოდი ერთი ახლოს და დამენახეო!

მეზობელი შეკრთა, — რად მეძახის ეს ხელმწიფის ტოლი კაცი, დანაშაული ხომ არაფერი მიმიძღვისო და კრძალვით მიუახლოვდა.

— ვერ მიცანიო? — ჰკითხა კაცმა.

— ვერა, ვერ გიცანიო.

— ბიჭო, მე ხომ შენი ღარიბი მეზობელი ვარ, არ გახსოვს, შენთვის რამდენჯერ კუტი პურები მითხოვია, მერე საშოვარზე წავედი, სამი წელიწადი უცხო ქვეყანაში გაატარე და აი, ახლა ვბრუნდებიო.

ახლა კი იცნო მეზობელმა, მაგრამ კიდევ დიდხანს ხმა არ ამოუღია, ამდენ ქონებას რომ ხედავს, გაოგნებულია და თვალებს არ უჯერებს. ბოლოს ჰკითხა:

— ბიჭო, მაშე შენა ხარო?

- სწორედ რომ მე ვარო!
- ეს ამოდენა სიმდიდრე ვილასიაო?
- ჩემია, ვისი იქნებაო.
- სად იშოვე, კაცო, როგორო?
- მოდი ერთი, დავსხდეთ, პური გავტეხოთ და მაგასაც

გეტყვიო.

გააშლევინა კაცმა მსახურებს მდიდრული სუფრა, მეზობელი გვერდით მოისვა და მთელი თავგადასავალი დაწვრილებით უამბო. ბოლოს ჰკითხა:

— რასა იქს ჩემი საცოდავი ცოლ-შვილი, როგორ არიანო?

მეზობელს შური წაეკიდა, ეს ღარიბ-ღატაკი კაცი ასე გამდიდრებული რომ დაინახა, და გულში მისი წყენა გადაწყვიტა.

— ეჰ, ძმაო, შენი ცოლ-შვილისას ნულარას მკითხავ, — უთხრა ვითომ დიდი გულისტკივილით, — სადღა არის შენი ცოლ-შვილი, შენ რომ წახვედი, იმავე წელს შემშლილთ ამოწყდნენ. აღარც შენი ქოხია, ახლა იმის ადგილას მყრალი გუბე დგას და შიგ ბაყაყები ყიყინებენო.

შემოიკრა კაცმა თავში ხელი და მორთო ხმამაღლა ტირილი. ბევრი იტირა, მოიოხა გული და ბოლოს თქვა:

— აბა, რაღად მინდა, რომ შინ მივიდე, ცოლ-შვილი იქ აღარ დამხედება და სირცხვილით ან ხალხს როგორ ვეჩვენო, — თვითონ გამდიდრებულა და ოჯახი კი შემშლილთ ამოწყვიტაო. ჯობია ისევ უკან გავბრუნდე და ისეთ ადგილას გადავიკარგო, სადაც ჩემი ვინაობა ყვავსა და ყორანსაც არ ეცოდინებაო. — და ის იყო, უნდა ებრძანებინა მსახურებისათვის, აჰკიდეთ ბარგი ჯორ-აქლემებს და ისევ უკან წავიდეთო, რომ უცბად ბრძენი ხელმწიფის ნათქვამი მოაგონდა: „რაც შენი თვალთ არ ნახო, სხვის ნათქვამს ნუ დაიჯერებო“, — და გულში ისევ იმედი ჩაესახა. საჩქაროდ აშალა მსახურები, გამოუძღვა ქარავანს და გამოსწია თავისი სოფლისაკენ.

აგე ქოხი, აგე, საჩხეში დაკონკილი ცოლ-შვილიც! კაცმა ხელები გაშალა და სირბილით წავიდა თავისი ცოლ-შვილის

შესახვედრად, ცოლმა და შვილებმაც შორიდანვე იცნეს და ისინიც ხელგაშლილნი გამოეგებნენ, გადაეხვივნენ სამი წლის უნასავ ქმარს და მამას, კოცნიან, ეფერებიან, ეხვევიან...

კაცმა იმავე დღეს მოიწვია კალატოზები და ქოხის ადგილზე მშვენიერი სასახლე წამოაჭიმვინა, შეაზიდვინა შიგ მთელი ქონება, თქრო-ვერცხლი, თვალ-მარგალიტი და დაიწყო იმ დღიდან ბედნიერი და ტკბილი ცხოვრება.

ჭირი — იქა, ლხინი — აქა,

ქატო — იქა, ფქვილი — აქა.









## მ ე რ ო ნ გ უ რ ე

იყო და არა იყო რა, ღვთის უკეთესი რა იქნებოდა, იყო ერთი ძლევამოსილი ხელმწიფე და ჰყავდა ერთი მზეთუნახავი ქალი. ქალს გათხოვების დრო რომ მოუვიდა, მამამ გამოაცხადა, ჩემს მზეთუნახავს იმას მივათხოვებ, ვინც უკვდავების ვაშლს მომიტანსო. მიდიოდნენ მთხოვნელები უკვდავების ვაშლის მოსატანად, მაგრამ უკან აღარავინ ბრუნდებოდა.

იმ სახელმწიფოში ერთი სახელგანთქმული მეჩონგურე ცხოვრობდა. ხელმწიფის მზეთუნახავი ასული იმასაც გულში ჩავარდნოდა, მაგრამ თხოვნას ვერ ბედავდა, — უბრალო მეჩონგურეს ხელმწიფე ქალს არ მომცემსო, ბოლოს, როგორც იქნა, გაბედა, წავიდა ხელმწიფესთან და თავისი სურვილი გაუმჟღავნა. ხელმწიფე ჯერ განრისხდა, ამ გლახამ ქალის თხოვნა როგორ გამიბედაო, და თავის მოკვეთა განიზრახა, მაგრამ მერე გადაიფიქრა, — ამისი ცოდო მე რად დავიდოო, სულერთია უკვდავების ვაშლის მცველი გველუშაპი შეჭამსო, და სხვების მსგავსად, ისიც უკვდავების ვაშლის მოსატანად გაგზავნა.

მეჩონგურემ აიღო თავისი ჩონგური და გაუდგა გზას. ბევრი იარა, თუ ცოტა, ცხრა მთა გადაიარა, ცხრა მინდორი გადალახა და მიადგა ერთი სალი კლდის გალავანს. ეს გალავანი სწორედ უკვდავების ვაშლის ბაღს ერტყა გარშემო და ისეთი მაღალი იყო, რომ ქორიც ვერ გადაფრინდებოდა.

შემოუარა მეჩონგურემ გალავანს ირგვლივ, მაგრამ კარი

ვერსად უპოვა. ბოლოს გალავნის ძირას ჩამოჯდა, ჩონგური დაუკრა და ზედ ტკბილი სიმღერა დაამღერა. სიმღერის ხნაზე მთელი მთა-ბარი სმენად იქცა, ხეებმა ფოთლის შარი-შური შეწყვიტეს და ტოტები დაბლა დახარეს, ტყიდან მხეცნი გამოვიდნენ, ციდან — ფრინველნი, წყარონი გაჩერდნენ და ყველა სიმღერის ჯადოსნური ჰანგით ტკბებოდა. სიმღერამ ბოლოს ქვის ყრუ კედელსაც სიცოცხლე მიანიჭა, — ერთ ადგილას თავისით გადაიხსნა და მეჩონგურეს უკვდავების ვაშლისაკენ გზა მისცა.

შევიდა მეჩონგურე გალავანში და გაჰყვა ვარდ-ყვავილე-ბით მოფენილ გზას. ბალის მცველმა პირცეცხლიანმა გველეშაპმა ადამიანის სუნი იყნოსა, დაალო პირი და შესაჭმელად გამოქანდა. მეჩონგურეს წასასვლელი აღარსაითა აქვს, ხედავს, თავდება იმისი სიცოცხლე და მზეთუნახავის სიყვარულიც და თავისი თავიც ოხრად რჩება. ბოლოს გულში თქვა, — მოდი, სიკვდილის წინ ერთხელ კიდევ დაუკრავ ჩემს ჩონგურს, ერთხელ კიდევ დავამღერებ და მერე რაც მომივა, მომივიდელო. ჩამოჰკრა ჩონგურს და ზედ სიმღერაც დააყოლა. ისევ დაიხარა ხეები, დადუმდნენ წყარონი და ნადირ-ფრინველიც ისევ შეიკრიბა. უცბად პირდაღებული გველეშაპიც შედგა, აწეული ყბა ძირს დაუშვა, ნელ-ნელა თავიც ჩამოიღო და ჩასისხლიანებული თვალებიდან ცრემლები ჩამოსცვივდა.

მეჩონგურემ დაასრულა სიმღერა, უკანასკნელად შეათრთოლა ჩონგურის ლარი და დაჩუმდა. დადგა გველეშაპის წინ თავდახრილი და ბედისწერას მორჩილად დაელოდა. გველეშაპმა თვალები გაახილა და მეჩონგურეს დანდობილად შეხედა, მერე შემობრუნდა, მოწყვიტა უკვდავების ვაშლი და გაუწოდა. მეჩონგურე გველეშაპისაგან ამას არ მოელოდა და შეკრთა. გველეშაპმა შიში შეამჩნია და უთხრა:

— ნუ გეშინია, მე შენ აღარას გერჩი. ჩემს სიცოცხლეში ასეთი ხმა არ მსმენია და არც ასე ძლიერად დავმტკბარვარ. აჰა, წაილე ეს ვაშლი და ეწიე გულის საწადელს. დღეის შემდეგ კაცთა მოდგმას აღარაფერს დაუშავებო.

გამოართვა მეჩონგურემ უკვდავების ვაშლი და გახარე-



ბული ხელმწიფის სახლამდე სულ სირბილით მივიდა. მიუ-  
ტანა ხელმწიფეს უკვდავების ვაშლი და უთხრა:

— დიდო ხელმწიფე, მე ჩემი მოვალეობა ავასრულე და  
ახლა თქვენ იცითო.

— ხელმწიფე, რა თქმა უნდა პირს ვერ გადავიდოდა, გა-  
მოიყვანა თავისი მზეთუნახავი ქალი და მეჩონგურეს ჩააბა-  
რა. ქორწილიც თვითონვე გადაუხადა და ახალი სიძე სასახ-  
ლის მოსაკრავეთა უფროსად დანიშნა.

ჭირი — იქა, ლხინი — აქა,  
ქატო — იქა, ფქვილი — აქა.





## რა უფრო საკვირველია

ზღაპარ იყო, ზღაპარ იყო,  
ღობეს ჩიტი მომკვდარიყო,  
დიდ ქვაბში არ ეტეოდა,  
პატარაში ლაღე იყო.

ცხრა ძმა დევი სუფრას შემოსხდომოდნენ, წინ თითოს თითო მოხარული კამეჩი ედო და ორთქლიან ხორცს ხარბად ღმურძლიდნენ, თან იმის ფიქრში იყვნენ, რომ გავათავებთ, რაღა ვჭამოთო.

ამ დროს ერთმა პატარა ბიჭმა გამოიარა. დევებს გაუსარდა, აი ესეც დასაყოლებელიო, და ბიჭს ხელი სტაცეს. ბიჭი მიხვდა, რა განსაცდელშიც ჩავარდა, და ელდა ეცა. მაგრამ არ დაიბნა, შიში მყისვე დასძლია და თავის გადარჩენის ხერხი მოიგონა.

— მე თქვენთან შემთხვევით არ მოვსულვარ, — უთხრა ბიჭმა, — სოფელს ერთი თავსატეხი კითხვა გაუჩნდა, მაგრამ პასუხი ვერაფერს ვიპოვე, ბოლოს მე დამავეალეს, წადი. ვინმე ჭკვიანი და ბრძენი ხალხი ნახე და გამოჰკითხეო. ამ არემარეში თქვენზე ჭკვიანი და დარბაისელი სხვა არავინ მეგულება, ჰოდა, აი, მოვედი, რომ სიტყვა გითხრათ და პასუხიც თქვენგან მოვისმინო.

— თქვი, გისმენთო, — უთხრეს დევებმა.

ბიჭმა დაიწყო:

— მამაჩემს ერთი ისეთი ბულა ჰყავდა, რომ შვიდ გორა-

ზე ბუზებს კუდით იგერიებდა, ერთ დღეს ბულა ეზოში ბალახსა ძოვდა, მოულოდნელად ერთი ვეებერთელა არწივი მოფრინდა, დასწვდა კლანჭებით ბულას და ჰაერში აიტაცა.

სოფლის ბოლოს ერთი თხა ება, არწივმა მიიტანა ბულა, იმ თხის რქებზეა ჩამოდო და ძიძგვნა დაუწყო. ერთ იჯრაზე სორცი მთლიანად გაათავა და ძვლების სვრას შეუდგა. უცაბედად გამოსრული ბეჭი გადმოვარდა და თხას თვალში ჩაუვარდა, თხამ ერთი ალიაქოთი ატეხა, თვალი მეწვისო. შეიყარა მთელი სოფელი, ბეჭს ორმოცი უღელი ხარ-კამეჩი დაუბეს და ძლივს ამოუღეს.

გავიდა დრო-ჟამი, ბეჭს მიწა და ხავსი მოეკიდა, ზედ ხეები ამოვიდა, გაჩნდა კორდები და წყაროები და სოფელი გაშენდა. ამას წინათ ერთი მშიერი მელა მოცუნცულდა, გამოჰკრა კბილი ბეჭს და ის სოფელი მთლიანად გაანადგურა.

სოფელმა მელა ორლობეში მოიმწყვდია და ქვით ჩაქოლა, მაგრამ ორლობე გადაიკეტა და ხალხს წასასვლელა აღარსაითკენ დარჩა. შეიყარა მთელი სოფელი, მორეკეს რაც კი ხარ-კამეჩი ჰყავდათ, მაგრამ მელას ადგილიდან ძვრა ვეღარ უყვეს. მაშინ მიჰყვეს ხელი, ცალ გვერდზე ტყავი გახადეს, და ქუდები შეიკერეს. იმდენი ქუდი გამოვიდა იმ ნახევარი ტყავიდან, რომ სოფელში უქუდოდ ძუძუთა ბავშვიც აღარ დარჩა.

გუშინ ორლობეზე ერთმა დედაბერმა ჩამოიარა, დედაბერს ხელში თითისტარი ეჭირა და ფთილებს ართავდა. მელა რომ გვერდგამოტყავებული ნახა, ძალიან გაუკვირდა, ეს ნახევარი ტყავი რაღად შეუტოვებიათო? ამოჰკრა თითისტარი და მელა მეორე გვერდზე გადააბრუნა. მერე მისდგა, ფრჩხილებით ააძრო ტყავი და თავის ძუძუთა შვილიშვილს ფაჩუნები შეუკერა.

ახლა სოფელმა სწორედ ამიტომ გამომგზავნა, რომ გავიგო, ამ ამბავში რა უფრო საკვირველია. და თქვენთანაც სწორედ ამიტომ მოვედი, რომ მითხრათ და სოფელს პასუხი მივუტანო.


შექმნათ დევებს ცილობა, — არა ეს უფრო საკვირვე-

ლია, არა ესაო. ამ ცილობა-ცილობაში ბოლოს ისე გაცხარდნენ, რომ დაერივნენ ერთმანეთს და ცემა-ტყეპა აუტყეს. ბიჭმა ამით ისარგებლა და ისე მოკურცხლა, რომ უკან ერთხელაც აღარ მოუხედაია.

დევები კი დღესაც იმ დავიდარაბაში არიან, სცემენ ერთმანეთს, ამტვრევენ ცხვირ-პირს, მაგრამ ჯერაც ვერ გამოუცნიათ, ბიჭის ნათქვამში რა უფრო საკვირველია.

ჭირი — იქა, ლხინი — აქა,  
ქატო — იქა, ფქვილი — აქა.





## ბედისწერის კალა

იყო და არა იყო რა, ღვთის უკეთესი რა იქნებოდა, იყო ზაზვი მგალობელი, ღმერთი ჩვენი მწყალობელი, იყო ერთი სელმწიფე და ჰყავდა ერთი ვაჟიშვილი, ისეთი გულადი და თვალ-ტანადი, რომ იმისთანა ვაჟკაცი ქვეყანაზე მეორე არ მოიძებნებოდა. ბიჭი დასაქორწილებელი რომ გახდა, ხელმწიფემ დაიბარა და უთხრა:

— წადი, შვილო, ქვეყანა მოიარე და რომელი ქალიც მოგეწონოს, ცოლად ის მოიყვანეო.

ბიჭმა დაუჯერა მამას და წავიდა. იარა ბევრი, მთელი დედამიწა შემოიარა და ბევრი ქალიც გასინჯა, მაგრამ საცოლედ არც ერთი არ მოეწონა. დაბრუნდა შინ ხელცარიელი და მამას შესჩივლა:

— ზღვა და ხმელი მოვიარე, დედამიწის ყველა კუთხე-კუნჭული მოვიხსრიკე, მაგრამ ჩემი გუნების ქალს ვერსად წავაწყდიო.

მამის მამამ ურჩია:

— რაკი სხვა საშველი არ არის, შეკაზმე შენი მფრინავი რაში, წადი ბედისმწერლებთან და ჰკითხეო.

ბიჭმა ახლაც დაუჯერა მამას, შეკაზმა მფრინავი რაში და გაფრინდა აღმოსავლეთისაკენ. გადაიარა ცეცხლის მთა, ყინულის მთა და ბოლოს მივიდა ბედისმწერლების ადგილსამყოფელში. კარებში ერთი თეთრწვერა ბერიკაცი დახვდა და იმან ჰკითხა:

— ზა გინდა, ჭაბუკო, რისთვის მოსულსარო?

ეს ბერიკაცი თვითონ იყო ბედისმწერელი.

ხელმწიფის შვილმა უთხრა, ვინც იყო და რისთვისაც იყო მისული. ბერიკაცმა ბედისწერის ოქროსყდიანი წიგნა გადაშალა და ბიჭს უთხრა:

— შენ ბედზე ამა და ამ სოფლის მენახირის ქალი ყოფილა დაწერილი და ის უნდა მოიყვანო.

ბიჭს ლამის გულს შემოეყარა, — ამდენი დიდგვაროვანი და მდიდარი საცოლუ დავიწუნე და მენახირის გომბიო როგორ შევირთო — მოეხვია ბერიკაცს მუსხლებზე და შეესვენა:

— მიყავი სიკეთე და სხვა ვინმე დამიწერე, ხელმწიფის შვილი ვარ და მენახირის ქალი რა ჩემი საკადრისიაო.

ბერიკაცმა წყრომით უთხრა:

— არ შეიძლება ბედი მხოლოდ ერთხელ იწერება და, რაც გერგო, უნდა დამორჩილდეო.

გაჯავრდა ხელმწიფის შვილი და თქვა:

— სულერთია, მენახირის ქალს არ შევირთავ, ახლავე წავალ, მოვკლავ და არც მაშინ ჩამომეხსნებაო? — შეჯდა საჩქაროდ თავის მფრინავ რაშზე და ისე გამობრუნდა, რომ ბერიკაცს არც კი გამომშვიდობებია. გადმოლახა ისე ცეცხლის მთა, ყინულის მთა და პირდაპირ იმ მენახირეს მიაღგაკარზე. გამოვიდა ჩამოკონკილ-ჩამოძენძილი მენახირე, მიესალმა და ჰკითხა:

— რას მიბრძანებთ, ხელმწიფის შვილო, რით გემსახუროო?

— შენი ქალი უნდა შევირთო ცოლად და სათხოვნელად მოვედიო, — მიუგო ხელმწიფის შვილმა.

მენახირე შეცბუნდა:

— ჩემი ქალი ჯერ ხომ სულ ბავშვია, და ეგეც რომ არ იყოს, მენახირის შვილი რა შენი საკადრისიაო?!

— არა, უნდა შევირთო, — დაიჟინა ხელმწიფის შვილმა, — ჩემი ბედი ეგ ყოფილა და ბედს კი ვერსად წავუვალო.

რაღა უნდა ექნა მენახირეს. ხელმწიფის შვილს ძალით ხომ ვერ გააგდებდა, შეიყვანა შინ და თავისი შვიდი-რვა წლის გოგო აჩვენა, — აი, ეს არის ჩემი ქალიშვილი და,

ხომ ხედავთ, ან რა გათხოვების დრო აქვს და ან რა შენი შესაფერისიაო.

— რაც არის, ეს არისო, — თქვა ხელმწიფის შვილმა და სუფრა მოითხოვა.

მოუტანეს მენახირემ და იმის ცოლმა, რაც კი რამ ეშაებედათ და ხელმწიფის შვილს სუფრა გაუშალეს, ავახშმეს და დააძინეს. შუალამე რომ მოვიდა, ხელმწიფის შვილი ჩუმად წამოდგა, ჩასცა ხანჯალი ძონძებში გახვეულ, მძინარე გოგოს, მოახტა რაშს და ღამის სიბნელეს შეერია.

დაჭრილმა გოგომ კივილი მორთო, — მიშველეთო! — წამოცვივდნენ დედ-მამა, აანთეს ჭრაქი და რას ხედავენ: ბავშვი სისხლში ცურავს და ხელმწიფის შვილი კი აღარსად არის. შეაბა მამამ საჩქაროდ ურემი, დააწვინა სულთმობრძავი ბავშვი და ქალაქში ექიმთან წაიყვანა.

შეხვდა ქალაქის მოურავი და ჰკითხა:

— სად მიგყავს ეგ ბავშვი, რა გაგჭირვებიაო?

მენახირემ უამბო, როგორც იყო საქმე. ქალაქის მოურავი უშვილო იყო და მენახირეს უთხრა:

— მე მოვარჩენ ამ ბავშვს, თუ მომცემო.

— ოღონდ ნუ დაილუპება, გადარჩეს და დამითმიაო, — მიუგო მენახირემ.

დაუტოვა დაჭრილი ქალიშვილი და შინ წავიდა.

ქალაქის მოურავმა იმავე დღეს მოიხმო საუკეთესო ექიმები, გოგონა სიკვდილს გადაარჩინა და დაუწყო ზრდა. დაუქირავა გამორჩენილი მასწავლებლები, ასწავლა წერა-კითხვა, ზრდილობა და დიდგვაროვანთა შესაფერი საქციელი და სიტყვა-პასუხი. გოგონა გაიზარდა და ჭკუა-გონებითაც ისეთი ქალი დადგა, რომ ქალაქში იმისთანა არავინ დადიოდა. ქალაქის მოურავი, რა თქმა უნდა, ტანსაცმელსაც შესაფერისს აცმევდა და სულ ძვირფასი სამკაულებით მორთული დაჰყავდა.

შორს გავარდა ამ ქალის სილამაზის ხმა და ბოლოს ხელმწიფის შვილის ყურამდეც მიაღწია. ხელმწიფის შვილმა იფიქრა, მოდი ვნახავ, რა არის ასეთი, იქნებ ჩემი შესაფერი იყოსო.

შეკაზმა ცხენი და წავიდა ქალაქში. ერთ წყაროზე ცხენს

წყალი დააღვინა და თვითონაც იქვე ჩამოჯდა, იმ იმედით, ექნება ვინმე მოვიდეს და იმ ნაქები ქალის სახლი მიმასწავლოსო.


მაგრამ დახეთ ბედისწერას! ქალი თვითონვე მივიდა წყაროზე და წყალი დალია. შეხედა ხელმწიფის შვილმა და მოეწონა, ქალსაც მოეწონა და ერთმანეთს გაეცვენენ. ხელმწიფის შვილმა რაკი თავისი გუნების ქალი იპოვა, ბევრი აღარ დააყოვნა და წადილი იქვე გაუმეღავენა. ქალიც უყოყმანოდ დათანხმდა.

ბევრი რომ არ გავაგრძელოთ, ხელმწიფის შვილმა იმავე დღეს წამოიყვანა ქალი შინ, დაიწერა ჯვარი და დიდი ქორწილიც გადაიხადა. ღამე, დასაწოლად რომ ემზადებოდნენ, ხელმწიფის შვილმა ქალს მუცელზე ნაჭრილობევი შენიშნა და ჰკითხა, — ეს რა არისო?

ქალმა ყველაფერი უამბო. ხელმწიფის შვილი განცვიფრდა და ხმამაღლა წამოიძახა:

— აი, რა ძალა ჰქონია ბედისწერასო!

ჭირი — იქა, ლხინი — აქა,  
ქატო — იქა, ფქვილი — აქა.







## შეშა-ქალა

იყო და არა იყო რა, ღვთის უკეთესი რა იქნებოდა, იყო ერთი უშვილო ცოლ-ქმარი, სიბერეში შევიდნენ და შვილი კი არ ეღირსათ. წუხდნენ ორივენი, მაგრამ წუხილით რას უშველიდნენ.

ერთხელ ბეჭიკაცი ტყეში წავიდა შეშის მოსაჭრელად, მივიდა ერთ ხესთან და დაუწყო ჭრა. უცებ ხიდან რაღაც ხმა მოესმა. გაჩერდა კაცი და მიაყურადა. ხმა შეწყდა. კაცმა ისევ მოიქნია ცული, შემოჰკრა ხეს და ისევ მოესმა ხმა, თითქოს ვიღაცა კენესოდა.

— ბქ რაღაც ამბავიაო, — თქვა კაცმა, შემოუარა ხეს ირგვლივ, ხე ერთ ადგილზე ფუტუროს გამოედრუტნა, ჩაისედა კაცმა შიგ და ერთი პაწაწინა ქალი დაინახა. ამოიყვანა კაცმა ფულუროდან ბავშვი, გამოიხვია ჩოხის კალთაში და განხარებულმა ცოლს მოურბენინა, — შეიღს ვნატრობდით და აი, შეგვეძინაო.

დედაკაცმა ღმერთს სანთელი აუნთო და მადლობა შესწირა. შეახვიეს ბავშვი სუფთა ჩვრებში, გაუკეთეს აკვანი და დაუწყეს ზრდა. სახელად შეშა-ქალა დაარქვეს.

ახლა წუხს ცოლ-ქმარი, ბავშვი ვის მოვანათვლინოთო, უცბად სარკმელში მთვარემ შემოანათა და უთხრა:

— მე მოვნათლავ თქვენს ქალიშვილს, ჩემს სიბადრეს დავანათლავ და ჩემსავით პირბადრი და ლამაზი იქნებაო, ცოლ-ქმარი დათანხმდა.

ახლა მზემ შემოანათა სარკმელში და ცოლ-ქმარს უთხრა:

— მე თქვენი ქალიშვილის ნათლია ვიქნებო და ჩემს შუქსა და სითბოს დავანათლავო.

დათანხმდა მზესაც ცოლ-ქმარი. ჩამოიქროლა ამ დროს ნიავეა და იმანაც შეშა-ქალას ნათლიობა მოინდომა, — ჩემსავით მარდი და დაუზარელი იქნებაო.

ცოლ-ქმარმა არც ნიავეს უთხრა უარი.

ბოლოს სარკმელში საავდრო ღრუბელმა შემოიხედა და ცოლ-ქმარს ბავშვის ნათლობა სთხოვა, — ჩემსავით შავი თმა და თვალ-წარბი ექნებაო.

მშობლები ღრუბელსაც დათანხმდნენ და მოანათვლინეს შეშა-ქალა. ნათლიები — მთვარე, მზე, ნიავე და ღრუბელი ყოველდღე მოდიან და დახედავენ თავიანთ ნათლულს. ცოლ-ქმარი კმაყოფილია და ახლა მის გაზრდასლა ელოდებიან.

ერთხელ დედამ აკვანი ეზოში გამოიტანა. სად იყო. სად-არა, უცბად ერთი ყორანი მოფრინდა და ბავშვს პირში ჩაუძვრა. ამ დღიდან ბავშვი გახდა გაუმადლარი. აღარაფერი აძლებს, დღე და ღამე პირი აქვს დაღებული და ჩხავის.

გავიდა ხანი. შეშა-ქალა გაიზარდა და ისეთი ქალი დადგა, რომ იმისი ბადალი ქვეყნად არავინ მოინახებოდა — შავთვალწარბა, მთვარესავით ანათებდა, მზის სითბო ჰქონდა და ნიავევით მსუბუქად მიმოქროდა, მაგრამ რა გინდა, ჭამით ვერ ძღებოდა და სულ გაიძახოდა — მშიაო. დედ-მამამ მთელი საცხოვრებელი მას შეაღია, ლუკმაპური აღარ შერჩათ. ბოლოს უთხრა დედ-მამას:

— ვხედავ, ჩემი შენახვა აღარ შეგიძლიათ, მოდით, წავალ, ვიმუშავებ, ან მოჯამაგირედ დავუდგები ვისმეს და როგორმე ჩემს თავს თვითონ შევინახავო.

ბევრი იტირეს ბერიკაცმა და მისმა ცოლმა, ბევრი იცეს თავში ხელი, მაგრამ რას იზამდნენ, თვითონაც ხედავდნენ, რომ შეშა-ქალას რჩენა მართლაც აღარ შეეძლოთ. მოიმზადა ქალმა საგზალი და გაუდგა გზას.

ერთი კვირა გზაზე იარა. ერთი კვირის შემდეგ ერთი თავადიშვილის სახლს მიადგა და დაიძახა. გამოიხედა სახლის პატრონმა.

— მოახლე ან მოსარეცხე ხომ არ გინდათ? — შეეკითხა შეშა-ქალა.

— როგორ არ გვინდა, ამოდით, — ჩამოსძახა თავადი შვილმა.

ავიდა შეშა-ქალა და დაუდგა მოახლედ. მუშაობს, მაგრამ რას მუშაობს. ხელეზიდან სულ ნაპერწკლები სცვივა, ნიავევით მარდი და დაუზარელია, მაგრამ რა გინდა, საჭმელი არა ჰყოფნის, სულ ჭამს, არც გაძლომა იცის, არც ბეზრდება. შეწუხდა თავადი შვილი, არ ეთმობოდა ასეთი კარგი, ხელმარჯვე მოსამსახურე, მაგრამ შენახვა აღარ შეეძლო და ერთ დღეს შეშა-ქალას უთხრა:

— ძალიან კარგი ხარ, მაგრამ რა ვქნა, შენი რჩენა აღარ შემიძლია, გაგისწორებ ანგარიშს და წადით.

რას იზამდა შეშა-ქალა. ადგა და წავიდა. იარა, იარა და ხელმწიფის კარზე მივიდა. შევიდა პირდაპირ ხელმწიფესთან და ჰკითხა:

— მოახლე ან მოსარეცხე ხომ არ გინდათ?

— მინდა, როგორ არ მინდაო, — უთხრა ხელმწიფემ, — თუ კარგად იმუშავებო.

— მუშაობით კი კარგად ვიმუშავებ, თუ ჩემი შენახვა არ გაგიჭირდებათო, — უთხრა შეშა-ქალამ.

ხელმწიფეს გაეცინა:

— ხელმწიფე ვარ და ერთი ქალის შენახვა როგორ გამიჭირდებაო, — მაინც ჰკითხა, — ისეთი რა ხარ, რომ შენი შენახვა გამიჭირდესო?

— ჯერზე ერთ ცხვარსა და ერთ თონე პურსა ვჭამ და ზედ ერთ ჩაფ ღვინოს ვაყოლებო.

ხელმწიფემ მაშინვე უარი უთხრა:

— არა, შვილო, შენ რაც ჭამა გდომებია, მაგისი ფასი რა უნდა გამიკეთო, ჯობია წახვიდე და შენს გზას ეწიო.

წავიდა შეშა-ქალა ტირილით, ცალკე შიმშილი აწუხებს, ცალკე — სირცხვილი. გზაზე ერთი თავისკბილა გლეხი ბიჭი შემოეყარა და ჰკითხა:

— რა გატირებს, ლამაზო ქალოო?

— რაღა რა მატირებს, ამაზე დიდი უბედურება რაღა იქნება, რომ ადამიანი შრომობდეს და საკმაო პურსაც ვერ

შოულობდესო, — უთხრა ქალმა და უამბო თავისი თავგადასავალი.

ბიჭმა უთხრა:

— წამოდი ჩემთან, პურსაც გაჭმევ და მაგ უბედურებასაც მოგაშორებო.

აბა, ქალი რას არ წაჰყვებოდა! წაიყვანა გლეხის ბიჭმა და ერთი კვირა უღუჟკმაპუროდ ამყოფა; ერთი ციცქნა საჭმელიც არ დაანახვა. კვირის თავზე ტყეში წაიყვანა, დასვა ერთ გადაჭრილ კუნძზე და წინ ხარის მძორი დაუდო. გაიგონძორის სუნი ცორანმა და ატეხა ყრანტალი ქალის მუცელში. ბიჭი იქვე ჩამოჯდა და სიმღერა წამოიწყო:

ჰაი, ყორანო, ყორანო,  
შე ავგულო და ვერანო,  
წინ გიდევს ხარის ლეშია,  
მანდ რას უზიხარ ბნელშია.

ამოვარდა ქალის მუცლიდან მშვიერი ყორანი, მივარდა ხარის ლეშს და დაუწყო ძიძგენა. გამოძდა კარგად, დაიყრანტალა და ისევ ქალის მუცელში ჩაძვრომა მოინდომა. მაგრამ გლეხის ბიჭმა აღარ დააცადა, ქალს პირზე ბაღდადი ჩამოაფარა. სტაცა ყორანს ხელი და თავი ქვაზე მიუნაყა. მერე მოკიდა ქალს ხელი და ისევ შინ წაიყვანა.

ის ღამე ბიჭის სახლში გაათენეს. შეშა-ქალას არც ცეცხლი სჭირდებოდა, არც სანთელი, ბნელში მთვარესავით ანათებდა და სახლს მზესავით ათბობდა. მეორე დილას შეაბეს ურემი, დაუდეს ზედ თუ რამე გააჩნდა ბიჭს ქონება-ცხოვრება და შეშა-ქალას დედ-მამასთან გადაბარდნენ.

გაუხარდა მოხუც ცოლ-ქმარს, თავიანთი ღამაში ქალიშვილი მორჩენილი რომ დაინახეს. ბიჭიც ძალიან მოეწონათ, და იმავე დღეს გადასწერეს ეკლესიაში ჯვარი.

ჭირი — იქა, ლხინი — აქა,  
ქათო — იქა, ფქვილი — აქა.



## სიკვდილი და ყაჩაღი

იყო და არა იყო რა, ამქვეყნად რა არ ყოფილა. და ერთი სახელგანთქმული ყაჩაღიც იყო. არცერთნაირ ავაზაკობას არ ერთდებოდა. ერთ ღამესაც ჩვეულებრივ წავიდა საყაჩაღოდ. სოფელში რომ შევიდა, ერთი სახლიდან რაღაც წივილ-კივილის ხმა შემოესმა. ყაჩაღმა ყურები ცქვიტა და იქით გაეშურა, შეიხედა ჭიშკრიდან და რას ხედავს: ერთი თეთრწვერა კაცი ზის ცხენზე და უკან თექვსმეტი წლის ქალიშვილი შემოუსვამს. ქალიშვილს წივილ-კივილით მოსდევს დედ-მამა. ყაჩაღმა იფიქრა, — ნამდვილად ამ ბერიკაცს ეს ღამაში გოგო მოუტაცნიაო, — და წართმევა გადაწყვიტა. თოფი მოიმარჯვა, ჭიშკარში ჩაუსაფრდა და გამოსულას დაელოდა.

მოადგა ბერიკაცი ჭიშკარს, ყაჩაღი წინ გადაუდგა, უტაცა ცხენს აღვირში ხელი და დაუყვირა:

— ეს ქალი ახლავე ძირს ჩამოსვი, თორემ სულს გაგაფრთხობინებო.

თეთრწვერა კაცმა ყაჩაღის მუქარა აინუნშიაც არ ჩააგდო, ხმაშაღლა გაიცინა და ჰკითხა:

— მაინც ვინა ხარ, ასე რიხიანად რომ მემუქრებით?

— მე ესა და ეს ყაჩაღი ვარო, — მიუგო ყაჩაღმა.

— მე კიდევ სიკვდილი ვარ, — უთხრა ბერიკაცმა, — ამაღამ ეს ქალიშვილი მიმყავს, დღეის სწორს შენი ჯერი დადგება და თუ ასეთი გულადი ვაჟკაცი ხარ, მაშინ გამიმაგრდიო.

ყაჩაღს შიშით გული გაუსკდა, იმავე წუთს ბინაზე დაბ-

ტუნდა, რაც ნაძარცვი ოქრო-ვერცხლი ჰქონდა, მთლიანად ამხანაგებს დაურიგა და უთხრა:

— ეს ოქრო-ვერცხლი როგორც გინდათ, ისე მოიხმარეთ, ოღონდ ერთ კვირაში ისეთი ციხე-სიმაგრე აშიგეთ, რომ იმის გატეხა ქვეყნად არავითარ ძალას არ შეეძლოსო.

დაფაცურდნენ ამხანაგები, იყიდეს საშენი მასალა, დაიქირავეს მუშები და ერთ კვირაში მართლაც ისეთი ციხე-სიმაგრე აუშენეს, რომ იმისი ბადალი ქვეყნად მეორე არ მოინახებოდა.

ყაჩაღმა, რაც კი საუკეთესო იარაღი ჰქონდა: თოფ-დამბაჩა და ხმალ-ხანჯალი, ყველაფერი ციხეში შეზიდა, ბლომა ტყვია-წამალი მოიმარაგა, ჩაიკეტა შიგნიდან კარები და თქვა, — აბა სიკვდილი თუ აქაც მომწვდებაო.

მაგრამ გულში შიში მანაც ჰქონდა და თოფმომარჯვებულ სულ კარებს შეჰყურებდა: გავიდა რამდენიმე დღე და დადგა წინა კვირის სწორი. სიკვდილი სწორედ ამ დღეს შეჰპირდა მოსვლას და ყაჩაღიც გულის ფანცქალით მოელოდა, თოფს წარამარა პირის წამალს უსინჯავდა და ტყვიას უცვლიდა, მაგრამ სიკვდილი არა და არ ჩანდა. ყაჩაღმა იფიქრა, ნამდვილად ვერ შემოაღწიაო, და გული დაიარხენია, თოფი კუთხეში მიაყუდა, ხმალ-ხანჯალიც აიხსნა და უდარდელად დაიძინა. ძილში უცბად რაღაც ხმა გაიგონა, გაახილა თვალები და რას ხედავს: ცელშემართული სიკვდილი დასდგომია თავს და თვალებს უბრიალებს. ყაჩაღს შიშით გული გაუსკდა და თვალები ისევ დახუჭა, თავი მოიმძინარა, მაგრამ სიკვდილმა შეანჯღრია და დაუყვირა:

— ადექი, უნდა წაგიყვანო!

— რა გაეწყობა, წამოვალ, — უთხრა ყაჩაღმა, — მაგრამ ჯერ ცოდვები მომანანიებინე. ხომ იცი, მთელი სიცოცხლე ყაჩაღობაში მაქვს გატარებული და ბევრი ცოდვაც ჩამიდუნია. ქრისტიანი კაცი ვარ, მინდა სიკვდილის წინ ყველა ცოდვა მოვინანიო და სანამ მამაო ჩვენოს არ ვიტყვი, ნუ წამიყვანო.

— კარგი, თქვი, ოღონდ ჩქარა მორჩიო, — უბრძანა სიკვდილმა.

— არა, ისე ვერ ვიტყვი, თუ პირობას არ მომცემ, რომ

სანამ ბოლომდე არ დავამთავრებ, არ მომკლავო, — უთხრა ყაჩაღმა.

— მომიცია პირობაო, — დათანხმდა სიკვდილი.

— არა, ვერც ეგრე, — უთხრა ყაჩაღმა, — მარტო პირობას ვერ ვენდობი. დაიფიცე მაღლა ღმერთი, რომ „მამაოჩვენოს“ ბოლომდე მათქმევინებო.

სიკვდილი ამაზეც დათანხმდა:

— მომიცია თავდებად მაღალი ღმერთი, ოღონდ ჩქარა მოათავე, ნუ მაგვიანებო.

ყაჩაღმა მუხლებზე წამოიჩოქა, აღაპყრა ხელნი ზეცად და დაიწყო:

— მამაო ჩვენო... რომელი ხარ ცათა შინა..

ნახევრამდე თქვა და გაჩუმდა. სიკვდილმა დაუყვირა:

— თქვი ჰა, რაღას გაჩუმდიო!

ყაჩაღმა ცბიერად გაიღიმა და პირობა მოაგონა:

— შენ ხომ ღმერთი მომეცი თავდებად, რომ სანამ არ დავამთავრებდი „მამაო ჩვენოს“ ლოცვას, მანამ არ მომკლავდი, ახლა მეტის თქმა აღარ მსურს და, როცა ვიტყვი, შენც მაშინ წამიყვანეო.

მიხვდა სიკვდილი, რომ მოტყუვდა და ყაჩაღს უთხრა:

— რაკი შენ ასეთი ჭკვიანი და მოხერხებული ყოფილხარ, ჯერ არ მოგკლავ, დაანებე ყაჩაღობას თავი, შემიამხანაგდი და სიკეთეს არ მოგაკლებო.

— რომ შეგიამხანაგდე, რა უნდა ვაკეთო? — ჰკითხა ყაჩაღმა.

— რა უნდა აკეთო და ექიმობა დაიწყე, — ურჩია სიკვდილმა, — მიდი ავადმყოფთან, იქ უსათუოდ მე დაგხვდები, მაგრამ შენს მეტი ვერავინ დამინახავს. ავადმყოფს ან თავით ვეყოლები დამჯდარი, ან — ფეხთით. თუ თავით ვეჯდე, ავადმყოფი არ მორჩება და შენც ხელი აიღე. ხოლო თუ ფეხთით დამინახო, ის ავადმყოფი ნამდვილად მოსარჩენია და უბრალო წყალიც რომ დაალევეინო, მორჩება. ამ ხელობით ბევრ ფულს იშოვი და გამდიდრდებიო.

მართლაც ყაჩაღმა დაანება თავი ძველ ხელობას და ექიმობა დაიწყო. დადის სოფლიდან სოფელში, შევა ავადმყოფთან, დახედავს, თუ სიკვდილი ფეხთით უზის, იტყვის მორ-

ჩებო, და გადაარჩენს კიდევ. თუ თავით ნახავს, იმავე წამს ხელს აიღებს და ავადმყოფიც იღუპება. გაუვარდა ექიმს სახელი და დიდძალი ფულიც დაუგროვდა.

გავიდა ხანი, გამდიდრდა ეს ყაჩაღი და ცხოვრობს ბედნიერად. ერთხელაც შეჯდა ცხენზე და წავიდა ავადმყოფის სანახავად. მდინარის ნაპირას წყლის გამორიყული პატარა ბიჭი ნასა. ბიჭი დამხრჩვალ იყო და ყელზე ჯვარი ეკიდა. ყაჩაღმა იფიქრა, ეს ბავშვი, ეტყობა ქრისტიანი ყოფილა, მოდი ანდერძს ავუგებ, „მამაო ჩვენო“ ვეტყვი და ისე დავმარხავო. დაუჯდა ბიჭს გვერდით და „მამაო ჩვენო“ ბოლომდე ჩაათავა. იმავე წამს სიკვდილი დაადგა თავზე და უთხრა:

— ხომ თქვი „მამაო ჩვენო“ ბოლომდე, აბა, ახლა შემომიჯექი ცხენზე და წამოდიო.

ყაჩაღს მოაგონდა დადებული პირობა და ფერი ეცვალა. დაუჩოქა და სთხოვა სიკვდილს:

— რაკი ამდენი ამაგი გაქვს ჩემზე, მოდი და ეს ერთი სიკეთეც გამიწიე: შინ მოხუცებული მამა მყავს, მომეცი ნება, რომ მივიდე და სიკვდილის წინ გამოვემშვიდობო.

სიკვდილი ისევ დათანხმდა და თან გაჰყვა. მივიდნენ ყაჩაღის სახლში. ყაჩაღი გამოემშვიდობა თავის მოხუც მამას და სიკვდილს სთხოვა:

— ეს ხომ მიგყევარ და მიგყევარ, მოდი, ბარემ საიქიოში ნურც ამ ჯავრს წამაყოლებ: როგორც ბავშვობას ვიცოდო, ამ ჩვენს ზამთრის მსხალზე ავაღ, ერთ-ორ მსხალს მოვწყვეტ, შევჭამ და წამიყვანეო.

— კარგიო, — დართო ნება სიკვდილმა, — ოღონდ ჩქარა ადი და ჩამოდი, არ დამაგვიანოო.

ეს მსხლის ხე ქრისტე ღმერთისაგან იყო დაწყვეტილი. გინც ზედ ავიდოდა, სანამ ნაყოფი მთლიანად არ მოეღოდა, ველარ ჩამოვიდოდა. ავიდა ყაჩაღი და დარჩა ზედ. ეძახის სიკვდილი, — ჩამოდიო, მაგრამ რას ჩამოვა, სანამ მსხალს ერთი ნაყოფიც აბია. რაღა უნდა ექნა სიკვდილს, რამდენი კაცი ჰყავდა წასაყვანი და დაზამთრებამდე იქ ხომ არ იდგებოდა?

გაბრუნდა უკან ხელცარიელი სიკვდილი და წასვლისას დაემუქრა:



— ხომ მომატყუე ორჯერ, მაგრამ იცოდე, არ შეგარჩენ, ისე გაგიხდი საქმეს, რომ თავი მოგძულდეს და თვითონვე მესხვეწებოდეთ.

გაუიდა ხანი, ყაჩალი ისე მოხსუცდა და დაუძლურდა, რომ ფეხზე ადგომა აღარ შეუძლია, მუხლში ღონე გამოელია, თვალში — სინათლე, აღარც მკვდარია, აღარც ცოცხალი. დღითი დღე უძლურდება, გახდა, ჩამოხმა და შავ ჩონჩხად გადაიქცა, — აღარც სისხლი აქვს, აღარც ხორცი, მარტო ძელები და გამხდარი ტყავია.

ერთ დღეს, როგორც იქნა, ეზოში გამობობლდა და თვალ-ცრემლიანმა ხმამალლა შეჰყვირა:

— სიკვდილო, შე დაწყევლილო, სადა ხარ, რომ ერთხელ აღარ გამოჩნდიო?

უცბად სიკვდილი თავზე დაადგა და ჰკითხა:

— რა გინდა, რატომ მიხმობო?

— რაღა რა მინდა, ვერა ხედავ, ადამიანი აღარა ვარ, ადექი და წამიყვანეთ, — შეგხვეწა ყაჩალი.

— აჰა, გახვეწინე, თუ არაო? — უთხრა სიკვდილმა ნიშნის მოგებით, ამოაცალა გაწამებული სული და გამხმარი ჩონჩხი იქვე დატოვა.

ასე მოანატრა სიკვდილმა თავი. ტყუილად კი არ ამბობს ხალხი, თავის დროზე სიკვდილიც საჭიროაო.

ჭირი — იქა, ლხინი — აქა,

ქათო — იქა, ფქვილი — აქა.





## სამი და

იყო და არა იყო რა, იყო ერთი ცოლ-ქმარი და ჰყავდათ სამი ქალიშვილი. ცოლ-ქმარი ძალიან ღარიბად ცხოვრობდა, მამული არ ჰქონდათ და არც საწველ-საყოლი საქონელი გააჩნდათ. თვითონაც მშვიერ-ტიტვლები იყვნენ და ქალებიც დაკონკილები დაუდიოდნენ.

ერთხელ ცოლი თაროებს ჰგვიდა, ერთ-ერთ თაროზე სამი პურის მარცვალი იპოვა. ცოლმა მარცვლები ქმარს მისცა და უთხრა:

— წაიღე ეს მარცვლები, მიწა მოხანი და დათესეო.

წავიდა კაცი, მოხნა მიწა და დათესა. ყანა მოვიდა ისეთი, რომ შიგ ღვთის თვალი ტრიალებდა. თავთავი სიმძიმისაგან გვერდზე მიწოლილიყო და ზღვასავით ირხეოდა. ცოლ-ქმარი სიხარულით ცას ეწივნენ და პურის დამწიფებას მოუთმენლად მოელოდნენ.

გავიდა ხანი და თავთავიც დამწიფდა. წავიდა ცოლ-ქმარი მოსამკელად და ქალიშვილებიც თან გაიყოლეს. მომკეს ყანა, შეკონეს და ერთი უზარმაზარი ფრთაქცეული ზვინი დადგეს.

მეორე დღეს მამამ უფროსი ქალი გაგზავნა ძნის დასათვალიერებლად: ნახე, საქონელმა არ წაგვიხდინოსო. წავიდა უფროსი ქალი და რას ხედავს: ძნის ზვინს ერთი უზარმაზარი გველეშაპი შემოხვევია და კუდი პირში უჭირავს. ქალს შიშით კინაღამ გული შეუღონდა, იმავე წამს სირბილით გამობრუნდა უკან და მამას უთხრა, — ასე და ასეა საქმეო.

მამამ ახლა შუათანა ქალი გაგზავნა, ჰკითხე, — რა უნდა, რისთვის მოსულაო. წავიდა ქალი, მაგრამ ვერაფერიც ვერ ჰკითხა, უზარმაზარ გველეშაპს რომ შეხედა, კანკალი დააწყებინა და გულგახეთქილი უკანვე გამობრუნდა. ადგა მამა და ბოლოს ნაბოლარა გოგო გაგზავნა, შენ მაინც გაიგე, რა უნდაო.

წავიდა ნაბოლარა გოგო, მივიდა გველეშაპთან და ჰკითხა:

— რა გინდა, რისთვის მოსულხარ, შეგვატყობინეო?

გველეშაპმა უთხრა:

— წადი და მამაშენს გადაეცი, რომ ერთ-ერთი თქვენგანი ცოლად მომცეს, თორემ ძნას არ დავანებებო.

დაბრუნდა გოგო შინ და უთხრა მამას გველეშაპის დანაბარები.

დაიბარა მამამ თავისი ქალიშვილები და ჰკითხა:

— აბა, რომელი გაჰყვებით გველეშაპს ცოლადო?

— თვალი იმასაც დაუდგეს და იმის ცოლად გამყოლსაცო, — თქვა უფროსმა გოგომ, — სწორედ, აღარაფერს დაგუკლებო!

შუათანამაც იგივე გაიმეორა და ჯერი ნაბოლარაზე მიდგა.

— აბა, ჩემო პატარა ქალო, შენ რაღას იტყვიო? — ჰკითხა მამამ.

— რაკი სხვა გზა არ არის, გავყვებით, — უთხრა ნაბოლარამ.

წავიდა ნაბოლარა და მივიდა გველეშაპთან. გველეშაპი წაუძღვა და წაიყვანა თავისი ქვეყნისაკენ. სოფელს კარგა მანძილით რომ დაშორდნენ, გადაიძრო გველეშაპმა ქერცლიანი ტყავი და ისეთი ჭაბუკი გამოჩნდა, რომ მტერსაც კი მოეწონებოდა. გაუხარდა ქალს და ღმერთს მადლობა შესწირა, რომ ასეთი ქმარი არგუნა, მერე ჰკითხა:

— ვინა ხარ, ან გველეშაპის სახით რატომ დადიხარო?

— მე ქაჯთა დედოფლის შვილი ვარ, — უთხრა ქმარმა, — ჩემს ქვეყანაში ყველანი ქაჯურად ლაპარაკობენ და ყველანაირს უკუღმა აკეთებენ. დედაჩემი რომ გეტყვის, კოკა გატე-

ხეო, შენ წყალზე უნდა წახვიდე, ზომ გეტყვის, წყალი და-  
ღვარე, შენ წყალი უნდა მოუტანო. როცა გეტყვის, თონე და-  
ამტვრიე, შენ უნდა გაასურღ და პური ჩააკრა, როცა გეტყ-  
ვის, სუფრა აალაგე, შენ სუფრა გაშალე, როცა გეტყვის ჯამ-  
ჭურჭელი დალევო, შენ მაშინ უნდა აალაგო. ერთი სიტყ-  
ვით, რაც გითხრას, ყველაფერი უკუღმა გააკეთე და ყველას  
შეუყვარდებიო.

მართლაც, მისვლის დღიდანვე ქალი ისე მოიქცა, რო-  
გორც ქმარმა დაარბია. რასაც დასაქმებდნენ, ყველაფერს  
უკუღმა აკეთებდა და ქაჯებმაც ძალიან შეიყვარეს, — ახა-  
ლი მოსულია და ჩვენს წესებს ჩვენზე უკეთ ასრულებსო, და  
სულ ძვირფასი სამკაულებით მორთეს.

გავიდა ხანი, ქალი დაორსულდა და მშობიარობის დრომ  
მოუწია. როგორც წესია, მშობიარობის წინ ქმარი გაჰყვა  
და წინაწვევად მამის სახლში წაიყვანა. დებმა რომ ნახეს  
თვალ-მარგალიტით მორთული და ძვირფას ტანსაცმელში  
გამოწყობილი თავიანთი და, შურით გულები დაუსკდათ. ამ  
კიკინას ასეთი ქმარი უნდა ჰყავდეს, ასე მდიდრულად ეცვას  
და ჩვენ კი დაკონკილები დავდიოდეთო? და გადაწყვიტეს,  
რამე სრიკი ვუგდოთ და ეს ბედი ხელიდან გამოვაცალოთო.  
ბოლოს უფროსმა დამ უთხრა შუათანას:

— როცა მოიმშობიარებს, მე თან გავყვები, იმდენს ვი-  
ზამ, რომ დავღუპავ და მაგის ქმარს ცოლად თვითონ დაუუჯ-  
დები, შენ კი ეს მოვლილი სახლ-კარი და ცხოვრება გქონდეს  
და ქმარი აქ მოიყვანეო.

მოეწონა შუათანა დასაც უფროსი დის ნათქვამი და სა-  
ბოლოოდ ამ პირობაზე შეთანხმდნენ.

მოილოგინა ნაბოლარა დამ და ეყოლა ვაყი. ცოლ-ქმარმა  
შინ დაბრუნება რომ დააპირეს, უფროსმა დამ უთხრა ნაბო-  
ლარას:

— მეც თან გამოგყვები, ახალი ნალოგინები ხარ, გზაზე  
დასუსტდები და ბავშვის ტარებას გიშველიო.

ნაბოლარას ძალიან გაუხარდა, უფროსი და რომ გვერ-  
დით მიეყოლება, აღარ მოვიწყენო და წაიყოლა. მიდიან გზა-  
ზე, წინ ბიჭი მიდის, უკან დები მიჰყვებიან. ერთ ადგილას  
მსხმოიარე ვაშლი დაინახეს. ნალოგინარ ქალს მყავე მოუნ-

და და ინატრა, ნეტავი ეს ვაშლი მაჭამაო. უფროსმა დამ სიძეს გასძახა, იარე და მოგეწევიტო, დას კი უთხრა: თუ ეგრე გულით ვინდა, ადი, დაკრიფე და ჭამეო.

— აბა, როგორ ავიდე, მაღალიაო, — შეწუხდა ნაბოლარა და.

— მე გიზურგულეებ და ასეალო, — უთხრა უფროსმა.

— მერე ბავშვს რაღა ვუყო?

— ბავშვს მე დავიჭერ და ჩამოყვანიტაც მევე ჩამოგიყვანო, — უთხრა უფროსმა დამ.

ნაბოლარა და დათანხმდა. უფროსმა უზურგულა და შესვა ხეზე. ბავშვმა ტირილი დაიწყო და, რომ აღარ გაჩერდა, ნაბოლარამ ჩამოსძახა:

ნუ მიტირებ, დამ, ყრმასა,  
შემომისვი ქანდარასა,  
— მოვაწოვებ პატარასა.

უფროსმა დამ ყურიც არ უგდო. საჩქაროდ დაისადა თავისი კონკიძველები. ჩაიცვა დის ძვირფასი კაბები, მორთო ზიზილ-პიპილებით, აიყვანა მტირალი ბავშვი ხელში და სიძეს გაეკიდა. დაუძახა შორიდან:

— კაცო, დამიცადე, რძე გამიშრა და ბავშვი მიტირისო!

სიძემ დაუცადა, მაგრამ რაკი მისი ცოლის ტანისამოსი ეცვა და სახითაც ძალიან ჰგავდა, ვერ იცნო, საკუთარი ცოლი ვგონა და ჰკითხა:

— და რაღა უყავიო?

— თვალი იმასაც დაუდგეს, მე ჩემი შვილის დარდი მაქვს, რომ რძე გამიშრა და ველარ ვაწოვებო. — მიუგო ბუზღუნით და დაუმატა, — შინ გავაბრუნეო.

მოვიდნენ სახლში. უფროსი და ვერც დედამთილმა იცნო და ჩვეულებრივ დასაქმა, — რძალო, კოკა გატეხეო, აიღო უფროსმა დამაც კოკა და კერაზე დაამსხვრია, — ჯამები დაამტვრიეო, — უთხრა და ქალმაც ჩაქა — სულ ერთიანად დაღეწა, მერე უთხრა, — თონე დაამტვრიეო, — ქალმაც აიღო ცული და სულ დაბჭირა. ქაჯებმა თქვეს, — სახლში

რომ დიდხანს დარჩა, ჩვენს წესს გადაჩვეულაო, — და აპ-  
ტიეს.

რაკი ქალს რძე არ ჰქონდა, ბავშვი ერთ ძროხას შეაჩ-  
ვიეს და იმით გაზარდეს. ბავშვი ისე მიეჩვია ძროხას, რომ  
დღე და ღამე აღარ შორდებოდა და, როცა გაიზარდა, საბა-  
ლახოდაც თვითონ დაჰყავდა.

დედა კი დარჩა ვაშლის ხეზე და იმდენი იტირა, იმდენი,  
რომ ცრემლად დაიღვარა და მიწაზე ჩამოიღვენთა. მიწიდან  
ლერწმის ტევრი ამოიზარდა და ნელ, მთრთოლვარე ხმაზე  
აშრიალდა.

ერთხელ პატარა ბიჭმა თავისი საყვარელი ძროხა სწო-  
რედ იმ ტევრთან მირეკა, მოსჭრა ლერწმის ერთი ღერო,  
სალამური გამოთალა და ჩაჰბერა. სალამური კაცის ენით  
ალაპარაკდა:

მე ვარ სტვირი  
და მას ვტირი,  
რომ შენ ჩემი შვილი ხარ,  
მე კი დედაშენი ვარ.

ბიჭს სალამურიც ძალიან შეუყვარდა, უბეში ჩაიდო და  
სახლში წაიდო. შინ რომ მიიტანა, ჩაჰბერა და სალამურმა  
იგივე სიტყვები გაიმეორა. გაიგონა უფროსმა დამ, ამ ბი-  
ჭის დეიდამ, და გულზე სისხლი მოეკიდა, წაართვა ბიჭს სა-  
ლამური, მიტეხ-მოტეხა და ეზოში გადაყარა. მაგრამ ნატეხ-  
მა ხმამაღლა ჩაარაკრაკა:

მე ვარ სტვირი და მას ვსტირი,  
რომ შენ ჩემი შვილი ხარ, მე კი დედაშენი ვარ!

უფროსი და უარესად გაცოფდა, წამოკრიფა ნამტვრევები  
და გახურებულ თონეში ჩაუძახა. ნამტვრევები დაიწვა, მაგ-  
რამ ახლა ნაცრისაგან ქალის სახე გამოიკვეთა და იგივე სი-  
ტყვები გაიმეორა.

უფროსი და ახლა კი მთლად ცოფიანს დაემსგავსა. ამო-  
იღო ქალის სახედ შეკრული ნაცარი, აიტანა ბანზე და მიმო-

ბნია. მეორე დილით ბანსე უზარმაზარი ლერწამი ამოიზარდა, ნასა ქმარმა და ძალიან მოეწონა. იმავე ღამეს აიტანა ლოგინი და ლერწმის ქვეშ გაიშალა. ლერწამი ტოტებს ჩამოსრიდა, ქმარს ქოლგასავით გადასურავდა და ნელი შრი-ალით აძინებდა. უყურებდა ამას უფროსი და და ჯავრით კვდებოდა. ბოლოს თავი მოიავადმყოფა და ქმარს უთხრა:

— თუ მაგ ლერწამს მოსჭრი და მაგის წვენს დამალევენებ, მოერჩები, თუ არადა მოვეკვდებით.

— მანამ ნურაფერი გეცკინოს, სანამ მე მაგ ლერწამს მოვჭრიდეთ, — მიუგო ქმარმა.

მაშინ ქალმა ხერხს მიმართა, ქმარი სანადიროდ გაგზავნა, თვითონ მკუმები მოიყვანა და ლერწამი ძირიანად მათსტრეინა, დააჭრეინა ნაწილ-ნაწილ და ზღვაში გადააყრეინა.

ლერწამი წყალში რომ მოსვდა, ისევ ქალად იქცა. გამოვიდა ზღვიდან, მაგრამ შიშველი სად წავიდოდა, იქვე ლელი-ანში დაიშალა და დაღამებას დაელოდა. საღამოს ქმარიც დაბრუნდა სანადიროდ, დაინახა ქალმა, წინ გადაუდგა და ჰკითხა, — მიცნობო?

ქმარმა, რა თქმა უნდა, ვერ იცნო. ისევ უფროსი და ეკონა და გაჯავრებით უთხრა:

— ქალო, ტიტველი რას დადიხარ, ტანსაცმელი რა უყავიო?

— წადი, ტანსაცმელი მომიტანე, შინ მიმიყვანე და ყველაფერს გაიგებო, — უთხრა ქალმა.

წავიდა ქმარი და მოუტანა ტანსაცმელი, ქალმა ჩაიცვა და წავიდნენ შინ. ქმარი გაკვირვებულია, ვერ იგებს რა ხდება, მაგრამ ქალი ჯერ არაფერს ეუბნება. ასე მივიდნენ შინ. დაინახა უფროსმა დამ ნაბოლარა და ფერფურმა გადაჰკრა, მაგრამ იხტიბარი მაინც არ გაიტეხა და თამამად შეუტია:

— ვინ გეპატიებოდა, რომ აქ მოჩერჩეტდი, ვერ დაეტიე შენს სახლშიო?

— მე კი ჩემს სახლში მოვედი, მაგრამ შენ ან სახლი სადა გაქვს. ან კარით, — მიუგო ნაბოლარა დამ, მერე ქმარს

მიუბრუნდა და ყველაფერი დაწვრილებით უამბო: ქმარი სიყვარულით გადაეხვია თავის ცოლს, მოღალატე და კი ცხენის ძუაზე გამოაბა და ლუკმა-ლუკმა დააგლეჯინა.


ასე მიეწლო უფროს დას ბოროტებისათვის, ხოლო ზა დაემართა შუათანას, შეირთო ქმარი თუ არა, ნაბოლარა დას იმისი აღარაფერი გაუგია.

ჭირი — იქა, ლხინი — აქა,

ქატო — იქა, ფქვილი — აქა.







## ბედის საქმეობარი

იყო და არა იყო რა, იყო ერთი უიღბლო კაცი. რა საქმისთვისაც არ უნდა მოეკიდა ხელი, ყველაფერი უკულმა წაუვიდოდა. ერთხელ ადგა და ბედის საქმეობად წავიდა, რადაც უნდა დამიჯდეს, ჩემი ბედი უნდა ვიპოვო.

იარა, იარა და ბოლოს ერთ ტრიალ მინდორზე გავიდა. მინდორის შუაში ერთ დიდ ხესთან მგელი იდგა და კენესოდა, კბილის ტკივილს ისე შეეწუსებინა, რომ ადგილიდან განძრევა აღარ შეეძლო. მივიდა კაცი ახლოს და მიესალმა:

— გამარჯობა, მგელოო!

— ღმერთმა გაგიმარჯოსო! — მიუგო მგელმა და შეკითხა, — სად მიდიხარ, კაცო, საით გაგიწევიაო?

— ბედის საქმეობად მივდივარო, — უპასუხა უიღბლო კაცმა.

— იმ შენს ბედს, თუ იპოვი, ბარემ ჩემი გაჭირვებაც უთხარი და ჰკითხე, რა მომირჩენს ამ ოხერ კბილსო?

— კარგო, — შეპირდა კაცი და წავიდა. იარა, იარა და ერთ ადგილას ერთად შეკრებილი ხალხი დაინახა. მივიდა ხალხთან და მიესალმა:

— გამარჯობათ, კაცებოო!

— ღმერთმა გაგიმარჯოსო, — უპასუხეს და ჰკითხეს, — სად მიდიხარ, საით გაგიწევიაო?

— ბედის საქმეობად მივდივარო, — უთხრა კაცმა.

— აბა, იმ შენს ბედს, თუ იპოვი, ბარემ ჩვენი გაჭირვების მიზეზიც ჰკითხე, იქნებ რამე წამალი იცოდესო, — სთხოვა ხალხმა.

— რა გაჭირვებიათო? — ჰკითხა კაცმა.

— რა გაგვჭირვებია და — შიმშილით, — მიუგო ხალხმა,  
— როგორ თუ შიმშილით? — ვერ გაიგო კაცმა.

— როგორ და, ყანას დავთესავთ, მოსამკალი რომ გახდებოდა, მკათათვეში უცბად ცეცხლი წაეკიდებოდა და სულერთიანად გადაიბუგებოდა.

— კარგით, ვკითხავო, — შეჰპირდა კაცი და წავიდა თავის გზაზე. იარა, იარა და ერთ ადგილას ხელმწიფის სასახლე დაინახა. მივიდა და ხელმწიფეს მიესალმა.

— გამარჯობათ, დიდო ხელმწიფეო!

— გაგიმარჯოსო, — მიუგო ხელმწიფემ და თან შეეკითხა, — სად მიხვალ ასე გაჩქარებული, რა გაგჭირვებიაო?

— ბედის საქებრად მივდივარო, — უთხრა კაცმა.

— იმ შენს ბედს, ბარემ ჩემი გასაჭირიც გააცანიო, — სთხოვა ხელმწიფემ.

— რა გაგჭირვებიაო? — ჰკითხა კაცმა.

— რა გამჭირვებია და, ერთ ხელმწიფეს ვეომები, იმას ცოტა ჯარი ჰყავს, მე ბევრი, მაგრამ მაინც სულ ის მამარცხებს და იქნებ გამიგოს, რა მიზეზიაო.

— ძალიან კარგი, ვკითხავო, — შეპირდა კაცი და წავიდა. იარა, იარა და შეხვდა ერთი ჭაღაროსანი კაცი. კაცი იმ ჭაღაროსანსაც ჩვეულებრივ მიესალმა, მაგრამ იმან ხმა არ გასცა. კაცი კიდევ მიესალმა და ჭაღაროსანმა კიდევ არ უპასუხა. მესამედაც მიესალმა და არც მესამედ უპასუხა. გაბრაზდა უიღბლო კაცი, ხელი მოჰკიდა და უსაყვედურა:

— რა არის, სამჯერ მოგესალმე და პასუხი რომ არ გამეცო. ჭაღაროსანმა ახლა კი ამოიღო ხმა და ჰკითხა:

— რა გინდა, კაცო, რას დაეძებო?

— ჩემს ბედს დავეძებ და უნდა ვიპოვო, — მიუგო კაცმა.

— მე ვარ შენი ბედი, და რასა მთხოვო? — შეეკითხა ჭაღაროსანი.

— სათხოვარი ბევრი მაქვს, მაგრამ ჯერ სხვათა დავალება უნდა შევასრულო, — უთხრა კაცმა და მგლის ამბავს მოუყვა, — გზაზე ერთი დიდი მგელი შემხვდა, კბილი ასტივენოდა და მთხოვა, გამიგე, რა არის კბილის ტკივილის წამალიო.

— ვირის ტვინი შეჭამოს და მაშინვე მოურჩებაო, — უთხრა ჭადაროსანმა და ჰკითხა, — კიდევ რა გინდაო?

— კიდევ, გზაზე მუშა ხალსი შემსვდა, შემომჩივლეს, დავთესავთ პურს და სამკალად რომ მოიწვევა, ცეცხლი გაუჩნდება და გადაიწვება, გაგვიგე, რა არის ამის მიზეზიო? — ჰკითხა კაცმა.

— სადაც პირველად ცეცხლი ჩნდება, იმ ადგილას, მიწაში ოქროს და ვერცხლის მადანია, მკათათუფში ცხელდება და ცეცხლს ის აჩენს, მოთხარონ მიწა, ამოიღონ მთლიანად ოქრო-ვერცხლი და აღარც ცეცხლი გაუჩნდებაო. — მიუგო ჭადაროსანმა და კიდევ შეეკითხა, — სხვას რაღას ითხოვო?

— კიდევ იმას ვიანხოვ. — უთხრა კაცმა, — რომ გზაზე ერთი ხელმწიფე შემსვდა და შემომჩივლა: ერთ ხელმწიფეს ვეომები, იმას ჩემი მეთაფი ჯარიც არა ჰყავს, მაგრამ მაინც ყოველთვის მამარტყებს და მთხოვა, ამისი მიზეზი გამიგეო.

— იმ ხელმწიფემ სარდლები შეცვალოს და გაიმარჯვებოსო, — მიუგო ჭადაროსანმა და კიდევ ჰკითხა, — სხვა სომ არაფერი გინდაო?

— როგორ არ მინდა, — უთხრა კაცმა, — შენთან ჩემმა გაჭირვებამ მომიყვანა: რასაც ხელს მოვკიდებ, ყველაფერი უკუღმა მიმდის და მითხარი, რისი ბრალია, სად არის ჩემი ბედი, რომ არაფერში არ მწყალობსო?

— თუ მიხვდები და გამოიყენებ, შენი ბედი, უკან რომ დაბრუნდები, გზაზე შეგხვდებაო, — მიუგო ჭადაროსანმა და გაქრა.

გამობრუნდა უიღბლო კაცი და წამოვიდა შინისკენ. მივიდა იმ ხელმწიფესთან, ვისაც მცირეჯარიანი ხელმწიფე ამარტყებდა, და გამარჯობა უთხრა.

— რა ამბავი მომიტანეო? — ჰკითხა ხელმწიფემ.

— ჯარის სარდლები შეცვალე და გაიმარჯვებო, — უთხრა კაცმა. ხელმწიფემ მაშინვე შეცვალა სარდლები და კაცს უთხრა:

— მოდი, ბარემ ომს დამესწარი და თუ მართლა გავიმარჯვე, დიდძალ ოქრო-ვერცხლს მოგცემო.

კაცი არ დაყაბულდა, — გზაზე ჩემი ბედი მიმელის და ის

უნდა ვიპოვო, — უთხრა და წამოვიდა. მოვიდა მხვნელ-  
მთესველ ხალხთან. იმათაც ჰკითხეს:

— რა ამბავი მოგვიტანეო?

— სადაც პირველად ცეცხლი ჩნდება, იმ ადგილას მიწა-  
ში ოქრო-ვერცხლის მადანი ყოფილა, გათხარეთ მიწა, ამოი-  
ღეთ ის ოქრო-ვერცხლი და ცეცხლიც აღარ გაგინდება-  
თო, — მიუგო კაცმა.

ხალხმა სთხოვა, რაკი ასეთი სიკეთე გვიყავი, მოდი, ბა-  
ტემ შენც შემოგვიერთდი მადნის მოთხრაში და ნახევარს შემ  
მოგცემთო.

მაგრამ კაცი არც ამათ დაყაბულდა, მე გზაზე ჩემი ბედი  
მიმელის და ის უნდა ვიპოვო, — უთხრა და წამოვიდა.

იარა, იარა და ბოლოს მოვიდა კბილმტკივან მგელ-  
თან.

— აბა, გამიგე თუ არა, ჩემი კბილის წამალიო? — ჰკი-  
თხა მგელმა.

— გაგიგო, — მიუგო კაცმა და ჭლაროსანის დანაბა-  
რები უთხრა, — შენი კბილის ტკივილის წამალი ვირის  
ტვინი ყოფილა, როგორც კი შეჭამ, მაშინვე მოგიჩიებაო.

— შენს გასაჭირზე რაღა გითხრაო? — შეეკითხა მგელი.

— ასე მითხრა, თუ მიხვდები და გამოიყენებ, შენი ბედი  
გზაზე შეგხვდებაო, — მიუგო კაცმა.


— მერე არაფერი შეგხვედრიაო? — ჰკითხა მგელმა.

კაცი დაჯდა და, რაც გზაზე შეხვდა, ყველაფერი დაწვრი-  
ლებით უამბო — როგორ შესთავაზა ხელმწიფემ დიდძალი  
ოქრო-ვერცხლი, თუ გაიმარჯვებდა, ან მხვნელ-მთესველებმა  
მადნის ნახევარი, და დააყოლა, — მე ყველაფერზე უარი  
ვთქვი და ჩემი ბედის საძებრად წამოვედიო.

მგელმა თავი გაიქნია, ამაზე უფრო დიდი და უჭკუო ვი-  
რი ამქვეყნად აღბათ მეორე არ მოინახებაო, — თქვა გუნე-  
ბაში, — სწორედ ესა ყოფილა ჩემი კბილის წამალიო, — წა-  
მოაქცია კაცი და ტვინიან-ხორციანად შეჭამა.

ჭირი — იქა, ლხინი — აქა,

ქათო — იქა, ფქვილი — აქა.



## კაცის ძალა

ერთ ცხრათავიან დევს თურმე კაცი თვალით არასოდეს ენახა. ერთხელ ეს დევი ღმერთთან მივიდა და სთხოვა:

— ღმერთო, ძლიერო, ამოდენა ხანია ქვეყანაზე დავიარები და ყველას შიშის ზარსა ვცემ. ჯერ არავინ შემხვედრია ისეთი, რომ ჩემი დახვედრა და გამკლავება შესძლებოდეს. ერთი მარტო ადამიანი არსად მინახავს. ამბობენ, დედამიწის ზურგზე იმისი მომრევი არავინ არისო. მინდა ვნახო ის სულიერი, რომელსაც ადამიანს ეძახიან, და ჩემი ღონე იმასთანაც გამოვცადო. მასწავლე, სად და როგორ ვიპოვო.

— კარგი, გასწავლი, — უთხრა ღმერთმა, — მაგრამ ეს კი იცოდე, ის შენ გძლევეს და სამუდამოდ შეერცხვენილი დარჩები.

— დაე, დავრჩე სირცხვილნაჭამი, ოღონდ ვნახო, ვინ არის და რა ღონის პატრონიაო, — დაიჟინა დევმა.

— რაკი არ დაგიშლია, წადი, — უთხრა ღმერთმა, — გადი ქვეყანაზე, გაიკითხ-გამოიკითხე და სადმე შეხვდები.

წამოვიდა დევი, მოდის და ყველაფერს ათვალეირებს, ნაგრამ არაფერი ჩანს. ბოლოს ერთი კუდამოძუებული მელია დაინახა და მაშინვე წინ გადაუდგა.

— შენა ხარ ადამიანიო? — ჰკითხა.

— არა, ბატონო, მე მელა გახლავარო, — მიუგო მელამ.

— რატომ გამორბინხარ ასე გულგახეთქილიო? — კვლავ ჰკითხა დევმა.

— იმიტომ გამოვრბინვარ, ბატონო, რომ კაცი გამომიდგა. ცხვრის ფარას მწყემსავს, მე ერთი ბატკნის მოტაცება

მინდოდა, დამინახა და კინალამ სული გამაფრთხოებინაო. —  
აუხსნა სირბილის მიზეზი მელამ.

— აბა ერთი წამიყვანე და მაჩვენეო, — უთხრა დევმა.  
მელა უარესად შეშინდა.

— არა, ბატონო, მე ვერ წამოვალ, — უთხრა დევს, — ახლა  
ის ჩემზე გაუგავრებულია და კიდევ რომ ფარის ახლომასლო  
დამინახოს, ცოცხალს არ გამიშვებსო.

დევმა არ დაიშალა, — გინდა თუ არა, უნდა წამომყვე და  
მაჩვენოო. — მელა ბოლოს დათანხმდა, ოღონდ უთხრა: —  
მე ახლოს არ მოვალ, შორიდან დაგანახებ, და რაც გინდა,  
ის ჰქენიო.

გაუძღვა მელა დევს და წაიყვანა. დევმა გზაზე კამეჩების  
ჯოგი დაინახა და მელას ჰკითხა, — ეგ ხომ არ არის ადა-  
მიანიო?

— არა, ბატონო, — მიუგო მელამ, — ადამიანი რომ მა-  
გათანა იყოს, რა უჭირდა. ის წყეული საშინელი თავხედი  
და თავნებაა, ამათთანებს რამდენიმეს დაიჭერს, კისერზე  
რალაც გაჩორკნილ სეს დაადებს, გამოაბამს უზარმაზარ  
ტვირთს და სახრის ცემითა და ლანძღვა-გინებით მიერეკე-  
ბაო.

განაგრძო გზა და ახლა ურა ცხენების რემა შემოხვდათ.

— არც ეს არის ადამიანიო? — ჰკითხა დევმა.

— არა, ბატონო, არც ეს არის ადამიანი, — მიუგო მე-  
ლამ, — ადამიანი ამათაც თავის ნებაზე ატარებს: ზურგზე  
რალაც ტახტის მსგავსს შეადგამს, პირში რკინას ამოსდებს,  
შეაჯდება და საითაც სურს, იქით წაიყვანსო.

გასცდნენ ცხენებს და წავიდნენ. დევს უკვირს, რა არის  
ეს ადამიანი ამისთანა, რომ ყველაფერს იმორჩილებსო. ბო-  
ლოს ცხვრის ფარაც გამოჩნდა. დევმა ისევ ჰკითხა მელას:

— იქნებ ეს არის ადამიანიო?

— არა, ბატონო, ეგ ცხვრებია, — მიუგო მელამ, — ადა-  
მიანი მაგათთანას რამდენიმე ათასს მოუყრის თავს და მარ-  
ტო სტვენითა და შეძახილით იმორჩილებს. აგე ახლაც ნა-  
პირზე დადის და გაფანტვის ნებას არ აძლევსო.

— როგორ, ის პაწაწინა სულიერია ადამიანიო?! — გაუ-  
კვირდა დევს.

— სწორედ ის გახლავთ, — უთხრა მელამ.

— აბა, წამოდი და ახლოდან ვნახოთო, — უთხრა დევმა.

— არა, ბატონო, — შეიცხადა მელამ, — მე მაგას ახლოდან კი არა, შორიდანაც ვერ დაუენახვები. აგე ილღიაში ჯოხივით რომ უჭირავს რაღაცა, იმისი მეშინია, რომ დამინახოს, იმას მოიმარჯვებს, ცალი თვალით გახედავს, ჩხაკანს დააძახებინებს და სულს გამაფრთხოებინებსო.

მელა დაბრუნდა, დევი მივიდა მწყემსთან და ჰკითხა:

— შენა ხარ ადამიანიო?

— სწორედ მე გახლავარო! — მიუგო ამაყად მწყემსმა.

— ღონეში გაქებენ და მინდა, გამოგცადო, — უთხრა დევმა.

— კეთილი და პატიოსანი, — უთხრა მწყემსმა, — მე, დიდი ხანია ვნატრობდი შენთან შეხვედრას და რაკი თვითონვე მოხვედი, უარს როგორ გეტყვი, მაგრამ უბედურება ის არის, რომ მოწმე არავინა გვყავს, რომ განსაჯოს რომელი ვაჯობებთ და სხვაც დაარწმუნოსო.

— მაშინ მოიყვანე მოწმე, ვინც გინდაო, — უთხრა დევმა.

— მოწმეს მოვიყვან, ეგ ძნელი არ არის, — უთხრა კაცმა, — მაგრამ მეშინია, ვაითუ შეგეშინდეს და ჩემს დაბრუნებამდე გაიპარო. ამიტომ მოდი, ხელ-ფეხს შეგიკრავ, რომ მოწმის მოყვანამდე არსად გამექცე და დიდი ხნის ნატვრა შენთან შეხვედრისა აუსრულებელი არ დამრჩესო.

— კარგიო, — დაეთანხმა დევი.

მწყემსმა გაშალა ოთხწვევრად დაგრეხილი თხის ბაღნის ქამანდი, შეუკრა დევს ხელ-ფეხი და დააგდო მიწაზე. ახლა მიყურე, როგორ მოწმეს მოგიყვანო, უთხრა, მოიმარჯვა შეინდის კომბალი და მისცხო და მისცხო დევს გვერდებში.

დევმა ყვირილი გააბა, მიშველეთო, მაგრამ ვინ უშველიდა. მწყემსი კი უყაპუნებდა და უყაპუნებდა მძიმე კომბალს და თან ნიშნის მოგებით დასძახოდა:

— კიდევ გაბედავ ჩემთან ჭიდილს, ჰა, კიდევ გაბედავო?!

დევი ძალიან რომ შეაწუსა ცემამ, გაიწია რაც ძალი და ღონე ჰქონდა, გაწყვიტა ქამანდი და თავქუდმოგლეჯილმა

მოკურცხლა. გადმოიხედა ღმერთმა მალლიდან და ჩამოს-  
ძასა:

— აკი გითხარი, ადამიანს ნუ შეეჭიდები, თორემ სირ-  
ცხვილნაჭამი დარჩები!

— მართლაც ყოფილა უძლეველიო, — მიუგო დევმა და  
თან სირბილს უმატა, — ემანდ კიდევ არ მომეწიოს და უა-  
რესი დღე დამაყენოსო.

საით წავიდა ის დევი, ან რომელ მხარეს გადაიხვეწა,  
არავინ იცის, ოღონდ ეგ კია, რომ იმ დღიდან დევთა მოდ-  
გმა სამუდამოდ გაქრა დედამიწის ზურგიდან.

ჭირი — იქა, ლხინი — აქა,  
ქატო — იქა, ფქვილი — აქა.







## ბ ე დ ი ს წ ე რ ა

იყო და არა იყო რა, ამქვეყნად რაღა არ ყოფილა და სხვათა შორის ერთი ვაჭარიც იყო. ეს ვაჭარი ჩარჩი იყო, სოფელ-სოფელ დადიოდა და ჩითსა და საწვრილმანოს ასაღებდა. ჩარჩობით საკმაო მოგებას შოულობდა და მდიდარიც იყო. ცოლისა და ერთი ქალიშვილის გარდა შესანახი არაუინ ჰყავდა და სახლი სულ თვალ-მარგალიტითა და ოქრო-ვერცხლის ნივთებით ჰქონდა გამოტენილი.

ერთხელაც ამ ჩარჩს ერთ სოფელში შემოაღამდა და ღამე ერთი მეთად ღარიბი კაცის სახლში გაათია. კაცს ცოლი ღუხმძიმედ ჰყავდა და სწორედ იმ ღამეს ვაჟი ეყოლა.

შუაღამე რომ მოახლოვდა, სახლში ბედის მწერლები შემოვიდნენ და დაიწყეს ბჭობა, ამ ახალშობილს რა ბედ-იღბალი დაუწეროთო. ზოგმა რა თქვა, ზოგმა—რა. ბოლოს მათი უფროსი წამოდგა და თქვა:

— მოდით, ამ ყრმას ბედნიერება ვუანდერძოთ. აქ რომ ვაჭარს სძინავს, მთელი იმისი ქონება ამას დარჩეს და ვაჭარი კი მოკვდესო.—დაწერეს, დაჰკრეს ბეჭედი და წავიდნენ.

ვაჭარს არ ეძინა, ბედის მწერლების ნალაპარაკევი ყველაფერი გაიგონა და გული ბოღმით აევსო, — ეს ვინ არის, რომ ჩემი ქონება დარჩესო, — თქვა გულში და დილაზე მშობლებს უთხრა:

— ეს ახალშობილი მე მომეცით გასაზრდელად და სამაგიეროდ მაგის წონა ოქროს მოგცემთო.

ღარიბი ცოლ-ქმარი ოქროს დახარბდნენ და ბიჭი ვაჭარს გაატანეს. წამოიყვანა ვაჭარმა ბიჭი და სოფელს რომ გა-

მოსცდა, მდინარეში გადააგდო, იქნებ დაიხრჩოსო და მომცილდესო. ბავშვი მდინარემ წაიღო და ვაჭარი თავისი გზით წავიდა.

ატარა მდინარემ ბავშვი, ატარა და ბოლოს ერთი წისქვილის რუში განხირა. ამ წისქვილის პატრონი უშვილო იყო, გამოვიდა, ნახა ბავშვი და სისარულით ცას ეწია. მაშინვე დასტაცა ხელი, გამოიხვია ჩოხის კალთაში და ცოლს მიუბრუნინა:

— სულ შვილს ნატრობდი და აჰა, ეგეც შეილიო.

მეწისქვილის ცოლსაც ძალიან გაუხარდა. მაშინვე ახალ ჩვრებში შეასვიეს, გააბანეს, თხის რძე დააღვინეს და, რაკი მისი პოვნა ღვთის წყალობად მიიჩნიეს, სახელიც წყალობა დაარქვეს.

გავიდა ხანი, ბიჭი გაიზარდა და კარგი თვალად-ტანადი ვაჟკაციც დადგა. ერთ ღღეს იმ ჩარჩმა მეწისქვილისკენაც ჩამოიარა და სავაჭრო ჩამოატარა — ჩითები, ქალის სამკაულები და ქამარ-ხანჯლები. მეწისქვილეს ბიჭისათვის სწორედ ქამარ-ხანჯლის ყიდვა უნდოდა და ბიჭს დაუძახა:

— წყალობავ, აბა, მოდი, ნახე და, რომელიც მოგეწონება, აირჩიეო!

მივიდა ბიჭი და ერთი შევერცხლილი ქამარ-ხანჯალი ამოარჩია. ჩარჩს მოეწონა ბიჭი და მეწისქვილესა და იმის ცოლს ჰკითხა, ასეთი კარგი ვაჟკაცისათვის წყალობა რად დაგიბრძნებიათო?

ცოლ-ქმარმა უამბეს ბიჭის თავგადასავალი. ჩარჩი მიხვდა, ვინც იყო ეს ბიჭი, და ცოლ-ქმარს უთხრა:

— მოდით, ეს ბიჭი მე მომეცით, გავზრდი, ვაჭრობაში გამოვწაფავ და კაცი დადგება. აბა, მეწისქვილეობით რა პური უნდა ჭამოს. სამაგიეროდ თქვენ ერთ საცხოვრის ფულს მოგცემთო.

ცოლ-ქმარმა თქვა: მართლაც ცოდოა ამისთანა ვაჟკაცი რომ მეწისქვილეობას შეაბერდეს, წავიდეს ქალაქში, თვალს გაახელს, ქვეყანას გაიცნობს, ცოდნას, გამოცდილებას შეიძენს და ჩვენც გამოგვადგება და თავის თავსაცო.

გამოართვეს ჩარჩს ფული და ბიჭი გაატანეს.

წამოიყვანა ვაჭარმა ბიჭი და ქალაქს რომ მიუახლოვ-

დნენ, წერილი დაუწერა, ასწავლა თავისი მისამართი, ქურჩა, სახლის ნომერი და უთხრა:

— ეს წერილი ჩემს ცოლს მიუტანე და მეც მალე მოვალ.

წაიღო ბიჭმა წერილი და შევიდა ქალაქში. წინ ერთი დარბაისელი კაცი შემოხვდა და ჰკითხა, ესა და ეს ნომერი სახლი და ქურჩა ხომ არ გეცოდინებათ?

კაცმა ქურჩაც იცოდა და სახლიც, ვაჭარსაც იცნობდა და გაუკვირდა, ამ ანგელოზივით ვაჟკაცს იმ ჯოჯოხეთ კაცთან რა უნდაო, და ბიჭს ჰკითხა:

— ვინა ხარ და იმასთან რისთვის მიდიხარო?

ბიჭმა უთხრა:

— ის კაცი ჩემი ბატონია და თავის ცოლთან წერილი გამომატანაო.

— აბა, მაჩვენე, რას სწერსო? — უთხრა კაცმა.

ბიჭმა მისცა წერილი, კაცმა წაიკითხა, წერილში ეწერა: „ეს ბიჭი ჩემი დაუძინარი მტერია, მოვიდეს თუ არა, მსახურებს მოაკვლევინე, ასო-ასოდ დააჭრევიანე და წყალში გადაყრევიანე“.

კაცი მიხვდა, როგორც იყო საქმე და ბიჭს უთხრა:

— შენს ბატონს წერა-კითხვა არა სცოდნია, ძალიან გაუგებრად არის ნაწერი, ქალბატონმა შეიძლება ვერც კი გაარჩიოს და გაგიწყრეს. მოდი, სუფთად გადაგიწერ და ის მიუტანეო.

ბიჭი დათანხმდა. კაცმა ის წერილი დახია და ასეთი წერილი დაუწერა: „ეს ბიჭი ჩვენი სასიძოა, მოვიდეს თუ არა, მაშინვე ჩვენს ქალზე ჯვარი დასწერე, დაკალი ძროხა, ცხვრები და კარგი ქორწილიც გადაუხადეო“.

ბიჭმა წაიღო წერილი და მიუტანა ჩარჩის ცოლს. ცოლმა წაიკითხა და ბიჭს კოცნა დაუწყო. მერე გამოვარდა კარში, შეყარა მთელი მოსამსახურეები და ცხვარ-ძროხის დახოცვა უბრძანა. ერთი მოსამსახურე მღვდელთან გაგზავნა, დასწერა ჯვარი ბიჭსა და თავის ქალიშვილს და კარგი ქორწილიც გააჩადა.

მოვიდა სახლში მეორე დილით ჩარჩი და ეს ამოდენა

ხალხი და ლხინ-მხიარულება რომ ნახა, კინალამ გაგიჟდა, გამოისმო ცოლი და ჰკითხა:

— ქალო, ეს რა ამბავიაო?

— რაც მომწერე, ის ამბავიაო, — ცოლმა უთხრა და წერილი აჩვენა. შემოიკრა თავში წელი ჩარჩმა, მაგრამ რაღას იზამდა, ამდენ ხალხში თავის განზრახვას ხომ ვერ გაამხელდა. მიუჯდა თვითონაც სუფრას და ნეფე-დედოფალი ტკბილი სიტყვებით დალოცა. თან გულში ბიჭს დაემუქრა, სულერთია, ბოლოს მოგიღებო.

ხალხი რომ გაისტუმრეს, ჩარჩმა მესაკირეებს უბრძანა:

— საკირე გაახურეთ და დილაზე ვინც პირველად მოვა თქვენთან, შიგ ჩაავდეთ. სულერთია, ვინ იქნება, ქალი თუ კაცი, მეც რომ მოვიდე, არ დამინდოთო.

— ბატონი ბრძანდებითო, — მიუგეს მესაკირეებმა და იმავე საღამოს შეუკეთეს საკირეს. დილას ჯერ რიჭრაყი არ იყო, რომ ჩარჩმა თავისი სიძე გააღვიძა და უთხრა:

— ხომ ხედავ ამოდენა სახლ-კარს და ცხოვრება-ქონებას, ამას მოვლა უნდა, ასლა პატრონი შენა ხარ, ადექი და მესაკირეებს მიხედე, ცუცხლი არ გაუნელონო.

ადგა ბიჭი და წავიდა საკირეზე. ის იყო, უნდა მისულიყო მესაკირეებთან, რომ მისდა ბედად, ეკლესიაში ცისკრის ზარი დარეკეს. ბიჭმა თქვა, მოდი, ჯერ წირვას მოვისმენ. მესაკირეებთან ცოტა გვიანაც რომ მივიდე, არა უშავსო, და ეკლესიისაკენ გაუხვია.

ცოტა ხნის შემდეგ ჩარჩიც ადგა. იფიქრა, ჩემი სიძე ასლა უკვე დამწვარი იქნებაო, და გულდაარსეინებული ამბის გასაგებად საკირისაკენ ღიღინ-ღიღინით წავიდა. მივიდა თუ არა საკირეზე, მესაკირეებმა, როგორც დარიგებული იყვნენ, სტაცეს ხელი და საკირეში შეაყუდეს.

ასე დასრულდა ბედისწერა: ვაჭარი მოკვდა, ხოლო მისი ქონება ბიჭს დარჩა და თავისი წუთისოფელი ტკბილად და უზრუნველად გალია.

ჭირი — იქა, ლხინი — აქა,

ქათო — იქა, ფქვილი — აქა.



## უკვდავი კაცი

იყო და არა იყო რა, ღვთის უკეთესი რა იქნებოდა, იყო ცოლ-ქმარი და ჰყავდათ ერთადერთი ვაჟი. ბიჭი ჩვეულებრივ იზრდებოდა და თანდათანობით ცხოვრების აუკარგსაც ეცნობოდა. თავის წამოზრდის ხანაში რამდენჯერმე შეესწრო სიკვდილს და ამან ძალიან დააფიქრა.

— ბიჭოს, ბოლოს თუ აუცილებლად მოვკვდები; მამ სიცოცხლეს რაღა მადლი უნდა ჰქონდესო, — თქვა გულში და გადაწყვიტა, — ისეთ ადგილას უნდა წავიდე, სადაც არ მოვკვდები და სულ ასე ჯეილად და ჯანმრთელად ვიქნებიო.

დღე-მამამ ბევრი უშალა, — ნუ წახვალ, ჩვენო იმედო და თვალის ჩინო, რა ვუყოთ, თავის წილად კაცს სიკვდილიც უნდა, უსიკვდილოდ არც სიცოცხლეს აქვს ფასიო. — მაგრამ ბიჭმა არ დაიშალა, ერთ მშვენიერ დღეს აიკრა გუდანაბადი, გადააკოცნა თვალცრემლიანი მშობლები და გაუდგა გზას.

ბევრი იარა თუ ცოტა იარა, ბოლოს ერთ ტრიალ-მინდორში გავიდა. მინდვრის შუაში ერთი ირემი იდგა და რქები ცისთვის ჰქონდა მიბჯენილი.

— სად მიხვალ, ჭაბუკო, საით გაგიწევიანო? — ჰკითხა ირემმა.

— უკვდავ-უბერებელ ადგილზე მივდივარ, სადაც არ დავებრდები და არც სიკვდილი გამეკარებაო.

— მოდი, ჩემთან დარჩი, — უთხრა ირემმა, — ამაზე დიდხანს სხვაგან ვერ იცოცხლებო.

— მაინც რამდენ ხანს ვიცოცხლებო? — ჰკითხა ბიჭმა.

— აი, ამ თვალუწვდენ მინდორს ხომ ხედავ, — უთხრა ირემმა, — სანამ სულ არ გაივსება ჩემი დაცვენილი რქებით, მანამდე მეცა და შენც ცოცხლები ვიქნებითო.

— მერე ხომ მაინც დავიხოცებითო? — ჰკითხა ბიჭმა.

— რა თქმა უნდა, — მიუგო ირემმა, — საბოლოო ხვედრი ყველასათვის სიკვდილიაო.

— არაო, — უთხრა ბიჭმა, — მე მუდმივი სიცოცხლე და უკვდავება მინდაო. — და გაუდგა ისევ გზას.

იარა, იარა და ერთ უღრან ტყეში შევიდა. ხის წვერზე ერთი ყვავი იჯდა, დაინახა ბიჭი და ჩამოსძახა:

— ჭაბუკო, შორი გზის მგზავრი ჩანხარ და საით გაგიწევიაო?

— ისეთი ადგილი უნდა მოვნახო, სადაც სიკვდილი ვერ მომწვდება და სამუდამოდ უკვდავ-უბერებელი ვიქნებიო.

— მაშინ დარჩი ჩემთან, — უთხრა ყვავმა, — აი, ხომ ხედავ ამ უკიდევანო ტყეს, სანამ მთლიანად არ გაავასებ ჩემი ბუმბულით, ორივენი ცოცხლები ვიქნებითო.

— ბოლოს ხომ მაინც დავიხოცებითო? — ჰკითხა ბიჭმა.

— რა თქმა უნდა, — უთხრა ყვავმა, — ბოლოს სიკვდილი ყველას უწერიაო.

— არაო, — უთხრა ბიჭმა, — მე მხოლოდ იქ დავარჩები, სადაც უკვდავ-უბერებელი ვიქნებიო. — და გაუდგა ისევ გზას.

იარა, იარა, ბევრი იარა თუ ცოტა იარა, ბოლოს ერთ ჭალაში გავიდა. ჭალაში უზარმაზარი წნორი იდგა. ჰკითხა წნორმა:

— საიდან მოხვალ, ჭაბუკო, ან საით გაგიწევიაო?

— უკვდავ-უბერებელ მხარეში მივდივარ, სადაც არც დავბერდები და არც მოვკვდებიო.

წნორმაც იგივე ურჩია:

— დარჩი ჩემთან, სანამ მე ვიქნები. შენც იცოცხლებ, აი, ამ ჭალას ხომ ხედავ, სანამ ჩემი ამონაყარი ყლორტებით არ გაავასებ, არ მოვკვდებიო.

— ბოლოს ხომ მაინც უნდა მოვკვდეთ? — ჰკითხა ბიჭმა.

— ბოლოს, რა თქმა უნდა, ყველა სიკვდილის შვილები ვართო.

— არაო, — უთხრა ბიჭმა, — მე მუდმივი სიცოცხლე მინდა და სანამ არ მივაგნებ ასეთ ადგილას, არ მოვისვენებ, — და გაუდგა გზას.

ბევრი იარა, თუ ცოტა იარა, ერთ დღეს გზაზე მეურმეებს წამოეწია.

— სად მისვალ, ჭაბუკო, ასე გაჩქარებულიო? — ჰკითხეს მეურმეებმა.

— ისეთ ადგილს ვეძებ, სადაც სიკვდილი არ არსებობს და მუდმივი სიცოცხლე სუფევსო, — მიუგო ბიჭმა.

— წამოგვეყვი და ეგეთ ადგილს ჩვენ გაჩვენებთო, — უთხრეს მეურმეებმა.

გაჰყვა ბიჭი მეურმეებს. ატარეს მეურმეებმა, ატარეს და ერთ ბოლის კოშკთან მიიყვანეს. უთხრეს მეურმეებმა:

— ამ კოშკში ერთი უკვდავ-უბერებელი მზეთუნახავი ქალია, მიდი მასთან და, თუ მიგიღო, შენც უკვდავი გახდებიო.

ბიჭი გამოემშვიდობა მეურმეებს, მივიდა კოშკთან, დაჯდა ფანჯრის ძირას და დაუწყო გათენებას ლოდინი. გათენდა დილა, გამოიხედა მზეთუნახავმა ქალმა ფანჯრიდან, დაინახა ბიჭი და ჰკითხა:

— ვინა ხარ, ან ამ ჩემს კოშკთან რასა ზიხარო?

— უკვდავ-უბერებელ ადგილს ვეძებ, მინდა სულ ასეთი ჯეელი ვიყო და ვერც სიკვდილი მომეკაროსო.

— თუ მუდმივად ჩემთან დარჩები და წასვლას არ მოინდომებ, არც ფერი შეგეცვლება, არც ჯანი და უკვდავიც იქნებიო, — უთხრა ქალმა.

ბიჭს ძალიან გაუხარდა და მიუგო:

— ოღონდ ეგ მეღირსოს და აქედან ფეხსაც არ მოვიცვლიო.

აიყვანა ქალმა კოშკში და დაიწყო ერთად ცხოვრება.

გავიდა ასეული წლები, გავიდა საუკუნეები, ათეული ოცეული, და ბიჭს არც სიბერე მიჰკარებია, არც სიკვდილი, არის ისეთივე, როგორც პირველ დღეს მოვიდა.

ბიჭი ჯერ კმაყოფილი იყო, გემრიელი სასმელ-საჭმელი და მოსვენება არ ეკლდა, გვერდით მზეთუნახავი ქალი ჰყავთა და თავს ბედნიერად თვლიდა, მაგრამ თანდათან ყველაფერი მობეზრდა, ისევ თავისი მიწა-წყალი მოენატრა და სულ უფრო მოიწყინა. ბოლოს ველარ გაუძლო ნაღველს და ქალს უთხრა:

— ჩემი მიწა-წყალი, ნაცნობი ადგილები მომენატრა და უნდა წავიდე და ვნახო.

— ნუ წახვალ, თორემ უკან ველარ დაბრუნდებიო, — ურჩია ქალმა.

მაგრამ ბიჭმა არ დაუჯერა და წამოვიდა. მოვიდა იმ ჭალაში, სადაც წნორი იდგა, ჭალა სულ გადაბერებული წნორებით იყო მოფენილი, მაგრამ ის წნორი აღარსად ჩანდა. წამოვიდა და მივიდა იმ ტყეში, სადაც ყვავი ნახა, ყვავი აღარსად იყო და იმისი ბუმბულიც მიწას შეეჭამა. ასეთივე სურათი დახვდა ტრიალ მინდორშიც, აღარც ირემი იყო და არც მისი დაცვენილი რქები, ჩონჩხებიც არსად ჩანდა, მინდორს ღიჭი და ბუჩქნარი მოსდებოდა და ქვეწარმავლებით ავსილიყო.

გამოსცდა ბიჭი მინდორსაც, იარა, იარა და მიაღწია თავის სოფელს, მაგრამ სადღა იყო სოფელი ან ნასახლარი. უცვლელად მხოლოდ სოფლის თავს სივრცე გაწოლილი სერი დარჩენილიყო, სოფლის ადგილას კი ქალაქი გაშენებულიყო. ქუჩებში აუარებელი ხალხი გაშლილიყო და ერთი ხმაური და ყრიაშული გაუდიოდათ. მაგრამ რა ხალხი იყო, ბიჭს რომ ახსოვდა, იმ ხალხს აღარათრით ჰგავდნენ, არც სახით, არც ჩაცმით და არც ყოფაქცევით. თავის მხრივ არც იმ ხალხს ენახა ბიჭისნაირი ადამიანი და გაკვირვებით უყურებდნენ. ბიჭი გაერია ხალხში და გამოესაუბრა; მაგრამ ყველა ისე მოერიდა, როგორც ჭირიანს და ვერც ნაუბარი ვისმეს გააგებინა. უკან დაბრუნება მოინდომა, მაგრამ გზა ველარ გაიგნო. დგას ბიჭი გაოგნებული და აღარ იცის, რა ქნას, ძველი და ახალი მოგონება და სინამდვილე თავში დომხალივით აერია და მარტოობისაგან თავზარი დაეცა. ბიჭი ახლად მიხვდა, რომ უკვდავება დიდი სიკეთე არ ყოფილა. უცბად დაიჩოქა და ღმერთს შეესვეწა:



— ღმერთო, ოღონდ მომკალი, ჩემი სული მიიბარე და საიქიოშიც შენი მლოცველი ვიქნებიო.

ღმერთმა უსმინა ვედრება, გამოუგზავნა მთავარანგელოზი გაბრიელი და სული ამოხადა.

ასე დაასრულა უკვდავების მაძიებელმა კაცმა თავისი სიცოცხლე. ნატვრა აუხდა, მაგრამ ნანატრი საბოლოოდ ისევ სანანებელი გაუხდა.

ჭირი — იქა, ლხინი — აქა,  
ქათო — იქა, ფქვილი — აქა.





## კოკროჭინა

იყო და არა იყო რა, იყო ერთი ღარიბი გლეხკაცი. ჰყავდა ერთი ოქროსქორიანი პატარა ბიჭი. იმ ბიჭს ნამდვილი სახელიც ერქვა, მაგრამ ყველანი კოკროჭინას ეძახდნენ.

ერთხელ გლეხი ყანაში წავიდა სამუშაოდ. კოკროჭინა გაეტირა, მეც უნდა წამოვიდეო. მამამ უთხრა:

— იქ წყალი არ არის, შვილო, მოგწყურდება, მარტო წყაროზე ვერ წახვალ და გამაცდენო.

— არა, არ მომწყურდებაო, — დაიჟინა ბიჭმა. მამამაც წაიყვანა. მუშაობს მამა ყანაში, კოკროჭინა კი ტყის პირას ჩიტის ბუდეებს ეძებს. დასცხა. მოსწყურდა. პირი უშრება. ითმინა, ითმინა და ბოლოს ველარ მოითმინა.

— მამი, წყალი მწყურიაო.

რა უნდა ექნა მამას, საქმეს თავს ხომ არ დაანებებდა! აბგიდან მჭადი ამოიღო და კოკროჭინას უთხრა:

— აი ამ მჭადს გავაგორებ და შენ უკან მიჰყევი. სადაც ეს გაჩერდება, წყაროც იქ იქნება. მალლა არ აიხედო, ისე დალიე და გამოიქეცი უკანო.

მიგორავს მჭადი და მისდევს კოკროჭინა. ბოლოს წაიქცა მჭადი და წყაროც გამოჩნდა. მივიდა ბიჭი წყაროსთან, დალია წყალი და, აბა, რა არის მალლაო, აიხედა.

აიხედა და რას ხედავს? ვაშლის ხე დგას და თურაშაული წითელი ვაშლებით არის დახუნძლული. კოკროჭინა გახარებული აფოფხდა ხეზე და დაუწყო ვაშლებს კრეფა და ჭამა.

სად იყო და სად არა; გაჩნდა ვაშლის ძირას პატარა, მოკუზული, ღრჯოლებიანი კუდიანი დედაბერი.

— შვილო, შვილო, მადლის გულისათვის ერთი ვაშლი ჩამომიგდო! — კოკროჭინამ ჩამოუგდო. დედაბერმა აიღო ვაშლი, ერთ ლუკმად შესანსლა და ისევ ასძახა:

— ის ვაშლი ტალახში ჩამივარდა, კიდე ჩამომიგდო! კოკროჭინამ მეორე ვაშლიც ჩამოუგდო. დედაბერმა ისიც შესანსლა და შეესხვეწა:

— ისიც ტალახში ჩამივარდა. შენს გაზრდას, დამიწიე ვაშლის ტოტი, მე თვითონ მოვწყვეტო.

კოკროჭინა დაბლა ტოტზე გავიდა და დაუწია. დედაბერმა მოზიდა ტოტი; სწვდა კოკროჭინას ფეხში, ჩამოათრია ხიდან, ჩასვა გუდაში, მოუკრა თავი და ზურგზე წამოიკიდა. ნიდის, მიკუნკულებს. დაილაღა. გუდა მოიხსნა. თვითონ ბუჩქებში გადაუსვია. კოკროჭინამ იფხაკუნა, იფსაკუნა და ამოძვრა გუდიდან. გუდაში რიყის ქვები ჩაყარა, თავი მოუკრა, გაიქცა და ისევ ვაშლის ხეზე ავიდა.

დაბრუნდა დედაბერი, მოიკიდა გუდა ზურგზე და ისევ კუნკულით გასწია შინისაკენ.

მიაღგა თავის ქოხის კარს და დაუძახა რძალს:

— პატარძალო, პატარძალო, გამოიტანე გობ-საცერი, ოქროსქოჩრიანი ბიჭი მოგიყვანეო.

გამოვიდა ქოხიდან გობ-საცრით ალქაჯი. ზღის სიხარულით და აკრატუნებს ღრჯოლებს. უქნეს თავი გობზე გუდას მაგრამ გობი მარტო რიყის ქვით გაივსო.

— სად არის ოქროსქოჩრიანი ბიჭიო? — იკითხა მსუნაგმა ალქაჯმა.

შერცხვენილი დედაბერი ისევ ვაშლის ხისკენ წაკუნკულდა. მივიდა ვაშლის ხის ძირას და ისევ დაუწყო ხვეწნა კოკროჭინას:

— შვილო, შვილო, გაგეხუმრე. ჩამომიზნიქე ერთი ტოტი, მშიერს ნუ დამტოვებ, დედაშვილობასაო.

არ დაუჯერა კოკროჭინამ, მაგრამ დედაბერმა ისე მოისაწყლა თავი, ისე ევედრა, და ეხვეწა, რომ შეებრალა კოკროჭინას, დაუზნიქა ტოტი. დედაბერი სწვდა კოკროჭინას ფეხში, ჩამოათრია ხიდან, ჩასვა გუდაში, მოუკრა თავი, წამოიკიდა ზურგზე და დაუსვენებლად მიიყვანა შინ. უქნა თავი

ვი გობზე გუდას და ოქროსქოჩრიანი ბიჭი გაუგორა წინ თა-  
ვის ალქაჯ პატარძალს.

ზრდიდნენ და ასუქებდნენ დედამთილი და პატარძალი ამ  
ბიჭს. ერთხელ დედამთილი თავის საკუდიანო საქმეებზე წა-  
ვიდა და პატარძალს ჩუმიად დაუბარა:

— დღეს ეგ ბიჭი დაკალი, შემოდგი ქვაბით კერაზე და  
მომიხარშეო.

კოკროჭინამ ყური მოჰკრა დედაბრის სიტყვებს. გახარე-  
ბული ალქაჯი დედაბერი წავიდა თუ არა, მაშინვე დანის  
ლესვას შეუდგა. კოკროჭინამ უთხრა:

— მომეცი ეგ დანა, გალესვაში მოგეხმარებო.

რა იცის მსუნაგმა ალქაჯმა, რომ ბიჭმა კუდიანი დედაბ-  
რის ნათქვამი გაიგონა. აიღო და მისცა დანა, თვითონ დგას  
და ნერწყვს ყლაპავს. გაუქნია ბიჭმა ის დანა ალქაჯს და  
გააგორა კიტრივით. კუდიან დედაბერს ერთი შავი კატაც  
ჰყავდა. საკუდიანო საქმეებში ეხმარებოდა. სანამ ის იქნე-  
ბოდა ცოცხალი, დედაბერი ყველგან გამარჯვებული გამო-  
ვიდოდა. ატეხა იმ კატამ კნავილი. ისეთი ხმით ღწოდა, მე-  
ორე სოფელში გავიდოდა მისი ხმა. სწვდა კოკროჭინა კა-  
ტას და ისიც ზედ წააკლან ალქაჯს. ნახა ქვაბი თუხთუხებდა,  
აკუნა ის კატა და შიგ ჩაყარა. ალქაჯი ტახტიქვეშ დამალა,  
თვიღონ კი სხვენზე აძვრა.

დაბრუნდა დედაბერი. შორიდანვე დაუწყო პატარძალს  
ძახილი. ხმას აჩაყინ სცემს. იფიქრა, მეზობლებშია გადასუ-  
ლიო. შევიდა შინ, ჩაიხედა ქვაბში და სიხარულით შესძახა:

— ოო, რა სადილი დაუხვედრებია ჩემს პატარძალსო.

ამოიღო ხორცი ქვაბიდან და დაუწყო ჭამა. ამ დროს  
სხვენიდან კოკროჭინამ ჭვარტლი გადმოაყარა ხორცზე. დე-  
დაბერს თავი ეგონა და ასძახა:

— ფრთხილად. თავუნიავ, თორემ შეგაკნატუნებო.

კიდევ ჩამოცვივდა ჭვარტლი. ახლა თავისი კატა ეგონა.

— ციც, ციცუნია, ფრთხილად, თორემ შენც შეგახრამუ-  
ნებო!

ჭვარტლი ისევ ჩამოცვივდა. აიხედა დედაბერმა და გაშ-  
ტერდა: სხვენში არა ზის პატარა ოქროსქოჩრიანი ბიჭუნა!

შემოეყარა გულს. მიხვდა, რა ამბავიც იყო მის თავს. აქეთ ეცა. იქით ეცა, მაგრამ ვერაფერს გახდა. სხვენში ვერ ავიდა. მაშინ ტკბილი სიტყვებით სცადა ბიჭის ხელში ჩაგდება.

— კოკროჭინავ, შეიღო! მითხარი, დედაშვილობას, როგორ ასვედი მანდაო?

— როგორ და გავახსურე კეცი, დავკარი საჯდომი ზედ და ამოვხტიო.

დედაბერი ეცა მაშინვე კეცს, გაახსურა, დაჰკრა საჯდომი, დაწვით კი დაიწვა და გამწარდა, მაგრამ ახტომით სხვენში რას ახტებოდა. ისევ შეეხვეწა კოკროჭინას:

— სწორი მითხარი, როგორ ასვედი მანდაო?

— დავდგი საჩეჩელი, დავკარი საჯდომი და ამოვხტიო. დაფაცურდა დედაბერი, დადგა საჩეჩელი, საჩეჩელზე დაჰკრა საჯდომი, მაგრამ ზედ ჩამოეგო, სხვენში კი ვერ იქნა და ვერ ახტა.

მაშინ მესამედ შეეხვეწა დედაბერი:

— მითხარი, შე არ გასაზრდელო, როგორ ასვედი მანდაო?

— სწორი თუ გინდა, ეს არის: გავახსურე თონე, გადავაფარე ფარდაგი, ვკარ ბუქნა ზედ და ამოვხტიო.

დედაბერი თონეს მივარდა. გაახსურა, გადააფარა ფარდაგი, დახტა ზედ და აგიზგიზებულ თონეში ჩაფარდა ჩაიწვა და ამოიბუგა მისი სახსენებელი.

ოქროსქონრიანი კოკროჭინა კი ჩამოვიდოშირს, იოუსვა, რაც ძალი და ღონე ჰქონდა, შინისაკენ. მის შემდეგ მამას ყველაფერს უგონებდა.

ჭირი — იქა, ლხინი — აქა,

ქათო — იქა, ფქვილი — აქა.





## სელეწიწის ღვლა

ზღაპარ იყო, ზღაპარ იყო,  
 ღობეს ჩიტე მომკვდარიყო,  
 დიდ ქვაბში არ ეტეოდა,  
 პატარაში ლაღე იყო,  
 ასმა კაცმა ვერ შეჭამა,  
 ერთი კაცის ლუკმა იყო.

იყო ერთი მდიდარი სოვდაგარი და ჰყავდა სამი ლამაზი ქალიშვილი. ერთხელ სოვდაგარი უცხო ქვეყნებში წასასვლელად მოეზადა, წასვლის წინ თავისი ქალიშვილები დაიბარა და უთხრა:

უცხო მხარეს სავაჭროდ მივდივარ და მითხარით, რა მოგიტანოთ?

უფროსმა ქალიშვილმა სთხოვა:

— ისეთი კაბა მომიტანე, რომ თავისით ჩამეცვას და თავისით გამეხადოსო.

შუათანამ სთხოვა:

— ისეთი სარკე მომიტანე, რომ ჩავიხედო და შიგ მთელი ქვეყნიერება მოჩანდესო.

ჯერი ნაბოლარა ქალიშვილზე მიდგა, ნაბოლარას ერთი ძალიან ჭკვიანი ძიძა ჰყავდა და იმას დაეკითხა:

— მამა უცხო მხარეს მიდის და მირჩიე, რა დავაბართო. ძიძამ უთხრა:

— ისეთი ვაშლი მოგიტანოს, რომ ნატვრა ავისრულდესო.

დაბრუნდა უმცროსი ქალიშვილი მამასთან და უთხრა:

— ისეთი ვაშლი მომიტანე, რომ შევჭამო და ხელმწიფის დედა გავხდეთ.

— კარგო, — უთხრა მამამ და წავიდა.

დაბრუნდა მამა ერთი წლის შემდეგ და უფროს ქალიშვილს კაბა მოუტანა, შუათანას — სარკე. უმცროსს კი უთხრა:

— რა ვქნა შეილო, შენი თხოვნა ვერ შევასრულე. ის ნატვრის ვაშლი ერთ უდაბნოში მდგარა, ირგვლივ გველების ღობე ჰქონია შემოვლებული და მცველებად პირდაღებული გველეშაპები ჰყოლია. იმ ხეს ჯერ კაციშვილი არ მიჰკარებია და აბა მე როგორ მოგიტანდიო.

დაღონდა ნაბოლარა ქალი, დაიწყო ტირილი და ძიძასთან წავიდა. ძიძამ ჰკითხა, — რად სტირი, ჩემო თვალისჩინოო?

— ასე და ასეა ჩემი საქმე, — უთხრა ქალიშვილმა, — მამამ ჩემს დებს დანაპირები აუსრულა, ჩემი დანაბარები ვაშლი კი ვერ უშოვნია და ხელცარიელი დაბრუნდაო.

ძიძამ ანუგეშა:

— ნუ სტირი, ჩემო თვალის სინათლე, თუ ყოჩაღად მოიქცევი, იმ ვაშლს შენ თვითონ იშოვი. წადი აღმოსავლეთისაკენ, იარე, იარე და ერთი ხრიოკი უდაბნო შეგხვდება. ის ვაშლი სწორედ იმ უდაბნოში დგას. შუადღისას, მზე რომ მაღლა აიწევს და ჩამოცხება, გველები და გველეშაპები იძინებენ, გადაახტი მძინარე გველებს, დაკრიფე რამდენიც გინდა და გამოიქეციო.

მოიშადა ქალმა საგზალი და წავიდა. ბევრი იარა, თუ ცოტა იარა, ბოლოს მივიდა გახრიოკებულ უდაბნოში. გაიხედა და დაინახა ნანატრი ვაშლის ხე. მართლაც გარს გველების ღობე ერტყა და სამი პირდაღებული გველეშაპი დარაჯად ედგა. ქალმა შეიცადა, სანამ მზე შუა ცაზე არ აიწია და გველ-ვეშაპებს არ დაეძინათ, მერე ისეუპა, გადაახტა გველების ღობეს და ხესთან მივიდა. მოსწყვიტა სამი ვაშლი და საჩქაროდ უკანვე გამობრუნდა. გადმოხტომისას აჩქარებულს ფეხი დაუცდა, ერთი ვაშლი გაუვარდა და მძინარე გველეშაპს დაეცა. გველეშაპმა თვალი გაახილა და საშინე-

ლი წივილი ატეხა. წივილზე სხვა გველეშაპებს და გველებსაც გამოელვითათ და წივილ სისინით გამოეკიდნენ ქალს.

მორბის ქალი, რაც ძალი და ღონე აქვს, და მოსდევნ გველები და გველეშაპებიც. ქალს თანდათან ღონე ელევა, მუხლი ეკვეთება, აღარ იცის, რა ქნას, გული შიშისა და დაღლილობისაგან ამოვარდნაზე აქვს. ბოლოს ერთი ვაშლი შეჭამა, მეორე გველეშაპებს გადაუგდო და ღონეგამოცლილი უგრძობლად ჩაიკეცა.

გონს რომ მოვიდა, აღარც გველეშაპები იყრ სადმე და აღარც გველები. ტრიალ მინდორში მარტოდმარტო იწვა და ირგვლივ არაფერი ჩანდა, არც ხმა ისმოდა. წამოდგა და გაიხედ-გამოიხედა, უნდა დაბრუნდეს შინ, მაგრამ არ იცის, საით წავიდეს. ერთხანს გაოგნებული იდგა, მერე მზეს გახედა და დასაველეთისაკენ წავიდა.

იარა, იარა და მზის ჩასვლისას ერთ განმარტოებულ საყდარს მიადგა. გაუხარდა, თავშესაფარი მაინც შექნებაო, მაგრამ ეკლესიის კარი შიგნიდან დაკეტილი დაუხვდა. დაჯდა ქალი კარის ზღურბლზე და ტირილი დაიწყო. კარგა რომ ჩამოხნულდა, შიგნიდან რაღაც ხმაური გაიგონა. ქალს შეეშინდა და კარებს უკან, საყდრის კუთხეს მოეფარა.

უცებ ეკლესიის კარი გაიღო და ერთი მშვენიერი ვაჟაკი გამოვიდა. ბიჭმა კარი ღია დატოვა და ეზოში გაისეირნგამოისეირნა, ქალმა დრო იხელთა და საყდარში შევარდა. ხედავს: ერთ კუთხეში კუბო დგას, მეორეში — გაშლილი მაგიდა. ქალს შია, მაგრამ საჭმლისათვის ხელის ხლება ვერ გაბედა და მაგიდის ქვეშ დაიმალა. გათენებისას ბიჭიც შემოვიდა, დაიბანა პირი, ჭამა საჭმელი და მზის ამოსვლამ რომ მოაწია, ახადა კუბოს სახურავს და შიგ ჩაწვა.

გამოძვრა ქალი და კუბოსთან მივიდა, რომ ბიჭს საჭმელი სთხოვოს, მაგრამ უკვე მკვდარი დახვდა. ქალს მეტის მოთმენა აღარ შეეძლო; მიუჯდა სუფრას და საჭმელი ჭამა, ერთი ჭიქა ღვინოც დააყოლა და საღამოს ისევ მაგიდის ქვეშ დაიმალა.

კარგა რომ ჩამოხნულდა, ვაჟი ისევ გაცოცხლდა, წამოდგა კუბოდან, გაიარ-გამოიარა და სუფრას მიუჯდა. და-



ხედა საჭმელს, მიხვდა, რომ ვიღაცას ეჭამა, და გაკვირვებულმა ხმამაღლა წამოიძახა:

— სამი წელია, აქა ვარ და ჯერ ასეთი რამ არ შემომჩნევია, ნეტა ვინ მოვიდა ისეთი გაჭირვებული, რომ ამ უკაცრიელ საყდარში შემოსვლა იკადრა და ჩემი იჯრა გაიზიარაო?

ქალს მოეწონა ვაჟი და მაგიდის ქვეშიდან გამოვიდა. შეხედა ვაჟმა და ამასაც მოეწონა, — მშვენიერი ქალიაო. დასხდნენ და ერთმანეთს თავგადასავალი და ვინაობა გამოჰკითხეს. ჯერ ქალმა ჰკითხა:

— რა მიხეზია, რომ დღისით კვდები და ღამით ცოცხლდებიო?

ვაჟმა უამბო:

— მე ხელმწიფის შვილი ვარ, ნადირობას ვიყავი გადაყოლილი. ერთხელაც ჩვეულებრივ წავედი სანადიროდ. ერთ ჩემს გამოვეკიდე და მთელი დღე ვდიე. ბოლოს ერთ მაღალ მთაზე ავიდა. მეც უკან მივყევი. მთაზე რომ ავედი, გავარვარებული მზე ორივე თვალით დაჰყურებდა დედამიწას და ყველაფერს წვაავდა. მე სიცხეს ველარ გავუძელი, ვესროლე მზეს ისარი და ცალი თვალი წამოვთხარე. იმის შემდეგ გაჩნდა ღამე და დედამიწის ნახევარი ბნელშია გახვეული. ამაზე მზემ დამსაჯა და ასე მაწვალებს: დღისით მკლავს და ღამით მაცოცხლებს. დედ-მამამ ველარ გაუძლო ჩემს ტანჯვას, ამიტომ ეს საყდარი ამიშენეს, ამ კუბოში ჩამაწვინეს. დღეში ერთი პური, ერთი ცხვრის ბარკალი და ერთი ჩარეკა ღვინო მეძლევა და ამით ვსაზრდობო.

მერე ქალმაც უამბო თავისი თავგადასავალი. შეუყვარდათ ერთმანეთი და დაიწყეს ერთად ცხოვრება. ვაჟი დღისით კვდებოდა, ღამით ცოცხლდებოდა და დროს ერთმანეთის ალერსში ატარებდნენ. გავიდა ხანი და ქალი დაორსულდა. ცხრა თვის შემდეგ ეყოლა ვაჟი.

რაკი შვილი ეყოლა, ვაჟს უფრო შეუყვარდა ქალი და მასთან სულ უფრო დიდხანს რჩებოდა. ერთხელაც ისე გაერთნენ ალერსში ორივენი, რომ მზის ამოსვლა ველარ შეამჩნიეს, ბიჭმა კუბოში ჩაწოლა ველარ მოასწრო და მოკვდა. ქალმა ბევრი იტირა და ივაგლახა, მაგრამ რას უშველიდა; ბოლოს გაუთხარა საფლავი და დამარხა.

დარჩა ქალი მარტოდმარტო, ძუძუთა ბავშვის ანაბარა, ულუკმაპუროდ. ქმრის სიცოცხლეში საჭმელი გამოუღვეელი ჰქონდათ, რასაც შეჭამდნენ და მოაკლებდნენ დღიურ ულუფას, მეორე დღისათვის პურიც, ღვინოც და ხორციც ისევ მთელდებოდა. ასლა კი ერთ ჭამაზევე გათავდა და აღარ გამთელდა. რაღა უნდა ექნა ქალს, ადგა, აიყვანა ხელში ბავშვი და გაუდგა გზას. გზადაგზა ბალასს, ხის ნაყოფს ჭამდა და შვილსაც და თავის თავსაც ამით ასაზრდოებდა.

ასე იარა ქალმა მთელი თვე, ბევრი მთა გადალახა და ბევრი გაჭირვებაც გამოიარა. ბოლოს ერთ ქალაქში შევიდა და ერთ მოხუც ცოლ-ქმარს თავშესაფარი სთხოვა. ცოლ-ქმარი უშვილოები იყვნენ და ქალის მისვლა ძალიან გაუხარდათ, — ვიშვილებთ და შვილიც გვეყოლება და შვილიშვილიცო.

მართლა იშვილეს და დაიწყო ქალმა დედობილ-მამობილთან ცხოვრება. გავიდა ხანი, ბიჭი გაიზარდა და კარგი ვაჟკაცი დადგა. თავის ცოლებში რომ გაერეოდა, ხალხს თვალი ზედ რჩებოდა, გაიძახოდნენ, — ნეტავი შენს პატრონსო.

იმ ქვეყნის ხელმწიფე ღრმად მოხუცი იყო, მაგრამ შვილი არ ჰყავდა, რომ ტახტი და სახელმწიფო ჩაებარებინა. ერთ დღეს ხელმწიფემ დაიბარა მისნები და უთხრა:

— მე დავბერდი, დღეს თუ ხვალ ფეხებს გავჭიმავ და ქვეყანა უპატრონოდ დარჩება. მირჩიეთ, ვინ დავსვა ხელმწიფედ, რომ ჩემი სიკვდილის შემდეგ ტახტსაც და სახელმწიფოსაც პატრონი ჰყავდესო.

მისნებმა უთხრეს:

— შეკრიბე მთელი შენი სამფლობელო, გაუშვი შენი საუკეთესო შევარდენი და ვისაც ის მხარზე დააჯდება, ხელმწიფობა იმას გადააბარეო.

ხელმწიფეს ეს რჩევა ჭკუაში დაუჯდა, შეკრიბა მთელი საბრძანებელი და გაუშვა თავისი საუკეთესო შევარდენი. შევარდენი აფრინდა, იტრიალა ხალხის თავზე, მაგრამ მხარზე არც ერთს არ დააჯდა. ხელმწიფემ მეორედ გაუშვა შევარდენი, მაგრამ მეორედაც იგივე ქნა. მაშინ ხელმწიფემ

ნაზირ-ვეზირები მოიხმოდნენ და ჰკითხა, მოსაყვანი ხომ არავენ გამოგრჩათ?

— არავენ, დიდებულ სელმწიფე, — მოახსენეს ნაზირ-ვეზირებმა, — მარტო ერთი კაცი გვაკლიაო.

— ვინ არისო? — იკითხა სელმწიფემ.

— აქ ერთ მოხუც ცოლ-ქმარს ნაშვილები დედა-შვილი ჰყავს და მხოლოდ ის ბიჭილა გვაკლიაო, — მოახსენეს ნაზირ-ვეზირებმა.

— მოიყვანეთ ორივენიო! — ბრძანა სელმწიფემ.

ააფრინა სელმწიფემ თავისი შვეარდენი. შვეარდენმა იტრიალა, იტრიალა და ბიჭს დააჯდა მხარზე. მეორედ აუშვეს შვეარდენი და მეორედაც ამ ბიჭსავე დააჯდა. წაიყვანეს ბიჭი, სელმწიფის საჯინიბოში დაამწყვდიეს და შვეარდენი მესამედ გაუშვეს. აფრინდა შვეარდენი, ხალხის თავზე რამდენჯერმე შემობოინდა, მერე საჯინიბოში შეფრინდა და ისევ ბიჭს დააჯდა მხარზე.

ახლა კი ყველამ ირწმუნა და სელმწიფეც დაყაბულდა, მაგრამ სანამ ტახტსა და გვირგვინს გადაულოცავდა, ჯერ ვინაობის გაგება მოინდომა — ვილაც გადამთიელს, შემოხიზნულს სელმწიფედ ვირჩევთ და გავიგოთ მაინც, ვინ არის, რა გვარ-ტომის ჩამომავალიაო. დაიბარა ბიჭის დედა სასახლეში და ვინაობა გამოჰკითხა. ქალმა ყველაფერი დაწერილებით უამბო, ვინც იყო თვითონ და შვილი ვისგანაც ჰყავდა.

სელმწიფე და დედოფალი ცას ეწივნენ სიხარულით, თურმე ის კუბოში მწოლარე ვაჟი, ვისგანაც ქალს ეს ბიჭი ეყოლა, ამათი შვილი ყოფილიყო. გადაეხვივნენ ქალს და დაუწყეს კოცნა, — შენ ჩვენი რძალი ყოფილხარ და ჩვენთვის ტახტის მემკვიდრე და შვილიშვილი გაგიზრდიაო.

სელმწიფემ იმავე დღეს მოიწვია დიდებულები, მთელი სამღვდელთა, შვილიშვილი სელმწიფედ აკურთხებინა და დიდი ნადიმიც გადაიხადა.

ასე გახდა სოვდაგარის ნაბოლარა ქალიშვილი სელმწიფის დედა.

ჭირი — იქა, ლხინი — აქა,

ქატო — იქა, ფქვილი — აქა.



## ჯეკარტიშული სიგართლე

იყო და არა იყო რა, იყო ერთი სახელგანთქმული მონადირე. ერთხელაც ჩვეულებრივ წავიდა სანადიროდ, ბევრი იარა, ბევრი კლდე-ღრე-დათელა, მაგრამ ვერაფერი ინადირა. გამობრუნდა შინისაკენ ხელცარიელი და დაღლილ-დაქანცულმა ერთ მდინარის პირას შეისვენა.

უცბად ველზე ირემი გამოჩნდა, ერთი ორჯერ შეიკუნტრუშა, ტოტიანი რქები შეარხია და ძოვა დაიწყო. მონადირემ წამოუწვერა თოფი, ესროლა და გააგორა. რაკი სამწვადე გაუნდა, ხის ძირას ცეცხლიც დაანთო და ირემის გატყავებას შეუდგა. გატყავებისას როგორღაც უნებურად თავზე გადააბოტა და ლამაზ ქალად გადაიქცა.

დაღონდა მონადირე ძალიან — რა ვქნა, ქალადქცეული ხალხში როგორღა გამოეჩნდეთ, მაგრამ დაღონებითა და წუხილით თავს ველარაფერი უშველა. აიყარა სანადირო იარაღები — თოფ-სასწრაფო, ქამარ-ხანჯალი, იქვე ხეზე დაჰკიდა და გასწია უცხო ქვეყნისაკენ.

ბევრი იარა თუ ცოტა იარა, ცხრა მთა გადაიარა, ცხრა ზღვა გადაცურა და ბოლოს ერთ უცხო ქალაქში შევიდა. ერთი ბებერი ეზოში ძროხას წველიდა, დაინახა ქალი, შეატყო, რომ უცხო იყო, და გამოელაპარაკა:

— ვინა ხარ, შვილო, ვისი შვილი ხარ, როგორ გაგიმეტა შენმა პატრონმა, რომ ამ უდროოდ დროს გარეთ გამოგიშვაო?

ქალმა შესჩილა, უპატრონო ვარ და სწორედ პატრონს

დავეძებ. თუ იმდენ სიკეთეს მიზამ, რომ შენთან დამაყენებ, დედად მიგიჩნევ და ერთგულად გემსახურები. ჯანი არ მაკლია და ღონე, და რასაც დამავალებ, ყველაფერს გაგიკეთებო.

გაუხარდა ბებერს და შეიყვანა ქალი შინ. დარჩა ქალი ბებერთან ამ დღიდან და მართლა ერთგული სამსახურიც გამოიჩინა. შორს გავარდა ქალის სილამაზისა და სიყოჩაღის ხმა, მოდიან და მოდიან მთხოვნელები, მაგრამ ქალი ყველას უარს ეუბნება.

ერთხელ ქალაქზე ხელმწიფის შვილმა გამოიარა. დაინახა თუ არა ქალი, გულში მაშინვე სიყვარული ჩაუვარდა, დაბრუნდა შინ და მამას უთხრა:

— ჩვენს ქალაქში ერთ ბებერს ერთი ლამაზი ქალი ჰყოლია, თუ ის ცოლად არ მოვიყვანე, თავი ცოცხალი არ მიხდაო.

ამ ქალის ქება მეფესაც გაგონილი ჰქონდა და შეიღს უარი არ უთხრა. მაშინვე გაგზავნა კაცები, მოაყვანინა ქალი და თავის შვილზე ჯვარი გადასწერა.

წლის თავზე ვაჟიშვილი გაუჩნდათ. ერთხელ ქალმა თქვა, მოდი წავალ და ჩემს იარაღებს, ხეზე რომ დავეიდუ, ჩემს შვილს მოვუტან და ვარუქებო. წავიდა და მივიდა იმ ადგილას, სადაც ირემი მოკლა. ნახა: ირემიცა და იარაღებიც ისევ თავიანთ ადგილებზე არიან. გადააბოტა ქალმა ირემს შუა წელზე, რომ იარაღებს მისწვდომოდა და უცბად ჭაკ ცხენად კი გადაიქცა. გამობრუნდა ცხენი ჭიხვინით და მოვარდა თავის სახლში. მთელი სასახლე ფეხზე დამდგარი დახვდა, მეფის რძალს დაეძებდნენ, რა იცოდნენ, რომ ეს ჭაკი ცხენი მათი რძალი იყო. დაიჭირეს და თავლაში შეაგდეს.

გავიდა ხანი, ცხენი ცხენია, მაგრამ ჭკუა-გონება ადამიანისა აქვს, მეფეს უკვირს ამ ცხენის გონიერება, თქვა, ამისი ჯიში თუ არ გავამრავლე, არ იქნებო, და ერთი შერჩეული ულაყი მოუყვანა. დამაკდა ცხენი და წლის თავზე ხვადი კვიცი გააჩინა. გაიზარდა კვიცი და ისეთი რაში დადგა, რომ ბადალი არ მოეძეებოდა.

ერთხელ მეჯინიბე შეჯდა ჭაკ ცხენზე და წყლის დასალეგად წაიყვანა. გზაზე უცბად მათრახი გადაჰკრა. ითაკილა

ჭაკმა მათრახის დაკვრა, გადმოაგდო მეჯინიბე, თვითონ მინდორში გაიჭრა და შემთხვევით მოკლულ ირემს გადაახტა. გადაახტა და ახლა ძუ ძაღლად გადაიქცა. გაიქცა მაშინვე მეფის სასახლისაკენ, მთელი სასახლე ახლაც ფეხზე დამდგარი დახვდა: მეფის ჭაკს დაეძებდნენ და ის კი არ იცოდნენ, რომ მეფის ჭაკი ცხენი სწორედ ის ახლად მოსული ძუ ძაღლი იყო.

ძაღლმაც ისეთივე გონიერება გამოიჩინა, როგორც ცხენი იყო, და ხელმწიფესა და მთელ ოჯახს ისიც ისევე შეუყვარდათ. ხელმწიფემ თქვა, ამ ძაღლის ჯიში თუ არ გავამრავლე, არ იქნებაო, და ერთი შერჩეული ხვალი ნაგაზი მოგვარა.

დამაკდა ძაღლი და წლის თავზე სამი ლეკვი დააგდო. გავიდა ხანი, ამასობაში ხელმწიფის შვილიშვილიც გაიზარდა და სანადიროდ სიარული დაიწყო. ყოველდღე შეჯდებოდა თავის საყვარელ რაშზე, მოუხმობდა ძაღლებს და გასწევდა.

ერთხელაც ტყეში ერთი კურდღელი გამოუხტათ. გაეკიდა კურდღელს ძუ ძაღლი და იმ მინდორში გავიდა, სადაც ოდესღაც ირემი მოკლა. მირბის კურდღელი და მისდევს ძაღლი. გადაახტა კურდღელი ირემს კუდუსუნზე და გადაჰყვა ძაღლიც. გადაჰყვა და ისევ მონადირედ გადაიქცა. მონადირემ დაიჩოქა და ღმერთს მადლობა შესწირა, რომ ბოლოს და ბოლოს ისევ თავისი სახე დაიბრუნა. ჩამოიღო ხიდან იარაღები და ხელმწიფის შვილიშვილის შესახვედრად წავიდა. მოვიდა და უთხრა:

— ბატონიშვილო, მეც მონადირე ვარ, შემამხანაგე და გამოგადგებიო. ხელმწიფის შვილიშვილმა ნება დართო. რა იცის ხელმწიფის შვილიშვილმა, რომ ეს მონადირე ის ძუ ძაღლია, რომელიც ახლასან კურდღელს გაეკიდა, რომ თავისი საყვარელი რაშიც იმისი გაჩენილი ჰყავს და თვითონაც იმისი შვილია.

შუუერთდა მონადირეც უფლისწულის მხლებლებს და წავიდნენ. იარეს, იარეს და ტყეში ერთ ბროლის კოშკს წააწყდნენ. ხელმწიფის შვილიშვილმა ცხენი შეაყენა და მხლებლებს უბრძანა:

— გამიგეთ, ვისია ეს კოშკი ან შიგ რა ხალხი ცხოვრობსო?

წავიდნენ მხლებლები და ამბავი მოუტანეს:

— თურმე ამ კოშკში მზეთუნახავი ქალი ცხოვრობს. ვინც მის ცოლად შერთვას მოინდომებს, სამი ისეთი სიმართლე უნდა უთხრას, რომ ჯერ არავის ეთქვას და არც დასაჯერი იყოს. ცეცხლზე ერთი ოქროს ქვაბი უდგას და ქვაბში ოქროს წყალი დგას. ვინც ასეთ სიტყვას ეტყვის, ქვაბში წყალი ადუღდება და ქალიც ცოლად გაჰყვება, ხოლო ვინც ვერ ეტყვის, თავს მოსჭრის და კლდეზე გადააგდებსო.

დაიყინა ხელმწიფის შვილიშვილმა, გინდა თუ არა, ის ქალი უნდა ვნახო. უშალეს მხლებლებმა, მაგრამ უფლისწულმა არ დაიშალა. მაშინ მონადირემ უთხრა:

— რაკი არ დაგიშლია, მეც წამოგყვები. მე ვეტყვი ისეთ სიტყვას, რომელიც ჯერ არ თქმულა, არც დასაჯერია და სიმართლე კი იქნება. ქვაბში წყალი ადუღდება და ის ქალი შენ დაგარჩებაო.

გაუხარდა ხელმწიფის შვილიშვილს, გაიმძღვარა წინ მონადირე და წავიდნენ. ერთი მხლებელი კოშკში აგზავნეს და ქალს შეუთვალეს:

— ზღვათა და ხმელეთთა ხელმწიფის შვილიშვილი გეახლათ, რომ ჯერ ართქმული სიმართლე გითხრას და როდის ინებებთ მის მიღებასო. ქალმა თანხმობა შემოუთვალა, ახლავე ამოვიდესო. ავიდნენ მონადირე და ხელმწიფის შვილიშვილი და შევიდნენ ქალთან. ქალს მოწმედ თავისი მხლებლები მოეწვია და აქეთ-იქიდან ჩაემწკრივებინა. თვითონ ოქროს ტახტზე იჯდა და გვერდით გალესილი მახვილი ედო, რომ, თუ ვინიცობაა, ვაჟი დაპირებულ სიმართლეს ვერ ეტყოდო, თავი მოეკვეთა და კლდეზე გადაეგდო. ოქროს ქვაბი და ზედადგარიც გვერდით ედგა. მონადირე მიესალმა ქალს და იქ შეკრებილ ხალხს და მოახსენა:

— ეს ყმაწვილი ჩემი ბატონია, რადგან იგი ამჟამად ძალიან დაღლილია, თუ ნებას მომცემთ, ამის მაგიერ ჯერ ართქმულ და არდასაჯერებელ სიმართლეს მე მოგახსენებთო.

ქალმა ნება დართო. მონადირე წინ წამოდგა, ხელი ხელმწიფის შვილიშვილისაკენ გაიშვირა და თქვა:

— დამიჯერებთ თუ არა, რომ მე ამ ჭაბუკის დედა ვარო?

თქვა თუ არა ეს მონადირემ, ქვაბქვეშ მაშინვე ცეცხლი გაჩნდა. მონადირემ განაგრძო:

— იქნებ არც ის დამიჯეროთ, რომ ამისი რაშიც ჩემი ნაშობიაო?

ამ სიტყვებზე ცეცხლი უფრო გაძლიერდა და წყალი გაცხელდა. მონადირემ განაგრძო:

— ეგ კიდევ არაფერი, საქმე ის არის, რომ ამისი სანადირო ძაღლებიც ჩემი განჩენილები არიანო.


მონადირემ დაასრულა და ქვაბში წყალიც ადულდა. ამ ამბავმა ყველა განაცვიფრა, თვითონ ხელმწიფის შვილიშვილიც გაოგნებული იდგა. მონადირემ დაწვრილებით უამბო თავისი თავგადასავალი და ხალხმაც საბოლოოდ ირწმუნა. უფლისწულმა მსურვალედ გადაკოცნა მონადირე, მერე ქალი წამოიყვანა და დიდი ქორწილიც გადაიხადა.

ჭირი — იქა, ლხინი — აქა,

ქატო — იქა, ფქვილი — აქა.







## ს უ თ კ უ ნ ჭ უ ლ ა

იყო და არა იყო რა, ღვთის უკეთესი რა იქნებოდა, იყო შაშვი მგალობელი, ღმერთი ჩვენი მწყალობელი, იყო ცხრა ძმა. ძმები ისეთი ღარიბები იყვნენ, რომ სწირად ლუკმაპური ენატრებოდათ.

ძალიან რომ გაუჭირდათ შიმშილ-სიტიტვლით, უმცროსმა ძმამ, რომელსაც მეტისმეტი ეშმაკობისათვის ხუთკუნჭულას ეძახდნენ, ძმებს უთხრა, მოდი, წავიდეთ და ვისმე მოჯამაგირედ დავუდგეთ, სხვა თუ არაფერი, იქნებ ლუკმაპური მაინც მაძლრად ვიშოვოთო. დაიჯერეს ძმებმა ხუთკუნჭულას რჩევა, ჩაალაგეს სურჯინებში თუ რამ ძველმანები გააჩნდათ შინ, გადაიკიდეს მხარზე და გაუდგნენ გზას.

ბევრი იარეს თუ ცოტა, ბოლოს ერთ უცხო ქვეყანაში გაგიდნენ. გზაზე ერთი დევი შემოხვდათ, დევი მიესალმა ძმებს და ჰკითხა:

— რატომ აყრილხარ ასე დედაბუდიანად, ან სად მიდიხართო?

— სამუშაოს ვეძებთ, გვინდა მოჯამაგირედ ვისმეს დავუდგეთ და თავი შევინახოთო.

— მე დამიდექითო, — უთხრა დევმა.

— კარგიო, — დათანხმდნენ ძმები.

წაიყვანა დევმა ძმები და მიიყვანა შინ. დევს უზარმაზარი სასახლე ედგა, ჰყავდა აუარებელი საქონელი და ცხრა მზეთუნახავი ქალი.

იმ ღამეს დევმა ძმებს გემრიელი ვახშამი გაუშალა. ხუთ-

კუნჭულამ საჩქაროდ შეჭამა საჭმელი, სუფრიდან წამოდგა და სასახლის ყველა კუთხე-კუნჭული დაათვალიერა. ბოლოს დევის უმცროსი ქალის ოთახშიც შეიჭყიტა. დევის ქალს ადამიანის დანახვა ეუცხოვა და ჰკითხა:

— ვინა ხარ, რა სულიერი ხარო?

— ვინა ვარ და ადამიანი, სახელად ხუთკუნჭულას მემან, ცხრა ძმაში მე ყველაზე უმცროსი ვარო.

— აქ საიდან გაჩნდი, ან რისთვის მოსულხარო? — ჰკითხა დევის ქალმა.

— ძმები სამუშაოს საძებნელად წამოვედით, — უთხრა ხუთკუნჭულამ, — გზაში მამაშენი შეგვხვდა და მოჯამაგირედ დაგვიყენაო.

— კაი მოჯამაგირედ დაუყენებხართო, — უთხრა ქალმა.

— ვითომ რატომ არაო? — გაუკვირდა ხუთკუნჭულას. დევის ქალს ძალიან მოეწონა ხუთკუნჭულა და უთხრა:

— თუ ცოლად მითხოვ, გეტყვიო.

— გითხოვო, — შეჰპირდა ხუთკუნჭულა.

— მაშ იცოდე, — უთხრა დევის ქალმა, — მამაჩემს თქვენ შესაჭმელად ჰყევხართ მოყვანილი. როცა დაგეძინებთ, ცხრავეს შეგჭამთ. მაგრამ თუ იფხიზლებ და არ დაიძინებ, თავსაც იხსნი და ძმებსაცო.

— სიკვდილის მოლოდინში რა დამაძინებსო, — თქვა ხუთკუნჭულამ და ქალს სთხოვა, მითხარი, როგორ მოვიქცეო.

ქალმა დაარიგა, როგორც უნდა მოქცეულიყო, და გამოისტუმრა. მოვიდა ხუთკუნჭულა ისევ ძმებთან. პურისჭამას რომ მორჩნენ, დევმა ძმები დარბაზში გაიყვანა დასაძინებლად და თვითონ დარბაზის კარებში დაწვა. ძმებმა მაშინვე ხვრინვა ამოუშვეს, ხუთკუნჭულას კი რა დააძინებს, საბნიდან ცალი თვალთ იჭყიტება და დევს დარაჯობს. ცოტა ხანი რომ გავიდა, დევმა წამოიხედა და შესძახა:

— ძმებო, გძინავთ თუ გღვიძავთო?

— მღვიძავსო, — უპასუხა ხუთკუნჭულამ.

— რა არ გაძინებსო? — ჰკითხა დევმა.

— შენი ბატების ყიყინიო! — მიუგო ხუთკუნჭულამ, როგორც ქალისაგან იყო დარიგებული.

დევი წამოხტა და მთელი ბატები ერთიანად გადაყლაპა, ისევ თავის ადგილზე დაწვა და ცოტა ხნის შემდეგ ისევ შესძახა:

— ძმებო, გძინავთ, თუ გღვიძავთო?

— მღვიძავსო, — გამოსძახა ისევ ხუთკუნჭულამ.

— რა არ გაძინებსო? — კვლავ ჰკითხა დევმა.

— შენი ძროხების ფშვინვაო.

წამოვარდა ისევ დევი, დაერია ძროხებს და სულ სათითაოდ გადაყლაპა. მერე ისევ თავის ადგილას დაწვა და ცოტა ხნის შემდეგ კიდევ ჰკითხა:

— ძმებო, გძინავთ, თუ გღვიძავთო?

— მღვიძავსო, — უპასუხა ხუთკუნჭულამ.

— ასლა რალა არ გაძინებსო? — გაჯავრდა დევი.

— მინდვრიდან შენი ცხენების ჭიხვინი მესმის და ის არ მძინებსო, — მიუგო ხუთკუნჭულამ.

დევი მაშინვე წამოვარდა და ცხენების შესაჭმელად მინდორში გაიქცა. ხუთკუნჭულამ კი დრო იხელთა და, როგორც დარიგებული იყო, დევის უმცროს ქალთან შეეარდა. ქალმა ხუთკუნჭულას თავისი ტანისამოსი ჩააცვა, ძმებისთვის დების ტანსაცმელი მისცა და დევის დაბრუნებამდე სასახლიდან ყველანი გააპარა.

დაბრუნდა დევი და ძმები რომ აღარ დახვდნენ, მთლად გაცეცხლდა. გამოვარდა გარეთ და უკან გაუკიდა, ირბინა, ირბინა და მიადგა ხიდს, ნახა რომ ძმები წყალგალმა იყვნენ გასული და უარესად გადაირია. ხიდი სასაზღვრო მდინარეზე იდო, იმის იქით სხვა ხელმწიფის სამფლობელო იწყებოდა და დევი იქ ვერ გადავიდოდა.

— ხუთკუნჭულავ, გამასწარ ხიდსაო? — დაუძახა კბილების კრაჭუნით.

— გადაგასწარ და თვალებიც მოგთხარეო! — გამოსძახა ხუთკუნჭულამ.

რალას იზამდა დევი, დაბრუნდა შინ გაწბილებული ხუთკუნჭულა და იმისი ძმები კი იმ დევის მომიჯნე ხელმწიფეს დაუდგნენ მოჯამაგირედ.

ხუთკუნჭულამ ხელმწიფის სამსახურში დიდი სიბეჯითე და გულმოდგინება გამოიჩინა, რაზედაც ხელმწიფე სშირად

ასაჩუქრებდა. ნაზირ-ვეზირებს, რა თქმა უნდა, არ მოსწონდათ ხელმწიფესთან სუთკუნჭულას ასეთი დაახლოება და მოინდომეს მისი თავიდან მოშორება. ერთ დღეს მივიდნენ და ხელმწიფეს მოახსენეს:

— დიდებულო ხელმწიფევე, შენი სასახლე და სახელმწიფო ყველაფრით სრულია, მაგრამ ჩვენს მომიჯნე დევს რომ ერთი გულთმისანი თხა ჰყავს, ისიც რომ თქვენი იყოს, უფრო მდიდარი იქნებითო.

— მერე, ვინ მოიყვანს იმ თხასო? — იკითხა ხელმწიფემ.

— ვინა და, რალა თქმა უნდა, თქვენი მოჯამაგირე სუთკუნჭულაო.

დაიბარა ხელმწიფემ სუთკუნჭულა და უბრძანა:

— წადი და, ჩვენს მომიჯნე დევს რომ გულთმისანი თხა ჰყავს, ის მომიყვანე, თორემ ცოცხალი ვერ გადამიჩივებო.

რალას იზამდა სუთკუნჭულა, ადგა და წავიდა. მივიდა ჩუმად დევის სასახლეში და შეიპარა უმცროს ქალთან. ქალმა ჰკითხა, — პირობა ხომ არ დაგვიწყებიაო?

— არაო, — უთხრა სუთკუნჭულამ.

— მაშ მითხარი, რა გაგჭირვებიაო?

სუთკუნჭულამ უთხრა თავისი გასაჭირი. — ეგ ადვილი საქმეაო, — დაამზვიდა ქალმა და საღამომდე თავის ოთახში დამალა. თან ისიც ასწავლა, როგორ ჩაეგდო გულთმისანი თხა ხელში.

საღამოზე დევმა მორეკა ცხვარი და შერეკა გომურში. სუთკუნჭულამ, როგორც დევის ქალისაგან იყო დარიგებული, თავი გამოყო და გულთმისან თხას დაენახვა.

— სუთკუნჭულა, სუთკუნჭულაო! — ატეხა თხამ კიკინი.

წამოვარდა დევი და მთელი სასახლე გადაჩხრიკა, მაგრამ სუთკუნჭულა ვერსად იპოვა, რას იფიქრებდა, თუ მისივე ქალის ოთახში იმალებოდა. გაბრაზდა დევი, — მე შენ გიჩვენებ სუთკუნჭულასაო, — დაუყვირა თხას და კარში გამოაგდო.

სუთკუნჭულასაც ეს უნდოდა, გამოვიდა ჩუმად ქალის ოთახიდან, წამოიკიდა თხა და მოცოცხა ხელმწიფის სასახლისაკენ. ნაზირ-ვეზირებს, რა თქმა უნდა, არაფრად ეპიტნა-

გათ, რომ ხუთკუნჭულამ თხაც მოიყვანა და საღსალამათიც დაბრუნდა, და ხელმწიფეს ისევ შეუჩნდნენ:

— იმ დევს ერთი ჯადოსნური ხალიჩა აქვს და ხუთკუნჭულამ ისიც მოიტანოს, ასეთი ძვირფასი ნივთი სწორედ თქვენი საკადრისიაო.

დაიბარა ხელმწიფემ ხუთკუნჭულა და უბრძანა:

— წადი და იმ დევს რომ ჯადოსნური ხალიჩა აქვს, ის მომიტანეო.

— ბატონი ბრძანდებითო, — უთხრა ხუთკუნჭულამ და წავიდა. მივიდა დევის სახლთან, შეიპარა ისევ უმცროსი ქალის ოთახში და თავისი გასაჭირი მოახსენა. ქალმა ერთი მუჭა ნემს-მახათი მისცა და დაარიგა:

— შედი მამაჩემის საწოლ ოთახში და ეს ნემსები ხალიჩას ქვეშიდან გაუყარეო.

შევიდა ხუთკუნჭულა და ის ხალიჩა სულ ნემს-მახათით გაავსო, მოვიდა საღამოზე დევი და დაჯდა ხალიჩაზე. დაჯდა და შეერჭო საჯდომზე ნემსები, იქით გაიწია, იქითაც შეერჭო, აქეთ გამოიწია და კიდევ უარესი დაემართა, გაბრაზდა დევი, დაავლო ხელი ხალიჩას და ფანჯრიდან ეზოში გადაუძახა.

გამოვიდა ხუთკუნჭულაც ქალის ოთახიდან, დასტაცა ხელი ხალიჩას და დილისთვის ხელმწიფეს მიურბენინა.

ნაზირ-ვეზირები შურით მთლად გულზე დასკდნენ. თქვენს, თუ რაღაც ხერხი არ ვიხმარეთ, ამას თავიდან ვერ მოვიშორებთო, და ხელმწიფეს მოახსენეს:

— დიდებულო ხელმწიფევე, მაგ თხისა და ხალიჩის პატრონიც რომ აქ მოიყვანოთ და მსახურად დაიყენოთ, ყველაფერს ის აჯობებსო.

— მერე, ვინ მოიყვანსო? — იკითხა ხელმწიფემ.

— ვინა და, რა თქმა უნდა, ხუთკუნჭულაო. რაკი თხა და ხალიჩა მოიტანა, არც პატრონის მოყვანა გაუჭირდებაო.

ხელმწიფეს ეს რჩევა ყველაზე მეტად მოეწონა. — მეფეთა გული ხომ გაუმაძღარია, დაიბარა ხუთკუნჭულა და უბრძანა:

— უნდა წახვიდე და თხისა და ხალიჩის პატრონიც მომგვაროო.

დალონდა სუთკუნჭულა ძალიან, — ვაითუ, ამაზე დევის ქალი გამიწყრეს და ცოცხალი ველარ დავბრუნდეთ, მაგრამ თავს იქით ძალა არ ჰქონდა და წავიდა. შევიდა დევის ქალთან. ქალმა დალონება შეატყო და ჰკითხა:

— რა იყო, ისეთი რა დაგავალა შენმა ხელმწიფემ, რომ თავ-პირი ჩამოგტირისო?

სუთკუნჭულამ უთხრა, რაც აწუსებდა.

— ჰო, ეგ კი ცოტა ძნელი საქმე დაუვალებია, — უთხრა ქალმა, — მაგრამ ნუ გეშინია, მაგასაც მოვევლება. შენ ის მითხარი, პირობა სომ არ დაგავიწყდამო?

— პირობას როგორ დავივიწყებ, კაცი ვარ და ქუდი მხურავსო — მიუგო სუთკუნჭულამ.

— აი, ეს მომწონსო — თქვა ქალმა და სუთკუნჭულას ერთი ხელი იმერული ტანსაცმელი და სადურგლო იარაღები გამოუტანა. თან დაარიგა, როგორ უნდა მოქცეულიყო, და გამოისტუმრა. სუთკუნჭულამ ჩაიცვა იმერული ტანისამოსი, დაიჭირა ხელში იარაღები და, როგორც ქალმა უთხრა, დევს ტყეში დაუსვდა.

— ვინა ხარ და ამ ჩემს ტყეში რას აკეთებო? — დასჭყვილა დევმა.

— იმერული დურგალი ვარ და ტყეს ვათვალიერებო — მიუგო სუთკუნჭულამ.

— თუ მართლა იმერული ხარ, კარგი ხელობა გეცოდინება, რას გააკეთებ საკვირველსო? — ჰკითხა დევმა.

ისეთ კიდობანს გავაკეთებ, რომ შიგ ჩაჯდე და ფიცარიც ვერ გააგდებინო, — უთხრა სუთკუნჭულამ.

— აბა გააკეთეო, — უბრძანა დევმა.

სუთკუნჭულამ საჩქაროდ გააკეთა კიდობანი და დევს უთხრა:

— აბა ჩაჯექი და სცადე, ფიცარს თუ გააგდებინებო.

დევმა ჩახტა კიდობანში და ხან ერთ ფიცარს მიაჭირა ფეხი, ხან — მეორეს, მაგრამ ძვრაც ვერ უყო. ამასობაში სუთკუნჭულამ კიდობანს თავი დაახურა და დალურსმნა.

— რასა შვრებიო? — გამოსძახა დევმა შიგნიდან, — თავს რად მაფარებო?

— ბარემ შურგზე აგიკიდებ და შინამდე მიგიყვან, —

უთხრა სუთკუნჭულამ. — თავიც სწორედ იმიტომ დაეღურ-  
სმნე, რომ გზაზე არ გადმოვარდეთ.

დევეს გაუხარდა, რომ შინამდე ფეხით აღარ მოუწევდა სი-  
არული და აღარაფერი თქვა, სუთკუნჭულამ კი წამოიკიდა  
კიდობანი და პირდაპირ ხელმწიფის ეზოში შეიტანა.

გამობრძანდა ხელმწიფე თავისი ნაზირ-ვეზირებით, მაგ-  
რამ სანამ კიდობანს გახსნიდნენ, სუთკუნჭულა ჩუმად გაი-  
პარა, აიღო უშველებელი მარილის ქვა და ერთ მაღალ ჭა-  
დარზე ავიდა.

ახადეს თავი კიდობანს. ამოვარდა განრისხებული დევი  
და ხელმწიფე და ნაზირ-ვეზირები ერთიანად გადასანსლა.  
მერე სუთკუნჭულას დაუწყო ძებნა, მიხვდა, რომ ეს მისი  
ოინი იყო და პირიდან სულ ცეცხლს ყრიდა. ბოლოს დაი-  
ნახა ჭადრის კენწეროზე მჯდომარე და შესძახა:

— სუთკუნჭულავ, მასწავლე, მანდ როგორ ახვედიო?

— აი, ეს მარილის ლოდი დავიდე გულზე და ამოფრინ-  
დიო, — ჩამოსძახა სუთკუნჭულამ.

— მერე, მე სად ვიშოვო მაგისტანა ქვაო? — ჰკითხა  
დევმა.

— რა შოვნა გინდა, შენ გულადმა დაწექი, მე ჩამოვუ-  
შვებ, დაგეცემა გულზე და ამოხტებიო, — ჩამოსძახა სუთ-  
კუნჭულამ.

დაწვა დევი გულადმა. ჩამოაგდო სუთკუნჭულამ მარი-  
ლის ქვა, დასცა დევეს გულზე და ნაპურტყალად აქცია.

ჩამოვიდა სუთკუნჭულა ხიდან და დაეპატრონა მეფის სა-  
სახლეს. დედოფლად დევის უმცროსი ქალი მიიყვანა. სხვა  
ქალები თავის ძმებს შერთო და ნაზირ-ვეზირებად დააყენა.  
დევის მთელი სიმდიდრეც ძმებს გაუნაწილა და დაიწყეს  
ბედნიერი ცხოვრება.

მთას ურემი ავიტანე.

წამოვიდა გორებითა.

აქ სიცოცხლით გამიძეხით.

საიქიოს — ცხონებითა.



## ქ ა ლ ქ ვ ა

იყო და არა იყო რა, ღვთის უკეთესი რა იქნებოდა, იყო ერთი წვრილშვილი ხელმწიფე: თორმეტი შვილი ჰყავდა და თორმეტივე ქალი. დედოფალი მეცამეტედაც დაორსულდა. მობეზრდა ხელმწიფეს ამდენი ქალები და როცა ცოლს მოლოგინების დრო მოუვიდა, დაიბარა და უთხრა:

— წადი ტყეში, თუ ბიჭი გაგიჩნდა, წამოიყვანე, ხოლო თუ ისევ ქალი გეყოლა, რაც გინდა, ის უყავი. გინდ გაზარდე, გინდ ტყეში დატოვე, ოღონდ აქ არ მოიყვანო და თვალით არ დამანახო.

რა უნდა ექნა საცოდავ დედოფალს, ქმარი იყო, თანაც ხელმწიფე და რასაც უბრძანებდა, უსიტყვოდ უნდა აესრულებინა. იმავე წამს ადგა, ამოიღო ილიაში საგზალი, ტანსაცმელი, ერთი ხელი ქვეშაგები და წავიდა. დედას სულ უმცროსი გოგოც უკან დაედევნა.

— შენ სადღა მოხვალო? — ჰკითხა დედამ.

— მეც შენთან უნდა წამოვიდეო, — მიუგო გოგონამ.

— არა, შვილო, შენ ნუ წამოხვალ. მე ტყეში მივდივარ, შორი გზა მაქვს და ჩემთან ვერ ივლიო.

გოგონა გაჯიუტდა:

— სადაც შენ იქნები, მეც იქ უნდა ვიყო.

დედამ კიდევ ბევრი უშალა, მაგრამ ბავშვმა არ დაიშალა და გაუდგნენ ორნი გზას.

ბევრი იარეს თუ ცოტა, ბოლოს ერთ დაბურულ ტყეში შევიდნენ. დედოფალმა ტყეში ერთი ყველაზე დიდი მუხა მონახა და ბინა იმის ქვეშ დაიდო.



— დედა, წავალ, იქნებ აქ სადმე ახლომასლო ცეცხლი ვიშოვო, — უთხრა გოგონამ.

— ცეცხლი კი გვინდა, მაგრამ ვაითუ ამ ტყეში გზა აგებნეს და დაიკარგო, — შეწუხდა დედა.

გოგონამ დაამშვიდა:

— ნუ გეშინია, ყოველ ათ ნაბიჯზე მიწაში მწვანე ტოტებს ჩავარჭობ და გზა აღარ დამეკარგებაო.

დედას მოეწონა შვილის ასეთი საზრიანობა და გაუშვა. გოგონა გამოეთხოვა დედას და წავიდა. ბევრი იარა, მაგრამ ცეცხლი ვერსად ნახა. ამასობაში კიდევ დაულამდა. გოგო შეძვრა ხის ფულუროში და დაიძალა.

ირგვლივ უკუნნი სიბნელეა, ტყეში ათასნაირი ნადირი დადის, თვითონ ტყეც გაუჩერებლად ფაჩუნობს, შრიალებს, შარიშურობს. გოგონა ზის ფულუროში და მოუთმენლად მოელის გათენებას.

შუალამე რომ გადავიდა, მალლიდან რაღაც ლაპარაკი გაიგონა. გოგოს ჯერ შეეშინდა, მერე გული გაიმაგრა და ყური მიუგდო. თურმე ციდან ბედისმწერლები ჩამოსულიყვნენ და ხალხს ბედ-იღბალს უნაწილებდნენ. ბოლოს ერთმა თქვა:

— ამ ტყეში რომ ახლა ბიჭი დაიბადა, შუბლზე ასეთი ბედი დაეწეროს: თორმეტ წლამდე გაიზარდოს, მერე ხელმწიფის ეზოში რომ დიდი ნაძვის ხე დგას, იმაზე ავიდეს, ჩამოვარდეს და მოკვდეს. ვინც ჩემი ნათქვამი გაიგონოს და გაამხილოს, ქვად იქცესო.

ახლა მეორემ დაიძახა:

— ამ ტყეში რომ ბიჭი დაიბადა, თან ეს ბედი დაჰყვეს: თექვსმეტ წლამდე უვნებლად იზარდოს, მერე ხელმწიფის ჭაკ ცხენს რომ კვიცი გაუჩნდება, იმაზე შეჯდეს, ჩამოვარდეს და მოკვდეს. ვინც ეს ჩემი ნათქვამი გაიგონოს და გათქვას, ქვად იქცესო.

ბოლოს მესამემ თქვა:

— დღეს ამ ტყეში რომ ბიჭი დაიბადა, ეს ბედ-იღბალი დაეწეროს: ოც წლამდე იზარდოს, ოცი წლისა რომ გახდება, დაინიშნოს, სიდედრმა საქორწინო ტანსაცმელი მიუტანოს, იმ ტანსაცმელში გველები გაჩნდნენ, დაკბინონ და მოკვდეს.

ვინც ეს ჩვენი ნათქვამი გაიგონოს და გაგვცეს, თავით ფეხებადმე გაქვავდეს და მზის პირის ნაბანი წყლის მეტმა ნულარაფერმა მოარჩინოსო.

ბედისმწერლებმა დაასრულეს თავიანთი საუბარი და ისევ ცაში გაფრინდნენ.

გოგომ სამივე ბედისმწერლის ნათქვამი კარგად დაიმასსოვრა და გათენებისთანავე დედისაკენ გაეშურა. დედოფალს მართლა ბიჭი გასჩენოდა. წამოიყვანეს ახალშობილი და წამოვიდნენ ორივენი სასახლისაკენ. ხელმწიფემ რომ გაიგო, ვაჟიშვილი შემეძინაო, სიხარულით ცას ეწია და დედოფალს მთელი თავისი ამალით შეეგება, ზარ-ზეიმითა და თოფ-ზარბაზნების სროლით შემოიყვანა სასახლეში და დიდი ძეობაც გადაიხადა.

გავიდა დრო, ხელმწიფის შვილი, წამოიზარდა, გადადგა მეთორმეტე წელში, აი, თორმეტი წელიც უსრულდება, კიდევ რამდენიმე დღეც და ხელმწიფე მემკვიდრის დაბადების თორმეტი წლისთავს იზეიმებს. მთელი სასახლე საზეიმო სამზადისშია გართული, სწორედ ამ დროს ხელმწიფის უმცროსმა ქალმა უცბად თავი მოიავადმყოფა და ლოგინში ჩაწვა. კვნესის, ოხრავს, ვიშვიშებს. ხელმწიფემ იმავ დღეს ყველა სახელგანთქმული ექიმი მოიწვია და ავადმყოფს თავზე დააყვნა, მაგრამ რას გაუგებდნენ, რაც არაფერი სჭირდა.

ექიმები რომ წავიდნენ, ქალმა მამას უთხრა:

— სულ ტყუილად წვალობ და აწვალებ ექიმებსაც. ჩემი ავადმყოფობის მიზეზი ჩვენი დიდი ნაძვის ხეა, თუ იმას მოაჭრევენებ, მოვრჩები, თუ არადა, მოვკვდებიო.

— შვილო, ოღონდ შენ კარგად გასდი და იმას კი არა, სხვა ხეებსაც დავაჭრევენებო, — უთხრა ხელმწიფემ, გამოვიდა, გასცა ბრძანება და ის დიდი ნაძვის ხე სულ ძირიანად მოათხრევენა.

ქალი მაშინვე ფეხზე წამოხტა და, გახარებული იმით, რომ სიკვდილს გადაარჩინა, ძმას სიყვარულით გადაეხვია:

გავიდა კიდევ ხანი. ხელმწიფის შვილს საცაა თექვსმეტი წელი უნდა შეუსრულდეს. ამ დროს ხელმწიფის ჭაკმა ცხენმა კვიცი მოიგო. ისეთია ეს კვიცი, რომ თვალი უკეთესს ვერაფერს ნახავს, სხვა თუ წლით იზრდება, ის დღით იზრდე-

ბა. ხელმწიფის შვილი გვერდიდან აღარ იშორებს, თვითონ წმენდს, უურვებს, თვითონ დაჰყავს წყალზე და ბალახსაც თავისი ხელით უთიბავს.

მოიავადმყოფა ისევ თავი ხელმწიფის უმცროსმა ქალიშვილმა და ჩაწვა ლოგინში, აკენესდა და აკივლდა. შეწუხდნენ მშობლები. აბა — ექიმი, მკითხავი, მლოცავი ვინც კი სახელგანთქმული იყო, ყველა მოიწვიეს, მაგრამ ავადმყოფს ვერაფერი გაუგეს, ან რას გაუგებდნენ, როცა არც რამე სჭირდა და არც აწუხებდა.

ბოლოს ქალიშვილმა ისევ მამა დაიბარა და ჰკითხა:

— მამილო, მე უფრო გიყვარვარ, თუ ჩვენი ჭაკი ცხენის კვიცი?

— ეგ რა სათქმელია, შვილო, — უსაყვედურა მამამ, — შენზე მეტად პირუტყვი როგორ მეყვარება?

— მაშ თუ ასე ძალიან გიყვარვარ, ერთი ნატვრა შემისრულე, — უთხრა ქალმა, — ის კვიცი დღესვე დაკალიო.

ხელმწიფეს ქალიშვილის ეს უცნაური სურვილი ძალიან გაუკვირდა და ჰკითხა:

— დაკვლით კი დაკვლავ, შვილო, მაგრამ შენ რას გარგებსო?

— სწორედაც. მარგებსო, — უთხრა ქალმა, — წუხელ სიზმარში ერთი თეთრწვერა მოხუცი გამომეცხადა და მითხრა: შენი ავადმყოფობის მიზეზი თქვენი კვიცია, თუ იმას დაკვავთ, მორჩები, თუ არა და მოკვდებიო.

— ოღონდ შენ მყავდე, შვილო, კარგად. და კვიცი თუნდ ეშმაკსაც წაუღია, — უთხრა მამამ და მსახურებს უბრძანა, დაკალითო დაკლეს კვიცი და ქალიც მაშინვე ფეხზე წამოდგა. ერთხელ კიდევ გადაარჩინა ძმა სიკვდილს და ამით გახარებული სიყვარულით გადაეხვია.

გავიდა კიდევ რამდენიმე წელიწადი, ხელმწიფის შვილი უკვე მეოცე წელში გადადგა და ცოლის შერთვის დრო მოუვიდა. დაფაცურდნენ ხელმწიფე და დედოფალი და ერთი დიდგვაროვანი მზეთუნახავი ქალი დაუნიშნეს. დადგა ქორწილის დღეც, სასიძო მოყვრებთან წასასვლელად მოემზადა, უცბად ხელმწიფის უმცროსმა ქალმა ტირილი მორთო და

დაიყინა, — მეც გამაყოლებთ ჩემს ძმას, თორემ ახლავე თავს მოვიკლავო.

წააყოლეს გოგოც და წავიდნენ მყარები. იმ დამეს კარგი დრო გაატარეს — იცეკვეს, იმღერეს, იმხიარულეს და დაიძინეს.

მეორე დღეს, ადგომის წინ, სიდედრმა სიძეს ახალი საქორწინო ტანსაცმელი მოუტანა. აბა სიძე მეორე დღეს იმავე ტანსაცმლით ხომ არ დაჯდებოდა სუფრასთან, წამოდგა ხელმწიფის შვილი, რომ ტანსაცმელი გამოეცვალა, ამ დროს წამოვარდა მისი უმცროსი და, ჩამოეკიდა კისერზე ძმას და თვალცრემლიანმა დაუწყო ხეწვნა:

— არ ჩაიცვა ეგ ტანისამოსი, არ ჩაიცვაო!..

ყველა გაკვირდა, ზოგს გიჟი ეგონა, ზოგს კიდევე რა. სასიდედროს ძალიან ეწყინა და ქალს საყვედურით უთხრა:

— რა მოგივიდა, ქალო, განა რას ხედავ ამ ტანსაცმელში ისეთს, რომ შენს ძმას ჩაცმას უკრძალავო?

— აბა თორნე გაახურეთ და მაშინ ნახავთ, რადაც ვუკრძალავო, — უბასუხა ქალმა.

ჩაყარეს მაშინვე თონეში სახმილი და წაუკიდეს ცეცხლი. მთელი ხალხი ფეხზე დადგა, ნეტა, რა მოხდებაო. კარგად რომ გახურდა თონე, ქალმა წამოავლო სიდედრის მოტანილ ტანსაცმელს ხელი, ხალათი, შარვალი, ჩოხა-ახალუხი, ჩექმები და ყველაფერი თონესთან მიიტანა, ყველა სათითაოდ ჩაბერტყა შიგ და ყველადან შავი, უზარმაზარი გველები გადმოცვივდნენ. გველები სისინ-წივილით ჩაიხრუკნენ ცეცხლში. ქალმა ისევ მოხვეტა ტანსაცმელი, მიუტანა თავის ძმას, გადაეხვია და უთხრა, — აი, ახლა ჩაიცვი, ახლა აღარ დაგიშლი ჩაცმასო.

— ჩემო დაო, შენ რა იცოდი, რომ ამ ტანსაცმელში წყეული გველები ისხდნენ? — ჰკითხა ძმამ.

და შეეხვეწა:

— მაგას ნუ მათქმევინებ, თორემ ინანებო.

მაგრამ ხელმწიფის შვილმა არ დაიშალა, თუ გიყვარვარ, უნდა მითხრაო.

— კარგი, ამასაც გეტყვი, — დათანხმდა და ბოლოს, — მაგრამ იცოდე, ვიტყვი თუ არა, მაშინვე გავქვავდები

და მზის პირის ნაბანი წყლის მეტი აღარაფერი მიშველსო.

დამ ყველაფერი დაწვრილებით უამბო, რაც ტყეში ბეადისმწერლებისაგან გაიგონა.

— თორმეტი წლისა შენ ჩვენი დიდი ნაძვიდან უნდა ჩამოვარდნილიყავი და მომკვდარიყავი. ამიტომ მოვიავადმყოფე თავი, მამას ის ხე მოვაჭრევი და სიკვდილს გადაგარჩინე. — თქვა თუ არა ეს ქალმა, მუხლებამდე გაქვავდა. ძმა შეეხვეწა, მეტს ნუღარ იტყვიო, მაგრამ დამ არ დაუჯერა, — სათქმელი ბოლომდე უნდა ითქვასო, და განაგრძო:

— თექვსმეტი წლისა რომ გახდებოდი, ბედისწერას ჩვენი ჭაკი ცხენის კვიციდან უნდა ჩამოეგდე და მოეკალი, მაშინაც ამიტომ მოვიავადმყოფე თავი, მამას ის კვიცი დავაკვლევი და სიკვდილისაგან ამჯერადაც დაგისხენი. — თქვა ეს ქალმა და წელამდე გაქვავდა.

— ოცი წლისას ცოლი უნდა შეგერთო, — განაგრძო ქალმა, — სიდედრი საქორწინო ტანსაცმელს მოგიტანდა და შიგ მსხდარ გველებს უნდა მოეკალი. აი, როგორც ხედავ, სიკვდილს ახლაც გადაგარჩინე და ამიერიდან აღარავითარი საშიშროება აღარ მოგელისო.

თქვა თუ არა ქალმა უკანასკნელი სიტყვა, მთლიანად ქვად იქცა. ხელმწიფის შვილმა ბევრი იტირა და ივაგლახა ბოლოს თქვა:

— ჩემმა დამ სამჯერ გადამარჩინა სიკვდილს, ახლა ჩემი ჯერია და სამაგიერო უნდა გადავუხადო. როგორც თვითონ მითხრა, მზის პირის ნაბანი წყალი უშველის, უნდა წავიდე მზესთან, გამოვთხოვო ნაბანი წყალი და ჩემი და გავაცოცხლო.

ხელმწიფის შვილმა აიღო რკინის ჯოხი, ჩაიცვა რკინის ქალამნები, გამოვთხოვა თავისიანებს — ახლადშერთულ ცოლს, მაყრებს, სიდედრ-სიმამრს და წავიდა მზის სამფლობელოსაკენ. ბევრი იარა, ბევრი დაბრკოლება გადალახა და ბოლოს მივიდა იმ ადგილზე, სადაც ცა დედამიწას სამ შუბის ტარზე უახლოვდება. აქ, ზედ ცისა და მიწის საზღვარზე, ერთი ირემი იდგა, ირემს რქები ცისთვის მიებჯინა და ისე

80. ქართული ხალხური ზღაპრები

იყო გახიდილი ცასა და მიწას შუა, რომ ველარც წინ მიდი-  
ოდა, ველარც უკან.

ხელმწიფის შვილმა უამბო ირემს თავისი გასაჭირი და  
სთხოვა, შენი რქებით მზესთან ამიყვანო. ავიყვანო, უთხრა  
ირემმა, ოღონდ იმ პირობით, თუ ჩემი გასაჭირის წამალს  
შემიტყობო. ხელმწიფის შვილი შეჰპირდა და ირემმაც ნება  
დართო. აცოცდა ხელმწიფის შვილი ირმის რქებზე და გადა-  
ვიდა მზის ქვეყანაში. იარა კიდევ კარგა ხანს და მიადგა ერთ  
აღმასის კოშკს. ეს სწორედ მზის სახლი იყო, მაგრამ მზე  
იმ დროს ქვეყანაზე სამოგზაუროდ იყო წასული. და შინ  
მარტო მზის დედა დახვდა.

— ვინა ხარ, რა სულიერი ხარ და ან აქ რამ მოგიყვა-  
ნაო? — ჰკითხა მზის დედამ. ხელმწიფის შვილმა ყველაფერი  
უამბო და დახმარება სთხოვა. მზის დედას მოეწონა უცხო  
ჭაბუკი და დახმარება აღუთქვა. ამასობაში მზის დაბრუნე-  
ბის დროც მოვიდა. მზის დედამ უთხრა ხელმწიფის შვილს,  
შენი აქ ყოფნა არ შეიძლება, ჩემი შვილის სიმხურვალეს  
ვერ გაუძლებო, და ცალკე სენაკში დამალა.

დაბინდებისას მზეც მოვიდა. დედამ მოიტანა ოქროს  
ტაშტი, ოქროს სურა და პირი დააბანინა, მერე ავახშმა და  
დააძინა.

დილას მზე ისევ სამოგზაუროდ რომ წავიდა, მზის დედამ  
გამოიყვანა ხელმწიფის შვილი, ჩაუსხა მზის პირინაბანი  
ბროლის სურაში და უთხრა:

— აჰა, შვილო, შენმა გარჯამ და წვალეებამ უნაყოფოდ  
არ ჩაიარა, ამ წყალს რასაც კი გადაასხამ, ყველაფერი სულს  
ჩაიდგამს და გაცოცხლდებაო.

— დედი, ერთი სათხოვარი კიდევ მაქვს და ბარემ ისიც  
ამისრულეო, — შეეხვეწა ხელმწიფის შვილი.

— კიდევ რა გაგჭირვებიაო? — ჰკითხა მზის დედამ.

ხელმწიფის შვილმა ირმის ამბავი უამბო.

— ის რომ არ შემხვედროდა, მე აქ ვერ ამოვიდოდი. მიწ-  
და მცხ სამაგიერო გადაუხსადო და მითხარი, რა ეშველე-  
ბაო?

— მაისის წყალი დალიოს და რქები თავისთავად მოს-  
ებრებაო, — უთხრა მზის დედამ.

ხელმწიფის შვილმა ყველაფერზე დიდი მადლობა გადაუხადა და წამოვიდა. დედამიწაზე ისევ ირმის რქებით ჩამოვიდა.

— რა ჰქენი, გამიგე რამე ჩემი საშველიო? — ჰკითხა ირემმა.


— გაგიგეო, — უთხრა ხელმწიფის შვილმა და მზის დედის დანაბარები ასწავლა. ირემმა დალია მაისის წყალი და რქები იმავე წამს მოსძვრა.

გამოეთხოვა ხელმწიფის შვილი ირემსაც და გაუდგა გზას. დაბრუნდა ისევ სიმამრისას, გადაასხა მზის პირისნაბანი წყალი თავის გაქვავებულ დას და გააცოცხლა. წამოიყვანა ახლად ჯვარდაწერილი ცოლიც და მოვიდა შინ.

მისი ქმრისთვის გაწეული ასეთი ერთგულების გამო რძალმაც უზომოდ შეიყვარა თავისი უმცროსი მული და ამ დღიდან ცხოვრობდნენ ტკბილად და აუმღერეულად.

ჭირი — იქა, ლხინი — აქა,

ქატო — იქა, ფქვილი — აქა.





## ს ი ზ მ ა რ ა

იყო და არა იყო რა, ღვთის უკეთესი რა იქნებოდა, იყო ერთი ობოლი ბიჭი. ბიჭი ძილში სულ სიზმრებს ნახულობდა და ამის გამო სახელიც სიზმარა დაარქვეს. ბიჭს ერთი ღვთისგარეგანი დედინაცვალმა ჰყავდა და ყოველდღე სცემდა და აწამებდა.

ერთხელ დედინაცვალმა მზეზე სორბალი გაფინა გასაშრობად და გერიც გვერდით მოუსვა, — უყურე, ქათმებმა არ აკენკონო. — სიზმარა ერთხანს თვალფხიზლად დარაჯობდა სორბალს, მაგრამ მალე ძილი მოერია და ჩაეძინა. დაესივნენ საფქვავს ქათმები და კენკვა დაუწყეს. ამ დროს მოუსწრო დედინაცვალმა, სტაცა ხელი მძინარე ბიჭს და ცემა დაუწყო.

— რა ეშმაკმა დაგაძინა, შე სასიკვდილევ, სორბალი დაღუპეს ქათმებმაო.

გამოელვობა ბიჭს და დედინაცვალს შეეხვეწა:

— ნუ მცემ და სიზმარს გეტყვიო.

გაუშვა ხელი დედინაცვალმა და ჰკითხა:

— აბა, რა ნახე, ჩქარა მითხარიო.

ბიჭმა ნამძინარევი თვალევი მოიფშვნიტა და უთხრა:

— სიზმარში ბაღდადს ვიყავი, ცალი ფეხი ბაღდადის თავს მედგა, ცალი — ბოლოს. ერთ მხარეს მზე მეჯდა, მეორე მხარეს — მთვარე და შუქურვარსკვლავი ხელ-პირს მამბანინებდაო.

დედინაცვალს ძალიან შეშურდა. გერის სიზმარი, სტაცა სიზმარას ხელი და უთხრა, — ახლავე მომეცი ეგ სიზმარიო.



შეწუსდა სიზმარა და დედინაცვალს უთხრა:

— აბა სიზმარი როგორ მოგცეო.

დედინაცვალს მთლად ცუცხლი მოეკიდა, — სიზმარიც არ გემეტება ჩემთვის და შენგან სხვას რას უნდა მოველოდეთ, — და სიზმარა სახლიდან გააგდო.

წავიდა სიზმარა დაღონებული. იარა, იარა და ბოლოს ერთ სახელმწიფოში მივიდა. გამოიხედა იმ ქვეყნის ხელმწიფემ, დაინახა უცხო ბიჭი და ჰკითხა:

— ვინა ხარ, ბიჭო, რას დადიხარ, ან ვის ეძებო?

— ასე და ასეა ჩემი საქმე, სიზმარი ვნახე, დედინაცვალმა მთხოვა, ვერ მივეცი და სახლიდან ცუმა-ტყუებით გამომაგდო, — უთხრა სიზმარამ.

— მაინც რა ნახე ასეთიო? — ჰკითხა ხელმწიფემ.

— რა ვნახე, დიდებულო ხელმწიფევე და, ვითომ ბაღდადში ვიყავი, ერთი ფეხი ბაღდადის თავს მედგა, მეორე — ბაღდადის ბოლოს, აქეთ-იქიდან მზე და მთვარე მესხდნენ და შუქურვარსკვლავი ხელ-პირს მახანინებდაო.

— ბიჭოს, ეს რა კარგი რაღაც გინახავსო, — გაოცდა ხელმწიფე და სიზმარას უბრძანა, — ეგ სიზმარი მე უნდა მომცეო.

სიზმარამ უთხრა:

— აბა როგორ მოგცე, დიდებულო ხელმწიფევე, სიზმარი იყო, გამომეღვიძა და გაქრაო.

განრისხდა ხელმწიფე და სიზმარა ხაროში ჩააგდებინა დაღონდა საწყალი სიზმარა, ვაის გაეყარა და უის შეეყარა, მაგრამ მართალ ადამიანს ღმერთი საბოლოოდ არ გასწირავს. ხელმწიფეს ერთი მზეთუნახავი და ბუნებით კეთილი ქალი ჰყავდა, შეეცოდა უდანაშაულო ბიჭი და ხაროში ჩუმად საჭმელს აწვდიდა.

ამ მზეთუნახავ ქალს ერთი მალრიბელი ხელმწიფე თხოვლობდა, მაგრამ ქალს არ უნდოდა და არც მამა ატანდა. მალრიბის ხელმწიფე კი არ ისვენებდა და ქალის ხელში ჩასაგდებად სულ ახალ და ახალ ხრიკებს იგონებდა. ერთხელაც ქალის მამას ოთხი ჭაკი ცხენი გამოუგზავნა და შემოუთვალა:

— გამოიცან, რომელია მაგ ცხენებში დედა, რომელი

უფროსი კვიცი, რომელი შუათანა და რომელი პატარა. გამოიცნობ, კარგია, არადა, შენი ქალი უნდა მომცეო.

შეწუხდა ხელმწიფე, აბა როგორ უნდა გამოეცნო, როცა ცხენები ტანითაც და სერ-ფერთაც ერთმანეთს ჰგავდნენ. უფრო შეწუხდა მზეთუნახავი, წავიდა და თავისი გასაჭირი სიზმარას შესჩვილა.

— ნუ გეშინია, მაგის გამოცნობა არც ისეთი ძნელია, — უთხრა სიზმარამ, — ცხენებს ბლომა მარილი აჭამეთ და თავლაში დაამწყვდით, დილას წყლის დასალევად რომ გამოუშვებთ, დააკვირდით: პირველად დედა გამოვა, დედას პატარა კვიცი გამოჰყვება, მე რე გამოვა შუათანა და სულ ბოლოს უფროსი კვიცი გამოვაო.

ქალი წავიდა და ყველაფერი მამას უამბო. ხელმწიფე მართლაც ასე მოიქცა და გამოცანაც გამოიცნო.

გავიდა ხანი. მალრიბის ხელმწიფემ ახლა რიყის ქვა გამოუგზავნა მზეთუნახავის მამას და შემოუთვალა:

— ამ რიყის ქვას თუ კოპად დაჭრი, ჩამოგეხსნები, თუ არადა, შენს მზეთუნახავ ქალს წავეყვანო.

დაღონდა ხელმწიფე, არ იცოდა, რა ექნა, როგორ უნდა დაეხია რიყის ქვა კოპად, არადა, ქალი უნდა მიეცა. ქალმა გაიგო მამის გასაჭირი და რჩევის საკითხავად ისევ სიზმარასთან გაიქცა. სიზმარამ უთხრა:

— ნუ გეშინია; მაგასაც მოველება. მამაშენს ასე უთხარი: გაატანოს ეგ რიყის ქვა უკან და შეუთვალოს, — მე არ ვიცი, როგორი ზომის კოპი გინდა. ბრტყელი თუ წვრილი, ამიტომ ამ რიყის ქვას პირი აართვი ნიმუში გამომიგზავნე და მეც იმ ზომაზე დაეხევიო.

რა თქმა უნდა, მალრიბის ხელმწიფე ქვას პირს ვერ აართმევდა და მზეთუნახავის მამა აქაც მოგებულნი დარჩა. მაშინ მალრიბის ხელმწიფემ ისარი გასტყორცნა და მზეთუნახავის სასახლის წინ დაარჭო. თან ხელმწიფეს შეუთვალა:

— ან შენს სახელმწიფოში ისეთი კაცი მონახე, რომ ეს ისარი ამოაძროს, ან არადა, შენი ქალი ცოლად მიმეყავსო.

შეკრიბა ხელმწიფემ ვინც კი მძლე და მკლავლონიერი ეგულებოდა სახელმწიფოში, მაგრამ ისარს ძვრაც ვერავინ

უყო. მაშინ ხელმწიფის მზეთუნახავი ქალი ისევ სიზმარასთან გაიქცა და თავისი გასაჭირი შესჩივლა. სიზმარამ უთხრა:

— ამაღამ ჩუმად მოდი ხაროსთან, თოკი ჩამოუშვი, ამიყვანე და იმ ისარს მე ამოვაძრობო.

მართლაც დაღამდა თუ არა, ქალმა ჩაუშვა თოკი ხაროში და სიზმარა ამოიყვანა. ამ ხნის მანძილზე, რაც ხაროში იჯდა, სიზმარა გაიზარდა და საკმაოდ მკლავღონიერი ჯელი დადგა. ხელის ერთი გაკვრით ამოაძრო ისარი და ისევ ხაროში ჩაჯდა.

გამოვიდა დილას ხელმწიფე, ნახა ამოძრობილი ისარი და ძალიან გაუკვირდა. გახარებულმა საჯაროდ გამოაცხადა:

— ვინც ეს ისარი ამოაძრო, მოვიდეს და ჩემს მზეთუნახავ ქალს ცოლად მივცემო.

შეიკრიბნენ ისევ სასახლეში ხელმწიფის გამოჩენილი ვაჟაკები, ქალის დასაკუთრება ყველას უნდოდა და ისრის ამოძრობას ყველა თავისთვის იჩემებდა. ბოლოს ხელმწიფემ ბრძანა, — აბა, ვინც ამოაძრო ეს ისარი, ახლაც დაძრას ადგილიდანო.

ყველამ სცადა, მაგრამ ძვრაც ვერავინ უყო. მაშინ მივიდა ქალი მამასთან და უთხრა:

— მამილო, ხაროში რომ ბიჭი გიზის, იქნებ იმან ამოაძროლო?

გაგზავნეს ვეზირები და მოიყვანეს სიზმარა, ისეთი ბიჭია, რომ ქალებს თვალეები ზედა რჩებათ. აილო სიზმარამ ისარი, გასტყორცნა და მალრიბის ხელმწიფის წინ დაარჭო. აბა ხელმწიფეს რაღა ეთქმოდა. მოიწვია მთელი სახელმწიფო და თავის მზეთუნახავ ქალსა და სიზმარას იმავე დღეს ჯვარი დასწერა.

დაიწყო სიზმარამ ტკბილი და ბედნიერი ცხოვრება. ხელმწიფის სიძეს ან რა უნდა მოჰკლებოდა, ან რა საზრუნავი უნდა ჰქონოდა, იჯდა არსეინად. გვერდს ლამაზი ცოლი ჰყავდა და სხვა არც არაფერი უნდოდა. მაგრამ ერთ დღეს გაიგო, რომ მალრიბის ხელმწიფე ჯარს აგროვებს და მზეთუნახავი ცოლის წართმევა უნდაო.

— ჩათრევას ჩაყოლა სჯობიაო, — უთხრა სიზმარამ ცოლს. — მოდი, ისევ მე დავასწრებო, — გამოემშვიდობა და წავიდა.

კარგა გზა რომ გაიარა, ერთ წყალუხვ მდინარეს მიადგა. მდინარის პირას ერთი დაღონებული კაცი იჯდა. მივიდა სიზმარა იმ კაცთან და ჰკითხა, — რამ დაგაღონა, ან ამ მდინარის პირას რას უზიხარო?

— წყალი მწყურია და ვერ დამიღვევია, — უთხრა კაცი, — ყლაპი რომ ვქნა, ყლუპი აღარ დამრჩება და რა ვქნა, არ ვიციო.

გაუკვირდა სიზმარას და უთხრა:

— კაცო, რა საკვირველი კაცი ყოფილხარ, მე გაღმა გავლა მიჭირს, შენ კი ამოდენა მდინარე ყლუპადაც არ გყოფნის. მოდი, ჩემი ძმა იყავიო.

— შენ ვინა ხარო? — ჰკითხა კაცმა.

— მე სიზმარას მეძახიანო.

— შენ ისა ხარ, ხელმწიფის მზეთუნახავი ქალი რომ ცოლად შეირთე და მალრიბის ხელმწიფეს ომს უპირებო?

— სწორედ ისა ვარო.

— შენ როგორ არ გექმობიო, — უთხრა კაცმა და გაუღუნენ გზას ორნი.

კარგა მანძილი რომ გაიარეს, გზაზე ერთი კაცი შეხვდათ. ზღვის პირას იჯდა და სიცილით კვებობდა. მივიდნენ ახლოს წყალისაპია და სიზმარა და ჰკითხეს: — რატომ ზიხარ ამ ზღვის პირას და ან რა გაცინებსო?

— როგორ არ გავიცინო, — უთხრა კაცმა, — ზღვის ფსკერზე ჭიჭყინები შეკრებილან და იმაზე მსჯელობენ, ვეშაპი როგორ დავამარცხოთ და როგორ მოვიშოროთ თავიდანო.

— რა საკვირველი კაცი ყოფილხარო, — უთხრა სიზმარამ, — ჩვენ ერთმანეთის ხმაც ძლივს გვესმის, შენ კი ზღვის ფსკერიდან ჭიჭყინების ლაპარაკიც გესმისო. მოდი და მეძმეო.

— შენ თვითონ ვინა ხარო? — ჰკითხა კაცმა.

— მე სიზმარას მეძახიანო.

— შენ როგორ არ გექმობიო, — უთხრა კაცმა და წავიდა.

ნენ სამნი. იარეს, იარეს და გზაზე კიდევ ერთ კაცს წააწყდნენ. მიუპარებოდა მტრედებს, და ფრთებს აძრობდა, ერთის ფრთას მეორეს გაუყრიდა, მეორისას — მესამეს ისე, რომ მტრედები ვერაფერს იგებდნენ.

სიზმარას გაუკვირდა ამ კაცის სიფრთხილე და ჰკითხა — რა საკვირველი კაცი ყოფილხარ, მე შეუმჩნეველად კამერს ვერ მივუპარებდი და როგორ ახერხებ ამას, რომ მტრედები ვერაფერს გებულობენ? მოდი და მეძმო.

იძმო ისიც სიზმარამ და გაუდგნენ გზას ოთხნი. ბევრი იარეს, თუ ცოტა იარეს, ბოლოს გზაზე ერთი მღვდელი შემოხვდათ. მღვდელს ზურგზე უზარმაზარი ეკლესია წამოეკიდნა, დასდგამდა ეკლესიას, სადაც მოესურვებოდა, და სწირავდა. მერე წამოიკიდებდა ისევ და გასწევდა სხვა მხარეს. სიზმარამ უთხრა:

— რა საკვირველი კაცი ყოფილხარ, ჩვენ სალთად მოვდივართ და ლამის მუხლები ჩაგვაწყდეს, შენ კი ამოდენა ეკლესია წამოგიკიდნია ზურგზე და მის სიმძიმეს ოდნავაც არ იმჩნევ. მოდი და გვეძმო. იძმეს ის კაციც და წავიდნენ ხუთნი.

იარეს, იარეს და მალრიბის ხელმწიფის სასახლესაც მიადგნენ. გამოიხედა ხელმწიფემ, მიხვდა, რომ ისინი სასიკეთოდ არ იყვნენ მოსულნი და ჰკითხა:

— ვინა ხართ და ან ჩემს სახელმწიფოში რისთვის მოსულხართო?

— სიზმარა ვარ, მზეთუნახავი ქალის ქმარი, — უთხრა სიზმარამ, — ესენი ჩემი ძმები არიან და შენთან საომრად მოვედითო.

— კარგი, გამოგცდით, — უთხრა მალრიბის ხელმწიფემ. — თუ გაიმარჯვებ, რალა მეთქმის, თუ არადა, თავებს დაგაყრევინებთო.

— ბრძანეთ და ჩვენც მზადა ვართო, — მიუგო ხუთივემ, ხელმწიფემ უთხრა:

— მე ერთი ექვსრუმბიანი ქვევრი მაქვს ღვინით სავსე, თუ იმ ქვევრს ერთ პურისჭამაზე დასცლით, ხომ კარგი, თუ არადა, როგორც გითხარით, თავებს დაგჭრითო.

ძმობილებმა წყალიხაპიას უთხრეს, აბა ახლა შენ იციო,

— თქვენ ფიქრი ნუ გაქვთ, — მიუგო წყალისაპიამ, — ექვსრუმბიანი კი არა, თორმეტრუმბიანიც რომ იყოს, ერთ ყლუპად არ მეყოფა და ყლაპი კიდევ მაგაზე დარჩებაო.

დასსა სუთივენი სუფრაზე მალრიბის ხელმწიფემ და მოატანინა ექვსრუმბიანი ღვინით გაპიპინებული ქვევრი, დაავლო ხელი წყალისაპიამ, მოიყუდა და ერთ ყლუპად გამოსცალა. თან ხელმწიფეს გადასძახა:

— ეს ყლაპი იყო და ყლუპი სადღააო?

განცვიფრდა მალრიბის ხელმწიფე, თქვა გულში, ამათ თუ რაღაც ხრიკი არ მოუხერხე, დამლუპავენო, და თავის მსახურებს უჩურჩულა, სუფრაზე მაგათთვის მოწამლული კერძები მოიტანეთო. — ეს ნაჩურჩულევი გაიგონა ყურმახვილმა და ამხანაგებს უთხრა, მოწამვლას გვიპირებენო.

ძმობილებმა ფრთაპარიას გადახედეს, უნდა გვიხსნათო. — აქა ვარ, ნუ გეშინიათო, უთხრა ფრთაპარიამ და ისე შეუცვალა თეფშებს ადგილები, რომ კაციშვილმა ვერაფერი გაიგო: თავიანთი მოწამლული კერძები ხელმწიფესა და იმის კარისკაცებს დაუდგა და იმათები კი თავიანთ წინ გადმოდგა.

ჭამეს ხელმწიფემ და კარისკაცებმა მოწამლული კერძები და სუფრაზევე ფეხები გაფშიკეს. სიზმარამა და მისმა ძმობილებმა კი მრავალყამიერი შემოსძახეს და ქეიფი დილამდე გააგრძელეს.

დილას აიშალნენ და წასასვლელად მოემზადნენ, მაგრამ ხელმწიფის სასახლიდან ხელცარიელები ხომ არ წავიდოდნენ — გახსნეს ხაზინა და რას ხედავენ: თვალ-მარგალიტი სულ ზვინებადა დგას. შეწუხდნენ ძალიან, ამდენი სიმდიდრე რით წაეიღოთო. უცბად გაახსენდათ მღვდელი და უთხრეს, რას იზამ, ამ თვალ-მარგალიტს მოერევიო?

— თუნდა თქვენც ზედ დამასხედითო, — უთხრა მღვდელმა და ზურგი მიუშვირა. აპკიდეს მღვდელს თვალ-მარგალიტი და წამოვიდნენ.

მოვიდნენ სიზმარასთან. სიზმარას მზეთუნახავ ცოლს ტყუპი ოქროსთმიანი ქალ-ვაჟი გასჩენოდა და მამას უკვე მოზრდილები დაახვედრა.

სიზმარამ სიმამრს უამბო მთელი თავისი თავგადასავალი და გამარჯვების საწინდრად წამოღებული თვალ-მარგა-

ლიტიც უჩვენა. მერე დაუძახა თავის ცოლ-შვილს, ერთ მხარეს ბიჭი მოისვა, მეორე მხარეს ქალიშვილი, ცოლს ოქროს სურა და ტაშტი მოატანინა და ხელ-პირის ბანა დაიწყო. თან ხელმწიფე-სიმაშრს მოახსენა:

— ხელმწიფევ, აი ჩემი სიზმარი: ეს მზეა და ეს მთვარე, — დაადო ხელი ქალიშვილსა და ვაჟს, მერე ცოლისაკენ გაიშვირა ხელი, — ეს კიდევ შუქურვარსკვლავია და ხელ-პირს მახანინებსო. აბა, ამათ რომ მთხოვდი, ცოცხალი როგორ დაგანებებდიო.

— ღმერთმა ყველა კეთილი სიზმარი ასე აგისდინოსო, — უთხრა ხელმწიფემ და თავისი ტახტი და სახელმწიფო იმავ დღეს სიზმარას გადაულოცა. სიზმარამ ყურმასვილა და ფრთაპარია ქვეყნის მცველებად დააყენა, წყალისაპიას მუზვრობა უბოძა და დღეში ასი ჩაფი ღვინო დაუნიშნა. მღვდელსაც ბევრს ეხვეწა, დარჩი ჩემთანო, მაგრამ ის არ დარჩა, როგორც მიწირია, სიკვდილამდე ისე ვწირავო, — უთხრა, წამოიკიდა საყდარი და წავიდა.

სიზმარა და მისი ძმობილები დღესაც ტკბილად ცხოვრობენ და სახელმწიფოსაც გონივრულად მართავენ. წყალისაპია დღეში ას ჩაფ ღვინოს სვამს, ყურმასვილას არც ერთი პაწია ჩქამი არ გამოეპარება, ხოლო ფრთაპარია ისე შეუცვლის მსტოვრებს საიდუმლო ბარათებს, რომ თავიანთი საქმისას თვითონაც ველარაფერს იგებენ.

ხანდახან მღვდელიც ესტუმრებათ, დადგამს საყდარს, გადაიხდის წირვა-ლოცვას და წავა.

ჭირი — იქა, ლხინი — აქა,

ქატო — იქა, ფქვილი — აქა.





## მონადირის შვილი

იყო და არა იყო რა, ღვთის უკეთესი რა უნდა ყოფილიყო, იყო ერთი მონადირე, ჰყავდა ცოლი და ერთი ძუძუთა ვაჟიშვილი. მონადირე დღისით სანადიროდ დადიოდა, ღამით თავის ცოლ-შვილთან ხარობდა და ბიჭის გაზრდა-დავაჟკაცებას სიხარულით მოელოდა, მაგრამ ვერ მოესწრო, — ერთხელ ნადირობიდან რომ დაბრუნდა, ავად გახდა და გარდაიცვალა.

გაიზარდა მონადირის შვილი და ისეთი ვაჟკაცი დადგა, რომ კაცის თვალი იმაზე უკეთესს ველარავის ნახავდა. ერთ დღეს დედას ჰკითხა, — მამაჩემი რა ხელობის კაცი იყო?

— მონადირე იყო, — უთხრა დედამ.

— მაშ, მეც მამაჩემის ხელობას გავეყვებიო, — თქვა ბიჭმა და დედას მამის სანადირო იარაღი მოსთხოვა. დედამ მოუტანა მამისეული მშვილდ-ისარი, ჩააბარა შვილს და გააფრთხილა:

— შვილო, ღმერთმა ხელიღბლიანი მონადირე გქნას, მაგრამ ერთი დაიხსომე: თეთრ მთაში ინადირე, შავ მთაშიც ინადირე, ოღონდ წითელ მთაში არ გადახვიდე, თორემ ინანებო.

წავიდა მონადირის შვილი სანადიროდ. იარა თეთრ მთაში, მაგრამ ვერაფერი მოკლა. იარა შავ მთაში და ვერც იქ რაიმე ინადირა. ბოლოს თქვა, მოდი ამ წითელ მთაშიაც გადავალ, განა რა უნდა იყოს ისეთი საშინელიო.

გადავიდა წითელ მთაში და დაღლილი ერთ ხის ძირას ჩამოჯდა. ცოტა ხნის შემდეგ ხეზე ერთი ტურფა სანახავი



ფრინველი შემოჯდა და საამო ხმაზე აჭიკჭიკდა. ბიჭმა გულში თქვა: „ეს ისეთი ლამაზი რამ არის, რომ ამისი მოკვლა დიდ ცოდვად ჩამეთვლება და როგორმე ცოცხლად უნდა შევიპყრო“, — მიეპარა და დაიჭირა. მოიყვანა შინ და დედას უთხრა, ეს უცხო ფრინველი ჩვენს ხელმწიფეს უნდა მივგვარო საჩუქრადო. დედამ დაუშალა:

— ხელმწიფეთა გული გაუმაძღარია და მაგას არ დაგვერდება, სხვა რამესაც მოგთხოვსო.

ბიჭმა მაინც არ დაიშალა. მაშინ დედამ უთხრა:

— კარგი, შეილო, რაკი არ დაგიშლია, წაუყვანე, მაგრამ იცოდე, ნაზირ-ვეზირები ასეთ ძვირფას საჩუქარს რომ დაინახავენ, შურით დასკდებიან და შემოგვეპატრებიან, შენ ვაჭრობას ნუ დაუწყებ, მიეცი, რაც შემოგაძლიონ და უკან წამოდი, თორემ ინანებო.

ბიჭი შეჰპირდა, ასე ვიჯამო, მაგრამ გუნებაში თქვა, ფრინველი ჩემი დაჭერილია და საჩუქრადაც მე თვითონ უნდა გადავცე, სახელი ნაზირ-ვეზირებს რატომ უნდა დარჩესო.

მართლაც დაუხვდნენ ნაზირ-ვეზირები და შეაძლიეს უთვალავი თვალ-მარგალიტი, მაგრამ მონადირის შეილმა ყველაფერზე უარი თქვა და ტურფა ფრინველი ხელმწიფეს თავისი ხელით მიჰგვარა. ხელმწიფემ დიდად დაუმაძღა და გულუხვადაც დაასაჩუქრა. ნაზირ-ვეზირებს კი უთხრა, — აბა თქვენ რა ვაჟკაცები ხართ, რომ კარში ფეხი ვერ გაგიდგამთ, ვაჟკაცი ეს ყოფილა და ქუდიც ამას ხურებიანო.

ნაზირ-ვეზირებს ძალიან ეწყინათ ხელმწიფის ნათქვამი, გულში მტრობა ჩაიდეს და მონადირის შეილის დაღუპვა გადაწყვიტეს. ერთ დღეს მივიდნენ ხელმწიფესთან და მოახსენეს:

— ასეთ ტურფა და ტკბილ მაგალობელ ფრინველს გალიაც შესაფერი უნდა ჰქონდესო.

— რისი გალია მოუხდებო? — ჰკითხა ხელმწიფემ.

— რა თქმა უნდა, სპილოს ძვლისაო, — მოახსენეს ნაზირ-ვეზირებმა.

— მერე და, სად ვიშოვი ამდენ სპილოებსო? — კვლავ იკითხა ხელმწიფემ.

— ვინც ეგ ფრინველი მოიყვანა, სპილოების მოყვანასაც ის შეძლებსო, — მიუგეს ნაზირ-ვეზირებმა.

დაიბარა ხელმწიფემ მონადირის შვილი და უთხრა:

— იმდენი სპილო უნდა მომიყვანო, რომ იმათი ძვლები-საგან ერთი მოზრდილი გალია გამოვიდესო.

დალონდა მონადირის შვილი, ისეთ გალიას, როგორსაც ხელმწიფე თხოულობდა, ათი სპილოც არ ეყოფოდა და სად უნდა დაეხოცა ამდენი სპილო. წამოვიდა შინ დალონებული და თავისი გასაჭირი დედას შესჩივლა.

— აკი გითხარი, შვილო, ხელმწიფის გული გაუმაძღარი და კიდევ რამეს მოგთხოვს-მეთქი მაგრამ ახლა სინანული აღარაფერს გარგებს. წადი, გამოსთხოვე ხელმწიფეს ასი ურემი ბანგი და ასი ურემი ბამბა, მიდი იმ ტბასთან, სადაც სპილოები წყლის სასმელად მიდიან. ტბა ბამბით ამოაშრე და შიგ ბანგი ჩაასხი. მოვლენ სპილოები, დალევენ და გაბრუებულები იქვე დაეყრებიან. დასჭერი თავები, რამდენიც საჭიროა, და წამოიღეო.

გამოსთხოვა ხელმწიფეს მონადირის შვილმა ასი ურემი ბანგი და ასი ურემი ბამბა და მიიტანა იმ ტბასთან. ტბა ბამბით დააშრო და შიგ ბანგი ჩაასხა. შუადღისას მოვიდნენ სპილოები, დალიეს ბანგი და იქვე დაეყარნენ. დასჭრა მონადირის შვილმა თავები. დააწყო ურემებზე და მოიტანა.

ხელმწიფემ უფრო მეტად დაუმაძღლა სამსახური და საჩუქარიც კიდევ მოუმატა. ნაზირ-ვეზირებს უარესად წაეკიდათ შური და ხელმწიფეს შეუჩნდნენ: თეთრსა და წითელ ზღვას შუა ერთი მზეთუნახავი ქალი ცხოვრობს და ის რომ დედოფლად დაისვა, უფრო ბედნიერი და სახელოვანი ხელმწიფე იქნებო.

— მერე და ვინ მომიყვანს იმ მზეთუნახავსო? — იკითხა ხელმწიფემ.

— ვინც ფრინველი და სპილოები მოგართვანთ, იმას არც იმ მზეთუნახავის მოყვანა გაუჭირდებაო, — უთხრეს ნაზირ-ვეზირებმა.

დაიბარა ხელმწიფემ მონადირის შვილი და უთხრა:

— თეთრ ზღვასა და წითელ ზღვას შუა რომ მზეთუნახავი ქალი ცხოვრობს; ის უნდა მომიყვანოო.

დაბრუნდა დაღონებული მონადირის შვილი და დედამ შესჩივლა, ხელმწიფემ ესა და ეს დამავალა და რა ვქნაო?

— ოხვრა და სინანული ახლა აღარაფერს გიშველის, თავიდან უნდა გცოდნოდა, რომ ხელმწიფე სულ უფრო მეტსა და მეტს მოინდომებდაო, — უთხრა დედამ და მზეთუნახავი ქალის მოყვანის ხერხიც ასწავლა, — წადი და ხელმწიფეს იმდენი ფული გამოსთხოვე, რომ გზაზე ვინც განწირული შეგხვდება, ყველას დასახსნელად გეყოს, სიკეთისათვის იქნებ ღმერთი შეგეწიოს და ეგ დავალებაც უხიფათოდ შეასრულოო.

წავიდა მონადირის შვილი და ხელმწიფეს ფული გამოსთხოვა, ხელმწიფემ მისცა ფული და ბიჭიც გზას გაუდგა, ბევრი იარა, თუ ცოტა იარა, ბოლოს ერთ სოფელს მიადგა, სოფლის პირას ბიჭებს მახით ქორი დაეჭირათ და მოკვლას უპირებდნენ. მონადირის შვილმა ბიჭებს ოქროები მისცა და ქორი გააშვებინა. ქორმა ერთი ცალი ფრთა გამოიძრო, მისცა მონადირის შვილს და უთხრა:

— ეს ფრთა სულ თან ატარე, სადაც გაგიჭირდეს, ამოიღე, მახსენე და იმავე წამს იქ გავირდები. კაცნი ვართ და იქნებ მეც გამოგადგეო.

გაიარა ცოტა კიდევ მონადირის შვილმა და ერთ მდინარეს მიადგა. მდინარის პირას მეთევზეს ბადე გამოეთრია, შიგ ერთი თევზი გაბმულიყო და საცოდავად ფართხალებდა, მივიდა მონადირის შვილი მეთევზესთან, მისცა ფული და თევზი გააშვებინა. თევზმა ერთი ფარფლი გამოიძრო, მისცა მონადირის შვილს და უთხრა:

— თუ სადმე გაგიჭირდეს, მახსენე და იქნებ მეც გამოგადგეო.

წავიდა მონადირის შვილი და ახლა ასეთ სურათს წააჩყდა: მონადირეებს ერთი ირემი მოეგდოთ ალყაში და მოკვლას უპირებდნენ. მისცა მონადირეებს ფული და ირემი გადაარჩინა. ირემმა ერთი ბალანი გამოიძრო და მონადირის შვილს უთხრა:

— აჰა, ეს ბალანი, სადაც დაგჭირდეს, მახსენე და უმაჟი, იქ გავირდები, ერთ გაჭირვებაში იქნებ მეც გამოგადგეო.

წავიდა მონადირის შვილი და კიდევ მიადგა ერთ სოფელს.

ფელს. ნახა, ხალხს საქათმეში მელა შეემწყვდია და კეტე-  
ბით უპირებდნენ ჩაქოლვას. ბიჭმა ეს მელაც ფულით დაიხ-  
სნა, წამოიყვანა მინდორში და გაუშვა. მელამ ერთი ბალანი  
მისცა და უთხრა:

— გაჭირვებაში მახსენე და ჩემ წილად მეც მოგეხმარე-  
ბიო.

შეინახა მონადირის შვილმა ეს ნიშანიც და თავისი  
გზით წავიდა. იარა, იარა და ბოლოს მზეთუნახავის ბრო-  
ლის კოშკსაც მიადგა. გადმოიხედა მზეთუნახავმა და დაუ-  
ძახა: რისთვის მოსულხარო?

— შენ წასაყვანადო, — უპასუხა მონადირის შვილმა.

— ჩემი წაყვანა თუ გინდა, ერთი პირობა უნდა აასრუ-  
ლო, — გადმოსძახა მზეთუნახავმა. — ისე უნდა დაიმალო,  
რომ ვერ გიპოვო, სამჯერ გაპატიებ, თუ მეოთხედაც გიპოვე,  
თავს მოგკვეთ და წყალში გადაგაგდებო.

— კარგიო, — დათანხმდა მონადირის შვილი, ამოიღო  
ქორის ფრთა და ახსენა. მოფრინდა ქორი და ჰკითხა, რა გაგ-  
ჭირვებიაო?

— თუ შეგიძლია, ისე დამმალე, რომ მზეთუნახავმა ვერ  
დამინახოსო, — უთხრა მონადირის შვილმა.

შეისვა ქორმა მონადირის შვილი ზურგზე, აფრინდა მაღ-  
ლა, ცას მიაკრა და ქვევიდან თვითონ აეფარა.

ქალს ერთი ჯადოსნური სარკე ჰქონდა, რომელშიც ცა-  
ხმელეთის ყველა კუთხე-კუნჭული მოჩანდა. აიღო ქალმა ეს  
სარკე, ჩაიხედა შიგ, დაინახა მონადირის შვილი და ასძახა:

— გხედავ, გხედავ, ცასა ხარ მიკრული და ქვევიდან ქო-  
რი გაფარიაო!

ჩამოიყვანა ქორმა ისევ ძირს მონადირის შვილი. ბიჭმა  
ახლა თევზს მოუხმო.

— რა გაგჭირვებიაო? — ჰკითხა თევზმა.

— ისე დამმალე, რომ მზეთუნახავმა ვერ დამინახოსო, —  
ქთხოვა ბიჭმა.

— რაც შემიძლია, შენი გულისთვის თავს არ დავზოგა-  
ცო, — უთხრა თევზმა, შეისვა ზურგზე, ჩაიყვანა ზღვის  
ფსკერზე, ლოდის ქვეშ შესვა და მაღლიდან თვითონ გადაე-  
ფარა.

ჩაიხედა მზეთუნახავმა სარკეში, დაინახა მონადირის შვილი და ჩასძახა:

— გხედავ, გხედავ, ზღვის ფსკერზე, ლოდის ქვეშ ზინაო და მალლიდან თევზი გაფარიაო!

ამოიყვანა თევზმაც ისევ ხმელეთზე მონადირის შვილი; ბიჭმა ახლა ირემს მოუხსმო, მოვარდა ირემი ქშენით და ჰკითხა:

— რა გაგჭირვებია, რით გემსახურო?

— ისე დამმალე, რომ მზეთუნახავმა ვერ დამინახოსო, — უთხრა ბიჭმა.

შეისვა ირემმა ზურგზე, ცხრა მთა გადაატარა, ერთ ღრმა გამოქვაბულში შესვა და შესასვლელს თვითონ ჩამოეფარა. ჩაიხედა მზეთუნახავმა სარკეში, დაინახა მონადირის შვილი და გასძახა:

— გხედავ, გხედავ, ცხრა მთას იქით გამოქვაბულში ზინაო და ირემი გაფარიაო.

დაბრუნდა უკან მონადირის შვილი ირმით და ბოლოს მელა ახსენა. მოცუნცულდა მელაკულდა და ჰკითხა:

— რა გაგჭირვებიაო?

— ასე და ასეა ჩემი საქმე, — უთხრა მონადირის შვილმა. — სამი პირობა უკვე წავაგე, ახლა შენი იმედილა მაქვს, თუ დამმალავ ისე, რომ მზეთუნახავმა ვერ დამინახოს, ხომ კარგი, თუ არა და, თავის მოკვეთა არ ამცდებაო.

— ეგ ადვილი სამსახურია, დამალვის მეტი რა მცოდნიაო, — უთხრა მელამ, გამოიბა კუდზე და წაიყვანა. აქეთ ატარა, იქით ატარა, ათას ხერელში გააძვრინა და ბოლოს იატაკქვეშ იმ ადგილზე ამოსვა, სადაც თვითონ მზეთუნახავი იდგა.

ამოიღო ქალმა სარკე, გაიხედა ხმელეთზე — ვერ დაინახა, აიხედა ცაში — ვერც იქ დაინახა, ჩაიხედა ზღვაში — არც იქ გამოჩნდა. ბევრი ატრიალა თავისი ჯადოსნური სარკე, მაგრამ მონადირის შვილს თვალი ველარსად შეაგდო. ბოლოს იწამა დამარცხება და დაუძახა:

— გამოდი, მოგებული ხარ და საითაც გინდა, იქით წამიყვანეო!

გამოვიდა მონადირის შვილი. ქალმა ჰკითხა, შენთვის გინდვიარ, თუ სხვა ვისმესთვისაო?

— ჩემი ხელმწიფისათვის მინდისარო, — გამოუტყდა ბიჭი.

— მაშინ წავიდეთ, — უთხრა ქალმა. — იმ შენს ხელმწიფეს სამჯერ დამალვის პირობას ჩამოვართმევ, თუ დამემალა, რაღა იქნება, თუ ვერა, თავს მოვკვეთ და შენი ცოლი გავხდებიო.

წამოვიდნენ და მივიდნენ ხელმწიფესთან. ხელმწიფემ უზომოდ გაიხარა მზეთუნახავი საცოლის მოყვანით, მაგრამ ქალმა ახლოც არ გაიკარა. ერთ პირობას დაგიდებ, თუ აასრულე, ხომ კარგი, თუ არადა, თავს გაგაგდებინებო.

— რა პირობასო? — ჰკითხა ხელმწიფემ.

— სამჯერ ისე უნდა დამემალო, რომ ვერ გიპოვნო, — უთხრა ქალმა, — ორჯერ გაპატიებ, მაგრამ თუ მესამედაც დაგინახე, იცოდე, სიკვდილს ვერ გადაურჩებიო.

ხელმწიფე დათანხმდა, მოუხმო თავის ნაზირ-ვეზირებს და უთხრა: ცხენების ახურში ჩამაწვინეთ, მალლიდან ბზე და ქერი დამაყარეთ და ცხენები მოუშვითო. ნაზირ-ვეზირებმა, რა თქმა უნდა, უსიტყვოდ აასრულეს თავიანთი ხელმწიფის ბრძანება. ჩაიხედა ქალმა სარკეში და სიცილით გაიგუდა:

— კატასავით ახურში ჩაწოლილა და თუ დროზე არ ამოიყვანეთ, ცხენები შეჭამენო, — უთხრა ნაზირ-ვეზირებს.

გამოვიდა ბზეში ამოსვრილი ხელმწიფე და ნაზირ-ვეზირებს უთხრა, — ჩამიყვანეთ სარდაფში, ქვევრში ჩამსვით და მალლიდან ლოგინები დამაფარეთო.

ნაზირ-ვეზირებმა ჩასვეს ხელმწიფე ქვევრში, დააყარეს, რაც ლოგინი ჰქონდათ, და ქალთან დაბრუნდნენ. ქალმა ჩაიხედა სარკეში, უფრო ხმამალა გადაიხარხარა და ნაზირ-ვეზირებს უთხრა:

— ჩქარა უშველეთ თქვენს ხელმწიფეს, თორემ საცაა, იმ ქვევრში გაიგუდებაო.

ამოიყვანეს ნაზირ-ვეზირებმა ხელმწიფე ქვევრიდან და ჰკითხეს, — ახლა სადღა დაგმალთო?

— ნესვი დიდი ორმო ამოთხარეთ, — უთხრა ხელმწი-

ფემ. — ჩამსვით შიგ. ზედ გოდორი დამაფარეთ და მერე ნესვი დამაყარეთო.


ნაზირ-ვეზირებმა ეს ბრძანება უფრო გულითადად აასრულეს, მაგრამ თავიანთ ხელმწიფეს ვერც ამით უშველეს. ჩაიხედა ქალმა სარკეში და სიცილით სული ველარ მოითქვა:

— ჩქარა ამოიყვანეთ ორმოდან, თორემ ნესვის ჭიები გამოსხრავენო, — უთხრა ნაზირ-ვეზირებს.

ამოიყვანეს ნესვით მოსვრილი ხელმწიფე ნაზირ-ვეზირებმა და მზეთუნახავს მიჰგვარეს. მზეთუნახავმა ქალმა შემოჭკრა ხმალი და თავი გააგდებინა. შურიანი ნაზირ-ვეზირებიც ზედ მიაყოლა და მონადირის შვილზე ჯვარი დაიწერა. მონადირის შვილმა ჩაიბარა სახელმწიფო, დედაც სასახლეში გადმოიყვანა და ცხოვრობდნენ ტკბილად და ბედნიერად.

ჭირი — იქა, ლხინი — აქა,  
ქატო — იქა, ფქვილი — აქა.





## მინდვრის ქალი

იყო და არა იყო რა, ღვთის უკეთესი რა იქნებოდა, იყო შაშვი მგალობელი, ღმერთი ჩვენი მწყალობელი. იყო ერთი მდიდარი კაცი და ჰყავდა ორი ქალი და ერთი ვაჟი. კაცი რომ დაბერდა და სიკვდილის ხანს მიაღწია, დაიბარა ვაჟი და უთხრა:

— შეილო, ღვთითა და იღბლით, ამდენი ქონება დამიგროვებია და შეილებიც დამიზრდიხართ. ახლა ჩემი ამ ქვეყნიდან წასვლის დრო მოვიდა, მალე საიქიოს ქვეყანას უნდა გავემგზავრო და სიკვდილის წინ ერთი თხოვნა ამისრულე ეს შენი დები თავის დროზე დაათხოვე, ოღონდ ისე კი რომ ბირველ ბედს ნუ დაუკარგავ და ვინც პირველმა გთხოვოს, მიათხოვეო.

შვილი შეპირდა, შენს ანდერძს პირნათლად შეეასრულებო. მოკვდა კაცი, შვილმა შესაფერისი პატივით დაასაფლავა და შეუდგა ოჯახის მართვას.

გავიდა ცოტა ხანი. ერთხელ ბიჭი დერეფანში იჯდა და შარაგზას გაჰყურებდა. გზაზე უცბად ერთი უცხო მგზავრი გამოჩნდა და პირდაპირ ამ ბიჭთან მივიდა. არც აცია, არც ბცხელა და მოსვლისთანავე უფროსი და სთხოვა ცოლად, გაყს მამის ანდერძი მოაგონდა და უცნობს უთხრა:

— მოცუმაზე უარს. არ გეტყვი, რადგან მამაჩემისაგან ასე მაქვს ნაანდერძები, მაგრამ ვინმემ რომ მკითხოს, და სად გაათხოვე, ან ვის მიეციო, რა ვუთხრა? გვარ-სახელი, სადა ურობა და ხელობა მაინც მითხარი, რომ ვიცოდე და ჩემიანებსაც გავაგებინოო.



უცხო კაცმა უპასუხა:

— მე შენთან არც გვარ-სახელის სათქმელად მოვსულვარ და არც სალაპარაკოდ, თუ მაძლევ დას, მომეცი. ვინაობასაც და სადაურობასაც თავის დროზე შეიტყობ, თუ არაა, როგორც მოვსულვარ, ისევე წავალ.

ვაჟმა იფიქრა, ემანდ ჩემი მიზეზით დას ბედი არ დაუკარგო, და დათანხმდა. გამოიყვანა უფროსი და და ჩააბარა უცხო კაცს. კაცმა მოჰკიდა ქალს ხელი და ორივენი უცბად გაჰქრენ.

გავიდა კიდევ რამდენიმე ხანი და ახლა მეორე კაცი მოვიდა, მიიჭრა ისიც ვაჟთან და პირდაპირ სთხოვა:

— შენი უმცროსი და უნდა მომცე ცოლად.

ვაჟმა იმასაც ხელობა — ვინაობისა და სადაურობის გამხელა მოსთხოვა, მაგრამ იმისგანაც იგივე პასუხი მიიღო, რაც უფროსი დის წამყვანისაგან:

— მე არც სალაპარაკოდ მოვსულვარ და არც გასაცნობად, შენი დის წასაყვანად მოვედი და, თუ მაძლევ, ნულარ მაგვიანებო.

რას იზამდა ვაჟი, მამის ანდერძს ვერ გადაუვიდოდა და მისცა იმასაც უმცროსი და. კაცმა მოჰკიდა თუ არა ხელი ქალს, ორივენი უცბად ჩრდილივით გაქრნენ.

დარჩა ვაჟი მარტოკა და გულს დარდი შემოეყარა: რა ექნა, ეს დები სად დაუკარგე, რომ ჭირი იყოს ან ლხინი, სად მოვძებნო, ვის მივაკითხო და ან ხალხს რა ვუთხრა, როცა შემეკითხებიანო. მიეცა საგონებელს ბიჭი და დადარდიანდა, აღარც კარში გამოდიოდა, არც ხალხში ერეოდა და საქმეზედაც ხელი აიღო. მამის მონაგარი ქონება თანდათან კლებულობდა, ილეოდა და სახლ-კარი და ეზო-კარ-მიდამოც ნადგურდებოდა.

გაიგო ეს ამბავი იმ ქვეყნის ხელმწიფემ და თავისი კარისკაცები გაგზავნა, ის ბიჭი საჩქაროდ აქ მომგვარეთო. წაიყვანეს კარისკაცებმა და მიჰგვარეს ხელმწიფეს. ხელმწიფემ ჰკითხა:

— რა არის მიზეზი, რომ შრომა-გარჯაზე მთლიანად ხელი აგიღია და მამის ამაგს ასე უმოწყალოდ ანადგურებო? ბიჭმა უთხრა თავისი გასაჭირი:

— ორი და მყავდა, ორივენი ვილაც უცნობ კაცებს გაჰყა-  
ტანე ცოლად, მათი ავ-კარგისა აღარაფერი ვიცი და იმას  
ვდარდობო.

— მერე რატომ ჰქენი ეგო? — ჰკითხა ხელმწიფემ.

— მამაჩემის ანდერძი ასეთი იყო, რომ ვინც პირველად  
მოვიდოდა და მთხოვდა დებს, უყოყმანოდ იმათთვის გამე-  
ტანებინაო, — მიუგო ბიჭმა.

— რაკი მამაშენის სურვილი ასეთი ყოფილა, მაშ ნუ  
იდარდებ. მამაშენი ძალიან ჭკვიანი კაცი იყო და უკეთურს  
არაფერს გირჩევდაო. — უთხრა ხელმწიფემ და თავის მონა-  
დირეებს ტყეში სანადიროდ გააყოლა, გულს გადაგეყრებო.

წავიდნენ მონადირეები და ერთ ტრიალ მინდორში გა-  
ვიდნენ. შუა მინდორში უცბად ერთი მზეთუნახავი ქალი დაი-  
ნახეს, ყვავილებზე ნიავეით მსუბუქად დახტოდა, ხან ერთ  
ყვავილზე დასკუბდებოდა ფუტკარივით, ხან მეორეზე და ისე-  
თი ლამაზი იყო, რომ კაცის თვალი იმაზე ტურფას ვეღარა-  
ფერს ნახავდა.

მონადირეებმა გადაწყვიტეს ამ ქალის დაჭერა და ირემი-  
ვით ალყაში მოიმიწყვდიეს, მაგრამ ქალი აფრინდა, გადაუფ-  
რინა თავზე და ისევ ყვავილებზე დაიწყო ფარფატი. ისევ წა-  
მოუარეს აქეთ-იქიდან მონადირეებმა და ისევ ალყაში მოამ-  
წყვდიეს, მაგრამ კვლავ ამაოდ, ქალმა ისევ გადაუფრინა  
თავზე და კვლავ ყვავილებზე ათამაშდა და ასე სულ. სდიეს  
მონადირეებმა და იფრინა ქალმა. ამ დევნაში ყველას ცხენე-  
ბი დაუსკდა, მარტო იმ ბიჭსლა შერჩა ცხენი და ახლა მარ-  
ტოკა გაეკიდა. მიფრინავს ქალი და მისდევს ბიჭი. იარეს  
ასე, იარეს და გავიდნენ უფრო დიდ მინდორში. აქ ბიჭსაც  
გაუსკდა ცხენი და დარჩა ქვეითად.

გაიხედ-გამოიხედა ბიჭმა და ელდა ეცა: აღარც მონადი-  
რეები ჩანან სადმე და აღარც ნაცნობი ადგილებია. ქალის  
დევნით გართულმა ვერც ის იაზრა, აქ საიდან მოვიდა, რო-  
მელი გზით, ან რომელი მხრიდან. შემოეყარა ბიჭს გულზე,  
დაჯდა და დაიწყო ტირილი. მივიდა ქალი, შორიანლო ყვა-  
ვილზე მოიკალათა, გადაიდო ფეხი ფეხზე და ბიჭს უთხრა:

— სირცხვილი არ არის, რომ დამჯდარხარ, დაგიკრუ-  
ფია გულხელი და ქალივით სტირი? ვაჟკაცი თუ ხარ, ვაჟკა-

ცურადაც უნდა მოიქცე. ადექი, გაიარ-გამოიარე, ქვეყანა დი-  
დია და იქნებ სასიკეთო რამეს გადაეყარო.

შერცხვა ბიჭს, ადგა, მოიწმინდა თვალები და გაიხედ-  
გამოიხედა. შორს, მინდორში ერთი ბროლის სასახლე დაი-  
ნახა და მაშინვე იქით გაეშურა. სახლი იყო ისეთი, რომ  
ხელმწიფესაც შეშურდებოდა. ბიჭი შევიდა ეზოში და ოქ-  
როსმილიან მარმარილოს წყაროსთან ჩამოჯდა. ცოტა ხნის  
შემდეგ სახლიდან პატარა მოახლე გოგო გამოვიდა, ოქროს  
სურა გამოიტანა და წყალს შეუდგა.

— პატარა ქალო, წყალი ვისთვის მიგაქვსო? — ჰკითხა  
ბიჭმა.

— ჩემი ქალბატონისთვისო, — მიუგო გოგომ.

— ვინ არის შენი ქალბატონიო?

— ჩემი ქალბატონი შორი ქვეყნიდან მოყვანილი ქა-  
ლიაო.

ბიჭი დაეჭვდა, ამისი ქალბატონი ჩემი ერთ-ერთი და არ  
იყოსო, და გოგოს წყალი სთხოვა. გოგომ სურა მიაწოდა,  
ბიჭმა ცოტა მოსვა და სურაში ჩუმად თავისი ბეჭედი ჩააგ-  
დო. გოგომ შეუტანა სურა ქალბატონს, ქალბატონმა დალია  
და სურტიდან ბეჭედი კი გადმოვარდა. ქალმა იცნო ძმის ბე-  
ჭედი და ხმამაღლა შეჰკვივლა. მერე დაუძახა გოგოს და ჰკი-  
თხა, — ეს ბეჭედი ამ სურაში საიდან გაჩნდაო?

— არ ვიცი, — უთხრა გოგომ, — წყაროსთან ერთი უცხო  
ჭაბუკი ზის, იმან წყალი მოთხოვა და, თუ ჩააგდებდა, ის ჩა-  
აგდებდაო.

ქალმა გოგო მაშინვე უკან გააბრუნა და უთხრა:

— ის ბიჭი საჩქაროდ აქ მომიყვანეო.

გამოვიდა გოგო და შეიყვანა ბიჭი შინ. ქალმა, რა თქმა  
უნდა, დანახვისთანავე იცნო თავისი ძმა და გახარებული  
გადაეხვია. ეს ქალი უფროსი და იყო. დასვა ძმა, კარგად  
გაუმასპინძლდა და ბოლოს ჰკითხა, — აქ როგორ მოხვე-  
დიო? — ძმამ ყველაფერი დაწვრილებით უამბო:

— ხელმწიფემ თავის მონადირეებს გამომაყოლა. მინ-  
დორში ერთი მზეთუნახავი ქალი ვნახეთ, იმისმა სილამაზემ  
დამატყვევა და დასაჭერად დავედევნე, მაგრამ ვერ დავეწიე,  
თითო გუთნის გაშლაზე სტებოდა და დევნამ ამაოდ ჩამია-

რაო. ცხენიც გამისკდა, დავრჩი მარტოკა უცხო ადგილზე და აღარ ვიცოდი, საით წავსულიყავი. კიდევ კარგი, ეს შენი სასახლე დავინახე და აქ მოვედი, თორემ მშვიერ-მწყურვალ მალე სულს დავლევდი და ყვაავ-ყორნების საჯიჯგინი გავხდებოდიო.

— ვაიმე, ძმაო, მოგიკვდეს ჩემი თავი, — უთხრა დამ. — იმას ბევრმა სხვამაც სდია, მაგრამ ვერვინ დაიჭირა, მინდვრის ქალს ეძახიან. ისეთი ბედი აქვს დაწერილი, რომ ვინმემ დაიჭიროს, მაშინვე მოკვდება და ამიტომ არავის ეჭერიანებაო.

ცოტა ხნის შემდეგ ნადირობიდან სიძეც მოვიდა. ნახა თავისი ცოლისძმა, იცნო და სიხარულით გადაეხვია. მერე უთხრა:

— აი, ახლა ხომ ხედავ, ვინცა ვყოფილვარ და რა ხელობაც მქონია. მთელი ეს ტყე-ველი ჩემი საკუთრებაა, გამოვერიდე ხალხის შურს, მტრობას, ნადირ-ფრინველთა შორის, ბუნებაში დავესახლე და ვცხოვრობ მშვიდად და აუღელვებლად. ვინაობაც თავდაპირველად იმიტომ არ გითხარი, რომ შენ ნათესავ-ახლობლებს შეკრებდი და მაყრიონს გამიმართავდი, მე კი ხალხის ყაყანის ატანა არ შემიძლიაო.

მერე დასვა და მისვლის მიზეზი გამოჰკითხა. ბიჭმა უამბო, რისთვისაც იყო მოსული, მაშინ სიძემ უთხრა:

— ნუ გეწყინება კი, ცოლისძმავ, და გულახდილად უნდა გითხრა, იმ ქალის დაჭერა რომ შეიძლებოდა, მე შენი და რად მინდოდა, თვითონ დავიჭერდი და ცოლად იმას მოვიყვანდი. მთელი ჩემი სიჭაბუკე იმის დევნას შევალე, მაგრამ არაფერი გამომივიდა და თავი დავანებე. შენც გირჩევი, ხელი აიღო და თავი ტყუილშობრალოდ არ გაიწვალო.

— არაო, — უპასუხა ბიჭმა. — ის რომ არ დავიჭირო, თავი ცოცხალი არ მინდა. შენ, ჩემო სიძე, ამას გთხოვ, ერთი ცხენი მომეცი და დანარჩენი მე ვიციო.

სიძემ უთხრა:

— ცხენს ერთის მაგივრად, თუნდა ათასს მოგცემ, მაგრამ ვიცი, არაფერი გამოგივა და ერთხელ კიდევ გირჩევი, თავი დაანებო. დარჩი ჩემთან, ცოლსაც მოგგვრი და ბედნიერადაც გაცხოვრებო. — მაგრამ ბიჭმა კვლავ უარი განაცხა-

და, — არა, ვერ მოვისვენებო, ან დავიჭერ, ანდა, იმის დევნაში მოვკვდებო.

წავიდა სიძე ჯოგში და მოჰგვარა ისეთი ცხენი, რომელიც ყოველ გადახტომაზე თითო გუთნის გაშლას გადადიოდა. ბიჭს ძალიან გაუხარდა, მაშინვე ზედ შეჯდა, გამოეთხოვა და-სიძეს და ისევ მინდვრის ქალის საძებნელად წავიდა.

ბევრი ძებნა არ დასჭირვებია, მალე მიაგნო მინდვრის ქალს, მაგრამ დაჭერით ვერც ამჯერად დაიჭირა. ბიჭის ცხენი ერთ გუთნის გაშლაზე ხტებოდა, ქალმა კი ორ გუთნის გაშლაზე დაიწყო ხტომა. დახტოდა ყვავილიდან ყვავილზე, ფოთლიდან ფოთოლზე და თან ნამსა და ტკბილ ნექტარს სრუტავდა. სდია ბიჭმა, სდია და ბოლოს ის ცხენიც გაუსკდა, დარჩა ისევ ხელცარიელი, დაჯდა მინდორში და ტირილი დაიწყო.

მოფრინდა ქალი, ჩამოჯდა ყვავილზე შორიასლოს და უთხრა:

— არა, გრცხვენია, ქალი ხომ არა ხარ, რომ სტირი? ტირილით ვის რა გაუკეთებია, რომ შენ გააკეთო ადექი, გაიარ-გამოიარე, მიდექ-მოდექი, ქვეყანა დიდია და იქნებ შენს გულის საწუხარსაც რამე წამალი გამოუჩნდესო.

ბიჭმა, მართლაც, ტირილს თავი დაანება, მოიწმინდა თვალები, ადგა და გაუდგა გზას. იარა, იარა და მინდორში კიდევ დაინახა ბროლის სასახლე, ეს სასახლე მისი უმცროსი დისა და სიძისა იყო. მივიდა იქაც და დაჯდა წყაროზე. გამოვიდა მოახლე გოგო, გამოიტანა ოქროს სურა და მიუდგა მილზე გადმომდინარ წყალს. ბიჭმა სთხოვა, წყალი დამალე-ვინეო, და სურაში ჩუმად ბეჭედი ჩააგდო. დამ იცნო თავისი ძმის ბეჭედი. და მაშინვე სასახლეში აიყვანა. მსურვალედ გადაკოცნა, ამბავი გამოჰკითხა, გემრიელი სუფრა გაუშალა და ბოლოს მოსვლის მიზეზიც ჰკითხა. ბიჭმა უთხრა, რისთვისაც იყო მისული, ან ის ქალი ჩემი უნდა გახდეს, ან არა-და, თავი ცოცხალი არ მინდაო.

— ეჰ, ძმაო, — უთხრა დამ, — ისეთ ძნელ საქმეს შემდეგ მომიხარ, რომ ჯობია, აქედანვე ხელი აიღო. იმას მინდვრის ქალს ეძახიან, შენამდეც ბევრმა სდია, მაგრამ სულ ამოდ, იმ ქალმა იცის, რომ უცხო ხელის შეხებისთანავე

ნოკედება და ამიტომ არავის დაეჭვრინება. შენც გირჩევ ჩამოეხსნა და ტყუილუბრალოდ თავს ნუ გაიფუჭებო.

ამ დროს სიძეც მოვიდა, გამოჰკითხა სტუმრობის მიზეზი და იმანაც იგივე უთხრა, რაც უფროსი დის ქმარმა:

— დაანებე თავი, არაფერი გამოგივა, მაგ ქალის დაჭერა რომ შეიძლებოდეს, მაშინ შენი და რაღად მინდოდა, ცოლად იმას მოვიყვანდიო.— მაგრამ ბიჭმა არ დაუჯერა, შენ-ოლონდ ერთი ისეთი ცხენი მომეცი, რომ სამი გუთნის გაშლაზე სტებოდეს და მეტი არაფერი მინდაო.

— ცხენი რა სათქმელია, — უთხრა სიძემ, — თუნდა მთელი ჯოგი წაიყვანე, მაგრამ ვიცი, საწადელს ვერ ეწევიო. — წავიდა ჯოგში და მოუყვანა ცხენი. ბიჭი გამოეთხოვა და-სიძეს, შეჯდა ცხენზე და წავიდა ისევ მინდვრის ქალის საძებნელად. იპოვა და დაედევნა, მაგრამ ისევ უშედეგოდ: ბიჭის ცხენი თუ სამი გუთნის გაშლაზე სტებოდა, ქალი ოთხ გუთნის გაშლასაც აჭარბებდა და აბა როგორ დაეწეოდა?

იბრინეს ასე მინდორ-მინდორ, იბრინეს და ბოლოს ბიჭს ის მესამე ცხენიც გაუსკდა. ისევ მივიდა ქალი, დაუსკუბდა შორიასლოს ყვავილზე და უთხრა:

— ტირილით თვალებს. რომ ითხრი, რას გიშველის, ეს ქვეყანა ისეა მოწყობილი, სანამ ყველაფერს თავის სასარგებლოდ არ გამოიყენებ, საწადელს ვერ ეწევი. ადექი, გაიარ-გამოიარე, იქნებ რამე ნასო ისეთი, რომ შენი სასარგებლო იყოს და გულის ზრახვა აისრულოო.

შერცხვა ვაჟს, მოიწმინდა ცრემლები და წამოდგა. წავიდა მინდორ-მინდორ და უცბად ეშმაკების ჩხუბს წააწყდა. სამი ეშმაკი უმოწყალოდ ფლეთდა ერთმანეთს და გამშველებელი კი არავინ იყო. მივიდა ბიჭი ახლოს და ჰკითხა:

— კაცო, რა გაქვთ ისეთი გასაყოფი, რომ ერთმანეთს სასიკვდილოდ აღარ ინდობთო?

— ჩვენ ძმები ვართ, მამისაგან ერთი ხალინა, ერთი სავარცხელი და ერთი სალესავი დაგვრჩა, ახლა სწორედ იმათ ვიყოფთ და ვერ მოვრიგებულვართო, — უთხრეს ეშმაკებმა.

— რა არის ასეთი, რომ ვერ მორიგებულხართო? — ჰკითხა ბიჭმა.

— ხალიჩას ისეთი თვისება აქვს, ზედ რომ დაჯდეს და შესძახო, ჰკა, ხალიჩავ, გამაცურეო, საითაც ეტყვი, იქით გაგასრიალებსო; სავარცხელი ისეთი თვისებისაა, რომ, რაგინდ საღ კლდეს მიადგეს და უთხრა, ჰკა, სავარცხელო და დაკიბეო, მაშინვე საფეხურებად დასჭრისო, ხოლო სალესავი წყალს ისრუტავს, წინ ზღვაც რომ დაგიხვდეს, გასვლა არ გაგიჭირდება. ჩააგდებ სალესავს შიგა და უკანასკნელ წვეთამდე დააშრობსო, — უთხრეს ეშმაკებმა და თან სამართალი მოსთხოვეს, — თუ შეგიძლია გაგვიყავი და გაგვაშველო.

ბიჭს უცბად ქალის ნათქვამი გაახსენდა, რასაც ნახავ, ყველაფერი შენს სასარგებლოდ გამოიყენეო, და ეშმაკებს უთხრა:

— წადით მინდვრის ბოლოში და დადექით, მე რომ ნიშანს მოგცემთ, გამოიქცევით და, რომელიც წინ მოვა, ხალიჩას იმას მივცემ, რომელიც მეორედ — სალესავს მივცემ, ხოლო ბოლოს მოსულს — სავარცხელსო.

გაუსარდათ ეშმაკებს, ძალიან კარგი სამართალიაო, და წავიდნენ მინდვრის ბოლოში. ბიჭსაც ეს უნდოდა, დაშორდნენ თუ არა ეშმაკები, აიღო სალესავი, სავარცხელი, დაჯდა ხალიჩაზე და შესძახა:

— ჰკა, ხალიჩავ და მინდვრის ქალთან მიმაცურეო!

მოსწყდა ხალიჩა ადგილს და ერთ წამში მინდვრის ქალთან მისრიალდა. მიხტის ქალი და მისდევს ხალიჩა. ირბინა ქალმა და იცურა ხალიჩამაც, გაათავეს მინდორი და ბოლოს ერთ უშველებელ კლდეს მიადგნენ. ქალმა ისკუბა და ამ ცაში აწვდილ კლდეს ბუმბულივით გადაეველო.

— ჰკა, სავარცხელო და ეს კლდე საფეხურებად აქციეო! — შესძახა ბიჭმა სავარცხელს. სავარცხელი ეცა კლდეს და სულ კიბის საფეხურად აქცია. აცურდა ხალიჩა საფეხურებზე და გაეკიდა ქალს.

იფრინა ქალმა, იცურა ხალიჩამ, გაირბინეს ცხრა ტყე, ცხრა მინდორი და ერთ უნაპირო ზღვას მიადგნენ. ქალმა ისკუბა და ზღვას მერცხალივით გადაეველო. ხალიჩას კი ზღვაზე ცურვა არ შეეძლო, მაშინ აიღო ბიჭმა სალესავი, გადააგდო და შესძახა:

— ჰკა სალესავო და ეს ზღვა უკანასკნელ წვეთამდე ამო-  
ხაბეო!

სალესავი აშხივლდა და ერთ წამში მთელი ზღვა დააშ-  
რო. გადაცურა ხალიჩამ ზღვის ფსკერი და გაეკიდა ისევ  
ქალს. იფრინა ქალმა, იცურა ხალიჩამ და ბოლოს ერთ მთის  
ძირას, ერთ გამოქვაბულს მიადგნენ. ეს გამოქვაბული მინ-  
დვრის ქალის სახლი იყო და ისეთ უდაბურ ადგილზე იდგა,  
რომ ეშმაკიც ვერ მიაგნებდა. შევარდა ქალი გამოქვაბულში  
და ვაჟიც შეჰყვა. მობრუნდა ქალი, გადაეხვია ვაჟს და დაუ-  
წყო კოცნა, — როგორ ქმარსაც ვთხოვდი ღმერთს, სწორედ  
ისეთი მარგუნაო.—მერე დასვა და თავისი უცნაური საქციე-  
ლის მიზეზიც უამბო:


— მე ისეთი ბედი მქონდა დაწერილი, რომ თუ კაცი ჩე-  
მი სახლის გარეთ მომკიდებდა ხელს, უსათუოდ მოვკვდებო-  
დი. ამ ჩემს საბინადროს ხომ ხედავ, როგორ ადგილზეა, აქ  
თვითონ, თავისით ძეხორციელი ვერ მომაგნებდა, ამიტომ  
მე ქმარი გარეთ უნდა მეძებნა და თანაც ისეთი, რომელსაც  
იმდენად შეეუყვარებოდი, რომ ჩემი დევნა არ მობეზრდე-  
ბოდა და ბოლომდე მომყვებოდა. ბევრმა მდია, მაგრამ ბო-  
ლომდე ვერავინ გასძლო, მხოლოდ შენ აღმოგაჩნდა იმდენი  
სიყვარული და გამძლეობა, რომ სახლამდე მომყევი და ამი-  
ერიდან მე შენი საკუთრება ვარო.

წამოიყვანა ბიჭმა მინდვრის ქალი, დაიწერა ჯვარი და  
დაიწყეს ტკბილად ცხოვრება.

ჭირი — იქა, ლხინი — აქა,  
ქატო — იქა, ფქვილი — აქა.







## ცუმოჭრილი ფურიკემი

იყო და არა იყო რა, ღვთის უკეთესი რა იქნებოდა, იყო ერთი მონადირე და ჰყავდა ცოლი და ძუძუთა ბიჭი. მონადირეს ცოლი ეუბნებოდა, მოდი, მონადირეობას თავი დაანებე და სხვა ხელობა აირჩიე, არ მინდა, მუდამდღე რომ ტყეში დადიხარ, ერთხელაც იქნება ხიფათს რასმეს გადაეყრები და დაიღუპებიო. მაგრამ მონადირე არ უჯერებდა, სიყრმიდანვე ამ ხელობას ვადგევარ და ახლა სხვაზე ველარ გავცვლიო.

ცოლის გუმანი ახდა. ერთხელაც წავიდა მონადირე სანადიროდ და უკან აღარ დაბრუნდა. ცოლმა მთელი სოფელი შეყარა და მაძებარი გაგზავნა, მაგრამ ცამ ჩაყლაპა თუ მიწამ. მონადირის გზა-კვალისა ველარაფერი გაიგეს.

დარჩა ქალი ქვრივად და დაუწყო ბიჭს ზრდა. გავიდა თვრამეტი წელიწადი. ბიჭი გაიზარდა და ისეთი ვაჟკაცი დადგა, რომ თვალი ყველას ზედ რჩებოდა. ერთხელ ბიჭმა დედას უთხრა:

— ახლა უკვე დიდი ვარ და დროა, რამე ხელობას დავადგე, მითხარი, მამარჩემი რა საქმის კაცი იყო და მეც იმას მოვკიდებ ხელსო.

— არა, შვილო, — უთხრა დედამ, — მამაშენის გზით სიარული ღმერთმა დაგიფაროს, თავის ხელობით თვითონ ვერაფერი მოიგო და არც შენ გარგებსო.

— მაინც რა ხელობის კაცი იყო? — იკითხა ბიჭმა.

— მონადირე იყოო, — გამოტყდა დედა.

— მაშ მეც მონადირე უნდა გავხდეო, — თქვა ბიჭმა.

დედამ კიდევ დაუშალა, მამაშენი ნადირობის გზაზე დაი-  
კარგა და შენ ველარ დაგკარგავო, მაგრამ შეილმა არ  
დაიჯერა, — რაც მამაჩემს უკეთებია, მეც ის უნდა ვაკეთო,  
მამა-პაპურ გზას და საქმეს ვერ ვუღალატებო, — უთხრა დე-  
დას და მამისეული სანადირო იარაღი მოსთხოვა.

— რა ვქნა, შეილო, რაკი არ დაგიშლია, იყოს ნება შე-  
ნო, — უთხრა დედამ, გამოუტანა მამისეული თოფ-სასწრა-  
ფო და ქამარ-ხანჯალი და შეილს ჩააბარა. ბიჭმა დაწმინდა  
დიდი ხნის ნაუქმარი იარაღი, დაზეთა, ჩამოასხა ტყვიები,  
თოფს ტალი და პირისწამალი გამოუცვალა, ჩაიდო საგზა-  
ლი, გადაიკიდა თოფი და გასწია ტყისაკენ სანადიროდ.

პირველ დღესვე ხელიღბლიანად ინადირა, მერე და მერე  
ხომ, რალა თქმა უნდა, თანდათან გაიწაფა, ნადირს გზა-სა-  
ყელი გაუგო და შინ ხელცარიელი არასოდეს ბრუნდებოდა.

მაგრამ ერთ დღეს ისეთი თარსი ბედი დაჰყვა, რომ პრან-  
წია ჩიტიც კი ვერ მოინადირა. იარა ტყე-ღრეში აღმა-დაღმა,  
იარა და დაღლილ-დაქანცული ბოლოს შინისაკენ დაბრუნდა.  
გამოიარა ცოტა გზა და ტყიდან ერთი ყელმოღერილი ფურ-  
ირემი გამოუხტა. ესროლა ბიჭმა თოფი და გააგორა. გახა-  
რებულმა საჩქაროდ ცეცხლი დაანთო, ირემი გაატყავა და  
სამწვადედ ცური ააჭრა. ცური შუაზე გაჭრა, ერთი ნახევარი  
შამფურზე წამოაგო და ცეცხლს მიუფიცხა, მეორე ნახევარი  
კი დედისათვის შეინახა და გვერდზე გადადო.

მწვადი რომ შეიწვა, ბიჭმა გუდიდან პური ამოიღო და  
შეუდგა ჭამას. მწვადის ჯერ ნახევარიც არ ჰქონდა შეჭმუ-  
ლი, რომ ცურის მეორე ნახევარი უცბად მოსწყდა ადგილს  
და გატყავებულ ირემს მიეკრა. ირემი იმავე წამს გაცოცხლ-  
და. — ჩვენ კიდევ შევხვდებით ერთმანეთსო! — შიამხა ბიჭს  
და ტყეს შეერია.

ბიჭი სახტად დარჩა. კიდევ შეეშინდა და კიდევ გაოცდა.  
დაავიწყდა პურის ჭამაც და კარგა ხანს გონდაკარგულივით  
იდგა. მერე მწვადსაც და პურსაც თავი მიანება და პირდა-  
პირ შინისაკენ წამოვიდა. დედამ ხელცარიელი და შემკრთა-  
ლი რომ დაინახა, შეეკითხა:

— შეილო, რამე ხომ არ შეგემთხვა, ხელცარიელი რად  
დაბრუნდი, ან დაღონებული რატომ ხარო?

შვილმა ყველაფერი უამბო. დაღონდა დედაც:

— მამაშენისაგან ბევრი რამ მსმენია, მაგრამ ასეთი უცნაური არაფერი გამიგონიაო.

ბევრი იფიქრეს დედა-შვილმა და ბოლოს ბიჭმა უთხრა:

— ნუ გამიწყრები კი, დედი, და, რა ექნა, უნდა წავიდე და ავად იქნება, თუ კარგად, ეს ამბავი უნდა შევიტყო. დავივლი მთელს ცის ქვეშეთს და ამ ძებნა-ძებნაში იქნებ მამაჩემის ასავალ-დასავლისაც რამე გავიგოო.

დედამ ამჯერადაც დაუთმო.

— წადი, შვილო, ოღონდ გულის საწადელს ეწიე და შენს დარდსა და წუხილს როგორმე გაუძღვებო.

მოიმზადა ბიჭმა საგზალი, გადაიკიდა თავისი სანადირო თოფ-იარაღი, გამოემშვიდობა დედას და გაუდგა გზას. ბევრი იარა თუ ცოტა იარა, ცხრა მთა გადაიარა, ცხრა ტყე გაკვეთა, ცხრა მინდორი გადათელა და ბოლოს ერთ განმარტოებულ სახლს მიადგა. შევიდა ეზოში და დაიძახა:

— ოჯახიშვილებო, გარეთ გამოდითო!

სახლიდან ერთი მზეთუნახავი გოგო გამოვიდა და ჰკითხა:

— რა გნებავთო?

— დაძმობას, შორი გზის მგზავრი ვარ და, თუ შეიძლება, ერთი ღამე გამათევინეთო.

— აბა, შევალ და მამას დავუკითხებო, — მიუგო გოგომ და შინ შევიდა. ცოტა ხნის შემდეგ ისევ გამოვიდა და შეიპატიჟა, — მობრძანდითო.

შევიდა ბიჭი შინ. სახლში მოხუცი კაცი დახვდა, დახვესებული წვერი მუხლებზე დაჰფენოდა, ტახტზე მორთხმით იჯდა და შემწვარ ცხვარს შეექცეოდა. ბიჭი მიესალმა მოხუცს, მოხუცმა სალამი დაუბრუნა და სუფრაზე მიიპატიჟა, — მოდი, დამეწვიე, ნამგზავრი ჩანხარ და გეშიებაო. — ბიჭს მართლაც შიოდა და სუფრას მიუჯდა. პურისჭამას რომ მორჩინენ, მოხუცმა ჰკითხა:

— ვინა ხარ, სადაური კაცი ხარ და ან რა საქმეზე წამოსულხარო?

ბიჭმა უთხრა ვინც იყო და რა საქმეზეც მიდიოდა. მოხუცმა ყურადღებით მოუსმინა და ბოლოს უთხრა:

— ეგ მართლაც საკვირველი რაღაც გინახავს, მაგრამ მე რომ გადამხდა, იმისთანა მაინც ვერ არისო.

მიამბე რა გადაგხდა ისეთი, რომ ჩემს ამბავზე საკვირველი იყოსო, — შეეხვეწა ბიჭი.

მოსუცმა ჩამოისვა წვერზე ხელი, ჩაახველა და დაიწყო: — ცხრა ვაყიშვილი მყავდა, ცხრავე ერთმანეთზე საუკეთესო მონადირე. მეც მონადირე ვიყავი. მამა და შვილები, ჩვენი დღე და მოსწრება სულ სანადიროდ დავდიოდით და ხელხვაიანადაც ვნადირობდით.

ერთ დღესაც შევსხედით ცხენებზე ათივენი და წავედით სანადიროდ. იმ დღეს ნადირი ვერ მოვკალით. ის იყო უკან უნდა დავბრუნებულიყავით, რომ გზაზე ერთი ცალთვალა მეცხვარე დევი შემოგვხვდა. დევს ცხვარი გაეშალა მინდორში, თვითონ მხართუძოზე წამოწოლილიყო და არხეინად დიღინებდა. მივედით ახლოს და ღამის გათევა ვთხოვეთ. დევმა გვითხრა:

— წადით ამ მინდვრის ბოლოში, იქა დგას ჩემი სახლი, სახლის წინ ერთი დიდი ჭადარი დგას, შეარხიეთ ის ჭადარი და შეშა ჩამოცვივა. შეშით ცეცხლი დაანთეთ, მერე, სახლს რომ ერთი პატარა გორა აფარია კარებად, ის გასწიეთ და შედით შიგ. სახლში ათი ტომარა ფქვილია, მოზილეთ ის ფქვილი და ხშიადი გამოაცხვეთ. ამასობაში მეც მოვალ და ერთად ვივასშმოთო.

შევსხედით ცხენებზე და წავედით, მივედით სახლთან, მაგრამ ვერც ჭადარი შევარხიეთ და ვერც კარებად აფარებულ გორას ვუყავით ძვრა. ვდგევართ პირშერცხვენილები და აღარ ვიციტ, რა ვქნათ. ამასობაში თვითონ დევიც მოვიდა, ნახა, რომ არც ცეცხლი ანთია და არც ხშიადია გამომცხვარი და ბავშვებივით დაგვტუქსა:

— თქვე წიწკანებო, მამ ათ კაცს იმდენი არ შეგეძლოთ, რომ ცეცხლი დაგენტოთ და ხშიადი გამოგეცხოთ?

ჩვენ თავის მართლება დავიწყეთ:

— უპატრონო სახლში შესვლა წესად არა გვაქვსო.

მაშინ დევმა თვითონ შეარხია ჭადარი და შეშა დააყრევინა. დაანთო უზარმაზარი კოცონი, ჰკრა წიხლი გორას და იქით, ათ ნაბიჯზე გააცურა, შევიდა შინ, მოზილა ათივე

ტომარა ფქვილი და ერთი კალოსტოლა ხმიადი გამოაცხო, მერე დაკლა ოცდაათი ცხვარი, დაატყავა და ნაკვერცხალზე დაყარა, როცა ცხვრები კარგად შეიწვა, გამოყარა ცეცხლიდან, ორ-ორი ჩვენ დაგვიწყო წინ და ათი თვითონ დაიწყო, ხმიადიც შუაზე გატეხა, ნახევარი ჩვენ გაგვინაწილა და ნახევარი თვითონ დაიდო. თავისი წილი ათი ცხვარი და ნახევარი ხმიადი თვალის დახამხამების უმალ გადაყლაპა, და ჩვენს წილ-კერძს მისდგა. იმასაც რომ მორჩა, ახლა ჩვენი ცხენები დაჭამა, მაგრამ მაინც სულ იმას გაიძახოდა, — მშია, მშიაო! — ბოლოს მოგვისვა ხელი და სულერთიანად კიდობანში ჩაგვყარა. იქიდან სათითაოდ გვიყვანდა და გველაპავდა. ასე შემიჭამა ცხრავე შვილი და ჯერი ჩემზე მოდგა. უცბად ხელიდან დაუუსხლტი და თვალში ნაცარი შევაყარე. დევმა თვალის სრესა დაიწყო, მე მუგუშალს წამოვავლე ხელი და ახლა ის ვატაკე. დევმა ერთი ისეთი დაიღრილა, რომ მთა-ბარმა სულ ზანზარი დაიწყო. მივხვდი თვალის მთლიანად დაეშრიტა და ცოტა იმედი მომეცა, ბრმა ველარაფერს დამაკლებს-მეთქი. მართლაც დევმა აქეთ-იქით ბოდიალი დაიწყო, მე დრო ვიხელთე, გამოვვარდი კარში და გამოვიქეცი. მას მერე, სანამ ჯანი შემწევდა, სულ იმ დევს დავეძებდი, რომ შური მეძია, მაგრამ ვერსად წავაწყდი და იმისი ჯავრი საფლავში მიმყვება. აი, შენ თუ წახვალ და იმ დევის ჯავრს ამომყრი, მაშინ გეტყვი, რაც იყო ის საოცრება შენ რომ გინახავსო.

— წავალო, — უთხრა ბიჭმა, — ოღონდ მასწავლე საით მხარეს ცხოვრობსო.

— ჩემი ცხენი წაიყვანე და ის თვითონ გაპოვნინებსო, — უთხრა მოხუცმა.

შეკაზმა ბიჭმა მოხუცის ნაჩუქარი ცხენი, გამოეთხოვა ბერიკაცსა და მზეთუნახავ გოგოს და გაუდგა გზას. ბევრი იარა თუ ცოტა, ბოლოს მიაგნო დევის სახლს. მიადგა კარზე და დაუძახა:

— დევო, შინა ხარო?

— შინა ვარ, რომელი ხარ, რა გინდაო? — გამოსძახა დევმა.

— ერთი გზაარეული მონადირე ვარ და თუ შეიძლება  
ამალამ ღამე გამათევინეო, — უთხრა ბიჭმა.

— გაგათევინებ, — გამოსძახა დევმა, — ოღონდ თუ  
პურს გამომიცხოვ და კარგად მავახშმებ. მე ორივე თვალით  
ბრმა ვარ და ვერაფერს ვხედავო.

— პურის გამოცხოვას რა უნდა, ოღონდ მაჩვენე ფქვი-  
ლი სად არის და ისეთ ხმიადს გამოგიცხოვ, რომ თითებსაც  
თან ჩაატანო, — შეჰქაჩა ბიჭმა.

— აბა, მაშ შემოდით, — გამოსძახა დევმა და კარებს  
აფარებული გორა გაუწია. თან გულში ეცინებოდა, შემო-  
ხვალ თუ არა, ჩემი ლუკმა გახდებო. — და ისე ჩადგა, რომ  
შემოსვლისთანავე ხელი ეტაცნა.

მაგრამ ბიჭი მიუსვდა ეშმაკობას და უთხრა:

— მე ცხენიანად უნდა შემოვიდე, ცოტა იქით გაიწიე,  
თორემ ვერ შემოვეტევიო.

დევს გაუსარდა, — ეს უფრო უკეთესიო, — თქვა გულ-  
ში, — ცხენსა და პატრონს ორივეს ერთად გადავსანსლა-  
ვო, — და კარებში გზა უტია. ბიჭი ფიცხლად ჩამოხტა ცხე-  
ნიდან, იძრო ხანჯალი და დევს ყელში მიაბჯინა. თან დას-  
ჭყივლა:

— არ გაინძრე, თორემ გაგათავებო!

დევს შეეშინდა და ხვეწნა დაუწყო:

— ოღონდ ნუ მომკლავ და აი, ჩემი ცხვრის ფარები, ქო-  
ნება-ცხოვრება სულ შენი იყოს და როგორც გინდა, მოიხმა-  
რეო.

— მე შენი არც ქონება მინდა, არც ცხვრის ფარები, —  
უთხრა ბიჭმა, — მარტო ის მითხარი, ცხრა ძმა მონადირე  
რომ გადაყლაპე, ისინი სად არიან, ან როგორ გავაცოცხლებ,  
და არ მოგკლავო.

დევმა უთხრა:

— ყელზე მობჯენილი ხანჯალი მომაშორე და ცხრასავე  
ცოცხალს ამოვანთხევე, მათზე ადრე ხანდაზმული მონადირე  
გადავეყლაპე და შენი ხათრით იმასაც თან ამოვაცოცხლებო.

— აბა, ჩქარა, გელოდებო, — უთხრა ბიჭმა და ხანჯალ-  
ი მოაშორა. დევმა მართლაც სათითაოდ გადმოყარა პირი-  
დან ბებერი მონადირის შვილები. ისეთი ვაჟკაცები იყვნენ,

რომ კაცი თვალს ვერ მოსწყვეტდა. ბოლოს ის ხანდაზმული მონადირეც გადმოაგდო და ბიჭს ჰკითხა, ახლა რაღას ითხოვო?

— ახლა ისიც უნდა მასწავლო, ამათი ცხენები სად არის და როგორ გავაცოცხლოო, — უთხრა ბიჭმა.

— მაგათი ცხენების ძვლები სახლის უკან ყრია, — უთხრა დევმა, — ამ ხანდაზმული მონადირის ცხენის ძვლებიც იქ არის, შენ ახადე სკივრს, ამოიღე იქიდან. სპილოს ძვლისტარიანი მათრახი. გადაჰკარი სათითაოდ ძვლებს და გაცოცხლდებიანო.

ბიჭი ასეც მოიქცა. ამოიღო ძვლისტარიანი მათრახი, გავიდა სახლის უკან, სადაც ძვლები ეყარა, და ყველა ცხენი გააცოცხლა. მერე დაბრუნდა დევთან და ხანჯალი ისევ ყელში მიაბჯინა, — შენ იმდენი ცოდვა და ბოროტება გაქვს ჩადენილი, რომ სიცოცხლის ღირსი მაინც არა ხარო.

დევს კანკალი დააწყებინა და ბიჭს შეეხვეწა:

— რად გინდა ჩემი სიკვდილი, ვეგდო ჩემთვის, ბრმა ვარ და ამის შემდეგ მაინც ველარავის რამეს დაუშვავებ. თუ სიცოცხლეს მარუქებ, ერთ ისეთ ხელსახოცს მოგცემ, რომ წაუსვა, მკვდარს გააცოცხლებ და ხეიბარს გააჯანსაღებო.

გამოართვა ბიჭმა დევს ცხვირსახოცი და აჩუქა სიცოცხლე. შესხდნენ ყველანი ცხენებზე — ხნიერი მონადირის შვილები თავთავიანთ ცხენებზე, ბიჭი მათი მამის ცხენზე, ხანდაზმული მონადირე თავის ცხენზე და წამოვიდნენ.

გზაზე ძმებმა ბიჭს ჰკითხეს:

— გვითხარი ვინა ხარ, ვისი შვილი ხარ, რომ ჩვენი გულისათვის ასე თავი გამოიღე და ამდენი სიკეთე გვიყავით?

ბიჭმა დაწვრილებით უამბო თავისი თავგადასავალი. ხანდაზმულმა მონადირემ ცხენი შეაყენა და ხმამაღლა დაიძახა:

— შენ ჩემი შვილი ყოფილხარი მე ვარ ის დაკარგული მონადირე, დევმა რომ გადამყლაპა, შენ სწორედ იმ დღეს შეგისრულდა წელიო.

ჩამოხდნენ ცხენებიდან მამა-შვილი და ერთმანეთს მხურვალედ გადაეხვივნენ. სვეენა-კოცნით რომ გული იჯერეს, ისევ შესხდნენ ცხენებზე და სიცილ-სიმღერით გაუდგმენ გზას.

მიუახლოვდნენ მოხუცი მონადირის სახლს და უფრო მოუ-  
მატეს სიმღერას. გამოიხედა მზეთუნახავმა გოგომ სიმღე-  
რის ხმაზე და მამას ახარა:

— მამი, ის ბიჭი მოდის და ჩემი ძმებიც მოჰყავსო!

— გაუღე, შვილო, ჭიშკარი და შეეგებეო,— უთხრა მამამ.

გოგომ ჭიშკარი ფართოდ გაუღო და შეეგება. ჩამოხტნენ ყველანი ცხენებიდან, გადაეხვივნენ ძმები თავიანთ მზეთუ-  
ნახავ დას და-დაუწყეს კოცნა. მერე სახლში შეცვიდნენ და  
მოხუცი მამა-ხელში აიტაცეს. გოგომ ბიჭს მადლობა გადაუ-  
ხადა და მამა-შვილიც შინ შეიწვია. ყველანი რომ დასხდნენ  
და ერთმანეთის მოკითხვით გული იჯერეს, მოხუცმა მონა-  
დირემ შვილებს უთხრა:

— შვილებო, ეს სიხარული სულ ამ ყოჩაღი ბიჭის წყა-  
ლობაა, თუ თქვენი თანხმობაც იქნება, ამაზე კარგ სასიძოს  
სად ნახავთ, მოდით, თქვენი და მიათხოვეთ და დაინათესა-  
ვეთო.

ძმები სიხარულით დათანხმდნენ და მაშინვე ქორწილის  
სამზადისს შეუდგნენ. სამი დღე და ღამე იქეიფეს. მერე გო-  
გო ბიჭს ჩააბარეს და ცალკე ოთახში მოასვენეს. ბატარძალა  
მა ტანსაცმელი გაიხადა, ბიჭმა ნახა, რომ ქალს ერთი ძუძუ  
ეკლდა, და გაკვირვებულმა ჰკითხა:

— რატომ არა გაქვსო?

გოგოს გაეცინა და უბასუსა:

— როგორღა მექნებოდა, როცა შენ შემიჭამეო.

— როგორ თუ მე შეგიჭამე?! — უფრო გაოცდა ბიჭი.

— გახსოვს უკანასკნელად ირემი რომ მოჰკალი და სამ-  
წვადედ ცური ააჭერი,— უთხარა გოგომ,— ნახევარი რომ მწვა-  
დად ააგე და შეჭამე, ის ირემი მე გიყავი და ცურის ნახევარ-  
ი კიდევ ეს ძუძუ იყო. ხომ გითხარი ერთმანეთს კიდევ  
შევხვდებით-მეთქი და აი, შევხვდით კიდევო.

ბიჭი ცას ეწია სიხარულით, რომ საიდუმლოც გაიგო და  
ასეთი მზეთუნახავი გოგოც იშოვა. მაშინვე ამოიღო დევის  
მიცემული ცხვირსახოცი, მიუსვ-მოუსვა მკერდზე და მოჭრი-  
ლი ძუძუ ისევ გაუმთელა.

დილას სიძე თავისი საწოლი ოთახიდან რომ გამოვიდა,  
სიამამრმა ჰკითხა:



— ხომ იპოვე, რასაც ეძებდიო?

— ვიპოვე და ბედნიერიცა ვარო, — მიუგო ბიჭმა.

და განა არ იყო ბედნიერი? საიდუმლო გაიგო, მზეთუნახავი ქალიც დაისაკუთრა და დაკარგული მამაც იპოვა და გააცოცხლა. ერთი კვირა სიმამრთან და ცოლისძმებთან ილაღობა, კვირის თავზე წამოიყვანა ცოლი და მამა და დამწუსრებული დედაც გააბედნიერა:

ჭირი — იქა, ლხინი — აქა,

ქატო — იქა, ფქვილი — აქა.





## ს ა ზ ლ ა უ რ ი

იყო და არა იყო რა, ღვთის უკეთესი რა იქნებოდა, იყო ერთი მეტად ღარიბი ახალგაზრდა კაცი და ჰყავდა ლამაზი ცოლი. კაცი დღიურ მუშად დასწავლიდა და ცოლს იმით არჩენდა. ერთ დღეს სამუშაო ვეღარ იშოვა, გროში ვეღარ აიღო და შინ ხელცარიელი დაბრუნდა. მშიერი ცოლი კარებწინ შეეგება, მაგრამ რა ექნა კაცს, რა მიეცა, როცა ჯიბეში გახვრეტილი გრთშიცადარ უჩხაოდა?

მომბეზრდა კაცს ასეთი სიცოცხლე და თავის მოკვლა გადაწყვიტა. მეზობლებში ერთი ორი გროში იშოვა, მიუტანა ცოლს და თვითონ თავის დასახარობად მდინარეზე წავიდა.

სანამ მდინარემდე მივიდოდა, გზაში ერთი თეთრწვერა მოხუცი შემოხვდა და ჰკითხა:

— საით მიიჩქარი, ჭაბუკო, ან ასე ძალზე რამ დაგაღონაო?

ბიჭმა უამბო თავისი გასაჭირი და დასძინა:

— მომბეზრდა ასეთი ძალღური ცხოვრება და თავი უნდა დავიხრჩოო.

თეთრწვერამ ჯიბიდან ერთი უბრალო სპილენძის სასტვენნი ამოიღო და უთხრა:

— ოღონდ თავს ნუ მოიკლავ და ამ სასტვენს გაჩუქებო, — მისცა ბიჭს სასტვენნი და გაქრა.

— ჩემს გაჭირვებას სასტვენნი რას უშველისო, — თქვა ბიჭმა და ისევ მდინარისაკენ წავიდა.

გზაზე კიდევ შემოხვდა ერთი კაცი, უფრო ხნიერი და უფროსი თეთრწვერა და ჰკითხა:

— ჭაბუკო, საით გაგიწევია, ან აგრე ძალიან რამ დაგა-  
ღონაო?

— ასეა და ასეა ჩემი საქმე და მდინარეზე თავის დასასხ-  
რობად მივდივარო.

— ოღონდ დაბრუნდი, თავს ნუ მოიკლავ და აი ამ ქისას  
გაჩუქებო, — უთხრა კაცმა, ამოიღო ჯიბიდან ცარიელი ქი-  
სა, ბიჭს მისცა და ისიც პირველივით გაუჩინარდა.

ბიჭს მწარედ გაეცინა:

— შინ ცარიელი ქისების მეტი რა მაქვს, მაგრამ რა მარ-  
გესო, — თქვა გულში, ჩაიდო ქისა ჯიბეში და გასწია ისევ  
მდინარისაკენ.

ცოტა რომ გაიარა, ახლა მესამე კაცი შემოხვდა, პირველ  
ორ კაცზე უფრო ხნიერი და დაჩაჩანაკებული. ჰკითხა ბიჭს:

— საით გაგიწევია, შვილო, ან რატომ ხარ ასე დანადვ-  
ლიანებულიო?

— აბა, როგორ ვიქნები, როცა სიცოცხლე ისე მომბეზრ-  
და, რომ აი მდინარეზე მივდივარ თავის დასასხრობადო, —  
მიუგო ბიჭმა.

კაცმა ჯიბიდან ერთი უბრალო ნაბდის ქუდი ამოიღო და  
ბიჭს გაუწოდა, თან უთხრა:

— ოღონდ თავს ნუ მოიკლავ და აი ამ ქუდს გაჩუქებო.

ბიჭმა ქუდი კი გამოართვა, მაგრამ განზრახვაზე ხელი არ  
აუღია. — ერთი ქუდი, ოქროსიც რომ იყოს, ჩემს სიღარიბეს  
არას არგებსო, — თქვა და ისევ მდინარისაკენ გაუტია.

სანამ მდინარემდე მიაღწევდა, მოიღრუბლა და კოკისპი-  
რული წვიმა დაუშვა. ბიჭმა მიიხედ-მოიხედა, მაგრამ ირგვ-  
ლივ თავშესაფარი ვერაფერი დაინახა, არც სე, არც ბურჩი.  
უცბად წვერიანი კაცის მიცემული ქუდი მოაგონდა, მაშინვე  
ამოიღო ჯიბიდან და დაიხურა. დაიხურა და გაქრა. თურმე  
ეს ქუდი უჩინმარინისა ყოფილა. ბიჭმა რამდენჯერმე დაი-  
ხურა და მოიხადა. დაიხურავდა, გაქრებოდა, მოიხდიდა —  
გამოინდებოდა.

ბიჭს მოეწონა ქუდი და მდინარეცა და თავის მოკვლაც  
გადაავიწყდა. ახლა ქისაც მოსინჯა, ამოიღო ჯიბიდან და  
დაიქნია. ქისიდან ოქროს თუმნიანები წამოცვივდა. კიდევ  
დაიქნია და კიდევ წამოცვივდა. ერთ წუთში ჯიბეები ოქროს

ფულებით გაივსო. ბიჭმა ბოლოს სასტვენიც ამოიღო, თქვა, — აბა, ერთი ვნახოთ, ამას რაღა ძალა აქვსო, და ჩაბერა. ჩაბერვისთანავე აქეთ-იქიდან შეიარაღებული ჯარის მწკრივები წამოვიდა. კიდევ ჩაპბერა და ჯარებიც უფრო მომრავლდა, კიდევ და კიდევ მთელი მინდორი შეიარაღებული მებრძოლებით აივსო.

ბიჭი ახლა კი მიხვდა, რა საგანძურის პატრონიც გამხდარიყო, და სიხარულით ცას ეწია. რაკი ძალაუფლება და სიმდიდრე ხელთ იგდო, სულ სხვანაირი ცხოვრება მოუნდა, და ავიწყდა შიმშილიც, სიღარიბეც, თავისი გაჭირვებული ცოლიც და უცხო ქვეყნების ნახვა გადაწყვიტა. სადაც წავალ, ყველგან ხელმწიფურად ვიცხოვრებ და ჩემს ღატაკ სახლში რაღა მინდაო, — თქვა და წავიდა.

ბევრი იარა, თუ ცოტა იარა, ბოლოს ერთ უცხო სახელმწიფოში შევიდა. მივიდა ერთ დედაბერთან და ღამის გათევა სთხოვა. დედაბერმა ნება დართო და ეს ბიჭიც შევიდა სახლში. მისცა დედაბერს ფული, მოატანინა კარგი საჭმელ-სასმელი და გენწიულად ივასშმეს. ვახშმის შემდეგ გააბეს საუბარი და ბევრი იმუსაიფეს. ბოლოს ბიჭმა ქალაქის ამბები გამოჰკითხა: — რა არის ამჟამად თქვენს ქალაქში საკვირველიო?

— ჩვენი ქალაქი ღამაზია და საკვირველიც ბევრი რამ არის, — უთხრა დედაბერმა. — ერთი ასეთი ხელმწიფის მზე-თუნახავი ქალის ამბავია: ქალს სასახლეში ერთი მოზრდილი ოთახი აქვს და მამა მხოლოდ იმაზე ათხოვებს, ვინც იმ ოთახს ოქროს ფულით გაავსებს. აგე, რამდენი ხანია, მოდიან სასიძოვები, მოაქვთ ოქროს ფული, მაგრამ იმ ოთახის გავსება ვერავენ შესძლო და ქალიც კვლავ გაუთხოვარია. ოქროს ფული ხელმწიფესა და იმის მზეთუნახავს რჩებათ და გაყვლეფილი სასიძოვები კი უკანვე ბრუნდებიანო.

„ეს სწორედ საჩემო საქმე ყოფილაო“, — თქვა ბიჭმა გუნებაში და გათენდა თუ არა, გასწია ხელმწიფის სასახლისაკენ. ხელმწიფემ შეიყვანა ბიჭი ოთახში და უთხრა:

— თუ ამ ოთახს ოქროს ფულით აავსებ, ქალი შენი იქნებაო.

ბიჭმა ერთი კვირის ვადა სთხოვა, ჩაიკეტა ოთახში და

დაიწყო თავისი ჯადოსანი ქისის ქნევა. მოდის და მოდის ოქროს თუმნიანები. კვირის თავზე ისე გაივსო ოთახი ფულით, რომ ნემსი აღარ ჩაეპარებოდა. გამოვიდა ბიჭი და ხელმწიფეს მოახსენა:

— პირობა შესრულებულია და ნახეთო.

გამოვიდნენ ხელმწიფე და მზეთუნახავი, ნახეს ოქროს ფულით ბირთამდე სავსე ოთახი და თავზარი დაეცათ: ხედავდნენ, რომ სანაძლეოს აგებდნენ და მუქთი შემოსავლის წყარო ეკარგებოდათ.

— კარგი, რა გაეწყობა, დილაზე მოდი და ქალი ჩაიბარეო, — უთხრა ხელმწიფემ.

ბიჭი დედაბრისას დაბრუნდა. ხელმწიფემ და იმისმა ქალმა კი იმ ღამეს მოილაპარაკეს: მაგ გლეხის ბიჭს, ეტყობა, რაღაც ჯადო აქვს და თუ ის არ გამოვაცალეთ ხელიდან, დავიღუპებითო.

გათენდა მეორე დილა და ბიჭიც იმავე წამს სასახლეში გაჩნდა. მზეთუნახავმა შეიყვანა ბიჭი თავის საწოლ ოთახში, მოეფერა, მოელაქუცა და ბოლოს უთხრა.

— ახლა მე და შენ ერთსულ და ერთხორც ვართ და ჩვენი გაყრა სიკვდილის მეტს აღარაფერს შეუძლია. აუ შენც ასევე გიყვარვარ, მითხარი, ეს ამოდენა ოქროს ფული აქ საიდან გააჩინე. ვიცი, არც ურმით მოგიტანია და არც აქლემები, მაშ რა ძალა გაქვს ისეთი, რომ ერთ კვირაში ამდენი ოქრო დააგროვეო?

ბიჭი ჯერ უარზე იდგა, არ უნდოდა საიდუმლოს გამხელა, მაგრამ ქალის ცდუნებას რას გაუძლებდა და გამოუტყდა. ამოიღო ქისა და აჩვენა. ქალმა უთხრა:

— აბა, მაჩვენე, მეც დავიქნე, მინდა დავინახო, ფული როგორ წამოცვივაო.

— ბიჭი გაბრყვიდა და მისცა. ქალმა ქისა უცბად ტაგრუცაში ჩაიკეტა და ბიჭი კარში გააგდო.

გაბრაზდა ბიჭი და გადაწყვიტა ქალზე შური ეძია. ამოიღო თავისი სასტვენის, დაუსტვინა და ხელმწიფის სასახლის ირგვლივ უთვალავი ჯარი შეკრიბა. დაინახა მზეთუნახავმა ჯარი, გამოეგება ბიჭს ეზოში და სიცილით უთხრა:

— რად გინდოდა ეს ჯარი? მე გეხუმრე, თორემ ქისა

შენია და მეც შენი ვარ. გაუშვი ჯარი, წამოდი ჩემს საწოლ, ოთახში შევიდეთ და კაი დრო გავატაროთო.

ბიჭმა დაუჯერა, გაუშვა ჯარი და გაჰყვა ქალს. ოთახში რომ შევიდნენ, ქალმა ალერსს და მოფერებას უმატა:

— ხომ იცი, როგორ მიყვარხარ, მზე და მთვარე შენზე ამომდის, და თუ შენც ასევე გიყვარვარ, მითხარი, ასე უცბად ანდენი ჯარი როგორ შეკრიბეო?

ბიჭმა ვერც ახლა გაუძლო ქალის მაცდუნებელ ალერსს და გამოუტყდა. არენა სასტვენიც. ქალმა უთხრა:

— აბა, ერთი წუთით დამაჭვრინე ხელში, მინდა გავიგო, თუ ჩემს დასტვენაზეც შეგროვდება იმდენი ჯარიო. — გამო-ართვა ეს სასტვენიც. ტაგრუცში ჩაკეტა და ბიჭი კი კინწის-კვრით გააგდო.

წამოვიდა ბიჭი, დადის ქალაქის ქუჩებში დაღონებული და აღარ იცის, რა ქნას, ფულიც დაკარგა და ჯარიც. ერთად-ერთი ურინმაჩინის ქუდილა შემორჩა. თქვა, თუ მიშველის რამეს ეს ქუდი, თორემ სამუდამოდ დაღუპული ვარო. და-ღამდა თუ არა, დაიხურა ქუდი, გახდა ურინარი და შეიპარა მზეთუნახავი ქალის საწოლ ოთახში, გამოეცხადა ქალს და უთხრა:

— ახლავე დამიბრუნე ჩემი ნივთები, თორემ ცოცხალი ვერ გადამირჩებიო.

ქალი მიხვდა, რომ ცუდად იყო საქმე და ისევ ნაცად ხერხს მიმართა, ჩამოეკიდა ყელზე და დაუწყო ალერსი:

— მე ხომ გეხუმრე, შენი გამოცდა მინდოდა, თორემ შენ გარდა ქმარი არ მინდა: ოჰ, რომ იცოდე, როგორ მოგელო-დი და როგორ გამიხარდა შენი დანახვაო. — გაუშალა სუფ-რა, დაალევინა ტკბილი ღვინოები, დაათრო და უთხრა:

— ახლა კი მართლა სიკვდილამდე განუყრელები ვართ და ერთმანეთთან დაფარული არც რაიმე უნდა გვქონდეს, მო-დი, მითხარი, აქ როგორ შემოსხვედი, რომ გუშაგებმა ვერა-ფერი გაიგეს და ქისასაც და სასტვენსაც ახლავე დაგიბრუ-ნებო.

ბიჭი კიდევ გაბრიყვდა და უჩვენა ურინმაჩინის ქუდი. ქალმა უცბად გამოსტაცა, ჩაკეტა ყუთში და ბიჭი კვლავ გა-რეთ გამოაბრძანა.

დარჩა ბიჭი ისევ ღარიბ-ღატაკი და უქონელი. გაახსენდა ცოლი, სახლ-კარმიდამო და გულთ მოუნდა იქ დაბრუნება, მაგრამ ჯიბეში გახერეტილი ფარა აღარ გააჩნდა და უფულოდ კი სად წავიდოდა? სხვა გზა რომ აღარ დარჩა, ისევ თავის მოკვლა გადაწყვიტა და კვლავ მდინარისაკენ წავიდა.

იარა, იარა და როგორც იქნა, მიაღგა მდინარეს. მდინარის პირას ორი ძირი ტყემალი იდგა, ერთი თეთრი იყო, მეორე შავი ფერისა. ბიჭს გზაზე ძალიან მოშივდა და იფიქრა, — რაღა მშიერი მოვკვდე, მოდი ამ ტყემლებს დავარხევ და სიკვდილის წინ მწიფე ტყემლით მაინც გავძლებიო.

დაარხია ორივე ტყემალი, ჯერ თეთრი ჭამა, მერე შავს გაუსინჯა გემო და შეჭამა თუ არა მაშინვე ვირად გადაიქცა. ბიჭი დარდისაგან კინაღამ გაგიჟდა. თავიც რომ მოვიკლა, მაინც ვირად დავრჩები და ვინ იცის, რომელ ხრამში გადამაგდებენ, საფლავ-სამარეც კი არ მეღირსებაო.

ამ წუხილში რომ იყო, თავისდაშეუმჩნევლად ერთი მარცვალი თეთრი ტყემალი შეჭამა. დახეთ საკვირველებას: იმავე წამს ისევ კაცად გადაიქცა. ბიჭი გაოცდა და ტყემალი რამდენჯერმე კიდევ გამოსცადა: შავს შეჭამდა — ვირად იქცეოდა, თეთრს შეჭამდა და — კაცად.

— ახლა კი ამოვიყრი მზეთუნახავი ქალის ჯავროსო, — თქვა გახარებულმა ბიჭმა, დაკრიფა ორივე ტყემალი, ერთ ჯიბეში შავი ჩაიყარა. მეორეში თეთრი. გამოიცვალა ტანსაცმელი, რომ ხელმწიფის ქალს არ ეცნო და წავიდა სასახლისაკენ. ჩაუარა სასახლეს იმ მხარეს, საითაც ქალის საწოლი ოთახი იყო და დაიწყო ყვირილი:

— აბა, კაი ტყემალი, მყავე ტყემალი, ვის უნდაო! გაიგონა მზეთუნახავმა და თავის მოახლეს უთხრა:

— ჩადი და ერთი ლიტრა იყიდეო.

ჩავიდა მოახლე და ჰკითხა ბიჭს:

— რა ღირს თქვენი ტყემალიო?

ბიჭმა შავი ტყემალი მიაწოდა და უთხრა:

— ჯერ გემო გასინჯე და ფასზე მერე მოვილაპარაკოთო. შეჭამა მოახლემ ტყემალი და იმ წამსვე ვირად გადაიქცა. ბიჭმა თოკი გამოასკვნა კისერზე და იქვე მიაბა. მზეთუ-

ნახავმა მეორედ სეფექალი გამოგზავნა, ბიჭმა იმასაც შეაჭა-  
მა შავი ტყემალი და ვირადქცეული მოახლის გვერდით  
მიაბა.

სეფექალიც რომ აღარ დაბრუნდა, მზეთუნახავი ახლა  
თვითონ ჩავიდა და ბიჭს შეეკითხა, — რა ღირს შენი ტყემა-  
ლიო? — ბიჭმა მიაწოდა შავი ტყემალი და უთხრა:

— ქალბატონო, ჯერ გემო გაუსინჯეთ და ფასზე მერე  
ვილაპარაკოთო.

გამოართვა მზეთუნახავმა ტყემალი, შეჭამა და იმავე წამს  
ჭაკ ვირად გადაიქცა. ბიჭმა ლაგამი ამოსდო და ხეზე მოკ-  
ლედ მიაბა. მერე ერთი ხორკლიანი ჯაგრცხილის სახრე გა-  
ნოსჭრა, ახლა როგორ გინდა, რომ სიცოცხლე გამიმწა-  
რეო, — უთხრა და მიჰკიდა და მიჰკიდა გვერდებში.

ვირი ტკივილისაგან იმ სახრესავით დაიგრისა და შე-  
ესვეწა:

— ოღონდ ისევ ქალად მაქციე და შენს ნივთებსაც და-  
გიბრუნებ, შენს მოტანილ ოქროს ფულებსაც და ჩემსასაც  
ზედ დაგისართავო.

— არა, ახლა ვეღარ გამაბრძოლებო, — უთხრა ბიჭმა, —  
თუ გინდა, რომ ისევ ადამიანად გაქციო, ჯერ შენი ოთახი-  
სა და იმ ყუთის გასაღებები მომეცი, სადაც ჩემი ქისა, სას-  
ტენი და ქუდი ინახება და გაპატიებ, თუ არადა, სამუდა-  
მოდ ვირად დაგტოვებო.

ასწავლა ქალმა, სადაც ინახავდა გასაღებებს. ავიდა ბი-  
ჭი, გააღო ოთახის კარები, გახსნა ყუთი და ამოალაგა თა-  
ვისი ნივთები. ჩამოვიდა ძირს, შეჯდა ვირზე და გამოსწია  
თავისი სახლისაკენ.

გზაზე ერთი მინდორი მოეწონა. მინდორი ყველაფრით  
შემკული იყო — მაღლიდან საიალალე მთა დაჰყურებდა,  
ირგულივ ხშირი ტყის მწვანე არშია ერტყა და ნაპირზე ანკა-  
რა ნაკადული ჩაუდიოდა. მართლაც, რომ საცხოვრებლად  
ყოველმხრივ ხელსაყრელი ადგილი იყო და ბიჭმაც აქ გადა-  
წყვიტა დასახლება. შეუკერა ვირს კურტანი, გაუკეთა ქოჭე-  
ბი და დაიწყო სამშენებლო ქვა-ქვიშის მოზიდვა. აჰკიდებდა  
ორმაგს, ზედ თვითონ შეჯდებოდა და სამოსახლო ადგილამ-  
დე ერთხელ არ შეასვენებდა.



ბოლოს, საკმარისი ქვა-ქვიშა რომ მოაზიდვინა, მოიწვია ხელოსნები და ერთ თვეში ხელმწიფის საკადრი სასახლე წამოჭიმა. მე თქვენ გეტყვით და, ფული შემოეღეოდა, დაიქნევდა ქისას და ოქრო ჩხრიალით წამოვიდოდა. ეზო-კარმი-დამოც სახლის შესაფერი მოაწყო. მერე შეკაზმა ვირი და თავისი ცოლის მოსაყვანად წავიდა. შესვა ცოლი ვირზე, მოიყვანა ახალ სასახლეში და დაიწყო ტკბილი და ბედნიერად ცხოვრება.

ვირს სანამ შეეძლო, ამუშავა, მერე კი, როცა მიიხრწმდა და მეტისმეტად გაძვალტყავდა, შეაჭამა ერთი ცალი თეთრ ტყემალი და ქალად აქცია. გაიყვანა შინდორში, ამოჰკრა პანდური და მიაძახა:

— წადი და, სადაც უენი დაიკვეხო, იქ არც ჩემი დაგავიო, წყდესო!

ჭირი — იქა, ლხინი — აქა,  
ქატო — იქა, ფქვილი — აქა.





## კონკია

იყო და არა იყო რა, იყო ერთი საწყალი ცოლ-ქმარი. ერთი პატარა გოგონა ჰყავდათ. ცოლი ავად გახდა და მოკვდა. პატარა გოგონა უდედოდ დარჩა.

გლეხი რომ მინდორში მიდიოდა სამუშაოდ, გოგონა მარტო რჩებოდა, მომვლელი არავინ ჰყავდა და გლეხი სულ ამას წუხდა: ან ცეცხლში ჩამეწვება, ან წყალში ჩამივარდებაო. ადგა და მეორე ცოლი მოიყვანა: სახლს მიხედავს, მეც მომივლის და ჩემს ობოლ გოგონასაც უპატრონებსო.

მეორე ცოლთანაც გოგონა შეეძინა. სანამ ეს გოგონა წამოიზრდებოდა, დედინაცვალი ზურგზე ჰკიდებდა გერს, მოვლითაც სულ იმას ავლევინებდა. როცა წამოიზარდა, შვილს კაკა-ბაბას არ აკლებდა, გერს კი ცარიელ პურსაც ანატრულებდა, ჩამოხეულ-ჩამოკონკილი დაჰყავდა და ამიტომ კონკია შეარქვეს.

ერთი ძროხა ჰყავდათ. გამოუხვევდა დედინაცვალი კონკიას: ერ თ კუტ პურს, გააყოლებდა ძროხას მინდორში და თან ასე დაბარებდა:

— ეს ერთი კუტი ამვლელსაც აჭამე, ჩამომვლელსაც, შეშცა ჭამე და შინაც მოიტანეო.

გავიდოდა კონკია მინდორში. გაუშვებდა ძროხას საბალახოდ, თვითონ კი დაჯდებოდა და ცხარე ტრემლით ტირიდა.

ერთ დღეს ძროხამ ენა ამოიდგა და ჰკითხა:

— რატომ ტირი, კონკიავ, რა გაგჭირვებიაო?

— შიმშილით ვკვდები და დედინაცვლის შიშით ეს კუ  
ტი ვერ შემიჭამიაო, — შესჩივლა კონკიამ.

ძროხამ უთხრა:

— მაგაზე რა გადარდებს, აი, ერთ რქაში ერბო მიდგას,  
მეორეში — თაფლი, რომელიც გინდოდეს, ის მიირთვიო.

ადგა კონკია, მოაძრო რქები და, მართლაც, ერთში ერბო  
დასვდა, მეორეში — თაფლი. ხან ერთს გეახლებოდათ, ხან მეორეს.  
~~დანაყრდღობდა და ისევ დასურავდა რქებს. ცოტა ხან-~~  
ში ისე გასუქდა, ისე დამშვენდა, უკეთესს ვერაფერს ნახავდა  
კაცის თვალი. დედინაცვალი შურისაგან გულზე სკდებოდა.

— ჯაფით უნდა მოვწყვიტო წელი და ვნახოთ, როგორი  
ლამაზიც იქნებაო, — თქვა დედინაცვალმა და აუარებელი  
მატყლი გაატანა, — ეს მატყლი დაართე, დაძახე და საღა-  
მომდე წინდებიც დაქსოვე, თორემ შინ ფეხს არ შემოგად-  
გმევიწებო.

რას იზამდა საწყალი კონკია! გაიგდო წინ ძროხა და მი-  
დის დაღონებული, თან გზადაგზა ართავს.

უცებ ძროხამ გზიდან გადაუხვია და ვიღაცის სახლის  
ბანზე გადაირბინა. მიჰყვა კონკიაც, უნდოდა გამოებრუნე-  
ბინა, მაგრამ ბანზე რომ შედგა, გაუძვრა კვირისტავი თი-  
თისტარიდან, გაგორდა, გაგორდა და ჩავარდა ბანის სანა-  
თურში. ჩაიხედა იმ სანათურიდან კონკიამ და დაინახა, რომ  
ქერასთან ერთი დედაბერი ზის.

— დედი, დედაშვილობას, კვირისტავი ამომაწოდეო, —  
შევედრა კონკია.

— შეუძლოდა ვარ, შვილო, ჩამოდი და თვითონ აიტან-  
ნეო, — ამოსძახა დედაბერმა.

ჩაიდა კონკია, აიღო კვირისტავი და ის იყო გამობრუნ-  
ებას აპირებდა, რომ დედაბერმა შესთხოვა:

— შვილო, შენს გახარებას, ნუ დამზარდები, ერთი კი-  
ლობანს ახადე და ნახე, პური ხომ არ დამიობდაო.

— რად დაგზარდებიო, — მიუგო კონკიამ და ახადა კი-  
ლობანს.

— უი, დედილო, პური მთლად დაგობებიაო.

— გამოცხობის თავი აღარა მაქვს, შვილო, ღვთის გუ-  
ლისათვის, იქნებ შენ გამომიცხოო.

შეეცოდა კონკიას დედაბერი, პურიც გამოუცხო, სახლიც დაულაგა, ჯამ-ჭურჭელიც დაურეცხა, მერე წყალი გააცხელა და თავიც დააბანინა. თან სულ ეტირებოდა. შეამჩნია ეს დედაბერმა და ჰკითხა:

— რა გაწუხებს, შვილო, რაზე გეტირებაო?

კონკიამ ყველაფერი უამბო: საღამომდე ამდენი მატყლის ჯართვასა და წინდების დაქსოვას ვერ მოვასწრებ და დედინაცვალმა მაგ დღეს დამაყენებსო.

— ნუ გეშინიაო. — ანუგეშა დედაბერმა. პური აჭამა, მატყლის დართვაშიც მიეხმარა და საღამომდე წინდებიც დაუქსოვა. საღამოს დედინაცვალმა კონკიას ვერაფერი მოუმიზეზა და ცემას გადარჩა.

კონკია დედაბერს მიეჩვია და ყოველდღე იმასთან დადილობდა. ძროხაც იქვე შორიასხლოს ძოვდა.

ერთხელ, კონკია რომ სახლის დაგვა-დასუფთავებას მორჩა, დედაბერმა უთხრა:

— შვილო, კონკიავ, როცა ძროხას წყლის დასალევად ჩაიყვან, მდინარეს დააკვირდი: თეთრმა წყალმა რომ ჩამოიაროს — არაფერი, ვირისფერმა რომ ჩამოიაროს — ისევე არაფერი, ხოლო, როცა ყვითელი წყალი ჩამოივლის, იმაში დაისველე თმებით.

წაიყვანა კონკიამ შუადღისას ძროხა მდინარეზე. ჩამოჯდა მდინარის პირას. ჩამოიარა თეთრმა წყალმა, ჩამოიარა ვირისფერმა, ჩამოიარა ყვითელმა და შეუშვირა იმ ყვითელ წყალს თავი. ადგა და რას ხედავს: ოქროს დალალები დაჭფენია ბეჭებზე.

— ახლა ეს თმა შეშურდება ჩემს დედინაცვალსო, — ატირდა კონკია და დადარდიანებული წავიდა დედაბერთან. დედაბერმა თმა დაუწნა, თავზე შემოახვია, ხილაბანდი წააკრა და ისე გაისტუმრა შინ.

ლამით კონკია დედინაცვლის უქნარა გოგოს ფეხებს ხანდა. როგორღაც ხილაბანდიდან თმის ერთი ბეწვი ჩამოგარდნოდა და გაჰქონდა ბრდღვიალი ლამბის შუქზე.

— შე დასამიწებელო, ეს რა გიბრჭყვიალებს მაგ ქეციანს თავზეო, — მისწვდა დედინაცვალი კონკიას, გადააძრო ხილაბანდი და სახტად დარჩა.

— ვინ მოგცა, გოგო ეს თმები, როგორ იშოვეო?

კონკიამ ყველაფერი უამბო.

— არ დაგინახოს ჩემმა თვალებმა, რომ თმის ერთი ბეწვი მაინც გამოგიჩნდეს, სულ ეგრე თავწაკრულმა იარე, თორემ ან მე ვიქნები და ან შენაო, — დაემუქრა დედინაცვალი.

მისმა უქნარა გოგონამ კი ტირილი მორთო:

— მეც მიწადა ეგეთი თმებით.

— ნუ ტირი, გენაცვალოს დედა! — ცრემლები მოსწმინდა დედამ თავის შვილს. — ხვალ ძროხა შენ გააგდე საძოვარზე, ის დედაბერი ნახე და ხვალ ამ დროს შენც ეგეთი თმები გექნებაო.

მეორე დღეს, ჯერ კარგად არ იყო გათენებული, რომ გააღვიძა თავისი ქალი, სუფთა ხელსახოცში ქადა-ნაზუქი გაუსხია, არ მოიშეშო, მატყლი და თითისტარიც გაატანა, გააყოლა ძროხას და ერთხელ კიდევ დაარბია, როგორ უნდა მოქცეულიყო.

უქნარა გოგომ ძროხა პირდაპირ დედაბრის ბანზე მიაგდო და, ვითომ ჩამივარდაო, კვირისტავი ძალით ჩააგდო სანათურიდან. ჩაიხედა შიგ და დაინახა დედაბერი:

— ქოფაკო დედაბერო, მომაწოდე ეგ კვირისტავიო!

— ჩამოდი და შენ თვითონ აიღეო! — უპასუხა დედაბერმა.

ჩავიდა გოგო, კვირისტავი აიღო.

— შვილო, შეუძლოდა ვარ, პური აღარა მაქვს, იქნება ცოტა გამომიცხოო.

— პური შინაც არ გამომიცხვია და შენ გამოგიცხობო?!

— ჭურჭელი მაინც დამირეცხეო.

— ფუჰ, ამ აყროლებულ ჯამებს ხელს ვინ მოჰკიდებსო!

— ერთი კოკა წყალი მაინც ამომიტანეო!

— შავი ქვა არ გინდაო?!

— აბა მაშ, შვილო, წადი, — უთხრა დედაბერმა, — აგერ იმ მდინარის პირას დაჯექი. თეთრმა წყალმა რომ ჩამოიაროს, არაფერი, ყვითელმა რომ ჩამოიაროს, არაფერი, ხოლო როცა ვირისფერმა ჩამოიაროს, თმები იმაში დაისველეო.

წავიდა უქნარა გოგო, დაჯდა მდინარის პირას და დაი-

წყობილი. ჩამოიარა თეთრმა წყალმა, ჩამოიარა ყვითელმა, ჩამოიარა ვირისფერმა, ჩაყო თავი და სულ ვირის ჩორჩოტინები დაეკიდა. გაიქცა დედასთან. დედას გული გაუსკდა. აიღო მაკრატელი და ძირში მოსჭრა. მაგრამ რამდენსაც აჭრიდა, იმდენი მეტი და მეტი ეზრდებოდა. გამწარებული ახლა კონკიას ეცა და იმასაც ძირში გადაჭკრიჭა, მაგრამ კონკიას კიდევ უფრო უკეთესი დალალები ამოვიდა.

რალას იზამდა, მიხვდა, რომ ყველაფერი ძროხის ბრალი იყო და მისი დაკვლა განიზრახა. იცოდა, ქმარი არ დათანხმდებოდა და თავი მოიავადმყოფა. ლავაშები დაახმო, ზედლოგინი გაიშალა, დაწვა და დაიწყო კრუსუნი. ყოველ გადაბრუნება-გადმობრუნებაზე ლავაშებს ლაწალუწი გაჭქონდა. თვითონ კი კიოდა—ვაიმე, გვერდები, ვაიმე, გვერდებით! ქმარმა ჰკითხა:

— რა იყო, ქალო, რა მოგივიდა, რა გტკივაო?

— რაღა რა მომივიდა, გვერდები მემტვრევა, ვკვდებიო.

— რა მოგარჩენსო?

— ასე მითხრეს, სანამ თქვენი ძროხის ნაღველს არ დალევე, არა გეშველება რაო.

გლეხი დაღონდა. დედამ კონკიას ეს ერთი ძროხა დაუტოვა, როგორ უნდა დაეუკლაო. მაგრამ რაკი დედინაცვალმა თავისი არ დაიშალა, მეტი რა გზა ჰქონდა, დაკვლა გადაწყვიტა.

ძროხა გულთმისანი იყო. მივიდა კონკიასთან და უთხრა:

— მე რომ დამკლავენ, შენ ჩემს ხორცს პირი არ დააკარო, მოაგროვე ჩემი ძვლები, ბოსელში ორმო ამოთხარე და შიგ ჩაყარე. როცა გაგიჭირდეს, მოდი და ასე ჩამომძახე: ამოდი, ჩემო რაშო, და სადედოფლო ტანსაცმელი ამომიტანეო.

დაკლეს ძროხა, დალია დედინაცვალმა ნაღველი და წამოდგა, ვითომ ამან მომარჩინაო. მთელი ერთი კვირა სულ ძროხის ხორცს ჭამდნენ, მაგრამ კონკია ახლოს არ გაეკარა. მოკრიფა ძვლები, ბოსელში ორმო ამოთხარა და შიგ ჩაყარა. ერთ მშვენიერ დღეს იმ ქვეყნის ხელმწიფემ ბრძანა: ამა და ამ დღეს ყველა ქალიშვილი ჩემს სასახლეში გამოცხადდეს, შეილისათვის საცოლე უნდა ამოვარჩიოთ.

ამის გაგონებაზე დედინაცვალმა თავისი ჯოჯო გოგო.

რაც შეიძლება მორთო, გაალამაზა. კონკიას კი ვარცლი და-  
უდგა, ერთი კოდი ფეტვი მოაბნია ეზოში და უთხრა:

— სანამ ჩვენ ხელმწიფის სასახლიდან დავბრუნდებით,  
ეს ვარცლი ცრემლით აავსე, ფეტვი ისე აკრიფე, მარცვალის  
არსად დაგრჩეს, მერე დაჯექი კართან და დაგველოდე. არ  
დაგვაკაკუნებინო, თორემ ვაი შენი ბრალიო.

წავიდნენ ისინი ერთი სიცილ-კისკისით, კონკია კი დაჯ-  
და და ტირის. მეტი რა შეუძლია: ან იმ ფეტვს რა აპკრეფს,  
ან ვარცლს რა აავსებს ცრემლით!

შემოჯდა ერთი სკვინჩა ჩიტი ღობეზე და ეკითხება:

— კოხტა გოგოვ, რა გატირებს, რა გაგჭირვებიაო?

კონკიამ უთხრა თავისი გასაჭირი.

სკვინჩამ დაუძახა თავის მეგობარ ჩიტებს: — სკვინჩი-  
სკვინჩოო! მოფრინდა მთელი გუნდი და თვალის დახამხამე-  
ბაში აუკრიფა ფეტვი.

ეს კი გააკეთეს, მაგრამ ვარცლი როგორ უნდა აევსოთ  
ცრემლით? დაჯდა კონკია და ისევე ატირდა ცხარე ცრემ-  
ლით. თან ეძინება და დედინაცვლის შიშით ვერ იძინებს.

— შეილო, კონკიავ, რატომ ტირიო? — მოესმა ამ  
დროს. აიხედა და ის კეთილი დედაბერი დაინახა.

— დედინაცვალმა მითხრა, ეს ვარცლი ცრემლით აავ-  
სეო! — შესჩივლა კონკიამ.

— შე საწყალო, თავს რაზე იკლავო. — ჩაასხა წყალი  
ვარცლში, ჩაყარა მარილი და უთხრა, — ეგეც შენი ცრემ-  
ლიო. ადექი ახლა, ხელ-პირი დაიბანე და ორმოს ჩასძახე,  
რაც ძროხამ დაგიბარაო.

კონკიას მაშინდა გაახსენდა ეს ამბავი. გაიქცა ბოსელში,  
მივიდა ორმოსთან და ჩასძახა:

— ამოდი, ჩემო რაშო, და სადედოფლო ტანსაცმელი  
ამომიტანეო!

ორმოდან მშვენივრად შეკაზმული რაში ამოვიდა, უნა-  
გირზე ოქროს ტანსაცმელი ჰქონდა დაკრული.

დედაბერმა უთხრა კონკიას:

— რაღას უყურებ. ჩაიცვი ჩქარა და ხელმწიფის სასახ-  
ლეში წადიო. — კონკიამ ჩაიცვა, დედაბერი მოეხმარა, შეჯდა  
რაშზე და ხელმწიფის სასახლისაკენ გაფრინდა.

დიდი მოკრძალებით და მოწიწებით შეხვდნენ კარისკაცები. მთელი ის ზღვა ხალხი იმას შესცქეროდა. ხელმწიფის ვაჟი ხომ სულ ერთთავად თვალებში შესცივინებდა.

კონკიას ეშინოდა დედინაცვალმა არ მიცნოსო, და საჩქაროდ გამოობრუნდა. დაედევნენ კარისკაცები. მაგრამ აბა იმის რაშს რა ცხენი დაეწეოდა! დაეკარგათ თვალსა და ხელს შუა.

გზად მდინარეში უნდა გასულიყო. იმ სიჩქარეში წასძვრა ცალი ოქროს ქოში ფესიდან და ჩაუვარდა შიგ, წყალი ღრმა იყო, ვერ ამოიღებდა. მივიდა შინ, გაისადა, ტანსაცმელი რაშს დააკრა, მიიყვანა ორმოსთან და უთხრა:

— რაშო, ჩაბრძანდი და სადედოფლო ტანსაცმელიც ჩაიტანეო.

რაში ჩავიდა. კონკიამ ორმოს დააფარა, შებრუნდა შინ, ჩაიცვა ისევ თავისი კონკები, მიჯდა კარს უკან და დაუწყო ლოდინი დედინაცვალს.

დედინაცვალი და იმისი ქალი გათენებისას დაბრუნდნენ. დედინაცვალმა თავში ჩაარტყა კონკიას:

— შენმა სიცოცხლემ, სწორედ შენ გგავდა, სასახლეში რომ მზეთუნახავი ვნახეთო!

გოგომაც სიცილი-დააყარა, კონკიას კი გუნებაში ეცინებოდა.

იმ მდინარეზე, სადაც კონკიას ქოში ჩაუვარდა, ხელმწიფის მეჯინიბეები ცხენებს წყალს ასმევდნენ ხოლმე. მეორე დღეს ცხენები დაფრთხნენ, წყალი არ დალიეს.

ხელმწიფეს ამბავი მიუტანეს: მდინარეში რალაც ანათებს, ცხენები წყალს ველარ სვამენო.

ხელმწიფემ მყვინთავეები გაგზავნა: ამოიღეს ოქროს ქოში და მიაართვეს. ხელმწიფემ ქოში შეათვალიერა და თქვა:

— ვისაც ეს ქოში მოერგება, რძლად ის უნდა მოვიყვანოო.

დაიბარა ნაზირ-ვეზირები და უბრძანა:

— რკინის ქალამნები ჩაიცვით, რკინის ჯოხები დაიჭირეთ, წადით, ცისქვეშეთი დაიარეთ და ვისაც ფეხზე ეს ქოში მოერგოს, ის ქალი წამოიყვანეთო. სადაც ეგ რკინის ქალამნები გაგიცვდებათ და ეგ რკინის ჯოხები დაგიტყდებათ, ის ქალი იქ იქნებაო.



წავიდნენ ნაზირ-ვეზირები, ქვეყანა მოიარეს, მაგრამ ქოში არავის მოერგო. ბოლოს მივიდნენ იმ საწყალი გლენის კარზე. ქალამნებიც იქ დაუცვდათ და ჯოხებიც იქ დაემტვრათ.

დედინაცვალს გაგებულნი ჰქონდა ოქროს ქოშის ამბავი და სულ იმით მოსვლას ელოდა. სასწრაფოდ მორთო თავისი გოგო და თოჯინასავით წამოსვა ტახტზე. კონკია კი თონეში ჩააგდო, ჭილოფი გადაათარა, ზედ სიმიინდი დაყარა და კრუხ-წიწილას დაუძასა. მერე მივიდა და ნაზირ-ვეზირები შეიპატიჟა:

— მობრძანდით, ბატონებო, მობრძანდით, ეგ ქოში სწორედ ჩემს ქალიშვილს მოერგებაო!

ჩააცვეს ოქროს ქოში და არ მოერგო, პატარა მოუვიდა.

დედაკაცმა უთხრა:

— თითი მოაჭერით და ჩაუვა, დედოფალი იქნება, ფეხით ხომ მაინც არ ივლისო.

ნაზირ-ვეზირები ძალიან შეწუხებულნი იყვნენ, ხელმწიფის ბრძანებას რომ ვერ ასრულებდნენ, მოაჭრეს იმ გოგოს თითი, ჩააცვეს ქოში და წაიყვანეს დიდის ამბით, მაგრამ გზაზე სკვინჩა შემოხვდათ და აუტყდა ნაზირ-ვეზირებს:

— თქვენ რომ მიგყავთ, ეგ არ არის ოქროს ქოშის პატარონი, ის იქ დარჩაო!

მიბრუნდნენ უკან.

— კიდევა გყავს ქალიო? — ჰკითხეს დედაკაცს.

— არა, მეტი აღარა მყავსო.

მოფრინდა სკვინჩა და იძახის:

— თონეში ზის კოხტა გოგო, თონეში ზისო!

დედაკაცმა ქვა ესროლა სკვინჩას, მაგრამ ის ისევ იმას გაიძახოდა.

მივიდნენ ნაზირ-ვეზირები, ახადეს თონეს და ამოიყვანეს კონკია.

დედინაცვალი აიპრუწა:

— ჩემს ქალს არ მოერგო და მაგ გომბიოს ტოტყებს რას მოერგებაო.

ჩააცვეს კონკიას ოქროს ქოში და მოერგო. გახარებულმა

ნაზირ-ვეზირებმა იმწამსვე დააპირეს წაყვანა, მაგრამ კონკიამ უთხრა:

— აქ მომიცადეთ ცოტა ხანს, ახლავე გამოვალო.

შევიდა ბოსელში, ორმოსთან მივიდა და ჩასძახა:

— ჩემო რაშო, ამოდი და სადედოფლო ტანსაცმელიც ამომიტანეო.

ამოვიდა რაში, კონკიამ კონკები გაიხადა, სადედოფლო ტანსაცმელი ჩაიცვა, ცალი ქოშიც გამოიტანა. ახლა კი ყველანი მიხვდნენ, რომ კონკია იყო ის მზეთუნახავი, მეფის სასახლეში რომ ნახეს. ნაზირ-ვეზირებმა კიდევ უფრო გაიხარეს, დედინაცვალსა და იმის შვილს კი შურით გულები დაუსკდათ.

გამოეწყო კონკია, შეჯდა რაშზე და გასწიეს სასახლისაკენ.

ხელმწიფე და ხელმწიფის შვილი სიხარულისაგან ცას ეწივნენ. შვიდ დღე და ღამეს გაგრძელდა ქორწილი. ხელმწიფემ ქვეყანა შვილს ჩააბარა, კონკია დედოფლად დასვეს. კონკიამ კეთილი დედაბერიც თავისთან მიიყვანა და ცხოვრობდნენ ბედნიერად.

შურიან დედინაცვალს კი იმ დღის შემდეგ დიდხანს აღარ უცოცხლია, თქვენი ჭირი წაიღო.

ჭირი — იქა, ლხინი — აქა,

ქატო — იქა, ფქვილი — აქა.





## ას ფ უ რ ც ე ლ ა

იყო და არა იყო რა, ღვთის უკეთესი რა იქნებოდა, იყო ერთი ქვრივი დედაკაცი, ქმარი ადრევე მოუკვდა და სამი მცირეწლოვანი შვილი დარჩა — ორი ვაჟი და ერთი ქალი. ღარიბი კაცის კვალობაზე ქალს პატარა მამულიც ჰქონდა, მაგრამ სიმარტოვის გამო ვეღარ ამუშავებდა. ხოლო როცა შვილები წამოეზარდნენ, მათ უთხრა:

— სანამ პატარები იყავით, არაფერს გეუბნებოდით, ახლა კი დროა, თქვენს მამულს მიხედოთ და უპატრონოთ.

შვილებმა არც კი იცოდნენ, თუ მამული ჰქონდათ, და დედას ჰკითხეს:

— სადა გვაქვს მამულიო?

დედამ ასწავლა, სადაც ჰქონდათ მამული, მაგრამ შვილებს ძალიან ეშორათ, — იმ სიშორეზე სადილს ვინ მოგვიტანსო?

— ოღონდ თქვენ წადით და საჭმელს ყოველთვის თქვენი და ჩამოგიტანთო.

ძმებს ჭკუაში დაუჯდათ დედის ნათქვამი და მამულში წასასვლელად მოემზადნენ, დედამ პირველწასვლისას ერთი კვირის სამყოფი საგზალი გაუმზადა, თან ბლომად ხახვი გაატანა და დაარია:

— შვილებო, ეს ხახვი გაფცქვენით და ნაფცქვენი გზაზე დაყარეთ. თქვენი და რომ საჭმელს წამოგიღებთ, ხახვის ნაფცქვენს გამოყვება და თქვენი პოვნა აღარ გაუჭირდებაო. წავიდნენ ძმები სამუშაოდ და, როგორც დედამ დაარია, მთელი გზა ხახვის ნაფურჩალით მოფინეს.

იქვე ახლოს ერთი ასთავიანი დევი ცხოვრობდა, გამოვი-

შა დევის დედა, მოკრიფა ხახვის ნაფურჩალი და თავისი სასახლისაკენ მიმავალ გზაზე დაყარა.

კვირა რომ შესრულდა, დედამ გემრიელი სადილი მოამზადა, ჩაალაგა ხურჯინში, გადაჰკიდა ხურჯინი ქალს და გაგზავნა ძმებთან. ქალი მიჰყვა ხახვის ნაფურჩალს, იარა, იარა და დევის სახლს მიადგა. შინ მარტო დევის დედა დაუხვდა, მივიდა ქალი და ჰკითხა:

— დედი, დედაშვილობას, მითხარი, ჩემი ძმები აქ ხომ არა მუშაობენო?

— რის ძმები, რა ძმები, — უთხრა დევის დედამ. — აქ ჩემი ასთავიანი შვილი ცხოვრობს, მოდი, ჩქარა დაგმალო, თორემ საცაა მოვა და შეგჭამსო.

წაიყვანა დევის დედამ ქალი და სახლის ყველაზე ბნელ კუნჭულში დამალა. ცოტა ხნის შემდეგ მართლაც მოვიდა ასთავიანი დევი. ერთ მხარზე ნანადირევი ეკიდა, მეორე მხარზე ხმელი ჭადარი ედო. ტვირთი ეზოში დაყარა და შინ შევიდა. შესვლისთანავე ცხვირი შეიჭმუნხა და დედას უთხრა:

— დედი, ადამიანის სუნი მცემსო!

— რას ამბობ, შვილო, შენი შიშით ცაში ფრინველს ეერ გაუჭაჭანებია და ხმელეთზე ჭიანჭველას და აქ ადამიანის შვილი როგორ მობედავდაო? — უთხრა დედამ.

დევმა მაინც არ დაუჯერა.

— არა, დედი, ნამდვილად ადამიანის სუნი მცემსო.

მაშინ გამოუტყდა დედა და უთხრა:

— მე ერთი კარგი ქალი შემოვიტყუე სახლში, შენ საცოლედ მინდა და თუ არ შეჭამ, გიჩვენებო.

— არ შევჭამო, — შეჰპირდა დევი.

მაშინ გამოიყვანა დედამ დამალული ქალი და აჩვენა. დევის მოეწონა და ცოლად შეირთო.

ძმები ელოდნენ დას, ელოდნენ და, რომ არსად გამოჩნდა, ადგნენ და შინ დაბრუნდნენ. დედას უსაყვედურეს:—რატომ საჭმელი არ გამოგვიგზავნეო?

— ვაი, მომიკვდეს თავი! — შეიცხადა დედამ და ტირილი დაიწყო, — ჩვენი მამულის ახლოს ერთი ასთავიანი დევი ცხოვრობს და თქვენს დას უსათუოდ ის წყეული დაიჭერდაო.

ძმებმა რომ ეს გაიგეს, იმავე წამს მოემზადნენ და დის გამოსახსნელად წავიდნენ. შორიდანვე გამოჩნდა დევის სახელი, დევის დედამ შეამჩნია მათკენ მიმავლები და ქალს უთხრა:

— აბა გაიხედე, მართლა მოჩანს რამე, თუ თვალი მატყუებდნენ?

ქალმა გაიხედა და უთხრა:

— ბუზის ტოლად მოჩანან ვილაცები და აქეთ მოდიანო.

— ვაი მაგათი დედის ბრალიო, — თქვა დევის დედამ და ცოტა ხნის შემდეგ რძალი კიდევ გაასედა.

— ორი კაცი მოჩანს და აქეთ მოდიანო, — უთხრა ქალმა.

— ვაი მაგათი დედის ბრალიო, — კიდევ თქვა დევის დედამ.

ამასობაში ძმები დევის სახლს მიადგნენ, ქალმა იცნო ძმები და თვალცრემლიანი შეეგება, ხან ერთს ეხვეოდა და ჰკოცნიდა და ხან მეორეს. დევის დედა მიხვდა, რომ მოსულები მისი რძლის ძმები იყვნენ და შინ შეიწვია. აჭამა პური და მერე უთხრა:

— ახლა კი მოდით, დაგმალავთ, თორემ საცაა ჩემი შეილი მოვა და ორივეს შეგჭამთო.

ძმები შეშინდნენ და დაიმაღლნენ.

ცოტახნის შემდეგ დევიც მოვიდა. ერთ მხარზე ისევ ხმელი ჭადარი გაედო და მეორეზე დახოცილი ნადირი ეკიდა. ტვირთი კართან მოიხსნა, შეაბიჯა შინ და დედას უთხრა:

— დედი, ადამიანის სუნი მცემსო!

დედამ ჯერ დაუმალა, მაგრამ შეილი რომ აღარ მოეშვა, გამოუტყდა:

— თუ პირობას მომცემ, რომ არ შეჭამ, აქ შენი ცოლისძმები არიან და გამოგიჩენო.

— არ შევჭამო, — შეჰპირდა დევი.

დედამ გამოუყვანა დამალული ცოლისძმები და აჩვენა: დევმა ახედ-დახედა ბიჭებს და უთხრა:

— მოდით, ვახშმის თადარიგს შევუდგეთო.

ძმები დათანხმდნენ და შეუდგნენ დახოცილი ნადირის გატყავებას, მაგრამ სანამ ისინი ერთ ირემს ფეხებს გადაუსერავდნენ, დევმა მთელი ნანადირევი დაატყავა და ქვაბში

ჩაუძანა, მერე ცოლისძმებს ის ირემიც გამოჰგლიჯა ხელი-  
დან, ერთი გაკვრით გააძრო ტყავი, მიკუწ-მოკუწა და ისიც  
სხვა ირმებს მიაყოლა.

ხორცი რომ მოიხარშა და ვასშმად დასხდნენ, დევმა ჰკი-  
თხა ძმებს, — ძვლის კაცები ხართ, თუ ხორცისაო?

ძმებს შეეშინდათ და ხორცზე უარი თქვეს:

— ჩვენ ხორცისა რა ღირსები ვართ, ძვლებითაც იოლად  
გავალთო.

გაუსვა დევმა პირი და მთელი ხორცი თვითონ შესანსლა,  
გამოხრული ძვლები კი ცოლისძმებს მიუყარა. კარგად რომ  
გამოძღა, ქვევრს მოხადა და კიდევ ჰკითხა:

— კოკის კაცები ხართ, თუ ყანწისაო?

— ყანწისაო, — უპასუხეს ისევ დაშინებულმა ცოლის-  
ძმებმა. დევსაც ეს უნდოდა, თვითონ კოკა დაიდგა და ძმებს  
კი ყანწი გადაუგდო.

ამასობაში დაძინების დროც მოვიდა. დევმა ცოლის-  
ძმებს ჰკითხა:

— ტახტის კაცები ხართ თუ ბაგისაო?

— ტახტი რა ჩვენი საქმეა, ბაგაში დავიძინებთო, —  
უთხრეს ძმებმა.

დევმა შეიყვანა ძმები გომურში და ბაგაში დააწვინა,  
თვითონ ტახტზე გაიშოტა და ხვრინვა ამოუშვა.

დილით დევმა გაიღვიძა და დედას უთხრა:

— დედი, პური მშია და მაჭამე რამეო.

— ჩადი, შვილო გომურში, კიდობანში ორი პური დევეს  
და შეჭამეო, — უთხრა დედამ.

დევი ჩავიდა გომურში, მაგრამ პურის კიდობანს ახლოც  
არ გაჰკარებია, დაძინებული ცოლისძმები რომ დაინახა,  
სიმსუნაგემ წასძლია, ორივენი იქვე გადაყლაპა და სანადი-  
როდ წავიდა.

დედას იმედი ჰქონდა, შვილები დამიბრუნდებიან და და-  
საც მოიყვანენო, მაგრამ რომ აღარ გამოჩნდნენ, იფიქრა,  
უთუოდ ასთავიანი დევი შეჭამდაო, და მორთო ტირილი. ამ  
დროს ჩამოიარა ერთმა თმაჭალარა კაცმა და დედას ჰკითხა:

— მითხარი, შვილო, რა ამბავია შენს თავს, რა გატი-  
რებს ასე გულამოსკვნითო?

დედამ უამბო თავისი გასაჭირი, ასე და ასეა ჩემი საქმე. ასთავიანმა დევმა შვილები შემიჭამა და იმათ დავტირიო. კაცმა რომ დედის დარდი გაიგო, ჯიბიდან ერთი თურქული ვაშლი ამოიღო, მისცა დედას და უთხრა:

— ეს ვაშლი ას ნაწილად გაჭერი და ყოველდღე თითო ნაჭერი შეჭამე. სულ რომ გაათავებ, ბიჭი გაგიჩნდება და ასფურცელა დაარქვი. ის ამოგყრის დევის ჯავრს და შვილებსაც ისევე დაგიბრუნებსო.

დედაკაცი მართლაც ისე მოიქცა, როგორც კაცმა დაარია გა: ვაშლი ას ნაწილად გაჭრა და დღეში თითო ნაჭერს ჭამდა. მესხეც რომ შეჭამა, ბიჭი გაუჩნდა და ასფურცელა დაარქვა.

სხვები რასაც წლით იზრდებოდნენ, ასფურცელა იმდენს დლით იზრდებოდა, მალე ისეთი ბიჭი დადგა, რომ იმისი დანახვა მტერსაც კი გაუხარდებოდა.

ერთხელ ასფურცელა თავის ტოლ ბიჭებში ჩილიკობას თამაშობდა. ერთ დედაკაცს კოკით წყალი მოჰქონდა, ასფურცელამ ჩილიკა გასტყორცნა და უნებლიეთ კოკას მოახვედრა. კოკა გატყდა. გაჯავრებულმა დედაკაცმა ასფურცელას უთხრა:

— დაწყევლით ვერ დაგწყევლი, რადგან დედისერთა ხარ? ოღონდ ამას კი გეტყვი: შნო თუ გაქვს, წადი და შენი დაძმები გამოიხსენი ასთავიან დევს რომ ჰყვანან შეპყრობილიო.

ასფურცელამ არ იცოდა, თუ დაძმები ჰყავდა, დედა არ უმხელდა. მივიდა შინ და დედას ჰკითხა:

დედი, მე დაძმები მყავსო?

დედამ ახლაც დაუმალა, მაშინ ასფურცელამ ხერხს მიმართა — ძუძუს მოწოვა მოინდომა და დედას შეეხვეწა, თუ გიყვარვარ, ძუძუ მომინდა და მომწოვეო.

— რაღა დროს შენი ძუძუს წოვაა, ვაჟკაცი ხარო, — გაუწყრა დედა, მაგრამ ასფურცელა არ მოეშვა და დედაც დათანხმდა. ჩაიდო ძუძუ პირში ასფურცელამ, მოუჭირა კბილები და დედას უთხრა:

— სიმართლე მითხარი, მართლა მყავს დაძმები, თუ არა ძუძუს მოგაჭამო.

შეეშინდა დედას და ყველაფერი დაწვრილებით უამბო. ასფურცელა იმავე დღეს ასთავიან დევთან წასასვლელად სამზადისს შეუდგა. დედამ ბევრი უშალა, მაგრამ ასფურცელამ არ დაიშალა. აილო ხმალი, მშვილდ-ისარი და წავიდა.

დევის დედა ბანზე იჯდა და მატყლს ართავდა. დაინახა შორით მომავალი ასფურცელა და რძალს დაუძახა:

— აბა, ერთი გახედე, მართლა მოდის ვინმე, თუ თვალი მატყუებსო?

რძალმა გაიხედა და, — ვილაც აბჯრიანი ჭაბუკი მოდისო, — უთხრა.

დევის დედას გულმა ავი რაღაც უგრძნო და დაიწუწუნა:

— ვაი, მაგის დედის ბრალი და ვაი, ჩემი შვილის დედის ბრალიო.

მალე ასფურცელა დევის სასასლეს მიადგა: დაურიდებლად შეაბიჯა შიგ, შეხედა ახალგაზრდა ქალს და უთხრა:

— უთუოდ შენ ჩემი და იქნებიო.

ქალს გაუკვირდა:

— მე მსოლოდ ორი ძმა მყავდა და ორივენი დევმა გადაყლაპა, შენ კი, არ ვიცი, ვინა ხარ და საიდან მოსულხარო.

ასფურცელამ ყველაფერი დაწვრილებით უამბო. ქალმაც ირწმუნა. უცნობ ძმას სიხარულით გადაეხვია.

დევის დედამ ასფურცელას ვინაობა რომ გაიგო, დამალვა მოუნდომა და უთხრა:

— მოდი, შვილო, დაგმალავ, თორემ საცაა ჩემი შვილი მოვა და შეგჭამსო.

— დამალულ სიცოცხლეს სიკვდილი მირჩევნიაო, — უთხრა ასფურცელამ, გამოვიდა ეზოში და დევის მოლოდინში აქეთ-იქით სეირნობა დაიწყო.

მალე დევიც გამოჩნდა. ერთ მხარზე დახოცილი ნადირი წამოეკიდნა, მეორეზე — ხე გაედო და არხეინად მოდიოდა. თავის ეზოში უშიშრად მოსეირნე უცხო კაცი რომ დაინახა, მთლად გაცეცხლდა — ჩემი შიშით ძირს ჭიანჭველას ვერ გაუვლია და მალლა ბუხს, ვინ არის ეს თავხედი, რომ ჩემს ეზო-ყურეში დაუკითხავად დასეირნობსო? — განრისხებული მიეჭრა ასფურცელას და შეუტია:



— ვინა ხარ და ან აქ რისთვის მოთრეულხარო?

— არა გრცხვენია, ცოლისძმას რომ მტრულად ხვდები, — უთხრა ასფურცელამ, — სტუმრად მოვსულვარ და თუ შეგიძლია გამიმასპინძლო.

— კარგი, რაკი ცოლისძმა ყოფილხარ, აღარას გერჩი, — უთხრა დევმა. — მაშ მოდი, ნანადირევი გავატყავოთ და ვასშმის თადარიგს შევუდგეთო. გულში კი ფიქრობდა, ხელთ კარგი გემრიელი ლუკმა ჩამივარდაო.

დაიწყეს დახოცილი ირმების დატყავება, სანამ დევი ერთს გაატყავებდა, ასფურცელამ ერთი ხელის გაკვრით დაატყავა მთელი ნანადირევი, დაჭრა კიდევ და ქვაბში ჩაყარა.

უყურებს დევი ასფურცელას და უკვირს, ეს რა ყოფილაო. საჭმელი რომ მოიხარშა და ვასშმად დასხდნენ, დევმა ასფურცელასაც იგივე ჰკითხა, რაც იმის ძმებს: ძვლის კაცი ხარ, თუ ხორცისაო?

ასფურცელამ თვალები გადაუბრიალა:

— ძვლის კაცი რად ვიქნები, განა ძალდი ვარ, ხორცი გადმომიწყე აქეთო.

დევმა გადაულაგა ხორცი და ასფურცელამაც გაჰკრა და გამოჰკრა, ხორცი თვითონ შეჭამა და ძვლები დევს დაულაგა. დევმა კიდევ ჰკითხა:

— კოკის კაცი ხარ, თუ ყანწისო?

— ყანწისა რად ვიქნები, კოკა მომიტაო, — უთხრა ასფურცელამ.

გადმოუდგა დევმა კოკა, მაგრამ გულში კი ძალიან შეფიქრიანდა, ამას რომ თავის თავის იმედი არ ჰქონდეს, ასე თამამად ლაპარაკს ვერ დამიწყებდაო. ვასშამს რომ მორჩნენ, დევმა ერთხელ კიდევ ჰკითხა:

— გომის კაცი ხარ, თუ ლოგინისაო?

— გომის კაცი რად ვიქნები, განა ძროხა ვარ, ლოგინი გამიშალეო, — უთხრა ასფურცელამ.

დევმა ასფურცელას ლოგინი გაუშალა და თვითონ გომურში დაწვა. დაწვა, მაგრამ იმის თვალს ძილი არ ეკარებოდა, სულ იმის ფიქრშია, ახლა კი დაეძინებოდაო, და ერთ უშველებელ ხმალს დაუწყო ლესვა. გამოელვინა ასფურცელას ლესვის ხმაზე და მიხვდა, რომ დევი დალატს უმზა-

დებდა. ჩუმად წამოდგა ლოგინიდან, ფრთხილად აიყვანა მძინარე დევის დედა და თავის ლოგინში ჩააწვინა. თვითონ მეორე ოთახში დაიშალა.

მორჩა დევი ხმლის ლესვას, შეიპარა ჩუმად ასფურცელას საძინებელ ოთახში და რაც ძალი და ღონე ჰქონდა, დასცხო და დასცხო ხმალი ლოგინს. იმდენი ურტყა, სანამ დედაც და ლოგინიც სულ არ აკუწა. — აბა თუ ბიჭი ხარ, ახლაც გამიდიდგულდიო, თქვა ნიშნის მოგებით და უკან გაბრუნდა.

დილას გაელვიძა დევს და ასფურცელა რომ ცოცხალი და საღსალამათი დახვდა, გაოცებისაგან პირი დაალო.

— წუხელ ხომ არაფერს შეუწუხებინარო? — ჰკითხა ასფურცელას.

— არაო, — უპასუხა ასფურცელამ.

— რწყილს მაინც არ უკბენიაო?

— არაო.

დევი უფრო გაოცდა, მაშ ის ვინ იყო, ხმლით რომ აკუწვო? — შევიდა ოთახში, გადასწია საბანი და ნაწილ-ნაწილ აკუწული საკუთარი დედა კი დაინახა. ყველაფერს მიხვდა, განრისხებული ღრიალით გამოვარდა და დაეძგერა ასფურცელას. ასფურცელამ პირველსავე მოქნევავზე წელამდე ჩაასო მიწაში, იშიშვლა ხმალი და შესძახა:

— ჩქარა თქვი, რა უყავი ჩემი ძმები, თორემ მოვიდა ხმალიო!

— ოღონდ ნუ მომკლავ და გეტყვი, — შეეხვეწა დევი, — შენი ძმები მკვდრები არ არიან, მუცელში ერთი კოლოფი მაქვს და იმაში მისხედანო.

ასფურცელამ მაშინვე გაუპო დევს მუცელი. ამოიღო კოლოფი და ამოიყვანა თავისი ძმები, ხოლო ასთავიანი დევი ხმლით აკუწა. მერე დაჯდა და ძმებს თავისი თავგადასავალი უამბო. ძმებმაც, რაღა თქმა უნდა, დიდად გაიხარეს.

და-ძმებმა იმავე დღეს დატოვეს დევის სახლი და შინისაკენ გამოემგზავრნენ. გამოეგება გახარებული დედა და ყველანი სათითაოდ გადაკოცნა. და-ძმებმაც გაიხარეს დედასთან დაბრუნებით და მისი ნახვით და იმ დღიდან მათ სახლში სიხარული აღარ გამოლევულა.

ერთ დღეს ასფურცელამ უთხრა დედას:

— დედი, ასე ყოფნა არ გამოგვადგება, ჩვენ ცოლები გვინდა, ჩვენს დას — ქმარი, უნდა წავიდე და ღირსეული საქმრო და საცოლეები მოვნახო.

გამოემშვიდობა და წავიდა.

ბევრი იარა თუ ცოტა იარა, ბოლოს ერთ ტრიალ მინდორში გავიდა. მინდორს არც თავი უჩანდა, არც — ბოლო. დგას ასფურცელა და იყურება აქეთ-იქით, აღარ იცის, რომელ მხარეს წავიდეს. ბოლოს ადგა, მოზიდა მშვილდს და ისარი გაისროლა, — სადაც ეს ისარი დაეცემა, ჩემი ბედიც იქ იქნება.

იფრინა ისარმა, იფრინა და ერთი სახლის წინ ჩაერჭო. ეს სახლი სამი ძმა დევისა იყო. გამოცვივდნენ დევები, დაეჯაჯგურნენ ისარს, მაგრამ მიწიდან ძვრაც ვერ უყვეს. მერე თქვეს, ისარი რომ მიწიდან ვერ ამოგვიძვრია, ამის გამომტყორცნელთან რაღას გავხდებითო და შეშინებულები ცხრა მთას იქით გადაიხვეწნენ.

მივიდა ასფურცელა, ამოაძრო თავისი ისარი და ჩაიდო საისრეში. უცბად სასახლიდან სამი მზეთუნახავი ქალი გამოვარდა, გადაეხვივნენ ასფურცელას და დაუწყეს კოცნა, — შენა ხარ ჩვენი მხსნელიო.


ეს ქალები ერთი სახელოვანი ხელმწიფის ასულები იყვნენ. დევებს მათი დედ-მამა ამოეხოცათ და დები ცოლებად წამოეყვანათ. ასფურცელამ უმცროსი ქალი იქვე შეირთო ცოლად და უფროსები ძმებისთვის დანიშნა. ქალებმა უთხრეს:

— ჩვენი ერთადერთი ძმაც აქ არის, ცხრაკლიტულშია დამწყვდეული, ბარემ ისიც გაათავისუფლე და საითაც გინდა, იქით წაგვიყვანეო.

ასფურცელამ დალევს ცხრაკლიტული და გამოიყვანა მშვენიერი ჭაბუკი. წამოიყვანა ყველანი თავის სახლში და დევების მთელი სიმდიდრეც თან გამოაყოლა. დები ძმებს ჩამოურიგა, ჭაბუკ უფლისწულს თავისი და შერთო ცოლად და დაიწყეს მშვიდი და ბედნიერი ცხოვრება.

ჭირი — იქა, ლხინი — აქა,

ქატო — იქა, ფქვილი — აქა.



## შავჩიტა რაში

1

იყო და არა იყო რა, ღვთის უკეთესი რა იქნებოდა, იყო ერთი მეტად მდიდარი და სახელგანთქმული ხელმწიფე. ხელმწიფეს ვეზირიც თავისნაირი მდიდარი და საქმის მცოდნე ჰყავდა. ცხოვრებით ორივენი კმაყოფილი იყვნენ, დოვლათი და სიკეთე არც სახელმწიფოში აკლდათ, მხოლოდ ეგ იყო, რომ შვილი არცერთს არ ჰყავდა და ეს ამბავი ძალიან აწუხებდათ.

ერთხელ ხელმწიფემ ვეზირს უბრძანა:

— შენ ჭკვიანი, მოხერხებული კაცი ხარ, წადი და სადაც იყოს და არ იყოს, უშვილობის წამალი იშოვე და მომიტანო.

ვეზირიც ადგა და წავიდა, ბევრი იარა, თუ ცოტა იარა, ბოლოს კითხვა-კითხვით გაიგო, რომ მავან და მავან ადგილას სამი ძმა დევი ცხოვრობს და უშვილობის წამალი მართო იმათ იციანო.

ვეზირი ისევ გზას დაადგა და როგორც იქნა მიაგნო დევების ადგილსამყოფელს. გზაზე ჯერ უმცროსი ძმის სახლი იდგა და ვეზირიც პირველად იმასთან მივიდა. გამოვიდა უმცროსი დევი, ისე იყო გათეთრებული, რომ თავზე ერთი შავი თმა აღარ უჩანდა.

— რა გაგჭირვებიაო? — ჰკითხა ვეზირს.

ვეზირმა უთხრა:

— უშვილობის წამალი გცოდნია და უნდა მასწავლო.

— ჩემს ზემოთ ჩემი უფროსი ძმა ცხოვრობს და მაგ წამ-

ლის გაკეთება იმან იცისო, — უთხრა დევმა და გზაც მიასწავლა.

წავიდა ვეზირი და მივიდა შუათანა ძმასთან. ის მხოლოდ ნახევრად იყო გაჭაღარავებული. ვეზირმა თავისი მისვლის მიზეზი გააცნო, მაგრამ წამალზე იმანაც უარი უთხრა.

— ეგეთი წამლის გაკეთება მე კი არა, ჩემს ზემოთ რომ ჩემი უფროსი ძმა ცხოვრობს, იმან იცისო, — უთხრა დევმა და ვეზირი უფროს ძმასთან გაგზავნა.

მივიდა ვეზირი უფროსი დევის სახლთან და დაიძახა. ძანილზე დევის ცოლია გამოიხედა, ვეზირმა მისვლის მიზეზი უთხრა და წამალი სთხოვა.

— ჩემს ქმარს ახლა სძინავს და ვერ გავაღვიძებო, — უთხრა ცოლმა. ვეზირი შეეხვეწა, როგორმე ჩემი გულისთვის გააღვიძეო. მაშინ ქალმა ქოშები ჩაიცვა და ქმრის საწოლთან ფლარტუნით გაიარ-გამოიარა. დევს გამოელვინა და ცოლს უსაყვედურა:

— რად გამაღვიძე, ჭაღარა არ მქონდა და ახლა კი აი, ერთი ღერი გამომერიათ.

ცოლმა აუხსნა, როგორც იყო საქმე, მაშინ დევმა უთხრა, — ვინ არის, შემოიყვანეო.

ვეზირი შევიდა და გაოცებისაგან პირი ღია დარჩა: უფროს დევს თმაში არც ერთი ჭაღარა არ ერია. ვერ მოითმინა და ჰკითხა:

— რა მიზეზია, რომ შენი უმცროსი ძმა სულ გათეთრებულია, შუათანას ნახევრად ურევია ჭაღარა და შენ კი ერთი თეთრი თმაც არსად გიჩანსო. შენ უფრო ჰგევხარ უმცროსს, ვიდრე ისინიო.

— მოიცა, მაგას თავის დროზე გაიგებო, — უთხრა დევმა და ცოლს გასძახა, — ადი სხვენში და ერთი საზამთრო ჩამოიტანეო.

ცოლი წავიდა და ჩამოიტანა საზამთრო. — ეგ არა, მეორე ჩამოიტანეო, — უთხრა ქმარმა. — ცოლი გაბრუნდა და ისევ ის საზამთრო ჩამოიტანა. — არც ეგ არისო, — ისევ უკან წააღებინა ქმარმა, — სხვა ჩამოიტანეო. — ქალი მესამედ შებრუნდა და ისევ ის საზამთრო ჩამოიტანა. — ჰო, აი ეგ არისო, — უთხრა დევმა და ვეზირს მიუბრუნდა, — აი,

ხომ ხედავ, სხვენში ერთის მეტი საზამთრო არ გვექონდა და იმის ჩამოსატანად სამჯერ ავგზავნე, მაგრამ ხმა არ ამოუღია, ამისთანა ცოლის ხელში აბა რა გამაჭაღარავებდა. იმ ჩემს ძმებს კი ასე არა აქვთ საქმე: უმცროსს ძალღმობიანი ცოლი ჰყავს და იმიტომ არის მთლიანად გათეთრებული, შუათანას ვირისგვერდა ცოლი ჰყავს და ნახევრადაც იმიტომ არის გაჭაღარავებული. ჩემმა ცოლმა თავის სიცოცხლეში მხოლოდ ამ ერთხელ გამაღვიძა პირველად და აი, ხედავ, უკვე ერთი ღერი თმა გამითეთრდა. ახლა ხომ გაიგე, რა ყოფილა მიზეზი, — უთხრა საბოლოოდ დევმა. — ვისაც დამჯერი და პატივისმცემელი ცოლი ჰყავს, იმას სიბერე ვერ მიეკარებაო.

მერე გაუკეთა უშიშროების წამალი, მაგრამ სანამ მისცემდა, ჯერ პირობა ჩამოართვა — შენა და შენმა ხელმწიფემ, რომელსაც ქალი გეყოლებათ, მე უნდა მომცეთო.

დაბრუნდა ვეზირი თავის ქვეყანაში, მიუტანა ხელმწიფეს უშიშროების წამალი და დევის პირობაც გააცნო.

— ბედისწერას ვერსად გავუქცევით, — უთხრა ხელმწიფემ. — მე გამწირავს ბედი თუ შენ, უნდა გავუძლოთო, — და წამალი ორივემ დალიეს.

ცხრა თვის თავზე ხელმწიფის ცოლს ვაჟი ეყოლა, ვეზირს ქალიშვილი.

ასე თხუთმეტ-თექვსმეტი წელიწადი რომ გავიდა, დევმა თქვა, — ახლა კი დროა, ვეზირს დანაპირები მოვთხოვო და ქალი წამოვიყვანოო, — და პირდაპირ ვეზირის სასახლისაკენ გასწია.

ვეზირს ერთი გულთმისანი შავჩიტა რაში ჰყავდა. რაშმა წინასწარვე იგრძნო მოსალოდნელი ხიფათი და ვეზირის ქალიშვილს დაუძახა.

— დევი შენს წასაყვანად მოდის და აქაურობას უნდა გაშორდე, — უთხრა რაშმა, — მოემზადე, ვაჟურად ჩაიცვი, მამაშენს სარკე, სავარცხელი, ერთი ფუთი მარბილი და ერთი ბოთლი ზეთი გამოართვი და ზედ შემჯექი. სამჯერ ისე დამარტყი მათრახი, რომ სამი პირი ტყავი ამძვრეს, ნამათრახეზე მარბილი დამაყარე და მერე მე ვიცეო.

ქალმა საჩქაროდ გადაიცვა ვაჟური ტანსაცმელი, გამო-

ართვა მამას ყველაფერი, რაც რაშია დაავალა, და მოახტა შავნიტას შურგზე. დაარტყა სამჯერ მათრახი, სამპირი ტყავი ააძრო და წყლულზე მარილი დააყარა. შავნიტა რაში მინდორში ნიავევით გაიჭრა.

ამასობაში დევიც მიადგა ვეზირის სახლს, გაიგო, რაც მომხდარიყო, და იმავე წამს გაქცეულების კვალს დაადგა.

შავნიტა რაშია იცოდა, რომ დევი უსათუოდ დაედევნებოდა და გზაში ქალს უთხრა:

— აბა, უკან მიიხედე, ხომ არაფერი მოჩანსო?

ქალმა მიიხედა და, შორს ბუზისტოლა რაღაც დაინახა.

— სავარცხელი გადააგდეო! — უთხრა შავნიტამ.

ქალმა გადააგდო სავარცხელი და მათ უკან გაუვალი ბუჩქნარი და ნარ-ეკალი აიყარა. მირბის დევი ქშენით და მისთელავს ნარ-ეკალს, ხელ-ფეხი და თავ-პირი მთლიანად დაეკაწრა, ნაკაწრებიდან სისხლი ღვარად ჩამოსდის. დიდი ტანჯვითა და წვალებით, როგორც იქნა, ნაპირს გააღწია.

ცოტა ხნის შემდეგ შავნიტამ მეორედ უთხრა ქალს, — აბა უკან მიიხედე, ხომ არაფერი მოჩანსო?

— კამერისოდენა რაღაც მოჩანსო, — უთხრა ქალმა.

რაშია ახლა სარკე გადააგდებინა ქალს და დევის სავალი გზა სულ ლურჯი ყინულით დაიფარა. მირბის დევი, ყოველ ნაბიჯზე იქცევა, ფეხი უსხლტება, დაიბეგვა, დაიჟეჟა, მაგრამ საბოლოოდ ნაპირს აქაც გააღწია.

ცოტა ხნის შემდეგ შავნიტამ ერთხელ კიდევ უთხრა ქალს — მიიხედეო, — ქალმა მიიხედა და შეშინებულმა შეპკივლა:

— ვაიმე, მოგვიანლოვდაო!

— ზეთი. გადაღვარეო, — უთხრა შავნიტამ. ქალმა გადაღვარა ზეთი და იმავე წამს უზარმაზარი ზღვა აბობოქრდა. შავნიტა რაში ფრენით გადაევლო ზღვას, ზღვის პირას იმ ქვეყნის ხელმწიფის სასახლე იდგა, სასახლეს ირგვლივ ბაღი ერტყა. შავნიტა რაში ბაღში დაეშვა და დაღლილებმა ჩრდილში დაისვენეს.

სასახლის აივანზე ახალგაზრდა უფლისწული გამოვიდა, თავიანთ ბაღში უცხო რაში და მხედარი რომ დაინახა, შევიდა და მამას უთხრა, — ჩვენს ბაღში ვიღაც უცხო მხედარი ზის და გვერდით რაში უბიაო. — მამამ შეილი ბაღში.

ჩაგზავნა, — აბა, გაიგე, ვინ არიან ან რისთვის მოსულანო? უფლისწული ჩავიდა, სალამი მისცა და გაიცნო. მალე უკანვე ამობრუნდა და მამას უთხრა, — ვილაც უცხო ჭაბუკი დასასვენებლად ჩამომხდარა, მაგრამ არ მჯერა, რომ ის ჭაბუკი ბიჭი იყოს, უფრო ქალის იერი აქვსო.

— მაშინ ასე ჰქენი, — უთხრა მამამ შვილს, — ჩადი, სადილი გაუმართე, ღვინო დააღვინე და, თუ მართლა ქალია, მალე დათვრება. გარდა მაგისა, სუფრის ირგვლივ ვარდი დაფინე და ორივენი ვარდზე დასხედით. მემის ქვეშ ვარდი მალე დაჭკნება და ამითაც გაიგებ თუ ქალიაო.

უფლისწულმა ყველაფერი ისე გააკეთა, როგორც მამამ დაარჩია — ვარდი სტუმარსაც დაუფინა და თვითონაც დაიფინა, მაგრამ სანამ დასხდებოდნენ, ქალმა ჩუმად აიღო თავის ქვეშ დაფენილი ვარდი და შავჩიტა რაშს მოუსვა თვალებზე. ისევ გაიფინა და დაჯდა.

უყურებს უფლისწული და ხედავს, რომ მის ქვეშ გაფენილი ვარდი უკვე ჭკნება, სტუმრის ქვეშ ნაფენ ვარდს კი ჭკნობა ჯერ ოდნავაც არ დასტყობია — ისევ ლაღანი გააქვს. ღვინოც ასევე — თუმცა უფლისწული ბევრს აძალბდა და ქალი თვითონაც ყოველ თასს ცლიდა, მაგრამ დათრობისა აჩაფერი ემჩნეოდა. იმიტომ რომ, მიაწვდიდა თუ არა სასმისს უფლისწული, ქალი რაშს გადახედავდა, — ჩემო შავჩიტავ, გაამოსო, — იტყოდა და დაღევდა. რაში თვრებოდა, თვითონ ფხიზლად რჩებოდა.

მაინც რომ ვერაფერს გახდა უფლისწული, ისევ მამასთან ავიდა და დაღონებულმა შესჩივლა:

— ვერა და ვერ დავათვრე ის ჭაბუკი, სასმისს მივაწვდი თუ არა, მაშინვე ცხენს გადახედავს, „ჩემო შავჩიტავ, გაამოსო“, — ეტყვის და დაღევს. ცხენი დაითრო, მხედარი კი ისევ ფხიზელია და, ვერც ის გავიგე, მართლა ვაჟია, თუ ქალიო.

— აქ რაღაც ჯადოა, — უთხრა მამამ და უფლისწული ხელახლა ჩაგზავნა ბაღში, — აბა, როგორმე ერთი თასი ისე დააღვინე, რომ რაშს არ უთხრას, ჩემო შავჩიტავ, გაამოსო.

უფლისწული ჩავიდა ბაღში, მოუჯდა მხედარს გვერდით და შეეხვეწა, ერთი თასი ისე დალიე, რომ რაშს ნუ ეტყვი



„ჩემო შავჩიტავ, გაამოსო“. მხედარმა ჯერ უარი უთხრა, მაგრამ ბევრი ხვეწნა-მუდარის შემდეგ დალია ისე, რომ რაში არ უხსენებია.

ღვინომ მართლაც მალე გასჭრა და მხედარს სუფრაზე ჩამოეძინა.

მეფემ და უფლისწულმა მძინარესთან მსახურები ჩაგზავნეს, გასინჯეთ, მართლა ვაჟია თუ არაო. მსახურებმა გაუხსნეს საკინძე და დაინახეს რომ ქალი იყო. ამოვიდნენ და მეფეს და უფლისწულს მოახსენეს, ვაჟურად ჩაცმული ქალი ყოფილაო.

ხელმწიფემ ბრძანა, მძინარე ამოიყვანეთ და აბრეშუმის ახალთახალ ლოგინში დააწვინეთო. — მსახურებმა ამოიყვანეს და დააწვინეს. ქალს იმ ღამეს გაუნძრევლად ეძინა, მეორე დილას გაიღვიძა და შეშინებულმა იკითხა, — სადა ვარო? — მაგრამ თავის გვერდით ჩამომჯდარი უფლისწული რომ დაინახა, მიხვდა სადაც იყო, და დამშვიდდა.

უფლისწულმა ვინაობა და თავგადასავალი გამოჰკითხა და ქალმაც ყველაფერი დაწვრილებით უამბო.

— ახლა ნულა გეშინია, — უთხრა უფლისწულმა. — თუ დამთანხმდები, დღეიდან მე ქმარი და შენ ცოლი. ჩემი საკუთრება რომ იქნები, ველარც დევი რამეს დაგაკლებსო.

ქალი, რა თქმა უნდა, დათანხმდა, რადგან უფლისწული თვითონაც ძალიან მოეწონა. გადაიხადეს დიდი ქორწილი და დაიწყეს ტკბილი და ბედნიერი ცხოვრება.

ვეზირის ქალი ყველაფრით კმაყოფილი იყო: გვერდით მოსიყვარულე ქმარი ედგა და თავისი მხსნელი ერთგული მეგობარი შავჩიტა რაშიც თან ჰყავდა. ერთი დედ-მამის ჯავრილა აწუხებდა და ქმარს ხშირად ეტყოდა, ჩემი ჯიბრით დევმა იმათ არაფერი აუტეხოსო.

ქმარი ჰპირდებოდა, სულ მალე წავიდეთ და ისინიც ჩვენთან გადმოვიყვანოთო, მაგრამ ამ სურვილის ასრულება აღარ დასცალდათ. სახელმწიფოს მტერი ღაესხა თავს და საშინელი ომი ატყდა. უფლისწული, რა თქმა უნდა, ომში უნდა წასულიყო და თავისი ჯარისთვის წინამძღოლობა გაეწია. გამოეთხოვა ცოლს, დედ-მამას, შეჯდა შავჩიტა რაშზე და წავიდა.

გავიდა ხანი, უფლისწულის ცოლს ოქროსთმიანი ქალ-ვაჟი გაუჩნდა. გასარებულმა ხელმწიფემ და დედოფალმა იმავე დღეს შიკრიკს უხმეს და ომში მყოფ შვილს მისალოცი წერილი გაუგზავნეს: „გილოცავთ, შენს ცოლს ოქროს-ქორიანი ქალ-ვაჟი ეყოლა“:

შიკრიკი წავიდა, მაგრამ სანამ უფლისწულამდე მიაღწევდა, გზაში ის დევი დაუხვდა, რომელმაც ვეზირს უშვილობის წამალი მისცა, და შიკრიკი შინ მიიწვია. დაასვენა, კარგად გაუმასპინძლდა, დაათრო და დააძინა. მძინარეს ჯიბიდან წერილი ამოუღო და დახია. დაწერა სხვა წერილი: „შენს ცოლს ძალღის ლეკვები ეყოლა და რა ვუყოთ, გავზარდოთ თუ გადავყაროთ?“ — წერილი იმავე ჯიბეში - ჩაუდო და გაისტუმრა.

წერილის წაკითხვამ უფლისწულს თავზარი დასცა, მაგრამ ბედს დამორჩილდა და მშობლებს ასეთი პასუხი გამოუგზავნა: „ძალღის ლეკვებია თუ კატის კნუტები, ჩემს დაბრუნებამდე დედასაც და შვილებსაც ისე მოუარეთ, რომ ცივი ნიავი არ მიეკაროსო“. — მისცა ეს წერილი შიკრიკს და გამოისტუმრა უკან.

დაბრუნებისას შიკრიკს ისევ დახვდა ის დევი გზაში, ისევ შეიპატიჟა შინ, ისევ დაათრო და დააძინა. ამოიღო ჯიბიდან უფლისწულის წერილი, დახია და მის ადგილზე ასეთი წერილი ჩაუდო: „ოქროსქორიანი ქალ-ვაჟი კი არა, ანგელოზებიც რომ ჰყავდეს, დედიანად კუბოში ჩააწვინეთ და გახურებულ საკირეში ჩაწვით. თუ ასე არ მოქცეულხართ, რომ დავბრუნდები, ორივეს დაგხოცავთ“.

შიკრიკმა მოუტანა ხელმწიფეს და დედოფალს ეს წერილი. იმათ, რა თქმა უნდა, შვილის მოწერილი ეგონათ და ძალიანაც შეწუხდნენ, არც შვილის წყენინება უნდოდათ და არც ის მშვენიერი შვილიშვილები და იმათი დედა ემეტებოდათ დასაწვავად. ტიროდნენ და ოხრავდნენ, მაგრამ მეტი გზა არ ჰქონდათ, შვილის დავალება უნდა აესრულებინათ.

გააკეთებინეს ხელმწიფემ და დედოფალმა კუბო, ჩააწვინეს შიგ რძალი და შვილიშვილები და საკირეც გაახურებინეს. და, ის იყო, უნდა ჩაეგდოთ კუბო საკირეში, რომ სად იყო, სად არა, უცბად შავრიტა რაში გაჩნდა. მან, რომ

გორც გულთმისანმა, წინასწარვე იგრძნო ბატრონის გასაჭირი, აიწყვიტა საბმური და ფრენით მოვარდა, დაავლო კუბოს პირი და გაიტაცა.

შაჰრიტა რაშმა სწრაფი სირბილით ატარა კუბო, ატარა და ერთ ტრიალ მინდორზე გაიტანა. აქ კუბო დადო, დაჰკრა ტორი, დაამტვრია და დედა-შვილები სათითაოდ ამოსხა. ქალი მოეხვია შაჰრიტა რაშს და თვალები დაუკოცნა.

შაჰრიტამ უთხრა ქალს:

— ახლა მე მოვკვდები, რადგან ჩემი აღსასრულის დღე მოვიდა, მაგრამ შენ არ შეგეშინდეს, მარტოს მაინც არ დაგტოვებ. როცა სულს დავლევ, შუაზე გამჭვრი, ჩემი მუცლიდან სამი კაცი, სამი ძალღი და სამი მამალი ამოვა და ჩემ მაგიერ სამსახურს ისინი გაგიწევენ. ჩემი ხორცი ძვლებიანად ასო-ასო დაჭერი, ნაჭრებისაგან ქოხი ააშენე, შიგ შედი და სამჯერ გაიმეორე: „ღმერთო და სამართალო, როგორი სახლიც მეკუთვნის, ისეთი დამიდგომ.

შაჰრიტა მოკვდა. ქალმა ბევრი იტირა. მერე გაჭრა შუაზე, მუცლიდან ჯერ სამი კაცი ამოხტა, მერე სამი ძალღი და სულ ბოლოს სამი მამალი. მერე ქალმა რაში ასო-ასო დაჭრა, გააკეთა ქოხი, შევიდა შიგ და, როგორც შაჰრიტამ დაარბია, სამჯერ ზედიზედ გაიმეორა:

— ღმერთო და სამართალო, როგორი სახლიც მეკუთვნის, ისეთი დამიდგომ.

ქოხის ადგილზე იმავე წამს ორსართულიანი სახლი წამოიჭიმა. ქალი შევიდა შიგ შვილებიანად და დაიწყო ცხოვრება. სამი კაცი ემსახურებოდა, ხოლო ძაღლები და მამლები ერთგულად დარაჯობდნენ.

ახლა დროა, უფლისწულიც გავიხსენოთ.

უფლისწულმა მტერი დაამარცხა და შინ გამარჯვებული დაბრუნდა, მაგრამ გამარჯვების სიხარული ცოლ-შვილის ამბის გაგებამ მოუწამლა, დამწუხრდა, დანალღელიანდა, აღარც თავი ახსოვდა, აღარც ქვეყნის საზრუნავი. ბოლოს დარდმა ისე დაიმორჩილა, რომ სახლში ვეღარ დადგა, აიღო რკინის ჯოხი, ფეხზეც რკინის ქალამნები ჩაიცვა, ტანი მათხოვრის კონკებით შეიმოსა და წავიდა ცოლ-შვილის საძებნელად.

ბევრი იარა თუ ცოტა იარა, ერთ დღეს სწორედ იმ მინდორზე გამოვიდა, სადაც იმისი ცოლი და შვილები ცხოვრობდნენ. ოქროსქორიანი ქალ-ვაჟი ამ დროს სახლის წინ თამაშობდნენ. უფლისწული მიუახლოვდა ბავშვებს და პური სთხოვა. ბავშვებმა მაშინვე დედასთან შეირბინეს და უთხრეს, ერთი მათხოვარი მოვიდა, ხელში რკინის ჯოხი უჭირავს, ფეხზე რკინის ქალამნები აცვია და პურსა თხოვლობსო. — დედამ უთხრა, აქ შემოიყვანეთო.

ბავშვებმა მათხოვარი სახლში შეიყვანეს. ისე იყო დადისაგან გატეხილი, რომ ცოლმა ვეღარ იცნო, ხოლო თვითონ ქალისთვის ერთხელაც არ შეუხედაია.

ქალმა გამოჰკითხა, ვინა ხარ, საიდან მოდიხარ, რად გაცვია რკინის ქალამნები? ან ეს მათხოვრის ტანსაცმელი რა არის? ხელი არ გაკლია, ფეხი და რა გიჭირს, რომ იმუშაო და შრომით იცხოვრო?

მაშინ უფლისწულმა ქალს თავისი თავგადასავალი უამბო: როგორ მიიღო მშობლების წერილი ომში, რა უპასუხა თვითონ, შავრიტა რაშის ომიდან გაპარვა, ყველაფერს დაწვრილებით მოუყვა და დაუმატა: — ომიდან რომ დავბრუნდი და ყველა ეს ამბავი გავიგე, გადავწყვიტე, სანამ ჩემს საყვარელ ცოლ-შვილს არ ვიპოვი, ასე ვიარო ქვეყნიდან ქვეყანაში. აი, ამიტომ დავხეტილობ ასე და ვიხეტილობ მანამდე, სანამ საწადელს არ ავასრულებო.

ქალი ყველაფერს მიხვდა და, სიხარულით გულათრთოლებულმა, ხმამაღლა წამოიძახა:

— სწორედ მე ვარ ის ქალი, ვისაც შენ დაეძებ, და ეს ოქროსქორიანი ქალ-ვაჟიც შენი შვილებია. ჩვენ საკირეშო დაწვას გვიპირებდნენ და ჩემმა შავრიტამ გადაგვარჩინაო.

ახლა კი შეხედა უფლისწულმა ქალს, იცნო თავისი ცოლი და ცოლ-ქმარი სიხარულით გადაეხვივნენ ერთმანეთს.

კოცნა-ალერსით რომ გული იჯერეს, ქალმაც დაწვრილებით უამბო თავისი თავგადასავალი. მერე მსახურებმა უფლისწულს სამეფო ტანსაცმელი მოუტანეს, შავრიტა რაშის მუცლიდან ამოსული კაცები გრძნეულები იყვნენ და ყველაფრის შოვნა შეეძლოთ. მალე შეკაზმული ცხენებიც გააჩინეს. შესხდნენ უფლისწული და მისი ცოლ-შვილი ცხენებზე, მსა-


ხური კაცები, ძაღლები და მამლებიც თან წაიყვანეს და მოვიდნენ თავიანთ ქვეყანაში.

ხელმწიფე და დედოფალი ცას ეწივნენ სიხარულით, შვილი რომ უვნებელი დაუბრუნდათ და თან დაკარგული ცოლ-შვილიც მოიყვანა. უფლისწულმა იმავე დღეს გადაიბარა სახელმწიფო საქმეები, სიმამრიც თავის სახლში გადმოიყვანა და პირველი ვეზირის ადგილი უბოძა. ამ დღიდან კვლავ ტკბილი და მშვიდობიანი ცხოვრება დაიწყო და ყველა გადატანილი დარდი და წუხილი სამუდამოდ დაივიწყეს.

ჭირი — იქა, ლხინი — აქა,

ქატო — იქა, ფქვილი — აქა.





## ცხრა ძმა და ერთი და

იყო და არა იყო რა, ღვთის უკეთესი რა იქნებოდა, იყო ერთი ცოლ-ქმარი და ჰყავდათ ცხრა შვილი. ცხრავე ვაჟი. ძმები სულ სანადიროდ დადიოდნენ და თავსაც და დედ-მამასაც იმით არჩენდნენ.

ერთხელაც, როცა მათი დედა მეათე შვილზე ფეხმძიმედ იყო, ძმები, ჩვეულებრივ, სანადიროდ გაემგზავრნენ და წასვლის წინ დედას უთხრეს: „თუ ქალი გაგიჩნდეს, ჩვენი დაბრუნების დროს ბანზე ჯარა გადმოდგი, ხოლო თუ ისევ ბიჭი გეყოლა — უღელიო.“

დედა დაჰპირდა, ეგრე ვიზამო და ძმებიც გზას გაუდგნენ.

დედას მართლაც ქალი გაუჩნდა და, როგორც შეჰპირდა შვილებს, ბანზე ჯარა გადმოდგა, მაგრამ ერთმა მეზობლის დედაბურმა უმტრო და, როცა ძმების სანადიროდან დაბრუნების დრომ მოაწია, ჯარა გადამალა და მის მაგიერ უღელი დააყუდა.

დაბრუნდნენ ძმები სანადიროდან და რას ხედავენ — ბანზე უღელი აყუდია. ჩვენს დედას ისევ ვაჟი გასჩენიაო, თქვენს და სახლამდეც აღარ მისულან, ეგრევე გაბრუნდნენ უკან და გადაიკარგნენ.

გავიდა რამდენიმე წელიწადი, ქალი წამოიზარდა და თანატოლებში თამაში დაიწყო, მაგრამ ძმები თუ ჰყავდა, ეს არ იცოდა: ერთხელ, თამაშის დროს ერთი თანატოლი გოგონა პატირა, გოგონას დედა გამოესარჩლა და წყევლა-კრულვით

წაყვედრა: შე სამიწევ, ის არ გეყო, რომ შენი გულითვის შენმა ცხრა ძმამ სახლ-კარი მიატოვა და უგზოუკვლოდ გადაიკარგნენ, ახლა კიდევ სხვებსაც არ აწუხებდეთ.

ქალს ეს სიტყვები გულში ჩარჩა და შინ რომ მივიდა, დედას ჰკითხა:

— მითხარი, მართლა მყავს ძმები თუ არაო?

დედა ჯერ უარზე დადგა, — რის ძმები, რა ძმები, ვინ გითხრაო, — მაგრამ გოგო არ მოეშვა და ათქმევინა.

— მართალია, შეილო, — უთხრა ბოლოს დედამ, — ცხრა ძმა გყავდა. ისინი სულ სანადიროდ დადიოდნენ და უხვი ნანადირევიც მოჰქონდათ. შენზე ორსულად რომ ვიყავი, ჩვეულებრივ წავიდნენ სანადიროდ და ასე დამიბარეს, თუ ისევ ვაყი გეყოლოს, ბანზე უღელი გადმოჰყუდე, თუ ქალი — ჯარაო. შენ რომ გამიჩნდი, მაშინვე ჯარა გამოვდგი, მაგრამ ერთმა სულკრულმა ბებერმა მიმტრო, ჯარა აიღო და უღელი დააყუდა. შენმა ძმებმა, ეტყობა, ჯარას შაგიერ ბანზე უღელი რომ დაინახეს, ეწყინათ, და შინაც აღარ მოსულან. იმ დღიდან მათი ასავალ-დასავლისა აღარაფერი გამიგია და არც ის ვიცი, ცოცხლები არიან, თუ მკვდრებიო.

— მაშ მე ქალი ნუ ვყოფილვარ, თუ ძმები არ ვიპოვო, — თქვა ქალმა, ჩაიცვა ტანისამოსი, მოიმზადა საგზალი და გაუდგა გზას. ბევრი იარა თუ ცოტა იარა, ბოლოს ერთ უღრან ტყეში შევიდა. ტყეში ერთ ქოხს წააწყდა, მაგრამ არც ახლომასლო და არც შიგნით კაცის ჭაჭანება არ ჩანდა. ოღონდ ქოხი საგულდაგულოდ იყო დაგვილ-დალაგებული და კერაზე ცეცხლიც ბუუტავდა. ქალი ამით მიხვდა, რომ ქოხს პატრონი და ბინადარი უნდა ჰყოლოდა, ჩუმად მისი ვინაობის გაგება გადაწყვიტა და კუთხეში აკოკლილი ირმის ტყავების უკან დაიმალა.

დაბნელდა თუ არა, ქოხში ცხრა ვაჟკაცი შემოვიდა და თან ნანადირევი შემოიტანეს. ეტყობოდა, ძმები უნდა ყოფილიყვნენ, რადგან სახით ძალიან ჰგავდნენ ერთმანეთს და ხნოვანებითაც ერთიმეორის მიმყოლები ჩანდნენ. ქალმა ისაზრა, რომ ესენი სწორედ მისი ძმები უნდა ყოფილიყვნენ, მაგრამ ვარაუდს ჰაიპარად ვერ ენდო და დრომდე დამალვა ამჯობინა.

ძმებმა ცეცხლი გააჩაღეს, მწვადები შეიწვეს, ივანშემს და დასაძინებლად ირმის ტყავებში გაეხვივნენ. ხოლო გათენებისას ისევ სანადიროდ წავიდნენ.

ქალი გამოვიდა საფარიდან, მწვადის ნარჩენებით ისაუზმა და ქოხის დალაგებას შეუდგა — დაგავა, დარეცხა, ყველაფერს ქალის ხელი დაატყო, ბოლოს დარჩენილი ნანადირევი ხორცისაგან საჭმელი გააკეთა და კვლავ ტყავებს უკან დაიმალა.

ძმები ჩვეულებრივ საღამოს დაბრუნდნენ ნადირობიდან და თავიანთი ქოხი რომ ასეთი სასეშეცვლილი — დაგვილდაკრიალებული ნახეს და თან საჭმელიც უკვე გამზადებული დახვდათ, დიდად გაოცდნენ, გაუხარდათ კიდეც, რომ ამ მიყურებულ, ულრან ტყეში მზრუნველი და გულშემატკივარი გამოუჩნდათ. ჩუმად მოითათბირეს, ქალია თუ კაცი, როგორმე უნდა ვნახოთ და გავიცნოთო.

და აი, როცა მეორე დილით კვლავ სანადიროდ გაემგზავრნენ, ორი უმცროსი ძმა ქოხის ახლოს დამალეს და ჩუმად თვალთვალი დაავალეს.

ძმებმა ერთხანს იცადეს საფარში, მერე, როცა დაატყვეს, ახლა კი დროაო, საფარიდან ფრთხილად გამოვიდნენ, ასეთივე სიფრთხილით მიუახლოვდნენ ქოხს, სწრაფად შეცვივნენ შიგა და ქალს სწორედ მაშინ სტაცეს ხელი, როცა ცოცხლმომარჯვებული ქოხის დალაგებას აპირებდა. დაამშვიდეს და გამოკითხვა დაუწყეს, ვინა ხარ, ამ ტყეში საიდან გაჩნდი, ან რა გასაჭირმა მოგიყვანაო? ქალმა ყველაფერი უამბო, რაც დედისაგან ჰქონდა გაგონილი. ვაყები მიხვდნენ, რომ ეს ქალი იმათი და იყო და უზომოდ გაიხარეს, თავის მხრივ თავიანთი თავგადასავალი უამბეს და დაც გაახარეს. საღამოს დანარჩენი ძმებიც დაბრუნდნენ და დას გადაეხვივნენ, მერე სიხარულით ივანშემს და დაიძინეს.

დაიწყეს ამ დღიდან და-ძმებმა ერთად ცხოვრება. ძმები ღლისით ჩვეულებრივ სანადიროდ მიდიოდნენ და ნანადირევი მოჰქონდათ, ქალი შინ ტრიალებდა, ქოხს უვლიდა, ძმებს ვახშამს ახვედრებდა. ძმები უზომოდ კმაყოფილნი იყვნენ თავიანთი დისა, ოღონდ ყოველი წასვლისას აფრთხილებდნენ, ცეცხლს გაუფრთხილდი, არ გაგიქრეს, თორემ



ძნელი საშოვარიანო. დაც ყოველნაირად ფრთხილობდა და ცხოვრობდნენ ტკბილად და უზრუნველად.

მაგრამ ერთ დღეს ქალს ცეცხლი გაუქრა. ეზო-კარმიდამოს დაგვა-მოწესრიგებას ხანგრძლივად შემორჩა და ცეცხლს ველარ მიხედა. ქალმა ბევრი იტირა და ივაგლახა, რა ეუთხრა ძმებს, რა პასუხი გავცე და ან საჭმელი რაღაზე გავაკეთოთ, მაგრამ ტირილით წამხდარ საქმეს ველარაფერი უშველა. სხვა გზა არ იყო, რაღაც უნდა ელონა, რომ ძმების საყვედური აეცდინა.

ბოლოს ადგა, ქოხის სახურავზე ავიდა და გაიხედ-გამოიხედა, იქნებ სადმე ცეცხლი დავინახოთ. მართლაც შორს, ტყიანი ქედის იქით, ცაში ასული კვამლის სვეტი დაინახა. ქალი სინარულით ცას ეწია და იმავ წამს კვამლის მიმართულებით წავიდა.

იარა ქალმა, იარა, მთა გადაიარა და ტყეში ერთ ქოსს მიადგა. კვამლი სწორედ ამ ქოხის საკვამურიდან ამოდიოდა. ქოხში ერთი დედაბერი დახვდა. დედაბერი კერასთან იჯდა, თითისტარს უკუღმა ატრიალებდა და ბაწარს ართავდა. ეს დედაბერი დევის დედა იყო. ქალი რომ დაინახა, სიმსუნაგისაგან კბილები აუკაწკაწდა — ეს რა გემრიელი ღუკმა მეწვიაო, მაგრამ სანამ შეჭმას დაუბირებდა, ქალმა დაასწრო და ცეცხლი სთხოვა.

— დედავ, დედაშვილობას, ცეცხლი გამიქრა და მომეციო.

— დედაშვილობის თქმა არ დაგესწრო, ნახავდი, რა ცეცხლსაც მოგცემდიო, — უთხრა დედაბერმა, მაგრამ ცეცხლი მაინც მისცა — ცხრილში ნაცარი ჩაუყარა, ზედ ნაკვერჩხალი დაუდო და გაატანა, თან დაარბია, აი შვილო, ამ ცხრილიდან გზადაგზა ნაცარი ნელ-ნელა დაიბნევა და მერედ რომ გაგიქრეს ცეცხლი, ამდენს აღარ იწვალე, ნაცარს გამოჰყვები და პირდაპირ ჩემ ქოხთან მოხვალო.

წამოვიდა ქალი გახარებული, მოდის და მოიქნევს ცხრილს, უკან ნაცრის რუხი ზოლი მოსდევს. მოვიდა შინ, დაანთო კერა და ძმების დაბრუნებამდე საჭმლის გაკეთებას შეუდგა.

ამ დროს დედაბრის შვილი — დევიც დაბრუნდა შინ,

ქოხში შესვლისთანავე იგრძნო ქალის სუნი და დედას ჰკითხა:

— დედი, ადამიანის სუნი მცემს და მითხარი, ჩვენსაგინ იყო?

დედამ ყველაფერი უამბო, ბოლოს დასძინა:

— თუ იმ ქალის ნასვა გსურს, ნაცრის ზოლს გაჰყევი და ბირდაპირ იმის ბინასთან მიგიყვანსო.

წამოვიდა დევი. მიადგა ქალის ქოხს და კარზე დაუკაკუნა.

— ქალო, კარი გამიღეო.

ქალმა კარი არ გაუღო და შიგნიდან გამოძახა:

— წადი აქედან, დაიკარგე, თორემ ჩემი ძმები მოვლენ და მოგკლავენო.

— მაშინ ხელი გამოყავი, — უთხრა დევმა, — თორემ შენი ძმების მოსვლამდე ამ ქოხს დაუანგრევ და შენც მოგიტაცებო.

ქალს შეეშინდა და ნეკა თითი გაყო კარის ღრიჭოში, დევმა ჩაიდო ბირში თითი და წოვა დაუწყო.

ამ დღიდან დევი ყოველდღე მოდიოდა ქალთან, გამოაყოფინებდა თითს ღრიჭოში და უწოვდა. ქალს თანდათან სისხლი გაუშრა, ჩამოხმა, გახდა, გაყვითლდა. ძმებმა ეს შეამჩნიეს და ჰკითხეს:

— დაო, რატომ არ გვეტყვი, რა არის შენს თავს, რომ ასე ჩამოხში და დაილიეო?

და გამოუტყდა, უამბო ყველაფერი, როგორ გაუქრა ცეცხლი, როგორ წავიდა საძებრად, როგორ მივიდა დევის დედასთან და წამოიღო ცეცხლი. მერე როგორ მოჰყვა დევი ნაცრის ნაკვალევს და დაუწყო თითს წოვა.

— ის დღე იყო და, დევი ველარ მოვიცილე, — უთხრა ბოლოს, — მოდის ყოველდღე და ასე მწოვს სისხლსო.

ძმები ძალიან შეწუხდნენ და მეორე დღეს სანადიროდ აღარ წასულან — დევს დაუდარაჯდნენ. შუალამემ რომ მოაწია, დევიც მოვიდა და ქალს დაუძახა, ნეკი გამოყავიო. გამოუცვივდნენ ძმები, დევი ხმლებით აკუწეს და ქოხსუკან ხაროში ჩაყარეს. მერე და გააფრთხილეს, ამის შემდეგ მაინც ეცადე, რომ ცეცხლი აღარ გაგიქრესო, და თვითონ ისევ სანადიროდ წავიდნენ.

გამოხდა ხანი და ქალს ისევ ჩაუქრა ცეცხლი. ისევ წავი-

და დევის დედასთან ცეცხლის სათხოვნელად და კარებიდან შესძახა:

— დედავ, დედაშვილობას, ისევ გამიქრა ცეცხლი და მომეცო.

დედაბერმაც მაშინდელივით უპასუხა:

— დედაშვილობა არ გეთქვა, მე ვიცოდი, როგორ ცეცხლსაც მოგცემდიო. მისცა ცეცხლი და თან ერთი მუჭა ქინძის თესლიც გაატანა, — ეს თესლი ქოხის უკან რომ ხარო გაქვთ, იქ დათესეო, — უთხრა, — სალამოზე შენი ძმები რომ ნანადირევს მოხარშავენ, ქინძი მოკრიფე და ხორცზე დააჭერი, უფრო გემრიელი გამოვა და შენს ძმებს გაუხარდებათო.

ქალმა დაიჯერა დედაბრის სიტყვა, შინ მისვლისთანავე ქინძის თესლი ქოხსუკან ხაროზე მოაბნია. სალამოსთვის მთელი ხარო ქორთა, სურნელოვანი ქინძით გადაიპენტა. სალამოს ძმებიც მოვიდნენ და მოიტანეს ირემი. როცა ირემი მოხარშეს და ვაწმმად დასხდნენ, ქალი გამოვიდა, მოკრიფა ქინძი და ხორცზე მოაყარა.

შეჭამეს თუ არა ძმებმა ქინძმოყრილი ხორცი, იმავე წამს ირმებად გადაიქცნენ და ქოხიდან ფხაჭა-გლეჯით გაცვივდნენ. ქალმა მხოლოდ უმცროსი ძმა-ირმის დაჭერაღა მოასწრო, დანარჩენებისა კი ასავალ-დასავალიც ვერ გაიგო.

დარჩა ამ დღიდან ქალი ტყეში ერთადერთი ძმა-ირმის ანაბარა, სადაც წავიდოდა — წყალზე თუ ხილ-კენკრის შესაგროვებლად, თავისი ირმადქცეული ძმაც თან დაჰყავდა, თან სულ ეფერებოდა, ტიროდა და თავ-კისერს ცრემლით უსველებდა.

ერთხელ ამ ტყეში ერთი ხელმწიფის შვილი ნადირობდა, დაინახა ირემი და ისარი დაუმიზნა, მაგრამ სანამ ესროდა, ქალმა თვალი შეასწრო, ირემს ჩამოეფარა და ხელმწიფის შვილს შეეხვეწა:

— ნუ ესვრი, ჩემი ძმა არის, ნუ მომიკლავო.

ხელმწიფის შვილს ქალი ისე მოეწონა, რომ მაშინვე მისი ცოლად მოყვანა გადაწყვიტა და თავის ძმა-ირმიანად სასახლეში წაიყვანა. ქალი მეფესა და დედოფალსაც ძალიან მოეწონათ, შვილს ნება დართეს და კაი ქორწილიც გადაუსადგინეს.

ხელმწიფის შვილი ერთ მეზობელ ხელმწიფის ქალზე იყო დანიშნული. ამ ქალმა თავისი საქმროს ღალატი რომ გაიგო გულში ჯავრი ჩაიდო და გადაწყვიტა, ახალი პატარძალი როგორმე ჩამოეშორებინა ხელმწიფის შვილისათვის და მისი ადგილი თვითონ დაეჭირა. ამ განზრახვით გაიცნო ქალი, დაუასლოვდა და ერთ მშვენიერ დღეს ქალაქგარეთ გასეირნებაზეც დაითანხმა.

ქალაქს გვერდით დიდი მდინარე ჩამოუდიოდა, მდინარის პირას რომ მივიდნენ, მეზობელი ხელმწიფის ქალმა უთხრა, აბა, კაბები გავიხადოთ და წყალში ისე ჩავიხედოთ, რომელს უფრო ლამაზი ტანი გვაქვსო.

გაიხადეს ორივემ და მიდგნენ მდინარის პირას. უცბად ამ მოღალატე ქალმა ირმის დას ხელი ჰკრა და მდინარეში გადააგდო. თვითონ იმისი ტანისამოსი ჩაიცვა და ხელმწიფის შვილთან წავიდა. რაკი ცოლის ტანსაცმელი ეცვა, ხელმწიფის შვილმაც ვერაფერი შეატყო.

დის დაღუპვა მხოლოდ ძმა-ირემმა გაიგო. დაიწყო აქეთ-იქით სირბილი და ბლავილით მთელი ეზო აიკლო.

ხელმწიფის შვილის ახალი ცოლი შეშინდა, ემანდ ეჭვი არ აიღონო, მოიავადმყოფა თავი და ქმარს უთხრა, თუ ირემს დაჰკლავ და მაგის გულ-ღვიძლს მაჭმევ, მოვრჩები, თუ არა და მოკვდებიო.

ხელმწიფის შვილს ძალიან გაუკვირდა ცოლის ნათქვამი და ჰკითხა:

— ქალო, რა მოგივიდა, აქამდე სულ ზედ დაჰკანკალედი ირემს და სხვებსაც იმას ემუდარებოდი, კარგად მოუარეთო, ახლა რაღა მოგეჩვენა, რომ სასიკვდილოდ იმეტებო?

— რა ვქნა, — უთხრა ქალმა თავმოკატუნებით, — აქამდე წყნარად იყო, არავის აწუხებდა, ახლა კი ისე ბლავის და ღრიალებს, რომ მაგისაგან მოსვენება არა მაქვსო.

რაღა უნდა ეთქვა ქმარს? მზარეულებს უბრძანა, ირემი დაკალით და საჩქაროდ გულ-ღვიძლი შეწვითო.

ირემი მიხვდა, რომ დაკვლას უპირებდნენ და უარესად გახელდა. მოჰყვა აქეთ-იქით სირბილს — სახლიდან მდინარემდე და მდინარიდან სახლამდე.

იმდენი ირბინა წინ და უკან გაუჩერებლად, რომ ხელ-

მწიფის შვილი ბოლოს ეჭვში ჩავარდა და ირემს მსახურები დაადევნა, ერთი ნახეთ სად დარბის და რას აკეთებსო.

გაპყვნენ მსახურები ირემს და ნახეს, რომ ჩერდება მდინარის ბირას და წყალში ჩასძახის:

„დაო, დაო, დაუნაო,  
პირწითელა ვაშლაო  
აქ გიკლავენ ძმასაო,  
ულესავენ ხმალსაო,  
უდულებენ წყალსაო!“

ახლა საპასუხოდ წყლიდან ვილაცამ ამოსძახა:

„წადი, უთხარ ქმარსაო,  
ნუ გალესავს ხმალსაო,  
ნურც ადულებს წყალსაო,  
ნურც შენ მოგჭრის თავსაო“.

წამოვიდნენ მსახურები და რაც ნახეს და გაიგონეს, ხელმწიფის შვილს მოახსენეს. ხელმწიფის შვილი მაინც ვერაფერს მიხვდა და ცოლის სურვილი აასრულა — ირემი დაკლა და გულ-ღვიძლი მიართვა, სოლო მდინარეზე მებადურები გაგზავნა, — სადაც იყოს და არ იყოს, ის მოლაპარაკე სულიერი დაიჭირეთ და აქ მომგვარეთო.

მებადურებმა ისროლეს ბადე და ქალი-სირინოზი დაიჭირეს, წამოიყვანეს და მოუყვანეს ხელმწიფის შვილს. ხელმწიფის შვილს ისე მოეწონა ეს უცნაური თევზ-ქალი, რომ მისთვის საგანგებო მარმარილოს აუზი ააშენებინა და შიგ ჩასვა. თვითონაც გვერდით მოუჯდა და მთელ დღეებს იმის აღერსსა და ფერებაში ატარებდა.

მოიავადმყოფა ისევ დედოფალმა თავი და აიჩემა: თუ დაკლავთ იმ თევზ-ქალს და მაჭმევთ, მოერჩები, თუ არადა მოვკვდებიო. ძალიან შეწუხდა ხელმწიფის შვილი, მაგრამ მეტი რა ჩარა ჰქონდა, ცოლის სიკვდილს ისევ თევზის დაკვლა ერჩინა და მსახურებს უბრძანა, დაკალით და მოხარშეთო.

— ისე მოხარშეთ და მომიტანეთ, რომ ერთი ფხაც არსად გადავარდესო, — ბრძანა დედოფალმა, მაგრამ ერთ-ერთ მზარეულს ერთი ფხა მაინც გადაუვარდა და ეზოში დაეცა. მალე თევზის ფხაზე ისეთი ალვის ხე ამოიზარდა, რომ წვერიცას მიაბჯინა. ხელმწიფის შვილს ალვის ხეც ძალიან მოეწონა, ხის ქვეშ ტახტი დაადგმევინა და სიცხიან დღეებში სულ იმის ჩრდილში ისვენებდა.

ისევ მოიავადმყოფა თავი დედოფალმა და ახლა ალვის ხის მოჭრა დაიჩემა: თუ მაგის ფიცრის საწოლს გამიკეთებთ, მოვრჩები, თუ არადა — მოკვდებით.

შეწუხდა ფრიად ხელმწიფის შვილი, — როგორ უნდა გავიმეტო ეს ლამაზი ხე მოსაჭრელადო, — მაგრამ რა ექნა, ცოლს სასიკვდილოდ ხომ ვერ გასწირავდა, უბრძანა მსახურებს, მოსჭერით და ფიცრებად გათაღეთო.

— ოღონდ ისე მოჭერით, რომ ერთი ნაფოტიც არსად გადავარდესო, — ბრძანა დედოფალმა, მაგრამ მსახურებმა დედოფლის სურვილი ვერც ამჯერად აასრულეს, სწორედ მაშინ, როცა უკანასკნელი სანაფოტეც მიაჭრეს და ხე საცაა უნდა წაქცეულიყო, უცბად ძლიერმა ქარმა წამოუბერა და ერთი ნაფოტი სადღაც ქალაქის ბოლოს გაიტაცა. ამ დროს ერთი დედაბერი ლოცვიდან მოდიოდა, იპოვა ნაფოტი, მოეწონა და შინ წამოიღო, — ქოთანს დავაფარებო.

მეორე დღეს დედაბერი რომ ლოცვაზე წავიდა, იქცა ნაფოტი ქალად, დაგავა სახლი, დაწმინდა-დარეცხა ჭურჭელი, მოხარშა შეჭამანდი, მიაღაგ-მოალაგა ყველაფერი და ნაფოტადქცეული ისევ ქოთანს დაეფარა.

მოვიდა შინ დედაბერი და ყველაფერი გაკეთებული რომ დახვდა, გაკვირვებისაგან პირი დაადო. გავიდა, ჰკითხა მეზობლებს, — ვინ მიყავით ეს სიკეთეო? — მაგრამ მეზობლებმა უარი უთხრეს, — ჩვენ ჩვენს ოჯახებს ვერ ავუღივართ და შენთვის სადა გვცალიათო.

მიხვდა დედაბერი, რომ აქ რაღაც საიდუმლო იმალებოდა, და გულში გადაწყვიტა, უნდა ვუდარაჯო და გავიგოო.

მეორე დღეს დედაბერი რომ სალოცავად წავიდა, ნაფოტი იმავე წამს ქალად იქცა და სახლის დაგვა-დალაგებას შეუდგა, მაგრამ დედაბერი საყდრამდე აღარ მისულა, შუა გზით

დან უკანვე დაბრუნდა და ქალს შინ შეუსწრო. დაიჭირა და ბკითხა:

— ვინა ხარ, რა სულიერი ხარ, რომ ჩემს სახლში შემო-  
სულხარ და შინაურივით იქცევიო?

— ადამიანი ვარ, ადამიანის შვილი, შემებრალე და მი-  
შეეღეო, — შეეხვეწა ქალი.

დედაბერს ქალი ძალიან მოეწონა და იშვილა, მაინც მარ-  
ტოხელა ვარ და ჩემი შვილი იყავიო. დაიწყეს ქალმა და დე-  
დაბერმა ერთად ცხოვრება. იმ წელიწადს დიდი გვალვა დაი-  
ჭირა, უბალახობა იყო და ხელმწიფის შვილს მთელი ჯოგი  
ისე გაუწყდა, რომ თავისი საყვარელი ცხენის მეტი აღარა-  
ფერი შერჩა, მაგრამ ისიც მომაკვდავი და გაძვალტყავებუ-  
ლი. ქალმა უთხრა დედობილს:

— წადი ხელმწიფიანთსა და ის ერთადერთი ცხენი გა-  
მოართვი, ცოცხალი რომ შემორჩათ, წამოიყვანე და გაეასუ-  
ქოთ, იქნებ ხელმწიფის შვილმა სიკეთე დაინახოს და რამე  
გვიწყალობოსო.

— რით გავასუქოთ, შვილო, როცა ბალახის ჭაჭანება  
არსად არისო, — უთხრა დედაბერმა.

— შენ მოიყვანე და დანარჩენი მე ვიციო, — დაამედა  
ქალმა.

წავიდა დედაბერი, გამოსთხოვა ხელმწიფის შვილს შიმა-  
შილისაგან გასავათებული ცხენი და მოუყვანა თავის შვი-  
ლობილს. დაიბანა ქალმა ხელები, ნაბანი მინდორში მიასს-  
მოასხა და ისეთი ბალახი ამოვიდა, რომ კაცი შიგ დაიმალე-  
ბოდა. გაუშვა ქალმა ცხენი ამ ბალახში და ერთ თვეში გა-  
ასუქა. დარბის გათქვირებული ცხენი, დგება ყალყზე და და-  
ჭიხვინობს. ქალმა უთხრა დედობილს:

— ახლა წადი და უთხარი ხელმწიფის შვილს, ვეზირები  
გამოგზავნოს და თავისი ცხენი ჩაიბაროსო.

წავიდა დედაბერი და მოახსენა ხელმწიფის შვილს ქალის  
დანაბარები. ხელმწიფის შვილმა გამოგზავნა ვეზირები,  
ქალმა დაიჭირა ცხენი; ხელმწიფის კარზე რომ მიგიყვანენ,  
დაწეპი და რამდენიც გინდა გცემონ, არ ადგე, სანამ მე არ  
მოვალ და არ გეტყვი, ადექი, შე პატრონივით მუხანა-  
თოო, — დაარბია და ვეზირებს გადასცა.

ცხენია, რომ სულ ვარსკვლავებს ეთამაშება. წამოიყვანეს გახარებულმა ვეზირებმა და მოიყვანეს სასახლეში. შეიყვანეს თუ არა ეზოში, ცხენი ჩაწვა და ძვრა აღარ ქნა. ბევრი სცემეს, უსტვინეს, უწრუწუნეს, მაგრამ არა და არა დაიბარა ხელმწიფის შვილმა დედაბერი და ჰკითხა, — რა მიზეზია, რომ ცხენი ფესზე არა დგებაო?

— დიდებულო ხელმწიფე, — მოახსენა დედაბერმა, — მე მაგისი არაფერი ვიცი, ერთი ნაშეილები ქალი მყავს, ეს ცხენი იმან გაასუქა და მიზეზიც თვითონვე ეცოდინებაო.

— ახლავე აქ მომგვარეთ ის ქალიო — ბრძანა ხელმწიფის შვილმა.

მოვიდა ქალი და ცხენს ერთი მაგრად დასჭყივლა:

— ადექი, შე პატრონივით მუხანათო!

ცხენი მაშინვე ფესზე წამოხტა და ძველებურად შეითამაშა.

ხელმწიფის შვილს ძალიან გაუკვირდა ქალის ნათქვამი და ჰკითხა:

— რად დაუძახე ჩემს ცხენს, პატრონივით მუხანათო? რატომ ვარ მე მუხანათიო?

ამ ქალმა ყველაფერი უამბო. ახლა კი გაიგო ხელმწიფის შვილმა, როგორც იყო საქმე და ქალზე ხელახლა ჯვარი დაიწერა, ხოლო ის ძალად დედოფალი მეზობელი ხელმწიფის ქალი კი ცხენის ძუას გამოაბა და სულ ლუკმა-ლუკმად დააგლეჯინა.

ჭირი — იქა, ლხინი — აქა,

ქატო — იქა, ფქვილი — აქა.







## ადისანჯალა

იყო და არა იყო რა, ღვთის უკეთესი რა იქნებოდა. იყო უშვილო ცოლ-ქმარი. ღმერთს სულ იმას ევედრებოდნენ, შვილი გვადირსეო. ერთ ღამეს ცოლს სიზმარში თეთრწვერა მოხუცი გამოეცხადა და უთხრა:

— შვილი გეყოლება, მაგრამ მისი გაჩენისთანავე მოკვდებიო.

— უშვილო ქალის სიცოცხლე, რა სიცოცხლეაო, — უთხრა ქალმა, — ოღონდ შვილი მედირსოს და ჩემი თავი მისი ჭირის სანაცვლო იყოსო.

მართლაც, დაორსულდა ცოლი და ცხრა თვის შემდეგ ბიჭი გააჩინა. ბიჭს ადისანჯალა დაარქვეს, რადგან დედის მუცლიდან ვერცხლით შეჭედილი ქამარ-ხანჯალი გამოჰყვა.

დედა შვილის გაჩენისთანავე გარდაიცვალა და ბავშვს მარტო მამა ზრდიდა. ადისანჯალა ძალიან სწრაფად იზრდებოდა — ერთი კვირის ათი თვისას ჰგავდა, ხოლო ერთი თვისა — ათი წლისას. ბიჭი კარგად რომ მოჩრჩხვდა, მამამ სხვა ცოლი მოიყვანა. დედინაცვალმა მოსვლის დღიდანვე ამოიჩემა გური და იმდენი აწამა, იმდენი, რომ ბავშვი ბოლოს სახლიდან გაიპარა.

დადიოდა ტყე-ღრეში, ნადირობდა და თავს იმით ირჩენდა. ამასობაში დავაჟუკაცდა კიდეც: ერთხელაც მინდორში გამოვიდა და ერთი თავისი ტოლი ბიჭი დაინახა. დიდი ხანი იყო, ადამიანი აღარ ენახა, გაუხარდა ბიჭის დანახვა და მაშინვე მასთან მიიბრინა. ის ბიჭიც ადისანჯალასავით დედინაცვალს გამოჰქცევოდა. ერთმანეთს გაეცნენ, დაძმობილდნენ და გაუდგნენ გზას.

იარეს, იარეს და გზაზე კიდევ ერთ თავიანთ ტოლ ბიჭს წამოეწივნენ. ეს ბიჭიც მათ ბედში აღმოჩნდა. დედინაცვლისთვის ველარ გაეძლო და სახლიდან გამოქცეულიყო, გულმა გული იცნო, ეს მესამე ბიჭიც ძმად გაიფიცეს და წავიდნენ სამნი.

ერთ ადგილას დაისვენეს და ადიხანჯალამ უთხრა ძმობილებს:

— ჩვენ ახლა უკვე ღვიძლი ძმები ვართ, ერთიმეორის გარდა არც პატრონი გაგვარჩნია, არც — ახლობელი. მოდით, გავანდოთ ერთმანეთს, გაჭირვებაში ვინ რისი შემძლე ვართ და ერთმანეთს რითი დავეხმარებითო.

პირველად რომ შესვდა ადიხანჯალას, იმ ბიჭმა თქვა:

— მე ის შემიძლია, რომ თუ რომელიმეს რაიმე გაგიჭირდებათ, ცხრა მთას იქითაც რომ იყოთ, იმავ წამს გავიგებო.

— მე ის შემიძლია, — თქვა მეორემ, — რომ დაკარგულს, სადაც არ უნდა იყოს იგი, აუცილებლად ვიპოვი, და თუ რომელიმე რამეს დაკარგავთ, არ შეწუხდეთ, მე აქა ვარო.

მამინ ადიხანჯალამ უთხრა:

— სანამ ჩემი ხანჯალი წელზე მექნება, ჩემი მორევა და დამარცხება ცხრათავიანი დევების ლაშქარსაც არ შეუძლიაო.

ადგნენ და გაუდგნენ გზას. ბევრი იარეს, თუ ცოტა, ბოლოს ერთ ქალაქში შევიდნენ. ძალიან ლამაზი და მდიდარი ქალაქი იყო, სავაჭროები გაჭედილი იყო საქონლით — ფარჩა-აბრეშუმითა და თვალმარგალიტით, მაგრამ საოცარი ის იყო, რომ არც ქუჩებში და არც სახლებში კაცის ჭაჭანება არ ჩანდა. ადიხანჯალამ უთხრა ძმობილებს:

— თქვენ აქ დამიცადეთ, მე ქალაქში გავივლი, იქნებ ვინმე ვნახო და ამ სიცარიელის მიზეზი გავიგოო.

გავიდა ადიხანჯალა ქალაქში, იარა აქეთ-იქით, მთელი ქალაქი შემოიარა, მაგრამ კაციშვილი ვერსად დალანდა. ბოლოს ქალაქის შუაგულში ერთი მარმარილოს სასახლე დაინახა და ბირდაპირ იქითკენ წავიდა. სასახლეს სულ რკინის გალავანი ერტყა, ჭიშკარიც რკინისა ჰქონდა შიგნიდან ურდულით დაკეტილი. ადიხანჯალამ ამოაძრო თავისი ჯადოს-

ჭური ხანჯალი, ერთი დაკვირით ჩამოჭრა ჭიშკარი და შევიდა გალავანში.

ხმაურზე სასახლის ერთ-ერთი სარკმლიდან ერთმა მზეთა უნახავმა ქალმა გამოიხედა, მოეწონა ადიხანჯალა და ჩა მოსძახა:

— აქ სამთავიანნი დევის შიშით ძირს ჭიანჭველას ვერ გაუვლია, მალლა ფრინველს და შენ როგორ მობედე მოსვლა? კარგი ჭაბუკი ხარ, ჩქარა წადი, თორემ დევი მოვა და მოგკლავსო!

— მე ვარ და, მოვბედეო! — უპასუხა ადიხანჯალამ. — ჯერ მოვიდეს ის სამთავიანი დევი და ვინ ვის მოჰკლავს, მაგასაც დაინახავო.

ქალი კიდევ ბევრს ეხვეწა, — გაერიდო, მაგრამ ადიხანჯალამ ადგილიდან ფეხიც არ მოიცივალა. მალე დევიც მოვიდა. დაინახა აკუწული ჭიშკარი და ღრიალით გამოექანა ადიხანჯალასაკენ. ეცნენ ერთმანეთს და გაუდით გნიასი, ხან დევია ძირს, ხან ადიხანჯალა. ბოლოს ისევ ადიხანჯალამ დასძლია, დასცა ძირს, გაიძრო ხანჯალი და სამივე თავი გააგდებინა. მერე ავიდა ქალთან და ჰკითხა:

— და-ძმობას, მითხარი, რა მოხდა ამ ქალაქში ისეთი, რომ კაცის ჭაჭანება გამოლუულაო.

ქალმა თავისი თავგადასავალი უამბო:

— ჩვენ სამნი დანი ვიყავითო, — უთხრა ქალმა, — ერთ დღეს ქალაქს სამი ძმა დევი დაესხა თავს, ხალხი პირ-წმინდად გაქლიტეს და დაგვეპატრონენ. ამ უფროსმა ძმამ მე შემირთო და აქვე, ჩვენს ქალაქში და სასახლეში დაბინავდა, უმცროსმა ძმებმა ჩემი უმცროსი დები წაიყვანეს და თავ-თავიანთ სახლებში დაბრუნდნენო.

— უნდა წავიდე და ისინიც გამოვიხსნა, — უთხრა ადიხანჯალამ, — ოღონდ მასწავლე, საით არიან და რომელი გზით უფრო მალე მივაგნებო.

ქალი შეეხვეწა:

— ნუ წახვალ, თორემ დაიღუპები. ჩემი საშუალო დის ქმარს ორი ამხელა შეუძლია, რაც ამ დევს შეეძლო, ხოლო უმცროსი დის ქმარი ორივეზე ორჯერ ღონიერიაო.

— მაგის ფიქრი ნუ გაქვსო, — უთხრა ადიხანჯალამ, —

შენ მხოლოდ გზა მასწავლე და ნიშანი რამე გამატანე, რომ შენს დას ვარქვენო და შენი ამბავი შევატყობინო.

რაკი არ დაიშალა ადიხანჯალამ, ქალიც დათანხმდა, ასწავლა გზა, ნიშნად თავისი ბეჭედი გაატანა და გაისტუმრა.

იარა ადიხანჯალამ როგორც ქალმა ასწავლა, იარა და ბოლოს მიაღვა იმ დევის სახლს, რომელსაც საშუალო და ჰყავდა დატყვევებული. რკინის ჭიშკარი აქაც ხანჯლით ჩამოჭრა და შევიდა გალავანში. ადიხანჯალა ამ საშუალო დასაც მოეწონა და შეეხვეწა:

— კარგი ჭაბუკი ჩანხარ, წადი აქედან ჩქარა, თორემ შვიდთავიანი დევი მოვა და ცოცხალი ვერ გადაურჩები.

ადიხანჯალამ ქალს უფროსი დის ბეჭედი აჩვენა და უთხრა:

— შენ ნუ გეშინია, რაც დღე შენი უფროსი დის ქმარს დავაყენე, ამ შენს ქმარსაც იმავე დღეს დავაყრიო.

ქალი კიდევ ბევრს ეხვეწა, წადიო, მაგრამ ადიხანჯალამ არ დაუჯერა. ამასობაში შვიდთავიანი დევიც მოვიდა. ჩამოლეწილი ჭიშკარი რომ დაინახა, მთლად ცეცხლი მოკვიდა და გაცოფებული მივარდა ადიხანჯალას. ბევრი იბრძოლეს, მაგრამ საბოლოოდ ადიხანჯალამ მაინც დასძლია, დასცა ძირს, დაჰკრა ხანჯალი და შვიდივე თავი ერთიანად გააგდებინა. მერე ავიდა ქალთან და უთხრა:

— ახლა მე თქვენი უმცროსი დის გამოსახსნელად უნდა წავიდე, დაძმობას, მასწავლე, რომელ მხარეს ვეძებო?

ქალი შეეხვეწა:

— ნუ წახვალ, თორემ იმ დევს თორმეტი თავი აბია, ჩვენს ქმრებზე ორჯერ უფრო ღონიერია და გაგაუფუჭებსო.

ადიხანჯალამ არ დაიშალა. გამოართვა ნიშნად საშუალო დასაც ბეჭედი და გაუდგა გზას. ბევრი იარა თუ ცოტა იარა, ბოლოს მიაღვა თორმეტთავიანი დევის სასახლეს. სასახლე სულ ოქრო-ვერცხლისა იყო, ირგვლივ ალმასის გალავანი ერტყა და ჭიშკარიც ალმასისა ჰქონდა. ადიხანჯალამ გაიძრო ხანჯალი, დაჰკრა ერთხელ, დაჰკრა მეორედ, დაჰკრა მესამედ და ჭიშკარი შუაზე გააპო. შევიდა ეზოში და მიიხედ-მოიხედა.

აივანზე ერთი ოქროსთმიანი ქალი გადმოდგა. ეს იყო უმცროსი და, ისეთი ლამაზი იყო, რომ მზის შუქს აბნელებდა. მოეწონა ქალს ადიხანჯალა და ჩამოსძახა:

— რამ გაგაბედინა აქ მოსვლა? ჩემი ქმრის შიშით ძირს ჭიანჭველას ვერ გაუვლია და მაღლა ფრინველს, ჩქარა წადი, თავს უშველე, თორემ საცაა მოვა და ნაცარ-მჭვრად გაქცევსო.

ადიხანჯალამ უფროსი დების ბეჭედი უჩვენა და უთხრა:

— შენ ჩემი ნუ გედარდება, ჩემგან რაც ამათ ქმრებმა წაიღეს, შენი ქმარიც იმას წაიღებსო.

ქალმა კიდევ წასვლა ურჩია, — ღონითაც რომ ვერ მოგერიოს, ჰაერით დაგამარცხებსო.

მართლაც ატყდა საშინელი ქარიშხალი. თორმეტთავიან დევს შორიდანვე ეგრძნო თავის სახლში ძეხორციელის მოსვლა და ქარიშხალი გამოეშვა. ქრის გრიგალი, წივის, ღმუის, ადიხანჯალას ხან ერთ მხარეს გაისვრის, ხან — მეორე მხარეს, მაგრამ დაჩოქებით ერთხელაც ვერ დააჩოქა. ბოლოს თვითონ დევიც გამოჩნდა — მთისხელა მოიზლაზნებოდა და თორმეტივე თავს გველივით ასავესავებდა. მივარდა ადიხანჯალას, დასტაცა ხელი, მოიქნია და მიწაში მუხლებამდე ჩაასო. ამოხტა ადიხანჯალა, მოიქნია დევი და კისრამდე ჩაასო, იმავე წამს გაიძრო ხანჯალი, მისდგა და, სანამ დევი მიწიდან ამოხტებოდა, თორმეტივე თავი კომბოსტოსავით წააცალა. მერე ადგა და სასახლისაკენ წავიდა, რომ ოქროსთმიანი ქალისათვის უფროსი დების განთავისუფლებაც ეხარებინა. ქალი კარსუკან მოეფარა და დაუძახა:

— კარს ნელ-ნელა გავადებ და თვალი შორიდანვე შემჩნე, თორემ უცბად ახლოს რომ მოხვიდე, ჩემი სილამაზე დაგაბრმავებსო.

ადიხანჯალამ დაუჯერა ქალს და ნელ-ნელა მიუახლოვდა, ამოიღო ნიშნად წამოღებული ბეჭდები და წინ დაულაგა. ქალმა იცნო თავისი დების ბეჭდები და ადიხანჯალას შეეკითხა:

— ეს ბეჭდები ჩემი უფროსი დებისაა და შენთან რა უნდაო?

— მე შენი დის ქმრებსაც ასეთივე დღე დაეყარე, ისი-

ნიც უკვე დიდი ხანია თავისუფლები არიან და თუ ისურვებ, შენც მათთან წაგიყვანო.

— წამიყვანო! — წამოიძახა სიხარულით ქალმა.

წამოიყვანა ადიხანჯალამ ოქროსთმიანი ქალი და საშუალო დასთან მიიყვანა, იქ ცოტა დაისვენა, მერე საშუალო დაც წამოიყვანა და მიიყვანა ორივენი უფროს დასთან. დეზმა უზომოდ გაიხარეს ერთმანეთის ნახვით და კარგა ხანს ერთი-მეორეს ველარ მოშორდნენ — ჩახვეულები ხან ტიროდნენ და ხან იციროდნენ.

ქალებმა ერთმანეთის მოკითხვითა და ხვევნა-კოცნით რომ გული იჯერეს, ადიხანჯალამ უთხრა:

— ასლა წავიდეთ და ჩემს ძმებსაც გაგაცნობთო.

ქალები, რა თქმა უნდა, სიხარულით გამოჰყენენ. ადიხანჯალამ ჯერ ქალები გააცნო ძმობილებს და მერე უთხრა:

— აი, ძმებო, სამნი ძმანი ჩვენა ვართ, სამნი დანი ესენი არიან, თითომ თითო ამოირჩიეთ საცოლედ და რომელიც დარჩება, იმას მე შევირთავო.

ძმობილებმა თქვეს: რა თქმა უნდა, ოქროსთმიანი და ორივეს ჯობია, მაგრამ რომელიმემ რომ ის დავიჩემოთ, დიდი უსინდისობა იქნება. მოდი, ჩვენ უფროსი დები დავითითოვოთ, ეგ ქალი კი ადიხანჯალას დავუთმოთ. ეკუთვნის კიდევ, — ჩვენ აქ ვისხედით და მაგან კი რამდენ ბრძოლა გადაიტანაო.

დაუთმეს ადიხანჯალას ოქროსთმიანი ქალი და დაიწყეს ქალაქში ცხოვრება. ყველაფერი მზამზარეული აქვთ, საჭმელსასმელი გინდა, თუ ტანსაცმელი, არიან განცხრომით, მაგრამ ძმობილებს თავიანთ სახლებში წასვლა მოენატრათ და ადიხანჯალას უთხრეს, — წავიდეთო. — ადიხანჯალამ უთხრა, — თქვენ თუ ძალიან გულით გინდათ, წადით, მე კი არსად წამესვლება და ამ ქალაქში დავრჩები. ოღონდ იცოდეთ, ძმობას ნუ დაკარგავთ და ხანდახან მეც მომინახულეთო. ძმობილები შეჰპირდნენ, ჭირი იქნება თუ ლხინი, მაშინვე შენთან გავრჩდებითო, — გამოემშვიდობნენ და წავიდნენ.

დარჩა ადიხანჯალა მარტო თავისი ოქროსთმიანი მზეთუნახავი ცოლით ქალაქში. ქალაქს გვერდით მდინარე ჩამოუდიოდა. ოქროსთმიანი ქალი ყოველდღე ამ მდინარეში ბა-

ნაობდა. ერთხელაც, ბანაობისას ერთი ღერი თმა მოსძვრა და მდინარეში ჩავარდა. ატარა მდინარეში თმა, ატარა და შუა ზღვაში გაიტანა. გამოიხედა ზღვათა ხელმწიფემ და დაინახა, რომ ზღვაში რაღაც მზესავით ანათებს. მაშინვე მოიხმო მენავეები და ზღვაში შეგზავნა, — გამიგეთ, რა ანათებს ასე თვალისმომჭრელად, და ახლავე აქ მომიტანეთო.

შეცურდნენ მენავეები ზღვაში და ნახეს, რომ ტალღებზე ქალის თმა ლივლივებს და ის ანათებს. ამოიღეს თმა და მოუტანეს ხელმწიფეს. ხელმწიფეს გულში ამ ქალის სურვილი ჩაუვარდა და საჯაროდ გამოაცხადა: — ვინც ამ თმის პატრონ ქალს ხელში ჩამაგდებინებს, ას აქლემ თვალ-მარგალიტს ვაჩუქებო.

ოქროსთმიანი ქალის ამბავი ერთმა ურიის მეტმა არაეინ იცოდა. ეს ურია ვაჭარი იყო და სულ აქეთ-იქით დატანტალებდა. ერთხელ იმ ცარიელ ქალაქზეც გამოევიღო და ის ქალი ენახა. მივიდა ურია ხელმწიფესთან და მოახსენა:

— დიდებულო ხელმწიფე, უბრძანე შენს სარდლებს, ჯარი შეკრიბონ და იმ ოქროსთმიანი ქალის ადგილ-სამყოფელს მე ვასწავლიო.

გაიხარა დიდად ხელმწიფემ, ურია უამრავი თვალ-მარგალიტით დაასაჩუქრა და სარდლებს ჯარის შეკრება უბრძანა, გაუძღვა ურია ხელმწიფის ჯარს და მიიყვანა იმ ქალაქში, სადაც ადიხანჯალა და მისი ცოლი იმყოფებოდნენ.

ადიხანჯალას ამ დროს ეძინა. ხმაურზე გამოიხედა ქალმა და დაინახა, უთვალავი ჯარი. მიხვდა, რისთვისაც უნდა ყოფილიყო ჯარი მოსული, იფიქრა, რაღა ქმარი გავადვიძო, ამათ ხომ მეც დავხვდებიო, ამოუღო ადიხანჯალას ქარქაშიდან ხანჯალი და დაერია ამ ჯარს. ჯერ ის ურია მოკლა, მერე მისდგა, კაფა და კაფა ხალხი. ისე გაქლიტა მთელი ჯარი, რომ ბოლოს ამბის წამლებად სამი კაციღა დატოვა. იმ სამ კაცს უთხრა, — წადით. და თქვენს ხელმწიფეს მოახსენეთ, რაც დღე დაგადგათო, — და დაბრუნდა ადიხანჯალასთან. ადიხანჯალას ასეთი ზნე სჭირდა: თუ მდინარეს ხანჯალს ამოუღებდნენ ქარქაშიდან, აღარ გამოეღვიძებოდა, სანამ ხანჯალს ისევ არ ჩაუგებდნენ. ქალმა გაწმინდა სისხლიანი ხანჯალი და ჩაუგო ქარქაშში.

გამოედვიძა ადიხანჯალას, ნახა თავისი ცოლი სულ  
სისხლით მოსვრილი და გაუკვირდა:

— ქალო, ეგ რა დაგმართნიაო?

ქალმა უამბო, რაც მოხდა, ადიხანჯალამ უსაყვედურა,  
რატომ მე არ გამაღვიძეო?

— ნუ ნაღვლობ, შენი ჯერიც დადგებაო, — უთხრა ქალ-  
მა, — ვიცი, ის ხელმწიფე არ მოისვენებს და კიდევ შეეცდებ-  
ა ჩემს ხელში ჩაგდებასო.

მართლაც, ამბის მთხრობლად გაშვებულმა სამმა კაცმა  
მოახსენეს თუ არა თავიანთ ხელმწიფეს, რაც თავს გადახ-  
დათ, ხელმწიფეს უფრო გაუძლიერდა ოქროსთმიანი ქალის  
სურვილი. თუ ის ქალი ხელში არ ჩავიგდე, რაღა ხელმწიფე  
ეყოფილვარო, — თქვა გულში და თავის სამეფოში ერთხელ  
კიდევ გამოაცხადა:

— ვინც იმ ქალს მომიყვანს, ნახევარ სახელმწიფოს ვა-  
ჩუქებ და საშვილიშვილოდ გავაბედნიერებო.

ხელმწიფეს ერთი ხელზე მოსამსახურე ჯადოქარი დედა-  
კაცი ჰყავდა, მივიდა ეს დედაკაცი ხელმწიფესთან და  
უთხრა:

— დიდებულო ხელმწიფეე, თქვენ მარტო ერთი ცხვარი,  
ერთი ბოთლი ღვინო, ერთი ბოთლი ბანგი და სამი კაცი  
მომეცით და იმ ქალს მალე შენს სასახლეში იხილავთო.

ხელმწიფემ მაშინვე მისცა ყველაფერი ბებერს, რაც  
ითხოვა, და გაისტუმრა. გამოკრა ხელსახოცში ჯადოქარმა  
დედაკაცმა ბანგი და ღვინო, გამოირეკა ცხვარი, წამოიყვანა  
კაცები და შევიდა ქალაქში. ადიხანჯალას სახლთან რომ  
მივიდა, ხელმწიფის კაცები გალავანს გარეთ დამალა, თვი-  
თონ შიგნით შევიდა და აქეთ-იქით ბარბაცი და ხმამაღლა  
წუწუნნი დაიწყო:

— არავინა ხართ ქრისტიანი, მომხედეთ, სულთმობრძა-  
ვი ადამიანი შემიფარეთო.

ადიხანჯალამ ცოლს უთხრა, ამოვიყვანოთ, ცოდოაო.  
მაგრამ ცოლმა დაუშალა: არ გინდა, ეგ ბებერი კაი სულის  
არა ჩანს და გვიღალატებსო.

— ერთი წირპლიანი დედაბერი მითხარ და იმისი ღალა-  
ტიო, — თქვა ადიხანჯალამ და დედაბერი შინ შეიყვანა.



დედაბერმა დიდად დაუმაძღა და დათაფლული ენით უთხრა:

— რახან ასეთი სიკეთე მიყავით, მე დედა და თქვენ შვილები, აი ეს ერთი ცხვარი მყავს, დავეკლათ და კაი დრო გავატაროთო.

დაკლეს მართლაც ცხვარი და გემრიელი ყაურმა გააკეთეს, დედაბერმა სუფრაზე ბანგისა და ღვინის ბოთლებიც შემოდგა. შეაპარა ცოლ-ქმარს ბანგი და ორივენი სუფრაზე დააძინა. იმავე წამს ამოუღო ადიხანჯალას ქარქაშიდან ხანჯალი და ზღვაში გადაუგდო, თვითონ ხელმწიფის კაცებთან გამოვარდა და შეატყობინა, — სანამ სძინავს ქალს, წაიყვანეთ, თორემ თუ გაელვიძა, ველარაფერს გახდებითო.

შევარდნენ მაშინვე კაცები სასახლეში, დაავლეს ხელი მძინარე ქალს და თავიანთ ხელმწიფეს მიჰგვარეს. ქალს გაელვიძა, მიხვდა, რაც ამბავი იყო მის თავს და ხელმწიფეს უთხრა:

— კარგი, რა გაეწყობა, ვიქნები შენი ცოლი, მაგრამ ერთი წელი მაცალე, რომ ქმარი გამოვიგლოვო და ჯვარი მერე დავიწეროთო.

სულერთია, მაინც ველარსად წამივაო, თქვა ხელმწიფემ და მისცა ერთი წლის ვადა.

ადიხანჯალას ძმადნაფიცმა იმავე წამს იგოძნო ძმობილის გასაჭირი და მეორე ძმადნაფიცსაც შეატყობინა. ადგნენ და წამოვიდნენ ორივენი. ავიდნენ ადიხანჯალას სახლში და ნახეს, რომ მათი ძმობილი მკვდარი წევს ტახტზე, ქარქაშში ხანჯალი აღარ უგია და აღარც მზეთუნახავი ქალი ჰყავს. მიხვდნენ, რომ ვიღაცას ღალატით მოეღორებინა. უფროსმა ძმამ უთხრა უმცროსს, — აბა თუ რამე ძალა გაქვს, ახლა გამოიჩინე და ის დაკარგული ხანჯალი მონახეო. — უმცროსმა ძმადნაფიცმა გაიხედა და ზღვის ფსკერზე, წვერით ჩარჭობილი დაინახა. მაშინვე ჩაყვინთა და ამოიტანა. ძმობილებმა გაწმინდეს ხანჯალი და ჩაუგეს ქარქაშში. ადიხანჯალას გამოეღვიძა და თვალები მოიფშვნიტა.

— რა ამბავია შენს თავს, ან ქალი რა უყავიო? — ჰკითხეს ძმობილებმა.

ადიხანჯალა გაღვიძებისთანავე მიხვდა, ვისი ოინიც იყო, ეს და ძმობილებს უთხრა:

— თქვენ თქვენი ვალი მოიხადეთ, ახლა წადით და დანარჩენი მე ვიცით, რაკი ჩემი ხანჯალი ისევ ხელთა მაქვს, ქალსაც დავიბრუნებ და მოლაღატესაც საკადრისს მიუზღავო.

დაბრუნდნენ ძმობილები თავიანთ ცოლებთან. ადიხანჯალა კი ადგა და წავიდა მზეთუნახავის საქებნელად.

ბევრი იარა, ბევრი მთა და ველი გადალახა, მაგრამ ქალის ასავალ-დასავალს ვერსად მიაგნო. ამასობაში წელიწადიც მიიწურა, დასასრულამდე ერთი დღელა დარჩა. სწორედ იმ დღეს ადიხანჯალას გზაზე ერთი რაჭველი მზარეული შეხვდა. რაჭველი სულ ცკევეითა და სიმღერით მიდიოდა.

— მარტოკას რა გამღერებს და რა გათამაშებსო? — ჰკითხა ადიხანჯალამ.

— როგორ რა გამღერებს, — მიუგო რაჭველმა, — ხვალ ჩვენი ხელმწიფე მოტაცებულ მზეთუნახავზე ჯვარს იწერს და უფროს მზარეულად ვარ მიწვეულიო.

— მეც მზარეული ვარ და მინდა, ხელმწიფის ქორწილში წილი დავიდო, — უთხრა ადიხანჯალამ. — მოდი, ეგ შენი მზარეულის ტანისამოსი მე ჩამაცვი, ჩემი ჩოხა-ახალუსი კი შენ ჩაიცვი, უფროსი მზარეული ყოფილხარ და საქმეს მაინც არავინ გაგაკეთებინებსო.

რაჭველი სიამოვნებით დათანხმდა, გაუცვალა ტანსაცმელი და ხელმწიფის სამზარეულოშიც შეიყვანა.

— რომელი საჭმელი უფრო მოსწონს თქვენს სადედოფლოსო? — იკითხა ადიხანჯალამ.

— პირს არაფერს აკარებსო; — უთხრეს მზარეულებმა, — რა არ გავაკეთეთ, მაგრამ ყველაფერზე უარს ამბობსო.

— მაშინ ერთ კერძს მე დავამზადებ და იქნებ მოიწონოსო, — სთხოვა მზარეულებს ადიხანჯალამ.

მზარეულები უყოყმანოდ დათანხმდნენ და ხორცი და სანელებელიც თვითონვე მოუტანეს. ადიხანჯალამ შეწვა ხორცი, გააწყო თეფშზე, ზედ ჩუმად თავისი ბეჭედი დაადო, გადააფარა მალლიდან ხელსახოცი და ქალს გაუგზავნა.

ქალმა, რა თქმა უნდა, დანახვისთანავე იცნო თავისი ბე-

ტედი, მიხვდა ყველაფერს და უზომოდ გამხიარულდა. გემრიელად შეჭამა უბრალოდ შემწვარი ხორცი და ახალი მზარეული თავისთან მოიხმო, — მომგვარეთ, კიდევ სხვა კერძებიც უნდა შევუკვეთო. წაიყვანეს ადიხანჯალა და შეიყვანეს მზეთუნახავთან. ქალი სიხარულით გადაეხვია ერთი წლის უნახავ ქმარს და მთელი თავისი თავგადასავალი უამბო.

ნაზირ-ვეზირებმა ხელმწიფეს მოახსენეს, — ერთი ახალი მზარეული მოვიდა, თქვენმა სადედოფლომ იმისი გაკეთებული საჭმელი ჭამა და ისე გამხიარულდა, რომ პირზე სულ ბედნიერების ღიმილი დასთამაშებსო.

ხელმწიფემ მოინდომა საცოლის ნახვა და ქალის ოთახში შევიდა. წამოვარდა ადიხანჯალა, ხელმწიფე ხანჯალზე ააგო და ფანჯრიდან ზღვაში გადაისროლა. ჯადოქარი დედაბერიც იმას მიაყოლა და მზეთუნახავზე მეორედ დაიწერა ჯვარი. მერე საქორწინო სუფრა გააშლევინა და ცხრა დღე და ღამე სმა და ლხინი არ შეწყვეტილა. ქორწილი რომ დამთავრდა, სახელმწიფო ტახტი და გვირგვინიც თვითონ დაიმტკიცა და იმ დღიდან ზღვათა ქვეყანაში სიმშვიდის, სიმარტლისა და ბედნიერების მეტი აღარაფერი მომხდარა.

ჭირი — იქა, ლხინი — აქა,  
ქატო — იქა, ფქვილი — აქა.





## ქვერივის შვილი

იყო და არა იყო რა, ღვთის უკეთესი რა იქნებოდა, იყო შაშვი მგალობელი, ღმერთი ჩვენი მწყალობელი. ერთ სოფელში ცხოვრობდა ერთი ქვერივი ქალი და ჰყავდა ერთი ბიჭი.

ბიჭი რომ წამოიზარდა, ნადირობა დაიწყო და კარგი ხელილბლიანი მონადირეც დადგა. ყოველდღე დადიოდა ტყეში, ხოცდა ნადირს, ნაწილს თავისთვის იტოვებდა, ნაწილი კი, როგორც წესი, თავის ბატონთან მიჰქონდა.

ერთხელაც ტყეში ერთი ჭრელი ირემი მოკლა, მოიტანა შინ, გაატყავა და დედას უთხრა:

— ასეთი ირემი ჩემს სიცოცხლეში არ მინახავს. ეს ტყავი ბატონს უნდა მივართვა და ეგების ყმობიდან გამანთავისუფლოსო.

დედამ დაუშალა:

— გაგანთავისუფლოს კი არა, ასეთ ძვირფას საჩუქარს რომ დაინახავს, დახარბდება და შეიძლება შინაყმად გახდომაც მოგთხოვოს. იფიქრებს სახლში რომ მეყოლება, მთელი ამისი ნანადირევი მე დამრჩებაო.

დედამ იცოდა რა გულღრძობე იყო ბატონი, მაგრამ ბიჭმა არ დაიშალა, აიღო ჭრელი ირმის ტყავი, გამოხვია ხელსახოცში და ბატონს მიართვა. ბატონმა მართლაც იმავე დღეს შინაყმად გაიხადა, თავის სახლში დაიტოვა და მკაცრად უბრძანა:

— ამის შემდეგ რასაც მოკლავ, ტყავსაც და ხორცსაც უკლებლივ ჩამაბარებო.

რა უნდა ექნა საწყალ ქვრივიშვილს, ყმა იყო და ბატონი რასაც უბრძანებდა უნდა დამორჩილებოდა. დარჩა ამ დღიდან ბატონის სახლში და დაიწყო ბატონისათვის ნადირობა. ყოველდღე მოჰქონდა ნანადირევი და უკლებლივ ბატონს აბარებდა. ბატონი დედისათვის გასაგზავნ ზორცსაც კი არ ანებებდა, მარტო თავ-ფეხს და შიგნეულს მიუყრიდა და ეტყოდა, ეგ შენა და შენს ქვრივ დედასო.

ქვრივის შვილი კარგი თვალ-ტანადი ვაჟკაცი იყო და ბევრს გასათხოვარ ქალს ეჭირა მასზე თვალი, მაგრამ თვითონ ერთი ცუგრუმელა გლეხის გოგოს მეტი არაფერი მოსწონდა. ის გოგო ბატონის მოურავსაც მოსწონდა და ყოველდღე დადიოდა სათხოვნელად, მაგრამ გოგო სიასლოვეს არ იკარებდა.

— შენ რა ვაჟკაცი ხარ, ვაჟკაცი ქვრივის შვილია და თუ გავყვები ცოლად, იმას გავყვები, — ეუბნებოდა.

მოურავი ბევრს ეცადა გოგოს გადმობირებას და, რომ ვერას გახდა, ქვრივის შვილის დალუპვა და თავიდან მოშორება გადაწყვიტა. მივიდა ბატონთან ერთხელ, ბევრი ემუსაიფა, ემლიქვნელა, ბევრი აქო და ბოლოს უთხრა:

— ეს ირმის ტყავი, ქვრივის შვილმა რომ მოგართვათ, მართლაც ძალიან კარგი რამ არის, მაგრამ ასე შიშვლად რომ გიკიდიათ კედელზე, არ უხდება, ამას რომ გველეშაპის ძვლების ოთახი აუშენოთ და შიგ დაკიდოთ, უფრო კარგი სანახავი იქნება და შენც უფრო სახელი და დიდება მოგემატებაო.

— დიასაც, კარგი იქნებოდა, მაგრამ გველეშაპის ჩონჩხს სად ვიშოვიო? — ჰკითხა ბატონმა:

მოურავმა ცბიერად გაიღიმა:

— მაგას რა დიდი ამბავი უნდა, შენს საბატონო მთაში ვიცი ერთი უზარმაზარი გველეშაპია, გაგზავნე შენი მონადირე ქვრივის შვილი და მოაკვლევინეო.

— მერე შესძლებსო? — ჰკითხა ბატონმა. — ვაითუ, იმ გველეშაპმა თვითონ მოკლას და მაშინ სადღა ვიშოვო კარგი მონადირეო?

თუ მონადირეა, უნდა მოკლას კიდევ, თუ არადა, უვარგისი მონადირე ან თქვენ რად გინდათ, — უთხრა მოურავმა.

ბატონს ჭკუაში დაუჯდა მოურავის ნათქვამი, დაიბარა მაშინვე ქვრივის შვილი და უბრძანა:

— ჩემს საბატონო მთაში რომ გველეშაპი ბუდობს, უნდა წახვიდე, ის მოკლა და იმისი ძვლებსაგან ერთი კარგი ოთახი ამიშენო.

მონადირემ უთხრა:

— ბატონი ბრძანდებით, მაგრამ ჯერ დედას ვინახულებ და მერე წავალ.

ბატონმა ნება დართო, წავიდა მონადირე დედასთან და უთხრა, რაც ბატონმა დაავალა. დედა ჭკვიანი ქალი იყო და შვილს ასეთი დარიგება მისცა:

— უთხარი ბატონს, მოურავის ფულით გიყიდოს ოცი უღელი ხარ-კამეჩი, მოურავისავე ხარჯზე გამოგაყოლოს ასი კაცი მუშა, და ოთახის აშენების ხარჯებიც მოურავმა გაიღოს, თორემ გროში რომ გაერიოს ბატონისა ან სხვა ვინმესი, არ აშენდება-თქო.

დაბრუნდა ბიჭი ბატონთან და უთხრა, როგორც დედამ დაარიგა:

— გველეშაპის მოკვლას და იმისი ჩონჩხისაგან სახლის აშენებას მაშინ შევძლებ, თუ მოურავი თავისი ფულით მიყიდის ოც უღელ ხარ-კამეჩს, დამიქირავებს ას მუშას და ოთახის აშენების ხარჯსაც თვითონ გასწევს.

ეცა პირკატა მოურავს, მაგრამ სად წაუვიდოდა ბატონის ნება-სურვილს, იყიდა იმავე დღეს ოცი უღელი ხარ-კამეჩი, დაუქირავა ოცი მეურმე, ასი მუშა და ქვრივის შვილს ჩააბარა. ქვრივის შვილმა მუშებიც ურმებზე დასხა და გაუძღვა საბატონო მთისაკენ. მივიდნენ იმ ადგილზე, გველეშაპი სადაც ბუდობდა. ქვრივის შვილმა მუშები და მეურმეები უშიშარ თავშესაფარში შერეკა, თვითონ მშვილდ-ისარი და ხმალ-კაპარჭი მოიმარჯვა და გველეშაპის მოსაკლავად წავიდა.

გველეშაპი ერთ ვაკე სერზე გაწოლილიყო, მზეს მიფიცხეზ ბოდა და ნებივრად თვლემდა. ისეთი გრძელი იყო, რომ ირგვლივ შემოვლა კაცს დაღლიდა. ქვრივის შვილმა შორიდანვე შეასწრო თვალი და ფრთხილად წაეპარა. შეურჩინ მარჯვე ადგილი, სტყორცნა ისარი და ერთი ყურის ძირი

დან მეორეში გააგდებინა. გველუშაპმა მხოლოდ ერთი ამოიქშინა და უსულოდ გაიშხლართა.

ქვრივის შვილმა დაუძახა მუშებს და გველუშაპისათვის ხორცის გაცლა უბრძანა, — ისე უნდა გააცალოთ, რომ ძვალს ერთი ჩიჩქიც არ შერჩესო. დაადგნენ მუშები—ასი კაცი. მეურმეებიც მიეშველნენ და სამი დღე და ღამე აჭრეს ლეში, ხორცით ყვავ-ყორნები და ტურა-მგლები გაახარეს, ჩონჩხი კი სახსრებზე დაშალეს, დაუდეს ოც ურემზე და ბატონის ეზოში ჩამოიტანეს.

ქვრივის შვილმა ბატონს უთხრა:

— ახლა მოურავმა თავისი ფულით ხელოსნები დამიქირავოს და სახლის აშენებას დღესვე შევუდგებიო.

დაიბარა ბატონმა მოურავი და უბრძანა:

— დღესვე წადი, სადაც კი ვინმე გამოჩენილი ხელოსანი გეგულება, ყველა დაიქირავე და ფულიც წინასწარ გადაუხადეო.

მოურავს ბოლმა ახრჩობდა: რისთვის ავიტყე ეს ხათა ბალო, მაგრამ ახლა სინანული გვიანდა იყო. თვითონ ჩააგონა ბატონს გველუშაპის ჩონჩხისაგან სახლის აშენება და უარს ხომ ვეღარ იტყოდა. ადგა, შეკაზმა ცხენი და იმავე დღეს ოცამდე რჩეული ხელოსანი მორეკა. ფულიც წინასწარვე გადაუხადა.

დააყენა მუშები და ხელოსნები ქვრივის შვილმა და დააწყებინა სახლის მშენებლობა. ხშირად რაღაცას დაუწუნებდა, დააშლევინებდა და ახლიდან გააკეთებინებდა, ან შეაცვლევინებდა. ყოველ ასეთ შეცვლა-გადაკეთებაზე მუშები და ხელოსნები ცალკე ანაზღაურებას ითხოვდნენ, მაგრამ რაში ენანებოდა მოურავის ფულები! როგორც იქნა, დაასრულეს სახლის მშენებლობა, დაჰკიდეს შიგ ჭრჭლი ირმის ტყავი და მართლა მშვენიერი რამეც გამოვიდა.

მოურავმა მაინც არ მოისვენა. სულ იმის ფიქრში იყო, როგორ მოეშორებინა ქვრივის შვილი თავიდან, რომ შემცილებელი აღარავინ ჰყოლოდა და იმ ცუგარუმელა გოგოს თვითონ დაჰატრონებოდა. გავიდა ხანი. ერთხელ მივიდა მოურავი ბატონთან და უთხრა:

— ეს ყველაფერი კარგია, მაგრამ ცხრა მთას იქით რომ

იადონი და ბულბული ბუდობენ, ისინიც რომ ამ სახლში იყვნენ, უფრო დაამშვენებენ და შენც ხელმწიფის ტოლი სახელი და დიდება გექნებაო. — მოურავს იმედი ჰქონდა, ამსიშორე გზას ქვრივის შვილი უხიფათოდ ვერ გადაარჩებოდა. — იადონს და ბულბულს სამი უზარმაზარი არწივი პატრონობდა და ისინი ცოცხალს არ გაუშვებდნენ.

— ეჰ, კარგი იქნებოდა, მაგრამ ვინ მომიყვანსო, — თქვა ბატონმა.

— როგორ თუ ვინ, — შეაგულიანა მოურავმა, — შენი მონადირე ქვრივის შვილი რას აკეთებსო?

— მერე შესძლებს კიო? — იკითხა ბატონმა, — ისე კი არ მოხდეს, რომ კარგი მონადირეც დავკარგო და ვერც იადონი და ბულბული დავისაკუთრო.

მოურავმა ცბიერად ჩაიციინა.

— უშველებელი გველეშაპი მოკლა და განა იადონისა და ბულბულის მოყვანა გაუჭირდებაო?

მართლაც არ უნდა გაუჭირდესო, — თქვა გულში ბატონმა, დაიბარა ქვრივის შვილი და უთხრა:

— უნდა წახვიდე და ცხრა მთას იქით რომ იადონი და ბულბული ბუდობენ, ისინი მომიყვანო.

— ბატონი ბრძანდებითო, — უპასუხა მონადირემ, — ოღონდ დრო მომეცით, რომ წავიდე და დედას გამოვემშვიდობო.

ბატონმა ნება დართო. მონადირე წავიდა დედასთან და ჰკითხა:

— ჩემი ბატონი ცხრა მთას იქით მგზავნის იადონისა და ბულბულის მოსაყვანად და როგორ მოვიქცეო?

— ეგ სულ იმ სულძალდი მოურავის ბრალიაო, — უთხრა დედამ და დაარჩია, — ახლა მიდი ბატონთან და უთხარი: მოურავის ფულით გიყიდოს ოცი თეთრი ხარი, ოცი — წითელი და ოციც — შავი. ისიც უთხარი, რომ ხარების ღირებულებაში სხვისი ან თვითონ ბატონისა გროში არ ერიოს, თორემ შენს ბრძანებას ვერ ავასრულებ-თქო. აყიდვინე ხარები, გაირეკე და წადი. სამ მთას რომ გადაივლი, თეთრი არწივი შეგხვდება, თეთრი ხარები მიეცი და გაგიშვებს. კიდევ სამ მთას რომ გადახვალ, წითელი არწივი დაგხვდება და იმას წითელი ხა-



რები მიეცი, ხოლო მეცხრე მთასაც რომ გადახვალ, იქ შავი არწივი დაგიხვდება და შავი ხარებიც იმას მიეციო.

დაბრუნდა ბიჭი ბატონთან და, როგორც დედამ დაარია, სამოცი ხარი მოსთხოვა, ისიც უთხრა, რომ ხარები თუ სულ მოურავის ფულით არ იქნება ნაყიდი, ბრძანებას ვერ შეეასრულებო.

დაიბარა ბატონმა იმავ წამს მოურავი და უბრძანა:

— დღესვე შენი საკუთარი ფულით იყიდე სამოცი ხარი — ოცი თეთრი, ოცი — წითელი და ოციც შავი და საჩქაროდ აქ მომიბრუნეო.

მოურავს ამის გაგონებაზე მუხლი მოეკვეთა, მაგრამ თავს იქით ძალა არ ჰქონდა. წავიდა, იყიდა სამოცი ხარი და მოურეკა. წაასხა მონადირემ ხარები და გაუდგა გზას.

გადაიარა სამი მთა და ერთი ვიწრო ველში გავიდა. ირგვლივ სიწყინარეა, ჩამიჩუმე არ ისმის, მხოლოდ მზე ანათებს და ჩიტები ყლურტულენ. „სად არის არწივი?“ — ქვრივის შვილმა ამის გაფიქრებაც ვერ მოასწრო, რომ ციდან უცბად მეხის გრგვინვასავეთ ხმა გაისმა. შეხედა ქვრივის შვილმა და თავზარი დაეცა: უზარმაზარ თეთრ არწივს ფრთები გაეშალა, პირდაღებული დედამიწისაკენ მოჰქროდა და მთელ მთა-ბარს აბნელებდა. მოვიდა ახლოს და მონადირეს შეუტია:

— ჩემი შიშით აქ ლომსა და ვეფხვს ვერ გაუვლია და შენ როგორ გაბედე, რომ მთელი ნასირი შემოგირეკიაო?!

— აი, ეს თეთრი ხარები შენთვის მოვრეკე და რაღად მიწყრებიო? — შეაგება ქვრივის შვილმა და არწივიც დაუტკბა. მივიდა სულ ახლოს, ფრთები შემოიკეცა და ჰკითხა:

— ასე წელია, რაც აქა ვარ და ჩემთვის ჯერ ერთი წიწილაც არავის მოურთმევია, შენ კი ვინა ხარ ასეთი გულუხვი, რომ ოცი მსუქანი ხარი მარუქეო?

ქვრივის შვილმა უამბო, ვინც იყო და რა საქმეზედაც მიდიოდა, თან რჩევაც ჰკითხა: — რა ვქნა, როგორ ვიგდო ხელთ იადონი და ბულბულიო?

— მეექვსე მთას რომ გადაივლი, იქ ჩემი უფროსი და დაგხვდება და მაგის პასუხს ის გეტყვისო. — უთხრა თეთრმა არწივმა. გამოიძრო ერთი ფრთა და მისცა, — როცა კი

მალიან გაგიჭირდეს, მახსენე და იმავე წამს შენთან გავჩნდებიო.

გამომეშვიდობა მონადირე თეთრ არწივს, გაირეკა და ჩენილი ორმოცი ხარი და გაუდგა გზას. მეუქვსე მთა რომ გადაიარა, ცოტა უფრო მოზრდილ ველში გავიდა. უცბად თითქოს ცამ დაიქუსა — გამოჩნდა ფრთების ტყლაშუნი ვითელი არწივი და არემარე სულ ქარიშხალში გაახვია. დაჰკივლა ქვრივის შვილს:

— ჩემი შიშით აქ ლომიც ვერ გაიჭაჭანებს და შენ როგორ გაბედე შემოსვლა და ნახირის შემორეკვაო?

— რად მიწყრები, — შეაგება მონადირემ, — თუ მოვრეკე შენთვის მოვრეკეო, — გადაურჩია ვითელი ხარები და უთხრა, — აი ეს ვითელი ხარები სულ შენი საჩუქარი იყოსო.

არწივს გაუხარდა ძღვენი და ქვრივის შვილს უკვე დანდობით შეხედა. უთხრა:

— ასოცი წელია, რაც აქ ვიმყოფები და ჯერ ჩემთვის წიწილიც არავის მოურთმევიაო, შენ კი რა ხარ, ვინა ხარ, რომ ოცი ხარი მარუქე და სამაგიეროსაც არაფერს ითხოვო?

მაშინ ქვრივის შვილმა აუხსნა თავისი გასაჭირი და არწივმა უთხრა:

— ის მგალობელი იადონი და ბულბული ერთ მიუვალ კლდეში სხედან, ის კლდე წამში იღება და იხურება, იქ შეფარენა და უკან გამოფრენა მხოლოდ ჩვენს უფროს დას შეუძლია. აქედან რომ სამ მთას გადაივლი, ის ჩვენი და იქ დაგახედება, სთხოვე და უსათუოდ გამოგიყვანსო.

ქვრივის შვილმა მადლობა გადაუხადა და გამომეშვიდობა, გამომეშვიდობებისას ვითელმა არწივმა გამოიძრო სამახსოვრო ფრთა და მისცა, — სადაც გაგიჭირდეს, მახსენე და იმავე წამს შენთან გავჩნდებიო.

გაირეკა ბიჭმა დარჩენილი ოცი შავი ხარი და წავიდა. გადაიარა სამი მთა და ერთ უზარმაზარ მინდორში გავიდა. იხედება ქვრივის შვილი აქეთ-იქით, მაგრამ არაფერი ჩანს, არც ხმა ისმის. უცბად ატყდა ერთი გუგუნ-გრიალი და წამოვიდა შავი არწივი გაშლილი ფრთებით და ღია ნისკარტით, გამოვიდა მინდორზე და ქვრივის შვილს მუქარით დაჰკივლა:

— აქ ჩემი შიშით ლომის ჯოგს ვერ გაუვლია და შენ რა ხარ ასეთი, რომ მთელი ნახირი შემოგირეკია და უნებარე თვოდ აბალახებო?

— ეს ხარები სულ შენთვის მოვრეკეო. — უთხრა ბიჭმა, არწივი დაცხრა და ჰკითხა:

— ასორმოცი წელია, რაც აქა ვარ და ჩემთვის ჯერ ძღვენი არავის მოუტანია, შენ რაკი ასეთი დიდი საჩუქარი მომართვი, ჩანს რაღაც გიჭირს, მითხარი და, რაც შემიძლია, თავს არ დაეზოგაეო.

ბიჭმა უთხრა თავისი გასაჭირი. არწივმა მაშინვე ფრთები გაშალა, აიჭრა ცაში და ბიჭს ჩამოსძახა:

— აქ დამიცადე და იმ ბულბულს და იადონს დღესვე მოგიყვანო.

მართლაც, არ გასულა დიდი ხანი, რომ არწივმა ისევ მოაბნელა მთა და ბარი და ბიჭს დატყვევებული მგალობლები ჩააბარა. ერთი სამახსოვრო ფრთა გამოიძრო, მისცა ბიჭს და უთხრა:

— სადაც კი გაგიჭირდეს, ამოიღე, მახსენე და ერთ წამში შენთან მოვფრინდებიო.

გადაუხადა ქვრივის შვილმა მადლობა, წამოასხა იადონი და ბულბული და წამოვიდა. ცხრა დღე და ღამეს დაუსვენებლად იარა, გადმოლახა უკანვე ცხრავე მთა და მოვიდა ბატონის სახლში, რა თქმა უნდა, იადონი და ბულბულიც მოიყვანა. შესხეს იადონი და ბულბული გველეშაპის ჩონჩხისაგან აშენებულ კოშკში და მაყურებელი ხალხიც მოიწვიეს. იადონმა და ბულბულმა დაიწყეს ტკბილი გალობა, აქეთ ერმის ტყავი ბრჭყვიალებდა, იქით მგალობლები სტვენდნენ მართლაც, რომ ტურფა რამ სანახავი იყო ბატონი ცაში დაფრინავდა სიხარულით, მაგრამ მოურავს კი გული ბოლმით ევსებოდა.

მაყურებელი ხალხი რომ წავიდ-წამოვიდა, მოურავმა ბატონი დაიმართოხელა და უთხრა:

— ახლა ყველაფრით ხელმწიფის ტოლი კაცი ხარ, მაგრამ ზღვაში რომ ბროლის კოშკი დგას და შიგ ერთი მზეთუნახავი ქალი ცხოვრობს, ის ქალიც რომ მოიყვანო და ცო-

ლად დაისვა, მაშინ ამქვეყნად ველარც ერთი ხელმწიფე ველარც შეგედრებაო.

ბატონს ახლაც ჭკუაში დაუჯდა მოურავის ნათქვამი და იკითხა:

— განა ჩემი მონადირე ქვრივის შვილი იმის მოყვანასაც შესძლებსო?

— სადაც გველუშაპი მოკლა და იადონი და ბულბული მორეკა, არც ეგ საქმე გაუჭირდებაო, — შეაგულიანა მოურავმა.

დაიბარა ბატონმა ისევ მეორე დღეს ქვრივის შვილი და უბრძანა:

— ამა და ამ ზღვაში ბროლის კოშკი დგას. კოშკში ერთი მზეთუნახავი ქალი ცხოვრობს, უნდა წახვიდე და მკვდარი ხარ, თუ ცოცხალი ის ქალი ცოცხლად მომგვაროო.

მონადირე, რა თქმა უნდა, დათანხმდა, ოღონდ სთხოვა, დრო მომეცი, რომ წავიდე და დედას გამოვემშვიდობოო. ბატონმა მისცა დრო. ბიჭი წავიდა დედასთან, უამბო რაც და აეალა ბატონმა და რჩევა ჰკითხა. დედამ უთხრა:

— ბატონს მოსთხოვე მოურავის ფულით ნაყიდი ორი მფრინავი რაში და ერთი აქლემი. ისევ მოურავისავე ფულით აყიდვინე ერთი აქლემის საპალნე სულ ძვირფასი ფარჩა-ატლასი და აჰკიდე აქლემს. წაიყვანე აქლემიც და ის ორივე რაშიც. ზღვის პირას იმ გრძნეული ქალის და ცხოვრობს, ფარჩა-აბრეშუმი სულ იმას მიაერთვი და იმან თვითონ იცის, როგორც დაგეხმარებაო.

დაბრუნდა ბიჭი ბატონთან და მოსთხოვა ორი მფრინავი რაში, ერთი ძვირფასი ფარჩა-ატლასებით დატვირთული აქლემი და თან გააფრთხილა:

— ოღონდ ყველაფერი მხოლოდ მოურავის ფულით უნდა იყოს ნაყიდი, თორემ დავალებას ვერ შევასრულებო.

დაიბარა ბატონმა მოურავი და უბრძანა:

— დღესვე იყიდე ორი მფრინავი რაში, ერთი აქლემი და იმ აქლემის საპალნე ძვირფასი ფარჩა-აბრეშუმი. იყიდე მხოლოდ შენი ფულით. სხვისა ერთი გროშიც არ შეურიო, თორემ ცოცხალი ვერ გადამიჩრებიო.

მოურავმა უკანასკნელი გროშები ამოყარა საფულედან

და რაც ბატონმა უბრძანა, ყველაფერი იყიდა. რა თქმა უნდა, ამდენი ზარალი გულს უკლავდა, მაგრამ თავს იმით იიმედებდა, რომ ის გრძნეული ქალი ქვრივის შვილს ცოცხალს აღარ გამოუშვებს და გლეხის ცუგრუმელა გოგო მე დამრჩებაო.

მაგრამ მოურავი ამჯერადაც მოტყუვდა. წაიყვანა ქვრივის შვილმა ფარჩააკიდებული აქლემი და პირდაპირ გრძნეული ქალის დას მიაყენა კარზე. მიართვა ქალს ძვირფასი საჩუქარი და მისვლის მიზეზი და გასაჭირიც შესჩივლა, ქალმა უთხრა:

— რაკი ამდენი ძღვენი გაიმეტე ჩემთვის, ვალში არც მე დაგრჩები: ჩემი და შუალამისას ყოველ ღამე ჩემთან გამოდის და ვახშამს აქ მიირთმევს. დღესაც გამოვა, შენ დაიმაღე, ვახშამზე მე ძილის წამალს შევაპარებ და დავაძინებ. ნაშინ ორივემ გავთოკოთ და დავაკრათ რაშს. ოღონდ ძალიან ჩქარა უნდა ატარო, თორემ თუ გზაში გაეღვიძა, თავს აიწყვეტს და ცოცხალი ვეღარ გადაურჩებო.

დამალა ქალმა ქვრივის შვილი და დის მოლოდინში ვახშამის სამზადისს შეუდგა. შუალამემ რომ მოატანა, გრძნეული დაც მოვიდა. ისეთი ლამაზი იყო, ისეთი, რომ სულ მზესავით ანათებდა. გადაიძრო ოქროთი მოსირმული მოსასხამი და დას უთხრა:

— დაო, ადამიანის სუნი მომდის, იცოდე, ღალატი არ იყოს, თორემ ცოცხალი ვერ გადამირჩებო.

დამ შეჭფიცა, აქ კაცის შვილს რა უნდაო, და სუფრა გააწყო. მოუსხდნენ დები სუფრას და ერთმანეთში საუბარი გააბეს. ბიჭი სახლის ბნელ კუნჭულში იჯდა და დებს სულგანაბული გამოჰყურებდა. გრძნეულმა დამ წყალი მოითხოვა, მეორე და წამოდგა, თუნგით მოურბენინა და თან ჩუმად შიგ ძილის წამალი ჩაურია. გრძნეულმა დალია წყალი და მაშინვე ძირს გაიშოტა.

გამოვიდა სამალავიდან ქვრივის შვილი. ქალს ხელ-ფეხი გასანთლული აბრეშუმის თოკით შეუკრეს და ერთ-ერთ რაშზე დააკრეს. ქვრივის შვილი მეორე რაშზე თვითონ შეჯდა და გაუდგა გზას ბატონის სახლისაკენ. ის იყო, მიაწია კი ბატონის სამფლობელოს, რომ ქალს უცბად გამოეღვიძა.

ერთი საშინლად დაიწივლა, მიგლიჯ-მოგლიჯან თოკები და უკანვე გამოიქცა.

დაღონდა ბიჭი ძალიან, რომ ამდენმა შრომა-ტანჯვამ ტყუილად ჩაუარა. უცბად დაძმობილებული არწივები მოაგონდა, ამოიღო მათი ფრთები და ახსენა. სამივენი იმავე წამს იქ დაიბადნენ და ჰკითხეს — რა გაგჭირვებიაო?

ბიჭმა უთხრა, რაც უჭირდა, და არწივებმაც აღარ დაახანეს, გაშალეს ფრთები, ქალს შუა გზაშივე წამოეწივნენ და შებოჭილი უკანვე მოუყვანეს.

ქალმა უთხრა ქვრივის შვილს:

— რაკი ამდენი შეგძლებია, რომ ეს არწივებიც შენს მხარეზე არიან, მეც შენი მშველელი ვიქნები, მიმიყვანე შენს ბატონთან, ბატონისა და მოურავის ჯავრს ამოგყრი და შენ შენს ბედს ეწიეო.

ამის შემდეგ ქალი უკვე თავისით გამოჰყვა და მოვიდნენ ბატონის სახლში. ბატონმა რომ მზეთუნახავი ქალი დაინახა, სიხარულით მთლად გადაირია, მოურავს კი გულს შემოეყარა, მაგრამ ერთიც და მეორეც ნაადრევად წუხდნენ და სარობდნენ. ქალი შივიდა ბატონთან და ჰკითხა:

— რა გინდა, რატომ მოაყვანივე ჩემი თავიო?

— ცოლად უნდა დაგისვაო, — მიუგო ბატონმა.

— მე ვინ მომიყვანაო? — იკითხა ქალმა.

— ჩემმა მონადირემაო — მიუგო ბატონმა.

— ეს გველესაპის ძვლების სახლი ვინ ააშენაო? — კვლავ ჰკითხა ქალმა.

— ჩემმა მონადირემაო. — ბატონმა მიუგო.

— ეს იადონი და ბულბული ვინ მოიყვანაო?

— ჩემმა მონადირემაო.

— ეს ირმის ტყავი ვილამ მოიტანაო?

— ეგეც ჩემმა მონადირემაო.

— მაშ, შე ოხერო და მუდრეგო, აქყველაფერი ამ მონადირეს გაუკეთებია და შენ რა ხელი გაქვსო? — უთხრა საბოლოოდ ქალმა, შეუბერა სული და ბატონი და მოურავი კოლოებად აქცია. ერთი კოლო აქეთ გაფრინდა წუილით, მეორე იქით. რაკი ესენი მოიშორა ქალმა, ბატონის მთელი სახლკარი და ქონება-ცხოვრება ქვრივის შვილს დაულო-

ცა, უსურვა ბედნიერი ცხოვრება, გამოემშვიდობა და თავის  
ბროლის კოშკში დაბრუნდა.

ქვრივის შეიღმა მოიყვანა ცოლად გლეხის კოსტა გოგო,  
ქვრივი დედა ბატონის სასახლეში გადმოიყვანა და მარ-  
თლაც ბედნიერი ცხოვრება დაიწყო.

ჭირი — იქა, ლხინი — აქა,  
ქატო — იქა, ფქვილი — აქა.





## ხელმწიფე — მონადირე

იყო და არა იყო რა, ღვთის უკეთესი რა იქნებოდა. იყო ერთი სასელგანთქმული მონადირე. ჰყავდა ცოლი და ძუძუთა ბიჭი. მონადირე ყოველდღე ტყეში დადიოდა და ბევრ ნადირ-ფრინველსაც ხოცავდა. ნანადირევს ნაწილს შინ იტოვებდა, ნაწილს ყიდდა და ოჯახს დაუყვედრებელ ლუკმას აჭმევდა. ცხოვრობდა ტკბილად პატარა ოჯახი, მაგრამ დაუნდობელმა წუთისოფელმა ბედნიერება დიდხანს არ შეარჩინა, ერთ დღეს მონადირე გარდაიცვალა და ოჯახის მთელი სიმძიმე ახალგაზრდა ქალს დააწვა.

ქალი არ დაიბნა, სახლში ფრინველი და საქონელი გაიჩინა და ობლის გაზრდას შეუდგა. ბიჭი ჯანსაღი და ღონიერი იზრდებოდა, ერთი თვისა ერთი წლისას ჰგავდა, ერთი წლისა — ათი წლისას და ჭამაც ისეთივე უნდოდა. მარტოხელა დედას სულ უფრო უჭირდა შვილის შენახვა და სულ იმის ნატვრაში იყო, ჩქარა გაიზარდოს და თავისი თავი თვითონ არჩინოსო. მართლაც, გახდა თუ არა თხუთმეტი წლისა, დედას ჰკითხა:

— მამაჩემი რა ხელობის კაცი იყო?

— მონადირე იყო, — მიუგო დედამ.

— მაშ, მეც მონადირე უნდა გავხდეთ, — თქვა ბიჭმა, კედლიდან მამისეული თოფ-სასწრაფო ჩამოიღო და სანადიროდ წავიდა. პირველ წასვლაზევე ხელიღბლიანად ინადირა და ამით წათამამებულს თოფი ხელიდან აღარ გაუშვია. ყოველდღე მიდიოდა ტყეში, მიჰქონდა ნანადირევი და დედასაც და თავის თავსაც გაუჭირვებლად ინახავდა.

ერთხელაც ჩვეულებრივ წავიდა ტყეში სანადიროდ, იარა



მთელი დღე, მაგრამ ვერაფერი მოკლა. ხელმოცარული ბოლოს ერთ ყვავილნარით შემკულ ველში გავიდა. ველში ერთი ლამაზი შველი ბალახობდა. ბიჭს გაუხარდა შველის დანახვა, იფიქრა, ამას მაინც მოვკლავო და თოფი ესროლა. შველი ფეხში დაიჭრა და კოჭლობით შევარდა ტყეში. ბიჭი გაეკი-  
და იმ იმედით, დაჭრილია, და შორს ვერ წავაო.

მიკელანობს შველი და მისდევს ბიჭიც უკან, ტყეში შველი ხან გამოჩნდება, ხან თვალს მიეფარება. ბოლოს ერთ კლდეს მიადგა და გამოქვაბულში შევარდა. ბიჭიც ფეხდა-  
ფეხ მიჰყვა, მივიდა გამოქვაბულთან, უნდა შეჰყვეს შიგ, მაგრამ უცბად თვალნაკრავივით შეჩერდა: გამოქვაბულში ერთი მზეთუნახავი ქალწული იჯდა. შველს ნატყვიარ ფეხს უხვევდა და თან გაჯავრებული ხმამაღლა იწყევლებოდა:

— ნეტა ვის გაუხმა ხელი, რომ შენ სასიკვდილოდ გაგი-  
მეტა? იმ არ გასახარებლმა, ამ ტყეში შენს მეტი ვერაფერ ნა-  
საო? — ასეთი სიტყვებით გააგრძელა ქალმა წყევლა. ბიჭმა  
ითმინა, ითმინა და ბოლოს გამოეპასუხა:

— რა იყო, ქალბატონო, ასე უღმერთოდ რომ იწყევლე-  
ბი, მე ხომ არ ვიცოდი, რომ ეგ შველი შენი იყო?

ქალმა მოიხედა და შეკრთა, მაგრამ როცა კარგად და-  
აკვირდა ახალწვერულვაშაშლილ, ოცი წლის ლამაზ ჭაბუკს,  
მოეწონა და გული დაიმშვიდა. ჰკითხა:

— ვინა ხარ და ამ ტყეში რისთვის დადიხარო?

ბიჭმა უთხრა, ვინც იყო, ქალს უფრო მოეწონა, გვერდით  
მოისვა და უთხრა:

— ამ გამოქვაბულში რომ დავსახლდი, ფიცრი დავდე, —  
ვინც პირველად მომაგნებდა და შემოვიდოდა ჩემთან, ცო-  
ლად იმას გავყვებოდი. აი, შენ პირველმა მომაგენი, პირვე-  
ლი შემოხვედი ჩემს გამოქვაბულში და, თუ თანახმა იქნები,  
ცოლად წამოგყვებიო.

ქალი მზეთუნახავი იყო და ბიჭი უარს რაზე იტყობდა,  
უკვე დროც ჰქონდა ქორწინებისა, — ოცი წელი შეუსრულ-  
და და მშრომელი კაცის კვალობაზე, ოჯახს უნდა მოჰკიდე-  
ბოდა. ის ღამე ქალთან გაათენა, მეორე დილას წამოიყვანა  
და მოიყვანა დედასთან. დედას უზომოდ გაუხარდა შვილის  
გაბედნიერება და შეძლებისდაგვარად კარგი ქორწილიც გა-

დაუსადა. დაიწყეს ერთად ცხოვრება და ერთმანეთში დიდი სიამტკბილობა ჰქონდათ, თავს სამივენი ბედნიერად თვლიდნენ, მაგრამ შეურყევლად არც ეს ბედნიერება შეჩერათ. მალე სახელმწიფოში ხმა გავარდა, მავან და მავან მონადირეს ისეთი ლამაზი ქალი უზის ცოლად, რომ დღეც კი ანათებსო. ქალის ქება ხელმწიფის ყურამდღაც მივიდა. ხელმწიფეს შური აღეძრა და ქალის ხელში ჩაგდება განიზრახა. დაიბარა ერთ დღეს მონადირე და უბრძანა:

— უნდა წახვიდე და გორშელმის ტყიდან შეშა მომიტანო.

გორშელმის ტყე ორი ცხრათავიანი დევის საკუთრება იყო, ხელმწიფეს იმედი ჰქონდა, ბიჭს დევები შეჭამენ და ლამაზი ქალი მე დამრჩებაო.

მონადირე უყოყმანოდ დათანხმდა, — მოვალე ვარ, ჩემი ხელმწიფის ბრძანება შევასრულოო, — უთხრა, — ოღონდ მე ცოლი და დედა მყავს და იმათ ჩემს მეტი მარჩენალი არავინ გააჩნიათ, თუ პირობას მომცემთ, რომ სასმელ-საჭმელს არ მოაკლებთ, წავალ, თუ არადა ვერ წავალო.

ხელმწიფე დაპირდა, — შენს დაბრუნებამდე არაფერს მოვაკლებო.

ბიჭმა გამოართვა ერთი კვირის საგზალი — სამი ხარი, თორმეტი ცხვარი, თორმეტი თონე პური და თორმეტი ჩაფი დეინო, გამოეთხოვა ცოლსა და დედას და გასწია გორშელმის ტყისაკენ. ტყეში ერთი წყარო მონახა და ბინა იქ დაიდო. დაანთო ცეცხლი, დაკლა ერთი ხარი, და გემრიელად ისადილა, მერე აიღო ცული დაერია ხეებს და სულ ლაწალუწი აუყენა.

გაიგონეს დევებმა ხეების ლაწალუწი და გაკვირვებულებმა ერთმანეთს უთხრეს: ნეტა ვინ არის, რომ ჩვენს ტყეში შემოსვლა გაბედაო? გამოვიდა ჯერ უფროსი ძმა და ბიჭს დაუძახა:

— როგორ ბედავ ჩვენს ტყეში ხის მოჭრას, არ იცი, ახლოს რომ მოვიდე, ერთ ლუკმად არ მეყოფიო?!

მონადირემ უბასუხა:

— თუ ასეთი გულადი და ღონიერი ხარ, ახლოს მოდი და ისე ვილაპარაკოთო.

გაბრაზდა დევი და გამოქანდა ს. დასწრო, სტაცა კისერში ცალი ხელი და იმას, რაც შენს სუ-  
მორე ხელით წნელი მოტეხა, დაგრიხა, დევი, და თვითონ შეშის ჭრა განაგრძო.

დაინახა ეს უმცროსმა ძმამ და ახლა ის გამოეწინდორში. აი-  
ნადირისაკენ მუქარით, მონადირემ იმასაც ისე უპასუხა. წავი-  
ასეთი გულადი ხარ, ახლოს მოდი და მერე ვილაპარაკებ და სახ-

მოვარდა გაცეცხლებული დევი და ეცა ბიჭს. ბიჭმა დაი-  
საც მოუგრიხა კისერი, თავი მიწას უხალა, დაგრიხა წნელი და  
და ისიც უფროსი დევის გვერდით მიაბა. თვითონ ისევე შე-  
შის დამზადება განაგრძო.

შეშის ჭრას რომ მორჩა, დაგლიჯა უზარმაზარი ჭადრე-  
ბი და მარხილი გააკეთა, მარხილზე შეშა დაუდო და შიგ  
ძმები დევეები შეაბა. მერე გამოსჭრა ერთი იფნის ლატანი,  
დაჯდა თვითონაც მარხილზე, გადაუჭირა დევეებს ზურგზე  
იფნის ლატანი და ხელმწიფის ეზოში სრიალ-გრიალით შე-  
რეკა.

ხელმწიფემ რომ ეს დაინახა, თან გაკვირდა და თან ბრა-  
ზისაგან ცეცხლი მოეკიდა: ერთი უყურეთ, ეს რა უქნია, მე  
მეგონა დევეები შეჭამდნენ, ამას კი თვითონვე დაუმორჩილე-  
ბია და ხარებივით უღელში შეუბამსო.

რაღა იქნებოდა. დარჩა ხელმწიფე გაწბილებული. მონა-  
დირემ თითო ლატანი კიდევ გადაუჭირა დევეებს, თან გა-  
აფრთხილა, — ამიერიდან კაცთაგანს აღარაფერი დაუშაო-  
თო, — და ეზოდან გაყარა.

დაბრუნდა შინ მონადირე და ისევ თავის ხელობას — ნა-  
დირობას მიჰყო ხელი. გავიდა დრო. ხელმწიფე მანც ვერ  
ისვენებს, უნდა, მზეთუნახავი ქალი როგორმე ხელში ჩაიგ-  
დოს. მისი დასაკუთრების სურვილი დღე და ღამე არ ასვენებს.  
ბოლოს დაიბარა ისევე ახალგაზრდა მონადირე და  
უბრძანა:

— წადი იქ, არ ვიცი — სად, მოიყვანე ის, არ ვიცი — რა  
ამ დავალების შესრულებისათვის ერთი წლის ვადას გაძღვე,  
და თუ ამ ხანში ვერ შეასრულებ, თავს მოგჭრიო.

მონადირე ახლაც უყოყმანოდ დათანხმდა, ან რა უფლებ  
ქონდა, რომ ხელმწიფის ბრძანება არ შეესრულებინა?

დაუსადა. დაიწყეს ერთობარუნებამდე ჩემს ცოლს და დედას სიამტკბილობა ჰქონდათ. ხელმწიფე შეპვირდა, — ჩიტის რძეთვლიდნენ, მაგრამ. — მონადირემ მოამზადებინა საგზალი ჩათ. მალე სახას.

ნადირეს ისწავრამ სად მიდის, ან რისთვის, თვითონაც არ ანათებსო. ქი ვინც კი შეხვდება, ყველას ეკითხება: ხომ არ მწიფეს შუდ ვიპოვი იმას, რაც ხელმწიფემ დამავალაო?

დაიბარა დაგავალაო? — ეკითხებიან მგზავრები.

— რა დამავალა და — ეშმაკმა რომ არ იცის იმისი თავი: „წადი იქ, არ ვიცი სად, მოიყვანე ის, არ ვიცი — რაო“?

ყველას უკვირს, მაგისთანა რამ არც ყურით გაგვიგონია და არც თვალთ გვინახავსო.

გულდაწყვეტილი მონადირე კი მიდის და მიჰყვავს გზას. საგზალი გამოვლია, თავს ნადირობით ირჩენს და მიდის. ბოლოს ერთ აყრილ ჭალაში შევიდა. გაჰყვა მდინარის ნაპირს და შლამში ერთ კუს წააწყდა. მონადირემ იფიქრა, — გამიგონია, კუ ათას წელიწადს ცოცხლობს, და მოდი, ვკითხავ, იქნება იცოდეს რაში. — მიუახლოვდა კუს, დაუჩოქა და შეესვეწა:

— შენი ჭირიმე, კუვ, თუ მიშველი რამეს — შენ, თუ არა და — ვიღუბები, მალე წელიწადი შესრულდება და მე კი ჯერ ხელმწიფის დავალება არ შემისრულებიაო.

— მაინც რა დაგავალა ასეთით? — ჰკითხა კუმ.

— ხელმწიფემ ასეთი დავლება მომცა: „წადი იქ, არ ვიცი — სად, მოიყვანე ის, არ ვიცი — რა. გზაში ვინც შემხვდა, ყველას ვკითხე, მაგრამ ვერავინ ამიხსნა, იქნებ შენ იცოდე, და, მიყავი სიკეთე, გადამარჩინე თავის მოკვეთასო.

კუმ ერთი ისეთი გადაიხარხარა, რომ ჭალამ სულ ზანზარი დაიწყო, და მონადირეს უთხრა:

— ხუთასი წელია, რაც ამ მზიან ქვეყანაზე დავიარები და ასეთი რაღაც პირველად მესმის. — მერე ჩაფიქრდა და დაუმატა, — მოიცა, მოიცა, ერთ ადგილს გასწავლი და შენს საძებარს შეიძლება იქ მიაგნო: გაჰყევი თავქვე ამ ხეობას და ერთ ტრიალ მინდორში გახვალ. მინდორში ერთ უსაძირკვლო სახლს ნახავ, არც ბოძები აქვს, არც საბრჯენები და რაღაც ძალით ჰაერში არის გაჩერებული. თუ იმ სახლში ასე-

ლას მოახერხებ, მე მგონი, იქ იპოვნი იმას, რაც შენს სულელ ხელმწიფეს დაუვალებიაო.

გამოემშვიდობა მონადირე კუს და დაჰყვა ხეობას. იარა, იარა და ბოლოს მართლაც გავიდა ტრიალ მინდორში. აიხედა მაღლა და დაინახა ჰაერში გაჩერებული სახლი. წავიდა მონადირე ტყეში, დაგლიჯა უზარმაზარი ხეები და სახლის ქვეშ მოწიდა. როცა სამყოფი ხე-ტყე მოიძარაგა, დაიწყო კიბის კეთება. გააკეთა კიბე და ავიდა სახლში. შევიდა შიგ და ყველა ოთახი ძირისძირობამდე მოიარა. ოთახები კარგად იყო მოწყობილი, მაგრამ შიგ კაცის ჭაჭანება არ ჩანდა. მონადირემ იფიქრა, ეს სახლი და ამდენი ძვირფასეული უპატრონო არ იქნებაო და ერთ დიდ ოთახში ტახტის ქვეშ დაიმალა.

გავიდა ცოტა ხანი და ატყდა რაღაც ბრახაბრუსი, გაიღო კარები და ოთახში ცხრა დევი შემოვიდა. შემოუსხდნენ მაგიდას და ერთმა მათგანმა, რომელიც უფროსი იყო, დაიძახა:

— ბიჭო, კიმოთე, სადა ხარო?

— რას მიბრძანებ, ბატონოო! — მოისმა ხმა, მაგრამ კაცი არსად ჩანდა.

— პურ-მარილი შემოიტანე და სუფრა გაგვიშალეო! — დაიძახა უფროსმა დევმა.

— ამ წუთას მოგართმევო! — უპასუხა ისევ უჩინარმა ხმამ.

მართლაც, ერთ წამში გაიშალა სუფრა, რა გინდა სულო და გულო, შემწვარ-მოსხრაკული, ღვინო-არაყი თუ ტკბილეული. დევები ეცნენ სანოვაგეს, სვეს, ჭამეს და კარგად რომ შეზარხმდნენ, ისევ უჩინარ კიმოთეს დაუძახეს:

— მოგვიტანე დოლი, დაუკარი, დაფა-ზურნა და ერთი კარგად ვიცეკვოთო.

მართლაც, გაჩნდა დოლი, ზურნა-დუდუკი და დევებმა დაიწყეს ცეკვა. ცეკვა-თამაშითაც რომ გული იჯერეს, დაწნენ და დაიძინეს. მამლის ყვილამდე ეძინათ, მერე ადგნენ და სანადიროდ წავიდნენ. დევები რომ წავიდნენ, ახალგაზრდა მონადირეც გამოძვრა ტახტქვეშიდან და დაიძახა:

— ბიჭო, კიმოთე!

— რას მიბრძანებ, ჩემო ბატონო? — მოესმა ხმა.

— აბა, ერთი კარგი სუფრა გამიწყე, მშიერი ვარო, — უთხრა მონადირემ და სუფრაც იმავე წუთს განახლდა. დაიბანა პირი ბიჭმა, მიუჯდა სუფრას და დაიძახა, — მოდი, კიმოთე, შენც დამეწვიეო.

— დაგეწვევით, ბატონოო, — მიუგო კიმოთემ.

— აბა ერთი არაყი დამისხი და შენც გადაჰკაროო, — უთხრა ბიჭმა.

კიმოთემ დაისხა არაყი და დაიწყო ჭამა. ბიჭი ხედავს, რომ სუფრა ერთ მხარეს თანდათან ცარიელდება, მაგრამ კიმოთე თვითონ არა ჩანს. ბიჭმა კიდევ უთხრა, აბა, კიმოთე, ახლა ღვინოც დაისხიო.

დაისხა კიმოთემ ღვინო და დალოცა მონადირე:

— ღმერთმა დიდხანს გაცოცხლოს ამ სიკეთისათვის, ის დევები ლუკმა-პურს არ გაიმეტებენ. ჩემთვის, შენ კი გამაძღე და ღვინოც დამალეუინეო. — დალია კიმოთემ ღვინო და უთხრა, — შენ ძალიან კარგი ბიჭი ყოფილხარ და დღეიდან გვერდიდან აღარ მოგშორდები, სადაც წახვალ, მეც თან წამოგყვებიო.

მონადირე ცას ეწია სიხარულით: აი სწორედ ეს არის, რაც ხელმწიფემ დამავალა, — არ ვიცი სადა ვარ და არ ვიცი, ვინ მიმყავსო. და კიმოთეს უთხრა:

— ბარემ ახლავე წავიდეთ, თორემ ჩემი პირობის ვადა — ერთი წელი იწურება და ჩემი ხელმწიფე თავს მომკვეთსო.

წამოვიდნენ იმავე ხეობით. მონადირე კიმოთეს ვერ ხედავს და მალმალე დაიძახებს:

— კიმოთე, მოდისხარო?

— მოვდივარ, შენი ჭირიმეო! — უბასუხებს კიმოთე.

იარეს, იარეს და ბოლოს მოვიდნენ იმ ადგილზე, სადაც მონადირეს კუ შეხვდა. მივიდნენ კუსთან და მონადირემ უთხრა კიმოთეს:

— აბა, ჩემო კიმოთე, ამ კუმ დიდი სიკეთე მიყო და პატრივი რომ არა ვცეთ, დიდი სირცხვილია, ერთი შენებურად დატრიალდი და კარგი მსუყე სუფრა გაგვიშალეო.

გაშალა უჩინარმა კიმოთემ ნუგბარი საჭმელ-სასმელით

სავსე სუფრა. კუმ და მონადირემ კიმოთეც ისევ მიიწვიეს და კარგა იქეიფეს. მერე მონადირემ კუს მადლობა გადაუხადა და გამოემშვიდობა.

მოდინ ისევ კიმოთე და მონადირე. მონადირე მალმალე დაიძახებს:

— კიმოთე, მოდიხარო?

— მოვდივარ, ჩემო ბატონოო! — მიუგებს კიმოთე და მონადირეც ფესს ააჩქარებს. უხარია მონადირეს. რასაც ეძებდა, იპოვა, სიკვდილსაც გადარჩება და თავის მზეთუნახავ ცოლსა და დედასაც გაახარებს.

ერთ დღეს გზაზე ერთი კაცი შეხვდათ, გამოესაუბრნენ ერთმანეთს, გაეცნენ და გასდნენ სამნი. მონადირე და ეს უცხო კაცი ჩანან, კიმოთე არა ჩანს. ბოლოს ერთ თვალუწვდენელ მინდორში გავიდნენ და პურიც მოშივდათ. დაისვენეს ერთ ადგილას და მონადირემ დაიძახა:

— აბა, ჩემო კიმოთე, ერთი გემრიელი სუფრა გაგვიშალეო!

იმავე წუთს გაიშალა სუფრა და მგზავრი და მონადირეც მოუსხდნენ. მგზავრი გაოცებული იცქირება აქეთ-იქით: — საიდან გაჩნდა ეს სუფრაო. მონადირემ ყველაფერი აუხსნა, მაშინ მგზავრმა ჯიბიდან ერთი კოლოფი ამოიღო და უთხრა:

— მოდი, ეგ უჩინარი კიმოთე მე მომეცი და ამ კოლოფს მოგცემო.

— რა შეუძლია მაგ კოლოფსო? — ჰკითხა მონადირემ.

— ახლავე გიჩვენებ, რაც შეუძლნაო. — მიუგო მგზავრმა, გახსნა კოლოფი, გადაატრიალა მარჯვნივ და დაიწყო ჯარმა ამოდენა. ამოდის და ამოდის ჯარი, ქვეითი და ცხენოსანი, შესაფერი თოფ-ზარბაზნებით შეიარაღებული. გაივსო მთელი მინდორი, ტევა აღარ არის.

მონადირეს ძალიან მოეწონა კოლოფი, მაგრამ გაცვლაზე მაინც უარი უთხრა, მაშინ კიმოთემ თვითონ უჩურჩულა მონადირეს:

— ნუ გეშინია, გამცვალე და ისევ შენ დაგიბრუნდებიო.

მისცა მონადირემ კიმოთე მგზავრს და კოლოფი გამოარ-

თვა. მორჩნენ პურის ჭამას, გამოემშვიდობნენ ერთმანეთს და თავთავიანთი გზით წავიდნენ.

მგზავრმა და კიმოთემ კარგა მანძილი რომ გაიარეს, პური მოშივდათ. მგზავრმა უთხრა:

— აბა, კიმოთე, სუფრა გაშალეო.

კიმოთემ გაშალა სუფრა და ღვინოც ბლომად მოიტანა. მგზავრი ჭამს საჭმელს და კიმოთე ღვინოს უმარჯვებს. იმდენი ასვა, იმდენი, რომ მგზავრს თავი ჩამოუვარდა, სუფრის გვერდით გაიშოტა და ხვრინვა ამოუშვა. კიმოთესაც ეს უნდოდა, აკეცა თავისი სუფრა და მონადირეს დაეღვენა. მალე დაეწია და უთხრა:

— აი, ისევ შენთან მოვედიო.

იარეს, იარეს და ბოლოს მივიდნენ მონადირის სახლში. მონადირე გადაეხვია ცოლს, დედას, გადაკოცნა და თავისი თავგადასავალი უამბო. იმ ღამეს იქ მოისვენეს, მეორე დილას კი მონადირემ კიმოთე ხელმწიფესთან წაიყვანა. ხელმწიფემ შესედა მონადირეს და დაუყვირა:

— იყავი იქ, არ ვიცი — სად, მოიყვანე ის, არ ვიცი — ვინო?!

— ვიყავი და მოვიყვანე კიდეცო, — მიუგო მონადირემ.

— აბა სად არისო? — იყვირა ხელმწიფემ.

— აი, აქა ვარო! — დაიძახა ურინარიმა კიმოთემ და ხელმწიფეს ერთი ისეთი სილა გააწნა, რომ ტახტიდან ძირს ბრავგანი მოადენინა. წამოხტა გამწარებული ხელმწიფე, მაგრამ კიმოთემ ახლა მეორე ყბაში შემოჰკრა და ისევ ძირს დასცა. ბოლოს თვითონაც ზედ დააჯდა და დაუწყო უმოწყალო ცემა. განრისხებული ხელმწიფე იქნევს ხელებს, მაგრამ რას გახდება ურინარ კაცთან. ბოლოს ძალიან რომ შეწუსდა ხელმწიფე, მონადირეს სთხოვა:

— ოღონდ მომაშორე ეს რაღაც ურინარი, ნუ მომკლავს და ტახტსა და სახელმწიფოსაც შენ მოგცემო.

მონადირემ კიმოთეს უთხრა, ეყოფაო, და კიმოთეც შეეშვა ხელმწიფეს. ხელმწიფემ დანაპირები შეასრულა და ტახტი და სახელმწიფო იმავე დღეს მონადირეს გადაულოცა. მონადირემ დედა და მზეთუნახავი ცოლიც სასახლეში გადმოიყვანა და დაიწყო ტკბილი ცხოვრება. ურინარი კიმოთეც სულ



გვერდით ჰყავდა და, როცა კი მოუნდებოდა, გემრიელ სუფრას აშლევინებდა.

მაგრამ ლამაზი ცოლის პატრონს ხიფათი არ გამოეღევა. გავიდა ხანი და ასლა მეზობელი ხელმწიფე წაედავა. — ეგ შენი მზეთუნასავი ცოლი ან ნებით დამითმე, ან არადა, შემოგესევი ჩემი უძლეველი ჯარით და ძალით წაგართმევო. ხელმწიფე — მონადირემ დაუძასა კიმოთეს და ჰკითხა:

— როგორ მოვიქცეო?

— როგორ მოიქცე და, ძალას ძალა უნდა შეაგებო, — უთხრა კიმოთემ. — შეკრიბე ჯარი და მომზადებული დაუხვდი, სოლო თუ მაინც გაგიჭირდა, ჯადოსნური კოლოფი სომ ხელთა გაქვს, ერთი გადაატრიალე და იმდენი ჯარი ამოვა, რომ მთელ ქვეყანას წალეკავსო.

დაუჯერა ხელმწიფე—მონადირემ კიმოთეს და მოძალადე მეზობელს შეუთვალა:

— ნებით არ გაძლევ ცოლს და თუ ვაჟკაცი ხარ, ძალით წაიყვანეო.

განრისხდა მეზობელი ხელმწიფე და გამოემართა დიდძალი ჯარით. ხელმწიფე—მონადირემ და კიმოთემ გადაატრიალეს მარჯვნივ კოლოფი და ერთ წუთში მთელი მთა და ბარი შეიარაღებული ჯარით გაივსო. მეთაურებმა მეზობელი ხელმწიფის ჯარს საზღვრის გადმოლახვაც არ აცალეს, თვითონ შეიჭრნენ მის მიწა-წყალზე და მთელი სახელმწიფო ნაცარ-მტვრად აქციეს. დამარცხებულმა ხელმწიფემ თავს გაქცევით უშველა, მაგრამ კიმოთე უჩინარი მალე წამოეწია, სწვდა კისერში და დატყვევებული თავის ხელმწიფეს მიჰგვარა. ტყვე ხელმწიფემ დაუჩოქა ხელმწიფე—მონადირეს და შეესვენა:

— ოღონდ ეს ერთი შეცდომა მაპატიეთ, სიცოცხლე შემინარჩუნეთ და ამიერიდან თქვენზე ძვირს გულშიც აღარ გავივლებო.

ხელმწიფე—მონადირემ აპატია დანაშაული და გაუშვა. შემდეგ კიმოთე-უჩინარმა უთხრა ხელმწიფე — მონადირეს:

— უბრძანე სარდლებს, რომ ჯარი დასხან და ერთი მდიდრულად გაავუმასპინძლდეთო.


დასხეს სარდლებმა თავ-თავიანთი ჯარები. ჩამოუარა

კიმოთე უჩინარმა და ყველა ჯარის წინ მდიდრული სუფრა გააწყო. სამი დღე და ღამე აქეიფეს ჯარი და სარდლები, მერე გადაატრიალეს კოლოფი მარცხნივ და ისევ შიგ ჩაალაგეს.

ამ დღიდან ხელმწიფე — მონადირეს ველარც ერთი ხელმწიფე ველარ უბედავდა ძალადობას, თავის ერთგულ კიმოთესთან ერთად მშვიდად და უხიფათოდ ცხოვრობდა და სახელმწიფოსაც გონიერულად მართავდა.

ჭირი — იქა, ლხინი — აქა,  
ქატო — იქა, ფქვილი — აქა.





## ორი ფალავანი

იყო და არა იყო რა, იყო ერთი ხელმწიფე და ჰყავდა ერთი დევკაცა ფალავანი. დევკაცას იმიტომ ეძახდნენ, რომ სახე კაცისა ჰქონდა და ტანი კი დევისა — ჯაგრითა და ბალნით შემოსილი, აღნაგობითაც დევს უფრო ჰგავდა. ისეთი ღონიერი იყო, რომ მთელს სახელმწიფოში იმისი მომრევი არავინ მოიპოვებოდა. ხელმწიფე ძალიან ამაყობდა თავისი უძლეველი ფალავნით, მაგრამ ხელმწიფეთა გული ხარბია, და კიდევ უკეთესი უნდოდა. ქვეყნად მჯობზე მჯობს რა გამოლევსო, თქვა ერთხელ და ვეზირები სხვადასხვა სახელმწიფოში დაგზავნა, — დაიარეთ დედამიწის კიდე-განი და ჩემი ფალავნის მომრევი კაცი მომინახეთ. თუ იპოვით, წამოიყვანეთ და დიდად დაგასაჩუქრებთ, იმ კაცს კი ჩემ ფალავნად დავნიშნავ და გავაბედნიერებო.

წავიდნენ ვეზირები, დაიარეს მთელი ქვეყანა, მაგრამ დევკაცის დამჭიდებელი ფალავანი ვერსად მოხელეს. ყველა სახელგანთქმული ფალავანი ამას ამბობდა: თავი კი არ მომძულეხია, იმ ალქაჯთა ნაშიერს დავეჭიდოო. ის იყო, გულდაწყვეტილი ვეზირები უკან უნდა დაბრუნებულიყვნენ, რომ გზაზე ერთი მენახირე დაინახეს. ნახირში ორი ბულა კამეჩი დაჭიდებულყო და აღარ შევლდებოდნენ. მენახირე მივიდა, დასტაცა ხელი კამეჩებს კისრებში და ერთი აქეთა მორევში გადაიხროლა, მეორე — იქითა მორევში.

ვეზირებმა თვალები ჭყიტეს: იქნებ ამან მაინც გაბედოს დევკაცთან ჭიდაობაო. მივიდნენ ახლოს და სახელი ჰკითხეს. მენახირეს ტეტია ერქვა და ისეთი დაფლეთილ-დაგლეჯილი

ტანსაცმელი ეცვა, კაცისაგან არ შეისყდებოდა. მაგრამ ვე-  
ზირები რას დაეძებდნენ, ოღონდ დევკაცთან მოჭიდავე კაცი  
ეშოვათ, რომ ხელმწიფის საყვედური აეცილებინათ და სხვა  
არაფერი უნდოდათ. — უთხრეს ვეზირებმა:

— ასე და ასეა ჩვენი საქმე, დევკაცთან მოჭიდავე კაცს  
ვეძებთ და სომ არ წამოხვალო?

— წამოვალ კიდევ და იმ თქვენს დევკაცს ცალი ხელით  
ვათამაშებო, — მიუგო ტეტია მენახირემ.

წამოიყვანეს გასარებულმა ვეზირებმა და მოჰგვარეს  
ხელმწიფეს. ხელმწიფემ ჰკითხა: — რას იზამ, ეჭიდები ჩემს  
დევკაც ფალავანს, თუ ვერაო?

— რატომაც არა, — მიუგო ტეტიამ, — თქვენი დევკაც-  
ფალავანი ვინ ოხერია, რომ ვერ დავეჭიდო, ოღონდ ერთ  
თვეს დამასვენეთ, კარგად მაჭამეთ, კახური საფერავი მას-  
ვით და მერე მე ვიციო.

ხელმწიფემ ბრძანა, — ახლავე ტანსაცმელი გამოუცვა-  
ლეთ, დაბანეთ, გაასუფთავეთ, ნუგბარ-ნუგბარი საჭმელები  
მიართვით და არც თავანკარი კახური მოაკლოთო.

ტეტიამ დაიბნა, გასუფთავდა, დალაქთან თმა-წვერი  
გაიკეთა, ჩაიცვა ხელმწიფის გამოგზავნილი ჩოხა-ახალუხი  
და ისეთი ბიჭა დადგა, რომ კაცის თვალი უკეთესს ვერა-  
ფერს ნახავდა. ერთი თვე სულ სმა-ჭამასა და ნებივრობაში  
გაატარა და უფრო დამშვენდა, თვის თავზე კი წარუდგა  
ხელმწიფეს და მოასხენა:

— მზადა ვარ დავეჭიდო და გამომიყვანეთ ის თქვენი სა-  
ნაქებო დევკაც-ფალავანო.

ხელმწიფემ გამოიყვანა თავისი ფალავანი, ჭიდაობის სა-  
ცურებლად მთელი ქალაქი შეიკრიბა და დიდი წრე გააკეთეს.  
გადმოვიდა წრეში დევკაცი — შავი, ბალნიანი და მძიმედ  
ჩაბუქნა, გადმოსტა ტეტია-მენახირე — ვარსკვლავივით ვაჟ-  
კაცი და წრეს სულ მაღლა-მაღლა ფრენით შემოუარა. დას-  
ცხო ზურნამ და მოჭიდავენიც დაიტაკნენ. დევკაცი ილღიაში  
შეუვარდა და წელში მოტეხა დაუპირა, ტეტია კალმახივით  
გაუსხლტა, დასტაცა მხრებში ხელი, მოიქნია და წრის იქით  
გადაისროლა. საღხმა გამარჯვებულს სიხარულის ყიჟინა

დასცა, დევკაცს „ბაი-ბუ“ დასძახა და თავზე ქოქოლა გადა-  
აყარა, ხელმწიფემ კი ბრძანა, — დევკაცი თვალთ აღარ და-  
ნენახოსო!

წამოდგა დევკაცი და, როგორც კარგი ფალავნების წე-  
სია, ძმურად გადაეხვია ტეტია მენახირეს, თან გადაკოც-  
ნა, — ვაჟკაცი ყოფილხარ და ალალია შენზე გამარჯვე-  
ბაო. — მერე განზე გაიყვანა და უთხრა, — ოლონდ იცოდე,  
ხელმწიფე სამსახურს ბოლომდე არ დაგიფასებს, მალე შენ-  
ზე მჯობს მონახავს და შენც ჩემსავით მოგიშორებს თავი-  
დან. როცა გაგიჭირდეს, ჩემი სახელი ახსენე და, როგორც  
ვაჟკაცს, ყველაფერში დაგესმარებო.

დევკაცი წავიდა. ტეტია კი დარჩა სასახლეში და ახლა  
ის გახდა ხელმწიფის საყვარელი ფალავანი. წაუქცევს არა-  
ვის უშვებდა და ხელმწიფეც ძალიან ამაყობდა. შორს გაუ-  
ვარდა ხმა ხელმწიფის ახალ მოჭიდავეს, ყველას ტეტია ფა-  
ლავნის სახელი ეკერა პირზე და დიდი თუ პატარა მის ქებას  
გაიძახოდა.

ხელმწიფეს ერთი მზეთუნახავი ქალი ჰყავდა და ტეტია  
ფალავნის ქებამ ბოლოს მის ყურამდეც მიაღწია. გოგომ  
მოიწადინა ახალი ფალავნის გაცნობა და თავის ძიძას  
სთხოვა, როგორმე მომიყვანე და მაჩვენეო. ძიძამ დახმარე-  
ბა აღუთქვა და ტეტია ფალავანი იმავე საღამოს ხელმწიფის  
ასულს გააცნო. რაინდ ბიჭს და ლამაზ გოგონას ერთმანეთი  
შეუყვარდა და ძიძის შუამავლობით იმ დღიდან ერთმანეთ-  
თან მიმოსვლა დაიწყეს. ხელმწიფის ასული პირველ ვეზირ-  
საც მოსწონდა და გადაწყვეტილი ჰქონდა მისი ცოლად  
შერთვა. გაიგო ტეტია ფალავნისა და ქალიშვილის ამბავი  
და ჯავრისაგან ცეცხლი წაეკიდა, მაგრამ ტეტია ფალავან-  
თან რაკი პირისპირ ვერაფერს გახდებოდა, ლალატით განი-  
ზრახა მისი თავიდან მოშორება.

ერთ დღეს მივიდა და ხელმწიფეს უთხრა:

— დიდებულო ხელმწიფე, ქვეყანა ლამაზი და მოწყობი-  
ლი გაქვს, სახელი დიდი გაქვს, ხალხი მადლიერი გყავს,  
მაგრამ ერთი რამე მაინც გაკლიაო.

— რა მაკლიაო? — ჰკითხა ხელმწიფემ.

— სამთავრიან დევს ეზოში რომ უკრავების ვაშლი უდ-

გას, ისღა გაკლიაო, — უთხრა ვეზირმა, — ისიც რომ ბაღში გედგეს, ქვეყნად შენზე ბედნიერი აღარავინ იქნებაო.

უკვდავების ვაშლის ხსენებაზე მეფემ ყურები ცქვიტა და ვეზირს ჰკითხა:

— მერე და, ვინ მომიტანს იმ ხეს, ვინ არის ისეთი, რომ სამთავიან დევს შეებრძოლოს და დაამარცხოსო?

— თუ მოიტანს შენი ტეტია ფალავანი მოიტანს, თორემ სხვა არავინ მეგულებაო, — უთხრა ვეზირმა.

— ვაი, რომ მომიკლას და ფალავანიც დავეკარგო?! — დაეჭვდა ხელმწიფე.

ვეზირმა ცბიერად გაიცინა და ხელმწიფეს უთხრა:

— ფალავანს კიდევ იშოვი, მაგრამ იმ ხეს ველარაო.

შეგულიანდა ხელმწიფე, დაიბარა ტეტია ფალავანი და უბრძანა, — უნდა წახვიდე და, სამთავიან დევს ეზოში რომ უკვდავების ვაშლი უდგას, ის მომიტანოო.

— ბატონი ბრძანდებითო, — მიუგო ტეტია ფალავანმა, შემოირტყა ხმალი და წავიდა. მაგრამ საით წავიდეს, თვითონაც არ იცის. ამ დროს მოაგონდა დევკაცა ფალავანი, გაჭირვებისას დახმარებას რომ შეჰპირდა, იფიქრა, იქნებ იმან იცოდეს იმ დევის ადგილსამყოფელიო და ახსენა მისი სახელი. დევკაცა მაშინვე იქ გაჩნდა და ჰკითხა — რა იყო, ძმობილო, რა გაგჭირვებიაო?

ტეტია ფალავანმა უთხრა, — ასე და ასეა ჩემი საქმე, ხელმწიფემ სამთავიანი დევის ბალიდან უკვდავების ვაშლის მოტანა დამავალა და არც გზა ვიცი და არც კვალიო.

— ეგ ადვილი სამსახურიო — უთხრა დევკაცმა და სამთავიანი დევის სახლისაკენ მიმავალი გზა აჩვენა. მერე დაარიგა, — ის დევი ძალიან ღონიერია, მაგრამ შენ ველარაფერს დაგაკლებს, პირიქით, რაკი მოურევი, ყმობას შემოგფიცავს, ვაშლსაც მოგცემს და ბევრ სხვა სიმდიდრესაც შემოგთავაზებს, სამაგიეროდ სიცოცხლის შენარჩუნებას მოგთხოვს, მაგრამ შენ არ შეცდე და ცოცხალი არ გაუშვა, თორემ ცბიერია და რამე ხიფათს შეგამთხვევსო. — ბოლოს ისევ დახმარებას შეჰპირდა, — თუ გაგიჭირდეს, მახსენე და წამსვე შენთან გავჩნდებითო.

ტეტია ფალავანმა მადლობა გადაუხადა დევკაცას და წა-

ვიდა. ბევრი იარა თუ ცოტა იარა, ბოლოს მიადგა სამთავიანი დევის სახლ-კარს. შევიდა ეზოში და დაინახა უზარმაზარი ვაშლის ხე, ხეს ტოტები სულ თურაშაული ვაშლით ჰქონდა დახუნძლული. მივიდა ტეტია ფალავანი, წაჰკრა წიხლი და მთელი ვაშლი ძირს ჩამოაყრევინა. მერე მისდგა და დაუწყო ჭამა.

გამოიხედა დევმა ზედა სართულის ფანჯრიდან და თავის ეზო-კარმიდამოში უცხო კაცი რომ დაინახა, გაკვირვებულმა ჩამოსძახა:

— ვინა ხარ, დაუკითხავად ჩემს ეზოში რომ შემოსულხარ და ხილსაც მიირთმევო?

ტეტია ფალავანმა დევს ცერად შეხედა და უპასუხა:

— ძირს ჩამოდი და თავს გაგაცნობო.

ჩამოვიდა დევი ძირს და ეცნენ ერთმანეთს. გადიან და გამოდიან, ხან ერთი სჯობნის, ხან მეორე, დგას ერთი ქმენა და კბილების სრჭიალი. ბოლოს ტეტია ფალავანმა მოიკრიბა მთელი ძალ-ღონე, მოიქნია დევი, ჩაფლა მიწაში ყელამდე და ხმალიც იშიშვლა. დევი შეეხვეწა:

— ოღონდ ნუ მომკლავ და სამუდამოდ შენი ყმა ვიქნები, ვაშლის ხესაც მოგცემ და უამრავ თვალ-მარგალიტსაცო.

ტეტია ფალავანს შეებრალა დევი, მართლაც და, რა ვაჟკაცობაა, დამარცხებულის მოკვლათ, თქვა გულში და ხმალი ისევ ქარქაშში ჩააგო. ამოგლიჯა უკვდავების ხე, გაიდო მხარზე და წამოვიდა.

ცოტა მანძილი რომ გამოიარა, წინ უცებ ცეცხლის კოცონი გადაეღობა და გზა აღარ მისცა. უქცევს გზას ტეტია ფალავანი, მაგრამ თავს ვერ აღწევს — საითაც წავა, კოცონიც იქიდან გადაეღობება. რა ქნას, აღარ იცის, ცეცხლში შევიდეს — დაიწვება, არადა წინ წასვლის სახსარი აღარა აქვს. ამ ღროს მოაგონდა თავისი ძმობილი და ახსენა. დევკაცა მაშინვე იქ გაჩნდა, იძრო ხმალი, შემოუქნია კოცონს და მიწაზე სამთავიანი დევის თავი კი გაგორდა.

— ხომ გითხარი, ცოცხალი არ გაუშვა, თორემ ხიფათს გადაგყრდის-მეთქი, — უსაყვედურა დევკაცამ. — ახლა კიდევ ის ორი თავი გადაგეღობება წინ და თუ მე თვითონ არ გაგყვი, შინ დაბრუნება გაგიჭირდებაო.

მიდიან დევკაცა და ტეტია ფალავანი, წინ სასიფათო არაფერი ჩანს, — გზა სწორია, ამინდი წყნარი, მაგრამ უცბად ცა მოიღრუბლა და ისეთი ქარიშხალი ამოვარდა, რომ ხეცყეს სულ ლაწალუწი დააწყებინა.

იძრო სმალი დევკაცამ, მოუქნია ქარიშხალს და მიწაზე სამთავიანი დევის მეორე თავი გაგორდა.

გაქრა ქარიშხალიც და გაუდგნენ ისევ გზას. მიდიან, მიდიან და უცბად წინ უსარმაზარი თოვლიანი მთა აღემაართათ. მთიდან კრთი უშველებელი ზვაევი მოწყდა და არემარე თან წამოიღო. საცაა, უნდა დაეცეს ტეტია ფალავანს და გასრისოს, მაგრამ დაასწრო დევკაცამ, ფალავანს წინ ჩამოეფარა, იძრო სმალი, მოუქნია ზვავს და მიწაზე დევის მესამე თავიც გაგორდა.

— ახლა გზა ხსნილი გაქვსო, — უთხრა დევკაცამ, — მაგრამ იცოდე, ხელმწიფე კიდევ რამეს დაგაეალებს და, როცა გაგიჭირდეს, ისევ მე მახსენეო, — გადაკოცნეს ერთმანეთი და დაშორდნენ. დევკაცა თავის გზით წავიდა, ტეტია ფალავანი კი პირდაპირ სასახლისაკენ გამოეშურა, შეიტანა ვაშლის ხე ბაღში, ჩაჰკრა ფეხი მიწას, ჩაანგრია და დარგო. შევიდა ხელმწიფესთან და მოახსენა:

— უკვდავების ვაშლი მოვიტანე და, როგორც მიბრძანეთ, ბაღში დავრგე, გამობრძანდით და ნახეთო.

აჩვენა ხელმწიფეს ვაშლის ხე, თვითონ კი თავისი მზეთუნახავის სანახავად წავიდა.

ხელმწიფე სიხარულისაგან აღარ იყო, რომ ფალავანიც უვნებლად დაუბრუნდა და უკვდავების ხეც დაისაკუთრა, ვეზირი კი ბოღმით აივსო, რომ მისმა ფანდმა არ გასჭრა და ტეტია ფალავანი ცოცხალი გადარჩა. ერთ დღეს ჩვეულებრივ შევიდა ხელმწიფესთან და საუბარი გაუბა, ილაპარაკეს ამ მთისა, იმ მთისა და ბოლოს უთხრა:

— დიდებულო ხელმწიფე, ძალიან კარგია, რომ უკვდავების ვაშლი დაისაკუთრე, მაგრამ ოქროს ძუა-ფაფრიანი რაშებშებმული აღმასის ეტლიც რომ გქონდეს, უფრო კარგი იქნებოდაო.

— მერე და, სად ვიშოვო ასეთი ეტლიო? — იკითხა ხელმწიფემ.



— ეგ ეტლი ერთ ცხრათავიან დევსა აქვსო, — მიუგო ვეზირმა.

— მერე და ვინ მომიტანსო?

— ვინა და, შენი ტეტია ფალავანი. თუ სამთავიან დევს უკვდავების ვაშლი წაართვა, არც იმ დევის დაჯახნვა გაუჭირდებაო, — მიუგო ვეზირმა.

სელმწიფეს სიხარბისაგან კანკალი დააწყებინა: ალმასის ეტლი და ისიც ოქროს ძუა-ფაფრიანი რაშებშებმული ეს სომ მთელ სახელმწიფოდ ღირდა, და იმავე წამს ტეტია ფალავანი მოისმო.

შევიდა ტეტია ფალავანი და თავი დაუკრა, — რას მიბრძანებთო?

— უნდა წახვიდე და ცხრათავიან დევს რომ ოქროს ძუა-ფაფრიანი რაშებშებმული ალმასის ეტლი აქვს, ის მომიტანოო, — უთხრა სელმწიფემ.

— ბატონი ბრძანდებითო, — მიუგო ტეტია ფალავანმა, შემოირტყა ხმალი და წავიდა. მაგრამ სად წავიდეს, რომელ მხარეს ეძებოს ცხრათავიანი დევი, — არ იცის. თუ მიშველის ის ჩემი ძმობილი დევკაცა მიშველისო, — თქვა გულში და ახსენა მისი სახელი. დევკაცა მაშინვე იქ დაიბადა და ჰკითხა:

— რა გაგჭირვებიაო?

— ასე და ასეა ჩემი საქმე, სელმწიფემ ოქროს ძუა-ფაფრიანი რაშებშებმული ალმასის ეტლის მოტანა დამავალა და არ ვიცი, საით წავიდეო.

— ეგ ადვილი სამსახურიოაო, — უთხრა დევკაცამ და ასწავლა ცხრათავიანი დევის სახლისაკენ მიმავალი გზა. თან ძველებურად დაარიგა, — ის დევი სამთავიანზე უფრო ღონიერია, მაგრამ პირისპირ შენი მომრევი მაინც არ არის, ოღონდ იცოდე, ცოცხალი არ გაუშვა, თორემ გზაზე ხიფათს რასმეს დაგახვედრებს და დაგღუპავსო.

ტეტია ფალავანმა მადლობა გადაუხადა და წამოვიდა. იარა, იარა და მივიდა ცხრათავიანი დევის სახლში. დევი შინ არ იყო, ალმასის ეტლით სასეირნოდ იყო წასული. ტეტია ფალავანი დაჯდა ჭირქართან და დაუწყო ლოდინი. არ გასულა დიდი ხანი, რომ ეყენების წკრიალი და ცხენების

ფლოქების თქარათქური, გაისმა და ცხრათავიანი დევიც გამონდა — ეტლში ნებივრად მიწოლილიყო და ოქროს ძუა-ფაფრიან რაშებს მოუსტვენდა. დაინახა ჭიშკართან ტეტია ფალავანი და საზარლად დაიღრიალა:

— ვინ ხარ, რა სულიერი ხარ, რომ ჩემს სამფლობელო-ში შემოგიბედი, არ იცი, ცოცხალი ვერ გადამირჩებიო! ტეტია ფალავანმა ამასაც ისევე უპასუხა:

— ახლოს მოდი და თავს გაგაცნობო.

მოვიდა დევი, გადმოხტა ეტლიდან და დაეტაკნენ ერთ-მანეთს, მაგრამ რა დაეტაკნენ, — დედამიწამ ზანზარი დაიწყო, ფეხით ავარდნილმა მტვერმა მზე დააბნელა და ხვნეშა-ქშენამ მიდამო გააყრუა. ბოლოს ტეტია ფალავანმა მაინც დასძლია, მოიკრიბა ძალ-ღონე, მოიქნია დევი და კისრამდე მიწაში ჩაფლა. გაიძრო ხმალი, რომ თავები დაეყრევინებინა, მაგრამ დევი შეეხვეწა:

— ოღონდ ნუ მომკლავ, სიცოცხლე შემინარჩუნე და სა-მუდამოდ ყმად გაგიხდები, აღმასის ეტლსა და ამ რაშებსაც შენ მოგცემ და ბევრ სხვა სიმდიდრესაც დაგიმატებო.

ტეტია ფალავანს ეს დევიც შეებრალა. მართლაც და, რა ვაჟკაცობაა დამარცხებულის მოკვლავ, — თქვა გულში და ამოღებული ხმალი ისევ ქარქაშში ჩააგო. ჩაჯდა აღმასის ეტლში, აკრიფა სადავეები და გამოსწია ხელმწიფის სასახ-ლისაკენ.

გზა სწორი და ხალვათია, ამინდი წყნარი, მაღლიდან მზე ანათებს და ძირს ფოთლები და ყვავილები შრიალებენ. მოაქ-როლებს ტეტია ფალავანი დევისეულ ეტლს და არხეინად მო-ლიღინებს, მაგრამ უცბად სად იყო, სად არა, გზაზე მკვრი-ვი ნისლის ფენა დაიდო და ცხენებს თვალეზე ბინდივით აეფარა. წინ, ათ ნაბიჯზე, დედამიწა გაიხლიჩა და თვალ-ჩაუდგამი ფრიალო უფსკრული გაჩნდა. ტეტია ფალავან-მა ნისლში უფსკრული ვერ დაინახა და რაშებს კვლავ წინ მიერეკებოდა, ის იყო უფსკრულში უნდა გადაცვენილიყვნენ, რომ დევეკაცაც მოვარდა, სტაცა ხელი ცხენებს სადავეში და შეაჩერა. მეორე ხელით ხმალი იშიშვლა, დაჰკრა ნისლის ფენას და მიწაზე შუაგაკვეთილი ცხრათავიანი დევი კი გა-გორდა. დევეკაცას ეგრძნო ძმობილის დასალუბად განწირვა

და საშველად წამოსულიყო. ხმალი ჩააგო და ტეტია ფალავანს უსაყვედურა:

— კიდევ არ გაიგონე ჩემი დარიგება? არ იცი, რომ დანდობითა და შებრალებით მტერს ვერ მოიშორებ. მე რომ დროზე არ შემეტყო და არ მოგშველებოდი, ახლა ხომ მკვდარი იქნებოდით?

გამომშვიდობებისას კი უთხრა:

— ამის შემდეგ აღარაფერი ხიფათი არ მოგელის და მშვიდობიანად ივლი, ოღონდ იცოდე, თუ ხელმწიფე კიდევ რამეს დაგავალებს, უჩემოდ ფეხი არ გასდგაო.

ტეტია ფალავანს გზაზე მართლაც აღარავითარი ხიფათი არ შეხვედრია და ხელმწიფის სასახლემდე მშვიდობით იარა. შეიყვანა ეტლი ეზოში, ავარდა ხელმწიფესთან და მოახსენა:

— თქვენი ზრძანება შესრულებულია, გამობრძანდით და ოქროს ძუა-ფაფრიანი რაშებშებმული ალმასის ეტლი ჩაიბარეთო.

უნდა გენახათ ხელმწიფის სიხარული: ახტა და დახტა, ახტა და დახტა, ჩახტა ეტლში და რამდენჯერმე გააჭენ-გამოაჭენა. ჭენებით რომ გული იჯერა, ოქროს ძუა-ფაფრიანი რაშები გამოახსნევიან და ბროლის თავლაში დააბმევიან, ხოლო ალმასის ეტლი უკვდავების ვაშლის ქვეშ დააყენებინა.

ნათქვამია, მადა ჭამაში მოდისო, ხელმწიფემ ახლა უკვე თვითონ დაიბარა ვეზირი, ეტლი და რაშები აჩვენა და ჰკითხა:

— კიდევ ხომ არაფერია ქვეყნად ისეთი, რომ მე არა მქონდეს, მითხარი და ჩემს ტეტია ფალავანს დღესვე მოვატანინებო.

ვეზირსაც ეს უნდოდა, ოღონდ ტეტია ფალავანი როგორმე თავიდან მოეშორებინა და ჯოჯოხეთში გასაგზავნადაც არ დაინანებდა. უთხრა ხელმწიფეს:

— შავ ზღვაში ოქროსრქიანი უღელი კამეჩი რომ ბინადრობს, ახლა მხოლოდ ისინილა გაკლიათ, გაგზავნეთ თქვენი ტეტია ფალავანი და მოაყვანინეთო.

საწყალ ტეტია ფალავანს თავისი საყვარელი მზეთუნახავის ნახვაც აღარ დასცალდა. იმავე დღეს დაიბარა ხელმწიფემ და უთხრა:

— წადი და შავ ზღვაში რომ ორი ოქროსრქიანი კამეჩი ბინადრობს, ისინი მომირეკეო.

რა უნდა ექნა ტეტია ფალავანს, ხელმწიფის სიტყვას ხომ ვერ გადავიდოდა, და დათანხმდა. — ბატონი ბრძანდები-  
თო, — უთხრა, შემოირტყა თავისი ხმალი და წავიდა.

ტეტია ფალავანმა არც შავი ზღვა იცოდა და გამოსცდა თუ არა ქალაქს, მაშინვე დეეკაცას სახელი ახსენა. დეეკაცა წამსვე იქ დაიბადა და ჰკითხა:

— რა იყო, ჩემო ძმობილო, კიდევ რა დაგავალა ხელმწი-  
ფემო?

— რა და, შავი ზღვის ბინადარი ოქროსრქიანი კამეჩე-  
ბის მოყვანა დამავალაო, — მიუგო ტეტია ფალავანმა.

— ო, ეგ კი ცოტა ძნელი საქმე დაუვალეზია, — უთხრა დეეკაცამ, — მაგრამ, თუ ისე მოიტყევი, როგორც მე დაგარი-  
გებ, არც მაგის ასრულება გაგიჭირდება. ის კამეჩები ისე-  
თი ძლიერები არიან, რომ ვერც ძესორციელი და ვერც ჯა-  
დოსული სიანსლოვეს ვერ გაეკარება, მაგრამ ახლა თვითონ-  
ვე უჭირთ და, თუ იმ გასაჭირიდან დაიხსნი, უდავიდარა-  
ბოდ დაგმორჩილდებიანო.

ასწავლა შავი ზღვისაკენ მიმავალი გზა და დაარიგა: საქ-  
მე ის არის, რომ ის კამეჩები მუდმივად ზღვაში ცხოვრო-  
ბენ, მაგრამ რაკი ზღვის წყალი სასამელად არ ვარგა, დღეში  
ერთხელ წყლის დასაღვეად ხმელეთზეც გამოდიან. ახლა მათ  
სასამელ წყაროს რაღაც ბუზი დაპატრონებია და კამეჩებს  
წყაროზე აღარ უშვებენ — გამოვლენ თუ არა ზღვიდან კამე-  
ჩები, მაშინვე მიესევინან, დაეხვევიან ტანზე, შეუძვრებიან  
ყურებში, ცხვირში და მწყურვალესავე გააბრუნებენ. შენ მი-  
დი წყაროსთან, მონახე იმ ბუზების ბუდე და საღამოს, რო-  
ცა ყველანი შიგ შეიკრიბებიან, აიღე ერთი დიდი სიპი და  
მალლიდან დააფარე. დედაბუზი შეგეხვეწება, აგვიშივი და  
შენ არაფერს გაენებთო, მაგრამ არ დაუჯერო, თორემ მოგე-  
სევიან და თვალის დახამხამების უმალ გაგათავებენო.

წავიდა ტეტია ფალავანი და, როგორც დეეკაცამ დაარი-  
გა, სწორედ ისე მოიტყა: მივიდა წყაროსთან და ბუზების  
საბუდარი დაზერა. როცა დაღამდა და ყველა ბუზმა ბუდე-  
ში დაისაღამურა, ტეტია ფალავანმა ერთი უშველბელი ლო-

დი მონასა, მოიტანა და ბუდეს მალლიდან დააფარა. თვითონაც იქვე დაიმალა.

დილას გამოვიდნენ ზღვიდან კამეჩები და რაკი ბუზები აღარ დახვდათ, წყაროსთან უშიშრად მივიდნენ, მოიკლეს დიდი ხნის წყურვილი და დაიძასეს:

— ვინა ხარ, ვინ გვიყავი ეს სიკეთე, გამოჩნდი და სიკედელამდე შენი ყურმოჭრილი, ერთგული ყმები ვიქნებითო!

გამოვიდა ტეტია ფალავანი სამალავიდან და უთხრა, — ეს მე ვიყავი, მე მოგაშორეთ სატანჯველიო. — კამეჩები მივიდნენ და ხელები აულოკეს. ამ დროს ლოდქვეშიდან დედაბუშმა დაუძასა:

— ტეტია ფალავანო, აგვიშვი და შენ არას გავენებთ, პირიქით, აურაცხელ თვალ-მარგალიტს და სიმდიდრეს გარუქებთო!

— არაო, — ჩამოსძახა ტეტია ფალავანმა, — ორჯერ ვიწვნიე და მესამედ აღარ გავბრიყვდებითო, — და გამოირეკა ოქროსრქიანი კამეჩები. კამეჩები გულთმისნები იყვნენ და ხელმწიფის სასახლეს რომ მიუახლოვდნენ, ტეტია ფალავანს უთხრეს:

— შენ უკვე ჩვენი მეგობარი ხარ და არ შეიძლება ერთი საიდუმლო არ გაგიმხილოთ: შენი ხელმწიფე ხარბია, ხოლო მისი ვეზირი — შურიანი. სანამ ისინი ცოცხლები არიან, მოსვენება არ გელირსება. ამიტომ, როცა სასახლეში მიგვიყვან, ჩვენს ნებაზე მიგვიშვი და რასაც გავაკეთებთ, ხელი არ შეგვიშალოო.


მიიყვანა ტეტია ფალავანმა ოქროსრქიანი კამეჩები და სასახლის ეზოში შერეკა. დიდი და პატარა მათ სანახავად გამოვიდა. გამოვიდნენ ხელმწიფე და მისი ვეზირიც. დაინახეს თუ არა კამეჩებმა ხელმწიფე და ვეზირი, ერთი საშინლად დაიყროყინეს, გაქანდნენ და ერთი—ერთმა და მეორე—მეორემ ალესილ რქებზე წამოიცივეს.

ტეტია ფალავანმა ხელმწიფის მზეთუნახავ ასულზე იმავ დღეს ჯვარი დაიწერა და ხელმწიფედ დაჯდა. დეკაკაც სასახლეში მოიყვანა, პირველი ვეზირის სახელო უბოძა და სახელმწიფოში ულამაზესი ქალი ცოლად შერთო. დარჩათ ყველაფერი ტეტია ფალავანს და დეკაკაცას—სახელმწიფოც.

უკვდავების ვაშლიც, ოქროს ძუა-ფაფრიანი ცხენებშებმული  
ალმასის ეტილიც, ოქროსრქიანი კამეჩებიც და თავისი სიცო-  
ცხლის დღენი ტკბილად და მშვიდობიანად გალიეს.

ჭირი — იქ იყოს, ლხინი — აქ,  
ნაცარი — იმათ, ფქვილი — ჩვენ,  
დღეისთვის ესეც ვიკმართ,  
ხვალე გიამბობთ დანარჩენს.





## ქ ა ლ თ ა მ ზ ე

იყო და არა იყო რა, ღვთის უკეთესი რა იქნებოდა, — იყო შაში მგალობელი, ღმერთი ჩვენი მწყალობელი. იყო ერთი ხელმწიფე და ჰყავდა ცოლი და ერთი გოგონა, სახელად ქალთამზე. გოგონა საოცრად ლამაზი იყო, მზესავით ანათებდა და ეს სახელიც ამიტომ დაარქვეს. მოულოდნელად დედოფალი გარდაიცვალა და დარჩა თბლად ქალთამზე. ხელმწიფემ სხვა ცოლი მოიყვანა. დედინაცვალს ლამაზი ქალი იყო, მაგრამ ქალთამზე სჯობნიდა. დედინაცვალს შური კლავდა, სულ იმის ცდაში იყო, როგორმე ლამაზი გერი დაეღუპა და ქვეყნად მოქიშპე აღარავინ ჰყოლოდა. დედინაცვალს ერთი ჯადოსნური სარკე ჰქონდა, ყოველდღე ჩაიხედავდა შიგ და ჰკითხავდა:

— ჩემო სარკეე, საჭკრეტელო,  
სხვაგან კი ნუ გამამხელო,  
მითხარ, ეშხით, სილამაზით,  
შენ მჯობიხარ, თუ მე — შენო?

სარკე უპასუხებდა:

— შენც ლამაზი, მეც ლამაზი —  
ტანი ბროლი, უსურვაზი,  
შენ მჯობინი, მეც მჯობინი,  
ქალთამზე კი ასლამაზი.

დედინაცვალს უარესად ცეცხლი მოეკიდებოდა. ბოლოს ველარ გაუძლო შურს და ერთ დღეს ხელმწიფეს უთხრა:

— თუ შენს ქალთამზეს არ მომასორობ სახლიდან, მე შენთან გამჩერებელი აღარ ვარო.

ხელმწიფე ძალიან დაღონდა, მაგრამ ლამაზი ცოლიც არ ეთმობოდა. დაუძახა ქალთამზეს, მოეფერა, მოუალერსა და ნაზირ-ვეზირებს გადასცა, — რაც გინდათ ის უყავითო. ნაზირ-ვეზირებმა წაიყვანეს ხელმწიფის ასული და ერთ ტრიალ მინდორში გაუშვეს.

დარჩა საბრალო გოგონა მარტოკა ტრიალ მინდორში და წავიდა ბედის საძებნელად. იარა, იარა და, ტყეში ერთ მდიდრულად მორთულ სასახლეს მიადგა. თურმე ამ სასახლეში მაშრიყის ხელმწიფის შვილები — ცხრა ძმანი ცხოვრობდნენ და ყოველდღე სანადიროდ დადიოდნენ. ახლაც სანადიროდ იყვნენ, მაგრამ სახლის კარი ღია იყო. შევიდა შიგ ქალთამზე, სახლი დაგავა, დასარეცხი დარეცხა, დასაწმენდი დაწმინდა, ყველაფერი დააკრიალა, საჭმელი მოხარშა და სახლის სიღრმეში, ბნელ კუნჭულში დაიმალა.

სალამოზე მოვიდნენ ხელმწიფის შვილები და ყველაფერი რომ გაკეთებული დახვდათ, ძალიან გაუკვირდათ. თქვეს, მოდი, ხვალ ვუდარაჯოთ და გავიგოთ, ვინ არის ჩვენი კეთილისმყოფელიო.

ადგნენ დილას ხელმწიფის შვილები და, ვითომ სანადიროდ მივდივართო, სახლიდან თოფ-სასწრაფოებით აღჭურვილები გამოვიდნენ. იქვე, სახლის გვერდით ტყეში გავიდნენ და ხეებს ამოეფარნენ. ქალმა იფიქრა, ახლა კი შორს იქნებიანო, გამოვიდა სამალავიდან და ისევ სახლის დაგვადაკრიალებას შეუდგა. ძმები ფეხაკრეფით მიუახლოვდნენ სახლს და კარებში უცბად შეცვივდნენ. ქალთამზეს შიშისაგან ცოცხი გაუვარდა და კანკალი დააწყებინა.

— ნუ გეშინია, — უთხრეს ხელმწიფის შვილებმა, — ჩვენ ცხრა ძმანი ვართ, მაგრამ და არა გვყავს, ეტყობა, ღმერთმა გამოგვიგზავნა შენი თავი, რომ და გვეყოლოდა. დარჩი ჩვენთან, ღვიძლ დასავით შეგინახავთ და შენც ღვიძლ ძმებად მიგვიღეო.

დარჩა ქალთამზე ხელმწიფის შვილებთან. ძმებმა მართლაც ღვიძლ დასავით შეიყვარეს, სულ ეალერსებოდნენ, ეფერებოდნენ, ყოველდღე მოჰქონდათ ახალ-ახალი ფარჩის



კაბები, სამკაულები და თავს ევლებოდნენ. ნანადირევიდან ყველაზე უკეთეს ნაჭრებს შეურიქევდნენ და სანამ ჭამას არ დაიწყებდა, თვითონ პირს არ დააკარებდნენ. პაცივმა და კარგმა მოპყრობამ ქალი უფრო გაალამაზა და ნამდვილ ტყის ფერიას დაამგვანა. მოკლედ რომ ვთქვათ, იმაზე ბედნიერი ქალი ქვეყანაზე აღარ იყო:

ერთ დღეს დედინაცვალმა აიღო თავისი ჯადოსნური სარკე, ჩაიხედა შიგ და ჰკითხა:

— ჩემო სარკევ, საჭვრეტელო,  
სხვაგან კი ნუ გამამხელო,  
მითხარ, ეშხით, სილამაზით,  
შენ მჯობისარ, თუ მე — შენო?

სარკემ უპასუხა:

— მეც ლამაზი, შენც ლამაზი, —  
ტანი ლერწამ-უსურვაზი,  
შენც მჯობინი, მეც მჯობინი,  
ქალთამზე კი ასლამაზი.

დედინაცვალმა გველნაკბენივით შესტა:

— რაო? ქალთამზეო? ის გომბიო ხომ სახლიდან გავაგდებინე და ტყე-ღრეში ნათრევი და ჩამომტყნარი როგორღა მჯობიაო?

— შენ ეგრე გგონია, მაგრამ სულ ტყუილად, მაშრიყის ხელმწიფის შვილებს — ცხრა ვაჟკაცს დად უზის და ვარდივით იფურჩქნებაო, — მიუგო სარკემ.

დედოფალმა თქვა, სანამ ის მოქიშპე ცოცხალი იქნება, ვერ მოვისვენებო და სადღაც ერთი კუდიანი დედაბერი გამონახა, მისცა ერთი მოწამლული და ერთიც სალი ვაშლი და უთხრა:

— წადი, მაშრიყის ხელმწიფის შვილების სახლში, იქ ერთი ქალი დაგხვდება და ეს მოწამლული ვაშლი იმას შეაჭამე, სალი კი შენ შეჭამეო.

წავიდა კუდიანი ბებერი, იარა, იარა და მიადგა მაშრი-  
ყის ხელმწიფის შვილების სახლს. ძმები სანადიროდ იყენენ  
წასული და სახლში მარტო ქალთამზე იყო, ფარჩის კაბას  
ქარგავდა და ნელა ღიღინებდა.

— შვილო, შორი გზის მგზავრი ვარ და ცოტახანს და-  
მასვენეო.— ქალთამზე სიხარულით შეეგება და კარგადაც  
გაუმასპინძლდა. სადილის შემდეგ კუდიანმა დედაბერმა  
ამოიღო ვაშლები, საღი თვითონ დაიჭირა, მოწამლული ქალ-  
თამზეს გაუწოდა და უთხრა:

— შვილო, სამაგიეროს სხვა ვერაფრით გადაგიხდი, ამ  
ერთი ვაშლის მეტი არაფერი გამაჩნია და ეს მაინც მიირ-  
თვიო.

ქალთამზემ ხათრი ვერ გაუტეხა და ვაშლი გამოართვა.  
მოკბინა, რაღაც ლუტი გემო იგრძნო, და მაშინვე გამოაფურ-  
ტხა, მაგრამ საწამლავმა მაინც იმოქმედა და ქალი გულწა-  
სული გადავარდა. ბებერს ეგონა, ეგ არის, მოკვდაო, და  
უკან მოუხედავად მოძურწა.

საბედნიეროდ ძმები ჩქარა მოვიდნენ და თავზარი დაე-  
ცათ. ნახეს მოკბეირილი ვაშლი და ყველაფერს მიხვდნენ. იმ  
დღეს სწორედ ერთი მგელიც ჰყავდათ მოკლული, საჩქაროდ  
გაფატრეს მგელი, ამოაცალეს ნაღველი და დას პირში ჩა-  
აწვეთეს. მგლის ნაღველმა შხამი მოკლა, ქალთამზემ თვა-  
ლები გაახილა და ძმებს ყველაფერი უამბო. ძმები ძალიან  
შეწუხდნენ და გააფრთხილეს, ამის შემდეგ შინ აღარავინ  
შემოუშვაო.

დაბრუნდა კუდიანი დედაბერი და დედოფალს ახარა, შე-  
ნი მოქიშპე საიქიოში განისვენებსო. დედოფალმა გულ-  
უხედად დაასაჩუქრა ბებერი და თვითონაც გული დაიმ-  
შიდა.

გავიდა რამდენიმე ხანი და დედოფალმა ისევ აიღო თა-  
ვისი სარკე, ჩაიხედა შიგ და ჰკითხა:

— ჩემო სარკევ, საჭვრეტელო,  
სხვაგან კი ნუ გამამხელო,  
მითხარ, ეშხით, სილამაზით,  
შენ მჯობიხარ, თუ მე — შენო?

— მეც ლამაზი, შენც ლამაზი,—  
ტანი ბროლი-უსურვაზი,  
მეც მჯობინი, შენც მჯობინი,  
ქალთამზე კი — ასლამაზი!

— რაო?! — შეჰკივლა დედოფალმა, — ვინ ქალთამზე, რა ქალთამზე, ის ხომ მკვდარია და როგორღა მჯობიაო?

— ტყუილად გგონია, რომ მკვდარია, — უთხრა სარკემ, — ახლაც მაშრიყის ხელმწიფის შვილების სახლშია, ცხრა ძმა უფლისწული თავს ევლება და პირზე მზე და მთვარე გადასდისო.

გაცოფდა დედოფალი, დაიბარა ის კუდიანი დედაბერი, — აკი მითხარი, შე ქოფაკო, ქალთამზე მოკვალაო? — მისდგა და ერთი გემრიელად მიბერტყა, წაართვა, რაც საჩუქრად მისცა და კინწისკვრით გააგდო. ახლა სხვა ბებერი გამონახა, უფრო კუდიანი და ალქაჯი, იმას ორი ყურძნის მტევანი მისცა, ერთი მოწამლული, ერთი საღი და უთხრა:

— წაიღე ეს მტევნები და მაშრიყის ხელმწიფის შვილების სახლში მიიტანე, იქ ერთი ქალი დაგხვდება, მოწამლული მტევანი იმას აჭამე, საღი თვითონ შეჭამე. თუ ამას შემისრულებ, უხვად დაგასაჩუქრებო. წავიდა ჯადოქარი დედაბერი და წაიღო მტევნები. ბევრი იარა, თუ ცოტა, ბოლოს მიაგნო მაშრიყის ხელმწიფის შვილების სახლს და შევიდა. ძმები ისევ სანადიროდ იყვნენ და ქალთამზე მარტოკა იყო, ხელსახოცს ქარგავდა და ნელა-ლიღინებდა.

— შვილო, შორი გზიდან მოვდივარ და ცოტახანს დამასვენეო, — უთხრა დედაბერმა საცოდავი ხმით.

ქალთამზეს შეეცოდა დედაბერი და მაშინვე საჭმელი გამოურბენინა. დედაბერმა გემრიელად ისადილა და ყურძნის მტევნები ამოიღო, საღი თვითონ დაიტოვა და მოწამლული ქალთამზეს გაუწოდა.

— შვილო, ამის მეტი არაფერი მაქვს და მიირთვი, სამაგიეროს ამით მაინც გადაგიხდისო.

ქალთამზეს აღარც კი ახსოვდა წინანდელი ამბავი, გამოართვა და შეჭამა. გემო უცბად ვერ გაუგო და რამდენიმე მარცვალღი ჩაყლაპა. უცბად თვალთ-დაუბნელდა, მტევანი ხე-

ლიდან გაუვარდა და უსულოდ დაეცა. ბებერმა საჩქაროდ მოძურწა, ემანდ, ხელმწიფის შვილებმა არ მომისწრონო. სალამოზე მოვიდნენ ძმები და თავიანთი და რომ მკვდარი დახვდათ, მორთეს ზარი და ტირილი. მათი მწუხარების ხმა ცაში ადიოდა, იგლეჯდნენ თმა-წვერს, ისოკავდნენ პირს, მაგრამ მკვდარს რაღას უშველიდნენ. გაუკეთეს ძვირფასი კუბო, თვითონაც ძვირფასად ჩააცვეს, ჩაასვენეს კუბოში და ერთ წყაროს პირას დაასვენეს, ძმები დილა-საღამოს გადიოდნენ კუბოსთან და თავიანთ საყვარელ დას გულამოსკვნით დასტიროდნენ.

ერთ დღეს ამ ადგილებში მადრიბის ხელმწიფის შვილმა გამოიარა, სანადიროდ მიდიოდა და წინ მწვეარ-მეძებრები მიუძლოდა. მწვეარ-მეძებრები უცხად შედგნენ და წკმული გააბეს. ხელმწიფის შვილმა მხლებლებს უბრძანა, გაიგეთ, ძაღლებს რა აწუხებთო, წავიდნენ მსლებლები და ამბავი მოუტანეს, — აქ ერთი ანკარა წყარო ყოფილა, წყაროს პირას კუბო ასვენია და იმაზე წკმუტუნებენო.

წავიდა თვითონ ხელმწიფის შვილი და ნახა, რომ კუბოში ძვირფასად მორთული ქალი წევს. ხელმწიფის შვილს ისე მოეწონა ქალთამზის სახე, რომ კუბო თან წაიღო, მიიტანა შინ, დაასვენა ცალკე ოთახში და თქვა, სანამ უკვდავების წამალს არ ვიშოვი და ამ ქალს არ გავაცოცხლებ, არ მოვისვენებო.

ადგა და წავიდა, ბევრი იარა, მთელი ქვეყანა შემოიარა, მაგრამ უკვდავების წამალს ვერსად მიაგნო. ბოლოს დაღონებული ერთი ხის ძირას დაჯდა და ტირილი დაიწყო. უცხად ხის ფესვებიდან ერთი პაწაწინა წრუწუნა გამოძვრა და ხელმწიფის შვილს გაეთამაშა. ხელმწიფის შვილი ცრემლად იღვრება, ეს ბახალა კი ხან აქეთ გადაუხტება, ხან იქით და ათასნაირად ემანჭება. მოუვიდა გული ხელმწიფის შვილს, გაჰკრა ფეხი და სული გააფრთხობინა. გამოვარდა ბახალას დედა და ბიჭს წყევლა დაუწყო: შე მიწის შესაჭმელო, რა დაგიშავა ამ პაწაწინამ, რომ სასიკვდილოდ გაიმეტეო. მერე იქვე მიიბრბინ-მოიბრბინა, რაღაც ბალახი მოგლიჯა, მიუსვ-მოუსვა თავის მკვდარ შვილს, გააცოცხლა და სოროსაკენ კინწისკვრით გაიგდო.

ბიჭმა დაიმახსოვრა ის ბალახი, მივიდა, თვითონაც მოგ-  
ლიჯა ერთი ღერო, წაიღო შინ და ქალთამზეს მიუსვ-მოუსვა.  
ქალთამზე მაშინვე გაცოცხლდა, წამოდგა და თქვა, — სად  
არიან ჩემი ძმები, ან მე ვისთან ვარო?

— ჩემთან სარ და ჩემთან დარჩებიო, — უთხრა ხელმწი-  
ფის შვილმა და უამბო, როგორ იპოვა კუბო, როგორ გადმო-  
ასვენა თავის სასლში და მერე როგორ გააცოცხლა. ბოლოს  
კიდევ უთხრა, ცოლად მინდისხარ და უარს ნუ მეტყვიო.

ქალთამზესაც მოეწონა ხელმწიფის შვილი და დათანხმ-  
და. დაიწერეს ჯვარი და დაიწყეს ერთად ცხოვრება. ქმარი-  
ცა და დედამთილ-მამამთილიც თავს ევლებოდნენ, წლის  
თავზე ოქროსქორიანი ვაჟი გაუჩნდა და კიდევ უფრო შეიყ-  
ვარეს. ერთი სიტყვით, ისეთ ბედში ჩავარდა, რომ თავის  
ყოფას თვითონვე დანატროდა.

გავიდა დრო. ერთ დღეს ქალთამზეს დედინაცვალმა ჩვეუ-  
ლებრივ ჩაიხედა სარკეში და ჰკითხა:

— ჩემო სარკევ, საჭვრეტელო,  
სხვაგან კი ნუ გამამხელო,  
მითხარ, ეშხით, სილამაზით  
შენ მჯობიხარ, თუ მე — შენო?

სარკემ უპასუხა:

— მეც ლამაზი, შენც ლამაზი, —  
ტანი — ლერწამ-უსურვაზი,  
შენც მჯობინი, მეც მჯობინი,  
ქალთამზე კი — ასლამაზი.

დედოფალი მთლად კანკალმა აიტანა:

— როგორ თუ ქალთამზე? განა ისევ ცოცხალიაო?

— ცოცხალიც არის და ბედნიერიც, — უთხრა სარკემ, —  
მალრიბის ხელმწიფის შვილს უზის ცოლად და თავის ბედს  
თვითონვე დანატრისო. — დედოფალმა მაშინვე კუდიანი დე-  
დაბერი დაიბარა, ერთი კარგად მიბეგვა, — შე ქოფაკო და  
სულწაწყმედილო, აკი ქალთამზე მოვკალიო? — ცემით რომ  
გული იჯერა, ბოლოს უთხრა:

ასლავე წადი მალრიბის ხელმწიფის სასახლეში და რითაც იქნება და არ იქნება, იმისი რძალი დაღუპე, თორემ ერთ დღეს არ გაცოცხლებო.

ბებერს მეტი რა გზა ჰქონდა, დედოფლის სიტყვას როგორ გადავიდოდა, ადგა და წავიდა. ბევრი წვა-დაგვისა და სიარულის შემდეგ გავიდა მალრიბის ქვეყანაში და ხელმწიფის სასახლეს მიადგა. დაინახა ქალთამზე და იმისი ქმარი და საბრალლო ხმით შესწუწუნა:

— უპატრონო დედაბერი ვარ, თქვენს დღეგრძელობას, მიმიღეთ და ერთგულად გემსახურებითო.

ქალთამზემ თუმცა ვერც იცნო ბებერი, მაგრამ იმათგან დაშინებული იყო და ქმარს უთხრა: არ გინდა, მაგ ბებერს სასლში ნუ შემოუშვებო. მაგრამ ქმარმა არ დაიშალა, ხელმწიფის შვილი ვარ და ერთ ბებერსაც თუ ვერ შევიფარებ და ვერ შევინახავ, რაღა უფლისწული ვყოფილვარო.

ქალთამზემ ქმარს ზედმეტი სიტყვა ვერ შეჰკადრა და ბებერი სასახლეში მიიღეს. დედაბერმა მართლაც დიდი ერთგულება გამოიჩინა — ურეცხავდა, უგვიდა, უსუფთავებდა და ოქროსქორჩიან მემკვიდრეს ხომ სულ თავს ევლებოდა. ბოლოს ცოლ-ქმარს სთხოვა:

— თქვენ რატომ იფრთხობთ ძილს, მოდით, აკვანი მე დამიდგით და ბავშვს ღამ-ღამობით მე მოვუვლიო.

რაკი საეჭვოს ვერაფერს ხედავდნენ, ცოლ-ქმარი დათანხმდნენ და ბავშვის აკვანთან ბებერი დააწვინეს. ერთ ღამეს ადგა ეს კუდიანი დედაბერი, ბავშვს დანით ყელი გამოსჭრა და სისხლიანი დანა მძინარე ქალთამზეს ჩაუდო ჯიბეში.

გათენდა დილა. გაიგეს ბავშვის სიკვდილის ამბავი და მთელი სასახლე ფეხზე დადგა. ზოგი რას ამბობდა, ზოგი რას. ამ დროს დედაბერი წამოდგა და თქვა:

— ხალხნო, რატომ ვიმტვრევთ თავებს, გავუჩხრიკოთ ყველას ჯიბეები და ვისაც სისხლიანი დანა აღმოაჩნდება, ყმაწვილის მკვლეელიც ის იქნებაო.

გაუჩხრიკეს ყველას ჯიბეები და დანა ქალთამზეს აღმოაჩნდა. უფლისწულმა დედაბერს ჰკითხა, რა სასჯელი ეკუთვნის ამისთანა დედასო?

დედაბერმა უთხრა:

— ამისთანა დედას თვალები უნდა დასთხარო, ხელში მკედარი ყმაწვილი დააჭერინო და შორს სადმე გზაჯვარედინზე დასვა, რომ გამვლელ-გამომვლელმა ყველამ ზედ აფურთხოსო.

საბრალო ქალს მართლაც დასთხარეს თვალები და უბეში ჩაუყარეს, მისცეს ყელგამოჭრილი ყმაწვილი ხელში და მინდორში გზაჯვარედინზე დასვეს. გზაჯვარედინზე განუწყვეტილად მიმოდის ხალხი, ხედავენ შვილის მკვლელ დედას და შეუბრალებლად ლანძღავენ და აფურთხებენ. ქალთამზეს მობეზრდა ამდენი წამება, მაგრამ სად წავიდეს უსინათლო, სად გაექცეს ხალხს? ბოლოს ერთმა თეთრწვერა მოხუცმა ჩამოიარა და ჰკითხა:

— დაო და დედავ, განა რა დანაშაული ჩაიდინე ისეთი, რომ ასეთი მძიმე სასჯელი დაუდვიათ შენთვისო?

ქალთამზემ ყველაფერი დაუფარავად უამბო მოხუცს. მოხუცმა ჰკითხა, — სადა გაქვსო თვალები?

უბეში მიწყვიტაო, — მიუგო ქალთამზემ.

— ამოიღე და თავიანთ ადგილებზე ჩაისხიო, — უბრძანა მოხუცმა. ქალთამზემ ჩაისხა თვალები თავის ადგილას. ეს მოხუცი კეთილი ჯადოქარი იყო და ქალთამზეს სიალამართლე კარგად იცოდა. ამოიღო აბრეშუმის ხელსახოცი, მიუსვ-მოუსვა თვალებზე და გაუმთელა. მერე ყმაწვილსაც მოუსვა ყელზე და ისიც გააცოცხლა. ქალთამზე სიხარული-საგან აღარ იყო, ეხვეოდა მოხუცს მუხლებზე და კოცნიდა. ბოლოს მოხუცმა ხელი ერთ მხარეს გაიშვირა და უთხრა:

— ამ გზით წახვალ, ივლი, ივლი და ერთ ანკარა წყაროს მიადგები, ამოიღე პეშვით წყალი და წყაროს ირგვლივ მოასხი, მშვენიერი სასახლე გაჩნდება. შედი შიგ, შეიყვანე შენი ბირმშო და იცხოვრე. ნუ გეშინია, არც საჭმელი მოგაკლდება და არც ჩასაცემელ-დასახურავიო.

ეს თქვა მოხუცმა და გაქრა. ქალთამზემ, რა თქმა უნდა, აასრულა მოხუცის ნათქვამი და წავიდა, საითაც მიანიშნა. მართლაც, მიადგა ანკარა წყაროს, ამოიღო პეშვით და მიასხ-მოასხა. გაჩნდა მშვენიერი სასახლე ეზო-კარმიდამოთი და ბალებით. ქალთამზე შევიდა შიგ და დაიწყო ცხოვრება.

გავიდა დრო, ქალთამშვეს ოქროსქოჩრიანი შვილი იმდენად წამოიზარდა, რომ სანადიროდ სიარული შესძლო.

ერთხელ სანადიროში ერთმანეთს შემთხვევით შეხვდნენ ქალთამშვეს მამა, ქმარი და ეს ბიჭი. რა თქმა უნდა, ისინი ერთმანეთს არ იცნობდნენ, მაგრამ ერთიმეორე ძალიან მოეწონათ და გადაწყვიტეს სულ ერთად ვინადიროთო. დაიწყეს ერთად ნადირობა. მოკლავენ ნადირს, გაატყავებენ და მწვადებსაც ერთად შეექცევიან. შეეჩვივნენ ერთმანეთს, ერთხელ შვილმა უთხრა ქალთამშვეს:

— დედი, ნადირობაში ორი ხელმწიფე გავიცანი. დიდი ხანია, ერთად ვნადირობთ და მწვადებსაც ერთად შევექცევით, ერთხელ მინდა შინ მოვიწვიო და, თუ ნებას დამრთავ, ამ სალამოს მოვიყვანო.

— მოიყვანე, თუკი გიკადრებენო, — უთხრა დედამ.

წავიდა იმ დღეს სანადიროდ ყმაწვილი და შეხვდა ხელმწიფეებს. ინადირეს და მწვადიც შეიწვეს. ყმაწვილმა სთხოვა:

— თუ მიკადრებთ, ვახშმად მეწვიეთო.

ხელმწიფეები სიამოვნებით დათანხმდნენ. მიიყვანა ყმაწვილმა სტუმრები შინ. ქალთამშვემ დანახვისთანავე იცნო ქმარი და მამა, მაგრამ იმათ კი ვერ იცნეს. სანამ დედა ვახშამს გააკეთებდა, ბიჭმა სტუმრებს ეზო-კარმიდამო დაათვალიერებინა. ხელმწიფეები გაკვირვებულნი იყვნენ, ეს რა მდიდრები ყოფილანო. განსაკუთრებით მოეწონათ ლალის მტევნებით დახუნძლული ვაზები, რომლებიც სასტუმრო დარბაზში ასასვლელ კიბეს ასდევდა.

ვახშამზე ქალთამშვემ სტუმრებს სხვადასხვაგვარი ღვინო მოართვა და მათაც ძალიან ისიამოვნეს. ივახშმეს, იმუსაიფეს და დაიძინეს.

ქალთამშვე გამოვიდა, კიბის სეივანს ერთი ლალის მტევანი მოსწყვიტა და მძინარე ქმარს ჯიბეში ჩაუდო. გათენდა დილა, ხელმწიფეებმა მასპინძლებს მადლობა გადაუხადეს და წასვლა დააპირეს. ქალთამშვემ შეაჩერა სტუმრები და უთხრა:

— უკაცრავად კი ვარ, მაგრამ ჩემს ვაზს ერთი ლალის მტევანი აკლია და რომელმა მოწყვიტეთო?



ხელმწიფეები შეცბნენ, ყურძნის მოპარვას როგორ ვიკადრებდითო.

— მაშინ ნება მომეცით, ჯიბეები გაგინხრიკოთო, — უთხრა ქალთამშემ. გაუნხრიკა ჯიბეები და ყურძნის მტვევანი თავის ქმარს არ ამოაცალა ჯიბიდან? ხელმწიფეს ჭირის ოფლმა დაასხა და დაიფიცა, მე არ მომიწყვეტია, მძინარე როგორ შევძლებდი, ყურძნის მტვევნის მოპარვას და ჯიბეში ჩადებასო?

ქალთამშემ გაიციინა და უთხრა:

— თუკი ის შეიძლება, რომ მძინარე დედამ თავის შვილს ყელი გამოსჭრას და სისხლიანი დანა ჯიბეში ჩაიდოს, რატომ არ შეიძლება, მძინარემ ყურძენიც მოიპაროსო?

ხელმწიფე უფრო შეცბუნდა, ქალის ნათქვამი ენიშნა და ჰკითხა:

— ქალო, მგას რაზე ამბობო?

— აბა, შემომხედე, ველარ მცნობო? — უთხრა ქალთამშემ, — ან ეს ყმაწვილი არ გაგონდებაო? ეს ის ბავშვია, კუდიანმა დედაბერმა რომ ყელი გამოსჭრა და მე კიდევ ის დედა ვარ, სისხლიანი დანა ჯიბეში რომ ჩამიდო და ცილი დამწამაო.

ხელმწიფის შვილი ახლა კი მიხვდა, ვისთანაც ჰქონდა საქმე, და თვალცრემლიანმა ცოლი და შვილი გულში ჩაიკრა. ქალთამშემ ქმრის ალერსით გული რომ იჯერა, ახლა მამას მიუბრუნდა:

— გეტყობა, ველარც შენ სცნობ საკუთარ ქალიშვილს, აბა იცოდე, მე ის პატარა ქალი ვარ, სახლიდან რომ გამაძევე. იმის შემდეგ ჩემმა დედინაცვალმა სამჯერ მოსაკლავადაც კი გამიმეტა, მაგრამ აი, როგორც მხედავ, ახლაც ცოცხალი ვარო.

მამასაც ცრემლი მოერიო, თავისი ქალი გულში ჩაიკრა და პატიება სთხოვა. ქალთამშემ აპატიო და ყველანი გამხიარულდნენ. წამოიღეს სასახლიდან, რაც კი უნდოდათ, ღმერთს მადლობა შეხწირეს და წამოვიდნენ.

ქალთამშეს მამამ თავისი ცოლი და კუდიანი დედაბერი სასლიდან გააძევა, სიძე-ქალიშვილი და იმათი ოქროსქოჩ-

რინი ბიჭი კი თავის სასახლეში დააბინავა და ხელმწიფობაც იმათ გადაულოცა.

ამ დღიდან ქალთამშეს ბედნიერებას ერთი პაწია ჩრდილიც აღარ მისდგომია და, რაც იტანჯა და იმწუხარა, სიხარულით ერთი ასად აუნაზღაურდა. ტყუილად კი არ არის ნათქვამი: მართალ ადამიანს ღმერთი არასოდეს გასწირავს, ხოლო ბოროტს ბოროტება ბოლომდე არ შერჩება.

ჭირი იქ იყოს, ლხინი — აქ.  
ნაცარი — იმათ, ფქვილი ჩვენ,  
დღეისთვის ესეც ვიკმაროთ,  
ხვალე გიამბობთ დანარჩენს.





## უხეირო

იყო და არა იყო რა, ღვთის უკეთესი რა იქნებოდა, იყო შაშვი მგალობელი, ღმერთი ჩვენი მწყალობელი იყო ცოლ-ქმარი, ღარიბ-ღატაკი და უქონელი. შეეძინათ ვაჟი, ისიც ერთი უხიაგი, — მჭამელი და ღორმუცელა. ამიტომ სახელიც უხეირო დაარქვეს. ახალშობილს დედის ძუძუ პირს არ უსველებდა, ხოლო როცა ორი-სამი წლის გახდა, ერთ ჭამაზე თითო თონე პური-და თითო ცხვარი აღარ ჰყოფნიდა,

გაუჭირდა ღარიბ დედ-მამას უხეიროს რჩენა და ქალაქში წაიყვანეს, — ეგებ ვინმემ სამადლოდ აიყვანოს და გაზარდოსო. მართლაც, ხელმწიფემ აიყვანა და დაუწყო ზრდა, მაგრამ მისი რჩენა ბოლოს ხელმწიფესაც გაუჭირდა, მით უფრო მაშინ, როცა დასრულდა და დავაჟკაცდა. ასლა ცხვაური კი არა, ხარიც აღარ ჰყოფნიდა, — რამდენიმე სულს ერთად შეჭამდა და ზედ ამდენსავე ჩაფ ღვინოს დააყოლებდა, საბაზეები პურის ცხობას ვერ აუდიოდნენ და მზარეულები ხორცის მოხარშვას.

გაბეზრდა ხელმწიფე, სარჩო-საბადო აღარ შერჩა. დაიბარა ერთ დღეს უხეირო, მისცა ერთი ტომარა ფული, ერთი კარგად გაწყობილი ხარ-გუთანი და გამოისტუმრა თავის დედ-მამასთან, — წადი, ხანი მიწა, იშრომე და იცხოვრეო.

ხელმწიფეს უხაროდა, ეგ არის მოვიშორე თავიდანო, მაგრამ მისი სიხარული ნაადრევი გამოდგა. უხეირო დედ-მამასთან დიდხანს არ დარჩენილა, ან როგორ დარჩებოდა, — რას ჭამდა? რით ამოივსებდა უძირო მუცელს? სანამ ფული ჰქონდა, კიდევ არა უშავდა, მერე კი, როცა ფული გამოელაია,

ადგა და ისევ ხელმწიფისაკენ გასწია, შეალაჯა ეზოში და შესვლისთანავე საჭმელ-სასმელი მოითხოვა.

შეწუხდა ხელმწიფე. რა უნდა ექნა? ძალით ვერ გააგდებდა, იმიტომ, რომ ძალიან ღონიერი იყო და ეშინოდა, ემანდ არ გაბრაშდეს და მთელი სასახლე ნაცარ-მტვრად არ მიქციოსო.

რაკი სხვა საშველი ეერაფერი გამონასა ხელმწიფემ, ბოლოს ისევ ხერხს მიმართა, დაიბარა უხეირო და უთხრა:

— ცხრა მთას იქით უღრანი ტყე რომ არის, იქ უნდა წახვიდე და იმ ტყის შეშა მომიტანო.

ხელმწიფემ იცოდა, რომ ის ტყე ორი უძლეველი ძმის — თორმეტათვიანი დევების კუთვნილება იყო და ეგონა, ის დევები უხეიროს უსათუოდ მოკლავენ და მომაშორებენო.

— მომიტანეთ ცული და ახლავე მივდივარო! — დაიძახა უხეირომ.

მოუტანეს ხუთფუთიანი ცული, შემოჰკრა უხეირომ კედელს და მარილივით მიაფშენა, მოუტანეს ათფუთიანი, ისიც მიაფშენა, ბოლოს ოცფუთიანი ნარჩევი ფოლადის ცული გაუკეთეს, უხეირომ მოსინჯა ხელში ცული და მოეწონა, გაიდო მხარზე და გასწია დევების სამკვიდრო ტყისაკენ. შევიდა უშიშრად ტყეში და წიფლებსა და ჭადარ-კობიტებს სულ ლეწვა-მტვრევა აუყენა, — გაუდის ერთი ჩახჩუხი. გაიგეს დევებმა და ბრაზისაგან დორბლმორეულები გამოქანდნენ. დევებს ეგონათ, შეშინდება და გაიქცევაო, მაგრამ, თქვენც არ მომიკვდეთ, უხეირო არც შემკრთალა და არც ადგილიდან დაძრულა! სტაცა ხელი ორივე დევს, ამოიჩარა ხლიაში, აჰკიდა მთელი გაჩეხილი ხე-ტყე, დაირეკა სახრით და ხელმწიფის ეზოში სულ გუგუნ-გრიალით მიატანინა.

დაუძახეს ხელმწიფეს, გამობრძანდით და ერთი ნახეთ, უხეირომ რა ქნაო! გამოვიდა ხელმწიფე და შიშით კინალამ გული გაუსკდა. — ეგ დევები მაინც მომაშორეო, — სთხოვა უხეიროს. უხეირომ მოხსნა დევებს წიფლები, გაუშვა ნებაზე და თითო სახრეც ამოუჭირა, ეს მაგალითი დაიხსომეთ და ამას იქით კაცის ნათესავს აღარა ავნოთ რაო!

გავიდა ხანი და ხელმწიფემ ახლა სხვა ხერხს მიმართა, დაიბარა უხეირო და უთხრა:

— ცხრა მთას იქით რომ უკვდავების წყაროა, იმისი წყალი უნდა მომიტანო.

უხეირო ამაზეც უყოყმანოდ დათანხმდა. ოღონდ ჭურჭელი მოითხოვა, რით მოვიტანო. მოუტანეს გოზაურები, სთხლიშა უხეირომ ერთმანეთს და დაამტვრია, — ბავშვი ხომ არა ვარ, რომ კოკებს მატანთ, მომიტანეთ დიდი რამეო — ახლა ქვევრები მოუტანეს, მაგრამ უხეირომ ქვევრებიც კოკებს მიაყოლა, — უფრო დიდი ჭურჭელი მომიტანეთო — მაშინ ორი ას-ას კოკიანი რუმბი მოუტანეს. — ჰო, ამით წასვლა მართლაც ღირსო, — თქვა უხეირომ, გადაიკირა რუმბები მხარზე და გასწია.

იარა უხეირომ, იარა და მივიდა უკვდავების წყაროსთან. ამ წყაროს ორი ბუღა კამეჩი ყარაულობდა, კამეჩები მთისოდენები იყვნენ. როცა წყაროსკენ მიმავალს ვისმე დაინახავდნენ, გამოექანებოდნენ ერთი ერთი მხრიდან, მეორე—მეორე მხრიდან, დაეჯახებოდნენ და გასჭყლტავდნენ. უხეიროსკენაც ასე ბულრაობით გამოექანენ, მაგრამ უხეიროს ფერიც ვერ აცვლევინეს. — თვითონვე სტაცა ორივეს ყურში ხელი და კისრები მოუგრიხა. მოგლიჯა ერთი უზარმაზარი ჭადარი, დაადო უღლად, მერე უკვდავების წყლით რუმბები დაავსო, დაუდო ზედ, თვითონაც უღელზე გადააჯდა და ღიღინ-ღიღინით ხელმწიფის სასახლისაკენ დაირეკა.

მოახსენეს ხელმწიფეს: უხეირო საღსალამათი დაბრუნდა და ის საშინელი კამეჩებიც აქ მორეკა, წყლით სავსე რუმბები თვითონ იმათ მოატანინაო.

გამობრძანდა ხელმწიფე და გოლიათი კამეჩების დანახვაზე მთლად კანკალი დააწყებინა. „ჯერ უხეიროს ვერ ვუძლებდი და მაგათ რალა ვაჭამო“, — თქვა თავისთვის, უკანვე შებრუნდა და მსახურებს უბრძანა, — უხეიროს უთხარით, ეს კამეჩები მაინც მომამშოროს აქედანო. — უხეირომ გადმოაწყო რუმბები, ახსნა კამეჩებს უღელი და გაუშვა, თან თითო სახრე ამოსცხო, — წადით და უკვდავების წყაროს ერთგულად უდარაჯეთო.

მთელი ხალხი აღტაცებით გაიძასოდა, — ვაპ, რა ყოფილა ეს უხეირო—ხელმწიფე კი დაღონებული იყო, რა ვქნა, რით მოვიშორო ეს ღორმუცელა თავიდანო.

ერთ ადგილას ელიას ყანა ედგა. დიდი მინდორი ქვიტკირის გალავნით იყო შემოზღუდული და შიგ იფქლის ყანა ეთესა. დაიბარა ხელმწიფემ უხეირო, მისცა ერთი დიდი ფარა ცხვარი და უთხრა:

— ეს ფარა ელიას ყანაში უნდა შერეკო და მოაძოვო.

ეს ელია ცაში ცხოვრობდა, ღონიერიც იყო და დიდი გრძნეულიც, ხელმწიფესაც სწორედ ამისი იმედი ჰქონდა, — ღონით თუ ვერ მოერევა, იქნებ გრძნეულებით მაინც დაღუპოსო. მაგრამ გრძნეულება ღონესთან რას გახდება! გაირეკა უხეირომ ეს ერთი ფარა ცხვარი და შერეკა ელიას ყანაში, ყანა ფარას მიანება, თვითონ ჩრდილში წამოწვა და დაიძინა.

გადმოიხედა ელიამ მაღლიდან და რას ხედავს: შესევია ცხვარი ყანას და აოხრებს. „გაოხრება ეგრე არ უნდაო“, — თქვა გულში და დაუშინა და დაუშინა სეტყვა. ისეთს ისვრის, სულ ქვას ამტვრევს. ფარა სულერთიანად გაწყვიტა, ქვა ქვაზე აღარ დატოვა, უხეიროს კი ძილიც ვერ დაუფრთხო, გამოტილა არხეინად და ხვრინავს.

განრისხდა ელია, გადმოვიდა ტახტიდან და დედამიწაზე დაეშვა. — მე შენ გიჩვენებ სეირსო, — უთხრა მძინარე უხეიროს, დააწვა მაღლიდან და ყელში წაუჭირა.

გამოელვიძა უხეიროს, გადააბრუნა ელია და ქვეშ ამოიღო.

— ამიშვიო, — უთხრა ელიამ.

— არა, არ აგიშვებო, — მიუგო უხეირომ.

— ამიშვიო, — კიდევ სთხოვა ელიამ.

— დამლოცე და აგიშვებო, — უთხრა უხეირომ.

მაშინ დალოცა ელიამ, — ჯერზე ერთი პური, ერთი ჩაჩქა ღვინო და ერთი გირვანქა ხორცი იმყოფინეო, და უხეირომაც აუშვა.

ამის შემდეგ უხეირო გამოეთხოვა ხელმწიფეს და წავიდა თავის დედ-მამასთან. მაგრამ მშვიდად ყოფნა დიდხანს ვერ შესძლო, გულმა ისევ საგმირო საქმეებისაკენ გაუწია და წავიდა ბედის საცდელად.

ბევრი იარა თუ ცოტა იარა, თავისი სახელმწიფო გაათავა და გავიდა უცხო ქვეყანაში. ერთიც. ვნახოთ, გზაზე ერ-

თი დევი მოდის, ხელში ერთი დიდი გორა უჭირავს და ბურთივით ათამაშებს. როცა მოუახლოვდა, უხეირომ ჰკითხა:

— კაცო, სად მიხვალ, ან ეს ამოდენა გორა სად მიგაქვსო?

— ხელმწიფის კარზე რომ უხეიროა, ის უნდა გამოვცადოო, — მიუგო დევმა.

— უხეიროც მე ვარო, — უთხრა უხეირომ, გამოართვა გორა და ცხრა მთას იქით გადასტყორცნა. მერე მიუბრუნდა დევს და ჰკითხა, — ახლა რა გინდა, მეძმობი თუ მეყმობიო?

— გეძმობიო, — უთხრა დევმა. ეძმნენ ერთმანეთს და წაგიდნენ ორნი.

მიდიან, მიდიან და ახლა მეორე დევი შეხვდათ, ხელში ორჯერ დიდი გორა უჭირავს და ბურთივით მოათამაშებს.

— სად მიხვალ ან ეს ამოდენა გორა სად მიგაქვსო? — ჰკითხა უხეირომ.

— ხელმწიფის კარზედ რომ უხეიროა; ის უნდა გამოვცადოო, — მიუგო დევმა.

— აი, უხეიროც აქა ვარო, — უთხრა უხეირომ, გამოართვა გორა და სამ მთას იქით გადასტყორცნა. მერე მიუბრუნდა დევს და ჰკითხა, — ახლა რა გინდა, მეძმობი თუ მეყმობიო?

— გეძმობიო, — მიუგო დევმა. ეძმო ეს დევიც და წავიდნენ სამნი.

ცოტა რომ გაიარეს, ახლა მესამე დევი შემოხვდათ, იმას ორჯერ კიდევ უფრო დიდი გორა მოაქვს და ხელში ბურთივით ათამაშებს.

— კაცო, ეს რა ამბავია, — ჰკითხა უხეირომ, — მე ხელცარიელმა ლამის ქალამნებიც გავიხადო და შენ ამოდენა გორას საით მიაბრებინებო?

— ხელმწიფის კარზე რომ უხეიროა, ღონეში აქებენ და მინდა გამოვცადოო, — მიუგო დევმა.

— თვითონ გახლავართ უხეიროო, — უთხრა უხეირომ, გამოართვა გორა და ერთი მთის იქით გადაისროლა, მერე მიუბრუნდა დევს და ჰკითხა, — ახლა რა გინდა, გიძმო თუ გიყმო?

— მიძმეო, — უთხრა დევმა. იძმო ისიც უხეირომ და წავიდნენ ოთხნი.

ბევრი იარეს თუ ცოტა იარეს, ბოლოს თეთრი დევის საბრძანებელში გადავიდნენ და ლამის გასათევად ერთ ტყეში დაბინავდნენ. არც ცეცხლი აქვთ და პურიცა შიათ. უხეირომ უთხრა დევებს:

— წადით და, სადაც იყოს და არ იყოს, ცეცხლი და პური იშოვეთო.

დევები სულ კანკალმა აიტანა:

— შიმშილით რომ დავიხოცოთ, თეთრი დევის შიშით ამ ტყიდან ფეხსაც ვერ გავდგამთო.

— თქვენ თუ ვერ გადგამთ, მე გავდგამო, — უთხრა უხეირომ და წავიდა. იარა, იარა და ერთ ადგილას ცეცხლი დაინახა. ცეცხლი სწორედ თეთრი დევის სახლიდან გამოდიოდა, მაგრამ დევი თვითონ შინ არ იყო, უხეიროს მარტო მისი ცოლი დახვდა.

— დამძობას, შორი გზის მგზავრი ვარ და ერთი-ორი პური და ცეცხლი მომეცო, — სთხოვა უხეირომ.

— ვინა ხარ, რა სულიერი ხარ, — უთხრა დევის ცოლმა, — ჩემი ქმრის შიშით ძირს ჭიანჭველას ვერ გაუჭაჭანია, მაღლა ფრინველს და შენ როგორ მობედე? ჩქარა თავს უშველე, თორემ საცაა ჩემი ქმარი ნადირობიდან დაბრუნდება. და ცოცხალს არ გაგიშვებსო.

— რომელი მხრიდან დაბრუნდებაო? — ჰკითხა უხეირომ.

— აი, ამ მხრიდანო, — უჩვენა დევის ცოლმა და თან გააფრთხილა, — თუ წყალს გაასწარ, არა გიშავს, ხოლო თუ წყალს აქეთ შემოგხვდა, ცოცხალი ვერ გადაურჩებიო.

უხეირომ გულში ჩაიცინა და სწორედ იქით წავიდა, საიდანაც დევი უნდა მოსულიყო. შორიდანვე დაინახა თეთრი ცხენზე ამხედრებული, მხარზე ნანადირევი ირემი გადაეკიდა და ღიღინით მოდიოდა.

უხეირომ ხიდის ყურში ჩაიმალა, დევი მოახლოვდა, უხეირომ უცბად თავი ამოყო და — „ყვიტ-ყვიტო!“ — დაიძახა. ცხენი დაფრთხა და უკან-უკან წავიდა. დევი უჯავრდება, ქუსლებს უბაგუნებს, მაგრამ ცხენი მაინც ფრთხება. ბოლოს ხმამაღლა დასჭყვილა:



— აჩუ, შე სატიალევ, რა გაშინებს, ხელმწიფის კარზე რომ უხეიროა, იმას მოვკლავ და მანდ ვინ უნდა იყოს ისეთი, მე ვერ მოვერიოო?

მაშინ კი ამოუხტა უხეირო და დაუძახა:

— აი, უხეირო მე ვარ და მობრძანდიო!

ჩამოხტა დევი ცხენიდან და დაიტაკნენ. უხეირომ პირველსავე მოქნევაზე სული გააგდებინა, მკვდარი თავისსავე ცხენზე გადაჰკიდა და ცოლს გაუგზავნა — ეგეც შენი ქმრის უძლეველობაო.

უხეირომ დევის მოკლული ირემიც თან წამოიღო და წამოვიდა. დევებს უკვე იმედი ჰქონდათ გადაწყვეტილი და უხეირო რომ უვნებელი დაინახეს, სიხარულით ცას ეწივნენ: დაანთეს ცეცხლი, შეწვეს ირემი, ივასშმეს და არსეინად დაძინეს.

მეორე დილას ადგნენ და ისევ გზას გაუდგნენ. სანამ წითელი დევის საბრძანებელში არ მივიდნენ, ისეთი აღარაფერი შემთხვევიათ. დადგნენ აქაც ტყეში ღამის გასათევად, მაგრამ არც საჭმელი აქვთ, არც ცეცხლი. უხეირომ უთხრა დევებს:

— აქ ახლომასლო ვინმე ესახლება, წადით და ორიოდე პური და ცეცხლი გამოართვითო.

დევები წინანდელზე უარესად აკანკალდნენ:

— აქ წითელი დევის მეტი არავენ სახლობს და ჩვენ იმის შიშით ფესსაც ვერ გავდგამთო.

— კარგით, ამჯერადაც მე წავალო, — თქვა უხეირომ და წავიდა. მივიდა წითელი დევის ცოლთან და სთხოვა: — დამძობას, ორიოდე პური და ცეცხლი მომეცითო.

— ჩემი ქმრის შიშით აქ ძე-ხორციელს ვერ გაუვლია და შენ ვინა ხარ ასეთი, რომ შემობედეო, — უთხრა დევის ცოლმა, მისცა ცეცხლი და პურები და თან დააჩქარა, — სწრაფად იარე, რომ წყალს აქეთ არ მოგასწროს, თორემ ცოცხალს არ გაგიშვებსო.

„ენახოთ, ვინ ვის მოერევაო“, — ისევ გულში ჩაიცინა უხეირომ, წამოვიდა და დადგა ხიდის ყურზე. გამოჩნდა დევი: წითელ ცხენზე ზის, მსარზე ნანადირევი ირემი ჰკიდა

და უშიშრად მოღლინებს. დაინახა უხეირო და შორიდანვე ხაფი ხმით შეუტია:

— ხელმწიფის კარზე რომ უხეიროა, მე ისიც ვერ გამომაგრდება და შენ ვინა ხარ ჩემს სამფლობელოში რომ შემოჭრილხარო?

— სწორედ ის უხეირო გახლავარ და, თუ ჯანი გერჩის, მობრძანდიო — მიუგო უხეირომ.

ჩამოსტა დევი ცხენიდან და დაეტაკნენ ერთმანეთს, მაგრამ უხეირომ საბოლოოდ მაინც დაამარცხა, — დაახუტქა მიწას და სული გააფრთხობინა, მერე ისიც ცხენს გადაჰკიდა და ცოლს გაუგზავნა, — აბა, თუ შენი ქმრის შიშით აქ ვერავინ გაივლისო — წამოიღო დევის მოკლული ირემი და წამოვიდა.

დევებს უხეიროს მოლოდინი არც ახლა. ჰქონდათ და კვლავ ცოცხალი და უვნებელი რომ დაინახეს, დიდად გაუხარდათ. მაშინვე დაანთეს ცეცხლი, შეწვეს ირემი, გემრიელად ივახშმეს და დაიძინეს.

მეორე დღეს ადგნენ და ისევ გზას გაუდგნენ. უხეირო კვლავ უშიშრად მიდის, დევებს კი თანდათან შიში ემჩნევათ, — მათ იცოდნენ, საითაც მიდიოდნენ. ბოლოს შავი დევის საბრძანებელში მივიდნენ. აქ ყველაფერი შავი იყო: მიწა, ტყე, ბალახი, ნადირი და ფრინველი. დადგნენ ისევ ღამის გასათევად ტყეში და უხეირომ უთხრა დევებს:

— აბა, წადით და იქნებ სადმე ორიოდე პური და ცეცხლი იშოვოთო.

დევებს შიშით ღამის გულები დაუსკდათ.

— რას ამბობ, ეს მიწა-წყალი შავი დევის სამფლობელოა, იმისი მომრევი ჯერ ქვეყნად არ გაჩენილა და ჩვენ თვალთ როგორ დავენახვებით, ხომ დაგვსრისა ბუზებივითო. შენც გირჩევთ, მასთან მისვლას თავი დაანებო და აქაურობას საჩქაროდ გავცილდეთო.

დევების რჩევა უხეიროს სიცილადაც არ ეყო, — თქვენ თუ ვერ დაენახვებით, მე დავენახვებიო, — უთხრა, — ცეცხლსაც მოვიტან და პურსაცაო, — ადგა და წავიდა, მივიდა შავი დევის ცოლთან და სთხოვა, — დაძმობას, ორიოდე პური და ცეცხლი მომეცო.

„დევის ცოლმა წესიერად პასუხიც არ აღირსა.

— ვინა ხარ, რას დადიხარ, — დასჭყვილა უკმესად, — საშენო არც პური მაქვს და არც ცეცხლი. აქედან დაიკარგე, თორემ თუ ჩემმა ქმარმა მოგისწრო, ერთ ლუკმად არ ეყოფიო.

„ვინ ვის არ ეყოფა, მაგასაც ვნახავო“, — გუნებაში თქვა უსერიომ, გამოიტანა ძალით ცეცხლი და პურები და წამოვიდა. მოვიდა მდინარესთან და ხიდის ყურში ჩაიმალა.

ცოტა ხნის შემდეგ დევიც გამოჩნდა — შავი, შავი, როგორც ყურყამი. ცხენიც შავი ჰყავდა, მხარზე ირემი ეკიდა, შავ თვალებს აბრიალებდა და უშიშრად მოიმღეროდა. შემოაყენა ცხენი ხიდზე, უსერიომ თავი ამოყო და — ყვიტო! — დაიძახა. ცხენი დაფრთხა და უკანვე გადახტა. უჯავრდება დევი ცხენს, ერეკება, მაგრამ სულ ტყუილად — ცხენი ფეხსაც აღარ დგამს წინ. გაბრაზდა ღებვი და ხმამაღლა შეუტია:

— აჩუ, შე უპატრონოვ, ხელმწიფის კარზე რომ უსერიოა, ის ვერ გადამირჩება ცოცხალი და შენ აქ ვის ხედავ ისეთს, რომ გეშინიაო?

— სწორედ უსერიო გახლავარო! — დაიძახა უსერიომ და წამოუსტა. — აბა, ცხენიდან ჩამობრძანდი და როგორ ვერ გადაგიჩინებ, იმასაც გაჩვენებო!

ჩამოსტა დევი და შეიბნენ.

შეიბნენ, მაგრამ რა შეიბნენი მიწას სულ ზანზარი გაუდის, მთები ინგრევა, ტყე იღეწება. ხან დევია ძირს, ხან — უსერიო, ბოლოს მაინც უსერიომ დასძლია, მოიკრიბა უკანასკნელი ღონე, დააწყვიტა დევი მიწას და სული გააგდებინა. დააკრა მკვდარი ცხენს და ცოლს გაუგზავნა, — აჰა, ეგაც შენი უძლეველი ქმარო! — წამოიკიდა ირემი, წამოკრიფა ცეცხლი და პურებიც და წამოვიდა თავისი ძმადნაფიცუბისაკენ.

დევებს ახლა კი საბოლოოდ ჰქონდათ იმედი გადაწყვეტილი და თავიანთ სახელოვან ძმობილს გულში უკვე გლოვობდნენ, მაგრამ არა, უსერიო კვლავ ცოცხალი დაუბრუნდათ და ცეცხლი და ვახშამიც მოუტანა. დევებმა ზედმეტი სიხარულისაგან სულ ცეკვა-თამაში დაიწყეს, ესეოდნენ

გარს უხეიროს და, — როგორ გადაურჩი შავ დევს ცოცხალი? — ეკითხებოდნენ.

— გადავურჩი და დედაც ვუტირეო! — უთხრა უხეირომ.

საჩქაროდ გააჩაღეს ცეცხლი, შეწვეს ირემი, მხიარულად ივასშმეს და დაიძინეს.

მეორე დილას დევებმა უთხრეს უხეიროს:

— შენს გზას დასასრული არ უჩანს, ჩვენ აღარ შეგვიძლია შენთან სიარული და, თუ შეიძლება, აქ დაგვტოვეო.

— კარგით, — უთხრა უხეირომ, — მე მარტოკა წავალ. — წაიყვანა დევები, ერთს თეთრი დევის ცოლი შერთო, მეორეს — წითლისა და მესამეს — შავისა და მათსავე სახლებში დააბინავა. გამოთხოვებისას ერთი ბურთი დაუკიდა და უთხრა:

— აი ამ ბურთს უყურეთ და როცა სისხლის წვეთვა დაიწყოს, მაშინ იცოდეთ, მიჭირს და მომეშველენითო. — გამოემშვიდობა თავის ძმადნაფიცებს და წავიდა.

ბევრი იარა თუ ცოტა იარა, ერთ ქალაქში შევიდა. ქალაქი როგორღაც მიჩუმებულია, ხუთი-ექვსი წლის ზევით კაციშვილი არა ჩანს, ხედავს ამას უხეირო და გაკვირვებულია. ბოლოს ერთ სახლს მიადგა და დააკაკუნა. სახლიდან დედაბერმა გამოიხედა და უხეირო მაშინვე შინ შეიყვანა.

— ვინა ხარ, ან აქ რისთვის მოსულხარო? — ჰკითხა დედაბერმა.

უხეირომ უამბო თავისი თავგადასავალი. მერე შეეკითხა:

— რისი ბრალია, რომ ამ ქალაქში მოზრდილი ხალხი არა ჩანსო?

— რა ვიცი, შვილო, არ რჩებიან, რატომღაც ნაადრევად იხოცებიანო, — სიტყვა ბანზე აუგდო დედაბერმა. ავასშმა და დააძინა.

მეორე დილას გამოელვია უხეიროს და დაინახა, დედაბერი კედლებში ყველა ჭუჭრუტანას საგულდაგულოდ ქოლავს, რომ გარედან სინათლე არ შემოვიდეს. უხეირო დაეკვდა, — აქ რაღაც სხვა ამბავიაო, — თქვა გულში და დედაბერს ჰკითხა:

— დედაშვილობას, მითხარი, რატომ არ არის ამ ქალაქში სრულწლოვანი ხალხი და ან ამ ჭუჭრუტანებს რატომ ქოლაფო?

დედაბერმა კვლავ რაღაც მიკიბ-მოკიბა. თქმა კიდევ არ უნდოდა, მაგრამ უხეირო არ მოეშვა და ბოლოს დედაბერიც გამოუტყდა:

— არ მინდოდა, შვილო, შენთვის მეთქვა, მაგრამ რაკი არ იშლი, რა გაეწყობა, — უთხრა დედაბერმა და ყველაფერი უამბო, — ჩვენი ქალაქის ახლოს, ზღვაში ერთი რკინის კაცია, იმ რკინის კაცს ერთი მოტაცებული მზეთუნახავი უზის კოშკში, როცა ის ქალი გარეთ გამოვა, შუქი ქალაქს შემოადგება. სწორედ ამიტომ ვჩუღავდი წელან ყველა ჭუჭრუტანას, რომ არ მინდოდა, იმ ქალის შუქი დაგენახა — ახალგაზრდა ხარ, გულში ჩაგივარდებოდა და დაიღუპებოდი. სწორედ ასე დაემართა ჩვენს ხელმწიფეს — ქალი შეუყვარდა და უნდა როგორმე ხელში ჩაიგდოს, ათი წელია, რაც ეომება რკინის კაცს, მაგრამ ვერაფერს აკლებს. იმიტომაც არ არის ჩვენს ქალაქში სრულწლოვანი ხალხი, ვისაც ჩარალის ხმარება შეეძლო, ყველა რკინის კაცთან ომს შეეწირა. ის რკინის კაცი უძლეველია და იმას ვერაფერს მოეკვამო.

— მაშ ბიჭი უხეირო მოკვდეს, თუ ის რკინის კაცი ვერ ვძლიო და მზეთუნახავი ქალი ცოლად არ დავისვამო, — თქვა უხეირომ და იმ დილასვე რკინის კაცის კოშკისაკენ გასწია. ამ დროს რკინის კაცი ცაში სალოცავად იყო წასული და უხეიროს კოშკში მხოლოდ ქალი დახვდა. გაუკვირდა ქალს უხეიროს მისვლა და ჰკითხა:

— რა ხარ, რა სულიერი ხარ, რომ აქ შემოსვლა გაგიბედიო, რკინის კაცმა რომ მოგისწროს, ხომ ცოცხალს არ გაგიშვებსო?

მაგრამ უხეიროს აინუნშიაც არ მოსდის ეს გაფრთხილება, დადის არხენად ოთახებში და ათეალიერებს. თან სადაც გაივლის, მის ნაკვალევზე სულ ვარდ-ყვავილი იშლება. ქალს ძალიან მოეწონა უხეირო და შეეხვეწა, — ჩქარა წადი, აქაურობას გაშორდი, თორემ საცაა რკინის კაცი მოვა და მოგკლავსო.

— მაგის ფიქრი ნუ გაქვს, მე ვიცი და იმანო; — უთხრა უსეირომ, — შენ მარტო ის გამიგე, სული რაში უდგას და რა მოჰკლავსო.

ქალი შეჰპირდა, გაგიგებო. უსეირო წამოვიდა. შუადღისას რკინის კაციც დაბრუნდა ციდან. ქალი ყელზე ჩამოკიდა და დაუწყო ალერსი, მითხარი, რაშია შენი სული და რა მოგკლავსო?

— რად გინდა მაგის გაგებაო? — ჰკითხა რკინის კაცმა.

— იმიტომ მინდა, რომ მეშინია, — უთხრა მაცდურად ქალმა, — ბერი მტერი გყავს, და, როცა მეცოდინება, უფრო გაგიფრთხილდებიო.

— რაკი ჩემზე ასე ზრუნავ, გეტყვიო, — უთხრა რკინის კაცმა, — მე ჩემ შარდში დასველებული იარაღის მეტი ვერაფერი მომკლავს, ისიც თუ ილღის ძირში დამკრეს, თორემ სხვაგვარად ჩემი სიკვდილი შეუძლებელიაო.

ქალმა იმავე ღამეს აიღო ორი დიდი ცული და სადაც რკინის კაცი შარდავდა, იქ დააყუდა. რკინის კაცმა სიბნელეში ვერაფერი დაინახა და ორივე ცული შარდით დაასველა. მეორე დღეს რკინის კაცი ისევ სალოცავად წავიდა, უსეირო კოშკში მოვიდა, ქალს ნაჯახები გამოართვა და რკინის კაცის დაბრუნებას დაელოდა.

შუადღისას მოვიდა რკინის კაცი და დაეძგერნენ ერთმანეთს. აბა, რომელი დასძლევს, ხან ერთია ძირს, ხან — მეორე დიდხანს იბრძოლეს, ორივეს ოფლი ღვარად სდიოდა. ბოლოს უსეირომ დაძალა, წააქცია და დასცსო ცული ილღიაში, გაუტყდა ერთი. მეორე მოიშველია და სულიც გააფრთხობინა. აიღო მკვდარი რკინის კაცი და ზღვაში გადაუძახა. ქალი ცოლად შეირთო და დაიწყო კოშკში ცხოვრება.

გაიგო ხელმწიფემ, რომ ვილაცას რკინის კაცი მოუკლავს და მზეთუნახავი ცოლად მოუყვანიაო. ახლა უსეიროსათვის გადაწყვიტა ქალის წართმევა და ნაზირ-ვეზირები შეკრიბა, რჩევა ჰკითხა.

— ისევ რალაც ხერხი უნდა ვიხმართო, თორემ რკინის კაცის მომრევთან ძალით ვერაფერს გავხდებითო, — უთხრეს ნაზირ-ვეზირებმა. ამ დროს ხელმწიფესთან ერთი დედაბერი შევიდა და მოახსენა:

— დიდებულ სელმწიფე, იმ მზეთუნახავს მე მოგიყვანო.

სელმწიფე გაოცდა: მთელი სახელმწიფოს ჯარი შევალე, მაგრამ ვერაფერს გავხდი და შენ რა შეგიძლია იმდენი, რომ ეგ გააკეთო?

— დიდებულ სელმწიფე, — უთხრა დედაბერმა, — ერთი შუშა ბანგი მომეცით, დამაკარით ფიცარზე, ჩამაგდეთ ზღვაში და დანარჩენი მე ვიციო.

სელმწიფე ცას ეწია სიხარულით და ნაზირ-ვეზირებს უბრძანა, — აასრულეთ, რასაც ითხოვსო!

ნაზირ-ვეზირებმა იმავე წამს დააკრეს ფიცარზე და შეაცურეს ზღვაში. მიცურდა დედაბერი კოშკის ძირას და დაიწყო ძახილი:

— ვინა ხართ ქრისტიანი, მიშველეთ, წყალში ვიხრჩობო!

გადმოიხედა უხეირომ და თავის მზეთუნახავ ცოლს უთხრა:

— მოდი, მადლს ვიზამ, გადავარჩენ და ამოვიყვანო.

— არ გინდა, ეგ ბებერი მუხანათი არ იყოს და არ გილაღატოსო, — ურჩია ქალმა. მაგრამ უხეირომ არ დაიშალა, — ერთმა წირპლიანმა დედაბერმა რა უნდა მიყოსო, — ჩავიდა და ამოიყვანა.

დაუწყო დედაბერმა ცოლ-ქმარს ერთგული სამსახური, ყველაფერს კარგსა და საუკეთესოს აკეთებდა. ამასობაში ისელთა დრო და ბანგი ღვინოში შეურია. ერთხელაც, სადილად რომ დასხდნენ, ცოლ-ქმარს ეს დაბანგული ღვინო შეაპარა და ორივენი დააძინა. დედაბერი კუდიანიც იყო, იცოდა, რომ უხეიროს თმაში სამი ბეწვი ერია და თუ იმას არ ამოაძრობდნენ, არ მოკვდებოდა. იპოვა ის ბეწვები, ამოაძრო, შეახვია წითელ ჩვარში და ზღვაში გადააგდო.

უხეირო მოკვდა. დედაბერმა შეუკრა ფეხები და ქვევრში თავდაყირა ჩაჰკიდა. მერე აიყვანა მძინარე ქალი, ჩააწვინა ნავში და სელმწიფეს მიუყვანა.

გაიხარა სელმწიფემ დიდად და დედაბერი უხვად დაასარჩუქრა, მაგრამ მისი სიხარული ნაადრევი გამოდგა. ქალს გამოელვინა, მიიხედ-მოიხედა და ყველაფერს მიხედა. სიახ-

ლოვეს არავინ გაიკარა, ჩაჯდა ერთ ბნელ დილეგში და დაიწყო ტირილი. რალა არ იღონა ხელმწიფემ, როგორ არ ეყურა, რა საჩუქარი აღარ აძლია, მაგრამ სულ ტყუილად, — ქალი არც ხმას იღებს და არც დილეგიდან გამოდის.

უსხირომ გამოთხოვების წინ თავის ძმადნაფიც დევებს რომ ბურთი დაუტოვა, იმ ბურთმა სისხლის წვეთვა დაიწყო. დევები მიხვდნენ, რომ უსხირო დიდ გასაჭირში იყო და მაშინვე საშეულად გაეშურნენ. რა ღმერთმანი კვალის მიგნება გაუჭირდებოდათ, — უსხიროს დანაბიჯებ ადგილზე სულ ვარდი ყვაოდა. მიჰყვნენ ამ ყვავილნარს დევები და კოშკს მიადგნენ. ავიდნენ მალლა და თავიანთი ძმობილი რომ ამ ყოფაში ნახეს — მკვდარი, ქვევრში ჩაკიდებული — შემოიკრეს თავში ხელი. მერე თქვეს, უნდა ვუშველოთ, ვისაც რით შეგვიძლია და ის თმები უნდა ვიპოვოთო.

ერთმა თქვა, მე ფრინველთა მეფეს ვიცნობ და თუ ცაშია, გავიგებო. მეორემ თქვა, მე ნადირთა მეფე მყავს მეგობარი და ხმელეთზე მოეძებნიო, მესამემ თქვა, თევზთა მეფე ჩემი ძმადნაფიცია და წყალში თუა, გაუგებელი არ დამჩებო.

აძებნინეს ცაში, — არ აღმოჩნდა, აძებნინეს ხმელეთზე — არც იქ აღმოჩნდა, დაუძახა მესამე დევმა თევზთა მეფეს და სთხოვა:

— აბა, შემიტყვე, სამი ბეწვი თმა ხომ არავის უპოვია უნეს საბრძანებელშიო?

მოუხმო თევზთა მეფემ თავის საბრძანებელს და მოვიდა და მოვიდა თევზების ქარავნები, მაგრამ სამი ღერი თმის მნახველი არავინ აღმოჩნდა.

— ხომ არავინ გვაკლიაო? — იკითხა თევზთა მეფემ.

— როგორ არა, მეფეო, — მოახსენეს თევზებმა, — ერთი ბებერი თევზი გვაკლია, ისეთი ბებერია, ცურვა აღარ შეუძლია და ზღვის ფსკერზე წევსო.

მეფე თვითონ წავიდა იმ უძღური თევზის სანახავად: თევზმა უთხრა:

— ეს-ეს არის წყალმა წითელ ჩვარში შეხვეული რალაც მოიტანა და ჩაველაპე. ოღონდ ნუ მომკლავთ, ჭიჭყინები ჩაგზავნეთ ჩემს მუცელში და, თუ არის, ამოაღებინეთო.

ჩაგზავნეს ჭიჭყინები ბებერი თევზის მუცელში, ამოაღე-



ბინეს თმები და მისცეს დევეებს. დევეებმა უხეირო ქვევრიდან ამოიყვანეს და თმები თავზე მიუსვ-მოუსვეს. თმებმა თავი-  
ანთი ადგილები მოძებნეს და უხეირომ თვალები გაახილა.  
წამოდგა ფეხზე, გაიზმორა და თქვა:

— უპ, რამდენი მძინებიაო.

— ბევრი მაშინ გეძინებოდა, ჩვენ რომ არ მოვსულიყა-  
ვითო, — უთხრეს დევეებმა. მერე ოთხივენი ქალაქში გამო-  
ვიდნენ, მიუხტნენ ხელმწიფეს და თავისი ნაზირ-ვეზირები-  
ნად ამოწყვიტეს. დაიწერა ჯვარი უხეირომ ქალზე, სახელ-  
მწიფოც დაისაკუთრა და სიკვდილამდე ტკბილად და ბედნი-  
ერად იცხოვრა.

ჭირი — იქა, ლხინი — აქა,  
ქატო — იქა, ფქვილი — აქა.





## სოვდაგარის შვილი

იყო და არა იყო რა, რაც არ ყოფილა, რა იქნებოდა, იყო მეტად მდიდარი და უშვილო სოვდაგარი. ერთხელ სოვდაგარმა თავის ცოლს უთხრა:

— მე ხვალ სხვა სახელმწიფოში მივდივარ. იქ სრულ ათ წელიწადს უნდა დავრჩე, თუ მეთერთმეტე წლის დამდეგს არ მოვედი, მაშინ მკვდრად ჩამთვალე და მიგლოვეო.

სოვდაგარი გამოემშვიდობა ცოლს და გაემგზავრა. ქმრის წასვლის ცხრა თვის თავზე ცოლს ვაჟი ეყოლა.

სოვდაგარს სხვა ქვეყანაში თხუთმეტ წლამდე შეაგვიანდა. ცოლი დათქმულ დრომდე ელოდა, მაგრამ რომ არსად გამოჩნდა, მკვდრად ჩათვალა და გამოიგლოვა. ამასობაში ბიჭი თხუთმეტი წლისა შესრულდა და ისეთი ვაჟკაცი დადგა, რომ ბადალი არ ჰყავდა.

სოვდაგარმა მხოლოდ მეთექვსმეტე წელიწადს მოახერხა შინ დაბრუნება, შეკრა რაც კი რამ მონაგარ-მონაგები ჰქონდა, ახსენა ღმერთი, გადაიწერა პირჯვარი, ჩაჯდა გემში და გამოსწია სახლისაკენ. შუა ზღვაში რომ შემოვიდნენ, გემი წყლის ქაჯთა ხელმწიფემ დაიჭირა და აღარ გაუშვა. გამოვიდა გემბანზე დაღონებული სოვდაგარი და ღმერთს უსაყვედურა:

— შე დალოცვილო ღმერთო, რა დაგიშავე ისეთი, რომ მეთექვსმეტე წელიწადია, ძლივს შინ დაბრუნება მეღირსა და ახლაც შუა ზღვაში მაჩერებო?

— ღმერთს ტყუილად ემდურები, — ამოსძახა წყლის ქაჯთა ხელმწიფემ, — ეს წყალი ჩემი სამფლობელოა და აქ

ღმერთიც თვითონა ვარ და მბრძანებელიც. თუ გინდა, შინ მშვიდობით მიხვიდე, შენი უცოდინარი მომეცი და გაგიშვებო.

სოვდაგარი დაფიქრდა:

— ცოლი მყავს — ვიცი, სახლ-კარი და ქონება მაქვს — ვიცი, მაშ რაღა უნდა მქონდეს ისეთი, რომ არ ვიცოდეთ, — და ქაჯთა ხელმწიფეს ჩასძახა:

— გაძლევ ჩემს უცოდინარს, ოღონდ გამიშვი, რომ შინ მშვიდობით მივიდეო.

— ოღონდ, იცოდე, — ამოსძახა წყლის ქაჯთა ხელმწიფემ, — ის შენი უცოდინარი წლის თავზე თვითონ უნდა მოვიდეს ჩემთან, პირი არ გამიტეხო, თორემ მთელ შენს სახლ-კარსა და ქონება-ცხოვრებას წყალს წავალეკვინებო.

— არაო, — შეჰპირდა სოვდაგარი, წყლის ქაჯთა ხელმწიფემაც ახსნა ჯადო და გამოუშვა-გემი.

ნაპირზე რომ გადმოვიდა, სოვდაგარმა კაცი გაუგზავნა ცოლს და თავისი დაბრუნება შეატყობინა. ცოლმა დაიჭირა-ვა ეტლი, ჩაისვა თავისი შვილიც და ქმრის შესახვედრად გაემგზავრა. ამდენი ხნის უნახავი ცოლ-ქმარი მხურვალედ გადაეხვივნენ ერთმანეთს. მერე ცოლმა შვილი გააცნო და უთხრა:

— შენ რომ წახვედი, სწორედ იმ წელიწადს მეყოლაო.

სოვდაგარს, რაღა თქმა უნდა, ასეთი მოსწრებული შვილის დანახვა უზომოდ გაუხარდა, მაგრამ უცბად წყლის ქაჯთა ხელმწიფისათვის მიცემული პირობა მოაგონდა და სასე მოელრუბლა. ცოლმა შეატყო ეს შეცარი სახეცვლილება და ჰკითხა:

— რა მოგივიდა, კაცო, შვილის ყოლა ხომ არ გეწყინაო?

— ნუ მკითხავ, — უთხრა სოვდაგარმა, — ჯერ ვერაფერს გეტყვიო. — ეშინოდა, უცბად რომ ვუთხრა, ვაითუ ქალის გულმა ვერ გაუძლოს და რამე უბედურება დაემართოსო.

წამოვიდნენ შინ. სოვდაგარი ვერც სახლ-კარისა და ეზო-კარ-მიდამოს ნახვამ გაახარა. ისე იყო გაწამებული, რომ დანა პირს არ უხსნიდა. სადილზედაც უარი თქვა, ცოლმა კი დევ უთხრა:

— ვსედავ, რალაც უბედურებაა ჩვენს თავს. მითხარი, ნუ გეშინია, შენთან ერთად ყველაფერს გავეუძლებო.

— ეჰ, აბა რალა გითხრა, — მიუგო სოვდაგარმა, — თურმე მოსწრებული შვილი მყოლია და მე კი სხვას მივეციო. — და რაც გზაზე თავს გადახდა, ყველაფერი დაწვრილებით უამბო.

— ვადა რამდენი ხანი მოგცაო? — ჰკითხა შვილმა.

— მსოლოდ ერთი წელიწადი, ჩემო შვილო, — მიუგო ოსვრით სოვდაგარმა, — მერე კი იმ დაწყევლილთან უნდა გაგაგზავნოო.

— ნუ დარდობ, მამაჩემო, — უთხრა ბიჭმა, — ერთ წელიწადს ხომ ერთად ვიქნებით და ერთმანეთში გავინახებთ. მერე წავალ და ისე ჩათვალე, ვითომ შვილი სულაც არა გყოლიაო.

სიტყვა შორს აღარ მიდის და წელიწადიც მალე გავიდა. ბიჭი მივიდა მამასთან და უთხრა:

— მამი, აბა მასწავლე, სად და როგორ წავიდე და წავალო.

მამამ აჩვენა საითაც უნდა წასულიყო და უთხრა:

— აი, ამ მხარეს წახვალ, ივლი, ივლი და მიადგები ზღვას, დადექი ნაპირზე და დაიძახე: წყლის ქაჯთა ხელმწიფევ, მოველ, რომ მამაჩემის პირობა შევასრულო და გამომხედე-თქო! ის გაიგებს შენს ხმას, გამოვა და წაგიყვანსო.

ბიჭმა ჩაიდო საგზალი, გადაკოცნა დედ-მამა და გაუდგა გზას. იარა იმ გზით, საითაც მამამ უჩვენა, და რამდენიმე დღის შემდეგ მართლაც მიადგა ზღვას. ნატარ-ნამგზავრი დაიღალა და წყალიც მოსწყურდა, მიიხედ-მოიხედა და ზღვის პირას ქვიშაში მოლიკლიკე წყარო დაინახა. მივიდა, წყალი დალია და პურიც შეჭამა. მერე თქვა: რა მეჩქარება, ცოტას დავისვენებ და მერე დავუძახებ ქაჯთა ხელმწიფეუსო და ქვიშაზე წამოწვა. დაღლილს მალე ჩაეძინა. სიზმარში ანგელოზი გამოეცხადა და უთხრა:

— აქ რას უწევხარ მორჩილი ხარით? ადექი, აქვე ახლოს გამოქვაბულია, შედი შიგ და დაიმაღე. შუადღისას სამი ქალი მოფრინდება ზღვაზე საბანაოდ. ის ქალები იმ ხელმწიფის შვილებია, ვისთანაც შენ მიდინარ. ქალები და-

იხდიან ტანსაცმელს, დააწყობენ ცალ-ცალკე და შეცურავენ ზღვაში. შენ მარჯვედ იყავი, როცა თვალს აიცდენ, ჩუმად გამოდი გამოქვაბულიდან, სულ უმცროსი დის ტანსაცმელი აიღე და დამალე. ბანაობას რომ მორჩებიან, უფროსი დები ჩაიცმევენ ტანსაცმელს და გაფრინდებიან, პატარა კი აქ დარჩება და თხოვნას დაგიწყებს, ტანსაცმელი გამომიჩინეო, მაგრამ სანამ ცოლ-ქმრობის პირობა არ მოგცეს, არ გამოუჩინო. ესეც იცოდე, — დაუმატა ბოლოს, — ქალები წყლიდან რომ გამოვლენ და უმცროსი დის ტანსაცმელს ვეღარ დაინახავენ, თითოჯერ ისე დაიწვილებენ, რომ ხე ხეს ეცემა, ქვა—ქვას, მთა—მთას და მინდორი—მინდორს, მაგრამ შენ არ შეგეშინდეს, გამოქვაბულში არაფერი დაგიშავდებაო.

გამოვლვიდა თუ არა ბიჭს, მაშინვე გამოქვაბულის ძებნას შეუდგა. იქით-მოდგა, აქეთ მოდგა და იპოვა. შევიდა შიგ და დაიმალა. შუადღე რომ წამოვიდა და კარგა ჩამოცსა, ზღვის პირას მართლაც მოფრინდა სამი ქალი. ისეთი ლამაზები იყვნენ, რომ კაცი იმათზე უტუროფესს ვეღარაფერს ნახავდა, მაგრამ უმცროსი მაინც ყველას ჯობდა. გაიხადეს ტანსაცმელი, დააწყეს ქვიშაზე და შეცვივდნენ ზღვაში. ბიჭმა დრო იხელთა, გამოვიდა გამოქვაბულიდან, აიღო უმცროსი დის ტანსაცმელი და ისევ გამოქვაბულში დაიმალა.

დებმა კარგა ხანს ილივლივეს ზღვის ტალღებში. გული რომ იჯერეს, ნაპირზე გამოვიდნენ. ნახეს, უმცროსი დის ტანსაცმელი აღარსად არი და გაბრაზებულებმა ისეთი დაიწვილეს, რომ მთელი მთა-ბარი შეზანზარდა. მერე უფროსმა დებმა ჩაიცვეს ტანსაცმელი და გაფრინდნენ, უმცროსი კი დარჩა ნაპირზე და ტანსაცმელს დაუწყო ძებნა. მაგრამ აბა რას იპოვიდა იმედი რომ გადაუწყდა, დადგა ზღვის პირას და ხმამაღლა დაიძახა:

— ვინა ხარ, რა სულიერი, თუ ჩემი ტოლი ხარ, ძმად მიგიღებ, თუ უფროსი ხარ — მამად, ოღონდ გამოჩნდი და ტანსაცმელიც გამომიჩინეო. ქალმა ეს სიტყვები რამდენჯერმე კიდევ გაიმეორა, მაგრამ ბიჭი არ გამოჩნდა, ბოლოს ქალი შეღონდა მოლოდინით და დაუძახა:

— კარგი, რაც არის, არის, შენ ქმარი და მე ცოლი, — ოღონდ გამოდი და ტანსაცმელი მომიტანეო.

მაშინ კი გამოვიდა ბიჭი და მიუტანა ტანსაცმელი. ქაღალმა გადაიცივა საჩქაროდ და ბიჭს უთხრა:

— მე ჩემს სიტყვას არ გადავალ, დღეიდან შენი ცოლად ვიქნები, წამოდი და ჩემს სახლსა და სადგომს გაჩვენებო.

გაუძღვა ქალი წინ და გაუდგნენ გზას. იარეს, იარეს და მზის ჩასვლისას ერთ მარმარილოს სასახლეს მიადგნენ, ქალმა შეიყვანა ბიჭი თავის ოთახში, გაუშალა მდიდრულნი სუფრა და თვითონაც გვერდით მოუჯდა. კარგად რომ და აპურა, მერე ჰკითხა:

— ახლა მითხარი, ვინა ხარ, სადაური და ან აქ რამ მოგიყვანაო?

ბიჭმა ყველაფერი დაწვრილებით უამბო. მერე ქალმა უთხრა:

— ვისთანაც შენ მიდიხარ, ის წყლის ქაჯთა ხელმწიფე მამაჩემია. ის ქალები კი, ჩემთან რომ ბანაობდნენ, ჩემი უფროსი დები არიან. ავი დედინაცვალი გვყავს და დები ამიტომ ცალკე ვცხოვრობთ. შენ მამაჩემსა და ჩემს დედინაცვალს შესაჭმელად უნდიხარ; მაგრამ რაკი ჩემი გახდი, მე დაგეხმარები და ვედარაფერს დაგაკლებენ. მამაჩემი ოთხ ძნელ დავალებას მოგცემს და გეტყვის, თუ ვერ აასრულე, შეგჭამო, მაგრამ შენ არ შეგეშინდეს, ჩემთან მოდი, მითხარი, რასაც დაგავალებს, და მე ვიციო.

ბიჭი იმ ღამეს თავის მზეთუნახავ ცოლთან დარჩა, მერე დილას ადგა და წავიდა ქაჯთა ხელმწიფის სახლში. მივიდა ხელმწიფესთან და უთხრა:

— აი, შევასრულე მამაჩემის პირობა და მოვედი, რა გინდა, რას ითხოვ ჩემგანო?

ქაჯთა ხელმწიფემ გამოიყვანა ბიჭი გარეთ, დაანახვა ერთი ტრიალი მინდორი და უთხრა:

— ამ მინდორს ხვალ დილაამდე ისეთი გალავანი უნდა შემოავლო, რომ სამი საყენი სიმაღლე ჰქონდეს და სამი საყენი — სისქე, თუ ვერ შეასრულე, იცოდე ცეცხლზე შეგწვავ და ისე შეგჭამო.

დაბრუნდა ბიჭი ცოლთან და შესჩივლა:

— იმ მინდორს მე კი არა, ათასი კაციც ვერ შემოავლებს ისეთ გალავანს, როგორც მამაშენმა დამავალა. ჯადო

ქარი სომ არ ვარ, რომ ვუთხრა, აშენდი-მეთქი, და აშენდესო?

— ნუ გეშინია, ამქვეყნად შეუძლებელი არაფერია, — ანუგეშა ქალმა, და წუსხანდელზე უკეთესი სუფრა გაუშალა. თვითონაც გვერდით დაუჯდა, გემრიელი სასმელ-საჭმლით გაუმასპინძლდა და დააძინა. მერე უბიდან ერთი ლერწმის ღერი ამოიღო და ჩასძახა:

— ჩემო შავო არაბებო, გაჭირვებისათვის გახსენებთ და ახლავე ჩემთან გაჩნდითო!

თქმა და თორმეტი არაბის შემოსვლა ერთი იყო. ქალმა გამოიყვანა გარეთ არაბები, სასახლის გასწვრივ გაშლილი მინდორი დაანახვა და უბრძანა:

— ან დაწყდით, ან აი იმ მინდორს ამაღამ ისეთი გალავანი შემოაგლეთ, რომ სამი საჟენი სისქე ჰქონდეს და სამი საჟენი — სიმალღეო.

— თქმა ძნელია, გაკეთება ადვილიო, — თქვეს არაბებმა და თვალის დახამხამების უმაღ გაქრნენ. დილაბინდზე დაბრუნდნენ და ქალს უთხრეს, დავალება შესრულებულია და ნახეთო.

გააღვიძა ქალმა ბიჭი, ააფარა ფეშტამალი, მისცა ხელში ქაფია და უთხრა:

— გალავანი უკვე მზად არის, შენ მხოლოდ მიდი და ალაგ-ალაგ ქაფია მიუსვ-მოუსვი, რომ მამაჩემს მართლა შენი გაკეთებული ეგონოსო.

ბიჭიც წავიდა, როგორც ცოლმა დაარბია, ისე მოიქცა: მიმოდის გალავნის გარეთ და ქაფიას ხან იქ წაუსვამს, ხან — აქ.

გამოიხედა წყლის ქაჯთა ხელმწიფემ და გაკვირვებულმა თავის ავ ცოლს დაუძახა:

— დედაკაცო, გამოიხედე, ჩვენს ტყვეს მართლა არ აუშენებია გალავანიო!

— დაგიდგეს თვალი, — ქოქოლა მიაყარა ცოლმა, — შენმა ტყვემ კი არ ააშენა, შენმა უმცროსმა ქალმა ააშენებინა თავის არაბებსო.

მივიდა სოვდაგრის შვილი წყლის ქაჯთა ხელმწიფესთან და ჰკითხა: — კიდევ რას დამავალებო?

ხელმწიფემ უთხრა:

— ამ გალავანში დილამდე ისეთი ხეხილის ბალი უნდა გააშენო, რომ რიგი ჰყვოდეს, რიგი მწიფდეს და რიგი იკრიფებოდეს, შეასრულებ — კარგია, არადა, სამფურზე წამოგაგებ და ისე შეგჭამო.

წამოვიდა ცოლთან დაღონებული ბიჭი და შესჩივლა:

— მამაშენმა იმ გალავანში ახალი ბალის გაშენება დამავალა, თანაც ისეთისა, რომ რიგი ყვოდეს, რიგი მწიფდეს და რიგი იკრიფებოდეს. როგორ უნდა მოვასწორო ერთ ღამეში, ჯადოქარი ხომ არა ვარო!

— ნუ გეშინია, — უთხრა ცოლმა, — შენ თუ არა ხარ ჯადოქარი, სამაგიეროდ მე ვარო. — მოუტანა კარგი სასმელსაჭმელი, ავახშმა და დააძინა. თვითონ ამოიღო ლერწმის ღერო და ჩასძახა:

— ჩემო შავო არაბებო, გაჭირვების გამო გიხმობთ და ახლავე ჩემთან გაჩნდითო.

თქმა და არაბების მისვლა ერთი იყო. თორმეტივე თავდახრით წარუდგა და შეეკითა, — რა გაგჭირვებია, ჩვენო მბრძანებელო?

ქალმა უბრძანა:

— იმ თქვენს აშენებულ გალავანში დილისათვის ისეთი ბალი უნდა გააშენოთ, რომ რიგი მწიფდეს, რიგი ყვოდეს და რიგი იკრიფებოდესო.

— თქმა ძნელია, გაკეთება ადვილი! — თქვეს არაბებმა და წამსვე გაუჩინარდნენ. დილაზე დაბრუნდნენ და თავიანთ ქალბატონს მოახსენეს, — დავალება შესრულებულია და ნახეთო.

გაადვიდა ქალმა თავისი ქმარი, მისცა ხელში სასხლავი დანა, კალათა და უთხრა:

— ბალი მზად არის, შენ შედი შიგ, ზოგან გამხდარი ტოტი შეაჭერი, ზოგან მწიფე ხილი მოწყვიტე, რომ მამაჩემმა დაგინახოს და მართლა შენი გაშენებული ეგონოსო.

წავიდა ბიჭი და შევიდა ბაღში. დადის აქეთ-იქით, ზოგან ტოტს შეაჭრის, ზოგან მწიფე ხილს კრეფს და კალათაში ყრის. გამოიხედა ხელმწიფემ და მსხმოიარე ბალი რომ დაინახა, ცოლს დაუძახა:



— დედაკაცო, ერთი გამოდი და ნახე, ჩვენს ტყვეს მართლა არ გაუშენებია ხეხილის ბაღიო!

ცოლმა ისევ ქოქოლა მიაყარა:

— დაგიდგეს თვალი შენმა ტყვემ კი არა, შენმა პატარა ქალმა გააშენებინა თავის ჯადოქარ არაბებსო.

წყლის ქაჯთა ხელმწიფემ შეუბღვირა ცოლს და უთხრა:

— დედაკაცო, ენა დაიმოკლე, თორემ მიგბეგვავ, შვილები სახლიდან გამიძევე და იქაც აღარ ეხსნებიო?

მივიდა ბიჭი ქაჯთა ხელმწიფესთან და ჰკითხა: — კიდევ რას დამავალებო? — ხელმწიფემ ერთი გაშლილი მდინარე დაანახვა და უთხრა:

— აგე იმ მდინარეზე დილამდე ისეთი სპილოს ძვლის ხიდი უნდა აავო, რომ ცხრა სადროშო ჯარმა თავის თოფ-ზარბაზნებით ზედ გაიაროს და არ ჩაინგრესო. გააკეთებ — კარგია, არა და, ყალად გაგახმობ და ისე შეგჭამო.

წამოვიდა ბიჭი დაღონებული და ცოლს შესჩივლა:

— როგორ უნდა ავაშენო დილამდე იმ სიგრძე ხიდი და ან იმდენი სპილოს ძვალი სად ვიშოვო?

— ნუ გეშინია, — ანუგეშა ცოლმა, — რაკი საჭიროა, სპილოს ძვალაც უნდა ვიშოვოთ და ხიდიც ავაშენოთო. — გაუშალა ისევ კარგი სუფრა, ავასშმა და დააძინა. თვითონ ადგა, ამოიღო ლერწმის ღერი და ჩასძახა:

— ჩემო ერთგულო არაბებო, გაჭირვებისათვის გეძახით და ახლავე ჩემთან მოდითო! — თქმა და მოსვლა ერთი იყო. დაუკრეს თავი თავიანთ ქალბატონს და შეეკითხნენ:

— რა გაგჭირვებია, ჩვენო მბრძანებლო? გვიბრძანე და მზადა ვართო.

— ქალმა დაანახვა მდინარე და უბრძანა:

— აგე იმ მდინარეზე დილამდე ისეთი სპილოს ძვლის ხიდი უნდა გააკეთოთ, რომ ცხრა სადროშო ჯარმა თავისთითო თოფ-ზარბაზნებით გაიაროს ზედ და არ ჩატყდესო.

— თქმა ძნელია, გაკეთება — ადვილი — მიუგეს არაბებმა და გაქრნენ.

ქალმა დილაბნელზე გააღვიძა თავისი ქმარი, ააფარა ფეშტემალი, მისცა ხელში ნაჯახი, ჩაქუჩი და უთხრა:

— ხიდი გადებულია, შენ გაიწარ-გამოიარე ხიდზე და აქა იქ ცული და ჩაქური ჩაუკაკუნე, რომ მამაჩემმა დაგინახოს და მართლა შენი გაკეთებული ეგონოსო.

წავიდა სოვდაგრის ბიჭი და შედგა ხიდზე. მიმოდის წიწ და უკან და ადგილ-ადგილ ჩაქურს უკაკუნებს. გამოიხედა ქაჯთა ხელმწიფემ და ცოლს დაუძახა:

— დედაკაცო, ერთი გამოდი, ჩვენ ტყვეს მდინარეზე როგორი ხიდი გაუკეთებიაო.

ცოლმა ისევ ქოქოლა მიაყარა:

— დაგიდგეს თვალი ტყვემ კი არ გააკეთა, შენმა უმცროსმა ქალმა გააკეთებინა თავის არაბებსო!

ახლა კი ვეღარ მოითმინა წყლის ქაჯთა ხელმწიფემ, მისდგა თავის ცოლს და სახრით ერთი კარგა მიბეგვა.

— მე კი მითქვამს და, რაკი არა გჯერა, ნახავ საბოლოოდ რასაც გიზამენო, — უთხრა ცოლმა და გაჩუმდა.

მოვიდა ბიჭი ხელმწიფესთან და ჰკითხა:

— აბა კიდევ რას დამავალებო?

წყლის ქაჯთა ხელმწიფეს ორი რაში ჰყავდა, — ნიაქარი თვალთულა და გულთმისანი თვალჩიტა. თვალთულა სახლში ება და საჯდომად იყენებდა. თვალჩიტა კი ჯოგში ჰყავდა გაშვებული. უთხრა სოვდაგრის შვილს: — წადი ჯოგში, დაიჭირე ჩემი თვალჩიტა რაში და აქ მომგვარე, დაიჭერ და მომგერი — ხომ კარგი, ვერ დაიჭერ და — ცოცხლად შეგჭამო.

სოვდაგრის შვილი ახლა კი გახარებული დაბრუნდა თავის ცოლთან. გულში ფიქრობდა: რა ცხენი უნდა იყოს ისეთი, რომ ვერ დავიჭიროო. ცოლმა გახარებული რომ დაინახა თავისი ქმარი, ჰკითხა, — რა დაგავალა მამაჩემმა ისეთი, რომ ასე ძალიან გიხარიაო?

— დღეს ძალიან ადვილი დავალება მომცა, — უთხრა ბიჭმა, — თვალჩიტა რაშის დაჭერა და მოყვანა დამავალაო.

— ადვილი კი არა, ყველაზე ძნელი საქმე დაუვალებია, — უთხრა ქალმა, — შენ არ იცი, ის რა არის, ცხენი კი არა, ქაჯია, მაგრამ რაკი დაგავალა, სხვა გზა არაა, უნდა შევასრულოთო, — გაგზავნა ქმარი თავის მამასთან და დააბარა:

გამოართვი თორმეტი ალმასის ლაგამი, თორმეტი უნაგირი და აქ მომიტანეო.

ბიჭი წავიდა, გამოართვა ხელმწიფეს, რაც ცოლმა და-  
აბარა, და მოიტანა. ქალმა გაუშალა ქმარს სუფრა, თვითო-  
ნაც გვერდით მიუჯდა, ეფერა, ეაღერსა, კარგად ავახშმა და  
დააძინა. დილაზე ადგა და თავისი არაბები მოიხმო. მისცა  
თითოს თითო ლაგამი და უნაგირი და თვალჩიტა რაშის  
დაჭერა უბრძანა. მერე ქმარი გააღვიძა და უთხრა:

— ეს შენი ბოლო დავალებათაა, შეასრულე თუ ვერ შეას-  
რულე, სულერთია, მამაჩემი მაინც შეგჭამს, ამიტომ მე და  
შენ არაბებს უნდა გავეყვით და, რაშს რომ დაიჭერენ, შევსხ-  
დეთ ზედ და აქედან გავიქცეთო.

მზე რომ ამოიწვერა, უხვე ჯოგთან იყვნენ. თვალჩიტა  
რაში რემას წინ მოუძლოდა და იალაღებისაკენ მიჰყავდა.  
ქალმა დაანახვა არაბებს თვალჩიტა და უთხრა, — აგე სწო-  
რედ ის მოწინავე ცხენი უნდა დაიჭიროთო.

წავიდნენ არაბები, მაგრამ რის დაჭერა, რა დაჭერა, რამ-  
დენიც მიუახლოვდნენ ჯოგს, თვალჩიტამ ყველა ტორებით  
გასრისა და მოკლა. ბოლოს აღარცერთი არაბი რომ აღარ  
დარჩა ცოცხალი, სოვდაგრის ბიჭმა თვითონ აიღო ლაგამ-  
უნაგირი და ცოლს უთხრა:

— სხვა გზა არ არის, მე თვითონ უნდა ვცადო. დავი-  
ჭერ — კარგია, არადა მაინც სასიკვდილოდ ვარ განწირუ-  
ლი და ცოცხლად შეჭმას ისევ ცხენმა რომ მომკლას ის მირ-  
ჩენიაო.

ქალმა ამოიღო უბიდან ბასრი დანა და უთხრა:

— არაბები დამეხოცნენ, ახლა შენს მეტი პატრონი აღა-  
რავეინ გამაჩნია და შენც თუ მოკვდები, მე სიცოცხლე რაღად  
მინდა, დავიცემ ამ დანას გულში და თავს მოვიკლავო. —  
გადაეხვია თავის ქმარს თვალცრემლიანი და დაემშვი-  
დობა:

ასენა ბიჭმა ღმერთი, გადაიწერა პირჯვარი და წავიდა  
თვალჩიტას დასაჭერად. თვალჩიტა გულთმისანი იყო,  
მიუხვდა ქალ-ვაჟს გულის წუხილს და ბიჭს უთხრა:

— თქვენ რაკი ასე თავგანწირვით გყვარებით ერთმანე-  
თი, თქვენი გულისათვის მეც თავს გავეწირავ, შემასხედით  
ორივენი ზურგზე და სამშვიდობოქს გავიყვანთო,

ბიჭი და ქალი სიხარულისაგან აღარ იყვნენ, გადაესვივნენ თვალჩიტას და დაუწყეს კოცნა. მერე შესხდნენ და ზღვის გაღმა ქვეყნისაკენ გააქროლეს.

წყლის ქაჯთა ხელმწიფემ უცადა სოვდაგროს ბიჭს, უცადა და, რომ არ დაბრუნდა, ცოლს უთხრა:

— ეტყობა, ჩემი ტყვე ჩემმა თვალჩიტა რაშმა გათელა, რომ აღარ მოდისო.

— შენ კი დაგიდგეს ეგ თვალები! — მიაწყევლა ცოლმა, — მოკლა კი არა, შენი უმცროსი ქალი და ის ტყვე ზურგზე შეისხა და ზღვის გაღმა ქვეყნისაკენ მიაქროლებსო.

— ეგ შენი ნათქვამი რომ მართალი არ გამოდგეს, იცოდე სასარჩობელაზე ჩამოგკიდებო; — უთხრა ქმარმა.

— თუ არა გჯერა, წადი და შენი თვალით ნახეო, — მიუგო ცოლმა. ხელმწიფე შეჯდა საჩქაროდ ნიავექარ თვალთულაზე და გაეკიდა. თვალჩიტამ იცოდა, რომ პატრონი თვალთულათი დაედევნებოდა და კარგა მანძილი რომ გაიბინა, ბიჭს უთხრა:

— აბა, უკან მოიხედე, ხომ არაფერი მოჩანსო?

ბიჭმა მოიხედა და შორს ერთი ბუზის ტოლა მოძრავი წერტილი დაინახა. — ეს უსათუოდ ჩემი პატრონია, — თქვა ცხენმა და ბიჭს უთხრა, — სულერთია, დაგვეწევა, ამიტომ მე ვიქცევი ვენახად, ქალს ვაქცევ მტევნად და შენ მეზურედ. ხელმწიფე ველარ გვიცნობს და გადავრჩებითო.

თქმა და ასრულება ერთი იყო. იქცა თვალჩიტა ვენახად, ქალი მტევნებად და ბიჭი მეზურედ. დადის ბიჭი ვენახებში, ხელში ვაზის სასხლავი მაკრატელი უჭირავს და მტევნებს ეალერსება. მოვარდა წყლის ქაჯთა ხელმწიფე აქოშინებული ცხენით და ბიჭს — მეზურეს ჰკითხა: — აქეთ ცხენით ბიჭსა და ქალს ხომ არ გაუვლიათო?

— წლიდან წლამდე ამ ზვარში ვტრიალებ და აქეთ გავლილი ჯერ კაციშვილი არ მინახავსო, — მიუგო ბიჭმა.

წყლის ქაჯთა ხელმწიფე რომ უკან გაბრუნდა, ვენახი იქცა ისევ რაშად, მტევნები — ქალად, მეზურე ბიჭად და გაუდგნენ კვლავ გზას. ქაჯთა ხელმწიფე კი მივიდა შინ და ცოლს მივარდა:

— შე ასეთ-ისეთო, რად მომატყუე და ამ სიშორე გზაზე

მაწვალე, ახლა როგორ გინდა, ჩამოგკიდო სახრჩობელაზე, თუ არაო?

— მაშ გზაზე არავინ შეგხვედრიაო? — ჰკითხა ცოლმა.

— მხოლოდ ერთი მეზვრე შემხვდა, მიმოდითა თავის ენასში და მტევნებს ეფერებოდაო.

— დაგიდგეს ეგ თვალები, — უთხრა ცოლმა, — ის ზვარი შენი თვალჩიტა რაში იყო, მტევნები — შენი ქალი და ნეზვრე კიდევ — შენი ტყვე. რატომ იქვე არ მოკალი და ვაზი და მტევნებიც სულ არ აკუწეო.

ზღვის ხელმწიფე ისევ მოახტა თვალთულას და გამოეკიდა უკან. მირბის თვალჩიტა, მირბის, მაგრამ იცის, რომ პატრონი ისევ გამოეკიდება თვალთულათი და დაეწევა. კარგა მანძილი რომ გაირბინა, ისევ უთხრა ბიჭს:

— აბა, უკან მოიხედე, ხომ არაფერი მოჩანსო?

— ძალიან შორს ბუზისტოლად რაღაც მოჩანსო, — მიუგო ბიჭმა.

— ეგ უსათუოდ ჩემი პატრონიაო, — თქვა თვალჩიტამ და იქცა საყდრად, ბიჭი მღვდლად აქცია, ქალი — ხატად. დგას ბიჭი საყდარში, ხატის წინ, ანაფორაგადაცმული და „მამაო ჩვენოს“ ბუტბუტებს. გამოიარა ქაჯთა ხელმწიფემ და ჰკითხა მღვდელს:

— აქეთ ცხენიან ქალსა და ბიჭს ხომ არ გაუვლიათო?

— წელიწადზე მეტია ამ საყდარში ვწირავ და ადამიანი კი არა, ფრინველიც არ დამინახავს მალლა გადაფრენილიო, — მიუგო ბიჭმა.

გაბრუნდა თუ არა უკან წყლის ქაჯთა ხელმწიფე, საყდარი ისევ თვალჩიტად გადაიქცა, მღვდელი — ბიჭად და ხატი — ქალად. შესხდნენ ქალ-ვაჟი ისევ თვალჩიტაზე და გააქროლეს.

მივიდა წყლის ხელმწიფე შინ და ცოლს შეუტია:

— რაკი მეორედაც მომატყუე, ახლა კი ველარ გადამირჩები, წამოდი ახლავე სახრჩობელაზე უნდა ჩამოგკიდოო.

— ჩამომკიდე თუ ვტყუივარო, — უთხრა ცოლმა, — მაგრამ ჯერ ის მითხარი: გზაზე არავინ შეგხვედრიაო?

— ერთი საყდარი შემხვდა, შიგ ხატის წინ ანაფორიანი მღვდელი იდგა და რაღაცას ბუტბუტებდაო.

— დაგიდგეს ორივე თვალი, — ქოქოლა მიაყარა ცოლმა, — ის საყდარი შენი თვალრიტა რაში იყო, ის მღვდელი — შენი ტყვე და ის ხატი კიდევ — შენი ქალი. შე უბედურო, ის საყდარი უნდა დაგენგრია, ხატი დაგეფშვნა და მღვდელი კიდევ მოგეკლაო.

წყლის ხელმწიფემ ისევ დააპირა თვალთულაზე შეჯდომა და გამოდევნება, მაგრამ ცოლმა არ დაანება — შენ ისევ მოგატყუებენ, ისევ მე წაეალ და ეშმაკებადაც რომ გადაიქცნენ, ვერსად წამივლენო. მოახტა თვალთულას ეს დედაკაცი და გაქუსლა.

მირბის თვალრიტა, მირბის კი არა, მიფრინავს, მაგრამ იცის, რომ პატრონი მესამედაც დაედევნება და თვალთულას კი შორს ვერ წაუვა. კარგა მანძილი რომ გაირბინა, ბიჭს უთხრა:

— აბა, ერთხელაც მიიხედე, ხომ არაფერი მოჩანსო? მოიხედა ბიჭმა და უთხრა:

— ვილაც მხედარი ცხენს ნიავექარივით მოაქროლებსო.

— ეგ ნამდვილად ჩემი პატრონის ჯადოქარი ცოლი იქნებაო, — თქვა თვალრიტამ და იქცა დიდ ტბად, ხოლო ქალი და ბიჭი გედებად აქცია. დაცურავენ ყელი-ყელგადაჭდობილი გედები წყალში და ტბის ზედაპირი ნელა ირხევა. ამ დროს მოვარდა წყლის ქაჯთა ხელმწიფის ცოლი, გადმოხტა რაშიდან და დაუწყო წყალს ყლაპვა. ყლაპა დედაკაცმა წყალი, ყლაპა, გაიბერა და გასკდა.

ტბა ისევ რაშად იქცა, გედები კი — ქალ-ვაჟად. ქალმა მისცა ბიჭს თავისი ბასრი დანა და უთხრა:

— აიღე ეს წყეული და სულ ლუკმა-ლუკმა აკუწე, თორემ გაცოცხლდება და არ მოგვასვენებსო.

გამოართვა ბიჭმა დანა, დედაკაცი სულ ფრჩხილისტოლა ნაწილებად აკუწა და ნაკუწები აქეთ-იქით მიმოფანტა. მერე შესხდნენ თვალრიტაზე და თვალთულაზე და უკვე უშიშრად გაუდგნენ გზას.

ბევრი იარეს, თუ ცოტა იარეს, ბოლოს მივიდნენ ბიჭის დედ-მამასთან. სოვდაგარსა და იმის ცოლს შვილი უკვე გამოგლოვილი ჰყავდათ, მაგრამ ცოცხალი და საღსალამათი

რომ დაინახეს, ცას ეწივნენ სიხარულით და ღმერთს მადლი შესწირეს.

სოვდაგარმა იმავე დღეს წაიყვანა წყლის ქაჯთა ხელმწიფის ქალი საყდარში და ქრისტიანულად მოანათვლინა. მერე მოიწვია მთელი ქალაქი და შეიღსა და რძალს არნახული ქორწილი გადაუხადა. ქორწილში მეც გახლდით, იმდენი ღვინო დავლიე და ისე დავთვერი, რომ დღესაც არ გამომეფხიზლებია.

ჭირი — იქა, ლხინი — აქა,  
ქატო — იქა, ფქვილი — აქა.  
უნაგირი ალგეთს დამრჩა,  
მოსართავი — არაგვზედა,  
ღმერთმა ყველას გაგიმარჯოთ,  
ვინაც სხედხართ ალაგზედა.





## სულამბარი და გულამბარი

იყო და არა იყო რა, ერთ ქვეყანაში იყო ერთი ხელმწიფე. ხელმწიფეს მეტისმეტად ჯიუტი და ავი ხასიათი ჰქონდა, არც შებრალება იცოდა, არც დანდობა, ყველა შეწუსებული ჰყავდა, ყველას სიცოცხლეს უმწარებდა და ხალხმა ამიტომ ზედმეტ სახელად ჯოჯოხეთა შეარქვა.

ამ სახელმწიფოში ცხოვრობდა ერთი ალალ-მართალი და მშრომელი კაცი, სახელად გოდერძი. გოდერძის თორმეტი შვილი ჰყავდა — ერთი ქალი და თერთმეტი ვაჟი. გოდერძი ღარიბი იყო, მაგრამ უსამართლოდ თავს არავის დააჩავრინებდა. ხელმწიფესაც ერთგულად ემსახურებოდა, თუმცა ზედმეტს და უსამართლოს არაფერს აკადრებინებდა.

ჯოჯოხეთა ხელმწიფეს არ მოსწონდა გოდერძის ასეთი სიმტკიცე და მართლმოყვარეობა და სულ იმას ცდილობდა, რამე ევნო.

მაღე საამისო დროც დადგა: ჯოჯოხეთა ხელმწიფეს ორი ქალიშვილი ჰყავდა, უფროსი ქალიშვილი ერთ ხელმწიფის შვილზე დანიშნა და სიძეს მზითევში რამდენიმე რჩეულ ვაჟაკსა და ქალს შეჰპირდა. რჩეულ ქალ-ვაჟებში გოდერძის თორმეტივე შვილიც იყო დასახელებული, მაგრამ გოდერძიმ მეფის ბრძანება შორს დაიჭირა და მტკიცე უარი შეუთვალა, — მე რაც სამსახური მმართვებს შენი, გისრულე, ამისი ვალდებული კი არა ვარ და არც შენა გაქვს შვილების წართმევის ნებაო.

გოდერძის უარი რომ გაიგო, ჯოჯოხეთა ხელმწიფე მთლად ჯოჯოხეთად გადაიქცა, გაწყრა, მაგრამ რა გაწყრა!



პირიდან სულ დორბლები წამოყარა და გაცეცხლებულმა იყვირა, —ახლავე შეიპყარით შეილებიანად და ჩამოახრჩეთო!

გოდერძი ჭკვიანი კაცი იყო, იცოდა, რომ ჯოჯოხეთა ხელმწიფე უარს არ აპატიებდა და თადარიგი წინასწარვე დაიჭირა: ცოლშვილითურთ აიყარა და ბინა ერთ მიუვალ კლდეში დაიდო. ხელმწიფემ ჯარი და ნაზირ-ვეზირები დაადევნა, მაგრამ გოდერძის შვილები რჩეული ვაჟაკები იყვნენ და ხელმწიფის ამაღლა სიმაგრეში არ შეუშვეს.

ჩამოვარდა ამ დღიდან მტრობა გოდერძისა და ხელმწიფის შორის. კლდე-ღრეში გახიზნული კაცის ხელობა ხომ ყაჩაღობაა და გოდერძიც ამ გზას დაადგა. თავისი რჩეული შვილებით წელიწადში რამდენჯერმე ჩავიდოდა ქალაქში, შეიპარებოდა ღამე ჩუმად, დახოცავდა სასახლის მცველებს და საზინას გაიტაცებდა, რაც ჭირდებოდა, თვითონ იღებდა, რაც არა და ღარიბ-ღატაკებს ურიგებდა.

რალა არ სცადა ჯოჯოხეთა ხელმწიფემ, რადანაირად არ უყელა, მაგრამ გოდერძისა და იმის შვილებს ვერაფერი დააკლო. ბოლოს ძალიან რომ შეწუხდა, ხერხს მიმართა: გოდერძის თავისი პირველი ვეზირი მიუგზავნა და შერიგება სთხოვა, თანაც ყველაფრის პატიება და ხელშეუხებლობა აღუთქვა.

გოდერძიმ ხელმწიფის შემონათვალის შვილებს გააცნო და ჰკითხა: — რას იტყვითო?

ძმებმა დაიჯერეს ჯოჯოხეთა ხელმწიფის დანაპირებზე და დაბრუნება ამჯობინეს, მხოლოდ ყველაზე ნაბოლარა ძმა — ჯიხვა დადგა უარზე, — ის ჩვენი ხელმწიფე ისეთი ჯოჯოხეთია, არაფერს გვაპატიებს და დაგვსჯისო. თვითონ გოდერძიც უმცროს შვილს ემხრობოდა, მაგრამ დანარჩენმა ძმებმა არ დაუჯერეს და მამასა და ძმას კარგაც უსაყვედურეს:

— როდემდე უნდა ვიყვნეთ ტყე-ღრეს შეხიზნულები, ამ ოჯახი და ცოლ-შვილი არ გვინდა, ან ადამიანური ცხოვრება? თქვენ თუ არ გინდათ, დარჩით, ჩვენ კი წავალთ და შეავურიგდებითო.

ჩავარდა საგონებელში გოდერძი. არ უნდოდა შვილების გათავთაყვადება და უმცროს შვილს ჯიხვას უთხრა:

— მოდი, შვილო, წავიდეთ. მართლაც და, როდემდე ვუყარნეთ ამ ტყეში, ხელმწიფეა და იქნებ თავისი სიტყვა არ გატეხოსო.

— მე კი მითქვამს და თქვენ იცითო, — თქვა ჯიხვამ და დათანხმდა.

აიყარა კლდის გამოქვაბულიდან გოდერძის ოჯახი და დაბრუნდა ძველ ნაბინავარში. მამამ და შვილებმა შეაკეთეს სახლი, აანთეს კერა და დაიწყეს ძველებურად შრომა და პატიოსანი ცხოვრება. ჯოჯოხეთა ხელმწიფემაც თითქოს დაივიწყა ძველი მტრობა, დაუტკბა, დაუახლოვდა. უფრო ჯიხვა მოსდიოდა თვალში, სასახლეში ხშირად იბარებდა და თანატოლივით ესაუბრებოდა, გულში კი სხვა განზრახვა ბქონდა, რომ ჯიხვასთვის შარი მოედო და ძველი მტრობის საბუჯის სასტიკად დაესაჯა.

საბაბი აქაც მალე გამოჩნდა. ჯოჯოხეთა ხელმწიფის უმცროსი ქალიშვილი ხშირად ხედავდა ჯიხვას სასახლეში და მოსწონდა, ბოლოს შეუყვარდა კიდეც. ლამაზი და ცქეიტი გოგო ჯიხვასაც შეუყვარდა, მაგრამ იცოდა, რომ ხელმწიფის ქალს მას არაფერ აღირსებდა და თავი შორს ეჭირა. ეს ამბავი სეფე ქალებმა გაიგეს და სასახლეში ჭორი გაავრცელეს. ჭორი ბოლოს ჯოჯოხეთა ხელმწიფის ყურამდეც მივიდა. განრისხდა ხელმწიფე და როგორ განრისხდა! პირიდან სულ ცოფები ყარა, — როგორ გაბედა ვიღაც გლეხის ბიჭმა ჩემი ქალის შეყვარებაო, და კარისკაცებს ჯიხვას შეპყრობა უბრძანა:

— სასახლეში დავიბარებ და, მოვა თუ არა, მაშინვე შეიპყართ და ღრმა ორმოში ჩააგდეთო.

დაიბარა სასახლეში და ჯიხვაც ძველებურად ეახლა, როგორც წესი, შესვლისთანავე აიყარა ხმალ-კაპარჭი და კარიბჭის მცველებს გადასცა, და ის იყო, უნდა შესულიყო დარბაზში, რომ ეცნენ შეიარაღებული კარისკაცები და ბნელ ხაროში უკრეს თავი.

რაკი ჯიხვა ხელთ ჰყავდა, ჯოჯოხეთა ხელმწიფეს, რა თქმა უნდა, სხვა ძმებისა და მამის დასჯა აღარ გაუჭირდებოდა, აფრინა მაშინვე შეიარაღებული ჯარისკაცები და გოდერძი და დანარჩენი შვილებიც შეაპყრობინა, მოა-

ყვამინა სასახლეში და ისინიც ბნელ ორმოებში ჩააყრევინა, ზის ჯიხვა ცივ და ბნელ ორმოში და ფიქრობს, როგორ დააღწიოს თავი სატანჯველს. ერთხელ ასეთ ფიქრში რომ იყო გართული, უცბად თავზე რაღაც დაეცა. აიხედა მალღან და ბნელში ჩამოშვებული თოკი დაინახა. იმავე წამს მალღანიდან ნელი ჩურჩულიც გაიგონა, — მოექვიდე თოკს და ამოადიო. — ჯიხვა მოექვიდა თოკს და ავიდა. ორმოს თავზე ჯოჯოხეთა ხელმწიფის უმცროსი ქალი დახვდა. ქალმა მოჰკიო და ხელი, გაიყვანა გალავანში და უთხრა:

— დაყოვნების დრო აღარ არის, აჰა, ცხენი და იარაღი, ყველაფერი მოგიმზადე. წადი, შეკრიბე ხალხი, დაესხი მამაჩემის სასახლეს და გამიტაცე. შენს მამას და დაძმებს მე მოვხედავ, შენ მხოლოდ შენს თავს მოუარე და ჩემს გატაცებაზე იფიქრეო. — აკოცა ქალმა ერთი და გაისტუმრა.

შეჯდა ჯიხვა ცხენზე და წავიდა, მიდის, მაგრამ არ იცის, საით მიდის. ბევრი იარა თუ ცოტა, ბოლოს გზაზე ერთ თავისკბილა ბიჭს გადაეყარა. ჯიხვას მოეწონა ბიჭი და გამარჯობა უთხრა.

— გაგიმარჯოსო, — მიუგო ბიჭმა.

ჯიხვამ შეატყო რომ ბიჭი რაღაცაზე დაღონებული იყო და მიზეზი და ვინაობა ჰკითხა. ბიჭმაც დაუფარავად უამბო:

— მე ერთი ძლიერი ხელმწიფის შვილი ვარ. მამაჩემი ღრმად მოხუცი იყო და თანაც ორივე თვალით ბრმა, მაგრამ ტახტს მაინც არ მამლევედა. იბარებდა ექიმებს და თვალეზისა და სიბერის წამალს სთხოვდა, რომ თვალეზიც ასელოდა და კიდევ გაახალგაზრდავებულიყო. ვინ არ მოიწვია, ვისთან არ იმკურნალა, მაგრამ არაფერი გამოუვიდა, არც სინათლე დაუბრუნდა და არც სიჭაბუკე. ბოლოს ერთი წუნკალი დედაბერი შეუჩნდა, მე მოგარჩენო და წამალიც ასწავლა: თუ ათი წელიწადი ახალშობილთა სისხლში იბანავებ, თვალეზიც აგეხილება და ახალგაზრდობაც დაგიბრუნდებაო. დაუჯერა მამაჩემმა დედაბერს, დაგზავნა ჯარი თავის სახელმწიფოს ყველა კუთხეში და რაც ახალშობილი ბავშვი იყო, ქალიც და ბიჭიც, ყველა მოაყვანინა, დაახოცინა და სისხლში იბანავა.

ამ ხნიდან მოკიდებული სულ ასე მეორდებოდა, ყოველ-  
დღე მოჰყავდათ ახალშობილი ბავშვები, ხოცავდნენ და სის-  
ხლში მამაჩემს აბანავებდნენ.

შეწუხდა ხალხი, ყველგან ტირილი და გლოვა ისმოდა,  
შიშით შვილს ველარავინ აჩენდა და ქვეყანას გადაშენება  
მოელოდა. ვხედავდი ამას და გული მიკედებოდა, მაგრამ  
მამაჩემის ხათრითა და რიდით ვერაფერს ვამბობდი.

ერთ დღესაც ჩვეულებრივ მორეკეს ბავშვები — ასი ბიჭი  
და ასი გოგო. ბავშვებს დედებიც უკან მოჰყვნიენ და შეიქნა  
ერთი ზარი და მოთქმა, — აქეთ ბავშვები წივიან, იქით დე-  
დები იცემენ თავში და იხოკავენ ყელ-ყურს. მაშინ კი ვეღარ  
მოვითმინე, დავავლე ხმალს სელი და მამაჩემს თავი ბატკა-  
ნივით გავაგდებინე, მერე გამოვვარდი კარში, დავსოცე ყვე-  
ლა კარისკაცი და შვილები დედებს დაუბრუნე. აი, ასეთი  
მძიმე საქმე შემემთხვა და ამის შემდეგ აბა ჩემს სახელმწი-  
ფოში როგორღა დამედგომებოდა, ხალხი მამის მკვლელს  
დამიძახებდა. მეც ავდექი და გამოვიქეცი, მაგრამ სად მი-  
ვივარ, სად წავიდე ან რა გავაკეთო, თვითონაც არ ვიცო.

ჯიხვამაც უამბო თავისი თავგადასავალი, დაძმობილ-  
დნენ და წავიდნენ ერთად. ბევრი იარეს თუ ცოტა, ბოლოს.  
ერთ უცხო ქვეყანაში მოხვდნენ და ბინად ერთ დედაბერთან  
დაბინავდნენ. მეორე დილას გამოვიდნენ და ქალაქი დაათვა-  
ლიერეს: ნახეს იმ ქვეყნის მეფის სასახლე და ძალიან მოე-  
წონათ, ოღონდ ეგ იყო, გალავანი სულ კაცის თავებისა  
ჰქონდა შემოვლებული. დაბრუნდნენ საღამოს შინ და თავი-  
ანთ დიასახლისს ჰკითხეს, — ამ თქვენს ქალაქში ყველაფე-  
რი კარგია, მაგრამ ერთი რამ ვერ გავიგე, რად არტყია  
მეფის სასახლეს კაცის თავების გალავანიო?

დედაბერმა უთხრა:

— არ მინდა, რომ გითხრათ, კარგი ახალგაზრდები  
ხართ, ვაითუ სულმა წაგძლიოთ და დაიღუპებითო.

ბიჭები არ მოეშენეს, — განა რა უნდა იყოს ისეთი, გვი-  
თხარიო.

— ამ ჩვენს ხელმწიფეს ერთი მზეთუნახავი ქალი  
ჰყავს, — უთხრა დედაბერმა, — ცოლად გაყოლაზე ქალი  
უარს არავის ეუბნება, მაგრამ ერთი პირობითი ერთ გამო-

ცანას ეტყვის, თუ გამოიცნო, გაჰყვება ცოლად, თუ ვერა და, თავს მოსჭრის და გალავანზე დადებს. დედამიწის რომელი კუთხიდან აღარ მოდიან მთხოვნელები, მაგრამ თავს ყველა აქ ტოვებს. ასე გაკეთდა ეს გალავანიო.

ჯიხვას ხელმწიფის შვილმა შეხედა და უთხრა:  
— ბედი უნდა ვცადო და დამეხმარეო.

ჯიხვას თავისი გასაჭირი აწუხებდა, მაგრამ ძმადნაფიცს სათრი ველარ გაუტეხა და დათანხმდა.

გათენდა მეორე დილა და ძმობილები ხელმწიფის სასახლისაკენ გაემართნენ. გზაზე ჯიხვამ უთხრა:

— გამოცანას რომ გეტყვის, თუნდაც იცოდე, მაშინვე ნუ უპასუხებ. მოფიქრების დრო მოსთხოვე, გამოდი, მე მითსარი და პასუსი ორივემ ერთად მოვიფიქროთო.

დაეთანხმა ხელმწიფის შვილი და შევიდა სასახლეში. ჯიხვა გარეთ დარჩა და დაელოდა. გამოვიდა ხელმწიფის შვილი დაღონებული. ჯიხვა მიუხვდა გასაჭირს და ჰკითხა: აბა, როგორ არის საქმეო?

— ძალიან ცუდად, — უთხრა ხელმწიფის შვილმა, — მგონი, თავის მოკვეთა არ ამცდებაო.

— მაინც რა გკითხა ასეთიო? — ჰკითხა ჯიხვამ.

— თუ ჩემი თავი გინდა, გამოიცანი ვინ იყვნენ სულამბარი და გულამბარი, თუ არადა, შენი თავი ჩემი ციხის გალავანს მიემატებაო.

— დრო რამდენი მოგცაო? — კიდევ ჰკითხა ჯიხვამ.

— სამი თვე და სამი კვირაო.

— დრო საკმაოაო, — თქვა ჯიხვამ და ხელმწიფის შვილს უთხრა, — მეტი რა ღონეა. უნდა წავიდეთ და სადაც იქნება და არ იქნება, გავიგოთ, ვინ იყვნენ სულამბარი და გულამბარიო.

ადგნენ იმავე დღეს, შეკაზმეს ცხენები, გამოეთხოვეს დედაბერს და წავიდნენ. იარეს ბევრი, ბევრი ქვეყანა მოიარეს, მაგრამ სულამბარისა და გულამბარის ამბისა ვერაფერე გაიგეს. დაბრუნდნენ ისევ დედაბერთან. სიარულში სამი თვე გავიდა და ხელთ სამი კვირალა შერჩათ. სამი კვირის თავზე ხელმწიფის შვილი პირობის თანახმად ხელმწიფის ქალთან უნდა გამოცხადდეს და თავი სასიკვდილოდ დადოს.

ჯიხვას ბოდმისაგან გული უსკდება, რომ მეგობარს ვერაფერს შევლის და მთელ დღეებს ოხვრა-გმინვით ატარებს.

ერთ დღეს ხელმწიფის შვილი გულის გადასაყოლებლად ქალაქში იყო გასული, ჯიხვა მარტო იჯდა შინ და კვლავ იმაზე ფიქრობდა, რით ეშველა ძმობილისათვის. უცბად მეორე ოთახიდან რაღაც ჩურჩული გაიგონა, წამოდგა და კარის ჭურჭრუჭანიდან შეიხედა: დედაბერს შუა ოთახში თქვა გაეშალა, ზედ მორთხმით დამჯდარიყო და თმაგაწეწილი რაღაც ჯადოსნურ ლოცვებს იზეპირებდა. ჯიხვამ იფიქრა, ემანდ ეს დედაბერი ჯადოქარი არ იყოს და სულამბარისა და გულამბარის ამბავიც თვითონვე არ იცოდესო. შევარდა უცბად, წაუჭირა დედაბერს ყელში ხელი, თან ოქროს თი სავსე ქისა დაანახვა და უთხრა:

— აირჩიე, რომელი გინდა — სიკვდილი თუ სიმდიდრე. მეტყვი სულამბარისა და გულამბარის ამბავს, გაგამდიდრებ, არ მეტყვი და — კატასავით დაგასრჩობო.

შეეშინდა დედაბერს, მართლა არ დამასრჩოსო და უთხრა, — ამიშვი და გეტყვიო.

აუშვა ჯიხვამ დედაბერი და უთხრა:

— სულამბარისა და გულამბარის ამბავი მე კი ვიცი, მაგრამ უმჯობესია, შენი თვალთ ნახო და მოისმინო. მე გასწავლი ერთ ადგილს და თუ იქ შესვალ, ყველაფერს დაწვრილებით გაიგებო. — დედაბერმა ქალაქის განაპირას ერთი მაღალგალავანშემორტყმული სახლი დაანახვა და დაუმატა, — ეგ სასახლე, აგერ, ჩვენი ქუჩის ბოლოს რომ დუქანი აქვს, იმ ვაჭრისაა, და სულამბარისა და გულამბარის ამბავიც იმან იცის. წადი, გაეცანი ვაჭარს, დაუახლოვდი და იქნებ როგორმე მოახერხო იმის სასახლეში შესვლაო. — მერე დედაბერმა სამი ღერი თმა გამოიძრო და მისცა, — რაკი მეგობრის გულისათვის ასე თავსა სდებ, მეც მოგეხმარები, ეს თმები კარგად შეინახე, სადაც ძალიან გაგიჭირდეს, მახსენე და მეც იმავე წამს იქ გავჩნდებიო.

ჯიხვმა სთხოვა დედაბერს, ჩემს დაბრუნებამდე ჩემი ძმობილი არსად გაუშვაო, და წავიდა. მივიდა დუქანთან და ვაჭარს სთხოვა:

— შორი ქვეყნიდან მოსული კაცი ვარ, სამუშაო არაფე-

ნი მაქვს და, თუ გამოგადგები, მიმიღე დუქანში მოჯამაგირედო.

ვაჭარს მართლაც დუქანში კაცი სჭირდებოდა და უარი არ უთხრა. დაუდგა ჯიხვა ვაჭარს მოჯამაგირედ, დაგავა დუქანი, დაასუფთავა ყაფაზები, დაალაგა საქონელი და ვაჭრობაშიც მიეხმარა. საღამოს ვაჭარმა ჯიხვა დუქანში დატოვა და თვითონ შინ წავიდა. მეორე დღესაც ჩვეულებრივ ივაჭრეს, ხოლო საღამოს, როცა დუქნის დაკეტვის დრომ მოაწია, ჯიხვამ სთხოვა ვაჭარს, აქ ნულარ დამტოვებო.

— წუხელაც სულ ეშმაკები მელანდებოდნენ და შიშით გული გამისკდა, შენთან წამიყვანე სახლშიო.

— წაგიყვანდი, — უთხრა ვაჭარმა, — მაგრამ იქ უარესი დაგეშართება და არ მინდა, ჩემი გულისთვის ხიფათს გადაეყარო.

— ოღონდ წამიყვანე და რაც არ უნდა შემემთხვეს, შენ არაფერზე დაგემდურებიო, — უთხრა ჯიხვამ.

— კარგი, წაგიყვან, — უთხრა ვაჭარმა, — მაგრამ თუ რამე დაგეშართა, ჩემი ბრალი არ იყოსო. — დაკეტა დუქანი, წავიდა სახლში და ჯიხვაც თან წაიყვანა. გააღო გალავნის ჭიშკარი ვაჭარმა და რომ შევიდნენ, დაკეტა. შეიყვანა ჯიხვა სახლში, გაატარა მდიდრულად მორთული დარბაზები და ბოლოს ერთ პატარა ოთახში ტახტზე დასვა. სასახლეში კაცის ჭაჭანება არ ჩანდა. ვაჭარმა თვითონ გააწყო სუფრა, ავასშმა ჯიხვა და თვითონვე აალაგა. მერე ტახტის ქვეშიდან ერთი კაცის თავი გამოაგორა, ჩამოიღო კედლიდან მკლავის სიმსხო რკინის მათრახი, რად მიღალატე, რა დაგიშავეო, უთხრა თავს და დაუწყო რკინის მათრახით ცემა. კარგად რომ დაიღალა, თავი ისევ ტახტქვეშ შეაგორა და დაისვენა. ცოტა სნის შემდეგ ისევ წამოდგა და ტახტქვეშიდან ასლა ქალის თავი გამოაგორა. იმასაც ისე უთხრა, — რა გინდოდა, რა გაკლდა ჩემს ხელში, რისი გულისათვის მიღალატეო, და იმასაც მათრახით სცემა. ცემით რომ გული იჯერა, ქალის თავიც ისევ ტახტქვეშ შეაგორა, მათრახი კედელზე დაკიდა და ჯიხვას უთხრა:

— ასლა დავწვეთ და დავიძინოთო.

ჯიხვამ უარი უთხრა:

— სანამ არ გავიგებ, ვისი იყო ეს თავები და ან ეს ცემა რას ნიშნავდა, არც დავიძინებ და არც აქედან წავალო.

ამაზე ვაჭარმა უთხრა:

— დაეხსენ ამ თავების ამბავს, თორემ ფიცი მაქვს მიცემული, ჩემს გარდა ვინც ამ საიდუმლოს გაიგებს, უნდა მოკლაო. პოდა, დამეხსენ, თორემ შენც მოგკლავ და მესამე საცემი შენი თავი გამიხდებო.

მაგრამ ჯიხვა არც ამ მუქარას შეუშინდა და კვლავ ხვეწნით უთხრა, — ოღონდ მითხარი და რაც გინდა მერე ის მიყავიო.

— კარგი, რაკი არ იშლი, გეტყვი, — უთხრა ვაჭარმა; ჯიხვა ტახტზე გვერდით მოისვა და უამბო: — აი ხომ ხედავ ჩემს სიმდიდრეს? ამ ქალაქში ჩემზე მდიდარი არავინ იყო, მაგრამ სხვა მდიდრებივით სიძუნწე არ მჩვეოდა, დარიბსა და მათხოვარს განუკითხავს არ გაუუშვებდი და სიკეთისათვის ღმერთიც ბარაქას მაძლევდაო.

ერთხელაც ერთი გლახა — მათხოვარი შევიცოდე და მოჯამაგირედ ავიყვანე. გავამდიდრე, წელში გავმართე და კაცად ვაქციე. მაგრამ იმან სიკეთე ბოროტებითა და ღალატით გადამიხადა, — ჩემი ცოლი შეიყვარა და გულში ჩემი მოკვლა და თავიდან მოშორება გადაწყვიტა. აი ის პირველი თავი სწორედ იმისი იყო და ცემითაც იმიტომ ვცემდიო.

ცოლად ულამაზესი ქალი მყავდა, — განაგრძო ვაჭარმა, — ლამაზი ცოლით თავი მომქონდა და დიდ პატივშიც მყავდა, რა სურვილი უნდა გასჩენოდა, რომ არ ამესრულებინა, თვალის ჩინივით ვუფრთხილდებოდო, მაგრამ სიკეთე არც იმან დამიფასა, — ჩემი გლახა მოჯამაგირე შეიყვარა და მოკვლა მომინდომა, მე ეს ამბავი ერთი ჩემი კეთილისმყოფელი კაცისაგან გავიგე, დავასწარი და ორივეს თავები დავაყრევინე. აი ის მეორე თავი ჩემი ცოლისა იყო და ცემითაც იმიტომ ვცემეო. ეს ამბავი ამ ქვეყანაში ჩვენი ხელმწიფის გრძნეული ქალის მეტმა არავინ იცის, მხოლოდ იმან გაიგო, სულამბარისა და გულამბარის ამბავი დაარქვა და გამოცანად იყენებს. ხოლო მე დამიბარა და გამაფრთხილა, თუ მესამე კაცთან წამოგცდა, ან იმ კაცს თავი მოჰკვეთე, რომ არსად თქვას და საიდუმლო არ გამჟღავნდეს, ან არა-



და, შენ გამოგასალმებ წუთისოფელსო. ახლა ძალიანაც მენანები, მაგრამ რა ვქნა, ჩემს სიკვდილს ისევ შენი სიკვდილი მირჩევნია, თავი უნდა მოგკვეთო და ჩვენი ხელმწიფის ქალს წავეულო, თორემ ცოცხალს არ გამიშვებსო.

რალა უნდა ექნა ჯიხვას, პირობას ვერ გადავიდოდა, მაგრამ რომც გადასულიყო, წასასვლელი არსაით პქონდა, ყველა კარი შიგნიდან იყო დაკეტილი, ხოლო ვაჭარმა უკვე ხმალი ამოიღო და უთხრა, სასიკვდილოდ მოემზადეო. ჯიხვას იმდენად თავისი სიკვდილი არ აწუხებდა, რამდენადაც ის, რომ მეორე დღეს მის ძმობილ ხელმწიფის შვილს პირობის ვადა უთავდებოდა და თავის მოსაკვეთად ხელმწიფის ქალთან უნდა გამოცხადებულიყო. დაღონდა ჯიხვა, ვერც ძმობილს რასმეს შეელოდა და თვითონაც სიცოცხლეს ესალმებოდა. ამ დროს მოაგონდა დედაბრის მოცემული თმები და ვაჭარს უთხრა:

— პირი პირია, უარს ვერ გეტყვი, მხოლოდ ერთსა გთხოვ, ერთი წუთით აივანზე გამიშვი, სიკვდილის წინ ქრისტიანულად ვილოცებ და მერე შენი ნება ასრულდესო.

ვაჭარმა ნება დართო, იცოდა, ჭიშკარი მჭიდროდ პქონდა დაკეტილი შიგნიდან, ხოლო გალავანზე ვერ გადასტებოდა. გამოვიდა ჯიხვა აივანზე, ამოიღო დედაბრის თმები და ახსენა. იმავე წამს მოფრინდა დედაბერი, შეისვა ჯიხვა მხრებზე და გააფრინა. ვაჭარი ელოდა, ელოდა, მაგრამ ჯიხვა რომ აღარ გამოჩნდა, თვითონ გამოვიდა აივანზე. მიხვდა, რომ ხელიდან გაუსხლტა და თავი მოიკლა.

გათენდა მეორე დილა. უამბო ჯიხვამ ხელმწიფის შვილს სულამბარისა და გულამბარის ამბავი და წაყვიდნენ ხელმწიფის ქალთან. ჯიხვა გარეთ დარჩა, ხელმწიფის შვილი ქალთან შევიდა. ქალმა ჰკითხა, — აბა როგორა ხარ პირობაზე, ცოლად წამოგყვე თუ თავი მოგკვეთო?

— ყველაფერზე მზადა ვარ, ოღონდ ჯერ მომისმინეო, — უთხრა ხელმწიფის შვილმა და უამბო, რაც ჯიხვასაგან გაიგონა:

— იყო ერთი ძალიან მდიდარი ვაჭარი და ჰყავდა მზეთუნახავი ცოლი. ერთხელ ვაჭარმა ერთი გლახა აიყვანა მოჯამაგირედ, გლახამ და ვაჭრის ცოლმა ერთმანეთი შეიყვა-

რეს და ვაჭრის მოკვლა გადაწყვიტეს, მაგრამ გაუგო ვაჭარმა ლალატი და თვითონვე დააყრუვინა თავები. ეს ყველაფერი შენს მეტს არავის გაუგია, სულამბარისა და გულამბარის ამბავი დაარქვი და გამოცანად იყენებდიო.

— მართალი ხარო, — უთხრა ქალმა, — მაჯობე პირობაში და დღეიდან შენი ცოლი ვხდებიო. — შეიყვანა ხელმწიფის შვილი მამასთან და უთხრა, — აი, ჩემი საქმრო და ჯვარი დაგვწერეო.

ხელმწიფემ თავის ქალს გადაუსადა დიდი ქორწილი და დიდძალი მზითვიც გაატანა. ჯიხვამ ვაჭრის ქონება წამოიღო და წამოვიდნენ ხელმწიფის შვილის ქვეყანაში. ხალხმა არა თუ უარყო ხელმწიფის შვილი, მადლობაც გადაუსადა ავი მამის მოკვლისათვის და იმავ დღეს ტანტზე აიყვანა.

ჯიხვამ უთხრა ხელმწიფის შვილს:

— ჩვენ ყველაფერი საზიარო გვაქვს და ტოლად უნდა გავიყოთო.

ხელმწიფის შვილი დათანხმდა და მთელი ქონება, რაც ნაშოენი ჰქონდათ, თანატოლად გაიყვეს.

მერე კიდევ უთხრა ჯიხვამ:

— ახლა ეს ქალიც უნდა გავიყოთო.

ხელმწიფის შვილს გაუკვირდა:

— ქალი როგორ გავყოთ, თუ გინდა, შენ დაგიტოვებო.

— არაო, — უთხრა ჯიხვამ, — უნდა გავჭრათ შუაზე. — გამოიყვანა ქალი, დააყენა და უთხრა:

— შენც საზიარო ხარ და შუაზე უნდა გაგჭრათო. იძრო ხმალი და, რაც ძალი და ღონე ჰქონდა, მოუქნია. ქალი შეშინდა და პირიდან მწვანე შხამი წამოანთხია. ჩააგო ხმალი ჯიხვამ ისევ ქარქაშში და ხელმწიფის შვილს უთხრა:


— აჰა, აი ახლა გყავდეს ცოლად, რაც ბოროტება ჰქონდა გულში, სულ წამოვარწყევინე და ამის შემდეგ ერთგულ ცოლობას გაგიწევსო.

რამდენიმე დღის შემდეგ ჯიხვამ სთხოვა ხელმწიფის შვილს, — ჯარი მომეცი, რომ ჩვენი ჯოჯოხეთა — ხელმწიფე დავამარცხო და ჩემი დაძმები და მამა ტყვეობიდან გამოვიხსნათ. მისცა ხელმწიფის შვილმა ჯარი, საუკეთესო სარდლები და თვითონაც თან გაჰყვა. მივიდნენ ჯოჯოხე-

თა ხელმწიფის სამფლობელოში და ხელმწიფესაც და იმის კარისკაცებსაც თავები დაჰკვეთეს. ჯიხვამ პირობისამებრ ჯოჯოხეთა—ხელმწიფის კეთილი ქალიშვილი შეირთო და ხელმწიფედ ეკურთხა. გაანთავისუფლა მამა და დაძმები, ნაზირ-ვეზირებად დაიყენა.

ჭირი — იქა, ლხინი — აქა,  
ქატო — იქა, ფქვილი — აქა.





## ქარალ-მეზატა

იყო და არა იყო რა, ღვთის უკეთესი რა იქნებოდა, იყო ერთი უშვილო ხელმწიფე. ერთხელ თავის ვეზირს უთხრა, ცხენები შეკაზმე და სანადიროდ წავიდეთო. შეკაზმა ვეზირმა ცხენები, მოამზადა საგზალი და წავიდნენ სანადიროდ. ტყეში ერთ ანკარა წყაროს წააწყდნენ, ხელმწიფეს მოეწონა წყარო და ვეზირს უთხრა, — აქ შევისვენოთ და ბარემ პურიცა ვჭამოთო.— ჩამოხადეს ცხენებს და დაიწყეს პურის ჭამა.

უცბად წყაროსთან ერთი წვერიანი ტყის კაცი მოვიდა. გამარჯვება უთხრა და ჰკითხა:

— ვინა ხართ, ან ამ ჩემს ტყეში რისთვის მოსულხართო?

ხელმწიფემ უთხრა, ვინც იყო, და დაუმატა:

— უშვილო კაცი ვარ, ამის გამო ხშირად ჯავრი შემომაწვება და გულის გადასაყოლებლად. ბუნებაში გამოვდივარო.

— მე მოგცემ ისეთ წამალს, რომ ერთის მაგიერ, ორი შვილი გაგიჩნდეს, ოღონდ უმცროსი მე უნდა მომცეო.

— ოღონდ შვილი მელირსოს და მოგცემო, — დათანხმდა ხელმწიფე.

კაცმა ამოიღო ორი ვაშლი, მისცა ხელმწიფეს და უთხრა:

— წაიღე ეს ვაშლები, აჭამე შენს ცოლს და გეყოლება შვილებიო.

დაბრუნდა ხელმწიფე შინ და ცოლს ერთი ვაშლი შეა-

ჭამა. დედოფალი დაორსულდა და ეყოლა ბიჭი. მეორე წელს ხელმწიფემ მეორე ვაშლი შეაჭამა და ეყოლა ოქროსთმიანი ბიჭი.

გავიდა თექვსმეტი წელიწადი. ისეთი დადგა ეს ოქროსთმიანი უმცროსი ბიჭი, რომ იმ არემარეში ბადალი არ მოეპოვებოდა. თექვსმეტი წლის თავზე კაციც მოვიდა და დანაპირები მოითხოვა.

ხელმწიფეს არ ემეტებოდა უმცროსი შვილი მისაცემად, ამიტომ თავზე ცხვრის ფაშვის ჩაჩი დაახურა, იქნებ ტყის კაცს ქაჩალი ეგონოს და არ მოეწონოსო. მაგრამ ტყის კაცმა სიქაჩლით არ დაიწუნა.

— რაც მერგო, მერგო, — თქვა, შემოისვა ცხენზე და თვალის დახამსამების უმაღლ გაქრა. ვერავინ გაიგო, რომელ მხარეს წავიდა.

ატარა ტყის კაცმა ბიჭი, ატარა და ქვესკნელში ერთ გამოქვაბულში შეიყვანა. იქ ერთი ღორი და რაში ჩააბარა და უთხრა:

— დრომდე ამათ მოუარე. ოღონდ იცოდე. ღორს თივა აჭამე, რაშს კი სალაფავი და, თუ კარგად მოუვლი, გაგანთავისუფლებო.

ეს უთხრა ტყის კაცმა და ისევ გაქრა. ბიჭმა მოამზადა სალაფავი და ცხენს დაუდგა, ღორს კი თივა დაუყარა, მაგრამ არც ერთმა პირი არ დააკარა. ბიჭს შეეცოდა პირუტყვეები და საჭმელი შეუცვალა — სალაფავი ღორს დაუდგა და თივა რაშს დაუყარა. ღორმა და რაშმა ჭამეს საჭმელი და ბიჭს უთხრეს:

— რაკი შენ ასეთი სიკეთე გვიყავი და ამდენი ხნის მშვირები გაგვაძლე, ჩვენც გვინდა სამაგიერო გადაგიხადოთო. შენ მართალი ხომ არ გგონია, რომ გითხრა, გაგანთავისუფლებო, ეგ განთავისუფლებას შეჭმას ეძახის, და თუ თავს ახლავე არ უშველე, რომ დაბრუნდება, შეგჭამსო.

— მაშ, რა ვქნა, როგორ მოვიქცეო? — ჰკითხა ბიჭმა.

რაშმა უთხრა:

— შედი ამ გამოქვაბულის სიღრმეში, იქ დევს ჩემი უნაგირი და ლაგამ-ავშარა, უნაგირზე ერთი ხელი სამეფო ტანსაცმელი და აბჯარ-საჭურველი აწყვია. ჩაიცვი ტანსაცმე-

ლი და საჭურველიც აისხი: მერე აიღე სავარცხელი, ფილთა-  
ქვა, მელნის შუშა და ჯიბეში ჩაილაგე, დამადგი უნაგი-  
რი და შემაჯექიო.

ბიჭმა შეკაზმა რაში და შეჯდა. წამოსვლისას ღორმა  
უთხრა:

— ტყის კაცი რომ მთვა, ჩემზე შეჯდება და დაგედევნე-  
ბა, მაგრამ შენ არ შეგეშინდეს, როგორც რაშმა დაგარბოს,  
ისე მოიქეცი და გადარჩებიო.

გადაჰკრა ბიჭმა რაშს მათრახი, რაში ფრთიანივით ამო-  
ვარდა. ქვესკნელიდან და ხმელეთზე ისარივით გაიჭრა. დაბ-  
რუნდა გამოქვაბულში ტყის კაცი და რაში და ბიჭი რომ  
ველარსად ნახა, ღორს დაუყვირა:

— რა იქნენ ისინიო?

— წავიდნენო, — მიუგო ღორმა.

— მერე, რატომ დროზე არ შემატყობინეთ? — დაუყვი-  
რა უფრო ხმამაღლა ტყის კაცმა, აიღო ერთი რკინის ჯოხი,  
მისდგა ღორს და სულ ბური აადინა. ცემით რომ გული იჯე-  
რა, შეჯდა ზედ და უთხრა:

— აბა, გასწი და დაედევნე .ან დაეწიე, ან არადა, ყელ-  
ში დანას გაგიყრი და იმის მაგივრად შენ შეგჭამო.

რალას იზამდა ღორი, ამოვარდა ქვესკნელიდან და დაე-  
დევნა. რაშმა უთხრა ბიჭს, აბა, მიიხედე, ხომ არაფერი მო-  
ჩანსო? ბიჭმა მიიხედა და უპასუხა: წერტილივით რალაც  
მოჩანსო.

— გადააგდე სავარცხელიო! — უთხრა რაშმა.

ბიჭმა გადააგდო სავარცხელი და გაჩნდა უღრანი, გაუ-  
ვალი ტყე. მიადგნენ ტყეს ღორი და ტყის კაცი და კაცმა  
დაუყვირა:

— გასჭერ და გამიყვანეთ!

მიადგა ღორი ტყეს და გაჰკრა და გამოჰკრა ეშვები, ხან  
მარცხნივ, ხან მარჯვნივ, აწვენს ხეებს და მიდის წინ. ბო-  
ლოს გასჭრა და გავიდა.

ამასობაში ბიჭი და რაში კარგა მანძილით დაწინაურა  
დნენ, მაგრამ ღორი რაშზე ათჯერ უფრო სწრაფი იყო და მა-  
ლევე წამოეწია. რაშმა იგრძნო ღორის მოახლოება და ბიჭს  
უთხრა:

— მიიხედუ უკან, ხომ არაფერი მოჩანსო?

მიიხედა ბიჭმა და მიუგო:

— მუშტის ტოლად რაღაც მოჩანსო.

— გადააგდე ფილთაქვაო! — უთხრა რაშმა.

ბიჭმა გადააგდო ფილთაქვა და აღიმართა ფრიალო კლდე. მიადგნენ ღორი და ტყის კაცი კლდეს, კაცმა დაუყვირა:

— გასჭერ და გამიყვანეო!

მისდგა ღორი კლდეს და გაჰკრა და გამოჰკრა ეშვები, გალენა კლდეც და გავიდა. ბიჭმა და რაშმა ამასობაში კიდევ გაიარეს დიდი მანძილი და დაწინაურდნენ, მაგრამ ღორი მალევე წამოეწია. კიდევ უთხრა რაშმა ბიჭს:

— უკან მიიხედუ, ხომ არაფერი მოჩანსო?

მიიხედა ბიჭმა და უპასუხა:

— ქუდის ტოლად რაღაც მოჩანსო.

— გადაღვარე მელანიო, — უთხრა რაშმა.

ბიჭმა გადაღვარა მელანი და წამოვიდა კუპრივით შავი მდინარე, ისეთი დიდი და ფართო, რომ ერთი ნაპირიდან მეორემდე კაცი თვალს ვერ გააწვდენდა. ტყის კაცმა უბრძანა ღორს:

— გაცურე და გამიყვანეო!

ღორმა შეცურა მდინარეში, შევიდა ერთ მორევში და დაიყურყუმელავა. ტყის კაცი მორევში ჩაასრჩო, თვითონ ნაპირზე გავიდა და ტყისკენ გასწია.

რაშმა მიიყვანა ბიჭი ერთ სახელმწიფოში, გამოიძრო ძუა, მისცა და უთხრა:

— გაიხადე ჯაჭვ-მუზარადი და ტანსაცმელი, ისევ უნაგირზე დამაკარი და გამათავისუფლე. შენ შენს გზაზე წადი, სადაც გაგიჭირდეს, ამოიღე ძუა, მახსენე და იმავ წამს შენთან დავიბადებო.

ბიჭმა აასრულა რაშის ნათქვამი, გაიხადა ტანსაცმელი, ჯაჭვ-ჯავშანი, დააკრა რაშს უნაგირზე და გაუშვა. თვითონ ქალაქისაკენ მიმავალ გზას დაადგა. შევიდა ქალაქში, მივიდა ხელმწიფის სასახლეში, ითხოვა შესვლის ნებართვა, წარუდგა ხელმწიფეს და მოახსენა:

— დიდებულო ხელმწიფეო, უცხო ქვეყნიდან წამოსული

კაცი ვარ, მინდა მოჯამაგირედ დავდგე და რამე საქმე გამო-  
მინასეთო.

ხელმწიფემ ახედ-დახედა თავზე ცხვრის ფაშვიამოცმულ  
ბიჭს და მართლა ქაჩალი ეგონა. ბოლოს უთხრა:

— მებატე მინდა; თუ დადგებიო.

— საქმე იყოს და ჩემთვის სულ ერთიაო, — უთხრა  
ბიჭმა და დაუდგა ხელმწიფეს მებატედ. საბატის გვერდით  
ერთი ჩალური მისცეს და იქ დასახლდა. დღისით ბატებს  
აძოვებდა მინდორში, ღამით კი ჩაიკეტებოდა თავის ჩალურ  
ქოხში და ოქროს ქოჩორს იბანდა.

ერთ ღამესაც ბიჭმა ჩვეულებრივ გააცხელა წყალი, მოი-  
ხადა ცხვრის ფაშვის ჩაჩი და თავის ბანა დაიწყო. ამ დროს  
ეზოში ხელმწიფის უმცროსმა ქალიშვილმა გაიარა, დაინახა  
ქოხის სარკმლიდან გამოსული შუქი და დაინტერესდა, —  
ნეტა რა არის ამ ქოხში ასე თვალისმომჭრელად რომ ანა-  
თებსო? მივიდა ჩალურთან, შეიხედა სარკმლიდან და ოქ-  
როსქოჩორიანი ბიჭი კი დაინახა. შუქიც მისი თმის ანარეკ-  
ლი ყოფილიყო. ხელმწიფის ქალს შეუყვარდა ბიჭი, წავიდა  
და თავის ორ უფროს დას უთხრა:

— ჩემო დებო, ჩვენ ყველანი გასათხოვრები ვართ, მაგ-  
რამ მამაჩენი არაფერს ფიქრობს, მოდით, გავახსენოთ, რომ  
უკვე დროა ჩვენი გათხოვებისა და საქმროები ამოგვარჩე-  
ვინოსო.

დებმა მოუწონეს დას რჩევა, იყიდეს სამი მწიფე საზამ-  
თრო, დაურჭვეს თავ-თავიანთი დანები და ხელმწიფეს გაუგ-  
ზავენეს, ხელმწიფემ დაიბარა ქალიშვილები და ჰკითხა:

— რას ნიშნავს ეს საზამთროები, ან შიგ გაყრილი და-  
ნებო?

— ეგ იმას ნიშნავს, — უთხრეს ქალებმა, — რომ უკვე დავ-  
მწიფდით და ჩვენი გაჭრის დროც დადგაო.

ახლა კი მიხვდა ხელმწიფე თავისი ქალების განზრახვას  
და ვეზირებს უთხრა:

— დაიბარეთ მთელი სახელმწიფოს საქორწინო ბიჭები,  
ჩემს ქალებს გათხოვების დრო მოსვლიათ და საქმროები  
უნდა ამოვარჩევინო.

აცნობეს ვეზირებმა ხალხს ხელმწიფის განცხადება და



ყველა გამოჩენილი სასიძო სასახლეში მოიწვიეს. ჩაამწკრივეს ეზოში და გამოიყვანეს ხელმწიფის ქალიშვილები. ხელმწიფემ ახლოს მიისმო ქალები და უთხრა:

— აი, შვილებო, ჩემი ქვეყნის ყველა გამოჩენილი სასიძო აქ არის, ჩამოუარეთ და რომელიც მოგეწონებათ, კალთაში ჩაუსხედითო.

ჩამოუარა უფროსმა ქალმა და ერთ-ერთი მთავრის შვილს ჩაუჯდა კალთაში. დალოცა ხელმწიფემ სიძე და ქალიშვილი. ჩამოუარა საშუალომ და მეორე მთავრის შვილს ჩაუჯდა. ხელმწიფემ ისინიც დალოცა. ჯერი უმცროს ქალიშვილზე მიდგა, ჩამოიარა რამდენჯერმე, ჩამოათვალიერა სასიძოები, მაგრამ ახლოს არავის მიეკარა, გამობრუნდა უკან და თქვა:

— მე ვინც მინდა, აქ არ არისო.

— შეკრიბეთ მთელი ქვეყნის ახალგაზრდობაო — უბრძანა ხელმწიფემ.

ვეზირებმა შეკრიბეს მთელი ქვეყნის ახალგაზრდობა. ჩამოუარა კიდევ ხელმწიფის ნაბოლარა ქალმა, ჩამოათვალიერა სასიძოები და ისევ უარი თქვა:

— ვინც მე მინდა, ის აქ არ არისო.

— ვინლა გვაკლიაო? — იკითხა ხელმწიფემ.

— თქვენი ქაჩალ-მებატის მეტი აღარავინ გვაკლიაო, — მიუგეს ვეზირებმა.

— მოიყვანეთ ისიცო! — ბრძანა ხელმწიფემ.

— მოიყვანეს მებატე და სულ ბოლოში დასვეს. მივიდა ხელმწიფის უმცროსი ქალი და ჩაუჯდა კალთაში:

— აი, ეს არის, ვინც მე მინდაო.

გაწყრა ხელმწიფე, როგორ თუ ჩემი ქალი მებატეს ჩაუჯდა კალთაშიო. ვეზირებმაც იწყინეს. რა იცოდნენ, რომ ქაჩალი მებატე ოქროსქორჩიანი ხელმწიფის შვილი იყო.

ხელმწიფემ უფროს და შუათანა ქალს დიდძალი მზითვი მისცა და გულუხვი ქორწილებიც გადაუხადა. ნაბოლარა ქალიშვილს კი არც მზითვი მისცა და არც ქორწილი აღირსა, ჩაღურ ქოხში გააგდო მებატესთან და თან დაუბარა:

— რაკი ასე შემარცხვინე, იყავი ახლა მაგ ქოხში, შენს ქაჩალ ქმართან და თავიც თვითონ ირჩინეო.

ხელმწიფეს უფროსი ქალიშვილები და სიძეები სადილ-მეჯლისებზე სულ გვერდით ჰყავდა და სახელმწიფო საქმეებზეც ეთათბირებოდა. უმცროს სიძე-ქალიშვილს კი ხსენებითაც არ ახსენებდა. მაგრამ ისინი ბედს არ ემდუროდნენ.

გავიდა დრო. ერთხელ ხელმწიფე ავად გახდა. მაშინ ექიმები არ იყვნენ, მათ მაგივრობას მკითხავეები ასრულებდნენ, და ამ ხელმწიფესაც მკითხავეი მიუყვანეს. მკითხავემა თავისებურად გასინჯა ავადმყოფი, რამდენჯერმე დაამოქნარა, წყლიან ჯამში ნახშირი და პურის მარცვლები ჩაყარა, ბოლოს პირვეარი გადაიწერა და თქვა:

— ამას გარეული ირმის რძის მეტი არაფერი მოარჩენსო.

აბა, დაფაცურდნენ უფროსი და შუათანა სიძე. შეკაზმეს ცხენები და გასწიეს ტყისაკენ, შევიდა ქაჩალ-მებატეც ხელმწიფესთან და სთხოვა:

— ერთი კოჭლი ცხენი მომეცით და მეც წავალ ირმის რძის მოსატანადო.

— დაიკარგე აქედან, შენ რა ირმის რძის მოტანა შეგიძლიაო! — დატუქსა ხელმწიფემ და კარში გამოაგდო.

წამოვიდა ქაჩალ-მებატე და ცოლს უთხრა:

— ირმის რძის მოსატანად უნდა წავიდე და, თუ დამაგვიანდეს, არ შეწუხდეთ. — გადააკოცნა ცოლი, გავიდა მინდორში, ამოიღო ტყის კაცისათვის წართმეული რაშის ძუა და ახსენა. რაში იმავ წამს იქ დაიბადა და ჰკითხა:

— რა გაგჭირვებიაო?

ქაჩალ-მებატემ უთხრა, რისთვისაც დაიბარა და თან ჰკითხა, — შეგიძლია თუ არაო?

— შენ ტანსაცმელი ჩაიცვი, აბჯარი აისხი, შემაჯექ და დანარჩენი მე ვიცით, — უთხრა რაშიმ.

ქაჩალ-მებატემ ჩაიცვა სამეფო ტანსაცმელი. აისხა იარაღი და მოახტა რაშს. რაში გაფრინდა და შუაგულ ტყეში შევარდა. ერთ წყაროსთან შეჩერდა და ხმამაღლა დაიჭიხვინა. იმავ წამს წყაროსთან ირმების მთელი ჯოგი მოგროვდა. ბიჭმა დაწველა ირმები, შეჯდა რაშზე და საჩქაროდ უკანვე გამობრუნდა.

ნახევარი გზა რომ გამოიარა, შეხვდნენ თავისი ქვისლე-

ბი — ხელმწიფის უფროსი და შუათანა ქალების ქმრები. ჰკითხა ბიჭმა:

— ვინა ხართ და საით გაგიწევიათო?

ბიჭმა, რა თქმა უნდა, იცნო თავისი ქვისლები, მაგრამ ქვისლებმა ვერ იცნეს ქაჩალ-მებატე და თავიანთი გასაჭირი შესჩივლეს. ბიჭმა ჰკითხა:

— რას მომცემთ, რომ ეგ წამალი გაშოვნინოთო?

— ოღონდ გვაშოვნინე, ხელმწიფესთან ნუ შეგვარცხვენ და რასაც მოითხოვ, მოგცემთო, — უთხრეს უფროსმა ქვისლებმა.

— მაშინ ჩაიხადეთ შარვლები და ჩემს რაშს საჯდომებზე თითო წიხლი მიარტყმევინეთო, — უთხრა ბიჭმა.

ძალიან უჭირდათ ხელმწიფის უფროს სიძეებს ამ პირობის ასრულება, მაგრამ მეტი რა ძალა ჰქონდათ. ჩაიხადეს შარვლები. სტკუცა რაშმა თითო-თითო წიხლი და ნალის ანაბეჭდი ორივეს დამლასავით დააჩნია. მისცა ბიჭმა რძე, მიუტანეს ხელმწიფეს დიდი თავმოწონებით და მოარჩინეს.

გავიდა რამდენიმე ხანი და ხელმწიფე მეორედ გახდა ავად. მოიყვანეს მკითხავი, მკითხავმა ახლაც თავისებურად ახსნა ავადმყოფობის მიზეზი და წამალიც დაუსახელა:

— ცხრა მთას იქით, უღრან ტყეში, ერთი ხურმის ხე დგას, ხეს ცეცხლისმფრქვეველი გველეშაპი ახვევია ირგვლივ და დარაჯობს, თუ იმ ხურმას მოატანინებ და შეჭამ, მორჩები, თუ არადა, წასული ხარ სააქაოდანო.

ისევ დაფაცურდნენ უფროსი სიძეები, შეკაზმეს საჩქაროდ ცხენები და გასწიეს. შევიდა ქაჩალ-მებატეც ხელმწიფესთან და სთხოვა:

— ერთი კოჭლი ცხენი მომეცით და მეც წავალ ხურმის მოსატანადო.

ხელმწიფემ მასხარად აიგდო. — აბა შენ კი ხარ, რომ ცეცხლისმფრქვეველ გველეშაპს ხურმა წაართვაო, — უთხრა და ისევ კინწისკვრით გამოაგდო. დაბრუნდა შინ ქაჩალ-მებატე და ცოლს უთხრა:

— ხურმის მოსატანად უნდა წავიდე და, თუ დამიგვიანდეს, არ შეგეშინდესო. — გადაკოცნა ცოლი და წავიდა მინ-

დორში, ამოიღო ძუა, ახსენა რაში და ისიც იმავე წამს იქ დაიბადა.

ბიჭმა უთხრა, რისთვისაც დაიბარა. მერე მოხსნა სამეფო ტანსაცმელი, აბჯარ-საჭურველი, გამოეწყო და მოახტა. რაშმა ერთ წამში გადაიქროლა ცხრა მთა და მივიდა სურმის ხესთან. ხეს გალავანივით შემორტყმოდა გველეშაპი და ეძინა. რაშმა უთხრა ბიჭს:

— ერთი ისეთი დამარტყი, რომ სამი პირი ტყავი ამძვრეს და მერე მე ვიცხო.

დაარტყა ბიჭმა მათრასი და ააძრო. სამი პირი ტყავი. რაშმა ისკუბა, გადაეწო გველეშაპს ზედ და მივიდა ხესთან. ბიჭმა სანქაროდ დაკრთა სურმა და რაშიც უკანვე გადმოეწო გველეშაპს. ამ დროს მოვიდნენ ხელმწიფის უფროსი სიძეებიც, მაგრამ გველეშაპთან მიახლოება ვერცერთმა ვერ გაბედა. დაუწყეს ბიჭს ხეწენა, — ოღონდ ეგ სურმა დაგვითმე და რასაც მოითხოვ, მოგცემთო, — ცნობით, რა თქმა უნდა, ვერც ახლა იცნეს.

— თუ ყურის ბიბილოებს დამაჭრევინებთ, მოგცემთო, — უთხრა ბიჭმა.

სიძეები სიხარულით დათანხმდნენ, ოღონდ ხელმწიფისათვის თავი მოეწონებინათ და ყურის ბიბილოები რა სათქმელი იყო. ჩამოაჭრა ბიჭმა ორივეს ყურის ბიბილოები და მისცა სურმა. მერე მოახტა თავის რაშს და იმავე დღეს შინ დაბრუნდა.

მეორე დღეს მოვიდნენ ხელმწიფის სიძეებიც, მოუტანეს სურმა და აჭამეს. ხელმწიფე განიკურნა, სიძეებს დიდი მადლობა გადაუხადა და გულუხვად დაასაჩუქრა.

გავიდა კიდევ რამდენიმე ხანი და ამ ხელმწიფეს მეზობელმა ხელმწიფემ ომი გამოუცხადა. ხელმწიფემ სანქაროდ შეკრიბა ჯარი და სარდლებად თავისი უფროსი სიძეები დააყენა, სიძეები პირველ შეტაკებისთანავე დამარცხდნენ. მტრის ჯარი მოედო ქვეყანას და დაუწყო ძარცვა-გლეჯა. ჩავარდა ხელმწიფე საგონებელში. ხედავს, რომ მარცხდება და დამცველი და გამმკლავებელი კი აღარავინ ჰყავს. ამ დროს მივიდა ქაჩალ-მებატე თავის სიმამართან და სთხოვა:

— ერთი ჯანდაგი ცხენი და ნაჯღან-ნუჯღანი იარაღი მანც მომეცი და მეც საომრად წავალო.

გამწარებულ გულზე ხელმწიფემ უფრო ხმამაღლა დაუყვირა:

— დაიკარგე აქედან, შე ქეციანო, შენ რა ხარ და შენი გაბრუნებული მტერი რაღა უნდა იყოსო!

გამობრუნდა უკან ქაჩალ-მეზატე, მივიდა შინ და ცოლს უთხრა:

— საომრად უნდა წავიდე და ერთი დღის საგზალი მომიმზადეო.

მოუმზადა ცოლმა ერთი დღის საგზალი, გავიდა ბიჭი მინდორში, ამოიღო ძუა და მოვარდა რაშიც. ჰკითხა ბიჭს:

— რა იყო, რა გაგჭირვებიაო?

ბიჭმა უთხრა, რაც უჭირდა.

— აბა საჩქაროდ გადაიცივი ტანსაცმელი, გამოეწყვე ჯაჭვ-მუზარადით, შემაჯექი და იმ ხელმწიფის ჯარს საღამომდე სულერთიანად გაგანადგურებინებო, — უთხრა რაშია.

გამოეწყო ბიჭი საჩქაროდ, მოასტა რაშს და გავიდა ბრძოლის ველზე. დაერია მტრის ჯარს და სულ მუსრი გააულო. თვითონ რასაც ხმლით ხოცავდა, ორ იმდენს რაში თქერავდა ტორებით. ისე, რომ საღამოსათვის ამბის მთხრობელიც აღარ გაუშვეს. ბრძოლა რომ დამთავრდა, მივიდა ბიჭი ხელმწიფესთან, დაუკრა თავი და მოასხენა:

— დიდო ხელმწიფევე, თქვენი სამეფოს მიწა-წყალი მთლიანად განთავისუფლებულია და ამიერიდან ღმერთმა სიმშვიდე და მოსვენება ნუ მოგიშალოსო.

ხელმწიფემ დაინახა, რომ ბიჭი მარჯვენა ხელში დაჭრილი იყო და სისხლი სდიოდა. საჩქაროდ ამოიღო თავისი აბრეშუმის ხელსახოცი, ჭრილობა შეუხვია და ჰკითხა:

— მითხარ, ჭაბუკო, ვინ ხარ და ამ დიდი სამსახურისათვის რა საზღაურს ითხოვო?

— საზღაურს არ ვითხოვ, ჩემს ვინაობას კი თავის დროზე შეიტყობთო, — მიუგო ბიჭმა, მოასტა რაშს და თვალის დახამსამების უმალ გაუჩინარდა.

მეორე დღეს ხელმწიფემ ნაზირ-ვეზირები დაგზავნა და მთელი სახელმწიფოს მამაკაცები სასასნლის ეზოში შეკრიბა.

თვითონ თუნგი და ტაშტი დაიჭირა და ყველას ხელები და-  
აბანინა. ხელმწიფეს ამ ხერხით უნდოდა გამოეცნო თავისი  
მხსნელი რაინდი, მაგრამ ხალხში ხელმწიფის ხელსახოცით  
ხელშესვეული არავინ აღმოჩნდა.

— ხომ არავინ გამოგრაათო? — ჰკითხა ხელმწიფემ ნა-  
ზირ-ვეზირებს.

— თქვენი ქაჩალ-მეზატიც მეტი არავინ გამოგვრჩე-  
ნიაო, — უთხრეს ნაზირ-ვეზირებმა.

— მოიყვანეთ ისიცო, — ბრძანა ხელმწიფემ.

მოიყვანეს ქაჩალ-მეზატი და წარუდგინეს ხელმწიფეს.  
ხელმწიფემ იმასაც დააბანინა ხელები და ნახა, რომ მისი  
ხელსახოცით ჰქონდა მარჯვენა შეხვეული. ხელმწიფე გაოც-  
და და ქაჩალ-მეზატეს ჰკითხა:

— თუ მართლა შენა ხარ ის რაინდი, რაში და საჭურვე-  
ლი რა უყავიო?

— სწორედ მე გახლავართ და რაშიც აქა მყავსო, — მიუ-  
გო ბიჭმა, მოიხადა ცხვრის ფაშვის ჩაჩი და ოქროს ომა-ქო-  
ნორი შუბლზე ჩამოეფინა. მერე ამოიღო ძუა, ახსენა რაში  
და ისიც იმავე წამს იქ დაიბადა. ჩაიცვა ბიჭმა სამეფო ტან-  
საცმელი, აისხა საჭურველი და ხელმწიფეს უთხრა:

— არც ახლა გჯერათ, რომ მე ვიყავიო?


ხელმწიფემ ახლა კი იცნო გუშინდელი რაინდი და კიდევ  
ჰკითხა:

— თუკი ასეთი ვაჟკაცი იყავი, მაშ აქამდე რატომ არ  
ჩნდებოდი და თავს რად იმალავდიო?

— აბა, რა მექნაო, — მიუგო ბიჭმა, — თქვენ კაცს გა-  
რეგნობით აფასებთ და სანამ საქმით არ დაგანახვებდით, არ  
დამიჯერებდით, მე და თქვენი უმცროსი ქალი საბატეში  
გაგვეყარეთ და სიახლოვეს აღარ გვიკარებდით. თქვენ მარტო  
უფროს სიძეებს აფასებდით, ის კი არ იცოდით, რომ ყველა  
გაჭირვებაში მე გშველოდით. აბა, ჰკითხეთ თქვენს უფროს  
სიძეებს, ვინ მისცათ ან ირმის რძე და ან ხურმა, ისე თავ-  
მოწონებით რომ მოგიტანეს? თუ უარს იტყვიან, მაშინ გა-  
უსინჯეთ ყურას ბიბილოები, ჩახადეთ შარვლები და ნახეთ,  
ეტყობათ თუ არა საჯდომებზე ჩემი რაშის ნაწიხლარე-  
ბიო.

მოიყვანეს უფროსი სიძეები და ნახეს, რომ თითო ყურის ბიბილო ორივეს ჩამოთლილი ჰქონდა, მერე ჩახადეს შარვლები და რაშის ნაწიხლარებიც ნახეს. ხელმწიფე მიხვდა თავის შეცდომას და დარცხვენილმა უმცროს სიძეს ბოდიში მოუხადა. მერე საბატედან თავისი უმცროსი ქალიც მოაყვანინა და დიდი ქორწილი გააჩაღა. ქორწილის შემდეგ ტახტი და გვირგვინიც გადაულოცა და ხელმწიფობა ჩააბარა.

ჭირი — იქა, ლხინი — აქა,  
ქატო — იქა, ფქვილი — აქა.





## დედაბრის შვილი

იყო და არა იყო რა, ღვთის უკეთესი რა იქნებოდა, — იყო ერთი უშვილო ხელმწიფე. ხელმწიფე და დედოფალი ღმერთს სულ იმას ევედრებოდნენ, შვილი გვაღირსეო, მაგრამ დრო გადიოდა და შვილი კი არა და არ უჩნდებოდათ.

დედოფალს ერთი პირისფარეში დედაბერი ჰყავდა, — ისიც თავისავით უშვილო. ერთხელ ამ დედაბერმა წყალზე ორი ვაშლი იბოვა, ერთი იქვე შეჭამა, მეორე წამოიღო და დედოფალს შეაჭამა. ორივენი დაორსულდნენ და ცხრა თვის შემდეგ ვაჟები ეყოლათ.

როგორც თანატოლები და ერთი ბედისანი, ბიჭები ერთად იზრდებოდნენ და ერთმანეთი ძალიანაც უყვარდათ. დედაბრის შვილი უზომოდ ღონიერი იყო, ხოლო ხელმწიფის შვილი უზომოდ ცელქი. ერთხელ სასახლის გარეთ მშვილდისრის სროლაში ვარჯიშობდნენ. ერთმა დედაბერმა კოკით წყალი ამოატარა, გააქანა ხელმწიფის შვილმა ისარი და დედაბერს კოკა გაუტეხა. დედაბერი მობრუნდა და დაუძახა:

— დაგწყევლო, როგორ დაგწყევლო, ხელმწიფის შვილი ხარ და თანაც დედისერთა, მაგრამ ამას კი გეტყვი: ცხრა ძმა დევს რომ ერთი მზეთუნახავი და ჰყავთ, იმისი სურვილიმც ჩაკვარდნია გულშიო.

ხელმწიფის შვილს ეს ნათქვამი მართლაც გულში ჩარჩა.

გავიდა დრო, ბიჭები დაიზარდნენ და საცოლედ მოიყარნენ. რა თქმა უნდა, წესით ჯერ ხელმწიფის შვილი უნდა დაექორწინებინათ და ხელმწიფემ და დედოფალმა დაიწყეს



სარძლოების შერჩევა, მაგრამ შვილმა ყველაზე უარი უთხრა.

— თუ მოვიყვან, ცხრა ძმა დევს რომ ერთი მზეთუნახავი და ჰყავს, იმას მოვიყვან, თუ არადა, სხვა ქალი არ მინდაო.

დაღონდა ხელმწიფე, რა ვქნა, ცხრა ძმა დევის და როგორ უნდა მოგვეპარო, და შვილს უთხრა:

— რა გიყო, შვილო, ყველა სურვილს შეგისრულებ, მაგრამ შენგან არჩეულ საცოლეს ვერასგზით ვერ მოგიყვან, იმ დევებთან ჩემი ჯვართ ვერაფერს გავხდები და ნებით ისინი არ მოგცემენო.

— შენი ჯვარი არ მინდა, მე და დედაბრის შვილი წავალთ და თვითონ მოვიყვანთო, — უთხრა შვილმა.

ხელმწიფე კვლავ უარზე დადგა — იმ დევებთან ორნი რას გახდებითო. მაგრამ რაკი შვილმა არ დაიჯერა, ბოლოს მამაც დათანხმდა. დაიბარა სასახლეში დედაბრის შვილი და ჰკითხა:

— გაპყვები ჩემს შვილს დევების მზეთუნახავი დის მოსაყვანადო?

— გაპყვები და კიდევ მოვიყვანო! — მიუგო დედაბრის შვილმა.

— მაშ სამგზავროდ რას მთხოვთ, რა მოგიმზადოთო? — ჰკითხა ხელმწიფემ.

— ბევრი არაფერი გვინდა, დიდებულო ხელმწიფე, — უთხრა დედაბრის შვილმა, — საგზალი მოგვიმზადეთ და ჩემთვის ერთი ფოლადის მშვილდ-ისარი გააკეთებინეო.

გააკეთებინა ხელმწიფემ მშვილდ-ისარი, მოსწია დედაბრის შვილმა და მიგრიხ-მოგრიხა, გააკეთებინა ხელმწიფემ მეორე მშვილდ-ისარი, დედაბრის შვილმა იმასაც იგივე უყო, გააკეთებინა ხელმწიფემ მესამედ, დედაბრის შვილმა მოზიდა და მოეწონა. გადაიკიდა მხარზე და გაუდგნენ გზას.

როცა თავიანთი სახელმწიფოს საზღვრებს გაცდნენ, დედაბრის შვილმა უთხრა ხელმწიფის შვილს:

— ახლა გზა-კვალი აღარ ვიცი, მოდი ერთ ისარს გაეპკრავე და იმას მივყევთ, იქნება მიგვაგნებინოს დევების ადგილსამყოფელისთვისო.

ამოიღო დედაბრის შვილმა ისარი, ჩააგდო კილოში და გასტყორცნა. წავიდა ისარი წივილით, გადალახა ცხრა მთა, ცხრა ზღვა, ცხრა მინდორი და ცხრა ძმა დევის სასახლის ბაღში დაერჭო. ხელმწიფის შვილი და დედაბრის შვილიც გაჰყვნენ ისარს. იარეს, იარეს და მიადგნენ დევების სახლს. შევიდნენ ბაღში, ბალი იყო ისეთი, რომ ავ თვალს არ ენახებოდა. დედაბრის შვილმა შეარხია ერთი მწიფე ნაყოფით და ხუნძლული ვაშლი და დაიწყეს ჭამა. თან ჩრდილში გულამა წამოგორდნენ.

დევები შინ არ იყვნენ, სანადიროდ ყოფილიყვნენ წასულები, შინ მარტო მათი დედა დაუხვდათ, ბანზე იჯდა და ტარს ატრიალებდა, ტარს კვირისტავად ერთი უშველებელი დოლაბი ჰქონდა წამოცმული. დაინახა უცხო ხალხი და ჩამოსძახა:

— ვინა ხართ, რა ხალხი ხართო?

— ვინა ვართ და — ქართველებიო! — უპასუხა დედაბრის შვილმა.

— მერე არ იცით, რომ ჩემი შვილების შიშით ძირს ჰიანჭველა ვერ დადის და მალლა ფრინველი, თქვენ კი წამოწოლილხართ არხეინად ბაღში და ხილსაც ხილობთ და ჩრდილსაც ჩრდილობთო?

— მარტო ხილი რა სათქმელია, ვახშმის ჭამასაც თქვენთან ვაპირებთო! — დაუძახა ხელმწიფის შვილმა.

— მერე, ჩემი შვილებისა არ გეშინიათო? — ჰკითხა დევთ დედაბერმა.

— არ გვეშინიაო! — მიუგო უშიშრად დედაბრის შვილმა.

დევების დედამ იფიქრა, ამას რომ თავის იმედი არ ჰქონდეს, ასე ამაყად ვერ ილაპარაკებდა. მოდი ერთი გამოვცდი, მართლა შეუძლია, რაიმე თუ არაო, და დოლაბის კვირისტავიანი ტარი ჩაუგდო, თან ჩასძახა:

— არიქა, დედა-შვილობას, კვირისტავი ჩამომივარდა და ამომიგდო.

დედაბრის შვილი ჰკვიანიც იყო, მიხვდა, რაც ეწადა დევის დედას და გუნებაში ჩაიცინა, — რაკი ჩემი გამოცდა გინდა, გულს არ გატყენო. — დაავლო კვირისტავს ხელი, ესროლა დედაბერს და წინა კბილები მთლიანად ჩამოაყრევინა.

დედაბერი გამწარდა და დაემუქრა, დაიცა, მოვლენ ჩემი შვილები და სამაგიეროს ისინი გადაგიხდიანო.

სალამოზე მოვიდნენ დევები, თითოს თითო ირემი და თითო ხმელი ხე გაედო მხარზე და შინ მხიარულად ბრუნდებოდნენ. დაინახეს თავის ბაღში დედაბრის შვილი და ხელმწიფის შვილი და უფრო გაიხარეს, — ვახშამს გემრიელ ლუკმასაც დავაყოლებთო. დედაბრის შვილმა გაიგონა დევების ნათქვამი და ბაღში დარჭობილი ისარი უჩვენა, — მოდი, ჯერ ეს ისარი ამოაძრეთ და ვინ ვის დააყოლებს, მაგაზე მერე ვილაპარაკოთო.

მივიდნენ დევები, დაეჯაჯგურნენ ისარს, მაგრამ ძვრაც ვერ უყვეს. გაუკვირდათ და დედაბრის შვილს ჰკითხეს, ვინა ხართ, ან რა რჯულის ხალხი ხართო?

— ვინა ვართ და ქართველებიო! — მათაც ისევე უთხრა დედაბრის შვილმა და ისარი ერთი ხელის მოკვრით ამოაძრო, — ეს ჩემი ხელმწიფეა, მე კი ამისი მსახური ვარო.

დევები კარგად მიხვდნენ, რა ძალის მქონეც იყო მათი სტუმარი, მაგრამ მაინც კიდევ გამოსცადეს: ირმები დაატყავეს, აკუწეს და ერთ უშველებელ ქვაბში ჩაყარეს. უთხრეს დედაბრის შვილს:

— აბა, თუ მართლა ქართველები ხართ, ეს ქვაბი ცეცხლზე შემოდგი და ერთი ქართული საშლამა მოგვიხარშეო.

ქვაბი ოთხყურა იყო და ოთხი დევი გაჭირვებით ერეოდა, დედაბრის შვილმა კი ცალი ხელით აიღო და ზედადგარზე შემოდგა, თან დააყოლა:

— ქართულად მოგიხარშავთ და ქართულადაც გაჭმევთო.

მოიხარშა საშლამა და დასხდნენ ვახშამად. ვახშამზე დედაბრის შვილმა ღვინო მოითხოვა, — ჩემი ხელმწიფე და მე ქართველები ვართ და უღვინოდ პურს ვერა ვჭამთ, ღვინო მოგვიტანეთო.

— ღვინო გვაქვს, მაგრამ ისე ღრმად არის მიწაში ჩაფლული, რომ ვერ ამოვიღებთო, — უთხრეს დევებმა.

— რას ჰქვია, ვერ ამოიღებთ, — დასჭყვივლა დედაბრის შვილმა, — ახლავე აიღეთ ბარ-წერაქვები და მოთხარეთო. — წამოყარა დევები, მოათხრევინა ასჩაფიანი ქვევრი და სუფრაზე მოატანინა.

დაიწყეს ვასშამი და ღვინის სმა. დევები თუ ყანწებით სვამენ, დედაბრის შვილი პირდაპირ ქვევრით იყუდებს, თან ხორცს აყოლებს, გამოხრავს უზარმაზარ ძვალს და დევებს შუბლში ესვრის.

დევები შეწუხდნენ და უთხრეს:

— რა მოგცეთ, რომ ჩამოგვესსნათ და თავისი გზით წახვიდეთო?

— თქვენ მზეთუნახავი და გყოლიათ, — უთხრა დედაბრის შვილმა, — სანამ თქვენს დას ჩემს ხელმწიფეს არ მიათხოვებთ, აქედან ფესის მომცვლელი არა ვართო.

დევებმა იფიქრეს, მსახური რომ ასეთი ღონიერია, ხელმწიფე რაღა იქნება, უარი რომ ვუთხრათ, ვაითუ სულ ამოგვყლიტონო, მოიყვანეს მზეთუნახავი და დაუსვეს ხელმწიფის შვილს გვერდით.

მეორე დღეს დედაბრის შვილი და დევები სანადიროდ წავიდნენ და ნეფე-პატარძალი სასახლეში დატოვეს. მზეთუნახავსაც შეუყვარდა თავისი საქმრო, ყველა საიდუმლო გაანდო, მისცა გასაღებები და ყველა ოთახი დაატარა, აჩვენა მთელი თავისი სიმდიდრე, ოქრო-ვერცხლი და თვალმარგალიტი და დაღლილს ბოლოს იმის კალთაში ჩაეძინა. ხელმწიფის შვილმა მძინარე ქალს ოქროს ნაწნავები დაუშალა და ერთ-ერთ ნაწნავში ერთი პატარა გასაღები უპოვა. იფიქრა, აქ რაღაც საიდუმლოაო, აიღო გასაღები, მძინარე ქალი ტახტზე გადააწვინა და სასახლის დასათვალიერებლად წავიდა, გაიარა თვალ-მარგალიტით სავსე ოთახები და სასახლის ბოლოს ერთ დაკეტილ კარს მიადგა. გააღო კარი და რას ხედავს: რკინით შეჭედილ ოთახში ერთი უზარმაზარი დევი ზის და თვალებს აბრიალებს. დევს ტანი და ხელფეხი კაჟისა ჰქონდა და ამიტომ სახელიც დევ-კაჟიანი ერქვა. ის იმ ცხრა ძმა დევების მტერი იყო, — მზეთუნახავი დის მოტაცება უნდოდა და ეომებოდა. დევებმა სხვა რომ ვერაფერი უყვეს, — იმის კაჟის სხეულს არც ისარი და არც ხმალი არ ეკარებოდა, — მოტყუებით შეიპყრეს და ამ ოთახში ჩაამწყვდიეს.

დევ-კაჟიანმა რაკი ღია კარი დაინახა, მაშინვე გამოვარდა, ხელმწიფის შვილს სილა გაჰკრა და გულწასული კარს-

უკან მიაგდო, მოსვია თავისი კაჟის მკლავები მძინარე ქალს და ცხრა მთას იქით გადაიკარგა.

ცოტა სნის შემდეგ ხელმწიფის შვილი მოსულიერდა და მზეთუნახავი რომ ადგილზე აღარ დასვდა, მწარედ დაღონდა. ამ დროს სანადიროდან დევები და დედაბრის შვილიც დაბრუნდნენ და გაიგეს მომხდარი ამბავი. დედაბრის შვილმა უთხრა დევებს:

— მე დევ-კაჟიანის საძებრად უნდა წავიდე, ჩემს ხელმწიფეს თქვენ გაბარებთ და არაფერი დაუშავდეს, თორემ ცოცხლებს არ გაგიშვებთო.

ადგა დედაბრის შვილი, აიღო თავისი ფოლადის მშვილდ-ისარი და გაუდგა გზას. იარა, იარა და ერთ ქვეყანაში გავიდა. გზაზე ერთ წყალუსე მდინარეს მიადგა. მდინარის პირას ერთი დაღონებული კაცი იჯდა. დედაბრის შვილმა ჰკითხა: —

— რამ დაგაღონა, ან ამ მდინარესთან რადა ზიხარო?

— წყალი მწყურია და შიშით ვერ დამილევია, ეს მდინარე ერთ ყლუპად არ მეყოფა და მერე რადა ვქნაო? — მიუგო კაციმა.

დედაბრის შვილს გაუკვირდა და უთხრა:

— კაცო, რა საკვირველი კაცი ყოფილხარ, მე გასვლაც მიჭირს ამ მდინარეში და შენ კი ყლუპადაც არ გყოფნისო.

— საკვირველი მე კი არა ვარ; დედაბრის შვილია, რომ ცხრა ძმა დევს მზეთუნახავი და წაართვა და თავისი ხელმწიფის შვილს დაუსვა ცოლადო, — მიუგო წყალიყლაპიამ.

— მე ვარ ის დედაბრის შვილიო.

წყალიყლაპიას გაუხარდა დედაბრის შვილის ნახვა და სთხოვა, — ან მიძმე, ან მიყმეო.

დედაბრის შვილმა იძმო და წავიდნენ ორნი. ცოტა რომ გაიარეს, გზაზე ერთ კაცს გადაეყარნენ. კაცი მიწაზე გაწოლილიყო, ყურიც მიწისთვის დაედო და სიცილით კვებობდა. მივიდა დედაბრის შვილი და ჰკითხა, ან მიწაზე რადა წევხარ ან ასე გულიანად რა გაცინებსო.

— ქვესკნელში ჭიანჭველებს ომი აუტყდათ, — უთხრა კაციმა, — იმათ ალიაქოთს და მუქარას ვისმენ და იმაზე ვიცინიო.

დედაბრის შვილს ეს კაცი უფრო გაუკვირდა, ჩვენ დედამიწის მაღლა ერთ საბელზე კაცის ფეხის ხმა არ გვეყურება, შენ კი ქვესკნელიდან ჭიანჭველების ხმაც გესმისო?

— მერე ეგ რა საკვირველია, — უთხრა ჭიანჭველასმენიამ, — საკვირველი ის არის, რომ დედაბრის შვილმა ცხრა ძმა დევს მზეთუნახავი და წაართვა და თავის ხელმწიფეს ცოლად დაუსვაო.

— მე ვარ ის დედაბრის შვილიო, — უთხრა დედაბრის შვილმა.

ჭიანჭველასმენიამ უთხრა:

— მე შენთან ყოფნა მინდა და ან მიძმე, ან მიყმეო.

იძმო ისიც დედაბრის შვილმა და გაუდგნენ გზას სამნი. ცოტა რომ გააარეს, გზაზე ერთი კაცი შეხვდათ, შუა მინდორში იდგა და ხელმოჩრდილული ცას შეჰყურებდა.

— რას შეჰყურებ ცას ასე გაფაციცებითო? — ჰკითხა დედაბრის შვილმა.

ცაშიცქერიამ მიუგო:

— შარშან ისარი ავტყორცნე და იმას ვუყურებ, როდის მობრუნდება უკან, ან ქარი საით მხარეს მიჰხრისო.

— რა საოცარი კაცი ყოფილხარ, — უთხრა დედაბრის შვილმა, — თვალი ეგრე როგორ გიჭრის, რომ შარშან ასროლილ ისარსაც ხედავო?

ამ ცაშიცქერიამ იგივე უთხრა:

— საკვირველი მე კი არა, დედაბრის შვილია, რომ ცხრა ძმა დევს და წაართვა და თავის ხელმწიფეს მიათხოვაო.

დედაბრის შვილი გამოეცნაურა, მე ვარ ის ბიჭო. მაშინ ცაში მაცქერალმა უთხრა, შენთან ყოფნა მსურს და მიძმობ, თუ მიყმობო?

— გიძმობო, — უთხრა დედაბრის შვილმა და გაუდგნენ გზას ოთხნი. იარეს, იარეს და გზაში ერთ კაცს შემოხვდნენ. იდგა ფეხებგაბოტიტნებული, მოგლეჯდა ერთ გორას, აქეთ მთაზე შეისროდა, მოგლეჯდა მეორეს და იქით მთაზე შეისროდა.

— ეს როგორი ღონიერი ყოფილხარ, რომ ამოდენა გორებს გუნდებივით ისვრიო? — გაუკვირდა დედაბრის შვილს.

გორიგლეჯიამ იგივე უთხრა:

— საკვირველი მე კი არა ვარ, დედაბრის შვილია, ცხრა ძმა დევს რომ ერთადერთი და წაართვაო.

— მე ვარ ის დედაბრის შვილიო, — უთხრა დედაბრის შვილმა.

— შენთან ყოფნა მწადია და ან მიძმე ან მიყმეო, — სთხოვა გორიგლეჯიამ.

დედაბრის შვილმა იძმო და წავიდნენ ხუთნი. კარგა მანძილი რომ გაიარეს, გზაზე კიდევ ერთ საკვირველ კაცს წააწყდნენ, კაცს ფეხებზე წისქვილის დოლაბები ჰქონდა წამოცმული და წვრილიანებში კურდღლებს ეწეოდა. მივიდნენ ახლოს და დედაბრის შვილმა ჰკითხა:

— კაცო, რას შერები, ჩვენ ლამის არის ფეხსაცმელიც დავისადოთ, შენ კი ამოდენა დოლაბები წამოგიცვია და მაინც კურდღლებს იჭერო?

— მერე ეს რა საკვირველია, — მიუგო ფეხდოლაბამ, — საკვირველი ის არის, რომ დედაბრის შვილმა დევებს მზეთუნახავი და წაართვა და თავის ხელმწიფეს დაუსვა ცოლადო.

დედაბრის შვილი ამ კაცსაც გამოეცნაურა, — მე ვარო.

— აბა თუ შენ დედაბრის შვილი ხარ, ან მიძმე ან მიყმეო, — უთხრა ფეხდოლაბიანმა.

დედაბრის შვილმა იძმო და გახდნენ ექვსნი.

ცოტა რომ გაიარეს, დედაბრის შვილმა ახალ ძმობილებს თავისი გასაჭირი უამბო, — ასე და ასეა ჩემი საქმე და, თუ რამ შეგიძლიათ, დამეხმარეთო.

— ჯერ დევ-კაყიანის ადგილსამყოფელი უნდა გავიგოთ და მერე ვისაც რა ძალა შეგეწევს, ის ვიხმართოთ, — თქვა გორიგლეჯიამ.

— წყალში მე გავიგებო, — თქვა წყალიყლაპიამ.

— ცაში პოვნა ჩემზე იყოსო, — თქვა ცაშიცქერიამ.

— ჭვესკნელში მე არაფერი გამომეპარებაო, — თქვა ჭიანჭველასმენიამ.

ამოსაპა მთელი ზღვები და მდინარეები წყალიყლაპიამ, მაგრამ დევ-კაყიანის სამყოფელი არსად აღმოჩნდა.

დაზვერა მთელი ცა ცაშიცქერიამ და ვერც იმან რამე დაინახა, მაშინ გაწვა მიწაზე ჭიანჭველასმენია და ცოტა ხნის

შემდეგ გახარებულმა წამოიძახა, — ვიპოვეო! — წამოდგა და ამხანაგებს ერთი უზარმაზარი მთა დაანახვა, — იმ მთიდან ქალის სუნთქვა მომესმა და დევ-კაჟიანის სამყოფელი სწორედ იქ უნდა იყოსო.

— აბა, გორიგლეჯიავ, ახლა შენ იციო! — უთხრეს გორიგლეჯიას, და აღარც იმან დააყოვნა, დაავლო ხელი მთას, მოგლიჯა და გვერდზე გადადგა.

გამოჩნდა მარმარილოს მშენიერი სასახლე. დედაბრის შვილმა ძმობილები ეზოში დატოვა და დევების დასთან მარტო შევიდა. დევების დას უზომოდ გაუხარდა დედაბრის შვილის დანახვა, მაგრამ ამდენადვე კიდევ შეწუხდა და დედაბრის შვილს უსაყვედურა, — რად მოხვედიო. ჩქარა წადი, თორემ, ხომ იცი, რომ ქვეყნად დევ-კაჟიანის მომრევი არავინ არის და აქ რომ მოგისწროს, გაგაუშვებსო.

დედაბრის შვილმა უთხრა:

— შენ მაგისი დარდი ნუ გაქვს, მარტო ის გამიგე, იმისი სული სად ან რაში ბინადრობს და მერე მე ვიციო.

— სამ დღეს დამაცადე და გავიგებო, — შეჰპირდა ქალი,

გამოვიდა დედაბრის შვილი სასახლიდან და თავის ძმობილებს ქალის დანაპირები უამბო. გორიგლეჯიამ ისევ აიღო მთა და დაახურა სასახლეს, რომ ნადირობიდან დაბრუნებულ დევს არაფერი შეემჩნია, მერე ექვსივენი ისევ უკან გამობრუნდნენ და, როგორც ქალმა დაარბია, სამი დღით მახლობელ ტყეში დაიმაღლნენ.

სალამოს დაბრუნდა შინ დევ-კაჟიანი. მიუჯდა გვერდით დევების და და დაუწყო აღერსი:

— სულ გარე-გარე რომ დადიხარ, მეშინია, ხიფათი არაფერი შეგემთხვეს და მითხარი, სად არის შენი სული, რომ გაეუფრთხილდეთ. დევ-კაჟიანი დაეჭვდა, ეს ქალი დღემდე ახლოს არ მიკარებდა და რალა ახლა შეუწყვარდიო. მოდი, გამოვცდი და გავიგებ, მართალს ამბობს თუ ღალატს მიიბრებსო, და უთხრა:

— ჩემი სული ავე მაგ ქოთნის ნატეხშიაო.

მეორე დღეს დევ-კაჟიანი ისევ სანადიროდ წავიდა, ქალი კი ადგა და ქოთნის ნატეხი სულ სირმა-აბრეშუმითა და ყვავილებით მორთო. დაბრუნდა დევ-კაჟიანი სალამოს, ნახა



შემკული ქოთნის ნატეხი და ქალს ჰკითხა, — ქალო, ეს რა გიქნიაო?

— ასე მიყვარს შენი სული და ვუფროსილდებო, — მიუგო ქალმა.

დევეკაჟიანს გაუხარდა ქალის საქციელი, მაგრამ ბოლომდე მაინც არ ენდო და ერთხელ კიდევ გამოსცადა:

— ჩემი სული მაგ ქოთნის ნატეხში კი არა, აგე ცოცხშიაო, — უთხრა.

ქალმა მეორე დღეს ცოცხსაც ასევე ვარდ-ყვავილებით შეამკო, მაშინ კი ირწმუნა დევეკაჟიანმა ქალის ერთგულება და გამოუტყდა: აქამდე სულ გატყუებდი, ახლა კი სიმართლეს გეტყვიო.

ქალი სმენად გადაიქცა და უფრო ახლოს მიუჯდა.

— ამ მთის იქით ერთი დიდი ველია, — უთხრა დევმა, — იმ ველში ცხრა მთიბელი ბალახს ცელავს, ყოველდღე, შუადღისას მთიდან ერთი ირემი ჩამოდის, შეჭამს ნათიბს და უკანვე ბრუნდება. ირემში შველი ზის, შველში კურდღელი, კურდღელს მუცელში ერთი პატარა ყუთი უდევს და შიგ სამი ჩიტი ზის, — თეთრი, წითელი და შავი. თეთრი ჩიტი ჩემი ღონეა, წითელი — გონება და შავი — სულიო.

— ვაიმე, ის ირემი რომ ვინმემ მოკლას, რაღა მეშველებაო, — წამოიძახა ქალმა ვითომ შიშით და დევეკაჟიანს შეეხვეწა, მომიყვანე და მე მოვუვლიო.

დევმა გაიცინა და დაამშვიდა:

— ნუ გეშინია, იმ ირემს ჩემს შარდში დასველებული ისრის მეტი ვერაფერი მოჰკლავსო.

ქალმა ყველაფერი ეს დაიხსომა და იმავე ღამეს, სადაც დევეკაჟიანი შარდზე დგებოდა, ჩუმად ნატეხარი გადადგა.

მესამე დღეს მოვიდა დედაბრის შვილი. ქალმა ყველაფერი დაწვრილჭებით უამბო. დედაბრის შვილმა აწრთო დევეკაჟიანის შარდში თავისი ფოლადის ისრები, გაიყოლა ამხანაგები და გასწია ირმის საქებნელად. გაიარეს ის მთა, რომელიც დევეკაჟიანმა ქალს ასწავლა, და მართლაც დაინახეს ცხრა მთიბავი. დედაბრის შვილმა უთხრა ძმობილებს, ველის პირას ბუჩქნარებში დავიმალნეთ, თორემ ირემმა რომ თვალი შეგვასწროს, შეიძლება დაფრთხეს და საბალახოდ

აღარ მოვიდესო. მერე ფესდოლაბა გააფრთხილა, ირემს რომ მოვკლავ, მზად იყავი, რომ შველი და კურდღელი ხელიდან არ დაგვისსლტნენო.

— მსოლოდ თვალით დავინახო და დანარჩენი მე ვიცო, — უთხრა ფესდოლაბამ და დოლაბები უფრო კარგად მოირგო.

შუადღისას მოვარდა ირემიც. დედაბრის შვილმა ბალახის ჭამაც არ აცალა, მოზიდა მშვილდი და დევ-კაყიანის შარდში ნაწრთობი ისარი ირემს გულში დააძგერა. ირემი წაიქცა და სული განუტევა. გაჭრა დედაბრის შვილმა ირემი, გამოხტა იქიდან შველი და მოუსვა მთისკენ, მაგრამ ფესდოლაბას საბლის გაშლაზეც ვერ წაუვიდა. გაჭრეს შველიც და ასლა კურდღელი გამოხტა. ფესდოლაბამ ორი ნახტომით ისიც ხელთ იგდო. ამოაცალეს მუცლიდან კურდღელს ყუთი და ამოიყვანეს სამი ჩიტი — თეთრი, წითელი და შავი.

დევი ამ დროს სანადიროდ იყო გამოსული. გულმა უგბინო, რომ ირემს რაღაც ხიფათი შეემთხვა, მიხვდა ქალის ღალატს და გაცოფებული წავიდა სახლისაკენ, რომ ქალი დაესაჯა. მაგრამ სანამ შინ შევიდოდა, დედაბრის შვილმა წააგლიჯა თავი თეთრ ჩიტს და ღონეგამოცლილი დევი კარებთან ჩაიკეცა.

დაბრუნდნენ დედაბრის შვილი და მისი ძმობილები და ნახეს ღონემიხდილი დევ-კაყიანი. დედაბრის შვილმა მოუჭირა შავ ჩიტს ხელი და დევ-კაყიანს უთხრა:

— ჩქარა მითხარი, რა გაქვს ამ სასახლეში დამალული, თორემ ახლავე სულს გაგაფრთხობინებო.

დევ-კაყიანმა იფიქრა, მოდი, ყველაფერს სიმართლით ვეტყვი, იქნებ ცოცხალი მაინც დამიტოვოსო. პირიდან ერთი საიდუმლო გასაღები გამოიღო, მისცა დედაბრის შვილს და უთხრა:

— ეს გასაღები ყველა ჩემს საიდუმლო ოთახს აღებს. მეცხრე ოთახში ექვსი მზეთუნახავი ქალი მყავს დამწყვედული, მეთაში შვიდი მფრინავი რაში, გამოიყვანე და როგორც გინდათ, მოიხმარეთო.

დაალო დედაბრის შვილმა ოთახები და გამოიყვანა მზეთუნახავი ქალები და მფრინავი რაშები. თითო ქალი ძმობი-

ლებს დაურიგა, ერთი თავისთვის დაიტოვა, მერე შესხდნენ მფრინავ რაშებზე, ცხრა ძმა დევის მზეთუნახავი დაც წამოიყვანეს და წამოვიდნენ. წამოსვლისას დედაბრის შვილმა გონის ჩიტსაც თავი წააცალა და დევ-კაჟიანი გონმისდილი დატოვა.

ცხრა ძმა დევსა და ხელმწიფის შვილს უკვე იმედი ჰქონდათ გადაწყვეტილი და დედაბრის შვილი და თავიანთი და უვნებელნი რომ დაინახეს, სიხარულით ცას ეწივნენ. ცხრა ძმა დევმა მაშინვე ასრფიან ქვევრებს მოხადეს და ქორწილი გააჩაღეს. მერე ყველა ერთად წამოვიდნენ ხელმწიფის შვილის ქვეყანაში და იქაც გადაიხადეს ქორწილი.

ქორწილის შემდეგ ცხრა ძმა დევი შინ დაბრუნდა. ხელმწიფის შვილი ხელმწიფე გახდა, ახალმა ხელმწიფემ სავეზიროც ახალი შექმნა: პირველ ვეზირად, რა თქმა უნდა, დედაბრის შვილი დააყენა, მის ძმობილებსაც შესაფერისი თანამდებობები დაურიგა და ცხოვრობდნენ ყველანი ტკბილად და შეთანხმებულად.

ჭირი — იქა, ლხინი — აქა,  
ქატო — იქა, ფქვილი — აქა.  
შაშვი იყოს მგალობელი,  
ღმერთი ჩვენი მწყალობელი.





მადლი ჰენი, ჰვაჟე დაღე,  
გაიარე, წინ დაგხვდება

იყო და არა იყო რა, იყო ერთი ძალიან მდიდარი სოფდა-გარი და ჰყავდა სამი ვაჟი. შვილები რომ წამოეზარდნენ, მამამ უთხრა:

— შვილებო, თქვენ უკვე ვაჟკაცები ხართ, საცაა ჩემი ადგილი უნდა დაიჭიროთ და სახლსაც და ქონებასაც შესაფერისად მოუაროთ. ამიტომ მინდა გამოგცადოთ, რომელს რა უნარი გაქვთ და ჩემი საქმე და მემკვიდრეობა ღირსეულს ჩაგაბართოთ. — გამოიტანა დიდძალი ფული, ოქრო-ვერცხლი, ჩააბარა უფროს შვილს და გაგზავნა სხვა სახელმწიფოში, თან დააბარა, — აი, ეს ფული როგორც გინდა, ისე მოიხმარე, იყიდე რაც გინდა, გაყიდე და საქმე შენი ჰკუთ აწარმოე. ზარალისა არ შეგეშინდეს, ოღონდ ნიჭი და მოსაზრება გამოიჩინე და ფულს კიდევ დაგიმატებო. — გადაკოცნა შვილი, გამოემშვიდობა და გაუშვა.

წავიდა ბიჭი, მოიარა სხვადასხვა ქვეყნები და ქალაქები, მაგრამ იმის შიშით, არ მოეცყუვდე და არ ვიზარალოო, ვერც რამე იყიდა და ვერც გაყიდა. პურიც კი ვერა ჰამა საკადრისად. დაბრუნდა შინ და გატანებული ფული მამას უკლებლივ მოუტანა.

— არა, შვილო, შენ საქმეში არ გამოდგები, — უთხრა მამამ, — შენ ხელში ფული უძრავად მოკვდება და ზარალის მეტს არაფერს მოგიტანს, ამიტომ არც მემკვიდრედ ივარგებ, იჯექი შინ და ყოველდღიური საქმე აკეთეო.

საშუალოსაც იგივე დაემართა. — წავიდა, ქვეყნები შემოიარა და გატანებული ფული მამას უკლებლივ მოუტანა. მაშინ დაიბარა მამამ უმცროსი შვილი, მისცა უამრავი ფული, ოქრო-ვერცხლი და უთხრა:

— შეილო, ასლა შენი იმედილა შემომარჩა, თუ მიშველი, შენ მიშველი, თუ არადა, ჩემი სიმდიდრე დაღუპულია. წადი, წაიღე ეს ფული და როგორც გინდა. ისე მოიხმარე — იყიდე და გაყიდე და, თუ დაგაკლდება, შემატყობინე და კიდევ გამოგიგზავნიო. — გადაკოცნა და გაისტუმრა.

წავიდა ბიჭი და დაიწყო სიარული უცხო ქალაქებში. თან ყველაფერს გულისყურით ათვალთვლებს და ფიქრობს, ფული სარფიანად რაში დავაბანდო. ერთ დღესაც გავიდა ერთ უცხო ქალაქში და დაინახა, რომ ერთ კაცს ცალყურა მკვდრისათვის წნელი ჩაუბამს ყელში და სადღაც მიათრევს. მეორე კეტით მისდევს უკან, უჟაპუნებს და უჟაპუნებს მკვდარს კეტს და თან დასძახის:

— სულერთია, საფლავში ჩაგყვები და ჩემს ვალს არ შეგარჩენო!

მივიდა სოვდაგრის შვილი, ეცა ხელებში კეტიან კაცს და შეაჩერა.

— კაცო, რას ემართლები, რომ ასე უმოწყალოდ სცემ, მკვდარმა ეგეთი რა დავიშავაო? — ჰკითხა.

— როგორ თუ რა დამიშავა, ჩემი რვა თუმანი მართებს და სანამ არ გამისწორდება, არ მოუეშვებიო, — მიუგო კეტიანმა.

— კაცო, რა უცნაური ხალსი ყოფილხართ, მკვდარი რაღა ვალს გადაგიხდისო. — უთხრა ბიჭმა.

— მაშ, რა ვქნა, ვინ ამინაზლაურებს ჩემს რვა თუმანსო? — მიუგო კაცი და მკვდარს ისევ ზაბაზუბი აუყენა.

სოვდაგრის შვილმა ისევ დაუჭირა კეტი და უთხრა:

— ოღონდ ამ მკვდარს ნუ აწვალებთ და რაც ვალი აქვს, მე გადავიხდისო. — ამოიღო ფული, მისცა ორივეს თავთავიანთი ვალი და მკვდრისათვის წნელი შემოაჩხსნევინა. დაჯდა და დაფიქრდა: აი რა არის მონის ცხოვრება, ცოცხალს ტყავს აძრობენ, მოკვდა და მკვდარსაც სისხლს სწოვენ, ღვთის კერძო ადამიანს ასეთი რამ არ ეკადრებაო, და გადა-

წყვიტა, ეს უპატრონო მკვდარი უნდა დავმარხო და საკადრისად გავაპატიოსნო.

იქირავა კაცები, მოიწვია მღვდელი, იყიდა ყველაფერი, რაც საჭირო იყო მდიდრული გასვენებისათვის, ჩააწვინა მკვდარი ოქროს კუბოში და მთელი ზარითა და გლოვით დაამარხვინა. ამასაც არ დასჯერდა, დაიქირავა სახელგანთქმული ხელოსნები და საფლავზე მზრმარილოს ძეგლი აღუმართა.

ყველაფერი რომ მოათავა, წამოდებული ფულიდან და ოქრო-ვერცხლიდან ბევრი აღარაფერი შერჩა, დაბრუნდა შინ და რაც ჩაიდინა, მამას ყველაფერი უამბო. მამამ ძალიან მოუწონა და შეაქო:

— ბარაქალა, შვილო, კარგი საქმე ჩაგიდენია, ახლა ერთი-ორი დღე დაისვენე, მერე დაგიმზადებ თორმეტი აქლემი თვალ-მარგალიტის, გაიტანე სხვა ქვეყნებში, გაყიდე და როგორც ჭკუამ გაგიჭრას, ფული ისე მოიხმარეო.

გავიდა ერთი კვირა, მამამ თორმეტი აქლემი თვალ-მარგალიტით დაუტვირთა და უთხრა:

— წადი, შვილო, ღმერთმა ხელი მოგიმართოს, ოღონდ ერთ დარიგებას მოგცემ და არამც და არამც არ დაივიწყო: უკაცოდ, უამხანაგოდ გაგიჭირდება, ამხანაგად და თანაშემწედ კი ისეთი კაცი აიყვანე, ვინც შენსკენ რბილ პურს მოთლის, თავისთვის კი ხმელ ნაჭრებს დაილაგებს, ასეთი კაცი არ გაგყიდის, არ გიღალატებს და მუდამ გულდაჯერებით იქნებიო. — გადაკოცნა და გაისტუმრა.

გაირეკა სოვდაგრის შვილმა ქარავეანი და წავიდა. ბევრი იარა, თუ ცოტა, გავიდა ერთ ქალაქში და ღამის გასათევად ქალაქგარეთ დაბანაკდა. გაგზავნა კაცი ქალაქში და დაავალა, გამოაცხადე სახალხოდ, რომ კარგ თანაშემწეს ვეძებ და ვისაც სამსახური სურს, მოვიდეს და გამირიგდესო. მოვიდა ერთი კაცი და მოახსენა:

— გავიგე, თანაშემწე გდომებიათ და, თუ მიმიღებ, გემსახურებო.

სოვდაგრის შვილმა, სუფრა გაშალა და უთხრა: -

— აბა, ეგ პური დაჭერი, მე ტიკჭორიდან ღვინოს ჩამო-

ვასხამ, ჯერ პური ვჭამოთ და საქმეზე მერე მოვილაპარაკოთ.

დაჭრა პური ახალმოსულმა და რაც რბილი და კარგი ნაჭრები იყო სულ თავისკენ დაილაგა, სოვდაგრის შვილს კი დამწვარი და ხმელი ყუები გადაუწყო. დასხდნენ პურის ჭამაზე და სადილი რომ გაათავეს, ახალმოსულმა ჰკითხა:

— აბა, რას იტყვი, ამიყვან თუ არაო?

— არა, ვერ აგიყვანო, — უთხრა სოვდაგრის შვილმა და დაითხოვა. მეორე დღეს კიდევ მეორე კაცი მოვიდა, სოვდაგრის შვილმა იმასაც მისცა პური დასაჭრელად და თვითონ ტიკტორასთან წავიდა. უცხომ პური დაჭრა და სუფრაზე თანაბრად გაანაწილა, ჭამეს პური და ჰკითხა:

— რას მეტყვი, მიმიღებ სამსახურში თუ არაო?

— არაო, — უთხრა სოვდაგრის შვილმა და ისიც უკან გააბრუნა.

მესამე დღეს ერთი არაბი მოვიდა და უთხრა:

— შენთან სამსახური მინდა და, რას იტყვი, მიმიღებ სამუშაოდ თუ არაო?

— ჯერ პური ვჭამოთ და საქმეზე მერე ვილაპარაკოთ, — მიუგო სოვდაგრის შვილმა და პური მიაწოდა, — სანამ ღვინოს ჩამოვასხამ, ეგ პური დაჭერი და სუფრაზე გაანაწილეო.

დაჭრა არაბმა პური და ყველა კარგი ნაჭერი სოვდაგრის შვილს გადაუწყო, თვითონ კი კუტი და გამსმარი ნაჭრები დაილაგა. ჭამეს პური და ჰკითხა:

— აბა, რას მეტყვი, მიმსახურებ თუ არაო?

— პირობას რას ითხოვო? — ჰკითხა სოვდაგრის შვილმა.

— შენი თანხის თავნი — შენ, მოგება — ნახევარი მე, ნახევარი — შენო, — მიუგო არაბმა.

— კეთილი და პატიოსანი, — უთხრა სოვდაგრის შვილმა და ხელი გაუწოდა, — მომე ხელი და საქმეს შეცუდგეთო.

— არაო, — უთხრა არაბმა, — ერთი პირობა კიდევ უნდა დავდლოთ,

— ბრძანე, გისმენო, — უთხრა სოვდაგრის შვილმა.

— მე შენი ხელქვეითი ვარ და, რასაც მიბრძანებ, უნდა ავასრულო, მაგრამ სამი რამ შენც ხმის ამოუღებლად უნდა დამიჯერო.

დათანსმდა სოვდაგრის შვილი, დაჰკრეს ხელი ხელს, შესხდნენ ცხენებზე და გაირეკეს ქარავანი. იარეს, იარეს და ერთ დაბურულ ტყეში შევიდნენ. ეს ტყე სულ მტაცებელი ნადირით იყო სავსე და უხიფათო სიარული ჭირდა. არაბმა უთხრა სოვდაგრის შვილს:

— ახლა ქარავანს მე გავუძღვები და შენ უკან მოჰყევი. ეს არის ჩემი პირობის პირველი მუხლი და უსიტყვოდ უნდა დამიჯერო.

დაუჯერა სოვდაგრის შვილმა, გაუშვა წინ არაბი და თვითონ უკან მოექცა. შევიდნენ თუ არა ტყეში, მხეცებმა იკრეს სუნი და ყოველი მხრიდან საქარავნო გზას მოაწყდნენ. ბრუნავს არაბი ბორბალივით, ისვრის თოფს, იქნევს ხმალს და მხეცებს ასე იგერიებს. ასე რომ, არაბმა უვნებლად გაატარა ქარავანი ტყეზე და აიყვანა უღელტეხილზე. სოვდაგრის შვილი უსაზღვროდ მადლობელია თავისი თანაშემწისა და გულში ფიქრობს: საქმეს რომ მოვრჩებით, ეს კაცი გულუხვად უნდა დავასაჩუქრო.

უღელტეხილზე არაბმა ქარავანი შეაჩერა. დაუძახა თავის ბატონს, მთის იქით გადაახედა და ერთი უზარმაზარი ქალაქი დაანახვა.

— ეს ქალაქი ამ ქვეყნის დედაქალაქია, აქ ცხოვრობს ამათი ხელმწიფე და ყველა მსხვილი ფორი და ბაზარიც აქ არის თავმოყრილი. ჩვენც აქ უნდა დავბინავდეთ და ვაჭრობა გავაჩალოთ. ახლა შენ ცხენზე შეჯექი და დაწინაურდი, მიდი ხელმწიფესთან სასახლეში და ბინა სთხოვე. ხელმწიფეს ერთი მზეთუნახავი ქალი ჰყავს, მაგრამ ქალი ხმას არ იღებს, ხელმწიფეს გამოცხადებული აქვს, ვინც ჩემს ქალს აალაპარაკებს, ცოლად იმას გავატანო. ქალაქი ქალის მთხოვნელებით არის სავსე და შეიძლება ხელმწიფემ გითხრას, ბინა არა მაქვსო. მაშინ შენ უთხარი, ეზოში რომ ერთი მიგდებული ქოხი გიდგას, იმაში დავბინავდები-თქო. ხელმწიფე ამაზე უარს ვეღარ გეტყვის და ჩვენი ქარავანი იქ დავაბანაკოთო. სოვდაგრის შვილს ქოხში დაბინავება არ მოე-



წონა, მაგრამ არაბმა ხმა არ ამოაღებინა, ეს ჩემი პირობის მეორე მუხლია და, პირობის თანახმად, ვალდებული ხარ უსიტყვოდ აასრულო.

სოვდაგრის შვილი უსიტყვოდ დამორჩილდა და წავიდა ხელმწიფესთან. ხელმწიფემ ნება დართო და ქარავანი ქოხში დააბინავა. იმ დღეს დაისვენეს, ხელმწიფეს ძღვენი გაუგზავნეს, მილაგდ-მოლაგდნენ და დაიძინეს. მეორე დილას არაბმა უთხრა სოვდაგრის შვილს:

— მე ასლა ბაზარში გავალ და თვალ-მარგალიტს გაეიტან. მიყვიდ-მოყვიდი და თავნსა და მოგებას ორივეს ჩაგაბარებ. შენ ამ ქოხში დარჩები და იცოდე, არამც და არამც კარში არ გამოხვიდე, ან ფანჯრიდან არ გაიხედო. ეს უკვე მესამე და უკანასკნელი მუხლია ჩემი პირობისა და ესეც უსიტყვოდ უნდა აასრულო.

— კარგიო, — დათანხმდა სოვდაგრის შვილი.

არაბმა გაივსო თვალ-მარგალიტით უბე-ჯიბეები და გავიდა ბაზრობაზე. ერთ კუთხეში სოვდაგრები რალაცას ბუზივით ესვეოდნენ. არაბი მივიდა და ნახა, რომ ერთი კაცი კაცივით მოლაპარაკე ჩიტს ყიდის და არის ერთი შეცილება. არაბმა არც აცია, არც აცხელა და ჩიტის პატრონს უთხრა:

— ათ მარგალიტს მოგცემ, თუ თვითონ ჩიტიც თანახმა იქნება, რომ მე ვიყიდლო.

— თუ კარგად მომივლი, დამბან, გამასუფთავე და არც სმა-ჭამას მომაკლებ, თანახმა ვარო, — დაილაპარაკა ჩიტმა.

— ცივ ნიავს არ მოგაკარებო, — შეპირდა არაბი და კაცს ჩიტი გამოართვა. მერე მიყვიდ-მოყვიდა, რაც სადღეისოდ ჰქონდა წამოღებული და ოქროს ფულებით გამოტენილი ქისით წავიდა თავის ბატონთან, მივიდა და რას ხელავს: ქოხის კარ-ფანჯრები მიღუწილ-მოღუწილი ყრია, ავეჯი დამტვრეული და თვითონ სოვდაგრის შვილიც ზღურბლზე გდია გულწასული. თურმე, არაბი რომ წავიდა, სოვდაგრის შვილს ცნობისმოყვარეობამ წასძლია და ფანჯრიდან გაიხედა. დაინახა კოშკის ფანჯარაში გადმომდგარი ხელმწიფის მზეთუნახავი ქალი და მერე რა ჩაიღინა, თვითონაც აღარ გაუგია.

არაბი იმ წამსვე ყველაფერს მიხვდა და ცივი წყალი

მოარბენინა, მიასხურა გულწასულ ვაჟს და მოასულიერა. უსაყვედურა, ჩემი სიტყვა რატომ არ გაიგონეთ, და თვალმარგალიტში აღებული ფული მიუთვალა.

სოვდაგრის შვილმა ფულს ზედ არ შეხედა და არაბს უთხრა:

— არაფერი არ მინდა, ფულიც შენი იყოს და თვალმარგალიტიც, ოღონდ, თუ ჩემი სიკეთე გსურს, როგორმე ის ქალი ხელში ჩამაგდებინეთ.

— მაგაზე ადრევე ვიზრუნეთ, — უთხრა არაბმა, — შენ ფული მიითვალე და დამშვიდებული იყავი, ის ქალი მალე შენი გახდებაო. — მიუთვალა სოვდაგრის შვილს ფული და ისევ ბაზარში წავიდა. იყიდა თავისთვის ერთი ხელი კარგი ტანისამოსი, გამოიწყო მდიდრულად, ჩაისვა უბეში მოლაპარაკე ჩიტი და ხელმწიფის სასახლისაკენ გასწია.

— რა გნებაესო? — ჰკითხა ხელმწიფემ.

— გვახელით, რომ თქვენი მზეთუნახავი ქალი ავალაპარაკო, — მიუგო არაბმა.

ხელმწიფემ ეჭვით შეხედა და ჰკითხა:

— რომ არ დაგელაპარაკოს, რას იზამო?

— რაც გსურდეთ, ის სასჯელი დამადეთო, — მიუგო არაბმა.

ხელმწიფეს ეწყინა, ვიღაც არაბი ჩემი ქალის თხოვას როგორ ბედავსო და მუქარით უთხრა:

— იცოდე, მაგ თავხედობისათვის სიკვდილი არ აგცდებაო.

— თანახმა ვარო, — უთხრა არაბმა, — ოღონდ თქვენი ქალი შემასვედრეთ და, თუ ვერ ავალაპარაკე, აასრულეთ თქვენი მუქარაო.

ამაზე აღარც ხელმწიფეს რამე ეთქმოდა. გაიყვანა არაბი ერთ ოთახში და უთხრა:

— აქ იყავი და ჩემი ქალიც მალე მოვაო.

ხელმწიფე უკანვე გაბრუნდა. არაბმა ოთახი მოათვალიერა და ფანჯრის რაფაზე ერთი ოქროს საყვავილე დაინახა. საჩქაროდ გამოიყვანა ჩიტი უბიდან, ჩასვა საყვავილეში და დაათარა. ჩამოჯდა სავარძელზე და ხელმწიფის ქალის შემოსვლას დაელოდა. უცბად გაიღო კარი და გამოჩნ-

და ასული. უკან ვეზირი შემოჰყვა. ვეზირმა უთხრა არაბს:

— ჩემმა ხელმწიფემ მოწმედ გამოგზავნა, იცოდე, თუ ვერ აალაპარაკებ ჩვენს მზეთუნახავს, აქედან ცოცხალი ვერ გახვალ.

— მზეთუნახავს კი არა, თუ გნებავთ, უსულო საგნებსაც ავალაპარაკებო, — უთხრა არაბმა და საყვავილეზე მიუთითა, — აგე, თუნდაც ამ ოქროს ჭურჭელსო.

— აბა, სცადეო, — უთხრა ვაზირმა.

არაბი მივიდა ქოთანთან და უთხრა:

— აბა ;თქვი, როგორ ხარ, მოვლა ხომ არ გაკლიაო?

ოქროს ჭურჭლიდან ჩიტმა დაილაპარაკა:

— რაღა როგორა ვარ, ჩემთვის არც მოვლაა და არც პატრონობა, მტკერი და ჭუჭყი მჭამს და კაციშვილი ყურადღებას არ მაქცევსო.

ხელმწიფის ასულს ჯავრისაგან გულზე ცეცხლი მოეკიდა.

— სტყუისო! — დაიძახა გაკაპასებულმა, — ჩემი მონაღლები ხომ წმენდენ და ასუფთავებენ, გუშინ კიდევ მე ჩემი ხელით გავწმინდეო.

მზეთუნახავმა და ვეზირმა რა იცოდნენ, რომ შიგ ჩიტი იჯდა, ეგონათ, თვითონ საყვავილე ლაპარაკობსო. არაბმა გაიმარჯვა, მზეთუნახავი დარცხვენილი გავარდა, ხოლო ვეზირი ხელმწიფესთან შევიდა და მოახსენა:

— თქვენი ასული არაბმა აალაპარაკაო.

— სტყუისო! — უყვირა ხელმწიფემ, — ალბათ იმ არაბმა ქრთამით მოგისყიდა და ჩემს მოტყუებას ამიტომ ბედავო, — გააძრო ხმალი და კისერი წააგდებინა.

მარტო რომ დარჩა, არაბმა ამოიყვანა ჩიტი საყვავილედან, ისევ უბეში ჩაისვა და წავიდა თავის ბატონთან.

მეორე დღეს ისევ ეახლა არაბი ხელმწიფეს და ჰკითხა:

— მე ჩემი დაპირება შევასრულე და პირობაზე როგორა ხართო?

— შენ ის ჩემი ვეზირი ალბათ ფულით მოისყიდე და ორივემ მომატყუეთო, — უთხრა ხელმწიფემ, — ახლა სხვა ვეზირს გამოგზავნი მოწმედ და ვნახავ, როგორ აალაპარაკებო. — გაიყვანა ისევ იმ ოთახში და თვითონ ქალისა და ვეზირის დასაძახებლად წავიდა.

არაბმა ამოიყვანა ჩიტი უბიდან, ფარდის ნაოჭებში თავდაყირა გახლართა და ქალისა და ვეზირის მოლოდინში ისევ სავარძელში ჩამოჯდა.

შემოვიდნენ ვეზირი და მზეთუნახავი. ვეზირმა უთხრა არაბს:

— აბა, სცადე და ჩემი ქალბატონი ახლაც აალაპარაკეო.

არაბმაც იგივე უპასუხა:

— გუშინაცა ვთქვი და დღესაც ვამბობ, რომ უსულო სანებისაც ავალაპარაკებ და ცოცხალი ადამიანი რას გამისდებო. თუ არ დაგიშლიათ, აგე იმ ფარდას ავალაპარაკებო.

— აალაპარაკეო, — უთხრა ვეზირმა.

არაბი ფარდისკენ შებრუნდა და მიმართა:

— აბა, მითხარი, როგორ გივლიან, გწმენდენ, გასუფთავენ, თუ არაო?

ფარდიდან ნაყშებში გახლართულმა ჩიტმა დაილაპარაკა:

— აბა, ეს რა მოვლაა, დასაბან-დასარეცხი თავდაყირა ვკიდევარ და კაციშვილი ყურადღებას არ მიაქცევსო.

ხელმწიფის ასული უფრო გაკაპასდა:

— სტყუისი — წამოიძახა ხმამაღლა, — არც გარეცხვა დამიკლია და არც გასუფთავება, და თუ თავდაყირა ჰკიდია, მე რა ვქნა, წესი ეგრეაო.

არაბი ვეზირს მიუბრუნდა:

— აბა, ხომ ხედავ, უსულო საგანიც ავალაპარაკე და შენი ქალბატონიცო. ვეზირმა გაკვირვებისაგან პირი დაადო. მზეთუნახავი მიხვდა, რომ შეაცდინა არაბმა და ახლაც დარცხვენილი გავარდა. ვეზირიც ხელმწიფესთან წავიდა და მოახსენა:

— იმ უბირმა არაბმა შენი მზეთუნახავი ქალი მართლა აალაპარაკეო.

— შენც მოუსყიდისარო, — უთხრა ხელმწიფემ და თავი წააგდებინა. არაბმა კი გამოსხნა ნაყშებიდან თავისი მოლაპარაკე ჩიტი, ჩაისვა უბეში და თავის ბატონთან წავიდა.

მესამე დღეს ისევ ეახლა არაბი ხელმწიფეს და პირობა

ზოაგონა, მაგრამ ხელმწიფე არც ამჯერად დაყაბულდა და მესამედ მოსთხოვა სანაძლეო, — ახლა თვითონ დავესწრები და ვნახავ ერთი, როგორ აალაპარაკებო. — არაბი ოთახში დატოვა და ქალის მოსაყვანად წავიდა.

არაბმა დრო იხელთა, ამოიყვანა უბიდან ჩიტი და ხელმწიფის ქალის სავარძლის ნაოჭებში შეჩურთა ქვეშიდან.

შემოვიდნენ ხელმწიფე და მზეთუნახავი და თავ-თავიანთ ადგილებზე დასხდნენ.

— აბა, არაბო, — მიმართა ხელმწიფემ დაცინვით, — ერთი მაჩვენე, როგორ ალაპარაკებ ჩემს მზეთუნახავსო?

— კიდევ ვიმეორებ, — უთხრა არაბმა, — მე უსულო საგნებსაც ვალაპარაკებ, თუნდაც, მაგ სავარძელს, რაზეც თქვენი ასული ზის, და ცოცხალი, მეტყველი ადამიანი რომ ავალაპარაკო, რა გასაკვირიაო.

— აბა, გელოდებითო, — უთხრა ხელმწიფემ, — დამანახვე, რა ჯადოქრობა იცი ასეთით. — ხელმწიფეს არ სჯერა, თუ არაბი იმის ქალს მართლა ალაპარაკებს, იმედი აქვს, რომ კაი გვარიან ფულს ააძრობს თავის გამოსასყიდად და ნასიამოვნები წინდაწინვე ულვაშებში ილიმება.

არაბი წამოდგა და მიმართა სავარძელს:

— აბა, მითხარი, თავს როგორ გრძნობ, ხომ არაფერი გაწუხებსო?

სავარძლის ქვეშიდან ნაოჭებში შეჩურთული ჩიტი კრუსუნებს:

— რალა როგორა ვარ, ამოდენა მთა მაწევს მალლიდან და სული მეხუთებაო.

— რაო, მთაო?! — ხელმწიფის მზეთუნახავი ქალი ჯავრისაგან მთლად გადაირია, მიუბრუნდა არაბს და სხაპასხუბით მიაყარა, — განა ასეთი ტყუილი მოსათმენია? შენ ხომ თვითონვე მხედავ, რა მსუბუქი და ტანწერწეტა ვარ და ეს კი რაებს ჩმახავს. დამაცადოს, გავატანინებ ხელოსნებს და სულ ნაჭერ-ნაჭერ დავაკუწინებო. — წამოხტა ატირებული და თავის ოთახში გავარდა. გაწბილებული ხელმწიფეც თავის ოთახში გავიდა. არაბმა გამოიყვანა ჩიტი, ჩაისვა უბეში, გაჰყვა ხელმწიფეს უკან და ჰკითხა:

— ჰა, ახლა რაღას იტყვითო?

სელმწიფე ჭირის ოფლში ცურავს, ეს რა ღვთის რისხვა დამატყდა თავს, — საუკეთესო სასიძოვები პირშიჩალაგა მოვლებულები გავისტუმრე და ახლა ჩემი მზეთუნახავი ქალი ამ გადაბერებულ არაბს უნდა დარჩესო. შეხედა არაბს და ჰკითხა:

— ერთი ეს მითხარი, ამ ხნის კაცს ახალგაზრდა ცოლი რად გინდა, ან რაღა დროს შენი ოჯახის მოკიდებააო?

— სცდებით, დიდებულო სელმწიფე, — უთხრა არაბმა. — მე ჩემთვის კი არაა, ჩემი ბატონისათვის ვიღწოდით.

— ვინ არის შენი ბატონიო? — ჰკითხა სელმწიფემ.

— აი, ის ლამაზი ჭაბუკი, პირველ დღეს ბინის სათხოვნელად რომ გეახლათ. უზომოდ შეყვარებულია თქვენს ქალიშვილზე და ღირსეული საქმროც არის, აურაცხელი სიმდიდრის პატრონია და თანაც გონიერი და კეთილშობილი, თუ ინებებთ, მოგიყვანთ და თქვენ თვითონ ნახეთო.

სელმწიფემ არაბს უთხრა:

— მაშ, თუ უგრეა საქმე, წადი და ის შენი ბატონი ახლავე აქ მომიყვანეო.

წამოვიდა არაბი ქოხში და წამოიყვანა სოვდაგრის ბიჭი. სელმწიფემ ასე-დასედა და ტანწერწეტა, ახლად წერულვაშაშლილი ყმაწვილი ძალიან მოეწონა, სწორედ სელმწიფის საკადრისი გარეგნობა ჰქონდა. სელმწიფემ იხმო თავისი ქალიშვილი. მზეთუნახავმა შეხედა თუ არა ბიჭს, გულში ყრუოლამ დაუარა, მორცხვად გაიღიმა. ბიჭმაც გაუღიმა და მათმა ღიმილმა მთელი დარბაზი გაანათა.

რაღა ბევრი გავაგრძელო, სელმწიფემ დალოცა სიძე-ქალიშვილი და ქორწილის დღეც დანიშნა. არაბმა გაისმო ცალკე სოვდაგრის შვილი და უთხრა:

— ჩემი რჩევით ჯერ ხომ არაფერი წაგიგიაო?

— არაფერიო, — მიუგო სოვდაგრის შვილმა.

— მაშ, აქაც ჩემი რჩევა დაიჯერე და არ წააგებო, — უთხრა არაბმა და დაარიგა, — სელმწიფეს მოახსენე, ახლა მსოლოდ ნიშნობა გადავიხადოთ, ქორწილი კი მაშინ გაემართოთ, როცა ჩემს ბედნიერებას მშობლებს შევატყობინებ და აქ ჩამოვიყვან-თქო. ასე უფრო მეტი პატივი დაგედება და სელმწიფის თვალშიც მეტი ფასი გექნებაო.

უთხრა სოვდაგრის შვილმა ხელმწიფეს, — ნება მომეცით, ქორწილი ჩემი დედ-მამის ჩამოსვლამდე გადავდოთ და ახლა მხოლოდ ნიშნობა გადავიხადოთ. — ხელმწიფეს მოეწონა სიძის გონიერება და დათანხმდა. მოიწვია მთელი ქალაქი და მხოლოდ ნიშნობა გადაუსადა.

ნიშნობის დამთავრებისთანავე სოვდაგრის შვილმა კაცი აფრინა თავის დედ-მამასთან, — ასეა და ასე ჩემი საქმე, და თქვენ იცით, როგორც ღირსეულად ჩამოხვალთო. — თვითონ არაბს ამოუდგა მხარში და მთელი თვალ-მარგალიტი ერთ თვეში გაასადა. თვის თავზე დედ-მამაც მოუვიდა და გააჩაღეს დიდი ქორწილი.

ნეფე-პატარძლის სადღეგრძელო რომ დალიეს, არაბი ადგა და ხელმწიფის სიძეს მიმართა:

— მე მგონი, რაც ერთად ვართ, ერთგულად გემსახურებოდი და, რაც შემეძლო, შენთვის მზრუნველობა არ დამიკლიაო.

— მართალი ბრძანებააო, — მიუგო სოვდაგრის შვილმა.

— პირობის თანახმად, მოგება შუაზე უნდა გაგვეყო, მაგრამ მე ჩემს წილს მთლიანად შენ გითმობო.

სოვდაგრის შვილი გაშტერდა და ჰკითხა, — რისთვისო?

— სიკეთისთვისო, — მიუგო არაბმა.

— რა სიკეთისთვისო? — უფრო გაოცდა სოვდაგრის შვილი. არაბმა გაიცინა და თავის ბატონს უთხრა:

— შენ მე ვეღარ მცნობ, იმიტომ რომ ცოცხალი არასოდეს გინახივარ. ერთხელ მნახე, ისიც მკვდარი. გახსოვს, ორი კაცი რომ წნელით მიმართევდა და თან კეტს მცემდა. იმათ მე რვა თუმნად მიყიდეს, მამუშავეს და სიკვდილის შემდეგაც ჩემში მიცემულ ფულს ვალად მითვლიდნენ. შენ მიეცი ის რვა თუმანი და დამიხსენი იმ მტარვალეებისაგან, ზერე მდიდრულად დამასაფლავე და ოქროდღირებული მარმარილოს ძეგლი დამიდგი. აი, მე სწორედ ის არაბი ვარ და საიქიოდანაც იმიტომ დავებრუნდი, რომ შენთვის სიკეთე გადამეხადა. ახლა ვალი უკვე გასტუმრებული მაქვს, შენც ბედნიერად გტოვებ და მშვიდად, გულდასვენებით დავუბრუნდები ჩემს საუკუნო სასუფეველსო, — ეს თქვა არაბმა და გაქრა.

მექორწილენი გაშტერებული დარჩნენ ასეთი უცნაური ამბით, ხოლო როცა გონს მოვიდნენ, სოედაგრის შვილს საქციელი შეუქეს და ყველამ ერთხმად აღიარა: სიკეთე და მაღლი მკვდართანაც არ იკარგებაო.

მართლაც რომ ასეა. ტყუილად კი არ არის ნათქვამი:

მაღლი ჰქენი, ქვაზე დადე,  
გაიარე, წინ დაგხედება.







## მზის ასული

იყო და არა იყო რა, ღვთის უკეთესი რა იქნებოდა. იყვნენ ერთ სოფელში სამნი ძმანი. გავიდნენ ერთ დღეს სამივენი მინდორში და სამი დღის მიწა მოხნეს, გაიყვეს ნახნავი თანაბრად და დათესეს პური, უფროსმა — მარჯენივ, შუათანამ — მარცხნივ და უმცროსმა — შუაში.

იმ წელს მხვნელ-მთესველთა ამინდი დაიჭირა და ძმებს ისეთი ყანები მოუვიდათ, რომ თვალი უკეთესს ვერაფერს ნახავდა — ზღვასავით აღელდა და სულ მტკაველ-მტკაველი თავთავი დაიყარა. ხარობდნენ ძმები და მოუთმენლად მოედლოდნენ ყანების შემოსვლას, მაგრამ, დახეთ უბედურებას — სწორედ იმ დღეს, სამკალად რომ უნდა გასულიყვნენ, უცაბად ცა მოიბურა, მოქურუშდა, დაიფარა ტყვიისფერი ღრუბლებით და მუშტისტოლა სეტყვა წამოუშინა. მაგრამ საკვირველი ის იყო, რომ ნაპირა ყანებს სულ არ მიეკარა და მარტო შუალა ყანა გაანადგურა.

გამოვიდა უმცროსი ძმა მინდორში, დახედა თავის გავეჩანებულ ყანას და გული ბოლმით აევისო, მაგრამ საყვედური არ დასცდენია, მხოლოდ ერთხელ ამოიოხრა, „ალბათ ეს იყო ჩემი იღბალიო“, — თქვა გულში, გადაიგდო მხარზე ნამგალი და გასწია ბედის საძებნელად.

ბევრი იარა თუ ცოტა იარა, ბოლოს ერთ მდიდარ კაცს მიადგა. მდიდარს სამკალად მოსული ასი დღიური ყანა ედგა.

— რას მომცემ, რომ ეს ყანა ერთ დღეს მოგიშკაო? — ჰკითხა უმცროსმა ძმამ.

— შუაზე გაგიყოფო, — უპასუხა მდიდარმა.

შეუდგა უმცროსი ძმა მუშაობას, შუადღემდე ულოები გრიხა, შუადღის შემდეგ მოსდო ნამგალი და სულ ნაბუარი აადინა, — მკის და აწყობს ძნას ძნაზე. აჭერს მზე, ოფლი წურწურით ჩამოსდის და დაღლილობისაგან თვალები უჭრელდება, მაგრამ ერთხელაც არ შეუსვენია. გავიდა ბოლოში, ნამგალი ყანის პირას ჩაარჭო და შეუდგა მომკილი ძნის შეკონვას, მოღის და მოჰკონავს, მარტო ერთი ძნა დაარჩა შესაკონი, რომ მზე გორის პირას გაება. მომკელმა მოუხადა ქუდი და შეეხვეწა მზეს: — ნუ ჩახვალ, ერთი ძნა დამრჩა და ამის შეკონვაც მაცალეო. — მაგრამ მზემ არ უსმინა და ჩავიდა.

მოვიდა ყანის პატრონი, გაუკვირდა, ასი დღის ყანა რომ მომკილი დახვდა და უთხრა:

— ახლა გავყო, როგორც პირობა გვქონდაო.

— არაო, — უთხრა უმცროსმა. ძმამ, — ბედს რომ ჩემთვის სიკეთე სდომებოდა, ამ ერთი ძნის შეკონვასაც დამაცდიდა. რაკი პირობა ვერ შევასრულე, ერთი მარცვალიც არ მინდაო, — გადაიგდო თავისი ნამგალი მხარზე და წავიდა.

იარა, იარა და ერთ ხელმწიფესთან მივიდა. ხელმწიფე სწორედ მეცხვარეს ეძებდა.

— რას მომცემ, რომ სამი წლის მანძილზე შენს ფარას ერთი ციკნის ყურიც არ დავაკლო, არც ნადირს რამე გავატანო და არც სატკივარს მოვაკვლევიწო? — ჰკითხა ხელმწიფეს.

— თავნსაც და ნაშენსაც შუაზე გაგიყოფო, — უთხრა ხელმწიფემ.

ამ პირობაზე შეთანხმდნენ და დაუდგა უმცროსი ძმა ხელმწიფეს მეცხვარედ. მეცხვარემ დასვენება არ იცოდა, დარსა თუ ავდარში ფეხზე იდგა და სამი წელი მართლაც ისე გაიყვანა, რომ ფარას ბეწვი არ დაჰკლებია. მოვიდა ხელმწიფე და თავისი ცხვარი ასე გამრავლებული და გაზრდილი რომ ნახა, დიდად გაიხარა.

ახლა პირობის ასრულებას წინ აღარაფერი ედგა, მაგრამ რა გინდა, ნათქვამია, კაცს თუ ბედი არ სწყალობს, ქვა აღმართში მოეწევაო. მეცხვარე უკვე ბაკში ერეკებოდა

ცხვარს გასაყოფად, რომ სად იყო, სად არა, უცბად ერთი მგელი გამოხტა, დასტაცა პირი ერთ მსუქან ცხვარს და ტყისკენ გააქანა.

ხელმწიფეს ეს ერთი ცხვარი აინუნშიაც არ ჩაუგდია და თავის მეცხვარეს უთხრა:

— აბა, როგორი პირობა გვქონდა, გადავთვალთ და გავყოთო.

— არა, — უთხრა მეცხვარემ, — რაც არ მერგება, არ შემერგება, ბედს რომ ჩემთვის სიკეთე სდომებოდა, ამ ერთ დღესაც დამაცდიდაო. — გადაუგდო ჯოხი და წავიდა.

მიდის დაღონებული და თავისთვის ფიქრობს: „საკუთარი ყანა სეტყვამ გამინადგურა, სხვას დღიურ მუშად მოვურიგდი და მზემ არ დამინდო, ცხვარი მგელმა გამომაცალა ხელიდან. ჩანს, ბედი არაფერში მწყალობს და დღეიდან აღარც მე შევაკლავ თავს საქმეს. ვივლი ასე ქვეყნიდან ქვეყნად და რასაც ღმერთი მომცემს, იმას დავჯერდებიო“.

ბევრი იარა, ბევრი მთა და ველი გადასერა და ერთხელ ერთ მდინარის პირას დაისვენა. შუალამემ რომ მოატანა, ციდან მზის ქალები ჩამოვიდნენ და მდინარეში ბანაობა დაიწყეს, ისეთი ლამაზები იყვნენ სამიუენი, რომ კაცის თვალი უკეთესს ვერაფერს ნახავდა, მაგრამ უმცროსი მაინც ყველას სჯობდა. და ვაჟმაც იმას დაადგა თვალი, — ჩუმად მიეპარა, სტაცა ხელი და, რაც ძალი და ღონე ჰქონდა, მოკურცხლა.

არბენინა ეს მოტაცებული ქალი, არბენინა და ბოლოს ერთ ტრიალ მინდორზე გაიყვანა. გაიკეთა იქ ერთი ქოხი, ქალი ცოლად შეირთო და დაბინავდა. მაგრამ სულს იქით არაფერი ებადა და ან ქალი რით უნდა შეენახა, ან თავისი თავი.

მაშინ ქალმა მისცა ნატვრის ბეჭედი და უთხრა:

— აჰა, ეს ბეჭედი, ეს არის ჩემი მზითვი და ამის მეტი არც შენ რამე გაგაჩნია, მაგრამ ამას ისეთი ძალა აქვს, ორივეს შეგვინახავს: მიწაზე დადებ, — სუფრა გაიშლება, სუფრაზე დადებ — სასმელ-საჭმელი ჩამორიგდება, იქით გასწევ — ჭურჭელი არიგდება, აქეთ გამოსწევ — ჩამორიგდებაო.

ვაჟი უკეთესს ვერაფერს ინატრებდა, საქმეში ხელმოცა

რული კაცისათვის სწორედ რომ მისწრება იყო — აღარც საქმე აწუხებდა, აღარც საზრუნავი და რასაც ინატრებდა, მზამზარეული მოსდიოდა, ისეთ განცხრომაში იყო, რომ იმის ბედს ძალიან აღარ დაჰყუფდა. მაგრამ, როგორც ყოველთვის ხდება სოლმე, უზრუნველმა, მუქთმა ცხოვრებამ თანდათან გაათამამა, გაამედიდურა და ბოლოს იქამდე გააყოყონა, რომ ხელმწიფის დაპატიჟება მოინდომა.

ცოლმა ბევრი უშალა. — შენს ქერქში დაეტიე, მიუწვდომელს ნუ წაეპოტინები, თორემ ეს ერთი ბეჭედი გვიგდია და მაგასაც დაკარგავო. მაგრამ ქმარმა არ დაიშალა, — გინდა თუ არა, უნდა დავპატიყო და ჩვენი გლექსური ცხოვრება ვაჩვენო, დაე, დარწმუნდეს, რომ ჩვენც შეგვიძლია ხელმწიფის საკადრისი მასპინძლობის გაწევაო, და იმავ დღეს ხელმწიფის სასახლისკენ გასწია, მიაართვა ხელმწიფეს საჩუქარი და სთხოვა:

— სადილად მეწვიეთ და ჩემი გლექსური ოჯახი გააბედნიერეთო.

— შენ რა ხარ და შენი სადილი რაღა უნდა იყოსო, — გაეცინა ხელმწიფეს, მაგრამ მთლიანად მაინც არ გააწბილა და თავის მაგიერ თავისი ნაზირ-ვეზირები აახლა, — წადით, ნახეთ, რისი იმედით მეპატიჟება ეს კაცი, მართლა აბადია რამე თუ მასხარად მიგდებსო.

მართლაც, შესხდნენ ცხენებზე ნაზირ-ვეზირები და გამოჰყვენენ მზის სიძეს. მასპინძელმა სტუმრებს ცხენები ჩამოართვა, ამოიღო ბეჭედი და ყველას თითო კონა თივა და ქერიანი თოფრები ჩამოურიგა, მერე ბეჭედი მიწაზე დადო და გაიშალა მდიდრული სუფრა, ჩამორიგდა ჯამ-ჭურჭელი და მოვიდა და მოვიდა სასმელ-საჭმელი, რა გინდა სულო და გულო! ნაზირ-ვეზირები უზომოდ გაჰკვირდნენ: სახლი არ აბადია, ქონება-ცხოვრება არ უჩანს და ეს ამოდენა სასმელ-საჭმელად საიდან მოაქვსო. ცოლის ნახვით ხომ მთლად ჰკუთხუ შეიშალნენ, ასე რომ, ნაზირ-ვეზირები სასახლეში პირდაპირ გადარეულები დაბრუნდნენ.

— აბა, როგორ გაგიმასპინძლდათ ის ჩემი ახალი ყმაო? — ჰკითხა ხელმწიფემ.

ნაზირ-ვეზირებმა, რა თქმა უნდა, ძალიან უქეს, — სულ

უცხო-უცხო საჭმელები მოგვართვა, მაგრამ იმას რომ ცოლი ჰყოლია, იმისთანა თვალთ არაფერი გვინახავს. ის ქალი იმას კი არა, თქვენ უნდა გყავდეთ, სწორედ ხელმწიფის საკადრისიაო.

— როგორ წავართვა, — ჰკითხა ხელმწიფემ, — უმიზეზოდ არ დამანებებს და მიზეზი კი არაფერი გამაჩნიაო?

ნაზირ-ვეზირებმა ურჩიეს:

— დაიბარე ის კაცი და მზესთან გაგზავნე ოქროს ვერძის მოსაყვანად, ის იქიდან ცოცხალი ვერ მოვა და ქალი შენ დაგრჩებაო.

დაიბარა ხელმწიფემ მზის სიძე და უთხრა:

— უნდა წახვიდე და მზეს რომ ოქროს ვერძი ჰყავს, ის მომიყვანო.

დაბრუნდა შინ მზის სიძე და ცოლს შესჩივლა:

— ხელმწიფე ოქროს ვერძის მოსაყვანად მგზავნის და რა ვქნაო?

— ეგ ადრე უნდა გეფიქრა, — უთხრა ცოლმა, — ახლა წუწუნი აღარაფერს გიშველის, უნდა ადგე და წახვიდეო.

ქმარიც ადგა და წავიდა. ბევრი იარა თუ ცოტა იარა, ბოლოს გაათავა ხმელეთი და მივიდა იქ, სადაც მზე და მთვარე ბუდობენ. მზე შინ არ იყო, — ქვეყნის გასანათებლად წასულიყო, სიძეს მარტო მთვარე დახვდა და ძალიანაც გაუხარდა. გამოჰკითხა მისვლის მიზეზი და სიძემაც ყველაფერი უამბო. ბოლოს მთვარემ უთხრა:

— ახლა შენ დაგმალავ, თორემ საცაა მზე მოვა და იმის სიცხეს ვერ გაუძლებო. — აქცია ნემსად და შუაბოძში შეურჭო.

ცოტა ხნის შემდეგ მზეც მოვიდა.

— ხორციელის სუნი მომდის! — დაიძახა შემოსვლისთანავე და მთვარეს ჰკითხა, — ვინ შემოდგა ფეხი ჩემს საბრძანებელშიო?

— რას ამბობ, — გაუჯავრდა მთვარე, — შენ იყავი ქვეყნად წასული და ხორციელის სუნიც შენ მოგყვებოდაო.

მზე რომ დამშვიდდა, მთვარემ ჰკითხა:

— ჩვენი სიძე რომ გვეწვიოს სტუმრად, ხომ არ დასწავავო?

— არაო, — დაიფიცა მზემ, — ოღონდ თვალით მაჩვენა ის ჩვენი სიძე, ვინ არის, რა კაცია, და არაფერს არ ვავენებო. აქცია მთვარემ სიძე ისევ კაცად და წაუყენა მზეს.

მზე მიესალმა სიძეს და გამოჰკითხა მისვლის მიზეზი.

— ხელმწიფე თქვენს ქალს მეცილება, — უთხრა სიძემ, — და როგორმე რომ თავიდან მომიშოროს, შენთან გამომგზავნა, მზეს რომ ერთი ოქროს ვერძი ჰყავს, ის მომიყვანო.

— ეგ ადვილი სამსახურიაო, — უთხრა მზემ და დასასვენებლად ბაღში გაიყვანა. ხის ძირას დასვა და უთხრა, კარგად დაისვენე და მგელი და ელია ვახშამსაც აქვე მოგართმევენო.

არ გასულა დიდი ხანი, რომ მგელი და ელიაც მოვიდნენ. მგელმა სუფრა გაშალა და ელიამ სასმელ-საჭმელი ჩამოურიგა. ბაღში კაკლის საბერტყი ხალხა ეგდო. წამოაყოლო ხელი მზის სიძემ, დაადგა ელიას თავზე და უთხრა:

— მე რომ ორ მამულს შუა სამკალად შემოსული ყანა მედგა და მთლად გამინადგურე, რადა ჰქენ ეგრეო? — და მოსცხო და მოსცხო ხალხა ბეჭებზე, იმდენი სცემა, სანამ სულ არ მიასავათა და ახლა მგელს მიუბრუნდა, — მე რომ სამი წლის მანძილზე, დარსა და ავდარში ველზე ვიდექი და ხელმწიფის ფარისთვის ერთი ციკნის ყურიც არ დაშოკლია და ყავლის გასვლის დღეს შენ რომ ერთი ცხვარი მომტაცე, — რადა ჰქენ ეგრეო? — მოსცხო და მოსცხო იმასაც. სულ „ვაი-დედა!“ აძახებინა. მერე დაერია ხეხილს, დაუშინა ხალხა და ტოტები მთლიანად ჩამოულეწა. მხოლოდ ამის შემდეგ მიუჯდა სუფრას და დაღლილი გემრიელად მიაძღა.

წავიდნენ მგელი და ელია მზესთან საჩივლელად. მოვიდა მზე, ნახა თავისი ბაღი ასე გატიალებული და სიძეს ჰკითხა:

— რადა ჰქენი ეგრეო?

— თქვენ რაღად ჰქენით ისე, რომ ყველაფერზე ხელი ამაღლებინეთო? — მიუგო სიძემ და მოუყვა, ვის რა დანაშაულიც მიუძღოდა: — ერთი დღიური ყანა მედგა, ის იყო, მკაუნდა დამეწყო, რომ წამოუშინა ელიამ სეტყვა და მთელი მარცვალი მიწაში ჩამიზილა, მერე ერთ კაცს ასი დღიური

ყანის მომკას მოვურიგდი, ერთი ძნალა მქონდა შესაკონი, გთხოვე, ამის შეკონვა მაცალე, ჯერ ნუ ჩახვალ-მეთქი, მაგრამ შენ ყურიც არ მათხოვე, და მთელი შრომა წყალში ჩამიყარე. ბოლოს ბედი მწყემსობაში ვცადე და ერთ ხელმწიფეს მეცხვარედ დავუდექი, სამი წელიწადი ციკნის ყური არ დამკლებია, ყავლის გასვლის დღეს კი ეს ვაჟბატონი მობრძანდა, ერთი ცხვარი მომტაცა და მთელი წილი დამაჟაგვინა. ჰა, თქვენ რაღად ჰქენით ეგრე, არ იცოდით, რომ ვალს და სამაგიეროს გადახდა უნდაო?

— რაღა ეთქმოდა მზეს, — მისცა დაპირებული ოქროს ვერძი და მშვიდობით გაისტუმრა.

დაბრუნდა მზის სიძე დედამიწაზე და მოუყვანა ხელმწიფეს ოქროს ვერძი. ხელმწიფეს ძალიან ეწყინა, მზის სიძემ დავალება რომ აასრულა და ქალის ხელში ჩაგდების ყოველგვარი იმედი გადაუწყდა, მაგრამ მაინც არ ჩამოეხსნა და რჩევა კვლავ თავის ვეზირებს ჰკითხა, ახლა რაღა მოუხსენსო?

— საიქიოში გაგზავნე და თქვენს მშობელ დედას რომ ოქროს ბეჭედი წაჰყვა, ის მოატანინეო.

დაიბარა მეორედ ხელმწიფემ მზის სიძე და უბრძანა:

— საიქიოში უნდა წახვიდე და დედაჩემის ოქროს ბეჭედი მომიტანო.

მოვიდა ცოლთან მზის სიძე დალონებული და შესჩივლა:

— ხელმწიფე ახლა საიქიოში მაგზავნისო.

ცოლმა ანუგეშა, მისცა ერთი ვაშლი და უთხრა:

— გააგორე ეს ვაშლი, გაჰყევი კვალდაკვალ და საიქიოში მიგიყვანსო.

გააგორა მზის სიძემ ვაშლი და მიჰყვა უკან. იგორა ვაშლმა, იგორა და ერთ ხრიოკ, ქვა-კლდიან ადგილზე მიგორდა. ირგვლივ სულიერი არ ჭაჭანებდა, ერთ კლდესთან მარტო ერთი ხარი ება, წინ არც საჭმელი ედო, არც წყალი სადმე ჩანდა, მაგრამ ხარი ისეთი მსუქანი იყო, რომ ხორცი სულ ზედ ასკდებოდა. გაუკვირდა მზის სიძეს და ხარს ჰკითხა:

— რისგან არის, რომ არც საჭმელი გაქვს, არც სასმელი და მაინც ასეთი მსუქანი კი ხარო?

— ავლილი ბევრი მინახავს, ჩამოვლილი კი არავინო, —

უთხრა ხარმა, — თუ უკან დაბრუნება გელირსა, ამის მიზეზს მაშინ გეტყვიო.

გააგორა ისევ მზის სიძემ ვაშლი და მიჰყვა უკან. იგორა ვაშლმა, იგორა და ერთ აბალახებულ მინდორში გამოვიდა. მინდორში ერთი ხარი იდგა, ბალახი მუხლებამდე სწვდებოდა, წინ ანკარა ნაკადული ჩაუდიოდა, მაგრამ ისეთი მჭლე და გაძვალტყავებული იყო, ყორანი ვერაფერს ააგლეჯდა. მივიდა ახლოს მზის სიძე და ჰკითხა:

— ასეთი ნოყიერი საბალახოს პატრონი ასე რამ გააძვალტყავაო?

— ავლილი ბევრი მინახავს, ჩამოვლილი კი აღარცერთი, — უთხრა ხარმა, — თუ უკან დაბრუნდები, ამის მიზეზს მაშინ შეიტყობო.

გასცდა ამ ხარსაც მზის სიძე, მიჰყვა ისევ თავის ვაშლს და ერთ ცოლ-ქმარს მიადგა. ცოლ-ქმარი ცულის ტარზე იწვა, მაგრამ აქეთ-იქიდან კიდევ ადგილიც მორჩენოდათ. მზის სიძე გაკვირვებით დააცქერდა ცოლ-ქმარს და ჰკითხა:

— თუ ღმერთი გწამთ, ეგ როგორ არის, რომ ორნი ცულისტარზე წევხართ და აქეთ-იქით ადგილი კიდევ მოგჩენიათო?

— ავლილი ბევრი გვინახავს, ჩამოვლილი კი აღარავინო, — უთხრა ცოლ-ქმარმა, — თუ უკანვე ჩამოვილი, ამის მიზეზს მაშინ გეტყვიო.

განაგრძო გზა მზის სიძემ და ისევ ცოლ-ქმარს მიადგა. ესენი კამეჩის ტყავზე იწვნენ, მაგრამ მაინც ვერ ეტეოდნენ, — ერთი იქით ნაპირზე გორავდა, მეორე — აქეთ და მაინც ერთმანეთს წიხლაუდნენ, იქით მიიწი, ხომ ხედავ, ადგილი მესერ მყოფნისო.

აქ მთლად გაშტერდა მზის სიძე და ცოლ-ქმარს ჰკითხა:

— ეგ რა უბედურებაა თქვენს თავს, რომ კამეჩის ტყავზე წევხართ და მაინც ვერ დატეულხართო?

ამ ცოლ-ქმარმაც იგივე უპასუხა:

— ავლილი ბევრი გვინახავს, ჩამოვლილი კი ერთიც არაო, — წადი და, თუ ჩამოვილი, ჩვენც გეტყვიო.

გააგორა მზის სიძემ ვაშლი, მიჰყვა უკან და ერთ დედაკაცს მიადგა. მოეგროვებინა დედაკაცს კვერცხები და ციხეს



აშენებდა. აიყვანდა შუამდე კედლებს და დაენგრეოდა. კიდევ და კიდევ. უყურა მზის სიძემ, უყურა და ბოლოს ჰკითხა:

— რას შერები, ადამიანო, კვერცხების კოშკი სხვას ვის აუშენებია, რომ შენ ააშენო, და ან რაში გჭირდებაო?

— ავლილი ბევრი მინასავს, მაგრამ ჩამოვლილი არავინო, — უთხრა დედაკაცმა, — თუ ჩამოვილი, ამის მიზეზს მაშინ გეტყვიო.

გასცდა ამასაც მზის სიძე და გაუდგა თავის გზას. იარა, იარა და ახლა მეორე დედაკაცს მიადგა. ეს დედაკაცი თონესთან იდგა და პურს აცხობდა — ჩააქრავდა ბამბასავით თეთრ პურს და ტალახივით შავს ამოჰყრიდა. მზის სიძემ ჰკითხა:

— რისი ბრალია, რომ თეთრ პურს აქრავ და შავს ამოჰყრიო? — დედაკაცმა იგივე უთხრა:

— ავლილი ბევრი მინასავს, მაგრამ ჯერ უკან არავინ დაბრუნებულა, თუ ჩამოვილი, გეტყვიო.

გაუდგა მზის სიძე გზას და ერთ მდინარეს მიადგა. მდინარეზე ერთი კაცი ხიდად გადებულებო და ყველა მასზე გადიოდ-გამოდოდა. გაუკვირდა მზის სიძეს, სად გაგონილა, კაცი ხიდად იდოსო, და ხიდ-კაცს ჰკითხა, — რა ამბავია შენს თავსო? — კაცმაც იგივე პასუხი მისცა:

— ამ გზაზე უკან დაბრუნებული ჯერ არავინ მინასავს და თუ გელირსა, ამის მიზეზს მაშინ შეიტყობო.

გაუდგა მზის სიძე ისევ გზას და ბოლოს ხელმწიფის დედასთანაც მივიდა.

— ძეხორციელი აქ რამ მოგიყვანაო? — ჰკითხა ხელმწიფის დედამ.

— შენმა შვილმა შემოგიტვალა, — უთხრა მზის სიძემ. — მანდ რომ ოქროს ბეჭედი გაგყვა, ის გამომიგზავნეო.

მისცა ხელმწიფის დედამ ბეჭედი და თან დააბარა:

— ამ ბეჭედს რომ გადასცემ ჩემს შვილს, ასე უთხარი: რაკი ასეთი უმადური ხარ, რომ საიქიოშიც არ მასვენებ, შენამც იქნები წყეული და ისემც წავივა საქმე, შენმავე ნაზირ-ვეზირებმა შეგჭამონო.

წამოიღო მზის სიძემ ბეჭედი და წამოვიდა. მოვიდა ხი-

დად გადებულ კაცთან და ჰკითხა, — ახლა მაინც მითხარო შენი ასეთი წამების მიზეზიო?

— მე სიცოცხლეში ხიდი მებარა, — უთხრა კაცმა, — და ზედ უფასოდ კაციშვილს არ გავატარებდი. ღარიბი და გაჭირვებული არ ვიცოდი, ბაჟს ყველას ორმაგად ვახდევინებდი და ჩემი ავკაცობისათვის აქ აი ასე დავისაჯე. კაცმა ცუდი საქმე არ უნდა ჩაიდინოს, თორემ ან მკვდარს ან ცოცხალს უსათუოდ მოექითხებაო.

— ჰოდა, მოგკითხვია კიდევცო, — უთხრა მზის სიძემ, გამოსცდა ამ კაცს და მივიდა პურის მცხობელ დედაკაცთან. დედაკაცმა უთხრა:

— მე იმქვეყნად ისეთი ძუნწი ვიყავი, რომ პურით მათხოვარს არ გავიკითხავდი, პური რომ მეცხო და იმ დროს მშიერ მგზავრს გაეულო, თვალებს თონეში ჩავიწვავდი და მალლა კი არ ავიხედავდი, რომ არ დამენახა და პურის მიწოდება არ დამჭირებოდა. ჰოდა, აი იმ სიძუნწისათვის ახლა ასე დავისაჯე, — რაგინდა თეთრი პურიც არ უნდა ჩაეკრა, თონიდან ტალახად ქცეული ამომივყო.

— უარესიც უნდა მოგსვლოდაო, — უთხრა მზის სიძემ, წამოვიდა და მივიდა იმ დედაკაცთან, ვინც კვერცხის ციხეს აშენებდა. დედაკაცმა უთხრა:

— მე იმქვეყნად მეზობლებს კვერცხებს ვპარავდი და ასე იმის გამო ვიტანჯებიო.

— შენც კარგად მოგსვლიაო, უთხრა მზის სიძემ, — ყველა ქურდსა და სხვათა მპარავს ასე უნდა დაემართოსო, — და წამოვიდა თავის გზაზე.

იარა, იარა, მოვიდა კამეჩის ტყავზე მწოლიარე ცოლქმართან და ჰკითხა, რა არის მიზეზი, ამსიფართე ტყავზე რომ ვერ დატეულხართო?

ცოლქმარმა უთხრა:

— კამეჩის ტყავზე იმიტომ ვერ ვეტევით, რომ ჩვენ სამზეოში ერთმანეთს პატივს არ ვცემდით, სულ ვჩხუბობდით და ვკინკლაობდით და ეს სასჯელიც ამ მიზეზით დაგვედო, მაგრამ უბედურება უფრო ის არის, ახლა ბევრიც რომ ვეცადოთ, ერთმანეთს ველარ დავშორდებით და სამუდამოდ ასე უნდა ვეწამოთო.

— სწორედ, რომ შესაფერად დასჯილხართო, — უთხრა მზის სიძემ და წამოვიდა. მოვიდა ცულის ტარზე მწოლარე ცოლ-ქმართან და ჰკითხა:

— ახლა მაინც მითხარით, ერთი ცულის ტარი ორ ადამიანს საწოლად როგორ გყოფნითო?

— იმ ქვეყნად ერთმანეთი გვიყვარდა და ის სიყვარული აქაც გამოგვყვა, — უთხრა ცოლ-ქმარმა, — აქაც სულ ერთმანეთის სიყვარულში ვართ და ამიტომ საწოლად ცულის ტარიც გვიყოფნისო.

— ერთმანეთის სიყვარული კვლავაც ნუ მოგეშალოთო, — უთხრა მზის სიძემ და წამოვიდა. მოვიდა იმ ხართან მწვანე მინდორზე წყაროს პირას რომ ება და შიმშილ-წყურვილით კი კვდებოდა.

— აბა ახლა მითხარი, — ჰკითხა მზის სიძემ, — რის ბრალია, რომ სასმელ-საჭმელი თავსაყრელი გაქვს და მაინც ასეთი გაძვალტყავებული ხარო?

— იმ ქვეყნად უმადური ვიყავი, — უთხრა ხარმა, — პატრონს არაფერში ვადგებოდი და მეუღლე ხარსაც მუდამ ვლატობოდი. აქ ამიტომ დავისაჯე ასე, და ახლა ბევრიც რომ ვჭამო, აღარ შემერგებაო.

— მეტის ღირსიც ყოფილხარო, — უთხრა მზის სიძემ და წამოვიდა. მოვიდა ბოლოს იმ ხართან, სულ პირველად რომ შეხვდა, — ხრიოკ ადგილზე რომ ება და სიმსუქნისაგან ტყავში კი არ ეტყოდა.

— სიცოცხლეში ხარისთვის არ მიღალატია და პატრონისათვისაც ერთგული და თავდადებული ვიყავი, — უთხრა ხარმა, — ჰოდა, იმ ერთგულების საზღაურად ახლა ასეთ განცხრომაში ვარ და სულაც რომ არაფერი ვჭამო, მაინც ასე მსუქნად და ჯანსაღად ვიქნებიო.

— ბარაქალა შენს ხართბასო, — უთხრა მზის სიძემ. გამოემშვიდობა და წამოვიდა. ბევრი იარა თუ ცოტა იარა, ბოლოს მოვიდა ხელმწიფესთან, მოუტანა ოქროს ბეჭედი და დედის დანაბარებიც გადასცა: ისე გაგიხდეს საქმე, რომ შენმავე ნაზირ-ვეზირებმა შეგჭამონო. იქცა მაშინვე ხელმწიფე კურდღლად, ნაზირ-ვეზირები — მწვერებად, გამოეკიდნენ კურდღელს და ასო-ასო დაფლითეს.

ხელმწიფის სახლ-კარი და ქონება მთლიანად მზის სიძეს დარჩა, იმავე დღეს ცოლიც სასახლეში გადმოიყვანა, დაჯდა ხელმწიფედ და მთელი სიცოცხლე ლხინსა და ბედნიერებაში გაატარა.

ჭირი — იქა, ლხინი — აქა,  
ქათო — იქა, ფქვილი — აქა.





## ნ ა ტ ვ რ ი ს თ ვ ა ლ ი

იყო და არა იყო რა, ღვთის უკეთესი რა იქნებოდა, იყო შაშვი მგალობელი, ღმერთი ჩვენი მწყალობელი. იყო ერთ ქვეყანაში ერთი ღარიბი ცოლ-ქმარი და ჰყავდათ ერთი ბიჭი. ბიჭი უკვე ჩვიდმეც-თვრამეტი წლისა იყო, მაგრამ საქმეს არ აკეთებდა, მთელ დღეებს უქმად ატარებდა და ლუკმაპურს ისევ მშობლების ხელიდან გამოელოდა. ამის თაობაზე ცოლ-ქმარს ხშირად ჩხუბიც მოსდიოდა და საყვედურით ერთმანეთს ყურებს უხვრეტდნენ:

არა, შენ წაახდინე შვილი, არა, შენო!

ერთ დღეს ცოლმა უთხრა ქმარს:

— კაცო, იქნება ჩვენი შვილი იმიტომ არ მუშაობს, რომ ოჯახში ფული ეგულება, მოდი გავყოთ ის საშავდღეოდ გადანახული ფული, ჩვენ ჩვენი წილი ავიღოთ და იმას თავისი მივცეთ, იქნება მაშინ მაინც გატოკდეს და საქმე გააკეთოსო.

ქმარს მოეწონა ცოლის აზრი, ამოიღეს სკივრიდან შენახული ფული, დაუძახეს თავიანთ ყალაღანა შვილსა და უთხრეს:

— აი, შვილო, მთელი ჩვენი ქონება ეს არის, გავყოთ თანაბრად, ყველამ თავისი წილი ავიღოთ და საკუთარი ქონებით ვიცხოვროთო. — სულ სამოცი თუმანი ჰქონდათ შენახული, მისცეს შვილს ოცი თუმანი და უთხრეს, — აჰა, შვილო, წაიღე, იქით მიდექ, აქეთ მოდექ, ფულს ფული მოაგებინე და იცხოვრო.

დაყაბულდა ბიჭი, ჩაიდო ჯიბეში ოცი თუმანი და გაუდგა გზას. გაიარა რამოდენიმე მანძილი და ერთ მინდორზე

გავიდა. უცხად ერთი მხრიდან რაღაც გნისი და ხმაური შემოესმა. ბიჭმა გაიხედა და დაინახა, რომ მეცხვარეებს დაუჭვრიათ ერთი ძაღლი და დასრრობას უპირებენ. შეებრა-  
ლა პირუტყვი, მივიდა მეცხვარესთან და სთხოვა:

— ოღონდ ეგ ძაღლი გაუშვიტ და ჯიბეში ოცი თუმანი მაქვს და სულ თქვენ მოგცემით.

მეცხვარეებმა, რა თქმა უნდა, ოცი თუმანი არჩიეს ძაღ-  
ლის დასრრობას და მაშინვე გაუშვეს. ძაღლმა მადლობით  
შეხედა თავის მხსნელს, დაიხსომა მისი სახე და გახარე-  
ბულმა მოკურცხლა. ბიჭმა მისცა მეცხვარეებს დაპირებული  
ოცი თუმანი და ისევ სახლში დაბრუნდა. დაჯდა ძველებუ-  
რად შინ და დაიკრიფა გულხელი.

დაღონდა ისევ დედ-მამა და უთხრეს ერთმანეთს:

— ოც-ოც თუმანს რომ გვაგულეებს, ალბათ იმიტომ არ  
მუშაობს, მოდი მივცეთ ამ ფულიდანაც ნახევარი, იქნება წა-  
ვიდეს და რამე გააკეთოსო. — გამოიტანეს ორმოცი თუმანი  
და ნახევარი დაუთვალეს. ბიჭმა ჩაიდო ფული ჯიბეში და  
წავიდა.

იარა, იარა და ერთ სოფელში მივიდა. ერთი სახლიდან  
რაღაც ხმაური გაიგონა, მოვიდა ამ სახლთან და დაინახა,  
რომ ერთ დედაბერს დაუჭვრია ციცა და ახრჩობს. ბიჭს შე-  
ებრაღა ცხოველი და დედაბერს უთხრა:

— დიდედა, ოღონდ მაგ კატას ნუ მოკლავ, გაუშვი და  
მე რომ ჯიბეში ოცი თუმანი მაქვს, იმას მოგცემო. — ბე-  
ბერმა გაუშვა კატა, ბიჭმა მისცა ოცი თუმანი და წამოვიდა  
შინისაკენ. მოვიდა შინ და ისევ ძველებურად ყალღანობა  
დაიწყო.

დაღონდნენ კვლავ მშობლები და თქვეს:

— ოც თუმანს რომ კიდევ გვაგულეებს, ნამდვილად იმე-  
ტომ არ მუშაობს, მოდი მივცეთ ეს ფულიც და რომ აღარა-  
ფერი გვექნება მისაცემი, იქნებ მაშინ მაინც გააკეთოს რა-  
მეო, — და ის უკანასკნელი ოცი თუმანიც მისცეს.

— აი, ეს იყო ჩვენი უკანასკნელი ფულიანობა და ამასაც  
შენ გაძლევეთ, — უთხრა მამამ, — აქამდე თუ ამის იმედი  
გქონდა, ახლა სახლში ერთი გროშიც აღარ გვრჩება და ნუ-

ღარც მოცემის იმედს იქონიებ, წადი, გაისარჯე, შრომა ფულად აქციე, ფულს ფული მიუმატე და იცხოვრეო.

ბიჭმა გამოართვა ფული, ჩაიდო ჯიბეში და გაუდგა გზას. იარა, იარა და გავიდა ერთ ღიჭიან ჭალაში. ბარდებს იქიდან რაღაც ხმაური შემოესმა, მივიდა და რას ხედავს: ერთ კაცს ბარდისთვის ცეცხლი წაეკიდებინა, გრძელ ჯოხზე გველის წლოკი მიება და ცეცხლის ალზე ატრიალებდა. წლოკი საცოდავად წიოდა და იკლაკნებოდა. შეებრაღა ბიჭს გველის ნაშიერი და კაცს სთხოვა:

— ოღონდ გაუშვი და ჯიბეში რომ ოცი თუმანი მაქვს, იმას მოგცემო. — კაცმა გაუშვა წლოკი, ბიჭმა მისცა დაპირებული ოცი თუმანი და გამობრუნდა შინისაკენ. ცოტა რომ გამოიარა, უცებ ბარდებიდან წლოკი გამოძვრა, გადაუდგა ბიჭს წინ და უთხრა:

— რადგან ასეთი დიდი სიკეთე მიყავი, მეც მინდა რითიმე სამაგიერო გადაგიხადო, წამოდი ჩემთან და ბედსა გწევო.

ბიჭი დათანხმდა და გაჰყვა. გზაზე წლოკმა ასე დაარია:

— ჩემს მშობლებს ჩემს მეტი შვილი არა ჰყავთ, მე რომ ვუამბობ, რა სიფათსაც გადამარჩინე, იმათ უზომოდ გაუხარდებათ და საჩუქრად უამრავ ოქრო-ვერცხლს შემოგაძლევენ, მაგრამ შენ არაფერი არ აიღო. უთხარი, თუ ჩემი პატივისცემა გინდათ, თქვენ რომ ერთი წითელთვლიანი ბეჭედი გაქვთ, ის მომეცით-თქო. ის ბეჭედი ნატვრისთვალაია და რასაც ინატრებ, შეგისრულდება.

ატარა ბიჭი გველის წლოკმა, ატარა და ერთ ბნელ გამოქვაბულში შეიყვანა. წლოკის მშობლებმა ბიჭი რომ დაინახეს, მაშინვე სისინი ატეხეს და შეჭმა დაუპირეს. წლოკმა ტირილი დაიწყო, ამას არაფერი ავნოთ, ჯერ მათქმევინეთ, რა სიკეთე მიყო და თვითონვე დარწმუნდებით, რომ ეს კაცი ჩვენი მოკეთა და არა მტერიო.

დედ-მამამ მოუსმინა და წლოკმაც ყველაფერი უამბო. მაშინ კი მოუღბათ გული გველებს და ბიჭს ჰკითხეს:

— რაკი ჩვენი შვილი სიკვდილს გადაარჩინე, რას ითხოვ, სამაგიერო რით გადაგიხადოთო?

— მე სხვა არაფერი არ მინდა, — უთხრა ბიჭმა, — თქვენ რომ ერთი წითელთვლიანი ბეჭედი გაქვთ, ის მომეცითო.

გველებმა უარი უთხრეს:

— ის ბეჭედი მთელი ჩვენი საცხოვრისია და ვერ მოგცემთო.

წლოკმა მშობლებს უსაყვედურა:

— რაკი ჩემს თავს თქვენ ის ერთი ბეჭედი გირჩევნიათ, აღარც მე მინდა თქვენი შვილობა და ამ კაცთან წავალო.

დედა გველს შეეშინდა, ემანდ მართლა არ წაპყვესო, და დათანხმდა. გამოიღო პირიდან წითელთვლიანი ბეჭედი, ბიჭს გადასცა და უთხრა:

— რაც კი მოგინდება, შეაგდე მალლა ბეჭედი და უთხარი: ჩემო ნატვრის თვალო, ნატვრით ვინატრებ და ნატვრა შემისრულე-თქო, და ყველა სურვილს შეგისრულებსო.

ბიჭმა მადლობა გადაუხადა გველებს, ჩაიდო ჯიბეში ბეჭედი და გამოსწია სახლისაკენ. მოვიდა შინ და ნახა, რომ იმისი დედ-მამა უარესად გაღარიბებულიყვნენ, ბიჭმა უთხრა დედას:

— დედი, პური მშია და მაჭამე რამეო.

— რა გაჭამო, შვილო, შინ ფრჩხილზე დასაყრელი ფქვილი არა გვაქვს და პურს რისგან გამოვაცხოზდიო, — დაიწუწუნა დედამ.

ბიჭმა ამოიღო თავისი ნატვრისთვალი, შეაგდო მალლა და უთხრა:

— ჩემო ნატვრისთვალო, ნატვრით ვინატრებ და ნატვრა შემისრულე. ეს კიდობანი სულ გამტკიცული პურით გაავსეო. — მერე მიუბრუნდა ისევ დედას და უთხრა, — მიდი, დედი, და მაინც ახადე, იქნება ნამცეცები მაინც იყოს დარჩენილიო.

დედა მივიდა, ახადა კიდობანს და გაკვირვებისაგან პირი დააღო: კიდობანი თეთრი გამტკიცული პურებით იყო სავსე. აბა, რაღა თქმა უნდა, რომ გაუხარდებოდა, ამოიღო პურები და გადმოალაგა სუფრაზე. ბიჭმა კიდევ შეაგდო ნატვრისთვალი და ახლა გემრიელი სასმელ-საჭმელი ინატრა. სუფრა იმავე წუთს გემრიელი კერძებითა და წითელი კახური საფურავით გაივსო. ივანშემს ტკბილად და დაიძინეს,



მეორე დღეს ბიჭმა უთხრა დედას:

— დედი, ჩვენს ხელმწიფესთან წადი და მოახსენე, რომ მისი მზეთუნახავი ქალის შერთვა მსურს და ნება დამბოძოსო.

— რას ამბობ, შვილო, ხელმწიფე გლეხკაცსა და ისიც ჩვენისთანა ღარიბს ქალს როგორ მიათხოვებსო? — გაუკვირდა დედას. მაგრამ ბიჭმა არ დაიშალა, — შენ წადი და უთხარი, და თუ ნებით არ მომცემს, ძალით წამოვიყვანო.

— კარგი, შვილო, რაკი არ დაგიშლია, წავალ, მაგრამ ამ დაკონკილი ტანსაცმლით ხელმწიფესთან როგორ მივიდეო, — უთხრა დედამ.

შვილმა შეაგდო ნატვრისთვალი და უთხრა:

— ჩემო ნატვრისთვალო, ნატვრით ვინატრებ და ნატვრამ შემისრულე, დედაჩემის მზითვის სკივრი სულ ძვირფასი ტანსაცმლით გაავსეო. — მერე ისევ დედას მიუბრუნდა, — დედი, აბა ახადე შენს მზითვის სკივრს, იქნებ ცოტათი გამოსადეგი რამე აღმოჩნდესო.

დედა მივიდა, ახადა სკივრს და გახარებულმა კინაღამ ხმამაღლა იკივლა: სკივრი სულ ფარჩა-აბრეშუმის ტანსაცმლით იყო გაჭედილი. ამოარჩია, რომელიც მოეწონა, ჩაიცვა და წავიდა. მივიდა ხელმწიფესთან, თავი დაუკრა და მოახსენა:

— დიდებულო ხელმწიფე, ჩემს შვილს თქვენი ქალი უნდა და სამაჭანკლოდ გამომგზავნა, თან ისიც შემოგიტვალათ:

— ნებით მომცემს კარგია, არადა, ძალით წამოვიყვანო. ხელმწიფე ჯერ უზომოდ განრისხდა, მერე იფიქრა, იმ კაცს რომ თავის თავის იმედი არ ჰქონდეს, ასე გაბედულად ვერ მომთხოვდაო, და დედას უთხრა:

— კარგი, თანახმა ვარ, მაგრამ შენს შვილს ორ დავალებას მივცემ, თუ შეასრულა, მართლა ღირსი ყოფილა ჩემი სიძობისა და ქალსაც გავატან, თუ არადა, კატასავით სახარხობელაზე ჩამოვკიდებო.

დაიბარა ხელმწიფემ ბიჭი და უთხრა:

— თუ ჩემი სახლიდან შენს სახლამდე ერთ ღამეში ისეთ ხეხილის ბაღს გააშენებ, რომ რიგი ყვავილებს, რიგი მწიფდებს

დღე რიგი იკრიფებოდეს, მოგათხოვებ ჩემს მზეთუნა-  
ხავ ქალს, თუ არადა, სასრჩობელაზე ჩამოგკიდებო.

— ბატონი ბრძანდებით, ვეცდებით, — უპასუხა ბიჭმა  
და წამოვიდა. შინ რომ მივიდა, აიღო თავისი ნატვრისთვა-  
ლი და მალლა შეისროლა, — ჩემო ნატვრისთვალო, ნატვ-  
რით ვინატრებ და ნატვრა შემისრულე: ჩემი სახლიდან ხელ-  
მწიფის სახლამდე დილისათვის ისეთი ხეხილის ბალი გამი-  
შენე, რომ რიგი ყვაოდეს, რიგი მწიფდეს და რიგი იკრიფე-  
ბოდესო.

მართლაც, ბიჭს სიტყვა არ ჰქონდა დამთავრებული, რომ  
მისი სახლიდან ხელმწიფის სახლამდე ჯერ არნახული ბალი  
გაიჭიმა. მივიდა მეორე დღეს ბიჭი ხელმწიფესთან და მოახ-  
სენა, თქვენი ბრძანება შესრულებულია, გამობრძანდით და  
იხილეთო.

ხელმწიფე გამოვიდა, დაათვალიერა ბალი და მეტად კმა-  
ყოფილი დარჩა. მერე მიუბრუნდა ბიჭს და უთხრა:

— ამჯერად მოგებულნი ხარ, თუ მეორე დავალებასაც  
ასევე უნაკლოდ შეასრულებ, შენს სურვილს წინ არაფერს  
დაუდგება, თუ არადა, სასრჩობელა არ ავცდებო.

— ბრძანეთ და ყველაფრისთვის მზად გახლავართო, —  
მიუგო ბიჭმა.

ხელმწიფემ უთხრა:

— ერთ ღამეში ისეთი ხალიჩა უნდა მოქსოვო, რომ ჩე-  
მი სახლიდან შენს სახლამდე გაიფინოს და ერთი იმდენი  
კიდევ დარჩესო.

— შევეცდები და იქნებ შევძლოო, — მიუგო ბიჭმა და წა-  
მოვიდა. შინ რომ მოვიდა, აიღო ნატვრისთვალი, შეისროლა  
მალლა და უთხრა:

— ჩემო ნატვრისთვალო, ნატვრით ვინატრებ და ნატვრა  
შემისრულე: ერთ ღამეში ისეთი ხალიჩა მომიქსოვე, რომ  
ჩემი სახლიდან ხელმწიფის სახლამდე გასწვდეს და ერთი  
იმდენი კიდევ დარჩესო.

ნატვრისთვალმა ესეც ერთ წამში გააკეთა — ბიჭის სახ-  
ლიდან ხელმწიფის სასახლემდე სულ ოქრომკედით ნაქარგი  
ხალიჩა დაფინა და ერთი იმდენი კიდევაც წააჭარბა.

მივიდა დილას ბიჭი ხელმწიფესთან და მოახსენა:

— თქვენი დავალება შესრულებულია, გამობრძანდით და იხილეთო.

ხელმწიფე გამოვიდა, გახედა ხალიჩას და ბიჭს უთხრა:

— სიტყვა სიტყვაა და უნდა შეეასრულო, მაგრამ, ხომ იცი, ჩემს ქალს მაყრები გამოჰყვებიან და ხელმწიფის ხალხს კარგი დახვედრა უნდა. გაქვს კი ისეთი სახლი და ცხოვრება, რომ მაყრებსაც დახვდე და პატარძალი ცოლიც შესაფერისად იყოლიო?

— რაცა მაქვს, მაქვს, რაც არა მაქვს, მექნება, — მიუგო ბიჭმა და წამოიყვანა ხელმწიფის ქალი. ხელმწიფემ განგებ ბევრი მაყარი გააყოლა. სახლს რომ მიუახლოვდნენ, ბიჭმა ამოიღო ნატვრის თვალი, შეისროლა მალლა და უთხრა:

— ჩემო ნატვრისთვალო, ნატვრით ვინატრებ და ნატვრა შემისრულე: ჩემი სახლის ადგილზე ერთი ისეთი ბროლის სასახლე დამიდგი, რომ ხელმწიფესაც შეშურდეს, და შიგ ისეთი სუფრა გაგვიწყვე, რომ ამ მაყრებს ჯერ თვალთაც არ ენახოთო.

მოვიდნენ შინ და მართლაც ისეთი სასახლე დახვდათ, რომ ხელმწიფის კაცებს შურიც კი აღეძრათ. სუფრას ხომ ლაპარაკი აღარ უნდა — რა თეფშები, რა ჭურჭელი, რა დანა-ჩანგალი ჩიტის რძეც კი ოქროს თასებით იდგა. ერთ კვირას ბუკ-ნალარისა და დუდუკ-დაირის ხმა არ შეწყვეტილა. კვირის თავზე ბიჭმა მაყრიონი გაისტუმრა და თავის მზეთუნახავ ცოლთან დაიწყო ბედნიერი ცხოვრება.

ერთ დღეს ბიჭი შინ არ იყო, სანადიროდ იყო წასული. ამ დროს სოფელზე ჩამოიარა ერთმა სოვდაგარმა და აღმასის ბეჭდები და საყურეები ჩამოატარა გასაყიდად. ხელმწიფის ქალმა აიყვანა სოვდაგარი სახლში და საყურეების არჩევა დაიწყო. ამ დროს ნატვრის თვალი სარკის წინ იდო. სოვდაგარმა დაინახა, მიხვდა, რომ ნატვრისთვალი იყო და მისი ხელში ჩაგდება განიზრახა. როცა ქალმა საყურეები ამოარჩია და ფასს შეეკითხა, სოვდაგარმა უთხრა:

— მაგ საყურეებს ფულზე ვერ გავყიდი, მაგრამ თქვენი ხათრის გულისათვის აგე. იმ ბეჭედზე კი გადაგიცვლითო.

ხელმწიფის ქალმა ჯერ არ იცოდა იმ ბეჭდის ძალა და გადაუცვალა. სოვდაგარმა ჩაიგდო თუ არა ხელში ბეჭედი,

მაშინვე ინატრა: ნატვრისთვალო, მე და ეს ქალი თავის სახლიანად ახლავე ცაში აგვაფრინე და შუა ზღვაში რომ ერთი უკაცრიელი კუნძულია, იქ ჩაგვაფრინეო. ამის თქმა იყო და სახლი იმავე წამს ჰაერში აიჭრა, იფრინა, იფრინა და იმ სოფდაგრის ნანატრ კუნძულზე დაეშვა.

ბიჭი დაბრუნდა სანადიროდან და რას ხედავს: აღარც სახლია და აღარც მზეთუნასავი ქალი. ბიჭმა მაშინვე ნეკზე იკბინა, მიხვდა, რომ ნატვრისთვალის ვილაცამ ჩაიგდო ხელში და ცოლიცა და სასახლეც იმან გაიტაცა. ადგა იმავე წუთს და საძებნელად წავიდა.

ბევრი იარა თუ ცოტა იარა, შემოხვდა გზაზე ძაღლი და გამარჯობა უთხრა, მერე ჰკითხა, რაზე დაღონებულხარო?

— როგორ არ დავღონდები, როცა ასეთი უბედურება დამატყდა: ჩემი ნატვრისთვალის ვილაცამ ჩაიგდო ხელში და ცოლი და სასახლეც მომტაცა. აი მივდივარ საძებრად, მაგრამ ის კი არ ვიცი, მივაგნებ, თუ ვერაო, — მიუგო ბიჭმა.

— მეც შენთან წამოვალ, — უთხრა ძაღლმა, — შენ ხომ მე სიკვდილს გადამარჩინე, ჰოდა, ახლა ჩემი ჯერია და შეძლებისდაგვარად მეც დაგეხმარებიო.

წაიყოლა ბიჭმა ძაღლი და გაუდგნენ გზას.

ცოტა მანძილი რომ გაიარეს, ახლა ციცა შემოხვდა.

— გამარჯობა!

— გაგიმარჯოს.

— რაზე დაღონებულხარ, ჩემო მხსნელო და გადამრჩენელო? — ჰკითხა ციცამ. ბიჭმა უამბო თავისი გასაჭირი.

— მაშ, მეც შენთან წამოვალ და იმ დიდი სიკეთის სამაგიეროდ, სიკვდილს რომ გადამარჩინე, ცოტას მაინც დაგეხმარებიო, — უთხრა ციცამ და გაჰყვა.

იარეს, ბევრი მთა გადაიარეს, ბევრი უდაბური ადგილი გადალახეს, მაგრამ ცამ ჩაყლაპა, თუ მიწამ, დაკარგულისა ვერაფერი გაიგეს. ბოლოს დასხდნენ და ბჭობა გამართეს, რა გქნათ, განვაგრძოთ ძებნა, თუ თავი დავანებოთო. ბოლოს ციცამ თქვა:

— ჩემი მამა-პაპისაგან გამიგონია, თავებმა ყველაფერი იციანო. ეგენი ხომ ყველა ჩემი მონა-მორჩილები არიან,

ხოდით, წავალ, და სათაგვეთის ხელმწიფეს ვკითხავ, იქნებ მართლა იცოდნენ და გაგვაგებინონო.

წავიდა ციცა სათაგვეთის ხელმწიფესთან და ჰკითხა, — ასე და ასეა ჩვენი საქმე, მზეთუნახავი ქალი და ბროლის სასახლე დაგვარგეთ და შენს საყმოში მისი მნახველი ან მცოდნე ხომ არავინ არისო.

ხელმწიფემ დაიბარა მთელი სათაგვეთი და ფიცხელი ბრძანება გასცა, ვისაც ბროლის სასახლისა და მზეთუნახავი ქალის ამბავი ეცოდინება და არ იტყვის, ცოლ-შვილიანად ძელზე გასმა არ ასცდებო.

დაიძრა მთელი სათაგვეთი და მოაწყდა ხელმწიფის სორო-კარმიდამოს, მაგრამ ამბის მცოდნე არავინ აღმოჩნდა. ყველა რჯულზე იფიცავდა, ამ ამბისა არაფერი გვსმენიაო.

დაღონდა სათაგვეთის ხელმწიფე, აღარ იცოდა, რა ექნა, ცალკე ციცას შიში ჰქონდა, ემანდ არ განრისხდეს და საყმო არ გამიწყვიტოსო, ცალკე სირცხვილი წვავდა, ციცა ერთხელ მომადგა თხოვნით და მაშინაც წადილს ვერ ვუსრულებო.

ამ დარდსა და ურვაში რომ იყო თავთ ხელმწიფე, ჭიშკარს ერთი კოჭლი თავვი მოადგა და დაიძახა:

— მიმიშვიტ ბატონ ხელმწიფესთან და მაგ ამბავს მე მოვახსენებო! — თავებმა მაშინვე გზა უტიეს, კოჭლმა თავგმა დაიჩოქა ხელმწიფის წინ და წრიბინით მოახსენა: დიდებულო ხელმწიფე, ერთ დღეს ჩვეულებრივ თხილის ჩრდილში ვისვენებდი, ზედ ერთი ხმელი ფოთოლი მეფარა და ვთვლემდი. ამ დროს ციდან რაღაც ზრიალი მომესმა, ავიხედე და ჰაერში ძვირფასი თვლებით მოჭედილი ბროლის სასახლე დავინახე. შემეშინდა, არ ჩამოვარდეს და ზედ არ დამეცეს-მეთქი, მაგრამ სასახლემ ქროლვით გადამიფრინა თავზე და ზღვაში რომ უკაცრიელი კუნძულია, იქ ჩაეშვა.

— თუ შეიძლება, ეს თავვი მე გამომაყოლეთ, რომ იმ კუნძულის ასავალ-დასავალი გვასწავლოსო, — უთხრა ციცამ ხელმწიფეს. სათაგვეთის ხელმწიფე ციცას აბა უარს როგორ გაუბედავდა და კოჭლ თავგს უბრძანა:

— ახლავე გაპყევი და სანამ იმ კუნძულს არ აპოვინებ, სათაგვეთისკენ პირი არ იბრუნო.

წამოიყვანა ციცამ კოჭლი თაგვი და მოიყვანა ბიჭთან. ადგნენ და წავიდნენ ოთხივენი. წინ კოჭლი თაგვი მიდიოდა და გზას უჩვენებდა. ასე იარეს კარგა ხანს და ბოლოს ერთ თვალუწვდენელ ზღვას მიადგნენ. თაგვმა უთხრა ბიჭს:

— ის კუნძული, რომელზეც შენი სასახლე დაეშვა, ამ ზღვის შუაგულშია მოქცეული, მაგრამ იქამდე რით მივიდეთ, როცა ერთი პაწია ნავიც არა გვაქვსო.

— იქამდე მიყვანა ჩემზე იყოს, — თქვა ძაღლმა, — ჩემი ჯილაგი თევზებს უტოლდება ცურვაში და კუნძულამდე მისვლა როგორ გამიჭირდება. თქვენ მარტო ზურგზე შემასხვდით და ბალანში მაგრად ჩამეჭიდეთ, რომ არ გადმოცვიდეთო. — შეასხდნენ ძაღლს ზურგზე ციცა და თაგვი და შეცურეს. ბიჭი ნაპირზე დატოვეს და დაუბარეს:

— შენ არ შეწუხდე, სადაც იქნება და არ იქნება, ვიპოვით იმ კუნძულს და შენს დანაკარგს უკლებლივ დაგიბრუნებთო.

ბევრი დავიდარაბა გადახდათ თავს ძაღლსა და იმის „მგზავრებს“, მაგრამ ზღვა უხიფათოდ გადაცურეს და კუნძულზე გავიდნენ. ძაღლი ზღვის პირას დარჩა, თაგვი და ციცა კი სასახლისაკენ წავიდნენ. წასვლისას ძაღლმა უთხრა:

— პირველ რიგში ნატვრის თვალის ხელში ჩაგდებას ეცადეთ, ის რომ გვექნება, მერე ყველაფერი ადვილიაო.

წავიდნენ კოჭლი თაგვი და ციცა და მიადგნენ სასახლეს. მაგრამ ყველა კარი და ფანჯარა მაგრა დაკეტილი დაუხვდათ. მაშინ ციცამ უთხრა თაგვს:

— მეტი გზა არაა, სადმე ხვრელი უნდა გამონახო, სასახლეში მარტოკა შეხვიდე და გაიგო, სად ინახება ნატვრის თვალიო.

თაგვმა მოურბინა ირგვლივ სასახლეს და ერთ-ერთი ზღურბლის ქვეშ იპოვა პატარა ნაჩვრეტი. შეძვრა შიგ და მთელი სასახლე ძირის-ძირობამდე გადაჩხრიკა, სარდაფის ბნელ კუნჭულებშიც კი შეიხედა, მაგრამ ნატვრისთვალი ვერსად იპოვა. გამოძვრა ისევ ზღურბლის ქვეშიდან და ციცას უთხრა:

— ბატონო, ციცავ, სასახლეში მარტო ერთი კაცი და ერთი ქალია, ბევრი ვეძებე, მაგრამ ნატვრისთვალის ვერსად დავინახე.

— უსათუოდ კაცს ექნება დამალული, — თქვა ციცამ და თავს უბრძანა, — შეძვერი ისევ და იმ კაცს უთვალთვალე, სანამ არ დაინახავ, საიდან იღებს და სად ინახავს ნატვრისთვალს, გარეთ არ გამოხვიდეთ.

შეძვრა კოჭლი თავი ისევ სასახლეში, ამოეფარა ტანის ფეხს და დაუწყო კაცს თვალთვალი. შუადღე რომ გადავიდა, ქალი და კაცი სადილზე დასხდნენ. კაცმა ჭამის წინ პირიდან ნატვრისთვალის გამოიღო და სუფრაზე დაიდო. თავგმა ყველაფერი დაინახა, საჩქაროდ გამოვიდა გარეთ და ციცას მოახსენა:

— ბატონო ციცავ, ნატვრისთვალის კაცს პირში აქვს შენახული.

ციცა ცას ეწვია სიხარულით, ჯერ გაიქცა-გამოიქცა, რამდენჯერმე ყირამალა ამოტრიალდა ჰაერში, ერთხელ დაიკრუტუნა კიდევ და თავს უთხრა:

— რაკი ადგილი გავიგეთ, სადაც ინახება, ახლა გამოტანა ადვილია. შედი ისევ შიგნით, შეიპარე სამზარეულოში და კუდი. ჯერ ცეცხლზე მოიტრუსე, მერე ძმარში ჩაყავი და ღამე რომ დაეძინებათ, კაცს ცხვირში შეუყავი. კაცი დააცემინებს და ნატვრისთვალის პირიდან წამოვარდება. შენ დასტაცე პირი და გამოიქეცი.

თავი შეძვრა ისევ სასახლეში და როგორც ციცამ დაარბია, ისე მოიქცა. საღამოს, როცა კაცს პირველი ძილი გაუყინდა, თავი მიეპარა და ძმრით დასველებული, გატრუსული კუდი ცხვირში შეუყო. კაცს დააცემინა და ნატვრისთვალის წამოვარდა. თავგმა დაავლო პირი, მოურბენინა ციცას და წინ დაუდო.

ციცა ახლა მთლად გადაირია სიხარულისაგან, იხტუნა ჰაერში, იტრიალა, მერე დაავლო პირი ნატვრისთვალს. თავი ზურგზე შეისვა და სანაპიროსაკენ მოკურცხლა. ნატვრისთვალის ძაღლს წინ დაუგდო და ხმამალა შესძახა:

— აი ძმობილო, ვიპოვეთ ჩვენი საძებარი!

უნდა გენახათ ძაღლის სიხარული, დაავლო პირი ნატ-

გრისთვალს და გაიქცა და გამოიქცა, შეტოპა ზღვაში, გადაახტა ბუჩოებსა და რამდენჯერმე ზურგზეც გადაკოტრი-  
ალდა. როცა გული იჯერა, თაგვსა და ციცას უთხრა:

— აბა შემასხედით ზურგზე და საჩქაროდ გავსწიოთ ჩვე-  
ნი კეთილი ძმობილისაკენო.

კატამ უთხრა:

— მოდი მაგ ნატვრისთვალს მე ჩავიდე პირში, თორემ  
შენი ამბავი რომ ვიცი, ვაითუ ვერ მოითმინო, გზაზე თვე-  
ზებს შეუყეფო, ნატვრისთვალი პირიდან გადმოგივარდეს და  
დაგვეკარგოსო. — მაგრამ ძაღლმა არ დაუჯერა და პირობა  
მისცა, მთელი ქარავანიც რომ დავინახო, კრინტს არ დაგ-  
ძრავო. — შეისხა ზურგზე ისევ ციცა და თაგვი და შეცურდა  
ზღვაში. ის იყო, ნაპირს უახლოვდებოდნენ, რომ ძაღლს ერ-  
თი ჭრელი თევზი აეკვიატა და საშველი აღარ მისცა — ხან  
უკან აედევნებოდა, ხან წინ გაუცურებოდა და გზას აღარ  
აძლევდა. ძაღლმა ითმინა, ითმინა, მაგრამ ბოლოს ველარ  
მოითმინა და შეუყეფა. გამოვარდა ნატვრისთვალი პირიდან  
და სიღრმისაკენ წავიდა. თევზი გამოეკიდა, დაეწია და გა-  
დაყლაპა.

დაღონდნენ ძმობილები, უფრო ძაღლი შეწუხდა, — ზღა  
პირით შევსვდე ჩვენს კეთილისმყოფელსო, და ტირილი დაი-  
წყო. ციცამ ჯერ უსაყვედურა, რომ მისი სიტყვა არ გაიგო-  
ნა, მერე უთხრა:

— ნუ გეშინია, ნაპირზე რომ გავალთ, მე წავალ და იმ  
ნატვრისთვალს უპოვნელს არ დავტოვებო.

გავიდნენ ნაპირზე და უთხრეს ბიჭს, რაც დაემართათ.  
ბიჭმა ანუგეშა, ნუ დარდობთ, ალბათ ღმერთს ასე ენება და  
რას ვიზამთო.

მაგრამ ციცამ არ დაუჯერა.

— არა, ძმობილო, — უთხრა ბიჭს, — მე ჩემი სიტყვის  
პატრონი ვარ და უნდა ავასრულო კიდევც. თქვენ აქ დამიცა-  
დეთ, მე წავალ და მალე მტერი მოგიკვდეთ, მალე ის ნატვ-  
რისთვალი აქ მოვიტანოო.

წავიდა ციცა, დაჰყვა ზღვის ნაპირ-ნაპირ და მივიდა მე-  
თევზებთან. მეთევზეებს გაუხარდათ, ქოხში ციცა გვეყოლე-



ბა და თავეები ველარ გაიჭაჭანებენო, მოეფერნენ და მოხარა  
შული თევზით გაუმასპინძლდნენ.

დარჩა ციცა მეთევზეებთან, მაგრამ საკვირველი ის იყო,  
რომ მოხარულ თევზს ისერიგად არ ეტანებოდა, როგორც  
შიგნეულსა და კუჭ-ნაწლავს. მეთევზეებს სულ ხელებში შეჭ-  
ყურებდა, და როცა თევზს გამოწეულავდნენ, გადაყრილ კუჭ-  
ნაწლავში იქექებოდა.

— ასეთი კეთილსინდისიერი ციცა მეორე არ იქნება, —  
ამბობდნენ მეთევზეები, — ხორცს პირს არ აკარებს და მარ-  
ტო კუჭ-ნაწლავით იკვებებაო. — რა იცოდნენ, რომ იმ კუჭ-  
ნაწლავში ნატვრისთვალს დაექებდა.

ერთ დღეს მეთევზეებმა სწორედ ის ჭრელი თევზი დაი-  
ჭირეს, რომელმაც ნატვრისთვალი გადაყლაპა. ციცამ და-  
ნახვისთანავე იცნო თევზი და გამოწელეს თუ არა, მაშინვე  
გადაყრილ ნაწლავებს მივარდა. გადაატრიალ-გადმოატრია-  
ლა, ასო-ასოდ დაგლიჯა და ბოლოს იპოვა, რასაც ეძებდა.  
დაავლო პირი და ისე მოკურცხლა, რომ მეთევზეებმა უკანაც  
ველარ მოახედეს. მივიდა თავის ამხანაგებთან, დაუდო ბიჭს  
წინ ნატვრისთვალი და უთხრა:

— აჰა, ძმობილო, მოგიტანე შენი ნატვრისთვალი და  
ახლა თვითონ იციო.


ბიჭს უზომოდ გაუხარდა, რომ მტრის ჯავრი არ ჭამა და  
ციცას ხან ერთ თვალში ჰკოცნიდა, ხან მეორე თვალში. მე-  
რე შეისროლა თავისი ნატვრისთვალი მალლა და უთხრა:

— ჩემო ნატვრისთვალო, ნატვრით ვინატრებ და ნატვ-  
რა შემისრულე — ის ჩემი სასახლე და ცოლი ისევ ძველ ად-  
გილზე დამიბრუნე, ხოლო სოვდაგარი კუნძულზე დატოვე,  
რომ შიმშილით ამოხდეს სულიო.

ბიჭს ნატვრა შეუსრულდა, შინ რომ მივიდა, სასახლე  
ისევ ძველ ადგილზე დახვდა. ცოლიც შინ იყო, გამოეგება  
ამდენი ხნის უნახავ ქმარს და გადაეხვია.

ბიჭმა ძაღლი, კატა და თავიცი თავისთან დაიტოვა და  
დღესაც ბედნიერად ცხოვრობს.

ჭირი — იქა, ლხინი — აქა,  
ქატო — იქა, ფქვილი — აქა.



## და და ძმა

იყო და არა იყო რა, ღვთის უკეთესი რა იქნებოდა, იყო ერთი ხელმწიფე და ჰყავდა ქალ-ვაჟი. და-ძმა ისე ჰგავდა ერთმანეთს, რომ ხშირად მშობლებიც კი ვერ არჩევდნენ. გოგონა ათი წლისა რომ გახდა, ხელმწიფეს გველეშაპი შეუჩნდა, გინდა თუ არა, შენი მზეთუნახავი ქალიშვილი ცოლად უნდა მომცეო. ხელმწიფე უარით ისტუმრებდა, მაგრამ გველეშაპი არ ეშვებოდა, ბოლოს დაემუქრა, ან ქალი მომეცი, ან არადა, მთელს შენს ქალაქს შევსანსლავ და შენც ზედ მიგაყოლებო. ხელმწიფეს შეეშინდა და დათანხმდა, ოღონდ დრო დაუთქვა, ორი წლის შემდეგ მოდი და გაგატანო.

ხელმწიფემ ერთი წლის მანძილზე პიტალო ქვის ციხე ააშენებინა, რკინის კარი შეაბმევინა და ქალი იქ დამალა, ხოლო ვაჟი ქალურად გამოაწყო. მოვიდა წლის თავზე გველეშაპი და უთხრა ხელმწიფეს, პირობაზე როგორა ხართ? მზადა ვართ — უთხრა ხელმწიფემ, გამოიყვანა ქალურად ჩაცმული ვაჟი და მისცა გველეშაპს.

წამოიყვანა გველეშაპმა ქალურად ჩაცმული ვაჟი და ცხრა მთა გადმოატარა. ერთ უღრან ტყეში დაულამდათ, დაანთეს ცეცხლი და დადგნენ ღამის გასათევად. გველეშაპი დააკვირდა ბიჭს ცეცხლის სიწათლეზე და დაეჭვდა, იმ სულძაღლმა ხელმწიფემ ქალის მაგივრად ვაჟი ხომ არ შემომაცეუაო. გასინჯა და მართლა ბიჭი არ აღმოჩნდა! განრისხდა გველეშაპი, აბა, თუ ეგრეა, ახლა მე მიყუროსო, — თქვა გაბოროტებულმა, ვაჟი ტყეში დატოვა, დაჰკრა ფეხი და პირა-

დაპირ ხელმწიფესთან გასწია. ხელმწიფე და მისი ჯალაბობ გადაყლაპა, მერე მიადგა ბიტალო ქვის ციხეს და დაუწყო კბილით ღრღნა, მაგრამ ვერაფერი დააკლო. ბოლოს გაჯავრებული ისევ ხალხს დაერია და სულ მუსრი გაავლო.

ამის შემდეგ გველესაბი ქალაქს აღარ მოშორებია, მოვიდოდა ყოველდღე, ეომებოდა ცხრაკლიტულ ციხეს და რომ ვერაფერს დააკლებდა, გულის ჯავრს ხალხზე იყრიდა, მისდგებოდა ერთ უბანს, მცხოვრებლებს გადაყლაპავდა და წავიდოდა.

ხელმწიფის ვაჟი კი, გველესაბმა ტყეში რომ დატოვა, მთელ დღეებს ტირილში ატარებდა. დადიოდა მშიერმწყურვალი, მაგრამ ტყეს არც ბოლო უჩანდა, არც დასასრული.

ერთ დღეს ტყეზე ერთმა მდიდარმა სოვდაგარმა გამოიარა, ნახა უპატრონო ყმაწვილი და ღმერთს მადლობა შესწირა, — შვილი არა მყავდა, ამას წავეყვან და ვიშვილებო. შემოისვა ცხენზე ყმაწვილი და გამოიყვანა ტყიდან. იარეს მთელი დღე და მზის ჩასვლისას ერთ ქალაქს მიადგნენ. ქალაქგარეთ სოვდაგარს ერთი ბალახიანი მინდორი მოეწონა, ჩამოხადა ჯორ-აქლემებს და ღამის გასათევად დაბინავდა.

ის ქალაქიცა და მინდორ-ველიც თურმე ერთი ხელმწიფის კუთვნილება ყოფილიყო. ხელმწიფეს ერთი შვილი ჰყოლოდა, თურმე ათი-თორმეტი წლისა მოიყარა, მაგრამ ტირილი ვერ მოიშალა, ცისმარე დღეს აკენის ბავშვივით ტიროდა, უცვლიდნენ ძიძებს, მომვლელებს, მაგრამ არაფერი შეელოდა: გაიღვიძებდა თუ არა, მორთავდა ტირილს და მერე იმისი საშველი აღარ იყო. შვილის შემყურე ხელმწიფე და დედოფალი გაჩენის დღეს იწყევლიდნენ.

ამ ღამესაც ეს ხელმწიფის შვილი ჩვეულებრივ ტიროდა: დილას ძიძა შეუცვალეს. ახალმა ძიძამ ბიჭი ქალაქგარეთ გაიყვანა, იქნებ გაერთოს და აღარ იტიროსო. ატარა ძიძამ მტირალი ბიჭი და ბოლოს სოვდაგართან მიიყვანა. ხელმწიფის შვილმა თავისი ტოლი ბიჭი რომ დაინახა, ტირილი შეწყვიტა. დაიწყეს ბიჭებმა ერთად თამაში — ხან პეპლებს დასდევდნენ, ხან ყვავილებს კრეფდნენ, ხან ერთმანეთს ეჭიდავებოდნენ და ბალახში გორაობდნენ. ყმაწვილი უფლის-

წული ისე გაერთო თავის კბილად ბიჭთან, რომ ტირილი სრულიად გადაავიწყდა.

დაბრუნდა სალამოს შინ ძიძა და ხელმწიფეს ყველაფერი უამბო:

— თქვენს მინდორში ერთ სოვდაგარს შეუსვენია, თან ერთი თქვენი შვილის ტოლი ბიჭი ახლავს. უფლისწული ისე გაერთო იმ მშვენიერ ყმაწვილთან თამაშით, რომ ტირილი აღარც კი მოჰგონებიაო.

ხელმწიფემ მაშინვე ნაზირ-ვეზირები მოიხმო და სოვდაგარის მოყვანა უბრძანა. წავიდნენ ნაზირ-ვეზირები და მოყვანეს სოვდაგარი.

ხელმწიფემ უთხრა: — ერთი სათხოვარი მაქვს და უნდა ამისრულო.

სოვდაგარმა თავი მდაბლად დაუკრა და მოახსენა:

— დიდებულო ხელმწიფე, ბრძანეთ და თქვენი ხმალი და ჩემი კისერიო.

ხელმწიფემ უთხრა:

— ასე და ასე არის ჩემი შვილის საქმე, — თითქმის დაჯაყაცდა და ტირილი ვერ მოვაშლევინეთ. დღეს შენს შვილთან ყოფილა და გაჩუმებულა, ამიტომ, რაც გინდა, მთხოვე, ოღონდ შენი შვილი დამითმეო.

სოვდაგარმა მოახსენა:

— ის ყმაწვილი ჩემი შვილი არ არის, ტყეში უპატრონოდ მიგდებული ვიპოვე, მაგრამ ჩემიც რომ იყოს, ხელმწიფეს უარს როგორ ვკადრებო.

ხელმწიფემ სოვდაგარი უხვად დაასაჩუქრა და ხელმწიფის შვილი სასახლეში დაიტოვა. იმ დღიდან ხელმწიფის შვილი ერთხელაც აღარ ატირებულა. ამის გამო ხელმწიფემ ყმაწვილიც შვილივით შეიყვარა და ღვიძლ შვილად მიიღო. სახელებიც, როგორც ღვიძლ ძმებს შეჰფეროდათ, ერთნაირი დაარქვა, თავის შვილს — ვეფხვა, ხოლო ნაშვილებს — ჯიქა.

დაიზარდნენ ბიჭები და ისეთი ვაჟკაცები დადგნენ, რომ ჭათი მჯობი დედამიწის ზურგზე არ მოიპოვებოდა. დღისით ცხენოსნობასა და ხმალ-შუბის ხმარებაში გარჯიშობდნენ, საღამოთი კი სახელმწიფო საქმეების გარჩევას სწავლობდნენ,

ერთ დღეს ძმებმა თქვეს: მოდი, გამოვცადოთ ჩვენი თავი, რანი ვართ და რა შეგვიძლიაო, და ხელმწიფეს უთხრეს: — გავვიკეთებინე ერთი თორმეტფუთიანი რკინის ბურთი, ჩვენი თავი უნდა გამოვცადოთო.

ხელმწიფემ თხოვნა დაუყოვნებლივ აუსრულა, ჩამოასხმევინა მჭედელს თორმეტფუთიანი ბურთი, წააღებინა ნაზირ-ვეზირებს და ძმების საჯირითო მოედანზე დაადებინა. გამოვიდნენ დილას ძმები და თორმეტფუთიანი ბურთი მუშტაქვასავით აათამაშეს.

რაკი თავის იმედი აიღეს, ისევ თქვეს: — სულ ასე ერთ ადგილას ტრიალი რა ხელს მოგვცემს, მოდი, წავიდეთ, ქვეყანაც გავიცნოთ და ჩვენი თავიც გავაცნოთო. — წავიდნენ ხელმწიფესთან და უთხრეს:

— ჩვენთვის ოც-ოცფუთიანი ჯაჭვის პერანგები და თორმეტფუთიანი მშვილდისრები ჩამოასხმევინე, უნდა წავიდე და ქვეყნიერება გავიცნოთო.

ხელმწიფემ ეს თხოვნა სიხარულით შეუსრულა — ჭაბუკისათვის ქვეყნიერების ნახვას რა ჯობიაო, და მშვილდისარიც და პერანგებიც მჭედელს მაშინვე ჩამოასხმევინეს. რაიცვეს ბიჭებმაც პერანგები, გადაიკიდეს მშვილდ-კაპარჭები, გამოემშვიდობნენ დედ-მამას და გაუდგნენ გზას.

იარეს, იარეს და ერთ ზღვისპირას მივიდნენ. ნავსადგურში აფრადაშვებული ხომალდი იდგა. ბიჭებმა ერთი ხომალდი იქირავეს და ზღვის მეორე ნაპირზე გასვლა მოინდომეს. ორ დღეს მშვიდობიანად იცურეს, ზურგის ქარი ქროდა და ხომალდი გაშლილ ზღვაზე შეუფერხებლად მისრიალებდა. მესამე დღეს ამინდი შეიცვალა, ქარიშხალი ამოვარდა და ზღვა ააბობოქრა, აზვირთდა მთისოდენა ტალღები და ხომალდი ნაფოტებად აქცია. ძმებს თითო-თითო ფიცარიდან შერჩა ხელთ, მაგრამ ზღვამ ერთი ერთ მხარეს გაიტაცა, მეორე—მეორე მხარეს. უკანასკნელად იმის თქმალა მოასწორეს, რომ თუ ცოცხლები გადავრჩით, სამ წელიწადს ნურც ცოლებს მოვიყვანთ, ნურც დავსახლდებით და მხოლოდ ერთმანეთი ვეძებოთო.

ჯიქა ზღვამ მალევე გარიყა ნაპირზე, ვეფხვა კი ატარა, ატარა და ერთ თვალშეუდგამ კლდეს მიაყენა. ვეფხვა მოე-

ჭიდა კლდეს, გამოტყესა მუშტით საფეხურები და ავიდა კლდის თავზე. დაღლილმა ცოტა შეისვენა, მერე ადგა და ჯიქას საძებნელად გასწია.

იარა ვეფხვამ, იარა და ბოლოს ერთ უკაცრიელ ქალაქს მიადგა. ქალაქი მდიდარია, დუქან-ბაზარი სავსეა ძვირფასი საქონლით, მაგრამ კაცის ჭაჭანება არსად ჩანს. გაიარა ვეფხვამ და მივიდა ცხრაკლიტულ ციხესთან. იფიქრა, ამ ქალაქის ხალხი უთუოდ აქ იქნება შეკეტილიო, ჰკრა წიხლი კარებს და შეამტვრია. შევიდა ციხეში და ერთი ნამტირალევი ქალი იპოვა. ეს ქალაქი სწორედ ჯიქას მამის სატახტო ქალაქი იყო, ეს არ იცოდა და ქალს ვინაობა და ქალაქის უკაცრიელობის მიზეზი გამოჰკითხა. ქალმა უთხრა:

— ეს ქალაქი ჩემი გულისთვის არის აკლებული გველეშაპისაგან. მას ჩემი ცოლად შერთვა უნდოდა, მაგრამ მამაჩემმა არ მიმცა და ქალაქი ამის გამო აი ასე გააპარტახა. ახლაც ყოველდღე მოდის, ებრძვის ჩემს ცხრაკლიტულს, მაგრამ ვერაფერს აკლებს. ახლა საცაა მოვა და ველარც გადავრჩებით, რადგან შენ რკინის კარები დაგიმტვრევია და აღარაფერი დაიჭერს. მე ცოლად წამიყვანს, ხოლო შენ გადაგყლაპავსო.

ვეფხვამ ქალი ანუგეშა:

— შენ ოღონდ ცოტა დამასვენე, დაღლილი ვარ, ხოლო როცა გველეშაპი გამოჩნდება, გამალვიძე და მე ვიცი და იმანო.

ქალმა კალთაში ჩაადებინა თავი. ვეფხვას მაშინვე ჩაეძინა. ცოტა ხნის შემდეგ გამოჩნდა გველეშაპი. — მიხდორში ნისლივით მოცურავდა და პირიდან ცეცხლს ჰყრიდა. ქალმა შეანჯღრია ვეფხვა, მაგრამ ვერ გაალვიძა და ტირილი დაიწყო. ერთი ცრემლი ვეფხვას ლოყაზე დაეცა და ამოსწვა, ვეფხვამ ახლა კი გაახილა თვალები და ქალს ჰკითხა:

— რატომ ტირი, უკვე მოდისო?

— მოდისო, — მიუგო ქალმა და შორს ცეცხლის კვამლში გახვეული შავი ურჩხული დაანახვა.

ვეფხვა წამოდგა. — მტერს დახვედრა უნდა და არა ლოდინიო, — უთხრა ქალს, თორმეტფუთიანი მშვილდ-ისარი

მომართა და გველეშაპის შესახვედრად გაეშურა. გველეშაპმა დაინახა და სიხარულით წამოიძახა, — კარგია, კიდევ ვიღაც დამრჩენია შესაჭმელი და ისიც თავის ფეხით მოდისო. ამაზე ვეფხვამ უპასუხა:

— ჰაი, შე მყრალო, შენა, ახლოს მოდი და პასუხს აქ გაგცემ, უშნო მყეფარივით, რა შორიდან იყეფებიო.

გველეშაპმა ძალიან იწყინა ვეფხვას პასუხი, დააღო პირი და პირდაპირ გამოექანა, ვეფხვამ მშვილდს ისარი მოარგო, სტყორცნა გველეშაპს და შუაზე გააწყვეტინა. გველეშაპმა სული დალია, ხოლო სისხლი ადიდებულ მდინარესავით გაიღვარა. მობრუნდა ვეფხვა ქალთან და უთხრა:

— შენი მტერი მინდოროთ გდია და მისი სისხლი ზღვას ერთვისო.

გაიხედა ქალმა, დაინახა მკვდარი გველეშაპი და სიხარულისაგან სულ ცეკვა-თამაში დაიწყო, მერე გადაეხვია ვეფხვას და უთხრა:

— რაკი ეს სატანჯველი მომაშორე, ახლა გინდა ქმარი იყავი, გინდა ძმად გამიხდიო.

— სამ წლამდე ვერც ქმრობას შეგპირდები, ვერც — ძმობას, — უთხრა ვეფხვამ — სამი წლის შემდეგ კი, რომელსაც შენ ირჩევ, ის ვიქნებიო.

დარჩა ამ დღიდან ვეფხვა ქალთან, მაგრამ ქალს ახლოს არ გაჰკარებია. კარებთან წეებოდა. ქალი საჭმელს უმზადებდა და ტანსაცმელს უკერავდა, ვეფხვას კი ნანადირევი მოჰქონდა და ქალს უზრუნველად აცხოვრებდა.

ქალს ერთი გასაღები ჰქონდა და სულ თან ატარებდა, მხოლოდ დაწოლის წინ იხსნიდა, მაგრამ მაშინაც თავის სახელსაქმო ტაგრუცში მალავდა. ვეფხვამ ეს შეამჩნია, იფიქრა, ეს ქალი მე არაფერს მღალატობდესო და ერთხელ, როცა ქალს ეძინა, ადგა და ტაგრუციდან გასაღები ამოიღო. მოსინჯა და ერთ-ერთ კარს მოერგო. გააღო ოთახი და შევიდა. ოთახი ცარიელი იყო, მხოლოდ ერთი ქალის პერანგი ეკიდა და მზესავით ანათებდა. ვეფხვამ იფიქრა, ეს ღამით გამინათებსო, დაკეცა პერანგი და უბეში ჩაიღო.

მეორე დღეს სანადიროდ რომ წავიდა, პერანგიც თან წაიღო. ერთ წყაროსთან შეისვენა, ხალათი გაიხადა, პერანგი

ბალახებზე დადო და პირი დაიბანა. დაინახა კაჭკაჭმა ბრჭყვიალა პერანგი, ჩამოფრინდა ხიდან, დასტაცა ნისკარტი და წაიღო. ვეფხვა გაედევნა კაჭკაჭს და ბევრი უკივლუჭყვივლა, მაგრამ ველარ გააგდებინა. დაბრუნდა შინ დაღონებული, ქალმა უგუნებობა შეატყო და ჰკითხა:

— ჩემო მხსნელო და მფარველო, რადა ხარ დაღონებულიო?

ვეფხვას ჯერ არ უნდოდა თქმა, მაგრამ ბოლოს გამოუტყდა: ასე და ასეა ჩემი საქმე, შენი პერანგი წავიღე თან გზის გასანათებლად და კაჭკაჭმა მომტაცაო.

პერანგის დაკარგვამ ქალიც დაადარდიანა, იმ პერანგს ხელში ვინმე ჩაიგდებს და ახალი მტერი გაგვიჩნდებაო.

მართლაც, კაჭკაჭმა ატარა პერანგი და, როცა მოიწვინა, ზღვის გაღმა ერთ მინდორში ჩააგდო. იმ მინდორში ხელმწიფის მწყემსები ნახირს აბალახებდნენ. ღამით ერთი მწყემსი დაკარგულ ძროხას დაეძებდა, ძებნაში ამ განათებულ პერანგს წააწყდა, მაშინვე უბეში დამალა და ხელმწიფეს საჩუქრად წაუღო. ხელმწიფეს ძალიან გაუხარდა უცნაური საჩუქარი და მენახირე გულუხვად დაასაჩუქრა. მერე იფიქრა, ეს პერანგი რომ ასეთი კარგია, ამის პატრონი რაღა იქნებაო, და ბრძანება გამოსცა:

— ვინც ამ პერანგის პატრონ ქალს მომიყვანს, არნახულ საჩუქარს მიიღებსო.

ბევრს უნდოდა ხელმწიფის გულის მოგება და დიდი საჩუქარი, მაგრამ მისი ასრულება თავს ვერავენ იღო. მაშინ მოვიდა ხელმწიფესთან ერთი გრძნეული ბებერი და მოახსენა:

— დიდებულო ხელმწიფე, მომეცით საგზლად ერთი თონე პური, ერთი ჩაფი ღვინო, ერთი ფუთი დამარილებული ხორცი, ერთი ბოთლი ბანგი, ერთი ცოცხი, ერთიც მოზრდილი ქვევრი და იმ ქალს, მალე მტერი მოგიკვდეთ, მალე აქ მოგიყვანთო.

მისცა ყველაფერი ხელმწიფემ და ბებერიც წავიდა. მიიტანა ბებერმა ქვევრი ზღვის პირას, ჩაალაგა შიგ საგზალი, თვითონაც შიგ ჩაჯდა, შეულოცა და ზღვაში აფრიანი ხომალდით შეაცურა. გავიდა ზღვის მეორე ნაპირზე. გამოა-



გორა ქვევრი მშრალზე, დააყენა ისეთ ადგილზე, რომელზეც  
დაც სანადიროდან დაბრუნებულ ვეფხვას უნდა გამოეველო,  
და დაიწყოს ტირილი.

მართლაც არ გასულა დიდი ხანი, რომ სანადიროდან  
მომავალი ვეფხვაც გამოჩნდა, დანახა მტირალი ბებერი,  
მივიდა და ჰკითხა:

— დედი, რა ამბავია შენს თავს, რატომ ტირიო?

ბებერი უფრო შესაბრალისად აკრუსუნდა:

— რაღა რა მატირებს, შვილო, სალოცავში მივდიოდი  
და ქვევრით ტკბილი ზედაშეც მომქონდა. გზაში ურემი გა-  
დამიბრუნდა და ზღვაში ჩავვარდი, ზღვამ ახლა აქ გამომრი-  
ყა და აღარ ვიცი საით წავიდე ან თავი რით დავირ-  
ჩინო.

ვეფხვას შეეცოდა დედაბერი და უთხრა:

— ნუ ტირი დედი, წამოდი ჩემთან, მე დედა არა მყავს  
და ღვიძლ დედაზე უკეთ შეგინახავო.

ბებერსაც ეს უნდოდა. წაიყვანა ვეფხვამ და მიიყვანა  
შინ. ქალმა შეხედა ბებერს და ვეფხვას უჩურჩულა:

— ნეტავი კი არ მოგეყვანა, გული რაღაც ცუდს მიგრძ-  
ნობს, ამ ბებერმა არ გვიღალატოს და რაღაც სიფათს არ  
გადაგვყაროს.

ვეფხვას გაეცინა:

— გველეშაპმა ვერაფერი მიყო და დედაბერმა რა უნდა  
მიყოსო.

დაიწყეს ერთად ცხოვრება. ეს ბებერი. მართლაც ნამ-  
დვილ დედასავით ექცეოდა ორივეს. ქალს არა თუ ეჭვი გაუ-  
ფანტა, თავიც კი შეაყვარა. როცა დარწმუნდა ბებერი, რომ  
ყველაფერში მენდობიანო, ერთ დღეს კარგი სადილი გააკე-  
თა და ქალ-ვაყს უთხრა:

— მოდით, შვილებო, ერთი კარგი ქეიფი გავწიოთო.

დათანხმდნენ ქალი და ვეფხვაც და მოიტანეს ღვინო.  
დასხდნენ და დაიწყეს ღვინის სმა. დედაბერი თვითონ უვ-  
სებდა ჭიქებს, ამასობაში ვეფხვასა და ქალს ბანგი შეაპარა  
და დააძინა.

აიყვანა ბებერმა ქალი, ჩამოიყვანა ძირს და ქვევრში  
ჩასვა, თვითონაც შიგ ჩაჯდა. შეულოცა და ისევ ზღვაში

შეაცურა. გზაზე ქალს გამოელვინა და ტირილი დაიწყო. დედაბერმა შეუტია, გაჩუმდი, თორემ გკრავ ხელს და ამ აბობოქრებულ ზღვაში გადაგაგდებო. რაღას იზამდა ქალი, შეშინდა და ბედს დამორჩილდა.

გამოიყვანა დედაბერმა ქალი ნაპირზე და მიუყვანა ხელმწიფეს. ხელმწიფემ დიდად გაიხარა, ბებერი სასახლეში დააბინავა და ქალზე იმავე დღეს ჯვარის დაწერა მონინდომა, მაგრამ ქალმა სიანხლოვეს არ გაიკარა, და უთხრა:

— თუ ჩემი ცოლობა გინდა, ორი წელი და ორი თვე უნდა მადროვო და მერე წამოგყვებიო. ვეფხვას მოცემულ სამი წლის პირობას მხოლოდ ეს დრო აკლდა. ხელმწიფე დაყაბულდა და ქალი ცალკე ოთახში ჩაიკეტა.

მეცხრე დღეს გამოელვინა ვეფხვას. მიიხედ-მობიხედა, აღარც სადმე ქალია და არც დედაბერი. გაახსენდა ქალის სიტყვები, გვიღალატებსო, და მიხვდა, რაც დაემართა, შემოიკრა თავში ხელი, მაგრამ წუსილით რაღას უშველიდა. ადგა, ჩაიცვა ოცფუთიანი ჯაჭვის პერანგი, აიღო თორმეტფუთიანი მშვილდ-ისარი და წავიდა ქალის საძებნელად. მივიდა ისევ იმ წყაროსთან, სადაც კაჭკაჭმა პერანგი მოსტაცა, ჩამოჯდა და დაღონებული მიწას ჩააშტერდა:

სად იყო, სად არა, უცბად ის კაჭკაჭი მოფრინდა. შეატყო დაღონება და ჰკითხა:

— რა იყო, რამ დაგაღონაო?

ვეფხვამ იცნო კაჭკაჭი. შენგან მჭირს რაცა მჭირსო, — შესძახა გაჯავრებულმა და მშვილდ-ისარი დაუმიზნა.

კაჭკაჭი შეშინდა და ვეფხვას შეეხვეწა:

— ოლონდ ნუ მომკლავ და ქალსაც და პერანგსაც ორივეს გაპოვინებო.

— აბა, მას გამიძეხი და მაპოვინეო, — უთხრა ვეფხვამ.

გაუძღვა კაჭკაჭი და გაჰყვა ვეფხვაც. მიფრინავს კაჭკაჭი და მისდევს ვეფხვა. იარეს წელიწადი, იარეს მეორე წელიწადიც და გავიდნენ იმ მინდორში, სადაც კაჭკაჭმა მანათობელი პერანგი ჩამოაგდო. მინდორში ხელმწიფის რემა ბალახობდა და ირგვლივ მეჯოგეები იდგნენ. კაჭკაჭმა უთხრა ვეფხვას:

— ახლა მე აღარ გჭირდები. მიდი მეჯოგეებთან, ერთი

ცხენი იყიდე და პირდაპირ ქალაქში წადი, იქ ხელმწიფის სასახლეში შედი და ქალსაც და პერანგსაც იქ წახავო.

მოვიდა ვეფხვა მეჯოგეებთან და უთხრა:

— მგზავრი ვარ, ერთი ცხენი მომიყიდეთ და, რაც გიღირთ, გადამახდევინეთო.

მეჯოგეებმა ერთმანეთს თვალი უყვეს, მოდით, უხედნელი რაში რომ გვყავს, ის მივიდოთ, მაინც ვერ მოიხმარს, სადმე კლდე-ღრეში შეახეთქებს და ისევ უკან დაბრუნდება. ფულიც შეგვრჩება და ხელმწიფესთანაც პირნათლად ვიქნებიო.

— ერთი რაში გვყავს და, თუ გინდა, იმას მოგიყიდითო, — უთხრეს ვეფხვას.

ეს რაში ისეთი იყო, კაციშვილი ახლოს ვერ ეკარებოდა, მაგრამ ვეფხვას არ შეშინებია და ფასი ჰკითხა. მეჯოგეებმა ასი თუმანი დაუფასეს.

— ორასს მოგცემთ, — უთხრა ვეფხვამ, — ოღონდ კარგი უნაგირი დამიდგით და შვიდი მოსართავი მოუჭირეთო.

მეჯოგეებს უფრო გაუხარდათ, უნაგირიც უკანვე დაგვიბრუნდება და ასი თუმანი მოგებაც დაგვრჩებაო. გამოიყვანეს რაში და შეუკაზმეს. დაჰკრა ვეფხვამ ხელი და უნაგირზე მოახტა. აბა, შეჯდომა გამიბედესო! რაშმა ერთი ძლიერად დაიფრუტუნა, მოსწყდა ადგილს და ზეცაში აიჭრა, რომ მხედარი ცისთვის მიეჭყლიტა, მაგრამ ვეფხვა მაშინვე მუცელზე მოექცა. რაში ახლა დედამიწისაკენ დაეშვა, ვეფხვაც თვალის დახამხამების უმალ ისევ ზურგზე მოექცა. რაში ახლა კი დამორჩილდა და უთხრა:

— ძლივს ჩემი გუნების მხედარი გიშოვე. ახლა წუღარ გეშინია, გასწი საითაც მიდინარ და მეც შენი მშველელი ვიქნებიო.

წამოვიდა ვეფხვა და მოვიდა ხელმწიფის სატახტო ქალაქში. ჩამოხტა ერთი ბებერი დედაკაცის ეზოში და დაუძახა:

— დედი, გამოიხედე, სტუმარი არ გინდაო?

გამოვიდა დედაბერი და დარცხვენილმა ენის ბორძიკით ჩაილულლულა:

— სტუმარი როგორ არ მინდა, შვილო, ღვთისაა, მაგა

რამ რა გიყო, რომ არც შენი საკადრისი მაქვს რამე და არც ცხენის საჭმელიო.

— შენ მარტო თავშესაფარი მომეცი და სასმელი და საჭმელი ჩემზე იყოსო, — უთხრა ვეფხვამ.

დედაბერმა ცხენი თავლაში შეიყვანა და სტუმარს შინ შეუძღვა. ვეფხვამ ამოიღო ფულით გატენილი ქისა, მისცა დედაბერს და უთხრა:

— წადი, დედი, ბაზარში, სავახშმო რამე იყიდე და რაც მოგრჩეს, სულ შენი იყოსო.

წავიდა გახარებული დედაბერი, იყიდა რაც კი საჭირო იყო და გემრიელი ვახშამი გააკეთა. ვახშამს რომ მორჩნენ, ვეფხვამ ჰკითხა:

— რა ამბავია თქვენს ქალაქში, ახალი და უცნაური ხომ არაფერიაო?

— უცხო და უცნაური ის არის, — უთხრა დედაბერმა, — რომ ორიოდ წლის წინათ ჩვენმა ხელმწიფემ საიდლანაც ერთი მზეთუნახავი ქალი მოიყვანა, მის სანახავად სასახლეში ყოველდღე უამრავი ხალხი დადის, მაგრამ ქალი ცალკე ოთახშია ჩაკეტილი და არც ხელმწიფეს და არც სხვა ვინმეს ხმას არა სცემსო.

— ხელმწიფე ჯვარს როდის იწერსო? — ჰკითხა ვეფხვამ.

— ზეგ იწერს, ქალმა მოყვანისთანავე პირობა ჩამოართვა, რომ ორ წელიწადსა და ორ თვეს, ხელმწიფე ახლოს არ გაეკარებოდა. ეს ვადა სწორედ ზეგ თავდება და ჯვარისწერაც ზეგისთვის არის დანიშნულიო.

ვეფხვამ წამოიძრო თითიდან ბეჭედი, გაუკეთა თითზე დედაბერს და უთხრა:

— წაიღე ეს ბეჭედი და წადი ქალის სანახავად, როგორმე ისე მოახერხე, რომ ბეჭედი დაინახოს და, რასაც გეტყვის, მითხარიო.

— დიდებულებს არ ელაპარაკება და მე ღარიბ-ღატაკ დედაბერს რა ხმას გამცემსო, — უთხრა დედაბერმა.

— ამ ბეჭედს ისეთი თილისმა აქვს, რომ მუნჯსაც აალაპარაკებსო, — მიუგო ვეფხვამ და დედაბერი ხელმწიფის სასახლეში გაგზავნა.

წავიდა დედაბერი სასახლეში, ქალის ოთახთან მნახველები ჯგროდ მიმდგარიყვნენ და შიგნით მიიწვედნენ. შეერია დედაბერიც ხალხში და ოთახში რომ შევიდა, უცბად ყვირილი ატეხა, — ვაიმე, ხელი, ხელი მომტყდაო. თან ბეჭდიანი მარჯვენა მალლა ასწია და ქალს დაანახვა.

ქალმა იცნო ბეჭედი, მაშინვე ფეხზე წამოდგა და ხელმწიფეს უთხრა:

— ახლავე გარეთ გარეკე ეს ხალხი და შენც გარეთ გადი, ეს დედაბერი მარტომ უნდა გაესინჯო, ჩემი გულისთვის დაზარალდა და მე უნდა ვუშველოო.

ხელმწიფე ცას ეწია სიხარულით, რაკი ქალისაგან ხმის გაცემას ვლირსა და მნახველები იმავე წამს კარში გაიყვანა, მერე თვითონაც გავიდა და ქალი დედაბერთან დატოვა.

მარტონი რომ დარჩნენ, ქალმა დედაბერი გვერდით მოისვა და ჰკითხა:

— ეს ბეჭედი ვინ მოგცაო?

— ჩემთან ერთი ტურფა ყმაწვილი მოვიდა სტუმრად და იმან გამომატანა შენთანო, — მიუგო დედაბერმა.

ქალი ყველაფერს მიხვდა, ბებერი გულუხვად დაასაჩუქრა და მერე უთხრა:

— წადი და იმ შენს სტუმარს საიდუმლოდ უთხარი ზეგ ჯვარი უნდა დაიწეროს ხელმწიფემ ჩემზე და, შენ იცი, როგორ დამლოცავ-თქო.

დაბრუნდა შინ დედაბერი და ვეფხვას ყველაფერი უამბო,

— ახლა მე ვიციო, — თქვა ვეფხვამ, შევიდა თავის რაშთან და ჰკითხა: — ასე და ასეა ჩემი საქმე, ხელმწიფეს საქორწილოდ მთელი თავისი ჯარი სასახლეში ჰყავს შეკრებილი და რას მირჩევ, როგორ მოვიქცეო?

— შენ მაგრად შემკაზმე, შემაჯექი ზედ, ხმალი იშიშვლე და დანარჩენი მე ვიციო, — მიუგო რაშმა.

შეკაზმა ვეფხვამ რაში, მოახტა ზედ და გასწია სასახლისაკენ, შეერივნენ რაში და ვეფხვა ხელმწიფის ჯარს. ერთი ხმლით, მეორე — ტორებით და რაც გაჟლიტეს, გაჟლიტეს, რაც არა და ისე მიფანტ-მოფანტეს, რომ თავბედისა აღარაფერი გაეგებოდათ.

ხელმწიფემ სულ ცოფები ჰყარა და ჯარს შეკრება და

ბრძოლის გაგრძელება უბრძანა, მაგრამ საბრძოლო მოედანს სიახლოვეს ველარავინ გააკარა. მაშინ დაიძახა:

— მომგვარეთ ჩემი გოლიათი მებაღეო!

ხელმწიფეს ერთი გოლიათი მებაღე ჰყავდა და ერთგულადაც ემსახურებოდა, მაგრამ თვითონ ხელმწიფე არაფრად აგდებდა, როცა გაუჭირდა, მხოლოდ მაშინღა გაახსენდა და კაცი გაუგზავნა. გამოვიდა ტყაპუჭიანი მებაღე და ხელმწიფეს ჰკითხა, რას მიბრძანებთ?

ხელმწიფემ ვეფხვა დაანახვა და უთხრა:

— თუ აგე, იმ ფალავანს დაამარცხებ და მოკლავ, ჩემი სახელმწიფოს ნახევარს დაგიტომობო.

— ვცდი და, თუ ღმერთი შემეწია, იქნებ გავიმარჯვო, — უპასუხა მებაღემ და მოედნისაკენ წავიდა.

ვეფხვამ რაშით ქვეითთან შებრძოლება ითაკილა და თვითონაც ჩამოქვეითდა. მივიდა მებაღე და სტაცეს ხელი ერთმანეთს. ხან ერთია ძირს და ხან მეორე, ისეთი ამბავია, რომ დედამიწას სულ ზანზარი გაუდის. მებაღე გაცილებით ღონიერია და ვეფხვას ცოტა არ იყოს, სჯობნის, ვეფხვა გრძნობს მოწინააღმდეგის სიძლიერეს და ეუბნება:

— ვხედავ, რომ მჯობნი, მაგრამ იცოდე, როდესმე ჩემი ძმა ჯიქა შეგხვდება და ჩემს მორევას არ შეგარჩენსო.

მებაღემ ამ სიტყვების გაგონებისთანავე ხელი გაუშვა და ჰკითხა:

— შენ განა იცნობ ჯიქასო?

— ძმა არის და როგორ არ მეცნობაო, — მიუგო ვეფხვამ.

— შენ თვითონ ვინა ხარო? — კვლავ ჰკითხა მებაღემ.

— მე ვეფხვა ვარო, — მიუგო ვეფხვამ.

— მე ვარ ჯიქაო! — დაიძახა მებაღემ და ვეფხვას მსურვალედ გადაეხვია.

დაინახა ეს ამბავი ხელმწიფემ და მებაღეს განრისხებული მივარდა:

— ახლავე შეებრძოლე, თორემ ჩამოგასრჩობო! — დაუყვირა.

მობრუნდა ჯიქა-მებაღე, წასწვდა ხელმწიფეს კისერში და თავი ქათამივით წააცალა. მერე შეცვივდნენ ორივენი სასახლეში და ხელმწიფის ყველა ვეზირი და ახლობელი

საიქოს გაისტუმრეს. კუდიანი დედაბერი რაშს გამოაბეს ძუაზე, მზეთუნახავი ქალი კი გამოიყვანეს. ქალი სიხარულით გადაეხვია ორივე გმირს და უთხრა:

— სადაც ამდენი სიკეთე მიყავით, ბარემ ეს ერთი თხოვნაც შემისრულეთ: ცოტა ხნით ჩემი მამის სატახტო ქალაქში დამაბრუნეთ, ერთხელ კიდევ ვნახავ ბავშვობისდროინდელ ადგილებს და მერე საითაც გინდათ, იქით წამიყვანეთო.

რა თქმა უნდა, ძმებმა ქალს ეს სურვილი უყოყმანოდ შეუსრულეს, გამოიყვანეს ხელმწიფის საჯინიბოდან ორი საუკეთესო ბედაური, ერთზე ჯიქა შეჯდა, მეორეზე — ქალი, ვეფხვა ისევ თავის რაშს მოახტა და გამოსწიეს ქალის სამშობლო ქალაქისაკენ. იარეს ბევრი და ბოლოს მიადგნენ აოხრებულ ქალაქს. ქალაქის დანახვისთანავე ჯიქა ცხენიდან ჩამოხტა, მიწაზე პირქვე დაემხო და მწარედ აქვითინდა. წამოაყენეს ქალმა და ვეფხვამ და ჰკითხეს:

— რა იყო, რაზე ატირდიო?

— იმაზე ავტირდი, რომ ეს ქალაქი მამაჩემის სატახტო ქალაქია, — უპასუხა ჯიქამ, — მე ერთი და მყავდა, მამაჩემს გველეშაპი შეუჩნდა, ჩემს დას ცოლად სთხოვდა, მამამ დის მაგიერ მე მიმცა გველეშაპს და, როგორც ჩანს, იმ წყევულს აუოხრებიაო.

ამის გაგონებაზე ახლა ქალს წასკდა ტირილი და ჯიქას გადაეხვია, — შენ ხომ ჩემი დაკარგული ძმა ყოფილხარ, სწორედ მე ვარ ის ქალი, ვიზეც შენ ლაპარაკობ, ეს ქალაქიც მართლა გველეშაპის აოხრებულიაო.

აბა, რაღა საკითხავია, რომ და-ძმამ ერთმანეთის პოვნით ძალიან გაიხარეს. ჯიქამ და ვეფხვას მიათხოვა, თვითონ ხელმწიფედ დაჯდა და გაპარტახებული ქალაქის აღდგენა-დასახლებას შეუდგა. რასაკვირველია, ცოლისძმას ვეფხვაც ესმარებოდა. როცა ქალაქი აღადგინეს და კვლავ დაასახლეს, ვეფხვა გამოეთხოვა ჯიქას, წამოიყვანა მზეთუნახავი ცოლი და თავის სახელმწიფოში დაბრუნდა. ხელმწიფე, ვეფხვას მამა, ძალიან მოსუცებულიყო და დაბრუნებისთანავე შვილი ტახტზე აიყვანა.

ამ დღიდან ცხოვრობდნენ მომიჯნედ სიძე-ცოლისძმა და ერთმანეთში ტკბილი ნათესაობა და მეზობლობა ჰქონდათ.

ერთმანეთის დახმარებით სახელმწიფოსაც გონივრულად მართავდნენ და ვერც მტრობას ვინმე უბედავდა. მათ წყენას ხალხი კი არა, დევებიც ერიდებოდნენ. ტყუილად კი არ არის ნათქვამი: სიძე-ცოლისძმა თუ შეერთდა, დევსაც ყურით დააბამენო.

ჭირი — იქა, ლხინი — აქა,  
ქატო — იქა, ფქვილი — აქა.







## ივანე ცინკარი

იყო და არა იყო რა, ღვთის უკეთესი რა იქნებოდა, — იყო ერთ ქალაქში ერთი მჭედელი. შვილები არ ჰყავდა, თუმცა გულით კი უნდოდა, რომ ჰყოლოდა.

ერთხელ მჭედლის ცოლი წყალზე წავიდა. კოკა წყალს შეუდგა და ავსებას დაელოდა. უცბად ხედავს, რომ წყალს სამი თურაშაული ვაშლი მოაქვს. მჭედლის ცოლი დასწვდა ვაშლებს და სახლში წაიღო. ერთი ვაშლი ქმარს მისცა, ერთი თვითონ შეჭამა და ერთიც შუაზე გაიყვეს.

ვაშლის ჭამის შემდეგ მჭედლის ცოლი დაორსულდა. მალე გავიდა ცხრა თვე და ერთ საღამოს დედის მუცლიდან ბავშვმა დაიძახა:

— წადით, მღვდელი მოიყვანეთ, რომ დაბადებისთანავე მომნათლოს, თორემ გავჩნდები თუ არა, იმავ წამს ცაში გაფრინდებიო.

მართლაც დაბინდდა თუ არა, ვაჟი დაიბადა, მაშინვე მონათლეს და, რაკი ბინდისას დაიბადა, ივანე მწუხრისა დაარქვეს. მოწოვა თუ არა ბავშვმა ძუძუ, იმავ წამს ზეცაში გაფრინდა. ის იყო, მღვდელი უნდა წასულიყო, რომ დედის მუცლიდან ახლა მეორე ბავშვმა დაიძახა:

— მღვდელი არ გაუშვათ, შუალამისას მეც დაეიბადებიო.

დაიბადა შუალამისას მეორე ვაჟი, მღვდელმა მონათლა და დაბადების მიხედვით, ივანე შუალამისა დაარქვა. მოწოვა იმანაც დედის ძუძუ და ზეცაში გაფრინდა.

მღვდელმა ისევ დააპირა წასვლა, მაგრამ დედის მუცლიდან ახლა მესამე ბავშვის ხმა გაისმა:

— მღვდელი არ გაუშვათ, ცისკარზე მეც დავიბადებო.

ცისკარზე დაიბადა მესამე ვაჟი, მონათლეს და დაარქვეს ივანე ცისკარი. მოწოვა ბავშვმა ძუძუ და თავისი ძმების მსგავსად ისიც ცაში გაფრინდა.

ამ დღიდან ძმები მუდმივად ცაში ცხოვრობდნენ, მიმოფრინავდნენ ღრუბლებსა და ვარსკვლავებს შორის, მაგრამ ერთმანეთს არ იცნობდნენ. შართალია დედასთან სამივენი ყოველდღე მოფრინდებოდნენ ხოლმე ძუძუს მოსაწოვად, მაგრამ ერთიმეორეს ვერც აქ ხვდებოდნენ, იმიტომ რომ ივანე მწუხრისა საღამოზე მოფრინდებოდა, ივანე შუალამისა — შუალამისას და ივანე ცისკარი — ცისკრის ამოსვლისას, მოსწოვდნენ ძუძუს და ისევ ცაში გაფრინდებოდნენ.

გავიდა დრო და ძმებიც დავაჟკაცდნენ, ახლა უკვე ძუძუს აღარ წოვდნენ და სახლშიც ყოველდღე აღარ მოდიოდნენ. — მოფრინდებოდნენ კვირაში ერთხელ, აიღებდნენ მთელი კვირის საგზალს და კვლავ ღრუბლებსა და ვარსკვლავებს მიასურებდნენ.

იმ ქვეყნის ხელმწიფეს ტახტი და სასახლე სწორედ იმ ქალაქში ედგა, სადაც მჭედელი და მისი ცოლი ცხოვრობდნენ. ხელმწიფეს სამი მზეთუნახავი ქალი ჰყავდა. ქალები იმისი შიშით, რომ ან მზე არ მოგვეკიდოსო ან სიცივემ არ დაგვეკრასო, დღე და ღამე შინ ისხდნენ და კარში არ გამოდიოდნენ.

ერთხელ მამამ უთხრა ქალიშვილებს:

— შვილებო, სულ შინ ჯდომა რა სასარგებლოა, ერთხელ მაინც გადით კარში და მზე და ქვეყანა ნახეთო.

დაუჯერეს ქალებმა მამას და სასეირნოდ ბაღში გამოვიდნენ. შუადღისას უცბად ცა მოიღრუბლა და ატყდა ქარიშხალი და საშინელი ელვა-ქუხილი. ქალებმა გონზე მოსვლაც ვერ მოასწრეს, რომ ციდან ერთი ცხრათავიანი დევი დაეშვა, მოიტაცა ხელმწიფის ქალები და ღრუბლებში გაუჩინარდა.

ეს ამბავი იმავე დღეს მოედო მთელ ქალაქს და ყველა დაამწუხრა. ხელმწიფემ ყოველმხრივ დაგზავნა მძებრები, მაგრამ ქალების კვალს ვერაფერს მიაგნო.

მაშინ ხელმწიფესთან მჭედლის შვილების ბებიაქალი მი-  
გიდა და მოახსენა:

— ამ ქალაქში ერთ მჭედელს სამი ვაჟი ჰყავს და სამი-  
ვენი ზეცაში ცხოვრობენ, ფრინველებივით დაფრინავენ, ცაც  
ხელში უჭირავთ და დედამიწაც, და თუ ეცოდინება ვისმეს  
შენი ქალების ამბავი, ისევ იმათ ეცოდინებათ, დაიბარე და  
გამოჰკითხო.

ხელმწიფემ მაშინვე წვეულება გამართა და მჭედელთან  
კაცი გაგზავნა მისი შვილების დასაპატიყებლად. შვილები,  
რა თქმა უნდა, შინ არ იყვნენ, მაგრამ მოპატიყეს დედამ  
პირობა მისცა, რომ, მოვლენ თუ არა, სახლში დავაბრუნებ  
და გამოვგზავნიო.

ბინდისას მოვიდა ივანე მწუხრისა. დედამ ჩვეულებრივ  
ავახშმა და როდესაც ივანე მწუხრისამ წასვლა დააპირა,  
უთხრა:

— დარჩი შინ ამაღამ, ხვალ ხელმწიფე წვეულებას მარ-  
თავს და დაგპატიყაო.

შვილმა დაუჯერა დედას და დარჩა. დედამ გაუშალა ლო-  
გინი და დააძინა. შუალამისას მეორე შვილი მოვიდა, დედა  
იმასაც ჩვეულებრივ გაუმასპინძლდა და სთხოვა:

— დარჩი, შვილო, ამაღამ სახლში, ხვალ ჩვენი ხელმწი-  
ფე წვეულებას მართავს და, რომ არ ეწვიო, ეწყინებაო.

დაუჯერა ივანე შუალამისამაც დედას და დარჩა. დედამ  
დასაძინებლად გაიყვანა. ივანე შუალამისამ დაძინებული  
ძმა რომ დაინახა, უცხო კაცი ეგონა და ძალიან გაჯავრდა.

— ეს ვინლაა აქ რომ სძინავსო? — ჰკითხა დედას.

— ეგ შენი უფროსი ძმა არისო, — უთხრა დედამ, —  
ორივენი ერთ ღამეს ხართ დაბადებული, მაგრამ ცალ-ცალ-  
კე რომ მოდიხართ, ერთმანეთს ამიტომ არ იცნობთო.

ივანე შუალამისა დამშვიდდა და ძმის გვერდით წამოწვა.  
გათენებისას ივანე ცისკარიც მოფრინდა. დედა გაუმასპინძლ-  
და, უთხრა ხელმწიფის შემონათვალი, დაძინებული ძმებიც  
აჩვენა და ისიც იმათ გვერდით დააწვინა.

გათენებისას უფროსმა ძმამ, ივანე მწუხრისამ რომ გაი-  
ღვიძა, უმცროს ძმებს ჯერ ისევ ეძინათ. — ივანე შუალამი-  
სა შუა ძილში იყო, ხოლო ივანე ცისკარისას მაშინდა ჩაე-

ძინა. ივანე მწუხრისა ძმებს ჯერ არ იცნობდა და ძალიან გაჯავრდა. — უცხო ხალხს ჩემს სახლში რა უნდაო. მაშინვე წამოდგა და ხმალს ეცა, ამ დროს დედა შემოვიდა და შვილი რომ ამ ყოფაში დაინახა, შეშინებულმა ჰკითხა:

— რად გინდა, შვილო, ხმალი, აქ სამტრო ვინა გყავსო?

— მაშ ეს უცხო კაცები ვინ არიან, თუ მტრები არაო? — ჰკითხა შვილმა.

— ვაი, მომიკვდეს თავი! — შემოიკრა დედამ ხელი, — ეგენი ხომ შენი ღვიძლი ძმები არიან, ეგენიც შენსავით ცაში ცხოვრობენ, წუხელ მოვიდნენ და მე აღარ გაუშვიო.

ცოტახნის შემდეგ ივანე შუალამისამ და ივანე ცისკრისამაც გაიღვიძეს და ძმები სიყვარულით გადაეხვივნენ ერთმანეთს. მერე ხელმწიფესთანაც წავიდნენ. ხელმწიფემ ძმები დიდი პატივით მიიღო და მსახურებს უბრძანა, კარგად გაუმასპინძლდითო. სადილის შემდეგ ხელმწიფემ ძმები გვერდით მოისხა და თავისი დაკარგული ქალების ამბავი გამოჰკითხა:

— ცაში დაფრინავთ, ყველაფერს ხედავთ, ხომ არ იცით, ჩემი ქალიშვილები სად არიანო?

ივანე სალამოსამ და ივანე შუალამისამ უარი უთხრეს, — არც გვინახავს და არც ვიცითო. მაშინ წამოდგა უმცროსი ძმა, ივანე ცისკარი და ხელმწიფეს მოახსენა:

— დიდებულო ხელმწიფე, ერთ დღეს ერთ ღრუბლის ფაფუკ ქულაზე ვიწექი და ვისვენებდი, თან ცასა და ღრუბლების ბოჭირს გავყურებდი. უცებ ქალების ტირილი და წივილ-კივილი შემომესმა, გავიხედე და რას ვხედავ: მოფრინავს ერთი უზარმაზარი დევი და ხელში სამი ატირებული ქალი უჭირავს. მაშინვე მშვილდს მოვზიდე, მაგრამ ვერ ვეპროლე, რადგან დევი რომ მომეკლა და მიწაზე ჩამომეგდო, ქალებიც დაიხოცებოდნენ. ეს იყო და ეს ჩემი იმათი ნახვა, იმ დღიდან მათი ამბისა აღარაფერი გამიგიაო.

ხელმწიფეს უზომოდ გაუხარდა, რომ ბოლოს თავისი ქალიშვილების მნახველი ერთი კაცი მაინც აღმოჩნდა, და ივანე ცისკარს უთხრა:

— თუ თქვენ, ძმები, ჩემს ქალებს იპოვით და გამოიხსნით, ცოლებად შეგერთავთ. უფროსს ქალს უფროს ძმაზე

დავნიშნავ, შუათანას — შუათანა ძმაზე, ხოლო უმცროსს, რომელიც მზესაც კი სჭარბობს სილამაზით, შენ შეგრა-თავო.

ივანე ცისკარი დათანხმდა, ძმები მოემზადნენ და წავიდ-ნენ მეფის ქალიშვილების საძებნელად. იარეს, იარეს და ბოლოს ერთ უშველებელ კლდოვან მთას მიადგნენ. მთას ერ-თი ფეხი ერთ ზღვაში ედგა, მეორე — მეორე ზღვაში და ისე-თი მაღალი იყო, რომ კაცი თვალს ძლივს შეუწვდენდა. კლდის ძირას ერთი კარავი იდგა და შიგ ერთ უზარმაზარ დიდთავა რკინის კაცს ეძინა.

ივანე ცისკარმა კარავში ძმები შეგზავნა, — გააღვიძეთო, მაგრამ ძმებმა თითიც ვერ გაატოკებინეს. მაშინ ივანე ცის-კარი თვითონ შევიდა კარავში, ჩაჰკრა კეფაში მშვილდი რკინისთავიან კაცს და გამოაღვიძა. რკინის კაცს შეეშინდა და სთხოვა, — მიძმე და გამოგადგებო. — გიძმობო, — და-თანხმდა ივანე ცისკარი, — თუ აი ამ კლდეზე აგვიყვანო. მაშინ რკინის კაცმა უთხრა:

— თუ მჭედლობა შეგიძლია, ერთი დიდი ჯაჭვი გააკე-თე, შევტყორცნოთ ის ჯაჭვი ზევით, მოვდოთ კლდეს და ავიდეთო.

— მჭედლის შვილი ვარ და მჭედლობა როგორ არ შე-მიძლიაო, — უთხრა ივანე ცისკარმა და წავიდა რკინის მოსა-ტანად. მოიტანა ბლომად რკინა, მარწუხები, კვერები — ყველაფერი, რაც საჭირო იყო ჯაჭვის გამოსაჭედად, მარტო გრდემლი ვერსად ეშოვა და ამაზე წუსდა.

— გრდემლად ჩემი თავი იხმარეთო, — უთხრა რკინის კაცმა და ლოდივით მკვრივი თავი ფეხებთან წაუღო.

ივანე ცისკარმა ძმებიც მოიშველია და უზარმაზარი, მთის გამწვდომი ჯაჭვი ერთ დღეში გამოკვერა. მერე კლდის ძირას ერთი კარავი იდგა და შიგ ერთ უზარმაზარ ერთი ბოლო დაამაგრეს, მეორე ბოლოზე ჯაჭვს ფოლადის დიდი ჩანგლები გამოაბეს, რომ კლდეს საიმედოდ მოსჭი-დებოდა, და ივანე ცისკარმა უთხრა ძმებს:

— აბა, ასწიეთ და შესტყორცნეთ, იქნებ შეუწიოთო.

ძმებმა სცადეს, მაგრამ ადგილიდანაც ვერ დასძრეს, მა-შინ ივანე ცისკარმა რკინის კაცს უთხრა:

— აბა, რკინის კაცო, ახლა შენა სცადე, იქნებ შენ მაინც შეუწიო.

რკინის კაცმა მოავლო ჯაჭვს ხელი და რაც ძალი და ღონე ჰქონდა, შეისროლა, მაგრამ კლდეს ნახევრამდეც ვერ მიუწვდინა.

— სულ ეგ არის შენი ღონეო? — ჰკითხა სიცლით ივანე ცისკარმა.

— სულ ეს არის, მეტი არ შემიძლიაო, — აღიარა რკინის კაცმა.

— აბა ახლა მე მიყურეთო, — თქვა ივანე ცისკარმა, და ავლო ჯაჭვს ხელი, ერთი ღონივრად მოიქნია, შესტყორცნა და მოსდო კინჭუხს. დაეჭიდნენ ყველანი ჯაჭვს, მაგრამ ძერა ვერ უყვეს, მაშასადამე, ჩანგლები კარგად იყო მოჭიდებული წვერში და ასვლა შეიძლებოდა. ივანე ცისკარმა ჯერ ისევ ძმები აგზავნა, მაგრამ ძმები ნახევრამდეც ვერ ავიდნენ, შეეშინდათ და აკანკალებულები უკანვე ჩამოვიდნენ. ივანე ცისკარმა ახლა რკინის კაცი აგზავნა, თან დაარიგა, ძირს არ ჩამოიხედო და უფრო უშიშრად ასვალთ, მაგრამ წვერამდე ვერც რკინის კაცმა უწია, ცოტალა ეკლდა ასვლას, რომ ძირს ჩამოიხედა, შეეშინდა და გაჭირვებით უკანვე ჩამოფოფხდა.

ივანე ცისკარმა ძმები რკინის კაცს ჩააბარა და გააფრთხილა, — ჩემს დაბრუნებამდე არა დაუშავდეთ რა, თორემ ცოცხალს არ გაგიშვებო. მერე მოჰკიდა ჯაჭვს ხელი და ზედ კვერნასავით აირბინა. მოექცა კლდეს თავზე და მარტოკა წავიდა ქალების საძებნელად.

იარა, იარა და ბოლოს ერთ სპილენძის სასახლეს მიაღგა. ეს სასახლე შვიდთავა დევისა იყო და ხელმწიფის უფროსი ქალიც სწორედ იმას ჰყავდა ცოლად. შევიდა ივანე ცისკარი სასახლეში და ნახა ხელმწიფის ქალი. გამოჰკითხა ვინაობა, ქალმა უამბო თავისი და თავისი დების თავგადასავალი და ბოლოს დაღონებით უთხრა:

— ნეტა კი არ მოსულიყავი, შვიდთავა დევს ცოცხალი ვერ გადაურჩები და ცოდო ხარო.

— შენ ნუ გეშინია, მე ვიცი და იმანო, — მიუგო ივანე ცისკარმა.

— თუ იმ წყევულს მოკლავ, შენ ქმარი და მე ცოლი, — უთხრა ქალმა.

— იქნებ ეგრეც მოხდეს, — უპასუხა ივანე ცისკარმა, — მაგრამ ქმრობას ვერ შეგპირდები და რძლად კი წაგიყვანო. — გამოვიდა სასახლიდან და დევის მოსვლამდე საჩრდილობელში წამოწვა.

სალამო ხანზე შვიდთავა დევიც გამოჩნდა, — ცხენზე იჯდა და სახლისაკენ გულარხეინად მოდიოდა. სახლს რომ მოუახლოვდა, ცხენი შეფრთხა და წაიბოროძიკა. დევმა აღვირი აუქნია და გაუწყრა:

— აჩუ, შე სამგლევე, რა გაშინებს, აქ რა ივანე ცისკარი დაგხედებო, — შემოვიდა დევი ეზოში და აკი მართლა ივანე ცისკარი არ დახვდა და დევმა დაინახა და დაუძახა:

— ივანე ცისკარო, სამტროდ მოსულხარ, თუ სამოყვროდო —

— შენთან სამოყვრო რა მაქვს, სამტროდ მოვსულვარო — უპასუხა ივანე ცისკარმა.

გადმოხტა ცხენიდან შვიდთავიანი დევი და ხაფი ხმით შეუძახა:

— მაშ, თუ სამტროდ მოხველ, ემანდ მიწას შეუბერეო!

— შეუბერე და მანდა ხარო — მიუგო ივანე ცისკარმა.

დევმა შეუბერა მიწას და ზედაპირი სულ პიტალო სპილენძად უქცია. მაგრამ ამან ვერ უშველა, — ივანე ცისკარმა პირველსავე მოქნევაზე მუხლამდე ჩაასო მიწაში. მერე დევმა მოიქნია ივანე ცისკარი, იმანაც მუხლებამდე ჩაასო. მეორე მოქნევაზე ივანე ცისკარმა დევი უკვე წელამდე ჩაასო და ხმლით სამი თავიც წააცალა. გაცეცხლდა დევი, მოიქნია ივანე ცისკარი და წელამდე დაიყვანა, ამოხტა საჩქაროდ ივანე ცისკარი, დევი ყელამდე ჩაფლო მიწაში და დარჩენილი თავებიც დააყრევინა. მერე ისევ შიგნით შევიდა და ქალს თავისი უფროსი ძმისთვის სანიშნო ბეჭედი გამოართვა, ჩემს დაბრუნებამდე არსად წახვიდეო, უთხრა, გამოეთხოვა და უმცროსი დების საძებნელად წავიდა.

იარა ივანე ცისკარმა, იარა და ერთ ვერცხლის სასახლეს მიადგა. ეს სასახლე ცხრათავა დევისა იყო და ცოლად ხელმწიფის შუათანა ქალი ჰყავდა. ივანე ცისკარი აქაც

უშიშრად შევიდა სახლში, დევი სანადიროდ იყო წასული და შინ მარტო ქალი დახვდა. ქალმა სტუმრის ვინაობა რომ გაიგო, შეეხვეწა, — ჩქარა წადი აქედან, ცხრათავიან დევს ნუ დაენახვები, თორემ მოგკლავსო.—ივანე ცისკარმა უთხრა, — შენ ნუ გეშინია, მე ვიცი და იმანო, — და დევის მოსვლამდე აქაც საჩრდილობელში დაისვენა.

მოვიდა საღამოზე ცხრათავიანი დევი, სახლთან მოახლოებისას ცხენი წაუბოროძიკდა, დევმა შეუტია:

— აჩუ, შე სატილოვო, რა გაშინებს, აქ რა ივანე ცისკარი დაგხვდებაო — შემოვიდა ეზოში და აკი მართლა ივანე ცისკარი არ დაუხვდა დაინახა დევმა და დაუძახა:

— ივანე ცისკარო, სამტროდ მოხველ თუ სამოყვროდ?

— შენთან სამოყვრო რა მაქვს, სამტროდ მოვედიო — უპასუხა ივანე ცისკარმა.

გადმოხტა ცხენიდან ცხრათავიანი დევი და შეუტია:

— მაშ, რაკი სამტროდ მოსულხარ, მიწას შეუბერეო

— შეუბერე და მანდა ხართო — უპასუხა ივანე ცისკარმა და ეცნენ ერთმანეთს. ივანე ცისკარმა მესამე მოქნევაზე ის დევიც ყელამდე ჩასვა მიწაში და ცხრავე თავი მოაგდებინა. მერე შევიდა ქალთან, გამოართვა თავისი შუათანა ძმისთვის სანიშნო ბეჭედი, თანაც დაარიგა, ჩემს დაბრუნებამდე არსად წახვიდეო, და გასწია უმცროსი მზეთუნახავი ქალის საქებნელად.

იარა ივანე ცისკარმა, იარა და მივიდა თორმეტთავიანი დევის სახლში, სადაც ხელმწიფის მზეთუნახავი უმცროსი ქალი იმყოფებოდა. სახლიც და ეზო-კარმიდამოც სულ ოქროსი იყო და თვალისმომჭრელად ლაპლაპებდა. შევიდა ივანე ცისკარი შიგნით, გადაეხვია თავის მზეთუნახავ საცოლეს და გადაჰკოცნა. უამბო ყველაფერი, რაც გადახდა თავს და ბოლოს უთხრა:

— აი, ახლა აქ მოვედი, რომ თორმეტთავიანი დევიც მოვკლა და შენ ცოლად წაგიყვანო.

ქალმა ტირილი დაიწყო:

— ნუ დაენახვები თორმეტთავიან დევს, თორემ მოგკლავს, მისი მომრევი კაცი ჯერ არ დაბადებულაო.

— შენ ნუ გეშინია, — ანუგეზა ივანე ცისკარმა, — მე ვი-



ცი და იმანო. — გავიდა კარში, დაჯდა ხის ძირას და დაუწყო ლოდინი.

სალამოხანს დაბრუნდა დევი ნადირობიდან — ზის ცხენზე და გულარხეინად მოდის თავის სახლისაკენ. წაიბოროტია ცხენმა.

— აჩუ, შე ოხერო, — შეუტია ცხენს და მათრახიც გადაჰკრა, — რა გაშინებს, თვითონ ივანე ცისკარიც რომ დაგიხედეს, ასო-ასო ავეჭრი და საჯიჯგნად ყვაე-ყორნებს მივუყრიო.

ამ მუქარით შემოვიდა დევი ეზოში, დაინახა ივანე ცისკარი და დაუძახა:

— ივანე ცისკარო, სამტროდ მოსულხარ, თუ სამოყვროდო?

— სამტროდ მოვედი, შენთან სამოყვრო რა მაქვსო, — უპასუხა ივანე ცისკარმა.

— მაშ, შეუბერე მიწასო! — უყვილა დევმა და ჩამოხტა ცხენიდან.

— შეუბერე და მანდა ხარო! — მიუგო ივანე ცისკარმა.

დევმა შეუბერა მიწას, ოქროდ აქცია და გაქანდა ივანე ცისკრისაკენ. ისიც შეეგება და დაეტაკნენ ერთმანეთს. დედამიწამ ზანზარი დაიწყო, ხეები დაიზნიქა, ბალახი მიმოითელა და ცაში ღრუბლები ათრთოლდნენ. დევი და ივანე ცისკარი ღონეზე არიან გასული და ხან ერთი სძლევს, ხან — მეორე, ხან ერთი ჩაფლავს მიწაში, ხან — მეორე. აგე, დევმა ივანე უკვე წელამდე დაიყვანა, მაგრამ იმარჯვა ივანე ცისკარმა, ამოხტა მიწიდან, მოიკრიბა მთელი ძალ-ღონე და დევი მხრებამდე ჩასვა, გაიძრო ხმალი და ცხრა თავი გააგდებინა. დევი დაიღალა და ცისკარს ჰკითხა:

— თქვენში ომი როგორ იციანო?

— ჩვენში ომობენ და დაისვენებენო, — უპასუხა ივანე ცისკარმა.

— მაშ დამასვენეო, — სთხოვა დევმა.

ივანე ცისკარმა იფიქრა, — ეს რომ დავასვენო, მე რა სარგებელი მაქვსო, — და დარჩენილი სამი თავიც წააჭრა, წამოიყვანა ქალი ივანე ცისკარმა და წამოვიდა.

სახლს ცოტაზე რომ გამოსცდნენ, ქალმა უთხრა:

— ივანე ცისკარო, აბა მიიხედე, რამდენი ოქრო რჩება ტყუილად და რად უნდა დავტოვოთო?

— დევებს ოქრო ვინ მისცაო, — უთხრა ივანე ცისკარმა; — ეგ სულ იმისთვის არის მოგონილი, რომ შენთვის თვალები აება და სიმდიდრით მოეტყუებინე. აბა, უყურეთუ არაო, — შებრუნდა ივანე ცისკარი, ერთი შეუბერა და ოქროს სასახლე და ეზო-კარმიდამო სულ მტვრად აქცია. ივანე ცისკარმა შუათანა და უფროს დასთანაც ასევე გააქეთა, — შეუბერა ვერცხლისა და სპილენძის სასახლეებს და უკვალოდ გააქრო. წამოიყვანა დები და მოიყვანა კლდე-თან.

— ივანე ცისკარმა ჯერ უფროსი და ჩაუშვა ჯაჭვზე და უფროს ძმას — ივანე მწუხრისას დაუძახა, — ეგ შენია და ხელი მოჰკიდეთ. მერე შუათანა ჩაუშვა და ივანე შუალამისას ჩააბარა. ბოლოს ჯერი თავის საცოლეზე მიდგა, მაგრამ ქალმა უარი უთხრა:

— რაღაც გული მიგრძნობს, რომ ის რკინის კაცი გიღალატებს, ჯოზია, პირველად შენ ჩახვიდეთ. — ივანე ცისკარმა არ დაუჯერა, — აქ მარტოს ვერ დაგტოვებო და ჩაუშვა, ჩავიდა თუ არა ქალი ძირს, რკინის კაცმა შემოჰკრა ჯაჭვს ლახტი და შუაზე გაწყვიტა.

დარჩა ივანე ცისკარი მალლა. აქეთ ეცა, იქით ეცა, მაგრამ ვერაფერს გახდა, ჩავარდნილიყო კლდეზე, — მოკვდებოდა, არადა, სხვა ჩასასვლელი არსად ჩანდა. რა უნდა ექნა? ამ გასაჭირში რომ იყო, დაბლიდან თავისი საცოლის ხმა გაიგონა:

— ივანე ცისკარო, თორმეტთავიან დევს ერთი რაში ჰყავს და თუ გიშველის, ის გიშველისო, — დაუძახა ქალმა, — ზღვაში რომ ცხვირწამოწვდილი კლდე დგას, იმ კლდეში აბია, დევმა იქ დაამწყვდია, რადგან ერთხელ ჩამოაგდო. წადი, ჰკარი წიხლი კლდეს, დაანგრე და ის რაში გამოიყვანეთ.

წავიდა ივანე ცისკარი, ჰკრა წიხლი კლდეს, შეანგრია და გამოიყვანა რაში. დიდიხნის დაუბანელს ზურგსა და კისერზე ხელის სისქე ჭუჭყი დასდებოდა. ხოლო უსმელ-უჭმელობითა და ადგილზე უძრავად დგომით ისე დასუსტებულიყო, დასუთულიყო, რომ ფეხზე ძლივსლა იდგა.

რაშმა ივანე ცისკარს სთხოვა

— სამ დღეს შავ მთაზე გამიშვი, რომ დავისვენო და ღოჭ  
ნე მოვიდგა, თორემ ვერა გზიდავო.

ცისკარმა გაუშვა რაში და სამ. დღეს აბალახა. მეოთხე  
დღეს მოიყვანა, დაბანა და შეკაზმა, შედგა ფეხი უზანგში,  
მაგრამ რაშმა ერთი ფეხით კიდევ წაიბოროძია. კიდევ სთხო-  
ვა ივანე ცისკარს, — მოდი ამალამაც დამასვენეო. ივანე  
ცისკარმა დაასვენა და მეორე დღისით რაში მართლაც ისე  
მოდლონიერდა, რომ ადგილიდან ფეხიც აღარ მოუცვლია. ივა-  
ნე ცისკარი შეჯდა, რაში ისარივით აიჭრა ცაში და, სანამ  
რკინის კაცი და უფროსი ძმები დაბრუნდებოდნენ ქალაქში  
ორი დღით ადრე მოიღო დგრიალი.

ივანე ცისკარს ძმებისა და რკინის კაცის მოსვლამდე  
ქალაქში გამოჩენა არ უნდოდა. მაშინ რაშმა უთხრა:

— რაკი აგრეა, აიყარე აბჯარ-საჭურველი, გაიხადე ტან-  
საცმელი, დამაკარი უნაგირზე და ისევე შავ მთაზე გამიშ-  
ვი, — გამოიძრო სამი ძუა და მისცა, — როცა დაგჭირდე, ეს  
ძუები შეტრუსე და იმავე წამს შენთან გავჩნდებიო.

ივანე ცისკარმა დაუჯერა რაშს, — აიხსნა იარაღი, გაი-  
ხადა ტანსაცმელი, დააკრა უნაგირზე და გაუშვა, თვითონ  
მათხოვრული ძველმანები ჩაიცვა და გავიდა ქალაქში, რომ  
ძმებისა და რკინის კაცის მოსვლამდე რამე საქმე ეშოვა,  
ბოლოს ერთ მჭედელთან მივიდა და სთხოვა:

— შენი არაფერი მინდა, ოღონდ მამუშავე და ჭამპურა  
დაც ყაბული ვარო.

მჭედელი დათანხმდა, ამ დროს სწორედ ცულს აკეთებ-  
და და ივანე ცისკარს უთხრა, — მოდი, ბარემ კვერი დამი-  
კარიო. ივანე ცისკარმა მჭედლის საორხელე კვერი ხელში  
ხვედასავით შეათამაშა და პირველსავე დარტყმაზე გრდემ-  
ლი კუნძიანად მიწაში ჩაქარგა.

მჭედელს გაოცებისაგან პირი ღია დარჩა — ასეთი ღო-  
ნიერი კაცი თვალთ არასოდეს ენახა. იმავე დღეს გააკეთე-  
ბინა უზარმაზარი გრდემლი, ჩაასმევინა უზარმაზარ კუნძში  
და დაიწყო ივანე ცისკარმა მუშაობა. ხუთი დღის საქმენ  
ერთ საათში აკეთებდა, მჭედელს უზომოდ უხაროდა, რომ  
მუქთად და უხელფასოდ ასეთი მარჯვე მუშა იშოვა.

ორი დღის შემდეგ მოვიდნენ რკინის კაცი და ივანე ცისკრის ძმები და მოიყვანეს ხელმწიფის მოტაცებული ქალები. ხელმწიფე ცას ეწია სიხარულით და ქორწილის დღეც დანიშნა. წესით, ჯერ უფროსი ქალის ქორწილი უნდა გადაეხადათ, მერე საშუალოსი და სულ ბოლოს უმცროსისა. მაგრამ უფროს დებს ბეჭდები აღარ აღმოაჩნდათ. — იმათი ბეჭდები ხომ ივანე ცისკარს ჰქონდა — და მეფის ქალებს კი ერთნაირი საქორწინო ბეჭდები უნდა ჰქონოდათ.

გაგზავნეს კაცი ოქრომჭედელთან და თან უმცროსი ქალის ბეჭედი გაატანეს, როგორც იქნება და არ იქნება, ორი ამნაირი ბეჭედი გაგვიკეთონო, მაგრამ ყველა ხელოსანმა უარი უთხრა. ბოლოს ივანე ცისკრის ოსტატთან მივიდნენ, მაგრამ ხელი ვერც იმან მოჰკიდა. ივანე ცისკარმა თავის ოსტატს ყურში უჩურჩულა, — გამოართვი და მე გავაკეთებო.

იმ ღამეს მჭედელმა დაიძინა და ივანე ცისკარი სამჭედლოში დარჩა. ცოტა ხანს ისე, ტყუილად აკაკუნა, ვითომ რაღაცას ვაკეთებო, მერე ამოიღო უფროსი დის ბეჭედი, შეახვია ჩვარში და შემოდო თაროზე. დილას მოვიდა მჭედელი და ჰკითხა, — რა ჰქენი, ხელმწიფესთან ხომ არ შემარცხვინეო?

— ოსტატს როგორ შევარცხვენდიო, — მიუგო ივანე ცისკარმა, გადმოუღო თაროდან ბეჭედი და მისცა. — მაგრამ წუხელ ერთის მეტი ვერ მოვასწარი, მეორეს სვადისთვის გაგიმზადებო.

წაიღეს ბეჭედი და მიუტანეს უფროს ქალს. ხელმწიფეს ისე გაუხარდა რომ ქორწილში მჭედელიც დაჰპატიჟა. მჭედელმა ივანეს სთხოვა, შენც წამოდიო, მაგრამ ივანე ცისკარი არ გაჰყვა, — მე არავინ მეპატიჟება და როგორ წამოვიდეო.

გავიდა თუ არა სახლიდან მჭედელი, ივანე ცისკარი მშინვე ქალაქგარეთ გავარდა, შეტრუსა რაშის ძუბა და რაშიც იმავე წამს იქ დაიბადა.

— რა გინდა, რა გაგჭირვებიაო? — ჰკითხა ივანე ცისკარს.

ივანე ცისკარმა გადაიცივა თავისი ტანსაცმელი, აისხა აბჯარ-საჭურველი, მოახტა რაშს და უთხრა:

— აფრინდი და ცას მიეკარი, ძირს მაშინ დაეშვი, როცა ჭემი უფროსი ძმა და რძალი ეკლესიიდან გამოვლენ, პირდაპირ კარებთან მიმაფრინე, რომ ჩემს ძმას ყბაში ერთი ლაჩათიანი სილა გავკრაო.

აფრინდა რაში და მიეკრა ცას. ჯვარდაწერილები ეკლესიიდან რომ გამოჩნდნენ, რაში სწორედ მაშინ დაეშვა ძირს და ივანე ცისკარმა თავის უფროს ძმას ყბაში ერთი მკვასე სილა აჭამა. მეტე ისევე ქალაქგარეთ გავიდა, ისევე გაუშვა რაში შავ მთაზე, აბჯარი და ტანსაცმელიც თან გაატანა და ბველმანებით ჩაცმული სამჭედლოში დაბრუნდა.

მოვიდა საღამოს მჭედელი ქორწილიდან შეზარხოშებული და უამბო თავის მუშას, რაც ნახა ქორწილში, — როგორ დაეშვა ციდან უცნობი ჭაბუკი, როგორ გაჰკრა სილა ნეფეს, როგორ მითელმოთელა ხალხი რაშმა ტორებით და მეტე მხედრიანად როგორ გაუჩინარდა, — რა თქმა უნდა, სიმთვრალის გამო მჭედელი ამბავს აზვიადებდა და ზოგიერთ რამეს კიდევ აჭარბებდა.

— აბა, რომ წამოვსულიყავი, სომ შიშით გული გამისკდებოდაო, — უთხრა ივანე ცისკარმა.

ივანე ცისკარმა იმ ღამეს ისევე აკაკუნა სამჭედლოში და დილას ოსტატს შუათანა დის ბეჭედი გადასცა. წაუღეს ქალს ბეჭედი. ქალები ახლა კი ყველაფერს მიხვდნენ, მიხვდა უმცროსი ქალიც და ჩუმად ტირილი დაიწყო, — თუკი მოვიდა, რატომ არ გამომიხსნისო. მაგრამ ივანე ცისკარმა თავისი დრო იცოდა. იმ დღესაც ისევე მოუხმო რაშს, მიუხტა ეკლესიიდან გამოსვლისას თავის საშუალო ძმას და ერთი სილა იმასაც უთავაზა.

ასე დასაჯა ივანე ცისკარმა უფროსი ძმები და ბოლოს რკინის კაცის ჯერიც დადგა.

ივანე ცისკარმა შეტრუსა ძუა და რაშიც იმავე წამს იქ გაჩნდა. ივანე ცისკარმა გადაიცივა თავისი ტანსაცმელი, აისხა აბჯარ-იარაღი, მოახტა რაშს და უთხრა:

— ახლა კი მაშინ უნდა დაეშვა ძირს, როცა რკინის კა-

ცი და ხელმწიფის უმცროსი ქალი ეკლესიაში შესვლას დააპირებენო.

— ნება შენიაო, — უთხრა რაშმა და მიეკრა ცას. მოდის რკინის კაცი და მოჰყავს ხელმწიფის მზეთუნახავი ქალი. ის აინუნშიაც არ არის და გულში შიში არაფრისა აქვს. ის იყო, მივიდა ეკლესიის კარებთან, რომ რაშიც იმავ წუთს იქ გაჩნდა. გადმობტა ივანე ცისკარი, მოუქნია რკინის კაცს ლახტი და ქვესკნელში ჩააძვრინა: მერე თავის საცოლეს გადაეხვია და გადაჰკოცნა.

ახლა კი მიხვდა ხალხი, ვინც იყო უცხო ჭაბუკი, გაიგეს, როგორც იყო საქმე და სიხარულის ყიჟინა დასცეს.

ივანე ცისკარმა შეირთო მზეთუნახავი ქალი და, როცა ხელმწიფე გარდაიცვალა, ტახტიც თვითონ დაისაკუთრა. დღესაც ხელმწიფედ ზის და ისე მართავს თავის ქვეყანას, რომ იქ ცრუ, ორპირი და მოღალატე კაცი ვერ გაიჭაჭანებს.

ჭირი — იქა, ლხინი — აქა,  
ქატო — იქა, ფქვილი — აქა.





## ხელმწიფის შვილის თავგადასავალი

ზღაპარ იყო, ზღაპარ იყო,  
ღობეს ჩიტი მომკვდარიყო.  
დიდ ქვაბში არ ეტეოდა,  
პატარაში ლაღე იყო,  
ასმა კაცმა ვერ შეჭამა,  
ერთი კაცის ლუკმა იყო.

იყო შაშვი მგალობელი, ღმერთი ჩვენი მწყალობელი,  
იყო ერთი უშვილო ხელმწიფე. ერთ დღეს ხელმწიფემ თქვა:

— ყველა ადამიანი სიკვდილის შვილია, ერთხელაც იქნება მეც მოვკვდები, შვილი არა მყავს და მთელი ჩემი ქონება ოხრად უნდა დარჩეს. მოდი, სანამ ცოცხალი ვარ, ყოველ შაბათ-კვირას ხალხს დავპატიებ, სიცოცხლეში ხალხი მადლიერი მეყოლება და მკვდარსაც კეთილად მომიგონებენო.— თქვა და აასრულა კიდეც. ყოველ შაბათსა და კვირას ხელმწიფის სასახლე ხალხით იყო გაჭედილი და დაფაზურნის ხმა გამოდიოდა.

ერთხელ ლხინში ერთი ეშმაკიც მივიდა, მიუჯდა სურხას და კარგად რომ გამოძლა, ხალხს შეეკითხა:

— რისთვის იხდის თქვენდ ხელმწიფე ამ ქეიფს, ნათლობა აქვს, თუ ქორწილიო?

— არც ერთი, არც მეორე, — უთხრა ხალხმა, — ჩვენი ხელმწიფე უშვილოა, მემკვიდრე არა ჰყავს და ქონება-ცხოვრება რომ ოხრად არ დარჩეს, ყოველ შაბათ-კვირას ასე გვაქეიფებსო.

— თქვენს ხელმწიფეს რომ ვინმემ შვილი შესძინოს, რას მისცემსო? — კვლავ იკითხა ეშმაკმა.

— ოღონდ ასეთი ვინმე გამოჩნდეს და ჩვენი ხელმწიფე სულსაც არ დაიშურებსო, — უპასუხა ხალხმა.

— მაშ, წადით და უთხარით, რომ მე შემძლია შვილი შევძინოო, — თქვა ეშმაკმა.

წავიდნენ ხელმწიფესთან მოქიცულები და ეშმაკის ნათქვამი მოახსენეს. ხელმწიფემ ბრძანა, ის კაცი აქ მომგვარეთო. მიუყვანეს ეშმაკი და ხელმწიფემ ჰკითხა:

— მართლა შეგიძლია ჩემთვის შვილის მოცემაო?

— მართლა შემძლიაო, — მიუგო ეშმაკმა.

— სანაცვლოს რას მოითხოვო?

— ბევრს არაფერს, — უთხრა ეშმაკმა, — თუ ერთი გეყოლოს, შენი იყოს, თუ ორი გეყოლოს, ისიც შენი იყოს, ხოლო თუ სამი გეყოლოს, რას მემართლები, ერთი მე და ორი შენო.

ხელმწიფე დათანხმდა, დადეს პირობა, რომ თექვსმეტი წლის შემდეგ ეშმაკი მოვიდოდა და სამიდან ერთ-ერთ შვილს წაიყვანდა. მერე ეშმაკმა ამოიღო ჯიბიდან ერთი ქურწითული ვაშლი, გაჭრა შუაზე და ნახევარი ხელმწიფეს აჭამა და ნახევარი — დედოფალს.

ეშმაკი თავისი გზით წავიდა. დედოფალი მართლა დაორსულდა და სამი ოქროსქორიანი ბიჭი ეყოლა. ბიჭები ერთმანეთზე უკეთესები იყვნენ და ჩქარაც იზრდებოდნენ. ისეთი ვაჟაკები დადგნენ, რომ დიდსა და პატარას თვალი ზედ რჩებოდა.

გავიდა თექვსმეტი წელიწადი და ეშმაკიც მოვიდა. რა ქნას ხელმწიფემ, არც ერთი შვილი არ ემეტება, მაგრამ სიტყვას ხომ ვერ გადავა. დაიბარა უფროსი შვილი და უთხრა:

— შვილო, ამ კაცთან პირობა მაქვს დადებული, რომ დღეს ერთ-ერთი უნდა მიგცეთ და რას იზამ, წაჰყვები თუ არაო?

— ეგ ვილაც კაცია, აქედან დაიკარგოს, თორემ ამ ჩემი ბასრი ხმლით ლუკმა-ლუკმა ავკუწავო, — უთხრა შვილმა.

ხელმწიფემ ასლა შუათანა ძმას გამოუძახა, მაგრამ ეშ



შაქინ წაყოლაზე არც ის დათანხმდა, რაც უფროსმა ძმამ თქვა, იმანაც იგივე უთხრა:

— აქედან დაიკარგოს, თორემ ჩემი ბასრი ხმლით ლუკ-მალუკმა ავკუწავო.

ბოლოს ხელმწიფემ უმცროსი შვილი დაიბარა და უთხრა:

— შვილო, ამ კაცისათვის პირობა მაქვს მიცემული, რომ დღეს ერთ-ერთი თქვენგანი უნდა წაგიყვანოთ და რას იზამ, გაჭყვები თუ არაო?

— პირი პირია, მამაჩემო, და ვერ გაგატყვინებ, — უთხრა ბიჭმა, — ეგეც არ იყოს, დღეს ხელმწიფე ხარ და რასაც გვიბრძანებ, ვალდებულები ვართ, შევასრულოთ.

ხელმწიფემ გამოაწყო თავისი შვილი, მისცა ყველაფერი, რაც სამგზავროდ სჭირდებოდა და გადასცა ეშმაკს. ეშმაკმა წინა დღეს კარგად ატარა, მეორე დღეს კი, როცა ქალაქს კარგა მანძილით გააცილა, გახადა ტანისამოსი და სახრით სულ გვერდები აუჭრელა.

— რადა მცემო? — ჰკითხა ბიჭმა.

— იმიტომ, რომ ჩემი ძალა უნდა იცოდეთ, — მიუგო ეშმაკმა.

ბიჭმა აღარაფერი უთხრა, გუნებაში კი თქვა, — დღეს შენი ტყვე ვარ და რაც გინდა, იმას მიშვრები, მაგრამ, ვნახოთ, იქნებ დრო დადგეს და ჩემი ძალაც გაჩვენო.

ატარა ეშმაკმა ხელმწიფის შვილი, ატარა და ერთ პიტა-ლო კლდესთან მიიყვანა. გამოიძრო თითიდან აღმასის ბეჭედი, მისცა ბიჭს და უთხრა, — დაარტყი ხელუკულმა კლდეს და გაიღებათ.

დაარტყა ბიჭმა ბეჭედი ხელუკულმა კლდეს და შუაზე გააბო. შიგნით ერთი ისეთი შემკულ-მოქარგული სასახლე გამოჩნდა, რომ ხელმწიფის დარბაზები მასთან შედარებით საკუჭნაო გეგონებოდათ.

შეიყვანა ეშმაკმა ბიჭი სასახლეში. სასახლეში სამი მზეთუნახავი ქალი დახვდათ. ეშმაკმა უთხრა ქალებს:

— ეს ტყვე დროებით თქვენთან იქნება, კარგად აჭამეთ და მოუარეთ, რომ გასუქდეს. ერთი კვირის შემდეგ ჩემი ქალიშვილები მესტუმრებიან და იმათ უნდა დაუგუქლო. — ეშმაკი ისევ უკან გაბრუნდა და კლდეც დაიკეტა.

მზეთუნახავ ქალებს ძალიან მოეწონათ ხელმწიფის შვილი და მისი გადარჩენა განიზრახეს, გამოჰკითხეს ვინაობა და თავიანთი თავგადასავალიც უამბეს:

— ჩვენ ერთი ხელმწიფის ქალიშვილები ვართ. მეზობელი ხელმწიფის შვილებზე ვიყავით—დანიშნულები, სწორედ ქორწილის დღეს, როცა ეკლესიაში უნდა შევსულიყავით და თავზე გვირგვინები დაგვედგა, მოფრინდა ეს ეშმაკი, სამივე მოგვიტაცა და თავის ქალებს დაგვიყენა მოსამსახურებად. ამას სამი მზეთუნახავი ქალი ჰყავს, დადიან ქვეყნად და ბოროტებას თესავენ. კვირაში ერთხელ თავიანთ მამას ეწვევიან. ეშმაკს მათი მოსვლისთვის თითო ადამის ძე მოჰყავს, დაუკლავს და გაუმასპინძლდება. მერე ჩვენ უნდა დავბანოთ, დავვარცხნოთ, ტანსაცმელი გამოვუცვალოთ და ისე გავისტუმროთ. ახლა კვირა იწურება, ქალების მოსვლის დრო ახლოვდება და შენც სწორედ იმიტომ მოგიყვანა, რომ დაგკლას და შენი ხორციტ გაუმასპინძლდეს. უკვე წელიწადია, რაც აქა ვართ დამწყვდეულები, ვუყურებთ ამ ბოროტებას და საცოდაობით ვიღვევით, მაგრამ რა ვქნათ, არც სხვათა შველა შეგვიძლია და არც თავის დახსნაო.

— ნუთუ აქედან გასვლა არ მოხერხდებაო? — ჰკითხა ხელმწიფის შვილმა.

— არის ერთი საშუალება, თუ შესძლებო, — უთხრეს ქალებმა. — ბევრმა კარგმა ვაჟკაცმა სცადა, მაგრამ ვერაფერ შესძლო და შენ რას იზამ, არ ვიცითო.

— მასწავლეთ და ვცდიო, — მიუგო ხელმწიფის შვილმა, — და თუ აქედან როგორმე თავი დავადღწიე, იქნება ღმერთი შემეწიოს და თქვენც დაგიხსნათო.

ქალებმა წაიყვანეს ხელმწიფის შვილი, მიიყვანეს თავლასთან და უთხრეს:

— ამ თავლაში ეშმაკს ერთი რაში უბია, თუ ისე გამოიყვან, რომ ფეხს ზღურბლზე არ დაადგმევინებ, ის რაში გაგიყვანს სამშვიდობოს, თუ არადა, შენი საქმე წასულიაო.

— თუ ღმერთს უნდა, შემადლებინებსო, — თქვა ხელმწიფის შვილმა, გადაიწერა ბირჯვარი და შევიდა თავლაში, რაში აბია ისეთი, რომ კაცის ტვალი უკეთეს ვერა

ფერს წახავს. რაშსაც მოეწონა ოქროსთმიანი ჭაბუკი და უთხრა:

— თუ შეგიძლია, ხელში ამიყვანე და ისე გამიყვანე, თორემ ეშმაკისაგან დაწყევლილი ვარ და ფეხი ზღურბლზე დამედგმევიწებო.

აიყვანა ბიჭმა ცხენი და გამოიყვანა ეზოში. რაშმა უთხრა:

— შემაჯექე ზურგზე, ფაფარში მაგრა ჩამეჭიდე და, რაც ძალი და ღონე გაქვს, მათრახს გადამიჭირეო.

ხელმწიფის შვილი გამოემშვიდობა მზეთუნახავ დებს, შეპფიცა, — მანამ არ მოვისვენებ, სანამ თქვენ არ დაგიხსნითო, — და მოახტა რაშს, ჩასჭიდა ხელი ფაფარს და რაც შალი და ღონე ჰქონდა, დაარტყა მათრახი. რაში მოსწყდა ადგილს, დაარტყა ტორი კლდეს, გაანგრია და მშვილდით წაბყროცნი ისარივით გაიჭრა. მიიყვანა ბიჭი თავის პატრონის სამფლობელოს საზღვარზე და უთხრა:

— ამის იქით მე ძალას ვკარგავ და აღარ გამოგადგები, წადი, კარგი ვაჟკაცი ხარ და ღმერთმა ხელი მოგიმართოს. თან აი ეს ბეჭედი წაიღე, — ჩლიქიდან ერთი აღმასის ბეჭედი გამოიღო და ბიჭს მისცა, — ოღონდ ჩუმად იქონიე და ყველას ნუ დაანახებ, სადაც დაგჭირდეს, ამოიღე, გაიკეთე მარჯვენა ხელის ნეკა თითზე და ყველა დაბრკოლებას დასძლეო.

ხელმწიფის შვილმა მადლობა გადაუხადა რაშს და გაუშვა. თვითონაც გზას დაადგა, მაგრამ არ იცის, სად მიდის, ირგვლივ ყველაფერი უცხო და უცნობია, მზეც თითქოს სსვანაირად ანათებს და ჩიტებიც სულ სხვაგვარ ხმაზე სტვენენ.

იარა ხელმწიფის შვილმა, იარა და გზაზე სამ თავისკბილა ბიჭს შემოხვდა. ბიჭები წყაროს პირას ისხდნენ და სადილს შეექცეოდნენ. ჩაცმასა და ქცევაზე ეტყობოდათ, რომ დიდებულთა ოჯახიდან უნდა ყოფილიყვნენ. მართლაც, როცა მიესალმნენ და ერთმანეთი გაიცნეს, ისინი იმ მზეთუნახავი დების დანიშნული ძმები აღმოჩნდნენ, ეშმაკს რომ ჰყავდა დატყვევებული. ძმებმა უამბეს ხელმწიფის შვილს,

რომ დაკარგვის დღიდან დავდივართ, დავეძებთ, მაგრამ მათი გზა-კვალისათვის ჯერაც ვერ მიგვიგნიათ.

ხელმწიფის შვილმა იცოდა, სანამ თვითონ ეშმაკის ქალებს არ იბოვიდა და არ დაიჭურდა, მანამდე მათს საცოლევებს ვერ გამოიხსნიდა და ბიჭებს მათი ამბავი არ გაუმხილა, მხოლოდ ეს უთხრა:

— მიძმეთ და მეც დაგეხმარებითო.

გაიფიცნენ ძმები და წავიდნენ ოთხნი.

ბევრი იარეს თუ ცოტა იარეს, ბოლოს ერთ ქალაქში შევიდნენ. ქალაქი მდიდარი იყო, მაგრამ ქუჩებში ახალგაზრდობა არ ჩანდა, მარტო მოხუცები, ქალები და ბატარა ბავშვები დადიოდნენ. ძმადნაფიცები ერთ მეღუქნესთან შევიდნენ და ჰკითხეს:

— რა მიზეზია, რომ ქალაქში ახალგაზრდობას ვერ ვხედავთ?

— ეჰ, შვილო, სადღაა ახალგაზრდობა, — ამოიოხრა ბერიკაცმა და წვერზე ხელი ჩამოისვა, — აქ, ქალაქის სამრეკლოზე ერთმა მზეთუნახავმა ქალმა ოქროს ცხვირსახოცი გადმოფინა და გამოაცხადა, — ვინც ამ ცხვირსახოცს მოიტაცებს, ცოლად იმას გაყვებითო. — ბევრმა სცადა და ბევრმაც მოიტაცა, მაგრამ ქალი არავის არ ანებებს, უმალ არწივად გადაიქცევა, აიტაცებს მალღა, გაუშვებს კლანჭებს და მიწაზე დაანარცხებს. ასე გაწყდა მთელი ახალგაზრდობა და აი, როგორც ხედავთ, ქალაქში დედაკაცები და ბებრებიღა დავრჩითო.

— მაჩვენე სად არის ქალაქის სამრეკლო და ბედს მეცა ვცდიო, — სთხოვა ხელმწიფის შვილმა.

ბებერი მეღუქნე უარზე დადგა:

— ნუ, შვილო, კარგი ვაჟკაცი ჩანხარ, დაილუპები და არ მინდა შენს ცოდვაში ჩავდგეო.

ხელმწიფის შვილმა არ დაიშალა, ვნახო მაინც, რა ქალიაო, და ბოლოს ბერიკაციც დათანხმდა, გამოიყვანა კარში და ქალაქის სამრეკლოზე გადმოფენილი ოქროს ცხვირსახოცი დაანახვა.

წავიდა ხელმწიფის შვილი, ამოიღო ეშმაკის რაშის წაჩუქარი ალმასის ბეჭედი, წამოიცვა მარჯვენა ხელის ნეკა

თითზე, შეხტა და ჩამოიღო ოქროს ცხვირსახოცი. უცბად ატყდა საშინელი შხუილი და მოფრინდა პირდაღებული არწივი.

— სად მიგაქვს ჩემი საგანძურო? — დასტყვილა ბიჭს და ბრჭყალებით მხრებში ჩააფრინდა, მაგრამ სანამ აიტაცებდა, ბიჭმა თვითონ სტაცა ხელი ფრთებში და მიწაზე დაახეთქა. არწივი შეშინდა, გაუსხლტა ხელიდან და გაფრინდა, ხოლო ცხვირსახოცი ბიჭს შეატოვა.

ჩაიდო ხელმწიფის შვილმა ოქროს ცხვირსახოცი ჯიბეში და დაბრუნდა თავის ძმადნაფიცებთან.

ის ღამე მედუქნესთან გაათენეს, მეორე დილას კი ადგნენ და წავიდნენ ეშმაკის ქალების საქებნელად. იარეს, იარეს, ბევრი მთა გადალახეს და ბევრი მინდორი გათელეს, დარს ავდარი სცვლიდა, ავდარს — დარი, მაგრამ გზას დასასრული არ უჩანდა და არც გრძნეული მზეთუნახავების ასავალ-დასავალი ჩნდებოდა.

ერთ დღეს ერთ სახელმწიფოში შევიდნენ. ქალაქის განაბირას, ერთი ეკლესიის ეზოში კუბო იდგა, კუბოში ახალგაზრდა ბიჭი ესვენა და ირგვლივ ასი შეიარაღებული კაცი იდგა. ხელმწიფის შვილი და მისი ძმადნაფიცები მივიდნენ და ჰკითხეს:

— რას დარაჯობთ, ან ამ კუბოში ვინ გიწევთო?

— კუბოში ჩვენი ხელმწიფის შვილი ასვენია. რაღაც ავისული ჰყავს დაპატრონებული, დამღამობით მოდის, აცოცხლებს და აწვალებს, დილით ისევ მოჰკლავს და გაფრინდება. ჩვენი ხელმწიფე ყოველღამე ახალ-ახალ გუშაგებს ვვაყენებს, მაგრამ ის ბოროტი არსება ვერ დაგვიჭერიაო.

— მოდით, ამალამ მეც თქვენთან მოვალ და დაგეხმარებითო, — უთხრა ხელმწიფის შვილმა, წაიყვანა თავისი ამხანაგები, ღამის გასათევად ერთ დედაბერთან დააბინავა და თვითონ უკანვე დაბრუნდა.

შუალამისას გუშაგებს ძილი მოერიათ და დაიძინეს, ბიჭი განზე გავიდა, ეკლესიის კარიბჭეს ამოეფარა და იქიდან დაუწყო თვალთვალი, აცა, რა მოხდებო. უცბად მოფრინდა და უზარმაზარი არწივი, გადაიძრო ბუმბულის ტანსაცმელი და ისეთი ღამაში ქალი გამოვიდა, რომ ხელმწიფის შვილს

იმისი სილამაზისაგან სულ თვალები დაუბნელდა. ქალს ხელში ოქროს წკებლა ეჭირა, გადაჰკრა ის წკებლა ყარაულებს და უთხრა, — თქვენამც ქვეულხართ დილამდე ქვებადო. მერე მკვდარს გადაჰკრა და გააცოცხლა. შესდგა ზედ, დაუგრისა მკლავები და გათენებამდე სულ ასე აწამა. დილას გადაჰკრა წკებლა და ისევ მოკლა. ხელმწიფის შვილმა მკვლავური ეს დაინახა და ბრაზი წაეკიდა, წამოიცვა თითზე რაშის ნარქუარი ბეჭედი, გამოვარდა საფარიდან და ქალს ხელი წკებლაზე უტაცა. ქალმა მოასწრო ხელიდან დასხლტომა, წკებლა ბიჭს შეატოვა, თვითონ ერთ წამში ისევ არწივად გადაიქცა და გაფრინდა.

წამოვიდა ხელმწიფის შვილი და მოვიდა თავის ძმანად ფიცებთან. ადგნენ იმავე დღეს და გასწიეს ისევ ეშმაკის ქალების საქებნელად. ბევრი იარეს თუ ცოტა იარეს, ბოლოს ერთ სახელმწიფოში გავიდნენ. ხედავენ, რომ ხალხი დაბეჩავებული და დაყვითლებულია და ღონემიხდილი ძლივს დალასლასებს. მივიდნენ ამ ქვეყნის ხელმწიფესთან და მიზეზი ბკითხეს. ხელმწიფემ უთხრა:

— ჩემს ქვეყანაში პურის მოსავალი არ მოდის და პურს სულ მეზობელი სახელმწიფოებისაგან ვყიდულობდი, მაგრამ ეს ერთი ხანია, ზღვას რალაც ავი სული დაეპატრონა, ვაგზავნით გემებს მეზობელ სახელმწიფოებში, დატვირთავთ ბურით, წამოვიღებთ და შუა ზღვაში რომ შემოვალთ, ის ავი სული დაგვეცემა და გემებს გვიძირავს, ხალხი ყოველდღე ათასობით მეხოცება და, თუ ასე გაგრძელდა, ალბათ სულ მოკლე ხანში ყველანი ამოვწყდებითო.

ხელმწიფის შვილმა უთხრა:

— მოდი მე გამაყოლეთ გემებს, იქნება ღმერთი შემეწიოს და თქვენს მეზღვაურებს რამე ვუშველოო.

ხელმწიფემ ნება დართო და ხელმწიფის შვილიც გაჰყვა გემებს. ზღვა აქედან მშვიდობიანად გაიარეს, იყიდეს პური, დატვირთეს გემები და გამობრუნდნენ. ზურგის ქარი უბერავდა და გემები სწრაფად მოსრიალეებდნენ ზღვის მოღურჯო ზედაპირზე. მაგრამ შუა ზღვას რომ მიაღწიეს, ციდან ერთი უშველებელი არწივი მოფრინდა, დააფრინდა წინა გემს კლანჭებით და გადაბრუნება დაუპირა. მეზღვაურები

შიშით გაქვედნენ, ხელმწიფის შვილმა კი წამოიყვა თავისი ალმასის ბეჭედი მარჯვენა ხელის ნეკა თითზე და სტაცა არწივს კლანჭებში ხელი, არწივი შეშინდა, გემს კლანჭი უშვა და გაფრინდა, ხოლო ბიჭს ხელში ოქროს ქოში შერჩა.

გამოატარა ბიჭმა პურით დატვირთული გემები და მოიყვანა მშვიდობით თავიანთ ქვეყანაში. ხელმწიფე სიხარულისაგან აღარ იყო, ეხვეოდა და ჰკოცნიდა. ბოლოს უთხრა.

— რა გინდა, რომ მოგცე, რით გადაგიხადო ამდენი სიკეთეო?

— მე არაფერი არ მინდა, — უთხრა ხელმწიფის შვილმა, — მარტო ამასა გთხოვ, ამ ჩემს ძმადნაფიცებს დაგიტოვებ და ჩემს დაბრუნებამდე შემიწახე. ვატყობ, დაილაღნენ და ჩემთან სიარული უჭირთ, მე კი ისევ უნდა წავიდე და სანამ ჩემს საძებარს არ ვიპოვი, არც დავისვენებო. — გამოემშვიდობა ხელმწიფეს, გადააკოცნა ძმობილები და მარტოკა გაუდგა გზას.

— მიდის და, ვინც კი გზაში შეხვდება, ყველას ეშმაკის მზეთუნახავი ქალების ამბავს ეკითხება: ბოლოს ერთი ღრმად მოხუცი ხელჯღოსიანი კაცი შემოხვდა. იმ კაცმა უთხრა:

— აგე აიმ წყალგალმა ერთი შავი არაბი ცხოვრობს. ერთი ყბა ცისთვის მიუბჯენია, მეორე დედამიწაზე უდევს და ვინც კი ახლოს მივა, ყველას ყლაპავს, სწორედ ის არის იმ ქალების მოურავი და მათი ამბავიც იმან იცის. მაგრამ არ გირჩევ, შვილო, იმასთან მისვლას, — დაუმატა ბერიკაცმა, — ვინც კი გასულა, უკან აღარ დაბრუნებულა და ვაითუ, ვერც შენ გადარჩეო.

— შენ მაგის ფიქრი ნუ გექნებაო, — უთხრა ხელმწიფის შვილმა და წავიდა. გავიდა მდინარეს, მიდის და მიიმდერის. დაინახა შავმა არაბმა და შორიდანვე დაუყვირა:

— ვინა ხარ, რა სულიერი ხარ, ჩემი შიშით ძირს ჭიანჭველას ვერ გაუვლია და მაღლა ფრინველს და შენ როგორ გაბედე აქ გამოსვლაო?

— ახლოს მოდი და პასუხს გაგცემ, შორიდან რა გელაპარაკოლი — დაუძახა ხელმწიფის შვილმა.

წამოვიდა არაბი მუქარით და კიდევ დაუძახა

— ბედი შენი, რომ მაძლარი ვარ, თორემ ერთ ლუკმად  
ბრ მეყოფოდით!

ხელმწიფის შვილმა წამოიცივა ბეჭედი მარჯვენა ხელის  
ნეკა თითზე და იმავე კილოზე მიუგო:

— შორიდან მუქარა რა ვაჟკაცის წესია, არ გაგიგონია,  
თავის ქება კიტრად არა ღირსო!

მოვიდა არაბი, დაუქმინა და შესაჭმელად მიეტანა, მაგ-  
რამ ხელმწიფის შვილმა არ აცალა, სწვდა ყბაში, დაახეთქა  
მიწაზე და მთელი კბილები ძირიანად დააძრო. არაბი შე-  
ესხვეწა; — ნუ მომკლავ და რასაც მომთხოვ, ყველაფერს შე-  
გისრულებო.

— მაშ, მასწავლე, სად არიან შენი ქალბატონები? —  
ჰკითხა ხელმწიფის შვილმა.

არაბმა ერთი სალი კლდე დაანახვა და უთხრა:

— მიდი იმ კლდესთან, დაარტყი ჩემი ერთ-ერთი კბილი,  
კლდე გაიხსნება და რასაც დაეძებ, იქ იპოვიო.

გაუშვა ბიჭმა არაბი და წავიდა. მივიდა იმ ყრუ კლდე-  
სთან, ამოიღო არაბის წინა კბილი და დაჰკრა. კლდე გაიბო  
და შიგნით ერთი ოქრო-ვერცხლით მოვარაყებული ბროლის  
კოშკი გამოჩნდა. ბიჭი უშიშრად შევიდა შიგ და მიათვა-  
ლიერ-მოათვალიერა. ნახა, ერთ ოთახში მდიდრული სუფრაა  
გაშლილი, რას ინატრებ სულო და გულო, რომ ზედ არ ელბ-  
გოს, მაგრამ კაცის ჭაჭანება არსად ჩანს. ბიჭმა იფიქრა, აქ  
რალაც ამბავიაო, შეძვრა ტახტის ქვეშ და დაუდარაჯდა.

უცბად ატყდა შხუილი და ოთახში სამი არწივი შემოფ-  
რინდა. გადაიძვრეს ფრინველის ბუმბული და მზეთუნახავი  
ქალები გამოჩნდნენ. ისეთი ლამაზებია, ისეთი, რომ კაცის  
თვალი უკეთესს ვერაფერს ნახავს. არ გასულა დიდი ხანი და  
ოთახში არაბიც შემოვიდა. ქალებმა უთხრეს არაბს:

— აბა, მოურავო, ერთი შენებურად გაგვიმასპინძლდი,  
ხომ იცი, დებს სამი წელია, ერთმანეთი აღარ გვინახავს და  
პური ერთად არ გვიჭამიაო.

რაც იყო სუფრაზე ხომ იყო და არაბმა ორი იმდენი სხვა  
დააღაგა. მოუსხდნენ დები სუფრას და შეუდგნენ პურის ჭა-  
მას. არაბმა ოქროს სურით ოქროს თასებში ღვინო დაუსხა  
და დებმა ერთმანეთის სადღეგრძელო შესვეს. არაბმა მყო-  
748



ჩედაც დაუსხა ღვინო. თასი უფროსმა დამ აიღო და თქვა:

— სამი წელიწადი ერთ ქალაქს ვიყავი გადამტერებუ-  
ლი, ქალაქის სამრეკლოზე ჩემი ოქროს ცხვირსახოცი მქონ-  
და გადამფენილი და ხალხს ვპირდებოდი, ვინც მოიტაცებს,  
ცოლად გაყვებით. ბევრმა გაჟაკცმა სცადა ბელი, მაგრამ  
ყველას სიცოცხლის ფასად დაგუსგო. იმ ქალაქში ახალგაზ-  
რდა კაცი აღარ დავტოვე. ბოლოს მოვიდა ერთი პირმშენი-  
ერი ჭაბუკი და ჩამოიღო ჩემი ცხვირსახოცი. მე მაშინვე  
არწივად გადავიქეცი და ბრჭყალები დავტაცე, რომ მალლა  
ამეყვანა და დედამიწაზე დამემარცხებინა, მაგრამ ჭაბუკმა  
დამასწრო და მიწაზე თვითონ მე დამანარცხა. რომ არ მე-  
მარჯვა და არ გავსხლტომოდი, ახლა ცოცხალი აღარ ვიქ-  
ნებოდი, მე კი გადავურჩი, მაგრამ ჩემი ცხვირსახოცი იმას  
დარჩა. მოდით, იმ ჭაბუკს გაუმარჯოს, ის რომ ვაჟაკი არ  
ყოფილიყო, ვერც წინააღმდეგობას გამიწევდა და ვერც  
ცხვირსახოცს წამართმევდაო.

თასი ახლა შუათანა დამ აიღო და დაილოცა:

— მე ერთი ხელმწიფის შვილზე ვიყავი გადამტერებუ-  
ლი, მამას მკვდრად მოვაჩვენე, მამამ ოქროს კუბოში ჩა-  
ასვენა და კუბო ერთ ეკლესიაში დაადგმევინა. თან გუშაგე-  
ბი დაუყენა და ჩემი შეპყრობა უბრძანა. შუალამისას მივ-  
დიოდი და გუშაგებს ჩემი ოქროს წკეპლით გავაქვავებდი.  
მერე გავაცოცხლებდი ხელმწიფის შვილს და დილამდე ვა-  
წვალებდი. დილას ისევ გადავკრავდი წკეპლას, მკვდრად  
ვაქცევდი და გამოვფრინდებოდი. მაგრამ ერთ დილას ვილაც  
უცხო ჭაბუკმა მტაცა ხელი, წკეპლა წამართვა და თვითონ  
მეც ბეწვზე გადავრჩი დაჭერას. მოდით, იმ ჭაბუკს გაუმარ-  
ჯოს და ის ჩემი ჯადოსნური წკეპლაც მშვიდობაში მოიხ-  
მაროსო.

დებმა ეს სადღეგრძელოც ერთხმად დალიეს და თასი ახ-  
ლა პატარა დამ ითხოვა.

— მე ერთი სახელმწიფოს დაღუპვა მინდოდა. იმ ქვეყა-  
ნაში მოსავალი არ მოდის და პურს სულ მუზობელი სახელ-  
მწიფისაგან ყიდულობენ. მე ზღვაზე ვიყავი გადარაჯებუ-  
ლი და საიდანაც არ უნდა წამოედოთ პური, დავხვდებოდი

გემებს და მეზღვაურებიანად წყალში ვძირავდი. ხალხი ისუ-  
დაიძმა, რომ ერთმანეთს ჭამდნენ, მაგრამ ერთხელ გემებს  
ვიღაც უცხო ჭაბუკი გამოჰყვა, და ის იყო, დაეტაცე კლან-  
ჭი წინა გემს, რომ გადამებრუნებინა, და ჭაბუკმაც მტაცა  
ფეხში ხელი, მე გავუსხლტი, მაგრამ ფეხიდან ოქროს ქოში  
კი წამაძრო. მოდით, იმ ვაჟკაცს გაუმარჯოს და ჩემი ოქ-  
როს ქოშიც მშვიდობაში მოახმაროსო.

უკანასკნელად არაბმა აიღო თასი და ერთი სადღეგრძე-  
ლო იმანაც ითხოვა: — რაკი თქვენ, თქვენი თქვით, მეც ჩემ-  
სას მოგახსენებთო, — და დაიწყო:

— მე ხომ თქვენი დაბადებისთანავე მამათქვენმა თქვენს  
მოურავად დამნიშნა: და კარგად იცით, რომ ამ ჩვენს საბრ-  
ძანებელში ჭიანჭველაც არ გამიჭაჭანებია. დღეს გავიხედე  
და დავინახე ერთი უცხო ჭაბუკი, ვითომ აქ არაფერიო, მო-  
დის და მოიმღერის. გავბრაზდი და შევუტიე, მაგრამ, გგო-  
ნიათ შეშინდა? პირიქით, აქეთ შემომიტირა. მივვარდი და  
შეჭმა დავუპირე, მაგრამ დამასწრო, მტაცა ყბაში ხელი და  
აღარცერთი კბილი არ შემარჩინა. მოდით, იმ ჭაბუკსაც გაუ-  
მარჯოს, ვაჟკაცი რომ არ ყოფილიყო, ამას ხომ ვერ მიხამ-  
დაო.

დალია არაბმა სადღეგრძელო და ხელმწიფის შვილიც  
გამოძვრა ტახტქვეშიდან. მივიდა სუფრასთან, აიღო ღვინით  
სავსე თასი და თქვა:

— თქვენ ისეთი კარგი სადღეგრძელოები თქვით, რომ  
არ შემიძლია, სამადლობელი არ შემოგაწიოთ, — და ყველა-  
ნი სათითაოდ ადღეგრძელა. მერე ამოიღო წართმეული ნივ-  
თები და დაურიგა, თან სიცილით დააყოლა, — რაკი ასე ძა-  
ლიან წუხნართ ამათ დაკარგვაზე, აჰა, ისევ თქვენთვის და-  
მიბრუნებიაო.

ასლა კი მიხვდნენ დები, გინც იყო და ერთმანეთში ცი-  
ლობა შეექმნათ, არა ჩემი ქმარი უნდა იყოს, არა—ჩემიო.  
სელმწიფის შვილმა უთხრა, — სამნი დანი თქვენა ხართ,  
სამნი ძმანი — ჩვენ. მე ყველაზე უმცროსი ვარ და თქვენ-  
განაც უმცროსი მერგება. ხოლო უფროსსა და შუათანას ჩე-  
მი ძმებისთვის წაგიყვანთ. ოღონდ ერთი პირობით, — დაუ-  
მატა ბოლოს, — მამათქვენს რომ სამი მზეთუნახავი ქალი

ჭყავს დატყვევებული, თუ იმათაც გაათავისუფლებთ და თან წამოიყვანთო.

ქალები, რა თქმა უნდა, სიხარულით დათანხმდნენ და არაბი თავლაში გაგზავნეს ცხენების გამოსაყვანად. არაბმა ყველასთვის დარახტული რაში გამოიყვანა და თვითონ დალონებული განზე გადავა. ხელმწიფის შვილს შეებრალა არაბი და ჰკითხა:

— შენც რომ წაგიყვანო, ბოროტებას მოიშლიო?

— მე სამსახურის მეტი არაფერი ვიცი, — უთხრა არაბმა, — და ვისაც ვემსახურები, ვუერთგულე კიდეც. შემ მიბრძანე და რას და როგორც დამავალე, ისე გავაკეთებო.

წამოიყვანა ხელმწიფის შვილმა არაბიც და წამოვიდნენ ეშმაკის ადგილ-სამყოფელისაკენ. შევიდნენ ქალები თავიანთი მამის სასახლეში და გამოიყვანეს დატყვევებული მზეთუნახავი დები. უკან ეშმაკი მოსდევდა და თავის ქალებს სწყევლიდა. — თქვე სულგაყიდულეებო, სად მიგყავთ ჩემი ტყვეები. თქვენ გამყიდეთ, გამყიდეთ და აღარც მაგათ მარჩენთო?

ხელმწიფის შვილმა უთხრა ეშმაკის ქალებს:

— როგორც ვხედავ, მამათქვენი ბოროტებას არ მოიშლის და რა ვუყო, შვილები ხართ და თქვენ გადაწყვიტეთ, მოვკლა თუ დავტოვო?

— მოკვლით რას გამოვრჩებით, — უთხრა შუათანა დამ, — აჰა, ჩემი ოქროს წკებლა, ამას ორნაირი ძალა აქვს, — კეთილი და ბოროტი, გადაჰკარი მამაჩვენს და უთხარი, — დაეხსენ ბოროტს და შეუდექ კეთილსო, და ისიც კეთილ სულად გადაიქცევაო.

ხელმწიფის შვილი ასეც მოიქცა, გადაჰკრა წკებლა ეშმაკს და უთხრა, — დაეხსენ ბოროტს და შეუდექი კეთილსო, ეშმაკი იმავე წამს კრავივით თვინიერი გახდა და ხელმწიფის შვილს შეეხვეწა, — წამიყვანე და, რაკი ყველა ჩემიანს ბოროტების გზა დაუგდია, მეც სიკეთეზე მიმსახურეო.

წამოიყვანა ხელმწიფის შვილმა ეშმაკიც და წამოვიდნენ, მოვიდნენ უპურო სახელმწიფოში, ხელმწიფე და მთელი ხალხი სიხარულის ყიჟინით შეეგება ხელმწიფის შვილს, ხელმწიფის შვილმა ძმადნაფიცები მოიკითხა და თავ-თავი

აწთი საცოლევები გადასცა. ხელმწიფემ ეშმაკის ნაბოლარა გოგო და ხელმწიფის შვილი ისე არ გამოუშვა, სანამ ჯვარი არ დასწერა და ქორწილი არ გადაუხადა. სამი კვირა განუწყვეტელ ლხინსა და ქეიფში გაატარებინა და მერე თავისი ქვეყნის საზღვრამდეც დიდი ზარ-ზეიმით და დაფ-წინწილით მიაცილა.

წამოვიდნენ ყველაში და მოვიდნენ შვილმკვდარი ხელმწიფის ქვეყანაში. მივიდნენ იმ ეკლესიაში, სადაც ხელმწიფის მკვდარი შვილი ესვენა და ხელმწიფის შვილმა უთხრა ეშმაკის შუათანა ქალს:

— აბა, აიღე შენი ჯადო წკებლა და გამოისყიდე დანაშაულიო.

შუათანა ქალმა გადაჰკრა წკებლა ჯერ კუბოში მწოლიარე ხელმწიფის შვილს, მერე გაქვავებულ გუშაგებს და ყველანი გააცოცხლა. გაგზავნა კაცი ხელმწიფის შვილმა ხელმწიფესთან და შვილის გაცოცხლება მიულოცა. გაიხარა დიდად ხელმწიფემ, დიდი ლხინი და მეჯლისი გაუმართა, დიდადაც დაასაჩუქრა და თავისი ქვეყნის საზღვრამდე სულ ასე ლხინ-შექცევით მიაცილა.

წამოვიდნენ იქიდანაც და მოვიდნენ იმ ქალაქში, სადაც ეშმაკის უფროს ქალს სამრეკლოზე ოქროს ცხვირსახოცი ჰქონდა გადმოფენილი და ახალგაზრდებს ღუპავდა. ხელმწიფის შვილმა უფროს ქალსაც იგივე უთხრა:

— ახლა შენი ჯერია და აბა, გამოისყიდე დანაშაულიო.

უფროსმა ქალმა ამოიღო თავისი ოქროს ცხვირსახოცი, მიუსვ-მოუსვა დახოცილ ახალგაზრდებს და ყველანი დააცოცხლა. გაგარდა ხმა ქალაქში და მთელი ქალაქი სამრეკლოს მოაწყდა. შეიქმნა დიდი ლხინი და სიხარული, გაცოცხლებული ჭაბუკების დედები სიხარულის ცრემლს ღვრიდნენ, ესვეოდნენ ხელმწიფის შვილს, ჰკოცნიდნენ და მადლობას უხდიდნენ.

სამი დღე და ღამე იქაც სულ ლხინსა და ქეიფში გაატარეს, მეოთხე დღეს დაემშვიდობნენ ქალაქის მცხოვრებთ, წამოვიდნენ და მოვიდნენ ხელმწიფის შვილის ძმადნაფიცო უფლისწულების სახელმწიფოში. ხელმწიფემ შვილებს იმავე დღეს ჯვარი დასწერა თავ-თავიანთ საცოლევებზე და სამივე

შვილის ქორწილი ერთად გადაიხადა. მერე დაუტვირთა ჯორ-აქლემები ხელმწიფის შვილს თვალ-მარგალიტით, სტავრა-აბრეშუმით და მთელი თავისი ამაღა მაცრად გამოაყოლა. მოვიდა ხელმწიფის შვილი თავის ქვეყანაში, ჩააბარა ძმებს მათი საცოლევები და მამას უთხრა, ჯვარი დაგვწერეთ. ხელმწიფემ მთელი თავისი სამღვდლოება მოიწვია და შვილებს ჯვარი დასწერა. მერე ხელმწიფობაც უმცროს შვილს გადაულოცა და სამეფო გვირგვინი თავისი ხელით დაადგა.

ხელმწიფის შვილმა მაცარიონი გაისტუმრა და მეორე დღიდანვე ქვეყნის მართვა-გამგებლობას შეუდგა. არაბს ისევ მოურავობა ჩააბარა და ისიც ჩვეული ერთგულებით ემსახურებოდა, ვაი იმას, ვისაც ახალგაზრდა ხელმწიფის ორგულობას შეამჩნევდა. ეშმაკი კი მთელს სახელმწიფოს ირგვლივ უვლიდა, დადიოდა ტყე-ღრეში, მთიდან — ბარში, ბარიდან — მთაში და ვისაც გაჭირებულს ნახავდა, ყველას შველოდა.

ჭირი — იქა, ლხინი — აქა,  
ქათო — იქა, ფქვილი — აქა.  
მთას ურემი ავიტანე,  
წამოვიდა გორებითა,  
აქ სიცოცხლით გამიძეხით,  
საიქიოს ცხონებითა.





## ნაბოლარა ძმა

იყო და არა იყო რა, იყო ერთი ხელმწიფე და ჰყავდა საჟი ვაჟი და სამი ქალი. ხელმწიფე ავად გახდა, იგრძნო სიკვდილის მოახლოება, დაუძახა თავის ვაჟებს და უთხრა:

— ჩემო შვილებო, მე დიდი დღე აღარ მიწერია და, აბა თქვენ იცით, ვინძლო ისე სიმართლითა და სიკეთით მართოთ ქვეყანა, როგორც მე ვმართავდი. . . . .ოღონდ ამას კი გეტყვი, რომ ერთმანეთის სიყვარული ნურასოდეს დაგიძვირდებათ და ნურც ერთი პირი გაგიტყუებათ, თორემ მტერი მოგერევათ, ერთ პირზე მდგომებს კი ვერაფერს გამოგარჩებათო. გარდა ამისა, დებსაც უნდა უპატრონოთ. ვცადეთ, წინაპირველი ბედი არ დაუკარგოთ, ვინც პირველად გთხოვოთ დები, პირდაღებული ეშმაკებიც რომ იყვნენ, აღუქით და მიათხოვეთო.

თქვა ეს ანდერძი ხელმწიფემ და სულიც განუტევა. შვილებმა, როგორც ხელმწიფეს შეჰფეროდა, კარგი პატივით დაასაფლავეს, იგლოვეს და შეუდგნენ ქვეყნის მართვას.

ერთ დღეს ხელმწიფის შვილებთან თეთრი დევი მოვიდა უფროსი დის სათხოვნელად. სთხოვა უფროს ძმას, მაგრამ უფროსმა არ მისცა, სთხოვა საშუალოს და არც იმან მისცა. ბოლოს სთხოვა უმცროსს და მისცა.

— მე მამაჩემის ანდერძს ვერ გავტეხო, — თქვა უმცროსმა ძმამ, გამოიყვანა უფროსი და და დევს ჩააბარა.

გავიდა ცოტა ხანი და ახლა წითელი დევი მოვიდა შუათანა დის სათხოვნელად. სთხოვა უფროს ძმას და არ მისცა, სთხოვა შუათანას და არც იმან მისცა, ბოლოს სთხოვა ნა-

ბოლარას და იმან მისცა, — მე მამაჩემის ანდერძს არ გადავალო, — თქვა, გამოიყვანა შუათანა და და წითელ დევს გაატანა.

გავიდა კიდევ ცოტა ხანი და ახლა შავი დევი მოვიდა უმცროსი დის სათხოვნელად. უფროსი და შუათანა ძმები ახლაც უარზე დადგნენ. ნაბოლარამ კი თქვა, — მე მამაჩემის ანდერძს არ გავტეხო, — და უმცროსი და შავ დევს მიათხოვა.

ერთხელ ძმები სანადიროდ წავიდნენ. გაისროლა უფროსმა ძმამ ისარი და ირემი მოკლა, გაისროლა შუათანამ და მოკლა ჯიხვი, გაისროლა ნაბოლარამ ისარი და ერთ მოტიტვლებულ მთაზე დაერჭო. ძმებმა დაცინვა დაუწყეს:

— ყველაფერში ასეთი ბედოვლათი როგორ უნდა იყო, ჯერ იყო და, დები დევებს მიათხოვე, ახლა ნადირობაშიც ხელი მოგეცარათ.

ნაბოლარას ეწყინა დაცინვა, მაგრამ მამის ანდერძი ახსოვდა, ერთმანეთის სიყვარული გქონდეთო, და ძმებს საწყენი არაფერი აკადრა, გაიცინა და მშვიდად უთხრა:

— მოიცათ, ძმებო, ნუ დამცინით, ჯერ ვნახოთ, იქნებ არც ჩემი ისარი დახარჯულა ტყუილუბრალოდო.

წავიდნენ სამივენი და ნახეს, რომ ისარი ოქროს სასახლის თავზე დაცემულიყო. შევიდნენ სასახლეში, მაგრამ შიგ ძეხტრციელი არ ჭაჭანებდა, ერთ მოზრდილ დარბაზში ოქროს სუფრა იყო გაშლილი და ზედ ოქროს ჩანგი და ნაირნაირი სასმელ-საჭმელი ელაგა. მიუსხდნენ სუფრას ძმები და კარგა ლაზათიანად მოუღებინეს.

— აი, ძმებო, ახლა ხომ ხედავთ, რომ უერთოდ არც ჩენი ისარი დახარჯულა და წელან სულ ტყუილად დამცინოდითო, — უთხრა ძმებს ნაბოლარამ და დაუმატა, — ეს სახლკარი და სიმდიდრე უპატრონო არ იქნება. მოდით, ამაღამ ვუყარაულოთ და გავიგოთ, ვისია, გინც არის, ადრე თუ გვიან, სახლში ხომ უნდა დაბრუნდეს და სხვა თუ არაფერი, გავიცნობთ მაინცო.

ძმები დათანხმდნენ. წესით პირველ ღამეს უფროს ძმას უნდა ედარაჯა, მაგრამ ისე იყო მთვრალი, რომ ჩამოჯდა თუ არა სკამზე, მაშინვე სვრინვა ამოუშვა. ნაბოლარა ადგა,

მძინარე ძმა ლოგინში გადმოაწვინა და იმის ადგილზე თვითონ დაჯდა. მშვილდ-ისარი გვერდით დაილაგა და, რომ აქ დასძინებოდა, ჩანგის დაკვრა დაიწყო.

ეს სასახლე სამი ძმა დევისა იყო. ისინიც რიგრიგობით იძინებდნენ სახლში. დღეს უფროსი ძმის ჯერი იყო. შუალამემ რომ მოაწია, მოვარდა უფროსი ძმა, სამთავიანი დევი, შავი რაშით და, თავის სახლიდან ჩანგის ხმა რომ გაიგონა, განრისხებულმა ხმამალა შესძახა:

— ვინ შესულხარ ჩემსა სახლსა,  
ვინ ზიხარ ჩემს თქროს სკამსა,  
ვინ აქედერებს ჩემსა ჩანგსა?  
ადე, ჩქარა გამეცალე,  
თორემ ახლავ მოგკვეთ თავსა!

ნაბოლარამ ჩამოჰკრა ჩანგს და სიმღერით უბასუხა:

— მე შევსულვარ შენსა სახლსა,  
მე ვზივარ შენს თქროს სკამსა,  
მე ვაქედერებ შენსა ჩანგსა.  
თუ აქით არ გამეცლები,  
თვითონ მოგკვეთ სამსავ თავსა!

დევი უფრო განრისხდა და ხმალამოწვდილი დარბაზში შევარდა. ნაბოლარამ მომართა მშვილდ-ისარი, ესროლა და დევს ძირს ბრაგვანი მოადენინა. დასჭრა ექვსივე ყური და ჯიბეში ჩაიწყო, ასო-ასო აკუწა დევი და გადაყარა, სისხლი მიაშროალ-მოაშროალა, რაში თავლაში დამალა და გათენებამდე ყველაფერი ისე მოათავა, რომ ძმებს არაფერი გააგებინა. ძმები მხოლოდ მზის ამოსვლისასდა გაადვიმა და სუფრასზე მიიწვია:

— ადექით ძმებო, ბური ვჭამოთ, ლხინი ვმახოთ და ერთმანეთს ნურა გვირჩვენია რათ.

ადგნენ ძმები, დაიბანეს და მიუსხდნენ სუფრას. დადამა და ის დღეც და ჯერი შუათანა ძმაზე მიდგა, მაგრამ შუათანასაც ისევე ჩაეძინა, ისევე ადგა ნაბოლარა, გადააწვინა ძმა



ლოგინში და სადარაჯო ადგილზე ისევ თვითონ დაჯდა, მშვილდ-ისარიც ისევ გვერდით დაილაგა და ჩანგი მომართა.

შუალამისას მოვარდა შუათანა ძმა — ცხრათავიანი დევი წითელი რაშით და, თავისი სახლიდან ჩანგის ხმა რომ გაიგონა, მრისხანედ შესძახა:

— ვინ შესულხარ ჩემსა სახლსა,  
ვინ ზიხარ ჩემს ოქროს სკამსა,  
ვინ აჟღერებს ჩემსა ჩანგსა?  
ადე, ჩქარა გამეცალე,  
თორემ ახლავ მოგკვეთ თავსა!

ნაბოლარამ ჩანგს ჩამოჰკრა და პასუხი კვლავ სიმღერით გამოესძახა:

მე შევსულვარ შენსა სახლსა,  
მე ვზივარ შენს ოქროს სკამსა,  
მე გაჟღერებ შენსა ჩანგსა!  
თუ აქით არ გამეცლები,  
თვითონ მოგკვეთ ცხრავე თავსა!

დევი განრისხდა და სმალამოწვდილი შევარდა. ნაბოლარამ სტყორცნა ისარი და დევი უსულოდ დასცა ძირს. საჩქაროდ დააჭრა ყურები და ჯიბეში შეინახა, დევი აკუნა და გადაყარა, სისხლი მოამშრალა, წითელი რაში თავლაში დამალა და ახლაც ყველაფერი ისე მოათავა, რომ ძმებს არაფერი გააგებინა. მზე რომ ამოვიდა, მხოლოდ მაშინღა გააღვიძა და ისევ სუფრასზე მიიწვია:

— ადექით, ჩემო საყვარელო ძმებო, ბური ვჭამოთ, ლხინი გაეწიოთ და ერთმანეთს ნურა გვირჩევნია რაო.

ადგნენ ძმები, დაიბანეს და მიუსხდნენ სუფრას. დაღამდა ის დღეც და ჯერი უკვე თვითონ ნაბოლარასზე მიდგა. უთხრა ძმებს: — თქვენ დაიძინეთ და შიში ნურაფრისა გაქვთო. ძმებმა დაიძინეს, ნაბოლარა კი დაჯდა ოქროს სკამზე, მომართა მშვილდ-ისარი და ჩანგი ააჟღერა.

შუალამემ რომ მოაწია, ერთი გუგუნ-გრიადი ატყდა  
თეთრი რაშით უმცროსი ძმა — თორმეტთაჲიანი დევი მო-  
ვარდა. გაიგონა ჩანგის ხმა და მრისხანედ შესძახა:

— ვინ შესულხარ ჩემსა სახლსა.  
ვინ ზიხარ ჩემს ოქროს სკამსა,  
ვინ აჟღერებს ჩემსა ჩანგსა?  
ადე, ჩქარა გამეცალე,  
თორემ ახლავ მოგკვეთ თავსა!

ნაბოლარამ ჩანგს უფრო ძლიერად ჩამოჰკრა და პასუხი  
ამასაც სიმღერით მიუგო:

— მე მოვსულვარ, შენსა სახლსა,  
მე ვზივარ შენს ოქროს-სკამსა,  
მე ვაჟღერებ შენსა ჩანგსა!  
თუ აქით არ გამეცლები,  
თვითონ მოგკვეთ ყველა თავსა!

— აბა, ეგ გამიბუდეო?! — იშიშვლა დევმა ხმალი და შე-  
ვარდა, მაგრამ დაასწრო ნაბოლარამ, სტყორცნა ორბის-  
ფრთიანი ისარი და დევი ფართი-ფართ გაახვრეტირა. დაეცა  
დევი უსულოდ და სახლმა სულ ზანზარი დაიწყო. წამოხტა  
ნაბოლარა და ყურების დაჭრას შეუდგა. ოცდამეოთხე რომ  
მოსჭრა, ყური გადავარდა, სანთელს დაეცა და ჩააქრო. და-  
ღონდა ნაბოლარა, ბნელში ვერაფერს გააკეთებდა და ვერც  
გათენებას დაუცდიდა, — ძმები გაიღვიძებდნენ და ყველა-  
ფერს შეიტყობდნენ, ეს კი არ უნდოდა. გამოვარდა საჩქა-  
როდ აივანზე და გაიხედ-გამოიხედა, — იქნებ ცუცხლი სად-  
მე შევნიშნო. მართლაც შორს სინათლის მკრთალი ჭიატი  
დაინახა და მაშინვე იქით გაეშურა. იარა, იარა და ერთ სამ-  
სართულიან ბროლის კოშკს მიადგა. სინათლე სწორედ პირ-  
ველი სართულის ფანჯრიდან გამოდიოდა, მაგრამ ეს პირ-  
ველი სართული ათი მეტრის სიმაღლისა მაინც იქნებოდა  
და შესასვლელი კარი და კიბე კი არსად უჩანდა. ნაბოლარა  
არ დაიბნა, საჩქაროდ დასჭრა ცაცხვის ბაყილები, ააძრო

ქერქი და თოკი დაგრიხა, თოკს კაუჭი გამოაბა, შესტყორცნა, მოსდო ფანჯრის კოჭაკს, აცოცდა თოკზე და ოთახში გადავიდა. ოთახში ხელმწიფის სამ მზეთუნახავ ქალს ეძინა. სამივეს ორ-ორი სანთელი ენთო, — თითო თავით და თითო ფეხით და ერთი მოზრდილი ოქროს შანდალი ოთახის შუაშიც იდგა.

ნაბოლარამ ჯერ უფროს ქალს შეუცვალა სანთლები, — ფეხით სანთელი თავით დაუდგა, თავით სანთელი — ფეხით, და თქვა, — ეს ჩემი უფროსი ძმისთვისაო. მერე შუათანას შეუცვალა და შუათანა ძმისთვის დანიშნა, ბოლოს უმცროს ქალთან მივიდა, რომელიც ყველაზე ღამაში იყო და შეუცვალა სანთლები. ეს ჩემთვისაო, თქვა და ერთი ლოყაზეც აკოცა, აიღო ოქროს შანდალი და წამოვიდა. მოვიდა სასახლეში და აანთო სანთელი. იპოვა ოცდამეოთხე ყური და ჯიბეში შეინახა, მერე დევი აკუწა, ხორცი გადაყარა, სისხლი მიამშრალ-მოამშრალა და შავი რაშიც თავლაში დააბა. ამის შემდეგ გააღვიძა ძმები და უთხრა:

— აღექით, ძმებო, ბური გავტეხთ, ლხინი ვნახთ და ერთმანეთის თავს ნურა გვირჩევენია რაო.

ადგნენ ძმები, დაიბანეს ხელ-პირი და სუფრას შემოუსხდნენ.

მომხდარი ამბავი ნაბოლარამ ძმებს არც ახლა უთხრა. ძმებმა გული დაიმშვიდეს: რაკი სამი ღამე ისე გავიდა, რომ სახლს არავინ მოაკითხა, ჩანს უპატრონო ყოფილაო და საბოლოოდ ამ სახლში დაბინავება გადაწყვიტეს. უფროსმა და შუათანამ ყველაფერი თვითონ გაიყვეს, ნაბოლარას კი ერთი ფიცრის საწოლი არგუნეს, ერთი გაცვეთილი თექის ნაგლეჯი მისცეს და თავლაში გააგდეს, — შენთვის ეგეც საკმარისიაო.

ნაბოლარას ეწყინა, მაგრამ მამის ანდერძი არც ამჯერად გატეხა და ძმებს არ აუხირდა.

— კი, ძმებო, ოღონდ თქვენა მყავდეთ კარგად და მე ამასაც ვიმყოფინებო. — უთხრა, წავიდა და შევიდა თავლაში, სადაც დევების რაშები ჰყავდა დამალული.

გაიღვიძეს დილას ხელმწიფის მზეთუნახავმა ქალებმა ბროლის კოშკში, საიდანაც ნაბოლარამ წუხელ შანდალი

წამოიღო, და თავზარი დაეცათ: ვინ შეუცვალათ სანთლები, ან ოქროს შანდალი რა იქნა? წავიდნენ და მამას უთხრეს:

— წუხელ ჩვენს კოშკში ვიღაც ქურდულად შემოსულა, ჩვენთვის სანთლები შეუცვლია და ოქროს შანდალი კი თან წაუღიაო.

ხელმწიფემ თქვა ამის ჩამდენი უბრალო კაცი არ იქნებაო, და საქვეყნოდ გამოაცხადა, — ქალებს ვათხოვებ და ვინც იმდენს შესძლებს, რომ ჩემი კოშკის სართულებს მისწვდება და მათ ნიშანს მოსტაცებს, იმას მივცემო.

დაიძრა საქორწინო ბიჭები დედამიწის ყველა კუთხიდან. გაიგეს ხელმწიფის შვილებმაც და წასასვლელად მოემზადნენ. ნაბოლარამ სთხოვა:

— მოდი, ძმებო, ხალხში ნუ გამომარჩევთ, ძმობა გამიწიეთ და მეც წამიყვანეთო.

• ძმებმა მასხარად აიგდეს:

— წაგიყვანოთ თორემ, სწორედ ბროლის კოშკს არ შესწვდე და ხელმწიფის ქალებს ნიშანი არ მოსტაცოო.

ნაბოლარამ კიდევ ბევრი ეხვეწა, მაგრამ ძმებმა ყური აღარ უგდეს, შესხდნენ თავ-თავიანთ ცხენებზე და წავიდნენ.

ეწყინა ნაბოლარას ძმების უსულგულობა, შევიდა თავლაში და ფიცრის ტახტზე დაღონებული ჩამოჯდა.

— რამ დაგალონაო? — ჰკითხეს რაშებმა.

ნაბოლარამ ყველაფერი უამბო, მაშინ სამთავიანი დევის შავმა რაშმა უთხრა:

— ახლავე დამადგი უნაგირი, ბალიშქვეშ ერთი ხელი აბჯარი და ტანსაცმელია, გამოიღე, შენც მოიკაზმე და წავიდეთო.

ნაბოლარამ საჩქაროდ შეკაზმა ცხენი, ბალიშქვეშიდან ერთი ხელი ტანსაცმელი გამოიღო: შავი ჩოხა-ახალუხი, შავი წულა, საცვეთი, აბჯარ-საჭურველი, გამოეწყო, მოახტა რაშს და გაქუსლა.

კოშკის ირგვლივ უამრავ ხალხს მოეყარა თავი, პირველი სართულის ფანჯარაში ხელმწიფის უფროსი ქალი იდგა და შავ მანდილს აფრიალებდა. სასიძოვები წელში წყდებოდნენ, დაუზოგავად ახტუნებდნენ ცხენებს, მაგრამ ფანჯრამდე ვერც ერთი ვერა სწვდებოდა. რაშმა უთხრა ნაბოლარას:

— დამარტყვი მათრახსი, რაც ძალი და ღონე გაქვს, ერთი ხმამალლა დამკვივლე, რომ გულში ჟრჟოლა შემიდგეს და მუკე მე ვიცო.

ნაბოლარამ დაჰკრა მათრახსი, დასჭყვივლა და რაშიც მოსწყდა ადგილს, ავარდა მალლა და გაუქროლა ფანჯარას. ნაბოლარა გადმოიხარა ცხენიდან, მისწყდა ქალს და მანდილი გამოსტაცა. ხალხმა ყიჟინა დასცა, მაგრამ ცხენიცა და მხედარიც ერთ წამში გაუჩინარდნენ.

ხალხი დაიშალა, ცხვირჩამოშვებული სასიძოვები თავთავიანთი სახლებისაკენ წავიდ-წამოვიდნენ. წამოვიდნენ ნაბოლარას ძმებიც, მაგრამ სანამ მოვიდოდნენ, ნაბოლარამ რაშს მოხადა და თავლაში დამალა, თვითონაც დაიხადა ტანსაცმელი, ისევ უნაგირის ბალიშის ქვეშ ამოდო და ძმებს ეზოში შეეგება.

— რა ჰქენით, ხელმწიფის ქალს ნიშანი ვერ მოსტაცეთო? — ჰკითხა.

ძმებმა მასხარად აიგდეს:

— სწორედ შენ არა გგავდა ის რაინდი, ცხენი რომ ააფრინა და ხელმწიფის ქალს მანდილი მოსტაცათ.

— რა ვქნა, ძმებო, — მიუგო ნაბოლარამ, — ნათქვამია, მჯობზე მჯობი არ დაილევას.

მეორე დღეს ხელმწიფემ შუათანა ქალი დააყენა მეორე სართულის ფანჯარაში და სასიძოვების ლაშქარიც ისევ დაიძრა. მოემზადნენ ნაბოლარას ძმებიც, ნაბოლარამაც ისევ სთხოვა, წამიყვანეთო, მაგრამ ძმებმა უარი უთხრეს და ისევ მასხარად აიგდეს:

— რას ამბობ, თუ წაგიყვანეთ, სწორედ ბროლის კოშკს კი შესწვდები და ხელმწიფის ქალს ნიშანს მოსტაცებო.

ძმები შესხდნენ ცხენებზე და წავიდნენ. ნაბოლარა კი შევიდა თავლაში და დაღონებული ისევ ფიცრის ტახტზე ჩამოჯდა.

— რამ დაგაღონაო? — ჰკითხეს რაშებმა.

ნაბოლარამ ყველაფერი უამბო. ახლა ცხრათავიანი დევის წითელი რაში წამოდგა და უთხრა:

— ახლავე უნაგირი დამადგი, ბალიშქვეშიდან ტანსაცმელი და საჭურველი გამოიღე, შენც მოიკაზმე და წავიდე!

თო. მოიკაზმა ნაბოლარა, შეჯდა და წავიდა. მინდორში ორი იმდენი ხალხი შეგროვილიყო და ცხენებსაც უფრო დაუზოგავად ასტუნებდნენ, მაგრამ კოშკს ნახევრამდეც ვერ სწვდებოდნენ. წითელმა რაშმა უთხრა ნაბოლარას:

— დამკარ მათრახი და ერთი ისეთი დამკვივლე, რომ გულში ქარი შემიდგეს და მერე მე ვიციო.

დაჰკრა ნაბოლარამ მათრახი და ერთი დაჰკივლა, რაშმა ისკუპა და ჰაერში ფრთოსანივით აიჭრა. ფანჯარას რომ დაუპირისპირდა, სადაც ხელმწიფის შუათანა ქალი იდგა და წითელ მანდილს აფრიალებდა, ნაბოლარა უცბად გადმოიხარა და ქალს მანდილი გამოსტაცა. ხალხმა ისევ ყიჟინა დასცა, მაგრამ ცხენი და მხედარი ახლაც თვალის დახამხამების უმალ გაუჩინარდნენ.

დაბრუნდნენ გაწბილებული სასიძოვები თავ-თავიანთ სახლებში. წამოვიდნენ ნაბოლარას უფროსი ძმებიც. ძმების მოსვლამდე ნაბოლარამ რაში დააბიზავა, თვითონაც გაიხადა ტანსაცმელი, ისევ ბალიშის ქვეშ შეინახა და ძმებს კვლავ ეზოში შეეგება.

— რა ჰქენით, კიდევ ვერ მოსტაცეთ ნიშანი ხელმწიფის ასულსო? — ჰკითხა.

ძმებმა ისევ დაცინვა დაუწყეს:

— შენმა მზემ, შენ კი მოსტაცებდი, სწორედ შენ არა გგავდა ის წითლოსანი ფალავანი, რაში რომ ოც საყენზე ააფრინა და ხელმწიფის მზეთუნახავი დაისაკუთრაო.

— რა ვუყოთ, ძმებო, — ისევ მოიკატუნა თავი ნაბოლარამ, — ამ ქვეყნად მჯობზე მჯობს რა გამოლევსო.

მეორე დღეს ხელმწიფემ უმცროსი ქალი დააყენა კოშკის სულ ზედა სართულის ფანჯარაში და ნიშნად ხელში თეთრი მანდილი დააჭვრინა. დაიძრნენ სასიძოვები და ნაბოლარას ძმებიც შეემზადნენ. ნაბოლარა არც ამჯერად წაიყვანეს. ნაბოლარა შევიდა თავლაში და ძმების უსულგულობით ნაწყენი ტანტზე ჩამოჯდა.

— რამ დაგაღონაო? — ჰკითხეს რაშებმა.

ნაბოლარამ დაღონების მიზეზი არც ახლა დაუმალა:

— ძმები მქიშბობენ და გული იმაზე მტკივაო.

წამოდგა წინ თორმეტთავიანი დევის თეთრი რაში და უთხრა:

— საჩქაროდ დამადგი უნაგირი, ბალიშქვეშიდან საჭურველი და თეთრი ტანსაცმელი გამოიღე, მოიკაზმე და წავიდეთ.— მოიკაზმა ნაბოლარა თეთრი ჩოხით, თეთრი წულასაცვეთით, თეთრი ჯაჭვ-მუზარადით და მოახტა თეთრ რაშს. გაქუსლეს და მივიდნენ. კოშკის ირგვლივ სამჯერ მეტი ხალხი შეკრებილიყო, მაგრამ ქალის მიმწვდომი ერთიც არ ღრია. ქალი კი იდგა ფანჯარაში, გაღიმებული, როგორც დილის მზე, და თეთრ მანდილს გამომწვევად აფრიალებდა. რაშია უთხრა ნაბოლარას:

— აბა, დამკარი მათრახი რაც ძალი და ღონე გაქვს, ერთიც ძლიერად დამკვილე და ამ კოშკს, თუ გინდა, თავზე გადავევლებიო.

დაჰკრა მათრახი ნაბოლარამ, დაჰკივლა ძლიერად და რაშიც მოსწყდა ადგილს. ცაში გრიგალივით აიჭრა და ისე ახლოს გაუქროლა ქალს, რომ ნაბოლარამ არა თუ მანდილი მოსტაცა — ერთი ყურის ძირშიც აკოცა. მაყურებელ ხალხს მოწონების ყიჟინა აღმოხდა, მაგრამ რაშისა და მხედრის სახე ვერც ამჯერად ვინმემ დალანდა, — ქარვით გაიშხუილეს ცაში და გაუჩინარდნენ.

მეორე დღეს ქალებმა მამას უთხრეს, — ახლა ხომ უკვე დანიშნულები ვართ და ბაღში სასეირნოდ გაგვიშვიო. — ხელმწიფემ ქალიშვილებს ბაღში სეირნობის ნება დართო და გამოაცხადა:

— ნიშნის გამტაცებლები მოვიდნენ და თავ-თავიანთი საცოლეები ჩაიბარონო, — რა იცოდა ხელმწიფემ, რომ სამივე ნიშნის გამტაცებელი ერთი კაცი — ნაბოლარა ძმა იყო.

გამოვიდა სამივე და და ბალის ყვავილებში შეერივნენ. ხელმწიფეც აივანზე იჯდა და თავის ქალიშვილების ცქერით ტკებოდა. თან სასიძოებს მოულოდა. უცბად, სად იყო, სად არა, ერთი ასთავიანი დევი მოფრინდა, დასტაცა ხელი უმცროს ქალიშვილს და გაიტაცა.

გავარდა ხმა მთელ სახელმწიფოში, ხელმწიფის უმცროსი ქალი ასთავიანმა დეემ გაიტაცაო. ხელმწიფემ ყველას სამგლოვიაროდ ჩაცმა უბრძანა, ქალაქსაც შავი გადააფარა.

და საქვეყნოდ გამოაცხადა, — ვინც ჩემს ქალიშვილს იპოვის და ცოცხალს დამიბრუნებს, ცოლად იმას გავეატან და სახელმწიფოს ტახტსაც დავეუთმო.

ამ ხმამ ნაბოლარას ყურამდეც მიაღწია. მივიდა ნაბოლარა ძმებთან, აჩვენა რაშები და უთხრა:

— ძმებო, მე ხელმწიფის ქალიშვილის საძებნელად უნდა წავიდე. ჩემს დაბრუნებამდე ეს რაშები კარგად შემიინახეთ, ნუ მკითხავთ, საიდან მოვიყვანე, ოღონდ უჩემობას ნუ აგრძნობინებთ, სამ წელიწადში თუ მოვედი, მოვედი, თუ არადა, მეც მკვდარი ვიქნები და მიგლოვეთო.

გამოემშვიდობა ძმებს ნაბოლარა და წავიდა. ბევრი იარა, თუ ცოტა იარა, მივიდა თავისი სიძის თეთრი დევის სასახლესთან და წყაროს პირას ჩამოჯდა. წყაროზე მოსამსახურე გოგო გამოვიდა და უცხო ჭაბუკი რომ დაინახა, შეუტია:

— თეთრი დევის მზემ, თეთრი დევის სიცოცხლემ, თეთრი დევის შიშით ძირს ჭიანჭველას ვერ გაუვლია, მაღლა — ბუზს და შენ აქ მოსვლა როგორ გაბედეო?

ნაბოლარამ წაიძრო თითიდან ბეჭედი და გოგოს უთხრა:

— თეთრი დევი ნუ მოგიკვდება, ეს ბეჭედი შენს ქალბატონს აჩვენეო. — შეუტანა გოგომ და აჩვენა. — გაიმე, ჩემი უმცროსი ძმის ბეჭედიო! — დაიძახა ქალმა და კისრისტეხით გამოვარდა. გადაეხვია ამდენი ხნის უნახავ ძმას და შინ შეიყვანა. გამოჰკითხა ამბავი და ძმამაც უამბო თავისი გასაჭირი, თან დააყოლა:

— იქნებ შენმა ქმარმა იცოდეს იმ დევის ადგილსამყოფელი და მიშველოს რამეო.

თეთრი დევი სანადიროდ იყო წასული. ქმრის მოსვლამდე ქალმა ძმა დამალა. საღამოზე მოვიდა თეთრი დევი, შვიდა შინ და დაიძახა:

— უცხო ადამიანის სუნი მცემსო.

ცოლმა უთხრა:

— ჩემი ძმა არის მოსული და თუ არას ავნებ, გამოგიჩენო.

დევმა უპასუხა:

— თუ უფროსია, შუაზე გაგვლეჯ, თუ საშუალოა, ლუქ



მა-ლუკმა დავებრი, უმცროს კი ასს დავუწოქებ, ორასს ვაკოცებ და გულუხვადაც დავასაჩუქრებო.

გამოიყვანა ქალმა ნაბოლარა, დევმა მართლა ასი დაუჩოქა, ორასი აკოცა და უთხრა, — რა გინდა, რით დავასაჩუქრო?

— მე არაფერი საჩუქარი არ მინდა, — უთხრა ნაბოლარამ, — ასთავიანმა დევმა საცოლვე მომტაცა და, თუ რაზე შეგიძლია, იმის პოვნაში დამეხმარეო.

— ვიცნობ მაგ დევს და დიდი ვერაგიც არისო, — თქვა თეთრმა დევმა, სამი ძალით იბრძვის, წყლით, ჰაერით დცეცხლით. სამივე ძალა თუ არ გამოვაცალეთ, ისე ვერ დავა მარცხებთო, მე ჰაერის ძალას გამოვაცლი და დანარჩენ ჩემმა ქვისლებმა იციანო.

თეთრი დევის და ცოლად ჰაერის ხელმწიფეს ჰყავდა მოუხმო დევმა თავის სიძეს. მოფრინდა ციდან უზარმაზარი თეთრწვერიანი კაცი, ცხვირი საბერველს უგავდა, პირი — ქურას და ლოყებიც სტვირის გუდასავით გასიებოდა. თეთრმა დევმა უამბო, როგორც იყო საქმე და ბოლოს უთხრა.

— ჩვენ ის ქალი უსათუოდ უნდა დავიბრუნოთ და ასთავიან დევთან დიდი ბრძოლა მოგველის, ამ საქმეში უნდა გვიშველო და შენი კუთვნილი ღონე წაართვაო.

— ადვილი სამსახურიოაო, — უთხრა თეთრწვერა კაცმა, — ჰაერიდან შიში ნუ გაქვთ, კუდასაც ვერ გააცანცარებსო.

ადგნენ ნაბოლარა და თეთრი დევი და წავიდნენ წითელი დევის საბრძანებელში. მივიდნენ სასახლესთან, წითელი დევი სანადიროდან დაბრუნებულიყო და ეზოში ირემს ატყავებდა:

— ცოლისძმა რომ მოგიყვანო, ხომ არ გაჯავრდებიო? — დაუძახა თეთრმა დევმა.

— თუ უფროსია თავს წავაგლეჯ, — უპასუხა წითელმა, — თუ საშუალოა, შუაზე გავეჭრი, ხოლო თუ უმცროსია, ასს დავუწოქებ, ორასს ვაკოცებ და გულუხვად დავასაჩუქრებო.

წითელმა დევმა მართლაც ასჯერ დაუჩოქა, ორასჯერ აკოცა და ქვისლიცა და ცოლისძმაც შინ შეიწვია. დამ უხმო-

მოდ გაიხარა უმცროსი ძმის სტუმრობით და მდიდრული სუფრა გაუშალა. ვახშამს რომ მორჩნენ, თეთრმა დევმა წითელ დევს სტუმრობის მიზეზი უთხრა და დახმარება სთხოვა. წითელი დევის და წყალთა ხელმწიფეს ჰყავდა ცოლად. მოუხმო დევმა თავის სიძეს. მოვიდა უზარმაზარი ყინულის 'გაცი, ყველაფერი ყინულისა ჰქონდა და წამწამებზეც ყინულის ლოლუები ეკიდა. წითელმა დევმა ჯერ საქმის ვითარება გააცნო და მერე უთხრა, — ასთავიან დევს შენი კუთვნილი ღონე უნდა წაართვაო.

— წყლიდან შიში ნუ გაქვს, ერთ წვეთსაც ვერ ეღირსებაო, — შეჰპირდა ყინულის კაცი.

ქვისლსა და ცოლისძმას წითელი დევიც გაჰყვა და მივიდნენ შავი დევის საბრძანებელში. შავი დევს უკვე გაეტყუებინა ირემი და ხორცს ხარშავდა — ქვაბს ქაფქირით დასტრიალებდა.

— ცოლისძმა რომ მოგიყვანო, გაგეხარდება თუ გეწყინებაო? — დაუძახეს თეთრმა და წითელმა დევებმა.

შავმა დევმა ქაფქირი ქვაბში ჩატოვა, დოინჯი შემოიყარა და გამოსძახა:

— თუ უფროსია, თავს წავაცლი, თუ შუათანა — შუაზე ჩავგლეჯ, ხოლო თუ უმცროსია, ასს დავეუროქებ, ორასს ცაკოცებ და კარგადაც გავეუმასპინძლდებით.

შავმა დევმა ასი დაუროქა ნაბოლარას, ორასი აკოცა და ქვისლებიცა და ცოლისძმაც შინ შეიწვია. უმცროსი ძმის სტუმრობით, რა თქმა უნდა, დამაც დიდად გაიხარა და მაშინვე გულუხვი სუფრა გაუშალა. ვახშმის შემდეგ თეთრმა და წითელმა დევმა ქვისლს ცოლისძმის გასაჭირი გააცნეს და დახმარება სთხოვეს. შავი დევის და ცეცხლთა ხელმწიფეს ჰყავდა ცოლად. მოუხმო დევმა და მოვიდა ერთი უზარმაზარი ცეცხლის კაცი. პირიდან და ცხვირიდან სულ ლაღარი სცვიოდა და თავზე ცეცხლის ალი ეხვია. უთხრა შავმა დევმა, რისთვისაც მოიხმო, და ცეცხლის ხელმწიფემაც თანხმობა მისცა:

— ჩემგან ერთ ნაპერწკალსაც ველარ ეღირსებაო.

ადგნენ მეორე დღეს სიძე-ცოლისძმები და ოთხივენი ასთავიანი დევის სამფლობელოსაკენ წავიდნენ. ბევრი იარეს,

თუ ცოტა იარეს, ბოლოს ერთ მთისოდენა სასახლეს მიადგანენ. ეს ასთავიანი დევის სახლი იყო. მიადგნენ ჭიშკარს და დაუძახეს:

— ასთავიანო, ბაყბაყო, ასნი მოვედით, ასი უნდა გკრათ და, თუ ვაჟკაცი ხარ, გამოდი და გაგვიმაგრდიო!

გამოვიდა ასთავიანი დევი, მაგრამ რა გამოვიდა, — უზარმაზარი, შავი, ბანჯგვლინი და ღრჯოლებიანი. გამოდგა ჭიშკარში და აგდებულად გამოსძახა:

— ჩიტი ბატენად არ ღირდა, დევნა მეტი იყოო. თქვენ რა ხართ და თქვენთან ბრძოლამ რა უნდა მიყოს. ერთ შეგიბერათ, მტვრად გაქცევთ და ქარს გაგატანთო.

ნაბოლარამ ველარ მოითმინა, — აბა მაშ გამომაგრდიო! — შესძახა და ხმალამოწვდილი გაექანა. სიძებმაც ხმლები იშიშველეს და უკან მიჰყვნენ. ასთავიანმა დევმა მოუხმო ქარიშხალს, მაგრამ ფოთოლიც არ შეირხა, მოუხმო წყალს და ერთი ტალღაც არ დაიძრა, შეკრთა დევი და უკანასკნელ ღონეს — ცეცხლს მოუხმო, მაგრამ აქაც მოტყუვდა, ალი კი არა, ნაპერწკალიც არსად ჩანდა.

მიხვდა დევი, რომ დამარცხებული იყო და შიშით თავზარი დაეცა, დაურთქა და შეეხვეწა, — ოღონდ ნუ მომკლავთ და მზეთუნახავი ქალიცა და მთელი ჩემი ქონება-ცხოვრებაც თქვენი იყოსო.

თქვეს დევებმა — ამისი ძალა მაინც ჩვენს ხელშია და, რომც რამე გაბედოს, რას დაგვაკლებსო, და ასთავიან დევს სიცოცხლე შეუნარჩუნეს, მაგრამ ოქრო-ვერცხლი და თვალმარგალიტი კი მთლიანად წამოიღეს. წამოიყვანეს ხელმწიფის ასულიც და წამოვიდნენ. დევებმა თავიანთ საზღვრებს გამოაცილეს ქალ-ვაჟი, მისცეს თითო ჯორაკი დებული თვალ-მარგალიტი, თითო საჯდომი ცხენი და გამოისტუმრეს.

მოდიან ხელმწიფის ასული და ნაბოლარა მარტოები, მოდიან დღე და ღამე. ქალს შეუყვარდა თავისი მხსნელი, მაგრამ ნაბოლარა არაფერს ეუბნება და არც საიდუმლოს უმხელს. ასე მოვიდნენ ხელმწიფის სასახლემდე. ხელმწიფემ უზომოდ გაიხარა თავისი უმცროსი ქალის ნახვით, იმავე წამს სამგლოვიარო ძაძა გაიხადა და ხალხსაც სალხინოდ

მორთვა უბრძანა. ნაბოლარას დიდი მადლობა გადაუხადა და უთხრა:

— მართალია, ჩემი ასულის ნიშანი სხვასა აქვს გატაცებული და, რაკი გლოვა დამთავრდა, ალბათ მოვა კიდევ და პირობის ასრულებას მომთხოვს, მაგრამ, რა გქნა, შენთან უფრო ვერ გავტეხ პირს, იმან მარტო ნიშანი წაიღო. შენ კი ტყვეობიდან დაიხსენი და ცოცხალი, მომგვარე. მასმასადამე, საკუთნოც უფრო შენია, დაიწერე ჯვარი და ქვეყნის მართვა-გამგეობაც ჩაიბარეო.

— თქვენი სიძეობა ჩემთვის დიდი წყალობაა, — უთხრა ნაბოლარამ, — მაგრამ უფროსი ძმები მყავს, ერთი დღით წავალ, იმათაც დავეკითხები და ქორწილში მოვიწვევო.

ხელმწიფემ ნება დართო. წავიდა ნაბოლარა თავის ძმებთან. ძმებს უკვე მკვდარი ეგონათ და უვნებელი რომ დაინახეს, ძალიან გაკვირდნენ. ალბათ აქვე, ახლომახლო სადმე იქნებოდაო; თქვეს და დაცინვა დაუწყეს: — რა ბქენი რაინო, დაიხსენი ხელმწიფის მზეთუნახავი ასული თუ ვერაო?

— დავიხსენი და ცოლადაც მომყავსო. — მიუგო ნაბოლარამ, — ახლა სწორედ თქვენს დასაპატიჟებლად მოვედი და, თუ გამოიყვებით, კაი სეირს გაჩვენებთო.

ძმებმა თქვეს, — მოდი გავყვეთ და გავიგოთ მაინც ეს ჭუტუცი სად დადის და რას აკეთებსო. მაშინ ადგა ნაბოლარა, გამოიყვანა შავი რაში და უფროს ძმას გადასცა, გამოუტანა უნაგირიც, — ბალიშქვეშ ერთი ხელი შავი ტანსაცმელი და აბჯარ-საჭურველია, გამოიღე, მოიკაზმე და შეჯექიო, გამოიყვანა წითელი რაში, გამოიტანა უნაგირიც, შუათანა ძმას ჩააბარა და იმასაც ისე უთხრა, — ბალიშქვეშიდან საცმელ-საჭურველი გამოიღე, მოიკაზმე და შეჯექიო. თვითონ თეთრად გამოეწყო, თეთრ რაშზე შეჯდა და ძმებს ხელმწიფის სასახლისაკენ გაუძღვა. შეიყვანა ეზოში და ხელმწიფეს დაუძახა:

— უმცროს ქალს რომ ათხოვებ, უფროსებმა რაღა დააშავეს, ბედს რად უკარგავ, გამოიყვანე სამივეში და აქ დააყენეო.

გამოიყვანა ხელმწიფემ თავისი ქალები და მწყრივად დააყენა. ნაბოლარამ უბიდაწ შავი მანდილი ამოიღო და უფ

როს ქალს გადასცა, — შენ ჩემი უფროსი ძმისთვისაო, ამოიღო წითელი მანდილი. შუათანა ქალს გადასცა და დააყოლა — შენ ჩემი საშუალო ძმისთვისაო. ბოლოს ამოიღო თეთრი მანდილი, უმცროს ქალს ყელზე შემოასვია და თქვა, — ეს კი ჩემთვისაო. ქალმა ახლა კი ვეღარ მოითმინა, გაშალა ხელები და კისერზე ჩამოექიდა. ხოლო ხელმწიფე ცას ეწია სიხარულით, რომ ნიშნის გამტაცებელიცა და ტყვეობიდან დამხსნელიც ერთი და იგივე კაცი აღმოჩნდა და სიტყვის გატეხასა და გაწბილებას გადაჩრა. მაშინვე მოიწვია ხალსი, მოიწვია მზარეულები, მწდუ-ტოლუმბაშები, მეხუკე-მესაკრავენი და სამპირი ქორწილი გამართა.

სამ დღე-ღამეს განუწყვეტელი ღხინი და სმა იყო. ქორწილი რომ დამთავრდა ნაბოლარამ ძმები გაისტუმრა და წასვლისას სახალხოდ უთხრა:

— აი, ჩემო ძმებო, დღეს ერთად ვართ და ერთმანეთს გულის პასუხიც უნდა ვუთხრათ: თქვენ მე, როგორც უმცროსს, დამცინოდით და გიჟად მთვლიდით, მაგრამ მე არც გიჟი ვარ და არც დასაცინი რამე მჭირდა. რატომ არ მეკითხებით, საიდან მოვიყვანე ეგ რაშები, ახლა რომ ზედა სხედხართ, როგორ გავტაცე ნიშნები სამივე ქალს და ან ჩემი მზეთუნახავი ვისი დახმარებით დავიბრუნე? გახსოვთ, პირველ ღამეს უცხო სახლში რომ შევედით და მე გითხარით, — მოდით, ვუდარაჯოთ, ეს სახლი უპატრონო არ იქნება და ხიფათს არაფერს გადავეყაროთ-მეთქი. თქვენ ჩემი რჩევა არაფრად ჩააგდეთ და დაიძინეთ. მაგრამ მე მამის ანდერძი არ გავტეხე. ვიჯექი და ვფხიზლობდი. ვნახოთ, შუაღამისას მოვიდა სამთავიანი დევი და განრისხებული ჩვენს დასახოცად შემოვარდა. მაგრამ დავასწარი და ისრით გავგმირე. მერე აკკუწე, ხორცი გადავყარე, სისხლი მოვამშრალე და ნიშნად მარტო ყურები დავიტოვე — ამოიღო ყურები, უფროს ძმას დაუყარა წინ და უთხრა: — ეგ შენი რაში სწორედ იმ დევისეულიაო. მეორე ღამესაც დაიძინეთ, მე კი ისევ ვფხიზლობდი, ახლა წითელი დევი შემომაკვდა, ისიც ისე აკკუწე და ნიშნად ყურები ავაჭერი, — ამოიღო წითელი დევის თვრამეტი ყური, შუათანა ძმას დაუყარა წინ და უთხრა: — ეგ წითელი რაშიც სწორედ


იმისეულიაო. მესამე ღამეს უკვე ჩემი ჯერი იყო და ასლა თეთრი დევი მომადგა, ისიც მოვკალი. ოცდამეოთხე ყური ხელიდან გამივარდა და სანთელი ჩამიქრო. დავრჩი ბნელში, რა ვქნა, დევი უნდა ავკუწო და შორს გადავყარო, სისხლი მოვამშრალო, რომ თქვენ არაფერი გაიგოთ, მაგრამ სიბნელეში ვერაფერს ვხედავ. გამოვედი კარში, გავიხედე და შორს სინათლის ჭიატი დავინახე. წამოვედი და აი ამ ბროლის კოშკს კი მოვადექი. სინათლე სწორედ აქედან გამოდიოდა, მაგრამ შესასვლელი კარი არსად ჰქონდა. ავდექი, დავგრიხე თოკი და იმით ავედი. ოთახში ამ მზეთუნახავ ქალებს ეძინათ, სანთლები შეეუცვალე. შანდალი წამოვიღე და წამოვედი. მოვედი, თქვენ გაღვიძებამდე დევი ავკუწე, გადავყარე და სისხლიც მოვამშრალე. აი ეს ჩემი თეთრი რაში იმისეულია და მანდილები სწორედ ამ რაშებმა მომატაცებინეს. აი, ძმებო, ხომ ხედავთ, მეც რომ თქვენსავით გულრძო ვყოფილიყავი, ასლა აღარც თქვენ იქნებოდით და არც ეგ რაშები და მზეთუნახავები გეყოლებოდათ. ასლა წადით და ერთმანეთში მაინც იყავით კარგად, რომ ლხინი უფრო გაგიტკბეთ და ჭირი გაგიადვილდეთო.

დარცხვენილმა ძმებმა თავები დახარეს და ისე წავიდნენ. ნაბოლარა კი დარჩა სიმამრთან, გადაიბარა ტახტი, მოისვა გვერდით თავისი მზეთუნახავი ცოლი და შეუდგა ქვეყნის მართვა-გამგებლობას.

ჭირი — იქა, ლხინი — აქა,

ქატო — იქა, ფქვილი — აქა.





## ბენიზარის ძალი

საღსნო, ყური მომაპყარით, ღმერთი მოგცემთ სამართალსა,  
ზღაპარს ვიტყვი, შიგ არ გავრევ, არც ტყუილსა, არც  
მართალსა.

იყრ და არა იყო რა, ღვთის უკეთესი რა იქნებოდა, იყო  
ერთი მეთევზე, სახელად — ბენიზარი. ჰყავდა ცოლი და სა-  
მი ძუძუთა ქალიშვილი, მეთევზეობით ბევრს ვერაფერს ში-  
ულობდა და ოჯახს გაჭირვებით ინახავდა.

ერთ დღესაც წავიდა ზღვის პირას სათევზაოდ, მაგრამ  
ვერაფერი დაიჭირა. დალონდა ბენიზარი, მოიხადა ქუდი და  
ღმერთს შეევედრა:

— ღმერთო, მოწყალეო, ოღონდ დღეს შემეწიე, შინ ხელ-  
ცარიელს ნუ გამგზავნი და რასაც დავიჭერ, ნახევარს გიბო-  
ძებო. — ისროლა ბადე და ერთი წითელი თევზი გააბა. ბეი-  
ნაზარმა დახედა ნადავლს და გაკვირვებულმა წამოიძახა. —  
კაცი ამ საქმეში ვბერდები და ასეთი თევზი არც თვალთ მი-  
ნახავს და არც ყურით გამიგონიაო.

თევზმა უცბად ენა ამოიდგა და ბენიზარს უთხრა:

— გამიშვი და ბედსა გწევო.

ბენიზარმა იფიქრა, — ეს რაღაც უცნაური თევზი ჩანს,  
მოდო გავუშვებ, იქნებ მართლაც ბედსა მწიოსო. — ადგა და  
გაუშვა. თევზი მობრუნდა და კიდევ უთხრა:

— კეთილო ბენიზარ, მოდი, შემაჯექ ზურგზე და ზღვა-  
თა ქვეყანაში გაგიყვან. ზღვათა ქვეყნის ხელმწიფე სავები-  
როდ კეთილ კაცს დაეძებს, შენ სწორედ ასეთი ხარ. ჩაიარე  
სასასლესთან, დაგინახავს და ვეზირად დაგინშნავს. შენც

ჭარგად იქნები და ცოლ-შვილსაც აღარაფერი მოაკლდებაო.

შეაჯდა ბეინაზარი თევზს ზურგზე და გავიდა ზღვათა ქვეყანაში. თევზმა დედაქალაქის მისადგომებამდე მიიყვანა. ნაპირზე გადმოსვა და უთხრა:

— აგე თეთრი მარმარილოს სასლი რომ ჩანს, ვგ არის ხელმწიფის სასახლე, მიდი თამამად და ჭიშკრის წინ აიარ-ჩაიარე. ხოლო თუ ოდესმე ჩემი თავი დაგჭირდეს, მოდი ამ ნაპირზე და დაიძახე:

წითელ ზღვის წითელო თევზო,  
ჩემი თხოვნა შეიწყენარე,  
შენს მეგობარ ბეინაზარს,  
საქმე უჭირს, დაეხმარე.

მე მაშინვე შენთან გავჩნდები და, რასაც მთხოვ, შეგიხრულეზო.

წავიდა ბეინაზარი და მივიდა მარმარილოს სასახლესთან. გადმოიხედა ხელმწიფემ სარკმლიდან, დაინახა ბეინაზარი და დაუძახა, ცოტა ხანს ჩემთან ამოდით! ავიდა ბეინაზარი, მოიხადა ქუდი და მდაბლად თავდაკერით მიესალმა:

— რას მიბრძანებთ, დიდებულო ხელმწიფეო?

ხელმწიფემ დაწვრილებით გამოჰკითხა ვინაობა, სადაურობა და ბოლოს უთხრა:

— თუ თანახმა იქნები და ვაჟიშვილიც გყავს, ვეზირად მინდა აგიყვანო.

ბეინაზარმა იცოდა, რომ ხელმწიფე ვეზირად არ აიყვანდა, თუ შემკვიდრე ვაჟი არ ეყოლებოდა და სიბერეში მამას არ შესცვლიდა, დახარბდა ვეზირობას და იცრუა, — მყავსო. ხელმწიფემაც აიყვანა ვეზირად. ამ დღიდან ბეინაზარსა და მის ოჯახს გაჭირვება აღარ უნახავთ. ბეინაზარი ერთგულად ემსახურებოდა ხელმწიფეს და ისიც გულუხვად ასაჩუქრებდა.

გავიდა ხანი, ბეინაზარი სიბერეში შევიდა და სახელმწიფო დავალებებს ისეთი სისწრაფით ველარ ასრულებდა. ბოლოს დადგა დრო ბეინაზარის განთავისუფლებისა და მის



ადგილზე მისი შვილის დანიშვნისა, და ხელმწიფემ უთხრა ბენაზარს:

— ჩემო ერთგულო ვეზირო, ღმერთია მოწამე, რომ არ მეთმობი, მაგრამ ქვეყანა, ხალხი სამსახურს თხოულობს და ნოვალეობას ვერსაით წაუუვალთ. თუ არ გეწყინება, დაბრუნდი შინ, დაისვენე და შენს მაგივრად შენი შვილი განომიგზავნეო.

ბენაზარმა მწარედ ინანა, რომ თავიდანვე სიმართლე არ უთხრა და უძეობა დამალა, მაგრამ ახლა სინანულით ველარაფერს უშველიდა. წამოვიდა შინ და გუნებაში გადაწყვიტა. — გამოვცდი ჩემს ქალებს, იქნებ რომელიმეს ვაჟის თვისებები აღმოაჩნდეს, ჩავაცმევ ვაჟურად და გამოვუგზავნიო.

ცოლ-შვილი სიხარულით შეეგება დიდი ხნის უნახავ მამას. ბენაზარმა ქალები აქეთ-იქიდან შემოისხა და ერთი ისეთი ამოიოხრა, რომ ღამის გულიც თან ამოაყოლა.

— რა იყო, მამილო, რაზე ოხრავო? — ჰკითხეს გოგონებმა.

ბენაზარმა უამბო, რაც აწუხებდა. წამოდგა უფროსი ქალი და უთხრა:

— მერე მაგაზე რატომ დაღონდი, მე გამგზავნე იმ ხელმწიფესთან, ჩავიცვამ ბიჭურად და ერთგულადაც ვემსახურებიო.

— თუ მაგას შესძლებ, რაღა მიჭირსო, — უთხრა ბენაზარმა, გამოაწყო ვაჟურად, მისცა თავისი ბასრი ხმალი, თოფი, დამბაჩა, შესვა ცხენზე და გაისტუმრა. ქალი რომ თვალს მიეფარა, ბენაზარიც ცხენზე შეჯდა, სახე ყაბალახით აიხვია, უყელა მოკლეზე ქალს და ხმალამოწედილი წინ გადაუდგა.

— სად მიხვალ, შე ჭაკო, ჭაკის გაზრდილო, — დასჭყივლა მუქარით, — ახლავე უკან გაბრუნდი, თორემ თავს გაგადებინებო!

ქალს შიშით გული გადაუტრიალდა, უსიტყვოდ შემოაბრუნა ცხენი და სახლისაკენ გააჭენა. ბენაზარი ისევ მოკლე გზით დაბრუნდა და ქალს შინ მიასწრო. როცა ქალიც მოვიდა, მამამ ჰკითხა:

— რა იყო, შვილო რატომ დაბრუნდიო?

— გზაში ვილაც შავყაბალახიანი კაცი დამიხვდა და კინალამ ხმლით ამკუწაო, — გამოუტყდა ქალი.

ახლა შუათანა გოგომ თქვა:

— მე წავალ, მამილო, მე არაფრისა არ მეშინიაო.

ბეინაზარმა გაგზავნა, მაგრამ იმასაც ისე უყელა, გადაუდგა გზაზე ყაბალახხვეული და მუქარით დასჭყვივლა:

— სად მიხვალ, შე ჭაკო, ჭაკის გაზრდილო, ახლავე უკან გაბრუნდი, თორემ თავს გაგაგდებინებო!

შეშინდა ქალი, შემოაბრუნა ცხენი და შინისაკენ მოკურცხლა.

ბოლოს მივიდა უმცროსი გოგო და შეეხვეწა. — მე გამიშვიო.

— გაგიშვებ კი, მაგრამ შენც გულგახეთქილი დაბრუნდებო, — უთხრა ბეინაზარმა.

გოგო უფრო შეეხვეწა:

— ოღონდ გამიშვი და წინ ცხრათავიანი დევიც რომ შემხედეს, არ შემეშინდებო.

შეუკაზმა ბეინაზარმა კარგი ქურანა ცხენი, შეაბა ხმალი, შემოსა ჯაჭვ-მუზარადით და გაისტუმრა. მერე თვითონაც ჩვეულებრივ შეჯდა ცხენზე და მრკლე გზით უყელა. დაუხვდა ერთ უდაბურ, ბნელ ადგილას, იძრო ხმალი და როცა მოუახლოვდა, შესძახა:

— სად მიხვალ შე ჭაკო, ჭაკის გაზრდილო, ახლავე უკან გაბრუნდი, თორემ თავს გაგაგდებინებო!

— შორიდან რას მემუქრები, ახლოს მოვალ და დამიხვდიო! — უპასუხა გოგომ, იშიშვლა ხმალი და ცხენი ზედ მიაგდო. ბეინაზარს შეეშინდა, საჩქაროდ მოიძრო ყაბალახი და გადაეხვია.

— შენ გენაცვალე, შვილო, შენ მართლაც ვაჟკაცის გული გქონია და მამის ადგილსაც ღირსეულად დაიჭერო, — უთხრა. მერე დაარიგა, როგორ უნდა მოქცეულიყო და ზღვათა ქვეყანაში როგორ მისულიყო:

— ზღვის პირას რომ მიხვალ, დაიძახე, წითელი ზღვის წითელო თევზო, ბეინაზარის შვილი მოვედი და ზღვათა ქვეყანაში გამიყვანეო. ის თევზი ჩემი კარგი მეგობარია,

ზღვაშიც გაგიყვანს და გასაჭირშიც დაგეხმარება. რაც კი დაგჭირდება, მიდი ზღვასთან, გამოიძახე და როგორც დაგარიგოს, შენც ისე მოიქეცი და ქვეყნად ყველა დაბრკოლებას დასძლეო. — ამ სიტყვებით ბენინაზარმა შემოიხსნა თავისი ბასრი ხმალი, გადააჰკიდა ქალს და დაუმატა, — აი, შვილო, ეს ხმალი რკინის მჭრელია და არსად არ გიღაღაბებსო. — გადაკოცნა საბოლოოდ და გაისტუმრა.

წავიდა ბენინაზარი ქალი, მივიდა ზღვასთან და დაიძახა:

— წითელი ზღვის წითელი თევზო, ბენინაზარის შვილი მოვედი და ზღვათა ქვეყანაში გამიყვანეო.

გამოცურდა წყლიდან წითელი თევზი და უთხრა, — მამაშენს ჩემზე ისეთი სიკეთე აქვს, რომ სამსახურს როგორც დაგამადლიო, — შეისვა ზურგზე და გაიყვანა ზღვათა ქვეყანაში. დაანახვა ხელმწიფის სასახლე და გამომშვიდობებისას უთხრა:

— მე ამ ზღვის მკვიდრი ბინადარი ვარ, თუ რამე გავიჭირდეს, მოდი აქ, დამიძახე და იმ წუთში შენთან გავჩნდებიო. — თევზი ზღვაში შეცურდა; ხოლო ქალი პირდაპირ ხელმწიფის სასახლისაკენ გაემართა. მივიდა კარის მცველებთან და უთხრა:

— მოახსენეთ თქვენს ხელმწიფეს, რომ ბენინაზარის შვილი მოვიდა და თქვენთან სამსახური სურსო.

ხელმწიფემ ბრძანა, შემოიყვანეთო. — შევიდა ბენინაზარის შვილი, დადგა ხელმწიფის წინ და მოახსენა:

— დიდებულო ზღვათა ქვეყნის მპყრობელო, გვახელით თქვენი ვეზირის შვილი, რომ ძის მაგივრად გემსახურთო.

ხელმწიფეს ძალიან მოეწონა ლამაზი და ზრდილი ჭაბუკი, დაისვა გვერდით და ტკბილად უთხრა:

— მიხარია, რომ მამაშენს ასეთი კარგი ვაჟკაცი ჰყოლიხარ, დღეიდან ჩემი პირველი ვეზირი იქნები და, იმედია, შენც ისევე ერთგულად მემსახურები, როგორც მამაშენი მემსახურებოდაო.

— ვეცდები, მამაჩემის სახელი არ შევარცხვინოო. — უთხრა ქალმა და მართლაც ისე სამართლიანი და გამჭრიახი მსაჯული გამოდგა, რომ მალე მთელს სახელმწიფოში სახელი გაუვარდა. ბენინაზარის შვილის ქებამ ბოლოს სელ-

მწიფის მზეთუნასავი ქალის ყურამდეც მიადწია. ქალმა მამას საყვედური შეუთვალა: თურმე ჩვენი საყვარელი ბენაზარის მაგივრად მისი ვაჟი ჩამოსულა სასახლეში და როგორ მოხდა, რომ მე აქამდე არაფერი შემატყობინე და არც გამაცანი. დღესვე გამომიგზავნე და მაჩვენეო. ხელმწიფეს იმ ერთადერთი ქალის მეტი არავინ გააჩნდა და მის სურვილს უსიტყვოდ ასრულებდა. დაიბარა ბენაზარის შვილი და უთხრა:

— ჩემს ქალიშვილს შენი გაცნობა უნდა და წადიო. — გააყოლა მოსამსახურე გოგო და გაგზავნა. ხელმწიფის ქალი ცალკე კოშკში ცხოვრობდა. დაინახა თუ არა ბენაზარის შვილი, გულში უმალ სიყვარული ჩაუვარდა. მაშინვე სურა გააშლევინა, მოატანინა რაც კი რამ გემრიელი სასმელ-საჭმელი ეგულებოდა და გულუხვად გაუმასპინძლდა. წამოსვლის დრომ რომ მოაწია, წამოდგა ბენაზარის შვილი და ქალს დაემშვიდობა, მაგრამ ქალმა არ გამოუშვა, კარბში გადაუდგა და უთხრა:

— არა, ამალამ ველარსად ვერ გაგიშვებ. დაგინახე თუ არა, გულში სიყვარული ჩამივარდა. დღეიდან შენ ქმარი უნდა იყო ჩემი და მე შენი ცოლიო.

დალონდა ბენაზარის შვილი: რა ექნა აღარ იცოდა, ეთქვა, რომ ბიჭი არა ვარო? — ეს მამის გაყიდვა და ღალატი გამოდიოდა, არ ეთქვა კიდევ და, ხელმწიფის ასულისათვის უარი როგორ ეკადრებინა. ბევრი ფიქრის შემდეგ ისევ უარი ამჯობინა, ჩამოიცილა გზიდან და მკაცრად უთხრა:

— ეს არასოდეს არ მოხდება. მე ვერც მამაჩემის სახელს შევარცხვენ და ვერც ჩვენი დიდებული ხელმწიფის ოჯახსო.

ხელმწიფის ასულმა გულში მუშტი ჩაიკრა და მიაძახა:

— მაშ მე ქალი არ ვიყო, თუ შენი ხორცი შენივე კბილე-ბით არ გაგლეჯინო!

გავიდა ცოტა ხანი. ხელმწიფის ქალმა თავი მოიავად-მყოფა და ლოგინში ჩაწვა. ხელმწიფემ მთელი მკურნალ-დასტაქრები იქ შეყარა, მაგრამ ქალი სულ უარესად და უარესად ხდებოდა. ბოლოს თვითონ ჰკითხა, — შეილო, მითხარი, რა მოგარჩენს და შენთვის არაფერს დავიშურებო.

— საყვარელო მამავ, — უთხრა ქალმა, — გიცი, რომ ძა

ლიან გიყვარვარ და თუ ჩემი მორჩენა გინდა, ეს ნატვრა უნდა შეშისრულო: კლდეთა ქვეყანაში გველესაბს რომ უკვდავების ვენახი აქვს, იმისი ყურძენი უნდა მომიტანო და მაჭამო.

დალონდა ხელმწიფე და ჰკითხა:

— შეილო, ვის შეუძლია იმ ყურძნის მოტანა, ჩემს სახელმწიფოში ვინ არის ისეთი, რომ ეგ საქმე შესძლოს?

— ამის შესრულება მარტო თქვენს ერთგულ ბენაზარის შვილს შეუძლია და, თუ უბრძანებთ, არც უარს იტყვისო, — უპასუხა ქალმა.

წამოვიდა ხელმწიფე სასახლეში, დაიბარა ბენაზარის შვილი და უთხრა:

— ჩემო ერთგულო ვეზირო, ჩემი ქალი ავად გახდა და გველესაბის ვენახის ყურძენს თხოვლობს. თუ მიშველი, ისევ შენ მიშველი, თუ არადა ამ საქმის გამკეთებელი სხვა არავინ მეგულებათ.

— მე თქვენი ვეზირი ვარ და რასაც მიბრძანებთ, უნდა ავასრულო, — უთხრა ბენაზარის შვილმა, გადაიკიდა მამისეული ბასრი ხმალი და წავიდა ზღვის სანაპიროზე, რომ წითელი თევზი გამოეხმო და ჩრევა-დარიგება ეკითხა. მოცურდა წითელი თევზი და ჰკითხა:

— რა იყო, რა გაგჭირვებია?

— ხელმწიფემ გველესაბის ყურძნის მოტანა დამავალა, და რა ვქნა, არ ვიცი, — საით წავიდე, ან რა ხერხით მივუღებო.

— ნუ გეშინია, — უთხრა თევზმა, — ეგ ადვილია, სხვაა ძნელი. იმ გველესაბს ახლა სამი წლით ძილქუში აქვს დაცემული და ხმლით ნაჭერ-ნაჭერაც რომ აკუწო, არ გაიღვიძებს, უშიშრად გადააბოტე ზედ, დაკრიფე რამდენიც გინდა და გამობრუნდიო. — ასწავლა გზა-კვალი და უკანვე შეცურდა.

ასხენა ღმერთი ბენაზარის შვილმა და გაუდგა გზას ბევრი იარა, თუ ცოტა იარა, ბოლოს მივიდა კლდეთა ქვეყანაში და მონახა გველესაბის ვენახი. მივიდა ახლოს და თქვენს მტერს, რაც იმან იქ დაინახა: შავი, უზარმაზარი გველესაბი გაღავენად შემოვლებოდა ვენახს, პირში თავისივე კუდის წვერი ჩაედო და მძინარე საბერველივით ქშინავდა.

ბენიზარის შვილმა უშიშრად გადააბიჯა გველეშაპის ლორწოვან ტანზე და შევიდა ვენახში, დაკრიფა რომელი ყურძენიც კი მოეწონა, გაივსო კალთა და უკანაც ასევე უშიშრად გამობრუნდა. ცოტა გზა რომ გამოიარა, იფიქრა, იქნებ არ დამიჯერონ, რომ ეს ყურძენი მართლა გველეშაპის ვენახში დავკრიფე და ჯობია ნიშანი რამე წავიღო. დაბრუნდა უკან, ააჭრა გველეშაპს ყურის ბიბილოები და გაუღვა გზას. მივიდა სასახლეში და მიიტანა ყურძენი. მერე ყურის ბიბილოებიც ამოიღო ჯიბიდან, ხელმწიფეს წინ დაულაგა და უთხრა:

— იქნებ არ დაგეჯერებინათ, რომ ყურძენი მართლა გველეშაპის ვენახში დავკრიფე, ამიტომ გველეშაპს ყურის ბიბილოები ავაჭერი და წამოვიღეო.

ხელმწიფემ დიდად დაუმაძღვა სამსახური და ძალიანაც გაუხარდა, რომ ვეზირი მთელი და უვნებელი დაბრუნდა. იმავ დღეს გაუგზავნა ყურძენი თავის ქალს, ქალმა შეჭამა ერთი მტევანი და საღ-საღამათი მაშინვე ფეხზე წამოდგა.

გავიდა კიდევ რამდენიმე ხანი და ხელმწიფის ქალმა ისევ თავი მოიკვამყობა. დაიბარა თავისი მამა და უთხრა:

— ჩემო მამილო, ვიცე ძალიან გიყვარვარ, და თუ გინდა, რომ მოვრჩე, ერთი ნატვრაც ამისრულე: დევთა ქვეყნის ამბავი გამაგებინეო.

დაღონდა ისევ ხელმწიფე. უთხრა თავის ქალს:

— შვილო, ვინ გაბედავს სამდევეთში წასვლას, ან იქ წასული კაცი უკან ცოცხალიდა დაბრუნდებო?

ქალმა უთხრა:

— ამ ამბის გაგება და უკან დაბრუნება მხოლოდ ბენიზარის შვილს შეუძლია, უბრძანე და შეასრულებსო.

დაიბარა ხელმწიფემ ბენიზარის შვილი და უბრძანა:

— ვეზირო, სამდევეთში უნდა წახვიდე და იქაური ამბავი მოგვიტანო.

რა თქმა უნდა, ვეზირი ხელმწიფის ბრძანებას ვერ გადაგიდოდა და ბენიზარის შვილიც მაშინვე სამზადისს შეუდგა. გაიმზადა საგზალი, გადაიკიდა მამისეული ბასრი ხმალი, წავიდა ზღვის ნაპირზე და დაიძახა:

წითელი ზღვის წითელო თევზო,  
ჩემი თხოვნა შეიწყნარე.  
შენ ძმა ბეინაზარის შეილს  
საქმე უჭირს, დაეხმარე.

გამოცურდა წითელი თევზი და ჰკითხა, — რა გაგჭირ-  
ვებია?

— ხელმწიფე დევების ქვეყნის ამბის შესატყობად  
გეზავნისო — უთხრა ბეინაზარის შეილმა.

— ნუ გეშინია, ეგ ადვილია, სხვა — ძნელი, — უთხრა  
თევზმა, — მე როგორც დაგარიგებ, ისე მოიქეცი და იქიდა-  
ნაც მშვიდობით დაბრუნდები: დევების ქვეყანა ცხრა მთას  
იქით მდებარეობს, შესასვლელში რკინის კარები აბია, კა-  
რები სულ მოძრაობს და ისე სწრაფად იღება და იხურება,  
რომ შიგნით შეფრენას ბუზიც ვერ მოასწრებს. იქვე ერთი  
უშველებელი რკინის ბოძია მიყუდებული, აიღე ის ბოძი,  
ჩაუგდე დირეში და კარი ვეღარ დაიკეტება. შიგნით რომ  
შეხვალ და ცოტა მანძილს გაივლი, ერთ სახლს მიაღვები.  
სახლის კარები ღია დაგხვდება, სახლში ერთი ჩონგური  
ჰკიდია კედელზე, მთელი სამდევეთის ძალა იმ ჩონ-  
გურშია და ერთი კოჭლი დევი დარაჯობს. კოჭლი დევი  
დღეში სამჯერ მოსაშარდად გამოდის, შენ კარებს ამო-  
ფარე, და როცა დევი გამოვა, შევარდი შიგ, ჩანოიდე  
ჩონგური და დაიჭირე ხელში, რამდენიც არ უნდა გეხვე-  
წოს კოჭლი დევი, არ მისცე და მთელი სამდევეთი დაგეპო-  
რილებათ.

წავიდა ბეინაზარის შეილი, გადაიარა ცხრა მთა და მი-  
ადგა რკინის ჭიშკარს. კარები მართლაც გაუჩერებლად  
იღებოდა და იხურებოდა. აიღო ბეინაზარის შეილმა იქვე  
მიყუდებული რკინის ბოძი, გაუყარა დირეში და გააჩეხა.  
შევიდა შიგნით და მიადგა იმ სახლს, სადაც ჩონგური ინა-  
ხებოდა. ამოფარა კარს და დაუწყო ლოდინი, ცოტა ხნის  
შემდეგ კოჭლი დევიც გამოვიდა და სახლსუკან მოეფარა.  
ბეინაზარის შეილმა დრო იხელთა, შევარდა სახლში და ჩა-  
მოხსნა კედლიდან ჩონგური. მობრუნდა კოჭლი დევი და  
ჩონგური სხვის ხელში რომ დაინახა, თავზარი დაეცა. შეი-

ხეწა ბენაზარის შვილს, — ოღონდ ეგ ჩონგური დამიბრუნე და რასაც მომთხოვ, შეგისრულებო.

ბენაზარის შვილმა უთხრა:

— თუ გინდა, რომ ჩონგური დაგიბრუნო, წადი ახლავე და მთელი სამდევეთი — დიდი და პატარა, ქალი და კაცი აქ მოიყვანეო.

გამოვიდა კოჭლი დევი კარში და ერთი ისეთი დაიღრიალა, რომ მთა-ბარს სულ ზანზარი დააწყებინა. დაიძრა მთელი სამდევეთი. დაიწყო მოდენა დიდმა და პატარამ, გაიჭვიდა მთელი მინდორი, ტევა აღარ არის ბოლოს სამდევეთის ხელმწიფეც მოვიდა და კოჭლ დევს ჰკითხა, — რა იყო, რისთვის მოგვიხმეო?

— ვილაც კაცი შემოპარულა ჩვენს ქვეყანაში, ჩამოუღია ჩვენი ჩონგური და ახლაც ხელში უჭირავს. შევეხვეწე, დამიბრუნე ჩონგური-მეთქი, მაგრამ ახლოც არ გამიკარა. მითხრა: თუ გინდა, რომ არ დაევამტვირო, და ჩონგური ისევ მთელი დაგიბრუნო, ახლავე მთელი სამდევეთი აქ მომიყვანეო. — უთხრა კოჭლმა დევმა, — მეც რაღა მექნა, გამოვედი და მოგიხმეთო.

— რაკი აქ შემოსვლა გაბედა, ან ამირანი იქნება, ან ამირანის შვილი, — თქვა დევთ ხელმწიფემ და თავისი ქვეშევრდომები გააფრთხილა, — ურჩობა არავინ გაბედოს, რასაც გვიბრძანებს, დავემორჩილოთ და შევუსრულოთო.

ბენაზარის შვილმა ეს სიტყვები რომ გაიგონა, უფრო გული მოეცა, უშიშრად გამოვიდა სახლიდან და დევებს მჭექარე ხმით მიესალმა, დევებმა მდაბლად თაყვანი სცეს და დედამიწაზე ცხვრებივით დაეყარნენ. ფეხზე მარტო მათი ხელმწიფე დარჩა და ჰკითხა ბენაზარის შვილს:

— რას მოითხოვ, რით გემსახუროთ? ოღონდ ჩონგურს ნუ დაგვიმტვირევ, მთელი დაგვიბრუნე და რასაც გვიბრძანებს, შევასრულებთო.

— ნუ გეშინიათ, — უთხრა ბენაზარის შვილმა, — ჩონგურს არაფერს ვაუნებ და თავის დროზე ისევ თქვენ დაგიბრუნებთ, ოღონდ ახლა ყველანი ჩემთან უნდა წამოხვიდეთ და რასაც გეტყვით, უსიტყვოდ აასრულოთო.



დევთ ხელმწიფემ თანხმობა მისცა. გაუძღვა წინ ბენი-ზარის შვილი და გაჰყვა უკან მთელი სამდევეთი. მოდიან და მიგრანგნიან მთა-ბარს, გადაიარეს ცხრა მთა, ცხრა მინდორი და მიადგნენ წყალთა ქვეყნის სახელმწიფოს. დედაქალაქის მცხოვრებლებმა დევების ლაშქარი რომ დაინახეს, ერთი წივილ-კივილი და ღრიანცელი ატყეს, მიატოვეს სახლები, დუქნები, სახელოსნოები და ტყე-ღრეში გაიხიზნენ, კარისკაცები ხელმწიფესთან შეცვივდნენ და მოახხენეს:

— დიდებულო ხელმწიფე, ჩქარა თავს უშველეთ, თორემ დაიღუპებით, ქალაქს დევების ლაშქარი მოადგა, წინ თქვენი ვეზირი ბენიზარის შვილი მოუძღვება და აკლებას გვიპირებსო.

გამოვიდა ხელმწიფე, გაიხედა და თავზარი დაეცა: ლაშქრის თავი უკვე ქალაქში შემოსულა და ბოლო კი ჯერ კიდევ არა ჩანს. გამოვიდა ხელმწიფე სასახლიდან, შეეგება ბენიზარის შვილს და საყვედურით უთხრა:

— რა დაგიშავე, ბენიზარის შვილო, რომ ჩემს ასაკ-ლებად მთელი სამდევეთი მოგიყვანიაო?

ბენიზარის შვილმა დაიჩოქა და მოახსენა:

— რატომ მწამებთ ცილს, დიდებულო ხელმწიფე, — რაში ხედავთ თქვენსა და თქვენი ქვეყნის ღალატს? განა თვითონ თქვენ არ მიბრძანეთ სამდევეთის ამბის გაგება? მე მხოლოდ თქვენი ბრძანება შევასრულე და ამბის მაგიერ, მთელი სამდევეთი აქ მოვრეკეო.

ხელმწიფე მიხვდა თავის შეცდომას და თავის ერთგულ ვეზირს გულთბილი მადლობა გადაუხადა. მერე შიკრიკი გაგზავნა თავის ავადმყოფ ქალთან და შეუთვალა: ბენი-ზარის შვილმა ეს სურვილიც შეგისრულა — მთელი სამდევეთი აქ მოგიყვანა, გამოიხედე ფანჯრიდან და შენი თვალით დაინახეო.

გამოიხედა ხელმწიფის ქალმა და მაშინვე კარგად გასა და. გაიგო ხელმწიფემ ქალის მორჩენა, გასარებულმა დევთ ხელმწიფეც მიიწვია და დიდი ნადიმი გამართა. ნადიმის შემდეგ ბენიზარის შვილმა ჩონგური დევთ ხელმწიფეს დაუბრუნა და უთხრა:

— მე ჩემი სიტყვა შევასრულე ჩემს ხელმწიფესთანაც და თქვენთანაც. ასლა ჩონგური ისევ შენა გქონდეს და მშვიდობით დაბრუნდით თქვენს ქვეყანაშიო.

ღევთ ხელმწიფემ დიდი მადლობა გადაუსადა ჩონგურის დაბრუნებისათვის და თავის საყმოს ისევ თავისი ქვეყნისაკენ გაუძღვა.

გავიდა რამდენიმე სანი და ხელმწიფის ასულმა ისევ თავი მოიავადმყოფა, ჩაწვა ლოგინში და მოჰყვა კვნესას. დაიბარა მამა და უთხრა:

— თუ გაქვავებული ქალაქის ამბავს გამაგებინებ, მოვრჩები, თუ არადა სიკვდილი არ ამცდებაო.

— შეილო, ოღონდ შენ კარგად გახდი და მთელს ჩემს საბრძანებელს ფესზე დავაყენებ, მოვაძებნინებ იმ ქალაქს და ამბავსაც მოვატანინებო, — უთხრა ხელმწიფემ.

ქალმა უთხრა:

— სხვა ვერავინ შეიტყობს, ისევ ბეინაზარის შვილი გაგზავნეო.

დაიბარა ხელმწიფემ ბეინაზარის შვილი და უთხრა:

— ჩემო ერთგულო ვეზირო, ჩემი მზეთუნახავი ქალი ისევ ავად გახდა. დღეს დამიბარა და მითხრა, — თუ გაქვავებული ქალაქის ამბავს გამიგებ, მოვრჩები, თუ არადა მოვკვდებიო. ჩემს საბრძანებელში შენზე საიმედო არავინ მეგულება და ეს ამბავიც ისევ შენ უნდა გამიგოო.

— შენი ხმალი და ჩემი კისერიო, — უთხრა ბეინაზარის შვილმა, შეიბა მამისეული ხმალი და ზღვის სანაპიროს მიაშურა. დადგა ზღვასთან და ტალღებს ჩასძახა:

წითელი ზღვის წითელო თევზო,  
ჩემი თხოვნა შეიწყნარე,  
შენი ძმა ბეინაზარის შვილს  
საქმე უჭირს, მიეხმარე.

გამოცურდა წითელი თევზი და ჰკითხა:

— რაო, რა გაგჭირვებიაო?

ბეინაზარის შვილმა უთხრა, რომ ხელმწიფემ ასლა გაქვავებული ქალაქის ამბის გაგება დამავალაო.

— ნუ გეშინია, ეგ ადვილია, სხვა — ძნელი, — უთხრა თევზმა და დაარბია, როგორც უნდა მოქცეულიყო:

— ივლი, ივლი, ცხრა მთას გადაივლი და მიადგები. გაქვავებულ ქალაქს. მხოლოდ ქალაქის შუა ადგილას ნახე ერთ კაცს, რომელიც მარტო წელსქვევით იქნება გაქვავებული. ის კაცი იმ ქალაქის ხელმწიფეა. მიდი ახლოს, გაქვავებულ მუხლებზე ფესი დაადგი, ხელი თავზე დაადევი და სანამ თვითონ არ დაგულაპარაკება, სმა არ ამოიღო, თორემ შენც გაქვავდები. მალე ხელმწიფესთან მისი კუდიანი ცოლი მოვა. იმ ქალს ერთი ჯადოსნური სახრე აქვს, თუ იმას წაართმევ, ყველა სურვილი შეგისრულდება და გაქვავებული ქალაქის ამბავსაც მისგან გაიგებო.

გადაუხადა წითელ თევზს მადლობა ბეინაზარის შვილმა და გაუდგა გზას. ბევრი იარა თუ ცოტა იარა, ბოლოს მივიდა გაქვავებულ ქალაქში. შევიდა შუა ადგილას და ნახა წელსქვევით გაქვავებული ხელმწიფე. მივიდა ახლოს, როგორც თევზმა დაარბია, და ფესი გაქვავებულ მუსლებზე შეადგა, ხოლო ხელი თავზე დაადო.

ხელმწიფე ჯერ ჩუმად იყო, მაგრამ რა დარწმუნდა. ეს ხმას არ ამოიღებდნო, პირველმა თვითონ დაილაპარაკა:

— ვინა ხარ, რა კაცი ხარ, ან აქ მოსვლა რამ შეგაძლე ბინაო? — ჰკითხა.

ბეინაზარის შვილი დაუფარავად მოუყვა თავის თავგადასავალს და შეესხა:

— ნუ დამიმალავ, მითხარი, რატომ ხართ გაქვავებული შენ და შენი ქალაქიო?

— მე ვერაფერს გეტყვი, — უთხრა ხელმწიფემ, — მაგრამ თუ მაგ ამბის გაგება ეგრე გულით გინდა, მალე ჩემი მზეთუნახავი ცოლი მოვა, შენ სადმე დაიმალე და უყურე. რასაც ის გააკეთებს, ამ ქალაქის გაქვავების ამბავიც ის არისო.

„თუკი ყველაფერს ჩემი თვალით ვნახე, ამას რაღა აჯობებსო“, — თქვა გულში ბეინაზარის შვილმა და იქვე ახლოს გაქვავებულ, ხშირტოტიან ბურქს ამოეფარა. არ გასულა დიდი ხანი და ხელმწიფის მზეთუნახავი ცოლიც მოვიდა. ხელში ცხრაწვერი მათრახი ეჭირა. მისდგა თავის ქმარს იმ

მათრახით და იმდენი სცემა, სანამ ღრიალი არ დააწყებინა.

— რაზე მტანჯავ, შე სულგაყიდულო, ერთხელ მომკალი და გამათავეო.

— არც მოგკლავ და არც წამებას მოგიშლი, იმიტომ, რომ ღირსი ხარო, — მიუგო ქალმა და უკან გაბრუნდა. გაჰყვა შორიასლო ბენიზარის შვილიც. ქალმა იარა, იარა და თავის სასახლეში შევიდა, ბენიზარის შვილი აბა შიგნით სომ ვერ შეჰყვებოდა! ცოტა ხანს შეიცადა, მერე კარის დარაჯებთან მივიდა და, როგორც თევზისაგან იყო დარიგებული, თქრობით გატენილი ქისა დაანახვა.

— რას ითხოვ, რისთვის მოსულხარო? — ჰკითხეს კარის მცველებმა.

— მინდა გავიგო, თქვენი ქალბატონი ღამღამობით რას აკეთებსო?

თქროს დახარბებულმა გუშაგებმა ყველაფერი დაწვრილებით გაანდეს:

— ჩვენი ქალბატონი ახლა ისვენებს, შუალამისას ადგება, შეგვაკაზმინებს ორ ცხენს, ერთზე თვითონ შეჯდება, მეორეზე ერთ-ერთი ჩვენთაგანი, რომ თან ვეახლოთ, და თავის საყვარელ ტარტაროზთან მიდის. დილაზე იქ დარჩება, იმან, რომელიც გავყვებით. ცხენებს უნდა მოვუაროთ და დილით ისევ სასახლეში მოვაცილოთ.

— არ შეიძლება, თქვენს მაგივრად მე გავყვეო? — ჰკითხა ბენიზარის შვილმა.

— ოღონდ ეგ სიკეთე გვიყავი, შუალამისას იქ ხეტიას გადაგვარჩინე და ჩვენც პატივს გცემთო, — მიუგეს გუშაგებმა.

დადგნენ ამ პირობაზე და დაელოდნენ დედოფლის გამოსვლას. შუალამე რომ მოახლოვდა, დედოფალიც გამოჩნდა და გუშაგებს გადმოსძახა: — ორი ცხენი შეკაზმეთო! გუშაგებმა თვალის დახამხამების უმაღლესი შეკაზმის ცხენები და კიბის ძირას დაახვედრეს. ერთზე დედოფალი შეჯდა, მეორეზე ბენიზარის შვილი და გასწიეს. წინ დედოფალი მიდიოდა, უკან ბენიზარის შვილი. იარა დედოფალმა და ერთ ბაღთან მივიდა. ჩამოსტა ცხენიდან, სადავე ბენიზარის შვილს მიუგდო და თვითონ ბაღში შევიდა. ბაღში ერთი შე-

საზარი რაღაც დასედა. — მთელი ტანი გრძელი ბალნით ჰქონდა დაფარული და ისეთი შავი იყო, რომ აფრიკის ზანგი მასთან შედარებით ანგელოზად გამოჩნდებოდა.

გადაეხვივნენ დედოფალი და ეს მახინჯი ტარტაროზი ერთმანეთს და დაიწყეს კოცნა და ალერსი. გული რომ იჯერეს, ქალი უკან გამობრუნდა, შეჯდა ცხენზე და წამოვიდა. ბეინაზარის შვილიც, რასაკვირველია, უკან გამოჰყვა. მოვიდნენ ისევ სასასტლეში.

ბეინაზარის შვილმა ცხენი გუშაგებს ჩააბარა და ჰკითხა:

— ახლა რას იზამს თქვენი ქალბატონიო?

— ახლა მოისვენებს, მერე თავის ქმარს აწამებს, სოლო შუაღამისას ისევ ტარტაროზთან წავაო.

ეს რომ გაიგო ბეინაზარის შვილმა, წამოვიდა და ისევ ხელმწიფის ახლოს დაიმალა. თან გუნებაში გადაწყვიტა, — რაღაც არ უნდა დამიჯდეს, იმ ქალს ის ჯადოსახრე უნდა წავართვა და ეს ქალაქი და ხელმწიფე წამებისაგან დავისნაო.

შუადღისას ქალიც მოვიდა, ჯერ მათრახით სცემა თავის ქმარს, მერე აიღო სახრე, დაარტყა და მიამახა: შენამც გაქვავებულხარ ისე, როგორც შენი ციხე-ქალაქიაო. ხელმწიფე იმავე წამს ქვად იქცა, შედგა ქალი ზედ და დაკლური დაუარა. წამოეპარა ბეინაზარის შვილი, უტაცა სახრეს ხელი და წაართვა, დააწყვიტა ქალი ძირს, იძრო ბასრი ხმალი. ყელზე დააბჯინა და უთხრა:

— სწორედ მითხარი, რად გააქვავე ეს ციხე-ქალაქი და ეს კაცი, თორემ თავს წაგაგდებინებო.

ქალი შეშინდა და შეეხვეწა:

— ოღონდ ნუ მომკლავ და ყველაფერს დაწერილებით გიამბობო, და უამბო: ეს კაცი ამ ქალაქის ხელმწიფეა, მე მისი ცოლი ვიყავი და ვცხოვრობდი ბედნიერად, გავიდა ხანი და მომბეზრდა საამური ცხოვრება. გულში თანდათან დარდი და ჭმუნვა გამიჩნდა. ჩემი ქმარი ამას ხედავდა, მაგრამ არავითარ ყურადღებას არ მაქცევდა, — სახელმწიფო საქმეებით იყო გართული და მე აღარც კი ვახსოვდი.

ერთ ღამეს ჩვეულებრივ მარტო ვიწევი ჩემს ოთახში და გულს დარდი მიღრღნიდა, ჩემი ქმარი სახელმწიფო საქმე-

ვებით იყო დაკავებული. ამ დროს შემოვიდა ერთი ულამაზესი ახალგაზრდა, ჩამომიჯდა საწოლზე და მითხრა: დედოფალო და ქვეყნის ქალთამშვევ, შენს გულს ახალი სიყვარული და ალერსი სწყურია, წამოდი ჩემთან, გულიდან დარდი გადაგეყრება და ისევ ბედნიერი იქნებიო.

შემატდინეს ამ სიტყვებმა და გავყევი, მაგრამ ბედნიერებას მაინც ვერ ვეღირსე — ის მშვენიერი ახალგაზრდა თურმე მოჩვენება იყო, სინამდვილეში ეშმაკების ტარტაროზი ყოფილიყო და მე მისი საყვარელი გავხდი.

რალას ვინამდღ რაკი შეეცდი და ეს ნაბიჯი გადავდგი, უკან სომ ვეღარ დავისევდი, თანაც ტარტაროზი მემუქრებოდა, თუ უარს იტყვი, საქვეყნოდ გამსელ და თავს მოგჭრიო.

გავიდა დრო, ჩენმა ქმარმა ეჭვი აიღო, მეთვალყურები მომიჩინა და ყველაფერი შეიტყო. მე მოუელოდი, რომ ჩემი შეცდენისათვის ეს შურს იძიებდა, მაგრამ ამან პირიქით გააკეთა, — მე მცემა და სასლიდან გამაგლო. ეს ამბავი იმავე დღეს მოეფინა ქალაქს, ქალი თუ კაცი ყველა მკიცხავდა და ზედ მათურთხებდა. ამან გამაბოროტა და გულში შურისძიების გრძნობა გამიჩნდა. ერთხელ წავედი ჩემს საყვარელ ტარტაროზთან და ვთხოვე, — რაიმე სერხი მასწავლე, რომ ჩემი ქმრისა და ხალხის ჯგავრი ამოვიყარო-მეთქი. — იმან აი ეს სახრე მომცა, შენ რომ ასლა წამართვი, და მითხრა: ამ სახრეს ისეთი თილისმა აქვს, რასაც გადაჰკრავ და ჩაუთქვამ, უმაღლე აგისრულდებაო. წამოვიღე სახრე, დავერიო ქალაქს და ყველაფერი ქვად ვაქციე, ჩემს ქმარს სწორედ ამ ადგილას შევხვდი და წელსქვევით გავაქვავე, რომ ნახევრად ცოცხალი ყოფილიყო და უფრო ძლიერად მეწამებინაო.

— ასლა რა გინდა, — ჰკითხა ბეინაზარის შვილმა, — როდემდე აპირებ ასეთ ცხოვრებას, ნუთუ არ მოგბეზრდა ამდენი ბოროტებაო?

— დიასაც მომბეზრდა, მაგრამ რა ვქნა, მშველელი არავინა მყავს, რომ ჩემს ქმარსა და ხალხთან შემარიგოს, თორემ მე ყველაფერს დავივიწყებდი, იმ ტარტაროზს ამ თილისმა სასრით ნაცრად ვაქცევდი, ქალაქსა და ხელმწიფეს გავაცოცხლებდი და ისევ ბედნიერ ცხოვრებას დავიწყებდიო, — მიუგო ქალმა.

— მე შეგარიგებო, — უთხრა ბეინაზარის შვილმა.

ქალს სისარულისაგან ცრემლები წამოსცვივდა და ბეინაზარის შვილს შეეხვეწა:

— ჩემო ძმავო, ოღონდ ეგ სიკეთე მიყავი, შემარიგე ჩემს ქმარს, ჩემს მშობელ მიწას, ხალხს და სიტყვას გაძლევ, რომ ჩემზე უფრო კეთილი და გულმოწყალე ადამიანი ქვეყნად მეორე არ იქნებაო.

ბეინაზარის შვილმა ხმალი ისევ ქარქაშში ჩააგო, მისცა სახრე ქალს და უთხრა; — შენი ხელით გადაჰკარი სახრე და ყველას წინაშე შენი დანაშაული შენვე გამოისყიდეო.

ქალმა ჩამოუარა ქალაქს და ყველას და ყველაფერს ისევ წინანდელი სახე და სიცოცხლე დაუბრუნა. ბოლოს თავისი ქმარიც გააცოცხლა. ბეინაზარის შვილი შუამავლად დაუდგა და ხალხსა და ხელმწიფეს სთხოვა, რომ ეპატიებინათ დედოფლისათვის შეცდომა და შერიგებოდნენ, მით უფრო, რომ თავისი დანაშაული მოინანია და გამოისყიდაო.

ხალხმა ერთხმად იგრიალა, — ვაპატიოთ, ვაპატიოთო! — და ხელმწიფეც შეურიგდა.

— რით გადაგიხადო ჩემზე გაწეული ესოდენი დიდი სიკეთეო? — ჰკითხა დედოფალმა ბეინაზარის შვილს.

— მე ბევრი არაფერი მინდა, — უთხრა ბეინაზარის შვილმა, — გადამკარი სახრე და, თუ შეგიძლია, ვაჟად მაქციეო.

— განა ახლა კი ვაჟი არა ხარო? — გაუკვირდა დედოფალს.

— ვაი, რომ არა ვარო, — მიუგო ბეინაზარის შვილმა, ჩამოიშალა ქუდში დამალული ნაწნავები და თავისი თავგადასავალიც დაწვრილებით უამბო.

— შენ მართლაც ღირსი ყოფილხარ ვაჟკაცის ქუდისა და სახელის ტარებისათ, — უთხრა დედოფალმა. გადაჰკრა-სახრე და ვაჟად აქცია.

გამოემშვიდობა ბეინაზარის შვილი ხელმწიფეს და დედოფალს, ხალხს და გამოსწია შინისაკენ. ხელმწიფეს ძალიან გაუხარდა ერთგული ვეზირის უენებლად დაბრუნება და იმავე დღეს თავის ქალთან წაიყვანა. ბეინაზარის შვილმა უამბო

ხელმწიფის ქალს გაქვავებული ქალის ამბავი და ქალიც იმავე წუთს საღსალამათი წამოდგა ლოგინიდან.

მაგრამ ქალმა მაინც ვერ მოისვენა, მეოთხედ მოიავად-მყოფა თავი, დაიბარა თავისი მამა და უთხრა:

— თუ ბეინაზარის შვილს გამაყოლებ ცოლად, მოვრჩე-ბი თუ არადა, მოვეკვდებიო.

წამოვიდა ხელმწიფე და თავის ვეზირს ჰკითხა:

— ბეინაზარის შვილო, ჩემი ქალი ცოლად წამოყოლას გთხოვს და რას იტყვიო?

— მადლობისა და სიხარულის მეტი რა შეთქმის, დიდებულ ხელმწიფე, მაგრამ ჯერ ჩემს დედ-მამას უნდა შევატყობინო და ნებართვა ვთხოვო, — მოახსენა ბეინაზარის შვილმა.

— დროს რამდენს ითხოვო? — ჰკითხა ხელმწიფემ.

— ერთი დღე და ღამე მეყოფაო.

— ერთი დღე და ღამე როგორ გეყოფა, ისინი ხომ ზღვის გაღმა არიანო? — გაუკვირდა ხელმწიფეს.

— თქვენ ეგ ვადა მომეცით და დანარჩენი მე ვიციო, — უთხრა ღიმილით ბეინაზარის შვილმა.

ხელმწიფემ ნება დართო. წავიდა ბეინაზარის შვილი ზღვის პირას და დაიძახა:

წითელი ზღვის წითელო თევზო,

ჩემი თხოვნა შეიწყნარე.

შენ ძმობილ ბეინაზარის შვილს

საქმე უჭირს, დაეხმარე.

გამოცურდა წითელი თევზი და ჰკითხა:

— რა იყო, რა გაგჭირვებიაო?

— ასეა და ასეა ჩემი საქმე და, უნდა წახვიდე და ხვალისათვის ჩემი დედ-მამა აქ მომიყვანო, — უთხრა ბეინაზარის შვილმა.

— ეგ ადვილია, სხვა — ძნელი, — თქვა თევზმა, ისარი-ვით გასრიალდა წყალზე და მეორე დილას მოხუცი ბეინაზარი და იმისი ცოლი უკვე სასახლეში იყვნენ. შვილი და მშობლები სიყვარულით გადაეხვივნენ ერთმანეთს. დედ-მა-



მა ყველაზე უფრო მისმა ვაჟად ქცევამ გაახარა. ბეინაზარის შვილმა ხელმწიფეს კაცი გაუგზავნა, დედ-მამა ჩამოვიყვანე და მზადა ვარ ჯვარისწერისთვისო.

ხელმწიფემ მთელი თავისი სამფლობელო მოიწვია და ქალსა და სიძეს არნახული ქორწილი გადაუხადა. ბეინაზარის შვილმა ერთსულ კიდევ დასაქმა წითელი ზღვის წითელი თევზი, თავისი დებიც სასახლეში მოაყვანიდა და დაიწყო ტკბილი და ბედნიერი ცხოვრება.

ჭირი — იქა, ლხინი — აქა,

ქათო — იქა, ფქვილი — აქა.

ელასა, მელასა, ჭიქა შეკიდა ყელასა,

მთქმელსა და გამგონებელსა, ძილი გაამოთ ყველასა.








ଶ୍ରୀକୃଷ୍ଣ







## კოკალა

ოდესღაც, ძალიან დიდი ხნის წინათ, მთელი არაგვის ხეობა, ჟინვალიდან დაწყებული მათურა-წუბროვანის მთებამდე, დევებით ყოფილა დასახლებული. იმდენად გამრავლებული ყოფილან დევები, რომ ხალხი შიშით კარში ვეღარ გამოდენილა, გუთანი ვერ გამოუტანია და უშიშრად ვერც ცხვარ-ძროხა უძოვებია. სადაც კი მოახელთებდნენ დევები ხალხს და საქონელს, დაიჭერდნენ, მორეკაედნენ მთავარ სიმაგრეში და ერთ წუთში გადასანსლავდნენ.

მთავარი ციხე-სიმაგრე ხევსურეთის ერთ მთაზე ჰქონიათ, ამ მთას დღესაც ციხეგორი ჰქვია. ციხეგორში ჰყოლიათ თავიანთი უფროსი ცხრათავიანი დევი, სახელად ბაჭიჭაური. თურმე დაჭერილი ხალხი და ცხვარ-ძროხა ჯერ იმასთან მიჰყავდათ, ის ამოარჩევდა ყველაზე საუკეთესოებს და დანარჩენს ხელქვეითებს უტოვებდა შესაჭმელად.

ერთხელ ერთი ქვრივი ქალი ტყეში ფიჩხზე წავიდა და თან თავისი პატარა ბიჭი კოპალაც წაიყვანა. მოასწრეს დევებმა, შეიპყრეს ორივე, დედა-შვილი და ბაჭიჭაურს მიჰგვარეს. ბაჭიჭაურმა ქალი მაშინვე გადასანსლა, ბიჭი კი ცოცხალი, დატოვა, — ჯერ გაიზარდოს და მერე შეეჭამო.

ჩავარდა ამ დღიდან კოპალა დევების ხელში. დევები პატარა ბიჭს უმოწყალოდ იმსახურებდნენ — ხან წყალს მოატანინებდნენ, ხან შეშას და თან სულ თავში უტყაპუნებდნენ. კოპალას ძალიან სწყინდა დევების ასეთი თავგასულობა, მაგრამ პატარა იყო, ძალადობა არ შეეძლო და ითმენდა.

ამ ტანჯვა-წვალებით გაიზარდა და კარგი თვალტანადი ვაჟაკიც დადგა. უკვე ვეღარ იტანდა დევების თარეშს ხალხზე და დღე და ღამე სამაგიეროს გადახდაზე ფიქრობდა. მაგრამ რა შეეძლო, დევებს რით გაუშკლავდებოდა?

ადგა ერთ უკუნეთ ღამეს კოპალა და ცინეგორიდან გაბარა, გადაიარა მთები, ტყეები, სევები და მდინარე ივრის პირას, იხინჭის მონასტერში მივიდა. დადგა იქ ბერებთან და დაიწყო ლოცვა. დღე და ღამე ღმერთს სულ იმას ევედრებოდა, იმდენი ღონე მომეცი, რომ დევებისათვის სამაგიეროს გადახდა შეეძლო.

ღმერთი თვითონაც განრისხებულნი იყო დევებზე, რომ სალხს ასე უდიერად ანადგურებდნენ, და კოპალას ვედრება შეისმინა, — მისცა სამოცი უღელი ხარის ღონე და ერთი ცეცხლის მფრქვეველი საომარი ლახტიც აჩუქა. კოპალამ ნკლავში ღონე იგრძნო, ჯანის გამოსაცდელად ეკლესიის წინ მდგარ უზარმაზარ იფნის ხეს მისწვდა და ძირფესვიანად მოგლიჯა. რაკი თავის იმედი დაიჭირა, აღარ დააყოვნა, იმავე დღეს მონადირულად ჩაიცივა და ცინეგორს ესტუმრა. ნაცნობმა დევებმა კოპალა ვეღარ იცნეს, მართლა მონადირე ეგონათ და იმისი მისვლა ძალიანაც გაუხარდათ, — საკბილო თავისი ფეხით მოგვივიდაო.

გატუნდა მეორე დღილა და დევებმა ჩვეულებრივ შეჯიბრი გამართეს — მოიტანეს ორმოცფუთიანი საჯილდაო ქვა და სროლაში გაიჯიბრნენ. ზოგი შორს ისროდა, ზოგი — ახლოს. კოპალა მივიდა და განგებ მორიდებულად სთხოვა, — მეც მასროლინეთო. — დევებმა სიცილიად არ იკმარეს, — შენ რა ხარ და შენი გასროლილი ქვა რაღა უნდა იყოსო.

დევებში სუთი ძმა მჭედელი იყო. იმათ გამოუტანეს კოპალას რკინის გრდემლი და ერთი ნაჯღანი ცული. და უთხრეს:

— თუ ამ ცულით ამ რკინის გრდემლს ნაფოტს ააძრობ, ქვასაც გასროლინებთო. — დევები, რა თქმა უნდა დასცინიან, ჰგონიან, რომ კოპალა ცულსაც ვერ დასძრავს, მაგრამ მოტყუვდნენ, კოპალამ ერთი შემოკვრით გრდემლიც ფუტუროსავით გახლიჩა და ცულიც ზედ მიაფშენიტა. ახლა კი შეკრთნენ დევები და ფერი ეცვალათ: ეს ვიღაც სასიკეთოდ

მოსული არა ჩანს და ჯობია, მშვიდობიანად მოვიცილოთ თავიდანო.

— რა გინდა, ჩვენთან რატომ მოხვედიო? — ჰკითხეს ბოლოს.

— რა მინდა და ეს ადგილი ჩემი საკუთრებაა და დღეიდან აქედან უნდა აიყაროთო, — მიუგო კობალამ.

— მაშ, შევეჯიბროთ და ვინც აჯობოს, ციხეგორიც იმას დარჩესო, — უთხრეს დევებმა.

— შევეჯიბროთო, — დათანხმდა კობალა.

წამოიღეს საჯილდაო ლოდები და უძილაურთის ვაკე მთაზე, ირემთ-კალოზე გამოვიდნენ. გამოვიდნენ და გასძახეს ფშავ-ხევსურეთის მთებში მცხოვრებ დევებს, — მოდით და მოწმეებად დაგვესწარიეთო.

ყველაზე დიდი და ღონიერი დევები ივრის კუდებიდან მოსულან. ირემთკალოს ვაკეზე დიდი სიპები დაუწყვიათ, რომ ქვის სროლის დროს ფეხები მიწაში არ ჩაფლობოდათ. ირემთკალოს ახლაც ისევ აწყვია ის სიპები. შემდგარან დევები ზედ და დაუწყვიათ სახლის ოდენა ლოდების ციხეგორისაკენ სრთლა. ციხეგორში დევებს ჩუმად ქაჯები დაუყენებიათ, — თუ ვინიცობაა, კობალამ გვაჯობოს, იმისი ნასროლი ქვა უკან გადმოაგორეთო.

კობალას ნასროლი ქვა სამოცი ნაბიჯით შორს დაცემულა. მისცვივინან მაშინვე ქაჯები და გადმოუგორებიათ, მაგრამ ბოლომდე ვერ ჩამოუტანიათ, ერთ-ერთი დევის ნასროლ ქვას წამოსდებია და გაჩერებულა. ევაჯგურებიან ქაჯები, უნდათ, როგორმე გადმოაცალონ ქვას და სულ ბოლოს მოაქციონ, მაგრამ სულ ტყუილად — ძვრას ველარ უშვრებიან. ამ დროს დევები და კობალაც მისულან ნასროლის სანახავად და შესამოწმებლად. კობალა მიხვედრილა დევების გაიძვერობას და უფრო გაჯავრებულა, ჯერ ის ქაჯები დაუხოცია ქვასთან, — ის ქვები დღესაც ისევ ისე აწყვია. — მერე დარეგია თავისი ცეცხლისმფრქვეველი ლახტით დევებს და სულერთიანად ამოუქლეთია.

დამკვიდრდა ამ დღიდან კობალა ციხეგორში, თავს ნადირობით ირჩენდა და დევების თარეშისაგან ხალხს საიმე-

დოდ იცავდა, სადაც კი დევებს დაიგულებდა, თავისი ლახტით უმაღლივ გაჩნდებოდა და მუსრს ავლებდა.

ციხეგორელი დევების შემდეგ ყველაზე მეტად კართანელი დევები იყვნენ გამხვივებული და ხალსიც უფრო მათ უწვალეობათ. კართანა ჩარგლისა და მადაროსკარს შუა, მდინარე არაგვის ვიწრო გასასვლელს ჰქვია. დევებს წყლის მარჯვენა ნაპირზე ჰქონიათ ციხე-სიმაგრე, საფშავ-სასწევსურეთო გზა სწორედ მათი სახლის წინ გადენილა, ეს გზა შეკრული ჰქონიათ და ზედ მგზავრი არ გაუტარებიათ. კართანელ დევებში ყველაზე ღონიერი და განთქმული სამი ძმა ყოფილა, უფროსი — შავშალიკა, შუათანა — ავთანდილი და უმცროსი — მიგრი. გაუგონიათ ამ ძმებს ციხეგორელ დევების გაქლეტის ამბავი და განრისხებულან. შავშალიკას უთქვამს ძმებისთვის: წავალ და იმ ვიღაც კობალას, თუ ვერ მოვკლავ, ბიძაჩვენის საჯდომ ქვას მაინც წავართმევო.

წავიდა შავშალიკა და ციხეგორს იმ დროს მივიდა, როცა კობალა შინ არ იყო, — სანადიროდ იყო წასული. შემოახვია თოკი შავშალიკამ ბიძის საჯდომ ქვას, წამოიკიდა ზურგზე და გამოიტაცა.

დაბრუნდა კობალა სანადიროდან, ნახა, ქვა აღარსად არის, მიხვდა, ვისი ოინიც იქნებოდა და მაშინვე კვალზე გამოჰყვა. მოეწია კართანასთან, სადაც ახლა ის ქვა დევს და შორიდანვე ლახტი ესროლა. ლახტმა დევს თავზე გადაუარა, მოხვდა კლდეს და უზარმაზარი გამოქვაბული გააკეთა. შავშალიკამ ჭახანი რომ გაიგონა, მიხვდა, კობალა მომდევსო, ქვა ძირს დააგდო და გაქცევა დააპირა, მაგრამ მოასწრო კობალამ, სტყორცნა მეორედ ლახტი და ადგილზევე სული გააფრთხობინა.

კობალამ ქვა იქვე დატოვა და თვითონ დევების ციხესთან ავიდა. ქვა დღესაც არაგვის პირას დევს. ქვის გვერდით ერთი მოგრძო გორაკს დღესაც დევის საფლავს ეძახიან.

ციხის ბანზე შავშალიკას დედა იჯდა, წინ ჯარი ედგა და მშვილდის გასაბმელ ბაწარს გრეხდა. ხვიოდა ჯარა და მისგან ატეხილი ქარისაგან მთელი ტყე ბალახივით ილახტებოდა. დაინახა დევების დედამ კობალა და დაცინვით ჩამოსძახა:



— რა მოსულხარ ეს ბუზის ტოლა, მოდი კალთაში შე-  
მომეფარე, ან ჯარამ არ აგიხვიოს და ან ჩემმა შვილებმა არ  
მოგასწრონ, თორემ კბილის საჩიჩქნად არ ეყოფიო.

— სად არიან შენი შვილებიო? — ჰკითხა კოპალამ.

— ავთანდილი, აგე, იმ მთაზე წავიდა სანადიროდ, —  
უთხრა დევების დედამ და პირდაპირ ჩაყუდებული ქედი  
დაანახვა, თან თავმოწმონედ დაუმატა, — დედა ენაცვალოს,  
აღბათ, მთის იქით გადავიდა, თორემ იმისი ფუნის ხმაც კი  
თავზარს დაგცემდაო. მიგრი მიგრიაულთის ქედზე ნადი-  
რობს, შავშალიკა კი ცისეგორს წავიდა, კოპალას ბიძის  
საჯდომი ქვა უნდა წაართვასო.

კოპალამ გულში ჩაიცინა და უთხრა:

— დევების დედას, გატყობ, შვილებით თავი მოგწონე-  
ბია, მაგრამ გაფრთხილდი, ისე არ გაგინდეს საქმე, რომ თა-  
ვი მოგძულდესო.

კოპალა და დევების დედა რომ ამ საუბარში იყვნენ, დი-  
ყელის მთაზე ავთანდილი გადმოდგა, ცალ მხარზე ირემი  
ეკიდა, ცალში მშვილდი ეჭირა და შინისაკენ მოდიოდა. და-  
ინახა კოპალამ, ესროლა ლახტი და სული გააცხებინა. ავ-  
თანდილი მოსწყდა ადგილს და თავქვე სრიალ-სრიალით გა-  
მოქანდა. სწორედ იმის ჩამონაცურზე გაჩნდა ის ღელე, კო-  
პალას ქვის პირდაპირ რომ ჩამოდის და ხალხი დღესაც ავ-  
თანდილი მოსწყდა ადგილს და თავქვე სრიალ-სრიალით გა-  
ნავარდა და ლურჯ კლდედ გადაიქცა. ის ღოდიც ისევ იქა  
დევს.

უცებ ჰაერში რაღაცამ გაიშხულია და კოპალას გვერდით  
ტოტებგაშლილი ჭადარი ჩაესო მიწაში წვერით. ახლად  
დაინახა კოპალამ, მიგრი მიგრიაულთის მთაზე გადმოდგა-  
რიყო და მეორე ჭადარს ამზადებდა სასროლად, მაგრამ კო-  
პალამ აღარც აცალა, დასცეცხლა ლახტი და ისიც შავშალი-  
კასა და ავთანდილის გზას გაუყენა. მერე მათი დედაც მოკ-  
ლა, ბოლოს შეუვარდა ციხეში და, რაც დევები იყო, სულერ-  
თიანად ამოჟლიტა. დაბრუნდა ისევ ციხეგორში და დაიწყო  
მშვიდობიანი ცხოვრება, თან ხალხს თვალფხიზლად  
დარაჯობდა და ხვესურეთის მიწა-წყალზე დევებს არ  
აჭაჭანებდა.

სოფელ ბაზალეთში ყოფილა ერთი ძაღზე მამაცი და ღონიერი ბიჭი და სახელიც შესაფერი ჰქონებოდა — გულადა. შრომობდა გულადა — ხნავდა, თესავდა და გლეხის კვალობაზე კარგადაც ცხოვრობდა. ერთ ღლესაც გააწყო გულადამ ხარ-გუთანი და ბაზალეთის ტბის პირას ყანის სენას შეეუღა. ერთი მძლავრი ხარი ჰყავდა, მეორე — სუსტი და სწაუჭირდა. უცებ ტბიდან დევი ამოვიდა, გულადას ხარის სახით გამოეცხადა და უთხრა:

— გამოუშვი ეგ სუსტი ხარი და მე შემაბიო.

გაუხარდა გულადას და შეაბა. ხარმა ვერ კარგად გასწია და გუთანი კვალზე სწორად გაატარა, მეორე უცბად ტბისაკენ გაიწია და ხარ-გუთნის ტბაში ჩათრევა მოინდომა. გულადა მაგრა მოეჭიდა გუთნის ერქვანს, მოსწია და ხარ-გუთანი უკანვე გადმოყარა. დევი თავი დაიძვრინა უღლიდან და ისევ ტბაში გაუჩინარდა, ხოლო გულადამ ისევ სუსტი ხარი შეაბა და სალამომდე იმუშავა.

სალამოს, ხარ-გუთანი რომ გაუშვა, ჩამოჯდა იქვე და ქალამნებიდან მიწის გადმობერტყვა დაიწყო. უცებ ტბიდან ისევ ამოვიდა დევი, გულადას ახლა კაცის სახით გამოეცხადა და ჰკითხა:

— გულადას შენ გეძახიანო?

— მეძახიან და ვარ კიდევცო — მიუგო გულადამ.

— თუ მართლა გულადა ხარ, მაშ დამეჭიდეთ, — უთხრა დევმა.

— დაგეჭიდები და დედასაც გიტირებო, — მიუგო გულადამ, წამოუხტა დევს, დაავლო ხელი, წააქცია, დააჯდა მალღიდან და ყელში წაუჭირა.

დევი შეშინდა და შეეხვეწა:

— ოღონდ ნუ დამახრჩობ და ბედსა გწევო.

— ვინ იქნება იმის მოწმე, რომ პირობას ნამდვილად აასრულებო? — ჰკითხა გულადამ.

— მოწმედ აი ფშარაველის ნიში მომიციაო, — უთხრა დევმა. ფშარაველის ნიში მაშინ ბაზალეთში ყოფილა და დევმაც ის დაიმოწმა. თან გააფრთხილა გულადა, — ოღონდ არ შემარცხვინო, არავის უთხრა, რომ მე წამაქციე, თორემ შე-

ნი სიმდიდრე იმავე წამს გაქრება და ფშარაველასაც ბეგრად წელიწადში თითო წყვილ ქალ-ვაჟს დავადებო.

— კარგო, — დათანხმდა გულადა, აუშვა დევი და წავიდა შინ. შევიდა სახლში და რას ხედავს: სახლი ოქრო-ვერცხლითა და თვალ-მარგალიტით არის გამოტენილი. ჰკითხსა ცოლმა გულადას:

— რა, ჰქენი ისეთი, ეს სიმდიდრე საიდან გაგვიჩნდაო? გულადამ უთხრა:

— თავი დამანებე, ნუ მათქმევინებ, თორემ ყველაფერი გაგვიქრებაო.

ცოლი მაინც არ მოეშვა, დღეს-სვალ, დღეს-სვალ, დღეს-სვალ, იმდენი ქნა, იმდენი, რომ ბოლოს ათქმევინა. გულადამ გააფრთხილა, არსად სთქვაო, მაგრამ დედაკაცის პირში რა გაჩერდება! — გაუარდა მეზობლებში და ყველას გააგებინა, — ჩემმა ქმარმა დევი წააქცია და იმიტომ გავმდიდრდითო.

გაიგო დევმა ეს ამბავი და მთელი სიმდიდრე იმავე დღეს გააქრო. ფშარაველასაც ბეგარი დასდო. ყოველ ფშარაობა დღეს ამოდოდა ტბიდან, სალოცავად მოსულ ხალხში ამოარჩევდა საუკეთესო ქალ-ვაჟს, შეიყვანდა ტბაში და ჭამდა.

შეწუხდა ხალხი, შიშით სალოცავად ველარ მოდიოდა. ლანძღავდნენ და საყვედურობდნენ გულადას, — სალოცავს ეს ხარკი შენს გამო დაედოო. გულადა ითმენდა ხალხის საყვედურს, მაგრამ ბოლომდე ველარ გაუძლო. ერთ ღამეს სახლიდან გაიპარა, ფშარაველის ნიშიც თან წაიღო და ხევსურეთის, ფშავისა და გუდამაყრის სასაზღვრო მთაზე დაამკვიდრა, — იქნებ აქ მაინც ველარ მოაგნოს იმ წყეულმა დევმა და ხალხმა მოისვენოსო.

მაგრამ დევი რას მოეშვებოდა, მეორე წელსვე მიაგნო და თავისი ბეგარა მოითხოვა. ასე გაგრძელდა რამდენსამე წელს, — მოვიდოდა თუ არა ხალხი სალოცავად, დევიც იმავე წამს იქ გაჩნდებოდა, ამოარჩევდა წყვილ ქალ-ვაჟს, რომლებიც მოეწონებოდა და იქვე გადასანსლავდა.

არა და არ დაადგა ხალხს საშველი.

ბოლოს ეს ამბავი გაიგო კობალამ, გამოეწყო მლოცავებით, ლახტი ტანსაცმლის ქვეშ დამალა და ფშარაულას დღე-

ობაში წავიდა. დღეობაზე დიდძალ ხალხს მოეყარა თავი, ფშაგ-ხევსურეთიდან და გუდამაყრიდან კაციშვილი არ აკლდა. იკვლებოდა საკლავი და ისმებოდა ლუდ-არაყი. ყველა ღხინობდა და მხიარულობდა, მაგრამ გულში კი არავის ელხინებოდა და დევის გამოჩენას ყველა შიშ-ელდით მოელოდა.

უცებ დევის ღრიალმა მთა შეაზანზარა, იმავე წამს თვითონაც ამოძვრა კლდიდან და მლოცავ ხალხს თავს წამოადგა — საზარელი, ბანჯგვლიანი, ეშვებიანი და თვალებბღვრიალა. კოპალამ ხალხი გააფრთხილა, სანამ მე არ დაგროთოთ ნება, რაც გინდა დაინახოთ, კრინტი არავინ დასძრათო.

დევმა ჩამოუარა მლოცავ ხალხს და ჩამოათვალიერა, ხალხში ერთი ასლად ჯვარდაწერილი ქალ-ვაჟი ერია და დევმაც სწორედ იმათ დაადგა თვალი. მაშინ მივიდა კოპალა და უთხრა:

— ქალი ეგ წაიყვანე და ბიჭის მაგიერ მე წამოვალო.

დევმა არ იცოდა, თუ ეს კოპალა იყო, გაუხარდა კიდეც, რომ უფრო მოზრდილი ჩაიგდო ხელში, და დათანხმდა, წაიყვანა ორივენი, ჩასასვლელ ვიწრო კლდესთან რომ მივიდნენ, კოპალას ჰკითხა:

— რა გქვიაო?

— ამე მქვიაო, — მიუგო კოპალამ.

— ჩამიძეხ, ამეო, — უბრძანა დევმა.

— ჩამიძეხ, დევო, — მიუგო კოპალამ.

— ჩამიძეხ, ამეო, — კიდევ გაუმეორა დევმა.

— ჩამიძეხ, დევოო, — არ დაუთმო მაინც კოპალამ.

კარგა ხანს ასე იკამათეს, ბოლოს ისევ დევმა დასთმო და ჩაუძღვა. ძალიან ვიწროში რომ ჩავიდნენ, კოპალამ გაძლილო დამალული ლახტი, შემოუქნია დევს და თავი გააგდებინა. დაგორდა თავი თავქვე და ატეხა ყვირილი:— გაესკდი, გაესკდიო!

როცა კოპალა ხალხს აფრთხილებდა, ხმა არ ამოიღოთო, ერთი ქალი მაშინ იქ არ იყო, წყაროზე იყო წასული და კოპალას ნათქვამი არ მოუსმენია. წყაროდან მომავალმა დაინახა დაგორებული დევის თავი და მიაძახა:

— ადრე გასახეთქი იყავ და გასკდი და გაცამ-  
ტვერდიო!

ამის თქმა და, თავის გახეთქვა ერთი იყო, თავი ოთხად  
გაიპო, გაპობილი თავიდან ქვის სეტყვამ ისუვლა და მთელი  
ხალსი დაფარა. შიშველ მთაზე აბა რა დაიფარავდა.

ასლაც ფშარაოს მთის ვაკე წვერზე სამი სასაფლაოა,  
ერთში ფშაველები მარხია, მეორეში — ხევსურები და მესა-  
მეში — გუდამაყრელები. ის ქვის სეტყვაც — შავი უზარმა-  
ზარი ლოდებიც იქვე ყრია. მართალია, ამ დღიდან დევის  
ბეგარისაგან ხალსი საბოლოოდ განთავისუფლდა და ფშარა-  
ულას დღეობაც ისევე აღადგინა, მაგრამ თავიდან გადმო-  
სულმა ქვის სეტყვამ ისე შეაშინა ხალსი, რომ დღესაც იმ  
ვაკეზე ღამის გათევას ყველა ერიდება. — ემანდ კიდევ არ  
მოვიდეს ქვის სეტყვაო და არ ამოგველიტოსო.

რაკი დევები თვითონ ვერაფერს გასდნენ კოპალასთან,  
ეშმაკები მოიხმარეს, შეიკრიბნენ ერთად და გადაწყვი-  
ტეს, — სანამ კოპალა ჩვენს ჯილაგს ძირიანად ამოაგლებს,  
არაგვი დავაგუბოთ, ფშავ-ხევსურეთი წყალში ჩაეახროთ  
და კოპალაც თან ჩავაყოლოთო. ჩავიდნენ კართანაში, სადაც  
წინათ დიდი ციხე-გალავანი ჰქონდათ, მოზიდეს უზარმაზა-  
რი ლოდები და დაიწყეს ხეობის ამოვსება. ყველაფერი გა-  
კეთებული ჰქონდათ, არაგვი მსოლოდ ერთ ადგილსდა გა-  
დიოდა ვიწროდ, ერთი ლოდის ჩაგდებადა ეკლდათ და არაგ-  
ვიც დაგუბდებოდა. სწორედ ამ დროს მოუსწრო კოპალამ,  
დასცეცსლა და დასცეცსლა ლასტი, დევები სულერთიანად  
გაჟლიტა და ფშავ-ხევსურეთი დაღუპვას გადაარჩინა. სოლო  
მოზიდული ლოდები ხელუსლებლად დატოვა და არაგვის  
ხეობაც სწორედ ამიტომ არის იმ ადგილას ასეთი ვიწრო  
და ძლივს გასასვლელი.

ამდენ ბრძოლაში კოპალას ისრის პირები შემოელია და  
უკანა — ფშავს მჭედელ პირქუშთან წავიდა. ეს ადგილიც და  
სამჭედლოც წინათ დევებს ეჭირათ, პირქუშმა ყველაფერი  
კოპალას დახმარებით ჩაიგდო ხელში, მაგრამ პირქუშს შურ-  
ბი, ქართული ხალხური ზღაპრებო

მა წასძლია, რატომ აქვს კოპალას ასეთი დიდი სახელით, და ისრის პირების გაკეთებაზე უარი უთხრა.

წამოვიდა კოპალა ნაწყენი. გაიგეს ქუშხეველმა დევებმა კოპალას და პირქუშის დამდურება და პირქუში ტყვედ წაიყვანეს. კოპალას გულმა მაინც არ მოუთმინა და პირქუშის საშველად გაეშურა. ქუშხეველ დევებს ციხე-სიმაგრე მოხერხებულ ადგილზე ედგათ და კარგადაც ჰქონდათ გამაგრებული. კოპალამ იცოდა, რომ პირდაპირ მისვლით ციხის გატეხა გაუჭირდებოდა, ამიტომ ირგვლივ შემოუარა და უკეთ მისადგომი ადგილის ძებნა დაიწყო.

ბედად ამ დროს ციხეში დევებს ჩხუბი მოუვიდათ და ერთი დევი კარში გამოაგდეს. კოპალასაც ეს უნდოდა, დაიჭირა ეს დევი და ჰკითხა:

— მასწავლე, ციხეში როგორ შევიდეთ?

დევი უარზე დადგა. მაშინ კოპალამ ლახტი მოიმარჯვა და მოკვლით დაემუქრა. დევი შეშინდა და ციხის მთელი საიდუმლო ერთ წუთში ჩამოფქვა:

— მზე რომ შუა ცაზე წამოვა და ხეებს თავიანთი ჩრდილები დაუსწორდებათ, დევები მაშინ ისადილებენ, ბანგნარევ ღვინოს დალევენ და დაიძინებენ. იმ დროს მიდი და წინ აღარაფერი დაგიდგებაო.


შეიცადა კოპალამ სანამ არ მოშუადღევდა და ხეებს ჩრდილები არ დაუსწორდათ, მერე წაიძვარა დევი და შევიდა ციხეში. დევებს მართლაც ეძინათ — ჭერეხებივით ეყარნენ და მათი ხვრინვა-ფშვინვისაგან კედლებიც კი ზანზარებდა.

დასჭექა კოპალამ ცასავით, გააღვიძა დევები და თავისი ცეცხლისმფრქვეველი ლახტით სულ მუსრი გაავლო. გაათავისუფლა პირქუში, წამოიყვანა და შუაფხოში ისევ თავის სამჭედლოში დაამკვიდრა. პირქუშს შერცხვა თავისი საქციელისა, კოპალას პატიება სთხოვა და ღვთის ფიცი მისცა, — ამიერიდან მუდამ შენი შემწე და ერთგული თანამებრძოლი ვიქნებიო.

მართლაც, ამ დღიდან კოპალა და პირქუში ერთმანეთს აღარ მოშორებინან. კოპალა ციხეგორაში ცხოვრობდა, პირქუში — შუაფხოში, მაგრამ ერთმანეთთან ძმური მიმოსვლა

ჰქონდათ და დევებსაც მუდამ ერთიანი ძალით ებრძოდნენ. თუ სადმე ფშავ-ხევსურეთის მიწაწყალზე დევების ბუნაგი იყო, ყველგან მისწვდნენ და ყველგან პირწმინდად გაეღიტეს. გაწმინდეს ყველა ხეობა უწმინდური დევებისაგან და ყველგან ხალსი დაამკვიდრეს. სალხმაც შეიყვარა თავისი მშველელი და მთამაგე გმირები, როცა დაიხუცნენ, სამახსოვრო ნიშები დაუდგა და მათს სახელებს ღღესაც მსურვალედ ლოცულობენ.





## ი ა ხ ს ა რ ი

კობალას და პირქუშის სიკვდილის შემდეგ, დევები ისევ მომრავლდნენ, ისევ დაიჭირეს ყველა დიდი და მცირე ხეობა და ხალხი კვლავ შეავიწროვეს. უკანა ფშავის ხეობა შუაფხოსთან ჰქონდათ ჩაკეტილი. არაგვის გაღმა, იფნიან გორაზე, სადაც ფშაველები ახლა ხატობას იხდიან, ციხესიმაგრე ააშენეს და ჭალაზე ადამიანის ნასასს არ აჭაჭანებდნენ. ასეთივე ციხე ააშენეს ავის გორაზეც, ციხიდან არაგვის ჭალამდე თოკები ჰქონდათ გაბმული, ეს იმიტომ უნდოდათ, რომ ღამითაც ვერაფერს გაჰპარვოდათ, — მგზავრი თოკს წამოედებოდა და დევთა სიმაგრეში ზარები დაირეკებოდა. ჩამოცვივდებოდნენ დევები, დაიჭურდნენ მგზავრს და გადასანსლავდნენ.

ისევ შეწუხდა ხალხი და ღმერთს შეევედრა — გვიშველეო. ღმერთმა შეისმინა ხალხის ხვეწნა-მუდარა, ერთ დღეს ყველა ღვთიშვილს მოუხმო და თავის კარზე შეკრიბა. გამოსაცდელად სამოცლიტრიანი რკინა დაუდო წინ. ვინც იმას ასწევდა, დევებთან ბრძოლასაც ის შესძლებდა. ყველამ სცადა ღონე, მაგრამ ძვრაც ვერაფერს უყო. ბოლოს ყველამ იახსარს მიაპყრო მზერა. ღვთიშვილებში ის ყველაზე ახალგაზრდა იყო და ღონეც საკმაოდ ერჩოდა, მაგრამ უცბად ვერ გაბედა, შეკრთა, ვაითუ, ვერ ავსწიოო, უკან დაიხია და მორიგე ღმერთს, — კვირას ღონის ხუთმაგად მომატება სთხოვა. კვირამ სამმაგად მეტი ღონე უბოძა. მაშინ კი გაბედულად წამოდგა წინ და სამოცლიტრიანი საფალავნო რკინა ბუმბულივით აიტაცა.



ხვთის კარზე შევიყარენით

ხვთისშვილს სამოცდა სამია.

გადმოდგეს სასწორო-ჩარეკი, — „კვირაჲ. გეჭიროს თვალია“  
ჩამოირიგეს ხვთისშვილთა, ვერვინ გაუგდო ქარია,

ერთმანეთს ეუბნებიან: „აილებს იახსარია“.

ხუდი შესთხოვე კვირასა, გადმომიმეცა სამია,

სამოცლიტრიანს რკინასა ქვეშ გაუჭარე ქარია.

ღმერთმა დალოცა იახსარი, მისცა საომარი ლახტი,  
მშვილდქებიური და დედამიწაზე გამოისტუმრა:

მაჩუქა დამბადებულმა მშვილდ-ლახტი საომარია.

ჩამოვიდა დედამიწაზე იახსარი და პირდაპირ ხაშრის  
ხეობისაკენ გასწია. იქ, ივრის კუდებში ცსოვრობდნენ ყვე-  
ლაზე ძალოვანი, დიდრონი დევები და განთქმული ფალაქ-  
ნებიც ჰყავდათ. ცხრათავიანი დევის შვილები — მთების  
მგლეჯავი მუსა, ცხრათავიანი ბელელა და თორმეტთავიანი  
ბარდა.

იმ დღეს დევებს ქორწილი ჰქონდათ და გახურებულ  
ლხინ-ღრეობაში იყვნენ, დიდი კასრებით სვამდნენ ლუდს,  
ზედ კაცის თავფეხს აყოლებდნენ და სმამალლა ხორხოცობ-  
დნენ. გაეგოთ იახსარის დედამიწაზე ჩამოსვლის ამბავი,  
მაგრამ აინუნშიაც არ აგდებდნენ, — იახსარი კი არა, თვი-  
თონ დმერთიც რომ ჩამოვიდეს, ვერას დაგვაკლებსო.

იახსარი ხაშრის ხეობაში ქუდიელის მთიდან ჩამოვიდა,  
მთელ ხეობაში დევების მყრალი სუნი იდგა. იახსარი ისე  
შეზარა მათმა სიმყრალემ, რომ ახლოს მისვლა ვეღარ შეს-  
ძლო და უკანვე გამობრუნდა. ეს დაინახეს ღვთის კარზე  
თავმოყრილმა ღვთიშვილებმა და ერთი ჩოჩქოლი შეუდგათ:  
რას შვრება იახსარი, რატომ მოდის უკან? ნუთუ შეუშინდა  
დევებს და სირცხვილული გამოიქცაო?

დევებს ქონოდა ქორწილი, ეჩქვიფა სიმურ-წყალია.

ცხრათავ ჰყოლიყო დედაი, ცხრათ. შვილთ გამზრდელი  
ქალია.

თავს ედგათ სალუდე ქვაბი, რა ძნელი სანახავია.

მიველ და გამამაბრუნეს, სუნი ჰქონიყო მყრალია.

ხვთიშვილს დამიგმეს ნაქნარი — „რას ჩადის იახსარია?“  
შემრცხვა და ისევ გავბრუნდი, გამოვუცვალე ჟამია.  
საკვმისას ლახტი ჩავლრიე, თავს დავაქციე ბანია.  
ცხრანივ იმაში ჩავხოცენ, ვადინე სისხლის წყალია.

ამის შემდეგ იახსარმა მომართა მშვილდ-ქეიბური და  
გინც ლახტს გადაურჩა, ისინი ისრით გაყლიტა. სწორედ  
ამაზეა ეს ლექსი გამოთქმული:

ქარი იყო და ხვიოდა, ფოთოლი ჩამოდიოდა,  
იახსრის მშვილდ-ქეიბური ქუდიელაზედ წიოდა.  
ბარდა, ბელელა ჩახოცნა, მუხასაც გული სტკიოდა,  
ხაშრულა იმდენ არ იყო, რაც იმათ სისხლი სდიოდა.

რაკი ივრის კუდებში დევების სახსენებელი მთლიანად  
გააქრო, იახსარი ახლა არაგვის ხეობაში გადავიდა და პირა  
დაპირ ავისგორელ დევებს მიადგა. ესენიც ცხრანი ძმანი  
იყვნენ. ცხრათავიანი დედის შვილები და ავისგორზე ახლა  
ციხე-სიმაგრეს იშენებდნენ. იახსარმა ამათაც ხაშრელი დე-  
ვების დღე დააწია — სტყორცნა ლახტი და ახლადნაგები  
ქავ-ციხე ნაცარმტვრად უქცია. დევებიც დიდ-პატარიანად  
სულერთიან გაყლიტა. მარტო ერთი კოჭლი დევი გადაურჩა,  
გამოვარდა ნანგრევებიდან გულგახეთქილი და თავქვე გაიქ-  
ცა. იახსარმა ლახტი დაადევნა, მაგრამ დევმა მოასწრო და  
კლდეს მოეფარა. ლახტი კლდეს მოხვდა და ოთხად გახეთქა.  
ერთი ნახეთქი დევს მოხვდა და თვალი გამოსთხარა. გამოხ-  
ტა თვალწამოთხრილი დევი და ისევ გაიქცა. იახსარიც უკან  
მიჰყვა.

ერთ კოჭლ დევ გადამრჩომიყო, გამაირანა კარნია.  
საგმირო გამოვაყოლე, კლდეს მათარა თავია.  
კლდე ოთხად გავანათოსე, დევს გამოვსთხარე თვალია.  
კარგად სცოდნიყვნეს წყეულსა აბუდელაურ ტბანია.  
დევი იქისკე გამექცა, თან მივჰყევ იახსარია.

მირბის დევი და მისდევს იახსარი!

დევმა გადაიარა ფშავის მთები, გადაიარა ხევსურეთის  
მთებიც და ხევსურეთის ჭიუხის ძირას, აბუდელაურის ტბა

სმლით აკუწა.

დევი ნავიდა ცბაშია. შინქვიფ-შინქვიფნა ცბაშია.  
ღვთისაგან იყო ბრძანება, თან ნავჰყეუ იახსარია,  
დევი ღოვიღლე ცბაშია, თავს დაეამტვრიე ფარია.

დევის სისხლმა იახსარს ფრთები შეუკრა, რის გამოც  
ველარ ამოვიდა და დარჩა ცბაში. ხალხმა თავისი მხსნელი  
რომ ამ გასაჭირში ნახა, ძალიან შეწუხდა, გაგზავნეს კაცები  
მკითხავთან. მკითხავმა უთხრა, — სანამ ოთხრქა-ოთხყურა  
ცხვარს არ შოიფვანთ და ცბაში არ ჩაჰკლავთ, იახსარს არა-  
ფერი ეშველებათ. წავიდა ხალხი, ძებნეს ცხვა წვლიწაღს და  
ბოლოს ჰევსურეთში აღმოაჩინეს ოთხრქა-ოთხყურა ცხვარი.  
წაიყვანეს მაშინვე ცხვარი და აბუდეღაურის ცბაში ჩაკლეს.  
იახსარს გაესსნა ცბა, ამოვიდა ხმელეთზე, ბროლის ქვაზე  
შემოჯდა და ფრთები შეიბერტყა.


იქიდან ველარ ამოვე, სისხლმა გამიბნა ფრთანია.  
ეძებნეს ჩემთა მოყმეთა ოთხრქა, ოთხყურა ცხვარია,  
მაიყვანეს და ჩამოკლეს, — ღმერთო, დასწირე ჯვარია!  
ამოვხედ, ამოვიწიე, მაშინ გამეხსნეს გზანია.  
შემოვჯე ბროლის ქვაზედა, შემოვიბერტყენ მხარნია.  
დავხედე ჩემსა ნაჯდომსა, — ჭრელად მოჩანდეს ქვანია.

რაკი დევები დედაბუდიანად ამოწყვიტა და ხალხს ჭირთ  
მოაშორა, იახსარს დედამიწაზე აღარაფერი საქმე ჰქონდა,  
ისევ ღვთის კარზე უნდა დაბრუნებულიყო. ხალხს ძალიანაც  
არ უნდოდა მისი გაშვება, მაგრამ ღვთის ბრძანებასა და  
ნება-სურვილს ვერავინ შეიცვლიდა.

წასვლისას იახსარი ხალხს გამოემშვიდობა და თან ან  
დერძი დაუტოვა:

ავისგორს შამიკიდიდით ჩემი პატარა ზარია,  
დავკრა, ხმა ახადს გავიდას, გამოისახონ ჯვარია,  
ჩამოდგან წირვა-ლოცვაზე ჩემნი ერთგულნი ყმანია,  
მიდულეთ სალუდე ქვაბი, ყმანო, გეწერასთ ჯვარია.

ხალხმა მართლაც აასრულა თავისი მხსნელისა და მოა-  
მაგის ანდერძი: ახადსა და ავისგორაზე სამახსოვრო ნიშე-  
ბი აუგო, აგრეთვე ციხეგორში და მის სახელს დღესაც მო-  
წიწებით ლოცულობენ და ეთაყვანებიან. ხალხმა ის ბრძო-  
ლის ქვაც სალოცავ ნიშად გაიხადა, აბუდელაურის ტბიდან  
ამოსული იახსარი რომ შემოვჯდა და მხრები შემოიბერტყა,  
ის ქვა დღესაც იმავე ადგილას დევს, ყოველ ზაფხულს,  
ათენგენის მეორე დღეს, ტბასთან უამრავი მლოცავი იყრის  
თავს, თან სამსხვერპლო ცხვრები მოჰყავთ და იახსარის სა-  
ხელის სადიდებლად ბროლის ქვას საკლავეების სისხლით  
ნათლავენ.





## აბესალომ და ეთერი

იყო ერთი უშვილო ცოლ-ქმარი. დიდხანს ელოდნენ შვილის ყოლას, მაგრამ ისე ჩამობერდნენ, რომ შვილი არ ეღირსათ. ბოლოს, იმედი რომ გადაიწყვიტეს, ცოლმა დაუყინა ქმარს, წადი მკითხავთან, აკითხვინე, გაიგე, რა მიზეზით არა გვყავს შვილი, იქნებ რამე წამალიც გასწავლოს და ბედმა ჩვენსკენაც გადმოიხედოსო.

წავიდა კაცი მკითხავთან და აკითხვინა. მკითხავმა სამი ვაშლი მისცა და დაარიავა:

— წაიღე ეს ვაშლები და ცოლს მიუტანე, როცა მოშივდეს, ორი ვაშლი შეაჭამე. მერე, რომ მოსწყურდება, ერთიც მაშინ შეაჭამე და შვილი გაგიჩნდებათო.

გზაზე კაცს მოშივდა, ველარ გასძლო და შეჭამა ორი ვაშლი, მერე მოსწყურდა და ის მესამეც ზედ მიაცოლა.

შეჭამა თუ არა კაცმა ვაშლები, იმავე წამს კანჭში ქალი ჩაესახა. კაცს შერცხვა, მოიჭრა კანჭი და გადააგდო. სუნზე ერთი ფრთათეთრი ორბი მოფრინდა, ჩასჭიდა კლანჭები კაცის კანჭს და წაიღო თავის ბუდეში, ერთი მაღალი ხის წვერზე.

მაღე კანჭიდან გაჩნდა ქალი. ორბმა ეთერი დაარქვა და შეუდგა გაზრდას, ყოველდღე გაფრინდებოდა ბუდიდან, დაივლიდა მთელს ქვეყანას და სადაც კი კარგ და გემრიელ საჭმელს იპოვიდა, მოუტანდა. ქალი დღითიდღე იზრდებოდა და ლამაზდებოდა, რომ გაიზარდა, ისეთი ლამაზი და ტურფა შესახედი დადგა, რომ იმაზე უკეთესი ქვეყნად აღარ მოიძებნებოდა.

იმ ქვეყნის ხელმწიფეს, სადაც ეთერი იზრდებოდა, ერთი საქორწილო ბიჭი ჰყავდა, სახულად აბესალომი. აბესალომს ნადირობა უყვარდა და ტყეში ხშირად დადიოდა. ერთხელ სწორედ იმ ხესთან გაიარა, დაინახა ეთერი და ჩაუვარდა გულში იმისი სიყვარული. ამის შემდეგ ნადირობა აღარც მოჰკონებია. ყოველ ცისმარე დღეს იმ ხის ძირას ატარებდა და ეთერს შორით ესიყვარულვებოდა. ერთხელაც ველარ მოითმინა და დაუძახა:

ჩამოდი, ეთერო, ძირსა,  
მანდ რას უზიხარ ხესაო,  
ჩამოდი, ცოლად გამომყევ,  
მანდ ნუ იღერებ ყელსაო.

ამაზე ეთერმა უბასუხა:

შენ მდიდარი, მდიდრის შვილი,  
დედა-მამით ხარ ქებული,  
ნუ ობოლი, ობლის შვილი,  
ობლობით ვარ დაჩაგრული,  
კაცის კანჭში ჩასახული,  
შარის პირას დაგდებული,  
ორბის კლანჭით აღებული,  
ხის კენწერზე დადებული,  
შენ შენი ჰქმნა და წახვიდე,  
გამიშვა წყალწაღებული.

აბესალომმა ღვთის ფიცი მისცა, არ გიღალატებო:

ზევიდან ღმერთი ცეცხლსა ჰყრის,  
ქვეშ აბესალომ უდგება,  
ეთერო, შენსა ღალატსა,  
ღვთის მეტი ვინ შეუდგება.  
ომში ხმალამოღებულსა,  
აბჯარიმც ჩამომიწყდება,  
წყალი, უწყლოსა აღაგსა.

ზღვა იყოს, ამომიშრება,  
შვიდი წლის გზასა მავალსა  
საგზალიმც დამიმიწდება,  
თოფი მტრისაკენ დახრილი,  
გულშიამც დამიბრუნდება.

დაიჯერა ეთერმა აბესალომის ფიცი და დათანხმდა. აბესალომმა, რაკი სელთ იმჟამად არაფერი ჰქონდა, სანიშნოდ ერთი შავტარიანი დანა აჩუქა, შემოისვა ცხენზე და წაიყვანა შინ.

აბესალომს ერთი ყმა ჰყავდა, სახელად მურმანი. აბესალომმა მურმანი წინ გაგზავნა და თავის დასთან, მარეხთან დააბარა:

— ცოლი მომყავს, ოქროსთმიანი ეთერი და საქორწილო ტანისამოსი მოგვიმზადეო.

დაუმზადა მარეხმა საჩქაროდ საქორწილო ტანისამოსი, მოიყვანა აბესალომმა ეთერი და ჩააცვეს. მდიდრულმა ჩაცმამ ისე დაამშვენა, რომ რაც იყო, ორი იმდენი სილამაზე შენატა. დაწერა აბესალომმა წიგნები და ქორწილში თავის სახელმწიფოდან კომლზე კაცი დაიბარა, მისცა წიგნები მურმანს და გაგზავნა მოპატიჟედ.

მურმანს დანახვისთანავე შეუყვარდა ეთერი, მიდიოდა ახლა გზაზე გულმოკლული და სულ იმის ფიქრში იყო, ნეტა ისეთი ვინმე გამოჩნდებოდეს, რომ ეთერი აბესალომს შეაძულოს და მე ჩამიგდოს ხელშიო. შემოხვდა ამ დროს წინ ეშმაკი და ჰკითხა:

— საით მიდიხარ, მურმანო, ან აგრე ძლიერ რას დაღონებულხარო?—მურმანმა თავისი გასაჭირი გაანდო. მაშინ ეშმაკმა უთხრა:

— მაგას რა ნატვრა უნდა, თუ შენს სულს მე მომცემ, ისეთ წამალს გასწავლი, რომ აბესალომმა ეთერი თავისი ხელით გადმოგილოცოსო.

— ოღონდ ეთერი ჩემი გახდეს და სულს კი არა, რჯულსაც მოგყიდო, — უთხრა მურმანმა.

ეშმაკმა ზელწერილი მოსთხოვა:

— ჯერ ხელწერილი დამიწერე, რომ პირს ველარ გადასვიდე და წამალს მერე გასწავლიო.

დაუწერა მურმანმა ხელწერილი და მისცა. ეშმაკმა უთხრა:

— ჯვარს რომ დაიწერენ და ეკლესიიდან გამოვლენ, ეთერს ერთი მუჭა ფეტვი ხელუკუღმა გადააყარე, მკბენარი დაეხვევა იმდენი, რომ სულ რომ აცალონ, მაინც ვერ გააყლიან, სანამ შენს ხელში არ ჩავარდება. აბესალომს შესძულდება ეთერი და შენ გადმოგილოცავსო.

დაბრუნდა შინ სულგაციდული მურმანი და გაჰყვა ეთერსა და აბესალომს ეკლესიაში. ჯვარი რომ დაიწერეს და ეკლესიიდან გამოდიოდნენ, მურმანმა პატარძალს ერთი მუჭა ფეტვი გადააყარა ხელუკუღმა. დაეხვია მკბენარი ეთერს, აცლიან, მაგრამ უფრო მეტი უხვევა. შეწუხდა აბესალომი ძალიან, მაგრამ საშველი რომ ვერაფერი ნახა, გამოიყვანა ეთერი ხალხში და საჯაროდ დაიძახა:

ორშაბათ შეყრილ მიჯნურნი  
სამშაბათს გავიყარენით,  
ვისაც რომ შეყრა გეწყინათ,  
გავყრილვართ, გაიხარენით,  
ვის გინდათ ქალი ეთერი,  
მე სანადიროდ წავალო.

აუსრულდა სულგაციდულ მურმანს გულისწადილი, დაიჩოქა აბესალომის წინ და შეღალადა:

უბოძე შენსა მურმანსა,  
შენი ერთგული ყმა ვარო.

მიუყვანა აბესალომმა ეთერი და თავისი ხელით ჩააბარა მურმანს. მოკიდა თუ არა მურმანმა ხელი, ეთერს მკბენარი იმავე წამს მოშორდა, წამოიყვანა და დაისვა ცოლად.

აბესალომს, განშორების შემდეგ, უფრო ცუცხლად მოედო ეთერის სურვილი, ერთხელ მურმანს შეხვდა, ველარ მოითმინა და ჰკითხა:



მურმან, მურმან, შენსა მზესა,  
ეთერ-ქალი რარიგია?

მურმანმა უპასუხა:

რას კითხულობ, ცათა სწორო,  
ცოლის ქება აუგია,  
შენც გინახავს ბროლის ციხე,  
წვერი ცამდის აულია.  
ღიგა ზის ქალი ეთერი,  
ყელი მოუღერებია,  
წელი წვრილი, ბეჭი ფართე,  
თეძოს თავი დაბალია,  
შუბლი ბრტყელი, წარბი წვრილი,  
საფეთქელი მწყაზარია,  
ცხვირი სტვირი, კბილი მძივი,  
ბაგე ხახვის ფურცელია,  
ცხრა მული გვერდსა უსხედან,  
ყველა პირის ფარეშია.  
დედამთილი ზურგთან უზის,  
გიშრის თმების დამწვენელია,  
ცხრა მაზლი კარებზე დგანან;  
დალუსილი აღმასია,  
მამამთილი ერდოზე წევს  
გველეშაპის მომკლავია.

ამის გამგონე აბესალომს უფრო გაუცხოველდა ეთერის  
სიყვარული და ავად გახდა. მოინდომა მურმანის მოშორება  
და ეთერის ისევ ხელში ჩაგდება, დაიბარა მურმანი და  
უბრძანა:

— წადი, უკვდავების წყალი მომიტანე, იქნება კარგად  
გაეხდეთ.— დალონდა მურმანი, მაგრამ ბატონს უარს ხომ ვერ  
ეტყოდა, გამოსთხოვა ცხრა დღის ვადა აბესალომს და ეთერ-  
თან გამოსამშვიდობებლად წავიდა. მივიდა და უთხრა  
ეთერს:

ამაღამაც ჩამიტოლე;  
ქალო, მკერდსა ბროლისასა,

სვალე აღგეთ'ში მგზავნიან,  
პირსა აღგეთის მთისასა,  
იქ თავში ქვასა დამცემენ,  
მონატეხსა ლოდისასა.  
ვაჰმე, თავსა გამიტეხენ,  
უზარელსა ლომისადა.  
ჩუ შეინვევ ავსა კაცსა,  
ნუცა ავის გვარისასა,  
წავა, სწორში დაიკვეხებს,  
ხვევნას ვიყავ მთვარისასა.

•  
ეთერმა უბასუნა:

გავინდო დიბა-ატლასსა,  
ჩავიცვამ ბამბის კაბასა,  
ავიღებ კოკას კუტალსა.  
მოვიტან წყალსა მდინარსა,  
არც შევალ შენის ძმისასა,  
არც — შენის მეზობლისასა,  
თუ შევალ, ისე გამოვალ,  
როგორც და თავის ძმისასა.

დაწვა იმ ღამეს მურმანი ეთერთან და განშორების მო-  
ლოდინით გულდაკოდელმა თავისთვის ნაღვლიანად წაიშ-  
ლერა:

ამაღამდელი ღამეო,  
ნუმც გათენდები მალეო,  
ვეხვევი ბროლის გულ-მკერდსა,  
ვეღარ ვიხილავ ხვალეო.

მეორე დღეს ადგა მურმანი, გაემზადა წასასვლელად და  
დასა და დედას შეეხვეწა:

— გაუფრთხილდით ეთერს, მასთან ნიავსა და მზის  
სხივსაც კი ნუ მიუშვებთო. — და წავიდა.

აბესალომს თანდათან მოერია ავადმყოფობა. ბოლოს იმ-

დენად შეაჭირვა, რომ სიკვდილის პირას მიიყვანა. აღარ იყო საშველი და აღარც წამალი რამეს რგებდა. ადგა აბესალომის და — მარეხ-ვარსკვლავი, გამოვიდა კარში და ხალხს შეევედრა:

— ძმა მიკვდება, ხალხნო, უშველეთ რამე, უწამლეთ, გადამირჩინეთო.

ხალხმა უთხრა:

— მაგას ეთერის სურვილი კლავს და წამალი არაფერს უშველის, შეუტანე მტრედის ფრთა, გამტკიცული პური, წითელი ღვინო, ყორნის ბოლო და ტახტზე დაულაგე, იქნებ ენიშნოს და ცოტა გულზე უფონოსო.

შეიტანა მარეხმა მტრედის ფრთა, გამტკიცული პური, წითელი ღვინო, ყორნის ბოლო და ტახტზე დაუწყო. მობრუნდა აბესალომი, აიღო მტრედის ფრთა ხელში და თქვა:

— მტრედის ფრთავ, თეთრი ხარ, მაგრამ ეთერისთანა კი ვერა ხარო.

აიღო ასლა გამტკიცული პური და თქვა:

— პურო, გამტკიცული ხარ, მაგრამ ეთერის სახისთანა კი ვერა ხარო.

მესამედ წითელი ღვინო აიღო, გასედა სინათლეზე და თქვა.

— წითელო ღვინოვ, ლაღისფერი ხარ, მაგრამ ეთერის ღაწვებისთანა კი ვერა ხარო.

ბოლოს აიღო ყორნის ბოლო და თქვა:

— შავი ხარ, შავი, ყორნის ბოლოვ, მაგრამ ეთერის თვალწარბისთანა მაინც ვერა ხარო. მერე ისევ დას მიუბრუნდა და უთხრა:

ადე, მარეხო-ვარსკვლავო,  
ეთერსა კარსა უარე,  
თუ გკითხოს ჩემი ამბავი,  
დაჯექ და წვრილად უაძბე.

მარეხი იმავე წამს ადგა და წავიდა ეთერის სანახავად, მაგრამ ეთერი შინ არ დაუხვდა, აბესალომის ავადმყოფობა რომ გაეგო, მულებსა და დედამთილს გამოჰპარვოდა, შესუც

ლიყო აბესალომის ბაღში, ერთ ვარდის ბუჩქთან ჩამომჯდა-  
იყო საშველი და აღარც წამალი რამეს რგებდა. ადგა აბე-  
ნასძინებოდა. იპოვა მარესმა ეთერი და დაუძახა:

მე ბანი-ბანად გეძებდი,  
შენ ბალი-ბაღიად გეძინა,  
ოქროს საკინძი გაგეხსნა,  
ბროლის გულ-მკურდი გეჩინა,  
ეგ შენი შავი დალალი  
ორგულივ ჩრდილივით გეფინა.

გააღვიძა მარესმა და უთხრა:

ეთერო, შემოვიარე,  
იშ შენი ციხის არესა,  
გადმოვიხედე, ავტირდი,  
ლოგინი გიგავ მთვარესა  
ეს გაზაფხულიც მოვიდა,  
მარტი, აპრილი, მაისი,  
ადე, ეთერო, გამომყევ,  
შენ მოშირჩინე ძმა ისი.  
ავიღებ, ბარსა, ნიჩაფსა,  
დავხვეტავ გზასა, ხვინჭასა,  
ფარჩა-აბრეშუმს დაგიფენ,  
ფეხი არ დასცე ქვიშასა,  
ისეთ სასახლეს აგიგებ  
ბროლ-მარმარილოს ქვისასა,  
შიგ და შიგ ფიცარს ჩავუყრი  
აბანოურის ხისასა.  
სახლის წინ ვარდებს მოვიყვან,  
სურნელსა ყვავილისასა,  
ზედ დიბა-ატლასს გადავფენ,  
საჩრდილობელსა მზისასა,  
ქვეშ ორხაულებს გაგიშლი,  
ნაქსოვსა კრაველისასა.  
ზედ ბილურს ჩამოგიკიდებ,  
სასმელსა ვარდის წყლისასა.

წავიდა მარესი, მიუტანა ეთერს ძვირფასი ტანსაცმელი,<sup>1</sup>  
მიუყვანა ცხენი და უთხრა:

აჰა, ეთერ, ტყავ-ტოლომა  
აფხაზურად შეკერილი,  
აჰა, ეთერ, თავსაბური  
მოთვალმარგალიტებული,  
აჰა, ეთერ, ბედაური  
არაბეთით მოყვანილი.

ეთერი ნაწყენი იყო აბესალომზე, რატომ დამთმო და  
მურმანს მიმცაო, და წასვლაზე მაშინვე არ დასთანხმდა, ასე  
უთხრა:

არცა მინდა ტყავ-ტოლომა  
აფხაზურად შეკერილი,  
არცა მინდა თავსაბური  
გათვალმარგალიტებული,  
არცა მინდა ბედაური  
არაბეთით მოყვანილი...  
გაზაფხულისა პირზედა  
მინდორში მოვა სოსანი,  
ამიღო და ყმასა მიმცა...  
უღირსი გვირგვინოსანი!

მაგრამ მარესის მუდარამ მაინც გული მოუღბო ეთერს  
და გაჰყვა. — თუ ჩემი მოსვლით მორჩება, როგორ არ წამო-  
ვალო.

მივიდნენ აბესალომის სასლში, აბესალომი უკვე სულს  
ებრძოდა, მაგრამ ეთერმა ბანზე რომ შედგა ფეხი, ერთი წა-  
მით ისევ სიცოცხლე დაუბრუნდა; იცნო ეთერის ფეხის ხმა  
და სულთმობრძავემა წამოიძახა:

ეთერი ბანზე შემოდგა, ბანი და კარი შეინძრა,  
ბანიდან ჩამოიხედა, სულში ნათელი ჩამიდგა.  
წამწამსა და წამწამს შუა ბალი გაგიშენებია,

ეთერის მობრძანებისთვის მადლი მომიხსენებია!  
მაგრამ ტყუილად გარჯილა, ვარ საიქიოს მავალი,  
უბრძანებია უფალსა გზა ვიწრო, მარტოდ სავალი.

შევიდა მარესი აბესალომთან და უთხრა:

ძმაო, მოვიდა ეთერი, თვალებში თუ გაქვს ნათელი

აბესალომმა უპასუხა:

ეთერს აქ მობრძანებისთვის ცხენი უბოძეთ სადარის

მარესმა უთხრა:

ცხენი რად უნდა ეთერსა, არსად წამსვლელი არ არი.

ამ დროს შევიდა ეთერიც კარებში. აბესალომმა ეთერის  
ნახვას ველარ გაუძლო, გადაბრუნდა კედლისაკენ და სული  
დალია. ეთერი მივარდა, გადაეხვია და ატირდა:

აბესალომის დანაო, უბეს მიდევხარ განაო,  
ამოგიღებ და დაგიცემ, მარცხენა ძუძუსთანაო;  
პირი ჩემკენ, ტარი შენსკენ, მეც დაგაკვდები თანაო.  
ერთადამც დავიხოცებით, ერთადამც დაგემარხიანო,  
გზის პირად დაგვადირებენ, გზის თავმსაც დაგემარხიანო.  
თავს ვარდი ამოსულიყოს, დილის ნიავი შლიდესო,  
შიგა ბუდობდეს ბულბული, ბუდობდეს, ბარტყებს  
ზრდიდესო,

ფხთითა წყრომც გამოვა, შიგ ოქროსთასი იდგესო.  
ყველა მუშა და მაშვრალი, დალევდეს, დაგვნატრიდესო,  
ყველა ამვლეელი, ჩამვლეელი შენდობას შეგვითვლიდესო:  
რა კარგნი რამ დახოცილან, ისევამც ადგებიანო,  
თუ წეს არ იყოს ადგომა,  
სულითამც ცხოვდებიანო.

მართლაც დამარხეს გვერდი-გვერდ აბესალომი და ეთ-  
ერი, ერთი ჯვარი დაადგეს და ზედ დააწერეს:

აბესალომ და ეთერი,  
ღმერთმა შეყარა ერთფერი!

მოვიდა მეცხრე დღეს მურმანი, მისცა სული ეშმაკს, გაითხარა საფლავი აბესალომისა და ეთერს შუა და ჩაწვა. აბესალომისა და ეთერის საფლავებზე ვარდი და ია ამოვიდა, მურმანის საფლავზე კი ეკალი. გადაიხრებიან ვარდი და ია ერთმანეთისაკენ, მაგრამ ეკალი გაეჩსირებათ შუაში და ერთმანეთთან მისვლას უშლის. იმასაც ამბობენ, ღამღამობით მურმანის საფლავიდან მგლის ლეკვები ამოძვრებიან და საზარლად ყმუიანო.





## როსტომი

იყო ერთი მეტად სახელგანთქმული გმირი როსტომი, იმისი მომრევე ქვეყანაზე არავინ მოიპოვებოდა, იმიტომ რომ დაბადებით თანდაყოლილი ჰქონდა სოლისა და უროს ძალა, აგორებული ლოდის შეუპოვრობა და ცის ქუხილის სმა. როგორც ყველა გმირი, როსტომიც უზომოდ თავდაბალი იყო, სამართლიანი და მეზობლობაში დამთმობი.

- როსტომ თქვა: გმირი მეც ვიყავ, ჯირით მეც შემოვისრეი, მეზობლის გაჯავრებასა, ისევ მოთმენა ვირჩიე.

ერთხელ როსტომს კბილი ასტკივდა, გავარდა ტყეში ტკივილისაგან გაბოროტებული და ხეებს სულ ლაწალუწი აუყენა. მივიდა იმ ტყის ბინადარი ერთი კოჭლი დევი და უთხრა:

— გმირო, როსტომო, ამ ჩემს ტყეზე რა ბიჭობას იჩენ, თუ სახელი და მკლავის გამოცდა გინდა, წადი ცხრა მთას იქით და შენი საფერი იქ შეგხვდებაო.

როსტომს შერცხვა, აიღო ხმალი, საგმირო ლახტი, მშვილდ-კაპარჭი და გასწია ცხრა მთას იქით. გზადაგზა, საცა მოშივდებოდა, ისრით ნადირს კლავდა და იმით საზრდოობდა. როსტომს სულ ფასკუნჯის ფრთადაწებებული არყის ისრები ჰქონდა, ტყე და მთა-ყურე დევეებით იყო სავსე, შაგრამ როსტომის ისრებს კარგად იცნობდნენ და შორიდან ერიდებოდნენ.



როსტომის არყის ისართა რად უნდა ქადაგ-მისანი,  
არც დიდი ცნობა უნდოდა: ფრთენ ეკრნეს ფაშქუნჯისანი.

როსტომმა უხიფათოდ და უთავგადასავლოდ გადაიარა ცსრავე მთა და ერთ დაბურულ ხევში ჩავიდა. ხევზე დროდა-დრო სისხლის მდინარე გამოივლიდა და შეწყდებოდა, გამოივლიდა და შეწყდებოდა. როსტომს ეუცნაურა სისხლის მდინარის ასეთი წყვეტილი დენა, ხეობას თვალი გააყო-ლა და ერთი ცასმიბჯენილი პიტალო კლდე დაინასა. სის-ხლიც სწორედ იქიდან გადმოსჩქეფდა.

„რალა გმირი ვიქნები, თუ იქ არ ავალ და ამ სისხლის დენის მიზეზს არ შევიტყობო“, — თქვა გულში როსტომმა, მოგლიჯა ერთი უზარმაზარი მუხა და მიაყუდა კლდეზე, მერე — მეორე, მესამე, დაადგა მუხები ერთმანეთზე და კლდეზე ასასვლელი კიბე გაიკეთა.

როსტომმა მკლავი გაშალა, მუსა მოგლიჯა ძირითა,  
ხელი გაუსვა, გალოპრა, გასტყორცნა, გააჯირითა.

შეაბიჯა მუხებზე როსტომმა და ავიდა კლდის თავზე. •  
კლდეზე. ხევის პირას, ერთი გოლიათი არაბი იჯდა, მუხ-  
ლებშუა ფსათავისკენ შიშველი ხმალი დაეკიდებინა და  
თვლემდა. რამდენჯერაც ჩასთვლემდა, თავს ჩააკანტურებ-  
და და შუბლით ხმალს მიეჯახებოდა, ჭრილობიდან სისხლი  
იქუსებდა და არაბიც გამოფხიზლდებოდა. გაიხედავდა ალ-  
მოსავლეთისაკენ და ისევ თვლემა მოერეოდა. როსტომმა  
უყურა, უყურა, მაგრამ ამ უცნაური საქციელისა ვერაფერი  
გაიგო, მივიდა ახლოს და ჰკითხა:

— ძმობილო, ამას რასა შერებო?

არაბმა თვალები აახილა და უთხრა:

— ძმობა არ გეტქვა, მე ვიცოდი, რასაც გიზამდი, მაგ-  
რამ რაკი ძმობით მოხვედი, აღარას გერჩი, მოდი, დამიჯექ  
გვერდით და ყველაფერს გიამბობო.

მივიდა როსტომი და გვერდით დაუჯდა, არაბმა ჰკითხა:

— ჯერ ეს მითხარი, შენ ვინა ხარო?

— მე როსტომი ვარო, — მიუგო როსტომმა.

— შენა გაქვს სოლ-უროს ძალა და ცის ხმაო? — კვალად ჰკითხა არაბმა.

— სწორედ მე მაქვსო, — უთხრა როსტომმა.

მაშინ გაენდო შავი არაბი და თავისი უცნაური საქციელის მიზეზიც აუხსნა:

— მე და ერთ წითელ არაბს ერთ მზუთუნასავ ქალზე ცილობა გვაქვს. ახლა საცაა, ის წითელი არაბი წითელი ზღვიდან გამოვა და იმ მზუთუნასავ ქალს გამოატარებს. პირობის თანახმად, მე აქ უნდა დავხედე და ვიბრძოლოთ, რომელიც მოვერევი, ქალი იმას დაგვრჩება.

მე ერთთვიანი ძილი ვიცი, ახლა სწორედ ძილის დრო მაქვს, ეს ხმალი სწორედ იმიტომ დავიყუდე ფხაჩემკენ, რომ როცა ჩამთვლემს, შუბლს დავკრაავ ზედ და გამეღვიძება, თორემ თუ დამეძინა, წითელი არაბი ქალს გამაპარებს და მე ხელცარიელი დავრჩები.

— შენ დაიძინე და წითელ არაბს მე ვუდარაჯებო, — უთხრა როსტომმა, — როცა გამოჩნდება, დავიყვირებ და გაგაღვიძებო.

— კარგიო, — დათანხმდა არაბი, ოღონდ უთხრა, — თუ ყვირილით ვერ გამაღვიძო, მარცხენა ფეხის ქუსლში ხმალი ჩამეცი და იმით გამაღვიძეო.

არაბი დაწვა და დაიძინა. დაუჯდა გვერდით როსტომი და დაუწყო ლოდინი წითელი არაბის გამოჩენას. დიდხანს ლოდინი არ დასჭირვებია, მალე მზუთუნასავი ქალის შუქმა აღმოსავლეთის ცისკარივით გაანათა და წითელი არაბიც გამოჩნდა — ქალისთვის ხელი მაგრა ჩაეკლბა და ისე მოჰყავდა.

როსტომს ერთი რკინის სალტე ჰქონდა, როცა მთელი ხმით უნდა დაეყვირა, თავზე იმ სალტეს ჩამოიცვამდა, რომ თავი არ გახეთქოდა, ახლაც ჩამოიცვა თავზე რკინის სალტე და რაც ძალი და ღონე ჰქონდა, დაიყვირა, მაგრამ არაბს ყურიც ვერ შეაბერტყინა, დაიყვირა მეორედ, დაიყვირა მესამედაც, მაგრამ შავი არაბი ცნობაში მაინც ვერ ჩააგდო, მაშინ იშიშვლა ხმალი და ჩასცა მარცხენა ფეხის ქუსლში.

გამოეღვიძა შავ არაბს, მოიფშვნიტა თვალები და წამოდგა.

— მეც ჩამოგყვები და მხარს დაგიჭერო, — უთხრა როსტომმა.

არაბმა არ უყაბულა.

— ორი კაცის ერთ კაცზე მისვლა, რა ვაჟაკობააო, — უთხრა, — ჩვენ ისეთი პირობა გვაქვს, მარტ-მარტომ, ერთით-ერთზე უნდა ვიომოთ, შენ აქ დარჩი და, თუ მაინც დამძლიოს, ერთი შენი სმით დაიყვირე, მე გული მომეცემა და ხელს დავრევეო.

ჩავიდა სწორე ადგილზე არაბი და დაელოდა წითელი არაბის მოსულას. მოვიდა წითელი არაბიც, ქალი განზე გაიყვანეს და დაიწყეს სასტიკი ომი. იმათი ქშენა ხეებს ლერწამივით არჩევდა და ფესის მტვერი ზეცას აბნელებდა. მოიქნევდა ხმაღს შავი არაბი და წითელი არაბის წითელ ბექთარზე ცუცხლის რკალს გაავლებდა, მოიქნევდა წითელი არაბი და შავი არაბის შავი ბექთარიც ბლუჯა-ბლუჯა ნაპერწკლებს ისროდა. თანდათან შავ არაბს დაღლა დაეცყო, წითელი არაბი კი ჯერ ისევ მყარად იდგა და ხმაღსაც ძველებური ძალით იქნევდა. როსტომმა შეატყო, რომ შავი არაბი მარცხდებოდა, ჩამოიცვა რკინის საღტე თავზე, გაჯავრებულმა თან კლდე ჩაბლუჯა და დაიყვირა:

იყვირ-იკივლა როსტომმა, გაჰსივლ-გაჰქუსა ზეცამდე,  
ტოტით დაგლიჯნა ჭიუხნი, გადაისროლა ბექამდე.

როსტომის ხმა წითელ არაბს ეუცხოვა და წამით სელი გაუჩერდა, ამით ისარგებლა შავმა არაბმა, თან როსტომის ხმის გაგონებაზე გულიც მოეცა, შემოჰკრა ხმალი გამეტებით და მოკლა.

დარჩა მზეთუნახავი ქალი შავ არაბს. წამოიყვანა ქალი არაბმა, როსტომიც შინ მიიწვია და ირმის მწვადითა და წითელი ღვინით პურადად გაუმასპინძლდა.

არაბს მალე ისევ ძილი მოერია და დაეძინა, სუფრაზე ქალი და როსტომილა დარჩნენ. მზეთუნახავ ქალს ხურომანი ერქვა. მოეწონა ხურომანს როსტომი და გადაწყვიტა მისი შეცდენა, გვერდით დაუჯდა და ღვინო დააძალა. კარგად რომ დაათრო, მერე უთხრა:

— მოდი, ეს შავი არაბი მოკალი და ცოლად შემიერთე, მეც შენი ვიქნები და ეს სახლ-კარი და ქონება-ცხოვრებაც შენ დაგრჩებაო.

როსტომი ჯერ უარზე დადგა, უბრალო კაცს როგორ ვუღალატო, ან მძინარე როგორ მოვკლავო. მაგრამ ქალი ვის არ შეაცდენს, იმდენი ეფერა, ელიზლა და ელაქუცა, რომ მთვრალი როსტომი ბოლოს დაიყოლია, მოაკვლევინა არაბი და იმ ღამეს გვერდით დაუწვა.

გაედვიძა დილას როსტომს გამოფხიზლებულს, ნახა ხმლით შუა გაკვეთილი არაბი, გაახსენდა, მთვრალმა წუხელ რაც ჩაიდინა და გული ბოღმით აევსო. დასწყევლა ხურომანი, დასწყევლა თავისი თავიც და არაბის სახლ-კარს საჩქაროდ გაეცალა. წასვლისას ხურომანს თავისი ავგაროზი მისცა და უთხრა:

— ვიცი, შვილი გაგჩინდება, თუ ქალი გეყოლოს, შენთან დაიტოვე, თუ ვაჟი, ზურაბი დაარქვი, ეს ნიშანი მხარზე დააკერე და ქვეყანაზე ისე იაროსო.

წავიდა როსტომი და ამ დღიდან სამუდამოდ დასწყევლა და შეიძულა ქალი.

როსტომ თქვა, — ჭკვა დიაცისა, არც მომწონს, არც მეკეთებ

ვაჟკაცს დიაცის მიმყოლსა, სამარემც დაეკვეთება.

როსტომ თქვა, ამ მთას, იმ მთასა, სელს მოგკრავ,

ერთად თავს ვუზამ,

თორმეტლიტრიან რკინასა კბილს მოვუჭერ და კნაპს ვუზამ,

ალაზანსა და იორსა, დავაყენებ და ყლაპს ვუზამ,

თავალებულსა დიაცსა, აბა, მითხარი, რას ვუზამ?

იარა როსტომმა, იარა და გავიდა ქაქეოზ მეფის სახელმწიფოში, იქ დამკვიდრდა და დაიწყო სიმართლისათვის ბრძოლა. არც ხელმწიფე ქაქეოზსა და არც იმის კარისკაცებს თვითნებობის ნებას არ აძლევდა. ქაქეოზსა და ნაზირვეზირებს არ მოსწონდათ როსტომის სამართლიანობა, მაგრამ შიშით ვერაფერს უბედავდნენ.

ამასობაში ხურომანს მართლა ვაჟი ეყოლა და ზურაბი

დაარქვა. ზურაბი ერთი თვისა ერთი წლისას ჰგავდა და ერთი წლისა ათის წლისას, თან ისეთი ღონიერი იყო, რომ ბავშვებთან თამაშის დროს, თუ გაბრაზდებოდა, ხარის კოჭებს ერთი ხელის მოჭერით დაფშვნიდა.

ერთხელ ზურაბმა ერთი ბავშვი აატირა, ბავშვი მიუბრუნდა და თვალცრემლიანმა უთხრა:

— თუ ასეთი ვაჟაკი ხარ, ჩემზე კი ნუ სცდი ბიჭობას, მამა რომ გყავს დაკარგული, ის მოძებნეო.

ეწყინა ზურაბს, არ იცოდა, თუ მამა ჰყავდა, წავიდა შინ და დედას ჰკითხა:

— ვინ იყო მამაჩემი ან ახლა სად არისო?

დედამ ყველაფერი დაუფარავად უამბო. ზურაბმა ჯაჭვი ჩაიკვია და მამის საძებნელად წასვლა გადაწყვიტა. ხურომანმა ბევრი უშალა, — ჯერ პატარა ხარ, როცა გაიზრდები, მე თვითონ გაგაგზავნიო, — მაგრამ ზურაბმა არ დაიშალა. მამინ ხურომანმა გამოიგანა როსტომის დანატოვარი ავგაროზი. დააკერა ზურაბს მხარზე და გაისტუმრა.

ბევრი იარა ზურაბმა, თუ ცოტა იარა, ბოლოს ისიც ქაქეოზ მეფის ქალაქში მივიდა. ქალაქის კართან მეფის ერთი კარისკაცი შეხვდა: კარისკაცმა მაშინვე იცნო ზურაბის მხარზე როსტომის ნიშანი, მიხვდა, რომ ეს უცხო გმირი ჭაბუკი როსტომის შვილი უნდა ყოფილიყო და შიშით გული გაუსკდა. იფიქრა, ჯერ მარტოკა როსტომმა დაგვწვა და დაგვდაგა და ახლა შვილიც რომ მხარში ამოუდგეს, მთლად მოგვსპობენ. მოდი, ერთმანეთს დავახოცინებ და ბურთი და მოედანი კვლავ ჩვენ დაგვრჩებაო. ამ განზრახვით მივიდა ზურაბთან და უთხრა:

— ქალი ხომ არა ხარ, რომ მხარზე მძივები დაგიკერები, აიხსენ და დამალე, თორემ ერთმანეთს დაგვინებენო.

ზურაბმა დაუჯერა ცბიერ ბერიკაცს და როსტომისეული ნიშანი ილღიის ქვეშ დამალა. კარისკაცი წავიდა და სხვა კარისკაცებს შეატყობინა:

— როსტომის შვილი მოსულა ჩვენს ქალაქში, ერთმანეთს რომ იცნონ, ხომ იცით, აქ აღარ დაგვედგომება, მოდით, ისე მოვაწყოთ საქმე, რომ ერთმანეთი როგორმე დავახოცინოთ და მოვისვენოთო.

კარისკაცები სისარულით დათანხმდნენ, წავიდნენ როსტომთან და უთხრეს:

— ჩვენს ქალაქში ერთი უცხო ფალავანი მოსულა და ჭიდაობაში გიწვევსო.

— ვერ ვნახავ, რა ვაჟკაცია და მერე დავეჭიდებო, — უთხრა როსტომმა და გაჰყვა კარისკაცებს. კარისკაცებმა წაიყვანეს როსტომი და სადაც შურაბი ჰყავდათ, იმ სასლში ერდოდან ჩუმად ჩაასვდეს. შურაბი მორთხმით იჯდა, შემოსედა ერდოდან და დაუძახა:

რად იტყვიტებით ბანითა, რად არ მოდისართ კართა?

როსტომს მოეწონა შურაბი და კარისკაცებს უთხრა, — ხვალე შევებმიო.

რაკი როსტომი დაითანხმეს, კარისკაცები ახლა შურაბთან შევიდნენ, — ჩვენი ფალავანი საჭიდაოდ გიწვევს და უნდა დაეჭიდო:

აღე, შურაბ, მოიკაზმე, ტანთ ჩაიცვი საომარი!

შურაბი უყოყმანოდ დათანხმდა:

წამოდექით, ერანელნო, ვინ ხართ უფრო ფალავანი? ნუ იკვეხნით ფალავნობას, თუ არა გაქვთ მკლავში ძალი, თუ იკვეხნით, ჩემთან მოდით, გაგისინჯოთ ბეჭის ძვალი!

გათენდა მეორე დილა და შურაბი და როსტომიც გავიდნენ ქალაქის მოედანზე საჭიდაოდ, როსტომის დანახვისთანავე შურაბს დედის ნათქვამი მოაგონდა, — მამაშენს კარინი კბილები აქვს, ბეჭში ოდნავ წახრილია და ბრძოლის წინ მარცხენა ფეხს ათამაშებსო. შურაბი დაეჭვდა, ეს მამაჩემი არ იყოსო, და როსტომს უთხრა:

— ბერიკაცო, ჩამომეხსენ, გული რადმე მეთაღრება, მე დედეულთა ნიშანი შენში რაღაც მენიშნება, კბილის კარი და ბეჭთ წახრა, როსტომისას მემსგავსება:

როსტომმა ყური არ ათხოვა ზურაბის ნათქვამს. რას იფიქრებდა თუ მისი შვილი იყო. ნაწყენმა, პირტიტველა ჭაბუკმა საფალავნოდ როგორ გამომიწვიაო, მკვახედ მიუგო:

— არცა ვარ როსტომიანი, არცა იმათი გვარისა, ვარ ვინმე თურქი მოლაშქრე, მამკლავი უზანთარისა. ბატონის გამოგზავნილი, ვარჯილთ ცხენოსანისა, აქ ფალავანის დამცემი, დამლევი მუჭა სისხლისა.

ზურაბს ეწყინა, რომ მამამისი არ აღმოჩნდა და დანანებით უთხრა:

— ეგ რა მითხარ, ბერო კაცო, დამიკოდე წყლული გული, ნეტავინ კი არ მენახე, ადრევე დაგელია სული.

ზურაბს მაინც ეჭვი ეპარებოდა და არ უნდოდა როსტომთან შერკინება, მაგრამ როსტომი ქაქეთო მეფის კარისკაცებისაგან იყო გაქეზებული და არ დაიშალა, გაჯიუტდა. დაიჭიდნენ და ზურაბმა დასძლია, წააქცია, როსტომს შერცხვა, მაგრამ აღარაფერი თქვა და თავი იმით ინუგეშა, რომ ზურაბი ახალგაზრდაა, მაგის მკერდზე ჯერ ვარდი არ აყვავებულა, ესე იგი, ჯერ ქალი არ უნახავს და ჯანი არაფერში დახარჯვიაო. მაგრამ კარისკაცები შეუჩინდნენ და მანამ არ მოასვენეს, სანამ ზურაბზე გული არ მოაყვანინეს და მტრობა და შური არ აღუძრეს, ბოლოს იმაშიაც დაარწმუნეს, რომ თუ ის უცხო ფალავანი არ მოკალი, არაფერი გეშველება, ის ახალგაზრდაა, შენ მოხუცი ხარ, ყველაფერში გაჯობებს და საბოლოოდ ხალხის სასაცილოს გაგხდისო.

სიბერეში, როგორც ყველას, როსტომსაც ეჭვიანობა დასჩემდა, კარისკაცების ნათქვამმა ხომ მთლად ცეცხლი მოუკიდა. დაბრუნდა სასახლეში და ქაქეთო მეფეს უთხრა:

ერთი ჭაბუკი მოსულა, ყველა მტრისათვის მახეა, მკლავშიაც ვცადე, ლახტშიაც, იმასთან ყველა მჩატეა, იმისი დანაბიჯები სამარის კარის ფართეა.

ქაქეოზ მეფეს გული გაუსკდა, რაკი როსტომსაც მოხე-  
ვია, მე რაღა სიკეთეს დამაყრისო, და თავისი ქვეყნიდან  
გადახვეწა გადაწყვიტა, მოუხმო ნაზირ-ვეზირებს და ბარგის  
შეკვრა უბრძანა. მაგრამ როსტომმავე დაამშვიდა:

ქაქეოზ, ბარგი, იქ დადევ, სადაც უწინა გდებია,  
მაგ ფალავნისა სიკვდილი, მე უკვე გულს ჩამდებია,  
შხამში გავლესავ დანასა, ჩექმაში ჩასადებია.

იმ ღამეს მართლაც აიღო როსტომმა ერთი საკმაოდ  
მოზრდილი დანა და დილამდე შხამში ლესა. კარგად რომ  
დააფხავა, ჩექმის ყელში დამალა და ზურაბი სელასლა საჭი-  
დაოდ გამოითხოვა, — გუშინ ხასიათზე არ ვიყავი და იმი-  
ტომ დავმარცხდი, დღეს გამოდი და ვინც მოვერევი, სა-  
ბოლოო გამარჯვებაც იმისი იყოსო:

ფეტვი ადგილზე სთესია, ჩვენში ასეთი წესია:  
ფალავანი ფალავანსა ერთხელ დასცემს, აუშვებსო,  
თუ მეორედაც დასძლია, ცოცხალს აღარ გაუშვებსო.

ზურაბს კიდევ არ უნდოდა ჭიდაობა. — გული არ ეთან-  
სმებოდა, მაგრამ როსტომმა არც ახლა დაიშალა და ზურა-  
ბიც დათანხმდა. გავიდნენ ისევ ქალაქის მოედანზე, დაი-  
ჭიდნენ და ისევ ზურაბმა წააქცია. მაშინ როსტომმა ამოიღო  
ჩექმის ყელში დამალული დანა და დაბლიდან ზურაბს მუ-  
ცელში გაუყარა. სასიკვდილოდ დაჭრილმა ზურაბმა როს-  
ტომს უთხრა:

შე ბერიკაცო, რად მომკალ, დანა რად დამეც ვადამდე?  
შენ მამაჩემსა როსტომსა, საით წაუსხეალ, სადამდე?  
ზღვას გახვალ, იქ გამოგყვება, ქვესკნელშიც თან ჩამოგყვება.  
გერჩივნა, ცას წასულიყავ, ვარსკვლავთა კარი გაგელო,  
მიწა საჭვრეტლად გქონოდა, მისი სურვილი წაგელო,  
ცოდვას მოინანიებდი, თავი ძირს აღარ დაგელო.

როსტომს ელდა ეცა ამის გაგონებაზე და ზურაბს ჰკითხა:



- შე მრუში დიაცის შვილო, ნიშანი სად გაკერია?
- მხარს მეკრა, ზრახვით შევიხსენ, აი, არწივის კვერია!

უთხრა ზურაბმა, ასწია მკლავი და ილლიის ქვეშ დამალული ნიშანი აჩვენა. როსტომმა იცნო თავისი დანატოვარი ავგაროზი და თავს რეტი დაესხა, ახლა კი გაიგო, რომ ზურაბი მისი შვილი იყო, აიღო ერთი უშველებელი ლოდი, თავზე გადაიფშვნა და ხმამაღლა დაიყვირა:

ვაიმე, შვილო, ზურაბო, ჩაგეცი დანა სრეული,  
რისთვის გაგზარდა დედამა, სული ჩაგიდგა წყეული?  
მე მოგკალ შვილო, ზურაბო, დავრჩი უშტოო ხევითა!  
ათრთოლდა ფურცელივითა, მიწას დაეცა რევითა.

მომაკვდავმა ზურაბმა მამას საყვედურით უთხრა:

შენ მამაჩემი არა ხარ, არც როსტომიანთ გვარისა,  
მოლაშქრე თურქი ყოფილხარ, შვილი მოჰკალი თავისა.

გასისხლიანებული შვილი როსტომმა ხელში აიტაცა და გულზე მიიკრა, ქაქეოზ მეფეს ხაჩქაროდ კაცი გაუგზავნა და წამალი მოსთხოვა:

ჩემო ქაქეოზ მეფეო, შენთვის შეეუბი დევსაო,  
წამალი გამომიგზავნე, ზურაბი მკიდავ ყელსაო.

ქაქეოზ მეფე ზურაბის სიკვდილის მსურველი იყო და რა წამალს გაუგზავნიდა, მაგრამ გაუგზავნელობისაც ეშინოდა, — როსტომი განრისხდება და ამიკლებსო. ბოლოს ასე მოახერხა: ერთ გიჟ დიაკვანს გაატანა და თან დაარიგა, — როსტომთან რომ მისვალ, ფეხი რამეს წამოჰკარი, წაიქეცი და დაღვარეო. დიაკვანიც ასე მოიქცა.

წამალი გამოუგზავნა გიჟი დიაკვნის ხელითა,  
ფეხი წამოჰკრა, დაღვარა, აივსო იმის წყევლითა.

ზურაბმა სული დალია. განრისსებულმა როსტომმა დი-  
აკვანი ხმლით შუაზე გაკვეთა, დაჯდა ზურაბის გვერდით და  
ცხარე ცრემლით ატირდა.

იტირა როსტომმა დიდხანს, იქვითინა და იხოკა თავ-პი-  
რი, მაგრამ მკვდარ შვილს ვეღარაფერი არგო.

ვაჰ, დედას შენსა, როსტომო, რა ცუდი დილა თენდება,  
რაც გინდა ბევრი იტირო, შვილი არ გაგიმთელდება.  
არ გათეთრდება ყორანი, რაგინდა ხესო ქვიშითა,  
მკვდარი ვის გაუსოცსლებავ ტირილითა და ვიშითა?!

ტირილით რომ გული იჯერა, მიუხედა ქაქეოზ მეფეს, ქა-  
ქეოზ მეფეს ორი ჭაბუკი შვილი ჰყავდა. მოავლო როსტომმა  
სული ორივე შვილს, წაჭვლიჯა თავები და ქაქეოზ მეფეს  
ფესებთან დაუყარა, — აი, ნასე და იწვნე, როგორია შვი-  
ლის სიკვდილიო.

ამის შემდეგ როსტომი დიდხანს აღარ დარჩენილბ, და-  
მარსა თუ არა ზურაბი, მაშინვე ველად გაიჭრა. დადიოდა  
მარტოდმარტო ტყე-ღრეში, ტიროდა და თავის მწუსარებას  
ლექსებად მოსთქვამდა:

როსტომ თქვა: დღენიმც კრულია დაბადებისა ჩემისა!  
სიყრმე სიბერედ ვაქციე, დღე ვერა ვნახე ლხენისა.

როსტომ თქვა: წყეულ სიბერეს არა რა შეეწონება.

დაჯდება, ველარ ადგება, შავი ქვა დაეწონება.

როსტომ თქვა: სიბერეკაცითა სიტყვა სათქმელად გაჭირდა,  
ჯაჭვი პერანგად გავცვითე, ახლა აღებაც გაჭირდა.





## ამბავი ტარიელისა

იყო ერთი ხელმწიფე, ბრძენი, სვებედნიერი და მდიდარი, ჰყავდა ერთგული ვეზირი სასულად მირი.

მირსა და ხელმწიფეს დიდხანს შვილები არ ჰყავდათ, ორივეს უკვე იმედი ჰქონდა გადაწყვეტილი, უძეოდ გადაეგზავნათ და მემკვიდრეები არ დაგვრჩებაო, მაგრამ ღმერთმა ბოლოს ორივეს მოხედა და ცოლები დაუორსულდათ. ხელმწიფემ და მირმა ერთმანეთს პირობა მისცეს, თუ ერთ-ერთს ბიჭი გვეყოლოს და მეორეს ქალი, ერთმანეთს შევრთოთო, თუ ორივეს ქალები გვეყოლოს, ცოლებად ძმებს შევრთოთ და თუ ბიჭები, მაშინ ნამდვილ ღვიძლი ძმებივით გავზარდოთ და ჩვენი მემკვიდრეობა გადავულოცოთო.

გავიდა ცხრა თვე და დაებადა ხელმწიფის ცოლს ქალი და ვეზირისას — ვაჟი. ქალს სასულად ნესტან-დარეჯანი დაარქვეს, ვაჟს კი — ტარიელი. ნესტან-დარეჯანი მზესავით ლამაზი გაიზარდა, ტარიელი კი მძლე, გულოვანი, ჭკვიანი და მეომარი.

ტარიელს ცამეტი წელი რომ შეუსრულდა, დედ-მამა დაეხოცა და დარჩა ობლად, ამის შემდეგ ქვრივი მამიდა ზრდიდა. როცა ქალ-ვაჟი წამოიზარდა და მოიწიფა, ერთმანეთი შეუყვარდათ. ნესტან-დარეჯანის მამამ ეს შეიტყო. ძალიან განრისხდა და ქალ-ვაჟის დაშორება გადაწყვიტა, დაიბარა დაუყოვნებლივ ტარიელი და უბრძანა:

— დღესვე მამის ცხენი შეკაზმე, მამისეული იარაღი აისხი, წადი ხატაეთს და ბეგარა აიღე. — ოცი ლიტრა ოქრო, ოცდაათი ლიტრა ვერცხლი და ორმოცი ლიტრა თვალმარგალიტო.

სატაელები ტარიელის მამის მოსისხლე მტრები იყვნენ და ხელმწიფეს იმედი ჰქონდა, მამის ცხენით და აბჯარ-მუ-ზარადით რომ ნახავენ ტარიელს, უსათუოდ იცნობენ და მოკლავენო.

ტარიელი ნესტანს დაეკითხა, რა ვქნაო? ნესტანმა უთხრა:

— წადი, მამაჩემის ბრძანება პირნათლად შეასრულე. იქნებ გული მოუღბეს, დანაშაული გვაპატიოს და ჩემი თავი უწვალებლად მოგცესო.

ტარიელიც ასე მოიქცა. აისხა მამისეული საჭურველი, შეუჯდა მამისეულ ცხენზე და გაუძღვა ლაშქარს სატაეთისაკენ. ტარიელი რომ სატაეთს გაგზავნა, ხელმწიფემ იდროვა და ნესტან-დარეჯანი სხვაზე დანიშნა.

ის-ის იყო ქორწილს ამზადებდნენ, რომ ტარიელი ცოცხალი და უვნებელი დაბრუნდა სატაეთიდან, დაბრუნდა გამარჯვებული და ბეგარაც უკლებლივ მოიტანა. სასახლეში ტარიელს ურიცხვი სტუმარი და ქორწილის მსგავსი სამზადისი დახვდა. ისიც გაიგო, რომ მის იქ არყოფნაში ნესტან-დარეჯანი მამას სხვაზე დაენიშნა, მაგრამ ქალი უარზე იყო, საქორწილოდ არ ირთვებოდა და არც სტუმრებთან გამოდიოდა.

წავიდა ტარიელი ნესტან-დარეჯანის ოთახისაკენ და სწორედ იმ დროს შევიდა, როცა ხელმწიფე ატყუებდა, ტარიელი სატაეთში მოკლეს და აღარასოდეს დაბრუნდებო. გაჯავრდა ტარიელი, მივიდა ხელმწიფესთან და უთხრა:

მეფეო, სატაეთს გამგზავნე, ბეგარა ამაღებიანე,  
სისხლი სატაელთ მეფისა თავზე მე დამაღებიანე,  
ქალი დარეჯან სხვას მიეც, გულს შური ჩამაღებიანე.

ნესტან-დარეჯანმა რომ ტარიელი დაინახა, სიხარულით ფეხზე წამოხტა, მივიდა ტარიელთან და შეეხვეწა:

— გინდა დად მიმიღე, გინდა ცოლად წამიყვანე, ოღონდ სხვის ხელში ნუ ჩამაგდებო.

ტარიელმა ამაზე მიუგო:

— და ღმერთმა არ მომცა, მაგრამ ცოლად კი შენი თავი  
ჯერ ღმერთმა მომცა და მერე მამაჩემისა და მამაშენის და-  
დებულმა ფიცმაო. — მერე გაიძრო ხმალი, მიუბრუნდა ნე-  
ფის მაყრიონს და მუქარით უთხრა:

ტარიელ ხატაეთიდან მგზავრად მოვიდა დილითა,  
ხმალი მრტყავ მამისეული წელზე აღმასის პირისა,  
შინ წადით, ნეფის მაყრებო, მაკმარეთ გულის ტკივილსა,  
თორემ ხალხს ვაყურებინებ თქვენი ცოლ-შვილის ტირილსა.

ვაყის მაყრები შეშინდნენ, მისედნენ, რომ ტარიელთან  
ძალით ვერაფერს გახდებოდნენ და შინ ხელცარიელები და-  
ბრუნდნენ გაჯავრებულმა ხელმწიფემ ტარიელს უთხ-  
რა:

მართალსა, შვილო, ტარიელ, ღალატსა გაგაგებინებ:  
არც მაგათ მივცემ, არც სსვათა, შენაც ხელს აგალებინებ,  
ქაჯავეთისა სუროთა კიდობანს შევაკვრევიანებ,  
შიგ ჩავსვამ ნესტან-დარეჯანს, ზღვას მივცემ, წავალებინებ

მოიყვანა ხელმწიფემ ქაჯეთის სუროები და გააკეთებინა  
კიდობანი.

სუროთ კიდობან ააგეს, ქებითა არ საქებითა,  
შიგ ჩასვეს ნესტან-დარეჯან, შიშვლად ნაშობი დედისა.  
შიგ სამი გველიც ჩაუსვეს, ჯავრით არ შენანებითა,  
შავმა გველმა თქვა, — შევჭამოთ, წითელმა უთხრა ქშენითა,  
თეთრმა გველმა თქვა, — ნუ შევჭამოთ, ტარიელისა მზე ვითა.

სუროებმა დაახურეს თავი კიდობანს და ზღვაში გადაუ-  
შვეს. დაინახეს წყლის ქაჯებმა კიდობანი, ეცნენ და დაიჭი-  
რეს, ამოიყვანეს ნესტან-დარეჯანი, გადასვეს თავიანთ  
ნაეზე და გაიტაცეს. ტარიელი ცხენდაცხენ გადაეშვა და გა-  
მოექიდა, მაგრამ ზღვაში ცხენით, რას გახდებოდა. დაბრუნ-  
და თავის მამიდასთან და შესჩივლა:

ცხრათ ქაჯთა მონადირეთა მზე ჩაავლიეს ნავითა,  
მე ჩემი ცხენით შეეცურე, წართმა გავბედე ძალითა,  
წყალმა ამყარა აბჯარი, დავრჩი შიშველი მკლავითა.  
შუბიც, ჩაჩქანიც ზღვას მივეც, მოვბრუნდი მარტო ხმალითა.

ამიტომ, ჩემო მამიდავ, გული სავსე მაქვს ჯავრითა,  
ქაჯავეთისა ციხენი ნჯავ მაჩვენა თვალითა,  
ფერ ხომ არ წაერთმეოდა ნესტან-დარეჯანს დარდითა!

ბოლოს უთხრა, სანამ ჩემს ნესტან-დარეჯანს არ ვიპოვი  
და არ დავიბრუნებ, ვერ მოვისვენებო. ადგა, შეკაზმა მამი-  
სეული რაში და წავიდა დაკარგული სატრფოს საძებნელად.  
მამიდაც თან წაიყვანა. მიდიოდა ზღვის პირდაპირ და ცხა-  
რე ცრემლით ტიროდა. იმისი ცრემლი მიწას ნამავდა და  
მდინარეებს ერთვოდა.

იარა ასე ტარიელმა, იარა და ერთ უცხო ქვეყანაში გა-  
ვიდა. ერთ გამოქვაბულში დევები გაჟლიტა და მამიდა იქ  
დააბინავა, თვითონ წყლის პირას გავიდა და დაღლილ-და-  
ქანცული მხართეძოზე წამოწვა.

იმ ქვეყნის ხელმწიფეს ნადიმი ჰქონდა და ერთი კოჭლი  
მონა ხალხის დასაპატიებლად გაგზავნა. მივიდა კოჭლი  
მონა იმ მდინარესთან, სადაც ტარიელი ისვენებდა, მაგრამ  
ხიდი აღარ დახვდა, — წყალს წაეღო. დაუძახა ტარიელს,  
ცხენი მათხოვე, რომ წყალში გავიდეო.

ტარიელი ისე იყო ტირილისა და დარდისაგან გონდა-  
კარგული, რომ მონის ძახილი ვერც კი გაიგონა, მხოლოდ  
მაშინ მოეგო გონს, როცა მონამ მეორედ დაუძახა, ტარიელ-  
მა წამოიხედა, გაიგო, რასაც სთხოვდა მონა და მდინარეზე  
ხიდად თავისი მკლავი გაუდო. გაიარა კოჭლმა მონამ ტა-  
რიელის მკლავზე, მივიდა თავის ხელმწიფესთან განცვიფრე-  
ბული და მოასხენა:

ერთი კაცი წყლისა პირსა ნამტირალსა ჰგავდა გმირსა.  
ზღვის კიდენი შეერთვილნეს ცრემლსა თვალთგან

დანადინსა!

უხდებოდა მარგალიტი იმის ცხენის უნაგირსა.

ცხენი ვთხოვე, არ მათხოვა, წყალი მოიღეკეავს ძირსა,  
თვისი მკლავი გამიშალა, გადო, როგორც ხიდი ხისა,  
ზედ გამოვედ უვნებლადა, შიში მქონდა არაფრისა,  
გვარი ვკითხე, არ მასწავლა, ნულამც მიეცემა ღსინსა.  
სახელი თქვა, ტარიელი, გაბრუნდიო, მკადრა პირსა.

ხელმწიფეს ორი გმირი მონა ჰყავდა, ისეთი ძლიერები  
იყვნენ, რომ თითო ას-ას კაცს უდრიდა. ერთს სახელად  
ადამი ერქვა, მეორეს — ომარე. დაიბარა ხელმწიფემ ადამ  
და ომარე და უბრძანა:

ადექით, აიყარენით, ძმანო, ადამ და ომარე,  
ის კაცი აქ მომიყვანეთ, ვინ არის ველთა მჯდომარე.

ადამმა და ომარემ ხელმწიფეს მოახსენეს:

ბრძანება იყოს, ბატონო შენთა ბაგეთა ბროლთაგან,  
ადვილი სამსახურია, ერთის მოყვანა ორთაგან.

წავიდნენ ადამი და ომარე და გზის საჩვენებლად კოჭლი  
მონაც თან წაიყვანეს. დაინახეს წყლის პირას მჯდარი ტა-  
რიელი და შორიდანვე დაუძახეს:

შენ, კაცო, კაცო, ვინ ხარო, შენი სახელი გვითხარო,  
ბატონი ბრძანებს, აქ მოდი, გულჩათხრობილი ნუ ხარო.

წამოიხედა ტარიელმა და შეჭურვილი რაინდები რომ  
დაინახა, თვითონაც შორიდან გაეპასუხა:

მინდორში ბროლის სურებსა, გარშემო უდგას თასები,  
ასლოს მოდექით, მოსულნო, შორით არ დავიფასები.

ადამმა და ომარმა ასეთი პასუხი ითაკილეს და მინდო-  
რის ტარიელის ხელდახელ შეპყრობა, მაგრამ ტარიელმა  
ისეთი დღე დასწია, რომ მტრისაგანაც კი შესაბრაღისებში  
გაქადა: ადამს ხელი დაავლო და ცაში შესტყორცნა, ომა-  
რეს ბარძაყი მოსწყვიტა, კოჭლ მონას კისერზე გადაჰკიდა

და უთხრა: წადი, შენს ბატონს მიაართვი და უთხარი, მეორედ ძალადობას ნულარ გამიბედავსო.

წამოვიდა კოჭლი მონა და წამოიღო ფეხმოტეხილი ომარეც. სასახლეს რომ მიუახლოვდა, ხელმწიფის მსახურები შეეგებნენ და ამბავი გამოჰკითხეს. კოჭლმა მონამ ყველაფერი დაწვრილებით უამბო, ტარიელმა რა უბედურებაც დამართა ადამს და ომარეს. მსახურები გაბრუნდნენ და ხელმწიფეს გაახსენეს:

კოჭლი მონა მოხანსალებს, თავში მთიშენდა ქვითა;  
ადამ ცაში შეისროლა, ჯერაც არ მოსულა ცითა.  
ომარს ბარძაყი მოგლიჯა, ბრუნავს, როგორც ჯარა წყლისა.

ხელმწიფემ თავისი რჩეული რაინდების ასეთი უბედურება რომ შეიტყო, მაშინვე სუფრიდან წამოდგა, მონადიმე ხალხსაც დაშლა უბრძანა და თავისი ლაშქართ უფროსი, სპასალარი ავთანდილი მოიკითხა:

მეფემ თასი გადაღვარა, აღარ არის ხანი სმისა,  
ვინც მე ყმანი დამიხოცნა, არ იქნება კაცთაგნისა,  
მომიყვანეთ ავთანდილი, მეომარი დევეებისა,  
ჯილდო ბევრი ვუთავაზო, მარგალიტი, ოქრო-რვლისა,  
ჩემს ყავარჯენს გავუგზავნი, რომელიც რომ მჯობი არი,  
მოვიდეს ის ტყვეთა მსხნელი, თურქთაც სალოცავი ჯვარი,  
ლახტი დასცეს ტარიელსა, ზეცას მიდიოდეს ჩქამი.

მოვიდა ავთანდილი, წარსდგა ხელმწიფის წინაშე და მოახსენა:

— რას მიბრძანებთ, მე მზად გახლავართო.

ხელმწიფემ უბრძანა:

— დაუყოვნებლივ ჯარი შეკრიბე, წადი და ის უცსო მოყმე ან მოკალი, ან ცოცხლად შეიბყარით.

ტარიელი ავთანდილის ძმადნაფიცო იყო, მაგრამ ავთანდილმა რა იცოდა, თუ ის მოყმე ტარიელი იქნებოდა და ხელმწიფეს უყოყმანოდ დათანხმდა. იმავე დღეს შეკრიბა ჯარი, წაუძღვა წინ და წავიდა ტარიელის შესაპყრობად.



ტარიელი დღე და ღამე დაკარგულ სატრფოს დასტირო-  
და, ტირილში ზოგჯერ ისე დაოსდებოდა, რომ ძილქუში  
დაეცემოდა და თვიდან თვემდე მკვდარივით ეძინა. ავთან-  
დილი რომ მიუახლოვდა, ტარიელი სწორედ ამ ყოფაში  
იყო, — ნაზადი მოეხვია და უგრძნობლად ეძინა. ავთანდილ-  
მა ჯარი ასლოს არ მიუშვია, ჯერ გავიგოთ, მკვდარია თუ  
ცოცხალი, ემანდ მკვდარი არ იყოს და შესაპყრობად რომ  
მივცვიედეთ მკვდარ კაცს, სირცხვილიაო. დაიჭირეს ერთი  
ორბი და გააფრინეს, თუ მკვდარია, ჭამას დაუწყებებს, თუ არა  
და, ასლოს არ გაეკარებაო. ორბი გაფრინდა, რამდენჯერმე  
შემობრუნდა ტარიელის თავზე, მაგრამ ასლოს არ მივიდა და  
არც ზედ დააჯდა. დაწმუნდნენ, რომ ცოცხალიაო, და დაუ-  
შინეს ისრები. ისრები ნაბადზე ერჭობოდა; მაგრამ ხორცამ-  
დე ვერ უწევდა და ტარიელს არ ეღვიძებოდა.

რაშია რომ დაინახა, ჩემს პატრონს ისრებს ესერიანო,  
ატესა ჭიხვინი, მაგრამ ტარიელს მაინც არ გამოელვიძა, მა-  
შინ რაშია ხერხს მიმართა, ტორებით ქვეშიდან მიწა გამო-  
უთხრა და კარგა მოზრდილი ბექობი გააკეთა, ტარიელი ბე-  
ქობზე გადავარდა და გამოელვიძა. გაღვიძებულმა პირველად  
მალლა მფრინავი ორბი დაინახა და ისარი შესტყორცნა,  
ჩამოაგდო ორბი, ააჭრა ფრთა და ისრის დასაწებად აბგაში  
შეინახა, მერე გახედა ჯარს, მიხვდა, რაშიც იყო საქმე, გან-  
რისხდა და საომრად მოემზადა: გამოუქვანძა რაშს ძუა,  
შეჯდა ზედ, იშიშვლა ხმალი, დაერია ავთანდილის ლაშ-  
ქარს და შალდაყვიით მიკაფ-მოკაფა.

ახლა კი იცნო ავთანდილმა ტარიელი და მაშინვე მის  
შესახვედრად გაემურა, მაგრამ ტარიელს ნესტან-დარეჯა-  
ნის დაკარგვის შემდეგ არავისი ნახვა აღარ უნდოდა, აღარც  
ავთანდილთან შეხვედრა ინდომა, გადაჰკრა რაშს მათრახი  
და დევების ქვეყნისაკენ წავიდა.

დაბრუნდა შინ ავთანდილი და ცოლს, თინათინს უთხრა:  
— ის უცხო მოყმე, ლაშქარი რომ დამიხოცა, თურმე  
ჩემი ძმადნაფიცო ტარიელი ყოფილა, დარდისაგან გონდა-  
კარგულმა ვერ მიცნო და დევების ქვეყნისაკენ წავიდა. მეში-  
ნია, ვაითუ, დევებმა დააღალატონ და მოკლანო.

ცოლმა ავთანდილს საძებრად და მისაშველებლად წასუ-

ლა ურჩია. ავთანდილს ცოლის რჩევა არ მოეწონა, დაექვდა, რატომ მიშორებს სახლიდან, ამას გულში სხვა განზრახვა ხომ არ უდევსო, და უთხრა:

რას ამბობ, უჭკო დიაცო, მრუშო და ღალატიანო,  
უწყლო-უღაროდ წისქვილნი მთაში ვის აუგიანო?  
მოყვარეების გულისთვის ქმარნი ვის წაუგიანო?

თინათინმა შეჰფიცა:

ხატი რისხავდეს თინათინს, ღმერთი ყოველთა რჯულისა,  
შენს გარდა ქმარი ინდომოს, ან ჰყავდეს ვინმე გულისა,  
მაგრამ მოძებნა წესია, მოყმისა დაკარგულისა.

ავთანდილმა დაუჯერა თინათინს, შეკაზმა ცხენი, აისხა ხმალ-აბჯარი, შეილდ-კაპარჭი და წავიდა ტარიელის საძებნელად. ავთანდილის წასვლა თინათინმა ხალხს ციხის სარკმლიდან აცნობა:

ციხით იძახა თინამა, ავთანდილ გაიპარაო,  
სამოცდასამი ისარი კაპარჭში ჩაითვალაო.

იარა ტარიელმა და გავიდა დევთ ქვეყანაში. დევები მინდორში გამოსულიყვნენ და მიწას ხნავდნენ, დაინახეს ტარიელი და დაუწყეს ყვირილი, — ნახნავზე ნუ დადიხარო! მაგრამ ტარიელმა ყური არ უგდო, მაშინ ერთი გუთნისდგა დევი გადაუდგა წინ და გზა აღარ მისცა. ტარიელმა წიხლი ჩასცა და დევი გაბერილი ბურთივით გასკდა. დიდიხნის გაუცინარ ტარიელს ამაზე გულიანად გაეცინა და მისი კბილების შუქმა მთელი მიდამო გაანათა. მერე იმის ხარ-გუთანსაც წიხლი ამოჰკრა და დამტვრეულ-დალეწილი მინდორში მიმოფანტა.

ამის შემდეგ დევები ახლოს აღარ მიჰკარებინ და მათი სამფლობელო ტარიელმა მშვიდობიანად გაიარა.

ტარიელს ავთანდილიც კვალდაკვალ მიჰყვებოდა, მოვიდა დევთ სამფლობელოში, ნახა დალეწილი ხარ-გუთანი და ერთ ნაცნობ დევს ჰკითხა:

დევო. შენ ბიჭიჭაურო, კარზე ვინ ჩამოგიარა?

დევმა უპასუხა:

ერთმა პირტუქსმა მოყმემა ცხენხეთქით ჩამოიარა,  
სარ-გუთანს წიხლი ამოჰკრა, მინდორში გააბზრიალა,  
ჩარდასას წიხლი დაგვიცა, კუნელმა ამოიარა,  
ღიმი პქნა, კბილი გამოჩნდა, შუქმა მთა გადაიარა,  
ნუ მისდევ, ძმაო, ავთანდილ, თორემ ავია ძრინანა,  
შენც მოგკლავს, არც შენ დაგინდობს, ბევრი სხვა დააზიანანა  
ბევრი ვთქვით, ხმაცა არ გაგვცა, ვერე რამ გააზუნინანა?!

ავთანდილმა, რა თქმა უნდა, არ დაუჯერა დევს და თავისი გზა განაგრძო, — ისევ ტარიელის კვალს დაადგა. ერთ ადგილას გზაზე სამი ძმა გოლიათი მეკობრეობდნენ, გზას რიგრიგობით დარაჯობდნენ, გამვლელ-გამომვლელს ატყვევებდნენ და სულით ხორცამდე ძარცვავდნენ. ტარიელი რომ მივიდა, დარაჯად იმ დღეს უმცროსი ძმა იდგა. იგი ძმებზე ღონიერიც იყო და გულადიც. დაინახა შორიდან მომავალი ტარიელი და ძმებს უთხრა:

— მაგ კაცს მარტო შევიპყრობ, ტყვე და მთელი ნადავლი თქვენი იყოს, ოღონდ რაში საკუთრად მე დამითმეთო.

დათანხმდნენ ძმები და ჩავიდა უმცროსი ძმა, გადაუდგა ტარიელს წინ. ტარიელს ზედმეტად კაცის სისსლში გარევა არ უყვარდა და ცხენი აირიდა. მაგრამ მეკობრე კვლავ წინ გადაუდგა და ლაგამზე წაეტანა. ეს კი ველარ მოითმინა ტარიელმა, ჩამოხტა ცხენიდან, წასწვდა მეკობრეს, ერთ ფეხზე ფეხი დაადგა, მეორე ფეხში ხელი სტაცა და შუაზე გახია. ნახევები აქეთ-იქით გადაყარა და გზა უშიშრად განაგრძო.

ამასობაში ავთანდილიც მოვიდა იმ ადგილზე. სადაც ტარიელმა მეკობრე გახლიჩა. დაინახა ტარიელი, რომ ისევ გზას დასდგომოდა და დაუძახა:

შავი ხარ და შავად მიხვალ, შავად რასმე დაბურვილხარ,  
სად მიხვალ, ის მაინც მითხარ, ან შინ რად არ  
დაბრუნვილხარ?

ტარიელი გონს მოეგო და მაშიდის სახლისაკენ დაბრუნ-

და, მაგრამ ავთანდილი მაინც ახლოს არ გაიქარა, დაემუქრა, თუ არ ჩამომეხსნები, მოგკლავო:

თეთრი ხარ და თეთრზე ზიხარ, თეთრად რასმე

მოკაზმულხარ,  
იქით წადი, აქ ნუ მოხვალ, თორემ დღეზე მიწურვილხარ,  
შენც მოგკლავ და შენს ცხენსაცა, თუ უკან არ  
გაბრუნვილხარ.

შემოჰკრა მათრახი თავის რაშს და უფრო გამოჰრიდა, მივიდა იმ გამოქვაბულში, სადაც მამიდა ჰყავდა და უთხრა:

— ჩემი ძმადნაფიცის მსგავსი ვილაც მომდევს, მე სანადიროდ წავალ და თუ მართლა ავთანდილი იყოს, შენ დაუხვდი და ჩემს დაბრუნებამდე უკანვე გაისტუმრეო.

მამიდამ უთხრა:

— რა არის, რომ სულ გარე-გარე დადიხარ და სიანლოვეს არავის იკარებ, მარტოკა ვერც შენს ნესტან-დარეჯანს დაიბრუნებ და ვერც სხვა საწადელს ეწევი. დაუცადე, ნახე, იქნებ მართლა ავთანდილია, იქნებ მოშველება უნდა და შენს გულის წყლულს რამე წამალი მოუნახოსო.

გაუგონა ტარიელმა მამიდას და აღარ წავიდა სანადიროდ. ცოტა ხნის შემდეგ ავთანდილიც მოვიდა. მოიკითხეს ერთმანეთი და ჩამოსხდნენ. ტარიელმა მთელი თავისი გასაჭირი და თავგადასავალი უამბო:

ღმერთს გეფიცები, ავთანდილ, მე აღარ მეცინებიან, ერთი მზე მყავდა მიყვარდა, ქაჯნი მას მეცნილებიან, დავდივარ გამწარებული, დავჯდები მეტირებიან, დავშავდი ჭაბუკობითა, სიბერენ მეღირებიან, ლაშქარნი ზღვისა ქაჯთანი მოკვლასა მეპირებიან.

ტარიელს თავის სახელმწიფოშიც ჰყავდა ერთი ძმობილი, სახელად ფრიდონი. ფრიდონს გაეგო ტარიელის ამბავი და საშველად წამოსულიყო. გამოქვაბულში სწორედ იმ დროს მივიდა, როცა ტარიელმა ამბის თხრობა დაამთავრა. იცნო ტარიელმა ფრიდონი, გააცნო ავთანდილიც და გახდნენ სამნი.

## ავთანდილმა უთხრა ტარიელს:

ნუ გეშინია, ტარიელ, დრო მე ვიცი ქაჯებისა,  
ასლა ქორწილს აპირებენ, ქაჯნი გამართავენ ლხინსა,  
ოლონდ შენი ცხენი მომეც, ჩემი ზღვაზე ვერა რბისა.

ზღვაზე მავალი ცხენი მსოლოდ ფრიდონს ჰყავდა, ტარი-  
ელმა სთხოვა და ფრიდონმაც უყოყმანოდ დაუთმო:

ცხენსაც მოგცემ, მეც გაგყვები, მაშ რად გინდა თავი ძმისა,  
თუნდა ლაფშა დაიჭირეთ, თუნდა რაში — როგორც გინდა,  
ისევ ლაფშა ამჯობინებს, თვალთ უმაღლე ნიავე-ქრისა,  
აიყარნენ და წავიდნენ სამნივ ქაჯაუეთის გზითა.

ავთანდილი ფრიდონისეულ ცხენზე შეჯდა და ზღვა-ზღვა  
წავიდა ციხის დასაზვერად. ტარიელი და ფრიდონი კი  
ქულავ ხმელეთით, ზღვის ნაპირ-ნაპირ წავიდნენ. შეიყარნენ  
ქაჯეთის ციხესთან ერთად და ფრიდონი გაეხუმრა ავთან-  
დილს:

ბრ მეგონა ავთანდილო, ზღვას თუ ვლიდით ცხენებითა,  
თორემ ლაფშას არ მოგცემდი, ჩემი სიცუდკაცე გითხრა.

ქაჯეთის ციხე ზღვის პირად, ერთ მიუვალ კლდეზე იყო  
დაშენებული, ციხის მახლობლად ორი დედაკაცი თონეში  
შოთებს აცხობდნენ: ციხიდან სიმღერა და ჟრიამული ისმო-  
და. ძმადნაფიცები დედაკაცებთან მივიდნენ და ჰკითხეს:

— რა ამბავია ციხეში, რა ხმაური ისმისო?

— ქაჯებმა ერთი მზეთუნახავი ქალი მოიყვანეს მოტა-  
ცებული, დღეს იმ ქალზე თავიანთ მეფეს ჯვარს სწერენ და  
ქორწილი აქვთო.

ძმადნაფიცებმა დედაკაცს სთხოვეს:

— ერთ-ერთი შედით და ამყამად რას აკეთებენ ქაჯები,  
გაგვიგეთო.

დედაკაცები ქაჯებს პურისმცხობლებად ჰყავდათ დაქირა-  
ვებული და ციხეში თავისუფლად ატარებდნენ. შევიდა ერთ-  
ერთი დედაკაცე და ამბავი გამოიტანა:

— ნუფე-პატარძალი უკვე საქორწინო სუფრაზე სხედან და ქაჯები საჩუქრებს აძლევენო.

ტარიელმა ველარ მოითმინა და რკინის კარის დამტკრევა მოინდომა, მაგრამ ავთანდილმა დაუშალა, რადგან კარს შიგნიდანაც რკინის ურდულები ჰქონდა გაყრილი. ღოსხნა ფრიდონისეულ თვალთ უმაღლეს ლაფშას თოკი და თქვა:

სიყრმისას ჩემნი გამზრდელნი სამუშაითოდ მზრდიდიან, ციხითა ციხის წვერზედა, თოკები გამიკიდიან, ისე გავიდი თოკზედა, თვალნიც კი ვერ მომკიდიან, იქ მდგომი ჩემი სწორები ჩემს ბედსა დანატრიდიან. მე ის მეგონა, კი თუ მკვლენ, ისინი თურმე მწვრთნიდიან.

ციხეს წვერში პატარა სანათური ჰქონდა, ავთანდილმა თოკი ქამანდურად გამოყულფა, ესროლა და ციხის წვერს მოსდო. შერე ტარიელს ბეჭედი გამოართვა, გაირბინა თოკზე, სანათურიდან ციხეში ჩავიდა და ტარიელის ბეჭედიც თან ჩაიტანა. ძმადნაფიცებს კი ამბავი დაუტოვა, მზათ იყავით და როცა მოგიხმოთ, დაუყოვნებლივ მომეშველენითო.

შევიდა იმ დარბაზში ავთანდილი, სადაც ნუფე-პატარძალი ისხდნენ და სტუმრებში გაერია. როცა საჩუქრის მიცემის რიგმა მოუწია, ამოიღო ჯიბიდან ჩუმად ტარიელის ბეჭედი და ნესტან-დარეჯანს გადასცა.

ნესტან-დარეჯანმა ბეჭედი იცნო და აქამდე თუ მგლოვიარესავით იჯდა, ახლა უცბად გამხიარულდა. ჰკითხა ავთანდილს ჩურჩულით:

— ამის პატრონი თვითონ სადღა არისო?

— აქ არის და გელოდებაო, — ჩურჩულითვე უპასუხა ავთანდილმა.

გახარებული ნესტან-დარეჯანი მსწრაფლ წამოხტა და კარისაკენ გაექანა, მაგრამ კარის მცველებმა გზა გადაუღობეს და კარებამდე არ მიუშვეს.

ახლა კი მიხვდნენ ქაჯები, რომ ავთანდილი სასიკეთოდ არ იყო შემოსული და მიესივნენ, — ზოგი ხმლით, ზოგი შუბით, ზოგი ისრითა და ხელკეტით.

— ჰაი, თქვე ქაჯებო, ქაჯთა შვილებო! — დაჰკივლა ავ-

თანდილმა, იშიშვლა ხმალი და გაუსო და გამოუსო, მარჯვნივ და მარცხნივ მკვდრები ააგო, მაგრამ ქაჯების რიცხვი დაკლების მაგიერ, სულ უფრო მატულობდა.

იბრძვის გმირი ავთანდილი, ყელამდე სისხლში დგას, გამეტებით იქნევს ხმალს და ლომივით ბრდღვინავს, სჭრის ქაჯებს თავებს, მაგრამ მათს რიცხვს მაინც ვერ ამცირებს, სულ ახალი და ახალი რაზმები ჩნდებიან და ავთანდილს ჭილყვაკვივით ესვევიან. ბოლოს შეწუხდა ავთანდილი და დაიძახა:

ძმაო, ტარიელ, მიშველე, დამჭირდა უენი გმირობა,  
დამათავსშირეს ქაჯებმა, ჩემზედ აქვთ შემოვლილობა.


გაიგონეს ტარიელმა და ფრიდონმა ავთანდილის ძახილი, მივარდა გმირი ტარიელი რკინის კარებს და გადაანგრია, მიღეწ-მოღეწა საკეტურები, იშიშვლა მამისეული აღმასის ხმალი და დაიძახა:

რა არის ციხე ქაჯების, ის ჩემგან დაძლეულია,  
ცხრა კარი, კლიტე რკინისა დაღეწილ-დანგრეულია,  
ტარიელს ომი არ უჭირს, ხმლის ქნევას დაჩვეულია,  
ნესტანის ქაჯთად დამთმობი სულითამც დაწყეულია.

გადაერია ქაჯებში, მიჰყვა ფრიდონიც ხმალამოწვილილი და ატეხეს ცხარე ომი. ძმადნაფიცები რომ დაინახა, ავთანდილიც გამხნევედა და უფრო მედგრად შეუტია. სამივენი თანაბარი თავგამეტებით იბრძვიან, იქნევენ ხმლებს, მაგრამ ქაჯთა ლაშქარს სიმცირე მაინც ვერ დაამჩნიეს.

ავთანდილმა შეიხედა მალლა და დინახა, რომ ციხის ჩარდახში ერთი ბებერი ზის და ფეტვს ცხრილავს. ჩამოდის ფეტვი ძირს და ქაჯებად იქცევა. მოიხსნა საჩქაროდ მშვილდი, ჩადო ისარი, სტყორცნა ბებერს და ჩამოაგდო.

ამის შემდეგ ომი, რა თქმა უნდა, გაუადვილდათ და ქაჯები სულ მოკლე ხანში მთლიანად ამოწყვიტეს. გამოიყვანეს ნესტან-დარეჯანი, ჩააბარეს ტარიელს და გამარჯვებულები და ბუღნიერები თავთავიანთი ქვეყნებისაკენ წავიდნენ.



## ა მ ი რ ა ნ ი

იყო ერთი ცოლ-ქმარი, სულკალმასი და დარეჯანი და ჰყავდათ სამი ვაჟი — უფროსი ბადრი, შუათანა უსუპი და უმცროსი ამირანი. როგორც ნაბოლარა შვილი, ამირანი დედას გამორჩეულად უყვარდა და საკუთარ ძეს, დარეჯანის ძეს ეძახდა. ამირანი ცოლ-ქმარს, დარეჯანსა და სულკალმასს ისეთ დროს ეყოლათ, როცა უკვე ღრმად მოსუცები იყვნენ და სიცოცხლის დიდი დღე აღარ ეწერათ. ამიტომ გადაწყვიტეს, მდიდარი კაცისათვის მოენათვლინებინათ, რომ მათი სიკვდილის შემდეგ ნათლიას წაეყვანა და გამოეზარდა. მოიწვიეს კიდევ მდიდარი კაცი ნათლიად, მაგრამ ნათლობის დღეს სულკალმასის სახლში მათხოვრულად ჩამული ღმერთი გამოცხადდა და სულკალმასს სთხოვა, შენი შვილი მე მომანათვლინეო. სულკალმასი და დარეჯანი დათანხმდნენ და ამირანი ღმერთს მოანათვლინეს. ღმერთმა ამირანს დაანათლა: დაქანებული ზეავის შეუპოვრობა, თორმეტი უღელი ხარ-კამერის ღონე და მგლის მუხლი, ბავშვობაში ობლობა და გაჭირვება, ხოლო ვაჟკაცობაში ომი და გამარჯვება.

მართლაც, არ გაუვლია დიდხანს, რომ სულკალმასი და დარეჯანი დაიხოცნენ და ძმები ობლად დარჩნენ. მაშინ დევები ზეპირ დადიოდნენ და ძალიან ბევრნიც იყვნენ. რაკი უპატრონო ობლები დაიგულეს, რაღა გააჩერებდათ, დაესხნენ თავს, წაართვეს მთელი საცხოვრებელი და სახლიდანაც გამოყარეს: დევებისაგან დაწიოკებულმა ძმებმა თავი საჩა-



ლესლა შეაფარეს, მაგრამ დევებმა არც იქ დააყენეს, მაშინ  
აღვინე ძმები და სულ სხვა მხარეს გადაიხვეწნენ:

ბადრი, უსუპი, ამირან ობლები მოვიყარენით,  
დევების დაშინებულნი, ჩაბალხეთს ჩავიყარენით,  
ღველუ არ გვინასავს, კერაი, საჩალეს მოვიზარდენით.

გავიდა ხანი, ძმები დაიზარდნენ და მშვენიერი ვაჟკაცე-  
ბიც დადგნენ, მაგრამ ღონით ამირანი ორივე ძმას სჭარ-  
ბობდა.

ბადრი ქალსა ჰგავს ლამაზსა საქმარედ მოპირებულსა,  
უსუპი — ბროლის ციხესა, თავ-ბოლო გამაგრებულსა,  
ამირან — შავსა ღრუბელსა, საავდროდ დამზადებულსა.

ამირანი ტანად მომცრო იყო, მაგრამ ღონე ასი კაცისა  
პქონდა და სმა-ჭამაც იმდენივე უნდოდა:

ცოტა კაცია ამირან, ცოტა სმა-ჭამა ეყოფა:  
სადილად ბულა კამეჩი, ვასშმად არც სამი ეყოფა.

ძმები რომ დაიზარდნენ, ყველას სამაგიერო გადაუხადეს,  
ვინც კი ობლობაში აწყენინა, ან სიკეთე უყო, კარგის  
მქნელს სიკეთით მიუზღეს, ხოლო მოძალადე დევებს შინ  
მიუცვივდნენ და ხმლით შემუსრეს:

ვინც კარგი გვიყო ობლებსა, მუშაში დავეტანენით,  
ხოლო ვინც ავად მოგვექცა, იმას შინ შავეტანენით,  
სამნი ჩვენ, ცხრანი დევები ჩაბალხეთს შევიყარენით,  
თავს მოვხვდით ბალხის კარავსა, ბოლოში გავიყარენით,  
დევები, დევთ დედაბრები სულ ხმლებქვეშ გავატარენით.

გაჟლიტეს დევები და თავიანთ სახლ-კარს თვითონვე დაე-  
ბატონენ, ძმები ღლისით სანადიროდ დადიოდნენ და თავს  
ნანადირევით ერჩენდნენ. ერთსელაც წავიდნენ სანადიროდ,  
იარეს ტყე-ღრეში, ცხრა მთა გადაიარეს, მაგრამ ვერაფერი  
მოკლეს. ბოლოს ალგეთის მთაზე გადავიდნენ და ერთი ოქ-

წოსტრქიანი ირემი წამოუხტათ, მაგრამ სანამ ისარს ეს-  
როდნენ, ირემმა გაიწყო ზურგზე დატოტილი რქები და ტყე-  
ში შევარდა. მიჰყვნენ უკან ამირანი და ძმანიც მისნი:

სანადიროდ წამოვიდნენ ამირან და ძმანი მისნი,  
გადიარეს ცხრანი მთანი, მეთენი ალგეთისნი,  
მთას ირემი წამოუხტათ, ოქრო იყო რქანი მისნი,  
მინდორს კვალი მოუკვლიეს, დანაჭლიკნი საჭირმისი,  
უცხო მთაზე კოშკი ნახეს ანაგები ბროლის ქვისი,  
მოუარეს გარე-ირგელივ, ვერ იპოვეს კარი მისი,  
სადაც მზემან სხივი დაჰკრა, ამირანმა — მუსლი მგლისი,  
კოშკმაც პირი იქ გაიხსნა, იქ შეება კარი ხისი,  
კოშკში ერთი მკვდარი იწვა, ლომი იყო ტანი მისი,  
იმას თავითთ რაში ება, ტორით მიწას თხრიდა ისი.  
მარცხნივ რომ შუბი ეყუდა, ცასა ჰხვედა წვერი მისი,  
მარჯვნივ თავის ხმალი ედო, პირი ჰქონდა აღმასისი.  
გვერდით ერთი ქალი ეჯდა, ზღვას ერთვოდა ცრემლი მისი,  
თითებსა და თითებს შუა წიგნი ჰქონდა ქალაღდისი.  
წაიკითხეს; შიგ ეწერა: ნაანდერძი ცამცუმისი:  
„არც ისე დაკარგული ვარ, დისწული ვარ უსუბისი,  
სანამ ვიყავ, მტერი ვმუსრე, არ შევჭამე ჯავრი სხვისი,  
მოგკვდი, მსოლოდ ჯავრი ჩამყვა, ერთი დევის ბაყბაყისი,  
ვინაც მოჰკლავს ბაყბაყდევსა, ჩემი შუბი ალაღ მისი,  
ვინც დედ-მამას დამიმარხავს, ჩემი ხმალი ალაღ მისი,  
ვინც მე მომივლის, დამმარხავს, ცოლიც, რაშიც ალაღ  
მისი“.

წაიკითხა ამირანმა წიგნი და ძმებს უთხრა:

— ხომ სულ ერთია იმ ბაყბაყდევს მოუკლავს არ გავუ-  
შვებთ, მოდით, როგორც ანდერძში წერია, ეს ხმალ-შუბი  
ასლავე წავიღოთ და ეს ქალი და რაშიც წავიყვანოთო.

ძმებმა დაუშალეს, სირცხვილია, ხალხი იტყვის, მკვდარ-  
ი გაძარცვეს და დაგვცინებენო:

ნუ, ამირან, ძმათა მზესა, ნურა გინდა ნურავისი,  
გამოდი და გამოხურე საყდარი და კარი მისი,  
თორემ გმირნი დაგვძრახავენ: მკვდარი გაუძარცვავეთ სხვისი;

დაუჯერა ამირანმა ძმებს და ამ განზრახვაზე ხელი აიკლო. მერე საფლავი გათხარეს, ცამცუმი დამარხეს, გამოხურეს კოშკის კარი და წავიდნენ ბაყბაყდევის საძებრად. ბევრი ძებნა და სიარული არ დასჭირვებიათ. ცოტა რომ გაიარეს, გზაზე ბაყბაყ დევი შემოხვდათ, დაუახლოვდნენ ერთმანეთს და ამირანმა შესძახა:

— სად მიხვალ, შე აყროლებულო, საითკენ მიეჩქარებიო?

— უსუბის ძმისწული ცამცუმი მომკედარა და მისი ლემის საჭმელად მივალო, — უპასუხა ბაყბაყმა.

ამირან, დევი ბაყბაყი ჩასაუბრობენ მტრულადა, ხმაღზე ხელი აქვს ამირანს, ცხარე ომს ფიქრობს გულადაა

ბოლოს ამირანმა უთხრა ბაყბაყ დევს:

— შენ ქრისტიანის ლეშს არავინ შეგაჭმევს და გირჩევნია, ახლავე უკან დაბრუნდეთ.

მაგრამ ბაყბაყდევმა ამირანის მუქარა არაფრად ჩააგდო და დაცივნით უთხრა:

— ვითომ შენ დამიჭერ გზასაო?

ამირანი გაბრაზდა და ეძგერა ბაყბაყდევს. ეძგერა ბაყბაყდევიც და დაიწყო ცხარე ომი.

ამირან, დევი შეიბნენ, მიწას გაჰქონდა გრიალი, ამირანმა დევი დასცა, ადგილი დახვდა ქვიანი, დასცა და მხარი მოსტეხა, დააწყებინა ღრიალი.

დევი შეშინდა და ამირანს შეეხვეწა:

— ნუ მომკლავ, დარეჯანის-ძევ, ხელი გაფიცო ხმლიანი, მანდილი დედისუნისა, თაკლავი, ოქროიანი, ზღვას გაღმა ქალი გასწავლო, სახელად ყამარიანი, საყამაროსა კაბასა, შვიდი დღე უნდა მზიანი, შვიდ კვირეული საპონი, ჩვიდმეტი კოკა წყლიანი, წასვლა ადვილი იქნება, მოსვლა გახდება გვიანი,

მოყვარული ხარ ომისა, გზა იქ გექნება მტრიანი,  
თან შიკრიკს გამოგაყოლებ, ვაჟია ღალატიანი.

ამირანმა შეიწყნარა ბაყბაყდევი, მაგრამ ძმებმა არ და-  
ანებეს. უთხრეს:

— მოკალი, თორემ დევი არ დაიზავება და ცუდ საქმეს  
გიზამსო.

დაუჯერა ძმებს ამირანმა და მოსჭრა ორი თავი, მესამე  
თავის მოჭრაც რომ დაუპირა, დევმა კიდევ სთხოვა:

— სომ მკლავ და მკლავ, უკანასკნელად ეს თხოვნა მა-  
ინც ამისრულე: ჩემი თავებიდან თითო ჭია ამოძვრება და  
იმათ ნუ დახოცავო.

მოსჭრა ამირანმა მესამე თავიც. თავებიდან მართლაც  
ამოძვრნენ ჭიები და კლაკვნა დაიწყეს. ძმებმა უთხრეს ამი-  
რანს:

— რაკი ერთი ჭირი მოიშორე, ძმაო ამირან, მოდი ეგ  
ჭიებიც ზედ მიაყოლე, თორემ ეგენი რამე ხიფათს გადაგ-  
ყრიანო.

ამირანმა ამჯერად აღარ დაუჯერა.

— რას ამბობთ, ძმებო, დევმა ვერაფერი მიყო და ჭიები  
რას მიზამენ, ჭამამ რა მიყო, ლოკვამ რა მიყოსო, ერთი  
თხოვნა თქვენ აგისრულეთ და მოდით, ერთსაც დევს აუუს-  
რულებო. — უთხრა ამირანმა და ჭიები ცოცხლები გაუშვა.  
მერე მიუბრუნდა ბაყბაყდევის გამოტანებულ შიკრიკს და  
უბრძანა, — აბა, შიკრიკო, აჩქარდი, ფეხიც ააჩქარე და ყა-  
მარისაკენ სავალი გზა გვასწავლეო.

წაუძღვა შიკრიკი და წავიდნენ. იარეს, ბევრი იარეს,  
მრავალი მთა და ველი გადალახეს, მაგრამ გზა ვერ გაიტა-  
ნეს. შიკრიკი ღალატობდა, ძმების დახოცვა უნდოდა და  
სხვადასხვა გზით ერთსა და იმავე ადგილზე ატარებდა.  
უსუბმა პირველმა შეატყო შიკრიკს ღალატი და გავლისას  
ერთ კუნძულს ისარი დაჰკრა, მართლაც მეორე დღეს შიკ-  
რიკმა იმავე გზაზე გამოატარა. უსუბმა იცნო თავისი ისარი  
და ამირანს უთხრა:

ვერ გაგიგია, ამირან, არგამარჯვების ნიშანი  
მეორედ იქვე მივედით, გუშინ რომ დავკარ ისარი.

## ამირანი განრისხდა და შიკრიკს შეუტია:

შიკრიკო, გზანი გაიხვენ, თუ არ ხარ თავის მისანი,  
თორე აგიღე, გაგთალე, რე საკიდობნე ფიცარი.

შიკრიკმა ახლა კი იკადრა, „გაიხვნა გზანი“ და ძმები  
ერთ ტრიალ მინდორზე გაიყვანა. გაიხნდა უცბად ამირანმა  
და დაინასა, რომ ის სამი ჭია, ბაყბაყდევის თავებიდან რომ  
ამოძვრნენ, უზარმაზარ გველესაპებად ქვეულიყვნენ და მინ-  
დორზე საზარლად მოიზღაზნებოდნენ. ერთი თეთრი იყო,  
ერთი — წითელი და ერთიც — შავი.

მინდორში სამნი ჭიანი მოდიან, მოიმღერიან,  
თვალს უცემს დარეჯანის ძე, — მაგათთან ომი მწადიან.

ამირანმა უთხრა ძმებს:

— აბა, ძმებო, მეტი გზა არ არის, მაგ გველესაპებს უნ-  
და შევებრძოლოთ, თეთრი — ბადრს, წითელი — უსუპს და  
შავი მე დამანებოთო.

— მარტო შავი კი არა, თეთრი და წითელიც შენთვის  
დაგვინებებია, — უთხრა უსუპმა, — როცა გირჩიეთ, რომ  
ის ჭიები ცოცხლები არ გაგეშვა, არ დაგვიჯერე და ახლა  
როგორც გინდა, ისე გაუსწორდი, შენი გამრუდებული გზა  
შენვე გაასწორეო.

ამირანს ეწყინა ძმის ასეთი პასუხი და საყვედური  
უთხრა:

უსუპო, ჩემი სიმუხთლე, სულმუდამ გულში გდებია,  
ტვინი — სადები თავშია, ჩაბალახშია გდებიაო.

და ბადრს მიუბრუნდა, — შენ მაინც მიშველეო, მაგრამ  
ბადრიმაც უარი უთხრა: ამირანმა ახლა ბადრს უსაყვედურა:

ტრელი ყოფილხარ, ძმავე, ბადრო, გულიც ალქატი გქონინა,  
დაჯე და ტყავები კერე, სხვა ხელი არა გქონიაო.

რაკი ბადრისაგანაც უარი მიიღო, იმედი ბოლოს აბჯარ-  
ნა. ქართული ხალხური ზღაპრები

საჭურველზელა დაყარა და შესთხოვა, — ჩემო ხმალო და აბჯარო, საძალედ მომეშველენითო, და გაუმართა სასტიკი ომი გველეშაპებს. მოკლა თეთრი, მოკლა წითელი და დამაშვრალი ბოლოს შავს შეება:

თეთრიც მოკლა და წითელიც შავსა შეება მაშვრალი.

მაგრამ შავს ველარ დასძლია. შავმა თვითონვე ჩაყლაპა და გასწია შავი ზღვისაკენ. ზღვის პირას ერთი რკინის ბოძი ჰქონდა, როცა ვინმეს ჩაყლაპავდა, ამ ბოძს შემოეხვეოდა, დაამტვრევდა და ისე მონილებდა, მაგრამ ახლა ბოძამდე მისვლა ველარ მოასწრო. ძმებმა რომ დაინახეს ამირანის გასაჭირი, მაშინვე მისაშველებლად გაეშურნენ, დაეწინენ გველეშაპს, უსუპმა ისარი ესროლა და ცხრა ადლი კუდი მოსწყვიტა. გველეშაპი შემოეხვია რკინის ბოძს, მაგრამ კუდი პირამდე აღარ მისწვდა და ამირანი დამტვრევას გადარჩა.

ამირანს ჯიბეში ალმასის დანა ედო, მაგრამ ახლა აღარ მოაგონდა. ძმებმა ეს იაზრეს და უსუპმა უთხრა ბადრს:

— მოუდის დარეჯანის ძეს ჯიბეს ჩადება დანისა, ამოღება და გამოჭრა, შავისა გველეშაპისა.

მართლაც, მოაგონდა ამირანს თავისი ალმასის დანა, ამოიღო იმავე წამს, გამოსჭრა მუცელი გველეშაპს და გამოვიდა. ცოცხალი კი გადარჩა, მაგრამ თმა-წვერი მთლიანად გასცვენოდა და გატუსულ გოჭს დამგვანებოდა. ძმებმა შეხედეს და სიცილი დაიწყეს:

ამირანი დაიბადა გოჭსა ჰგავდა ხუხალასა,  
წვერ-ულვაში გასცვენოდა, ჩაეყარა ტომარასა.

ეწყინა ამირანს ძმების დაცინვა და გაჯავრებით უთხრა:

იგივე ვაჟია ამირან, გუშინ რომ ჩამოქარობდა,  
არცა რა ბევრი ტანთ ეცვა, არცა რა მკლავთ უფარობდა.

ძმებმა დაამშვიდეს, ვიხუმრეთ, ნუ გეწყინებაო და თანაც ანუგეშეს:

მინდორზე გამოვიარე, დავეკრიფე ვარდი — სოსანი,  
ამირან, ნუ გეწყინება, სხვანიც არიან ქოსანი,  
თხასაც ასხია ბალანი, ჩალად არა ღირს თმოსანი,

ამირანი რომ დამშვიდდა, უსუპმა უთხრა:

— წვერ-ულვაშზე ნუ ინალვლებ, ძმაო, ამირან, მაგის ხე-  
ლობა იგრი-ბატონმა იცის, მივიდეთ მასთან და ისეთ წვერ-  
ულვაშს გაგიკეთებს, როგორსაც ეტყვიო.

წავედნენ იგრი-ბატონთან. გზაზე ძმებმა ამირანი დაარი-  
გეს:

— იგრი-ბატონი ცოტა ავი კაცია, კარზე რომ მიხვალ,  
იგრი-ბატონი დაუძახე, სხვანაირად არ მიმართო, თორემ  
გაწყრება და წვერ-ულვაშს აღარ გაგიკეთებსო.

მაგრამ ამირანი ხეტი კაცი იყო და ასეთი თავაზიანობი-  
სა არაფერი გაეგებოდა. მივიდა თუ არა იგრი-ბატონის კარ-  
ზე, ძმების დარიგება აღარც კი მოჰგონებია და თავისებუ-  
რად, მკვახედ შეუძახა:

— იგრი, იგრი, კარში გამო, წვერ-ულვაში გამიკეთეო!

იგრი-ბატონი ხელკეტიტ გამოვარდა. — ვინა ხარ, ვინ  
მოთრეულხარ, რომ „იგრი-ბატონის“ დაძახებასაც არა  
ჰკადრობო, მაგრამ შეხედა თუ არა დარეჯანის ძეს, მაშინვე  
იცნო და ენა მუცელში ჩაუვარდა. მოკრძალებით ჰკითხა:

— რა გინდა, დარეჯანის ძევ, რა გაგჭირვებია და რითი  
გემსახურო?

— ხომ ხედავ, წვერ-ულვაში აღარა მაქვს და გამიკე-  
თეო, — უთხრა ამირანმა.

— მე ჩემი ხელმწიფე მყავს, — უთხრა იგრი-ბატონმა, —  
და სანამ იმის ნებართვას არ მომიტან, ვერ გაგიკეთებო.

ამირანი წავიდა იგრი-ბატონის ხელმწიფესთან, მაგრამ  
ხელმწიფემ უწვერ-ულვაშო ამირანი ვერ იცნო და უკმეხად  
მიასხალა:

— წადი, წადი, წაუთრიე, არც კი გიცნობ ვინა ხარ და  
რა ბრძანება უნდა მოგცეო!

— ვინა ვარ და, გაგაცნობ თავსო! — განრისხდა დარე-  
ჯანის ძე, წასწვდა ხელმწიფეს, წაჰკლიჯა თავი, გამოიხვიდა

ჩოხის კალთაში და წაუღო იგრი-ბატონს, გაუგორა ფეხებ-  
წინ და უთხრა:

— აჰა, ეგეც ბრძანება და საქმეს შეუდექიო!

რალას იზამდა იგრი-ბატონი, მაშინვე გაუკეთა მშვენიე-  
რი წვერ-ულვაში და გაისტუმრა.

შეიყარნენ ძმები ისევ ერთად და წავიდნენ ყამარის სა-  
ძებნელად. ბევრი იარეს, ბევრი ხიფათი, გაჭირვება გამოიარეს და ღვარეს სისხლი. მოსწყინდათ ბადრსა და უსუბს სულ არე-არეზე სიარული, სულ ომი და სისხლისღვრა, დაიღალნენ, დაიქანცნენ, დაიღალა შიკრიკიც და ძმებმა ამირანს უსაყვედურეს:

— შენისა ცოლის გულისთვის სულ ძმები დავილიენითო! რას დავდივართ ტყე-ღრეში, სახლი ჩვენთვის არ არის და თავშესაფარი. დათვსაც თავისი ბუნაგი აქვს, ჩვენ კი, სულკალმასის შვილებს, სულს იქით აღარაფერი შეგვრჩა. მოდით, დავბინავდეთ სადმე და ოჯახებს მოვეკიდოთო.

ამირანი ამჯერად არ შეედავა ძმებს, შიკრიკი დაითხოვა, ხოლო ძმები წაიყვანა და დევების სახლთან მიიყვანა:

— აიქ ჩავიდეთ, უსუბო, გუშინ რომ ქარი ხვიოდა, დევებსა ჰქონდათ ქორწილი, სიმღერა გამოდიოდა.

ძმებმა დაუშალეს, ბევრნი არიან და ვაითუ დავმარცხდეთო, მაგრამ დარეჯანის ძემ არ დაიშალა, თქვენ გამომყევით და მე ვიცო და იმ დევებმაო, — უთხრა ძმებს და ხელი თავის მოკლე ხმაღზე დაიდო.

ეს დევები მართლაც ძალიან ბევრნი იყვნენ, უზარმაზარი ოჯახი ჰქონდათ და უთვალავი ქალ-რძალი და შვილ-შვილიშვილები ჰყავდათ. თვითონ არაფერს აკეთებდნენ, სულ სხვათა ნაძარცვით ცხოვრობდნენ და დღესა და ღამეს ღვინსა და განცხრომაში ატარებდნენ. მივიდა ამირანი დევების სახლის კარზე და უშიშრად გაიარ-გამოიარა. დაინახა ერთმა ქალმა, შეეარდა და დევებს უთხრა:

— აქ ვიღაცა კაცი მოსულა, კარზე დასეირნობს და აინუნშიაც არ აგდებს თქვენს აქ ყოფნასო.

დევებმა თქვეს, ეგ თუ იქნება, დარეჯანის ძე იქნება, აქ



სხვა ვერავინ მობედავდაო, და ქალი ხელახლა გამოგზავნეს, — გადი, ახლოს გაუარ-გამოუარე და გაუცინე. იქნებ თვითონაც გაგიცინოს, შენ კარგად დააკვირდი და თუ ოქროს კბილი გამოუჩნდეს, შემოდი და საჩქაროდ შეგვატყო ბინე, თადარიგი უნდა დაეიჭიროთ, თორემ დარეჯანის ძე ადვილი სასტუმრო კაცი არ არისო.

გამოვიდა დევის ქალი, გაუვლის ამირანს, გამოუვლის და გაუცინებს, ამირანმა ითმინა და ბოლოს უთხრა:

რას მიცინი, დევის ქალო, რას მიელვი თეთრსა პირსა, გამივლი და გამომივლი, გამისინჯავ ბაგე-კბილსა? სომესი ვარ, ტანტრე მქვია, დავკარგე და ვეძებ ვირსა, დღეს დავკარგე, სვალ ვიპოვნი, ჩემი ბედი ასრე სჭრისა.

ქალი შევიდა და დევებს მოახსენა:

— იმ კაცს მართლა აქვს ოქროს კბილი და საცრისხელა ძთვალეები უსხედს. ვირი დაუკარგავს და იმას დაეძებსო.

— ოჰ, დარეჯანის ძე ყოფილაო, — თქვეს დევებმა და საომრად მზადება დაიწყეს, მაგრამ სანამ იარაღს აისხამდნენ, ამირანი თვითონ შეუვარდა, დაიდო ხმალზე ხელი და წაიკაფიავა:

გაჟიკატო, გულოვანო, ღვინის ფერო, მცინარეო, ხმლის სიმოკლე რას დაგიშლის, ფეხი წადგი წინარეო!

დაურია დევებს თავისი მოკლე ხმლით და სულერთიანად ამოჟღობდა. დევების სისხლით სახლი ჭერამდე აივსო, ამირანი სისხლში მოჰყვა, სისხლი გაიყინა, შეკუთდა და სუნთქვა გაუძნელდა. ამირანმა მიძრ-მოძრა მხრები, მაგრამ ამოოდ, სისხლის მორევს ძვრაც ვერ უყო. ამირანს დახრჩობას აღარაფერი უკლდა, მაგრამ სიცოცხლე იმდენად არ ენანებოდა, რამდენადაც ყამარის უნახაობა. ბოლოს დამორჩილდა ბედს და სინანულით ჩაილაპარაკა:

მოვლალე გმირის მარჯვენა ამდენი ომში ქნევითა, ჯაჭვის კალთები დამაცვდა ამდენი სისხლში რევითა, ვაიმე, ქალო, ყამარო, ვერ გავძეხ შენი ხვევითა.

მაგრამ ამირანი ბედისაგან განწირული არ იყო. უცბად სისხლში ერთი დაჭრილი დევი დაინახა, დასწვდა დევს, ესროლა კარს და გატეხა. სისხლს რაკი გზა გაეხსნა, ნიაღვარივით მოსკდა და კარში გამოიღვარა. ამირანმა მხრები გაიბერტყა და თავისუფლად ამოისუნთქა.

ძმებმა გაწმინდეს სახლი, მიაღაგ-მოალაგეს და დაიწყეს შიგ ცხოვრება. ერთხანს ამირანმაც მოისვენა, მაგრამ გული სახლში დიდხანს არ დაუდგა, დღე და ღამე ყამარის ლამაზი სახე ელანდებოდა და იმის უნახაობა მოსვენებას არ აძლევდა. ბოლოს ველარ მოითმინა და ბადრს სთხოვა:

— მათხოვე შენი თეთრონი, ზღვაში გავალ და ყამარს გამოვიყვანო.

ბადრო, მათხოვე თეთრონი, ზღვაში გავიდე ნდგლევითა, გამოვიყვანო ყამარი — ქალია თეთრი მზევითა, თან ყურძენ გამოვაყოლო, ტკბილია დედის რძევითა.

ათხოვა ბადრმა თეთრონი, ძმებიც გაჰყვნენ და წავიდნენ ყამარის მოსაყვანად. ამირანმა ძმები ზღვის პირას დატოვა, თვითონ კი თეთრონზე შეჯდა და ზღვაში შეცურდა. გააპო ზღვა, გავიდა იქით ნაპირზე და გასწია ყამარის მამის სამფლობელოსაკენ. იარა, იარა და ბოლოს ყამარის ბროლის კოშკსაც მიაღდა.

ყამარი ქაჯთ ხელმწიფის ქალი იყო. ქაჯთ ხელმწიფე უმეტესად ცაში ცხოვრობდა. იმხანადაც დედ-მამა ცაში ჰყოლოდა და კოშკში მარტოკა თვითონ იყო, სარკმელთან იჯდა და ჭურჭელს რეცხავდა. ამირანმა თეთრონი სარკმლის ძირას მიაგდო და შესძახა:

— მოვედი, ყამარ-ქალო, შენი მამებარი დარეჯანის ძე, ჩამოდი, შემომიჯექ ცხენზე და ჩემთან წაგიყვანო.

ყამარსაც მოეწონა ამირანი და ჩამოსძახა:

— ამოდი, ცოტახანს შეისვენე, ბარემ მეც მოვრჩები ჭურჭლის დარეცხვას და მერე წავიდეთო.

ამირანმა თეთრონი დააბა და ყამართან ავიდა, ყამარმა დარეცხა ჭურჭელი და ამირანს უთხრა:

— სანამ მე ტანსაცმელს გამოვიცვლი, შენ ეს დარეცხე-

ლი ჭურჭელი ერთმანეთზე დააწყვე, ოღონდ ფრთხილად კი იყავი, არაფერი გაგიტყდეს, თორემ დავიღუპებითო.

ყამარი მეორე ოთახში გავიდა, ამირანი კი ჭურჭლის დალაგებას შეუდგა. აწყობს ამირანი ჯამებს, მაგრამ ერთ ჯამს ვერაფერი მოუხერხა, — რამდენჯერაც პირქვე დადგა, იმდენჯერ გულალმა გადმოუბრუნდა. გაჯავრდა დარეჯანის ძე, დასცა წიხლი ურჩ ჯამს და ნამსხვრევებად აქცია, გატყდა თუ არა ჯამი, ერთი აურზაური გაიმართა, — მთელმა მთელს უთხრა, ნატეხმა ნატეხს, აიშალა მთელი ჯამ-ჭურჭელი და წივილ-კივილით ცისკენ წავიდა, — არიქათ, ყამარს იტაცებენ და ჩქარა მდევარი შეყარეთო!

გამოვიდა ყამარი და ამირანს უთხრა:

— აბა, ჩქარა გავშორდეთ აქაურობას, თორემ მამარჩემი დაგვედევნება თავისი ლაშქრით და ცოცხლები ვერ გადავურჩებითო.

საჩქაროდ ჩამოვიდნენ ძირს, შესდნენ თეთრონზე და გაქუსლეს.

ცოტა გზა რომ გაიარეს, საშინელი ქარიშხალი ამოვარდა, ხეებს სულ ლაწალუწი აუყენა და მიწა-მტვერიც ერთმანეთში არია. ამირანმა მალლა აიხედა და თქვა:

— ცაში ავდრის ნიშანი არაფერი ჩანს და ეს გრიგალი საიდან გაჩნდაო?

— ეს ქარი მამიჩემის ლაშქრის სუნთქვასაო, — უთხრა ყამარმა.

ცოტა გზა კიდევ გაიარეს და ახლა კოკისპირული წვიმა დაუშვა. ისევ აიხედა ამირანმა მალლა და გაკვირვებულმა თქვა:

— დიდება შენდა, ღმერთო, ცაზე ღრუბლის ნასახი არ იბადება და ეს ნიაღვარი საიდან მოდისო?

— ეს წვიმა დედაჩემის ცრემლია, — უთხრა ყამარმა, — ეტყობა, ჩემს დაკარგვას ტირის. აჩქარდი, ამირან, თორემ მამარჩემიც მალე მოგვეწევასო.

ამირან გვალე-გვალესა, მუხლად გაქებენ მალესა, ამბრნი, უმბრნი და არაბნი ცხენს შესხდებიან ჩქარესა, მალედვე მოგეწევიან, ომს აგიტეხენ ცხარესა.

ამირანმა ცხენი ბედენად არ ააჩქარა და ყამარიც დაამ-  
შვიდა:

ამოდ იარე, ყამარო, გზათა ვერ დაჰლევ რბოლითა,  
არა ვარ ტყისა ხოსობი, მომინადირონ ქორითა.  
არცა ვარ ჭალის კურდღელი, რომ დამიჭირონ მწვევრითა,  
არცა ვარ ხისა ფურცელი, გადამიტანონ ქართა,  
მოვლენ და მეც აქ დავხვდები, ამ ჩემი გორდა ხმალითა,  
უსუბითა და ბადრითა, მესამით ამირანითა.  
იმ მამაშენის ლაშქარსა მარტოც ვეყოფი ჯანითა,  
სუყველას თავებს დავაჭრი საპურყველია დანითა.

გამოვიდა ამირანი ზღვას და გამოიყვანა ყამარიც. ცო-  
ტა ხანი და ზღვას ყამარის მამის ლაშქარიც მოადგა ხომალ-  
დებით, გაივსო ჯარით ზღვის ნაპირი. ამირანმა უთხრა  
ბადრს:

— შეკაზმე, ძმაო, შენი თეთრონი, შეჯექ შედ და გაიგე,  
ლაშქრის შემოვლაში რამდენი ხანი დაგჭირდებაო.

ბადრის თეთრონი ისეთი ჩქარი იყო, რომ ერთი დღის  
სავალს, ერთ წამში გაირბენდა, ზღვა და ხმელი მისთვის  
სულერთი იყო. შეკაზმა ბადრმა თეთრონი და ჩავიდა. დაარ-  
ჭო ერთ ადგილას ისარი სანიშნოდ, რომ იქვე მოსულიყო  
და თეთრონი ნიავევით გააქროლა, მაგრამ ყამარის მამის  
მოლაშქრე ქაჯებმა ისარი ამოაძრეს და უკან გამოუდგნენ,  
არბინა ბადრმა თეთრონი რაც ძალი და ღონე ჰქონდა, არბი-  
ნა ცხრა დღე და ღამე, მაგრამ თავისი დარჭობილი სანიშ-  
ნო ისარი ველარსად ნახა, დაღლილ-დაქანცული ამირანთან  
დაბრუნდა და უთხრა:

ცხრა დღე მივლია, ცხრა ღამე, გარსა ვერ მომირბენია,  
ამ ჩემი თეთრონისთვისა ოფლი არ შემისრენია,  
ამ ჩემი მათრახისთვისა ფოჩი არ შემირჩენია.

— მაშ მე თვითონ წავალო, — თქვა ამირანმა და შეჯდა  
თეთრონზე, ჩავიდა ყამარის მამის ლაშქართან, დაარჭო  
ისარი და თეთრონი გააფრინა, მივარდნენ ეშმაკები ამი-

რანის ისარსაც, ეჯაჯგურნენ, მაგრამ ძვრა ვერ უყვეს. შემოურბინა ამირანმა ერთ წამში ლაშქარს და დაბრუნდა ძმებთან. უთხრა უსუპს:

— უფროსი ხარ და პირველი ჩასვლა შენ გეკუთვნის, ჩადი, იომე და, რომ გაგიჭირდება, ჩვენც ჩამოგეშველებითო.

ჩავიდა ვაჟი უსუპი, ჩავიდა და ჩაზვერა ლაშქართ სიმრავლე, მერე შეუტია ჯარს და სულ სისხლის წყალი გაადინა. იომა სასელიანად, გაანახევრა ჯარი, მაგრამ სიმრავლემ დაღალა და თვითონაც დაეცა. ამირანს გულმა უგრძნო უსუპის სიკვდილი და ბადრს უთხრა:

ან ჩადი, ბადრო, ან ჩავალ, ან შემეიკაზმე შენ ცხენი, უსუპის მუზარადისა აღარ ამოდის ნათელი.

ამირანს წესად ჰქონდა, ომში რომ შევიდოდა, ან უნდა გაემარჯვა ან მომკვდარიყო. სწორედ იმიტომ არ უნდოდა პირველად ჩასვლა, რომ ბადრი მარტო დარჩებოდა. ასე ფიქრობდა: მე რომ გადავრჩე, იქნებ რამე ვარგო და ძმები ისევ გავაცოცხლო, ბადრი კი ვერაფერს გასდება და სამივენი უძებრად დავიღუპებითო. კიდევ უთხრა ბადრს:

ან ჩადი, ბადრო, ან ჩავალ, ან გამიღესე ხმალია, ჩავალ და ველარ ამოვალ, ვაიმე, შენი ბრალია!

შეჯდა ბადრი თეთრონზე და ჩავიდა. იომა იმანაც გმირულად, გაანახევრა დარჩენილი ლაშქარი და თვითონაც მტერს შეაკვდა. ყამარმა უთხრა ამირანს:

— მომეცი შენი აბჯარი და მე თვითონ ჩავალ, თორემ შენც რომ მოგკლან, მე რალა მეშველებათ.

— რას ამბობ, ქალო, — გაუწყრა ამირანი, — რა შენი საქმეა ხმალი და ბრძოლა, ხმლიანი მე ვარ და ჩასვლითაც მე ჩავალო.

— მაშ, რაკი არ იშლი, ეს ერთი თხოვნა მაინც ამისრულე, — უთხრა ყამარმა, — ომიდან რომ გამოსვალ, ხმალს ქარქაშში ნუ ჩააგებ და ჩემთან ხმალამოწვდილი მოდიო.

ყამარს ამით უნდოდა, რომ ამირანი არ გაბრიყვებულიყო და, თუ კიდევ რაიმე ხიფათს შეემთხვეოდა, ხმალამოწვდილი მარჯვედ დახვდებოდა.

ჩავიდა ამირანი საომრად და ჩაიკაფიავა:

ასრი-ბუსრი ხარ, ამირან, გელარძი ხარ გაბრუნებული, ასნი რად უნდან დედასა, ერთი ჯობს დაღურბლებული.

ჩავიდა და ჩაანასევრა ქაჯების ლაშქარი. გავიდა ბოლოში, შემობრუნდა უკან და გაუსრ და გამოუსო კვლავ მოკლე ხმალი მარჯვნივ და მარცხნივ, კაფა და კაფა ქაჯების ლაშქარი, გასწყვიტა სულერთიან და ბოლოს ყამარის მამას შეება. შეუტიეს ერთმანეთს სიძე-სიმამრმა. სცეს ხმალი და ფარიც მარჯვედ იფარეს. ორივეს ბექთარი ეცვა და ხმალი ვერცერთს ვერ ჭრიდა, ამირანის ხმალი ყამარის მამის მუზარადს რომ მოხვდებოდა, ბლუჯა-ბლუჯა ნაპერწყლებს აყრევიანებდა, ამირანის ხმალი რომ მოხვდებოდა, ყამარის მამის მუზარადი ცეცხლივით აინთებოდა, ხოლო ჯაჭვი გველივით წიოდა. უყურებდა ყამარი მამისა და ამირანის ბრძოლას, ხედავდა, რომ ამირანს უჭირდა ქაჯთ ბატონის დაძლევა. ეწყინა ყამარს საქმროს უგერგილობა და ამირანს შეუძახა:

ამირან, ცოლ-დედა მკვდარო, ომი ვერ იცი კილოსა, მალლა კი ნუ სცემ სპილოსა, დაბლა შემოჰკარ რბილოსა, დააწყებდიან ძარღვები, დაეცემიან ძიროსა. არ იცი, ბოძნი რომ დაეჭრებიან, დარბაზნიც დაეცემიანო.

გაიგონა ქალის სიტყვები მამამ და დაჰგმო ყამარი:

— რატომ დედაშენს შობამდე არ გაუწყალდი მუცელში, ან რატომ ძალღად არ დაიბადე, ის უფრო ერთგული და მოსიყვარულე იქნებოდა. შენ კი რა გამოხვედი, რომ ასლავე მამას ქმარი ირჩიეო.

უყურეთ კახპას ქალასა, ქმარი ირჩია მამასა. . . .  
ქმარი ხეს ასხავს ფოთლად, მაგრამ ვინ მისცემს მამასა,

რისთვის გაგზარდა დედამა, რისთვის გეტყოდა ნანასა,  
რად გაწოვებდა ძუძუსა, გირწებდა აკაენასა?

ყამარმა ამაზე მამას უპასუხა:

არცრა გამზარდა დედამა, არცრას მეტყოდა ნანასა,  
მიმაგდის სახლის ყურეში თაგვების ანაბარასა,  
დამსუამდით დავიწყებულსა, დამალირებდით დანასა.

— მაგას გაზრდას ეძახით, ტირილით რომ მოვმკვდარი-  
ყავი, ერთხელაც არ მომხედავდითო.

დაიჯერა ამირანმა ყამარის რჩევა, შემოჰკრა ხმალი  
ქაჯთ ბატონს ფეხებში და წააქცია. აკუწა ხმლით და გა-  
მარჯვებული ხმალდახმალ გაბრუნდა ყამარისაკენ. გზაზე  
ერთი დაჭრილი ქაჯი შემოხვდა, ნახა ხმალამოწვდილი ამი-  
რანი და დაუძახა:

სად მიხვალ ხმალამოწვდილი, ამირან თარაქამო,  
გაწყვიტე ცოლეულები, ვინ გითხრა ბარაქალაო?

— შენ რომ ვაჟკაცი იყო, ქალისკენ არ წახვიდოდი,  
ხმალს ჩააგებდი და ჯერ შენი გულისთვის დახოცილ ძმებს  
მონახავდიო.

შერცხვა ამირანს, ჩააგო ხმალი და წავიდა ძმების საძებ-  
ნელად. მოაგონდა უსუპის სიტყვები: შენი ცოლისა გულის-  
თვის მთლად ძმები დავიღუპენითო, და გულში თქვა: მაცა-  
ლეთ, ძმებო, მაინც გიპოვით, თუ ცოცხლები იქნებით, მეც  
თქვენთან ერთად გავიხარებ, თუ არა და, სამარეს გავითხრი  
და თქვენს გვერდით დავიმარხებიო. ეს თქვა ამირანმა და  
გავიდა ბრძოლის ველზე, ველი თავიდან ბოლომდე მკვდრე-  
ბით იყო მოფენილი, მძორს ნადირი და ყვაყ-ყორანი მისეო-  
და და გაჰქონდა ერთი ღრენა და ყაპყაპი. იარა ამირანმა  
მკვდრებში და ბოლოს იპოვა მკვდარი უსუპი, აიყვანა ხელ-  
ში და ახლა ბადრის საძებნელად წავიდა, იპოვა ბადრიც,  
რა თქმა უნდა, ისიც მკვდარი, ღააწყო დახოცილი ძმები ერ-  
თად და ჩასძახა:

— არ დამემდუროთ, ძმებო, თქვენ თუ თავი დასდეთ ჩემი გულისთვის, არც მე გიღალატებთ და ასლავე ზედ დაგაკვდებითო.

ამოიღო ამ სიტყვებით თავისი მოკლე ხმალი და დაიცა გულში, მაგრამ ხმალმა კანიც არ გაუჭრა. დაჯდა ამირანი და დაიწყო ტირილი, — სიკვდილიც აღარ მეღირსა თქვენთან, რა შევცოდე ისეთი, რომ ღმერთი ჩემთვის სიკვდილსაც არ იმეტებსო.

ამ დროს ერთმა დაჭრილმა ქაჯმა წამოიწია და დაიძახა:

— ადექით, მკვდრებო, ეს რა საკვირველება ვიხილეთ ამირანს თავის მოკვლა გადაუწყვეტია, დაიცა კიდევ ხმალი გულში, მაგრამ არ გაჭრა. ამირანი ისეთი რეგვენი ყოფილა, რომ ისიც არ სცოდნია, თავი როგორ უნდა მოიკლას, რად უნდა ხმალი, მარცხენა ხელის ნეკათითი მოიჭრას და მოკვდებო.

ამირანმა გაიგონა ქაჯის ნათქვამი და იმავე წამს მოიჭრა ნეკათითი. უდინა სისხლმა თითიდან, უდინა და ამირანიც ძმებთან მიწვა. სიკვდილის წინ ამის თქმალა მოასწრო

სამთა ფრთაწვრილთა ფრინველთა ალგეთის ჭალა მოეველა, უძმოსა, უმამიძმოსა, ამირანს თავი მოეკლა.

გაიგო ყამარმა ამირანის სიკვდილი, მოვარდა და დაიწყო ტირილი. ზის და ტირის ყამარი, იმისი ცრემლი ზღვას ერთვოდა, იმისი მოთქმა ცასა სწვდებოდა და ცოდვით ხეებს ფოთოლი სცვიოდა.

ამ გლოვასა და მოთქმა-ტირილში რომ იყო ყამარი, უცბად ერთი თავი გამოძვრა და დაუწყო ამირანის სისხლს ლოკვა. მოუვიდა გული ყამარს, გაიძრო ქოში, ესროლა თავს და სული გააფრთხობინა. გამოვარდა ახლა თავის დედა და ყამარს მისდგა, — აი, შე ასეთ-ისეთო, შენი გულისათვის ამდენი ხალხი გაწყდა, მამა აღარ შეგარჩა და ქმარ-მამულები, იმის მაგივრად, რომ სირცხვილი გწვავდეს, მკვდრებს კიდევ მკვდარს უმატებო. ბრალი შენი, თორემ მე ჩემს შვილს ისევე გავაცოცხლებო.



ესა თქვა თავგვმა, გაეარდა მინდორში, მიირბინ-მოირბინა და რალაც ბალახი იპოვა, მოწყვიტა ბალახი, მოიტანა, მიუსვ-მოუსვა თავის მკვდარ შვილს და გააცოცხლა. ადგა ყამარიც, მოწყვიტა იგივე ბალახი და ამირანს მოუსვა. გაცოცხლდა ამირანი, ადგა, მოიფშენიტა თვალები და თქვა: — ოჰ, რა ბევრი მძინებიაო.

— ბევრი მაშინ გეძინებოდა, თუ თავგი არ გამომძვრა-ლიყო და შვილი არ გაეცოცხლებინაო, — უთხრა ყამარმა, მერე ყველაფერი დაწვრილებით უამბო, რაც მოხდა. მოწყვიტეს ამირანმა და ყამარმა იგივე ბალახი, გააცოცხლეს ბადრი და უსუპიც და სიმღერით გასწიეს თავიანთი სახლისაკენ:

ნეტავი ძმათა მრავალთა, მზე ცსრაგნით ამოუხდება,  
ვერც ვინ წაართმევს დიაცსა, ვერც ვინ შინ შემოუხდება.

გავიდა ხანი, ამირანი სულ ახალ და ახალ საგმირო საქმეებს ჩადიოდა. ბევრი სახელგანთქმული დევი და გველეშაპი გამოასალმა წუთისოფელს, ბევრ მოძალადეს შეუკრა ხელ-ფეხი და აადებინა ხელი სხვათა ძარცვაზე. გაუვარდა სახელი ამირანს, ქვეყანაზე იმისი მომრევი აღარავინ იყო. მხოლოდ ერთი სახელგანთქმული ფალავანი ამბრი არსად შესვედროდა, ამირანი სულ იმის შესვედრას ნატრობდა და შორიდან მუქარასაც კი უბარებდა.

ერთხელ ამირანი სალაშქროდ იყო დევების ქვეყანაში, იქიდან რომ ბრუნდებოდა, გზაში თორმეტულელ ხარ-კამეჩს შესვდა. თურმე სახელოვანი გმირი ამბრი მომკვდარიყო და დედას დასამარხად მიჰქონდა, იღო ურემზე და თორმეტი უღელი ხარ-კამეჩი ძლივძლივობით სძრავდა. ამბრის ცალი ფეხი გადმოვარდნოდა ურმიდან, დაბლა მოსთრევედა და მიწას საორბირე გუთანივით მიჰკვალავდა.

ამბრი მიჰქონდა ურმითა თორმეტულელა ხარსაო,  
გადმოვარდნოდა ბარკალი, მიწას მიჰხნავდა მყარსაო.

ურემს ამბრის დედაც გვერდით მიჰყვებოდა. დაინახა ამირანი, მოინდომა გამოცდა და დაუძახა:

— დარეჯანის ძევ, ჩემს შვილს ბარკალი გადმოუვარდა ურმიდან, მიწაზე ეთრევა, უპატიური ხდება და, დედაშვილობას, ასწიე და ისევ ურემზე დადევით.

მივიდა ამირანი, დაეჯავჯურა ამბრის ბარკალს, მაგრამ ძვრაც ვერ უყო, თორემ ურემზე შედებას ვინ იტყოდა;

ამბრი მასთრევდა დედასა, ურემში ება ხარები, ამირანმ მაგის ზიდილსა, ასო აიგდო, მხარები.

ამბრის დედამ დატუქსა ამირანი:

იგი ქვეყანამც კრულია, სადაც შენ ამირანობდი, თავს ისურავდი ჩაჩქანსა, ბოლოზე ჯაჭვიანობდი. წესი რომ იყოს დედათა, ადვილად გინადირებდი, მოგკრავდი მათრახს წვერასა, ცის კიდელ-კიდელ გაგრევიდი, ღმერთმა ხომ იცის, ამირან, ამბრის ვერ ედარებოდი, ვერც სმაში, ვერცა ჭამაში, ვერც ომში ეტოლებოდი, მკედარმა გაჯობა ცოცხალსა, ცოცხალს რას ედავებოდი? თუ მაგის მეტი არ იყავ, ჩემს შვილს როგორღა მტერობდი?!

გაწბილდა და დაღონდა ამირანი, მიწა რომ გახეთქოდა და შიგ ჩავარდნილიყო ის ერჩია, მზისაცა სცხვენოდა, კაცისაც და გულს ჯავრი და ბოღმა უკლავდა.

ჯავრი და გულის ვარამი დღეს უბნელებდა მზიანსა, სიცოცხლეს ჰგმობდა, სიკვდილსა ნატრობდა ნამუსიანსა.

ველარ გაუძლო ამირანმა სირცხვილს, დატოვა მზიანი ქვეყანა, ჩაჯდა საბნელოსა და სიახლოვეს აღარავის იკარებდა.

საბნელოს ჩაჯდა ამირან, შემოიკრიფა ფეხები. თუ ამის მეტი არა ვარ, სამზეოს რას ვეხეტები?!

გაიგო ნათლია ღმერთმა ამირანის გასაჭირი და კიდევ მიუმატა სამი ადიდებული წყლის ღონე და სამი დიდი ზეპანის სიძარდე და შეუპოვრობა. თან დააარიგა:

— ღონეს გაძლევი, მაგრამ იცოდე, ავზე და უკეთურ საქმე

მეებზე არ მოიხმარო, თორემ ისევ გაწბილდები და სირცხვილში ჩავარდებიო.

მაგრამ ამირანს დიდხანს არ გაჰყვა ნათლიის დარიგება, რაკი ღონე მოემატა, მალე დაავიწყდა და თვითონ დაიწყო ძალმომრეობა. ბოლოს ისე გათამამდა, რომ ნათლიასაც აღარ ერიდებოდა, დადიოდა და სულ იმას გაიძახოდა, — ნეტავი კი ერთხელ ის ჩემი ნათლია დამჭიდა. ამდენი ღონე რომ მომცა, მეცადა მაინც რა კაციაო.

ერთხელ მართლაც შეხვდა ღმერთი ამირანს. ამირანმა უთხრა:

— ნათლიავ, შენ იმდენი ღონე მომეცი, რომ ქვეყანაზე ჩემი მომრევი არავინ არის, მოდი, რაც იქნება, იქნება, მეჭიდუ და ერთხელ ღონე შენზედაც მაცდევინეო.

— ამირან, ჭკვიანი კაცი ხარ და მაგდენი როგორ არ იცი, რომ ნათლიას არ უნდა ეჭიდავო, — უთხრა ღმერთმა.

მაგრამ ამირანმა არ დაიშალა, დაიჟინა, გინდა თუ არა, უნდა მეჭიდოო.

მაშინ — ღმერთმა აიღო თავისი საღმრთო არგანი და უთხრა:

— მაშ კარგი, რახან არ დაგიშლია, მოდი, ასე ვქნათ: მე ამ ჯოხს მიწაში დავარტობ და, თუ ამოაძრობ, გამარჯვებული შენ იყავიო.

— კარგიო, — დათანხმდა ამირანი.

— დაარტო ღმერთმა ჯოხი, მივიდა ამირანი და ხელის ერთი გაკვრით ამოაძრო, დაარტო მეორედ — ღმერთმა ჯოხი და ამირანმა მეორედაც ასევე ადვილად ამოაძრო. დაარტო მესამედ ღმერთმა თავისი ჯოხი, გადასახა ჯვარი და უბრძანა, — ისეთი ფესვი გაიდგი, რომ მთელ დედამიწას ირგვლივ შემოსწვდესო.

დაეჭიდა ამირანი ჯოხს, მაგრამ ძვრაც ვერ უყო, ან რას დასძრავდა, როცა ფესვებით დედამიწაზე იყო შემორტყმული. მაშინ დასწყევლა ღმერთმა ამირანი, საყვერის ჯაჭვით იმ ჯოხზე დააბა და თავზე გერგეტის მთა და ყაზბეგის ყინულიანი მწვერვალი დაადგა.

არის მას შემდეგ ამირანი იმ ყინულიან კლდეში მიჯაჭვული, — ღმერთისაგან დღეში ერთი პური და ერთი ხელადა

ღვინო აქვს საზრდოდ დანიშნული და იმით საზრდობს. ღმერთმა ამირანს ერთი გოშიაც მისცა, ეს გოშია ყორნის ნაშობია და ამირანს ერთგულად ემსახურება: დაკანგებულ ჯაჭვს დღე და ღამე შეუსვენებლივ ლოკავს და აწვრილებს, ჯაჭვი მივა გაწყვეტაზე, გაესხნება ამირანს გული, ისევ თავისუფლებისა და მზიან ქვეყანაზე დაბრუნების იმედი გაუნდება, მაგრამ წყეული მჭედლები დიდსუთშაბათ დილას გრდემლზე კვერს დაჰკრავენ და ჯაჭვი ისევ მთელდება.

იმედგაწყვეტილი ამირანი მწარედ ამოიოხრებს, მაგრამ ღმერთი მარტო ამ სასჯელს არ აკმარებს და ახლა მშიერ არწივს მიუსევს. არწივი უმოწყალოდ უკორტნის გულს ამირანს და სისხლის ნიაღვარს ადენს. ამირანს თავისი მოკლე ხმალიც გვერდით უდევს, მაგრამ ჯაჭვი იქამდე არ უშვებს, ითმენს ამირანი არწივის კორტნას, ითმენს და რომ ვეღარ მოითმენს, ერთს საზარლად დაიყვირებს. ამირანის ყვირილზე მთელი მთა-ბარი შეინძრევა, ცა დაიქუსებს, ზეავები გუგუნ-გრიალით დაეშვებიან უფსკრულებისაკენ, ყინვა გატყდება და ღელე-ხეობები შავფაფარაყრილი მდინარეებით აივსებიან.





## ორი ძმა

იყო და არა იყო რა, ღვთის უკეთესი რა იქნებოდა, იყო ერთი ღარიბი კაცი. დადიოდა ტყეში, იჭერდა ჩიტებს, ყიღა და თავს იმით ირჩენდა.

ერთ დღეს ერთი უცნაური ჩიტი დაიჭირა. წაიყვანა ბაზრობაზე და აატარ-ჩამოატარა. ნახა ერთმა მდიდარმა სოვდაგარმა ჩიტი და კაცს უთხრა:

— ას თუმანს გაძლევ და მომეციო.

ღარიბმა კაცმა იფიქრა, ეს ვილაც გიყიათ, მისცა ჩიტი სოვდაგარს, გამოართვა ასი თუმანი და უკანმოუხედავად მოკურცხლა, — ემანდ ფული უკანვე არ მომთხოვოსო.

წამოიყვანა სოვდაგარმა ჩიტი და მოიყვანა შინ. ამ ჩიტს ორივე ფრთაზე თურმე არაბული წარწერები ჰქონდა. სოვდაგარს არაბული ენა სცოდნოდა და ეს საიდუმლო წარწერები ამოეკითხა. მარჯვენა ფრთაზე ეწერა: ვინც შემჭამოს, ხელმწიფედ დაჯდეს, ხოლო — მარცხენაზე, ვინც შემჭამოს, ჯიბე ფულით საესე ჰქონდესო.

სოვდაგარს ორი ვაჟიშვილი ჰყავდა და ეს ჩიტი სწორედ მათ ბედობაზე იყიდა, მაგრამ საიდუმლო არც ცოლს და არც შვილებს თავის დრომდე არ გაუმხილა.

ერთ დღეს სოვდაგარი ხელმწიფემ დაიბარა და უცხო ქვეყანაში სავაჭროდ წასვლა უბრძანა. წასვლის წინ სოვდაგარმა ცოლს უთხრა:

— ხელმწიფე უცხო ქვეყანაში სავაჭროდ მგზავნის, არ

ვიცი, როდის დავბრუნდები. ჩემს დაბრუნებამდე იმას ვთხოვ, ეს ჩიტი და ჩენი ბიჭები კარგად შემინახო.

ცოლი ფიცით შეჰპირდა, ასე ვიზამო, მაგრამ გაუწყობა ღმერთი და ერთი გაიძვერა ვაჭარი შეიყვარა.

ამ ვაჭარმაც იცოდა არაბული ენა და ერთ დღეს ჩიტის ფრთებზე საიდუმლო წარწერები ამოიკითხა. საჩქაროდ სახლში წავიდა, ჩაწვა ლოგინში და სოვდაგრის ცოლს შეუთვალა:

— ჩემი დღე და საათი დათვლილია. თუ თქვენს ჩიტს დაკლავ და იმის ხორცს მაჭმევ, მოვრჩები, თუ არადა — მოვეკვდებიო.

ქალმა მსახურს უბრძანა, ეს ჩიტი საჩქაროდ დაკალი და კარგად შემიწვიო.

მსახურს დიალაც არ უნდოდა ჩიტის დაკვლა, მაგრამ რას იზამდა, დაკლა ჩიტი, გაპუტა და დადო ტაფაზე. მივიდნენ სოვდაგრის ბიჭები და სთხოვეს, გვაჭამეო, მსახურმა თქვა, ეს უცხო ჩიტი, ჩემი ბატონის შვილებზე უფრო უპირანიო და, ერთი ნახევარი ერთს მისცა, მეორე ნახევარი — მეორეს, ვაჭრისათვის კი იმ ჩიტის ტოლა ვარია დაკლა და თავის ქალბატონს ის გაატანა.

შეჭამა ვაჭარმა ვარია. იმას, რა თქმა უნდა, ჩიტი ჰგონია, მაგრამ არც ფული გაუჩნდა და არც ხელმწიფობას ვინმე აძლევს. ვაჭარი დაექვდა, ეწვია საყვარელს და ნახა, რომ მტს ბიჭს ერთს ფულით გატენილი ჯიბეები აქვს და მეორეს სამეფო ნიშნები ატყვია. ვაჭარი მიხვდა, რომ ის ჩიტი მათი შეჭმული იყო და შურით გული გაუსივდა. საჩქაროდ დაბრუნდა შინ, დაიბარა ერთგული მსახური და უთხრა:

— თუ პატივი და სიმდიდრე გინდა, ახლავე წადი, მავანი და მავანი სოვდაგრის ბიჭები ტყეში გაიტყუე, დახოცე და იმათი გულ-ღვიძლი აქ მომიტანეო.

მსახურმა, გალესა ხანჯალი და წაიყვანა ბიჭები ტყეში.

მსახურს არ ემეტება სასიკვდილოდ ეს ანგელოზებივით ბავშვები და გულამოსკენით ტირის, ბიჭები გაკვირვებით ეკითხებიან, — რა გატირებსო, — მაგრამ მსახური ხმას არ იღებს, ტირის და ჩამოსდის ცრემლი ღვაკად. ამ დროს შე-

მოსვდათ ერთი მეცხვარე, იმასაც გაუკვირდა მსახურის ეს უცნაური საქციელი და ჰკითხა:

— რა იყო, კაცო, რა გასაჭირი გადგას ასეთი, რომ ტირილით თავს იკლავო?

მსახურმა საიდუმლოდ გაანდო მეცხვარეს, რაზეც ტიროდა და სთხოვა, მისხენი ამ ცოდვისაგან თუ რაზე შეგიძლიათ.

— შემიძლია და გიხსნი კიდევცო, — უთხრა მეცხვარემ, — მოდი, ეს ბიჭები მე დამიტოვე, ცხვარში გამომადგებიან, შენ კი ორ თიკანს დაგიკლავ და შენს ბატონს ის წაუღეო.

ვაჭრის მსახურს მოეწონა მეცხვარის ნათქვამი და სიხარულით დათანხმდა. მეცხვარემ დაკლა ორი თიკანი, ამოაცალა თბილი გულ-ღვიძლი და გაატანა, ბიჭები კი თავისთან დაიტოვა.

წამოიღო მსახურმა თიკნების გულ-ღვიძლი და მოუტანა თავის ბატონს, ვაჭარმა შეჭამა, მაგრამ ფულსა და ხელმწიფობას ვერც ახლა ეღირსა.

გავიდა ხანი, მეცხვარესთან დარჩენილი ბიჭები დაიზარდნენ და კარგი თვალ-ტანადი ვაჟაკებიც დადგნენ. ერთს სულ ხელმწიფური შესახედობა აქვს, მეორეს კი — ფულით გატენილი ჯიბეები. ძმებმა ერთ დღეს მოილაპარაკეს: ჩვენ ასე ყოფნა არ გამოგვადგება, უნდა წავიდეთ და საჩვენო ბედი ვეძებოთო. მისცეს მეცხვარეს უამრავი ფული, გამოემშვიდობნენ და წამოვიდნენ.

იარეს ძმებმა, იარეს და ბოლოს ერთ გზაჯვარედინს მიადგნენ. გზაჯვარედინზე დიდი ქვა იდო და ზედ ეწერა:

მარჯვნივ წახვალ, ნათლით ივლი,

მარცხნივ, ბნელი გზებიაო.

უმცროსმა ძმამ უთხრა უფროსს:

— მოდი, შენ მარჯვნივ წადი, ფული არა გაქვს და ნათლით მაინც იარე, მე კი ფული გამოუღეულად მაქვს და ბნელი გზითაც რომ წავიდე, თავს ადვილად გავიტანო.

ძმებს წელზე მამის ნაჩუქარი ერთნაირი ქამრები ერტყათ. გამომშვიდობებისას ერთმანეთს უთხრეს: — რაც არ უნდა გავგიჭირდეს, წელიდან ამ ქამრებს ნუ მოვიშორებთ

და თუ როდესმე ერთმანეთს შევხვდებით, ამით ვიცნობთო, გადაკოცნეს ერთმანეთი და უფროსი მარჯვნივ წავიდა, უმცროსი — მარცხნივ.

იარა უფროსმა ძმამ ნათელი გზით, იარა და ბოლოს ერთ სახელმწიფოში მივიდა. იმ ქვეყნის ხელმწიფე უძეოდ მომკვდარიყო, შემცვლელი აღარავინ დარჩენოდა და ახლა ვინმე უნდა აერჩიათ. უფროსი ძმა სწორედ ამ დროს შევიდა ქალაქში. ხალხს ძალიან მოეწონა თვალადტანადი ვაჟკაცი და იმავე დღეს თავიანთ ხელმწიფედ დასვეს.

უმცროსმა ძმამაც იარა ბნელი გზით და გავიდა ბნელეთის ქვეყანაში. მივიდა ერთ ბებერთან და ღამის გათევას სთხოვა.

დედაბერმა შეამჩნია, რომ ბიჭს ჯიბეები ფულით ჰქონდა და სავსე და პირდაპირ ხელმწიფესთან გაიქცა, იფიქრა, ეს ბიჭი მალე წავა, ხელმწიფეს კი ბატივში ვეყოლებიო, და სხაბასხუბით ჩამოუკაკლა: — ჩემთან ერთი უცხო ჭაბუკი მოვიდა, ჯიბეები სულ ოქროს ფულებით აქვს დატენილიო.

ბნელეთის ხელმწიფე ძალიან ხარბი იყო, ერთი მახინჯი ქალიშვილი ჰყავდა, ისიც თავისავით ხარბი და გაწუწუკებული. ფულის ხსენებაზე მამა-შვილმა თვალები ჭყიტა. აფრინეს ნაზირ-ვეზირები და ბიჭი სასახლეში მოაყვანინეს. ხელმწიფემ ბღვერით შეხედა უმცროს ძმას და უთხრა:

— ჩვენ ასეთი წესი გვაქვს: — ყველა უცხოელს, ვინც ჩვენს მიწაზე ფეხს დაადგამს, ბაჟს ვახდევინებთ და ეს წესი შენც უნდა აასრულოო.

— რამდენი მოგართვათო? — ჰკითხა ბიჭმა.

— რაც ჩემს ჯარს ერთ წელიწადს საჭმელად ეყოფაო, — მიუგო ხელმწიფემ.

— მომიტანეთ სამყოფი ჭურჭელი და აგვივებთო, — უთხრა ბიჭმა. მოატანინა ხელმწიფემ ათი უზარმაზარი საცალო და ბიჭს წინ დაუწყო. გაავსო ბიჭმა ათივე საცალო და ხელმწიფეს შეუთვალა:

— თქვენი ბრძანება შესრულებულია, მობრძანდით და ჩაიბარეთო.

გამოვიდნენ ხელმწიფე და იმისი ქალიშვილი, ნახეს, სწა



ქალოები ბირთამდე სავსეა, მაგრამ ბიჭის ჯიბეებს არაფერი ემჩნევა, — ისევ ფულით არის დატენილი. გაუკვირდა ქალს ძალიან და მამას უჩურჩულა:

— მოდი, ამ ბიჭს ნულარ გავუშვებთ და ფული სულ გამოვლევლად გვექნებაო.

მამა დათანხმდა.

ქალმა უმცროსი ძმა იმავე საღამოს ვახშმად დაპატიჟა. ბიჭი ეწვია, აბა, რა ექნა, ხელმწიფის ქალიშვილს უარს ხომ ვერ აკადრებდა? ქალმა კარგი სუფრა გაუშალა, საუკეთესო ღვინო დალევინა და ცოტა რომ დაათრო, შეაპარა:

— დარჩი ჩვენთან, ცოლად შემიერთე და შენც ბედნიერი იქნები და მეცო.

ბიჭს კინალამ გულს შემოეყარა, — ისეთი მახინჯი და ულამაზოა ეს ქალი, ისეთი, რომ კაცს შეხედვა გაუჭირდება. ბიჭმა უარი უთხრა, ვერ დავრჩებიო.

ეს ქალი ჯადოქარიც იყო, აბა, ბნელეთის ხელმწიფის შვილი რა იქნებოდა! აბა, უარი მაკადრეო? შეულოცა ბიჭს და გულ-ღვიძლი ამოაცალა.

დარჩა ბიჭი ცოცხალ-მკვდარი, სული კი უდგას, მაგრამ არსად წასვლა აღარ შეუძლია. მამა-შვილი ყოველდღე აკითხავდა, უცარიელებდა ჯიბეებს, მაგრამ მეორე დღეს ისევ ოქროს ფულით დატენილები ხვდებოდათ.

ასე გაატარა უმცროსმა ძმამ რამდენიმე წელიწადი. ერთხელ ქალაქში ჯადოქრები მოვიდნენ და ცეკვა-თამაში გამართეს. მთელი ხალხი მათი სანახაობის საყურებლად გარბოდა. გაიგო ამ ბიჭმა ჯადოქრების ჩამოსვლა და იფიქრა, ცოტა გულს მაინც გადავაცოლებო. გაჭირვებით ადგა, გამოვიდა მიწურიდან და ბარბაც-ბარბაცით ქალაქის მოედნისაკენ წახანხალდა. მოჰკრა თვალი ჯადოქრების უფროსმა ბიჭს და ჰკითხა:

— კაცო, რა მოგსვლია, ასე რამ დაგადამბლავაო?

ბიჭმა ყველაფერი დაწვრილებით უამბო. მაშინ ჯადოქრების უფროსმა უთხრა: — რას მომცემ, რომ ამ სატანჯველიდან დაგიხსნაო?

— სხვა არაფერი მაქვს და ფულს კი იმდენს მოგცემ, რამდენის ზიდვასაც შესძლებო, — უთხრა ბიჭმა.

— მაშ, ყური მიგდე, — უთხრა ჯადოქარმა ბიჭს, ერთი მოზრდილი ანკესი და პატარა ყველის ნატეხი მისცა და დაარბია, — ბნელეთის ხელმწიფის ქალი კუდიანია და ჭიაკოკონობა ღამეს კატად გადაიქცევა, მოვა შენს მიწურთან და საცოდავად დაიწყებს კნავილს, შენ შიგნით არ შეუშვა, თორემ თვალებს ამოგჩიჩქნის, ეს ანკესი ყველის ნატეხში გაახვიე და კარის ღრიჭოდან გადაუგდე. ყველს რომ გადაყლაპავს, ანკესიც თან ჩაპყვება, შენ მაშინვე ამოსწიე, შენი გულ-ღვიძლი ამოაცალე და საჩქაროდ გადაყლაპე. როგორიც იყავი, ისევ ისეთი გახდები. შენს გულ-ღვიძლს კატის ენაც თან ამოპყვება, აიღე. ის ენა, დაარტყვი ქალს და რადაც გინდა, იმად აქცევო.

მისცა ბიჭმა ჯადოქართა უფროსს იმდენი ფული, რამდენის წაღებასაც შესძლებდა, და ხანხალით ისევ თავის მიწურში დაბრუნდა. დადგა კუდიანების ღამეც. შუალამეა. ჩამიჩუმი არ ისმის. ბიჭი ზის სულგანაბული და კატის მოსვლას მოელის. მართლაც, შუალამე რომ გადავიდა, კარებთან საცოდავი კნავილი გაისმა, ერთხელ, ორჯერ, სამჯერ. ბიჭმა ჩამალა ყველის ნატეხში ანკესი და კარის ღრიჭოდან გადაუგდო. კატა ეცა და გადაყლაპა, ძაფი რომ დაიჭიმა, ბიჭმა გამოსწია და კატას მუცლიდან თავისი გულ-ღვიძლი ამოაცალა. გულ-ღვიძლს კატის ენაც თან ამოპყვა. ბიჭმა საკუთარი გულ-ღვიძლი გადაყლაპა და ისევ საღ-საღამათ ჭაბუკად გადაიქცა. დაიჭირა ხელში კატის ენა, გამოვარდა კარში, გადაპკრა კატას და ჯორად აქცია, შეჯდა იმავე წამს ზედ, გადაუჭირა რცხილის სახრე და ბნელეთის ქვეყნიდან უკან მოუხედავად მოკურცხლა. გამოვიდა ისევ ნათელ ქვეყანაში და გასწია ძმის საძებნელად. დადის ეს ბიჭი თავისი ჯორით ქალაქ-ქალაქ, ფული გამოუღველად აქვს და სადაც დუქანი მოეწონება, ყველგან კაი დროს ატარებს. თუ ჯორით მგზავრობა მობეზრდება, ენა ჯიბეში უდევს, ამოიღებს, დაარტყამს ჯორს და ცხენად აქცევს, ცხენი მოსწყინდება, კვლავ ჯორად ან აქლემად გადააქცევს და დადის არსენიანად.

ერთხელ ერთ ქალაქში შევიდა. ნახეს ხელმწიფის კარისკაცებმა, რომ ბიჭს ჯიბეები თქროს ფულით აქვს დატენილი და ებნევა. წავიდნენ და ხელმწიფეს მოახსენეს, ერთი უცხოელი ჩამოსულა ჩვენს ქალაქში და იმდენი ფული აქვს, ჯიბეებში აღარ ეტევა და სულ გზა-გზა ებნევაო.

ხელმწიფეს რაღაც ენიშნა და სასახლეში მიაყვანინა.

— ვინა ხარ, სადაური ან აქ საიდან მოხვედიო? — ჰკითხა ხელმწიფემ.

ბიჭმა დაწვრილებით უამბო თავისი თავგადასავალი; ბოლოს უთხრა:

— ამქვეყნად ერთადერთი ძმა მყავს და სანამ არ ვიბოვი, სულ ასე უნდა ვიარაო.

ხელმწიფემ ჰკითხა:

— ნიშანი თუ გაქვს რაიმე, რომ ნამდვილად ძმას ეძებო?

— ნიშანი ქამარი მაქვსო, — მიუგო ბიჭმა, — შემოიხსნა ქამარი და ხელმწიფეს წინ დაუდო.

ადგა ხელმწიფე, თვითონაც შემოიხსნა ქამარი და ქამრის გვერდით დადო. ძმებმა იცნეს ერთმანეთი და სიყვარულით გადაეხვივნენ. ერთმანეთის სიყვარულით რომ გული იჯერეს, მერე თქვეს: მოდი, წავიდეთ და ჩვენი მამა ვნახოთო. ხელმწიფემ საუკეთესო ცხენები შეაკაზმინა, მაგრამ უმცროსი ძმა ისევ თავის ჯორზე შეჯდა. — სანამ ცოცხალია, ასე უნდა ვაწამოო.

წამოვიდნენ ძმები და მივიდნენ თავიანთ სახლში. მამას უკვე იმედი გადასწურვოდა შვილების ნახვისა და უკვე ხარჯს უხდიდა. მოეწვია ხალხი. ის ვაჭარიც იქ იყო. ბიჭებმა ყველა იცნეს, ბიჭები კი ვერაფერს იცნო. მიუჯდა ხალხი სამკვდრო სუფრას და დალია შესანდობარი. მაშინ ადგა უფროსი ძმა, რომელიც ხელმწიფე იყო, და გამოაცხადა:

— კარი ჩაკეტეთ, გარეთ არავინ გაუშვათ, რაღაც სათქმელი მაქვსო.

ჩაკეტეს კარი და ბიჭმა ხალხს თავიანთი თავგადასავალი დაწვრილებით უამბო. სოვდაგარმა ახლა კი იცნო შვილები, გადააკოცნა ორივენი და ქელესი ღვინოდ აქცია.

ხალხმა იქვე შებოჭა ვაჭარი, ქმრის ლალატისათვის სოვდაგრის ცოლიც ზედ მიაყოლეს. გამოაბეს ორივე ცხუნის ძუაზე და ნაფლეთ-ნაფლეთ აქციეს. ლხინს რომ მორჩნენ, შვილებმა მამაც თან წაიყვანეს, დასახლდნენ უფროსი შვილის სახელმწიფოში და თავისი დღენი ერთმანეთის სიყვარულსა და სიამტკებობაში გალიეს.

ჭირი — იქა, ლხინი — აქა,  
ქატო — იქა, ფქვილი — აქა.



# ბოლოსიტყვაობა

## ზ ლ ა პ ა რ ი

ზღაპარი ხალხური სიბრძნის ერთ-ერთი ყველაზე უფრო ძველი და ბოჰულარული ჟანრი. იგი ძალიან დიდი ხნის წინათ შეპირად შეუქმნიათ ჩვენს წინაპრებს. შეპირადო ვამბობთ, რადგანაც იმ შორეულ წარსულში ხალხმა ჯერ კიდევ არ იცოდა ასოების წერა. შემდეგ კი ამ შეპირად მონათხრობს ხალხი მოსმენით იმანსოვრებდა და კვლავ შეპირად გადასცემდა შთამომავლობას. მრავალი ასეული წლის განმავლობაში ეს შეპირი ფანტასტიკური მოთხრობები ასე გადადიოდა კუთხიდან კუთხეში და თაობიდან თაობაზე.

განსაკუთრებით დიდი იყო ზღაპრის დანიშნულება მანამ, სანამ ხალხი დამწერლობას განავითარებდა. მაგრამ არც დამწერლობას და არც წიგნს ზღაპარი არ მოუსპია. იგი მწერლობის მხარდამხარ ვითარდებოდა და ვრცელდებოდა, რადგანაც მას თავისი საკუთარი ფუნქცია და ტრადიცია ჰქონდა.

ასე მოაღწია ზღაპარმა იმ უხსოვარი დროიდან ჩვენამდე. ცხადია, მას თავისი უძველესი სახე უცვლელად არ შერჩენია; იგი განვითარებული საზოგადოების თანამგზავრი იყო და მასთან ერთად თვითონაც ვითარდებოდა. საზოგადოების შესაბამისად იცვლებოდა ზღაპრების მოტივები და იდეები, იხვეწებოდა ფორმა და ბოლოს იგი მთელ ქვეყნიერებაზე გავრცელდა და ჩამოყალიბდა როგორც დამოუკიდებელი შეპირსიტყვიერი ჟანრი. ჩვენს დროში არ არის ქვეყანა, რომლის ხალხი სიამოვნებით არ ეცნობოდეს ხალხის მიერ შექმნილ ამ მხატვრულ საგანძურს.

ქართული შეპირსიტყვიერება ერთ-ერთი უძველესი და უმდიდრესი ხალხური შემოქმედებაა. საუკუნეებს გაუძლეს და ჩვენს დრომდე მოაღწიეს წინაქრისტიანულმა, წარმართობისდროინდელმა ქართულმა მითებმა: ამირანის, კომპალას, ბირქუშის, სამშეპარისა და სხვათა სახით.

დიდი ხნის წინათ იხსენიებენ ქართული წერილობითი წყაროები ზღაპარს, მას არაერთგზის ვხვდებით აგრეთვე ძველ ქართულ მწერლობაშიც. უნდა აღინიშნოს, რომ ამ ჟანრის მნიშვნელობა ძირითადად დღესაც იგივეა, რაც მას უძველეს წარსულში ჰქონია.

ჩვენს წინაპრებს ზღაპარი ესმოდათ, როგორც ფანტაზიის მეშვეობით შექმნილი, მოგონილი ამბავი და მას ყოველთვის სინამდვილის ხა-

ბირისპირო მნიშვნელობით ხმარობდნენ: ერთ ძველ ნაწერში კვითხულობთ: „არა ვითარცა ტყუილსა და ზღაპარსა, არამედ ტეშმარიტსა ხილულსა ვიტყვ“, გ. ი. ის ამბავი, რაც ხილულია, თვალთ დანახულია, ზღაპარი არ არის.

სულხან-საბა ორბელიანის განმარტებითაც ზღაპარი „არს მოგონებულ ტყუილი ამბავად შემჭევრებული და არა ქმნილი მყოფობით“, გ. ი. ზღაპარი მოგონილია და არა ნამდვილად მომხდარი ამბავი.

ქართული ზღაპრების ადრე ჩაწერილ ტექსტებს ჩვენამდე არ მოუღწევია; ისე კი მათი კვალი საკმაოდ ჩანს ძველ ქართულ მწერლობაში. ზღაპრების ყველაზე ძველი ხელნაწერი კრებული მე-17 საუკუნიდან მოგვეპოვება, შემდეგ კი რამდენიმე მნიშვნელოვანი ჩანაწერი მე-19 საუკუნის დასაწყისიდანაც არის ცნობილი.

ქართულ ხალხურ ზეპირსიტყვიერებას, როგორც დიდ ეროვნულ საგანძურს, სერიოზული ყურადღება ბირველად სამოციანელებმა მიაქციეს. მენი ცნობილი კლასიკოსები ი. ტავუაძე, აკ. წერეთელი, ი. გოგებაშვილი, ალ. ყაზბეგი, რაფიელ ერისთავი, ვაჟა-ფშაველა და სხვანი თვითონ იყვნენ ბირველი ინიციატორები და ჩამწერები ზეპირსიტყვიერის მასალებისა. ამ საქმეში ენერგიულად ჩაებნენ ცნობილი მოღვაწენი და მეცნიერნი.

XIX ს. მეორე ნახევარში დაიწყო ზეპირსიტყვიერი მასალების სისტემატური გამოქვეყნება ჟურნალ-გაზეთებში. ხალხურ ლექსებსა და სიმღერებს ხშირად აქვეყნებდა „ივერია“, „დროება“, „მოამბე“, „კვალი“ და სხვა.

ბერიოდულ პრესაში თუ ადვილად სერხდებოდა მცირე მოცულობის ბოეტური ნიმუშების გამოქვეყნება, ზღაპრებზე ამას ვერ ვიტყვი. თვითმპყრობელობის ბატონობის მძიმე ბერიოდში ზღაპრების არა თუ გამოცემა, არამედ ჩაწერაც კი ჭირდა. მრავალი შემკრები წლების განმავლობაში ამოდ ცდილობდა ზღაპრების სრული სახით დაბეჭდვასა და მკითხველისათვის მიწოდებას. ბევრი მათგანი ისე ჩაივლიდა საფლავში, რომ ამ კეთილშობილური სურვილის განხორციელებას ვერ ეღირსა.

მაგრამ მაინც დაგვრჩა ზღაპრების რამდენიმე მნიშვნელოვანი კრებული, რომელთა გამოცემაც დიდი გაჭირვებით მოუხერხებიათ:

1891 წელს ზღაპრების მცირე კრებული გამოუცია ლადო აღნიაშვილს. 1897 წელს აკაკი წერეთელმა თავის „კრებულში“ დაიწყო ქართული ზღაპრების სისტემატურად ბეჭდვა. 1901—1903 წლებში „ქართულ ქალთა წრესაც“ დაუბეჭდავს ზღაპრების ორი კრებული.

1909 წელს თ. რაზიკაშვილს გამოუცია ქართლ-კახეთსა და ფშავში მაწერილი ზღაპრების ორი კრებული.

ქართული ზღაპრები აგრეთვე ქვეყნდებოდა საზოგადოებათა კრებულებშიც, მაგრამ ყველაფერი ეს ზღვაში წვეთი იყო იმასთან შედარებით, რაც შესაკრები და გამოსაცემი რჩებოდა.

საქართველოში საბჭოთა წყობილების დამყარების შემდეგ მშრომელი ხალხის შემოქმედებით უნარს ფართო გზა გაეხსნა. კიდევ უფრო

გაიზარდა ინტერესი მისი შეკრების, შესწავლისა და გამოცემისადმი. ფართოდ გაიშალა საველე-შემკრებლობითი მუშაობაც, რამაც დიდძალი ზეპირსიტყვიერი მასალა და მათ შორის ზღაპრებიც შემატა ადრე შეკრებულ მარაგს.

საბჭოთა ხელისუფლების წლებში ზღაპრების მრავალი კრებული იქნა გამოქვეყნებული სათანადო მეცნიერული წინასიტყვაობითა და შენიშვნა-კომენტარებით. დაინტერესებულ მკითხველს შეუძლია გაეცნოს პროფესორების: მ. ჩიქოვანის (1938 — 1952 — 1956), ქს. სისხარულიძის (1938), ალ. ლლონტის (1948 — 1952 — 1956), ელ. ვირსაღაძის (1949 — 1958) ზღაპრების კრებულებს.

ამის გარდა, სხვადასხვა დროს გამოიცა ცალკეულ შემკრებთა მასალები, სადაც ზღაპრებს დიდი ადგილი უჭირავს.

ზღაპარი ერთ-ერთი ყველაზე უფრო მოძრავი ჟანრია. იგი იმთავითვე ძალიან იოლად გადადიოდა კუთხიდან კუთხეში და ქვეყნიდან ქვეყანაში.

საღვთისმშობლის ქვეყნად ერთმეორესთან ამა თუ იმ სახის ურთიერთობა. ისინი ქვეყნიდან ქვეყანაში გადადიოდნენ როგორც ვაჭარი, თუ ჯარისკაცი, მოგზაური, თუ მისიონერი. დამპყრობლები დიდხანს რჩებოდნენ დაპყრობილ მოსახლეთა შორის და ადგილობრივი მკვიდრნი ტყვეების სახით გაჰყავდათ თავიანთ ქვეყნებში. ეს მდგომარეობა კი დიდად უწყობდა ხელს ზღაპრის მოძრაობას, სხვადასხვა ენაზე მოლაპარაკე საღვთისმშობლის ერთნაირსიუჟეტიანი ზღაპრების დამკვიდრებას. აი, ამიტომ ამბობენ, ზღაპარი ინტერნაციონალური ჟანრიაო. რა თქმა უნდა, ეს ისე არ უნდა გავიგოთ, თითქმის ერთნაირი ზღაპრები არ არსებობდა. ზღაპართა ურთიერთგაზიარება სწორედ იმას ნიშნავს, რომ ყველა ერს უნდა ჰქონოდა ამა თუ იმ სახის ზეპირ მოთხრობათა მეტ-ნაკლები მარაგი, თორემ, აბა, რა გადავიდოდა ერთი ხალხიდან მეორეში? ამასთან ერთად მკვლევარები ფიქრობენ, რომ სხვადასხვა ხალხთა განვითარების მსგავსებამ დამოუკიდებლად წარმოშვა მსგავსი სიუჟეტები და მოტივები.

ზღაპარი იმდენად აჩრის ერთნაირი, რამდენადაც მასში ჩანს ამ ერის თავისებურებანი, მისი ისტორიისა და ყოფის ანარეკლი, წესჩვეულებანი, მეურნეობის დარგები, ლანდშაფტი, გარემომცველი ფლორა და ფაუნა და მრავალფა სხვა. ამიტომაც ზღაპარში ადვილად წყნობა იმ ხალხის ცხოვრება, რომელშიც იგი აღმოცენდა და დამკვიდრდა.

ვისმენტ ქართულ ზღაპარს და იქ, როგორც სარკეში, ისე ჩანს ჩვენი ხალხის ბედუკუღმართი წარსული, სოციალ-პოლიტიკური თუ ერთნაირი ძნელბედობა, ჩაგვრისა და უსამართლობის წინააღმდეგ თავგანწირული ბრძოლა, სოციალური უთანასწორობისა და შიმშილ-სიღატაკისაგან თავდაღწევაზე ოცნება.

აი, სოფლის მარჩენად ერთადერთ წყაროს სადღაცაიდან გადმოვარდნილი გველეშაბი დაბატრონებია და ხალხს წყურვილისაგან იღუპება. გველეშაბი კი წვეთწვეთობით აძლევეს წყაფს და ისიც მსთლოდ იმ შემთხვევაში, თუ ხალხს მსხვერპლად რჩეულ ქაღ-ვაკებს მიუყვანს. ამ ცხრა-

თავიან დევს მიუტაცია მზეთუნახავი ქალწული და მიუვალ ცხრაკლო-  
ტულში გამოუმწყვედევია, ხოლო დამცველებად ავსულები და კუდიანი  
დედაბარები მიუჩენია. რამდენი მწყემსისა თუ მეწისქვილის ბედისმადი-  
ხელი შვილი უდებს საბედისწერო სანაძლეოს ხელმწიფეს, რომ მოგების  
შემთხვევაში ბედს ეწიოს. ყველაფერი ეს კი ნიშნული და დამახასიათე-  
ბელი იმიტომ არის ქართული ზღაპრებისათვის, რომ მათში ჩვენი ხალხის  
წარსულია არეკლილი.

ყველა ხალხის ზღაპრებში ის თემები, მოტივები და იდეებიც წინ  
წამოწეული, რაც მისი შემქმნელი ხალხის ისტორიისა და ყოფისათვის  
არის დამახასიათებელი.

ზღაპრებში ასე ხშირად რომ გვხვდება: „იარა, იარა, ცხრა მთა გა-  
დაიარა“, არ შეიძლებოდა სტეპების მკვიდრთა შორის შექმნილიყო. „ცხა-  
დია, „ელია“ იქ აღმოცენდებოდა, სადაც მოსავალს სეტყვა ანადგურებს,  
ასევე „სამმეტევანა ჭაბუკიც“ იქ შეიქმნებოდა, სადაც ვენახი ხარობს,  
ზღაპარში დამომობილებული პერსონაჟები რომ ერთიმეორისათვის სი-  
ცოცხლეს სწირავენ, ამის საფუძველი ძმად გაფიცვის უძველესი ქართუ-  
ლი წესია, რაც დღემდე შემორჩა ქართველ მთიელთა შორის.

საქართველოში ზღაპარი ყოველთვის პოპულარული ყოფილა, მას  
დიდ პატივს სცემდნენ როგორც ხალხის იდეური აღზრდის ერთ-ერთ  
მძლავრ იარაღს, გართობისა და დასვენების საუკეთესო საშუალებას.  
ზღაპრის ეს უდიდესი ფუნქცია საუკეთესოდ ესმოდა ხალხს. ზღაპარი  
მსმენელებს უნერგავდა იმედსა და სულიერ სიმტკიცეს, ხალისსა და  
ენერჯიას. ზღაპრის ორი პერსონაჟი, დალიისა და შიმშილისაგან ქანც-  
გაწყვეტილი, ძლივსლა მილასლასებს შორეულ გზაზე. ერთი ეუბნება მე-  
ორეს: — ან შენ ამიკიდე, ან მე აგიკიდებო, — მეზღაპრეთა ენაზე ეს  
იმას ნიშნავდა, ან შენ მითხარი ზღაპარი, ან მე გეტყვი, რომ შიმშილი და  
დალლა დაგვაიწყდესო. აი, როგორ კარგად ესმოდათ ზღაპრის როლი  
თვითონ მეზღაპრეებს და იმიტომ იყო, რომ ქმნიდნენ, ასრულებდნენ და  
ავრცელებდნენ მას.

ზღაპარი, მართალია, მეტ-ნაკლებად, მაგრამ მაინც გავრცელებული  
ყოფილა საქართველოს ყველა კუთხეში და ყველა სოციალურ ფენაში  
გარდა იმისა, რომ იგი მტკიცედ იყო დამკვიდრებული გლეხთა ყოფაში,  
მას პატივს სცემდნენ დიდებულთა ოჯახებშიც. აკაკი წერეთლის ცნობით:  
საქართველოში ყოფილან ისეთი ყმა-გლეხები, რომელთაც მხოლოდ ბა-  
ტონისა და და მისი ცოლ-შვილისათვის ზღაპრების თქმა ემართათ და სხვა  
გადასახადისაგან განთავისუფლებულნი იყვნენ. მისივე ცნობით, ასეთი  
ყოფილა არა ერთი კაცი, არამედ მთელი გვარეულობა.

ზღაპართმცოდნეები ადასტურებენ, რომ მეზღაპრეობა ხელოვნება  
იყო, ხოლო ზღაპრის კარგი მთხრობელი — შემოქმედი. იგი ნიჰსა და  
დაოსტატუნას მოითხოვდა და იმიტომაც კარგი მთქმელები მოსახლეობა-  
ში სახელითა და პატივისცემით სარგებლობდნენ.

ზღაპრებში მათი ფორმისა და შინაარსის მიხედვით ერთმანეთისაგან  
განსხვავდებიან, ზოგი მათგანი მოკლეა, ზოგი კი საკმაოდ ვრცელია.



გვხედება როგორც თხრობის, ისე დიალოგის ფორმით შექმნილი ნაწარმოებები, ხოლო ზოგიერთ მათგანში კი პროზა და ლექსი ცვლის ერთმეორეს და ამბავი ამ ფორმით გადმოიცემა. კიდევ უფრო ნაირფეროვანია ზღაპრები შინაარსის მიხედვით. ზოგიერთი მათგანის პერსონაჟები პირუტყვები არიან და ნაწარმოების სიუჟეტი აგებულია მათი ურთიერთობის საფუძველზე. სხვა სახის ზღაპრები კი უფრო ადამიანთა საყოფაცხოვრებო ურთიერთობას გადმოსცემენ. მათი შინაარსი ადამიანთა ყოველდღიურ ცხოვრებასა და გარემოებასთან არის დაკავშირებული. ცნობილია ისეთი ზღაპრებიც, რომელთა ეპიზოდები, მოტივები თუ პერსონაჟები ფანტასტიკურ გამონაგონს წარმოადგენენ, ხოლო ზოგიერთი ნაწარმოების საფუძველი რომელიმე საგმირო ამბავი ან გმირის თავგადასავალი გამხდარა.

ზღაპრების კლასიფიკაცია რთული საქმეა. მართალია, მეზღაპრისათვის ყველა ზღაპარი ერთი და იგივე არ არის, ისინი თხრობის დროს კონკრეტულ გარემოს, ასაკს, სქესსა და ბევრ სხვა რამეს ითვალისწინებენ, და ამის მიხედვით ამბობენ შესაფერ ზღაპარს, მაგრამ შემოქმედების ასეთი პროცესი ჟანრებისა და მოტივების ერთიმეორეში გადასვლასაც იწვევს, რაც მათ კლასიფიკაციას აძნელებს.

არსებობს ზღაპრების კლასიფიკაციის რამდენიმე სახე. ქართული ზღაპრების თანამედროვე კლასიფიკაციის მიხედვით, რომელიც პროფ. მ. ჩიქოვანს ეკუთვნის, მიღებულია შემდეგი ჯგუფები: 1. ცხოველთა ეპოსი, 2. მისნური ანუ ჯადოსნური ზღაპრები, 3. საყოფიერო-ნოველისტური ზღაპრები, 4. საგმირო ეპოსი, 5. ლეგენდები და 6. ანეკდოტები.

ამ ჟანრებზე იმის მიხედვით გვექნება ლაპარაკი, რა სახითაც ისინი წინამდებარე კრებულში არიან წარმოდგენილნი. გათვალისწინებული იქნება ის ფორმა, რომელიც მათ მიუღიათ შემდგენლის მიერ გადამუშავების შემდეგ.

ზღაპრების ლიტერატურული დამუშავება, მათი სტილისა და დიალექტოლოგიური ფორმების გასწორება ახალი რამ არ არის. ზღაპართმცოდნეობის ისტორიაში ამის მრავალი მაგალითი მოიპოვება როგორც ჩვენში, ისე საზღვარგარეთ. საკმარისია ითქვას, რომ იაკობ და ვილჰელმ გრიმების მიერ გამოცემული ზღაპრების პირველივე კრებულები: „გერმანული საბავშვო და საოჯახო ზღაპრები“, რითაც საფუძველი ჩაუყარა ზღაპართა კრებულების გამოცემას, სტილიზებული იყო.

ქართული ზღაპრების ძველი პუბლიკაციებიც დამუშავების შემდეგაა გამოქვეყნებული. ხალხურ ნაწარმოებებში შესწორებების შეტანა ადრევე საჭიროდ მიუჩნეოდათ ჩვენს ცნობილ მწერლებსა და საზოგადო მოღვაწეებს: ილიას, აკაკისა და იაკობ გოგებაშვილს. უფრო მეტიც, ზღაპრების სტილი და ფორმები თვითონ ჩამწერებსვე უსწორებიათ. გამოჩენილ შემკრებს სვე. გარეჩილაძეს პროფ. მ. ჩიქოვანისათვის დაწერილ მოგონებაში აღუნიშნავს, რომ მთქმელთა მიერ მოწოდებულ ზღაპართა ტექსტებს ჯერ „გავაკაკალავებდი და რაც გამოსადეგი დარჩებოდა ცხრილზე ვეიო, იმას გადავწერდი“.

ფართო მკითხველი საზოგადოებისათვის განკუთვნილ ზღაპართა კრებულების დამუშავებული სახით გამოცემა იმდენადვე სასურველი და აუცილებელიც კია, რამდენადაც დაუშვებელია სამეცნიერო დანიშნულების მქონე ტექსტების გასწორება.

## ცხოველთა ეპოსი

ცხოველთა ეპოსს უწოდებენ იმ ზღაპრებს, რომლებშიც მოქმედ ბიჭებად პირუტყვები არიან გამოყვანილი. შინაური ცხოველებიდან ზღაპრის პერსონაჟებად გვევლინებიან ხარი, ცხვარი, ძაღლი, ძროხა, ცხენი და სხვა, ხოლო მსუცებიდან ლომი, ვეფხვი, დათვი, მგელი, მელა, კურდღელი... ასევე მონაწილეობენ ცხოველთა ზღაპრებში შინაური თუ გარეული ფრინველები: მამალი, წიწილა, ბატი, მტრედი, ყორანი, არწივი, აგრეთვე სხვადასხვა ჯურის ქვეწარმავლები და თევზები.

ცხოველთა ეპოსში ცხოველების ურთიერთობის საფუძველზე იგება ზღაპრის სიუჟეტი და ვითარდება მოქმედება. პირუტყვ პერსონაჟთა შორის ხშირად ეპიზოდური მოქმედი პირის სახით ადამიანიც გამოიყვება. ცხოველთა ეპოსისათვის განსაკუთრებით არის დამახასიათებელი პერსონიფიკირება. ისინი ადამიანების მსგავსად მოქმედებენ, მტრობა და მოყვრობა, შეგობრობა და ლალატი ზღაპრის პერსონაჟებისთვისაც ისევე დამახასიათებელია, როგორც ადამიანებისათვის. ისინი არა მარტო ერთმეორესთან და ადამიანებთან საუბრობენ, არამედ ზოგჯერ ადამიანებსაც ასწავლიან თავიანთ ენას („ძაღლების ენა“).

ცხოველთა სამყაროსთან ხანგრძლივმა და მჭიდრო ურთიერთობამ, მათზე დაკვირვებამ და გამოცდილებამ ადამიანს ადრევე მისცა საშუალება, თავისი შეხედულება შეემუშავებინა თითოეულ მათგანზე. თანდათან ადამიანმა ცხოველთა ნაწილი მოიშინაურა კიდევც და თავის მარჩენლად აქცია. ალბათ ამანაც განსაზღვრა ის, რომ შინაური ცხოველები თითქმის ყოველთვის დადებითი პერსონაჟები არიან და სიკეთეს ემსახურებიან. ისინი არასოდეს მტრობენ და ლალატობენ ადამიანს, მაშინ, როცა იმავეს ვერ ვიტყვით გარეულ მსუცებზე. იწვიათად არის, მაგალითად, რომ მგელი კეთილ პერსონაჟს დაუმეგობრდეს, ხოლო თუ ასეთი რამ მაინც მოხდა, იგი კეთილად არასოდეს დამთავრდება. ადამიანმა იმთავითვე იცოდა, რომ დათვი თავს ესხმის ბალახისმჭამელ ცხოველებს, კლავს და სანსლავს ძროხებსა და ცხვრებს, ამასთან ერთად იგი მძლავრი, მაგრამ ყოველთვის უხეში, ბინძური და ზრიალიანი, მელა კი მისი სრულიად საპირისპირო არსებაა, სუსტიცა, მაგრამ მეტად ეშმაკი და მოხერხებული, თანაც შინაური ფრინველებისათვის კბილის გაკვრა მასაც სჩვევია. რადგან ადამიანმა იმთავითვე იცოდა ყოველი პირუტყვის ჩევივა და ხასიათი, მათე ურთიერთსაპირისპირო კეთილი თუ ბოროტი საწყისები, იცნობდა მათ ფიზიკურ შესაძლებლობებსა და ინსტინქტებს, ამიტომ თითოეულ მათგანს ზღაპარში შესაბამისი როლი და ფუნქცია აქვს

დაკისრებული. ეს საპირისპირო პერსონაჟები ერთიმეორეს ხედებიან და ზღაპრის სიუჟეტური კვანძიც უკვე შეკრულია. შეხედება თუ არა დათვო და შელა ერთიმეორეს, მსმენელმა უკვე იცის, რომ ძლიერი ბრიყვი და სუსტი მოხერხებული ვერასოდეს მორიგდებიან, თუმცა პირველი მათი ურთიერთგაცნობა თითქმის ყოველთვის დაძმობილებით იწყება. შემდეგ დათვი ძალიან მალე გამოაქვს უხეშ სიბრიყვეს, დაარღვევს დადებულ პირობას, მეგობრობით ნაშოვნ დოვლათს თვითონ დაუპატრონება და გუშინდელ მეგობარს აღარაფერს უწილადებს. მაგრამ უხეშობას მელა გოველთვის თავის ეშმაკობას უპირისპირებს და მოქმედებაც დაძაბული და საინტერესო ხდება.

გაუმადლარმა დათვმა მელას ბატკანი შეუქაშა („დათვი და მელა“), მელას ძალიან ეწყინა, მაგრამ, თითქოს არაფერიყო, — შეგარგოსო, — უთხრა ცბიერად და იმავე წუთს შურისძიების მიზნით ახალი საცდუნებელი შესთავაზა ბრიყვ დათვის — ახლა ნასუქი ღვეჯის სორცით უნდა გაგაძლოო. დათვი, ცხადია, სიხარულით გააყვა მელას და დაიწყო მოქმედების შემდგომი განვითარება, რაც მელას მიერ შურისძიების ახალ-ახალ ეპიზოდებით გამოიხატა. ჯერ იყო და მელამ მყარებს ტყავი გაასდევინა დათვისთვის, მერე, ვითომ მკურნალობის მიზნით, ტყავაპრობილ წყლული გაუარვარებული რკინებით დაუდალა, ამ წამების შემდეგ კი გოდორში ჩასვა და კლდეზე დააგორა. თვითონ კი კლდის თავზე დაცუცქდა და გამარჯვების სიმღერა შემოსძახა:

ახტება და დახტება ეს სულბოროტიანი,  
დაჯდება და უცქერის სოსრო დოვლათიანი.

ასე დასაჯა უხეში ბოროტება თავისი ტკუისა და მოხერხების შემწეობით სუსტმა მელამ.

სხვა ზღაპარში კი, სადაც დათვი, მგელი და მელა ამავე პერსონაჟური ნიშნებით ანვითარებენ მოქმედებას, ამბავი იმით დასრულდა, რომ მელამ სასტიკად იძია შური გაუტანელ „ძმობილებზე“. „დათვის ბელები დაუსოცა, მგელი მწვეარ-მძებრებს ღააგლეჯინა, თვითონ კი „ღღესაც ცოცხალია და ახალ თინებს იგონებს“ („დათვი, მგელი და მელა“).

წინეულია, რომ ასეთ შემთხვევაში ხალხი მელას უთანაგრძობს და ამარჯვებინებს კიდევ, რადგანაც იგი სიბრიყვისა და ბოროტებისაგან იცავს თავს. ხალხმა საკუთარი გამოცდილებიდან კარგად იცის, რომ მძლავრი ბრიყვის წინააღმდეგ ბრძოლის ერთადერთი საშუალება მოხერხება და ეშმაკობაა.

ყოველ ზღაპარში, შესაბამისი პერსონაჟების სახით, ერთიმეორეს უპირისპირდება დადებითი და უარყოფითი, მაგრამ გერ ვიტყვით, რომ ერთი და იგივე ცხოველი ყოველთვის დადებით ან უარყოფით არ არსებობს. შემოსხენებულ ზღაპრებში თუ მელის ეშმაკობა გაწაბლდებოდა და, ამიტომ იგი დადებით პერსონაჟად წარმოგვიდგება სხვა ზღაპარში თავისი საქციელის გამო უარყოფითი პერსონაჟია და ხალხს

მას ამარცხებს, ეს კი იმიტომ ხდება, რომ ამჯერად მელას საქციელი პატიოსნების წინააღმდეგ არის მიმართული.

თაღლითმა მელამ ჩამდენიმე პურადი და სტუმართმოყვარე მასპინძელი დააზარალა („მელიას ოინები“). პირველ მასპინძელს უშარა და ფეტვის სანაცვლოდ მამალი წაართვა, მეორეს — მამლის ნაცვლად ერკემალი, მესამეს ერკემალში — ხარი, ხოლო მეოთხეს — მკედარი ხარის სამაგიეროდ ლამაზი გოგონა გამოსძალა, ჩაისვა გუდაში და პატიოსანი ადამიანების მოტყუებით გახარებულმა სიმღერა შემოსძახა:

ფეტვი გაყვიდე მამლადა,  
მამალი — ერკემალადა,  
ერკემალი კი — ხარადა,  
ხარი — უტურფეს ქალადა.

მაგრამ სტუმარ-მასპინძლობის სპეტაკი ტრადიციის დამრღვევი და გამყალბებელი მატყუარა ხალხს დაუსჯელი არ დაუტოვებია. მესუთე მასპინძელმა — მელორემ, მელას გუდიდან ქალი მოპარა და მის ნაცვლად აშარი ძალღი ჩაუსვა, გზაზე გუდიდან ლამაზი ქალის ნაცვლად თაღლით მელას გააფრებულნი ქოფაკი გამოუხტა და „ფაფუკი ტყავი კუდის რიკამდე გააძრო“.

მელა მიუსედავად დიდი მოხერხებულობისა და ეშმაკობისა, ხშირად მარცხდება არა მარტო ადამიანებთან და ძლიერ პირუტყევებთან (ხართან, ძაღლთან და სხვა) დაპირისპირების დროს, არამედ მასზე სუსტ ფრინველებთანაც კი („ნახევარწიწილა“ და სხვ.)

თაღლითი მელა მოტყუებით ცდილობდა მწყერრიტას ხელში ჩაგდებასა და შესანსვლას, მაგრამ მწყერრიტა როდი მოტყუვდა, პირიქით, მან ოსტატურად შეაცდინა პირისგამტეხი მელა, მისთვის გლეხს თავი გააჩენინა, ხოლო თვითონ უვნებელი გადაარჩა („მელია და მწყერრიტა“).

ხარი თავისი ფიზიკური ძალით, დაუზარელი შრომითა და პატიოსანი ერთგულებით ბოლომდე ზრება თავის მეგობარ ადამიანთან. მისი და ადამიანის მეგობრობა ყოველთვის სპეტაკი და უხინჯოა. ხარს ადამიანი გამოჰყავს ყოველგვარი გასაჭირიდან. ესმარება შიმშილისა და სილატაკის დაძლევაში. ისხნის მტრებისაგან და, თუ მდგომარეობამ მოითხოვა, სიცოცხლესაც სწირავს მის გადასარჩენად. ადამიანისადმი ერთგულებაში ხარი, ყველა სხვა პირუტყევს შორის, გამორჩეული პერსონაჟია. მას, გარდა ფიზიკური ძალისა, მისწური სიდარბაისლევ გააჩნია და გაჭირების დროს ადამიანის დამრიგებლად და მხსნელად გვევლინება („ერთგული ხარები“). წიქარა რქებიდან ლალას იღებდა და განწყობულ უმწეო თბოლს ისე ინახავდა, ხოლო როდესაც თბოლს სიკვდილის საშიშროება დაემუქრა, საკუთარი სიცოცხლე გასწირა მის გადასარჩენად („წიქარა“).

ძალდი ყოველთვის ადამიანის ერთგული მეგობარი და სამართლიანობის მსახურია. ზღაპარში მოქმედების განვითარება ხშირად ისე წარმართება, რომ ძაღლის გამოჩენით ნაწარმოების კვანძი იხსნება —

ძალეები დასჯიან ცბიერსა და მატყუარა მელას, ან გაუმაძღარ და ვურაგ მგელს დაბეგვავენ, ბრიყვ დათვს დაკბენენ და, მიიღებს რა ბოროტი მხეცი დამსახურებულ სასჯელს, ზღაპრის კვანძიც ამით იხსნება. ძალი ძალიან ზშირად მეგობრულ რჩევას აძლევს და ამით გასაჭირისაგან იხსნის ადამიანს („ძალეების ენა“).

მგელი მუდამ ვერაგი და დაუნდობელია, მგლურ გაუმაძღრობასთან ერთად მას ცბიერი ტყუილიც სჩვევია. მას უნდა მოტყუების საშუალებით ხელთ იგდოს მსუქანი გოჭები, მაგრამ დედა ღორთან ვერაფერს გააწყობს. შემდეგ კი იგი მომნანიებული წმინდანის როლში გვევლინება და ცოდვებისაგან განსაწმენდელად იერუსალიმში მიემგზავრება, მაგრამ მისი საშუელი არ არის და მგელი ბოლომდე მგლად რჩება, ამიტომ ყოველთვის დამსახურებული სასჯელით ისჯება: ჯერ იყო და ვირზა წისლებით კბილები ჩაულეწა, მერე ყორზემა რქებით ნეკნები დაუმტვრიეს, ხოლო შემდეგ მოზვერმა ძალეებს ისე დააბეგვინა, რომ ცოცხალ-მკვდარმა ძლივძლივობით დააღწია თავი იქაურობას („ნუ დაჰკარგავ ძველსა გზასა“).

კურდღელი უძლური და ამიტომაც მშიშარა და ფრთხილი პერსონაჟია. მას ყველა მხეცი: ღომი, დათვი, მგელი და თვით მელაც კი ერევა და ჩაგრავს. მაგრამ ხალხის ფანტაზიამ უმწურო კურდღელს მისცა ის, რაც ბუნებამ დააკლო. მას ზოგჯერ ღომებსა და ვეფხვებზეც კი ამარჯუებინებს. კურდღელს არ გააჩნია არც ფიზიკური ძალა და არც სიმამაცე. მაგრამ ტრაბახს უყვარს და ესერხება კიდევ. დამახასიათებელია, რომ ასეთი საქციელი მას უმართლებს.

მთვრალი კურდღელი ტყეში მარტოდმარტო ბანცალობს და მღერის

„ეს ქვეყანა სამეფოა,  
მე ვარ მეფე ამ ქვეყნისა,  
არ ვანსხვავებ ღომს და მელას,  
შიშის ზარს ვცემ ყველა ბრიყვსა“.

მაგრამ ღომის გამოჩენაზე შიშით თავზარი დაეცა და უგონოდ დავარა და. გონს როდესაც მოეგო, ნახა, რომ ღომსა და ვეფხვს ერთმანეთი დაეფლითათ, ჩვენი ტრაბახსა ყურცქვიტა ამაყად გაიჭიმა და სინანულით თქვა: „ფუჰ, შევარცხვინე მთვრალი კაცი ამოდენა მხეცები შემომკვდომია და აღარც კი მახსოვსო („ბაქია კურდღელი“).

უძლურთა ბაქიობა მსმენელთა ღიმილს იწვევს, მაგრამ არ კმნის უარყოფით ემოციას. მართალია, მკვებარობა ცუდი თვისებაა, მაგრამ როდესაც მასში, იმედი, მოხერხება და საკუთარი თავისადმი რწმენა ურევია, ხალხს ის დასაგმობად არ მიაჩნია.

გაუმაძღარ ღომს ცხოველებში მუდმივო ხარჩო გაუჩინეს. ყოველდღე თითო პირტყვს მიაართმევდნენ. კურდღლის ჯერიც დადგა: იგი ღომთან დაგვიანებით გამოცხადდა და გააფთრებულ ცხოველთა მეფეს მიახსენა: შენთან უფრო დიდი და მსუქანი კურდღელი მომყავდა, გზაზე სხვა ღომი დამხვდა და წამართვაო. შემდეგ კი გაუძლვა და ჭაში ჩაახვდა.

ლომს თავისი გამოსახულება სხვა ლომი ეგონა და უმაღლესი გიგანტის  
ლომი დაიხრჩო, კურდღელმა კი შინ გასწია.

მამალი ყოყონა და თავმომწონვა, მაგრამ გაჭირვების დროს მშინა-  
რა. იგი სიკეთის მსახურია და თავის საბრძანებელში სანიმუშო წესრი-  
გი აქვს დამყარებული.

შინაური ცხოველები ადამიანს არასოდეს უპირისპირდებიან, ზოლო  
მხეცისა და ადამიანის დაპირისპირება კი ყოველთვის ადამიანის გა-  
მარჯვებით მთავრდება, რადგან ასეთ შემთხვევაში მხეცის ფიზიკურ ძა-  
ლას ადამიანის ყოვლისშემძლე გონება უპირისპირდება და იმარჯვებს  
კიდევ („კატა და ვეფხვი“).

ცხოველ პერსონაჟთათვის დამახასიათებელია გაჭირვების დროს ურ-  
თიერთდამშობილება. ძმობილებიან ხშირად სრულიად სხვადასხვა უნა-  
რისა და შესაძლებლობის მქონე, არამონათესავე პერსონაჟები. თითო-  
ეული მათგანის უნარი კვანძის გახსნის მომენტში გამოადგება გაჭირ-  
ვებულ პერსონაჟს.

— შეილების მამებარმა გერიტმა გზაზე მამალი, მახათი, ფილთაქვა და  
ვირი დაიმშობილა. გაჭირვების დროს კი თითოეულმა მათგანმა ფექ-  
ტურად გამოიყენა თავისი უნარი და გერიტმაც საწადელს მიაღწია.

მაგრამ დამეგობრება ყოველთვის მეგობრული გრძნობის საფუძველზე  
როდი ხდება. მთავარი პერსონაჟი სხვადასხვა უნარის მქონე პერსონა-  
ჟებს ხშირად იძულებით უყრის თავს. ნახევარქათამამ გადაყლაპა მელა,  
მგელი, დათვი და ზედ ზღვაც დააყოლა. გაჭირვების დროს ყველა მათ-  
განი მუცლიდან ამოუშვა და თითოეულს თავისი საქმე გააკეთებინა:  
საქათმეში დამწყვედელმა ნახევარქათამამ ჯერ იყო და ბირიდან მელა  
ამოუშვა და ხელმწიფის ქათმები გაანადგურებინა, შემდეგ ასევე გაანად-  
გურებინა მგელს ბატები, დათვს — ცხვრები, ზოლო ბოლოს ბირიდან  
ამოშვებულ ზღვას ხელმწიფე და მისი კარისკაცები დაასრჩობინა („ნა-  
ხევარწილი“).

ცხოველთა ურთიერთობის ამსახველი ზღაპრების მოცულობა მცირეა.  
აქ არა გვაქვს მრავალბიზოდიანობა და გართულებული სიუჟეტები. ამ-  
ბავი შედარებით მარტივად იწყება და ვითარდება, მცირეა პერსონაჟთა  
რიცხვიც. რაოდენობის მიხედვითაც ცოტაა ცხოველთა ებოსი. ამ უძვე-  
ლეს ჟანრს დროთა განმავლობაში შესამჩნევ ცვლილებები განუცდია.  
შეცვლილია მოტივები და შესრულების გარემოც. ახლა იგი თითქმის  
მთლიანად ბავშვთა რეპერტუარის კუთვნილებაა.

ხალხი ცხოველთა ურთიერთობაში კეთილისა და ბოროტის, ბრძენისა  
და მოხერხებულის, უმწიფოსა და გერაგის დაპირისპირებით თავისსავე  
საზოგადოებას გულისხმობს და ამიტომ გულწრფელად უჭერს მხარს და-  
ჩაგრულის მიერ მჩაგვრელის დამარცხებას, შექსარის უსამართლობაზე  
სამართლიანობის გამარჯვებას. მთელ ცხოველთა ებოსში თითქმის არ  
არის შემთხვევა, რომ ბოროტი მგელი და ბრძენი დათვი იმარჯვებდეს.  
ხალხის წება უმწიფო კურდღელსაც კი ამარჯვებინებს მრისხანე ჯომებსა  
და ვეფხვებზე. ცხოველთა ებოსში ადვილად შევნიშნავთ სიმბოლურ-აღუ-

გორიულ დეტალებს და თხრობის იგავ-არაკულ ფორმას. ზოგი მათგანში კი კომპოზიციითაც ლიტერატურულ იგავ-არაკს ჩამოჰგავს.

მგელმა ავადმყოფ ლომს ავი ენა მიუტანა და ცხოველთა მეფე მელაზე განაჩინა. მელამ კი ავადმყოფს მოასხენა: — თქვენო დიდებულებავ, როცა თქვენი ავადმყოფობის ამბავი გავიგე, თავზარდაცემული გიგივით დავრბოდი და ექიმებს ვეკითხებოდი, — რა წამალი არგებს ჩვენს დიდებულ მეფესო, მირჩიეს: მგელს ფეხი მოსტეხონ, კოჭი ამოართვან და ნადირთა მეფეს მიაჩთვანო.

ექიმების რჩევა იმწამსვე სისრულეში იქნა მთყვანილი. ფესმოლეწილი მგელი მწარე ღმუილით მოშორდა მხეცებს, უკან მელია გამოედევნა და მისძახოდა:

— წითელჩქებებიანო, საით მიბრძანდები, როდესაც სიტყვას ამბობ, დაფიქრდი და სხვას ორმოს ნუ უთხრო.

ამ ზღაპარში იგავ-არაკისათვის დამახასიათებელი ლაკონური სტილი და თხრობის მანერაა გამოყენებული და ყველაფერი, ისე როგორც იგავ-არაკშია ხოლმე, მორალისთვის არის განკუთვნილი: როდესაც სიტყვას ამბობ, დაფიქრდი და სხვას ორმოს ნუ უთხრო.

ზოგიერთ ლიტერატურულ იგავ-არაკს ამჟამად ეტყობა, რომ მათ წყარო ცხოველთა ეპოსშია.

## საყოფაცხოვრებო ზღაპარი

საყოფაცხოვრებო-ნოველისტურ ზღაპრებს უწოდებენ ზღაპრების ოჯგუფს, რომელთა თემაც ხალხის ყოფა-ცხოვრებაა. ასეთი ზღაპრები ბერსონაჟები ადამიანები არიან და მათი მოქმედებაც კონკრეტულ გარემოში მიმდინარეობს. მათი შინაარსი ადამიანთა ურთიერთობას, მათ ქიხსა და ლხინს ასახავს, სინამდვილესთან შეუთავსებელი ფანტასტიკური გამოწვევები ნაკლებად გვხვდება. ის კი არა, ზოგიერთ ასეთ ნაწარმოებში თითქმის არაფერია დაუჯერებელი და ზღაპრული („ყმის სურვილი“). ზღაპრებში ტიპიური სახეებია შექმნილი უსამართლო მეფეებისა და ნაზირ-ვეზირებისა, ფლიდი და გაიძვერა მოხელეებისა, უზნეო მღვდელ-ღიაკვნებისა, მატყუარა, სოვდაგრებისა. ამ ბერსონაჟთა სახეებში ხალხმა შესანიშნავად გადმოსცა მათთვის დამახასიათებელი კლასობრივი ნიშნები და ექსპლოატატორული თავისებურებანი. მეოთხე მხარეზე დგანან ლარიბ-ლატაკები და ქვრივ-ობლები, მშვიერ-ტიტველი გლეხები და მოჯამაგირეები, ლუკმაპურისთვის ბედთამ მებრძოლი მონადირეები და მეთევზეები, ხალხის მსახური მჭედლები და მეწიესტვილები.

ეს ორი ძირითადი სოციალური ოჯგუფი იმთავითვე კლასობრივი ნიშნის მიხედვით არის ურთიერთდაპირისპირებული.

გამრჯე და წისკიერი ხალხი ცდილობს არსებობიხ შენარჩუნებასა და მდგომარეობის გაუმჯობესებას, მაგრამ ამ სამართლიან იდეალს

განხორციელების გზაზე მას ყოველთვის წინ აღუდგება საუკუნეთა მანა-  
ძილზე შექმნილი და ხალხის ყოფაში და მკვიდრებ უდიდო სოციალური  
უკულმართობა, კანონიერი საზოგადოებრივი იდეალისა და ზრუნვის  
მქონე დადებით პერსონაჟს შებრძოლება უხდება მძარცველებთან და  
ქურდებთან, მატყუარა ვაჭრებთან და გამომძალველებთან, ზნედაცემულ  
მღვდლებთან და ძუნწ მდიდრებთან.

ხალხი ყოველთვის სიყვეთისა და სამართლიანობის მხარეზე დგას და  
სწორედ ეს არის ზღაპრის უდიდესი ისტორიული და სოციალური ფუნ-  
ქცია. ზღაპარში დადებითი პერსონაჟი არასოდეს მარცხდება. შემოქმედი  
ხალხი თავის გმირს მუდამ მხარში უდგას და მიიწე მდგომარეობიდან  
გამოსავალ გზას უჩვენებს. ამისათვის იგი არ იშურებს თავის მდიდარ  
გამოცდილებას და ცხოვრებაზე დაკვირვებით შექმნილ სიბრძნეს. ყველა-  
ფერ ამას იგი თავის საყვარელ პერსონაჟში განაზოგადებს და ბოლოს  
უსათუოდ ამარჯვებინებს, ზრუნვას უმართლებს და ლამაზი იდეალის-  
თვის მიაღწევინებს.

ბევრი ზღაპრის მიზანდასახულობა ანტისაზოგადოებრივი, მავნე მოყ-  
ლენების წინააღმდეგ ბრძოლაა, უსამართლობის დაძლევაზე, მის დამარ-  
ცხებაზეა მახვილი დასმული. ამ საპატიო მოვალეობის შესრულებას ზმი-  
რად ყველაფერზე წინ აყენებს ზღაპრის დადებითი პერსონაჟი: უსამარ-  
თლო და მექრთამე კარისკაცმა გაჭირვებული გლეხი ხელმწიფესთან მ-  
ნამ არ შეუშვა, ვიდრე ბირობა არ დაადებინა, — ხელმწიფესაგან რასაც  
მიიღებ, იმის ნახევარი მე უნდა მომცეო. — კარისკაცის უსამართლობით  
აღშფოთებულმა გლეხმა დაივიწყა თავისი სათხოვარი და ხელმწიფეს  
ორი სილის გარტყმა სთხოვა. მბრძანებელმა უშალვე შეუსრულა ეს უც-  
ნაური თხოვნა. გამოსვლისას გლეხმა უსამართლო კარისკაცს მოახსუ-  
ნა: — ერთ მისხალსაც არ დაგაკლებ, რაც ხელმწიფემ მომცა, იმის ნახე-  
ვარს ახლავე მოგართმევო, — და ერთი ისეთი სილა სტიკცა, რომ უკერ  
გონება, ხოლო შემდეგ კი კარისკაცობაც დააკარგვინა („ჰკვიანი ხელ-  
მწიფე და ღარიბი კაცი“).

საყოფაცხოვრებო ზღაპარი, ჯადოსნურთან შედარებით, მოცულობით  
მცირეა. მოქმედება მარტივად იწყება და სწორსაზოვნად ვითარდება.  
მისთვის დამახასიათებელი არ არის გართულებული სიუჟეტი და პარა-  
ლელური მოტივები. მისი პერსონაჟები რეალური გარემოდან არიან აღუ-  
ბუნნი. საყოფაცხოვრებო ზღაპარში მთავარია საზოგადოების წევრთა  
ურთიერთობა, ცხოვრებისეული, ყოფითი ბროზღემები. წინა პლანზეა წა-  
მოწეული ცხოვრებიდან მომდინარე საჭირობოროტო საკითხები.

პერსონაჟთა შობის საზოგადოების თითქმის ყველა ფენისა და წრის  
წარმომადგენლები გვხვდებიან. მაგრამ მოქმედებას ყოველთვის ორი და-  
პირისპირებული ძალა წარმართავს, რომელთაგან ერთიცა და მეორემ  
ნათლად გამოხატული დადებითი და უარყოფითი ძალებია. ერთიმეორეს  
ებრძვიან მდიდარი და ღარიბი, აღზევებული და დაჩაგრული, უსამარ-  
თლო და პატიოსანი, მუქთახოხა და გამარჯვ. მაგრამ ამ კლასობრივ სა-  
ფუძველზე წარმოქმნილ კონფლიქტებთან ერთად ბიჭვინდა საყოფა-



ცხოვრებო, საოჯახო სფეროდან მომდინარე დაპირისპირებანიც სშირად წარმართავენ მოქმედებას. ერთიმეორეს უპირისპირდებიან ბოროტი დედინაცვალი და უმწეო გერი, უზნეო ცოლი და პატიოსანი ქმარი, ბრიყვი და ჭკვიანი ძმები, მშრომელი მშობლები და მუქთახოტა შვილი და ა. შ.

ხალხური შემოქმედი არ ცდილობს მხატვრული ხერხებით თანდათანობით გაგვიხნას დადებითი თუ უარყოფითი პერსონაჟის მხატვრული სახე. პერსონაჟთა სოციალური მდგომარეობა და ბუნება ზღაპრის დასაწყისიდანვე გარკვეულია.

მეზღაპრე თავიდანვე გვაწოდებს მზა ცნობას პერსონაჟის ვინაობისა და ტიპობრივი ბუნების შესახებ: „იყო ორი მონადირე, ერთი სიტყვაძვირი, მეორე კი — ყბედი და მეტიწარა“ („შერცხვენილი მონადირე“), „იყო ვრთი წუწკი და ფულს დახარბებული დედაკაცი“ („ბუერის მაძებარი, ცოტასაც დაკარგავს“). ამით მსმენელს თავიდანვე ექმნება გარკვეულ წარმოდგენა ამა თუ იმ პერსონაჟის ვინაობისა და რაობის შესახებ, ხოლო ნათქვამის მხატვრული დასაბუთება კი შემდეგ, მოქმედების განვითარების პროცესში ხდება. მთხრობელი მსმენელებთან ერთად ფეხდაფეხ მიჰყვება თავის პერსონაჟს და სიუჟეტურ საფეხურებს ისე გაატარებს, რომ დადებითი პერსონაჟი ნაწარმოების ყოველ ეპიზოდში სძლევს უარყოფითს და ბოლოს სიკეთე ბოროტებაზე გამარჯვებას ზეიმობს.

ზღაპარს არ სჩვევია დადებითი პერსონაჟის დამარცხება. ცხოველთა ებოსსა და ჯადოსნურ ზღაპრებში თუ ბოროტება სშირად ფიზიკურად მარცხდება, საყოფიერო-ნოველისტურ ნაწარმოებებში დიდი ადგილი ბოროტების მორალურად დამარცხებასაც უკავია.

ხალხმა თავისი მდიდარი გამოცდილებითა და დაკვირვების წყალობით კარგად იცოდა, რომ ადამიანთა მოდგმის მტერი ფიზიკურად უნდა მოისპოს; დეკს ცხრავე თავი უნდა მოეჭრას, კუდიანი აესულები ცხენის ძუაზე გამოებას, გველეშაპი ხმლით აინეხოს. მაგრამ ხალხს ის უტყუარი სიბრძნეც კარგად ესმოდა, რომ ანტისაზოგადოებრივი, მოვლენები: უსამართლობის, სიღარბის, მექრთამეობის, ზნედაცემულობისა თუ სხვათა სახით, მორალურად უნდა იქნას გატეხილი და მოსპობილი. ამიტომ არის, რომ მდიდარი უკანონოდ ნაშოვნ სიმდიდრეს კარგავს. ხარბ მღვდელს მოტყუებით მოგროვებული ოქრო მთლიანად ხელიდან ეცლება („ხარბი მღვდელი“), მდიდარ, მაგრამ ბებერ ოქრომჭედელს უწესოდ შერთული ახალგაზრდა ლამაზი ცოლი სამაგიეროს ღალატით უხდის („ოქრომჭედლის ცოლი“).

სამმა გაჭირვებულმა ამხანაგმა დიდძალი ოქრო იპოვა, მაგრამ გაყოფამდე ურთიერთლაღობით გადაწყვიტეს. ერთ-ერთმა მათგანმა დანარჩენ ორს საჭმელი მოუწამლა, ხოლო ამ ორმა კი იგი საჭმლის ჭამამდე მოკლა და მოზიარე თავიდან მოიცილა. დაიღუპა სამივე ამხანაგი და ნაპოვნი განძი ოხრად დარჩა („ამხანაგი ნუ გძულს, საშოვარი ნუ გშურს“).

ზემოხსენებულ ზღაპარში ჯეროვნად დაგმოხილია გაუმაძღრობა, ტა-საც გაუტანლობა და ლალატი მოსდევს. აქვე საყურადღებოა იმის ხაზ-გასმაც, რომ საშოვარზე მოარული ეს სამი ამხანაგი პატიოსანი შრომით მოპოვებულ მცირე მონაგარს ადრე ყოველთვის კეთილსინდისიერად და თანაბრად იყოფდა, ხოლო აღმოჩნდა თუ არა მათ ხელთ უშრომლად მო-პოვებული დიდი სიმდიდრე, თითოეულ მათგანში წაგლეჯისა და მით-ვისების მხეცურმა სურვილმა გაიღვიძა, რამაც ბოლოს სამივე დალუბა. ზღაპარი მთავრდება შეგონებით: „ვისაც ამხანაგი სძულს და ნაშოვარი შურს, თავისი წილიც ოხრად დარჩება“.

ზღაპრებში ხშირად გვხვდება „ცოდვილი ძღვენის“ — ქრთამის აღება. ქრთამის გამღებსაც და ამღებსაც ყოველთვის არაპატიოსანი მიზანი ამოქმედებს. ეს ანტისაზოგადოებრივი მოვლენა თავს მაშინ იჩენს, რო-დესაც საიდუმლოს გაცემამ, ლალატმა და უზნეობამ უნდა გაიმარჯვოს, იგი ყოველთვის სიმართლის, კანონიერებისა და პატიოსნების წინააღ-მდეგ არის მიმართული. ამ მაცდური საშუალების წყალობით ლალა-ტობს კარისკაცო ხელმწიფეს, შვილი — მამას, ცოლდ — ქმარს და ა. შ.

მაგრამ ქრთამით წამოწყებული საქმე ვერასოდეს იმარჯვებს, იგი მასაფუშავად არის განწირული.

საყოფაცხოვრებო ზღაპარი მკაცრად ებრძვის და ამხელს ყოველგვარ ანტისაზოგადოებრივ მოვლენას უსამართლობის, სიხარბის, მექრთამე-ობის, უზნეობისა და სხვათა სახით. იგი ყოველთვის მორალურ და ზნე-ობრივ ზეგავლენას ახდენს ფართო მასაზე. ამიტომია დიდი ზღაპრის აღ-მზრდელობითი ფუნქცია.

საყოფაცხოვრებო ზღაპრის მოქმედ პირობა პერსონალურ ფენქციას, მათ დადებითსა თუ უარყოფით სახეს ძირითადად მათივე სოციალურ-კლას-სობრივი მდგომარეობა განსაზღვრავს და ეს ზოგადი დამახასიათებელი ნიშანი მათ ყოველთვის ახლავს. მშრომელი ხალხი თავის შემოქმედებაში საკუთარ კლასობრივ თვალსაზრისსა და იდეას ასახავს და ამდენად მო-ბირისპირე სოციალური ძალების წარმომადგენლებს უარყოფით პერსო-ნაჟთა შორის აქცევს. ასეთთა შორის ყურადღებას ხელმწიფის სახე იქ-ცევს. იგი ხშირად უსამართლო და ბოროტია, მისი მომადლიერება მცირედით ძღვენით არ შეიძლება („სოვდაგარი და მისი ცოლი“), მაგრამ სიმართლისა და გონებაშახვილობის წყალობით უსამართლო ხელმ-წიფეს ხშირად ამარცხებენ ხალხის წრიდან გამოსული რიგითი ადამიან-ები („ორი ქურდი“), ხელმწიფესა და მის რჩეულ ვეზირს ჰკუთთა და გონებაშახვილობით გლეხის გოგომ აჯობა („ჭირვეული ხელმწიფე“).

ზღაპრებში თითქმის ყოველთვის უარყოფითი სახეებით არიან წარ-მოდგენილნი ეკლესიის მსახურნი. ეს „წმინდა მამები“ მსუნაგები და გა-იძეერები არიან, მათი მორალურ-ზნეობრივი სახე დაქვეითებულია.

მნათე, დიაკვანი და მღვდელი მოსვენებას არ აძლევდნენ გლეხის პა-ტარძალს, მოხერხებულმა პატარძალმა ისინი ბაემანზე მიიტყუა და

ბნელ გომში ერთიმეორე კეტებით დააბეგვინა. შემდეგ კი პატარძლის მე-  
ულლეც გამოჩნდა და, რაც ერთმანეთს დააკლეს, იმან დაუმატა. უზნეო  
მაშები სოფლიდან გადაიქარგნენ („პატარძლის ოინები“).

რთიგითი მეზატონე ზღაპრებში შედარებით იშვიათად გვხვდება, რად-  
განაც ნაწარმოებში მას ფუნქციონალურად ხელმწიფე ცვლის, მაგრამ  
როცა კი გვხვდება, სიბრძნეითა და ექსპლოატატორული მიდრეკილებით  
გამოირჩევა.

ზატონი მოჯამაგირეებს „არწყენაზე“ უდებს სანაძლეოს, მერე კი მათ  
აუტანელ ბირობებს უქმნის და ნაწყენი მოჯამაგირე იძულებულია მთე-  
ლი წლის ნამუშევარზე ხელი აიღოს და გასამრჯელოს გარეშე გაეც-  
ლოს მეზატონეს. მაგრამ სხვისი შრომის მითვისება ექსპლოატატორს  
ბოლომდე როდი შერჩება, მოჯამაგირის უმცროსი ძმა მას სანაძლეოს  
მოუგებს და გადასახადსაც ორმაგად გადაახდევინებს („მატყუარა ბა-  
ტონი“).

უარყოფით პერსონაჟთა გალერეას ემატებიან ადგილობრივი მოსე-  
ლეები. გლეხის ბიჭმა ზნედაცემულ მამასახლისს მეუღლესთან შეუს-  
წრო, მძინარეს პირში მდულარე ერბო ჩაასხა და სული გააფრთხობინა,  
შემდეგ კი მკვდარი თავის მტრებს მიუგდო და ფათერაქს ოსტატურად  
დააღწია თავი („მამასახლისი და გლეხის ბიჭი“).

ზღაპრებში ხშირად გვხვდებიან ვაჭართა კლასის წარმომადგენლები.  
ისინი უმეტესად მოარული მატყუარებისა და მყეღეფელების სახით და-  
უხატავს ხალხს. ვაჭრის გამოჩენა ხალხის მოტყუებასა და შეცდენაზე  
უკავშირდება. სოვდაგარი მეცხვარეს უმტყიეებს, რომ ქვეყნად არ მო-  
იძებნება ისეთი კაცი, რომელმაც ტყუილი არ იცის. მეცხვარეს ეს  
არა სჯერა და ერთმანეთთან დებენ დიდ ნაძლეოს. ორიპრმა და გაიძვე-  
რა სოვდაგარმა სწორედ მოტყუების გზით სცადა სანაძლეოს მოგე-  
ბა, მაგრამ სასტიკად დამარცხდა („სიმართლე“). მეორე ზღაპარში  
(„ჭკუა მაქვს და ფული — არა“) ხარბი სოვდაგარების მთელ ჯგუფს  
ჭკუითა და მოხერხებით გლეხმა აჯობა. მაგრამ დადებითისა და უარ-  
ყოფითის დაპირისპირებას წმინდა საყოფაცხოვრებო, ოჯახურ გარემო-  
შიცა აქვს ადგილი. ხალხი პატივს სცემს შრომაზე დაფუძნებულ, პატი-  
ოსანსა და ნამუსიან ოჯახს, რომლის თითოეული წევრი თავის კუთ-  
ვნილ მოვალეობას უძღვება და ასრულებს. ზღაპარი ვერ ურიგდება ან-  
გარებაზე ნაშენებ უწესო და უსამართლო ოჯახს.

მეზღაპრეები დიდი სიყვარულით, როგორც მისაბამ მაგალითს, გვი-  
ხატავენ გამტანი და ნამუსიანი ცოლ-ქმრის ურთიერთობას, დამთმობ და  
მოყვარულ და-ძმებს, პატიოსან პატარძლებს, ზრდილობიანსა და გამ-  
გონ შეილებს.

ძმათა შორის სიყვარულისა და ძმური ურთიერთობის მომხიბვლელად  
ამბავია მოთხრობილი ზღაპარში „ძმობა“.

ორმა ძმამ მიწის მცირე ნაკვეთი თანატოლად გაიყო და ცალ-ცალკე  
დასახლდნენ. უმცროსი ძმა საკუთარ ძნებს იღებდა და ღამე თავისი ძმის  
ძნებზე აწყობდა, — იმას უფრო უჭირს, ოჯახის პატრონიაო, — ცოლ-

შვილიან ძმას კი თავისი ძნები შალულად უმცროს ძმასთან მიჰქონდა. — მაგას უფრო უჭირს, ჯერ ოჯახი არ შეუქმნიაო.

პატიოსანი პატარძლისა და ერთგული მეუღლის სახეა დახატული ზღაპარში „პატარძლის ოინები“. უზნეო მღვდელ-დიაკვნების შიშით გლეხს დანიშნული პატარძალი შინ ვერ მოუყვანია, ვაითუ შემცდინონო, მაგრამ ქალის პატიოსნებამ და მოხერხებულობამ გაიმარჯვა „წმინდა მამები“ სამარცხვინოდ დამარცხდნენ, ხოლო დედაკაცი ბოლომდე ქმრის ერთგულ მეუღლედ დარჩა.

მაგრამ არის სხვა რიგის ოჯახებიც, ხალხის მიერ ადრიდანვე მსილებული და დაგმობილი, ასეა გამოაშკარავებული ოქრომჭედლის ოჯახი:

მოხუცებულმა გონჯმა ოქრომჭედელმა სიმდიდრის წყალობით ახალგაზრდა და ლამაზი გოგო შეირთო ცოლად. მაგრამ ცოლმა მისი შესაფერი ახალგაზრდა შეიყვარა, ოქრომჭედელს ფულიც დასტყუა და სულიდან გაუქრა („ოქრომჭედლის ცოლი“).

შვილის აღზრდა, სწორ გზაზე დაყენება და პატიოსან მშრომელ ადამიანად მისი ჩამოყალიბება ერთ-ერთი მთავარი საკითხთაგანია მშობლებსისათვის და ასეა იგი წარმოდგენილ ზღაპრებშიც.

ხალხს თავისი გამოცდილება და დაკვირვება განუზოგადებია და პატიოსანი და გამრჯე შვილის აღსაზრდელად თავისი საალმზრდელო-პედაგოგიური მეთოდებიც გამოუმუშავებია. ეს მეთოდები, მართალია, ხალხურია და თანაც ზღაპრული სიუჟეტებით გადმოცემული, მაგრამ უმეტეს შემთხვევაში ისინი სწორი, ღრმავარნი და დღევანდელი თვალსაზრისით მისაღებნიც არიან.

მჭედელი ცდილობს, რომ მისმა ზარმაცმა და უქნარა შეიღმა ფული საკუთარი შრომით მოიპოვოს, დედა კი მას მანეთიანს აძლევს და ტყუილს ასწავლის: — აჰა, მანეთიანი, მთელ დღეს შინ ნუ გამოჩნდები, საღამოს მოდი, უჩვენე მამაშენს ეს მანეთიანი და უთხარი: — მე ვიშოვე-თქო.

ამ დეტალში ხალხმა დედისათვის დამახასიათებელი, მაგრამ საზოგადოდ მანვე გულჩვილობა ასახა. აქ შესანიშნავად არის მინიშნებული იმაზეც, რომ დედა უნებლიეთ აიძულებს ზარმაც შვილს მატყუარაც იყოს. მაგრამ მამა როდი ტყუვდება. იგი შვილის მოტიანილ ფულს ბუხარში წვავს და შვილს ეუბნება, — ეს შენი შრომით მოპოვებული არ არისო. — ასე განმეორდა რამდენჯერმე, ვიდრე ვაჟმა მართლა არ მოჰკიდა შრომას ხელი და თავისი გამოუმუშავებული ფული არ მიუტანა. მამამ ამ ფულის დაწვაც სცადა, მაგრამ შვილი ეცა და დასაწვავად არ დაანება — დაენანა შრომით მოპოვებული მანეთიანის განადგურება. გამოცდილი მამა მიხვდა შვილის აღლევების მიზეზს, შვილს დაუტკბა და აღერისით უთხრა: — ასეა, შვილო, სანამ შენი ოფლით არ შეიძენ, მანამდე ფულისა და ტონების ყადრს ვერ გაიგებო („ზარმაც შვილი“).

ოჯახის წევრთა შორის ხშირად გვეხვდება ბრყვის სახე. ბრყვი შეძლება იყოს ოჯახის ყველა წევრი — ცოლი ან ქმარი, ძმა ან მოჯამა-

გირე და ა. შ. იგი თავისი სიბრძნის გამო ხშირად ვერ ეტყევა ელუ-  
მენტარულ საყოფაცხოვრებო საკითხებსა და საოჯახო წერილმანებში,  
მისი ურთიერთობა ოჯახის წევრებთან თუ გარეშე საზოგადოებასთან  
უგუნურია და აკეთებს იმის საწინააღმდეგოს, რასაც უნდა აკეთებდეს.  
ბრძნის ამ შეუძლია სწორად გაიგოს სხვისი ნათქვამი. ამ დეტალს, რო-  
გორც ბრძნის ბუნებისათვის- დამახასიათებელ ნიშანს, ზღაპარში სახე  
აქვს გასმული.

გლესმა ბრძნე ცოლს დაავალა: ღვინოს ბრძე მოაცილე და გადაღუ-  
ბო. — ქალმა რამდენიც არ ჩაყო სასაპავი შიგ და ამოიღო, ბრძე ღვი-  
ნოში მაინც რჩებოდა. ხაპა ქალმა ასე, ხაპა და საღამომდე ქვევრი მთლად  
დააცარიელა. („ქვის სეტყვა“).

შემდეგ საქროაკიდებული აქლემი იპოვეს და, ბრძნე ცოლს რომ ეს  
ამბავი ბატონთან არ წამოსცდენოდა, ქმარმა იგი თონეში დამალა. ბრძ-  
ნი კი მაინც ამოძვრა და აქლემის ბატონს განუცხადა: — ჯორი ჩვენ  
ვიპოვეთ. — აქლემის ბატონმა იჩივლა და ცოლს რომ საიდუმლო არ გა-  
ემხილა, ქმარმა იგი გააფრთხილა, — აქ დაჯექი და ამ კარს არ ვადმო-  
ცდეო. ცოლმა კი კარები ჩამოსხნა, ზურგზე მოიკიდა და სასამართლოში  
იხე მივიდა, აქაოდა, კარებს ხომ არ მოცვილებივართ.

ბრძნევი ქმრის ტიპიური სახეა ღარიბი გლესი, რომელსაც სახლში მა-  
რილიც კი არ მოებოვება, რომ ღობიო შეაზავოს. იგი ქალაქში მუჭანახე-  
ვარი მარილის საშოვნელად მიდის და, რომ არ დაავიწყდეს რისთვის  
წაიდა, გზაზე სულ მუჭანახევარი, მუჭანახევარიო, — გაიძახის, ამი-  
ტომ გზაზე შეხედრილი მხენელ-მთესველი კაცი მიბეგავს — ერთი ასად,  
ერთი ასად რატომ არა თქვიო. ბრძნევი დაუჯერა, მაგრამ ახლა მკვდრის  
პატრონებმა სცემეს, — ერთი ასად კი არა, აცხონოს უნდა გეთქვაო და  
ა. შ. („მუჭანახევარი მარილი“).

ხალხმა იცის, რომ სიბრძნევე სოციალური უკულმართობის ბრალია.  
იგი იმ უეცრობისა და გაუნათლებლობის შედეგია, რაც საუკუნეთა გან-  
მავლობაში თავს ედო საზოგადოების დაბალ ფენებს. ამიტომ ხალხს ბრძ-  
ნი უფრო ეცოდება, ვიდრე ეზიზღება. მისი საქციელი ყოველთვის სატი-  
რულ-იუმორისტული საღებავებით არის შეზავებული, გულუბრყვილო და  
უანგარო ბრძნევი მსმენელების თანაგრძნობასა და სიყვარულს იწვევს,  
ხოლო მისი ალალ-მართალი უეცრობა ხშირად მხარჯუებს კიდევ ბორო-  
ტებსა და უსამართლობაზე („ქვის სეტყვა“).

გერისა და დედინაცვლის ურთიერთობას ერთ-ერთი მთავარი ადგი-  
ლი უჭირავს საყოფაცხოვრებო ზღაპრებში. გერი უფრო ხშირად გოგოა,  
ზოგჯერ კი ბიჭიც გვხვდება. თუმცა ამით ზღაპრის მთავარი იდეა არ  
იცვლება, ორივე შემთხვევაში გერი და დედინაცვალი დაპირისპირებული  
პერსონაჟები არიან. დედინაცვალი ყოველთვის მტრობს გერს, ავიწ-  
როებს, ჩაგრავს და შეურაცხყოფას აყენებს. მდგომარეობა მით უფრო  
გამძაფრებულია, თუ დედინაცვალს საკუთარი გონჯი და უჭკუო შვილი  
ცა ჰყავს. ასეთ შემთხვევაში დედინაცვალი გერის დანაგვრით ალბა კმა-  
ყოფილდება და მის მოსპობასა და თავიდან მოცილებას ცდილობს.

სშირად ნაწარმოების კვანძი იმით იკვრება, რომ დედინაცვალს თავს მოიაკადმყოფებს და ქმარს ავალებს: დაკლას გერი და მისი გულ-ღვიძლი მიართვას, თორემ სხვა არაფერი მოარჩენს. ვერაგი დედინაცვლის მონა-მორჩილი ქმარი თანახმაა, შვილი მსხვერპლად გაიღოს. ბოროტი განზრახვის შესრულებას თითქოს ხელს აღარაფერი უშლის.

მიუხედავად ამისა, გერს ყოველთვის აღმოაჩნდება გადაარჩენის ძალა და საშუალება. ეს ან მისი ჭკუა და მოხერხებაა, ანდა მეგობარი გამოქსარჩლება ადამიანისა თუ საყვარელი ბირუტყვის სახით. ამიტომ იგი ყოველ ეპიზოდში თავს აღწევს განსაცდელს და ბოლოს ბოროტი დედინაცვალის სასტიკად მარცხდება.

გერისა და დედინაცვლის ურთიერთობა გადაუწყვეტელ ბრობლემად მოჩანს არა მარტო გლეხობაში, არამედ მეფე-მთავართა შორისაც. მრავალი უსიამოვნო ფაქტია აღწერილი ისტორიაში გერის (უფლისწულის) და დედინაცვლის (დედოფლის) ურთიერთობისა. გერი კანონიერი მემკვიდრე იყო ყველაფერი იმისა, რაც მის მამას მოეპოვებოდა. ცხადია, ასეთი მდგომარეობა დედინაცვალს გერის მიმართ კეთილად გერ განაწყობდა, მით უმეტეს, თუ მას თავისი შვილებიც ჰყავდა.

ივარაუდება, რომ ღარიბ-ღატაკთა ოჯახებშიც გერისა და დედინაცვლის კონფლიქტი არანაკლებად მწვავე იქნებოდა. ისტორიული სინამდვილიდან აღებული ეს მძიმე ურთიერთდამოკიდებულება შესანიშნავად ასახულა ზღაპრებშიც.

ჩვენს ქვეყანაში გერისა და დედინაცვლის მტრულ ურთიერთობას სოციალური საფუძველი დიდი ხანია გამოცლილი აქვს და ზღაპრებში მისი შემორჩენა მხოლოდ წარსული ყოფის მხატვრული ანარეკლია.

გერისა და დედინაცვლის ურთიერთობის ამსახველი ზღაპრების ციკლი ძველად ბოპულარული და აქტუალური ყოფილა. ხალხს ამ ორ პერსონაჟში განუზოგადებია საოჯახო ყოფის ყველაზე უფრო მტიკინეული საკითხი — მემკვიდრეობის საკითხი და მასთან დაკავშირებული ვნებები.

ცხადია, ობიექტურად სიმართლედ გერის მხარეზეა, რადგანაც იგი ოჯახის კანონიერი შვილია, ამასთან, ერთად იგი ობოლი და დედის აღურსს მოკლებულია. ამიტომ ხალხის ჰუმანიზმი მთლიანად მის მხარეზეა: დედინაცვალის საკუთარი, სუბიექტური ინტერესების მიხედვით მოქმედებს და ამიტომ იმსახურებს ხალხის სიძულვილს.

## ჯადოსნური ზღაპარი

საზღაპრო ეპოსში დიდი ადგილი ჯადოსნურ ზღაპრებს უკავია. მათი მთავარი თავისებურება უკიდურესი ფანტაზიურობაა. ფანტაზია და გამოწონაგონი ზღაპრისთვის საზოგადოდ დამახასიათებელი ნიშანია, მაგრამ შინსურ-ჯადოსნუკ ნაწარმოებებში ეს თავისებურება განსაკუთრებით იჩენს თავს. მათი სიუჟეტი და მოქმედების განვითარება რეალური სინამდვილიდან შორსა დგას და ადამიანთა მხატვრულ გამოწაგონზეა აგე-

ბული, მოტივირებულია ჯადოსნურ-სასწაულებრივი ელემენტებით. მის-  
ნურ-ჯადოსნურ ზღაპრებში გადმოცემულია ობიექტიურ, რეალურ სინამ-  
დვილესთან ძნელად შესაგუებელი, დაუჯერებელი, ფანტასტიკური ამბავი.

ჯადოსნურ-ფანტასტიკურ ზღაპრებში ყველაზე უფრო უკეთა ჩანს ადა-  
მიანთა ფანტაზიის არე და წვედომათა ზღვარდაუდებელი შესაძლებლობა,  
ჩანს თუ რამდენად შემოუფარგლავი იყო მხატვრული გამოგონების,  
შეთხზვისა და ჭერეტის უნარი. ადამიანთა გონებამ საუკუნეთა მანძილ-  
ზე ახალი და ლამაზი-სამყარო შექმნა ფანტასტიკურ-ჯადოსნური ზღაპ-  
რების სახით. ფანტაზიის წყალობით მიღწია იმ საუკუნეობრივ იდეალს,  
რისი პრაქტიკულად მიღწევაც მას არ შეეძლო.

უმწეო მშრომელმა ადამიანმა ჯანსაღი ფანტაზიით შექმნა ჯადოსნუ-  
რი საშუალებანი და ჩააღწია ქვესკნელში, დაუფლა ზეცას, ფენის დაუს-  
ველებლად გადაიარა უნაპირო ზღვებზე.

იგივე ფანტაზია დაიხმარა სოციალური უკუღმართობის წინააღმდეგ  
ბრძოლაშიც. მან ჩაგვირის, უსამართლობისა და ბოროტების სიმბოლუ-  
რი სახეები შექმნა კუდიანების, დეეების, გველეშაპებისა და სხვათა სა-  
ხით. შემდეგ კი ამ ბოროტ ძალებს პატიოსანი მშრომელი ადამიანი და-  
უპირისპირა და თავისი გმირი ფანტასტიკური ხერხებითა და ჯადოსნუ-  
რი საშუალებებით შეაიარაღა. მისცა მას კომბალი, რომელსაც შეუძლია  
ძლიერი და ურთცხვი მოწინააღმდეგის დაბეგვა, დასურა ურინმაჩინის  
ქუდი, რომ მტერთაგან შეუმჩნეველი და უვნებელი იყოს. მის დამცველად  
და ქომაგად გამოიყვანა ცხოველთა და მცენარეთა მთელი სამყარო. ადა-  
მიანის გონება არა მარტო მახინჯ საზოგადოებრივ ფორმებსა და კანო-  
ნებს შეებრძოლა, არამედ მისმა ფანტაზიამ ბუნების კანონების გარდაქ-  
მნაც მოახერხა: ჯადოსნური ვაშლით უძეო ცოლ-ქმარს შეილი შესძინა  
და ოჯახი გადაშენებას გადაარჩინა, ფანტაზიით შექმნილი სამკურნალო  
ბალახით მკვდარი გააცოცხლა, ჯადოსნური საშუალებებით უდაბნოში  
წყალბ ამოიყვანა და იქაურობა წალკოტ-ბალებად აქცია.

უსაზღვრო და უკიდურესი ფანტაზიით შექმნილი სამყარო თავისი მა-  
ზობრავებელი ძალებითა და საშუალებებით, დაუჯერებელ ჯადოსნურ-  
მისნური კომპონენტებით, სრულიადაც არ უნდა მოგვეჩვენოს მოჭარბე-  
ბულ უსაგნო ფანტაზიის ნაყოფად. ასეთ ნაწარმოებთა იდეა და მიზანდა-  
სახულობა რეალურად არსებულ ობიექტური გარემოდან არის არაკლილი  
და მასვე ემსახურება. აქ ჯადოსნურსა და მისტიკურ-ფანტასტიკურ ჭრელ  
სამოსელში არის გახვეული სრულიად ამქვეყნიური საზოგადოებრი-  
ვი ტიპივლები, სოციალური უთანასწორობანი და ხალხის ბრძოლა უკე-  
თისი ცხოვრების შესაქმნელად. სადაც და რა გარემოშიც არ უნდა ხდებო-  
დეს მოქმედება, ზესკნელსა თუ ქვესკნელში, ვისაც არ უნდა უპირის-  
პირდებოდეს გმირი, ცხრათავიან დევსა თუ უსამართლო ხელმწიფეს,  
ყველგან ჩანს ობიექტურად არსებული ცხოვრების ამარეკლი. სადაც სა-  
უკუნეთა მანძილზე თცნებობდა გამხდაარყო ქვეყნის გამგებნეო და ამ  
აუხდენელ სურვილს მსოლოდ ფანტაზიით ეკმაყოფილებდა. თცნებობდა  
იმზე, თუ რა საშუალებებით აჯობებდა იგი ხელმწიფეს და თვითონ გაზ-

დებოდა კეთილი და სამართლიან მამებელი, შაგრამ იმას, რასაც პრაქტიკულად ვერ ასწავებდა, ძალიან ლამაზად ასურათებდა ზღაპარში.

მძიმე შრომისაგან გატყევილი, შეუხედავი ცოლის შემყურე მიწის მუშა თუ მეჯოგემ, მეთევზემ თუ მონადირემ ფანტაზიით შექმნა საყოფაობიანი მზეთუნახავის სახით და ამ იდეალის მისაღწევად გადალახა მრავალი უადონსურ-ფანტასტიკური წინააღმდეგობა. დაამარცხა კუდიანი დედაბრები, კაციჭამია დევები, შეასრულა ბირობა და მოიგო სანაძლეო. დიდი სიმამაცის, გამჭრიახობისა და მოხერხებულობის გარდა ხალხმა მას ფანტაზიით შექმნილი უადონსურ-მისნური საშუალებებიც მიახმარა და გამარჯვებული გამოიყვანა — მზეთუნახავი მისი კუთვნილება გახდა.

ადამიანს მუდამ ჰქონდა ლტოლვა ჯერ მიუღწეველი საკენ, ამოუცნობის ამოცნობისაკენ, გარემომცველი სამყაროს საიდუმლოებათა ამოხსნისაკენ. ასე შექმნეს უძველეს წარსულში ნიჭიერმა წინმგებრეკლებმა მფრინავი ხალიჩა და მთებსა და ზღვებს გადაუფრინეს, ასე დაასწრო მეცნიერებამ მათმა უადონსურმა ფანტაზიამ და მოიგონა უადონსური სარკე, რომელშიც ჩანდა, თუ რა ხდებოდა ცხრა მთას გადაღმა.

ჩვენს დროში ზღაპრის ბევრმა სხვა დეტალმაც დაკარგა ფანტასტიკურობა და რეალურ სინამდვილედ იქცა. კავშირგაბმულობის დღევანდელ ბირობებში სასურველი ბიროვნების გამოსაძახებლად და მისგან რჩევისა თუ დახმარების მისაღებად სრულიადაც არ არის საჭირო მისი თმის ღერის ან ფრჩხილის ცეცხლში ჩაგდება, რასაც უადონსური ზღაპრების გმირები აკეთებდნენ.

ასე რომ უადონსურ ზღაპრებში ხალხის ხალასი ფანტაზიით შექმნილი, იმ დროისათვის უცნაური გამოჩენილი დროთა განმავლობაში თანდათანობით რეალური და ხელშესახები ხდება. ეს კი ჩვენი წინაპრების გონებრივ განვითარებასა და ინტელექტუალობაზე მიუთითებს.

უადონსური ზღაპრის ცენტრში ადამიანი დგას და მოქმედებასაც ის წარმართავს. ზღაპრის ყოველი მოტივი თუ ეპიზოდი, მისი ყოველი პერსონაჟი ადამიანთან არის დაკავშირებული, მის სასარგებლოდ ან საზიანოდ მოქმედებს. ადამიანი იწყებს და ამთავრებს მოქმედებას.

უადონსური ზღაპრის ადამიანი პერსონაჟები თავიანთი ბუნებითა და გარეგნობით ნაკლებად შეცვლილი არიან. მართალია, იქ გვხვდება მათი სილამაზის, ფიზიკური ძალის ან სხვა ნიშან-თვისებათა კიბერბოლიზაცია ანდა ბირუტყვად გარდაქმნა, მაგრამ მაინც მისი მოქმედება, მიზნები და მისწრაფებები ადამიანურია.

ფანტაზია უფრო მეტ გასაქანს ბირუტყვ პერსონაჟებს აძლევს. მხეცები თუ შინაური ცხოველები, თევზები თუ ფრინველები არა მარტო გონივრულად მსჯელობენ და ლაპარაკობენ, არამედ თავისი მისნური უნარით ადამიანს პერსონაჟებს ღიჟავენ, უადონსურ სიმნეღვთა დაძლევაშიც ეხმარებიან.

უადონსური ზღაპრებში ფანტასტიკურ ელემენტს ყველაზე მეტად გამოგონილი, რეალურად არარსებული პერსონაჟები აძლიერებენ. ეს არცთუ მოულოდნელია, რადგანაც ისინი ხალხის შემოქმედებითაა ფანტაზიამ



სწორედ ამ მიზნით შექმნა და შემოიყვანა მოქმედებაში. დევი, გველეშაპი, რაში თუ ფასკუნჯი, ეს ის გამოგონილი პერსონაჟებია, რომლებიც სიუჟეტის შეკვრასა და მოქმედების განვითარებას უწყობენ ხელს. მიუხედავად იმისა, რომ ეს პერსონაჟები უძველესი რწმენის ანარქული აზრის, მხატვრულ ნაწარმოებში ისინი მხატვრული გამონაგონის ფუნქციას ასრულებენ.

ჯადოსნური ზღაპრის მოქმედების არე მეტად ფართოა. მისი გმირები მოქმედებენ ხმელეთზე, ადიან ცაში და ჩადიან ქვესკნელში; გადადიან მთებზე და გადიან ზღვებზე. ისინი ხან უკაცრიელ უდაბნოებსა და უსიერ ტყეებში მოხვდებიან, ხან კი ქალაქებსა და მეფეთა სასახლეებში. ხალხი ირეალურ გარემოს, ქვესკნელსა თუ ზესკმელს, მიწიერის, ობიექტურად არსებულის კვალობაზე გვიხატავს.

ფორმისა თუ შინაარსის მხრივ ჯადოსნურ ზღაპარს ბევრი რამ სპერტო აქვს საზღაპრო ეპოსის სხვა ჟანრებთან. ხოლო სხვა ჟანრებისთვის დამახასიათებელ მრავალ ელემენტს ჯადოსნურ ზღაპრებშიც შეუღწევია. აქ უნდა შევჩერდეთ ჯადოსნური ზღაპრისათვის დამახასიათებელ ტიპურ მოტივებსა და პერსონაჟებზე. ამ მხრივ ორიგინალური მაქციონერობა არის. მოქმედების მსვლელობაში მისი პერსონაჟები სახეს იცვლიან, — ცხოველებად ან ფრინველებად გარდაიქმნებიან. ამას ისინი სხვისი ძალდატანებით ან თავისი სურვილით სჩადიან. ძალდატანებით გარდაქმნა სასჯელის ფორმაა. კაცი მოლაღატე მეუღლეს ვირად აქცევს და სახლის ასაშენებელ ქვას აზიდვინებს, მაგრამ შოგჯერ ბოროტი პერსონაჟიც ახერხებს პატიოსანი ადამიანის პირუტყვად გადაქცევას: ორგული ცოლი მათრახის ერთი დაკვრით ქმარს ძალღად გარდაქმნის. მაქციერობა ხშირად ორმაგი და სამმაგიც კია: მონადირე ჯერ ლამაზ ქალად და ხელმწიფის რძლად იქცა, მერე — ფაშატ ცხენად, ხოლო ბოლოს — ძალღად.

ცხოველებად გარდაქმნილ პერსონაჟებს გონება ისევ ადამიანისა აქვს და გონიერულად მოქმედებენ. ცოლისგან ძალღად ქცეული გლეხი მგლებს ამოსწყვეტს და ხელმწიფის შვილს სიკვდილისაგან იხსნის.

ბოროტთა მიერ პირუტყვებად ქცეული ადამიანები დიდი ბჭძოლის შემდეგ ისევ იბრუნებენ ადამიანობას.

შოგჯერ ადამიანები თვითონ გარდაიქმნებიან ხელმწიფის შვილი გველეშაპად გარდაიქმნა და გლეხის სარჩო-საბადებელს დაეპატრონა. გლეხი იძულებული იყო თავისი სამი ქალიშვილიდან ერთ-ერთი მისთვის მიეთხოვებინა. ორმა უფროსმა დამ უარი თქვა. ოჯახის ხსნის მიზნით მისი ცოლობა ნაბოლარა დამ იკისრა, მაგრამ საშინელო გველეშაპი მაშინვე ხელმწიფის ულამაზეს შვილად იქცა. ნაბოლარა და, რომელმაც ოჯახის კეთილდღეობისთვის თავი გასწირა, მოგებული დარჩა.

გარდაქმნის ჯადოსნური საშუალება სხვადასხვაგვარია. ამ ფუნქციას ხან საჭმელი ასრულებს, ხოლო უფრო გავრცელებული კი წყებია ან მათრახია. ვინაც ეს ჯადოსნური საშუალება ხელთ ჩაუვარდება, დაპკრავს მოწინააღმდეგეს და ნებისმიერ პირუტყვად აქცევს.

მაქციერი მათრახის გარდა სხვა ჯადოსნური წივითც ბუერია. მათ სხვადასხვა ფუნქცია აქვთ და ამის მიხედვით დიდ როლს ასრულებენ მოქმედების განვითარებისა და სრულქმნის საქმეში. ვისაც ჯადოსნური ნატურისთვალა აქვს, რასაც ინატრებს, ყველაფერი აუსრულდება, ხოლო ნატურის სუფრის პატრონს ნატურასთანავე წინ გადაუშლება უღვეელი სასმელ-საჭმელი. ჯადოსნური ქისის პატრონმა რაც უნდა ბუერი ფული ხარჯოს, ქისა თავისით ისევ და ისევ ივსება. უკვე ვახსენეთ ჯადოსნუ-ბი ხალიჩა და სარკე, რომლებიც სივრცისა და მანძილის დაძლევის სურ-ვილით შექმნა ხალხის ფანტაზიამ.

ბერსონაქთაგან ყურადღებას მზეთუნახავი ქალიშვილები იქცევენ, ისინი ხალხმა ლამაზი და მიუწვდომელი ლტოლვის ობიექტად დასასა.

მზეთუნახავი ზოგი ზღაპრის მიხედვით ხელმწიფის ასულია, ხოლო ზოგჯერ კი მის ვინაობაზე საერთოდ არაფერია ნათქვამი. მათი გა-რეგნული ბრწყინვალეობა იმდენად დიდია, რომ მნახველები ყოველგვარ სხვა სურვილსა და იდეალზე უარს ამბობენ და მათი დასაკუთრების მიზ-ნით თანხმდებიან, შეასრულონ უძნელესი დავალებები, გადალახონ სი-ცოცხლისათვის საშიში წინააღმდეგობანი. მზეთუნახავის ხელში ჩაგდებ-ბისათვის ერთნაირად იბრძვიან მეფეთა და დიდებულთა შვილები, ვაჭ-რები და მოჯამაგირები. მაგრამ მისი ქმრობის უფლების მოპოვება ერ-თობ ძნელია.

მზეთუნახავი არც გონიერებასა და ეშმაკობას არის მოკლებული. ხო-ლო ზოგჯერ კი მას მინსურ-ჯადოსნური უნარიც გააჩნია. იგი ხშირად თვითონ ხდება არასასურველი საქმროების დაღუპვის მიზეზი, აძლევს რა მათ ძნელად ამოსახსნელ ამოცანებს, ან არადა ცხრა მთას იქით აგზავ-ნის ისეთი დავალების შესასრულებლად, რასაც საქმროს დაღუპვა უნდა მოჰყვეს.

მზეთუნახავის დასაკუთრება განსაკუთრებით მაშინ არის ძნელი, თუ აგი დევსა ჰყავს მოტაცებული. დევს იგი კაცთაგან მიუგნებსა და მიუვალ ცხრაკლიტულებსა თუ თვალუწვდენ ცისე-კოშკში ჰყავს საიმედოდ დაცუ-ლი, ხოლო მისასვლელს გველეშაპები და ურჩხულები იცავენ. მაგრამ დე-ვი უხეში და ბრყვია და ამიტომ არის, რომ მზეთუნახავი ყოველთვის ცდილობს მისგან თავის დაღწევას. ასეთ შემთხვევაში იგი გადამწყვეტ დანაშაულებას უწევს მისი ხელის მაძიებელ ჭაბუკებს. უმხელს დევის საი-დუმლოებას, ასწავლის მის სუსტ მხარეებს და ესმარება მის დამარცხე-ბაში. მაგრამ ხშირად მზეთუნახავი სასასლემია გადამალული და მის ნაც-ვლად სასიძოებს მძიმე პირობას მისი მამა — ხელმწიფე უდებს, პირობის შეუსრულებლობის შემთხვევაში კი, ამავე პირობის თანახმად, სასი-ძოებს თავის მოკვეთა ან ვირად ქცევა არ ასცდებათ („სამი ტყუილი“). მიუხედავად ამისა, მზეთუნახავის მშვენივით მოხიბლული სასიძოებო ყო-ველგვარ პირობაზე თანხმდებიან. დამარცხებულთა მოკვეთილი თავებით ივსება ხელმწიფის კარ-მიდამო.

და აი, ამ დროს სარბიელზე გამოჩნდება ჯადოსნური ზღაპრის გმო.

ბი, — ლატაკი მონადირისა თუ მეწიხეების ბედის მაძიებელი ვაჟი. იგი ბედსა ცდის და წამოყენებულ პირობებს იღებს.

ჯადოსნური ზღაპრების უმეტესობის სიუჟეტური კვანძი ამ მომენტში იკურება და შემდგომი მოქმედების ყოველი ეპიზოდიც მზეთუნახავთან არის დაკავშირებული. მზეთუნახავის ცოლად შერთვით იხსნება ნაწარმოების კვანძი და მთავრდება ზღაპარი.

გამოგონილ პერსონაჟთა შორის ჯადოსნურ ზღაპრებში დევის სახე გამოირჩევა. მას ადამიანის ყველა თვისება გააჩნია, შესახედავადაც ადამიანის მსგავსია, ოღონდაც ვეებერთელაა და საშინელი გარეგნობა აქვს, ტანი ბალნით დაფარული, მხრებზე სამი, ცხრა და ზოგჯერ კი — თორმეტი თავი აბია, უშველებელი პირი დიდი ეშვებითა აქვს შეიარაღებული. ფიზიკურად ძლიერია, გონებით ბრიყვი, ხოლო ბუნებით ბოროტი და უხეშია. ადამიანების მსგავსად ჰყავს ოჯახი, აქვს სახლი და სამფლობელო. ცხოვრობს კაცთაგან მიუკარებ გარემოში და ფლობს აურაცხელ სიმდიდრესა და ძვირფასეულობას. იგი სიკეთის მტერია და ადამიანთა მოდგმას ებრძვის.

ადამიანმა იგი საკუთარი თავის მსგავსი შექმნა, მაგრამ იმ თავისებურებით, რომ ადამიანთა მოდგმის ყველა ნაკლი, ყველაფერი არაადამიანური დევეში გააერთიანა. ამიტომ არის, რომ პატიოსნების, სიკეთისა და ბედნიერებისაკენ მიმავალ გზაზე ყოველთვის დევი ღვას და ადამიანთა სანუკვარი მიზნების ასრულებას წინ ეღობება.

დევის პერსონაჟი, მთელი თავისი დამახასიათებელი ნიშან-თვისებებით, განზოგადებული სიმბოლური სახეა სოციალური ბოროტებისა. დევი და დევეთა კაცობრიობას ყოველთვის თან სდევდა, როგორც ბედნიერებისაკენ მიმავალ გზაზე ჩახერგილი წინააღმდეგობა. საინტერესოა, რომ დევი სხვადასხვა სოციალური ნიუანსებით გვხვდება ზღაპრებში. იგი ხან მეფესავით სრა-სასახლეებისა და სამფლობელოების პატრონი და მბრძანებელია, რომელსაც ცოლად ხელმწიფის მზეთუნახავი ასული უზის, ხან კი რიგითი მეჯოგეა და ღამეს ველზე ატარებს ბოჯანო მწყემსის მსგავსად. მაგრამ ბუნებით კი, აქაც და იქაც, დევი სიკეთის მტერია, უხეშო და ბოროტია. ყველა სოციალურ ერთეულსა თუ კლასს ჰყავდა ბედნიერების გზაზე ჩასაფრებული თავისი დევი. ერთ ზღაპარში თუ იგი თბოლ ბიჭს ცხერებს შეუჭამს და ამით სწადის ობლის მიმართ დიდ ბოროტებას, სხვაგან დიდებული ხელმწიფის შვილს საცოლეს ეცილება და მზეთუნახავს მოსტაცებს. არის ზღაპრები, სადაც დევი ადამიანისათვის კეთილ საქმეს — სწადის, მაგრამ ეს ხდება მხოლოდ მერე, როცა ადამიანი მას სჯობნის და ამარცხებს.

ხალხის გენიამ თავის ზეპირ შემოქმედებაში დევეობის წინააღმდეგ ბრძოლის იდეები იქადაგა და რეალურ შესაძლებლობას ღამაში ფანტაზიაც დაუმატა მისნურ-ჯადოსნური თუ ფანტასტიკური ელემენტის სახით.

ხშირია შემთხვევა, როდესაც დევე მზეთუნახავებსა თუ ჩვეულებრივ გლეხის გოგოებს იტაცებს და ცოლად იერთავს („ადისანჯაღა“), მაგრამ

ყოველთვის გამოიჩინება მოტაცებულ ასულის ქომაგი ჭაბუკი და დეგზ ხასტიკად ამარცხებს („კაცის ძალა“).

დევთან შებმა და მისი დამარცხება ყველაზე უფრო საინტერესო ებო-ზოდია ზღაპარში. სახალხო ბოროტებასთან შეჭიდებულ ჭაბუკს ყველა-ფერი დასმარებას უწევს. უმართლებს მისწურ-ჯადოსნურთ საშუალებებ-ღ, ესმარებიან ცხოველები.

ხალსი სწორად ასახავს ბოროტი ძალის სიმძლავრეს. დევმა მოიქნია ჭაბუკი და მიწაში მუხლამდე ჩასვა, მაგრამ ჭაბუკი უმაღ გაციმართა, მო-ქნია დევი და წელამდე წამალა მიწაში. ასე გააძლიერა ხალხმა თავისი ფანტაზიით ბოროტებასთან შებრძოლი კეთილი ძალა.

დევი ყველაფერს მუსრავს და ნთქავს, ყოველგვარ კეთილს ბილწავს და აოსრებს, მაგრამ მას ბოლოს ისევ ადამიანთაგან ბრეული უხდის სა-მაგიეროს. ამ ბოროტი ძალის ერთადერთი დამმარცხებელი და შემმუს-გრელი ისევ ადამიანია.

დევთან ერთად ზოგჯერ მისი დედა, დევ-დედაბერიც გვხვდება. მისი გამოჩენა თითქმის ყოველთვის ერთ გარემოში ხდება. დევის სამყოფელ-ში მოხვედრილ ადამიანს შინ მხოლოდ დევ-დედაბერი დახვდება. დევი კი წადირობიდან თუ მწყემსობიდან შემდეგ ბრუნდება.

დევ-დედაბრისა და ადამიანის ბირველი შეხვედრა თითქმის მუვიდო-ბიანია, მაგრამ მალე გამოაშკარავდება დედაბრის ცბიერება, იგი მაც-დური და ვერაგია — ადამიანებს მიიტყუებს და ღუპავს.

დევის მსგავსად ადამიანთა მოდგმის მტერია მეორე პერსონაჟიც — გველეშაპი (გველეშაპი). მათი პერსონალური მსგავსება ამ მხრივ ისე დიდია, რომ ვარიანტებში ერთიმეორეს ცვლიან. მისი გარეგნობა მთქმე-ლებს უფრო მკრთალად აქვს წარმოდგენილი, ვიდრე დევისა, მიუხედავად ამისა, იციან, რომ იგი უშველებელი არსებაა, ცხოვრობს წყალში და ხმე-ლეთზე მხოლოდ მსხვერპლისთვის გამოდის. ზოგჯერ კი ციდანაც ჩამო-ეჭრება. გარშემო შემოერთყვება მზეთუნახავის კოშკს, ან გლენის ყანას, დაუბატონება სოფლის წყაროს და წყლის საფასურად ჭაბუკებისა და ქა-ლიშვილების მსხვერპლად მირთმევას მოითხოვს. სანსლავს ბირუტყვებ-სა და ადამიანებს. ერთი სიტყვით. გველეშაპი ზღაპრებში წარმოდგენი-ლია როგორც მეტად საშიში ბოროტი არსება. როგორც დევის, ისევე მი-სი დამარცხებაც ბრეულთა ხვედრია. ზღაპრის მთავარი პერსონაჟი, და-ბალი წრიდან გამოსული უშიშარი ჭაბუკი მას სან ჰაერში განგმირავს ისრით, ხან კი წყაროს მახლობლად ხმლით აჩეხავს და ამით სოფელს განსაცდელისაგან იხსნის.

ხალხის ფანტაზია ამქვეყნით ბოროტებას გამოგონილ პერსონაჟებში დევეებსა და აღქაჯებში, გველეშაპებსა და აჯსულებში უყრია და თავს. მათ უბირისპირებდა სიკეთის განსახიერებას, მართალსა და მამაც ადა-მიანს და ამ ღამაში ფანტაზიის წყალბობით ამარცხებდა და სლობდა მას. მაგრამ ამეგ ფანტაზიის წყალბობით შეუქმნია ხალხს სიკეთის დამსმარე და ქომაგი პერსონაჟებიც. სიკეთისათვის მებრძოლ გმირს ფანტასტიკურ-ჯადოსნურ წიფთებთან. ერთად ექომაგებიან ბირუტყვები. მათ შორის ყუ-

რადღებას იქცევს გამოგონილი პერსონაჟი მფრინავი რამის სახით. რაში ფანტაზიით პიკერბოლიშებული ცხენის სახეა. იგი ადამიანის ერთგული მსახური და ქომაგია. მისი მთავარი ღირსება სისწრაფეა. ამ უნარის წყალობით შეუძლია ადამიანი სასწრაფოდ განარიდოს მოსალოდნელ ფათერაკს, ან მიიყვანოს განსაცდელში მყოფ მეგობართან. სიბილიტან ერთად მას ფრენა და ცურვაც შეუძლია. ამას გარდა რაშს მისწურ-ჯალოს-ნური უნარიც გააჩნია და ამით ყოველთვის დიდ დასმარებას უწევს თავის პატრონს. საყურადღებოა, რომ ეს ფანტასტიკური არსება მოქმედების განვითარების პროცესში უკავშირდება სიკეთისათვის მებრძოლ პერსონაჟს, მანამდე კი იგი დევების ან ხელმწიფის კუთვნილებაა.

## თქმულეები

კრებულში შეტანილია რამდენიმე მითოლოგიური და საგმირო-სატრფიალო თქმულეა. ზოგი მათგანი („ამირანი“, „იახსარი“, „კოჰალა“) ძალიან ადრინდელი ჩანს, ხოლო ზოგი კი („აბუსალომი და ეთერი“, „როსტომი“) შედარებით გვიან შეუქმნიათ ან გადაუმუშავებიათ ჩვენს წინაპრებს.

მიუხედავად იმისა, რომ ისინი სრულიად სხვადასხვა თემაზე არიან შექმნილნი, საერთო ისა აქვთ, რომ ყოველ მათგანში ჩანს ჩვენი ხალხის წარსული, მისი რწმენა და შეხედულებები სამყაროა თუ საზოგადოებაზე.

ნაწარმოებთა გმირები თავგანწირვით იბრძვიან ძალმომრეობისა და ბოროტების წინააღმდეგ, სძლევენ ბოროტ ძალებს და ამით ხალხისათვის კეთილდღეობა მოაქვთ. ისინი სიმართლისმოყვარულნი და მაღალი იდეალებისთვის მებრძოლნი არიან. იციან მეგობრის გატანა და გაჭირვების დროს ყოველთვის მხარში უდგანან მას.

ასევე საინტერესოა თქმულეებში ასასული სატრფიალო მოტივები. შეყვარებული წყვილები სპეტაკი სიყვარულის ბოლომდე ერთგულნი რჩებიან. მათთვის უცხოა ლალატი და ორპირობა.

ზემოჩამოთვლილი ყველა მოტივი დამახასიათებელი და ნიშანდობლივია ჩვენი ხალხის ისტორიისა და ყოფისათვის, ჩვენი ზეპირსიტყვიერებისა და მწერლობისათვის.

განსაკუთრებით დიდი სწისა ჩანს საგმირო-მითოლოგიური შინაარსის მქონე თქმულეებში ამირანსა, კოჰალასა და იახსარზე. ისინი რამდენიმე ათასი წლისანი არიან და ჯერ კიდევ ქრისტიანობამდე, წარმართობის ხანაში შეუქმნიათ ჩვენს წინაპრებს. მითოლოგიურ თქმულეებს ის თავისებურება აქვს, რომ მათი გმირები ზეადამიანებად და „ღვთიშვილებად“ არიან მიჩნეულნი. ამის საფუძველი კი ის იყო, რომ იმდროინდელი ხალხი ბუნების მოვლენებში კარგად ვერ ერკვეოდა. მათთვის აუხსნელი რჩებოდა, მაგალითად, მესის, ელ-ჭექის, გვალვის, ყინვისა თუ ეპიდემიურ ავადმყოფობათა გამომწვევი მიზეზები და ყველა ამ მოვლენის საფუძ-

გლად ისინი ზეციურ ძალებს მიიჩნევდნენ. შემდეგ კი ეს თავისივე ფანტაზიით შექმნილი ღმერთები ადამიანების სახით წარმოდგინეს და მათზე მითოლოგიური თქმულებები შექმნეს. ამიტომ არის, რომ მითოლოგიური გმირები: ამირანი, იახსარი, კოპალა და სხვ. ღვთაებრივი შექმლებისა და უნარის მქონენი არიან. მაგალითად, ღვთიშვილი იახსარი მორიგე ღმერთმა თავისი სამოცდასამი შვილიდან ამოარჩია; როგორც უდიდესი ძალი ღონის პატრონი და დედამიწაზე ჩამოგზავნა ადამიანთა მტრების — გიგანტური დევეების შესამუსრავად. შემდეგ კი მითოლოგიური თქმულება მოგვითხრობს იმაზე, თუ როგორ სძლია ღვთიშვილმა იახსარმა ბოროტი ძალები და როგორ გადაარჩინა მათგან ადამიანთა მოდგმა.

ასევე ებრძვიან გველეშაპებს, დევეებს და სხვა ბოროტ ძალებს ამირანი და კოპალაც.

საგმირო-სატრფიალო მოტივებზეა აგებული „ამბავი ტარიელისა“ და „როსტომი“.

შეყვარებულთა მძიმე სვედრზე მოგვითხრობს თქმულება „აბესალომი და ეთერი“.

კრებულში შეტანილი თქმულებების თავისებურება ისიც არის, რომ ისინი შედგენილნი არიან სხვადასხვა ვარიანტებიდან ამოკრებილი ეპიზოდებისაგან.

და ვ ი თ ბ რ ვ ო ზ უ რ ი

## ს ი ტ ყ ვ ა თ ა ბ ა ნ მ ა რ . ტ ე ბ ა

აინუნში არ ჩააგდო — ყურადღება არ მიაქცია, არაფრად ჩათვალა.

ალა — ალატი, წისკვილის ნაწილი, რომელშიც ფქვილი ცვივა.

ალალი — კუთვნილი, შრომით მოპოვებული.

ანკარა — წმინდა, სუფთა.

არამი — უკუთვნილი, უღირსად შენაძენი.

არგანი — ჯოხი, ყაყარჯენი.

არეუ — ჯოგი, ფარა.

აწრთო — დააფოლადა, გაამაგრა.

აშარი — ჩხუბის მოყვარული, კაპასი, ავი.

აჯილლა — ასალგაზრდა, მამალი ცხენი, დაუკოდავი.

ბადალი — შესადარი, მსგავსი.

ბაკი — პირუტყვთა სადგომი (უსახურავო).

ბანგი — ძილის მომგვრელი წამალი.

ბატკანი — კრავეი, ცხვრის შვილი.

ბაქია — მკვეხარა, ტრაბახა.

ბაყილა — ნერგი.

ბედაური — მუსლადი ცხენი.

ბედისმწერელი — ზეციერი არსება, რომელიც ასალდაბადებული ბავშვის მომეაღს განსაზღვრავს.

ბერწი — შვილის არ მშობელი პირუტყვი.

ბოხჩა — ხელჩანთა, შეკვრა.

ბრდღვინვა — შფოთვა, ჯავრობა.

ბრკე — ღვინის ზედაპირზე ამონალექი, პერი.

ბუდრუგანა — ძველი ქოხი.

ბუნაგი — მხეცის სამყოფელი, სორო.

ბურეაკი — დიდი გოჭი.

ბოსელი — პირუტყვთა სადგომი, გომური.

ბულა — დაუკოდავი ხარი, მოზვერი.

გადიხვეწა — გადაიკარგა, გააღწია, წავიდა.

გამოშიგნა — გამოწელა, შიგნეული; ჯიგარი გამოაცალა.

განძი — ძვირფასეულობა, ქონება.

გაყლიტა — დახოცა, ამოწყვეტა.

გასვლიპა — შესანსლა.

გველეშაპი — ადამიანთა მოდგმის მტერი, ვეებერთელა არსება; ცხოვრობს ზღვებსა და ტბებში, ზოგჯერ ხმელეთზეც გამოადის.

გვრინი — გალობა, მღერა, ღულუნი.

<sup>1</sup> სიტყვები განმარტებულია იმ მნიშვნელობით, რაც კონტექსტის მიხედვით აქვთ.

**გურიტი** — გარეული ფრინველი.

**გოდორი** — წნელით მოწნული დიდი ჭურჭელი, სახორბლე.

**გოზაური** — ღვინის ჭურჭელი, თიხისგან დამზადებული.

**გომბიო** — გომბეშო, ბაყაყი (იტყვიან შეუხედავ ქალზე).

**გომური** — შინაური პირუტყვის ბინა.

**გონი** — გონება, ჭკუა.

**გროში** — ფულის უმცირესი ერთეული, კაპიკი.

**გუდა** — პატარა პირუტყვის (ხბო, თიკანი) ტყავისგან დამზადებული პარკი, სასაგზლე.

**გუდურა** — შეშის კონა.

**გულარსეინად** — გულდამშვიდებულად, უდარდელად, აუღელეებლად.

**გულთმისანი** — გულთამხილავი, მოსალოდნელი ამბის წინასწარ ამომცნობი, მკითხავი.

**დარასტული** — საბრძოლოდ შეკაზმული ცხენი.

**დასწამა** — დააბრალა.

**დამშობილება** — ძმად გაფიცვა.

**დახლიდარი** — დახლთან მომუშავე, გამყიდველი.

**ღვეი** — გიგანტური გარეგნობის მქონე შემზარავი ბოროტი არსება, ადამიანთა მოდგმის მტერი.

**დეკეული** — უშობელი ძროხა.

**დერციკი** — ტანსაცმლის მკერავი, თერძი.

**დილეგი** — ორმო შეპყრობილთათვის.

**დოლაბი** — დიდი წისქვილის ქვა.

**დოქი** — სურა, ჭურჭელი სითხისათვის.

**დღესა და ღამეს ასწორებდა** — ღამეც მუშაობდა.

**დღიური** — მიწის ნაკვეთი, რასაც გუთნეული ერთ დღეს მოხნავდა.

**ელამი** — მრუდთვალეზიანი.

**ელია** — ცის გამგებელი, ღრუბელთა ღვთაება, რომლის ნება-სურვილის მიხედვითაც ატყდება ჭექა-ქუხილი და მოდის სეტყვა.

**ერდო** — ბანი, სახლის მიწური ჭერი.

**ერკემალი** — ყოჩი, მამალი ცხვარი.

**ერქვანი** — გუთნის ნაწილი.

**ესაგებდებოდა** — გააჩნდა, ჰქონდა შავი ბედიტ ნაშოვნის გაჭირვებით შენაძენი.

**ესეი** — დიდი საბრძოლო კბილი ტახისა.

**ესმაკი** — ავი სული, მაცდური.

**ეჯიბი** — სასიძოს თანმხლები.

**ვეზირი** — მეფის კარისკაცი, მრჩეველი.

**ვერძი** — მამალი ცხვარი, ყოჩი.

**ზარდახშა** — ფულისა და ძვირფასეულობის შესანახი ყუთი.

**ზაქი** — კამერის შვილი.



**ზედაშე** — ხატისთვის შესაწირი ღვინო.

**თავანკარი** — საუკეთესო, წმინდა.

**თავლა** — ცხენების სადგომი.

**თეპა** — ქერი, ნაბდის სამოსელი.

**თვალშეუდგამი** — თვალაწუედენელი, მაღალი.

**თილისმა** — შელოცვილი, მომაჯადოებელი ნიეთი.

**თოფი** — ქსოვილის გორგალი.

**თუნგი** — სპილენძის ჭურჭელი, დოქი.

**თქერაჲდა** — ქელაჲდა, ანადგურებდა.

**იაბო** — მამალი ცხენი, დაკოდელი.

**იადონი** — მგალობელი ჩიტი.

**იერუსალიმი** — ქალაქი, რომელშიც სალოცაჲდ მიდიოდნენ ქრისტიანები.

**იფქლი** — მარცვლეულის ჯიში.

**იღბალი** — ბედი.

**იხრანებს** — იემმაკებს, ოინს იზამს.

**იხტიბარი არ გაიტეხა** — იმედი არ დაკარგა, გული არ გაიტეხა.

**კავი** — მხენელის იარაღი, ძველებური გუთანა.

**კალატოზი** — კედლის მშენებელი, ხურო.

**კალო** — ადგილი, რომელზეც წარმოებს მარცვლეულის ღეწვა (ჩალიდან გამორჩევა).

**კაბა** — შუაცეცხლის გარშემო მუგუზლის დასადები შემალღება, ჰქონდათ ძველ სახლებში.

**კვერი** — ჩაქერი.

**კიდობანი** — დიდი ყუთი.

**კილო** — ისრის ჭრილი.

**კინჭუსი** — კლდის წვერი.

**კოკა** — წყლის ჭურჭელი თიხისა; ღვინის საწყაო (უღრიდა დაასლოებით 40 ლიტრს).

**კომბალი** — თავმსხვილი ჯოხი.

**კოპიტი** — იფანი; ხის ჯიშია.

**კუდიანი დედაბერი** — აესული, მანე დედაბერი ბოროტ არსებათა (ღვეის, ვეშაპის და სხვ.) ქომაგი.

**კოფო** — ურმის ნაწილი, რომელზეც მეურმე ჯდება.

**კუპრი** — შავი წებოვანი სითხე, იღებენ ნიადაგიდან, იყენებდნენ ტიკების მოსაგოზად.

**კუტი ბური** — ცუდად გამომცხვარი ბური.

**ლაგამი** — ცხენის სადავე, აღვირი.

**ლაზათიანი** — შესაფერი, მორგებული.

**ლაქია** — მსახური.

ლასტი — დევ-გმირების საომარი იარაღი.  
 ლერწამი — მცენარე, რომლისგანაც სალამურს ამზადებენ.  
 ლეში — უძველო სორცი, ხორცი.  
 ლენაქი — ქალის თავსაბურავი.  
 ლიხი — მაღალი, გაუვალი ბალახი, შამბი.  
 ლუტი — უგემური.

მათარა — წყლის ჭურჭელი თან სატარებელი.  
 მამასახლისი — ხელისუფლების მიერ სოფლის გამგებელად დანიშნული პირი ძველ დროს.

მანდილი — გათხოვილი ქალის თავსაბურავი.  
 მარანი — ღვინის შესანახი სათავსო.  
 მარდი — სწრაფი, ჩქარი.

მარხილი — დიდი ციგა პირუტყვთა შესაბმელი.  
 მწვეარი — მომწვევი, მომპატიყებელი პირი.  
 მაჭანკალი — საცოლის გამრიგებელი, მაშვალი, შუამავალი.  
 მახათი — დიდი ნემსი.  
 მდადი — პატარძლის თანმხლები ქალი, დობილი.  
 მემკვიდრე — შვილი, ჩამომავალი.  
 მენახირე — საქონლის მწყემსი.  
 მენურილმანე — წვრილმანეულით მოვაჭრე, ჩარჩი.  
 მეჯინიბე — ცხენების მომვლელი.  
 მხეთუნახავი — არაჩვეულებრივად ლამაზი ქალი.  
 მიაყურადა — მიპარვით მოუსმინა.  
 მიკიტანი — ღვინო-არაყით მოვაჭრე.  
 მიჰმიყელა აუტეხა — ააწიოკა, ამოწყვიტა.  
 მისაუათება — დასუსტება, ძალის გამოლევა, დაღლა.  
 მკათათვე — ივლისი.  
 მნათე — ეკლესიის მსახური, კანდელაკი.  
 მოდგმა — ჩამომავლობა.  
 მოზეერი — სახარე საქონელი, ბულა.  
 მოლა — მუსულმანური სარწმუნოების მქადაგებელი, მაჰმადიანთა მღვდელი.

მოლოგინება — მშობიარობა, დედის მიერ ბავშვის დაბადება.  
 მოსართავები — ქაშრები უნაგირის ცხენზე დასამაგრებლად.  
 მოურავი — სხვისი მეურნეობის ზედამხედველი, მნე.  
 მოში — ორივე მკლავის მოდება. მკლავებს შორის მოქცეული ოდენობა (მაგ., ორი მოში თივა, ერთი მოში შეშა და სხვ.).  
 მოციქული — შუამავალი, ელჩი.  
 მოძურწა — გაიბარა, გაიქცა.  
 მოძუძგა — გაიქცა, მოკურცხლა.  
 მოჯამაგირე — კერძო პირის მიერ გარკვეული დროით დაქირავებული მუშა.

მრეველი — ხალხი, რომელსაც მღვდელი ემსახურება.

მუგუზალი — ცეცხლმოკიდებული შუშის ნაჭერი.  
მუშტაქვა — პატარა, მუშტისოდენა მრგვალი ქვა.  
მუსანათი — ბოროტი მტერი.

მყუფარი — ძაღლი, ქოფაკი.

მძორი — საჭმელად უვარგისი ხორცი, „მკედრის გვამი“ (საბა).

მწევარი — ძაღლი, რომელიც ნადირს ეწევა.

მწყერჩიტა — გარეული ფრინველი.

ნაბოლარა — ბოლოს დაბადებული, და-ძმებზე უმცროსი.

ნაბუარი — მტერი, კორიანტელი.

ნაზირ-ვეზირები — მეფის კარისკაცები, მჩვეულები.

ნალბანდი — ნალის ხელოსანი, მჭედელი.

ნატყხარი — პირმოტყხილი ჭურჭელი, ჭურჭლის ნატყხი.

ნატყრისთვალი — მცირე ნივთი, რომელიც პატრონს ყველა სურ-  
ვილს აუსრულებს.

ნატყრისსურა — ჯადოსნური სურა, რომელიც მისი მფლობელის  
ნატყრის მიხედვით გაიწყობა.

ნაფოტი — ხის ანათალი.

ნაყშები — ნაკეცები.

ნაშენი — პირუტყვის ნაშატი.

ნახირი — საქონლის სიმრავლე, ფარა, ჯოგი.

ნეკაზე იკბინა — ინანა.

ორმოცი — გარდაცვალებულთან დაკავშირებული რიტუალი ორმო-  
ციოდე დღის შემდეგ.

ოქროსქორჩიანი — ოქროსთმიანი.

ორანი — უხედნელი, ურჩი, სახედარი (ვირი, ცხენი).

ბირმურა — მოშავოდრუნჩიანი (იტყვიან ძაღლზე, მგელზე, დათ-  
ვზე და სხვ.).

პიტალო — მაგარი, სალი, ძნელად გასატყხი.

რაში — მფრინავი გრძნული ცხენი.

რემა — ცხენების ფარა, ჯოგი.

რკინის ქალამნები — რკინის ფეხსაცმელი, იცმევდნენ ცხრა მთას  
იქით გასამგზავრებლად.

რკო — მუხის ნაყოფი.

რუმბი (რუმი) — მსხვილფეხა საქონლის (ხარი, კამეჩი) ტყავის-  
გან დამზადებული საღვინე ჭურჭელი, დიდი ტიკი.

საბერველი — მჭედლების ხელსაწყო. რითაც ცეცხლს უბერავენ.

საბძელი — ბზის (ჩალის, თივის) შესანახი სათავსო.

საგზალი — მგზავრობისას საჭმელი.

სადგისი — ტყავის მკერავთა იარაღი, სახერეტელი.

საიქით — მიცვალებულთა სულების საწყოფელი.

საკვამური — სარკმელი, კვამლის გასასვლელი ხვრელი.

საიბრე — კირის გამოსაწვავი ქურა.

სალაფავი — ღორის, ძაღლის და მისთ. საჭამადი.

სალასანა — უსაქმური, ბედოვლათი.

სალთა — უბარგო ადამიანი, მგზავრი სატარებლის გარეშე.

სალესავი — ერთგვარი ქვა, რომლითაც ლითონის იარაღს ლესავენ.

სამზო — ქვეყანა, მზისქვეშეთი.

სამისდღეშიო — სამუდამო, სიკვდილამდე საკმაო.

სამოთხე — წმინდანთა სულების სამყოფელი ფუფუნების წალკოტი.

საპალნე — აქლემის (ცხენის) ტვირთი.

სარქველი — ქვევრის სახურავი ქვა.

სასუსნავი — საჭმელი.

სალსალამათი — ჯანმრთელი, უვნებელი.

საცალო — დიდი ტომარა.

საყდარი — სალოცავი, ეკლესია.

საყეყარი — ჭაპანი, უღელზე ტვირთის მისაბმელი ტყავის თოკი, ჯამბარა.

სახნისი — გუთნის ნაწილი.

სახმილი — თონის გასასურებელი ხმელი ფიჩხი.

სასრე — ჯოხი პირუტყვთათვის.

სუირი — გასართობი სანახაობა.

სენი — ავადმყოფობა, სახადი.

სეინჩა — პატარა ჩიტი.

სეივრი — საოჯახო ყუთი, ზანდუკი.

სოვდაგარი — დიდვაჭარი.

სორო — მხეცთა ბუნავი მიწაში, საძრომი.

სუდარა — მკედრის სამოსელი.

სულთამსუთავი — სულის ამომხდელი, მკვლელი.

სულთმობრძავი — მომაკვდავი, მძიმე ავადმყოფი.

სურვილი — სიყვარული, ნდომა.

ტავრუცი — ორნამენტიანი მცირე ზანდუკი, ყუთი.

ტარტაროზი — მახინჯი არსება, ავი სული, მოჩვენება.

ტახი — მამალი ღორი, დაუკოდავი.

ტკაპა — ძუძუმწოვარა არსებათა მკბენარი, სისხლიხმწოველი პარაზიტი.

ტრაპეზი — სურთა, ტაბლა.

ტრიალი მინდორი — ვრცელი მინდორი.

უგერგილო — უშნო, უქნარა, მოუხერხებელი ადამიანი.

ულუფა — კერძი, კუთვნილი საზრდო.

უნავირი — ცხენის აკაზმულობა, მხედრის საჯდომი.

უკაპუნებდა — ურტყამდა, ჯოხით სცემდა.

ურდული — კეტი, კარების დასაკეტად.

უტყუპა — წყვილად მიარტყა.

ულელი — ხის მოწყობილობა, რომელსაც გამწვევ საქონელს (ხარებს, კამერებს) კისერზე დაადგამენ და ტვირთს გამოაბამენ.

ულრანი — გაუვალი, დაბურული ტყე.

უნინმარინის ქუდი — ქუდი, რომლის დახურვის შემდეგაც ადამიანი გაუნინარდება.

უსიაგი — ბრიყვი, მოუქნელი, სეპრე.

ფალავანი — მძლე, შეჭიდებაში გამარჯვებული.

ფარა — მრავალი ცხვარი ერთად, ცხვრის ჯოგი, პირუტყვთა სიმრავლე.

ფარი-ფარ — გაჭოლვით, ერთი მხრიდან მეორემდე („დევი ფარი ფარ გაახვრეტინა“).

ფარჩა — ქსოვილი.

ფაში — პირუტყვთა კუჭი.

ფეტი — მარცვლეულის ჯიში.

ფეშტამალი — ხელოსნის წინსაფარი, ფესტამალი.

ფეხები გაჭიმა — მოკვდა, გარდაიცვალა.

ფილი — ჭურჭელი მარილის, ნივრის და მისთანათა სანაყი (ჯამ-ფილა).

ფოფოღია — მღვდლის ცოლი.

ფური — მეწველი ძროხა (დედა ირემზეც ითქმის).

ქამანდი — ყულფიანი თოკი პირუტყვის დასაჭერად.

ქარქაში — ცივი იარაღის (ხმლის, ხანჯლის და სხვ.) ბუდე, კაპარჭი.

ქაფჩა — კედლის მშენებლის, კირით ხუროს იარაღი.

ქაჩალი — უთმო, მტიერი.

ქაჯი — მაცდური, ბოროტი არსება, ეშმაკეული.

ქერი — მარცვლეულის ჯიში.

ქერი — ფარის წინამძღოლი მამალი თხა.

ქაწვია — ძუნწი, მომჭირნე, გაუმეტებელი.

ქვეერი — ჭური, თიხის დიდი ჭურჭელი ღვინისათვის.

ქვისლები — დების მეულლეები, სიძეები.

ქისა — თანსატარებელი მცირე პარკი, საფულე.

ქიშიში — ხმელი ყურძენი.

ქოთანი — ქილა, პირგანიერი ჭურჭელი თახისა, სადულარი.

ქოსა — უწვერულვამო მამაკაცი.

ქოფაკი — ძალღი, ნაგაზი.

ქულაჯა — მამაკაცის ტანსაცმელი, ერთგვარი სარჩულიანი ჩოხა.

ლადარი — ნაღვერდალი, ცეცხლი.

ლალა — ცხიმი, მაწიერი (ღალანი რძე).  
ღვთისგარეგანი — უღმერთო, ბოროტი, ავი.  
ლიჭი — ეკლიანი მცენარე.  
ღმურძღაედა — ჭამდა, თქვლევდა.

ყაბალასი — მამაკაცის თავსაბურავი.  
ყავლი — დათქმული დრო, ვადა.  
ყალაღანობა — მუქთახორობა, უსაქმურობა, ავარობა.  
ყალიონი — ჩიბუხი.  
ყაფაზა — დუქნის თარო, გასასყიდთა დასადებელი, თახჩა.  
ყალი — საქონლის ხმელი ხორცი, შაშხი, ლორი.  
ყევაბი — ორი უღელი (ოთხი) ხარი, ან კამეჩი.  
ყველიერი — რელიგიური საწესრეულებო დღეები მარტში.  
ყონი — მამალი ცხვარი.

შუქურუბარსკვლავი — განთიადის ვარსკვლავი, ცისკარი.

ჩალური — ჩალით ნაშენი ან დახურული ქოხი.  
ჩანახი — საწყაო ჭურჭელი.  
ჩარეკა — თიხის ჭურჭელი ერთი ლიტრის ტევადობის.  
ჩარჩი — კარდაკარ ჩამოვლით მოვაჭრე, საწვრილმანოს გამყიდ-  
ველი.  
ჩასიძება — ცოლის ოჯახში ჩასახლება.  
ჩაფარი — მეფის მოხელე, პოლიციელი.  
ჩაფი — ლენის საწყაო, უდრის ცხრა ხელადას (18 ლიტრს).  
ჩიორა — ჩიტის ჯიში.  
ჩინქი — მცირე ნაწილი, ხორცის პატარა ნაჭერი, ჩინია.

ცეროდენა — ცერისოდენა, თითისხელა, პატარა არსება.  
ცისმარე დლე — მთელი დლე, ყოველდლე, ცის მიერი დლე.  
ციცა — კატა.  
ცხრაკლიტული — ცხრა საკეტით დაკეტილი, ძნელი გასახსნელი.

ძაღლთაპირა — ავის მთქმელი, ბოროტი, მეჭორე.  
ძაძები — შავი სამოსელი, მგლოვიარეთათვის, ღაზლი.  
ძელზე გასმა — წამება, ჯვარზე გაკვრა.  
ძე-ხორციელი — ადამიანი, ცოცხალი არსება.  
ძილქუში — ხანგრძლივი ძილი.  
ძუა — ცხენის კუდის ბეწვი.

წალღუნა — ხის საჭრელი პატარა წალდი.  
წელზე ფეხს იდგამდა — გაჭირვებით ცხოვრობდა, მძიმე შრომას  
ეწეოდა.  
წვრილშვილი — ბუერი მცირეწლოვანი შვილის მშობელი.  
წივა — საქონლის გამხმარი ნაეკლი, ხმარობენ შეშის მაგიერ, ნეხ-  
ვი, ფუნა.

წუთისოფელი — სიცოცხლის ხანგრძლიობა.

წუნკალი — ავი, უსინდისო (მაწანწალა ძალს ჰქვია, კაცზეც იტყვიან).

წულა — ერთგვარი ყელიანი ფესსაცმელი.

წუწკი — მსუნაგი, ძუნწი.

ჭაკი — დედალი ცხენი, ფაშატი.

ჭალა — სავარგული მდინარის პირას, სანახები მდინარის გასწვრივ.

ჭამპურა — მოჯამაგირე, რომელსაც საჭმლის გარდა სხვა გასამრჯელო არ ეძლევა.

ჭაშნიკი — სინჯი, ნიმუში.

ჭედილა — მამალი ცხვარი, დაკოდელი ყორი.

ჭიატი — მცირე სინათლე, მკრთალი შუქი.

ჭირნახული — წლის მოსავალი.

ჭკვაში დაუჯდა — მოეწონა, ესიამოვნა.

ხაზინა — სახელმწიფოს განძის საცავი.

ხალხა — გრძელი ჯოხი, ლატანი.

ხარო — ორმო, დილეგი.

ხაშლამა — ნაჭრებად მოხარშული ხორცი.

ხელადა — თიხის ჭურჭელი ორი ლიტრის ტევადობის.

ხელეჩო — ხელოსნის იარაღი ხის დასამუშავებლად.

ხელეკეტი — პატარა კეტი, ცალი ხელით სახმარი.

ხელმწიფე — ქვეყნის მბრძანებელი ძველად, მეფე.

ხედა — ხის ჩაქური.

ხვიმირა — წისქვილის ნაწილი, რომელშიც საფქვეს ყრიან.

ხომალდი — გემი.

ჯაგარი — ღორის ბეწვი, უხეში ბალანი.

ჯადოსნური სარკე — სარკე, რომელშიც მთელი სამყარო მოჩანს.

ჯადოქარი — გრძნეული, მხიბლავი, ავსული.

ჯამბარა — გუთნეულის ნაწილი, ჭაპანი.

ჯანჯალი — შეუთანხმებელი, ჯიუტი კაცი.

ჯარა — საფეიქრო იარაღი ძაღვის დასამუშავებლად.

ჯაჭვის პერანგი — ფოლადით ნაქსოვი პერანგი თავდასაცავად.

ჯგლეთა — ხალხის სივიწროვეში მოძრაობა.

ჯერი — რიგი.

ჯვარისწერა — ქორწილი, შეუღლება.

ჯილაგო — მოდგმა, ჯიში.

ჯოგი — სიმრავლე პირუტყვთა (ცხენის, ირმის და სხვ.), ფარა.

ჯოჯოხეთი — ცოდვილთა სულების სამყოფელი.

ძარამხანა — მუსულმან მბრძანებელთა ცოლების სამყოფელი.

## ს ა რ ჩ ე ვ ი

### ცხოველთა სამყარო

დათვი, მელა და მგელი	5
კატა და ვეფხვი	6
გერიტი	8
თხა და ვენახი	11
მეგობრობა	13
ჩიტი და მელია	16
ზარმაცი კაცი	19
მელია და მწყერჩიტა	23
მსაჯული მელა	25
ლომი და კურდღელი	28
ნახევარჩინილა	31
ბაქია კურდღელი	35
დათვი, მგელი და მელა	39
ხელმწიფე და სკეინჩა	43
ნუ დაჰკარგავ ძველსა გზასა	47
დედა ღორი და მგელი	52
რწყილი და ჭიანჭველა	57
ძაღვების ენა	62
დათვი და მელია	67
სამტევანა ჭაბუკი	71
მელიას თინები	77
დათვი და მელა	83
ერთგული ხატები	89
ხელმწიფის შვილი და მისი მეზობლები	98
წიქარა	108

### საყოფაცხოვრებო ფლანკები

ამხანაგი ნუ გძულს, საშოვარი ნუ გმურს	119
დიაკვანი და ყვავი	121
ღვინის გაჩენა	123



ხარბი მღვდელი	125
ლამაზების ქვეყანა	128
ყმის სურვილი	130
ზლაპარი — გამოცანა	133
ქვიანი ხელმწიფე და ღარიბი კაცი	136
ძმობა	138
ხარბი ოქრომჭედელი	140
ბურის მარცვალი	142
ერთი დრო არვის შერჩება	145
შერცხვენილი მონადირე	148
სამი ტყუილი	152
მღვდელი და გლეხი	155
ქვის სეტყვა	158
ოქრომჭედლის ცოლი	161
ჭკუა და დოვლათი	165
მუჭანასევაარი მარილი	168
ზარმაცი შვილი	171
ეშმაკის ლაგამი	174
ოქროსტარიანი ცული	177
ბბოლი და ქოსატყუილა	180
ფედაკაცი და ეშმაკი	183
სიმართლე	187
სოფდაგარი და მისი ცოლი	191
სამი გამოცანა	195
გლეხი, მილა და ეშმაკი	199
ცეროდენა	203
ორი მეგობარი	208
მეცხუარე	212
მდინდარი და ღარიბი	216
არჩეუანი	220
ბერის მაძებარი, ცოტასაც დაკარგავს	224
სამი ძმა და ქოსატყუილა	228
ნაცარქექია	233
ალალი ორი შაური	238
ჭკუა მატყის და ფული	243
ჭირვეული ხელმწიფე	248
ორი ქოსატყუილა	253
სტუმართმოყვარე ცოლი	258
სოლომონ ბრძენი და პატარა ბიჭი	265
მატყუარა ბატონი	270
ჭკუამხიარული ცოლები	275
ხარბი და ალალ-მართალი	280
უქნარა	285

ორი ქურდი	290
მამასახლისი და გლეხის ბიჭი	295
ქალის კაბა	301
შრომა და იღბალი	306
მორჯულებული ცოლი	312
ხასუტა	318
მეფობას ხელობა ჯობია	325
ხელმწიფე და გლეხის ქალი	332
კომბლე	339
სიმდიდრე ჯობია თუ სიღარიბე	346
ვაჭარი და გურული	353
ჭკვიანი ნავეზირალი	362
ამხანაგს ნუ უღალატებ	371
სამი სიბრძნე	381

### ჯადოსნური ზღაპრები

შემსენებელი	395
ბა. ფაშო საკვირველია	398
ბედისწერის ძალა	401
შენა-ქალა	405
სიკვდილი და ყაჩაღი	409
სამი და	414
ბედის მამებარი	421
კაცის ძალა	425
ბედისწერა	429
უკვდავი კაცი	433
კოკროტინა	437
ხელმწიფის დედა	442
ჯვართქმული სიმართლე	448
სუთქანჭულა	453
ქალი	460
სინჯარა	
მონადირის შვილი	
მინდვრის ქალი	
ცურმოჭრილი ფურბარემი	
საზღაური	
გონკია	515
ასფურცელა	519
შავჩიტა რაში	525
ცხრა ძმა და ერთი და	531
ადინანჯალა	535